


Quiarinio pueyaso rupaa pa jiyaniijia

Jesucristojiniji pueyano rupaajinia



New Testament in Arabela (PE:arl:Arabela)

Quiarinio pueyaso rupaa pa jiyaniijia Jesucristojiniji pueyano rupaajinia New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 29 Jan 2022
90034700-94c6-5f48-ae9c-2383843fed68

Contents

MATEO	1
MARCO	59
LUCAS	95
JUAN	154
MIISHANO	198
ROMA	255
1 CORINTO	281
2 CORINTO	309
GÁLATA	326
ÉFESO	337
FILIPO	346
COLOSA	353
1 TESALÓNICA	358
1 TESALÓNICA	363
1 TIMOTEO	366
2 TIMOTEO	373
TITO	378
FILEMÓN	381
HEBREO	383
SANTIAGO	404
1 PEDRO	411
2 PEDRO	419
1 JUAN	424
2 JUAN	430
3 JUAN	431
JUDAS	432
NIQUISHANO	434

MATEO NAAJIOTASANO JESUCRISTOJINIJI

*Jesucristo supuetanaajiniji pahuatasano
(Lc 3.23-38)*

¹ Jesucristoori supuetana Abraham jihuacuajinio supueno quiquiaari, supuetana David niqiuoacuajinionio. Nioori Jesucristo supuetanaa sesaca. Naa quiquiaaritiij:

² Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaca quejuhuaj. ³ Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niqiuocua. Faresri Esrom que quiquiaari. Esromri Aram que quiquiaari. ⁴ Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. ⁵ Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isai que quiquiaari. ⁶ Isaiiri David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Urías niqiuocua.

⁷ Salomónri Roboam que quiquiaari. Roboamri Abías que quiquiaari. Abíasri Asa que quiquiaari. ⁸ Asaari Josafat que quiquiaari. Josafatri Joram que quiquiaari. Joramri Uzías que quiquiaari. ⁹ Uzíasri Jotam que quiquiaari. Jotamri Acaz que quiquiaari. Acazri Ezequías que quiquiaari. ¹⁰ Ezequíasri Manasés que quiquiaari. Manasésri Amón que quiquiaari. Amónri Josías que quiquiaari. ¹¹ Josíasri Jeconías que quiquiaari, tapueyocuaca quejuhuaj. Jiyacaritiij, Israel pueyapueeri quioosaaquiaari Babilonia jiyajiniara. ¹² Babilonia jiyajinia, Jeconíasri tii mueratequiaari Salatiel. Salatielri Zorobabel que quiquiaari. ¹³ Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. ¹⁴ Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. ¹⁵ Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. ¹⁶ Jacoboori José que quiquiaari. Joseeri María niyaca quiquiaari. Cuno Maríari Jesu nucua quiquiaari. Jesu sesa tarajanuri quiquiaari Cristo. Nioori pueyano rupaaajinia sequeya “Pueyaso jiyarosano Jiyaniijiarano”.

¹⁷ Naacuajitij, Abrahamjiniji, catorce supuetanaari quiquiaari Davidta. David nuhuaji, socua catorce supuetanaari quiquiaari. Jiyacaritiij, Israel pueyapueeri quioosaaquiaari Babilonia jiyajiniara. Babilonia jiyajiniara nojori quioosaanu nuhuaji, socua catorce supuetanaari quiquiaari Cristo jaara rasaanquiaari.

*Jesucristo rasacari pahuatasano
(Lc 2.1-7)*

¹⁸ Naa quiquiaariti Jesucristo rasacari: na nucuarano Maríari tari Joseeta camiriquiano quiquiaari. José numuetuqueyaquishacarijia María, Maríari tariucua manajaraca quiriquiaa. Pueyaso Sohuanucuaajaari na manajetequiaari. ¹⁹ Neyacarano José jaara niishiquiaari necorano tariucua manajaraca quiya, nojuajaari jiyanohua niishiriojoriquiaa na cartenura jiyasohuaja. Nojuajaari jiyaniquiaari tamonu jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niqiuara. ²⁰ Naa José niishiriojosacari na cartenura juucuatej, Pueyaso seruuri nocua muetaquiaari na maquenujia. José sequereeri:

—Supuetana jiyaniijia David niqiuoacuajinio supueno Joseenaa, María quia camiri naajaa. Maja quia puerenu. Pueyaso Sohuanucuaajaari na manajorucuaa. ²¹ Maríari neyanu ranutaniya. Quiocua na sesojore “Jesu”. Sesa na pueya miijiosano tuujunutaniya nojori jiuujiajinijiiri. Naaratej, na sesaari quiniutianiya “Jesu”.

²² Jesu rasaanuuri naa quiquiaaritiij, tariucuaaanu pueyara Pueyaso sequesano caminiujunia pahuatasano tohuateenura. Pueyasoori naa na pahuataniquiaari jiyanohua tarijiatej:

²³ “Nia tojiri. Niyacoori manajenutaniya. Neyanu ranutaniyari. Na sesojonutaniyari ‘Emanuel’”.

Nioori pueyano rupaaajinia sequeya “Pueyaso pata quiyani”.

²⁴ José niucuasacari, nojuajaari naa miiquiaaritiij taa Pueyaso seru sequequiaari nojuacuajani. María riquiaariiri na tijajiniara necocuara. ²⁵ Nojoriiri maja na quiniu quiquiaari juhua seetanujuanaa camitioono, María jaara raquiaari neyanujuaatijia. Jaara na raquiaari, na sesojoreeri “Jesu”.

2

Niishijiaca tiuquijiosacari conaajaacua

¹ Jesuuri rasaanuqaari Belén tiacajinia, Judea jiyajinia. Cuno quishacari, Herodesri jiyaniijia quiquiaari Judea jiyajinia. Jesu rasaanu nuhuaji, niishijiacaari tiuquijioquiaari Jerusalén tiacajinia. Nojoriiri Jesu niquniuria tiuquijioquiaari jiya pajamaji. ² Nojori tiuquijiosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaanuqaani? Canaari niishiyani nojuajaari tari rasaanuqaani. Canaari na rijia niquniuria jiya pajamajini, canaa jiyajinia canaa quishacari. Canaari nocua niyareeni canaa shuquiritianura nojuaja, jiyaniijiarano na quiniucua.

³ Jiyaniijia Herodes tojishacari naa niishijiaca sequesantej, jiyanojua tacaquiaari. Puetunu Jerusalén tiacajinia quiniaajanaari tacaquiaarijuhuaj. ⁴ Nocuaji, Herodesri Judiocuaca seconaa sequequiaari nocua nojori nijionura, Moisés Rootasanonijini niishitiojanaano. Nojori tiuquijiosacari nocua, Herodesri naa nequesoreetaquiaari nojori:

—¿Tee Cristo rasaanutaniyani, Judiocuaca jiyaniijiarantej?

⁵ Nojoriiri na riucuaquiaari:

—Belén tiacajinia rasaanutaniyani, niya Judea jiyajiniani. Naa naajiotasano quiyacua-jaari Pueyaso sequesano caminiujunio sequesano. Cuno tariucuaaanu naajiotasano-jaari naa sequeyatej:

⁶ “Belén tiacajinia quiniaanaa, nia tiacaari maja najuhuaa shiitianiyojua tiaca Judea jiyajinia. Cuno nia tiacajiniani, jiyaniijiajanaa cutaraari supenutaniya. Nojuajaari socua cutara jiyaniijiajanaa quiniutaniya tamasa jiyaniijiacajiniji Judea jiyajini-jinio. Cunoori maninia jitianutaniya cua pueya, Israel pueya”.

⁷ Naa pueya sequesano na tojinu nuhuajitij, Herodesri cuno jiya pajamaji nijiono niishijiaca nequesoreetaquiaari jiyasohuaja:

—¿Taaari rijia niquishaacanu seetanujuaanaani?

⁸ Nojori riucuanu nuhuaji, Herodesri na sapojonuta nojori sequequiaari:

—Nia quiaare Belén tiacajinia. Niocua jacaria nequesoreetasee cuno mueyajiniji. Nia jaara na riuriatara, niocua cua numootecuhua. Janyacua nocua quiaarejanihuaj cua shuquiritianura nojuaja.

⁹ Niishijiaca tojinu nuhuaji naa jiyaniijia Herodes sequesantej, nojoriiri quiojia-reecuhua. Jiya pajamaji na niqutiushano rijia niqutiuriiri nojori puetaano. Rijiaari pootia tiushii tia caco, tee mueya quiriqiaacuaajani. ¹⁰ Nojori niquishacari rijia, niishijiacaari jiyanojua timitiuquiaari. ¹¹ Tiaco tiuquitiaseeri. Conaaja niqutiushii na nucua Mariataari. Conaajaacuaara mojuetacoquiaari. Na shuquiritatureeri. Na nuhuaji, niishijiacaari na patootasano casaa riataquequiaari, nareya na niqutiosocoriquiano conaaja. Nojoriiri na niqutiouquiaari oro, shanohua jaanuta catijiasocoriquianojuhuaj, tamaatiucua shanohua jaanutajanio. Na sesaari tahue rupaaajinia “mirra”. ¹² Na nuhuaji, Pueyasoori cuno niishijiaca sequequiaari na maquenujinia, maja Herodescua nojori tacatenuhuara Herodes nojori pohuatanuhua conaajajiniji. Naacuaajitij, niishijiacaari tamonu nucuaacua tacatequiaarihuua na jiyajiniohuara.

Egipto jiyajiniara Jesu mashitiasaanujiniji pohuatasano

¹³ Niishijiaca jaara quiaquiaarihuua, Pueyaso seruuri Joseecua muetaquiaari na maquenujinia. José sequereeri:

—¡Quia sanere! ¡Conaaja quia mashitiare na nucua Egipto jiyajiniara! Quiniqui nia quishii, janiya cuara sequerohua quiajaniyajaatijia. Herodesri Belén tiacajinia na pueya pajetenutaniya conaaja, na motesocoriquiano.

¹⁴ Joseeri sanecuaari. Cuno niucua, conaaja mashitiaree na nucuaajaari Egipto jiyajiniara. ¹⁵ Nojori tiuquishacari Egipto jiyajinia, ti quishiiquiaariiri, Herodes cuara cusoorajaatijia. Nojoriiri naa Egipto jiyajinia quiquiaariti, tariucuaaanu Pueyaso sequesano tohuateenura maninia, Herodes cusonu nuhuaji. Pueyasoori naa pohuatequiaari na sequenu panishano caminiujuaacua:

“Cua niyanu piiriinjia, Egipto jiyajiniji na tacatenuhuara”.

Herodes puecootesacari muerasu

¹⁶ Jiyaniijia Herodes jaara niishiquiaari cuno niishijiacaari na ruuretaquiaari saaja, Herodesri jiyanojua juaquiaari. Na pueya jiyaroquiaari puetonu naatujoori canuniyojuaanaa nojori puecoonura Belén tiacajinia, na shocuaqueya tiacajinia quiniaa muerasunio. Naa miiquiaariiri Jesu na monura juucua. Herodesri na pueya sequequiaari

cuaara puecoosaaria puetunu shusha roosanojuanaa, mariyata canapueete caapiqui marjija shocoteo quiquiaarijiani. Herodesri naa sequequiaari niishijica pohuatanuucua nojuaja, Jesu rijiaari tarijia niquishaaquiaari. Juhuanajuajaari maja caapiqui marijia shocojonu quiquiaari rijia niquishaanujiniji. ¹⁷ Naacujitij, tariucuacaanu Pueyaso sequesano caminiujunia Jeremías sequesanoori tohuateequiaari. Jeremías sequesanoori naa naajiotasaquiaaritij:

¹⁸ “Sapuenuari tojishiya Ramá tiacajinia. Jiyanhua taraatia. Raquelri necohuacua sariyacojiya. Majaari na paniniu na cumanjiasaanura. Necohuari tari puecoosaaru-cuaa”.

¹⁹ Na nuhuaji, Herodes jaara cusoquiaari, Pueyaso seruuri Josecua muetaquiaariuhua na maquenujina, Egipto jiyajinia nojori quishacarija. ²⁰ Na sequereeri:

—Quia sanere. Mueya quia tacaretaarohua Israel jiyajiniohua na nucuataja. Mueya monu panijiaacari tari cusonuurucuaa.

²¹ Joseeri sanequiaari. Mueya tacaretaquiaariuhua Israel jiyajiniohuara na nucuatajaari. ²² Israel jiyajinia na tiuquishacari, Joseeri numootesaaquiaari Herodes niyanu Arquelori jiyaniijia quiriquiaa jiyacari, na que niti Judea jiyajinia. Nocuai, Joseeri puerequiaari quiniqui na quiniuria. Jiyacarijuhuj, Pueyasoori na niishitioquiaari na maquenujina, tamocora na quianura. Naaratej, Joseeri mueya nucua pacuquiaari Galilea jiyajinara. ²³ Galilea jiyajinia nojori tiuquijiosacari, Nazaret tiacajinia quishiiri. Naacujitij, tariucuacaanu Pueyaso sequesano caminiujunia sequesanoori tohuateequiaari nojori jaara naa naajiotaquiaaritij:

“Jiyaniquishaanutaniyari Nazaret tiacajininio pueyano”.

3

Tiuquinijona Juan pohuatasacari cariquia jiyajinia

(Mr 1.1-8; Lc 3.1-9, 15-17; Jn 1.19-28)

¹ Na nuhuaji, tamonu pueyanoori cariquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijona Juan. Nojuajaari Pueyaso sequenu panishano poojotaquiaari pueya niquiara. ² Naa pohuataquiaaritij:

—¡Nioojia nia tacatore sesa nia miiniujiniji! Pueyasoori tari nia jiyanoonu paniya, na muerasu nia quiniuria seetanujuanaa.

³ Jiyanhua tarijia, Pueyasoori na pueyano Isaías pohuataniquiaari miriqui na sequenu panishano pueyara. Isaíasri naa na pohuataquiaaritij:

“Pueyano rupaari tojishaaree cariquia jiyajinia. Naa nacajoriquiaari: ‘Nia jeecanamitiri Jiyaniijia nuu, maja mojoquetunu na quiniuria’”.

Tiuquinijona Juanjanaacujiaari nio tariucuacaanu pohuatasano tohuateequiaari, pueya na niishitiojosacari nojori jeenucuanura nojori jiuujia Jesuucuaij.

⁴ Cuno Juan toqueeri camello cajacajiniji shitiasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariquia jiyajinia na riuritasano sequeru, samiyatunio. ⁵ Pueyari Juancua quiojoquiaari na tojtianura. Queraatia pueyari nocua quiojoquiaari Jerusalén tiacajininio, Judea jiyajininiojuhuj, puetunu Jordán moo shocuaqueyajininiojuanaano. ⁶ Pueya jaara pohuataquiaari Juan niquiara sesa nojori miijiosano, Juanri nojori tiuquinioquiaari Jordán moojinia, Pueyaso tojjiaari nojori quiniu panishacari.

⁷ Na tiuquinijosacari pueya, Juanri queraatia Fariseocuaa niquiquiaari nocua nijiyano, Saduceocuanio. (Nojoriiri Moisés Rootasanojiniji niishitiojonaa quiquiaari.) Tiuquinijona Juanri nojori sequequiaari:

—¡Niaaquiiri sesa pueya, juhua sacocua! ¿Cante nia numooteree nia mashiniuria Pueyaso saniitionuucuaij nijaniyani? Nio pa quishacariini, quera Pueyaso saniitiosacari jiyanhua na ruuretajaca pueya. ⁸ Naa jaara seetanujuanaa nioojia tacatore sesa nia miiniujiniji, ¡saaja maninia nia miiri, maja sesa! ⁹ Majaari nia jiyaniniu niaari Pueyaso muerasu, Abraham niquihuacuajinio supueno nia quiniucua. Cua tojiri, Pueyaso jaara paniri, nojuajaari na naata Abraham niquihuara shipininio nio saajinijijuhuj. ¹⁰ Nio miriqui sequesano nia tojirijuhuj pueyanaa. Naana jaara maninia jajau muetuyaquiri, na camaruuri na nuya na catijiasocoriguiano. Naajuhuj, Pueyasoori quera saniitionutaniya nijaniya, na tojijashijica nia quiniucua.

Tiuquinijona Juanri pueya sequequiaari socua:

¹¹ —Janiyari moojinia nia tiuquinijiyani, nioojia nia tacatosacari sesa nia miishanojiniji. Cua nuhuaji, tamonuuri niriqiano cutara. Nojuajaari jiyanhua socua jiyaniijijanaa janiyajiniji. Janiya maara jiyanhua shuquiriaatia quirini, nojuaja jaara cua sequere na seru cua quiniuria quenaaja na sapatu cua jocuanura nera. ¡Nojuajaari jiyaniijijanaa

cutara! Nojuajaari Pueyaso Sohuanu tiuquinijionutaniya nioojiajinia, cumaacaraca nia quiniuria, seetanu Pueyaso muerasujuanaa nia quiniuria. Nia jeequenutaniyaajaariuhua juhua manitia, sesa nia miishanojiniji. ¹² Nia tojitiare miriqui cua sequesano. Trigo jaara rapijiosaare maninia, na camaruuiri na queyaroojua, jiyocuacaanuji na totinijiaso-coriquiano. Naa miiquiaari paratu cuaara paara na cocua, na sucuanio, na jajau na racatanura tiajiniaaco. Naajuhua, cua nuhuaji niniaari tariucua pueca, na tojtianaa na rijionura na quiquojiniara, saniniuuja na tojiyashijiaca na quejoonura manijinia na saniitionura, tee mani maquesaaquiyacuajani.

Jesu tiuquinishacari moojinia

(Mr 1.9-11; Lc 3.21-22)

¹³ Na nuhuaji, Jesuuri tiuquiquiaari Galilea jiyajiniji Tiuquinijiona Juancua, Jordán moojinia. Tiuquinijiona Juan sequeseeeri:

—Cua tiuquinirijia.

¹⁴ Juanri saaja na sequereee:

—Maja Jiyaniijianaa. ¡Quiaa cutaraari maninia pueyano! ¿Casaara cucua quia nimiaa cua tiuquininiuria quiajaniya moojiniani? ¡Cua tiuquiniri juhuari cutara!

¹⁵ Jesuuri saa sequeseejaa:

—Quiarijia quia miiri cua panishano. Cua tiuquiniri naajaa. Maniniaari pa miiniuria puetunu Pueyaso panishanojuanaa.

Naacuaajitij, Juanri na tiuquiniquiaari. ¹⁶ Jesu jaara tiuquinishaaquiaari, nojuajaari ritia tacaquiaari moojiniji. ¡Jiyacaritij, jiya cajiniocuaari riateguee! Jesuuri Pueyaso Sohuanu niquiquiaari nocua roseyano juhua mococoonu niquishano. Nocua tiuushiiri.

¹⁷ Jiyacaritij, jiyocuacaanuji Pueyaso rupaari tojishaaree naa sequeseyano:

—Nioori cua Niyanuniyojua. ¡Na shuquiritiaa jiyanojuanijia!

4

Samaruhua jiyaniijia saniniujishacari Jesu

(Mr 1.12-13; Lc 4.1-13)

¹ Na nuhuaji, Pueyaso Sohuanuuri Jesu jiyataquiaari cariiquia jiyajiniara, Sesaaca saniniujiushocoriquiano cuniqui.

² Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueyaquishacari. Na nuhuaji miaajequiaariiri. ³ Sesaacaari jiyacari nocua niquiaari na saniniujiniuria. Jesu sequeseeeri:

—Quiaa jaara seetanujuanaa Pueyaso Niyanu quiri, nio sai quia jataniri panra. Quiocua na sarohua.

⁴ Jesuuri saaja na riucaaree:

—Maja. Pueyaso Rupaajiniacuajaari naa naajiotasano quiyatej:

“Pueyanoori maja na naatanu saa miaquesanoocuaaja. Seetanujuanaa saminio quiaa cutaraari na tojishacari puetunu Pueyaso Rupaajananaa”.

⁵ Na nuhuaji, Sesaacaari Jesu jiyataquiaari Jerusalén tiaacajinia. Na nujuatequiaari jiyocuacaanuuri, Pueyaso Secojojua tia cacojiria. ⁶ Na sequeseeeri:

—Quiaa jaara seetanujuanaa Pueyaso Niyanu quiri, niiquiji quia jaataare jiyocua. Pueyaso Rupaajiniacuajaari naa naajiotasano quiaa:

“Pueyasoori na seya sequenutaniya na cojuanura quiajaniya. Nojoriiri quia quianutaniya, maja quenaaja saajiaacua quia jiriataaquiniuucaaji”.

⁷ Jesuuri na riucaaree:

—¡Maja! Pueyaso Rupaajinia, naa naajiotasanoori quiyajuhua:

“Maja quia saniniujituniu quia Jiyaniijia Pueyaso”.

⁸ Na nuhuaji, Sesaacaari Jesu tacaniquiaari socua jiyanojua jiyaconaja tuhananuucua. Cuniquiji na niquitirii puetunu jiya jiyaniijiacajanaari. Jiyanojua cumaacaraca quijiaca. Jiyanojua queraatia casamiriaca quijiacajuhua. Jiyanojua maninia niquishano. ⁹ Jesu sequeseeeri:

—Janiyacua quia jiyatere jiyaniijiajanaara nojori nitini, quiaa jaara cua cariquimijaji mojoquetare quia shuquiritianura janiya, quia jiyaniijia cua quiniuria.

¹⁰ Jesuuri na sequereee:

—¡Niiquiji quia quiaare Satanásnaa! Naa naajiotasano quiyacuajaari Pueyaso Rupaajinia: “Saaja quia Jiyaniijia Pueyaso quia shuquiritiaare cutara. Saaja nojuaja quia tojiri”.

¹¹ Na nuhuaji, Sesaacaari na tarinitiaquiaari. Jiyacaritij, Pueyaso seyari Jesuucua niquiaari na mianuutenura.

Jesu cotesacari poonijionu Galilea jiyajinia

(Mr 1.14-15; Lc 4.14-15)

¹² Jesu niishishacari Tiuquinijiona Juan nujuatesaarucuaa nujuatejojuajinia, nojuajaari Galilea jiyajinia quiaquiaariuhua. ¹³ Jesuuri Nazaret tiacajiniji pacuquiaari Capernaum tiacajinia na quiniuria, caminia shuriucua. Cuno jiya quiquiaari Zabulón niquiohuacujinio supueno pueya jiya, Neftalí niquiohuacujinio supueno pueya jiyanio. Zabulón, Neftalínio, nojoriiri supuetana Jacobo niquiohua quiquiaari. ¹⁴ Jesu quishacari cuno jiyajinia, naa tohuateequiaariiri taa tariucuacaanu Pueyaso sequesano caminiujunias Isaias pohuataquiaari cuno jiyajinijicujani. Nojuajaari naa pohuataquiaari Pueyaso niishitiosano nojuaja taa na nuhuaji na sequesano tohuateenutaniyani:

¹⁵ “Zabulón pueya jiya, Neftalí pueya jiyanio, cunoori caminia shuriuquiumia neteja nucuama quiya, mariyata Jordán moo tamajiria. Cunoori mariyata Galilea jiya, tee taucuaca quiyacuajani. ¹⁶ Cuno jiyajinia quiniaari ninishiqui quijiaca quiquiaari. Quiarjia saniniujia, nojoriiri jiuujia Cuhuatana niquriucuaa. Nojoriiri cusonu pueretujuaca quiquiaari tarijia. Quiarjia cutara nojoriiri cuhuatasaaree nojori puereyaquiniucujani”.

¹⁷ Jiyacarijij, Jesuuri Pueyaso rupaa pohuatanu coteequiaari. Naa sequequiaariiri: —Nioojia nia tacatore sesa nia miiniujiniji. Pueyasoori nia paniya na pueya nia quiniuria.

Jesu saquiriojosacari sapitiaaja ritianaa
(Mr 1.16-20; Lc 5.1-11)

¹⁸ Jesuuri Galilea caminia shuriuquioco rucuaneriquiaa. Jiyacarijij, Pedro niquriiri, tarajanu Andrésnio. Pedro sesa quiquiaarijuhuaj Simón. Nojoriiri sapitiaaja ritianaa quiquiaari shiyaruta. Nojoriiri jiyacari shiyaru jaquerooriquiaa. ¹⁹ Jesuuri nojori sequeere:

—¡Miji! Cua tarajare. Cua pueyara nia quiri. Janiyacua nia jiyatere pueya quioojuara saniniunijia, juhua sapitiaaja quioonaa.

²⁰ Nojoriiri na shiyaru tujiaquiaari ritia. Jesuta quiojijareeri.

²¹ Jesuuri shiitaniyojua socua rucuanequiaari na tacoji. Socua caapiqui pueya riuri-ataseeri. Nojoriiri quiquiaari Santiago, tarajanu Juannio. Cuno pojori queeri quiquiaari Zebedeo. Nojoriiri na queta quiriquiaa botejinia. Na shiyaru cushipirijionuuriquiaari. Jesuuri Santiago sequeere Juannio, na pueyara nojori quiniuriajuhuaj. ²² Nojoriiri ritia bote tujiaquiaari na queta, Jesuta na quojonura.

Jesu niishitiojosacari queraatia pueya
(Lc 6.17-19)

²³ Jesuuri puetunu Galilea jiyajiniajanaa rucuaneriquiaari na saquiriojosano pueyara. Pueyaso secujojua tiacajiniaqueya niishitiojoriquiaari. Pueyaso rupaa pohuataquiaari taa Pueyaso jitianu paniya maninia na pueyani. Puetunu tamaatia cusonuunu jitiacojuajanaa naatanijioquiaariiri. Puetunu nootunejaca pueyajanaa shaataquiaarijiaariuhuj. ²⁴ Naa maninia na miishanoori pojojtasaaquiaari puetunu Siria jiyajiniajanaa. Naaratej, pueyari Jesuucua patootaquiaari puetunu cusosuhuaanaa, puetunu tamaatia cusonu jitiacajajanaano, cumatacuruhuana cusosuhujuhuj, nootunejaciono. Nocua jiyatasaaquiaarijuhuaj samaruhuaraca quijiaca, canashiyajuij cusojonuujuaciono. Jesuuri nojori naatanijioquiaari puetunujanaa. ²⁵ Jiyanohua queraatia pueyari Jesu nuhuajiquiaari Galilea jiyajiniji, Decápolis tiacajinijinio. Na nuhuajiquiaarijuhuaj Jerusalén tiacajinijinio, Judea jiyajinijiniojuhuaj, mariyata Jordán moo taquijiria jiyajinijinionio.

5

Jesu pohuatasacari Pueyaso rupaa tuhuananujiniji
(Lc 6.20-23)

¹ Jesu niquishacari jiyanohua queraatia pueya nocua niyano, nojuajaari tuhuananucua tacaquiaari tiji na cajiniuria. Na saquiriojosano pueyari nocua catecanoquiaari. ² Jesuuri nojori niishitiojonu coteequiaari. Naa na pueya sequeereeri:

³ —Shuquiriaatia quijiaca cutaraari noo pojori, canapuete niishiyani noojia sesa quiya. Nojoriiri Pueyaso pueyara quiriqiano, pueyaracaanu na jitianura nojori.

⁴ Shuquiriaatia quijiaca cutaraari noo pojori canapuete taraatia quiyani sesa na miinuucua. Pueyasoori nojori cumanijianutaniya.

⁵ Shuquiriaatia quijiaca cutaraari noo pojori, canapuete maja tama nerajaaja niishiriojojuacioni. Nojoriiri nio jiya camaruhua quiniutianiya, taa Pueyaso sequequiaaricujani.

⁶ Shuquiriaatia quijiaca cutaraari noo pojori, canapuete maninia quiniucua jiaatiaa jiyanohuani, taa pa jiaatiaacuaa miaquenuucuanu. Pueyasoori maninia quijiacaari nojori jiyatenutaniya.

⁷Shuquiriaatia quijiaca cutaraari noo pojori, canapuate naquiya miishanoocua taraajejani. Pueyasoori nojoriicua taraajenutaniyajaacuhuai.

⁸Shuquiriaatia quijiaca cutaraari noo pojori canapuate maninia jiuujjaracani. Nojoriiri Pueyaso niquniutianiya cutara.

⁹Shuquiriaatia quijiaca cutaraari noo pojori, canapuate pueya jiyanoootootejani. Nojoricuajaari Pueyaso muerasu quiniutianiya.

¹⁰Shuquiriaatia quijiaca cutaraari noo pojori, canapuate naquiya miishanoni, Pueyaso panishano nojori miiniucua. Pueyasoori nojori jitianutaniya pueyaracaanu shuquiriaatia, na muerasu nojori quishacari.

¹¹Shuquiriaatia quijiaca nijaniya, tamasaca jaara nia macaatiri cua tojitiyajaca nia quishacari, naajuhuai, nojori jaara miya naquiya nijaniya. Naajuhuai, niaari shuquiriaatia quijiaca, nojori jaara saquiriojotare niaacuara na sajonota, maninia nia tojiniucua janiya. ¹²Niaa jaara naa miishaaretej, jiyanohua nia timiquiore. ¡Shuquiriaatia nia quirijihuai! Pueyasoori cunora jiyanohua maninia nia miiniutianiya jiyocuacaanu nia quishacari nata. Tariucuacaanu Pueyaso sequesano caminiujuniaacuajaari naa naquiya miishaaquiaarijuhuai, nia supueyaquishaacarijiyojua.

*Pueyaso muerasuuri juhua shoni quiya mijiria, juhua ninishiqui cuhuatanaajuhuai
(Mr 9.50; Lc 14.34-35)*

¹³Mijiria, niaari juhua shoni quiya, mijiria quiniaa mariqui socua seseyareeri. Shoni jaara na tiquiriigua jatama, ¿maatucua taa tiquiriigua quirihoani? Maja na naata. Shoni jaara naa quiriritij, najuhuaa quiyari, shaaca. Jiyano shoni cuara jataaarina nuujinia, pueya rapijosocoriquiano.

¹⁴Naajuhuai, niaari juhua ninishiqui cuhuatana mijiria quiniaara. Tiaca jaara tuhuanuucua quiri, majaari na naata na jamaaniu. ¹⁵Naajuhuai, pueya jaara samaritiu noshitiri, jiyocuacaanu morotashiyari, tiaco na cuhuatanura maninia, pueya niquniuria maninia nocuaji. Majaari samaritiu niatasaanu conatu cariquiaco. ¹⁶Naajuhuai, nijaniya cuara maninia miiria pueya niquiara. Maninia nia miishacari, niaari pueya cuhuataa juhua samaritiu. Naa maninia mijia nia quishacaritij, pueyari Jiyocuacaanu Quijia nia Que Pueyaso maniniuhuaqueetanutiya.

Jesu niishitiojosoori tariucuacaanu Moisés Rootasanojiniji

¹⁷Majaari nia jiyaniniu janiyari niqiaarini Moisés Rootasano cua tarinitiniuria nijaniya, Pueyaso sequesano caminiujuniaa rootasanonio. Maja. Niqiaari cutaranijia puetunu cunoro rootasanojuanaa cua tojiniuria, cua tohuateenurajuhuai. ¹⁸Pueyanaa, seetanujanaa nia sequeyanijia. Nio jiya quishacarijia, jiya cajiniocuanio, majaari quenaaja niquriyatu naashanoniyojua Pueyaso Rupaajiniji shaajetesaanu quiniutianiya. Majaari na shaajetesaanu quiniutianiya puetunu Pueyaso naajotesanojuanaa cuara tohuateerejaatijia. ¹⁹Naaratej, tamonu pueyano jaara jiyaniri tamonu rootasano tariucuacaanu Pueyaso Rupaajiniji najuhuaa sequesano, nojuajaari cocuaatia miya. Nojuaja jaara cunoro tariucuacaanu rootasano tojiyaquiri, cunoro pueyanoori socua rerequetesano quiniutianiya narta Pueyaso muerasujinijianaa. Naajuhuai, nojuaja jaara pueya niishitiojore nojori tojiyaquiniuria cunoro rootasano, cunoro pueyanoori socua rerequetesano quiniutianiya puetunu narta Pueyaso muerasujinijianaa. Saniniuuja, cante tariucuacaanu Pueyaso rootasano tojiqiaianijia, na niishitiojoquiaa tamasacajaariuhuai, cunoro pueyanoori socua tojishano pueyano quiniutianiya Pueyaso shuriucua jiyocuacaanu. ²⁰Nia nunooteyanijia, niaa jaara quiyaquiri socua maninia quijiaca Fariseocuacajiniji, Moisés Rootasano niishitiojonaajinijinio, majaari Pueyaso muerasu nia quiniu quiniutianiya.

*Jesu niishitiojosoora maja pa juaaniuria
(Lc 12.57-59)*

²¹Niaacuajaari tojiqiaari taa pa supuetanaa sequesaaquiaaricuajani: “Maja monu. Cante pueyano monani, nojuajaari nequesoreesaanutaniya”. ²²Janiyari saniniuuja nia niishitiojijiani, cante narta pueyanota juaajiani, cunoori nequesoreesaanutaniya. Naajuhuai, cante narta pueyano saarijiojuani, cunoori nequesoreesaanutaniya jiyaniijianu-cua niqiaara. Naajuhuai, cante narta pueyano sesacareeni, cunoori quera jatashiya mani quiqiojinia, pueyaracaanu saniitosocoriquiano.

²³Naacuajitij, nia niqutionu panishacari Pueyasora nia casaa, niaa jaara jiyacari niishiquii, quiaari quiarta pueyano juaatiriucuaa quiocuara, ritia quia tiujiare cuniqui quia niqutiosocoriquiano Pueyasora, catijiaja shuriucua. ²⁴Quiarta pueyanota quia jiyanoootoocoocuara coteenu. Na nuhuaji cutara quia naata niqutionu quia casaa Pueyasora.

²⁵ Tamonu jaara quia jiyataa nequesoreenaacua, sesa quia miiniucua nojuaja, maninia quia pohuatare ritia nojuaja, taa quia miiniutianiyani na jiyanooniuria quia-janiya. Ritia nia jeecatoore nucuaco nia quiasacarijia, quiaa mariqui nequesoreena niquitiosaareeri. Nequesoreena naasucuaari quia niquitionutaniya nujuatejojua camarnu saniniuujia. Nojuajaari quia nujuatenutaniya nujuatejojua jiniya. ²⁶ Seetanujuanaa nia sequeyanijia, majaari quia tohuatanu quiniutianiya, quiaa cuaara niqutiorejaatijia puetunu na sequesano cumaneecajanaa quia cumaneecajinijia.

Jesu niishitiojosano, maja pa camishoo maajiicua pa jiaataiaquiniuria

²⁷ Niaacuaajaari tari tojiqiaari nio tariucuaacaanu rootasano: “Maja tamonu niquiocua numuetucunu”. ²⁸ Janiya cutaraari nia sequeyani, pueyano jaara na camishoo maaji niquri nocua na jiaatianuta, cunoori juhua na numuetucuree tari noojiajiniya.

²⁹ Na nuhuaji, Jesuuri nio miriqui sequesano sequequiaari pueyara, jiyanoohua na niishitiojonura nojori:

—Naaratej, quia miaquetajara quia namijia jaara sesa miitiri quiajaniya, quia namijia quia jiatere. Tamocora quia jatere. Quiajanijara socua maninia cutaraari namijijiu quia quiniuria, maja quia jataaanura mani quiqiojinia puetunu quia cuaqueyatajanaa. ³⁰ Naajuhuj, quia miaquetajara quia numatu jaara quia miitiri sesa, quia jiyatarenoj. Tucuaacaanu quia jatere. Socua maninia cutaraari quia quia jiyatanura quia numatu, maja puetunu quia cuaqueyatajanaa quia jataaanura manijinia, pueyacaanu quia miiniuria naquiya tii.

Naa na pohuatasacarijij, Jesuuri pa niishitiojija maja pa tojiniuria poojia panishano, sesa na miitiniuria pa cuaqueya.

Jesu niishitiojosano maja pueya cartenura necocua

(Mt 19.9; Mr 10.11-12; Lc 16.18)

³¹ Jesuuri naa niishitiojoquiaarijuhuaj:

—Pa supuetanaari naa rootasaquiaarijuhuaj: “Pueyano jaara necocua cartere, maaji cuaara niquitiosaaria naajione, pueya niishiniuria neyacaqui na carteree”.

³² Janiyari saniniuujia nia sequeyanijia, pueyano jaara necocua cartere, sesa miya Pueyaso niqiaaraari. Naacuajitij, na cartesano maajiiri tamonuta quiniutianiya na nuhuaji. Cunoori sesa Pueyaso niqiaara. Pueyano jaara niishiri necocuaari tamonu caya numuetucujutequiaa, saa cunoraja cutara na naata na cartenu. Pueyanoori sesa miyajuhuj, jaara cartesano maaji camiri.

Jesu niishitiojosano maja pa sapojonura

³³ Niaari tarijia tojtiaquiaari taa pa supuetanaa rootasaquiaarini. Naa rootasaquiaariiri: “Majaari nia jatanu nia sequesano, niaa jaara sequere: “Seetanujuanaari cua sequesano. Pueyasocuaajaari niishiya majaari cua sapojonu’ ”.

³⁴ Janiya cutaraari nia sequeyani, nia sequesano jaara seetanujuanaa sequesano quiri, saaja nia sequere “jaa”. Jaara seetanujuanaa quiaquiri nia sequesano, saaja nia sequere “maja”. Majaari nia sequesano nia maateni najuhua naatej: “¿Janiyate sapojonuani? Cua rupaari juhua jiya cajiniocua. Maja na jatanu quiniutianiya”. Majaari naa sequenutej pueyanaa. ¿Majateeri nia niishiniu, jiya cajiniocuaari Pueyaso quiqio? ³⁵ Naajuhuj, ¿casaara nia sequequiaa najuhuanani: “Cua sequesanoori juhua pa jiya? Majaari na shaajenu quiniutianiya”. Maja nia sequenutej. Pa jiya, cunoori Pueyaso niaja na niohuaca. Naajuhuj, ¿casaara nia sequequiaani: “Cua sequesanoori juhua Jerusalén tiaca? Pueyacaanu quiniutianiyari”. Maja nia sequenutej. Jerusalén tiacaari pa Jiyanijia Pueyaso tiaca. ³⁶ Naajuhuj, ¿casaara nia sequequiaa na najuhuanani: “Quia naataari cua sequesanoocua tiuuniu, cua naca quishacarijia”? Majaari naa sequenutej pueyanaa. Niaa jaara naa sequeretej, nia niishiri, majaari nia naata quenaaja niqumi nia muesujinijinio nia jiyatenu taariuria, muerumecarano. ³⁷ Naaratej, pueyacaanu saaja seetanujuanaa nia sequere “jaa”, “maja”. Cante na sequesano maatejani, cunoori Sesaaca niishitiojosano nijaniya.

Jesu niishitiojosano maja pa naminiuria

(Lc 6.29-30)

³⁸ Niaacuaajaari tari rootasaquiaari: “Pueyano jaara tamonu pueyano namijia cocuutare, na namijia cuaara cocuartaariajuhuaj, pueya nequesoreena niqiaara. Naajuhuj, pueyano jaara tamonu pueyano quiaja shaatare na pishacari, na quiaja cuaara shaataariajuhuaj”. ³⁹ Janiyari saniniuujia nia sequeyani, pueyano jaara quia miiniu paniri sesa, quia cuaqueya quia tarinitiare nera. Majaari na nujuatanu. Naacuajitij, pueyano jaara quia maseca piri, majaari juaani. Quia jiyanoori. Nojuaja jaara socua quia piriouhua, quia jiyanoori. Majaari na naminiu. ⁴⁰ Pueyano jaara quia toque jaariutianu

paniri, nera quia tarinitiare. Cuaara na paara. Mariyata quia cushishano shiniquiaacuaji quia niquitiore nareja. Majaari jamueja quia quiniu. ⁴¹ Tamonu camarnu jaara quia sequere na naacutanura na casami quia jatanura nuu cajiniocua, majaari na tarijionu. Saniniuujia, shuquiriaatia quia naacutare na casami jatanura socua tucuacaanu na sequesanojiniji. ⁴² Tamonu pueyano jaara quia casami masenu paniya nera, quia niquitiore nareja. Naajuhuj, tamonu pueyano jaara quia casaa panu paniya nareja rupaquijiara, quia niquitiore. Majaari na ruuretanu. Capora quia quiri.

Jesu niishitiojosano pa paraca pa paniniuria

(Lc 6.27-28, 32-36)

⁴³ Niacuajaari nio tariucuacaanu sequesano tojtiaquiaarijuhuaj: “Quia shuriucua quinia quia paniri. Saniniuujia, majaari quia paraca quia niquiniu”. ⁴⁴ Janiya cutaraari nia sequeyani, nia paraa nia paniri. Nia sesacaja pueya nia maniniuuaqueetare pueya niquiara. Pueyano jaara niaacuara saquiriojotare na sajonuta, nocuara nia secojore Pueyaso. Sesa nia miiniaacuara nia secorejehuj. ⁴⁵ Naa maninia nia miishacaritij, niaari seetanujuanaa jiyocuacaanu Quijia nia Que Pueyaso muerasu quiniutianiya. Nia niishiri, Pueyasoori pananu muetaniquiaa sesa pueyara na janura, maninia pueyara na janurajuhuj. Pueyasoori maru nitiquiaa maninia miijiaca pueyara, sesa miijiacarajuhuj, maninia nojori nataacuaca moritianura. ⁴⁶ Naa jaara saaja nia panijiaca pueya panijia quiri quia, ¿Pueyasoteeri cunora nia shuqiritianutaniya, socua na casaajiniji na niquitionura nijaniya? Maja. Sesa miijiaca pueyani, noo pojori canapute cumaneeca masejoquiaa na sajonutani, nojoriiri maninia miiquiaa na panishano pueyajuhuj. ⁴⁷ Naa jaara saaja nia panishano pueya saruhuataquiaa, ¿niaateeri cunora maninia miijiaca quia Pueyaso niquiara? Maja. Pueyaso niishiyashijiaca pueyari naa maninia miiquiaa na panishano pueyajuhuj. ⁴⁸ Naaratej, maninia miijiaca nia quiri juhua jiyocuacaanu Quijia nia Que Pueyaso. Nojuajaari seetanujuanaa maninia miijia. Rimiajata miyashijia cutara.

6

Jesu niishitiojosano saaja maninia pa miiniuria Pueyaso niquiara

¹ Tama nia cuaqueyajaaja nia cojuare maja maninia nia miiniuria saaja pueya niquiara, pueya maniniuuaqueetanura nijaniya. Pueya jaara nia maniniuuaqueetare maninia nia miiniucua, nia Que Pueyasoori maja na niquitionu quiniutianiya nijaniya socua, maninia nia miiniucua. ² Naaratej, niaa jaara casamijiuucua pueya niquitionu paniri nareja nia casamijiniji, majaari juhua sesa jiuujiaraca pueya nia miiniu. Cuno pojoriiri pueya numotequiaa na niquitionu panishacari na casaa, puetunu pueyajanaa shootianura nojori. Cuno pojoriiri naa miiquiaaqui Pueyaso secojoua tiacajinia, tiacaacacajuhuj, pueya maniniuuaqueetanura nojori. Seetanujuanaa nia sequeyanijia, cuno pojoriiri tari maseree narta pueya maniniuuaqueetanu. Majaari nojori masenu quiniutianiya socua Pueyasojiniji naa maninia nojori miiniucua. ³ Saniniuujia, niaa jaara nia casaajiniji casamijiuucua niquitionu paniri nareja, quia mueneca cuaara niishiyaqiirria quia niquitiosano quia miacquetajata. ⁴ Naa miriqui sequere nijaniyanijia cua niishitiojonura nijaniya, jiyasohuaja nia miiniuria puetunu maninia nia miiniu panishanojuanaa. Naacuajitij, saaja nia Que Pueyasoori jiyasohuaja maninia nia miishano niishiniutianiya. Naaratej, nojuacuajaari nia niquitionutaniya na casamijiniji, na shuqiritiasacari nijaniya.

Jesu niishitiojosano naa pa secjonura Pueyaso

(Lc 11.2-4)

⁵ Naa secijosacari Pueyaso, majaari juhua sesa jiuujiaraca pueya nia miiniu. Cuno pojoriiri Pueyaso secjonu maniniucuaquiaa na nujuanuta pueya niquiara, saaja pueya shootianura nojori. Nojoriiri naa secjonuquiaa Pueyaso secojoua tiacajiniatej, tiaca nuucujinijuhuj, tee queraatia pueya quiyacuajani. Seetanujuanaa nia sequeyanijia, cuno pojoriiri tari maniniuuaqueetasarecuaaja. Jiyano pueyatej, majaari nojori masenu quiniutianiya socua Pueyasojiniji. ⁶ Nijaniya saniniuujia, nia secijosacari Pueyaso, nia sohucamara nia tiuquiri. Nia tiootiu nia tiore. Na nuhuaji, cuniqui nia Que Pueyaso nia secojore jiyasohuaja tamajaaja. Nia Que Pueyaso niquishacari naa jiyasohuaja nia miishanotej, nojuaja cutaraari nia niquitionutaniya na casamijiniji, na shuqiritiasacari nijaniya.

⁷ Naa secijosacari Pueyaso, majaari nia sequesano pacutejousa nia quiniu puera, juhua Pueyaso niishiyashijiaca. Cuno pojoriiri jiyaniya Pueyasoori nojori tojiniutianiya pueyaracaanu na pacutejosacari tariucua na sequesano. ⁸ Majaari juhua nojori nia miiniu. Pa secojiaquishaacarijijouja, pa Que Pueyasocujaari tari niishiya casaa pa paniyani. ⁹ Naaratej, naate nia secojore:

“Canaa Queana, quiaa cutaraari jiyocuacaanu Quijia. Pueya cuaara niishiiria quiaari saaja maninia quijia. ¹⁰ Quia quiri canaa Jiyaniijia, canaa quia jiitianura. Quia panishano cuaara miishaaria mijiria, taa jiyocuacaanu na miishaaquiaacuaani. ¹¹ Canaa quia niqutiore canaa miaquesocoriquiano quiarijiani. ¹² Canaa quia jyanoori sesa canaa miishanojiniji, taa canaa jyanooquiaa tamasaacuaani, sesa nojori miishacari canaa. ¹³ Majaari canaa quia shanacunu canaa saniniujuushaanura sesa canaa miiniuria. Saaja canaa quia cojuare cutara Sesaacaacuai. Saaja quiajaniya cutaraari seetanujuanaa Jiyaniijijanaa. Quiaa cutaraari puetunu cumaacaracajanaa. Quiaari shanohua shacantuua quijia cutara. Quiaari naa quijia pueyaraanutej. Tariucujaja”.

¹⁴ ‘Naatej, niaa jaara jyanoori tamasa, sesa na miishacari najaniya, nia Que Pueyasoori nia jyanoonutianiyajuhuj. ¹⁵ Saniniujia, niaa jaara tamasa jyanoyaquiri, nia Que Pueyasoori maja na jyanooniu quiniutianiya najaniyajuhuj sesa nia miishanojiniji.

Jesu niishitijosano taate pa naata miaqueyaquiniuni Pueyaso pa secojonura

¹⁶ ‘Niaa jaara miaqueyaquiya Pueyaso nia secojonura, majaari macuhuajeconu pueya niqiiara, taa sesa jiuujiaraca pueya miiquiaatej. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujuanaa nia sequeya cutaranijia, narta pueyari tari nojori maniniuhuaqueetarecujaja. Majaari Pueyasojiniji nojori masenu quiniutianiya socua. ¹⁷ Najaniya saniniujia, nia miaqueyaquishacari Pueyaso nia secojonura, nia jiquioco nia jeequere. Nia canuure nia muesu, taa nia miiquiaa pueyaracaanucujani. ¹⁸ Naa nia miiri Pueyaso nia secojosacari, maja pueya niishiniuria cunogui miaajeya. Saaja pa Que Pueyaso cutara cuaara niishiiria nia miishano. Naacujitij, nojuajaari nia niqutionutianiya na casamijini nia shuquiritianuucua najaniya.

*Pa casami pa racatare jiyocuacaanu Pueyaso shuriucua
(Lc 12.33-34)*

¹⁹ ‘Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari na miaquenutianiya. Tiyarashiniutianiyajariuhuj. Nohuasenujuacaari nocua tiuquiniutianiya na nohuasenu. ²⁰ Nia racatare cutara nia casami Pueyaso shuriucua jiyocuacaanu. Tii cutaraari shaacqui surequeya, shaacqui tiyara. Naajuhuj, nohuasejojuuari maja na naata nocua tiuquiniu tii, jiyocuacaanuji nia casami na nohuasenu. ²¹ Niaa jaara nia casami racatare mijiria, niaari nocua niishiriojonutianiya pueyaracaanu. Nia casami jaara racatasano quiri Pueyaso shuriucua saniniujia, niaari Pueyasoocua niishiriojonutianiya. Majaari nia tacaaniu quiniutianiya mijiria casaacua tari.

*Pa cuaqueyajinia cuhuatanajiniya pohuatasano
(Lc 11.34-36)*

²² ‘Pa namijaari juhua poojia cuhuatana. Naacujitij, paa jaara sesa casaacua jiaatiashijia qiririni, poojiaari juhua cuhuashiqui quiya maninia. ²³ Niaa jaara sesa casaacua jiaatiajaca quiri saniniujia, nioojiaari juhua ninishiqui quiya. Nioojia jaara sesa casaacua jiaatiaja quiri, nioojiaari socua ninishiqui quiya cariyujuaru pueyanojiniji.

*Pueyaso panijia pa quiri, maja cumaneeca panijia
(Lc 16.13)*

²⁴ ‘Maja nia naata poonijionu maninia caapiqui camarnura. Niaa jaara caapiqui camarnuraca quiri, niaari tamonu paniniutianiya, niaari saniniujia tamonu niqiniuu paniaquiniutianiyacujua. Naacujitij, niaari shuquiriaatia poonijionutianiya nia panishano camarnura. Niaari tamonu soojotanutianiyacujua. Naajuhuj pueyanaa, majaari nia naata Pueyasora poonijionu maninia, cumaneecaacua nia jiaatiasacarijuhuaj.

*Pueyaso na muerasu cojuaja
(Lc 12.22-31)*

²⁵ ‘Naaratej, nia sequeyanijia, maja puera nia niishiriojonu casaa nia miaquenutianiya, casaa nia ratunutianiya, casaa nia cushiniutianiya. Pueyaso jaara pa shipiniquiaari pueyano pa quiniuria, ¿majateeri na niqutionu quiniutianiya pa miaquenu panishano, pa cushiniu panishanonio, maninia pa rishiniuria? Taaquiriirini. ²⁶ Jiyocuacaanu jaacuatujua nia niquiricua. Nojoriiri maja na natanu. Majaari na senoonu. Majaari nojori mishinijionu tiaco na miajajaura. Naajaa, pa Que Pueyasoori nojori niqutioquiaa na panishano. Nia niishiri. Niaa cutaraari socua Pueyaso panishano cunoo jiyocuacaanu jaacuatujacajini. ²⁷ ¿Nia naatate socua jyaconajara maashiniu, jyanohua nia tacaanuitia? Maja.

²⁸ 'Naajuhuj, ¿casaara nia tacaquaiarini nia niishiriojosacari casaa nia cushiniutianiyani? Naana shuucuaca nia niquiriquiacuaa. Nojoriiri maja na niishiniu poonijionu. Majaari na niishiniu na maniniushitajara shitianujuhuj. ²⁹ Seetanujuanaa nia sequeyanijia, pa supuetanaa jiyaniijia Salomónri jiyanoehua shanohua toqueya cushijia quiquiaari. Naajaa, na toqueeri maja socua shanohua niquishano quiquiaari cuno naana shuucuacajiniji. ³⁰ Naana shuuri saaja rupaquijia shanohua niquishano. Jaara sorere, namitiashiyari catijiasocoriquiano. Pueyasoori naana shuu shipiniquiaari saaja rupaquijia shanohua niquishocoriquiano, na nuhuaji catijiasocoriquianonio. Nojuaja jaara naa shanohua naana shuucuaca shipiniquiaari, ¿majaateeri socua maninia na miiniu quiniutianiya niaara? ¿Casaara nia tiuyaquiya nia Que Pueyasocuaarini? ³¹ Naaratej pueyanaa, maja nia tacaaniu. Majaari nia sequenu: ¿casaa pa miaquenutaniyani?, ¿casaa pa ratunutaniyani?, ¿casaa pa cushiniutaniyani? ³² Pueyaso niishiyashijiaaari naa sequejacatej, puera nojori tacaashacari puetunu na panishano casaacujanaa. Niaa cutaraari jiyocuacaanu quijia Queraca. Nojuacuajaari tari niishiya puetunu nia panishanojuanaa. ³³ Naaratej, coteenu nia niishiriojore Pueyaso tojjijara nia quiniuria cutara. Pueyasocua nia niqutiore puetunu nia panishanojuanaa. ³⁴ Naajuhuj, majaari tariquiria nia tacaaniu. Saaja nia niishiriojore cutara, taa nia miiniutianiya maninia quiarijiani. Tariqui cutara niocua niishiriojore taa nia miiniutianiya maniniani. Tariucujaja quiarijia nia niishiriojosano nio juucara. Majaari socua tariquiria nia tacaaniu. Saaja nia Que Pueyasocua nia tiuuri, juhuajaniya nia quiniuria.

7

Majaari quarta pueyanoocura soqueto nia quiniu
(Lc 6.37-38, 41-42)

¹ 'Maja niarta pueyano nia soquenu najuhuanaj, Pueyaso mariqui nia jiyanoyaquirijiaariuhuj. ² Taa nia sesacaquiaa tamasacuaani, niaari naa sesacasaaanutaniyajuhuj. Naatej, taa nia miiquiaa tamasacuaani, Pueyasoori mariyata naa miiniutianiya nianianiyajuhuj. ³ Nio miriqui cua sequesano nia tojiri. ¿Casaara nia niquiya rucucua nia tarajanu namijajiniani, niaa jaara puereetuca maca jitiiaa tama nia namijajiniajaaja cutara? ⁴ Maca nia jitiiasacari tama nia namijajiniajaaja, ¿casaara nia sequeya niarta pueyanoni: "Cuno rucucua pa taquiri quia namijajiniji"? ⁵ Sesa jiuujiaracanaa, coteenu nia pare cuno maca nia namijajiniji cutara. Na nuhuaji niocua maninia niquiri cutara, nia tarajanu rucucua nia taquiniuria na namijajiniji. Nio miriqui cua sequesanoori nio sequeya: nioojia seque nia jeeicare coteenu, na nuhuaji cutara niocua maninia nacasure niarta pueyano.

⁶ 'Majaari Pueyaso ruuretajaca nia niishitiojonu Pueyaso rupaa najuhuanaj. Cuno tojiyashijiaaari nia tojiyaquiniutianiya, naatej taa tamonu pueyano sare tojiyaquiquiaa nijaniyacuaani. Majaari Pueyaso soojeaca nia pohuatanu Pueyaso miishano shanohua nijaniyara. Nojoriiri saaja rerequetenutaniya Pueyasojiniji nia pohuatasano, naatej taa cushiya rapijioquiaa marajinia juhuajaniya na niishishoo maninia casaacuaani.

Pueyaso pa secorej
(Lc 11.9-13; 6.31)

⁷ 'Pueyaso nia secorej. Nojuajaari nia niqutionutaniya nia masesano. Niaa jaara pajere, niaari nia pajesano riuriantanutaniya. Tohuateyaji nia piqiri, niaacuajiri riataaanutaniya. ⁸ Cante Pueyaso maseya na panishanoni, seetanujuanaa na masenutaniyari. Naajuhuj, cante pajejani, na panishano riuriantanutaniyari. Cante tohuateyaji piqijiani, nocuajiri riataaanutaniyajuhuj.

⁹ 'Mueya jaara na que nenecojore neecaruura, ¿na queteeri na niqutionutaniya saajia? ¡Maja! ¹⁰ Mueya jaara na que nenecojore sapitiaajara, ¿na queteeri na niqutionutaniya soconu? ¡Maja! ¹¹ Nijaniyari sesa miiniu niishijiaa. Naajaa, niaacuajaari maninia casaa niqutionu niishijia, nia mueya jaara nia nenecojore. Nia Que Pueyaso cutaraari jiyanoehua socua maninia niqutionu niishijia, na muerasu secojosacari nojuaja.

¹² 'Pueyaracaanu maninia nia miiri tamasaca, taa nia paniquiaa pueya miiniuria nijaniyacujani. Niaa jaara maninia miiriquia nio cua sequesano, niaari tari tojitiiaa maninia puetunu tariucuaaanu Moisés Rootasanojuanaa, tariucuaaanu Pueyaso sequesano caminiujuniaa rootasanonio.

Pueyasocua nuuri secanuniojua
(Lc 13.24)

¹³ 'Pueyasocua neteja nuu nia pajere, shiitaniyojua nuuri tuneja. Saniniujia, puereetuca nuuri neteya mani quiquiojiniara. Puereetuca na tuneja. Puereetucaari neteya, carianujuhuj. Naaratej, queraatia pueyari juhuajaniya cuno nucuaco quiojiya

saniitiosocoriquiano. ¹⁴ Saniniuuja, shiitianiyojua nuuri maninia cutara. Cuno nuucuaco quijonaari pueyaracaanu quiniutianiya Pueyasota cutara. Jiyanojua shiitianiyojuaari cuno nuu tuneja. Secaja pueyari na riuriataa, cami na quiojonura.

Naanaari niishishano na jajaujini
(Lc 6.43-44)

¹⁵ Tama nia cuaqueyajaaja nia cojuare sapojonuujuaacuajaji, noo pojoriicuajaji canapue te najuhua sequejacuajani: “Pueyaso Rupaa pohuatananijia”. Nojoriiri sapuenu juhua maninia pueya niquishano, nojori sapojonura niajaniya. Nojoriiri sapuenu juhua borregoniyojua niquishano, seetanujuanaa juhua puereeta sare nojori quishacari, sayoru. ¹⁶ Niocua nojori niishiri, sesa nojori miiniucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuumiateeri na naata muetunu cohuajaru? Maja. Naajuhua, cuno sesa jiuujaraca pueyari maja na naata maninia miiniu. ¹⁷ Maninia naanaari, maninia jajau muetujua cutara. Saniniuuja, sesa naanaari, sesa jajau muetujuaaja. ¹⁸ Maninia naanaari maja na naata sesa jajau muetunu. Naajuhua, sesa naanaari maja na naata maninia jajau muetunu. ¹⁹ Naana jaara sesa jajau muetujua quiri, nushiyari, manijinia catijasocoriquiano. ²⁰ Naacuajitij, niocua cuno sapojonuujua pueya niishiri nojori miishanojiniji sesa.

Saaja noojiaqueya pueyari Pueyaso muerasura quiniutianiya
(Lc 13.25-27)

²¹ Cuno pojori canapue te cua sequejacani: “Cua Jiyaniijianaa, cua Jiyaniijianaa”, noojiaqueya nojoriinijinioori maja nojori tiuquitianu quiniutianiya cua Que Pueyaso quiquiojinia. Saaja seetanujuanaa cua Que tojtiajaca cutaraari nocua tiuquitianutaniya. ²² Cua nequesoreesacari pueya nio jiya puequesacari, queraatia pueyari cua sequentaniya: “Cua Jiyaniijianaa, cua Jiyaniijianaa, canaacuajaari quia rupaa pohuataquiaari pueya niquiarani. Canaa sequesacari quia sesa, canaari samaruhua tohuatanijioquiaari quia cumaacatani. Naajuhua, canaari cusosuhua naatanijioquiaarini quia sesa canaa jiyaniquishacari”. ²³ Janiyari saniniuuja naa sequejaca riuquanutaniyani: “Maja cua niishiniu niajaniya. ¡Nia quiojorohua! Niaari saaja sesa miijiaca quiquiaari”.

Jesu tojtiajaca miishanoori pueyaracaanu rishiniutianiya cutara
(Mr 1.22; Lc 6.47-49)

²⁴ Naacuajitij, cante cua sequesano tojjijiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinia. ²⁵ Na nuhuaji, maruuri jiyanojua niquiaari. Moori pajaashiquiaari. Paratuuri jiyanojua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. ²⁶ Cante cua sequesano tojyashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaaquiajia tiaquiaari. ²⁷ Maruuri jiyanojua niquiaari. Moori pajaashiquiaari. Paratuuri jiyanojua piyarojoquiaari cuno tiaacuara. Cuno pueyano tiaari pojotaquiaari. Na camaruuri jiyanojua taraatia quiquiaari na tia pojotasacari.

²⁸ Jesu jaara niishitiojonu pucaquiaari, pueyari jiyanojua jiuujateriquiaa na niishitiojosano nojori tojishacari. ²⁹ Pueyari naa jiuujiatequiaari seetanu cumaacatajanaa Jesu niishitiojosacari juhua jiyaniijiajanaa, maja juhua Moisés Rootasanojiniji niishitiojonaa. Cuno pojoriiri nareja tariucuacaanu rootasano caminiujuquiaari pueyaracaanu.

8

Jesu naatanishacari sesa cusonu jiiitaja
(Mr 1.40-45; Lc 5.12-16)

¹ Jesu jaara tuhananujiniiji rosequiaariuhua na cokiniaata, jiyanojua queraatia pueyari na nuhuajiriqiaa. ² Tamonu pueyano cusosuuri jiyacari Jesuucua catecanoquiaari. Jiyanojua sesa cusonu jiiitajiaquiariri. Tahue rupajinia, cuno cusonu sesaari quiquiaari “lepra”. Pueyano shuuri juhua miaquesano quijia na cuaqueyajinia cuno cusonu na jiiitasacari. Cusosuuri Jesu cariquimijaji mojuquetaquiaari Jesu na sequenura na panishano. Naa na sequereeri:

—Jiyaniijianaa, quia jaara paniri, niishiyacuajaniija quia naata cua cusonu cushiritiniu.

³ Jesuuri nocua taraajequiaari. Nocua niaree na juaashiquiaari. Na sequereeri:

—Jaa, paniyanijia. Cuaara cushiriiria quia cusonu.

jiyacaritij, ritia cushiriiquiri! Jeequerohuari. ⁴ Na nuhuaji, Jesuuri naa na rootaquiaari:

—Cua tojiri. Maja tamasaca niquara quia pohuatanu cua miishano quiajaniya. Saaja Pueyaso secojonaa jiyaniijia quia cuaqueya quia niquitiri, na cartenura quiajaniya, pueya

tajinia quia rucuanefonuhuaa juhuajaniya. Na nuhuaji, ritia quia niquitiore quia seru Pueyasooacara catijiasocoriquiano. Naa quia miiritij taa Moisés niishitiojoquiaari tarijiacuajani, juhua jeequesano quia quiniuria Pueyasora. Naacuajitij, pueyari niishiniutianiya quiaari tari jeequerohua quia cusonujiniji.

Jesu naatanishacari Romano capitán seru
(Lc 7.1-10)

⁵ Jesu jaara tiuquiquiaariuhua na pueyata Capernaum tiacajiniuhua, Romano soldadohua jiyaniijiaari Jesuucua niquiaari na secojonura Jesu. ⁶ Naa na sequequiaariiri:

—Jiyaniijianaa, cua seruuri cusosu mataa maquetujinia. Majaari na naata pooniniu quenaaja. Jiyanhua naquiya miya na noonutaari.

⁷ Jesuuri na sequequiaari:

—Janiyacuaajaari nocua quianutaniyani na cusonu cua shaatanura.

⁸ Soldadohua jiyaniijiaari na riucaaree:

—¡Maja jiyaniijianaa! Janiyari maja pueyano maniniuni, cua tiajinia quia tiuquiniuria. Nareja quia sequere, cua seru cusonu cuaara shaateera tamajaaja. Niishiyacuajanijia, quiaari na shaatanutaniya saa quia rupaataja. ⁹ Janiyari jiyaniijiaracajaniuhuj. Na tojiquiaanijia. Naajuhuj, cua soldadohuari cua tojitiaquiaajuhuj cua sequesacari nojori. Naacuajitij, janiya jaara tamonu sequereni: “Quia quiaare”, cunoori ritia quiaquiaa. Naajuhuj, janiya jaara tamonu sequereni cuaara niiria, cunoori ritia niya cucua. Janiya jaara cua pataaco seru sequereni cuaara miiria cua panishano, na miiquiaari. Cua sequesano jaara naa tojishaaquiaacuaa, quia sequesano cutaraari tojishaanutaniya.

¹⁰ Jesu jaara tojiquiaari naa cuno tahue sequesanteje, jiuujiatequiaariiri. Na cojiniaa sequereeri:

—¡Seetanujuanaa nia sequeyanijia, majaari quenaaja parta Israel pueyajinijinio cua niqiniu quiquiaa Pueyasooacara tiuujia cutara, juhua nio tahue! ¹¹ Seetanujuanaa nia sequeyanijia, queraatia taucuaacari Pueyasooacara tiuujiaa quiniutianiya juhua nio tahue. Nojoriiri tucuaanujii nijionutaniya pananu muetasamaji, pananu tiuquishocojijihuj. Nojoriiri pa supuetanaata cajitiunutianiya na miaquenuunura Pueyaso shuriucua. Tii quiniutianiya shuquiriaatiaari pa supuetanaata: Abrahamta, Isaactajuhuj, Jacobotanio. ¹² Parta Israel pueya, canapueete Abraham jinianuucujinijio supuenoni, nojoriiri saniniuujia tamocora quejoosanutaniya ninishiqui, nojori tojitiaaquinuucua Pueyaso. Nojoriiri tii sariyocuatunutaniya naquiya na miishacari. Na quiaa miaquenuunutaniyani na noonuta. Nojoriiri juucua saquiriojosaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jinianuucujinijio nojori quishacari.

¹³ Na nuhuaji, Jesuuri cuno soldadohua camarnu sequequiaari:

—Quia tiajinia quia quiaarohuaqui. Cuaara quiiriaqui taa quia sequereecujani. Jiyacaritij, na seruuri ritia naataquiaariuhua.

Jesu naatanishacari Pedro reyarucua
(Mr 1.29-31; Lc 4.38-39)

¹⁴ Jesuuri quiaaree Pedro tiajinia. Tii Pedro reyarucua niquishiiri cusosu mataano na maquetujinia. Naseeca matariquiaari. ¹⁵ Jesuuri na juaashiquia quiasee. Na naseeca cusonuuri ritia na tajiquiaari. Ritia sanequiaariiri Jesu na mianuutenura.

Jesu naatanijosacari queraatia pueya
(Mr 1.32-34; Lc 4.40-41)

¹⁶ Shusha ninishacari cuno juucaja, cuno tiacajinijinio pueyari queraatia samaruhuaraca pueya jaatucunuquiaari Jesuucua. Jesuuri cuno samaruhua tohuatanijioquiaari saa na rupaataja. Puetunu cusosuhujanaa naatanijioreejaariuhuj.

¹⁷ Naa tohuateequiaariti supuetana Isaías naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusonujuanaa na jatanura”.

Tamasaca pueya quini panishacari Jesu pueyara juucua
(Lc 9.57-62)

¹⁸ Jesu jaara jiyanhua queraatia pueya niquiquiaari na shocua maano, na pueya sequereeri:

—Caminia taquijiria pa niuutiaare.

¹⁹ Jiyacaritij, Moisés Rootasanojiniji niishitiojona pueyanoori Jesu sequeree:

—Niishitiojonanaa, janiyari quata quianu paniyani. Janiyacua quia tarajareni puetunu tiuquiyocujanaa quia rucuanijosacari.

²⁰ Jesuuri na riuacuaree:

—Quioojuapue cutaraari na raa jiitiaa. Shuhuari na jesuhua jiitiaajuhua. Saniniuuja, pueyano cua quishacari mijiria, majaari cua maquejara cua jiitianu quenaaja, taa cuno casami jiitiaacuaa na maquetuuarani.

²¹ Tamonu Jesu pueyajiniinioori Jesu sequeree:

—Cua jiyaniijianaa, cua tarinitiare, cua que niquirijaara. Janiya jaara na shaajareni, janiyacua quia tarajare cutarani.

²² Jesuuri na riuacuaree:

—Naajaa, cuata quia quiaare cutara. Quia tarinitiare nojuaja. Macunucua cuara jamoora tama narta macujuaaja. Naatej, cante Pueyaso tojtiaashijiicani, nojoriiri tariucua juhua macunucua quia Pueyasora.

Jesu suraajasacari paratu, mohuacanio

(Mr 4.35-41; Lc 8.22-25)

²³ Na nuhuaaji, Jesuuri botejinia tacaquiaari. Na saquirojosano pueyari nata quiojoquiaari. ²⁴ Paratuuri senota piyarojonu coteequiaari nojori niuutiasacari. Jiyanoohua piyarojoriquiaari. Caminiaari jiyanoohua queyocuariquiaa paratu piyarojosacari. Mohuacaari bote jiniacuma mishiriquiaa. Jesuuri jiyacari maqueriquiaa. ²⁵ Na pueyari cunora na niucujasee. Jesu sequetureeri:

—¡Jiyaniijianaa, canaa quia naacutare! ¡Paa tari tiuquitiaareni!

²⁶ Nojori riuacuaree:

—¿Casaara nia pueretiuyani? ¿Majateeri nia niishiniu Pueyasocua tiuuniu?

Jesuuri saneree. Paratu sequereeri, mohuacanio:

—¡Niaaj, nia suraajere!

Paratu, mohuacaari ritia suraajequiaari. ²⁷ Jesu pueyari jiuujiatequee. Tama nojorijiaarijiaa sequequiaari:

—¡Juhuej! ¿Taamueca pueyanotucuaanojoni? ¡Paratuuri na tojiya, mohuacajuhua!

Jesu tohuatanishacari samaruhua, caapiqui pueyajiniji Gadara jiyajinia

(Mr 5.1-20; Lc 8.26-39)

²⁸ Jesuuri na saquirojosano pueyata tiuquiiioquiaari caminia taquijiria Gadara jiyajinia. Jiyacaritij, caapiqui pueyanoori Jesuucua tohuareetaquiaari raacajiniji, macunucua nucuhua paaquiosaquiji. Nojoriiri samaruhuaraca quiquiaari. ¡Jiyanoohua pueya puerezano! Cuno nucuaco, majaari pueya rucuanenu quijia, cuno pojori na puereuucua. ²⁹ Samaruhuaraca caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa? ¿Quiaate juhuacarijia niyaree canaa quia saniitionura Jesunaa?

³⁰ Jiyacaritij, cushiyari cateca naataja miaquenuuriquiaa. Jiyanoohua queraatia cushiyari quiquiaari. ³¹ Samaruhuari cuno caapiqui pueya pocuatequiaari. Naa Jesu secoreeri:

—¡Quiaa jaara canaa tohuatanijiore nio caapiqui pueyanojiniji, canaa quia jiyarore cuno cushiyacua canaa tiuquitanura!

³² Jesuuri cuno samaruhua sequeree:

—¡Nia quiaare!

Samaruhuari cuno caapiqui pueyajiniji tohuareetaquiaari. Cushiyacua tiuquitiaseeri. ¡Cushiyari cocuatequee! Saaja caminiajinia totesee tacojinijiiri. Cushiyari tii shushiniushii.

³³ Cushiya cojuanaari netecuatiquiaariuhua na shiriiquiniutia na tiacajiniara. Nojori tiuquiiijosacariuhua, pueya niquiara pohuatatuquiaari cushiyajinijiiri, samaruhuaraca pueyajinijinio. ³⁴ Naaratej puetunu pueyajanaari cuno tiacajiniji nijioquiaari Jesuucua. Nojori niquishacari Jesu, na sequetureeri nojori jiyajiniji na quianura tamaqui.

9

Jesu naatanishacari cumatacuruhuana cusosu

(Mr 2.1-12; Lc 5.17-26)

¹ Na nuhuaaji, Jesuuri botejinia rosetaquiaari na saquirojosano pueyata. Caminia taquijiria niuutiaquiaariuhuari tama na tiacajiniarajaaja. ² Tii nojori tiuquiiijosacari, Jesuucua patasaquiaariiri cumatacuruhuana cusosu pueyano. Patasaquiaariiri na matujinia. Jesu niquishacari taa na patanaa tiuquiaari jiyanoohua nocuani, cusosu sequereeri:

—¡Quia shuquiriri sanajanaa! Quiaacujaari tari jiyanooshaaree sesa quia miishanojiniji.

³ Noojiaqueya Moisés Rootasanojiniji niishitiojonaari Jesu sequesano tojtiri quiaa. Nojoriiri tama noojiajiniajaaja niishiriojonuuquiaari: “¡Nio pueyanoori tama na cuaqueyajaaja jiyateya juhua Pueyaso na quiniuria naa na sequesacari! ¡Cumoori jiyanoohua sacuraatia!”. ⁴ Jesuuri cuno pueya niishiriojosano niishiquiaari. Nojori sequereeri:

—¿Casaara sesa nia niishiriojiniji? ⁵ Seetanujanaa, pueyano maja na naata jiyanooniu pueya miishano sesa. Naajuhua, majaari na naata tamajaaja pueya na naataniniu. ⁶ Naajaa, janiyari nia niishitiniutaniyani janiyari mijiria jiyarosaaquiaarini cua jiyanooniuria pueya, sesa nojori miishanojiniji.

Jiyacaritij, Jesuuri cusosu sequequiaari cuno pueya niquiaari:

—¡Quia sanere! Quia matu quia pataarohua quia tiajinia.

⁷ Cusosuuri sanequiaari. Na tiajinia quiaarohuari. ⁸ Na niquitiushacari Jesu miishano, puetunu pueyajanaari shiriqituuquiaari. Nojoriiri Pueyaso maniniuhaqueetaquiaari pueya na niquitionuucua na cumaaca, naa Jesu miiniuriatej.

Jesu sequesacari Mateo na pueyano na quiniuria

(Mr 2.13-17; Lc 5.27-32)

⁹ Jesu quiasacari cuno tiacajiniji, tamonu pueyano niquiquiaari cajiyanoori cumaneeca masejojuajinia Romano jiyaniujiaara. Na sesa quiquiaari Mateo. Nojuacuajaari janiya; nio naajionani. Jesuuri cua sequequiaari:

—Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

¹⁰ Na nuhuaji, janiyari Jesu masuquiaarini cua tiajinia na miaquenura, na pueyajuhaaj. Naacuajitij Jesuuri cua tiajinia tiuquitiaquiaari miaquenura. Queraatia cuarta cumaneeca masejonaari canaa cojiri quiaajuhua, queraatia noo pojori juhuaj, Fariseocuaa jiyaniquitiushano sesori quia pueyatatej. Puetunu canaajanaari Jesuta miacquenuriquiaani. ¹¹ Fariseocuaa jaara Jesu niquiquiaari miaqueyano canaata, nojori soosano pueyani, nojoriiri naa Jesu saquiriojosano pueya nequesotaree:

—¿Casaara nia niishitiojona miaqueya cuno sacuraatia cumaneeca masejonaatani, sesori quia pueyatano?

¹² Jesuuri naa nojori sequesano tojirii. Nojori sequeree miriquiiri:

—Cante na cuaqueya jiyaniyani maja cusosu na quiniu, nojuajaari maja naarajona na paniniu. Cusosuhua cutaraari naarajona panijia. Naajuhua, sesa miijia pueyari cua paniya nojori cua jiyanooniuria sesa nojori miijosanojiniji. ¹³ Niaa cuara niishitiojosuhua socua, maninia nia niishiniuria casa tariucuacaanu Pueyaso sequesano niishitiojinyani naa na sequesacaritij:

“Niaacuajaari nia seya catijia quiaa cucuara. Maninia juhuari nia taraajenura tamasacaacua. Cuno cutaraari cua shuquiritiasano”.

Naara niquiaarinijia nia sequesano sesa miijia cua jiyanooniuria sesa nojori miishanojiniji. Maja cutaraari mijiria cua ninu quiquiaari maninia pueyacia.

Pueya nequesotasano casaara Jesu pueya tarinitiaa quiquiaa quenaaja miaquenuni

(Mr 2.18-22; Lc 5.33-39)

¹⁴ Tiuquinijona Juan pueyari Jesuucua niquiaari naa na nequesotanura:

—¿Casaara quia pueya tarinitiaa quiquiaa quenaaja miaquenuni, nojori secojonura Pueyasoni? Canacuajaari miaquenu cartequiaani Pueyaso canaa secojonura taa Fariseocuaa miiquiaacuani.

¹⁵ Jesuuri nojori riucaaree miriqui:

—Pueyano camishacari, ¿na masuusano pueyatucua taraatia quiriri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu quiniutaniya, janiya jaara nojori tajiniji rishaareni.

¹⁶ Socua cua tojtiare pueyanaa. Pueyano jaara cushipirijionu paniri na toque mocua, maja na naata quiarinio toquerau ruposaanu toque mocua cuhuocojinia, jeequesoojua na quishacari. Quiarinio toquerau jaara ruposaare toque mocua cuhuocojinia, na jeequesacari, posequenutaniyari. Cunota, toque mocua cuhuocoori socua sutenutaniya.

¹⁷ Naajuhua, majaari pa naata uva caaca racatanu shoque tariucuacojinia. Uva quiariniacu jaara racatasaree juucua shoque tariucuacojinia, jaara jerema vinora na quiniuria, shoque tariucuaco surtanutaniyari. Vinoori niitiasaanutaniya najuhuanaj. Shoque tariucuacoori maja na naata tooniu, uva caaca jaara jerema. Naaratej, uva caaca nia shuujiore shoque quiariquiojinia, maja najuhua nia niitianura uva caaca. Naajuhua, majaari na naata cua niishitiojosano cojitishaanu tariucuacaanu niishitiojosanota. Cua niishitiojosano nia tojtiare cutara.

*Caapiqui maajipohua naatanijiosacari**(Mr 5.21-43; Lc 8.40-56)*

¹⁸ Jesu pocuasacarijia, nocua niqviaariiri Pueyaso secojojua tia camarnu. Jesu cariquimiaji mojoquetaquiaariiri. Na sequereeri:

—¡Quiyatuari shusha cusoquee! Naajaa, miiji, cuata quia quiaare. Niishyanijia quiaa jaara niare nocua quia juaashiquia, samiitianutanihuari.

¹⁹ Jesuuri saneree. Nata quiaareeri. Canaa, Jesu saquiriojosano pueyani, canaari nata quiaareejuhuj. ²⁰⁻²¹ Canaa quiasacari, tamonu maaji cusosuuri Jesuucua catecanoquiaari jiyasohujaja na paramaji. Cuno maajiiri pueyaracaanu naatequiaari. Doce marijiaari tari na shoconjuquiaari pueyaracaanu na naatesacari. Tama niishiriojoriquiaajaarijia: “Janija jaara Jesu toque quiareni, cua nanacaari curetanutaniya”. Cunora, maajiiri Jesu toque casaca quiaasee jiyasohujaja. ²² Jesuuri na nijiniara tacatequee. Cuno maaji niqiriiri. Na sequereeri:

—Shuquiriaatia quia quiri, sanaunaa. Cucua quia tiushacari, quia nanacaari tari curetaquee.

Jiyacaritij, cuno maaji jiniacumaari ritia sacuantaquee.

²³ Jesuta canaa tiuquishacari Pueyaso secojojua tia camarnu tijinia, canaari pueya niqishiini macura naajua joneneniuyanano taraatia, sapiyoniuayanonio. ²⁴ Jesuuri cuno pojori sequereeri:

—¡Niiquiji nia tohuareetare! Nio maaji samiriuri maja macu. Nareja maqueyano.

Pueyari Jesu saroojotaree saaja, naa na sequesacaritij. ²⁵ Jesuuri cuno pojori tohuatanijiore saaja. Na nuhuaji, sohuacamara tiuquimiaari macuucua. Na juaashiquiajiniji na quiaaseeri. ¡Maaji samiriuri sanemaa! ²⁶ Naa Jesu miishanojinijiiri pohuatasaquiaari puetunu cuno jiyajiniajanaa.

Jesu jeecasacari caapiqui cariyujuaru namijiaa

²⁷ Canaa jaara tohuareetaquiaari cuno tijinjini, caapiqui cariyujuaruuri Jesu nuhuajiquiaari. Canaa nuhuaji nacariquiaari nojori niishishacari Jesuuri seetanujanaa Pueyaso jiyarosano. Naaratej, Jesu sequeturiquiaari:

—¡Supuetana David niquiohuacuajinio supueno pueyanonaa, canaacua quia taraajere quenaaja!

²⁸ Canaa tiuquishacarihua canaa quijia tijinia, cariyujuarujuriiri Jesuucua catecanoquiaari. Jesuuri nojori nequesotaree:

—¿Niaate cucua tiuya nia namijiaa cua jeecanura?

Jesu riucatureeri:

—Jaa, jiyaniijianaa. ¡Quia naatacuaaquiniatejaj!

²⁹ Jesuuri na juaashiquia niare nojori namijiaacua. Jesuuri cariyujuarujuri sequereeri:

—Cucua nia tiuuniucua, cuaara quiriia taa nia sequereecuajani,

³⁰ Cuno pojori namijiaari maniniuajiacara quiquiaarihua. Jesuuri jyanohua nojori rootaree:

—¡Majaari tamasaca niqiiara nia pohuatanu cua miishano!

³¹ Na tohuareetasacari, cuno cariyujuarujuriiri ritia pohuatanu coteequiaari Jesu miishanojiniji. Naacuajitij, Jesujiniji niishishaaquiaariiri puetunu cuno jiyajiniajanaa.

Jesu pocuatasacari tiquia pueyano

³² Cariyujuarujuri tohuareetanu nuhuaji, tamasaca pueyari Jesuucua jaatucquiaari samaruraca pueyano. Cuno pueyanoori maja na naata pocuanu quijia. Tiquiatuhuj.

³³ Jesuuri samaru tohuatanirii cuno pueyanojiniji. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jyanohua jiuujiatequiaari. Sequetureeri:

—¡Naa miishanoori maja na niquishaanu quiquiaari Israel jiyajinia!

³⁴ Fariseocuaacari saaja Jesu macaatiquiaari pueya niqiiara. Naa sequetureeri:

—Cuno Jesuni, nojujaari samaruhua jiyaniijia cumaacaraca. Naacuajitij, na naata samaruhua tohuatanijionu.

Jesu taraajesacari pueyacua

³⁵ Jesuuri puetunu tiacajiniajanaa rucuanajoquiaari Pueyaso rupaa na pohuatanura, puereetuca tiacajinia, shiitaniyojua tiacajinianio. Maninia rupaa pohuataquiaariiri Pueyaso secojojua tiacajiniaqueya, pueya niishiniuria taa Pueyaso jyanooniu paniya nojorini. Naajuhuj, nojujaari queraatia tamaatia cusonu naatanijioquiaari puetunujanaa, nootunejacanio.

³⁶ Jesu shootiasacari pueya, nojoriicua taraajequiaari jyanohuari. Pueyari taraatia niquishano quiquiaari, juhua tashuquoono pueya. Nojoriiri taraatia quijiaca quiquiaari

juhua cojuasoo borregohua. Shaaqui na camaru. ³⁷ Cunora, Jesuuri canaa na saquiriojosano pueya sequequiaari:

—¡Nia niqiri! Jiyano hua queraatia pueya. Cuno pojoriiri juhua puereetuca sucohua. Saniniuuja, secajaari na senoonaa. ³⁸ Nocuaaji nia sequeyanijia, na Camaru nia secojore, nojuaja cuara jiyaroora queraatia poonijionaa na senooriquiano nera.

10

Jesu saquiriojosacari doce pueya na jiyaramiquishocoriquiano

(Mr 3.13-19; Lc 6.12-16)

¹ Jesuuri canaa na doce saquiriojosano pueya sequequiaari na rootasano canaa tojini-uria, canaa na jiyaramiquiaquishacarijia. Jesuuri canaa niqutioquiaari na cumaaca, samaruhua canaa tohuatanijionura, cusosuhua canaa naatanijionura, puetunu noonujua-na canaa shaatanurajuhua.

² Niiori canaa sesaca, na jiyaramiquishocoriquiano pueya sesacani: coteenuuri quiquiaari Simón. Pedroori na sesa quiquiaarijuhuaj. Pedro tarajanu Andrésri quiquiaarijuhuaj. Quiriquiaaariuhua Santiago, tarajanu Juannio. Cuno pojoriiri Zebedeo niqiohua quiquiaari. ³ Felipeeri quiriquiaajuhua, Bartolomé, Tomásnio. Quiriquiaaariuhua janiya Mateoni. Janiyari tarijia quiquiaarini cumaneeca masejojua Romano jiyaniijia. Quiriquiaaariuhua socua tamonu Santiago. Cuno Santiagoori Alfeo niyanu quiquiaari. Quiriquiaaariuhua Lebeo. Na sesa tarajanuuri quiquiaari Tadeo.

⁴ Quiriquiaaariuhua Simón. Nojuajaari Cananeo pueya maanujinjinio quiquiaari. Judas Iscarioteeri quiriquiaajuhua. Nojuajaari Jesu quiateriquiano quiquiaari mosocoriquiano.

Jesu rootasano na pueya na jiyaramiquiaquishacarijia

(Mr 6.7-13; Lc 9.1-6)

⁵ Jesuuri nio na doce pueya jiyaramiquiaquishacarijia. Coteenu, canaa rootaquiariiri, canaa na jiyaramiquiaquishacarijia. Naa canaa sequequiaariiri:

—Majaari taucuaacua nia quiojonu. Naajuhua, majaari nia tiuquiniu Samaria pueya tiacajinia. ⁶ Saaja parta Israel pueyacua nia quiaare cutara. Nojoriiri juhua borregohua tashuquioono quia. ⁷ Nojori niqiuara nia pohuatatare puetunu tiacajinijanaa. Nojori nia seque: “Pueyasoori quiaarijia nia jitianu paniya, nia jaara na rupaa tojtiajacara quiri”. ⁸ Cusosuhua nia naatanijiore. Macunucua nia samiitianijiore. Canapuet lepra cusonu jitiaani, cuno cusonu nia shaajare pueya cuaqueyajiniji. Samaruhua nia tohuatanijiore pueyajiniji. Niacuaajaari nio cumaaca maseree nareja. Naaratej, nareja nia naatanijiorejuhuaj. Majaari cua cumaaca nia jamuenu.

⁹ Majaari cumaneeca nia panu. ¹⁰ Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia quiaare. Majaari nia panu nia miojotu. Naaacutasano pueya cuara niqutioora saniniuuja nia panishano.

¹¹ Naa rucuanesacari, nia jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tiacajinia nia jijojetare, nia cuara cuniquiji quiaarejaatijia. ¹² Naa jaara tamonu tiacajinia tiuquishiiquia, pueya nia seque naatej: “Pueyaso cuara nioojia cajitiiria”. ¹³ Cuno tiacajinia quiniaa jaara maninia pueya quiri, juhuajaniya quiniutianiyari taa nia sequeecuaajani. Nojori jaara Pueyaso tojiyashijia quiri saniniuuja, nojori jiuujiacaari cajitiyaquishaanutaniya. ¹⁴ Tamonu tia camaru jaara nia tiuquinitianu paniyaquiri na tiacajinia, Pueyaso Rupaa ruuretataca nojori quiniuuca, nojori niqiuara nia niocuacuaajani nia rapijiotare jiya joocua. Naacuaajitij, cuno pueyari niishiniutianiya Pueyasoori nojori jiyanoquiniutianiya, nojori maseyaquiniuuca na rupaa pohuatanaa. Naa nia miirijuhua cuno tiaca pueya niqiuara, cuno pojori jaara Pueyaso rupaa tojiniu paniyaquiri nia pohuatasacari. ¹⁵ Seetanujuanaa nia sequeyanijia, jiya puequesacari, cua nequesoresacari pueya, cuno pueyari jiyano hua saniitiosaanutaniya socua Sodoma tiaca pueyajiniji, Gomorra tiaca pueyajinjinio.

Pueyaso rupaa pohuatanaari naquiya miishaanutaniya

¹⁶ Socua cua tojtiaare. Janiyari nia jiyaroya Pueyaso tojtiaashijia quiaari nia pohuatanaa cua rupaani. Naaari nojori tiacajinia puereeta quiniutianiya, naatej, taa borregohua quia sayoru tajinacuaani. Nojoriiri sesa miiniutianiya niacajinia. Nocuaaji jiyano hua niishijia nia quiri, tama nia cuaqueyajaaja nia cojuanura. Naajaa, majaari nojori naminiu. Saaja maninia nia quiri juhua noseja, pueyano porocua. ¹⁷ Tama nia cuaqueyajaaja nia cojuare tamasaca pueyacuaaji. Cuno pojoriiri nia jiyatanutaniya tiaca jiyaniijianucuaacua nia saniitiosaanura, nojori tojiniu paniyaquishacari cua rupaa. Naaari Pueyaso secojojua tiacajinia piqishaanutaniya. ¹⁸ Cua rupaa nia pohuatanuucua,

niaari quioosaanutaniya tiaca jiyaniijianucuaacuara, nojori nequesoreenura niajaniya. Niaari jiyaca jiyaniijianucua niquitiosaanutaniyajuhuaaj. Naajaa, naacuaajitij, niaari nojori niqiuara pohuatanutaniya janiyajiniji, taucuaca jiyaniijianucua niquiaranio. ¹⁹ Niaa jaara jiyaniijianucua tacoji nujuatesaare nequesoreesocoriquiano, majaari nia niishiriojonu taa nia riuucuanutaniyani. Nia riuucuanu panishacari, niaari jiyacari niishitiosaanutaniyacuaa maninia nia riuucanura. ²⁰ Naacuaajitij, nia riuucasanoori maja tama niajanijajini-jijiaaja quiniutianiya. Pueyaso Sohuanu cutaraari nia pohuatenutaniya jiyaniijianucua niqiuara.

²¹ Pueyari tama tarajanujuaaja niquitionutaniya mosocoriquiano, tarajanu tiuushacari cucua. Pueyanoori neyanu niquitionutaniya mosocoriquiano, cucua neyanu tiuuniucua. Mueraasapueeri tama na queya tacartanutaniyajaacujua na motenura, na queya tiuushacari cucua. ²² Puetunu pueyajanaari nia niqiniu paniyaquiniutianiya, cucua nia tiuushacari. Naajaa, cante seetanujuanaa cucua tiuujia quiya pueyaracaanuni, nojuaja cutaraari jatanishaanutaniya pueyaracaanu shacantuca quijia na quiniuria. ²³ Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanura. Seetanujuanaa nia sequeyanijia, juhuanujuaja nia tucataaquishacarijia pohuatanu Pueyaso rupaa puetunu Israel pueya tiacajinijanaa, janiyari jiyocuaaanuji tacatenutaniuhuani.

²⁴ 'Nio nia niishirijuhuaaj. Pueyanoori maja socua tojishano na niishitiojonajiniji. Naajuhuaaj, seruuri maja socua tojishano na camarnujiniji. ²⁵ Pueyano jaara maninia tojiriqia na niishitiojona, maniniacuajaari nojuaja jaara na nuhuaji juhua na niishitiojonara quirijihuaaj. Maniniacuajaari, seru jaara juhua na camarnura quirijihuaaj. Naaratej, nia Jiyaniijia jaara jiyaniquishiyacuaa "Sesaacata", ¿taariquitijia socua na muerasu sesacasaanutaniyatej?

Cante socua pa pueresaroni

(Lc 12.2-7)

²⁶ Naaratej, majaari nia puerenu niarta pueya. Puetunu jiyasohuaaja pueya miishanojuanaari niishishano quiniutianiya. Puetunu pueya seetasanojuanaari niishishaanutaniyajuhuaaj. ²⁷ Jiyasohuaaja cua niishitiojosano niajaniyani, cuno nia pohuatare puetunu pueya niquiarajanaa. Cua sasacojosano nia numaa pajamani, cuno nia nacatare puetunu pueya niquiarajanaa. ²⁸ Majaari nia puerenu pa puecojuaca. Nojoriiri maja na naata pa sohuanu monu. Saaja nia puerere cutara nooj, cante cumaacaracacuajani mani quiqiojinia nia sohuanu na quejoonura, nia cuaqueyanio.

²⁹ 'Pa naata saaja niquiriyatu cumaneeniyajuata caapiqui shiyojuanijojua masenu pa miaquesocoriquiano. Naajaa, pa Que Pueyasoori puetunu cuno shuhua niishiyajanaa. Naacuaajitij, majaari quenaaja niquiriyatujua shiyojua cusunu Pueyaso paniyaquishacari. ³⁰ Naajuhuaaj, Pueyasoori puetunu nia naca cajasu niishiyajanaa. Puetunujuanaari na serojosano quiya. ³¹ Naacuaajitij, maja nia puerenu. Niaari jiyanohua socua Pueyaso panishano queraatia shuhujiniji.

Maja cumaati Jesucristojiniji pa caririquiniu

(Lc 12.8-9)

³² Niaa jaara tamasa pueya niqiuara sequere niaari cucua tiuujica cutara, janiyacua jiyocuaaanu quijia cua Que niqiuara sequerejanijuhuaaj, niaari cua muerasu. ³³ Cante saniniujia cucuaji seetaja tamasa niquiarani, janiyari cua Que niqiuara na tamacanutaniyajaacuhuaaj.

Jesuucua tiuujia pueyari narta pueya juaashano

(Lc 12.51-53; 14.26-27)

³⁴ Majaari nia jiyaniinu janiya mijiria niquiarini pueya quiniuria juhujaniya. Maja. Mijiria cua niniucua, pueyari juayonuujanutaniya. ³⁵ Niqiaari cutaranijia pueya tiuuniuria cucua. Naacuaajitij, pueya tiuushacari cucua, cucua tiuyashijia pueyari nojori niqiniu paniyaquiniutianiya. Naacuaajitij, pueyanoori na que paracaaniutianiya, cucua tiuujia na que quiniucua. Maajiiri na nucua paracaaniutianijuhuaaj, na nucua tiuuniucua cucua. Pueyano niqiuocuaari na reyarucua paracaaniutianijuhuaaj, cucua tiuujia na reyarucua quiniucua. ³⁶ Naacuaajitij, tama pueya panishano pueyajaajaari na paracara quiniutianiya, cucua nojori tiuuniucua.

³⁷ 'Cante na queya panijia socua janiyajinijini, jiyano pueyanoori maja maninia cua pueyano na quiniuria. Cante necohua panijia socua janiyajinijini, jiyano pueyanoori maja maninia cua pueyano na quiniurijuhuaaj. ³⁸ Cante tama na cuaqueyajaaja panitiaaquijia na tojinuria janiyani, cunoori maja maninia quiria. ³⁹ Cante saaja tama na cuaqueyajaaja cojuanu paniya shuquiriaatia na quiniuria mijiriani, jiyano pueyanotej, nojuaja cutaraari

shaajasaanutaniya, pueyaracaanu taraatia na miitiasaanura. Saniniuujia, cante tama na cuaqueyajaaja panitiaa naquiya na miishaanura cua tojjia na quiniuucuan, nojuaja cutaraari rishijiara jatanishaanutaniya. Seetanujuanaa cuata shuquiriaatia quiniutianiya pueyaracaanuuri.

Pueyasoori maninia miijiaa niqutionutaniya na jiiitiasanoiniji

(Mr 9.41)

⁴⁰ Cante na tiaco nia tiuquinitiaja cua rupaajiniji nia pohuatasano na tojiniuriani, cuno pueyanoori cua tojiyajuhaaj. Cuno, cante cua tojjiani, nojuajaari cua Jiyarona tojjiajuhaaj. ⁴¹ Naajuhaaj, cante Pueyaso rupaa pohuatana tiuquinitiaja na tiaconi, Pueyaso rupaa pohuatana na quiniuucuan, Pueyasoori cuno pueyano niqutionutaniya maninia na casaajiniji. Nojuajaari niqitiosaanutaniya mariyata taa Pueyaso rupaa pohuatana niqitiosaanutaniyacuuaani, Pueyasojiniji na pohuatano sami. Cante maninia miijia pueyano tiuquinitiaja na tiaconi, maninia pueyano na quiniuucua, na tiaco tiuquinitiaja pueyanoori maninia casaa niqitiosaanutaniya mariyata taa maninia miijia pueyano niqitiosaanutaniyacuuaani. ⁴² Naajuhaaj, cante quenaaja shiniitiuniacu mohuaca raateya tamonuni, cua mueyaniojua na quiniuucua, Pueyasoori seetanujuanaa na jiiitiasanoiniji na niqutionutaniya na raatenu sami.

11

Tiuquinijiona Juanri na pueya jiyaroquiaari Jesu nequesotanura

(Lc 7.18-35)

¹ Jesu jaara canaa na doce saquiriojosano pueya rootanu tucutaquiaari tii, nojuajaari tiji quiaquiaari cuno jiya tiacajinia quiniaa na niishitiojonura Pueyaso rupaa.

² Tiuquinijiona Juan quishacari nujuatejojuajinia, nojuajaari jiyacari niishiquiaari Jesucristo miishanoiniji. Cunora, nojuajaari na pueya jiyaroquiaari Jesuucua naa na nequesotanura:

³ —¿Quiaate seetanujuanaa Cristo, tariucuacaanu Pueyaso sequesano canaacua niriqianotej? ¿Canaate tamonu sashiya soj?

⁴ Jesuuri nojori riucaaree:

—Nia quiaarohua. Tiuquinijiona Juan nia pohuatasuhua puetunu cua miishanojuanaa nia niquishano, nia tojishanojuhaaj. ⁵ Naa nia pohuatasuhua: “Cariyojuarujuriiri tari niqitiarohua. Shipiiniquiniuujiacaari maninia rucoorohua. Shu miaqueja cusono jiiitijacaari tari jeequerohua. Numueejunucuaari tari tojtiaarohua maninia. Macunucuaari samiitiacorohua. Casamiijiuniucua pueyari Pueyaso rupaa pohuatasaaaree, Pueyaso muerasura nojori quiniuria”. ⁶ Shuquiriaatia quijia cutaraari noo pueyano, cante cucuaji taacanuyaquijiani.

⁷ Tiuquinijiona Juan pueya jaara quiojoquiaariuhua Juancua, Jesuuri Tiuquinijiona Juanjiniji naa pohuatano coteequiaari pueya niquiaratej:

—¿Casaa niqiniuucua nia quiojocanu cariiquia jiyajiniani? ¿Niaateeri paratu piyarosano naajua niqiniuucua quiacanu? Maja. ¿Tiuquinijiona Jiuoteeri noojia niqijiojetej? Maja. ⁸ Cua sequeture, ¿casaa niqiniuucua nia quiojocanuni? ¿Niaateeri pueyano niqiquianu maniniuqui toque cushiyano? Maja. Cuno pojori cante maniniuqui toque cushijiani, nojoriiri jiyaniijianucua tiajinia quijiaa cutara, maja cariiquia jiyajinia. ⁹ ¿Taateerinitioj? ¿Casaacua nia quiojocanuurini? ¿Pueyaso sequenu panishano caminiujunonia niqiniuucuatee? Jaa. Seetanujuanaa nia sequeyanijia, Tiuquinijiona Juanri jiyanoohua socua cutara pueyano tamasaca Pueyaso sequesano caminiujunoniaajiniji. ¹⁰ Cuno Juanjinijicuaajaari tariucuacaanu Pueyaso Rupaajinia pohuatasaaquiaari. Naa naajiotasaaquiaari miriquiri Pueyaso sequesano janiya nojuajiniji:

“Janiyari cua pueyano jiyaronutaniya quiocuajini. Nojuajaari quia puetanutaniya, quia nuu jecariquiano quiocuaji”.

Juanri naa maninia miiquiaari cucuaji, pueya tojiniuria janiya cua tiuquishacari.

¹¹ Seetanujuanaa nia sequeyanijia. Majaari tamonu pueyano quini quiaquiaari socua cutara pueyano Tiuquinijiona Juanjiniji. Naajaa, cante Pueyaso muerasuniyojua quia cucua na tiuushacari, cunoori socua cutara pueyano Tiuquinijiona Juanjiniji.

¹² Tiuquinijiona Juan jaara coteequiaari Pueyaso rupaa pohuatano, pueyari jiyanoohua saniniujiriquiaa Pueyaso muerasu nojori quiniuria. Pueyari naa saniniujia quiarijiajuhaaj. Cante jiyanoohua saniniujia Pueyaso muerasu na quiniuriani, naa quiniutianiyari. ¹³ Supuetana Moisés, mariyata puetunu Pueyaso sequesano caminiujunoniaajanaari tariucuacaanu pohuataquiaari taa Pueyaso jiiitanutaniya pueyani. Naa poojotasaaquiaariiri Tiuquinijiona Juan jaara tiuquiquiaariiaatijia. Quiarijiani, Tiuquinijiona Juanta, nojori pohuatasanoori tari tohuateenu coteya. ¹⁴ Naa jaara nio cua

pohuatasanoocua tiuuniu paniri, nia tojiri nio: Tiuquinijiona Juancujaari tariucua-caanu pueyara Pueyaso sequesano caminiujiunia Eliascuja. Eliascujaari sequesaaquiaari niriqiuano. ¹⁵ Cante numaaracani, cuara tojiiria cua sequesano.

¹⁶ Nia pohuatareera taamuecate nio pa quishacari pueyani, quiarijiani paa na quiyani. Nio pueyari juhua naatujoori, canapuee carijiniacuma tacuarishijionu paniya juucuanu. Nojoriiri narta naatujooricua naca, nojori tacuarishijionu panishacari juucua. ¹⁷ Naa nacaari: “Canaari juucua naajua jonenejiyani. Majaari nia nianujunu paniniu. Canaa jaaquequejosacari taraatia saniniuujia, majaari nia sapuenu”. ¹⁸ Naajuhua pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuaj. Pueyari saaja na sequequiaari samaruraca pueyanota. ¹⁹ Na nuhuaji, janiyari tiuquiquiaarini. Janiya cutaraari sumatuucua miaquejani, mashaca ratujuajuhua. Pueyari cua sequequia: “Miaquejoru cuno, ratunu porocuanio. Sesa pueya cojijia, pa soosano Romano jiyaniijia seya cojijia sacuaraatiajuhuaj”. Naa nia soosacari janiya, Tiuquinijiona Juannio, niaari puetunu Pueyaso niishitiojosanojuanaa ruureta. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Pueyaso jiyaramiquishano cutarani.

Jesu piriyojosacari tojiyashijianucua pueya
(Lc 10.13-15)

²⁰ Corazín tiacajinia, mariyata Betsaida tiacajinia, Jesuuri tii socua pueya naatani-jioquiaari tamasaca tiacajiniji. Jiyajeneta casaa miiquiaari tii Pueyaso cumaacataari. Pueyari saaja nocua tiyaaquiquiaari. Nojoriiri maja noojia na tacatonu quiquiaari sesa nojori miiniujiniji. Cunora, Jesuuri nojori piriyojouquiaari. Naa sequequiaari nio caapiqui tiacajinia quiniaa pueyari:

²¹ —¡Niaari taraatia saniitiosaanutaniya, nioojia nia tacatoyaquiniucua sesa nia miishanojiniji! Janiya jaara Pueyaso cumaacata miiquiaari Tiro tiacajiniani, mariyata Sidón tiacajiniano, taa cua miiquiaari nia tiacajiniacuaani, cuno taucua maara Pueyasocua nari noojia tacatocanu cutara. Nojori maara ritia cocuaque toqueya cushiyonuuquiaari nojori tacaani niishishanura sesa nojori miishanojiniji. Naajuhua, nojori maara juaca quejooquiaari na nacaacua, noojia nojori tacatosacari Pueyasocua, sesa nojori miiniucua. ²² Naaratej, janiyari nia numooteyani: jiya puequesacari, niaari socua jiyanhua saniitiosaanutaniya Tiro tiacajinia quiniaa pueyajiniji, Sidón tiaca pueyajinijio. ²³ Capernaum tiacajinia quiniaanaa, ¿niaateeri jiyaniya niaari tamasaca tiaca shocotanutaniya nia jiyanihacari niaari socua maninia cutara? ¡Maja! Niaari mani quiqiojinia quejoosaanutaniya. Janiya jaara cua cumaacata cutara casaa miiquiaari Sodoma pueya tiacajiniani, taa cua miiquianu nia tajiniacuaani, Sodoma tiaca maara qiriqiaajaj. ²⁴ Nocuaji nia sequeya cutaranijia: jiya puequesacari, niaari socua jiyanhua saniitiosaanutaniya Sodoma tiaca pueyajiniji.

Jesuucua tiuuniari samaateriquiano cutara
(Lc 10.21-22)

²⁵ Jiyacarij, Jesuuri na Que Pueyaso sequequiaari:

—Quia shuquiritiaanjia cua Quena. Quiaari jiya camarnu, jiyocuaaanu camarnunio. ¡Quiaari maninia! Quiaari niishiyashijia pueya maninia casaa niishitirii, niishijia pueyacuaji quia jamosanoni. Niishijia pueyari saaja tama nojori niishishanoocujaaja tiuujia. ²⁶ Naacujitij cua Quena, quiaari maninia niishitirii niishiyashijia pueya, taa quia paniquiaaricujani.

²⁷ Cua tojitiare pueyanaa, cua Queeri cua niqutioquiaari puetunu casaajanaa cua jiiiasocoriquiano. Majaari seetanujanaa tamasaca niishiniu janiya. Saa cua Queja cutaraari cua niishiya. Naajuhua, majaari seetanujanaa tamasaca niishiniu cua Que. Saaja janiya, Neyanuni, na niishiya cutaranijia, naajuhua canapue cua niishitini paniya cua Quecujani. ²⁸ Cucua nia nijiore, puetunu nijaniyanaa, canapuee tacaquioyani, canapuee puera niishiriojonuuacani. Naa jaara cucua nimia, janiyari nia samaraatanutaniyani. ²⁹ Cua niishitiojosano nia tojiri. Janiyajiniji nia niishiri taamuecatucua janiyani. Janiyari ritia juayashijiani. Janiyari pueya shocoteyaquijiani. Naacujitij, nioojaari maja na tacaani quiniutianiya nia rupesacari janiya. ³⁰ Nia tojishacari janiya, nioojaari juhujaniya quiniutianiya. Cua poonitijosacari nijaniya, majaari jiyajeneta na quiniu quiniutianiya niaara, cua cumaquishacari nijaniya.

12

Jesu pueya carojotasacari trigo samaatenu juuca
(Mr 2.23-28; Lc 6.1-5)

¹ Jiyacaritij, Jesuuri canaa na saquiriojosano pueyata cuhuariquia jiuujiaaco tajiriquiaa samaatenu juuca. Canaari jiyacari miaajeriquiaani canaa quiasacari nucuaco. Canaari se-
caja trigo jajau carojotanu coteequiaarini. Canaari na miojonuuriquiaani. ² Fariseocuaca
jaara canaa niqiquiaari naa miyanotej, Jesu sequetureeri:

—¡Quia niqiri! ¡Quia pueya trigo shuniitaa! ¡Na shuquiuquojoniuyari! ¡Naa nojori
miishacaritij, poonijionuyari! Cuno maja panishano samaatenu juuca miiniuria. ¡Pa
supuetana Moiséscaujaari naa pa rootaquiaaritij!

³ Jesuuri cuno pojori riucaaree:

—¿Majateeri nia serojonu quiquiaari Pueyaso Rupaajinia taa pa supuetana David mi-
iquiaari na miaajesacarini, na pueyano? ⁴ Nojoriiri Pueyaso Secojoua tiajinia tiuquiti-
aquiaari. Pueyasora niqutiojosano pan satureeri. Cuno panri saaja pueyacuara seco-
jonaa sasocoriquiano quiquiaari, maja socua tamonu pueyano sasocoriquiano. Naajaa,
Davidri na saquiaari. Na miishanoori maninia quiquiaari Pueyaso niquiara. ⁵ Naajuhuj,
¿majateeri nia serojonu quiquiaari tariucuacaanu Moisés naajiosanojinia, taa pueyacuara
secojonaa pueyaracaanu poonijioquiaa Pueyaso Secojoua tiajiniani? Nojoriiri naa
poonijionuquiaa samaatenu juucajuhuaj. Naa nojori poonijiosacari Pueyaso Secojoua
tiajinia samaatenu juucatej, cunoori maja sesa. ⁶ Moiséscaujaari pa rootaquiaari maja
pa poonijionura samaatenu juuca. Naajaa, cuno rootasanoori seetanujuaanaa maja na
quiniu Pueyaso Niyanura, jaara Pueyaso Secojoua tiajinia poonijionaara quiaquiriji-
uhuj. ⁷ Maja naascuaari nia niishiniu quiquiaari casaa nio tariucuacaanu naajiotasano
niishitiojiya nijaniya juucuan. Naa sequeyari: “Janiya cutaraari socua nia panitiaani
niarta pueyacu nia tarajenura, maja saaja nia niqutiojonura nia seya cucuara catijlaso-
coriquiano”. Naa jaara nio naajiotasano niishijia quiriquia, niaa maara sesa miyashijia
pueyacuara tonujiaquiriquiaj. ⁸ Cua tojitiare quiaritia. Janiyacuajaari Pueyaso Nya-
nuni. Naacuajitij, mijiria cua quishacari cua naata sequenu casaate samaatenu juuca
miishiyani.

Jesu jeeacasacari pueyano juaashiquia cuseetucojuara joojequetano
(Mr 3.1-6; Lc 6.6-11)

⁹ Na nuhuaji, canaari Jesuta quiojoquiaari quiniqijini. Canaari Pueyaso Secojou-
ua tiajinia tiuquishiini. ¹⁰ Pueyanoori tii quiriquiaa cuseetucojuara joojequetano na
juaashiquia. Taa canaa Judiuocuaca camarucua Jesuucuara saquiriojotanu paniriquiaa
juucuacuajani, jiyacaritij, na sapojonuta Jesu nequesotaturee naari.

—¿Maninateeri samaatenu juuca cusosu naataniniuria? Paacuajaruhua niishitio-
josaaquiaarini maja pa poonijionura samaatenu juuca.

¹¹ Jesuuri cuno pojori riucaaree:

—Naa jaara niqiriyatujua borregoniojua jitiare, cuno jaara tiyare raama samaatenu
juuca, ¿majateeri nocua nia quianu, raamaji nia panura nia seruniyojua? ¡Taaquiririnij!
¹² ¿Majateeri pueyano socua jiyanojua panishano borregonijini? Taaquiririnij. Naaratej,
maja pa tarinitianu maninia pa miiniuria pueyaracaanu, samaatenu juucajuhuaj.

¹³ Na nuhuaji, sesarucojua sequereeri:

—Quia juaashiquia quia shiitiore.

Na juaashiquia shiitioreeri. Ritia jeequequeeri juhua tanecaraja. ¹⁴ Naa Fariseocuaca
niquishacari Jesu miishanotej, tohuareetaqueeri. Tama nojoriijaaritia rojotooquiaari
nojori motenura Jesu.

Jesujiniji pahuatasano tariucuacaanu naajiotasanojinia

¹⁵ Jesu jaara niishiquiaari Fariseocuaca miiniu panishano nojuaja, quiniqiji quiaque-
eri. Queraatia pueyari na nuhuajiquiaari canaata. Jesuuri puetunu cusosuhujanaa
naatanijioquiaari. ¹⁶ Jesuuri na naatanijosano pueya rootaquiaari maja tamasa
niquiara nojori pahuatanura cante nojuajani. ¹⁷ Naacuajitij, tariucuacaanu Pueyaso
sequesano caminiujumia Isaias pahuatasanoori tohuateequiaari. Nojuajaari juhuacaritia
naa pahuataquiaari Jesujiniji Pueyaso sequesano miriquitij:

¹⁸ “Niocujaari cua seru, cua saquiriojosano. Na timitiaanijia. Nojuajaari jiyanojua
panishano. Janiyari cua Sohuanu jiyaronutaniya nocuani. Nojuajaari tamasa
pueyapue pahuatanutaniya janiyajiniji, nojori quiniuria cua muerasura pueyaraca-
caanu. ¹⁹ Majaari pueyata juaajia na quiniu quiniutianiya. Majaari nacojojua
na quiniu quiniutianiya. Majaari na rupaa tojishano quiniutianiya tiacaacaco.
²⁰ Majaari quenaaja shuniitasano naajua na shutianu quiniutianiya puetunujua-
naa. Naajuhuj, majaari na maquishajanu quiniutianiya jatarinitiaja nojijano

samaritiiu. Nojuajaari naa sesa miijiaca jiyanooniutianiya, nojuaja jaara tiuquiri-ohuaajatiijaj, puetunu sesa miiniuujanaa na puecanura, jiyaniijijanaa na quini-uhuaa pueyaracaanu. ²¹ Puetunu tiquiyocuacajiniinjo quijiaca pueyajanaari nocua tiuuniutianiya”.

Pueya sequesacari Jesu samaru cumaacaracana

(Mr 3.20-30; Lc 11.14-23; 12.10)

²² Tiquiaari Jesuucua jaatucusaquiaari. Cariyojuaru quiriquiaajaariuhuaaj. Naa quiquiaariiri samaruraca na quiniuucua. Jesuuri na jeeceeree. Naacuajitij, tiquiaari pocuajara quiquiaari, niquijiarajuhuaaj. ²³ Cunora, puetunu pueyajanaari nocuaji jiuuji-atequiaari. Seqetureeri:

—¡Nio jiyoteeri pa supuetana David niquiohuacuajinio supueno pueyano, tariucua-acaanu sequesano pa jiyaniijara quiriquianotej!

²⁴ Fariseocuaca jaara tojiquiaari naa pueya sequesacari Jesujiniitij, nojoriiri na juaaniutia sequequiaari saaja:

—¡Cuno pueyanoori samaruhua tohuatanijiya Satanás cumaacata!

Satanásri samaruhua jiyaniijia. ²⁵ Jesuuri cuno pueya niishiriojosano niishiquiaari. Cunora, nojori sequeereeri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia jatashiyari. Naajuhuaaj, tiacajinia quiniaa jaara juayonuutare jiyareta tama nojorijiaaja, cuno pueyari maja na naata quiniu jatiqui. Naa-jaariuhuaaj, pueyano jaara juayonuujutare tapueyocuacata tama na tiajiniaajaaja, majaari nojori naata jatiqui quiniu. ²⁶ Jaara naa quiritij, samaruhua jaara tohuatanijiosaare Sesaaca cumaacata, tama na cuaqueya paracayajaarijia. Naacuajitij, majaari na naata na cumaaca rishiniu. ²⁷ Janiya jaara samaruhua tohuatanijiya Satanás cumaacatani, taa nia sequeya janiyacujani, cua sequeretoj, ¿cante nia niishitiojosano pueya cumaquiya samaruhua nojori tohuataniniuriani? ¿Satanáste? Majaruhua. Nojoricuajaari samaruhua tohuataniquiaa Pueyaso cumaacata. Naacuajitij, nojori tohuatanijiosacari samaruhua Pueyaso cumaacata, niaari jiyanoohua jiyajeneya nia sequesacari janiya samaruhua tohuatanijiya Sesaaca cumaacatani. ²⁸ Seetanujuanaa Pueyaso Sohuanu cumaquishacari janiya, samaruhua cua tohuatanijionura, niaa cumaati cua sequesano tojirii. Naa cua tohuatanijiosacari samaruhuatej, niaacuajaari niishiya Pueyasoori tari poonijiya juhua jiyaniijia, mijiria nia tajinia.

²⁹ ¿Pueyanote na naata cumueeca pueyano tiajinia tiuquiniu na casami na jaariuuti-nura? Maja na naata na jaariuutianu, jaara coteenu na morojijaquiri. Jaara na morojore coteenu, na nuhuaji cutara na naata na casami panu. Naajuhuaaj, janiyari Pueyaso cumaacata jaariuutiaa Sesaaca jiiitiasano pueyani.

³⁰ Cante cua jiyano quiaquiyani, cunoori cua paraca. Cante cua naacutaaquiya pueya rerecojonura Pueyasanoni, nojoriiri saaja pueya cocuataa Pueyasocujaji.

³¹ Naarate nia sequeyanijia: puetunu pueya miishano sesajanaari na naata jiyanooshaanu. Sesacojojua pueyanoori na naata jiyanooshaanujuhuaaj. Saniniuujia, cante Pueyaso Sohuanu miishano sesacajani, cunoori maja na jiyanooshaanu quiniutianiya cutara. ³² Cante Pueyaso Nyanu sesacajani, nojuajaari na naata jiyanooshaanujuhuaaj. Saniniuujia, cante Pueyaso Sohuanu sesacajani, nojuaja cutaraari jiyanoaquishaanutianiya pueyaracaanu. Na ruuretanuucua Pueyaso Sohuanu, majaari na jiyanooshaanu quiniutianiya mijiria, jiyocuacaanujuhuaaj.

Naanaari niishishano na jajaujiniiji

(Lc 6.43-45)

³³ Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacuajitij, na jajaujiniiji paari niishiyani taamueca naanatenojoni. ³⁴ Niaari juhua sacocua. ¿Niaatucua taa maninia pocuajaca quirini, niaa jaara pueyaracaanu sesa miijiaca quiyajaa? Paari poojiajiniji pa niishiriojosano pocuajaaani. ³⁵ Naacuajitij, maninia jiuujiaraca pueyanoori saaja maninia casaa pocuajaja. Sesa jiuujiaraca pueyano saniniuujia, sacuaratia casaa pocuajaja. ³⁶ Nia sequeya cutaranijia, Pueyaso saniitonu juuca, pueyari puetunu najuhanaa sesa na pocusanojini-jijianaa nequesoreesaanutianiya. ³⁷ Cante maninia casaa pocuajaja quiquiaarini, cunoori sequesaanutianiya “maninia pueyanota”. Naajuhuaaj, cante sesa casaa pocuajaja quiquiaarini, nojoriiri saniitisaanutianiya saniniuujia. Naaratej, majaari nia niti nia taquirocuatenu sacuaratia casaa nia pocuanura.

Fariseocuaca niqiniu panishacari Jesu miishano Pueyaso cumaacata

(Mr 8.12; Lc 11.29-32)

³⁸ Noojiaqueya Moisés Rootasanojiniji niishitiojonaari tii quiriquiaa Fariseocucata. Nojoriiri Jesu sequequiaari:

—Niishitiojonanaa, jiyajeneta casaa quia miiri Pueyaso cumaacata canaa niquishocoriquiano.

³⁹ Jesuuri nojori riucaaree:

—Niaari sesoriquia pueya, Pueyaso tojiyashijiaca. Majaari nia niquiara casaa cua miiniu quiniutianiya Pueyaso cumaacata. Niaari saaja niquiriyatu cutara miishano niqiniutianiya taa supuetana Jonás miishaaquiaaricuaani. Cuno Jonásri Pueyaso sequesano caminiujinua quiquiaari. ⁴⁰ Nojuajaari puereetuuca sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhua, janiyari raaco macu niojosaqui camueenujunutianiya jiuujianaraca juucani, jiuujianaraca niucuanio. ⁴¹ Jonás pohuatasacari Pueyaso rupaa Ninive tiacajinia, cuno tariucuacaanu taucuaacari noojia tacatoquiaari sesa nojori miishanojiniji. Cunora, Pueyaso nequesoreenu juuca quishacari, Ninive pueyari saneecuatunutianiya nojori tonujunura nio pa quishacari pueyacuara. Nojoriiri Pueyaso saquiriojotanutianiya nio pa quishacari pueyacuara, nojori ruuretanuucua tamonu Pueyaso sequesano caminiujinua socua jiyaniijiajanaa cutara Jonásjiniji. ⁴² Naajuhua, tariucuacaanu jiyaniijia maajiiri niquiaari tucuaaanuji pa supuetanaa jiyaniijia Salomón tojiniuucua. Cunoori quiquiaari jiyanohua nishijia Salomón quiniuucua. Cuno maajiiri pananu shuucuaaji niquiaari Salomón na tojiniuria, jiyanohua tucuaaanu na jiyajiniji. Naaratej, Pueyaso nequesoreenu juuca quishacari, cuno maajiiri sanenutianiya na saquiriojotanura nio pa quishacari pueyacuara. Nojoriicuara saquiriojotanutaniyari nojori ruuretanuucua tamonu niishijia, socua niishijia Salomónjiniji cutara.

Samaruuri na tohuatanishaquiji tacatejohua

(Lc 11.24-26)

⁴³ Samaru jaara tohuatare pueyanojiniji, joojuashiquio rucuaneyiyari na samaatejara na pajesacari. ⁴⁴ Jaara riuriataaquiri na samaatejara, naa niishiriojiyari: “Tacateyaru-huaraqui tariucua cua quiquojinohua”. Jaara tacatemohua, cuno na pueyano riuriata-suhuari juhua camaruuju tia, netoosano, maninia jeenucuasano. ⁴⁵ Naaratej, samaruuri socua tamasaca narta samaruhua pajeya. Socua siete narta samaruhua riuriataoci socua jiyanohua sesa nojuajiniji. Puetunu nojorijianaa jaara tiuquitiare cuno pueyanooocua tii na quiniuria, cuno pueyanoori na nuhuaji socua jiyanohua sesa quiijara jiyacateja.

Naa quiniutianiyajaariuhua nio pa quishacari pueyara na tojitiaaquiniuucua janiya. Nojoriiri socua sesa quiijacara jiyacatenutaniuhua taa cua niyacarijia quiijaca nojori quiquiaaricujani.

Cante seetanujanaa Jesu nucuani, tapueyocacajuhua

(Mr 3.31-35; Lc 8.19-21)

⁴⁶ Jesu pohuatasacarijia pueya niquiara, na nucuari tiuquijioquiaari Jesu tapueyocucata Jesuucua. Carijiniacuma qutiuriquiaari. Jesuta pocoojonu paniriquiaa juucuaari. ⁴⁷ Tamonu pueyanoori Jesu sequeree:

—iNiishitiojonanaa! Quia nucuacqui quia tapueyocucata carijiniacuma quiya. Quiata pocoojonu paniyaquiniaari.

⁴⁸ Jesuuri saaja na numootena pueyano riucaaree:

—¿Cante cua nucuani? ¿Cante cua tapueyocucani?

⁴⁹ Jiyacarijij, Jesuuri canaa na tojitianaa pueya shishirii. Tii quiniaa pueya sequereeri:

—Nio cua tojitianaani, nojori cutaraari juhua cua nucu, juhua cua tapueyocucata cutara. ⁵⁰ Naacuajitij, cante cua Que Pueyaso panishano miiquiaa cutarani, nojuaja cutaraari cua tarajanu, cua rimiatu, cua nucuano.

13

Natoojojua pueyanojiniji pohuatasano

(Mr 4.1-9; Lc 8.4-8)

¹ Cuno juucaja, Jesuuri tohuataquiaari tiajiniji. Caminia casaqueyaji cajishiiri. Canaari nata quiriquiaani. ² Jiyanohua queraatia pueyari nocua rerequeejoquiaari. Puera pueya quiniuucua, Jesuuri botejinia tacaquiaari. Tii cajishiiri. Puetunujanaa pueyari jaaquia-jinia jatejoquiaari, tiji na tojitianura Jesu canaata. ³ Jesuuri queraatia casaa pueya maanu niishitiojoriquiaa miriqui. Naa pohuataquiaari puetunu canaajanaari:

—Pueyanoori natoojonura quiaquiaari na cuhuariquiajinia. ⁴ Na jacutasacari, seca-jaari nucuaco totequiaari. Shuhuari nocua rosetaquiaari. Puetunujanaa nucuacoci na natau miojoquiaariiri. ⁵ Tajaacaari totequiaari tamaqui sai tajiniaqueya. Majaari puera jiya quiniu quiquiaari tii. Naaratej, cuno natauri ritia moritiaquiaari. ⁶ Pananu jaara tacaquiaari, cuno natauri ritia sorequiaari maja puera nujuacaraca na quishacari.

⁷Tajaacaari totequiaarijuhua riyocuaca tajinia. Riyocuaca maashishacari, majaari cuno natau maashiniu quiquiaari maninia. Majaari na muetunu quiquiaari. ⁸Maninia jiyajinia totequiaariiri tajaaca saniniuujia. Tii moritiaquiaari maninia cutaraari. Maninia muetquiaari cutaraari. Puetunu cuno jiyoneejinijijianaani, noojiaqueyari muetquiaari cien jajau niquiriyatu jiyonaacua. Tamonu jiyoneeri muetquiaari sesenta jajau niquiriyatu jiyonaacujahuaj. Socua tamonu jiyoneeri muetquiaari treinta jajau. ⁹Niaa jaara numaaraca quiri, nia tojitiare cua pohuatasano.

*Casaara Jesu niishitiojiya miriquini
(Mr 4.10-12; Lc 8.9-10)*

¹⁰Jesuuri naa pohuataquiaari miriqui pueya niquiaratej. Na nuhuaji, canaa, Jesu saquiriojosano pueyani, canaari nocua catecanoquiaarini. Canaari na nequesotaquiaarini:

—Jiyaniijianaa, ¿casaara pueya quia niishitiojoriquiaa miriquini?

¹¹Jesuuri canaa riucuaaree:

—Pueyasoori nia saquiriojoquiaari, nia niishishoo casaa Pueyasojiniji nia niishiniuria, taa Pueyaso poonijia pueya jiuujiajiniani, na muerasura nojori quiniuria shuquiriaa-ta. Tamasacara saniniuujia, majaari nio jiyasohuaja Pueyasojiniji niishishano nojori niishishocoriquiano. ¹²Cante Pueyaso rupaa tojija cutarani, nojuajaari socua niishitiojosaanutaniya, Pueyasojiniji jiyanoehua na niishiniuria. Cante Pueyaso tojiyashijiani, shiitianiyojua Pueyasojiniji nojori niishishanoori puetunu jaariuutiasaanutaniyajanaa nojorijiniji. ¹³Cunora, janiyari miriqui pohuatariquiaa nojori niquiarani. Naacujitij, nojoriiri najuhuaana niquiquiaa cua miishano na niishiyaquiniutia. Nojori tojishacari cua pohuatasano, na numaa shama tojitiuquiaa saajaari. Majaari quenaaja nojori niishiniu na tojishano. ¹⁴Naa nojori quiniucuatej, tari tohuateereeri juhuacarijia supuetana Isalaas sequesano nojorijiniji. Pueyara Pueyaso sequesano caminiujunia na quiniucua, nojuajaari naa sequequiaari pueyatej:

“Niaari seetanujuanaa Pueyaso rupaa tojiniutianiya najuhuanaj. Majaari nia niishiniu quiniutianiya. Niaari Pueyaso miishano niquiniutianiya najuhuanaj. Majaari nia niishiniu quiniutianiya nia niquishano. ¹⁵Nojoriiri cumajiuujiaaca quiaa. Nojoriiri juhua numeejeju, tojiyashijiaa. Nojoriiri juhua nimishitiu quiyajuhua. Naa juhua nimishitiu quitiuyari nojori niquiyaquiniucuaaji. Nojoriiri naa juhua numeejunucuaajuhua, nojori tojitiaaquiniucuaaji noojiata. Naa quitiuyari nojori niishiyaquiniucuaaji noojiata, cucua nojori tacatenuhuara cua jeeanura nojori jiuujia seque”.

¹⁶Cua pueyanaa, niaari saniniuujia shuquiriaatia quiaa maninia nia niishishacari cua miishano, nia tojishacari cua pohuatasanojuhuaj. ¹⁷Seetanujuanaa nia sequeyanijia, queraatia tariucuaaanu pueyari quiarijia nia niquishano niquiniucuaa jiaatiaquiaari juucua. Naa nio niquiniucuaa jiaatiaquiaariiri tariucuaaanu Pueyaso sequesano caminiujunia, queraatia maninia pueyanio. Majaari nojori niquiniu quiquiaari saaja. Nojoriiri nia tojishano tojiniucuaa jiaatiaquiaari juucuaajuhua. Majaari nojori tojiniu quiquiaari saaja.

*Jesu niishitiojosacari miriqui na pohuatasano natojojuajiniji
(Mr 4.13-20; Lc 8.11-15)*

¹⁸Nia pohuatareera nia niishiniuria cua pohuatasano natojojuajiniji. ¹⁹Canapute Pueyasojiniji cua pohuatasano niishiyaquiyani, nojoriiri juhua nucuaco toteno jajau. Sesaacaari niquiaa. Pueyaso Rupaa jaariutiaa noojiajinijiiri. ²⁰Noojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuquiaa. ²¹Nojoriiri juhua nujuacaaju. Majaari cumaatia na nujuatunu. Naaratej, nojori jaara naquiya miishaare Pueyaso Rupaa tojijiaa nojori quiniucua, nojoriiri ritia Pueyaso tojiniu tarinitiaquiaa. ²²Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojirii. Na nuhuaji, nojoriiri saaja puera tacaquiaa nio jiya casamiicua. Naajuhua, nojoriiri sapojosaaquiaa nojori jiyanihacari nojori jaara queraatia casamiriaca quiriquia, nojori maara shuquiriaatia quiriquiaj. Cunora, Pueyaso Rupaari maja na naata poonijionu nojori jiuujiajinia. Naacujitij, cuno pueyari juhua natau muetuhuo quiquiaa. ²³Saniniuujia, cante maninia tojijia Pueyaso Rupaani, maninia na niishiyari. Cunoori juhua jiya maniniujinia jacutasano jajau. Naacujitij, cuno pueyari juhua maninia natau, maninia muetuna cutara. Jiyanoehua maninia pueyari quiquiaa na tojishacari Pueyaso Rupaa. Naaratej, tamonuuri juhua cien jajau muetujua. Tamonuuri juhua sesenta jajau muetujua. Tamonuuri juhua treinta jajau muetujua.

Jesu pahuatasano miriqui trigo tajinia moritaja sesa jiyasocujajiniji

²⁴ Jesuuri tamonu miriqui pahuatasano pahuataquiaari pueya niquiara, nojori na niishitiojonura taa Pueyaso tojitiaashijiaca pueya quiniutianiya Pueyaso muerasu tajiniani. Jesuuri naa pueya pahuataquiaari:

—Tamonu pueyanoori maninia jajau nataquiaari na cuhuariquiajinia. ²⁵ Puetunu pueyajanaa jaara niucua maqueturiquiaa, na paracaari jiyacari niquiaari. Sesa jiyasocua jajau jaquerooquiaari trigo natasano cuhuariquiajiniaari. Na natanu nuhuaji, tacateyarohuari. ²⁶ Trigo jajauri maashiquiaari. Na nuhuaji, na jajau mueratuusacari shusha, sesa jiyasocuaari mariyata niquishaaquiaari maashiyano. ²⁷ Cuhariquia camaru seyari quiaquiaari na camarujuanaa nojori sequenura: “Jiyaniijianaa, ¿majateeri maninia saquiriojosano jajau quiquianucuaaja quia natasano cuhuariquiajiniani? ¿Teje cuno sesa jiyasocua moritiarucuaa quia natau tajiniacuaraarini?” ²⁸ Cuhariquia camaruuri nojori riucaaree: “Pa paracaari cunohuaj, naa pa miirucuaani”. Na seyari na nequesotaree: “¿Quiaate paniya canaa quianura cuno jiyasocua jayotanura trigo tajiniaqueyajiniji?” ²⁹ Na seya sequereee saajaari: “Maja. Maja nia jayotanu jiyasocua, niaa mariqui trigo na cojiritiareeri. ³⁰ Naajaa, nia tarinitiare cuaara maashiiria, mariyata cuaara noshiirijaara trigo jajau. Na nuhuaji cutara janiyari senoona jiyaronutaniyani, cuaara coteenu jiyasocua namirioora, nojori jiunioconura jiyasocua catijiasocoriquiano. Na nuhuaji cutara, cuaara trigo jajau racatatuura nataco”.

Jesu pahuatasano miriqui mostaza jajajajiniji

(Mr 4.30-32; Lc 13.18-19)

³¹ Jesuuri socua miriqui pahuataquiaari pueya niquiara, na niishitiojonura taa Pueyaso poonijiya pueya jiuujiajiniani, nocua nojori tiushacari. Naa sequereeri:

—Tamonu pueyanoori mostaza jajau nataquiaari na cuhuariquiajinia. ³² Seetanujanaa mostaza jajauri socua jiyanohua shiitianiyojua puetunu tamonu jajajajinijianaa. Naajaa, cuno mostaza jaara maashiri, socua puereetuucara maashijaari narta nataacuacajiniji. Naacuajitij, shuhuari na cashacucuaacua jesuya. Naajuhuj, pueyano tojishacari Pueyaso rupaa, seetanujanaa maninia Pueyaso muerasura jatanishiyari.

Jesu pahuatasano miriqui pan poreetajajiniji

(Lc 13.20-21)

³³ Jesuuri nio miriqui pahuatasano pahuatarohuacuhua pueya niquiara, taa Pueyaso Rupaa poonijiya mijiriani. Nojori sequereeri:

—Pueyaso rupaari jiyanohua cumaacaraca na poonijionura juhua pan poreetaja. Maaji jaara pan poreetaja cojitiri jiuujianaraca shiitianiyojua tohuatashi mishaja trigo cashojuta, puetunujanaa na poreeteyari. Pueyaso rupaari naa cumaacaracajuhuj, pueya na jataniniuria quiariniara.

Casaara saaja miriqui sequesano pahuatasaaquiaa pueya niquiarani

(Mr 4.33-34)

³⁴ Puetunu Jesu pahuatasanojuanaa pueya niquiarani, miriqui sequesanoori quiquiaari. Puetunu na pahuatasanojuanaari naa quiquiaaritij. ³⁵ Naacuajitij, maninia tohuateequiaariiri tariucuaaanu pueyara Pueyaso sequesano caminiujiunia sequesano, jaara nio naajiotajajiniji:

“Pueyasoori naa sequeyaquij: ‘Janiyari pueya niishitiojonutaniyani saaja miriqui cua pahuatasano. Naacuajitij, janiyari pueya pahuatanutaniya pueyaracaanu nojori niishishoo casaani, shusha jiya shipinishaanujiniji’ ”.

Jesu niishitiojosacariuhua miriqui na pahuatasano sesa jiyasocujajiniji

³⁶ Na nuhuaji, Jesuuri pueya maanu sequereee:

—Tariucuaaja pueyanaa. Nia quiojorohua.

Na nuhuaji, nojuajaari na quijia tajinia tacaarohua. Jiyacaritij, canaa, na saquiriojosano pueyani, canaari nocua catecanoquiaarini. Canaari Jesu sequereeni:

—Canaa quia niishitirijia miriqui quia pahuatasano cuno sesa jiyasocujajiniji.

³⁷ Jesuuri canaa sequereee:

—Janiyacuaajaari cunoni, maninia jajau natojojuaani. ³⁸ Nio jiyari juhua cuno cuhuariquia. Pueyaso muerasuuri juhua cuno maninia jajau, cuhuariquiajinia natanoni. Tamasacaari saniniujia Sesaaca muerasu quia. Nojoriiri juhua cuno sesa jiyasocua, cuhuariquiajinia natau tajinia maashinioni. ³⁹ Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senoosacari quiniutianiya. Jiyocuaaanuji Pueyaso seyari juhua cuhuariquia senoona quiniutianiya. ⁴⁰ Naatej, taa sesa

jiyasocua namitiashiya catijasocoriquianocuaani, naa quiniutianiyajaariuhua nio jiya puequesacari. ⁴¹ Janiyari cua seya jiyaronutaniya jiyocuaaanujini. Nojoriiri sesa miijiaa quioonutaniya, mariyata canapue te tamasa miiquiquiaa sesani. ⁴² Nojoriiri quejoosanutaniya mani quiquiojinia. Nojoriiri tii sapuenutaniya pueyaracaanu. Naquiya na miishacari, na quiaa miaquenutaniyari. ⁴³ Na nuhuaji, Pueyaso tojtiajacaari jiyanhua shacantuucara quiniutianiya juhua pananu, na Que Pueyaso jiiτίαςacari nojori pueyaracaanu. Cante numaaracani, cuaara tojtiaara cua sequesano.

Jesu pahuatasano miriqui jiyanhua panishano casaajiniji

⁴⁴ Jesuuri canaa na pueya pahuataquiaari miriqui, Pueyaso muerasu pa quiniuni, cunoori jiyanhua panishano. Nojuajaari naa sequequiaaritiij:

—Tamonu pueyanoori tamasa cuhuariquia tajiriquiaa juucua. Casaa riuriatamaari, jiyanhua panishano casaa. Tiijia na jamorohuari tee na quiriquiaacuajani. Jiyanhua na shuquiritiasacari na riuriatasano casaa, puetunujuanaa tama na casamijiaaja niqutiojoreeri queraatia cumaneeca na jiiťianura. Na nuhuaji, puetunu na cumaneecajanaa pataareeri cuno cuhuariquia camaruucua, cuno cuhuariquia na masenura. Naacujitij, cuno jiyanhua na panishano casaari tama na casaara quiquiaarijiaaja. Naajuhua, socua jiyanhua panishano cutaraari, Pueyaso pueyanora nia quiniuria. Cunoori jiyanhua socua panishano puetunu pa panishano casaajinijianaa.

⁴⁵ 'Socua nia tojiri nio pahuatasano. Casami niqutiojonaari pueyaracaanu rucanejoriquiaa shanhua cohuajaaca tiujiau na pajenura. Cunoori noturu shipinijosano sai quiquiaari. ⁴⁶ Tamonu juuca, jiyanhua shanhua noturu saajia niqutishaquiaariiri. Jiyanhua na panishano. Naaratej, puetunu na jiiťiasanojuanaa niqutiojoquiaariiri, cumaneeca na jiiťianura, cuno na panishano casaa na masetajara. Na nuhuaji, puetunujuanaa na casami samitia masequiaari cuno noturu saajiaari, jiyanhua na panishano. Naajuhua, nia tarinitiare puetunu nia panishano casaajanaa, Pueyaso pueyara nia quiniuria seetanujuanaa.

Jesu pahuatasano miriqui shiyarujiniji

⁴⁷ 'Pueyaso Rupaari juhua puereetuuca shiyaru na camaru jartasano caminiajina. ⁴⁸ Jaara mishaja quiquiaari sapitiaajata, pueyari na jayotaquiaari jaaquiajiniara. Queraatia tamaatiuniucua sapitiaajari tii quiriquiaa. Pueyari jaaquiajina cajituuquiaari saaja maninia sapitiaaja nojori saquiriojonura. Canaasatujinia na niojotureeri racatasocoriquiano. Sesa sapitiaajari saniniujia jacutasaaquiaari. ⁴⁹ Naa quiniutianiyajaariuhua jiiya puequesacari. Naacujitij, Pueyaso seyari rosetanutaniya, sesa miijiaa na saquiriojonura maninia pueya tajiniji. ⁵⁰ Na nuhuaji, sesa pueyari quejoosanutaniya mani quiquiojinia, taa sesa sapitiaaja jacutasaaquiaaricuaani. Nojoriiri tii sapuenutaniya. Na quiaa miaquenutaniyajaariuhua naquiya na miiniutia.

Pueyaso Rupaari jiyanhua panishano: tariucuaaanu naajiotasano, quiari naataja naajiotasanio

⁵¹ Jesu pahuatanu puecasacari, canaa na pueya nequesotaquiaariiri:

—¿Niaate maninia niishirii puetunu cua pahuatasanojuanaacuaja?

Canaari Jesu riucareeni:

—Taaquiriirinij jiyaniijianaa.

⁵² Jesuuri canaa sequere:

—Maniniacuajaqui. Tariucuaaanu Pueyaso Rupaajiniji niishitiojona jaara quiarinio cua niishitiojosano Pueyasojiniji niishirijuhua, nojuaja cutaraari Pueyaso Rupa niishijia seetanujuanaa. Nojuajaari juhua tia camaru, cante tariucuaaanu shanhua casamiriacuajani, quiarinio casamiriacuajuhua, na tiajiniaaco racatasano. Na panishacari, na camaruuri na racatasanojiniji na panishano rijia.

Jesu quishacari Nazaret tiacajinia

(Mr 6.1-6; Lc 4.16-30)

⁵³ Jesu jaara puecaquiaari miriqui pahuatanu, tiji quiaquiaariuhuari. Canaari na nuhuajiriquiaani. ⁵⁴ Canaari na maashijia tiacajinia tiuquiquiaariuhua. Canaa tiuquijiosacari, canaari Pueyaso secjojua tiajinia tiuquiquiaarini. Jesuuri tii pueya niishitiojonu coteequiaari. Pueyari juujiatequiaari na niishitiojosano nojori tojshacari. Nojoriiri tama sequequiaarijiaaja:

—¿Taa nio pueyano niishiya puerajaarani? ¿Tejenotejaara na cumaacani, cusosuhua na naatanijonurani? ⁵⁵ Na shipininiocujaari suruhuatujiniji casaa shipinijona quijia. Na nucuacuajaari María. Na tapueyocuaari Santiago, José, Simón, Judasno. ⁵⁶ Na rimiatuhuari mariyata niya pa tajinia quiya. ¿Taa na niishiya puerajaarani?

⁵⁷ Naaratej, pueyari na ruuretaquiaari saaja. Naa na tiacajinijinio pueya tojitiaquiaacari nojuajatej, Jesuuri nojori sequequiaari:

—Puetunu tiqiyocua pueyajanaari maninia tojitiaquiaacari cutara Pueyaso sequenu panishano caminiujunia. Saaja narta pueya tama na jiyajinijiniojuaarijia na tojitianu paniyaquia, tama na tiajinijiniojuaaja pueyano.

⁵⁸ Naa nojori ruuretanuucua Jesutej, majaari puera na cumaacata na miiniu quiquiaari tii, nojori tiuyaquinuucua nocua.

14

Herodes motesacari Tiuquinijiona Juan

(Mr 6.14-29; Lc 9.7-9)

¹ Cuno quishacari, Galilea jiya jiyaniijia Herodesri pohuatasaaquiaari Jesu miishanojiniji na cumaacata. ² Herodesri na seya sequequiaari Jesujiniji:

—¡Nojuacuajaari cua mosano Tiuquinijiona Juan! ¡Samitiarohuacuaaqi! Naacuajitij, jiyanoehua cumaaca jiitiaari, jiyajeneta casaa na miinuria Pueyaso cumaacata.

³ Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na morojoquiaariiri cumayocua shipinishano jiyocuata. Na nuhuaji, na nujuatequiaari nujuatejojuajiniaari. Herodesri naa miiquiaari na juaanuutia Juantej, Juan nacasunuucua nojuaja, Herodes quiniuucua tarajanu Felipe niqiuocuata. ⁴ Tiuquinijiona Juanri naa Herodes sequequiaari quiasano na quiyaquishacarijia:

—¡Quiaari Pueyaso tojiyashijia! ¡Majaari maninia quia quiniuria Herodias! ¡Nojuacuajaari quia tarajanu Felipe niqiuocua!

⁵ Herodesri cunora Juan monu paniriquiaa juucua. Judiocuaca puereriquiaa saajaari. Judiocuacaari niishiquiaari cutara, Juanri seetanujuanaa Pueyaso sequenu panishano caminiujunia quiquiaari. ⁶ Tiuquinijiona Juan nujuasacarijia nujuatejojuajinia, Herodesri na rasaanu juacajinia queranacuquiaari na masuusano pueyata. Jiyacari-tij, cuno maaji Herodias niyatuuiri nianujuquiaari Herodes masuusano pueya niquiara. Jiyaniijia Herodesri jiyanoehua na shuquiritiaquiaari. ⁷ Naaratej, Herodesri necanuru sequequiaari puetunu pueya niquiarajanaa:

—Sanaunaa, cua sequere casaa quia paniyani. Janiyacua quia niquitiore quia panishanoni. ¡Seetanujuanaa quia sequeyanijia! Majaari cua rupaa cua jatanu quiniutianiya. ¿Casaa quia paniniutianiyani?

⁸ Jiyacari-tij, niyacoo nucua Herodiasri neyatu rootaquiaari jiyasohuaja, casaa na masenutianiyani. Naaratej, niyacoori jiyaniijia Herodes sequesee:

—Cua quenunaa, cua niquitiore Tiuquinijiona Juan naca miacojuajinia.

⁹ Jiyaniijia Herodesri taraajequee niyacoo sequesano na tojishacari. Naajaa, majaari na naata na rupaa jatanu quiquiaari, seetanujuanaa na sequenuucua na masuusano pueya niquiara. Naacuajitij, Herodesri na seya sequequiaari cuara niquitiosaarinoj.

¹⁰ Naaratej, na pueyano jiyaroquiaari nujuatejojuajiniaari, Tiuquinijiona Juan na nacatanura. ¹¹ Na nuhuaji, Juan nacaari patasaaquiaariuhua miacojuajinia. Niyacoo niquitiosaa-suhuari. Niyacoori saniniuuja na nucuaacua na pataquiaari.

¹² Na nuhuaji, Tiuquinijiona Juan pueyari quiojoquiaari na quete na panura. Na jamotuquiaariiri. Na nuhuaji, nojoriiri nijioquiaari Jesu pohuatanuucua Tiuquinijiona Juanjiniji.

Jesu mianuutesacari cinco mil pueya

(Mr 6.30-44; Lc 9.10-17; Jn 6.1-14)

¹³ Jesu tojishacari Tiuquinijiona Juan tari mosaarucuaa, nojuajaari canaa jiyataquiaari botejinia tamaquiria, pueya quiyaquishaquiria. Pueya jaara niishiquiaari tee Jesu quiaareeni, queraatia pueyari cuno jiya tiacajiniji quiojoquiaari tiriaraajuhaaj. Nojoriiri na neteyotaquiaari nuacu caminia shuriquiuoco. Cuno pueyari canaacuaji cutesee. ¹⁴ Naacuajitij, Jesu rosesacari botejiniji, jiyanoehua queraatia pueya niqishii saajaari. Nojoricua taraajereeri. Cuno pueya patootasano cusosuhua naatanijioreeri. ¹⁵ Tariucua tenacari, canaa, Jesu saquiriojosano pueyani, canaari nocua niquiaarini. Canaari na sequereeni:

—Canaa Jiyaniijianaa, paa niya quiya pueya quiyaquishaquini. Paari nininiutianiyani. Juhuacarijia pueya quia sequere nojori cuara quiojohuara tiacajinia, na miaqueso-coriquiano nojori masenura.

¹⁶ Jesuuri canaa sequeree saaja:

—¿Maatucua casaara quiojyaruhanu? Niaa mariqui nojori mianuutere saniya.

¹⁷ Canaari Jesu sequereeni:

—Maja canaa jiitianu miaquesano. Niya quiya saajaari cinco pan, caapiqui sapitiaa-janio.

¹⁸ Jesuuri canaa sequere: e:

—Miji nia patare.

¹⁹ Jesuuri sequeree pueya cuaara cajitiuuria jiyasocuajinia. Na nuhuaji, Jesuuri cuno pan pataree, sapitiaajanio. Jiyocuacaanu maureeri na Queecua, miaquesanoocua na seconjura. Na nuhuaji, Jesuuri pan neecasequiaari queraatiara. Canaa na niqutiojoreeri puetunu pueyajanaa canaa niqutiojosocoriquiano. ²⁰ Puetunu pueyajanaari miaque-nuuquiaari. Maninia tooquioreeri. Nojori puecasacari miaquenu, canaari pan neeca reratequiaariuhua, sapitiaaja raquiquiano. Doce canaasatuuri mishinijiosaaquiaari na raacuata. ²¹ Jiyanojua queraatia pueyari miaquenuquiaari; cinco mil quiquiaari saa canuuja. Majaari maajipohua serojosaanu quiquiaari, naatujoorinio.

Jesu rucuanesacari mohuaca caco

(Mr 6.45-52; Jn 6.16-21)

²² Na nuhuaji, Jesuuri canaa na saquiriojosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhua. ²³ Pueya jaara tari quiojoquiaariuhua, Jesuuri tuhananuucua tacaquiaari tamajaaja, na Que Pueyaso na seconjura. Jaara niniquiaari, Jesuuri tii quiriquiaa tamajaaja. ²⁴ Canaari saniniuujia caminia jiuujiajinia tari jaare-tariquiaacuani. Mohuacaari saaja canaacuaa cajiniucuariquiaa, paratu piyarojosacari canaacua. ²⁵ Juhuaquenu panishacari, Jesuuri canaa rupusee mohuaca caco na rucuanenuta. ²⁶ ¡Canaa niquishacari casaa mohuaca caco rucuaneyano, canaari jiyanojua shiriqutiuriini! Canaari sariyocuatereeni.

—¡Yae! ¡Samaruhua!

²⁷ Jesuuri ritia pocuaree. Canaa sequereeri:

—¡Niojia nia cumaquiri! Janiyacuajanijia. Maja nia puerenu.

²⁸ Canaa tojishacari Jesu, Pedroori Jesu sequere:

—Jaara seetanujanaa quiajanija quiri Jiyaniijanaa, cua sequere quiocua cua quianura mohuaca caco!

²⁹ Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiri Jesuucua na quianura. ³⁰ Na niquishacari paratu jiyanojua piyarojiano, Pedroori puerequiaari. Na pueresacari, moo cariquimia tiuquiniu coteequiaariiri. Nacareeri:

—¡Jiyaniijanaa cua quiare!

³¹ Jesuuri ritia Pedro juaashiquiajiniji quiaree. Na sequereeri:

—Pedronaa, majaqui puera quia tiuuniu cucua. ¿Casaara cua sequesanoocuaiji quia taacanuureeni?

³² ¡Nojori jaara botejinia tacataquiaariuhua, paratuuri jiyacari pueyajeeque! ³³ Canaa niquishacari naa Jesu miishano na cumaacatej, canaari Jesuucuaa mojuquetaco-quiaarini. Canaari na sequereeni:

—¡Quiaaqui seetanujanaa Pueyaso Niyanu!

Jesu naatanijosacari cusosuhua Genesaret jiyajinia

(Mr 6.53-56)

³⁴ Canaa jaara caminia taquijiria niuutiaquiaarini, canaari Genesaret jiyajinia shiiti-aseeni. ³⁵ Genesaret pueya jaara niishiquiaari Jesu tiuquirii, nojoriiri puetunu na jija-jinijanaa pueya numootequiaari, cuaara patootasaaria cusosuhua Jesuucua. Naacuajitij, Jesuucua patootasaquiaariiri puetunu cusosuhujanaa. ³⁶ Pueyari Jesu sequetquiaari:

—Nareja quia shanacure cusosuhua quiocua, nojori cuaara quia tucuaque toque quiaara quenaaja, nojori naataconuhua.

Jesuuri naa miirii. Puetunu na toque quianaajanaari naatacoquiaariuhua na cusonu-jiniji.

15

Casaate sesa miitijia pueyanoni

(Mr 7.1-23)

¹ Na nuhuaji, Jerusalén tiacajinijinio pueyari canaacua tiuquijioquiaari Jesuta pocoon-jonura. Nojoriiri quiquiaari Fariseocua, Moisés Naajioneejiniji niishitiojanaanio. Jesu sequetureeri:

²—Quia pueyari shuquitioojua miaquenuuquiaa. ¿Casaara nojori tojtiaaquiquiaa canaa niishitiojosano pa supuetanaajinjini? ¡Nojori cuara miiria taa pa supuetanaa miiquiaar-icuaani!

³ Jesuuri nojori nequesotaree saniniuuja:

—¿Niajanitarihuaj? ¿Casaara nia tojtiaaquiquiaa saniniuuja Pueyaso Rupaani, nia supuetanaa jiitishano miiniu nia miiniuriani? ⁴ Pueyasocuajaari sequequiaari: “Quia que tojjia quia quiri, quia nucua tojjianio. Majaari nojori rerequetenu”. Naacuajitij, maninia pa cojuare pa queya. Pueyasoori sequequiaarijuhuaj: “Cuaara mosaaria cante na que sesacajani, na nucua sesacajanio”. ⁵ Niaari saniniuuja sequequiaacujua, maniniacuajaari pueyano jaara na queya sequere: “Cua quena, cua nucuaana, janiyari Pueyasora niqutionantania cua casamini. Naacuajiti majaari cua naata nia naacunu cua jiitiasano casamitia”. ⁶ Naa nia niishitiojosacari pueyatej, niaari pueya tarinitiya na queya nojori cartenura, naacuso nojori quiniuria. Naa nia tojjishacari tama nia niishitiojosanojuaaja juhua nia supuetanaa nia miiniuriatej, niaari Pueyaso Rupaa jiyateya najuhuanara. ⁷ ¡Sapueno Pueyaso Rupaa tojtiajacanaa! Supuetana Isaíasquiiri maninia naajotaquiaaricuaaja nijaniyajinjini, na caminiujiushacari nio rupaa Pueyasojinjini:

⁸ “Nio pueyari saa na rupaataja cua maniniuhuaqueetaquiaa. Nojori jiuujiaari saniniuuja tucuaaanu quia janiyajinjini. ⁹ Nojoriiri najuhuaana rerejoquiaa na maniniuhuaqueetanura janiya. Nojori niishitiojosanoori tama nojori niishishanojuaaja, maja cua rupaa”.

¹⁰ Na nuhuaji, Jesuuri puetunu pueyajanaa sequere:

—Miji, nia cua tojtiasecuarajaj maninia nia niishiniuria. ¹¹ Pa miasanoni, cunoori maja sesara na jiyatenu poojia. Pa rupaata pa pocuasano sesani, cuno cutaraari poojia sesojua.

¹² Jiyacaritij, canaa, Jesu saquiriojosano pueyani, canaari nocua catecanoquiaarini naa canaa sequenura nojuaja:

—Jiyaniijianaa, ¿quiaate niishiya Fariseocuaaari juaaquioree naa quia sequesacaritij?

¹³ Jesuuri canaa riuquaree:

—Naajaa. Cuara juaaquiorea. Cuno pojoriiri juhua sesa jiyasocua, Sesaaca natasano cua Que cuhuariquiajina. Nojoriiri juhua sesa jiyasocua jayotasaanutaniya. ¹⁴ Seetanujanaa Pueyaso niishiyashijaca nojori quishacari, nojoriiri juhua cariyojuaru quia. Narta cariyojuaru jaatucuyari. Cariyojuaru jaara narta cariyojuaru jaatucure juucua, nojoriiri mariyata raama totenutaniya.

¹⁵ Pedroori Jesu sequere:

—Jiyaniijianaa, canaa quia niishitiojoreja casaa quia sequenu paniriquiaa quia pohu-atasacari pa miasanojinijini.

¹⁶ Pedro riuquareeri:

—¿Niaateeri na niishiyaquiyaajuhua? ¹⁷ ¿Majateeri nia niishiniu, pa miaquesano pa rupaataari pa seecojinia tiuquia saaja? Na nuhuaji, pa marecuhucuma tajimiaari. ¹⁸ Saniniuuja, pa rupaata pa pocuasano sesani, cunoori poojiajinijini tohuataa cutara. Naacuajitij, pueyanoori sesa quia Pueyaso niquiara, sesa casaa na pocuanuucua. ¹⁹ Pueyano jiuujiajina coretaari puetunu sesa niishiriojosanojanaa: monu paniniu; na camishoo maajipohua numuetucunu paniniu; saaja numuetucunuua jiaatianu; nohuasejonu paniniu; sajonota saquiriojotanu paniniu; sacuaraatia coriaacojonu paniniu. ²⁰ Puetunu naa sesa pueya niishiriojosanojanaa cutaraari pueyano sesojua. Saniniuuja, pueyano jaara miaquere shuquitioojua, naajaa. Cunoori maja na sesonu pueyano Pueyasora.

*Taatu tiuushacari Jesuucua
(Mr 7.24-30)*

²¹ Jesuuri Genesaret jiyajinjini quiaquiaari canaa na pueyata. Canaari quiojoquiaari tamonu taucuaa jiyajinarani. Cuno jiyajinia quiquiaariiri Tiro tiaca, Sidón tiacajuhua. ²² Canaa rucuanjosacari tii, cuno jiyajinjini taatuuri Jesuucua niquiaari. Nojuajaari Cananeo pueyajinjini maaji quiquiaari. Jesu nuhuaji nacariquiaari:

—¡Jiyaniijianaa, cucua quia taraajere! ¡Pueyaso Jiyarosanaana, cucua quia taraajere quenaaja! Quiyatu samaru jiitia. Jiyanohua taraatia na miiquiaari.

²³ Jesuuri maja na riuuanu quiquiaari. Sanaa canujuriquiaa saajaari. Naaratej, canaari Jesu catecanoquiaarini canaa sequenura nojuaja:

—¡Jiyaniijianaa, na panishano quia miiri cuara quiohuara! ¡Tajeta naca pa nuhuajini!

²⁴ Jesuuri canaa riuquaree:

—Janiyari saaja Israel pueyacua jiyarosaaquiaarini. Nojoriiri juhua borregohua tashuquiono. Nojoriicua taraajeyanija.

²⁵ Cuno maajiiri Jesu sequesano tojirii. Naajaa, Jesu cariquimiaji mojoquetaseeri. Na sequereeri:

—¡Jiyaniijianaa, cua naacutare!

²⁶ Jesuuri na riucuaaree:

—Majaari maninia pa jaariutianura pa niqiuohua miaquesano, sare niqiuohua niqiuohua niqiuohua saniniuujia.

²⁷ Maajiiri saaja na sequereeri:

—Maniniacuaja quia sequesano Jiyaniijianaa. Naajaa, sareyaniojuacuajaari miaquesano shiriya miaquenuquiaa, na camaru totinijosano na miaquejajini.

²⁸ Jesuuri maaji sequereeri:

—Maniniacuaja quia sequesano maajinia. Quiaaqui jiyanoahua cucua tiuya. Cuaara quiriiaqui taa quia paniyacuajani.

Jiyacaritij, neyatuuri naataquiariuhua.

Jesu naatanijosacari queraatia cusosuhua

²⁹ Canaari Jesuta cuniquiji quiaquiaariuhua. Canaari Galilea caminia shuriquiuco tajimiaani. Canaari tuhananuucua tacatamaani. Jesuuri tii cajishii. ³⁰ Queraatia pueyari nocua nijioquiaari. Nojoriiri queraatia cusosuhua niojotaquiaari Jesu shuriucua, nojori tiacajini nojori patootasano. Cusosuhuari quiquiaari shipiiniquiujiuniaa pueya, cariy-
ojuarujurinio, tiqianucujuhua, sesarunecatohuanio, socua queraatia tamaatia cusosuhuanio. Jesuuri nojori naatanijosacari puetunjuanaa. ³¹ Pueyari jiuujiatequiaari nojori niqushacari tiqianucua pocoyano, shipiiniquiujiuniaa rucuaneyano maninia, cariy-
ojuarujuri niqushacari maniniajuhuaj. Naajuhua, sesarunecatohuari maninia numatucuaraca quiquiaariuhua. Naa pueya niqushacari Jesu miishanotej, nojoriiri Pueyaso maniniuhuaqueetaree. Sequetureeri:

—¡Jiyanoahua maninia Israel pueya Pueyaso!

Jesu mianuutesacari cuatro mil pueya

(Mr 8.1-10)

³² Na nuhuaji, Jesuuri canaa na saquiroijosano pueya sequereeri:

—Miji pueyanaa. Nio pueyacua taraajeyanijia. Nojoriiri tari jiuujianaraca juuca camueenujiya niya pata. Majaari nojori jiitiatunu quenaaja casaa na miaquetusocoriquiano. Majaari cua jiyaronu paniniu miaqueyojua nojori, nojori mariqui na miaajenuta cusojo-
niuyarohua nucuacoori.

³³ Canaari Jesu nequesotareeni:

—¿Canaatucua tee riuriatate queraatia miaquesano nio queraatia pueyarani? Niya, majaari pueya quiniu quenaaja.

³⁴ Jesuuri canaa nequesotaree:

—¿Taa pan nia jiitiaani?

Canaari na riucuaareeni:

—Canaa saaja siete pan jiitiaani, secaja sapitiaajaniyujuanio.

³⁵ Jesuuri pueya sequereeri na cajituniuria. ³⁶ Na nuhuaji, Jesuuri cuno siete pan pataree, sapitiaajanio. Jesu jaara na Que secojoquiaari coteenu miaquesanoocua, na nuhuaji na neecasequiaariiri canaa niqiuohua pueya. ³⁷ ¡Puetunu pueyajanaari maninia miaquenuquiaari! Tooquioreeri. ¡Canaari miaquesano cureenota mishinijosacari siete canaasatuni! ³⁸ Queraatia pueyari na miaquenuquiaari. ¡Saaja canuuri serojosaquiaari cuatro mil pueya! Majaari maajipohua serojosaanu quiquiaari, naatujoorinio. ³⁹ Na nuhuaji, Jesuuri pueya sequereeri nojori quiojonuhua. Na nuhuaji, Jesuuri canaa jiyataquiaari botejinia Magdala jiyajiniara.

16

Fariseocuaca, Saduceocuaca niqiniu panishacari Jesu miishano Pueyaso cumaacata

(Mr 8.11-13; Lc 12.54-56)

¹ Fariseocuacaari Saduceocuacata Jesuucua nijioquiaari nojori saniniujiunioria no-
juaja. Nojoriiri Jesu sequequiaari:

—Casaa quia miiri quia cumaacata canaa niqushocoriquiano, canaa niishinioria quiaate seetanujuanaa Pueyaso jiyarosano.

² Jesuuri nojori sequereeri saaja:

—Jiya jaara naatuuca quiri pananu tiuquishacari, niaari sequequiaa: “Maninia juucaqui tariqui quiniutianiya”. ³ Naajuhua, pananu jaara tariquicuaji jama, niqiuohua jaara niqushaarejuhuaj, niaari sequequiaa: “Maruqui niniutianiya”. Niaari naa ni-
shiquiaa taamueca juucate quiniutianiyani jiya nia niqushacari. ¡Mosanucuaana! ¿Casaara

saniniujuja nia niishiyaquiya casaa Pueyaso niishitiojiya juucua nijaniyani? Nojuacajaari juucua na cumaacata na miishano miiquiaa nia niquiara najuhanaj.

⁴ Jesuuri nojori niquiara sequereejuhuj:

—Nio sesoriquia pueya, Pueyaso tojitiaashijiacani, nojoriiri Pueyaso cumaacata cua miishano niquiniu paniya juucua. Majaari nojori niqutishaanu quiniutianiya socua. Nojoriiri saaja nio niqiriyatu Pueyaso cumaacata miishocoriquiano niquiniutianiya: janiyari miishaanutaniyani taa supuetana Jonás miishaacuaricuaani.

Naa Jesu sequenu nuhuajitij, nojori tarinitiaqueeri. Canaari quiaqueeni.

Jesu numootesacari na pueya Fariseocuaca niishitiojosanoocuaji
(Mr 8.14-21)

⁵ Canaa niuutiasacari caminia taquijiria, canaari canaa coseyaca panu niyajetaquiaari canaa sasocoriquianoni. ⁶ Jiyacaritij, Jesuuri canaa sequeree:

—Niishijica nia quiri. Tama nia cuaqueyajaaja nia cojuare Fariseocuaca pan poreetajaacuaji. Saduceocuaca pan poreetajaacuajinio.

⁷ Cunora, canaari tama sequetooreejaanijia:

—¿Casa na sequeyani? Pan pa paaquiniucua naa pa sequeya jiyoteeri.

⁸ Jesu niishishacari naa canaa sequesanootej, canaa sequereeri:

—¿Majateeri juhuanajuaja cucua nia tiuuniu maninia? ¿Casaara tama nia pocoojiyajaaja panjinijini? ⁹ ¿Majateeri juhuanajuaja nia niishiniu tari cua miishanojiniji? ¿Niaateeri tari niyajarucuaa taa canaasatu mishajate cureecanuni, cinco mil canuu jaara miaquenuucanu cinco panjinijitij? ¹⁰ Naa jiyoteeri niyajarucuaajuhuj taa canaasatu mishajate cureecanuni, cuatro mil canuu jaara miaquenuucanu siete panjinijitij. ¹¹ ¿Casaara nia jiyaniiriini janiya miaquesanojiniji sequeriquiaani? Maja cua sequenu panjiniji. Nia sequeriquiaanijia tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

¹² Naa na sequesacaritij, canaari jiyacari niishiquini majaari Jesu sequenu quiriquiaa pan poreetajajiniji. Canaari shusha niishiquini Jesuuri miriqui canaa numooteriquiaa tama canaa cuaqueyajaaja canaa cojuanura Fariseocuaca niishitiojosanoocuaji, Saduceocuaca niishitiojosanoocuajinio.

Pedro sequesacari Jesuuri seetanujuanaa Pueyaso Jiyarosano
(Mr 8.27-30; Lc 9.18-21)

¹³ Canaa tiuquijiosacari Cesareya Filipino tiaca jiyajinia, Jesuuri canaa nequesotaree:

—¿Taa pueya sequequiaa janiyajinijini, cantena janiyani?

¹⁴ Canaari Jesu riucaareni:

—Noojiaqueya pueyari sequequiaa, quiaanaari Tiuquinijiona Juan. Herodes motesano naasucuaanaari samiitiarohuacuaa. Tamasacaari sequequiaacujua, quiaanaari Elías, tariucuaaanu pueyara Pueyaso sequesano caminiujunua. Tamasacaari saniniujuja quia sequequiaacujua, quiaanaari supuetana Jeremías, pueyara Pueyaso sequesano caminiujunua, tamonu Pueyaso sequesano caminiujunua soj.

¹⁵ Jesuuri canaa nequesotarohua socua:

¿Niajaniyariuhuj? ¿Taa nia sequeyanijia? ¿Cante janiyani?

¹⁶ Simón Pedroori na riucaaree:

—¡Quiaacuajaari Pueyaso Jiyarosano! Quiaari Cristo, Pueyaso Niyanu.

¹⁷ Jesuuri Simón Pedro sequerohua:

—Quiaacuajaari Pueyaso shuquiritasano pueyano, Jonás niyanunaa. Jiyocuacaanu Quijia cua Quecuajaari quia niishitirii cante janiyani. Janiyajiniji quia niishishanoori maja pueya niishitishano quiajaniya. ¹⁸ Janiyari socua sequenu paniya quiajaniani Pedronaa. Quia sesaari Pedro. Niioori pueyano rupaajinia sequeya “saajia”. Naatej, taa saajiacuaani jataniyaquishoo, quiaari cumaatia nujuataja quiniutianiya, seetanujuanaa cucua quia tiushacari, quia niishishacari janiyari Pueyaso Niyanuni. Naajuhuj, puetunu pueyajanaa cante cucua tiuuriini taa cucua quia tiuyacuani, janiyari nojori jiyatenutaniya cua muerasurani. Puetunu cua saquiriojosano pueyajanaari cumaatia nujuatunutaniya, nojori niishishacari janiyari Pueyaso Niyanuni. Naacuajitij, nojoriiri juhua puereetuca saajiacua tiasano quiniutianiya. Puetunu cua muerasujanaari juhua cua tia quiniutianiya, cua quiquio nojori quishacari. Sesaacaari maja na naata cua tia pojoretanu quiniutianiya. Majaari na naata na tarinitiniu quenaaja janiya, cua tiasacari cua quiquiora. ¹⁹ Naajuhuj Pedronaa, quiaari juhua cua quiquio tiotiu riatataja jiiitiana quiniutianiya. Naacuajitij, quiaari coteenu pohuatanutaniya pueya niquiara janiyajiniji, nojori tiuuniuria cucua, juhua Pueyasocua nojori tiuquiniuria na muerasura nojori quiniuria. Naajuhuj, quiaa jaara rootare taate Pueyaso muerasu naata miiniu

maniniani, Pueyasoori sequenutaniya cuaara naa quiiariatej. Naajuhuaaj, quiaa jaara casaa tenujure, maja naa pueya miiniuriatej, Pueyasoori naa sequenutaniyajuhuaaj.

²⁰ Na nuhuaji, Jesuuri canaa na pueya rootaree maja canaa pohuatanura tamasaca niqiuara nojuacuajaari Pueyaso Niyanu.

Jesu numootesacari na pueya, nojuajaari mosaanutaniya
(Mr 8.31–9.1; Lc 9.22–27)

²¹ Jiyacaritij, Jesuuri canaa pohuatanu coteequiaari taa nojuaja miishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judiocuaca jiyaniijianucuaari tii cua miiniutianiya naquiya jiyanoahua. Pueyacuara secojonaa jiyaniijianucuaari nojori rupenutaniya naa cua paracaashaanurajuhuaaj, mariyata tariuucacaanu Moisés Naajoneejiniiji niishitiojonaani. Naacuajitij janiyari mosaanutaniyani. Jiuujianaraca juucajnia, janiyari samiitianutaniuhuaani.

²² Naa Jesu sequesacaritij, Pedroori Jesu jaatucuree tamocora na nacasunura tamajaaja. Jiyanoahua Jesu sequereeri:

—¡Maja naa pocuanutej! ¡Pueyaso cuaara cojuara quiajaniya maja naa quia miishaanuratej!

²³ Jesuuri saaja Pedro nijiniaquequee. Na sequereeri:

—Niiquiji quia quiaare Satanásnaa! ¡Quia sanaajere! Sesaacaari naa quia pocuaterree Pedronaa. Quia sequesanoori maja Pueyasojiniji. Quia niishiriojosanoori juhua mijiria pueya niishiriojosano saaja. Naa quia sequesacaritij, quiaari cua Que sequesanoocuaij cua tarinitiniu paniya juucua.

²⁴ Na nuhuaji, Jesuuri canaa na pueya sequequiaari:

—Pueya jaara cua tojjijara quiniu paniya, nojori cuaara carteera tama nojori panishanojuuaaja. Na nuhuaji cutara, cuaara miiria cua panishano, tama na cuaqueya na panitianutajaaja cucuara. ²⁵ Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyanoahua taraatia quiniutianiya. Saniniuuja, cante tama na cuaqueyajaaja panitiaa cucuara mijiriani, cuno pueyanoori na nuhuaji pueyaracaanu shuquiriaatia quiniutianiya cutara. ²⁶ Naajuhuaaj, pueyano jaara masere puetunu nio jiya casamijianaa, na casamiiri najuhuana quiniutianiya nera, na camaru jaara jatasaare mani quiquiojinia na shaajesacari. Nojuajaari maja na naata Pueyaso jiyanoootiniu tama na cuaqueyajaaja, naajaa, nojuaja jaara puetunu na casamijianaa niqitioore Pueyaso, Pueyaso samiitianiniuhuaa nojuaja.

²⁷ Janiyacuajaari jiyanoahua shacantuuca quijjara quiniutianiyani, cua Que jiyatesacari janiya Jiyaniijiarajanaa. Na nuhuaji, janiyari mijiria niniutianiuhua jiyocuacaanuji cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niqitiosaanutaniya maninia nojori miiniuucua. Pueyaso tojjitiaashijiaacari saniniuuja naquiya miishaanutaniya, sesa nojori miiniuucua. ²⁸ Seetanujuanaa nia sequeyaniija, noojiaqueya nijaniyajinijinio niya cuata quiyani, majaari nia shaajenu quiniutianiya juhuanujuaja, niaa cuaara niqiriijaatijia Pueyaso cumaaca cucua tiuquiyano, cucua tiuujiaa jiiitariquiano.

17

Jesu jatasacari shacantuucara
(Mr 9.2–13; Lc 9.28–36)

¹ Seis juuca nuhuaji, Jesuuri nio pojori jiyataquiaari jiyaconaja tuhuananuucua. Nojoriiri quiquiaari Pedro, Santiago, Santiago tarajanu Juannio. Jiyareta tama nojoriijaariija quiaquiaari. ² Jesuuri tii tamaatiara jataquiaari nojori niqiuara. Na jiquicoori jiyanoahua shacantuucara jataquee, juhua pananu. Na toqueeri mariyata jiyanoahua cohuajara jataquiaarijuhuaaj, juhua cuhuatana. ³ Jiyacaritij, nojoriiri caapiqui supuetanaa niquirii, Moisés, Elíasnio. Jesuta pocoojoriquiaari. ⁴ Cunora, Pedroori Jesu sequereeri:

—¡Jiyaniijianaa, canaaqui namitia niya quiyani! Quiaa jaara paniri, canaa quicuajaji suhuoronutaniyani, Moisésrajuhuaj, Elíasranio.

⁵ Pedro pocuasacariija, shacantuuca najacaari nojori mishiquioma. Najacajiniji, ru-paari tojjishaaquiaari naa sequeyano:

—¡Niioori cua Niyannunioyua, cua shuquiritiasano! ¡Saaja nojuaja nia tojjitiare!

⁶ Naa nojori tojjishacari Pueyaso pocuaanotej, nojoriiri jacamatuquiaari jiyanoahua na puerenuta. ⁷ Jesuuri nojoriicua nimiaa. Nojori quiaaseeri na juaashiquiata. Nojori sequereeri:

—Nia saneecuatuurohua. Maja puerenu.

⁸ Nojori jaara niquinijionuquiaari, majaari tari na niquitiuniu quiquiaari cuno supuetanaa. Saaja Jesuuri quiriquiaa.

⁹ Nojori rosetasacariuhua tuhuananujiniji, Jesuuri naa nojori rootaquiaari:

—¡Majaari nia pohuatanu pueya niquiara tuhuananujiniji nia niquishano! Niocua na pohuatarohua cutara janiya jaara samiitarohuani.

¹⁰ Na pueyari Jesu nequesotaree:

—¿Casaara tariucuacaanu Pueyaso Rupaajiniji niishitiojona sequequiaacuaraarini, supuetana Eliasnaari quiocuaji mijiria niniutianihua coteenu, pueya na jiyanoootenuhuara necohuata?

¹¹ Jesuuri riucuaaree:

—Eliasri seetanujuanaa coteenu niriquiano quiquiaari, puetunu pueya jiuujiaajanaa na jeenucuanura. ¹² Janiya cutaraari nia sequeyani, Eliascuajaari tari niquiaari. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricuajani. Nojoriiri naa cua miiniutianiya naquiyajuhua.

¹³ Naa Jesu pohuatasacari Eliasjinijitij, na pueyari niishiqui nojuajaari Tiuquinijiona Juanjiniji pohuatariquiaa miriqui.

Jesu naatanishacari samaruraca caya samijia

(Mr 9.14-29; Lc 9.37-43)

¹⁴ Jesu jaara tuhuananujiniji tiuquijioquiaari canaacua, tamonu pueyanoori nocua catecanoquiaari canaata quiniaa maanujiniji. Jesuucuaa mojoquetaseeri na sequenura neyanuucuaa. ¹⁵ Jesu sequereeri:

—¡Jiyaniijianaa, cua niyanuucua quia taraajere quenaaja! ¡Nojuajaari pueyaracaanu cusojoquiaa! Na jiiitasano cusunuuri na taquiriocatequiaa. Na cusojosacari miiquiaa naquiyari. Naacuajitij, sequeyarucua manijinia tiquiaari, moojiniano. ¹⁶ Janiyari quia pueyacua na tiuquitiasee na naataniniuria juucuaani. Nojoriiri maja na naata na naataniniu.

¹⁷ Jesuuri cunora sequereee:

—¡Niaaqui Pueyasooocua tiuyashijiaca, na tojiyashijiacanío! ¿Janiyateeri nia rejeretanutaniya pueyaracaanuni? ¿Taaacari nia niishiniutianiya Pueyaso tamajaajaarini? Miji nia jaatucuma cuno mueya.

¹⁸ Mueya tiuquishacari nocua, Jesuuri samaru juaari. ¡Na tohuatereeri! Jiyacaritij, caya samijiaari maninia quiquihua.

¹⁹ Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriquiaani?

²⁰ Jesuuri canaa riucuaaree:

—Maja puera maninia nia tiuuniu juhuanojuaja Pueyasooocua. Seetanujuanaa nia sequeyanijia, nia tiuuniu Pueyasooocua jaara quiriquia shiitianiyojua juhua mostaza jajau quenaaja, jiyacari cutaraari nia naata miiniu puetunu nia panishanojuanaa. Naacuajitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”. ²¹ Saniniuujia, jiyano samarutej, na naata tohuatanishano cutara saaja Pueyaso nia secijosacari nia miaqueyaquiniutia.

Jesu pacutesacari pohuatanu nojuajaari mosaanutaniya

(Mr 9.30-32; Lc 9.43-45)

²² Tamonu juuca Jesu rucoojosacari canaa na pueyata Galilea jiyajinia, Jesuuri canaa sequereee:

—Janiyari sapojonuta niqutiosaanutaniya taucuaani. ²³ Nojoriiri cua monutaniya. Jiuujianaraca juucajinia, janiyari samiitianutaniuhuani.

Naa Jesu sequesacari canaatej, canaari jiyanohua taraajequiaarini.

Cumaneeca niqutiosacari Pueyaso Secojoua tiaacuara

²⁴ Canaa jaara tiuquijioquiaari Capernaum tiacajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojoua tiaacuara. Cuno pueyanoori Pedro nequesotaree:

—¿Majate nia niishitiojona niqutionu na cumaneeca Pueyaso Secojoua tiaacuara, taa pa jiyaniijianucua sequequiaaricuajani?

²⁵ Pedroori na riucuaaree:

—Na niqutioquiaanocuaaja.

Na nuhuaji, Pedro tiuquishacariuhua na tiajinia, Jesuuri na nequesotaree:

—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿teyano pueyajiniji cumaneeca maseshiyani? ¿Tama na pueyajinijitij, taucuaajiniji soj?

²⁶ Pedroori Jesu riucuaaree:

—Taucuaca niquitiojoteshiyanocuaaja nojori jiya jiitiana sequesano.

Jesuuri na sequeree:

—Naacuaaquiniatejaj. Naacuaajitij, tama na pueyajaarijia maja na niquitionu. Pueyaso Secojoja tiacuaajaari cua Que tia. Naaratej, maja cumaati Neyanu sequesaanu na niquitionura na cumaneeca. ²⁷ Naajaa, pa niquitiore juhuari nojori sequesano, paa mariqui nojori juaatiriiri. Nocuaaji quia rioosee caminiajinia. Quiocua coteenu quia jatasano sapitiaaja rupaama niqiri. Quiaari tii cumanee riuriatanutaniya. Quiocua cuno cumanee niquitiosuhua nojori, quiria, quiarajuhuj.

18

Cante jiyaniijajanaa cutarani

(Mr 9.33-37; Lc 9.46-48)

¹ Jiyacaritij, canaa, Jesu saquiriojosano pueyani, canaari Jesuucua catecanoquiaarini naa canaa nequesotanura nojuaja:

—Jiyaniijajanaa, canaa quia sequeretoj, puetunu quia pueyajinijiniojuanaani, ¿cante jiyaniijajanaa cutarani?

² Jesuuri naatujua piiri. Canaa tajinia na nuuatereeri.

³ Na nuhuaji, Jesuuri canaa sequeree:

—Nia niyaretare socua tojishano pueyano nia quiniu paniniu tamasaajini. Seetanujanaa nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muerasura nia quiniu quiniutianiya quenaaja. ⁴ Naacuaajitij, cante tama na cuaqueyajaaja jiyateya pueya shocoteyashijia na quiniuria juhua naatujuaani, nojuajaari socua jiyaniijajanaa quiniutianiya cutara narta Pueyaso muerasujinijinio. ⁵ Naajuhujaj, cante naatujua maseja maninia na paniniucua janiyani, nojuajaari cua maseyajuhujaj.

Paari cocuaatia miyani sesa pa miishacari

(Mr 9.42-48; Lc 17.1-2)

⁶ 'Sesa cutaraari, sesa nia miitiniuria cucua tiujia naatujua. Socua maninia cutaraari sesa miitiriqiano pueyanora, nojuaja jaara juhuacarjia caminia queronijinia jartasaare puereetujajau saajia na riquiajiniji morotasano. ⁷ ¡Mijiria quiniaari jiyanoehua cocuaatia miiquiaa sesa na miitishacari tamasa! Mijiria, pueyari pueyaracaanu sesa miitishaaquiaajuhuanajaj. ¡Taraatia quiniutianiya cutaraari noo pueyanora, cante sesa miitirii tamonuni!

⁸ 'Nio miriqi cua niishitiojosano nia tojiri: nia juaashiquia, nia niohuaca jaara sesa miitiya niajaniya, nia rashiquiarenoj, tucuaaanu jatsacoriquiano. Naa nia miiri niaa mariqui mani quiquiojinia jataasaareeri puetunu nia cuaqueyatajanaa. Socua maninia cutaraari juaashiquiaaju, niohuacaaju nia tiuquitianura Pueyaso quiquiojinia jiyocuaaanu. Niaari tii quiniutianiya shuquiriaatia pueyaracaanu. ⁹ Naajuhujaj, nia namijia jaara nia miitiri sesa, nia jiatere. Tucuaaanu nia jatarenaj. Jiyanoehua socua maninia cutaraari niaara, jiyocuaaanu nia tiuquiniuria namijijiu, maja nia jataasaanura mani quiquiojinia, saniitiosacoriquiano puetunu nia namijiaatajanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyanoehua canaa miiniu panishano, cuno jaara sesa miijiaara jiyateriquia canaa.

Jesu pahuatasano miriqui borrego tashucuanojiniji

(Lc 15.3-7)

¹⁰ Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniucuaaji tamonu muerasuniyojua, juhua nio mueyaja. Cua tojitiare. Pueyasocuaajaari na seya seerataquiaa nojori cojuanura muerasu. Cuno na seyari pueyaracaanu cua Que Pueyaso jiquioco shootiaquiaa. Naajuhujaj, Pueyasocuaajaari na muerasuranooocua niishiriojoquiaa. ¹¹ Naaratej, janiyari mijiria niqiaarini tashucuaano pueya cua pajenura, nojori cua jaariuutianura Sesaaca.

¹² '¿Taa nia sequeyani pueyanaa? Tamonu pueyano jaara cien borregohua jiitiare, niqiriyyatujua jaara tashucure tapueyocuaajiniji, ¿majateeri na camaru na borregohua cureeno tujuanu rupaquijia, tashucuaano na pajenura? Taaquiriiriniji. ¹³ Jaara na riuriatate, seetanujanaa socua jiyanoehua cuno borrego tashucuaano shuquiritaari tamasa na borregohujajiniji. ¹⁴ Naajuhujaj, jiyocuaaanu quijia nia Queeri maja na paniniu quenaaja niqiriyyatujua nio muerasujinijinio tashucuanura puetunurajanaa.

Taa pa jiyanoya pa tarajanuni

(Lc 17.3)

¹⁵ 'Quiarta Pueyaso pueyano jaara sesa miiri quiajaniya, nocua quia quiaare na naca-sunura tamajaaja nia niishacari. Nojuaja jaara tojiri quiajaniya, maniniacuajaari. Niaari maninia rupuetoojuacara quiniutianihuacuahuaj. ¹⁶ Nojuaja jaara tojijaquiri quiajaniya saniniuuja, nocua quia quiaare socua tamonu pueyanota, caapiqui pueyata soj. Nojori niqiarua quia nacasure cuno sesa miinia. Niaa jaara naa miiritij, naa quiniutianiyari taa tariucuacaanu Pueyaso Rupaajinia niishitiojosaquiaricujani: "Querajaa pueya jaara mariyata pohuatate na niquishano, na tojishanojuhuaj, cunoori maja sapojonu". Naacua-jitij, nojori saquiriojotasanoori seetanujuanaa quiniutianiya. ¹⁷ Cuno sesa quia miinia jaara nia tojiniu paniyaquiya saaja, puetunu niarta Pueyaso pueya niquiarajanaa quia pohuatate sesa na miishano. Cuno pueyano jaara tojiniu paniyaquiri puetunu Pueyaso pueyajanaa, nojuaja cuara quiriia juhua Pueyaso niishiyashijia niaara. Naacua-jitij, majaari socua nia rupuenunoj.

¹⁸ 'Seetanujuanaa nia sequeyanijia, cana nia jiyanoyaquiri miijiriani, na tojiniu paniyaquishacari niajaniya, cunoori jiyanoyaquishano quiniutianiya jiyocuacaanu cua Que Pueyasarajuhuj. Naajuhuj, cana nia jiyanoori miijiria na tojishacari niajaniyani, cunoori jiyanooshano quiniutianiya jiyocuacaanu cua Que Pueyasarajuhuj.

¹⁹ 'Naajuhuj, janiyari seetanujuanaa sequeya niajaniyani. Caapiqui niajaniyajinijinio jaara mariyata niishiriojore nia panishanoocua nia secojonura Pueyaso, cua Queeri nia tojiniutianiya. Nojuajaari jiyocuacaanu nia naa maninia miiniutianiya niaara, taa nia secojosacari nia sequereecuajanoj. ²⁰ Querajaa niajaniyajinijinio jaara rerejore, cucua tiuujiaca nia quishacari, janiyari tii niarta quiyajaanihuaj. Naacua-jitij, cua Queeri nia secojosano tojiniutianiya cutara.

²¹ Jiyacaritij, Pedroori Jesu nequiesotasee:

—Jiyaniijianaa, tamonu pueyano jaara sesa miiniu pacutejore janiya, ¿janiyatucua pueyaracaanu na jiyanoorini? ¿Majateeri tariucuaja, janiya jaara na jiyanoori siete sesa na miishanojiniji janiyani?

²² Jesuuri Pedro riucaaree:

—Maja naatej Pedronaa. Maja quia tarinitianu na jiyanooni. Pueyaracaanu sesa na miishacari quiajaniya, pueyaracaanu quia jiyanoori quarta pueyano. Majaari quia serojonu sesa na miishano quiajaniya. Pueyaracaanu quia jiyanoori saaja.

Jesu pohuatasano jiyanooyashijia serujiniji

²³ 'Naaratej, cua tojiri pueyanaa. Nia pohuatateera nia niishiniuria taa Pueyaso paniya jiyanoootiojuaca na muerasu nia quiniuriani. Tamonu jiya jiyaniijaari nera poonijionaa pueya sequequiaari nojori cuara tari niqutiojora nojuaja na cumaneeca, nojori na niqutiojosanojiniji na casami. ²⁴ Noojiaqueya nera poonijionaa pueya jaara tari nojori pasano casamijiniji niqutiojori quia cuaa tama nojori cumaneecajinijijaaja, jiyacaritij, tamonuuri tiuquinishaareejuhuaj. Nojuajaari jiyanoohua queraatia casami masejoquiaari na jiyaniijiajiniji, queraatia millón cumaneeca. ²⁵ Nojuajaari maja na jitianu quiquiaari na cumaneeca, na jiyaniijia na niqutionuhua. Na jiyaniijaari cunora na pueya se-queere: "Tamonu camarnu nia niqutiojore nio cua seru, necocuataja, cua cumaneecara, necohuajuhuj, puetunu na casamijianaano. Naacua-jitij, na cuentaari puegunutianiya". ²⁶ Cuno na seru tojishacari naa na jiyaniijia sequesantej, nocua jacamaquiaariiri. Na jiyaniijia sequereeri: "¡Cua tarinitiare quenaaja cua jiyaniijianaa! ¡Rupaquijiaa cua tarinitiarejaara! Janiyacuajaari quia cumaneeca niqutionutianiya puetunujuanaani". ²⁷ Na jiyaniijaari nocua taraajeree. ¡Na carterohua puetunujuanaari! Naa na jiyanooriiri, nocua na taraajenuuca.

²⁸ 'Cuno seru tohuatasacari jiyaniijia tiajiniji, narta seruta naacuneetooreeri. Cuno narta seruuri tarijia masequiaari shiitianiyojua casami cuno jiyanooshano serujiniji. Secaja cumaneecaari quiquiaari na cuenta. Naajaa, cuno jiyanooshano seruuri narta seru quiaaree. Cumaatia na riquiajinia na miniriiri. Na sequereeri: "¡Ritia cua niqutiojore cumaneeca, tarijia quia masesano janiyajiniji!" ²⁹ Narta seruuri na riquiajinia mininia cariquimijia mojoquetaree. Na sequereeri: "¡Cua tarinitiarecuara quenaaja! ¡Janiyacuajaari quia cumaneeca quia niqutionutianiya!" ³⁰ Majaari na sashiniu paniniu quiquiaari. Saaja na nujuatequiaari nujuatejojuajiniaari cuara na cumaneeca na niqutiojorejaatijia. ³¹ Narta seya niquishacari naa cuno jiyanooshano seru miishantej, nojoriiri jiyanoohua taraajequiaari. Nojoriiri jiyaniijaacua quiojoquiaari puetunu sesa narta seru miishanojuanaa nojori pohuatanura. ³² Naaratej, jiyaniijaari tamonu na seru jiyaroree cuno jiyanooshano seru riniucua. Na tiuquishacari, jiyaniijaari na juaarii. Na sequereeri: "¡Quiaaqui jiyanoohua sesajuhuanajaj! Quia sequesacari janiya, janiyari quia jiyanooriicuaani, maja quia naata niqutionu quishacari quia cumaneeca. ³³ ¿Majateeri quia naata quiri quiaa taraajenu cuarta seruucua, taa cua taraajeree quiocuacuani?"

³⁴ Jiyaniijiaari jiyanoehua juaarii. Cunora, cuno sesa miiijia seru jiyarotareeri nujuatejo-juajinia na nujuatesaanura. Sequereejaaariuhuaq cuaara naquiya miishaaria tii, cuaara puetunujuanaa na cumaneeca niquitiorejaatijia, casami na pasanoinijii.

³⁵ 'Nia Que Pueyasoori naa miiniutianiya niajanijajuhuaq, niaa jaara seetanujuanaa jiyanoyaquiri niarta Pueyaso muerasu.

19

Jesu niishitiojosano maja pa niquiocua pa cartenura

(Mr 10.1-12; Lc 16.18)

¹ Jesu jaara naa pohuatanu puecaquiaaritiq, canaa na pueyata quiaquiaari Galilea jiyajiniijii. Canaari Judea jiya shuriucua tiuquishii Jordán moo taquijiriani. ² Jiyanoehua queraatia pueyari Jesu nuhuajiyaree. Quiniqi canaa quishacari, Jesuuri cusosuhua naatanijioree.

³ Jiyacaritiq, noojiaqueya Fariseocacajiniijinoori Jesuucua nijioquiaari sesa na pocu-atenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maniate pa cartenura pa niquiocua, jaara pa juaatiri?

⁴ Jesuuri nojori riucaaree:

—¿Majate nia serojonu quiquiaacuaja Pueyaso Rupaajinia? Coteenujuanaa Pueyaso shipinishacari pueyano, Pueyasoori shipiniquiaari caya, maajinio. ⁵ Naaratej, nojori shipininiiaari sequequiaari: “Caya cuaara tiujiaara na que, na nucuanio, necocuata na quiniuria. Nojoriiri juhua niquriyatu pueyanora quiniutianiya na camitioosacari”. ⁶ Naaratej, caya, maaji jaara camitioore, majaari tari na quiniu caapiqi pueyano. Juhua niquriyatu pueyanojuuari quiquii. Naacuaajitiq, majaari maninia Pueyaso rupuetootesano rupartanura.

⁷ Nojoriiri Jesu sequeree:

—Jaara naa quiritiq, ¿casaara supuetana Moisés rootaquiaaricuaarini caya cuaara naajionee niquitioora necocua, na cartenu panishacari?

⁸ Jesuuri nojori riucaaree:

—Moiséscajaari niishiquiaari niaari puera cumajiuujiaaca. Naaratej Moisésri nia tarini-tiaquiaari nia niquiocua nia cartenura. Coteenujuanaa, Pueyaso jaara shipiniquiaari caya, maajinio, majaari naa na quiniu quiquiaari. ⁹ Cua tojitiare pueyanaa. Janiyari nia sequeya cutarani. Cante necocua carteree najuhuanani, tamonu maajitia na caminiuria, coteenu necocua jaara tamonu cayata quiyaquiri, neyacaari jiyanoehua sesa miya Pueyaso niqiuara. Jaara naa miiritij, Pueyasora, nojuajaari sesoriquia pueyano. Nojuacuajaari juhua pueyano, cante narta pueyano niquiocua numuetucujani. Naajuhuaq, cante cartesano maaji camiyani, naa sesa miyajaariuhuaq.

¹⁰ Canaa, Jesu saquiriojosano pueyani, canaa tojishacari naa Jesu sequesantej, canaari na sequereeni:

—Jaara naa quiritiq taa quia sequeriquiaacuajani, maninia naasucuaari maja mashaja caminiuria. ¿Naatejaaratej?

¹¹ Jesuuri canaa riucaaree:

—Maja na naata puetunu pueyajanaa nio cua niishitiojosano tojinii. Saaja noojiaqueya pueya cutaraari na tojiniutianiya, noo pojori canapuete jiyocuaaanuji cumaaca niquitioosareeni na tojiniuria. ¹² Naajuhuaq, noojiaqueya canuuri maja na naata caminiu, riyacajajaaju nojori quishacari. Nojoriiri naa rasanohuanajaj. Tamasaca canuuri maja na caminiu saniniuuja, jiatejosano nojori riyacajajau quishacari. Tamasacaari maja na caminiujuhuaj tama nojori panyaqushacarijiaaja, saaja Pueyasora nojori poonijionu panishacari. Cante na naata naa miiniuni, cuaara naa miiriatej.

Naatujooriicuaa Jesu secojosacari Pueyaso

(Mr 10.13-16; Lc 18.15-17)

¹³ Na nuhuaji, pueyari Jesuucua nitaquiaari necohua juucua, Jesu nianura nojoriicua na juaashiquia, nocuara na seconjura Pueyaso. Canaa, Jesu saquiriojosano pueyani, canaari saaja nojori tenujeree canaa juaaniutiani. ¹⁴ Jesuuri saniniuuja canaa sequeree:

—¿Maja nojori tenujunu! Nia tariniutare naatujoori cuaara cucua nijioora. Nia tojiri, canapuete seetanujuanaa juhua nio naatujoorini, nojoriiri Pueyaso muerasu quiriquiano.

¹⁵ Na nuhuaji, Jesuuri na juaashiquia niaquiaari naatujooriicua, nojoriicua na seconjura, Pueyaso miiniuria maninia nojori. Na nuhuaji, Jesuuri quiniquiji quiaquiaariuhua.

Jiyanoehua casamiriaca mashaja pocoojosacari Jesuta

(Mr 10.17-31; Lc 18.18-30)

¹⁶ Tamonu mashajaari Jesuucua niqiuiaari. Na nequesotaseeri:

—Niishitiojonanaa. Quiaari maninia pueyano. Cua sequere, ¿taa cua miiniutianiyani maninia cua quiniuria Pueyaso niquiara, pueyaracaanu quijiara cua quiniuriani?

¹⁷ Jesuuri na riucaaree:

—¿Casaara quia sequeya janiya maninia pueyanotani? Saaja niquiriyatujaaari maninia quijia cutara. Nojuacuajaari Pueyaso. Naajaa, quiaa jaara maninia quiniucua jiaatiaa Pueyaso pueyano quia quiniuria, quia tojiri tariucuacaanu Moisés Rootasano Pueyaso-jiniji.

¹⁸ Jesu riucaareeri:

—¿Teyano rootasanoteni?

Jesuuri na sequeree:

—Maja quia monu. Maja quiarta pueyano niquiocua quia numuetucunu. Maja quia nohuasenu. Maja quia saquiriojotanu tamonuucua quia sapojonuta. ¹⁹ Quia que, quia nucua tojjia quia quiriqia. Maja nojori quia rerequetenu. Mariyata quiarta pueyano quia paniri taa quia paniyacuaa tama quia cuaqueyajaani.

²⁰ Mashajaari Jesu sequeree:

—Janiyacuaajaari puetunujuanaa nio tojjia quiquiaari cua naatujuajinjini. ¿Casaa cua miiniutianiya socuani?

²¹ Jesuuri na sequeree:

—Quiaa jaara seetanujuanaa maninia quiniucua jiaatiaa Pueyaso niquiara, quia quiaarohua quia tiajinia. Quia niquitiojore puetunu quia casamijianaa cumaneecara. Na nuhuaji, casamijiuniucua quia niquitiojore nareja quia cumaneeca. Naacuajitij, quiaari queraatia casami jitianutaniya jiyocuaaanu. Na nuhuaji, quiocua nimiohua cutara, cua tojjia quia quiniuria.

²² Na tojishacari naa Jesu sequesantej, mashajaari taraatia quiaarohua jiyanohua casamiriaca na quiniucua.

²³ Jiyacaritij, Jesuuri canaa sequeree:

—Seetanujuanaa nia sequeyanijia, jiyanohua jiyajenetaari pueyano tojiniuria Pueyaso, na pueyano na quiniuria, cuno pueyano jaara puera jiyanohua casamiriaca quiri. ²⁴ Pueyanaa, ¿camelloteeri na naata cusupuetaja cuhuoco tamajiria tajiniu? Maja na naata. Cua tojitiare. ¡Socua jiyanohua jiyajenetaari casamiriaca pueyanora, Pueyaso pueyanora na jatanishaanura!

²⁵ Canaa tojishacari naa Jesu sequesantej, canaari jiyanohua jiuujatereeni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitioj?

²⁶ Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na panishanojuanaa na miiniuria.

²⁷ Pedroori Jesu sequeree:

—¿Canaarijataj? Canaari puetunu canaa casamijianaa tiujiaquiaarini canaa rupenura quiajaniya. ¿Casaa canaa masenutaniyarinjia?

²⁸ Jesuuri canaa riucaaree:

—Seetanujuanaa nia sequeyanijia. Nio jiya maniniushitishacarihua, janiyari cajiniutianiyani jiyaniijia cajitijinia puetunu cua Quejiniji shanohua cua cumaacatajanaa. Jiyacaritij cua pueyanaa, niaari mariyata cajitijosaanutaniya doce jiyaniijia cajitiucaajinia. Niaari pa supuetana Israel doce niquiohuacuajinio caneno pueya nequesorenaa quiniutianiya. ²⁹ Cua pueya tojiniuria janiya, noojiaqueya nojorijinjinioori na tia tiujanutaniya, tapueyocuaa, na rimiatuhua, na que, na nucua, necohua, na cuhuariquiano. Canapuee naa tiujiaquiaa na tojiniuria janiyani, cuno pojoriiri Pueyasojiniji socua jiyanohua queraatia masenutaniya nojori tiujiasanojiniji. Nojoriiri pueyaracaanu shuquiriaatia quijia quia quiniutianiyajuhua, shaajeyashijia. ³⁰ Saniniuujia, queraatia tojishano pueyari Pueyaso shocotasano quiniutianiya na tojtiaashijia nojori quiniucua. Naajuhua, mijiria, queraatia pueyari juhua shocotasano pueya quia Pueyaso niishiyashijia pueyara. Cuno pojori jyanishano najuhua quijiacani, nojoriiri Pueyaso shuquiritasano pueya quiniutianiya cutara.

20

Jesu pahuatasano cuhuariquiajina poonitijosano pueyajiniji

¹ Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaru miiquiaari na poonitijosano pueyacaani. Cuno cuhuariquia camaruuri quiaquiaari tariquicuajij pueya na pajenura na uva cuhuariquiajina nojori

poonijionura. ² Cuhuariquia camaruuri pueyata pocoojoquiaari taa cumaneeca na niq-
 uitionutaniya cuno juuca nojori poonijiosanojinijini. Poonijionaa pueyari na sequeree:
 “Maniniacuajaari taa quia sequereecuajani”. Na nuhuaji, cuno pueya jiyaroreeri uva
 cuhuariquiaari nojori poonijionura. ³ Pananu tacasacari, cuhuariquia camaruuri to-
 huataquiaariuhua na tijinjini. Jiyacaritij, socua tamasaca pueya niquishiiri juhuajaniya
 quiyano tiaca jiuujiajina curotasano cajitiucujajinia. ⁴ Cuhuariquia camaruuri nojori
 sequese: “Nia quiaarejuhuaj, cua uva cuhuariquiajina nia poonijionura. Janiyacua
 cumaneeca nia niqutiorohua nia poonijionu samini”. ⁵ Naacuajitij, nojoriiri quiojo-
 quiaari cuno cuhuariquiajina poonijionurajuhua. Na camaruuri socua tohuataquiaari-
 iuhua panacari. Socua tamasaca pueya niquishiiri juhuajaniya quiyano tiaca jiuujiajina
 curotasano cajitiucujajinia. Nojori sequereeariuhua nera nojori poonijionura cuno
 juuca. Pananu mueecosacari, socua pueya riuriataquiaariiri. Nojori jiyaroree poonijionu-
 cuajaariuhua. ⁶ Tariucua pananu piriushacari, na camaruuri socua tohuataquiaari-
 iuhua. Socua tamasaca pueya niquishiiri tiaca jiuujiajina curotasano cajitiucujajinia
 najuhua quiyano. Nojori sequereeri: “¿Casaara nia quiojiaquiyaree poonijionuucuanu?
 ¿Casa nia miya niyani? Naa mariqui poonijiore”. ⁷ Nojoriiri na riucaare: “¿Canaatucua
 taa poonijioreni, canaa jaara pajeshiaquiri poonijionurani?” Cuhuariquia camaruuri
 nojori sequere: “Nia quiaarequi cua cuhuariquiajina nia poonijionura. Janiyacua nia
 poonijionu sami cumaneeca nia niqutiorohuani”. ⁸ Pananu tiuquishacari, cuhuariquia
 camaruuri na casami cojuana sequere: “Cua poonitijosano pueya quia piiri miji, nojori
 rerejonura. Na nuhuaji, cua sequesano cumaneeca quia niqutiojore puetunu nojorijianaa
 taa cua sequeree coteenujuanaa quiria poonijionaacujani. Majaari rimiajata nojori
 niqutiojonu. Coteenu quia niqutiojore tariucua pananu piriushacari cua jiyaramiquis-
 hano. Naa quia niqutiojore puetunjuanaa. Quiocua naa tucutare niqutiojonu noo
 pojorijuhua, canapueete tariquicuaji coteeree poonijionucujani”.

⁹ Jiyacaritij, tariucua pananu piriushacari poonitijosano pueyari nijiomaa. Puetunu
 nojorijianaari cumaneeca niqutiosaaree taa cuhuariquia camaruuri coteenujuanaa tariqu-
 icuaji poonijionaa pueya sequerequiaricujani. Majaari rimiajata nojori niqutiosaanu
 quiquiaari cumaneeca, nojori poonijionu sami. ¹⁰ Na nuhuaji, coteenujuanaa poonijionaa
 pueyari sequesaaquiaari na cumaneeca nojori masenura. Nojoriiri jyaniquiaari nojori
 naasucuaari socua cumaneeca niqutiosaanutaniya rupaquijia poonitijosano pueyajiniji.
 Nojoriiri saaja niqutiosaaree taa cuhuariquia camaruuri sequeree nojori cuno juucacujani.
¹¹ Nojori masacari na cumaneeca, nojoriiri cuhuariquia camaruuri juaaquiore. ¹² Na
 sequetureeri: “Cuno pueyari saaja rupaquijia poonijiore. Quiaari nojori niqutiojore
 taa quia niqutiojore canaacuaani. Canaari pananucari cateree cutarani, pueyaracaanu
 canaa poonijosacari”. ¹³ Cuhuariquia camaruuri tamonu nojorijinijinio sequeree saaja:
 “Sanajanaa, maja sesa cua miiniu quiri quiajaniya. ¿Majateeri quia niishiniu, paa jaara
 tariquicuaji pocoojoriquiaatej, janiyari juhuacarijia quia sequereeni janiyari naa cumane-
 eeca quia niqutionutaniyani? Quiaari cua riucaare: ‘Maniniacuaja’. ¹⁴ Naaratej, quia
 jiyatarohua quia cumaneeca quia tijinjiohua. Janiyacuajaari naa niqutionu paniriquiaa
 tariucua pananu piriushacari na poonitijosano pueyani, taa cua niqutiojore quiajaniy-
 acuana. ¹⁵ ¿Majateeri cua naata miiniu tama cua panishanojuaja tama cua cumaneecata-
 jaaja? ¿Quiaateeri socua cumaneeca cua jiaatijara quiqui, capora cua quiniucua?”

¹⁶ Na nuhuaji, Jesuuri naa sequerequiarijuhua, na pohuatanojinijini na niishitiojonura:
 —Naa quiniutianiyari taa cua sequerequiaacuajani: canapueete nuhuajishanaani, no-
 joriiri coteetanaa quiniutianiya. Naajuhua, cante coteetanaani, nojoriiri nuhuajishanaa
 quiniutianiya saniniujuja. Queraatia masuusano pueyari quia. Saniniujuja, secajaari
 saquiriojosano quia nojorijinijinio.

Jesu camishacariuhua pohuatanu taa na mosaanutaniyani

(Mr 10.32-34; Lc 18.31-34)

¹⁷ Tari Jesu quiasacari Jerusalén tiacajiniara, Jesuuri canaa na doce saquiriojosano
 pueya piirii tamocora nuu shuriuquicora, tamajaaja canaata na pocoojonura. Canaa
 sequereeri:

¹⁸ —Cua tojiri. Niaacuajaari niquiya paa tari Jerusalén tiacajiniara tacataani. Janiyari
 tii niqutiosaanutaniya pueyacuara secojona jyanijianucuanu, Moisés Naajioneejiniji
 niishitiojanaano. Nojoriiri cucuara saquiriojotanutaniya nojori sapojonuta cua mosaa-
 nura. ¹⁹ Nojoriiri cua niqutionutaniya taucua. Cuno pojoriiri cua rerequetenutaniya.
 Cua majacutunutaniyari. Na nuhuaji, niyacutesanojinia cua teetetunutaniyari tii
 cua cusonura. Jiuujanaraca juucujinia janiyari macujiniji samiitianutaniuhua.

Santiago, Juan nucua sequesacari Jesu, maninia na miiniuria necohua
(Mr 10.35-45)

²⁰ Jiyacaritij, Zebedeo niquiocuaari Jesuucua catecanoquiaari necohuata. Jesuucuaara mojoquetaseeri Jesu na sequenura nera na miiniuria na panishano. ²¹ Jesuuri na sequeree:

—¿Casaa quia paniyani?

Jesu riucaareeri:

—Quiaa jaara Jiyaniijiaa jiyatesaare, quiocua cua niquiocua cajitijiore quia shuriucua, Santiago, Juannio. Tamonu cuara cajiria quia miaquetajara, tamonu quia muenecara, quia naacunaa nojori quiniuria, juhua jiyaniijianucuaajuhua.

²² Jesuuri Santiago sequeree, Juannio:

—Majaari nia niishiniu casaa nia maseyani. ¿Nia naatateeri rejeretanu naquiya miiniu taa cua miishaanutaniyacuaani?

Nojoriiri saaja Jesu riucaaree:

—Taaquiririni. Canaa naatacuuaaquiniatejaj.

²³ Jesuuri nojori sequeree:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu niajaniya, cante cua miaquetajara cajiniutianiyan, cua muenecarano, Jiyaniijia cua quishacari. Saaja cua Que cutaraari tari na saquirojosano pueya sequenutaniya cua shuriucua nojori cajitiuniuria, teyano pojoricuaji na jeenucaquiaaricuaani.

²⁴ Canaa, narta saquirojosano pueyani, canaari Juan juaariini, Santiagonio, canaa tojishacari nojori masesano juucua. ²⁵ Jesuuri saniniuuja canaa sequeree:

—Miji pueyanaa. Niya cua tojitiasee. Niaacuajaari niishiya, mijiria jiyaniijianucuaari na pueya poonitijioquiaa juhua tama na seyajaaja. Mijiria camarucuaari taraatia mi-iquiaa na pueya, nojori na mitishacari puetunu na panishanojuanaa. ²⁶ Niajaniya saniniuuja, majaari naa nia quiniu quiniutianiya. Naacuajitij, cante tojishano pueyano quiniu paniya niajaniyajiniinjioni, cuno cuara quiiria narta Pueyaso pueya cumaquinia. ²⁷ Cante nia jiyaniijia quiniu paniyani, cuno cuara quiiria juhua nia seru, maninia na miiniuria niajaniya, naatej, taa cua miiquiaa niajaniyacuaani. ²⁸ Janiya cutaraari Jiyaniijiani. Naajaa, majaari mijiria cua ninu quiquiaari pueya cua poonitijionura quiria, shuquiriaatia cua quiniuria tamajaaja. Niquiaari cutaranijia pueya cua naacunura, tama janiyajaja mosaanura pueya niti, queraatia pueyacuaji cua ritianura Sesaaca.

Jesu jeecasacari caapiqui cariyujuaru namijiaa

(Mr 10.46-52; Lc 18.35-43)

²⁹ Jesuta canaa quiasacari Jericó tiacajiniji, jyanohua queraatia pueyari Jesu nuhua-jiriquiaa. ³⁰ Jiyacaritij, caapiqui cariyujuaruuri nuu shuucuaaji cajitiuriquiaa. Nojori niishishacari Jesuuri nojori tajiriquiaa, nojoriiri nacanuu coteequaari:

—¡Jiyaniijianaa! ¡Canaacua quia taraajere! Quiaacuajaari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

³¹ Pueyari nojori juaarii nojori sanaajetanura juucua. Nojoriiri saaja jiyacatequee nacanura:

—¡Jiyaniijianaa, canaacua quia taraajere, Pueyaso Jiyarosanonaa!

³² Jesuuri socua nujuasee. Nojori sequereeri:

—¡Miji! ¿Casaa nia paniya cua miiniuria niajanianarani?

³³ Jesu riucaatureeri:

—¡Jiyaniijianaa, canaa namijiaa quia jeecare!

³⁴ Jesuuri nojoriicua taraajeree. Nojori namijiaa quiareeri. ¡Nojoriiri niquijiacara quiquii! Na nuhuaji, Jesuucua sacuaaree canaataari.

21

Jesu tiuquishacari Jerusalén tiacajinia

(Mr 11.1-11; Lc 19.28-40; Jn 12.12-19)

¹ Canaa quiojosacari, canaari socua tiuquijioosee Betfagé tiacajiniani, Olivo nacuhua tuhuananu shuriucua. Cuniquiji, majaari puera tucuacaanu quiquiaari Jerusalén tiacajiniara. Jiyacaritij, Jesuuri caapiqui canaa na pueyajiniinjio sequequiaari:

² —Cuno tiacajinia nia quiaare, noj pocuaji niquishiyatej. Niaari tii riuatanutaniya niquiojuaraca burro morotasano. Niocua na samaacartasee. Niocua miji na jaatucuyarohuanos, necojuataja. ³ Pueya jaara nia tenujunu paniri nocuaji, niocua na sequere: “Jiyaniijia na paniya. Ritia na tacatonutanihuacuaja”.

⁴ Naa tohuateequaariiri tariucuaaanu Pueyaso sequesano caminiujunia sequesano, nojuaja jaara naa naajotaquiaari Jerusalén tiacajinia quiniaa pueyara:

⁵ “Sión tiacajinia quiniaa pueya nia sequere: ‘¡Nia niquiri! Nia Jiyaniijaari burrojina niaacua niya. Maninia pueyanoori, juayashijia. Burro nijinia cajiyano, necojuaacuanio’”.

⁶ Jiyacaritij, cuarta Jesu pueyari quiaquiaari. Nojoriiri naa miquiaari taa Jesu sequequiaari nojoricuajani. ⁷ Nocua jaatucutuquiaariuhua burroori, necojuataja. Na nuhuaji, Jesu cajijiaara, canaari canaa tucuaque toqueya niojoquiaari burro nijiniani, necojua nijiniano. Na nuhuaji, Jesuuri naa nijinia cajirii. ⁸ Jiyanoehua queraatia pueyari tii quiriquiaa. Nojoriiri na tucuaque toqueya muejoquiaari nucuaco Jesuucuaaji. Tamasacaari jaamasucua piyotaquiaari Jesuucuaaji niojotasocoriquiano nucuaco, nuu niquishaanura shanohua, juhua cutara jiyaniijaacuaaji maniniushitishano. ⁹ Jesu puetanaa, mariyata na nuhuaji nijionaajuhua, nojoriiri naa coteequiaari nacojonura: “¡Pueyanaa, nioori pocuaaji Tacuna! ¡Nojuacuajaari pa Jiyaniija, pa supuetanaa jiyaniija David niti! ¡Cuaara quiiria shuquiriatia pa Pueyaso jiyarosano! ¡Jiyanoehua maniniaari pa Pueyaso! ¡Cuaara shuquiritasano quiiria!”

¹⁰ Jesu tiuquishacari Jerusalén tiacajinia, puetunu tii quiniaa pueyajanaari jiuujiatecoquiaari. Sequetureeri:

—¿Cantejaara cunoni, tiuquiyaari?

¹¹ Jesuta tiuquijionaari nojori riucaaree:

—Nojuacuajaari Jesu, Pueyaso sequenu panishano caminiujiunia, Nazaret tiacajininio pueyano, Galilea jiyajininio.

Jesu jaacasacari seya niqutiojonaa Pueyaso Secojoja tiacariji
(Mr 11.15-19; Lc 19.45-48; Jn 2.13-22)

¹² Na nuhuaji, Jesuuri Pueyaso Secojoja tiacari matakajinia tiuquijiaari. Tii pueya niquishiiri seya niqutiojiano. Jesuuri puetunu nojorijanaa tohuatanijioree. Cumaneca tacatojiojuaa juhuacutucua caponeetareeri, tee pueya niqutiojioriquiaa tucuaa cumaneeca, Pueyaso Secojoja tiajinia niqutiojosocoriquiano cumaneecaracuaajani. Mococoonu niqutiojonaa cajitucua caponeetareejaariuhua, tee mococoonu niqutiojosaariquiaacuaajani Pueyasocuaa catijasocoriquiano. ¹³ Jesuuri nojori sequere:

—Pueyaso sequesanoajaari naa naajiotasaaquiaari tarijia:

“Cua quiquoori sesojosaanutaniya Pueyaso Secojoja tia”.

¡Niaari saniniujia na jiyatecanu nohuasenujuaca quiquiora!

¹⁴ Secojoja tiajinia na quishacarijia, cariojuuarujuri pueya, mariyata shipiiniquijuniaa pueyari nocua nijioquiaari. Jesuuri nojori naatanijioree. ¹⁵ Pueyacuara secोजनाa jiyaniijanucuaari Moisés Naajioneejiniji niishitiojonaata Jesu shootariquiaa cusosuhua naatanijiyano. Jiyacaritij, naatujooriiri Secojoja tiajinia naa nacooriquiaa Jesujiniji: “¡Pa supuetanaa jiyaniija David niquiohuacuajinio supueno pueyano! ¡Nojuajaari pa Jiyaniija!” Canaa Judiocuaca jiyaniijanucua niquishacari naa Jesu miishanotej, mariyata nojori tojishacari naatujoori, nojoriiri juaaquioree. ¹⁶ Nojoriiri Jesu nequesotaree:

—¿Quiaate naatujoori tojiya casaa nojori sequeyani? ¡Nojoriiri jiyaniya quiaari Pueyaso jiyarosano!

Jesuuri nojori riucaaree:

—¡Taaquiririnij! Na tojiyacuaajani. Maniacuaajaari nojori sequesano. ¿Majateeri nia serojonu quiquiaacuaa tariucuaaanu Pueyaso Rupaajinia naa sequesantej:

“Quaari naatujoori niishitirii conaajanio, seetanujuanaa nojori maninihuaqueetanura quia Jiyarosano?”

¹⁷ Naa nojori na sequenu nuhuajitij, Jesuuri nojori tiuquiaquee. Jerusalén tiacajiniji quiaqueeri canaata Betania tiacajinia. Canaari tii maqueseeni.

Jesu sesacasacari higo naana, muetuhuo na quiniucua
(Mr 11.12-14, 20-26)

¹⁸ Tariquicuaji, Jesuuri Jerusalén tiacajiniara tacateriquiohua canaa na saquiriojosano pueyata. Jesuuri miaajeriquiaa. ¹⁹ Higo naana niquiriiri nuu shuriucua nujuaano. Nocua canujiyareeri. Shaanoori quiriquiaa, saa na jaamasucuaaja. Cunora, Jesuuri naana sequere:

—Majaari socua quia jajau sanishaanu quiniutianiya.

¡Naanaari ritia sorequee! ²⁰ Naa canaa niquishacaritij, canaari jiuujiatereeni. Canaari Jesu nequesotareeni:

—¿Taateni? ¿Casaara higo naana sorequee ritiani?

²¹ Jesuuri canaa riucaaree:

—Seetanujuanaa nia sequeyanijia, niaa jaara Pueyasocua tiuujiaa quiri noojia nia niqijioteyaquiniutia nocuaji, niaa maara socua cutara miishano miiri, socua jiyajeneta

cua miishanojiniji. Naacuaajitij, niaa maara nia sequesano niquirei niaa jaara nio tuhuananu sequere: “Quia jaataare shoniniacu caminiajinia”.²² Puetunujuanaa nia masesano nia secijosacari Pueyaso, niaa jaara seetanujuanaa nocua tiuuri, niaari nia masesano masenutaniya.

Judiocuaca jiyaniijianucua nequesoreesacari Jesu, cante na jiyaronani
(Mr 11.27-33; Lc 20.1-8)

²³ Jesuuri Pueyaso Secojoua tiajinia tiuquiquiaari. Tii pueya niishitiojoriqiaaari. Jiyacaritij, canaa Judiocuaca jiyaniijianucuaari nocua catecanoquiaari. Nojoriiri pueyacuara secojonaa jiyaniijianucua quiquiaari, canaa Judiocuaca camarucuanio. Nojoriiri Jesu nequesotaree:

—¿Canteeri quiajaniyani, naa quia miiniuriatej? ¿Canteeri quia jiyatecanu juhua canaa jiyaniijia quia quiniuriani?

²⁴ Jesuuri nojori sequere saniniuuja:

—Janiyari nia nequesotanutaniya saniniunijia. Niaa jaara cua riuquare, janiyacu nia sequerohua saniniunijia cante cua jiyaroquiaari naa cua miiniuriani.²⁵ Naacuaajitij, cua riuquare coteenu. ¿Cante Tiuquinijiona Juan jiyaroquiaari pueya na tiuquinijionurani? ¿Pueyasotee? ¿Tama pueyajaaja soj?

Jiyacaritij, tama nojoriijaarija juayonuutunu coteequiaari jiyasohuaja. Tama seque-tooreejaarija:

—Paa jaara na riuquareni: “Pueyaso na jiyaroquiaari”, pa sequerucua: “¿Naatee? ¿Casaara na niishitiojosanocua nia tiuyaquiquianucuaaraari?”²⁶ Saniniuuja, paa jaara sequereni: “Nojuajaari nareja pueya jiyarosano quiquiaari”, ipueereeta quiniutianiyari pajaniyara! Paacuaajaari niishiyani puetunu pueyajanaari sequequiaa Tiuquinijiona Juanaa seetanujuanaa Pueyaso sequesano caminiujuunia quiquiaari.

²⁷ Naaratej canaa Judiocuaca jiyaniijianucuaari Jesu riuquare:

—Maja canaa niishiniu canariquitijia na jiyaroquiaaritiaj.

Jesuuri nojori sequeree:

—Janiyajuhua, majaari cua sequenu quiniutianiya nijaniya cante cua Jiyaronani, naa cua miiniuriatej.

Jesu pahuatasano pueyano niqiuohuajiniji

²⁸ Jesuuri naa nojori sequerohuacuhua:

—¡Cua tojtiiare! Tamonu pueyanoori caapiqui niyanuraca quiquiaari. Nojuajaari jiyapueranu jiyaroree: “Quiyanunaa, quiria quia poonijiosee uva cuhuariquiajinia quiarijia”.²⁹ Neyanuuri saaja na riuquaree: “Maja cua quianu paniniu”. Na nuhuaji, niishitiojorohuari. Quiaqueeri. Poonijioseeri.³⁰ Na queeri naa na nuhuajishana sequereehuaj. Neyanuuri na riuquaree: “Maniniacuaja, cua quena. Janiya quianutaniyani”. Na nuhuaji, majaari na quianu quiquiaari saaja.³¹ ¿Taa nia sequeyani pueyanaa? ¿Teyano cuno caapiqui necohuajinijiniote na que tojtijia quiquiaarini?

Nojoriiri Jesu riuquaree:

—Na jiyapueranucua.

Naaratej, Jesuuri nojori sequeree:

—Seetanujuanaa nia sequeyanijia. Cumaneeca masejonaa pa pueyajiniji Roma tica-jajinia quijia jiyaniijiarani, mariyata paanatujurinio, cuno nia soosano pueyari nia shocotanutaniya Pueyaso muerasura nojori quiniuria.³² Cua tojtiiare casaara naa cua sequeree nijaniyani. Tiuquinijiona Juanri niqiuuari na niishitiojonura juucua nijaniya, maninia nia quiniuria Pueyaso niqiuara. Majaari nia tiuuniu quiquianu nocua. Niaari saaja na tojiaquiquianu. Cumaneeca masejonaa nia soosano pueya cutaraari nocua tiuquianu, paanatujurinio. Nojoriiri na tojtiajara quiquianu. Niaacuaajaari na niqiuquianu taa cuno sesa miijia pueya maninia pueyara jatacanuni. ¡Niajanijarijataj, majaari nia tacatonu quiquianu nioojia sesa nia quiniujiniji! Niaari saaja Tiuquinijiona Juancua tiuyashijia quiquianu.

Jesu niishitiojosano cuhuariquia cojuanaa sesa miijiacajiniji

(Mr 12.1-12; Lc 20.9-19)

³³ Socua tamonu cua pahuatasano nia tojiri. Tamonu pueyanoori cuhuariquiajinia uva natoocuaari. Maninia matacoquiaari puetunu na shuriquicojuanaari maja casaa tiuquitianura nocua. Saaja quejaquiaarijaarihuaj uva rapijiojuara, na caaca rerate-saanura. Jyaconajara tiaquiaarijaarihuaj, cojuana niqijijara tiji nohuasejojuaacuaji. Na nuhuaji, na camaruuri tamasa pueya niqitioquiaari na cuhuariquia, nera nojori cojuasocoriquiano. Na nuhuaji, na camaruuri tucuaaanu quiaquiaari pueyaraaanu

camueenujunura. ³⁴ Jaara tari quiquiaari uva carojotasacari, saniya cuhuariquia camarujuaanaari na seya jiyaramiquiaari na cuhuariquia cojuanaa pueyacia. Nojori jiyaramiquiaari nojori masenura cuhuariquia cojuanaa carojotasanoinijini, taa nojori pocoojoquiaari taricujani. ³⁵ Cuhuariquia cojuanaari cuhuariquia camarujuaana jiyaramiquishano seya quioore. Niquiriyatu majacutueeri. Tamonu moturee cutaraari. Tamonu jacutree saitiaari. ³⁶ Na nuhuaji, na camaruuri socua queraatia seya jiyaramiquiaariuhuj. Nojoriiri naquiya miishaaquiaarijuhuaj.

³⁷ Na nuhuaji, na camarujuaanaari tama sequereeaaja: “Jiyaroreera cua niyanu. Maja cutara nojori rerequetenu quiniutianiya cua niyanu”. ³⁸ Cuhuariquia cojuanaa jaara niqiuiaari camarujuaana niyanu nojoriicua niyanu, nojoriiri tama sequetoreeaaja: “¡Cunocuaajaqui cuhuariquia camaru quiriqiano na que niti, na que jaara shaajequee! ¡Pa morej! Naacujitij, pocua nio cuhuariquia camaruhuaa quiqini”. ³⁹ Naaratej, camarujuaana niyanu tiuquishacari, cuhuariquia cojuanaari na quiaree. Na jaatucutueeri cuhuariquiajiniji tamama. ¡Cuniqui na motureeri!

⁴⁰ Naa Jesu pohuatanu nuhuajitij, nojuajaari cuno canaa Judiocuaa camarucua nequesotaree:

—¿Taa nia sequeyani pueyanaa? Cuhuariquia camaru jaara tiuquiriohua na cuhuariquiajinia, ¿taa na miiniutianiya cuno cuhuariquia cojuanaari?

⁴¹ Jesu tojtianaari na riucautueere:

—¡Cuno cuhuariquia camaruuri nojori pueconutaniya, nojoriicua na taraajeyaquiniutia! Na nuhuaji, tamasaca pueya sequenutaniya cutaraari, nojori cojuanura nera na cuhuariquia. Nojori cutaraari cuhuariquia camaru panishano niqutionutaniya nojori carojotasanoiniji.

⁴² Jesuuri nojori sequeree:

—Jaa, naa miiniutianiyari. ¿Majate nia serojonu quiquiaaricuaa nio, tariucuaaano Pueyaso Rupaajiniani?:

“Pueyari saitia tiariquiaa. Nojoriiri tamonu saajia jiyaniquiaari saajia sesarujajau naasucua. Cuno saajiacuaajaari socua panishano saajia quiquiaari. Jiyaniijajanaari naa na jiyatequiaari. Cuno saajiata tiaree maninia cutaraari. Pueya niquishacari, jiuujatecoreeri”.

Naa naajiotasano quiyacuaajaari.

⁴³ Camarucuaanaa, nocuaji nia numooteyanijia, Pueyasoori nia ruuretanutaniya maja tari nia quiniuria na muerasu jitianaa. Tamasaca pueyari nia niti jiyatesaanutaniya cutara, nojori jitianura maninia Pueyaso muerasurano. Nojoriiri maninia Pueyaso tojtianaa quiniutianiya cutara, Pueyaso muerasu canenura jiyanohua nera, juhua cuhuariquiajiniji senoosano queraatia. ⁴⁴ Cuno saajiajiniji saniniujia, pueyano jaara cuno saajiaacua tiyare, nojuajaari juhua rashiquijiniutianiya. Cuno saajia jaara tiyare pueyanoocua, jacanaura na miiniutianiyari.

⁴⁵ Pueyacuara secोजना jiyaniijanucua, mariyata Fariseocuaa tojtiasacari naa Jesu pohuatasantej, nojoriiri niishiqui Jesuuri nojoriinijini pohuatariquiaa miriqui. ⁴⁶ Naaratej, nojoriiri Jesu quianu panirii juucua, nojori juaniutia. Nojoriiri saaja puereriquiaa pueya. Pueyacuajaari sequeriquiaa Jesuuri seetanujuaana Pueyaso sequenu panishano caminiujunia quiquiaari. Naaratej, jiyaniijanucuaari jiyamitia puercoriquiaa Jesu nojori quianura.

22

*Jesu pohuatasano miriqui camishacari queranacunujiniji
(Lc 14.15-24)*

¹ Na nuhuaji, Jesuuri socua niishitiojoquiaari miriqui pohuatasanta. Naa pohuataquiaaritij:

² —Pueyasoori pueya masuya nojoritia na quiniuria shuquiriaatia, taa tamonu cutara jiyaniijia miqiuiaari mijiriacuaani. Cuno jiyaniijiaari shuquiriaatia quiniu paniriquiaa queraatia pueyata, neyanu camishacari. Naaratej, jiyaniijiaari queraatia sumatutequiaari, queraatia pueya miaquesocoriquiano. ³ Na nuhuaji, na seya jiyaramiquiriiri na masuusano pueya numootenura nojori niniuria queranacunura. Masuusano pueyari maja na niniu paniniu quiquiaari saaja. ⁴ Jiyaniijiaari socua tamasaca na seya sequeree: “Cua masuusano pueya nia numotejocoo. Nia sequesee: ‘Jiyaniijia nia sashiya. Puetunujuaanaari tari jeenucuasano nia queranacunura. Tari puecoosaaree na juyaca, na shiyoshitishano seyano. Tariucua rariyosanoori quiya. Ritia nia nimia. Nia miaquenuusee’”. Naa na seya na rootanu nuhuajitij, jiyaniijiaari nojori jiyaramiquirii. ⁵ Masuusano pueyari

saaja tojitiaaquirii. Puetunujuanaari tama na panishanojuaja miiriquiaa saaja. Tamonuuri na cuhuariquiajini quiaaree. Tamonuuri na casami niqutiojosaqui quiaareecujua. ⁶ Tamasacaari saniniuujia jiyaniijia seya quiooree. Jiyanojua naquiya nojori miiriiri. Na nuhuaji, nojori puecootureeri. ⁷ Jiyaniijia niishishacari, jiyanojua juaariiri. Nocuaji na soldadohua jiyaramiquiriiri cuno monaa nojori naminiuria saniniuujia, nojori tiaca na catijatanurajuhuj. ⁸ Na nuhuaji, jiyaniijiaari na seya sequeree: “Puetunujuanaari tari jeenucuasano pa queranacunura cua niyanu camishacari. Cua masuusano pueyacuajaari saaja cua ruuretareeni. Namitia majaari nojori nijionu quimiaa, saaja cua rerequetajaca nojori quiniuucua. ⁹ Quariijia cutara, nia quiaare nuu tuneequetajajinia, tee queraatia pueya tajiniuucuaquiacuajani. Nia masuure puetunu nia niquishano pueyajanaa”.

¹⁰ “Na seyari quiojoquiaari tiaca nucuaco. Nojoriiri puetunu na riuriatasano pueyajanaa rerejoteree, maninia pueya, sesa pueyano. Queranacuuasaquiri mishiquiaari masuusano pueyata. Camarnu seyari puetunu pueyajanaa cushiyotequiaari camishacari cushiyasano toqueya, nojori tiuquiasacari tiaco queranacunura.

¹¹ “Na nuhuaji, jiyaniijiajanaanari tiuquiquiaari masuusano pueya na niquniuria. Tamonu pueyano niquishiiri camishacari cushiyasano toqueeju. ¹² Jiyaniijiaari na sequeree: “Pueyanonaa, ¿taa quia tiuquimaa camishacari cushishano toqueejuni?” Pueyanoori sanaa na tojiriquiaa. Majaari na riucuanu quirii. ¹³ Cunora, jiyaniijiaari na seya sequeree: “¡Nia morojore na cashacucua, na numatucuanio! ¡Niocua na jartarohua carijiniacuma ninishiqui! Tii sapuenutaniyari. Na quiaa miaquenutaniyajaariuhua na noonuta, naquiya na miishacari”.

¹⁴ Naajuhuj pueyanaa, Pueyasoori queraatia pueya masuya quariijia na muerasu nojori quiniuria. Saniniuujia, secajaari saquiriojosaanutaniya nojorijiniinio seetanujuanaa na muerasura nojori quiniuria.

Jiya jiyaniijia cuara niqutiojosaaria na sequesano cumaneeca

(Mr 12.13-17; Lc 20.20-26)

¹⁵ Na nuhuaji, Fariseocuacaari quiojoquiaari Jesu shuriucujia tama nojori niishitiojotonurajaaja. Nojoriiri Jesu pocuatenu paniquiaari sesa juucua, nocuara nojori saquiriojotanura. ¹⁶ Na nuhuaji, Fariseocuacaari na niishitiojosano pueya jiyaramiquirii Jesuucua, jiyaniijia Herodes panijaca pueyata. Herodesri jiyaniijia César jiyatesano quiquiaari Judea jiyajinia jiyaniijia na quiniuria. Fariseocuaca jiyaramiquishano pueyari Jesu sequesee:

—Niishitiojonanaa, canaari niishiyani quiaari maninia pueyano. Majaari quia cuaracashijionu. Quiaari seetanujuanaa casaa niishitiojoquiaa cutara taate canaa naata maninia quiniu Pueyaso niquiarani. Majaari quia puerenu quiquiaa, pueya niquiara quia pohuatanura quia niishishano. Majaari rimiajata quia niquniu pueya. ¹⁷ Naaratej, canaa quia sequere taa canaa miiniutianiyani. Paari sequesaaquiaarini pa cumaneeca pa niqutiojonura jiyaniijiajanaa Césarra, taa cuno tahue César sequequiaaricujani. Quiajaniyariuhuj, ¿taa quia sequeya saniniuujia?

¹⁸ Jesuuri ritia niishiquii, nojoriiri naa na nequesotariquiaa na sajonuta. Nocuaji nojori sequereeri:

—Sapueno maninia quijacanaa, ¿casaara nia saniniuujia naa janiyani? ¹⁹ Cua niqutiri nia cumaneetoj, cuno, jiyaniijia César sequesano pa niqutiojonura nojuajani.

Nojoriiri Jesu niqutirii cumanee. ²⁰ Jesu niquishacari cuno cumanee, nojori nequesotareeri:

—¿Cana naaquiti nio nocuani? ¿Cana sesate nocua naajiotasanojanihuahuj?

²¹ Nojoriiri na riucuarree:

—Jiyaniijia César naajicujaja, na sesajuhuj.

Jesuuri nojori sequeree:

—Jaara naa quirij, César nia niqutiojore tama na casaajaaja. Nojuacuajaari na camaru. Saniniuujia, Pueyaso nia niqutiojore nerano tama na casaajaaja. Nojuaja cutaraari pa camarnu.

²² Nojori tojishacari naa Jesu sequesantej, jiuujiatecoreeri. Na tarinitiatoreeri. Quiojorohuari.

¿Macnucuate samiitiaconutaniuhua?

(Mr 12.18-27; Lc 20.27-40)

²³ Cuno juucaja, Saduceocuacaari Jesuucua nijioquiaari. Nojoriiri jiyaniquiaari macnucua maja na samiitiaconu quiniutianihua. Naaratej, nojoriiri Jesu sequesee:

²⁴ —Niishitiojonanaa, supuetana Moisésri pa sequequiaari na naajiotasanojinia, pueyano jaara cusoyare mueyaju, na tarajanu cuara camiiria mashiquio, mueya na mueratenura tarajanu niti. ²⁵ Tarijia, tamonu pueyanoori niya quiquiaari. Siete

niquiohuaraca quiquiaariiri, saa canuujuua. Jiyapueranuuri camiquiaari. Na nuhuaji, shaajequiaariiri muetuhuojuua. Naaratej, na mashiquioori camitishaaquiaari neyaca tarajanuta. ²⁶ Nojuajaari muetuhuojuua shaajequiaarijiuhuj. Naaratej, neyaca tarajanuuri mashiquio camiquiaarijiuhuj. Nojuajaari mueyaju cusoquiaarijiuhuj. Naa cusonuuquiaariiri puetunu cuno siete canuujuanaa. ²⁷ Na nuhuaji, mashiquioori cusoquiaarijiuhuj. ²⁸ Saniniuujia, macunucua jaara samiitiacorohua, ¿teyano cuno siete neyacaajiniiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

²⁹ Jesuuri nojori riucaaree:

—¡Niari jiyanohua jiyajeneya nia niishiyaquishacari Pueyaso Rupaaajinia naajiotasano, Pueyaso cumaacanio! ³⁰ Macunucua samiitiacosacariuhua, majaari canuu camiyonu quiniutianiya maaji. Naajuhuj, maajipohuari maja na camiyonu quiniutianiya neyacaara. Caya, maajinio, nojoriiri juhujajaniya quijiaa quiniutianiya juhua jiyocuaacanu quijiaa Pueyaso seya, maja camiyosano. ³¹ Socua cua tojiare. Macunucuaari seetanujuanaa samiitiacoriquianohua. ¿Majateeri nia serojonu quiquiaacuaja taa Pueyaso sequequiaari niajanuacujani? Naa sequequiaariiri:

³² “Janiyari nia supuetana Abraham Jiyaniijiani, nia supuetana Isaac Jiyaniijiajuhuaj, nia supuetana Jacobo Jiyaniijiano”.

Naaratej, nia sequeyanijia, Pueyaso muerasu shaajecononi, nojoriiri maja macunucua na quiniu. Canapueete seetanujuanaa Pueyaso muerasuni, nojori cutaraari pueyaracaanu quijiaa.

³³ Pueya tojishacari naa Jesu niishitiojosanotej, nojoriiri jiyanohua jiuujiateree.

Puetunu Pueyaso rootasanojinijianaani, teyanote socua na pueya tojishocoriquianoni (Mr 12.28-34)

³⁴ Fariseocuaca jaara niishiquiaari Jesu Saduceocuaca sanaajaree, nojoriiri Jesuucua nijioquiaari nojori saniniuujiniuria nojuaja, nojori nequesoreenuta. ³⁵ Nojoriiri jaarajaaja Jesu pocuatenu paniriquiaa sesa juucua. Tamonu nojorijinijioori Moisés Rootasanojiniji niishitiojana quiquiaari. Na saniniuujiniuria, nojuajaari Jesu nequesotaree:

³⁶ —Niishitiojanaa, ¿Pueyaso rootasanojinijini, teyanote socua pa tojishocoriquianoni?

³⁷ Jesuuri na riucaaree:

—Naa naajiosano quiyacuajaari:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia niishitijatajanaanio”.

³⁸ Niocuajaari socua na pueya tojishocoriquiano Pueyaso rootasano. ³⁹ Tamonu na sequesanoori quera juhua niojuhuaj. Naa sequeyari:

“Quiarta pueyano quia paniri taa quia paniyacuaa tama quia cuaqueyajaajani”.

⁴⁰ Puetunu Moisés rootasanojuanaa, mariyata puetunu tariucuaacanu Pueyaso sequesano caminiuujiniiaa rootasanojuanaari nio caapiqui rootasanojinijicuaja.

¿Cante Cristo supuetanani?

(Mr 12.35-37; Lc 20.41-44)

⁴¹ Fariseocuaca quishacarijia cuniqui, Jesuuri nojori nequesotaree:

⁴² —¿Taa nia niishiriojia Cristojinijini? ¿Cante na supuetanani?

Nojoriiri Jesu riucaaree:

—Pa jiyaniijiarano Cristoni, nojuajaari pa supuetana David niquiohuacuajinio supuentaniya.

⁴³ Jesuuri nojori sequerohuacuahuaj:

—Taaquiriirini. Jaara naa quiririti, ¿niaateeri niishiyacuaja casaara David sequequiaari “cua Jiyaniijiaata” Cristocuararini, Pueyaso Sohuanu jaara na pocuatequiaari? Naa sequequiaariiri:

⁴⁴ “Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijaara, janiya cuara quia paraa shocotore quiocuajijiaatijia’”.

⁴⁵ ¿Cristotucua taa David niquiohuacuaji supuereni, David jaara Cristo jiyaniiquiya na jiyaniijiaata?

⁴⁶ Nojoriiri Jesu niquitiaree sanaa. Nojoriiri maja na naata na riuuanu quiquiaari. Cuno nuhuaji, pueyari maja socua na nequesoreenu paniniu quiquiaari Jesu.

23

Jesu juaashacari Fariseocuaca, Moisés Rootasano niishitiojanaanio

(Mr 12.38-40; Lc 11.37-54; 20.45-47)

¹ Na nuhuaji, Jesuuri tii quiniaa pueya sequeree, cana na saquiriojosano pueyanio:

² —Moisés Rootasanojiniji niishitiojona, mariyata Fariseocuaaari supuetana Moisés niti quiya, tariucuaaanu Pueyaso Rupaa nojori niishitiojonura. ³ Naaratej, nia tojitiare puetunu nojori sequesanojuanaa nijaniya. Saniniuujia, maja cutaraari nia miiniu taa nojori miiquiaacuani. Nojoriiri najuhuana niishitiojoquiaa taa pueya miiniutianiyani. Majaari saniniuujia nojori miiniu tama nojori niishitiojosanojuaaaja. ⁴ Nojoriiri tama nojori niishishanojuaja rootaquiaa, maja saaja tariucuaaanu Pueyaso niishitiojosano pa supuetanaa. Nojori rootasano pueya miishocoriguianoni, cunoori juhua jiyanohua niiquia casaa pueya nitiasocoriguiano. Nojoriiri maja quenaaja na naacutanu quiquiaa na juaashiquia sacasaruta. ⁵ Nojoriiri puetunu na miishanojuanaa miiquiaa saaja pueya niquishocoriguiano, pueya shuquiritianura nojori. Nojoriiri Pueyaso Rupaajiniji naajio-tasano cushitiaquiaa na jiniji morotasano, na numatucuaacuanio. Nojoriiri naa miiquiaa taa pa supuetanaa miiquiaaricuaani. Saniniuujia, nojoriiri najuhuana socua puereetucara na quiqiora cusupuequiaa pueya shootiasocoriguiano. Naajuhua, nojoriiri na toquecuaji sohuatocujua tunujutaquiaa taa pa supuetanaa Pueyaso tojitiatacua mi-quiaaricuaani. Saniniuujia, nojoriiri puera tucuacujuaa na tunujutaquiaa saaja pueya niquishocoriguiano, pueya shootianura nojori. ⁶ Nojori jaara masusaare tamonu tiajinia queranacunura, nojoriiri secoquiaa socua panishano cajitiujinia nojori cajitiuniuria tia camaru shuriucua. Naajuhua, Pueyaso secojoja tiaajinia pueya rerejosacari, nojoriiri cajitiuniu paniquiaa camarucua cajitiucuaajinia pueya shootianura nojori. ⁷ Nojori ru-cuanijosacari tiaajinia, nojoriiri paniquiaa pueya sarhuatanura nojori. Panitiuquiaa-jaariuhua pueya jiyaniquiniuria nojori “niishitiojonaata”.

⁸ ‘Niajaniya saniniuujia cua pueyanaa, majaari pueya shanacunu niaacua, nojori jiyaniquiniuria nijaniya “niishitiojonaata”. Niajaniya cutaraari niquiriyatujua Niishitio-jonaraca. Puetunu nijaniyajanaari niarta Pueyaso pueya tapueyocua. ⁹ Naajuhua, majaari tamonu pueyano mijiria nia jiyaniquiniu “cua queta”. Niaacuajaari niquiriyatu Queraca. Nojuajaari jiyocuaaanu Quinia. ¹⁰ Naajuhua, majaari pueya nia shanacunu niaacua, nojori jiyaniquiniuria nijaniya “cua jiyaniijaata”. Niaari niquiriyatujua Jiyaniijiaracuaaja. Nojuacuajaari Pueyaso jiyarosano nia jiyaniijiaranoni. ¹¹ Cante jiyaniijiajanaa cutara nijaniyajinijinioni, cuno cuaara jiyateera tama na cuaqueyajaaja nia cumaquinia na quiniuria. ¹² Cante tama na cuaqueyajaaja jiyateja pueya shocotaja na quiniuriani, narta pueya jiyaramiquijia na quiniurijuhua, jiyano pueyano cutaraari cararasanutaniya. Cante saniniuujia juhua narta pueya serura jiyateja tama na cuaqueyajaajani, cunoori jiyaniijaari jiyatesaanutaniya cutara.

¹³ ¡Cua tojitiare, Moisés Rootasanojiniji niishitiojonaanaa, nijaniya Fariseocuaajuhua, niaari cocuaatia miiquiaa! ¡Niaari sapuenu juhua maninia quijiaa niquishano! Niaari pueya tarinitiaaquiuaa nojori rupuenura Pueyaso. Niaari maja nia tiuuniu Pueyasoocua. Naajuhua, majaari pueya nia tarinitianu nojori tiuuniuria Pueyasoocua, na muerasura nojori quiniuria.

¹⁴ ¡Niaari taraatia miishaanutaniya, Moisés Rootasanojiniji niishitiojonaanaa, nijaniya Fariseocuaajuhua! Niaari sapuenu juhua maninia mijiaa niquishano. Niaari mashiquiopue tiaca masequiaa secaja nia cumaneecata, nia sapojonuta nojori. Naacuajitij, niaari nojori tiaca masequiaa tama nijaniyarajaaja. Naa nia miiniu nuhuajitij, niaari shitiarayocua secojoquiaa najuhuana Pueyaso, pueya niquiara, maninia pueya nia jiyani-ishaanura. Naaratej, niaari socua jiyanohua saniitiosaanutaniya tamasaca pueyajiniji.

¹⁵ ¡Niaari puereeta miishaanutaniya Moisés Rootasanojiniji niishitiojonaanaa, nijaniyajuhua Fariseocuaanaa! Niaari sapuenu juhua maninia mijiaa niquishano. Niaari tucuacaanu rucuanajoquiaa jiya caco, shoniniacu caminia taquijiriano, tamonu nia niishitiojonura najuhuana Pueyaso tojjijara na quiniuria juucua, juhua tama nijaniya-jaaja. Nia niishitiojosano pueyano jaara nia tojjijara quiri, nojuajaari socua jiyanohua saniitiosocoriguiano quiya nijaniyajiniji, sesa nia rootasano tojjija na quiniucua.

¹⁶ ¡Niaari taraatia miishaanutaniya mosanucuaanaa! Niajaniyari juhua cariyujuaru, cante tamonu pueyano jaatucuya juucuanu, nuu nia niishiyaquishacari. Naacuajitij, niaari capa niishitiojoquiaa. Niaari rootaquiaa, pueyano panishacari tamonu tiuuni-uria na sequesanoocua, nojuaja cuaara sequeera: “Taa oro Pueyaso Secojoja tiajinia pueyaracaanu quiyacuaani, naajuhua, cua sequesano quiajaniyari seetanujuanaa to-huateenutaniya quiara”. Saniniuujia, niaari sequequiaa, Pueyaso Secojoja tiajinia oro jaara sequeyaquishaare, majaari na sequesanoocua tiuushaanu. Naacuajitij, niaari se-quequiaa, pueyano sequesanoori nareja sequesano, nojuaja jaara sequeere: “Taa Pueyaso Secojoja tia pueyaracaanu quiyacuaani, naajuhua, cua sequesano quiajaniyari see-tanujuanaa tohuateenutaniya quiara”. Niaari sequequiaa cuno sequesanoocuaari maja tiuushaanu. ¹⁷ ¡Mosanucuaanaa, niaari juhua cariyujuaru! ¿Teyanote socua pueresanoi, cuno orote, Pueyaso Secojoja tia soj? Cuno oroori naa pueresanora jiyatesaaquaaari

saaja Pueyaso Secojoua tiajinia na quiniucua. ¹⁸ Niaari rootaquiaajuhuj, pa seque-sacari parta pueyano, casaa pa miiniutianiya nerani, pocua na tiuuniuria paa cuara sequeera naatej: “Seetanujuanaa quia sequeyanijia. Naatej, taa casaa Pueyasooocuaa catijijaja juhuacutuucua niasano jiyanoehua maninia quiyacuaa Pueyasorani, naajuhuj, cua sequesanoori saaja maninijuhuj. Majaari cua sapojonu”. Naacuajitij, niaari sequequiaa, paa jaara naa sequereni, paa cuara miiria pa sequesano. Saniniujia, niaari sequequiaa: “Pa sequesanoori najuhuaana sequesano, paa jaara saaja Pueyasooocuaa catijijaja juhuacutu sequereni. Majaari nocua tiuushaanu”. ¹⁹ ¡Cariyojuarurinia! ¿Majateeri nia niishiniu? ¿Teyanote socua maniniani, Pueyasooocuaa catijasocoriquiano casaatee, Pueyasooocuaa catijijaja juhuacutu soj? Catijasocoriquiano casaari narejajuhuanajaj, jaara Pueyasooocuaa catijijajaacua niasoo quiyaquiri. ²⁰ Naaratej, cante Pueyasooocuaa catijijaja sequeree seetanujuanaani, nojuajaari maja saaja Pueyasooocuaa catijijaja na sequenu quirii. Nojuaja cutaraari na caco niasano sequereehujuhuj. ²¹ Naajuhuj, cante Pueyaso Secojoua tia sequeree najuhuanani, cunoori maja saaja Pueyaso Secojoua tia na sequenu quirii. Nojuajaari Pueyaso sequereecuaja, Pueyaso Secojoua tia na sequesacari. ¡Pueyasooocuaaari na Secojoua tiajinia quijia! ²² Naajuhuj, pueyano jaara sequere na sequesano seetanujuanaa juhua jiya cajiniocua, nocua tiuushaanura, cunoori maja saaja jiya cajiniocua na sequenu quirii. ¡Pueyaso cajishaqui sequereeariuhuj, Pueyasojuanaa sequereeariuhuj, jiyocuacaanu casaa na sequesacari!

²³ ¡Niaari taraatia miishaanutaniya, Moisés Rootasanojiniji niishitiojonaanaa, niajanijajuhuj Fariseocuaanaa! Niaari sapuenu juhua maninia miijiaa niquishano. Niaari Pueyaso niqutiojoquiaa maninia puetunu nio nia nataujinijijianaa, shanohua jaanujaja jaamasucua, miaquesanojinia jatasano casaa: menta, anis, cominonio. Niaari jacaria serojoquiaa diez casaa puetunu cuno cien casaajinijijianaa, Pueyasora nia niqutiosocoriquiano taa supuetana Moisés sequequiaaricuaajani. ¡Niaari saniniuuja socua pa tojishocoriquiano Moisés rootasano tojtiaaquiquiaa! ¡Naacuajitij, majaari maninia pueyano nia quiniu taa Moisés rootaquiaaricuaajani! ¡Majaari nia tarajajenu quiquiaa niarta pueyanoocua! ¡Majaari nia tiuuniu Pueyasooocua! Niaari maninia niqutiojoquiaa nia nataacuacajiniji. Taa nia niqutiojoquiaa nia nataacuacajinijicuaani, ¡naa nia tojtijarejuhua socua pa tojishocoriquiano rootasano Moisés Naajotasanojiniji! ²⁴ Pueyano nia niishitiojosacari Moisés Rootasanojiniji juucua, niaari juhua cariyojuaru cante narta cariyojuaru jaatucuya juucua. Niaari juhua tamonu pueyanojuhuj. Na ratuacari, nujuhua taquirii na mashacajinijiiri. Socua na ratuacariuhua, ¡saaja cuartia miataaree juhuanijari!

²⁵ ¡Niaari cuaatia miiquiaa, Moisés Rootasanojiniji niishitiojonaanaa, niajanijajuhuj Fariseocuaanaa! Niaari sapuenu juhua maninia miijiaa niquishano. Niaari juhua noo pueyajuhuj, cante nareja na ratujaja cuaqueya jeequejoquiaani, na miacojaja cuaqueyano. Na jiniacumaari saniniuuja jiyanoehua curuutuua quiyajaa. Nio miriqui cua sequesano nia niishiri. Niojiaari naa quiyajuhuj. Niaari nohuasenuujaja, jamuejancio. ²⁶ ¡Cariyojuar Fariseocuaanaa, nia ratujaja jiniacuma nia jeequere coteenu, nia miacojaja jiniacumano! Naacuajitij, na cuaqueyari maninia jeequesano quiniutianijajuhuj.

²⁷ ¡Niaari taraatia miishaanutaniya, Moisés Rootasanojiniji niishitiojonaanaa, niajanijajuhuj Fariseocuaanaa! Puetunu niajanijajanaari sapuenu juhua maninia miijiaa niquishano, juhua macunucua quiquio shanohua niquishano, cohuajata noshijosano. Saniniuuja na jiniacuma quiyari sacuaraatia jaanujaja pueya nuchua mocuaca. ²⁸ Niaari naajuhuj. Niaari sapuenu juhua maninia pueya niquishano. Saniniuuja niojiaari jiyanoehua sesa, jiyanoehua sapojonu niishijia.

²⁹ ¡Niaari taraatia miishaanutaniya, Moisés Rootasanojiniji niishitiojonaanaa, niajanijajuhuj Fariseocuaanaa! Niaari sapuenu juhua maninia miijiaa niquishano. Niaari macunucua niojotajara shanohua niquishano shipinijioquiaa, tariucuaaanu pueyara Pueyaso sequesano caminiujuniaa nuchuaacua. Naajuhuj, niaari tariucuaaanu Pueyaso tojtijajaca puecosano quiquio maniniushitijia. ³⁰ Naa nia miishacaritij, niaari juhua sequequiaaruhua: “Paa jaara shipinijiosaaquiaari pa supuetanaa quishacaritia tariucuaaanuni, paa maara nojori cojiyaquiquiaari cutarani, nojori puecosacari Pueyaso sequesano caminiujuniaa”. ³¹ Saniniuuja, naa nia sequesacaritij, niaari tama niaacuara toreeaacujaja. Niaaquiri cuno tariucuaaanu Pueyaso sequesano caminiujuniaa puecoonaacuajinio supuenocua. ³² Naa Pueyaso sequesano caminiujuniaa puecoonaacuajinio supueno nia quishacaritij, Pueyaso Jiyarosano nia morejuhuj, nia tucuatannura nia supuetanaa coteesano.

³³ ¡Sesa miijiaa pueyanaa, niaari noonacuraca, juhua sacocua! ¿Niaateeri jiyaniya niaari sanitioyaquishaanutaniya mani quiquiojinia nia supuetanaata? ³⁴ ¡Cua tojtijare! Janijari

Pueyaso rupaa caminiujiunaa jiyaramiquiniutianiya niaacuani, Pueyaso Rupaa niishijiacajuhua, Pueyaso rupaa niishitiojonaanio. Nojoriiri nia pohuatanutianiya Pueyasojiniji. Niaari noojiaqueya nojorijinijinio puecoonutianiya. Niaari tamasaca teetejonutianiya niyacutesanojinia nojori nia monura. Niaari tamasaca majacunutianiya Pueyaso secojojua tiacajinia. Niaari tamasaca neteyojotanutianiya puetunu tiacajiniijianaa, naquiya nia miiniuria nojori. ³⁵ Niaacuajaari niishiya, coteenujuanaa mosaquiaari Abel, maninia miijia pueyano. Naa puecoosaaquiaari queraatia Pueyaso tojtiajaca pueya. Na nuhuaji, socua jaatesaaquiaari monuuri Zacarías, Berequías niyanu. Cuno maninia pueyanoori mosaquiaari Pueyaso Secojoua tiajinia, Pueyasocucara catijiasaqui shuriucua. Monu porocua nia quiniucua taa nia supuetanaa quiquiaaricuaani, niaari saniniujia nocua namishaanutaniyacujua puetunu tariucuaaanu Pueyaso tojtianaa puecoosaanuucua-janaa. ³⁶ Seetanujuanaa nia sequeyanijia, nio pa quishacari pueyani, nojoriiri sanitiosaanutianiya puetunu cuno pueya puecoosaanuucujanaa.

Jesu nujuquesacari Jerusalén tiacajinia quinia pueyacua
(Lc 13.34-35)

³⁷ *Jerusalén tiacajinia quinia pueyanaa, jiyanojua taraajeya niaacuanijia! Niaari Pueyaso sequesano caminiujiunaa pueya puecoojua. Niaari Pueyaso jiyaramiquishano pueya jacujuaca saitia nojori pohuatanuucua Pueyaso rupaa nia niquiara juucua. Janiyari cucua nia nijionura panijia juucuan tاراatia nia miyaquishaanuucujia cua tacunura niaacuaji, naate taa caacaraja rijioquiaacuaa necohua na nesu cariquiacorani, na cojuanura nojori. Niaari saaja cua paniyaquijia cua cojuanura nijaniya. ³⁸ Cua tojitiare. ¡Niaari nia quiuiojiniji sanaajasaanutianiya niiquiji! ³⁹ Seetanujuanaa nia sequeyanijia, majaari socua nia niqiniu quiniutianiya janiya, niaa cuara cua tiuquishacariuhua sequerejaatijia: “Pueyaso cuara shuquiritiiria pa Jiyaniijia quiriqiano na jiyarosano.”

24

Jesu pohuatasacari, Pueyaso Secojoua tia niyartasaanutianiya
(Mr 13.1-2; Lc 21.5-6)

¹ Jesuuri Pueyaso Secojoua tiainijia tohuataarohua. Nata canaa quiojosacari nucuaco, canaa, na saquiriojosano pueyani, canaari nocua catecanoquiaarini. Canaari Jesu niqitiriqiaa Pueyaso Secojoua tiani, shanohua niquishano tia. ² Jesuuri saa canaa riucuaaree-jaa:

—Jaa, na niquiyacujanijia. Naa cumaati maninia na niquiyacujua. ¡Seetanujuanaa nia sequeyanijia, cuno tia niaa na niquiyani, cunoori niyartasaanutianiya puetunujuanaa! ¡Majaari quenaaja tamonu saajia manu quiniutianiya tamonu caco!

Taa pa niishiniutianiyani quera jiya puequesacari
(Mr 13.3-23; Lc 21.7-24; 17.22-24)

³ Na nuhuaji, canaari Olivo cuhuariquia tuhananuucua quiojoquiaarini. Jesu cajishacari tii, canaa na saquiriojosano pueyani, canaari nocua catecanoquiaarini. Tama canaa quishacarijaaja, canaari na nequesotareeni:

—Canaa quia sequere ¿taacari Pueyaso Secojoua tia niyartasaanutianiyani? Naajuhua, ¿taa canaa niishiniutianiyarini taacari quia tacatenutaniuhua mijiriani? Canaa quia sequerejuhuaj, ¿taacari jiya puequenutianiyani?

⁴ Jesuuri canaa riucuaaree:

—Tama nia cuaqueyajaaja nia cojuare tamasaca mariqui nia sapojoreeri. ⁵ Queraatia sapojonuujuaari supuenutianiya. Nojoriiri tama na cuaqueyajaaja sequenutianiya: “Janiyacujaja Cristoni, Pueyaso Jiyarosano”. Naa nojori sequesacari, queraatia pueya sapojonutianiyari. ⁶ Naajuhua, niaari pueyapue miaquetoojonujiniji tojiniuniutianiya, niya, tamonu jiyacajiniano. Niaari miaquetoojonura miananajotoonujiniji tojiniuniutianiyajuhua. Naa jaara naa tojiniuuritij, majaari puerenu. Naa quiniutianiyari mijiria. Naajaa, juhuanoujaaja maja jiya puequesacari quiniutianiya. ⁷ Tamonu pueyari tamasaca pueyata miaquetoojonutianiya. Tamonu jiyajiniji jiyaniijiaari tamonu jiyaniijiatata miaquetoojonutianiyajuhua. Jiyacari, jiyanojua miaajenuuri quiniutianiya queraatia jiyacajinia, cusonuunujuhua. Rijiaari queraatia jiyacajinia jiuquiujiutianutianiya. ⁸ Naa naquiya miishacari mijiriatej, cunoori juhua manajaraca cotesacari noonu. Na nuhuaji, socua jiyacatenutianiyari naquiya miishacari, mijiria cua tiuquiyacuquishacarija.

⁹ Jiyacari, niaari jiya camarucua niqitiojosaanutianiya cua muerasu nia quiniucua, naquiya nojori miitanura nijaniya. Niaari puecoosaanutianiya. Puetunu jiyacajinijinio pueyajanaari nia niqiniu paniyaquiniutianiya, cua muerasu nia quiniucua. ¹⁰ Jiyacari, queraatia cucua tiuunaa pueyari cucua tiuuniu tarinitianutianiya nojori jaara naquiya miishaare. Nojoriiri narta Pueyaso muerasu tacartanutianiya. Majaari

nojori niqiniu paniniu quiniutianiya tarijia narta Pueyaso muerasu. ¹¹ Queraatia sapojonuujaca Pueyaso rupaa pohuatanaari supenutaniya. Nojoriiri queraatia pueya sapojonutaniya. ¹² Jiyacaritij, sesa miiniuuri socua jiyanoehua jiyacatenutaniya mijiria. Cunora, queraatia pueyari narta pueya paniniu tarinitianutaniya. ¹³ Saniniuujia, cucua tiuujia jaara rejeretare pueyaracaanu cuno naquiya miishacari jiya cuaara puequere-jaatijia, nojuaja cutaraari shacantuca quijiara jatanishaanutaniya, pueyaracaanu na rishiniuria. ¹⁴ Pueyaso rupaa jaara pohuataasaare janiyajiniji pueyapue niquiara puetunu jiyacajinijanaa, nojori niishiniuria taate nojori naata cua muerasura quiniuni, jiyacaritij, jiyari shusha puequenutaniya cutara.

¹⁵ Pueyaso sequesano caminiujiunia Danielri tariucuaaanu pohuataquiaari sacuaratia casaanaari supenutaniya, puereeta niquishano. Cunoori Pueyaso pueya shaajariquiano. (Cante nio serojiyani, cuaara niishiiria casaa na sequeyani.) Niaa jaara cuno sacuaratia casaa niqiri Pueyaso Secojoua tiajinia nujuetasano, niocua mashiri. ¹⁶ Jiyacaritij, canapete Judea jiyajinia quiyani, nojori cuaara mashiria tuhuanuhuacua. ¹⁷ Canapete na tia cacojiria quiyani, nojori cuaara tiuquiyaquiri na tiajiniaaco maja na tarishiniuria na casamiicua. ¹⁸ Canapete cuhuariquijajinia quiyani, cuaara tacateyaquihuara na tiajiniohua na toqueyacu. ¹⁹ Jiyacaritij, jiyanoehua taraatia quiniutianiari maajipohuara, canapete manajaotuhua quiyani, mariyata canapete supuejaca muerasu jiitiaani. ²⁰ Juhucarijia Pueyaso nia secojoriquia nia mashiyocutunu panishacari quiyaquiniuria shuniyara, samaatenu juucanio. ²¹ Cuno quishacari, jiyanoehua naquiya miiniuuri quiniutianiya seetanujanaa. Jiya coteenujiniji, jiyano naquiya miiniuuri maja na niquishaanu quiquiaari tari. Naajuhuj, naa naquiya pueya miiniu nuhuajitij, majaari socua na caminiu quiniutianihua juhua nio naquiya miiniu. ²² Cuno naquiya miishacari jaara tajiyaquiri ritia, pueya maara cureyacuquij. Pueyaso cutaraari na tajitiniutianiya ritia, na saquirojosano pueyacu na taraajesacari.

²³ Jiyacaritij, majaari nia tojinu, tamonu jaara sequere nijaniya: “¡Cua tarajanunaa, Cristoqui tari tiuquiriohua! Niy quiyano”. Naajuhuj, majaari nia tojinu tamonu jaara nia sequere: “Nooj, jati quiyatej”. ²⁴ Queraatia sapojonuujacaari supenutaniya. Nojoriiri tama na cuaqueyajaaja jiyatenutaniya juhua Pueyaso jiyarosana. Tamasacaari sequenutaniyacujia: “Janiyari Pueyaso sequenu panishano caminiujuniani”. Nojoriiri pueya sapojonutaniya jiyajeneta nojori miishanota. Naa nojori miishacari, mijiria quiniaa pueyari jyaniniutianiya nojoriqui seetanujanaa Pueyaso jiyaramiquishano. Jaara na naata quiri, Pueyaso saquirojosano pueya sapojonutaniya-jaarihuaj. ²⁵ Pueyanaa, naa cua sequesacari nijaniyajitij, janiyacujaaari juhuacarijia nia numootereeni. ²⁶ Naaratej, majaari nia quianu cua pajenucua, pueya jaara sequere nijaniya: “Cristo jati cariiquia jiyajinia quiya”. Naajuhuj, majaari pueya nia tojinu nojori jaara sequere nijaniya: “Miji, Cristo sohuacamara cajiya. Nia niquishijia”. Majaari nia shanacunu naa nia sapojosaanuratej. ²⁷ Mijiria cua tiuquishacarihuua, majaari jiyasohua cua tiuquiniu quiniutianihua. Naatej, taa pueya niquiquiaa miacana nunujiano pananu muetasamajicuaani, pananu tiuquishocoranio, pueyari naa cua niquiniutianiya cua tiuquishacarihuua. ²⁸ Tee casaa mocua quiyani, mohuari tii rerequeejonutaniya.

Jesuuri naa niishitiojoriquiaa miriqui, mijiria quiniaa pueya jaara sesere puera, nojoriiri saniitosaanutaniya.

Taa na quiniutianiya Cristo tiuquishacarihuua
(Mr 13.24-37; Lc 21.25-33; 17.26-30, 34-36)

²⁹ Jesuuri naa canaa pohuataquiaari socuatej:

—Ritia naquiya miishaanu nuhuajijia, pananuuri ninishiquiria quiniutianiya. Racaari maja na cuhuatanu quiniutianiya. Riyari totenutaniya. Jiya cajiniocua cumaaca jiitijacaari tetcacatunutaniya. ³⁰ Jiyacaritij, puereeta casaari jiya cajiniocua niquishaanutaniya, mijiria quiniaa niishiniuria janiyari quera roseyani. Puetunu nio jiyajinia pueyapuejanaari sapiyonuunutaniya, jiyanoehua nojori taraajeneta. Na nuhuaji, cua niqutiuniutianiari cohuaja najacajinia roseyano, jiyanoehua cua cumaacata, jiyanoehua shacantuca. ³¹ Janiyari jiyocuaaanuji cua seyata tiuquiniutianihuanu, cua jiyaramiquiniuria nojori puetunu cua saquirojosano pueyacuajanaa. Nojori tojtiasacari trompeta jonenu jiyanoehua, nojoriiri cua saquirojosano pueya rerejotenutaniya cucua, puetunu nio jiyajiniijianaa.

³² Nia pohuatareera higo naanajiniji, socua maninia nia niishiniuria taacari jiya puequenutaniyani. Higo naana cashacua jaara macumaaca quiri, na jaamasucuaari mueratiyua. Naa nia niquishacarij, niaari niishiya tacareejonucui quera quiniutianiya. ³³ Naajuhuj, niaa jaara puetunu cua sequesanojanaa niqiri tari tohuateyano, niocua niishiri janiyari quera tiuquihuani. Tari jiya puequesacari quera. ³⁴ Seetanujanaa

nia sequeyanijia, nio pa quishacari pueyani, majaari nojori shaajenu quiniutianiya juhuanojuaja, nojori cuaara puetunujuanaa cua pohuatasano niquirijiaatijia. ³⁵ Jiya, jiya cajiniocuano, cunoori shaajenutaniya. Cua sequesano cutaraari tohuateenutaniyacujua. Cua rupaari pueyaracaanu setanu rupaajanaa quiniutianiya.

³⁶ Maja cutaraari quenaaja tamonu pueyano niishiniu taacari jiya puequenutaniyani, mariyata taacari cua niiniutianihuani. Jiyocuacaanu quiniaa Pueyaso seyari maja na niishiniujuhuaj. Majaari quenaaja cua niishiniujuhuaj. Saaja cua Queeri tamajaaja na niishiya cutara.

³⁷ Quera cua tiuquiniu panishacariuhua, mijiria pueyari juhuajaniya quiniutianiya taa Noé quishacari mijiria tariucuacaanu pueya quiquiaaricuaani. ³⁸ Jiyacaritij, nio jiya pajaashitiaaquishacarijia, supuetanaari juhuajaniya miaquenuujua quiquiaari. Juhuajaniya queranacunuuriquiaajaariuhua. Juhuajaniya necohua camiyoteriquiaajaariuhua. Noé jaara tiuquitiaquiaarijiaatijia na puereetua buqueiniacuma. ³⁹ Nojoriiri saaja juhuajaniya quiriquiaa pajaa jaara nojori pajaashitiaquiaarijiaatijia. Puetunu pueyajanaari canashiyacuiji netasaaquiaari. Mariyata naa quiniutianiyari cua tiuquishacariuhua. ⁴⁰ Jiyacaritij, caapiqui pueya quishacari cuhuariquiajinia, niquiriyatuuri rishaanutaniya, Pueyaso pueyano na quiniucua. Tamonuuri jateenutaniya saniitiosocoriquiano saniniujia. ⁴¹ Naajuhua, caapiqui maajipohua riiquiniushacari tunanajiniacuma, niquiriyatuuri rishaanutaniya. Tamonuuri jateenutaniya. ⁴² Nocuaji juhua sutejaca nia quiriquia. Majaari nia niishiniu taacari nia Jiyaniijia tiuquiniutianihuani. ⁴³ Nio nia niishiri. Tia camaru jaara niishiri quia taacari nohuasejoja niiniutianiya nocuani, nojuaja maara nocuaji sutere maja nohuasejoja tiuquiniuria na casami nohuasenura. ⁴⁴ Naaratej pueyanaa, niaa cumaati cua sashiya, janiya mariqui nia jiyajenetemohuarini.

Jesu pohuatasano maninia serujiniji, sesoriquia serujinijinio
(Lc 12.41-48)

⁴⁵ Socua cua pohuatasano nia tojitiare pueyanaa. Jiyano hua casamiriaca pueyanoori queraatia seyaraa quiquiaari. Cuno jiyaniijiaari tucuacaanu quianu paniquiaari tamonu jiyajinia. Naaratej, na nuhuajiria, nojuajaari niquiriyatu na seyajinijinio jiyatequiaari juhua na tia camarura, narta seya na mianuutenura maninia, puetunu juucajanaa. Cuno seruuri niishijia quiquiaari, na camarnu tojjijajuhua. ⁴⁶ Cuno seruuri shuquiriaatia quiniutianiya na camarnu jaara na riuriatasuhua maninia poonijiyano taa na camarnu sequequiaari na nuhuajiriacuajani. ⁴⁷ Naaratej, setanujuanaa nia sequeyanijia, na camarnuuri na jyatenuutaniya puetunu na jiiatasanojuanaa cojuanara. ⁴⁸ Saniniuuja, cuno seru jaara sesa mijia quiri, nojuajaari tama sequenutaniyajaacujua: “Cua jiyaniijiaari jiyano hua tarishiniutianiya”. ⁴⁹ Jaara naa niishiriojore, nojuajaari narta seya piquiniu co-teenutaniya. Mashaasequenuujuaca cojiniutianiyaajaariuhua queranacunuunura. ⁵⁰ Naa juhuajaniya na quishacaritij, na jiyaniijiaari jiyacari na jiyajenetenuutaniya. ⁵¹ Naa sesa na quiniucuatej, na jiyaniijiaari jiyano hua na saniitonutaniya. Na nuhuaji, na jatanutaniyari na cojiritiasocoriquiano saniitonu sapuenu juhua maninia niquishano mijijaca pueyata. Nojoriiri tii nujuquetunutaniya. Na quiaa miaquenuunutaniyari, naquiya na miiquosacari.

25

Jesu pohuatasano diez niyacoojorijiniji

¹ Nia pohuatareera taa Pueyaso shuriucua tiuquitianu panijiaa quiniutianiya cua tiuquishacariuhua. Nojoriiri juhua diez niyacoojori quiniutianiya, canapute camiriquiano pueyano sashiri quiaacuajani. Cuno niyacoojoriiri quojoquiaari camiriquiano pueyano sashiniuria, na tiuquishacari nojori tiuquitianura nata tiaco. Nojoriiri samaritiu patootaquiaari. ² Cinco cuno niyacoojorijinijiiri mosanucua quiquiaari. Tamasacaari saniniuuja niishijiaa quiquiaari cutara. ³ Mosanucuaari saaja niquiriyatu samaritiu patootaquiaari. Majaari socua samaritiu nojori panu quiquiaari. ⁴ Niishijiaa cutaraari socua samaritiu pooquiaari, nojori samaritiu puequesacari na noshitishocoriquiano. ⁵ Camiriquiano pueyano tarishishacari, puetunu nojorijianaari maquenuujuquiaari. Nojoriiri socua maquetuquee. ⁶ Shiyaqueya, tamonu pueyanoori nacaquiaari: “¡Camiriquiano pueyano cumaji tari! ¡Nia naacusee!” ⁷ Puetunu cuno niyacoojorijianaari ritia saneecuatuquiaari. Quera pueetacoyano na samaritiu nishiriiniuriiri. Nocuaji niishijiaa niyacoojoriiri socua na pootusano samari noshitirii. ⁸ Jiyacaritij, mosanucua niyacoojoriiri narta niyacoojori sequeere: “Canaara nia rashiquiojoreja nia samaritiujiniji. Canaa samaritiu tari pueetaareeni”. ⁹ Cuno cinco niishijiaa niyacoojoriiri nojori riucaaree: “Maja. Maja maninia canaa

niquitionura niajaniya, puetunu pa samaritiujianaacua senota pueetama. Ritia nia quiaare juhuari na masejosaqui, socua nia masenura tiji”.¹⁰ Cuno mosanucua niyacoojori quiojosacari samari masenuucua, camiriquiano pueyanoori nojori niyacari tiuquishii. Cuno samaritiuriaca niyacoojori cutaraari camiriquiano pueyanota tiuquitiaquiari camishaqui tiaco queranacunura. Tia tiotiuuri mishiquisoaaree.¹¹ Na nuhuaji, mosanucua niyacoojori tiuquijioquiaariuhua. Tia tohuateyaji jiiquionuusuhuari. Sequetureeri: “Jiyaniijianaa, jiyaniijianaa, canaacuaji quia riatareja tiotiu!”¹² Jiyaniijaari saa sequereejaa: “Seetanujanana nia sequeyanijia, maja cua niishiniu niajaniya”.

¹³ Naa na pohuatunu nuhuajitij, Jesuuri canaa na saquiriojosano pueya sequeree:

—Pueyanaa, nia quiri juhua sutejaca, nia niishyaquishacari taacari cua tiuquiniutiani-uhuanu, casaa juucatej.

Miriqui Jesu pahuatasano cumaneeca poonitijonaajiniji
(Lc 19.11-27)

¹⁴ Na nuhuaji, Jesuuri socua miriqui pahuataquiari canaa na niishitiojonura taa Pueyaso muerasu miishaanutaniya jiya puequesacarini. Jesuuri naa canaa pahuataquiariitij:

—Tamonu jiyaniijaari tucuaaanu quianu paniquiaari tamonu jiyajinia. Na nuhuajiria, na seya niquitiojoquiari na racatasano cumaneecaari, nojori cuaraa poonitijioora cuno cumaneeca na canijasocoriquiano.¹⁵ Naacuajitij, coteenu seru niquitiooree cinco mil cumaneecaari. Tamonuuri niquitioaaree dos mil. Tamonuuri niquitioaaree mil cumaneeca. Na jiyaniijaari naa nojori niquitiojoquiari na niishishacari nojoriiri rimiajata niishijiaa quiquiaari, socua cuno cumaneeca nojori canijianura. Na nuhuaji, nojori jiyaniijaari quiaquiari.¹⁶ Cinco mil cumaneeca jiiitianaari ritia coteequiaari casami masenura na niquitiojosocoriquiano socua cumaneecara, na reratenura na jiyaniijia. Naacuajitij, cuno seruuri socua cinco mil cumaneeca reratequiaari coteenu na jiiitasanojiniji.¹⁷ Naajuhuj, dos mil cumaneeca jiiitianaari socua dos mil cumaneeca reratequiaari na jiiitasanojiniji.¹⁸ Mil cumaneeca masenaari saniniuujia maja na poonitijionu quiquiaari na jiyaniijia niquitiosano cumaneeca. Nojuajaari saaja jiyajinia jiuutiaquiari na jamojuara na jiyaniijia cumaneeca.¹⁹ Seya jiyaniijaari camueenujuquiaari jiyanohua. Socua tiuquiquiaariuhuari na cumaneeca na masejonuhua na seyajiniji.²⁰ Coteenu nocua tiuquiquiaariiri cante cinco mil cumaneeca niquitiosaaquiaaricujani. Nojuajaari na jiyaniijia sequeree: “Jiyaniijianaa, quiaari cua niquitioocano cinco mil cumaneeca. Niya quiyari socua cinco mil cumaneeca quiara, cua poonijiosanojiniji cua reratesano”.²¹ Na jiyaniijaari na sequeree: “Maniniacuaja. Quiaacuajaari maninia cua seru. Majaqui najuhuaana cua tiuuniu quiquianu quiocua. Quiaacuajaqui maninia miiquianu secaja na niquitiosanota quiajaniya. Janiyari quia jiyatenutaniya queraatia jiiitanarani. Miji quia tiuquimia. Niya cuata quia quishii shuquiriaatia”.²² Na nuhuaji, tamonu seruuri na jiyaniijiaacua tiuquishiijuhuaj, nooj, cante dos mil cumaneeca niquitiosaaquiaaricujani. Na jiyaniijia sequereeri: “Jiyaniijianaa, quiaari cua niquitioocano dos mil cumaneeca. Niya quiyari socua dos mil cumaneeca quiara, cua reratesano cua poonijiosanojiniji”.²³ Na jiyaniijaari na sequeree: “Maniniacuaja. Quiaacuajaari maninia cua seru. Majaqui najuhuaana cua tiuuniu quiquianu quiocua. Quiaacuajaqui maninia miiquianu secaja na niquitiosanota quiajaniya. Janiyari quia jiyatenutaniya queraatia jiiitanarani. Miji quia tiuquimia. Shuquiriaatia niya quia quishii cuata”.²⁴ Na nuhuaji, tamonu seruuri tiuquishiijuhuaj cante mil cumaneeca niquitiosaaquiaaricujani. Na jiyaniijia sequereeri: “Jiyaniijianaa, janiyari niishiyani quiaacuajaari quarta pueyaca tarajeyashijia. Quiaari tamasaca natoosanojiniji senoocua. Quiaari tamasaca poonijiosanojiniji miajajuhuj”.²⁵ Naarate, janiyari quia cumaneeca pueretacanu nohuasenujuacani. Cunora janiyari quia cumaneeca jamocanu raamani. Quia niquiri. Niya quiyacuaja quia cumaneeca puetunujuanaa”.²⁶ Na jiyaniijaari na juuari: “iQuiaaqui sesoriquia pueyano! iTaajeca seque! ¿Quiaateeri niishiquianu janiyari tamasaca natoosanojiniji senoocuanu, tamasaca poonijiosanojiniji miajajuhuj? ²⁷ Quiaa jaara cua jiyaniquianu naa quiijatej, ¿casara cua cumaneeca quia niquitioyaquiquianu cumaneeca cojuanaarini? Nojori jaara cua cumaneeca poonijiotecanu, nojori maara socua na canijiacanu quiria”.²⁸ Jiyacaritij, jiyaniijaari tamasaca na seya sequeree: “Nio sesa cua serujiniji nia jaariutiare cua mil cumaneeca. Nia niquitioore cutara cua maninia seru, cante diez mil jiiitia tariucujani.²⁹ Naacuajitij, cante casaa jiiitacuuaani, nojuajaari socua niquitiosaanutaniya, queraatia jiiitia na quiniuria. Saniniuujia, cante secaja jiiitia najuhuanani, nojuajaari secaja na jiiitasano jaariutiasaanutaniya puetunujuanaa.³⁰ Nio najuhuaana quijia seru saniniuujia,

nia jatare carijiniacuma ninishiqui. Tii sapuenutaniyari. Na quiaqua miaquenutaniyari na noonuta, naquiya na miishacari”.

Jiya puequesacari, puetunu pueyapuejanaan nequesoreesaanutaniya saniitiosocoriquiano

³¹ Puetunu cua seyajanaanu jiyocuacaanu jia cojiniutianiya janiya jaara tiuquiriohuani Pueyaso shacantuuca cumaacata, Jiyaniijajanaa cua quiniuria mijiria. Janiyari shanohua puereeta jiyaniijia cajitiujinia cajiniutianiya, pueya cua nequesoreesacari. ³² Puetunu pueyapuejanaanu cucua rerejotesaanutaniya puetunu nio jiyajiniujuanaa. Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquia cabraacuaca tajinijicuaani. ³³ Janiyari maninia pueya nujuatejonutaniya cua miaquetajarani. Saniniuujia, janiyari sesoriquia pueya nujuatejonutaniya cua muenecarani. ³⁴ Na nuhuaji, janiyari cua miaquetajara nujuatiuyano sequenutaniyari: “Miji, cua Que shuquiritiasano pueyanaa. Shusha jiya shipinishacari niaarano cua Que riuriotaca nia masere. ³⁵ Cunoori niajaniyara, maninia miijia nia quiniucua. Cua miaajesacari, niaari cua miaqueteja. Cua jiyamuesacari, niaari cua raateja. Tucuaaanu cua rucuanajosacari, niaari nia tiaco cua tiuquiniija. ³⁶ Toqueeju cua quishacari, niaari cua niqutioquiaari. Cusosu cua quishacari, niaari cua niquiniucua quiaja. Nujuatejojuajinia cua quishacari taraatia, niaari cucua quiojojua cua cumanijianuucua”. ³⁷ Na nuhuaji, maninia pueyari cua nequesotanutaniya: “Jiyaniijanaa, ¿taacari canaa niqutioquiaari quiajaniya miaajeyanoni? ¿Canaateeri quia miaquetequiaarini? Majaruhua. ¿Taacari canaa niqutioquiaari quiajaniya jiyamueyanoni? ¿Canaateeri quia raatequiaarini? ³⁸ ¿Taacari canaa niqutioquiaari quiajaniya canaa jiyajinia rucuanajeyanoni? ¿Canaateeri canaa tiajinia quia tiuquiniquiaarini? Majaruhua naa canaa miiniu quiquiaari quiajaniya. ¿Naajuhaaj, taacari canaa niqutioquiaari quiajaniya toqueejuni? ¿Canaateeri quia niqutioquiaari toqueni? Maja. ³⁹ ¿Taacari canaa niqutioquiaari quiajaniya cusosuni, nujuatejojuajiniano? ¿Canaateeri quioqua quiojoquiaari canaa niquiniuria quiajaniyari? Maja”.

⁴⁰ Janiyari cuno maninia pueya rucuanutaniyari: “Seetanujanaa nia sequeyanijia. Niaa jaara naa maninia miqutioquiaari tamonu cua muerasuniyojuajinijinio, niaari maninia cua miqutioquiaarijuhuaaj”.

⁴¹ Na nuhuaji, janiyari cua muenecara nujuatiuyano sequenutaniyari: “¿Cua shuricuajia niqutio nia quiaa, sesoriquia pueyanaa! ¿Niaari cua Que sesacasano! Niaari mani quioquojinia quejoosaanutaniya. Cuno mani quioquoori maquesaashijia. Shipinishaaquiaariiri samaruhua jiyaniijiaacuaji, na seya samaruhuacuajinio. ⁴² Niaari naa miishaanutaniyaqui nia taraajeyaquinuucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. ⁴³ Cua rucuanajosacari nia jiyajinia, majaari nia tiajinia nia tiuquini quijia janiya. Toqueeju cua quishacarijuhuaaj, majaari toque nia niqutio nia quijia janiya. Nujuatejojuajinia cua quishacari, cusosu cua quishacarijuhuaaj, majaari nia quianu quijia cua niquiniucua quenaaja”.

⁴⁴ Jiyacaritij, cuno pueyari cua nequesotanutaniya: “Jiyaniijanaa, ¿taacari canaa niqutioquiaari quiajaniya miaajeyanoni, jiyamueyanujuhuaaj? Majaari canaa niquini quijia quiajaniya canaa jiyajinia rucuanajeyano tiaaju, toqueeju quiyano, cusosu quiyano, nujuatejojuajinia quiajuhuaaj. Canaa jaara naa quiyano quia niqutioquiaarini, canaa maara quioqua taraajeyaquiari”. ⁴⁵ Janiyari nojori rucuanutaniyari: “Seetanujanaa nia sequeyanijia, nia taraajeyaquinuucua tamonu cua muerasuniyojuaacua, niaari seetanujanaa cucua taraajeyaquiaria”. ⁴⁶ Jiyacaritij, maninia miyashijia pueyari quejoosaanutaniya pueyaracaanu saniitiosocoriquiano. Saniniuujia maninia miijia pueyari Pueyaso shuricuua quianutaniya, pueyaracaanu shuquiriaatia nojori quiniuria.

26

Judiocuaca camarucua rojotoosacari Jesu nojori quianura
(Mr 14.1-2; Lc 22.1-2; Jn 11.45-53)

¹ Jesu jaara puetunu nio pohuatasanojuanaa pohuatanu puecaquiaari, canaa na saquiriojosano pueya sequereeri:

² —Niaacuajaari niishiya, tama tariquiiri Pascua juucara queranacusacari. Janiyari jiyacari taucuaca niqutiosaanutaniyari, mosocoriquiano niyacutesanojinia teetesano.

³ Jiyacarijuhuaaj, canaa Judiocuaca camarucuaari rerejoquiaari Caifás tiajinia. Caifásri pueyacuara secjonaa jiyaniijajanaa quiquiaari. Cuno pueya rerejoquiaarini, nojoriiri quiquiaari pueyacuara secjonaa camarucua, canaa Judiocuaca camarucuanio.

⁴ Nojoriiri cuno tiajinia pocoojoquiaari taa nojori sapojonutaniya Jesu na quiatuso-coriqiuani, nojori mosocoriqiuano. ⁵ Nojoriiri tama sequetooquiaarijiaaja: “Maja pa monu Pascuara queranacusacari, paa mariqui pueya juaatiriiri”.

Tamonu maaji totasacari na shanhua jaanutaja Jesuucua
(Mr 14.3-9; Jn 12.1-8)

⁶ Tamonu juuca, Jesuta canaa quishacari Betania tiacajinia, canaari Simón tiajinia miagenuuriquiaani. Cuno Simónri tarijia lepra cusunujiniji Jesu naatanishano quiquiaari. ⁷ Miaquejajinia Jesu cajishacari, tamonu maajiiri nocua catecanoquiaari. Shiitaniyotua shucuariquiaja pataconiyotua cacatariquiaari, cohuaja saajiajiniji quejasano. Tii quiriquiaari shanhua jaanutaja. Cuno jaanutajaari jiyanhua queraatia cumaneecata masesano quiquiaari. Cuno maajiiri Jesu nacaacua na totaree puetunujuanaa. ⁸ Canaa jaara niqiquiaari naa cuno maaji miishanotej, canaari juaaquioreeni. Noojiaqueya canaajinjinoori naa sequeturee:

—¿Casaara cuno maaji niitiaree najuhuana shanhua jaanutajani? ⁹ ¡Cuno jaanutaja maara queraatia cumaneecara niqitiosaare, casamijiniucua niqitiosocoriqiuano!

¹⁰ Jesu tojishacari taa canaa sequeriquiaa cuno maajini, canaa sequereeri:

—¿Casaara nio maaji nia taroojiyani? ¡Na miishano janiyani, cunoori jiyanhua maninia quiria! ¹¹ Casamijiniucuaari niaata quiriqiuano pueyaracaanu cutara. Janiya saniniuuja, majaari cua quiniu quiniutianiya pueyaracaanu niaata. ¹² Nio maaji totasacari cua na shanhua jaanutajani, juhuacarjia cua cuaqueya jeecaari, raaco cua niasaanura janiya jaara mosaareni. ¹³ Seetanujuanaa nia sequeyanijia, pueyaracaanu pueya pohuatasacari Pueyaso rupaa janiyajiniji, nio maaji miishanoori pohuataaanutaniyajuhua puetunu jiyacajinijanaa. Naa na miishano janiyani, majaari na niyajetasaanu quiniutianiya pueyaracaanu.

Judas tacartasacari Jesu, na quiatenura
(Mr 14.10-11; Lc 22.3-6)

¹⁴ Jiyacaritij, Judasri pueyacuara secojonaa jiyaniijianucuaacua quiaquiaari. Nojuajaari niquiriyatu canaajinjini Jesu doce saquiriojosano pueyano quiquiaari. Na sesaari quiquiaari Judas Iscariote. ¹⁵ Secojonaa jiyaniijianucua sequesee:

—¿Taa cumaneeca nia niqutionutaniya janiyani, janiya jaara nia quiatere Jesuni?

Nojoriiri ritia treinta cumaneeca niqutioquiaari Judas. ¹⁶ Na nuhuaji, Judasri pueyaraaanu niishiriojoriquiaa maatucua taacari quiatere Jesuni.

Jesu miaquesacari na nuhuajiria na pueyata
(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Puetunu marijarajanaa, canaa Judiocuacani, canaari poreetesoo pan miaquenuquiaari puetunu siete juucajanaani. Coteenu juucaari sesojosaaquiaari Pascua juuca. Naaratej, Pascua juuca, canaa, Jesu saquiriojosano pueyani, canaari nocua catecanoquiaarini naa canaa nequesotanura nojuaja:

—Jiyaniijianaa, ¿tee quia pania canaa majeetenura quiocuaji borregoni, pa miaquesocoriqiuano quiarjia Pascuarani?

¹⁸ Jesuuri canaa riucuarree:

—Paacuajaari miaquenutaniyani tari cua sequesano pueyano tiajinia Jerusalén tiacajinia. Tii nia quiaare. Tia camaru nia sequesee: “Canaa niishitiojonaari naa quia sequeya: ‘Quera cua cusosacari. Janiyari cua nuhuajiria cua pueyata miaquenutaniya Pascua borrego quia tiajiniani’”.

¹⁹ Canaari naa miiquiaarini taa Jesu sequequiaari canaacujani. Canaari tii majeetequiaari borregoni, Pascua juuca miaquesocoriqiuano.

²⁰ Jaara niniquiaari, Jesuuri canaa na doce pueyata miaquejajinia cajituriquiaa.

²¹ Canaa miaquenuusacari, Jesuuri canaa sequeree:

—Seetanujuanaa nia sequeyanijia, tamonu nijaniyajinjinoori cua tacartanutaniya, cua paraa na quiatenura janiya, nojori monura janiya.

²² Canaari jiyanhua taraajeqeenei naa Jesu sequesacaritij. Puetunu canaajanaari Jesu nequesotareeni:

—¿Janiya jiyoteeri jiyaniijianaa?

²³ Jesuuri canaa riucuarree:

—Cante cuata tureneetaa pa miacojuajinjini, nojuacuajaari cua quiatenutaniya mosocoriqiuano. ²⁴ Janiyacuajaari mosaanutaniyani taa janiyajiniji naajiotasaaquiaaricujani tariucuaaanu Pueyaso Rupaajinia. Saniniuuja, jiyanhua taraatia miishaanutaniyani cua quiateriquano pueyano. Maara socua maninia quiquiaari cuno pueyanora jaara raaquishaaquiaari.

²⁵ Na quiateriquiano Judasri socua Jesu nequesotareejuhua:

—¿Janiya jiyoteeri Niishitiojonanaa?

Judas riucuaereeri:

—Taaquiriirinij. Quiajaniyacuaaquiniatejaj.

²⁶ Canaa miaquesacari, Jesuuri pan ririi. Na Que Pueyaso secojoree nocuaraari.

Na nuhuaji, na necasereeri puetunu canaarajanaa, canaa miaquesocoriquiano. Canaa sequereeri:

—Jajaa, nia masere. Nia miaquere. Nio panri cua cuaqueya.

²⁷ Na nuhuaji, Jesuuri raatonuque pataree. Pueyaso na secojonu nuhuaji nocuara, Jesuuri canaa na niquitioree. Canaa sequereeri:

—Niojiniji nia rature puetunu nijanijajanaa. ²⁸ Nioori cua nanaca, Pueyaso jiyanoonuria nijaniya. Cua nanacaari queraatia pueyacuara shoonutaniya, nojori jiyanooshanura sesa nojori miishanojiniji. ²⁹ Seetanujuanaa, majaari socua cua ratunu quiniutianiya niaata mijiria nio uva caacajiniji. Janiyari niaata na ratunutaniya cutarani janiya jaara tacatemohuani, pueyaracaanu Jiyaniijiajanaa cua quiniuria. Jiyacaritij, jiyanoohua maninia quiniutianiyari cuno quishacari. Paari mariyata jiyanoohua shuquiriaatia quiniutianiya pueyaracaanuni.

Jesu sequesacari Pedro, nojuaja nocuaji seetanutaniya

(Mr 14.26-31; Lc 22.31-34; Jn 13.36-38)

³⁰ Canaa jaara jaaquejejoquiaari supuetana David naajioneejinijini, na nuhuaji canaari quiojoquiaarini Olivo cuhuariquia tuhananuucua. ³¹ Jesuuri jiyacari canaa sequeree:

—Puetunu nijanijajanaari cucua tiuuniu tarinitianutaniya quiari niucuaaja. Naa naajiotasano quiyacuajaari Pueyaso sequesano tarija: “Janiyari borrego cojuana monutaniyani. Na borregohuari niaquejonutaniya tamajaaja”. ³² Naajaa, janiya jaara samitarohua macujinijini, janiyari nia puetanutaniya Galilea jiyajiniani.

³³ Pedroori Jesu sequeree:

—Puetunu quia pueyajanaa jaara quiocua tiuuniu tarinitiare, janiya cutaraari maja cua catenu quiniutianiya quiocuaaji.

³⁴ Jesuuri Pedro sequere saaja:

—Seetanujuanaa nio niucuaajani, caacaraja niunijiyaquishacarijia, quiaari naa pacutejonutaniya seetanu cucuaji: “Maja cua niishiniu cuno pueyano”.

³⁵ Pedroori Jesu sequeree:

—¡Pueya cuaara moora janiyaqui, naajaa, majaari cua seetanu quiniutianiya quiocuaaji! Puetunu canaa Jesu pueyajanaari mariyata naa sequequiaaritij, taa Pedro sequeriquiaacuani.

Jesu secojosacari Getsemani cuhuariquiajinia

(Mr 14.32-42; Lc 22.39-46)

³⁶ Na nuhuaji, Jesuuri tamonu cuhuariquiajinia tiuquijioquiaari canaa na saquiriojosano pueyata. Cuno cuhuariquia sesaari quiquiaari Getsemani. Jesuuri canaa sequeree: —Niyaja nia cajitiuri cua secojosacari cua Que jati socua nia taccoji.

³⁷ Jesuuri Pedro jiyataquiaari, caapiqui Zebedeo niquiohuanio. Jesuuri juhuacatecara taraajequiaari. Jiyanoohua tacaariquiaajaariuhua. ³⁸ Jiyacaritij, Jesuuri nojori sequeree:

—¡Coojia quera jiaqueya jiyanoohua cua taraajenuta! ¡Quera cusoyanijia! Niyaja cua sashitiuri. Nia sutere nia tarajanura janiya quenaaja.

³⁹ Jesuuri nojori shuriucuaaji canujiyaree tamajaaja socua nojori taccoji. Jiyocuara jacamaseeri Pueyaso na secojonura. Naa sequereeri:

—¡Cua Quena, jaara na naata quiri, maja quenaaja cua cartenu naquiya cua miishanura! Naajaa, janiya cuaara miishaariqui taa quia paniyacuajani, maja juhua cua panishano.

⁴⁰ Na nuhuaji, Jesuuri na pueya niquishuhua. Nojoriiri saaja maqueturiquiaa. Pedro sequereeri:

—Pedronaa, ¿majate nia naata cuata sutenu quenaaja rupaquijia? ⁴¹ Nia sutere Pueyaso nia secojonura, niaa mariqui sesa miiriiri niaa jaara saniniujuishaare. Seetanujuanaa, poojaari maninia miiniu panijia. Pa cuaqueyari saniniuuja sasaca quiyacujua. Naacua-jitij, majaari pa naata maninia miiniu Pueyaso cumaquiyaquishacari pajaniya.

⁴² Jesuuri socua tacatequiaariuhua tamajaaja Pueyaso secojonuhua. Naa sequereeri:

—Cua Quena, janiya jaara naquiya miishaareni, janiya cuaara miishaariqui taa quia paniyacuajani.

⁴³ Jesuuri na pueyacuata tacateyarohuacuahuaj. Maquetiuyano nojori riuriatasuhuariuhua. Nojori namijiaari saaja seecutayariquiaa jiyanoohua nojori maquenu paniniutia.

⁴⁴ Jesuuri nojori tarinitiaquiaari socua. Quiaquiaarihuuari na Que secojonuhuara. Secojonu pacutequiaariiri taa na secoriquiaa coteenucajani. ⁴⁵ Na nuhuaji, na pueyacu nimiohuarihuaj. Nojori sequesuhuari:

—Quiarjia cutara nia maquetuuyare. Nia paniyatere cutara maquetunu. ¡Juaj! ¡Nia tojiri! ¡Janiyari tari quitatesaanutaniya sesa miijiaca pueyani! Nojoriiri cua miiniutianiya taa na panitiuyacuajani. ⁴⁶ ¡Nia saneecature! Pa quiaare. Cumaji tari cua quiateriquiano.

Moronucua na paraa jaatucutasacari Jesu

(Mr 14.43-50; Lc 22.47-53; Jn 18.2-11)

⁴⁷ Jesu pocuasacarijia, Judasri jiyacari tiuquishii. Nio Judascuaajaari niquiriyatu canaajinijinio Jesu doce saquiriojosano pueyajiniji quiquiaari. ¡Queraatia pueyari Judasta nijioquiaari! Nojoriiri secojonaa jiyaniijianucua jiyaramiquishano pueya quiquiaari, canaa Judiocuaca camarucua jiyaramiquishano pueyajuhuj. Nojoriiri nijiniaquetucua mueruu pooriquiaa, macacanio. ⁴⁸ Judasri tari niishitioquiaari Jesu quiaturiquiano pueya taa nojori niishiniutianiyan teyanote Jesuni. Nojuajaquiri tari nojori sequequiaari: “Teyano pueyano cua nujiya pa tiuquishacarini, cunocuaajaari nojuaja. Niocua na quiaaseeritia”. ⁴⁹ Naacuajitij, Judas tiuquishacari Jesuucua, na sequeseeri:

—Quiocua tiuquiyaniija Niishitiojonanaa.

Jiyacarijia na nujuureeri. ⁵⁰ Jesuuri na sequeree:

—Cua rupenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee. ⁵¹ Jiyacaritij, tamonu canaajinijinio pueyanoori ritia shitiaree na nijiniaquetucua mueruu na shuucuaaji. Nata jaatere secojonaa jiyaniijia seru numocoori. ⁵² Jesuuri na sequeree:

—¡Na co jiniacuma quia shiriohua quia mueruu! ¿Majate quia niishiniu, cante mueruuta miaqueja pueyanoni, mueruuta mosaanutaniyajaarihuaj? ⁵³ ¿Quiaate niishiyacuiyajuahuj, janiya jaara cua Que sequereni cucua na jiyaramiquiniuria na seya jiyocuaaanuji na cojuanura janiya, cua Que maara ritia cucua jiyaramiquiri cincuenta mil na seyajinijinio? ⁵⁴ Naajuhuj, janiya jaara naa cua Que sequere na cojuatenura janiyani, ¿tariucuaaanu Pueyaso Rupaajinia janiyajiniji naajiotasanotucua taa tohuateerini?

⁵⁵ Jiyacaritij, Jesuuri na paraa sequeree:

—¿Taateni? ¿Janiyateeri nohuasejojuani, naa nia tiuquitianura cua quianura mueruuta, macacatani? Niaacuajaari juucua cua niquijia puetunu juucajanaa Pueyaso Secojoua tiajinia cajiano, pueya cua niishitiojosacari. ¿Casaara tii nia quiaaquiquianu janiyani? ⁵⁶ Naajaa, naacuajitij puetunu nia miishanojuanaari tohuateenutaniya, taa tariucuaaanu Pueyaso Rupaajinia naajiotasaaquiaari janiyajinijicuaajani.

Jiyacaritij, canaa, na saquiriojosano pueyani, canaari Jesu tiujiaquiaari niquiriyatuni. Puetunu canaajanaari mashiyocuatereeni.

Judocuaca camarucua nequesoreesacari Jesu

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesu quianaari na jaatucquiaari jiyaniijia Caifásua. Caifásri pueyacuara secojonaa jiyaniijia quiquiaari. Judocuaca camarucuaari tari Jesuucuaaji rerejoquiaari Caifás tiajinia. Nojoriiri quiquiaari Moisés Rootasanojiniji niishitiojonaa, canaa Judocuaca camarucuanio. ⁵⁸ Pedroori Jesu nuhuajiquiaari tucuaaanuji secojonaa jiyaniijia tiajinia. Cuno puereetuca tia shocuaari mataca quiquiaari. Pedroori tii carijiniacuma tiuquiquiaarijuhuaj. Jiyaniijia Caifás seya tajinia cajishiiri, na niquniuria taa nojori miiniutianiya Jesuni.

⁵⁹ Pueyacuara secojonaa jiyaniijianucuaari puetunu canaa Judocuaca camarucuaanaa pajeriquiaa pueya, nojori saquiriojotanura na sapojonuta Jesuucuaara, na mosaanura. ⁶⁰ Queraatia pueyari najuhuaana Jesuucuaara saquiriojotaree juucua. Nojori sequesanoori rimiajata quiquiaari tamasa sequesanojiniji. Na nuhuaji, socua caapiqui pueyari mariyata sesa saquiriojotaree Jesuucuaara. ⁶¹ Nojoriiri naa sequeree:

—Cuno pueyano naa sequecantej: “Janija jaara Sequere Secojoua tia niyartareni, janiyari na tianu tucuatantaniuhua jiuujianaraca juucajiniani”.

⁶² Jesuuri sanaa nujuariquiaa saaja. Nocuaaji, secojonaa jiyaniijiaari nujuaree. Jesu sequereeri:

—¿Majate quenaaja quia riucuanuujua? ¿Quiaate pueya tojirii quiocuara saquiriojotaano? ¿Seetanutejanaa nojori sequesano?

⁶³ Jesuuri saaja sanaa na tojiriquiaa. Nocuaaji secojonaa jiyaniijiaari Jesu sequeree:

—¡Cua tojiri! Paa niya quiya Pueyaso niquiarani. ¡Cua riucuaare! ¡Majaari sapojonu! ¿Quiaate Cristo, Pueyaso Niyanu?

⁶⁴ Jesuuri na riucuaaree:

—Jaa. Nojuacuajanijia taa quia sequereecuajani. Cua tojitiare. Na nuhuaji, niaari cua niqiniutiianiya Pueyaso miaquetajara cajiyo. Niaari cua niqiniutiianiya juhuaj jiyocuacaanuji tacateyanohua cohuajajinia.

⁶⁵ Pueyacuara secojonaa jiyaniijia jaara tojiqiaari naa Jesu sequesantej, tama na toque sutareejaarijia na juaniutia. Nata quiniaa sequereeri:

—¡Juhuej! ¡Nia tojishuriucuara na sequesano! ¡Nojuajaari tama na cuaqueyajaaja jiyateya juhua Pueyaso na quiniuria! ¡jijianohua sacuarataaari na sequesano Pueyaso niqiaari! ¿Paatucua casaara sashiri socua tamonu saquiriojotanura nocuaraarini? Niaacuaja shusha tojitiaree tama na sequesanojuaja sacuarataa Pueyaso niqiaari. ⁶⁶ ¿Taa pa miiniutiianiyoj? ¿Taa nia sequeyani?

Nojoriiri pueyacuara secojonaa jiyaniijia riuuaree:

—¡Cuaara mosaaria!

⁶⁷ Jiyacaritij, tamasacaari Jesu jiquioco riucojoree. Na jiquioco na masetejetureejaari-juhuaj. Tamasaca saniniujia, Jesu namijia na morotunu nuhuaji, na mocritia na piquituriiri. ⁶⁸ Na nuhuaji Jesu nequesotateeri:

—Quiaa jaara Cristo quiri, Pueyaso jiyarosano, quia niishiritioj, ¿cante quia piriini?

Pedro seetasacari Jesuucuaji

(Mr 14.66-72; Lc 22.56-62; Jn 18.15-18, 25-27)

⁶⁹ Pedroori jiyacari tii cajiriqiaajaa carijiniacuma. Jiyacaritij, secojonaa jiyaniijia seruuri Pedro niqishii. Nojuajaari niyacoo quiquiaari. Pedro sequereeri:

—¡Jaj, quiaacuaja cuno Jesuta rucanejojua, cuno Galilea jiyajiniijinio pueyanotani!

⁷⁰ Pedroori jiyacari seetaree puetunu pueya niqiarajanaa. Naa sapojoreeri:

—¡Maja cua niishiniu casa quia sequeyani!

⁷¹ Pedroori tohuateyajiria canujijaree. Jati, tamonu niyacoori na niquiriijuhua. Cuno seruuri jiyacari tii quiniaa sequereeri:

—¡Nio pueyanoori cuno Jesuta quijiajuhuaj, cuno Jesu, Nazaret tiacajiniijinio pueyanoni!

⁷² Pedroori Jesujiniji socua seetanu camiriohuacuahuaj:

—¡Maja cua niishiniu cuno pueyano! ¡Pueyasocuaajaari niishiya, seetanujuanaa nia sequeyanijia!

⁷³ Pasaja na tarishiniu nuhuaji, quiniqiu quiniaari Pedro sequetusee:

—¡Quiaaqui seetanujuanaa cuno Jesu pueyajiniijinio! ¡Quiaari juhua nojori pocuaajuhua!

⁷⁴ Jiyacaritij, Pedroori socua jiyacateere sapojonura. Naa cuno pueya sequereeri:

—¡Pueyasocuaajaari niishiya maja cua niishiniu cuno pueyano, niaa na sequeyani! ¡Pueyasocuaajaari cua sequesano tojiya! ¡Majaari cua sapojonu nijaniya!

Caacarajaari canashiyaquiji niunijioquee. ⁷⁵ Jiyacaritij, Pedroori naa cuno niucuaja Jesu sequesano niishiqui: “Pedronaa, caacaraja niunijiaquishacarijia, quiaari tari janiyajiniji seetanu pacutejonutaniya”. Pedroori tia shocua matacajiniji tohuataquiaari ritia. ¡jijianohua nujuquequeeri na taraajenuta!

27

Judiocuaca camarucua niqitiosacari Jesu jiyaniijia Pilato

(Mr 15.1; Lc 23.1-2; Jn 18.28-32)

¹ Tariquicuaji, puetunu pueyacuara secojonaa jiyaniijianucuaajanaari rerejoree narta Judiocuaca camarucuata. Nojoriiri roojotooree taa na miituniutiianiya Jesu na motenurani. ² Na nuhuaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

Judas Iscariote cusosacari

³ Judasri jiyanoohua macuhuaquejaari na niqushacari Jesuuri mosaanutaniya na quiatenucua nojuaja. Na tacaaniutia, Judasri quiaquiaari secojonaa jiyaniijianucuaacua, canaa Judiocuaca camarucuacuano, nojori na niqutionuhuaa cuno treinta cumaneeca. ⁴ Judasri nojori sequeere:

—¡Janiyaqui sesa miiriucuaani, najuhuaa cua quiatenucua maninia pueyano nijaniya!

Nojoriiri saa na riuuareejaa:

—Naajaa. Maja canaa miishano. Cunocuaajaari tama quia miishanojuaja.

⁵ Judasri nojori cari cuno treinta cumaneeca jatatee Pueyaso Secojojua tiajinia. Tiji quiacuahuari. Na riquiajiniji morotaquiaari sohaneyocuaari. Naa cusoquiaariiri. Sohaneyocuaacuaji jaasutaari. ⁶ Secojonaa jiyaniijianucuaari Judas jatasano cumaneeca reratequiaari. Nojoriiri tama sequetooquiaarijaaja:

—Nio cumaneecaari maja na naata Pueyasora racatajajinia niasocoriquiano. Nio cumaneecaari pueyano monu sami.

⁷ Puetunu nojorijianaa jaara niishiriojoquiaari taa na miitiuniutianiya cuno cumaneecani, nojoriiri marau paniyoru pueyano cuhuariquia masequiaari cuno cumaneecata. Cuno cuhuariquiaari jiyatesaaquiaari rucoonaa jamojuara, nojori jaara cusoyare Jerusalén tiacajinia nojori quishacari. ⁸ Pueyano monu samitia cuno cuhuariquia masesaanuucua, cuno cuhuariquiaari sesojosaaquiaari “Nanaca samitia masesano cuhuariquia”. Naa quiyajaari na sesa. ⁹⁻¹⁰ Naacujitij, Pueyaso sequenu panishano caminiujiunia supuetana Jeremías sequesanoori maninia tohuateequiaari. Nojuajaari na sequequiaaritij;

“Nojoriiri na treinta cumaneeca pataquiaari cuhuariquia masenura marau paniyoru pueyanojiniji, taa cua jiyaniijia Pueyaso sequequiaari janiyacujani. Tarijia, cuno treinta cumaneecata, maninia pueyanoori nata masesaaquiaari. Israel pueyari naa sequequiaaritij: ‘Cuaara treinta cumaneecata masesaaria cuno pueyano’ ”.

Pilato nequesoreesacari Jesu
(Mr 15.2-5; Lc 23.3-5; Jn 18.33-38)

¹¹ Jesuuri jaatucusaaquiaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquiniatejaj, taa quia sequereecuajani.

¹² Secojonaa jiyaniijianucua, canaa Judiocuaca camarucuanio, nojori jaara Jesuucuaa saquiriojotariquiaa, Jesuuri sanaa tojiriquiaa nojori. ¹³ Naaratej, jiyaniijia Pilatoori Jesu sequeree:

—¿Majate quia tojinu nojori, quiocuara tonujiyano queraatia?

¹⁴ Majaari Jesu riucuanu quirii quenaaja. Pilatoori nocuaji jiuujiateree, casaara na riucuaaquia quenaajani.

Pilato sequesacari Jesuuri mosaanutaniya
(Mr 15.6-20; Lc 23.13-25; Jn 18.38–19.16)

¹⁵ Puetunu Pascua juucarajanaa, Pilatoori nujuatejojuajinia nujuatesano pueyano cartenu jiitiquiaari. Judiocuaca panishano pueyanoori cartesaaquiaari pueyaracaanu.

¹⁶ Cuno quishacari, tamonu pueyanoori nujuatejojuajinia nujuatesano quiriquiaa, Barrabás jiyanishano. Puetunu pueyajanaari na niishijia sesa na miiniuucua. ¹⁷ Pueya rerejosacari Jesu na nacoojotasacari Pilato niquiara, Pilatoori nojori nequesotaquiaari:

—Judiocuaanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano. Pueyaso jiyarosana.

¹⁸ Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojiti-aquiriquiaa, nojori tojitianura Jesu. Cunora, camarucuaari Jesu monu paniriquiaa.

¹⁹ Pilato cajishacari na nequesoreesaqui, necocuaari nocua jiyaroquiaari tamonu na seru, naa na numootenuratej: “¡Narejatejaj, nareja! ¡Janiyari niucua maquiyojoree pueereeta cuno pueyanoocujini!”

²⁰ Jiyacaritij, secojonaa jiyaniijianucuaari, canaa Judiocuaca camarucua pueya niishitiojoriquiaa nojori sequenura, Barrabás cuaara cartesaaaria, Jesu cuaara mosaaria saniniuuja. ²¹ Naacujitij, jiyaniijia Pilato jaara pueya nequesotaquiaariuhua teyano nojori paniya na cartenurani, nojoriiri na riucuaaree:

—¡Barrabás quia cartere!

²² Pilatoori nojori nequesotaree:

—¿Naatee? ¿Taa cua miiniutianiya Jesuurinitioj, pueya sequesano “Pueyaso jiyarosani?”

Puetunu pueyajanaari ritia na riucuaaree:

—¡Cuaara teetsaaria niyacutesanojinia!

²³ Pilatoori nojori nequesotarohuacuhuj:

—¿Casaarateni? ¿Sesa miiritijiaara?

Pueyari saaja socua jiyanoehua nacaree:

—¡Cuaara mosaaria niyacutesanojinia teetsano!

²⁴ Pilato cartenu saniniujiushacari Jesu juucua, pueyari saaja socua jiyanoehua na-cooriquiaa. ¡Socua jiyanoehua juaaquioriquiaari! Pilato niishishacari maja na naata quiniutianiya Jesu cartenu, taa na paniriquiaa juucuacuajani, nojuajaari mohuaca maseree. Pueya niquiara shuquitiareeri. Na shuquitasacari, Judiocuaca sequereeri:

—¡Majaari cucua na tiutiasaanu quiniutianiya nia mosacari nio maninia pueyano! Cunoori maja cua miishano quiniutianiya. ¡Cunoori tama nia miishanojuajaaj!

²⁵ Puetunu pueyajanaari na riucuaeree:

—Naajaa. ¡Jaara mosaare, cuaara tiutiasaaria canaacua, canaa niqiuohuacuanio!

²⁶ Na nuhuaji, Pilatoori Barrabás tohuateree nujuatejojuajiniji. Saniniuuja Jesu maja-cutereeri. Na nuhuaji, na soldadohua na niqutioreeri niyacutesanojinia nojori teetesocoriquiano.

²⁷ Jiyaniijia Pilato soldadohuari jiyacari Jesu jaatucuree Pilato tiajiniaaco. Nojoriiri puetunu narta soldadohuajanaa rerejoteree Jesu shocuaqueya. ²⁸ Na nuhuaji, nojoriiri Jesu toque jocuaturee. Tamonu tucuaque toque cushitishaareeri, shaaruque, juhua jiyaniijiajanaa cushishano. Naa na miituriiri na macaatiuriaria. ²⁹ Nojoriiri juhuacontucua maateree na nacaquerajuhua. Na nuhuaji, na cushitituriiri Jesuuri. Naajua niqutiosaa-reejaariuhua, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucua mojoquetacoquiaari. Nojoriiri naa na macaatiiri:

—¡Jejeje, Judiocuaca jiyaniijiana!

³⁰ Nojoriiri Jesu riciojoree. Na naajua na jaariutiatureeri. Nataja na naca piqutiuriiri.

³¹ Naa nojori macaatiini nuhuaji Jesutej, nojoriiri cuno tucuaque toque jocuaquiaariuhua nocuaji. Tama na toquejaaja cushitishaarohuari. Na nuhuaji, nojoriiri na jiyataquiaari na teetenura niyacutesanojinia.

Jesu teetesacari niyacutesanojinia

(Mr 15.21-32; Lc 23.26-43; Jn 19.17-27)

³² Nojori tohuareetasacari tiaajiniji puecoosaquiria nojori quiojosacari, nojoriiri tamonu pueyano naacumaa. Nojuajaari Cirene jiyajiniijio pueyano quiquiaari. Simónri na sesa quijia. Soldadohuari cuno Simón pateree Jesu teetejara niyacutesano. ³³ Nojoriiri tiuquijiosee sesa miijia puecoosaqui. Pueya puecoosaquini, na sesa quiquiaari “Gólgota”. Nioori pueyano rupaaajinia sequeya “Pueyano nacaco”. ³⁴ Quiniquí, soldadohuari Jesu raateree vino juucua, casaa piajata cojitishano. Jesu jaara na saniquiaari, majaari na ratunu quirii.

³⁵ Jesu jaara niyacutesanojinia teetesaaquiaari tari, soldadohuari saitia tacuarishijioeree nojori niishiniuria cante Jesu toque poonutaniya nerani. Naacuajitij, tama nojoriiaariijia Jesu toque seraatiaquiaari. Naa tohuateequiaariiri tariucuaaano Pueyaso sequesano caminiujunua sequesano, nojuaja jaara naa naajiotaquiaari: “Pueyari saitia tacuarishijioeree cua toque nojori seraatianura”.

³⁶ Na nuhuaji, cuno soldadohuari cajitiquiaari Jesu na cojuanura.

³⁷ Jesu nacaacuma, naajioneeri rupotasaquiaari. Tii naajiosano quiriquiaari casaara na teetesaaareeni. Naa naajiosano quiriquiaari: “Nioori Jesu, Judiocuaca Jiyaniijia”.

³⁸ Caapiquí nohuasenujuacaari Jesu shuriucua teetesaaquiaarijuhuaj, socua tamonu caapiquí niyacutesanojinia; tamonu na miaquetajara, tamonu na muenecara. ³⁹ Tamasaca pueya tajishacari nucuaco Jesu shuriuquico, nojoriiri Jesu macaatiquiaari. Na maanquenuta, nojoriiri Jesu sequetuquiaari:

⁴⁰ —¡Jaj! ¡Cumaacaraca quijia naatiijia! Quiaacuajaari sequeja quiaa jaara Pueyaso Secojoua tia niyartare, quia naata na tianu tucuatunuhua jiuujianaraca juucajinia. ¿Naatee? ¡Quiaa jaara naa cumaacaraca quirritij, canaa niquiara quia roserecurajaj, quiaa jaara Pueyaso Niyanu quirii seetanujanaari!

⁴¹ Secojonaa jiyaniijianucuaari tii quiriquiaajuhua Moisés Rootasanojiniji niishitiojonaata, canaa Judiocuaca camarucuanio. Nojoriiri Jesu macaatiiriaajuhua. Tama sequetooriaaajarijia:

⁴² —Saaja tamasaca naataniojuaquiri. Maja cutaraari na naata tama nocuajijiaaja tacunu. Jaara seetanujanaa pa Israel pueya jiyaniijia quirii, cuaara roseera quiarijia pa niquiara niyacutesanojiniji, nocua pa tiuuniuria. ⁴³ ¡Pueyasocua tiuujia naatiijia! Jaara naa quirritij, Pueyaso cuaara na roshiniiria, nojuaja jaara seetanujanaa Pueyaso panishano quirii. Nojuacuajaari pa sequeja: “Janiyari Pueyaso Niyanuni”.

⁴⁴ Cuno caapiquí nohuasenujuaca Jesu shuriucua teetejosano quiriquiaani, nojoriiri Jesu macaatiiriaajuhua.

Jesu cusosacari

(Mr 15.33-41; Lc 23.44-49; Jn 19.28-30)

⁴⁵ ¡Panacari, mijiriaari ninishiquiria quiquí! Pananu mueecosacari cuhuatemohuari.

⁴⁶ Jiyacaritij, Jesuuri jiyanhua nacaquiaari naatej:

—¡Elí, Eliinaa! ¿lama sabactani?

Nioori pueyano rupaaajinia sequeya: “¡Cua Pueyasonaa, cua Pueyasonaa!, ¿casaara quia carteree janiyani?” ⁴⁷ Tamasaca na shuriucua nujuatunaari na tojtiriquiaa. Nojoriiri sequeere:

—¡Nia tojiri! ¡Supuetana Elías jiiquioonuyano! Noo Elías, tariucuaaanu pueyara Pueyaso sequesano caminiujuunia quiquiaaritij.

⁴⁸ Tamonuuri ritia netequee namasu casaa na riniuria. Naajuaacua na morotanu nuhuaji, jereeca vinojinia na shiriiri. Na nuhuaji, Jesuucua na shiitioreeri na raatenura. ⁴⁹ Tamasacaari sequeree:

—¡Pa shanacure! ¡Elías jiyoteeri nocua niniutianiya na roshininiuria niyacutesanojiniji! ⁵⁰ ¡Jiyacaritij, Jesuuri jiyanhua nacarohua! ¡Na nuhuaji na sohanu tohuataniriiri!

¡Cusoqueeri! ⁵¹ Pueyaso Secojoua tiajinia, shiquiaruque toquejiniji sohuacaari quiquiaari Pueyaso Quishaqui mishiquitotaja. ¡Jesu cusosacari, cuno toqueeri sutequee jiyocuaaanuji jiyocuaa puetunjuanaa! ¡Rijiaari jiya jiuuquiutiaquiaari jiyanhua! ¡Sairi jiaquetacouaari noojiaacoji! ⁵² ¡Macunucua raacaari riatequequiaari! ¡Queraatia tariucuaaanu Pueyasocua tiuunaaari samiiticoquee na raacajinia! ⁵³ Jesu jaara samiitiaquiaariuhua, cuno samiitiaconohua pueyari tohuareetaquiaari na raacajiniji. Nojoriiri Jerusalén tiacajinia tiuquitiaquiaari. Nojoriiri queraatia pueyacia muetaquiaari tii, Pueyaso panishano tiacajiniani. ⁵⁴ Soldadohua capitánri na pueyata Jesu cojuariquiaa, Jesu cuara cusoyarejaatijia nojori niquiara. Nojori jaara jiya niqutiutiaquiaari jiuuquiutiaano, socua puetunu nojori niquishanojuanaano, nojoriiri jiyanhua puereturee. Sequetureeri:

—¡Nio pueyanoqui seetanujuanaa Pueyaso Niyanu quiqianu!

⁵⁵ Queraatia maajipohuari tii quiriquiaajuhua. Nojoriiri tucuaaanuji shootiaturiquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenuuriquiano. ⁵⁶ Cuno maajipohua tajinia quiriquiaari María Magdalena, Santiago nucua Maríajuhua, José nucua Mariano, mariyata Zebedeo niquihua nucuanio.

Jesu quete niasacari raaco

(Mr 15.42-47; Lc 23.50-56; Jn 19.38-42)

⁵⁷ Tamonu pueyanoori quiquiaari Arimatea tiacajinijinio. Jiyanhua casamiriaca quijiaari. Na sesa quiquiaari José. Nojuajaari tarijia Jesu tojjiaara quiquiaari. Joseeri Jesu cusonu juucaja tiuquiutiaari cuno tenacari. ⁵⁸ Joseeri Pilatocua quiaquiaari Jesu quete na masenura. Pilatoori na pueya sequeree cuara na niqutiosaarianoj. ⁵⁹ Joseeri Jesu quete paquiaari na jeenucuanura raaco na niasocoriquiano. Na jiunioceeri quenaaruque cohuajaque toquejinia. ⁶⁰ Na nuhuaji na niaquiaari tama na raacojaarijia. Quiarinio raa quiquiaariiri. José jiuutianishano saajiajinia. Na nuhuaji, Joseeri puereetuca saajia saqutiniquiaari raa tootiuria. Quiacuhuari. ⁶¹ María Magdalenaari na sesaanucuaata cajituriquiaa raa canaja taquijiria.

Soldadohua cojuasacari Jesu raa

⁶² Pascuara jeenucuanu juuca nuhuaji, seconajaa jiyaniijianucuaari Pilatocua quiojocuaari Fariseocuaata. ⁶³ Naa na sequetuseeri:

—Jiyaniijianaa, canaari cuno sapojoua pueyano sequesano niishiquiini, na sequesano saminio na quishacarijia. Nojuajaari sequeja: “Janiyari jiuujianaraca juucajinia samitianataniuhuan”. ⁶⁴ Nocuaji na raa quia cojuatere maninia tiosano, jiuujianaraca juuca cuara shocorejaatijia, na pueya mariqui niucua macu nohuasequeeri. Nojori jaara na nohuasere, nojoriiri sequenutianiya Jesu samiitiarohuacuaa. Nojori jaara naa sapojore pueyatej, socua jiyacatenutaniyari Jesu sequesano, nojuaja jaara sequecanu: “Janiyari Pueyaso Jiyarosani”.

⁶⁵ Pilatoori nojori sequeree:

—Niya quiyacujaja cua soldadohua. Nojori nia cojuatere maninia cuno raa, taa nia paniyacujani.

⁶⁶ Nojoriiri soldadohua nujuatejoquiaari raa nojori cojuanura. Raa tiotiuuri rupana-cusaaquiaarijuhuaj jiyaniijia Pilato sesa naajiotajata.

28

Jesu samiitiasacariuhua

(Mr 16.1-8; Lc 24.1-12; Jn 20.1-10)

¹ Samaatenu juuca jaara shocoquiaari, coteenu juuca seamaaninijinio juhuaquesacari, shusha cuhuatesacari, María Magdalenaari raa niquniucua quiariquiaa na sesaanucuaata. ² ¡Canashiyaquiji, rijiaari jiyanhua jiuuquiutiaari! Cunoori quiquiaari Pueyaso seru rosenucua jiyocuaaanuji raacua. Raa tiotiu saajia saqutinishiiri. Na nuhuaji, saajiaacua cajiriohuari. ³ ¡Pueyaso seruuri niquishaquiaari shacantuca juhua miacana! Na toqueeri jiyanhua cohuajaque quiquiaari, juhua sohanatuu. ⁴ Raa cojuatunaari jiyanhua shiriqutiutiaari nojori niquishacari Pueyaso seru. Jiyanhua tetecatureeri. Na puerenuta socua cusojonureeri. ⁵ Maajipohua jaara tiuquiutiaari raajinia, Pueyaso seruuri nojori sequeree:

—Maja nia shiriiquiniu. Janiyacuajaari niishiyani niaari Jesu pajeya, niyacutesanojinia mosanotej. ⁶ Maja niya na quiniu. Tari samiitiarohuano, taa nojuaja sequequiaari niajaniyacuajani. Miji. Nia niquishushiiria na masaqui. Shaaqui. ⁷ Ritia nia quiaarohua. Na saquiriojosano pueya nia sequesuhua: “Jesu tari samiitiarohua. Nojuajaari nia puetanutaniya Galilea jiyajinia. Naaari jati na niqiniutianiya”. Janiyacuajaari tari nia sequereni. Naa nia pahuatasuhua na pueya.

⁸ Maajipohuari masaacujutanuuriquiohua raajiniji na puerenuta, na shuquiriniuti-ajuhua. Nojoriiri socua netecuatiuyarohuaquij, canaa na pahuatanuhua Pueyaso seru sequesano nojori. ⁹ ¡Jiyacaritij, Jesujuanaari canashiyaquiji nojoriicua muetaquee nuujinia! Nojori saruhuatareeri. Maajipohuari nocua catecanoree. Na cariquimijaji mojoquetacoreeri. Jesu niohuaca quiatuereeri. Jesu shootiatuereeri na jiuujiatenuta. ¹⁰ Jesuuri nojori sequeree:

—Maja nia puerenu. Nia quiaarohua. Cua pueya nia sequesuhua nojori cuaara quiojoora Galilea jiyajinia. Nojoriiri seetanujuanaa cua tapueyocuaca. Nojoriiri jati cua niqitiuniutianiya.

Raa cojuanaa pahuatasano

¹¹ Maajipohua quiojosacariuhua, noojiaqueya raa cojuanaajininioori tiacajinia quiojoquiariuhua pueyacuara secojonaa jiyaniijianucua nojori pahuatanura nojori niqishano. ¹² Pueyacuara secojonaa jiyaniijianucuaari canaa Judiocuaca camarucuata rerejoree na rojotoonura taa na miitiuniutianiyan. Na nuhuaji, nojoriiri queraatia cumaneeca niqitioquiaari raa cojuanaa, pueya niqiara nojori pahuatanura tamaatia nojori niqishanojiniji. ¹³ Soldadohuari naa rootasaquiaariti:

—Niocua na seque pueyatej: “Canaa maquesacari, Jesu pueyaquiiri niucua nohuasequee Jesu quete raajiniji”. Niocua naa sequeretej. ¹⁴ Jiyaniijia Pilato jaara niishiri naa nia pahuatasacariitij, majaari nia puerenu. Canacuajaari na shiniajanutaniyan jaara juaari. Naacuajitij, majaari na juaaniu quiniutianiya niajaniya.

¹⁵ Jiyacaritij, soldadohuari cumaneeca maseree. Nojoriiri naa pahuatanu coteequiaari taa nojori rootasaareecuajani. Nojori cuaracashishanoori ritia caminiujiushaaquiaari canaa Judiocuacara. Naacuajitij, canaa Judiocuacaari naa sequeyajaa quiarijia.

Jesu rootasacari na pueya na jiyaramiquiyaquishacarijia nojori

(Mr 16.14-18; Lc 24.36-49; Jn 20.19-23)

¹⁶ Canaa, Jesu once saquiriojosano pueyani, canaari Galilea jiyajinia quiojoquiaari tamonu tuhuananuucuan. Jesuuri canaa sequequiaari canaa quiojonura tirira, tii canaa coquetonura nata. ¹⁷ Canaa niqishacari Jesu quiyano tii, canaari nocuara mojoquetacquiaari canaa shuquiritianura nojuajani. Tamasaca canaajininioori jiyaniriquiaa maja naasucuaari Jesu. ¹⁸ Jesuuri canaacia catecanoree. Canaa sequereri:

—Janiyari puetunu cumaacajanaa niqitiosaareeni, Jiyaniijiajanaa cua quiniuria jiyocuacaanu, mijirianio. ¹⁹ ¡Naaratej, nia quiojore! ¡Puetunu pueyapuejanaa nia pahuatare cua rupaa, cua tojtiajacara nojori quiniuria! Moojinia nia tiuquinijiore cua tojtiajaca Pueyaso sesajinia, nojori rupuesacari pa Que Pueyaso, janiya, na Sohuanunio. ²⁰ Nojori nia niishitiojore puetunu cua rootasanojuanaa niajaniya, nojori tojishocoriquiano. Nia niishiri nio: ¡janiyacuajaari niaata quiniutianiya pueyaracaanuni, jiya cuaara puequerejaatijia!

MARCO NAAJOTASANO JESUCRISTOJINIJI

*Cariiquia jiyajinia Tiuquinijiona Juan poojotasacari Pueyaso rupaa
(Mt 3.1-12; Lc 3.1-9, 15-17; Jn 1.19-28)*

¹ Pueyaso Nyanu Jesucristojiniijiiri naa coteetasaaquiaari pohuatanutej.
² Tariucuacaanu pueyara Pueyaso sequesano caminiujiunia Isaiásri Pueyaso Nyanu niyacari naajiotaqueaari. Naajiotaqueaariiri taa Tiuquinijiona Juan poojotanutaniya pueya jeenucuanura nojori jiuujiani, niriquiano Jesu tojjia nojori quiniuria. Isaiásri naa naajiotaqueaari Pueyaso sequesano miriqui Neyanutej:

“Janiyari quiocuaji jiyaronutaniya tamonuni, quiocuaji quia nuu jeenucuariquiano. ³ Na nacanuari tojishaanutaniya cariiquia jiyajinia. Naa pueya sequeyari: ‘¡Nia jeenucuare Jyaniijia nuu! ¡Nia nuunore maninia, maja shuutiuniu!’”

⁴ Quiari naataja, Tiuquinijiona Juanri seetanujunaan naa miiquiaari cariiquia jiyajinatej. Nocua nijionaa pueya tiuquinijioriquiaa moojiniaari. Tiuquinijiona Juanri cuno pueya sequequiaari:

—¡Nioojia nia tacatore sesa nia miiniujiniji, moojinia cua tiuquinijionura nijaniya!
¡Pueyasocua sesa nia miishanojiniji nia jianaori puetunujuanaa!

⁵ Puetunu Judea jiyajininio pueyajanaari nocua nijioquiaari nojori tojtianura nojuaja, Jerusalén tiacajininio pueyano. Cuno pueya jaara sesa na miishano pohuataquiaari Juan niqiuara, Pueyaso niqiuarajuhuj, Juanri nojori tiuquinijioquiaari Jordán moojinia.

⁶ Tiuquinijiona Juan toqueeri camello cajacajiniji shitasano quiquiaari. Na cajiniocua na camarucutesanoori quiquiaari shoque sacuanijiasano. Na miaquesanoori quiquiaari sequeru, samiyatunio, cariiquia jiyajinia na riuriatasano. ⁷ Juanri pueya niqiuara pohuataquiaari naatej:

—Tamonuuri cua nuhuaji niniutianiya. Nojuajaari socua cumaacaraca janiyajiniji. Janiya maara shuquiriaatia quirini, nojuaja jaara quenaaja cua sequere cua naacutanura nojuaja, juhua na seru, na sapatu neyocua cua samaacatanura. Nojuajaari Jyaniijiajanaa cutara janiyajiniji. ⁸ Janiyari nia tiuquinijiya moojiniani, juhua jeequejosano nia quiniuria sesa nia miishanojiniji. Cua nuhuaji ninia cutaraari Pueyaso Sohuanu tiuquinijionutaniya nioojiajinia, na cumaca nia jitianura, seetanujunaan maninia miijiaa nia quiniuria.

*Jesu tiuquinishacari moojinia
(Mt 3.13-17; Lc 3.21-22)*

⁹ Jesuuri jiyacari Nazaret tiacajiniji quiaquiaari Tiuquinijiona Juancua. Nazaret tiacaari Galilea jiyajinia quijia. Tiuquinijiona Juanri Jesu tiuquiniquiaari Jordán moojinia. ¹⁰ Jesu tacasacari moojiniji na tiuquinishaanu nuhuaji, jiyacaritij, nojuajaari jiya cajiniocua niqiuquiaari riateyano. Pueyaso Sohuanu niquiriri nocua roseyano juhua mococoonu. Nocua tiuushiiri. ¹¹ Jiyacaritij, jiyocuaaanuji tojishaaqueaariiri Pueyaso pocuaano. Naa Jesu sequequiaariiri:

—¡Quiaari Quiyanuniyojua, cua panishano! ¡Jiyanohua quia timitiaanijia!

*Samaruhua jiyaniijia saniniujiushacari Jesu
(Mt 4.1-11; Lc 4.1-13)*

¹² Na nuhuaji, Pueyaso Sohuanuuri Jesu jiyatequiaari ritia cariiquia jiyajiniara.
¹³ Jesuuri cuarenta juuca shocojotequiaari tii tamajaaja, puereeta jiya camaruhua casami quishaqui. Tii na quishacari, Satanásri Jesu saniniujuriquiaa na tojjijara Jesu quiniuria juucua. Na nuhuaji, Pueyaso seyari nocua nijioquiaari na naacunura, na mianuutenurajuhuj.

*Jesu coteesacari poonijionu Galilea jiyajinia
(Mt 4.12-17; Lc 4.14-15)*

¹⁴ Jyaniijia Herodes jaara Tiuquinijiona Juan nujuatequiaari nujuatejoajainia, na nuhuaji, Jesuuri Galilea jiyajinia quiaquiaariuhua. Nojuajaari pueya niqiuara poojotaquiaari tii, maninia pohuatasano Pueyasojiniji, taa Pueyaso jitianutaniya na muerasuni. ¹⁵ Jesuuri naa sequequiaari pueyatej:

—Nia sequeyanijia, nio pa quishacarini, quiarijiaari Pueyaso jiyanooshacari pueya, na muerasura nia quiniuria. Cunora, Pueyasojiniji cua pohuatasanoocua nia tiuuri. Nioojia nia tacatore sesa nia miiniujiniji, Pueyaso tojtiajaca nia quiniuria.

*Jesu saquiriojosacari pueya, na tarajariquiano
(Mt 4.18-22; Lc 5.1-11)*

¹⁶ Galilea caminia shuriuquioco Jesu rucuanijosacari, nojuajaari Pedro niquiquiaari, tarajanu Andrésnio. Nojoriiri shiyaru jaquerootanaa quiquiaari. Jiyacaritij, nojoriiri shiyaru jaquerootariquiaa caminiajinia. ¹⁷ Jesuuri nojori sequeese:

—¡Miji, cua nuhuajitiuyare! Janiyari nia jiyatenutaniya pueya quiojuara saniniunija, juhua sapitiaaja.

¹⁸ Nojoriiri ritia na shiyaru tiujiaquiaari. Jesuta quiojiyareeri.

¹⁹ Socua shiitianiyojua na tacoji Jesu canujusacari, Santiago niquishiiri, tarajanu Juanio. Nojoriiri na shiyaru cushipirijionuuriquiaa botejinia. Nojoriiri Zebedeo niquiohua quiquiaari. ²⁰ Jesuuri jiyacari nojori sequequiaari nata nojori qianurajuhuj. Nojoriiri na que Zebedeo tiujiaquiaari botejinia na naacunaata. Nojoriiri Jesuta quiojoquee.

Samaruraca pueyanojiniji pohuatasano

(Lc 4.31-37)

²¹ Nojoriiri Capernaum tiacajinia tiuquishii. Samaatenu juuca, Jesuuri tiuquiquiaari Pueyaso secjojua tiajinia. Tii pueya niishitiojonu coteequiaariiri. ²² Pueyari jiyanhua jiuujiatequiaari na rootasano nojori tojshacari. Jesuuri juhua jiyaniijajanaa niishitiojoriquiaa. Majaari na niishitiojonu quiquiaari taa Moisés Rootasanojiniji niishitiojonaa niishitiojoquiaaricuaani. Nojoriiri saaja Moisés pohuatasanojiniji caminiujuquiaari, pueya niqiuara nojori pohuatasacari Pueyaso Rupaa. ²³ Samaruraca pueyanoori Pueyaso secjojua tiajinia quiriquiaa tiijuhuj. Nojuajaari nacaquiaari:

²⁴ —¡Nazaret tiacajininio Jesunaal!, ¿quiaateeri tari canaacua nimiaa, canaa quia shaajana? Janiyari quia niishiyani. ¡Quiaacuajaari Pueyaso Nyanu!

²⁵ Jesuuri cuno samaru juuari. Na sequereeri:

—¡Quia sanaajere! ¡Quia tohuatate nio pueyanojiniji!

²⁶ Jiyacaritij, samaruuri jiyanhua taraatia miiri cuno pueyano. Jiyanhua na sariyotequiaariiri na tohuatasacari nojuajiniji. Juhua macu tiujiaquee pueyanoori. ²⁷ Puetunu pueyajanaari shiriiquitiquiaari. Tama nojoriijaarijia nequesoreetooquiaari:

—¿Casaatucuaa nionio? ¡Nioruhua quiarinio niishitiojosano! ¡Nio pueyanoqui cumaacaraca! ¡Taa samaruhua tojitiaa nojori na jiyarosacariiri!

²⁸ Pueyari ritia caminiujuquiaari Jesujiniji puetunu Galilea jiyajiniajanaa.

Jesu naatanishacari Simón Pedro reyarucua

(Mt 8.14-15; Lc 4.38-39)

²⁹ Jaara tohuareetaquiaariuhua Pueyaso secjojua tiajiniji, Jesuuri Simón, Andrés tiajinia quiaquiaari Santiagota, Juantano. ³⁰ Simón reyarucuaari naseeca matariquiaa maquetujinia. Cusosutuhuj. Tiajinia quiniaari Jesu sequeturee nojuaja cusosu mataa. ³¹ Jesuuri nocua canujiyaree. Na juaashiquiaajiniji cusosu sanaseeri. Na cusonuuri seetanujanaa ritia tajiquiaari nocuaji. Naacujitij, nojuajaari pueya mianuutenu coteequiaari ritia.

Jesu naatanijosacari queraatia cusosuhua

(Mt 8.16-17; Lc 4.40-41)

³² Shusha ninishacari, Jesuucua patootasaaquiaariiri puetunu cusosuhujanaa, samaruhuaraca cusosu pueyano. ³³ Puetunu cuno tiacajiniji pueyajanaari tia tohuatayaji rerequeequiaari tee Jesu quiriquiaacuajani. ³⁴ Jesuuri queraatia puetunu tamaatia cusonujanaa naatanijioquiaari na rupaa cumaacata. Queraatia samaruhua tohuatanijioquiaari tamasaca pueyajinijiaariuhuj. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

Jesu pohuatasacari Pueyaso rupaa Galilea jiyajinia

(Lc 4.42-44)

³⁵ Jesuuri jiyanhua tariquicuajaji sanequiaari, ninishiqui quishacarijia. Tiacajiniji quiaquiaari tamaquiriaari, tii Pueyaso na secjonura tamajaaja. ³⁶ Na nuhuaji, Simónri Jesu pajenucua quiojoquiaari, nata quiniaata. ³⁷ Jaara na riuriatatuquiaari, na sequetuseeri:

—¡Puetunu pueyajanaa quia juuretaa!

³⁸ Jesuuri saaja nojori sequereeri:

—Pa quiaare juhuari catecanaataja tiacajinia. Tii pa pohuatarehuhua Pueyaso rupaa pueya niqiuara. Janiyacuajaari cunora jiyasohuaja tohuataareeni.

³⁹ Naacujitij, Jesuuri puetunu Galilea jiyajiniajanaa rucuanajoquiaari. Pueyaso rupaa pohuataquiaariiri Pueyaso secjojua tiacajiniaqueya puetunu Galilea jiya tiacajiniajanaa. Nojuajaari samaruhua tohuatanijioquiaarijuhuj.

Jesu naatanishacari lepraraca pueyano

(Mt 8.1-4; Lc 5.12-16)

⁴⁰ Lepraraca cusosu pueyanoori Jesuucua catecanoquiaari. Jesu cariquimiaji mojqe-taseeri. Na sequereeri:

—Quiaa jaara paniri, quia naata cua naataniniu cua cusonujiniji.

⁴¹ Jesuuri nocua taraajeqiaari. Na juaashiquia niaree nocuaari. Na sequereeri:

—Taaquiriirinij. Quia naataniniu panianijia. Quia cuaqueya cuaara jeequehuara.

⁴² Jesu jaara naa na sequequiaaritij, na lepraari ritia cushiriquii. Na cuaqueyajiniji shaajeqiaariiri na cusonu. Na cuaqueyari maninara quiquiaariuhua. ⁴³ Na jiyaroy-aquishacarijia na naatanishano pueyano, Jesuuri jiyanoehua na rootaquiaari. Na sequereeri:

⁴⁴ —¡Cua tojiri, majaari pueya quia pohuatanu cua miishano! Saaja pueyacuara sec-
ojonaa jiyaniijia quia cuaqueya quia niquitishii, na cartenuhuara quiajaniya, pueya
tajinia quia rucuanefonuhua juhuajaniya. Mariyata ritia quia niquitiore quia seru
Pueyasocuara catijasocoriquiano. Naa quia miiri taa Moisés niishitioquiaaricujani,
puetunu pueyajanaa niishinuria quiaa tari naatarohua quia cusonujiniji.

⁴⁵ Cuno pueyano jaara quiaquiaari, juhuacatecara pohuataquiaari puetunu pueya-
janaari taa na naatanishaarohuani. Naaratej, puetunu pueyajanaari Jesu niqiniu panijia.
Cunora, Jesuuri maja tari na naata tiuqiniu quiquiaari juhuajaniya tamonu tiacajinia.
Nocuaij Jesuuri pueya quiaquishaqui rucuanajojua. Naajaa, puetunu cuno jiyajiniji
pueyajanaari saaja nocua nijqoquiaari na niqiniuria.

2

Jesu naatanishacari cumatacuruhuana cusosu (Mt 9.1-8; Lc 5.17-26)

¹ Na rucuanefonu nuhuaji, Jesuuri Capernaum tiacajinia tiuquiquiaariuhua na saquiri-
ojosano pueyata. Pueya jaara niishiquiaari Jesu tari na quijia tijinia tiuquiriohua,
² queraatia pueyari nocua nijjqoquiaari cuno tijiniara. Nojoriiri tiaco mishiquiaari,
tohuateyajijiuhuaj. Jesuuri cuno pueya niqiuara pohuataquiaari Pueyaso rupaa. ³ Jesu
quishacari tii, nocua patasaquiaariiri pueyano cusosu na matujinia. Cuatro pueyari na
patamaa. Cuno cusosuuri pootia mataja quiquiaari pueyaracaanu, cumatacuruhuana
na quiniucua. ⁴ Cusosu patanaari maja na naata tiaco tiuquitianu quiquiaari Jesu-
ucua, puera pueya rerequesacari tohuateyaji. Nocuaij nojoriiri tia cacojiria cusosu
tacataquiaari tacatuwo. Nojoriiri tia nijinia cuhuataquiaari. Namitia Jesu nujuasaqui-
janaa cuhuataturee tiaari. Na nuhuaji, tia cuhuocojiniji, Jesuucua roshinitiasaareeri
cusosu na matujinia. ⁵ Jesuuri cusosu patanaa pueya niquirii seetanujanaa nocua
tiuyano. Naaratej, Jesuuri cusosu sequeree:

—Quiyanunaa, sesa quia miishanojiniji quia jiyanoorii taricujaniijia.

⁶ Moisés Rootasanojiniji niishitiojonaari tii cajituriquiaa. ⁷ Nojori tojishacari Jesu
jiyanoyano cuno pueyano, nojoriiri niishiriojonuuree: “¿Casaara nio pueyano pocuaa
naani? Majaari quenaaja pueyano naata pa jiyanooni sesa pa miishanojiniji. ¡Nojua-
jaari tama na cuaqueyajaaja jiyateya juhua Pueyaso na quiniuria! ¡Cunoori jiyanoehua
sacuraatia! ¡Saaja Pueyaso cutaraari na naata pa jiyanooni!” ⁸ Jesuuri tamajaaja
ritia niishiquiaari noojajinia naa cuno pueya niishiriojonuusano. Jesuuri cunora nojori
sequeree:

—¿Casaara naa nia niishiriojiani? ⁹ ¿Casaate jiyajenetashiya sequenurani: “Sesa quia
miishano tari jiyanooshaaree”? ¿Mariyata jiyajenetateeri sequenurajuhua: “Quia sanere.
Quia matu quia pataarohua”? ¹⁰ Seetanujanaa nia sequeyanijia, janiyari quiarijia nia
niishitiniutianiyani, pueyano cua quishacari mijiria, naajaa, janiyari Pueyaso cumaaca
jiitiaa sesa miijiaa cua jiyanoonuriani.

Jiyacaritij, Jesuuri cumatacuruhuana cusosu sequeree:

¹¹ —Cua tojiri. ¡Quia sanere! Quia matu quia patare. Quia tijinia quia quiaarohua.

¹² Cusosuuri ritia sanequee. Pueya niqiuara na matu pataarohuari. Naaratej, pueyari
jiujuatequiaari. Pueyaso maniniuhuaqueetatureeri. Cuno pueyari naa sequetuquiaaritij,
na shuquiritiasacari Pueyaso:

—¡Majaari quenaaja pa niqiniu quiquiaari naa miishanotej!

Jesu sequesacari Leví na nuhuajiniuria (Mt 9.9-13; Lc 5.27-32)

¹³ Na nuhuaji, Jesuuri na saquiriojosano pueyata tacatequiaariuhua caminia casaque-
yajiria. Queraatia pueyari nocua nijjqoquiaari. Jesuuri cuniqui nojori niishitiojqoquiaari
Pueyaso rupaa. ¹⁴ Na nuhuaji, Jesu quiojosacari na saquiriojosano pueyata cuniquiji, Jesu-
uri Leví niqunimaa cajiyano Roma tiacajinia quijia jiyaniijia cumaneeca masejoajinia.
Nojuajaari Alfeo niyanu quiquiaari. Jesuuri na sequeree:

—Miji. Cua nuhuajiyare.

Jiyacaritij, Leviiri sanequiaari. Jesu pueyanora quiaquiaariiri.

¹⁵ Cuno niucuaaja, Jesuuri Levi tiajinia miaqueriquiaa. Levi tiajinia miaquenuuriquiaa-jaariuhua queraatia narta cumaneeca masejonaa. Queraatia tamasaca pueyari nojoritia miaquenuuriquiaajuhua, canapue Judiocuaca camarucosa sequequiaari sesa pueyatacua-jani. Nojoriiri Jesuta miaquenuuriquiaa, Jesu saquiriojosano pueyatanio. Jiyanohua queraatia pueyari Jesu rupenaa quiriquiaa. ¹⁶ Moisés Naajoneejiniji niishitijonaa, mariyata Fariseocuaca jaara Jesu niquirii cuno pueyata miaqueyano, nojoriiri Jesu saquiriojosano pueya nequesotaquiaari:

—¿Casaara nia niishitijona miaqueya cuno cumaneeca masejonaatani, mariyata cuno sesa miijiacatani? ¿Casaara cuno pojoritia na ratuyajaanihua?

¹⁷ Jesuuri cuno pueya sequesano tojirii. Nojori sequeere miriquiri:

—Jiyotuuaari maja na paniniu naarajona. Cante cusosuni, cuno cutaraari naarajona paniya. Majaari cua niniu quiquiaari maninia miijiacacua. Niquiaari cutaranijia nia sequesano sesa miijiacua cua jiyanooniuria sesa nojori miijiosanojiniji.

*Pueya nequesotasacari Jesu, casaara na pueya miaquenu carteyaquiya, nojori shuquir-
itiniuria Pueyaso*

(Mt 9.14-17; Lc 5.33-39)

¹⁸ Tamacari, Tiuquinijiona Juan tojitiajaca, mariyata Fariseocuaca miaqueyaquishacari, tamasaca pueyari Jesuucua niijioquiaari. Na sequetuseeri:

—¿Casaara quia saquiriojosano pueya carteyaquiya miaquenu quenaajani? Tiuquinijiona Juan pueya cutaraari miaajecoquiaa Pueyaso nojori shuquiritiniuria. Fariseocua-caari naa miiquiaajuhua. ¿Casaara naa quia pueya miyaquiyaajaanihua?

¹⁹ Jesuuri nojori riucaaree miriqui:

—¿Masuusano pueyateeri miaajenutaniya nojori jaara queranacusaqui quia, pueyano camishacari maaji? Camiriquiano pueyano jaara nojoritia quiyajaa, maja na naata nojori miaajenu, shuquiriaatia nojori quishacari. ²⁰ Tamacari cutara, cuno camiriquiano pueyanoori nojori tajiniji rishaanutaniya. Cua pueyari jiyacari miaqueyaquiniutianiya cutara.

²¹ Seetanujuanaa nia sequeya cutaranijia, toque mocua cuhuocoori maja na naata c-shipirijiosaanu quiariqui toquerauta. Jaara jeequesaare, quiarinio toquerauri posequeja. Naacuajitij, toque mocua cuhuocoori socua queraaquetaree. ²² Naajuhua, quiariniacu uva caacari maja na naata racatasaanu shoque tariucuacojinia. Quiariniacu uva caaca jaara jerema, shoque tariucuaco pojuaretaari. Naacuajitij, paari najuhua naitiaa uva caacani, shoqueno. Cunora, maninia cutaraari quiariniacu uva caaca shuujionu shoque quiariquiojinia, maja vino niitiasaanura najuhuanaj, shoqueno.

Jesuuri naa pohuataquiaaritij, pueya na niishitijonura quiarinio na niishitijosanoori maja na naata cojitishaanu tariucuacaanu niishitijosanota.

Jesu pueya carojotasacari trigo samaatenu juuca

(Mt 12.1-8; Lc 6.1-5)

²³ Jesuuri samaatenu juuca quiojoquiaari cuhuariquiajiniaaco na saquiriojosano puey-ata. Na pueyari jiyacari trigo carojotanu coteequiaari na miaajenuta. ²⁴ Fariseocuaca jaara na niiquiaaari, Jesu sequetureeri:

—¡Quia niquiri! ¿Casaara quia saquiriojosano pueya poonijiya samaatenu juucani? ¡Pueyaso Rupaajinia, paari piriyojoshiyacujani maja samaatenu juuca pa poonijionura!

²⁵ Jesuuri nojori sequeere:

—¿Majateeri nia serojonu quiquiaari Pueyaso Rupaajinia pa supuetanaa jiyaniijia David miishanojiniji, nojuaja jaara miaajequiaari na cojiniaata, nojori jiiitaaquishacari na cosey-aca? ²⁶ Cuno quishacari, supuetana Abiatar pueyacuaa secojona jiyaniijia quiquiaari. Davidri tiuquiquiaari Pueyaso Secojoua tiajinia. Nojuajaari Pueyasora niquitiosano panjiniji saquiaari. Cuno panri saaja Pueyaso Secojoua tia cojuanaa sasocoriquiano quiquiaari. Naajaa, Davidri na saquiaari. Na neecasequiaariiaariuhua nata quiniaa pueyara.

²⁷ Jesuuri nojori sequequiaarijuhuaj:

—Pueyasoori samaatenu juuca shipiniquiaari pueyara. Maja cutaraari Pueyaso ship-ininiu quiquiaari pueya, samaatenu juucara. ²⁸ Naaratej, pueyano cua quishacari mijiria, janiyari cumaacaraca cua Quejinijini cua sequenura casaa pa miiniutianiya samaatenu juucani. Janiyacuajaari samaatenu juuca camarnuni.

3

Jesu jeeacasacari pueyano juaashiquia cuseetucojuara joojequetano
(Mt 12.9-14; Lc 6.6-11)

¹ Jesuuri Pueyaso secuojua tajinia tiuquiquiaariuhua na saquiriojosano pueyata. Tii quiriqiaari pueyano, cuseetucojuara joojequetano juaashiquiaraca. ² Cuniqiu quiniaa Fariseocuacaari shanacutariquiaa na niqiniuria taa Jesu miiniutianianoj. Nojoriiri tama sequetooreejaaja:

—¿Jesuteeri sesarucujua pueyano juaashiquia jeeacanutaniya samaatenu juucani?

Nojoriiri Jesuucara saquiriojotanu paniriquiaa, nojuaja jaara samaatenu juuca pooni-jiore. ³ Jesuuri jiyacari sesarucujua pueyano sequere:

—Quia sanere. Niya quia nujuasee canaa tajinia pueya niqiuara.

⁴ Na nuhuaji, Jesuuri pueya nequesotaree:

—¿Casaate samaatenu juuca miishiyani? ¿Paate maninia miyani, paate sesa miya soj? ¿Pueyanote naatanishiya, moshiyajanaa soj?

Nojoriiri sanaa niqitiariquiaa saaja, Jesu sequesacari naatej. ⁵ Jesuuri na shocuaqueya nujuatiuyano pueya niqiniijoree na juaaniutia. Nojoriicua taraajeriquiaaariuhua, cumajiuujiaaca nojori quiniuucua. Majaari nojori niishiniu paniniu quiquiaari taa Pueyaso paniya pueyacua taraajeja pa quiniuriani. Jesuuri sesarucujua pueyano sequere:

—¡Quia juaashiquia quia shiitiore!

Na juaashiquia shiitioreeri. ¡Jiyacaritij, na juaashiquiaari ritia jeequequee!

⁶ Fariseocuaca niquishacari naa Jesu miishanotej, nojoriiri tohuareetaquee na juaaniutia. Nojoriiri Herodes panijiaaca pueyata pocoojoquiaari ritia, taa nojori monutaniya Jesuni.

Queraatia pueya rerequeejosacari caminia casaqueyaji

⁷ Na nuhuaji, Jesuuri quiojoquiaari caminiajinia na saquiriojosano pueyata. Queraatia pueyari na nuhuajiquiaarijuhua Galilea jiyajinjiji. ⁸ Pueya niishishacari puetunu Jesu maninia miishanojinijijianaa na cumaacata, queraatia pueyari nocua nijioquiaari na niqiniuria. Nojoriiri nocua nijioquiaari puetunu iyacajinjijinojuanaa: Judea jiyajinjijinio pueya, Jerusalén tiacajinjijinio pueyajuhua, Idumea jiyajinjijinio pueyano. Nijioquiaarijuhua Jordán moo taquijirajinjiji pananu muetasamaji pueya, Tiro tiacajinjijinio pueyano. Sidón tiacajinjijinio pueyari nijioquiaarijuhua na niqiniuria Jesu. ⁹ Nocujaji Jesuuri na saquiriojosano pueya sequequiaari:

—Niocua juhuacarijia bote cojuare quiria, cua tacajara pueyacujaji, maja pueya tanuujunura janiya.

¹⁰ Jesuuri jiyacari jiyanhua queraatia pueya naatanijiriquiaa. Nocujaji cusosuhuari Jesuucua riutioconeetariquiaa na quianura Jesu, nojori cusonujinjiji nojori naataconuhua.

¹¹ Samaruharaca pueya jaara Jesu niqitiuquiaari, nojoriiri nocuaa mojoquetacoquiaari. Naa nacatuquiaariiri:

—¡Quiaacuajaji Pueyaso Niyanu!

¹² Nocujaji Jesuuri nojori sequequiaari na juaaniutia, maja nojori sequenura pueya niqiuara cante nojuajani.

Jesu saquiriojosacari doce pueya na pueyajinjijinio, na rupaa pohuatariquiano
(Mt 10.1-4; Lc 6.12-16)

¹³ Na nuhuaji, Jesuuri tacaquiaari tuhananuucua. Nojuajaari tiji sequequiaari cana na paniquiaaricujajani. Nocua nijioquiaariiri na jyaniquishano pueya. ¹⁴ Jesuuri doce pueya saquiriojoquiaari nata nojori quiniuria. Nojori jiyatereeri na jiyaramiquishocoriquiano, Pueyaso rupaa nojori pohuatanura. ¹⁵ Nojori niqitioree na cumaacaari, cusosuhua nojori naatanijionura, samaruhua nojori tohuatejonurajuhua. ¹⁶ Niocua na saquiriojosano doce pueya sesaca: Simón, Jesuuri na sesojoquiaari Pedro; Santiago, tarajanu Juannio. ¹⁷ Jesuuri nojori sesojoquiaari “Boanerges”. Naa sequenu paniyari nio, “Ritia juaajia, juhua miacana”. Nojoriiri Zebedeo niqiohua quiquiaari. ¹⁸ Socua quiquiaariiri Andrés, Felipe, Bartolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijiaaca pueya manujinjijinio quiquiaari. ¹⁹ Quiquiaarijuhua Judas Iscariote, Jesu quietequiaari mosocoriquianoni.

Judicuaca camarucua sapojosacari, Jesu samaruhua cumaaca jiiitiaa
(Mt 12.22-32; Lc 11.14-23; 12.10)

²⁰ Na nuhuaji, Jesuuri na saquiriojosano pueyata tamonu tajinia tiuquitiaquiaari tamonu tiacajinia. Queraatia pueyari tiuquitiaquiaarijuhua cuno tajinia Jesuucua. Naacuajitij, majaari nojori naata miaquenu quiquiaari. ²¹ Jesu tapueyocuaca jaara

niishiquiaari naa nocuajitij, nojoriiri nocua nijioquiaari na riniuucua juucua. Tama sequetooriquiaajaariija:

—Jesuqui tari paatecara quirijuhuanajaj!

²² Moisés Rootasanojiniji niishitiojonaa Jerusalén tiacajiniji nijiono pueyari saniniuujia naa sequetuquiaari Jesujiniji:

—Samaruhua jiyaniijia Satanás cuajaari cumaaca niquitiorucuaa cuno pueyano. Cunora, samaruhua tohuatanijia pueyajiniijiri.

²³ Naaratej, Jesuuri cuno pojori sequequiaari nojori na niishiriojotenura:

—Miji, nia cua tojtiasee. ¿Pueyanoteeri na naata Satanás tohuatenu pueyanojiniji tama Satanás cumaacatajaaja? Maja na naata. ²⁴ Naajuhuj, mijiria jiya jiyaniijia jaara juayonuutaa tama na pueyatajaaja, nojuajaari maja na naata nujuatanu na paraa, jaara nocua nijjoma. Nojuajaari shocotasaanutaniya. ²⁵ Naajaariuhuj, pueyano jaara tapueyocuacata juayonuutare, majaari nojori naata jatiqiu quiniu nojori tiajinia. ²⁶ Niaari saniniuujia cua sequeree, janiyana Satanás cumaacata tohuatanijioquiaa samaruhuan. Satanás jaara naa miiritij, cuno maara tari quiri na shaajasaanurajanaa.

²⁷ Naajuhuj, pueyano maja na naata tiuquiniu cumueeca pueyano casamiriaca tiajinia, na casami na jaariuutianura, jaara coteenu na camaru morojijaquiri. Pueyano jaara coteenu na camaru morojorejaatijia, naa cutara na naata na casami jaariuutianu.

²⁸ Seetanujanaa nia sequeya cutaranijia, pueyano sesa miishanoori na naata jiyanooshaanu. Janiyajiniji sesa na pocuasanoori jiyanooshiyajuhuj. ²⁹ Saniniuujia, cante sesa rimiaaqueja Pueyaso Sohuanuucarani, cuno cutaraari maja na jiyanooshaanu quiniutianiya quenaaja. Jiyano pueyanotej, nojuajaari pueyaracaanu saniitiosaanutaniya.

³⁰ Jesuuri naa nojori sequequiaaritij, pueya sequesacari, nojuajana samaruraca quijia, Pueyaso Sohuanu cumaacata na tohuatejosacari samaruhua.

Jesu nucuajiniji pohuatasano, Jesu tapueyocuacajinijino
(Mt 12.46-50; Lc 8.19-21)

³¹ Jiyacaritij, Jesu nucuuari tiuquijioquiaari, Jesu tapueyocuacanio. Majaari tiajiniaaco na tiuquitianu quiquiaari Jesuucua. Saaja carijiniacumaji tamonu pueyano sequetureeri na numootenura Jesu nojoriicuara. ³² Jesu shocuaqueya cajitiuniaari Jesu sequeturee:

—Quia nucuana quia tapueyocuacata jati carijiniacuma nujuatiuya. Quia pa-jenuyaquinia.

³³ Jesuuri saaja nojori sequeree:

—¿Cante cua nucuani, cua tapueyocuacajuhuj?

³⁴ Na nuhuaji, na shocuaqueya cajitiuniaa niquiniijoreeri. Sequereeri:

—Nio pueyari cua nucua, cua tapueyocuacanio. ³⁵ Cante cua Que panishano miijiani, nojuaja cutaraari cua tarajanu, cua rimiatu, cua nucuanio.

4

Miriqui pohuatasano natojojua pueyanojiniji
(Mt 13.1-9; Lc 8.4-8)

¹ Jesuuri socua Pueyaso rupaa niishitiojonu coteequiaariuhua caminia casaqueyaji. Jiyanohua queraatia pueyari rerequeejoquiaari nojori tojtianura nojuaja. Boteeri tii cutariquiaa caminiajinia. Naacuajitij, Jesuuri botejinia tacaquiaari. Tii cajishiiri, caminia casaqueyaji rerequeejono pueya na niishitiojonura tiji. ² Cuno pueya niishitiojoreeri queraatia miriqui pohuatasano. Na niishitiojosacari pueya, Jesuuri naa sequequiaaritij:

³ —Nia tojtitiare nio sequesano. Tamonu juuca, pueyano na cuhuariquiajinia natoojonuucua quiaquiaari. ⁴ Na jacutasacari, nucuaco totequiaariiri tajaaca. Shuhuari na miojoree. Majaari na moritianu quiquiaari. ⁵ Tajaacaari totequiaari sai tajiniaqueyajujuaj. Majaari cuniqui puera jiya quiniu quiquiaari na maashiniuria. Naacuajitij, najuhuaana ritia moritiaquiaariiri. ⁶ Pananu jaara jaquiaari, na catijiareeri. Maja puera nujuacaraca na quishacari, ritia sorequeeri. ⁷ Tajaacaari totequiaarijuhua riyocuaca tajinia. Jiohuacacaari socua ritia maashiquiaari. Natauri tarinitiucuaa quiquiaari saniniuujia. Naaratej, majaari na muetunu quirii. ⁸ Tajaacaari saniniuujia totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia. Niquiriyatu jiyonajiniji carojosaaquiaariiri treinta jajau. Tanajajiniji socua sesenta jajau, naajuhuj socua cien jajau tanajajiniji.

⁹ Jesuuri nojori sequeree:

—Cante numaaracani, cuara cua sequesano tojtiaara.

Casaarate miriqui pohuatasanonni
(Mt 13.10-17; Lc 8.9-10)

¹⁰ Na nuhuaji, Jesu quishacari tamajaaja, na saquiriojosano doce pueyari na nequesotaquiaari, tamasaca pueyanio. Cuno pojoricuaajaari Jesu shuriucua quiriquiaa. Nojoriiri Jesu sequeree:

—¿Casaa miriqui quia pohuatasano sequenu paniyani?

¹¹ Jesuuri nojori sequeree:

—Pueyasoori nia niishitiojiya jiyasohua na miiniu panishano, taa na muerasu na jiitianutaniya pueyaracaanu cutarani. Tamasacara saniniuujia, canapuate Pueyaso ruuretajacani, nojoririaari miriqui pohuatahiyacujua. ¹² Naacuaajitij, nojoriiri cua cumaacata cua miishano niqutiuguiaa pueyaracaanu najuhuanaj. Majaari nojori niishiniu na niqishano. Naajuhuaaj, nojori jaara Pueyaso Rupaa tojitiare, majaari na niishiniu na tojishano. Nojori jaara niishiri, nojori mariqui nojia tacatorohuari sesa nojori miishanojiniji nojori jiyanooshaanura.

Jesu niishitiojosacari miriqui na pohuatasano natoojonajiniji
(Mt 13.18-23; Lc 8.11-15)

¹³ Jesuuri nojori sequequiaarijuhuaj:

—¿Majateeri nia niishiniu miriqui cua pohuatasano? ¿Niaatucua taa niishiriquia socua tamonu cua pohuatasano? ¹⁴ Cua pohuatasano cuhuariquiajinia natoojonajinijini, nojuajaari juhua Pueyaso Rupaa pohuata. ¹⁵ Noojiaqueya pueyari juhua nucuaco toteno jajau. Najuhuaana Pueyaso Rupaa tojiyari. Na tojinu nuhuaji, Satanásri nimiaa. Nojuajaari puetunu Pueyaso Rupaajanaa noojiajinia natasano jaariutiaquiaa. ¹⁶ Tamasaca pueyari juhua noo jajau saniniuujia, sai tajiniaqueya jacutasanotej. Nojori jaara Pueyaso Rupaa tojiri, jiyanohua na timitiaari. ¹⁷ Cunoori juhua secaja nujuacaraca moritiano jajau, sai tajinia na moritianuucua. Majaari na rishiniu. Naajuhuaaj, cuno pueya jaara saniniu-jiushaare taraatia, jaara naquiya miishaarejuhuaaj Pueyaso Rupaa tojijiaa nojori quiniuucua, nojoriiri ritia Pueyasocua tiuuniu tarinitiaja. ¹⁸ Noojiaqueya pueyari juhua noo jajau, jiohuacaca tajiniaqueya jacutasanotej. Pueyaso Rupaa tojiyari. ¹⁹ Na nuhuaji, nojoriiri puera niishiriojiya taa nojori quiniutianiya maninia mijiriani. Nojoriiri sapojosaquiaa puera na shuqiritiasacari mijiria casami. Nio jiya casamiicua jiaitiaquiaajaarijuhuaj. Puetunu cunorajanaa, nojoriiri Pueyaso rupaa tojitiaquiaa na numaa shama. Naacuaajitij, nojoriiri juhua muetuhuo quia. ²⁰ Noojiaqueya pueya saniniuujia, nojori cutaraari maninia tojitiaja Pueyaso Rupaa. Cuno pueyari juhua cuhuariquiajinia natau, queraatia muetujua, maninia jiyajinia natasano. Cuno maninia nataujinijinioni, noojiaqueyari maja puera na muetunu. Tarajanuuri maninia muetuna. Naajuhuaaj, tarajanuuri jiyanohua queraatia muetujua. Naajuhuaaj, cante Pueyaso Rupaa tojijia cutarani, nojuajaari juhua maninia muetujua natau.

Pueyaso muerasuuri juhua samari
(Lc 8.16-18)

²¹ Jesuuri nojori sequerejuhuaaj:

—¿Samaritiutiiri noshitishano, conatu cariquiaco jamotasocoriquiano, maquetu cariquiaajuhuaaj? Maja. Samaritiiu jaara noshitishaare, morijiucua morotashiyari, tajiniaaco na cuhuatanura maninia. ²² Naajuhuaaj, jiyasohua nia miishanoori puetunujuanaa niishishaanutaniya. Cua pohuatasanoori juhua samaritiu, puetunu pueya jiuujiaajanaa na cuhuatanura. Naajuhuaaj, Pueyaso Rupaa jaara nioojiajinia jamosaare, juhua muetunutaniyari puetunu pueya niqishocoriquianojuanaa. ²³ Niajaniya, canapuate numaa jiitiaani, nia tojitiare cua pohuatasano.

²⁴ Jesuuri naa nojori sequequiaarijuhuaj:

—Nia niishiri nia tojishano. Nia shanacutajataja, teyanota nia shanacujuquiaa nia niq-uitiosocoriquianocuaajani, Pueyasoori cunotaja niara shanacunutaniyajuhuaj. Naacuaajitij, niaa jaara capora quiriquiaa tamasacata, Pueyasoori socua capora quiniutianiya niaarajuhuaaj. ²⁵ Cante na rupaa tojijiani, socua na niishitiojonutaniyari. Saniniuujia, canapuate na rupaa tojitiaquiyani, secaja na niishishanoori puetunu jaariutiasaanutaniyajanaa.

Miriqui pohuatasano natau moritianojiniji

²⁶ Jesuuri nojori sequequiaarijuhuaj:

—Nia niishitiojonu saniririria taa Pueyaso muerasu supuequiaani, Pueyaso jiitiasano nojori quiniuria. Tamonu pueyanoori na cuhuariquiajinia nataquiaari jajau. Na nuhuaji, majaari na tacatenu quiquiaariuhua pueyaracaanu na natasano na niquiniuria. ²⁷ Cuno pueyanoori na natanu nuhuaji camueenujuquiaari. Cuno jajauri moritiaquiaari juuca, niucuanio. Maashiquiaariiri na camaru maquesacari, na niqishacarijuhuaj. Tamonu juuca, na camaru tacatesacariuhua na natasano na niquiniuria, tariucua puereetucaari quiquiaari. Majaari na camaru niishiniu quiquiaari taa na moritiareeni. ²⁸ Jiyari

tamajaaja moritianijia natau. Coteenu moritiaari na jiyona. Na nuhuaji, na jajau coori supueya. Na nuhuaji, na jajauri querasapijiaacara quimaa na noshiniuria. ²⁹ Na natau jaara noshimia, na senoonaaari na senoojua na racatasocoriquiano. Pueyaso muerasuuri naa miishaanutaniyajuhua.

Miriqui pahuatasano mostaza jajaujini

(Mt 13.31-32; Lc 13.18-19)

³⁰ Jesuuri socua sequequiaari:

—¿Juhua casaa niqushanote Pueyaso cumaacani? ¿Casaate pa naata na saniniujiuniuni, taa Pueyaso Rupaa poonijia pueya jiuujiajiniani? Quiaritia nia pahuatareeraj. ³¹ Pueyaso Rupaari pueya jiuujiajinia quiya juhua mostaza jajau. Mostaza jajauri jyanohua socua shiitianiyojua puetunu tamasaca jajaujinijianaa, majaan puera maatia na niqushaanu. Pueyaso Rupaari naajuhua pueya jiuujiajinia, nocua nojori tiuushacari. ³² Mostaza jajau jaara nataasaare, maashiyari socua puereetucara tamasaca nataujini. Na cashacucuaari maashiya puereetucucara. Shuhuari na cashacucua cariquiaco nujuatujua shinishiqui.

Pueyaso Rupaari pueyano jiuujiajinia naa cumaacaracajuhua, na jataniniuria na tojijia, maninia miijia na quiniuria.

Jesu niishitiojacari pueya saa na miriqui pahuatanotaja

(Mt 13.34-35)

³³ Jesuuri naa queraatia miriqui pahuatanota niishitiojoquiaari Pueyaso rupaa saaja pueya niishishano casaata. Majaan socua jiyajeneta casaa na pahuatanu quiqiaari. ³⁴ Naacuajitij, nojuaja jaara casaa niishitiojonu paniquiaari pueya niqiaara, nojuajaari puetunujuanaa naa niishitiojoquiaari miriqui na pahuatanota. Tamajaaja nojori quishacari saniniujia, Jesuuri na saquiriojosano pueya niishitiojoquiaari maatia, casaa miriqui na pahuatanano sequenu paniriquiaani.

Jesu pueyajetesacari paratu, mohuaca cajiniuucuanunio

(Mt 8.23-27; Lc 8.22-25)

³⁵ Cuno juuca jaara niniquiaari, Jesuuri na saquiriojosano pueya sequequiaari:

—Caminia taquijiria pa quiaare.

³⁶ Cuniqijia pueya tiujatiuyareeri, nojori quianura caminia taquijiria. Na pueyari Jesu quiojyaree cuno botenjiaja, tee nojuaja quiriqiaacuajani. Jesu quiasacari caminia taquijiria, tamasaca boteeri nata jaatequetariquiaajuhua. ³⁷ Maja puera na quenaacoy-aquishacarijia, maruuri paratuta canashiyajijia jyanohua niqiaari nojoriicua nojori niuutiasacari. Paratuuri jyanohua cajiniuucuatequiaari mohuaca nojori botenjiaacumara. Nocua ni boteeri tari quera tiuquitiariciaa mohuacata. ³⁸ Jesuuri jiyacari bote pajamaji maqueriquiaa juhuajaniya. Na nacaacuaji mataja caco maqueriquiaari. Na pueya niucujatusacari nojuaja, Jesu sequeteereeri:

—¿Niishitiojonanaa!, ¿majateeri quia puereenujua paa tari tiuquitiareeni?

³⁹ Jesuuri sanema. Paratu sequereeri, caminiano:

—¿Quia suraajere! ¿Tariucujaj!

Paratuuri tajimiohua. Caminiaari pootia maquee. ⁴⁰ Jesuuri na saquiriojosano pueya sequereeri:

—¿Casaara nia puereya puerani? ¿Niaateeri Pueyasocua tiuyashijiaa quiyajaruhuaj?

⁴¹ Nojoriiri jyanohua shiriqitiuri. Tama nojoriijaaritia sequetooquiaari:

—¿Cantejaaranononi? ¿Paratu, caminiaari na tojirii!

5

Gerasa jiyajiniinio samaruharaca pueyanoinijia pahuatanano

(Mt 8.28-34; Lc 8.26-39)

¹ Na nuhuaji, nojoriiri caminia taquijiria tiuquijioquiaari, Gerasa jiyajinia. ² Jesu tacasacari botenjini, nocua niqiaariiri tamonu pueyano raacajini, macunucua nu-cuhua paaquiosajijia. Cuno pueyanoori samaruraca quiquiaari. ³ Raacajinia quijia quiquiaariiri. Majaan na naata moronu quishaaquiaari quenaaja cumayocua shipinishano casaata. ⁴ Pueyari juucua na morojouja, na cashacucua, na juaashiquiacanio. Saaja na turojotajaaari. Majaan quenaaja na nujuataja pueyano quiniu quijia. ⁵ Pueyaracaanu tuhananuhua rucuanajoquiaariiri, raacajiniano. Na rucuanajosacari sariyacojuaari, juuca, niucuanio. Tama na cuaqueyajaaja piquijia saitiaari. ⁶ Nojuaja jaara Jesu niqiquiaari tucuaaanuji, nocua netequiaariiri. Jesu cariquimiaaji mojuquetaseeri. ⁷ Jesuucara nacareeri:

—¿Casaacua miji quia niyani, Jesunaa, jiyocuaaanu Quijia Pueyaso Niyanunaa? ¿Quia secojijianijia maja naquiya quia miiniuria janiya!

⁸ Samaruhuaraca pueyanoori naa sequeree Jesutej, tari Jesu sequenuucua samaru nojuajiniji na tohuatanura.

⁹ Jesuuri na nequesotaree:

—¿Taa sesanaacatequia?

Na riucuaereeri:

—Canaa jiyanoehua queraatiani, cunora cua sesa “Queraatia”.

¹⁰ Cuno samaruuri jiyanoehua Jesu secojoriquiaa maja nojori na taanuunura cuno jiyajiniji. ¹¹ Cushiyari jiyacari cateca naataja miaquenuuriquiaa tuhuananucari. Jiyanoehua queraatia cushiyari quiriquiaa. ¹² Samaruhuari Jesu secojoree naatej:

—¡Canaa quia jiyarore canaa tiuquitianura cuno cushiyacua!

¹³ Jesuuri samaruhua jiyaroree. Samaruhuari pueyanojiniji tohuareetaquee. Cushiyacua tiuquitiaseeri. Dos mil cushiya naasucuaari quiriquiaa. Cuno cushiyari cocuatequiaari, samaruhuaraca nojori quiniucua. Tacobiniji totesee caminiajiniaari. Puetunujuanaari ti shushiniuquiaari.

¹⁴ Cushiya cojuanaari jiyacari netecuaturuhua na shiriiquiniutia. Na tiacajinia pueya poojotanuusuhua nojori niquishanoori, cuhuariquiacajinia quiniaa pueyano. Nocuaji pueyari nijioquiaari nojori niquiniuria casaate quiquiaarini. ¹⁵ Cuno pueya jaara tiuquijioquiaari Jesu quishaqui, cuno tarijia samaruhuaraca quijia pueyano niquitiushiiri panaatia cajiyano, toqueraca. Naa nojori niquishacari nojuajatej, pueyari pueretuquiaari. ¹⁶ Jesu miishano niqutiuniaari cuno pueya pohuataquiaari taa samaruhuaraca pueyano miishaareeni, mariyata cushiyajinijinio. ¹⁷ Cunora, cuno pueyari Jesu secooteree na quianuhua cuniquiji, nojori jiyajiniji.

¹⁸ Jesu jaara tacaquiaariuhua na botejinia, cuno tarijia samaruhuaraca quijia pueyanoori nata quianu paniquiaari juucua. ¹⁹ Majaari Jesu paniniu quiquiaari. Na sequeree saajaari:

—Quia quiaarohua quia tiajinia quia pueyacua. Quia pohuatasuhua nojori taa Pueyaso miiri quiajaniani, quiocua na taraajenuucua.

²⁰ Pueyanoori quiaarohua. Nojuajaari pohuatanu coteequiaari cuno na jiya diez tiacajinia taa Jesu miiquiaari maninia nojuajani. Puetunu pueyajanaari jiuujiatequiaari nojori tojishacari nojuaja. Cuno diez tiaca sesa quiquiaari “Decápolis”.

Jairo niyatujiniji pohuatasano, Jesu toque quiana maajinijijuhua
(Mt 9.18-26; Lc 8.40-56)

²¹ Jesu jaara niuutiaguaariuhua botejinia caminia taquijiriohua, queraatia pueyari nocua tiuquijioquiaari na quishaqui. ²² Jesu quishacarijia caminia casaqueyaji, nocua tiuquiquiaariiriri tamonu pueyano, Pueyaso secojoja tia jiyaniijia. Na sesa quiquiaari Jairo. Jaara Jesu niquiquiaari, na cariquimiaji mojoquetaseeri. ²³ Naa Jesu secojoree jiyanoehuari:

—¡Quiyatu quera cusoya! ¡Miji, quia juashiquia nocua quia niaquee na naatanuhua!

²⁴ Jesuuri jiyacari nata quiaaree, na saquiriojosano pueyano. Puera jiyanoehua queraatia pueyari na nuhuajiriquiaa. Jesu tanuujuturiquiaari. ²⁵ Cuno pueya tajinia quiriquiaajaariuhua tamonu cusosu maaji. Doce marijaari tari na shoconujuquiaari pueyaracaanu na naatesacari. ²⁶ Queraatia naarajonaari nareja naquiya na miiquiaari. Socua na jiyacatojoquiaari saajaari. Najuhua na cumaneeca puecaquiaariiriri na naarajosaanura juucua. ²⁷ Cuno maaji jaara Jesujiniji tojiquiaari, na nijiniji na nuhuajiquiaari jiyasohuari. Na tucuaque toque quiaasee pueya tajiniaari. ²⁸ Cuno maajitiri tama sequequiaariijaaja: “Janiya jaara quenaaja na toque quiareni, janiyari naatanunihuaani”. ²⁹ Naacujitij, na quiasacari Jesu toque, na nanacaari ritia curetaquee. Jiyacari na niishiquiri. Tama sequequiaariijaariija: “¡Cua cusonu tari tajiyatema!” ³⁰ Jesuuri jiyacari niishiqui nojuaja na cumaacata cusosu naataniriri. Cunora, nojuajaari tacareecuaree na niquiniuria pueya. Pueya nequesotareeri:

—¿Cante cua toque quiareeni?

³¹ Na saquiriojosano pueyari na sequeree:

—Quiaacuajaari queraatia pueya niquiya quia tanuujiyano. Quiaari najuhua nequesotaariquiohua saajuhua: “¿Cante cua quiareeni?”

³² Jesuuri saaja na shocuaqueya niqunijoriquiaa, na niquiniuria cante na toque quiareeni. ³³ Maajiri jiyacari tetecariquiaa na puerenuta. Jesu cariquimiaji mojoquetasee ritiaari. Nojuajaari niishiquiaari Jesu cumaaca na naataniriohua. Cunora, Jesu sequeree puetunu seetanujanaari. ³⁴ Na nuhuaji, Jesuuri na sequeree:

—Sanaunaa, cucua quia tiuuniucua, quiaacuaja tari quia cusonujiniji naatarohua. Juhujaniya quia quiaarohua. Quia cusonucua tari tajiyatemohua quiocuaji.

³⁵ Jesuuri cuno maajiicua pocuariquiaajaa pueya tiuquiiijosacari Jairo tiajiniji. Cuno pojoriiri maaji samiriu que sequetusee:

—¡Quia niyatu tari cusoquee! Maja najuhuana Niishitiojona riniu quia tiajinia.

³⁶ Jesuuri nojori sequesano tojirii. Naaratej, maaji samiriu que sequereeri:

—¡Maja puerenu! ¡Cucua quia tiuuri saaja!

³⁷ Majaari Jesu paniniu quiquiaari tamasa quiojonura nata. Saaja nata quiojoquiaari cutaraari Pedro, Santiago, Santiago tarajanu Juannio. ³⁸ Nojori jaara tiuquiiioquiaari Jairo tiajinia, pueya niquishii nujuquetiuyanoori, sariyocuatuiyanonio. ³⁹ Jesu jaara tiajiniaaco tiuquiquiaari, cuno pojori sequereeri:

—¿Casaara puera nia cojuatuneyani? ¿Casaara naa nia nujuqueyani? Maaji samiriu maja macu. Nareja maqueyano.

⁴⁰ Pueyari saaja Jesu saroojotaquiaari nojuaja na rerequetenuta, naa nojori na sequenucuatej. Jesuuri cunora nojori tohuatanijioree tiajiniaacoji. Jesuuri macucua sohuacamara tiuqunitiaquiaari Jairo necocuata, tama na pueyajaajanio, cuniqui tii nata qutiiriqiaani. ⁴¹ Macu juaashiquiajiniji quiaaseeri. Na sequereeri:

—Talita, cumi.

Nioori pueyano rupaajinia sequeya: “¡Maaji samiriuniaa, quia sequeyanijia, quia sanere!”

⁴² Jiyacaritij, maaji samiriuri ritia sanequee. Juhucatecara rucanereeri. Doce mariijaari tari cuno maaji samiriu shocojoquiaari na queyata na quishacari. Pueya niquishacari naa Jesu miishanotej, nojoriiri jiyanojua jiuujiatequiaari. ⁴³ Jesuuri jiyanojua nojori rootaree maja nojori pohuatanura pueya niquiara na miishano. Saaja sequeree cutaraari maaji samiriu cuara mianuutesaaria.

6

Jesu quishacari Nazaret tiacajinia

(Mt 13.53-58; Lc 4.16-30)

¹ Jesuuri cuniquiji quiaquiaariuhua tama na jiyajiniohuajaaja. Na saquiriojosano pueyari nata quiojoquiaarijiuhua. ² Jaara quiquiaari samaatenu juuca, Jesuuri tii niishitiojonu coteeqiaari Pueyaso secojojua tiajinia. Queraatia pueyari na tojitiariquiaa. Nojoriiri jiuujiatequiaari. Tamajaaja sequetooquiaariiri:

—¿Tee nio pueyano niishitiojosaaquiaari puetunu niojuanaani? ¿Teje na masecanu puetunu na niishishanojuanaani, cuno cumaacanio, jiyajeneta miishano na miiniriani?

³ Nojuacuajaari suruhuatujiniji casaa shipinijona tiajiniaacor, niya pa tiacajiniani. Nojuajaari pa tiacajinia quinia María niyanu. Niya quiyajaariuhua na tapueyocuaa: Santiago, José, Judas, Simónnio. Na rimiatuhuari niya quiyajuhua pa tiacajiniani.

Cunora, majaari nojori tojtianu paniniu quiquiaari Jesu. ⁴ Naaratej, Jesuuri nojori sequeree:

—Pueyari tiquiyocua Pueyaso sequenu panishano caminiujuunia tojinii paniquiaa cutara. Saaja tama na tiacajinijinio pueya cutaraari maja na tojtiiuniu paniniu, na jiyasojinijinio supueno pueyajuhua, tama na tiajinia quiniaajaajanio.

⁵ Naacuajitij, nocua nojori tiuyaquiniucua, majaari na naata na cumaacata na miiniu quiquiaari. Saaja secaya cusosuhucua niojoquiaari na juaashiquiaari, nojori na naatani-ionura. ⁶ Jesuuri jiuujiatequiaari nojori tiuyaquishacari nocua. Na nuhuaji, Jesuuri rucanejoquiaari pueya na niishitiojonura, queraatia shiitaniyojua tiacajinia catecaja na tiaca shocua.

Jesu jiyaramiquishacari na saquiriojosano pueya Pueyaso rupaa pohuatanura

(Mt 10.5-15; Lc 9.1-6)

⁷ Na nuhuaji, Jesuuri na saquiriojosano doce pueya sequequiaari nocua nojori niniuria. Nojori jiyaramiquiniu coteereeri, nojori quiojonura caapiqui, caapiqui, Pueyaso rupaa nojori pohuatanura. Nojori niquitioree na cumaacari samaruhua nojori tohuatanijionura pueyajiniji. ⁸ Nojori sequereeri maja nojori panura nojori panishano, saaja nojori miojotu cutara. Nojori sequereeariuhua, maja nojori panura caashoque, coseyaca, cumaneecanio. ⁹ Nojori sequereeri saaja nojori cushiniuria na sapatu cutara, maja socua toque nojori panura na cushihocoriquiano. ¹⁰ Nojori sequereeariuhua:

—Niaa jaara tiuquishiiquia tamonu tiajinia, cuniquijia nia jiyojetare, niaa jaara cuniquiji quiaarejaatijia. ¹¹ Pueya jaara nia tiuqunitianu paniyaquiri na tiajinia, nia pohuatasano nojori tojinii paniyaquishacarijiuhua, niocua cuniquiji quiaare. Niocua nia niohuacaacuaji jiya joocua piitiare nojori niquiara, nojori niishiniuria Pueyasoori nojori saniitionutaniya, na rupaa tojyashijianucua nojori quiniucua.

¹² Na nuhuaj, Jesu jiyaramiquishano pueyari quiojoquiaari. Nojoriiri Pueyaso rupaa pohuatanuquiaari pueya tacatonuhuaa nojori jiuujia Pueyasoocua. ¹³ Nojoriiri queraatia samaruhua tohuatanijioquiaari. Naajuhua, nojoriiri cusosuhucua tarooquiaari naana jajau shiyocua, nojori naatanijosacari queraatia pueya.

Tiuquinijiona Juan mosacari
(Mt 14.1-12; Lc 9.7-9)

¹⁴ Jesu miishanojinijiri caminiujiushaquiaari puetunu cuno jiyajinijanaa. Naacuajitij, Galilea jiya jiyaniijia Herodesri Jesujiniji pohuatasaaquiaarijuhuaj. Herodesri cunora sequequiaari:

—i Tiuquinijiona Juanqui samiitiarohucuaa, cua mosano pueyanotej! Naaratej, cuno Jesuuri cuno cumaacaraca, jiyajeneta casaa na miiniuria na cumaacata. Nojuacuajaari cua mosano Juan samiitianohua.

Jiyaniijia Herodesri na jiyajenetaquiaari jiyanoehua cumaacaraca Jesu quiniuucua. ¹⁵ Tamasaca pueyari Jesujiniji sequequiaari tamaatia saniniuuja, nojori jiyajenesacarijuhuaj. Naa sequetquiaariiri:

—i Nojuacuajaari tariucuaaanu pueyara Pueyaso sequesano caminiujiunia Elías!

Tamasaca pueyari saniniuuja naa sequequiaari, nojori jiyajenesacarijuhuaj:

—Nojuacuajaari quiarijia nio pa quishacari Pueyaso sequesano caminiujiunia pajaniyara, juhua tariucuaaanu pueyara Pueyaso sequesano caminiujiuniaajuhua.

¹⁶ Herodes jaara pueya sequesano tojiquiaari, nojuajaari saa sequequiaarijia:

—Nojuacuaja Tiuquinijiona Juan, cana cua nacataniquianucujani. Samiitiarohucuaaquiiri.

¹⁷ Tiuquinijiona Juan moyaquishacarijia, nojuajaari Herodías rupaaajinia nujuatesaaquiaari. Cuno maaji Herodíasni, nojuajaari Herodes tarajanu Felipe niquiocua quiquiaari coteenu. Herodesri tarajanu Felipe niquiocua jaariutiaquiaari necocuara. ¹⁸ Nocuaji, Tiuquinijiona Juanri Herodes nacasujujua. Naa na sequejaari:

—i Pueyasora, majaari maninia quia jitianura quia tarajanu niquiocua!

¹⁹ Cunora, cuno maaji Herodíasri maja na niquiniu paniniu quijia Tiuquinijiona Juan. Na monu panijiaari. Majaari na naata quiquiaari saaja. ²⁰ Herodesri Tiuquinijiona Juan puereja. Nojuajaari niishiquiaari Tiuquinijiona Juanri maninia pueyano, Pueyaso tojijia pueyano, maja sesa miijia. Naaratej, Herodesri maninia na cojuateja nujuatejojuajinia. Majaari na shanacunu quiquiaari sesa na miishaanura. Herodesri Tiuquinijiona Juan pohuatasano tojinu maniniucua. Nojuajaari saaja noojia niquijoteja quiquiaari. Majaari na niishiniu quijia taa na miiniutianiyani. ²¹ Saniniuuja, cuno maaji Herodíasri pueyaracaanu niishiriojoriquiaa, Tiuquinijiona Juan na motenura. Jiyacaritij, namitia nera, Herodes rasaanu juuca quiquiaari. Cuno juuca, jiyaniijia Herodesri queraatia pueyata queranacuree. Na queranacunura, nojuajaari Galilea jiyajinijinio jiyaniijianucua masuquiaari, tama na soldadohua jiyaniijianucuaajajano. ²² Jiyacaritij, Herodías niyatuuri tiuquiquiaari queranacusaqui, tii na nianujunura puetunu pueya niquiarajanaa. Herodesri niyacoo nianujunu shuquiritiaquiaari jiyanoehua. Nata miaquenaa pueyari jiyanoehua na shuquiritiaquiaarijuhuaj. Naaratej, jiyaniijia Herodesri niyacoo sequere:

—Cua masere quia panishano. Janiyacua quia niqutioreni.

²³ Herodesri socua puetunu pueya niquiarajanaa na sequerohucuhua:

—i Seetanujuanaa quia sequeyanijia, maja cua sapojonu! Janiyari quia niqutionutaniya quia masesanoni. Quiaa jaara cua masere cua jitiiasano cajiniocua, naajaa, janiyari quia niqutionutaniyani.

²⁴ Niyacoori tohuataquee na nucua Herodías na nequesotanura. Na sequeeeri:

—Cua nucuaana, ¿casaa cua masenutaniya cua quenuni?

Na nucuaari na sequere:

—i Quia masere Tiuquinijiona Juan naca!

²⁵ Cuno niyacoori ritia tiuquiquihua jiyaniijia Herodes quishaqui. Na sequereeri:

—i Quiarijia cua niqutiore Tiuquinijiona Juan naca miacojuajinia!

²⁶ Naa jiyaniijia Herodes tojishacaritij, jiyanoehua taraajequeeri. Naajaa, seetanujuaana na sequenuucua na masusano pueya niquiara, majaari tari na naata ruuretanu quiquiaari cuno niyacoo masesano. ²⁷ Naaratej, jiyaniijiaari ritia jiyaroree na soldado, Juan naca na niqutionura cuno niyacoo. ²⁸ Soldadoori quiaaree nujuatejojuajinia. Juan nacataseeri. Na naca patamohua miacojuajiniaari. Soldadoori niyacoo na niqutiosuhua. Nojuajaari na nucua na niqutiose saniniuuja.

²⁹ Tiuquinijiona Juan pueya jaara na niishiquiaari, na maanu patuquiaariiri, na jamotusocoriquiano.

Jesu mianuutesacari cinco mil pueya
(Mt 14.13-21; Lc 9.10-17; Jn 6.1-14)

³⁰ Jesu jiyaramiquishano pueyari tiuquijioquiaariuhua Jesuucua nojori rucuanenon nuhuaji Pueyaso rupaa nojori pohuatanura. Nojoriiri Jesu pohuataquiaari puetunu nojori miitiushanojuanaa, nojori niishitiojosanojinijinio. ³¹ Na nuhuaji, Jesuuri nojori sequere: —Miji, pueya quiyaquishaqui pa quiaare tamaqui, tii pa samaatenura rupaquijia que-naaja.

Jiyanohua queraatia pueyari pueyaracaanu nojoriicua nijioriquiaa. Tamasacaari quiojoriquiohuacuaa. Tamasacaari saniniuujia shusha tiuquijioriquiaacujua. Naaratej, majaari jeya nojori quiniu quiquiaari na miaquenura quenaaja. ³² Jiyacaritij, Jesuuri saaja na jiyaramiquishano pueyata quiaquiaari botejinia, pueya quiyaquishaqui. ³³ Queraatia pueyari saaja nojori niqutiuri quiaano. Cuno pojoriiri Jesu niishitiquiaari. Naaratej, puetunu caminia shuriquioico tiacajinjijianaa pueyari netecuatuquiaari. Nojoriiri Jesuucua cutesee. ³⁴ Jesu rosesacari botejiniji, saaja queraatia pueya niquriiri. Nojori na niquishacari, cuno pojoriicua taraajeguiaariiri. Nojoriiri juhua cojuanaaju borregohua quiriquiaa. Naaratej, Jesuuri nojori niishitiojonu coteeree queraatia casaa Pueyasojiniji. ³⁵ Jaara quiquiaari tari tenacari, na saquiriojosano pueyari nocua nijioquiaari. Na sequetuseeri:

—Tari tenacari. Paa tiajiyaqui quiyani. ³⁶ Pueya quia sequere, nojori cuara quiojoora cateca naataja tiacajinia, na miaquesocoriquiano nojori masenura tii.

³⁷ Jesuuri nojori riucaaree saaja:

—Niaa mariqui nojori miaquetereja saniya.

Nojoriiri na sequere:

—¿Quiaateeri paniya queraatia pan masenuucua canaa quianura puetunu cuno pojoriirijanaa? ¡Pa mianuutenura nojori, panishiyari dosciento cumaneeca! Majaari pa jiitianu.

³⁸ Jesuuri nojori nequesotaree:

—¿Taa pan nia jiitiaani? Nia niquishiitioj.

Nojori jaara niishiquiaari taa pante quiyani, na sequetusuuhari:

—Cinco pan quiya, caapiqui sapitiaajanio.

³⁹ Jesuuri jiyacari na pueya sequere nojori cajitijionura pueya jiyasocujania, na mianuutesocoriquiano. ⁴⁰ Pueyari cajituri cien, tamocora cincuenta, tamaqui socua cien, camiria cincuenta. Pueyari naa queraatia maapuera raquiriojotasaaree nojori mianuutesaanura. ⁴¹ Jesuuri cuno pan pataree, sapitiaajanio. Na nuhuaji, jiyocuaaanu maureeri Pueyaso na secojonura nocuara. Na nuhuaji pan neecasequiaari na saquiriojosano pueyaraari, nojori serotasocoriquiano pueya. Cuno caapiqui sapitiaaja shiquioreereejaariuhua puetunu pueyarajanaa. ⁴² Puetunu pueyajanaari maninia miaquenuquiaari. Maninia tooquioreejaariuhua. ⁴³ Na nuhuaji, doce canaasatuuri mishinijiosaaquiaari pan raacuaa, sapitiaaja raquiquiatanio. ⁴⁴ Cinco mil pueyari cuno panjiniji miaquenuunaa quiquiaari.

Mohuaca caco Jesu rucuanenunijini pohuatasano
(Mt 14.22-27; Jn 6.16-21)

⁴⁵ Nio nuhuaji, Jesuuri na saquiriojosano pueya tacanitiaquiaari botejinia, nojori puetanura nojuaja caminia taquijiria Betsaida tiacajiniara. Jiyacaritij, Jesuuri pueya sequeriquiaa nojori quiojonuhua na tiacajiniohua. ⁴⁶ Pueya jaara tari quiojoquiaariuhua, Jesuuri tuhananuucua tacaquiaari tii na secojonura na Que Pueyaso. ⁴⁷ Jaara niniquiaari, boteeri tari caminia jiuujijania jaaretariquiaa. Jesuuri juhuanajuaja na jateesaqui quiriquiaajaa. ⁴⁸ Jesuuri nojori niquiquiaari najuhuaa jaarioconuyano. Majaari nojori naata jaaretanu quiriquiaa, puera paratu piyarojosacari nojoriicuaa. Quera juhuaquenu panishacari, Jesuuri nojori rupusee. Mohuaca caco canujuriquiaari. Quera nojori tajiriquiaari. ⁴⁹ Nojori jaara na niqutiquiaari mohuaca caco canujiyano, nojoriiri na jiyantiquiaari samaru. Nocua sariyocatureeri. ⁵⁰ Puetunu nojorijianaari na niqutiuri. Shiriqutiuriiri. Jesuuri ritia pocuaree. Nojori sequereeri:

—¿Casaara nia puereyani? ¡Nioojia nia cumaquiri! ¡Maja pueretunu! Janiyacujania.

⁵¹ Botejinia tacasee nojoriicuaari. Paratuuri jiyacari pueyajequee. Nojoriiri na shootariquiaa tacuriitia, jiyanohua na jiuujiatenuta. ⁵² Nojoriiri juhuanajuaja maja na niishiniu quiquiaari Jesu miishano, queraatiara na jiyatesacari pan, pueya miaquesocoriquiano. Nojori jiuujiaacari juhua ninishiqui quiquiaarjia.

Jesu naatanijiosacari cusosuhua Genesaret jiyajinia
(Mt 14.34-36)

⁵³ Jesuuri na pueyata caminia niuutiaquiaari. Tiuquijiooseeri Genesaret jiyajinia. Nojoriiri tii morotasee na bote. ⁵⁴ Nojori jaara tohuareetaquiaari botejiniji, cuniquijinio pueyari ritia Jesu niishiquiaari. ⁵⁵ Pueyari jiyacari netecuatuquiaari, Jesujiniji nojori pohuatanura puetunu cuno jiyajiniajanaa. Cusosuhuari juhuacatecara pa-tootasaquiaari na matucuaajinia tee Jesu quiriquiaa na rucuanijosacari nojori jiyajini-acuajani. ⁵⁶ Tiquiyocua Jesu rucuanijosacari, cusosuhuari nocuaji nijotasaquiaari nucuaco, tuhuaqui tiacajinia, queraatia shiitianiyojua tiacajiniajuhuaj, cuhuariquiaacajiniano. Pueyari Jesu secojoree cusosuhua na quiatenura quenaaja na toque casaca. Canapuate na toque quiaquiaarini, puetunu nojorijianaari na cusonujiniji naatacoquiaar-uhua.

7

Casaate sesoriquiara pa jiyateja Pueyasorani (Mt 15.1-20)

¹ Jesucua catecanoquiaariiri Fariseocuaca, Moisés Rootasanojiniji niishitiojanaano, canapuate Jerusalén tiacajiniji nijioquiaaricuajani. ² Cuno pojori quishacari tii, nojori-iri noojiaqueya Jesu pueyajinijinio niquiquiaari shuquitioojua miaqueyano. Nojoriiri jiyajinia, nojori rucuanijosacari sesa miijiaa pueya tajinia, sesa nojori quiniu na naata nojoriicua pacunu. Nojoriiri cunora shuquitianu jiiitiquiaari, nojori jyanishacari nojori jiuujia naasucua curuushiniutianiya, shuquitioojua nojori miaquesacari. Naaratej, cuno pueyari Jesu pueya pocuanu coteequiaari. ³ Cuno Fariseocuaca, puetunu narta Judiocuacajanaano, nojoriiri maja na cartenu quijia tariucuaacanu nojori supuetanaa niishitio-josano. Naaratej, majaari nojori miaquenu quijia shuquitioo. ⁴ Naacuajitij, nojori jaara mi-aquesano niquitiojosaquiji tacatequiohua, majaari nojori miaquenu shuquitioojua. Socua queraatia quiyari cuno pojori niishishano. Naacuajitij, nojoriiri jiyaniquiaa, sesa nojori quiraquiniucuaaji Pueyaso niquiara, nojori cuara na ratujua jeeguejooa, pataco, coshi, na maquetucuanio. ⁵ Naaratej, Fariseocuaca, Moisés Rootasanojiniji niishitiojanaano, nojoriiri Jesu nequesotaquiaari:

—¿Casaara quia pueya tojitiaaquia pa supuetanaa niishitiojosanoni? Nojoriiri maja na shuquitianu quiquiaa na miaquenuunura.

⁶ Jesuuri cuno pojori riucaaree:

—¡Niaari sapuenu juhua maninia pueya niquishano! ¡Niaacuajaari seetanujuanaa sesa miijiaa! Pueyaso sequesano caminiujunia Isaíasri maninia sequequiaari nijajaniyajini-jicua, naa na naajiotasacari Pueyaso sequesano:

“Nio pueyari saaja na rupaata shuquiritiaa janiya. Nojori jiuujiaari saniniuujia tucua-caanu quia janiyajiniji. ⁷ Nojori miishano quiriani, cunoori najuhuanaj. Naa nojori miishanoni, majaari na shuquiritiniu janiya. Nojori niishitiojosanoni, cunoori tama pueya niishitiojosanojuaaja, maja cua sequesano”.

⁸ Niaari cua pueya pocuariquiaa. ¿Niajaniyariuhua? ¿Casaara Pueyaso sequesano nia tojiyaquiquiaanijia? Niaacuajaari Pueyaso sequesano tojiyaquiya, tama nia supuetanaa niishishanojuaaja nia miiniuria najuhuanaj.

⁹ Jesuuri socua naa sequequiaari cuno pojoritij:

—Tama nia miiniu jiiitishanoocua nia miiniurijaaja, ¡niaari Pueyaso sequesano shocortaa saaja! ¹⁰ Moiséscuajaari naa rootaquiaari: “Maninia quia miiri quia que, quia nucuanio. Majaari nojori rerequetenu. Cante na que, na nucua sesacajani, cuno pueyano cuara mosaaria”. ¹¹ Niaari sequeya saniniuujia, maniniacuaja, pueyano jaara na que, na nucua sequere: “Maja cua naata naacutanu nijajaniya cua casamitia. Janiya tari Pueyasora jiyaterree puetunu cua jiiitiasanojuanaani”. ¹² Niaari sequequiaajuhua, pueyano jaara naa sequeretej, maniniacuaja maja na naacutanura na que, na nucuanio. ¹³ Naacuajitij, niaari Pueyaso sequesano shocortaa saaja, tama nia niishishanojuaaja nia miiniuria najuhuanaj. Cuno nia niishishanocuajaari saaja nia supuetanaajiniji caminiujishano. Niaari socua queraatia casaa miiquiaa juhua cunojuhuaj.

¹⁴ Naa na nacasunu nuhuaji cuno pojoritij, Jesuuri pueya rerejeterohua na shocua. Nojori sequereeri:

—Cua tojitiare puetunu nijajaniyajanaa, maninia nia niishiniuria. ¹⁵ Casaa pa miaqueyari, Pueyasora naajaa. Cunoori maja na naata pueyano jiyatenu sesa miijiaa. Poojajinia pa niishiriojosano cutaraari sesara pa jiyateya Pueyasora. ¹⁶ Cante numaacarani, nojuaja cuara tojitiara cua sequesano.

¹⁷ Jesu jaara tiujiaquiaari cuno pueya, tiajiniaaco tiuquiyarohuari. Na saquiriojosano pueyari tii na nequesotaree pueya na niishitiojosanojiniji. ¹⁸ Jesuuri nojori sequere:

—¿Niaateeri cua sequesano niishiyaquiyajuhua? ¿Majateeri nia niishiniu? Puetunu pa jiniacuma tiuquijiajanaani, cunoori maja na jiyatenu sesa miijiaa pajaniya. ¹⁹ Pa

miasanoni, majaari na tiuquiniu poojiajnia, saaja pa seecojinia mishiya cutaraari. Na nuhuaji pocoma tajiyari pa marecuhucuma.

Nio sequesanota, pueya niishitiojoriqiaari, puetunu miaquesanojuanaari manini-acuaja pa miaquesocoriquiano. Maja cutaraari na naata na jiyatenu pajaniya juhua curuutuucara Pueyasora. ²⁰ Jesuuri sequeereejuhuaj:

—Pueya niishiriojosano sesa noojiajiniani, cuno cutaraari sesara na jiyatequiaa. ²¹ Pueyano jiuujiajiniji supueya cutaraari sesa niishiriojosano, sesa na miiniuria. Naacua-jitij, pueyanoori na camishoo maajipohua numuetucujua, seya numuetucujaujuhuaj. Tamonu pueyano casami nohuasejoquiaari. Pueya moquiaajaariuhuj. ²² Narta pueyano niquiocua numuetucujuaari. Tamonu pueyano casamiicua jiaatiaquiaari. Jiyanohua sesa miiquiaari. Cuaracashijionu niishiyari. Tama na cuaqueyajaaja shuquiritiaquiaari na miiniu jiiitishanota. Narta pueyano miananajoquiaari. Tamonuucara tonujuquiaari. Naajuhuj, saaja tama na cuaqueyajaaja shuquiritija quiquiaari. Juhujaniya sesa miiquiaajaariuhuj, moseeca na quiniuucua. ²³ Puetunu nio sesa miishanojuanaari pueya jiuujiajiniji supuequiaa. Cuno cutaraari sesa quijiaa pueya jiyateja Pueyaso niquiara.

Taatu tiuushacari Jesuucua

(Mt 15.21-28)

²⁴ Jesuuri cuniquiji quiaaree Tiro tiaca shocua jiyajiniara. Tii tiuquishii tamonu tiajiniaari. Majaari na paniniu quiquiaari pueya niishiniuria nojiajiniji, tee na quiyani. Naajaa, majaari na naata jamaaniu quiriquiaa. ²⁵ Tamonu maajiiri ritia Jesujiniji niishiquiaari. Neyatuuri samarucua quiriquiaa. Naaratej, maajiiri Jesuucua niquiaari. Na cariquimijia mojuquetaseeri. ²⁶ Cuno maajiiri Sirofenicia jiyajinijinio taatu quijia. Jesu secejoseeri samaru na tohuataniniuria neyatujiniji. ²⁷ Jesuuri maaji sequeeree miriqui:

—Quia tarinitiare, muerasu cuara coteenu miaquenuura. Majaari maninia muerasu pa jaariutianura na miaquesano, sareyacari jatasocoriquiano.

²⁸ Maajiiri Jesu riucaaree:

—Jaa, Jiyaniijianaa. Naajaa, sareyacajaari miaqueja cariquiacoji taticuaja, muerasu totinijosano miaquesano shiriya.

²⁹ Jesuuri na sequeeree:

—¡Quiaacuaja maninia cua riucaaree! Quia tacateyarohua. Samarucujaari tari tohuataree quia niyatujiniji.

³⁰ Maaji tiuquishacariuhua na tiajiniohua, neyatu riuriasuhuari na maquetujinia mataano. Samaruuri tari tohuatano quiriquiaa nocuaji.

Jesu jeeacasari numueju, tiquia pueyano

³¹ Jesuuri tacatequiaariuhua Tiro tiaca shocua jiyajiniji. Na tacatesacariuhua, Sidón tiaca shocojiaariuhuari, Decápolis jiya tiacanio. Galilea caminiajnia tiuquishuhuari. ³² Tii na quishacari, nocua jaatucusaquiaariiri numueju, tiquia pueyano. Na jaatucunaari Jesu secejotujuquiaari na juaashiquia na nianura nocua, na jeeanura cuno pueyano. ³³ Jesuuri pueyano numueju jaatucuree tamocora pueyacujia. Na numaama shirii na juaashiquiaari. Na nuhuaji, tama na juaashiquiajiniaaja riocoreeri. Na riacau cojuata pocuaashijia niti quiareeri. ³⁴ Jiyacaritij, jiyocuaaanu maureeri. Noojia niareeri. Na nuhuaji, cusosu numaa sequeereeri:

—¡Efata!

Nioori pueyano rupaajinia sequeya: “¡Quia riatere!”

³⁵ Jiyacaritij, numueju numaari riatequequee. Na nitiiri jeequequeejuhuaj. Ritia pocuaquee maniniaari. ³⁶ Jesuuri cuno pojori rootaree maja nojori pohuatanura na jeecasano pueyanojiniji tamasaca niquiara. Nojoriiri saaja tiquiyocua pohuatanuquiaari. Naa Jesu rootasacari na naatanijosano pueyatej, maja nojori pohuatanura na miishanojiniji, nojoriiri saaja socua jiyacatequiaari pohuatanura. ³⁷ Pueyari jiyanohua jiuujiatequiaari Jesu miishano na niquitiushacari. Tama nojorijiaarjia sequetoquiaari:

—¡Puetunjuanaa miya maniniaari! Numuejunucua jiyateya tojitiajacaari. Tiquianucua pohuateyajaariuhuj.

8

Jesu mianuutesacari cuatro mil pueya

(Mt 15.32-39)

¹ Jiyacaritij, jiyanohua queraatia pueyari rerejoquiaari Jesu na tojitianura. Majaari nojori jiiitanu quiquiaari casaa quenaaja na miaquetusocoriquiano. Jesuuri na saquiriojosano pueya piirii. Nojori sequeereeri:

² —Nio pueyacua taraajeyanijia. Nojori tari jiuujianaraca juuca quiya niya cuata. Majaari quenaaja nojori jiiitiatunu miaquesano. ³ Janiya jaara nojori jiyaramiquiriohua

na tiajinia miaqueyojuani, nucuaco cusojoniuyarohuacua. Noojiaqueya nojoriijiniiniori niyara nijiorucuaa tucuaaanuji.

⁴ Na saquiriojosano pueyari na riucuaaree:

—¿Paatucua taa miaquetere nojori niyani, pueya quiyaquishaquini?

⁵ Jesuuri nojori nequesotaree:

—¿Taa pan nia jiitiaani?

Nojoriiri na sequere:

—Nareja siete.

⁶ Jesuuri na pueya sequeree, nojori cuaara sequera puetunu pueyajanaa nojori caji-tiuniuria. Na nuhuaji, Jesuuri cuno siete pan pataree. Pueyaso secojoree nocuaraari. Na nuhuaji, na saquiriojosano pueyara na neecasereeri. Nojoriiri saniniuujia pueya na serotaree puetunujuanaa. ⁷ Secaja sapitiaaja jiitaturiquiaajaariuhuj. Jesuuri socua nocuara secorohuacuhuj. Na nuhuaji, na pueya sequereeri nojori niqutiojonura pueya. ⁸ Puetunu pueyajanaari maninia miaquenuuree. Tooquioreejaariuhuj. Mi-aquesano cureenota mishinijosaaquiaariiri siete canaasatu. ⁹ Na miaquenaa pueyari quiquiaari cuatro mil pueya. Na nuhuaji, Jesuuri nojori sequeree nojori quiojonuhuaa. ¹⁰ Na nuhuaji, Jesuuri botejinia tacataquiaari na saquiriojosano pueyata. Quiaareeri Dalmanuta jiyajiniara.

Fariseocuaca niqiniu panishacari Jesu miishano Pueyaso cumaacata
(Mt 16.1-4; Lc 12.54-56)

¹¹ Fariseocuacaari Jesuucua tiuquiiijosee. Nata juayonuutaseeri. Nojori saniniuujini-uria Jesu, nojoriiri na sequeree juucua cuaara nojori niqishocoriquiano casaa miiria Pueyaso cumaacata. Nojoriiri naa na sequeturee, nojori niishiniuria Jesute seetanujuanaa Pueyaso jiyarosano. ¹² Jesuuri noojia niaree na taraajenuta. Sequereeri:

—¿Casaara nio pueya niqiniu paniya Pueyaso cumaacata miishanoni? Seetanujuanaa nia sequeyanijia, majaari cua niqitiniu quiniutianiya niajaniya cua cumaacata cua miishano.

¹³ Jiyacaritij, cuno pojori tiujiaqueeri. Na pueyata botejinia tacataarohuari. Caminia taqijiria niuutiaareeri.

Jesu numootesacari na pueya Fariseocuaca niishitiojosanoocua
(Mt 16.5-12)

¹⁴ Jesu pueyari na coseyaca niyajatatuquiaari. Nareja niquiriyatujua panniyojua jiitia-turiquiaa botejiniaari. ¹⁵ Jiyacaritij, Jesuuri nojori sequeriquiaa miriqui:

—Cua tojitiare. Niocua tama nia cuaqueyajaaja cojuariquia Fariseocuaca pan poreeta-jaacuaji, Herodes pan poreetajaacuajijihuj.

¹⁶ Majaari na pueya niishiniu quiriquiaa naa Jesu sequesacaritij. Nojoriiri cunora tama sequetooriquiaajaaja:

—Pa jiyaniija jiyoteeri naa pa sequeya, coseyaca pa paaquiniucua pa sasocoriquiano.

¹⁷ Jesuuri na saquiriojosano pueya niishiriojosano niishiquii. Nojori sequereeri:

—¿Casaara naa nia niishiriojiya pan nia jiitiaaquishacarin? ¿Majateeri juhuanojuaja nia niishiniu tamonu juuca cua miishanojiniji? ¿Niateeri cumajiuujiaacato, maja nia niishiniuria? ¹⁸ ¿Majateeri cua miishano nia niqiniu quiquiaacuaja nia namijiata? ¿Majateeri nia tojiniu quiquiaa nia numaatajuhuj? ¿Niateeri ritia niyajarucuaa cua miishano? ¹⁹ Janiya jaara cinco pan neecascanu cinco mil pueyaratej, ¿taa canaasatu nia mishinijiocanu miaquesano cureenotani?

Nojoriiri na riucuaaree:

—Doce.

²⁰ —Naajuhuj, janiya jaara siete pan neecasercuaa cuatro mil pueyaratej, ¿taa canaasatu nia mishinijiorucuaani?

Nojoriiri na riucuaaree:

—Siete.

²¹ Naaratej, Jesuuri nojori sequere:

—¿Majateeri juhuanojuaja nia niishiniu naa cua miishanojinijitij?

Jiyacariti nojoriiri Jesu sequesano niishiquii.

Jesu jeeacasacari cariyojuaru pueyano, Betsaida tiacajinia

²² Na nuhuaji, Jesuuri Betsaida tiacajinia tiuquiiioquiaari na pueyata. Tii na quishacari, Jesuucua jaatucusaquiaariiri cariyojuaru pueyano. Pueyari Jesu secojotuquiaari cuno cariyojuaru namijia na quianura quenaaja. ²³ Jesuuri cariyojuaru quiaree na juashiquia-jiniji. Tiaca jyaquiria na jaatucuyareeri. Cariyojuaru namijia piquiojoree na riacautaari. Na nuhuaji, na juashiquia niaree nocuaari. Na nequesotareeri:

—¿Quia naatate niqiniu shiitianiyojua quenaaja?

²⁴ Cariyojuaruuri niqiniu sanirii. Jesu sequereeri:

—¡Jaa! ¡Pueya niquiyanijia, juhua nacuhua rucoyano!

²⁵ Jesuuri socua pacuterohua na juaashiquia nianu cariyojuaru namijiaacua. Cariyojuaruuri niqiniu saniriohuacuahuaj. Jiyacaritij, tojetaarucujanaa maninia niquijiara quiquiiri. ²⁶ Jesuuri na tiajinia na jiyarorohua. Cariyojuaru rootaree naari:

—Majaari tiacajinia quia quianuhua pueya quia pohuatanura cua miishanojiniji quia-janiya.

Pedro sequesacari, Jesu seetanujuanaa Pueyaso Jiyarosano

(Mt 16.13-20; Lc 9.18-21)

²⁷ Na nuhuaji, Jesuuri quiojoquiaari na saquiriojosano pueyata tucuaqui tiacajiniara Cesareya Filipino tiaca shocuaqueya. Na quiasacari nucuaco, na pueya nequesotareeri:

—¿Taa pueya sequequiaa janiyani, cantena janiyani?

²⁸ Nojoriiri na riucuaaree:

—Noojiaqueya pueyari quia sequequiaa, quiaanaari Tiuquinijiona Juan. Tamasacaari saniniuuja quia sequequiaacujua quiaanaari supuetana Elias. Naajuhuaaj, tamasaacari quia sequequiaa, quiaa naasucuaanaari tariucuaaanu pueyara Pueyaso sequesano caminiujunia, samiitianohuatuhuaaj.

²⁹ Na nuhuaji, Jesuuri nojori nequesotaree:

—¿Niajanियarjijataj, taa nia sequeyani, cante janiyani?

Pedroori na sequere:

—Quiajanuyacuaja Cristo, Pueyaso Jiyarosano.

³⁰ Jesuuri nojori rootaree maja nojori pohuatanura tamasa niquiara nojuajiniji Pedro niishishano.

Jesu numootesacari na pueya, nojuaja mosaanutaniya

(Mt 16.21-28; Lc 9.22-27)

³¹ Jiyacaritij, Jesuuri na pueya niishitiojonu coteequiaari tama nojuajinijijiaaja, taa Pueyaso Niyanu miishaanutaniya jiyanoehua naquiya taraatiani. Naa na pueya sequereeri:

—Parta Israel pueya jiyaniujanucuaari cua tojitiaaquiniutianiya, pueyacuara Pueyaso secोजना jiyaniujanucujuhuaaj. Naajuhuaaj, Moisés Rootasanojiniji niishitiojanaari cua rerequetejaca quiniutianiya. Janiyari mosaanutaniyani. Na nuhuaji, janiyari jiuujianaraca juucajinia samiitianutaniuhuanu.

³² Jesuuri naa seetanujanaa nojori sequequiaari. Na pohuatasanoori maja miriqui na quiniu quiquiaari. Jesu juara naa sequequiaari, Pedroori tamocora na jaatucuree. Cuniqiu na nacasureeri maja naa na pocuanuratej. ³³ Jesuuri na nijiniara tacatequee saaja. Na saquiriojosano pueya na niqiniutia, Pedro sequereeri:

—¡Cua shuriucuaji quia quiaare, Satanásnaa! Quia niishiriojosanoori maja Pueyasojiniji. Majaari quia niishiriojonu juhua Pueyaso panishano. Quiaari saaja juhua nio jiyajinijinio pueya niishiriojiya.

³⁴ Naa na sequenu nuhuajitij, Jesuuri na saquiriojosano pueya piirii, puetunu cuniqiu quiniaa pueyajanaanio. Nojori sequereeri:

—Pueyano jaara cua tojjijara quiniu paniri, nojuaja cuaara niiria cucua, seetanujuanaa noojiata na panishacari janiya. Nojuaja cuaara niyajetaara tama na cuaqueya na cojuanurajaaja. Cuaara cucua panitiaara tama na cuaqueyajaaja. ³⁵ Saniniuuja, cante tama na cuaqueyajaaja shuquiritiniu panijiani, na nuhuaji, nojuajaari jyanohua taraatia quiniutianiya pueyaracaanu. Saniniuuja, cante tama na cuaqueya panitiaa cua panishano na miiniuriani, na pohuatanura janiyajinijijuhuaaj, cuno pueyano cutaraari pueyaracaanu quiniutianiya shuquiriaatia. ³⁶ ¿Niaarate maninia, pueyano jaara puetunu nio jiya casamijanaa jitiare, na nuhuaji na sohanu jaara jatasaare mani quiquiojinia pueyaracaanura? ³⁷ ¿Pueyanote na naata Pueyaso niqutionu queraatia na casamijinijinio, Pueyaso jiyatenuhara nojuaja pueyaracaanu rishijia na quiniuria nata? Maja na naata. ³⁸ Cante cua rupaa pohuatanu caririquiya sesa miijiaca pueya niquiara nio jiyajiniani, janiyari nojori caririquiniutianiyajacuahuaj. Naajuhuaaj, cante caririquiya mijiria quiniaa niquiara sequenurani, janiya nojori jiyaniijiani, janiyari cua tacatesacariuhua nojori caririquiniutianiyajuhuaaj. Janiyari jiyacari cua Que cumaacata jiyocuaaanuji tacatenu-taniuhuanu, maninia miijiaca cua Que seyatajuhuaaj.

9

¹ Jesuuri nojori sequequiaarijuhuaaj:

—Seetanujuanaa nia sequeyanijia pueyanaa. Noojiaqueya niya quiniaajinjini quiariani, majaari nojori cusununu quiniutianiya juhuanajuaja, nojori cuara niquirijiaatijia Pueyaso cumaaca tiuquiyano cucua, na muerasu jiitariquianoni.

Jesu jatasacari shacantuucara
(Mt 17.1-13; Lc 9.28-36)

² Seis juuca nuhuaji, Jesuuri jyaconaja tuhananuucua tacaquiaari. Saaja nata quiojoquiaari Pedro, Santiago, Juannio. Jesu quishacari tuhananujiniji, na cuaqueyari tamaatiuucua jataquiaari nojori niquiara. ³ Na toqueeri shacantuquera jataquiaari, socua jyanohua cohuajara sohanatuujiniji. Nio jiyajinia toqueya jeequejonaari maja na naata jyanohua cohuajquera toque na jyatenu, taa Jesu toque jataquiaaricuaani. ⁴ Jiyacaritij, nojoriiri supuetana Elías niquitiuquiaari, supuetana Moisésjuhuaj, Jesuta pocoojyano tii. ⁵ Jiyacaritij, Pedroori Jesu sequere:

—Niishitiojonanaa, ¡canaa namitia niya quiyani! ¡Canaacua niaacuaji suhuorojoreni: quiaara, Moisésra, Elíasrani!

⁶ Jesu pueyari shiriituriquiaa. Nocuaji Pedroori naa juhuajaniya pocuariquiaa. Majaari na niishini quiriquiaa casaa na pocuariquiaani. ⁷ Jiyacaritij, jiyocuaanuji cohuaja najacaari nojoriicua rosequiaari. Cohuajari nojori mishiquioma. Cohuaja najacajiniji, Pueyasoori tojishaaree pocuaano. Naa sequequiaaritij:

—¡Niocuaaja cua Niyanniyojua, cua shuquiritasano! ¡Saaja nojuaja nia tojiri!

⁸ Jiyacaritij, nojori jaara ritia niquinijionuuquiaari na shocuaqueya, majaari quenaaja tamonu na niquitiuniu quiquiaari socua. Saaja Jesuuri tamajaaja quiriquiaa.

⁹ Nojori rosetasacariuhua tuhananuucocoji, Jesuuri nojori rootaquiaari maja nojori pohuatanuhuaa tamasa niquiaara nojori niquishano. Jesuuri nojori sequequiaari cuara noojajinia racatatuura, nojuaja jaara samitiarohuaajaatijia. ¹⁰ Cunora, tama nojorijiaarjia maninia racataquiaari noojajinia nojori niquitiushano. Maja cutaraari nojori niishituniu quiquiaari, casaara naa Jesu sequere nojorini “cua samitiiasacariuhua”. ¹¹ Cunora, nojoriiri Jesu nequesotaquiaari:

—¿Casaari Moisés Rootasanojiniji niishitiojonaa sequequiaacuaraarini, Elíasna coteenu tiuquiniutianihua Pueyaso Jiyarosocoriqianooacuaji?

¹² Jesuuri nojori riuuaree:

—Seetanujuanaacuaaquiniatejaj, Elíasri coteenu tiuquiriquiano quiquiaari, puetunu cucuaji jeenucuariquianojuanaa. ¿Niaate niishiya casaara tariucuaaanu Pueyaso Rupaa-jinia naa naajiotasaaquiaari janiyajinjini: “Pueyaso Jiyarosanoori naquiya miishaanutaninya? Pueyari na soonutanijahuaj”. ¹³ Janiyari seetanujuanaa nia sequeyani, Elíascuajaari tari niquiaari. Pueyari naquiya na miiquiaari taa nojori paniquiaaricuaani. Pueyaso Rupaajinicuaajaari naajiotasaaquiaari nojuajaari naa miishaanutanijaqij. Seetanujuanaa tari naa miishaaquiaariiri.

Jesu tohuatesacari samaru, caya samijajiniji
(Mt 17.14-21; Lc 9.37-43)

¹⁴ Na nuhuaji, Jesu jaara tacatequiaariuhua na saquirojosano pueya quishaqui, queraatia pueya niquishuhuari nojori shocua maano. Tii quitiuriquiaajaariuhua Moisés Rootasanojiniji niishitiojonaa. Nojoriiri Jesu pueyata juayonuutariquiaa. ¹⁵ Pueya jaara Jesu niquitiuquiaari, puetunu pueyajanaari nocuaji jiuujiatequiaari. Nojoriiri nocua netecuatuquiaari na saruhuanura. ¹⁶ Jesuuri na saquirojosano pueya nequesotaree:

—¿Casaajiniji nia juayonuutariquiaa cuno pojoritiani?

¹⁷ Tamonu cuno pueyajinjinioori Jesu riuuaree:

—¡Niishitiojonanaa, quiocua nitiaaree quiyannijia! ¡Samaru jiiitiaano! ¡Samaruuri na jiyatequiaari tiqiuara! ¹⁸ Tiquiyocua na quishaqui, samaruuri na pojotequiaa. Naa na cusojosacaritij, cushau jataquiaa na rupaamajiri. Na quica miaquequiaajaariuhua. Na nuhuaji, pootia maquiaari juhua macu. Quiyannuuri cunora sasacara quiyaree. ¡Socua piriuquiniutianiyari! Janiyacuajaari tari sequere quia pueyani, nojori tohuatenura cuno samaru nojuajiniji. Nojoriiri maja na naata na tohuatenu quiriquiaa.

¹⁹ Jiyacaritij, Jesuuri naa sequere:

—¡Niaaqui Pueyasoocua tiuyashijacaja! ¿Janiyatucua pueyaracaanu nia jiiitariquiani? ¿Janiyateeri pueyaracaanu nia rejeretanutanijajaanihuaj? ¡Miji nia jaatucure cuno caya samijia!

²⁰ Nocua jaatucusaareeri caya samijia. Samaru niquishacari Jesu, caya samijia miirri tاراatiaari. Caya samijiaari pojoquee Jesu niquiaara. Tii taquirioculariquiaari. Na rupaa-majiri cushaariquiaa. ²¹ Jesuuri caya samijia que nequesotaree:

—¿Taacari na coteecanu naa na quiniuria juhuacatecarani?

Na queeri Jesu riuuaree:

—Na naatujuajiniji naa quijiajuhuanajaj. ²² Na cusojuanura juucua, cuno samaruuri sequeyarucua na pojotequiaa manijinia, moojiniajuhuaj. Naaratej, ijaara quia naata quiri, canaacua quia taraajere quenaaja! ¡Canaa quia naacure!

²³ Jesuuri na sequeree:

—¿Casaara naa quia sequeree janiyani, “jaara quia naata quiri”? Cante Pueyasocua tiuetua noojiaata setanujuanaani, nera miishiyari puेतunu na panishanojuanaa.

²⁴ Jiyacaritij, caya samijia queeri nacaree:

—¡Jaa, quiocua tiuyanijia! ¡Cua naacure socua cua tiuuniuria quiocua!

²⁵ Jesu niquishacari queraatia pueya nocua rerequeejiano, ritia samaru sequereeri:

—¡Tojiyashijia, tiquia samarunaa, janiya quia sequeyani, quia tohuatate nio caya samijiajiniji! ¡Puetunu quia tohuatatejanaa! ¡Majaari socua quia tacatenuhua, nocua quia tiuquinihuara!

²⁶ Samaruuri sariyocuaquee. Caya samijia taquiriocuaterohuarihuaj. Na tohuatate sacari caya samijiajiniji, juhua macu na tiujiaqueeri. Nocuai, queraatia na niquitianaa pueyari sequequiaari:

—¡Juaj! ¡Tari cusoquee cutaratej!

²⁷ Jesuuri na juaashiquiajiniji na quiaree. Na sanareeri. Caya samijiaari juhuajaniya nujuaqueaariuhua.

²⁸ Na nuhuaji, Jesuuri tiaco tiuquitiaquiaari na pueyataja. Tamajaaja nojori quishacari tii, na saquiriojosano pueyari na nequesotaree:

—¿Casaara maja canaa naata cuno samaru tohuatenu quiriquiaani?

²⁹ Jesuuri nojori riuquaree:

—Jiyano samaruuri na naata tohuatanishaanu cutara saaja jiyanohua Pueyaso nia secojonuta nia miaqueyaquiniutia.

Jesu pohanu pacutesacariuhua nojuaja mosaanutaniya

(Mt 17.22-23; Lc 9.43-45)

³⁰ Nojori jaara quiojoquiaariuhua tiji, Galilea jiya tajimiaari. Majaari Jesu paniniu quiquiaari pueya niishiniuria tee na quiyani. ³¹ Jesuuri jiyacari saaja na saquiriojosano pueyata quiniu paniriquiaa. Jiyacari, nojori niishitiojoriquiaari. Naa nojori sequereeri:

—Janiyari pueya niquitiosaanutaniyani, nojori miiniuria janiya taa nojori panyacuajani. Nojoriiri cua monutaniya. Jiuujianaraca juucajinia, janiyari samiitianutaniuhuanu.

³² Majaari quenaaja na pueya niishiniu quiriquiaa Jesu sequesano. Nojoriiri saaja puereriquiaa maninia na nequesoreenura casaa naa na sequenu paniriquiaani.

¿Cante jyanijiajanaa cutarani?

(Mt 18.1-5; Lc 9.46-48)

³³ Nojoriiri Capernaum tiacajinia tiuquijiosee. Tari nojori quishacari tiajinia, Jesuuri nojori nequesotaree:

—¿Casaajiniji nia juayonuutariquiaa nucumajini?

³⁴ Nojoriiri saaja sanaajetaquee. Na juayonuutanujiniji niishituriquiaacuajaaari. Nucumajij, nojoriiri riutioconetariquiaa teyano nojorijinijiotote socua tojishano pueyanoni. ³⁵ Jesuuri jiyacari cajirii nojori na rootanura. Na doce pueya piiriiri. Nojori sequereeri:

—Cante socua tojishano pueyanora quiniu paniyani, nojuaja cuaara quiiria juhua serura, narta pueya na naacunura puेतunujuanaa.

³⁶ Na nuhuaji, Jesuuri mueya nujuatequiaari nojori tajinia. Cuno mueya paree nojori niquiaraari. Na pueya sequereeri:

³⁷ —Cante jiyano mueya maseja na paniniutia janiyani, nojuajaari cua maseyajaacuhuj. Cante cua maseyani, majaari saaja na masenu janiya. Jiyocuaaanu Quijia cua Jiyarona maseyajaarihuaj.

Tamonu pueyano tohuatanijosacari samaruhua Jesu cumaacata

(Mt 10.42; Lc 9.49-50)

³⁸ Tamacari, Juanri Jesu sequeree:

—¡Niishitiojonanaa, canaari tamonu pueyano niquiriini quia sesa jiyaniquiyano samaruhua na tohuatanijionura pueyajiniji! Nojuajaari maja pajaniyajinijinio. Nocuai, jcanaari na tenujureeni maja socua naa na miiniuriatej!

³⁹ Jesuuri nojori sequeree:

—¿Casaara nia tenujureeni? Pueyano jaara maninia miishano miiri cua sesa cumaacata, na nuhuaji, nojuaja maja na naata sesa pocuanu janiyajiniji. ⁴⁰ Nia niishiri, cante maja pa paracani, nojuajaari pa jiyano. ⁴¹ Nia rucuanijosacari, cante nia raateya mohuacaniyojua

na paniniutia janiyani, cua pueya nia quiniuucujuhujaj, Pueyasoori saniniuujia maninia casaa na niqutionutaniya na jiiitasanojiniji.

Puereeta quiniutianiyari sesa miijiacara
(Mt 18.6-9; Lc 17.1-2)

⁴² Nio mueyari cucua tiuujia. Cante jiyano mueya miitiri sesani, nera maara socua maninia quiri, puereetuujajau saajia jaara morotasaare na riquiajiniji, caminia queronijinia jartasocoriquiano. ⁴³⁻⁴⁴ Nio miriqui cua niishitiojosano nia tojiri: tama nia juaashiquiajaaja jaara nia jiyatere sesa miijia, nia juaashiquia nia rashiquiare juhuari niaa mariqui mani quiquiojinia jatasaaereeri, sesa miijia nia quiniuucua. Cuno mani quiquiojiniani, majaari mani maquesanu. ¿Niaateeri paniya tii nia jatasaanura caapiquiquiojuata? Jiyanhua socua maninia cutaraari niaara, juaashiquiaaju nia tiuquinishaanura Pueyaso shuriucua, pueyaracaanu shuquiriaatia nia quiniuria nata. ⁴⁵⁻⁴⁶ Naajuhujaj, nia niohuaca jaara nia jiyatere sesa miijia, nia rashiquiarenoj maja nia jatasaanura mani quiquiojinia. ¿Niaateeri paniya tii nia jatasaanura caapiquiniocuata, pueyaracaanu tii nia saniitiosaanura? Jiyanhua socua maniniaari niquiniocuata Pueyasoocua nia tiuquiniuria, pueyaracaanu nata nia quiniuria shuquiriaatia. ⁴⁷⁻⁴⁸ Naajuhujaj, nia namijia jaara sesa miitiri quia niajaninya, nia jiaterenoj. Naa nia tarinitiare sesa nia miiniu, maja nia jatasaanura caapiqui namijia pueyaracaanu mani noshishaqui. Sesa miijiaaari cuno mani quiquiojinia quejoosaanutaniya, pueyaracaanu nojori saniitiosaanura. Cuno manijinia, majaari porohua cusonuunu. Maniiri tii pueyaracaanu noshia. Majaari na maquesanu. Jiyanhua socua maniniaari nia tiuquiniuria Pueyasoocua niquiriyatujua namijia pueyaracaanu shuquiriaatia nia shootianura nojuaja.

Naa Jesu niishitiojosacari miriquitij, nojuajaari pueya niishitiojoriquiaa nojori tarinitianura jiyanhua nia miiniu panishano, cuno jaara sesa miijia jiyateriquia nojori.

⁴⁹ Jesuuri socua niishitiojorohua:

—Puetunu Pueyaso muerasujanaari saniniujiushaanutaniya juhua manitia, taa shu caquishiyacuaani na moqueyaquiniuucuaaji. ⁵⁰ Naajuhujaj, shoniiri jiyanhua maninia, shu moqueyaquiniuucuaaji. Saniniuujia, shoni jaara shaacara quiri, ¿maatucua taa tiquiri-iquia quirohua saajaniuhujaj? Maja na naata. Naajuhujaj, Pueyaso cumaaca nia jiiitare nioojiajinia, niaa mariqui najuhuaana quijia quiriiri juhua Pueyaso niishiyashijia pueya. Naajuhujaj, jiyanoojiaca nia quiri, jatiqui nia quiniuria shuquiriaatia.

10

Jesu niishitiojosano maja pueya cartenura necocua
(Mt 19.1-12; Lc 16.18)

¹ Na nuhuaji, Jesuuri Capernaum tiacajiniji quiaquiaari na saquiriojosano pueyata. Judea jiyajinia quiojijareeri, Jordán moo taquijirajuhujaj, pananu muetasamaji jiyajinia. Pueyari jati nocua rerejoquiaariuhua Jesu quishaqui. Jesuuri nojori niishitiojonu coteeree socua, taa na niishitiojoquiaari tarijiacuajani. ² Jiyacaritij, noojiaqueya Fariseocuaaari Jesuucua nijioquiaari na saniniujiunuria nojori nequesotanuta, nocuara nojori saquiriojotanura juucua. Cunora, cuno pojoriiri Jesu nequesotaree:

—¿Maninate pueyano cartenura necocua?

³ Jesuuri nojori nequesotaree saniniuujia:

—Cua sequeretoj, ¿taa Moisés sequequiaari niajanianiyani?

⁴ Cuno pueyari Jesu riucuaare:

—Moisésri pa sequequiaaricuaaja, pueyanoori na naata necocua cartenu. Neyaca cuara coteenu na niqutioora na cartetaja naajionee, necocua na cartenura. Moiséscajaari naa pa sequequiaaritij.

⁵ Jesuuri cuno pojori sequeeree:

—Moisésri naa sequequiaari niajaniyatej, pueyaracaanu cumajiuujiaaca nia quiniuucua, nia niquiuocuaacua taraajeyashijia nia quiniuucujuhujaj. ⁶ Saniniuujia, Moisésri naa naajiotaquiaari pueyajiniji:

“Pueyaso jaara puetunu casaajanaa shipiniquiaari, nojuajaari niquiriyatu caya shipiniquiaari, niquiriyatu maajinio”.

⁷ Naaratej, pueyanoori na queya tiujanutaniya necocuara na caminiuria. ⁸ Nojori jaara camitioore, nojoriiri juhua niquiriyatujua pueyanora quiqui. Naacuaajitij, nojoriiri maja juhua caapiqui pueya na quiniu tari. Saaja juhua niquiriyatujua pueyano quiyari. ⁹ Cunora, pueyano cuara necocua carteyaquiiria, Pueyaso rupuetootesano nojori quiniuucua.

¹⁰ Majaari Jesu saquiriojosano pueya niishitiuniu quiquiaari naa Jesu sequesano. Na nuhuaji, tiajinia nojori quishacariuhua, na saquiriojosano pueyari Jesu nequesotaquiaari casaa na sequenu paniriqiaaa naani. ¹¹ Jesuuri nojori sequereer:

—Cante necocua carteya tamonu maajitia na caminiuriani, cuno pueyanoori jiyanoehua sesa miya coteenu necocua. Pueyasora, naa na miishacaritij, nojuajaari juhua narta pueyano niquiocuata quijia. ¹² Naajuhuaaj, maaji jaara cartere neyaca tamonuta na caminiuria, cuno maajiiri sesa miya Pueyaso niquiarajuhuaaj.

Jesu niasacari na juaashiquia naatujooriicua

(Mt 19.13-15; Lc 18.15-17)

¹³ Na nuhuaji, Jesuucua jaatucunuusaquiaariiri naatujoori, Jesu nianura na juaashiquia nojori nacaacua. Na saquiriojosano pueyari naatujoori jaatucunaa tenujuriqiaaa saaja. ¹⁴ Jesu jaara na niquiquiaari, juaaquiiri. Nojori sequereeri:

—¡Nia tarinitiare naatujoori cuara niiria cucua! ¡Maja na tenujuna! Canapuate Pueyaso muerasura quiniu paniani, nojori cuara juhua nio naatujooriria jataara. ¹⁵ Seetanujuanaa nia sequeyanijia, Pueyasocua nia tiuuri seetanujuanaa, taa naatujoori tiuya cucuacuaani na taacanuyaquiniutia. Saaja naacuajiti niaari Pueyaso pueyara jiyatesaanutaniya cutara, pueyaracaanu Pueyaso jiiitasano nia quiniuria.

¹⁶ Jesuuri jiyacari cuno naatujooriniyojua pooree. Nojori nacaacua niojoree na juaashiquiaari Pueyaso na secojonuta, Pueyaso miiniuria maninia nojori.

Jiyanoehua casamiriaca mashaja pocoojosacari Jesuta

(Mt 19.16-30; Lc 18.18-30)

¹⁷ Quera Jesu quianu panishacari quiniquiji, nocua netequiaariiri tamonu pueyano. Jesu cariquimijai mojoquetaseeri. Na nequesotareeri:

—Maninia niishitiojonanaa, ¿taa cua miiniutianiyani, seetanujuanaa Pueyaso pueyanora cua quiniuriani?

¹⁸ Jesuuri na sequereer:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuanaa maninia. ¹⁹ Quiaacuajaari Pueyaso niishitiojosano niishiya. Moisésuajaari naa na naajotaquiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucuaa tonujunu sapojonuta. Maja cuaracashijionu. Quia queya tojjia quia quiriqia”.

²⁰ Pueyanoori Jesu riuucaree:

—Niishitiojonanaa, janiyacuaajaari puetunu cuno rootasanojuanaa tojjia pueyaracaanu cua naatujuajinjini.

²¹ Jesuuri na paniniutia na niquirii. Na sequereeri:

—Juhanojuaja niquiriyatu casaari quiyajaa quia miishoo. Quia quiaarohua. Puetunu quia casamijianaa quia niquitiojocoo. Na nuhuaji, casamijiuniucua nareja quia niq-uitiore quia masesano cumaneeca quia casami sami. Naacuajitij, quiaari quia casami jiiitanutaniya jiyocuacaanu Pueyaso shuriucua. Na nuhuaji cutara, quiocua nimiohua cua nuhuajiriquiano.

²² Cuno pueyano jaara tojjiquiaari naa Jesu sequesantej, jiyanoehua taraajequeeri. Na taraajenuta quiacuhua na tiajiniaari. Nojuajaari jiyanoehua casamiriaca pueyano quiquiaari. ²³ Na nuhuaji, Jesuuri na shocuaqueya niqiniijoree. Na saquiriojosano pueya sequereeri:

—¡Jiyanoehua jiyajeneta cutaraari casamiriaca pueyano quiniuria Pueyaso pueyanora!

²⁴ Na saquiriojosano pueyari shiriiquitiuquiaari naa na sequesacaritij. Na nuhuaji, Jesuuri nojori sequenu pacutequiaari:

—Sanajooriniaa, seetanujuanaa nia sequeyanijia. Jiyanoehua jiyajenetaari casamiriaca pueyano quiniuria Pueyaso pueyanora. ²⁵ Taa camello maja na naata cusupuetaja cuhuoco tamajiria tajiniucuaani, naajuhuaaj, casamiriaca pueyanoori maja na naata tama na cuaqueyajaaja jiyatenu Pueyaso pueyano na quiniuria.

²⁶ Na saquiriojosano pueya jaara na tojtiaquiaari, nojoriiri socua jiyanoehua jiuuji-ateer. Naaratej, tama nojorijiaarijia nequesoreetooquiaari:

—¿Canteeri Pueyaso pueyanora jiyatesaanutaniya socuanitioj?

²⁷ Jesuuri nojori niquirii. Naa sequereeri:

—Pueyano maja na naata tamajaaja Pueyaso pueyanora quiniu. Pueyaso cutaraari na naata na jiyatenu na muerasura. Pueyasora, maja jiyajeneta casaa quiniu.

²⁸ Pedroori Jesu sequereer:

—Jiyaniijianaa, canaari puetunu canaa jiiitasanojuanaa tiujiaquiaarini quia pueya canaa quiniuria.

²⁹⁻³⁰ Jesuuri nojori riuquaree:

—Seetanujuanaa nia sequeyanijia, shuquiriaatia quijia quiniutianiya cutaraari noo pueyano cante na jiišanaso tiujajaja cua tojjia na quiniuucuan, janiyajiniji pohuatana na quiniuucujuhuj. Cante na tia tiujajani, tapueyocuaca, na rimiatuhua, na queya, necohua, na cuhuariquiano, nojuajaari maninia miishaanutianiya quiarijia mijiria na quishacarijia. Nojuajaari socua jiyanhua queraatia niquitiosaanutanihua na tiujiasanojiniji. Niquitiosaanutaniyari tiaca, tapueyocuaca, na rimiatuhua, na nucua, necohua, cuhuariquiano. Naajuhuj, naquiya miishano quiniutianiyari cua tojjia na quiniuucua. Naajaa, na nuhuaji, pueyaracaanu Pueyasota shuquiriaatia quiniutianiyari quiarinio jiyajinia. ³¹ Saniniuujia, queraatia tojjishano pueyari najuhua quijia quiniutianiya Pueyasora, nojori tojijaquiniuucua nojuaja. Saniniuujia, Pueyaso ruuretajacara, queraatia Pueyaso pueyari quiarijia juhua najuhua quijia niquishano quiquiaa. Naajaa, nojoriiri na nuhuaji seetanujuanaa juhua jiyaniijianucua quiniutianiya Pueyasora, na tojtijajaca nojori quiniuucua.

Jesu pacutesacariuhua pohuatanu nojuaja mosaanutianiya
(Mt 20.17-19; Lc 18.31-34)

³² Jerusalén tiacajiniara nucuamaji nojori quiasacari, Jesuuri na saquirojosano pueya puetariquiaa. Nojoriiri na nuhuaji sacuariquiaa na puerenuta. Socua pueyari na nuhuajitiuriquiaa nojori puerenutajuhuj. Nuu cajiniocua, Jesuuri na doce saquirojosano pueya jaatiree tamocora tamajaaja. Tii nojori sequeriquaari taa nojuaja miishaanutaniyani, nojori tiuquishacari Jerusalén tiacajinia.

³³ Nojori sequereeri:

—Niaacuajaari niishiya, paa tari Jerusalén tiacajinia quiaani, tee cuniqui Pueyaso Niyanu niquitiosaanutianiya pueyacuara secojona jiyaniijianucuan, Moisés Rootasanojiniji niishitiojonaanio. Cuno pojoriiri cucuara tonujunutaniya jiyaniijianucua na saponuta, cua mosaanura. Janiyari taucua niquitiosaanutaniyani. Janiyari jiyanhua naquiya miishaanutaniyani. ³⁴ Nojoriiri cua rerequetenutaniya. Cua riocojotunutaniyani. Cua piquitiuniutianijaariuhuj. Naa cua miishaanu nuhuajitij, nojoriiri socua cua monutaniya. Naajaa, jiuujianaraca juucajinia, janiyari seetanujuanaa samiitianutaniuhuan.

Santiago, tarajanu Juanta, nojori sequesacari Jesu, maninia nojori na miiniuria
(Mt 20.20-28)

³⁵ Na nuhuaji, Santiagoori, tarajanu Juanta Jesuucua catecanoquiaari. Nojoriiri Zebedeo niqiohua quiquiaari. Jesu sequetuseeri:

—Niishitiojonanaa, canaara quia miiri canaa masenu panishano quiajaniya.

³⁶ Jesuuri nojori nequesotaree:

—¿Casaa nia paniya cua miiniuria niaarani?

³⁷ Nojoriiri Jesu riuquaree:

—Pueyaso jaara quia jiyatere pueya jiyaniijia, quiocua canaa cajitijiore quia shuricua, tamonu quia miaquetajara, tamonu quia muenecara, quia naacuna canaa quiniuria.

³⁸ Jesuuri nojori sequereeri:

—Majaari nia niishiniu nia masesano. ¿Nia naatateeri rejeretanu naquiya miiniu taa cua miishaanutaniyacuaani? Naquiya cua miiniuuri jiyanhua noonu quiniutianiya juhua pueyano jaara mani noshiyanojinia tiuquinishaare.

³⁹ Nojoriiri na riuquaree:

—Taaquiririnij, canaa naatacuaaquinateja naquiya miiniu rejeretanu juhua quiajaniya.

Jesuuri nojori sequereeri:

—Seetanujuanaa, niaari na nuhuaji cua ratuquianojuhuaj. Niaari juhua manijinia tiuquinishaariquianojuhuaj, taa cua tiuquinishaanutaniyacuaani.

Jesuuri naa nojori sequeriquiaa miriqui, taa jiyanhua naquiya na miishaanutaniyani, na cusosacari pueyacuara. Jesuuri naa nojori sequereeri socuatej:

⁴⁰—Maja cutara cua naata niqutiono niajaniya nia masesano, cua cajitiniuria niajaniya cua miaquetajara, cua muenecarano. Cunoori noo pojori niquitiosaanutaniya cutara, canra tari na jeenucuasaaquiaricujani.

⁴¹ Narta saquirojosano pueya jaara tojiquiaari nojori masesano Jesu juucua, nojoriiri juaaquiocuaari. ⁴² Jesuuri nojori piiri. Nojori sequereeri:

—Niaacuajaari niishiya, mijiria jiya jiyaniijianucuaari na pueya jiiitiquiaa juhua na seya, tama nojori panishano na miiniurajaaja nojoritia. Naajuhuj, pueya jiyaniijianucuaari na jiišanaso pueyacuara paaretaquiaa na cumaaca, tojjishano pueya nojori quiniuria. ⁴³ Nijaniya saniniuujia, majaari naa nia quiniu quiniutianiya. Cante tojjishano pueyanora

quiniu paniya niajanijajininioni, cuno cuara jiyateera tama na cuaqueyajaaja juhua narta Pueyaso pueya serura na quiniuria. ⁴⁴ Cante nia jiyaniijia quiniu paniyani, nojuaja cuara quiriia narta Pueyaso muerasu cumaquinia. ⁴⁵ Janiyajuhuj, majaari mijiria cua niniu quiquiaari pueya cua poonijiotenura quiria, tama cua cuaqueya cua shuquiritiniurijaaja. Janiya cutaraari niqiaarini pueya cua naacutanura, tama janiyajaaja mosaanura pueya niti, queraatia pueyacuaji cua ritianura Sesaaca.

Jesu jeeacasacari Bartimeo namijia
(Mt 20.29-34; Lc 18.35-43)

⁴⁶ Nojoriiri jiyacari tiuquiiioquiaari Jericó tiacajinia. Jesuuri cuno tiacajiniji quiariquiaa na saquiriojosano pueyata. Queraatia pueyari nata quiariquiaajuhuj. Jiyacaritij, tamonu cariyajuaru pueyanoori tii cajiriqiaa nuu shuucua. Na sesa quiquiaari Bartimeo, Timeo niyanu. Nojuajaari cumaneeca mashiniquijiona quiquiaari, cariyajuaru na quiniucua. Nojuajaari maja na naata poonijionu quijia tamajaaja. ⁴⁷ Nojuaja jaara tojiquiaari cuno tajiyano pueyano quiquiaari Jesu, Nazaret tiacajininio, nojuajaari naa nacanuu coteeree:

—¡Jesunaa, Pueyaso Jiyarosanonaa, cucua quenaaja quia taraajereja!

⁴⁸ Queraatia pueyari na tenujiriqiaa na sanaajanura juucua. Saaja socua nacaree jiyanohuari:

—¡Pueyaso Jiyarosanonaa, cucua quia taraajere!

⁴⁹ Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariyajuaruuri naa sequesaree:

—¡Quia sanere! ¡Quia shuquiriri! ¡Quia sequeyacuaja! ¡Nocua quia canujiyare!

⁵⁰ Naa na tojishacaritij, cariyajuaruuri na tucuaque toque jataquee. Ritia jaaqueeri Jesuucua na catecanonura. ⁵¹ Jesuuri na nequesotaree:

—¿Casa quia paniya cua miinuria quiajaniani?

Cariyajuaruuri na riucaaree:

—¡Niishitiojonanaa, niquijiaa quiniu paniuhanijia! ¡Cua namijia quia jeecarohua quiria!

⁵² Jesuuri na sequeree:

—Quia quiaarohua. Quia namijiaacuaja tari jeequerohua cucua quia tiuuniucua.

Jiyacaritij, cariyajuaruuri tari na naata niquiniu quiriqiaa. Nucuaco Jesu nuhuajiyareeri.

11

Jesu tiuquishacari Jerusalén tiacajinia
(Mt 21.1-11; Lc 19.28-40; Jn 12.12-19)

¹ Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquiiiojosee Olivo cuhuariquia tuhuananuucua. Cunoori Betfagé tiaca shuriucua, Betania tiaca shuriucuanio. Jesuuri caapiqui na saquiriojosano pueya jiyaroree tiji. ² Nojori sequereeri:

—Cuno tiacajinia nia quiaare, pa taccoji niquishiyani. Niaa jaara tiuquishii tii, niaari burro riuriatutaniani morotasano, pueyano cajishoojua na nijinia. Niaa jaara niquishiiinjioj, niocua na samaacartasee. Niocua na jaatucumohua miji. ³ Pueya jaara naa nequesotare niajanija: “¿Casa nia samaacartaanoj?”, niocua na sequere: “Jiyaniijia na paniya rupaquijia. Ritia na niqutionutanihuacuaja”.

⁴ Nojoriiri quiojoquiaari. Burro riuriatuseeri morotasano nuujinia, tamonu tia tohuateya shuriucua. Nojoriiri na samaacartasee.

⁵ Tamasaca tii quiniaari nojori sequereeri:

—¿Casa nia miyani? ¿Casa nia samaacartaa cuno burroni?

⁶ Nojoriiri na riucaquiaari taa Jesu rootaquiaari nojoricuajani. Naaratej, cuno pueyari nojoriria na tarinitiaquiaari. ⁷ Na nuhuaji, Jesuucua jaatucutumohua cuno burroori. Pueyari na toqueya niojoquiaari burro nijinia, Jesu cajijia. Na nuhuaji, Jesuuri nocua cajirii. ⁸ Queraatia pueyari na toqueya muevoquiaari nucuaco, Jesuucua nojori maniniushi-tiniuria nuu. Tamasacaari jaamasucua piyotaguaiaari cuhuariquiacajiniji, Jesuucua nojori niojotasocoriquiano na nucuacohujua. ⁹ Jesu puetanaa, mariyata na nuhuaji nijionaari jiyanoohua nacojonu coteequiaari nojori shuquiriniutia. Naa sequeturiquiaari:

—¡Pa shuquiritiare pa Jiyaniijia Pueyaso! ¡Jiyanoohua maniniacuaja pa Jiyaniijia, cuno, Pueyaso cumaacata tiuquiyani! ¹⁰ ¡Pueyaso cuara na jiyateera maninia Jiyaniijia na quiniuria pajaniyara! ¡Nojuajaari pa supuetanaa jiyaniijia David niti pa jitianutaniani maninia cutara! ¡Jiyocuaanu Quijia pa Pueyasocuaajari pa shuquiritiasano!

¹¹ Jesuuri naa tiuquiquiaari Jerusalén tiacajiniatej. Pueyaso Secojojua tiajinia tiuquishi-iri. Na niqiniujionu nuhuaji puetunu casaajanaa, Betania tiacajiniara quiaquiaari ritiaari na doce saquiriojosano pueyata. Jiyacaritij, tari tenacariiri quiriquiaa.

Jesu sesacasacari jajauju higo naana
(Mt 21.18-19)

¹² Tariqui, nojori quiojosacari Betania tiacajiniji, Jesuuri miaajeriquiaa. ¹³ Tucuacaanuji niqiriri higo naanaari queraatia jaamasucuaraca. Nocua canujiyareeri na niqiniuria seetanujuanaa jajauracate quiriquiaa. Saaja queraatia jaamasucuaari quiriquiaa. Maja higo muetusacari quiquiaari jiyacari. ¹⁴ Jesuuri naa sesacaree higo naana:

—Maja quiocuaji socua quia jajau miasaanu quiniutianiya.

Na saquiriojosano pueyari na tojtitariquiaa naa na sequesacaritij.

Jesu jaacasacari seya niqutiojonaa Pueyaso Secojojua tiajiniji
(Mt 21.12-17; Lc 19.45-48; Jn 2.13-22)

¹⁵ Nojori jaara tiuquiiioquiaari Jerusalén tiacajinia, Jesuuri tiuquiquiaari Pueyaso Secojojua tiajinia. Tiji pueya tohuatanijionu coteereeri, cuno pojori, canapete Pueya-soocuara puecosocoriquiano seya niqutiojoriquiaa cumaneecaracuajani. Na masejonaa tohuatanijioreejaarihuaj. Cumaneeca tacatojojuaa juhuacutucua caponeetareeri, tee pueya tacatojoriquiaa taucuaa cumaneecacuajani, Pueyaso Secojojua tiajinia niqutiojocoriquiano cumaneecaracuajani. Naajuhuaaj, Jesuuri mococoonu niqutiojonaa caji-tiucua caponeetaree. ¹⁶ Naajuhuaaj, majaari na shanacunu quiquiaari pueya niyacunura najuhuaana Pueyaso Secojojua tia, na nitiotasano casamitia. ¹⁷ Na nuhuaji, pueya niqiuara niishitiojonu coteereeri. Naa sequereeri:

—Tariucuacaanu Pueyaso Rupajinia naa naajiotasanocujajaari quiya:

“Cua tia sesaari quiniutianiya, Pueyaso Secojojua tia. Puetunu jiyacajiniujionu pueya seconuujuara quiniutianiya”.

Niaari saniniuujia na jiyatequiaari nohuasenuujuaca quiquiora.

¹⁸ Pueyacuara seconaa jiyaniujanucua, mariyata Moisés Rootasanojiniji niishitiojonaari niishiquaari naa Jesu miishanojiniji. Cunora, nojoriiri rooootoquiaari taa na motunutianiya Jesuni. Saniniuujia, puetunu pueyajanaari jiuujateriquiaa Jesu niishitiojosano nojori tojishacari. Cunora, Judiocuaca jiyaniujanucuaari Jesu puereturiquiaa, puetunu pueyajanaa tojishacari na niishitiojosano. ¹⁹ Jaara niniquiaari, Jesuuri Jerusalén tiacajiniji quiacuhua na saquiriojosano pueyata.

Higo naana sorenojiniji pahuatasano
(Mt 21.20-22)

²⁰ Tariquicuaji, nojori shocosacari higo naana, na niqutiuquiaariiri tariucua soreno, puetunu na nujuacatajanaa. ²¹ Pedroori jiyacari Jesu sequesano niishiquii. Jesu sequereeri:

—Niishitiojonanaa, ¡quia niqiri! ¡quia sesacasano higo naanaqui tari soreree!

²² Jesuuri nojori riucaree:

—Pueyasocua nia tiuuri. ²³ Seetanujuanaa nia sequedianija, niaa jaara Pueyasocua tiuuriquia nia taacanuyaquiniutia, nia naata nio tuhuananu sequenu: “Shiiquia niiquiji. Quia jaataare shoniacu caminajinia”. Niaa jaara naa sequere seetanujuanaa Pueyasocua nia tiuuniutia, niaari nia sequesano niqiniutianiya. Naacuajitij, Pueyasocua nia taacanuyaquishacari, nia sequesanoquajaari tohuateenutianiya taa nia sequereecua-jani. ²⁴ Janiyari cunora nia sequeyani, puetunujuanaa nia masesano nia secojosacari Pueyasoni, nia niishiri niaa na jütiaa tari. Na nuhuaji, niaari seetanujuanaa na masenutianiya. ²⁵ Naa secojosacari, niaa jaara niishiquii niaa sesa quia tamonu pueyanota, sesa na miiniuucua nijaniya, nojuaja nia jiyanoori. Naacuajitij, jiyocuaaanu Quijia nia Queeri nia jiyanooniutianiya sesa nia miishanojinijijuhuaaj. ²⁶ Naa jaara jiyanooyashijia quiriquia, jiyocuaaanu Quinia nia Queeri nia jiyanoyaquiniutianiya, sesa nia miishanojinijijuhuaaj.

Pueya nequesotasacari Jesu, cante na jiyaronani
(Mt 21.23-27; Lc 20.1-8)

²⁷ Na nuhuaji, nojoriiri quiaquiaarihuua Jerusalén tiacajinihua. Jesu rucanejosacari Pueyaso Secojojua tiajinia, nocua catecanoquiaariiri pueyacuara seconaa jiyaniujanucua, Moisés Rootasanojiniji niishitiojonaaajuhuaaj, narta Judiocuaca camarucuanio.

²⁸ Nojoriiri Jesu nequesotaree:

—¿Cante quia sequecanu naa quia miiniuriani? ¿Cante quia jiyatecanu Pueyaso Secojojua tia jiyaniija quia quiniuriani?

²⁹ Jesuuri nojori riucaree:

—Janiya nia nequesotanutaniya saniniunijia. Niaa jaara cua nequesotasano riucaure coteenucuaa, janiyari nia sequenutaniyajuhaaj cante cua jiyaroquiaari naa cua miiniuriani. ³⁰ Cua riucauaretoj, ¿cante Tiuquinijiona Juan jiyaroquiaari pueya na tiuquinijionura moojiniani? ¿Narejaca pueyatee, Pueyaso soj? Cua riucaature.

³¹ Jiyacaritij, cuno pueyari jiyasohuaja tama juayonuutano coteequiaarijiaaja. Naa sequetooquiaariiri:

—Paa jaara na sequereni Pueyaso na jiyaroquiaari, pa riucaurucua: “¿Casaara nocua nia tiuyaquiuanucuararini?” ³² ¿Paatucua taa sequereeri, nojuaja nareja pueya jiyarosano quiquiaari?

Cuno pojoriiri narta Israel pueya puereturiquiaa sequenura, Tiuquinijiona Juanri nareja pueya jiyarosano quiquiaari. Nojoricuajaari niishiriquiaa puetunu pueyajanaari niishiquiaari Tiuquinijiona Juanri seetanujuanaa Pueyaso sequesano caminiujunia quiquiaari. Cunora, nojoriiri Tiuquinijiona Juan rerequetenu pueretuquiaari, pueya quishacari tii. ³³ Naacuajitij, maja na naata na riucautunu quishacari, Jesu sequetureeri:

—Maja canaa niishiniu.

Jesuuri nojori sequereeri:

—Janiyajuhaaj, maja cua sequenu quiniutianiya niajaniya, cante cua jiyaroquiaari naa cua miiniuriani.

12

Miriqui pohuatasano sesa miijiaca poonijionaaajiniji
(Mt 21.33-46; Lc 20.9-19)

¹ Jiyacaritij, Jesuuri miriqui pohuatanu coteequiaari cuno pojori niquiara. Cuno camarucua sequereeri:

—Tamonu pueyanoori cuhuariquiaajinia uva natoouquiaari. Na nuhuaji, na shuriuquioco matacoreeri. Naajuhuaaj, saajia quejaquiaariiri uva rapijiojuara, na caaca reratesaanura. Jiyaconajara tiareejaariuhuaaj, tiji na cuhuariquia na cojuajara nohuasejojuaacuaji.

² Na nuhuaji, tamasaca poonijionaa pueya na niquitioreeri nojori cojuasocoriquiano nera. Naacuajitij, uva carojotasacari, nojoriiri nojuaja niquitionutaniya tijijihuaaj, na camarujuanaa na quiniucua. Na nuhuaji, nojuajaari tucuaaanu quiaquiaari, tii marijia na shocotejonura. ³ Jaara tari quiquiaari uva carojotasacari, saniya cuhuariquia camarujuanaari na seru jiyaroquiaari cuhuariquia cojuanaa pueyacua. Na jiyaroquiaariiri cuhuariquia cojuanaa niquitionura nojori carojotasanojiniji, taa na camarujuanaa pocoojoquiaaricuaa nojorita tarijiani. ⁴ Cuhuariquia cojuanaa pueyari saaja jiyarosano seru quiaturee. Na piquitiuriiri. Na nuhuaji, juhuasu na jiyaroturohua na camarnuucuaari. ⁵ Na camaruuri socua jiyaroquiaari tamonu na seru. Cuno seruuri jacusaaree saitia. Na nacaari surtasaree saajiata jasano. Na sesacatureejaariuhuaaj. ⁶ Na camaruuri socua jiyaroquiaari tamonu na seru. Cuno na seru cutaraari mosaaciaari. Na nuhuaji, socua jiyaramiquiquiaari queraatia na seyari. Puetunu nojorijinijiniojuanaani, tamasacaari piquishaaquiaari. Tamasacaari puecoosaaquiaari cutara.

⁷ Cuhuariquia camaruuri saaja niquiriyatujua nianunioyuaa jiiitiquiaari, jiyanohua na panishano. Cunora, nojuajaari socua cuno neyanunioyuaa jiyaroquiaari. Na queeri tama sequequiaarijiaaja: “Cuno pueya jaara niquiri cua niyanu, nojoriiri na tojiniutianiya cutara”. ⁸ Cuno cuhuariquiaajinia poonijionaa niquishacari nojori camarnu niyanu nojoricua niyanu, nojoriiri saaja tamajaaja niishitiojotooquiaari:

—¡Nioori pa camarnu niyanu! Nio cuhuariquiaari tama nerajaaja quiniutianiya, na que jaara cusoyare. ¡Pa morej! ¡Pocua nio cuhuariquia camaruhuaa quiqui tamajaajani!

⁹ Cunora, na quiatureeri. Na motureeri. Na motunu nuhuaji, nojoriiri macu jataree cuhuariquiaajiniji tamama.

¹⁰ Jiyacaritij, Jesuuri cuno pojori nequesotaree:

—¿Taa cuhuariquia camaru miiniutianiya socuani? Nia sequereera pueyanaa. Nojuajaari cuhuariquia cojuanaa puecoonutaniya. Na nuhuaji, tamasaca pueya niquitionutaniya cuno cuhuariquiaari, nera nojori cojuanura.

¹¹ ¿Majateeri tariucuaaanu Pueyaso Rupaajinia nia serojonu quiquianucuaaja nio? Naa sequeyari:

“Tiajonaa pueyari tamaatiujiajau saajia jataree nojori tiasacari saijiniji tia. Na nuhuaji, cuno jatasano saajiaari socua cutara saajiaara jiyatesaaroehua tamasaca saijiniji.

¹² Cunoori pa jiyaniijia miishano. Pajaniyara, na miishanoori jiyanohua maninia. Nocuaji jiuujatesano”.

¹³ Jiyacaritij, cuno judiocuaca camarucuaari niishiricuaja miriqui Jesu pohuatasanoori tama nojorijinijiaaja quiriquiaa. Naaratej, nojoriiri Jesu quiatunu panirij juucua, nojori nujuatesocoriquiano. Nojoriiri pueya puereturiquiaa saaja, naa nojori miiniuria Jesutej.

Naacuajitij, nojoriiri nareja quiojoquiaariuhua. Naa Jesu pohuatasacari miriqui cuno saajiajinijitij, nojuajaari tama na cuaqueyajinijiaaja pohuatariquiaa.

Jiya jiyaniijia cuaara pueyaracaanu niquitiosaaria na sequesano cumaneeca
(Mt 22.15-22; Lc 20.26-32)

¹³ Na nuhuaji, Jesuucua jiyaramiquishaaquiaariiri noojiaqueya Fariseocuacajinijinio, Herodes panijiaa pueyajinijiniojuhuaj. Cuno pojoriiri Jesu pocuatenu paniquiaari sesa juucua, jiyaniijia nojori saquiriojotanura nocuara. ¹⁴ Naaratej, cuno pojoriiri Jesuucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojiyashijia. Quiaari seetanujuanaa sequeja. Majaari rimiajata quia niquniu pueyajuhua. Majaari pueya naata sapojonu quiajaniya. Quiaari seetanujuanaa pueya jiuujia niquijia. Quiaa cutaraari seetanujuanaa Pueyasojiniji niishitiojua, taate pa naata maninia quiniu Pueyaso niquiarani. Naaratej, canaa quia sequere, ¿maniniate pa niquitiojonura pa cumaneecajiniji jiyaniijia Césarra, taa cuno tahue sequequiaari pajaniyacujani? ¿Taa quia sequeyani, niquitiojoshiyatee, maja soj?

¹⁵ Jesuuri ritia niishiqui, naa nojori nequesotasacari nojuajatej, cuno pojoriiri na saniniujiuriquiaa sesa na pohuatenura najuhanaj. Naaratej, Jesuuri nojori sequere:

—¿Casaara nia saniniujiya janiyani? Miji nia riri cumanee cua niquishocoriqiano.

¹⁶ Nera rishaareeri cumanee. Jaara na niqiquiaari, Jesuuri nojori nequesotaree:

—¿Cana naaquiti nocuani? ¿Cana sesateeri nocua naajiotasanojanihuaj?

Nojoriiri na riucuaaree:

—Jiyaniijia César naaquicuaaja, na sesajuhua.

¹⁷ Jesuuri jiyacari nojori sequere:

—Jaara tama César casaajaaja quiri, tama na casaajaaja nia niquitiore na camaru. Saniniujujia, Pueyaso nia niquitiore nerano tama na casaajaaja.

Jesu jaara naa nojori riucuaquiaaritij, nojoriiri jiyanojua jiuujiatequiaari.

¿Macunucuate samiitiaconutaniuhua?
(Mt 22.23-33; Lc 20.27-40)

¹⁸ Fariseocuaca nuhuaji, noojiaqueya Saduceocuacajinijinioori Jesuucua nijioquiaari. Saduceocuacaari jiyaniya macunucua maja na samiitiaconu quiniutianihua. Naaratej, nojoriiri Jesu nequesotasee nojori niishiniuria taa na sequenutaniya macunucujinijini. Na sequetuseeri:

¹⁹ —Niishitiojonanaa, supuetana Moiséscaajaari pa rootaa na naajioneejinia, pueyano jaara cusoyare mueyaju, tarajanu cuaara camiriia mashiquio, mueya na mueratenura tarajanu niti. ²⁰ Tarijia, tamonu pueyanoori niya quiquiaari. Siete niqiuohuaraca quiquiaariiri, saa canuujuu. Jiyapueranuuri camiquiaari. Na nuhuaji, shaajequiaariiri muetuhuojuu. ²¹ Naaratej, na nuhuajishanaari tarajanu mashiquio camiquiaari. Nojuajaari muetuhuojuu cusoquiaarijuhuaj. Naajuhua, jiyareta na nuhuajishanaari na camiquiaari. Nojuajaari juhua tapueyocuaca cusoquiaari mueyajuhua. ²² Cuno siete canuuri naa camiyocuaari cuno maaji. Puetunu nojorijianaari cusonuuquiaari. Majaari quenaaja niquiriyatujua mueya nojori mueratenu quiquiaari. Na nuhuaji, cuno maajiiri cusoquiaarijuhuaj. ²³ Naacuajitij, macunucua jaara samiitacorohua, ¿teyano cuno siete neyacaajinijiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

²⁴ Jesuuri nojori riucuaaree:

—Niaari jiyanojua jiyajeneya Pueyaso Rupaajinia naajiotasano nia niishiyaquishacari, Pueyaso cumaacanio. ²⁵ Macunucua samiitacosacariuhua, majaari canuu camiyonu quiniutianiya maaji. Naajuhua, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuaaanu quijiaa Pueyaso seya, maja camiyosano. ²⁶ Naa macunucua samiitianijionujiniji nequesoree-taate. ¿Majateeri nia serojonu quiquiaacuaaja supuetana Moisés naajioneejinia, taa Pueyaso sequequiaari Moiséscaaja nequeru casaja noshiyanojinijini? Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiajuhuaj, quia supuetana Jacobo Jiyaniijiano”.

²⁷ Naacuajitij, paari niishiyani Pueyaso pueya shaajeconoori saminiucua quia Pueyasoora cutara. Pueyasoori maja macunucua jiyaniijia, saaja saminiucua pueya jiyaniijia cutaraari. Janiyari cunora nia sequeyani, niaari jiyanojua jiyajeneya nia niishiyaquiniucua Pueyaso Rupa.

Puetunu Pueyaso Rootasanojinijijianaani, teyanote socua pa tojishocoriquianoni
(Mt 22.34-40)

²⁸ Tamonu pueyanoori Jesu tojiriquiaa Saduceocuaca riuhaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuacaanu Pueyaso Rootasanojinijiniote socua pa tojishocoriquianoni?

²⁹ Jesuuri na riucaaree:

—Pueyaso sequesano socua na pueya tojishocoriquianoori nio: “Nia tojitiare Israel pueyanaa, pa Jiyaniijia Pueyasoni, nojuacuajaari pa Jiyaniijijanaa. Majaari tamonu quiniu socua. ³⁰ Nia Jiyaniijia Pueyaso nia paniri puetunu niojiatajanaa, puetunu nia sohanutajanaa, puetunujuanaa nia niishitijata, puetunu nia cumaacatajanaanio”. Nio rootasanoori socua pa tojishocoriquiano puetunu Pueyaso rootasanojinijijianaa. ³¹ Socua tarajanu na rootasano pa tojishocoriquianoori quera juhua coteenu na rootasanojuhuaj. Naa sequeyari: “Quiarta pueyano quia paniri taa quia paniyacuaa tama quia cuaqueyajaajani”. Puetunu Pueyaso rootasanojinijijianaani, majaari socua tamonu rootasano quiniu socua tojishocoriquiano nio caapiqui na rootasanojiniji.

³² Jiyacaritij, cuno Moisés Rootasanojiniji niishitiojonaari na sequeree:

—Quiaacuaja maninia sequeree, niishitiojonanaa. Seetanujuanaari quia sequesano: quiyacuaaquiniateja niquiriyatujua Pueyaso. Majaari socua tamonu quiniu juhua nojuaja. ³³ Seetanujuanaa jiyano hua maninia cutaraari Pueyaso pa paniniuria puetunu poojiatajanaa, puetunujuanaa pa niishitijata, puetunu pa sohanutajanaa, puetunujuanaa pa cumaacatanio. Naajuhua, jiyano hua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojiijaca quirini, cunoori jiyano hua socua maninia Pueyasora, puetunu seya catijiasanojinijijianaa nocuara, mariyata puetunu pueya niqutijosano na casamijiniijijianaa nera.

³⁴ Jesu jaara tojiquiaari naa cuno pueyano riuucasano maniniatej, na sequereeri:

—Quiaaqui quera Pueyaso pueyanora quiya.

Na nuhuaji, majaari socua pueya nequesoreetanu paniniu quiri quiaa Jesu.

¿Canaacuajinio supuenote Cristoni?
(Mt 22.41-46; Lc 20.41-44)

³⁵ Jesuuri Pueyaso Secojoua tiajinia niishitiojoriquiaa pueya. Jiyacaritij, nojuajaari na tojtianaa pueya nequesotaree:

—¿Casaara Moisés Rootasanojiniji niishitiojonaa sequequiaacuaraarini: “Cristonaari supuetana David niqiuoacuajinio supuenutaniya”? ³⁶ Pueyaso Sohanu pohuatesacari supuetana David, nojuacuajaari sequequiaari:

“Jiyaniijia Pueyasoori cua Jiyaniijia Cristo sequeree: ‘Quia cajirijiaara cua miaquetajara, janiya cuara quia paraa shocojotare quicuajijiaatijia, Jiyaniijijanaa quia quiniuria pueyaracaanu cutara’”.

³⁷ Supuetana David jiyaniijiacasacari Cristo, ¿Cristotucua taa supuetana David niqiuoacuajinio supueno quirini? Davidcuajaari na jiyaniquiya “cua Jiyaniijiaata”.

Queraatia pueyari shanohua tojitiariquiaa Jesu pohuatasano.

Jesu sequesano Moisés Rootasano niishitiojonaajiniji
(Mt 23.1-36; Lc 11.37-54; 20.45-47)

³⁸ Jesuuri nojori na niishitiojosacari sequeriquiaa:

—Tama nia cuaqueyajaaja nia cojuare Moisés Rootasano niishitiojonaacuaji. Cuno pojoriiri puera tucuaque toque cushiyonu maniniucuaja nojori rucuanajotajara, pueya shootianura nojori. Nojoriiri timiquiaa pueya saruhuatasacari nojori, nojori quishacari tiaca jiuujajinia curotasano cajitiucuajinia. ³⁹ Nojori jaara masuusaare tamonu tiajinia queranacunura, nojoriiri ritia secoquiaa socua panishano shitiujinia nojori cajitiuniuria tia camaru shuriucua. Naajuhua, Pueyaso secojojua tiacajiniaqueya pueya rerejosacari, nojoriiri camarucua cajitiucuajinia cajitiuniu paniquiaa, pueya shootianura nojori. ⁴⁰ Nojoriiri mashiquopue tiaca masequiaa secaja cumaneecata nojori na saponuta. Naa nojori miinu nuhuajitij, nojoriiri Pueyaso secoquiaa shitiaroyocua pueya niquiara, maninia pueya nojori jyanishaanura. Naaratej, Pueyaso saniitiosacari maninia miyashjiaca pueya, nojoriiri socua jyanohua naquiya miishaanutaniya tamasacajiniji.

Casamijiu mashiquio niqutiosacari na cumanee juurane Pueyasora
(Lc 21.1-4)

⁴¹ Tamacari, Jesuuri cajiriquiaa Pueyaso Secojoua tiajinia cumaneeca niqutiojoua tajoji, tee pueya niojoriquiaa na cumaneeca Pueyasoracuajani. Jesuuri tiji pueya

shootiariquiaa na cumaneeca niqutiojiyano. Queraatia casamiriaca pueyari queraatia cumaneeca niqutiojoriquiaa. ⁴² Jiyacari tiuquishiiiaariuhua casamiiju mashiquio. Caapiqui cumaneeniyojua niasee cumaneeca niojojuajiniaari. Cuno cumaneeca na niasanoori maja puera cumaneeca na quiniu quiriqiaa. Saaja cobrejini shipinishano quiquiaariiri. ⁴³ Jesuuri jiyacari na saquirojosano pueya piiri. Nojori sequereeri:

—Seetanujuanaa nia sequeraniija, nio casamiiju mashiquio cutaraari socua queraatia niqutiooree puetunu tamasacajiniijianaa. ⁴⁴ Puetunu pueyajanaari na cumaneeca cureenojiniji niqutiojoriquiaa. Saniniuujia, nio maajiiri puetunujuanaa na miaquesocoriquiano na masetajarano niqutiooree cutara.

13

Jesu sequesacari Pueyaso Secojoua tia niyartasaanutaniya
(Mt 24.1-2; Lc 21.5-6)

¹ Jesu tohuareetasacari Pueyaso Secojoua tiajiniji, tamonu na saquirojosano pueyajinijinioori na sequereeri:

—Niishitiojonanaa, quia niquiri Pueyaso Secojoua tia, puereetujaaca saitia tiasano. jiyanoohua shanohua tia!

² Jesuuri na riucaaree:

—¿Quiaateeri cuno shanohua tia niquiya, saijiniji tiasano jiyaconajani? Cuniqi, majaari saajia cureenu quiniutianiya tamonu caco maano quenaaja. Puetunu niyartasanojuanaa quiniutianiya.

Taa pa niishiniutianiya ni jiya puequesacari quera
(Mt 24.3-28; Lc 21.7-24; 17.22-24)

³ Na nuhuaji, nojoriiri quiojoquiaari olivo cuhuariquia tuhuananuucua. Cuniqiji, maja puera tucuaaanu quiquiaari Pueyaso Secojoua tia. Na taquijiraja quiquiaariiri. Jesu cajishacari tii, nocua catecanoquiaariiri Pedro, Santiago, Juan, Andrésnio. Nojoriiri na sequetuquiaari jiyasohuaja:

⁴ —Canaa quia sequere taacari Pueyaso Secojoua tia niyartasaanutaniya. ¿Casaa Pueyaso miiniutianiya canaa niishiniuria quia sequesano quera tohuateya?

⁵ Jesuuri nojori riucaaree:

—Tama nia cuaqueyajaaja nia cojuare tamasaca sapojijaquiniuucua ni jianiya. ⁶ Nia numooteyacuajaniija, queraatia sapojonuujaacari nijionutaniya nojori sequenura nianianiya: “Janiya Cristoni”. Naa sapojotunutaniya queraatia pueyari.

⁷ Naa jaara tojiniuuri miaquetoojonujini niya, tucuaaanujuhuaj, majaari najuhua nia shiriqitiuni. Seetanujuanaa naa quiniutianiya. Naajaa, jiyacari, majaari jiya puequesacari quiniutianiya juhuanojuaja. ⁸ Tamonu rupaa pocuajacari miaquetoojonutaniya tamaatiuucua rupaa pocuajacata. Pueyari tamonu jiyajini miiaquetoojonutaniya tamonu jiyajini quiyata. Naajuhua, rijaari jiuquiujiutianutaniya queraatia tiqiyocua tiacajinia. Jiyanoohua miaajesacariiri quiniutianiya jiyacari. Naajaa, puetunu niojuanaari saaja shusha naquiya miini cotesacari quiniutianiya.

⁹ Tama nia cuaqueyajaaja nia cojuare. Nia nia tiacajinia jiyaniijianucuaaja nia niqutiosaanutaniya saniitosocoriquiano. Naajuhua, nia nia Pueyaso Secojoua tiacajinijanaa majacusaanutaniya. Nia nia jiyatasaanutaniyajuha tiaca jiyaniijiaacua, jiya jiyaniijianucuaacuanio, nojori nequesoreenura nianianiya, janiyajini pohuatanaa nia quiniuucua. Naacujitij, niocua janiyajini pohuatane nojori niqiarajuhua. ¹⁰ Jiya puequeyaquishacariija, Pueyaso rupaari tari pohuatano quiniutianiya puetunu jiyacajinijanaa. ¹¹ Cua tojiri, nia jaara jiyatashiyare jiyaniijianucuaacua nequesoreesocoriquiano, majaari nia tacaani taa nia sequenutaniya, taa nia pocuanutaniya. Majaari quenaaja nia niishiriojonu naatej. Saaja nia sequere nojori niquiara jiyacari Pueyaso Sohanu niishitiojosano nianianiya. Naa pocuasanoori maja nianianijini quiniutianiya, nia pocuasacari nojori niquiara. Cunocuaari Pueyaso Sohanu niishitishano quiniutianiya, na pocuatasacari nianianiya. ¹² Jiyacarijuhuaj, pueyanoori sesa miiniutianiya tama tarajanuujaaja, cua tojijia tarajanu quiniuucua. Tama tarajanuujaariija nia niqutionutaniya mosocoriquiano. Jiyacari, pueyari tama necohuaaja miiniutianiya sesa, cucua tiuujiaca necohua quiniuucua. Naajuhua, necohuari tama na queya tacarantutaniya monujuaaja, na queya tojiniuucua Pueyaso rupaa. ¹³ Puetunu nio jiyajini quiyata pueyajanaari maja na niquiniu panini quiniutianiya nianianiya, cua tojitiajaca nia quishacari. Naajaa, cante seetanujuanaa pueyaracaanu cucua tiuyajaani nio jiya jaara puequerejaatijia, nojuaja cutaraari shacantuca quijia jatanishaanutaniya, pueyaracaanu cuata na quiniuria shuqiriata.

¹⁴ 'Niaa jaara cuno jiyanhua sacuaraatia casaa niquiri Pueyaso Secojoua tijinia nujuatesano, taa supuetana Daniel sequeya na naajioneejinacuajani, niocua ritia mashiri. (Cante nio serojiyani, nojuaja cuara niishiiria casaa na sequeyani.) Judea jiyajinia quiniaa cuara mashiiria ritia tuhuananuhuaa, cuno sacuaraatia casaa jaara nujuatesaare Pueyaso Secojoua tijinia. ¹⁵ Canapute jiyacari quiya na tia cacojiriani, nojori cuara tiuquitiacquiiria tijiniaaco na casaa na riniuria juucua. ¹⁶ Canapute jiyacari quiya na cuhuariquiajiniani, nojori cuara tacateyaquihuara na toqueya na poonuhua. ¹⁷ Jiyacaritij, jiyanhua taraatia quiniutianiyari maajipohuara, nojori jaara manajaatohua quiya, jaara jiyacari jiitiare supiejaca conaajajuhua. ¹⁸ Nia secosacari, Pueyaso nia maseriquia juhuacarijia, nia mashiyocuatucacari cuara quiyacuiria shiniquia quishacari. ¹⁹ Cuno quishacari, jiyanhua naquiya miiniuuri quiniutianiya. Tariucuaaanu, majaari naa naquiya miiniu quiquiaari Pueyaso shipiniuu nuhuaji nio jiya. Naajuhua, cuno naquiya miiniu nuhuaji, majaari jiyano naquiya miiniu quiniutianihua socua, juhua nio. ²⁰ Pueyaso jaara ritia tajitiyaquiri cuno naquiya miiquiosacari, pueya maara mijiria cureyaquirij. Pueyasocuaajari ritia tajitiniutianiya cuno naquiya miiniu, na saquiriojosano pueyacua na taraajenuucua.

²¹ 'Jiyacaritij, tamasaca jaara nia sequere: "Nia niquiri, Cristo tari niya quiya", jaara sequerejuhuaj: "Nooj, jati quiyatej", majaari na tojtianunoj. ²² Jiyacaritij, queraatia sapojonuujaacari supuenutaniya. Nojoriiri sequenutaniya: "Janiyacuaa Cristoni". Tamasacaari sequenutaniyajuhua: "Janiya Pueyaso sequenu panishano caminiujujuni-ani". Nojoriiri pueya niquishoo casaa miniutianiya na cumaacata, Pueyaso saquiriojosano pueya na sapojonura juucua. Jiyacaritij, queraatia pueya cutaraari sapojosaanutaniya. ²³ Cunora pueyanaa, tama nia cuaqueyajaaja nio cojuare. Janiyacuajaari tari juhuacarijia nia numooteyani. Majaari cua sequesano nia niyajetanu.

Pueyaso Niyanu tacatenujiniji pohuatasano
(Mt 24.29-35, 42, 44; Lc 21.25-36)

²⁴ 'Naa naquiya pueya miiniu nuhuajitij, pananuuri ninishiquiria quiniutianiya. Naa-juhuaj, racaari maja na cuhuatanu quiniutianiya mijiria. ²⁵ Riyari totenutaniya. Jiyocuaaanu cumaacaraca quijiaacari tetecatunutaniyajuhua. ²⁶ Jiyacari, janiya Pueyaso Niyanuuri niquishaanutaniya jiyocuaaanuji roseyano cohuajajiniani, jiyanhua shacantuuca cua cumaacata. ²⁷ Jiyacaritij, janiyari cua seya jiyarami quiniutianiyani nojori rerejotenura puetunu cua saquiriojosano pueyajanaa. Nojoriiri puetunu nio jiyajiniujuananaa rerejotesaanutaniya, socua jiyanhua tucuaaanu jiya cajiniocua puequeetujinijinio.

²⁸ 'Quiarjia cutara nia niishiri higo naanajiniji. Shuniyara, na jaamasucuaari totequiaa jaranacujua na quiniuria. Na nuhuaji, na cashacucua jaara macumaaca quiri, quiarinio jaamasucuaari mueratumohua. Niaa jaara naa niqiritij, niaari niishiquiaa tacareejonuuqui quiniutianiya. ²⁹ Quiarjia saniniuuja, naatej taa nia niishiquiaa higo naanacuaani, niocua naa niishirijuhua janiya quera tiuquihuani, niaa jaara puetunu cua pohuatasanojuanaa niquiri tohuateyano. ³⁰ Seetanujanaa nia sequeyanijia, puetunu cua pohuatasanojuanaari niquishaanutaniya nio pa quishacari quiniaa pueya cusonuyaquishacarijia. ³¹ Jiya cajiniocuaari shaajenutaniya, nio jiyajuhua. Cua Rupaa cutaraari maja na jatanu quiniutianiya. Cua sequesanoori puetunujanaa tohuateenutaniya.

³² 'Maja cutaraari nia niishiniu taacari cua tiuquiniutianihuani, casaa juucatej. Majaari jiyocuaaanu quijiaa Pueyaso seya niishiniujuhuaj. Janiyajanaari maja cua niishiniu. Saaja cua que Pueyaso cutaraari tamajaaja na niishiya.

³³ 'Cunora, janiyari nia sequeya cutarani, maja juhua maquenuujuuaca nia quiniu. Pueyaracaanu nia niqutiare cucuaji, juhua sutejaca. Tamajaaja nia soquere. Saaja pueyaracaanu nia secoriquia Pueyaso. Majacuajaari nia niishiniu taacari cua tiuquiniutianihuani. ³⁴ Cunoori quiniutianiya juhua tamonu pueyano quianu panishacari tamonu jiyajiniara tucuaaanu. Na quianura, nojuajaari na seya seeraataree maninia nojori cojuanura na tia. Tamasaca niqutiayaree na poonijosanoori, nojori poonijosocoriquiano. Tamonu sequereeri, tohuateyaji na cojuanura pueyaracaanu, nojuaja cuara tiuquihuaraajattijia. ³⁵ Naaratej, nia sutere. Maja maquenuujunu. Majaari nia niishiniucuaaja taacari tia camaru tiuquiniutianihuani, shusha ninishacari, shiyaqueya, caacaraja niunijosacari, tariquicuaji soj. ¿Taacari cua tiuquiniutianihuani? Johua, maja pa niishiniu. ³⁶ Cunora, juhua sutejaca nia quiriquia, janiya mariqui nia jiyajenetesuhuari, canashiyaquiji cua tiuquishacarihua niaacua. ³⁷ Cua sequesano niyajaniyani, cunoori puetunu pueyarajanaa: "¡Nia sutereja! ¡Maja maquenu!"

14

Judiocuaca camarucua roojotoosacari nojori qianura Jesu
(Mt 26.1-5; Lc 22.1-2; Jn 11.45-53)

¹ Jiyacari, juhuanojuaja querajaa juuca quiriquiaaajari Pascua juucara queranacunura. Pascua juucajuhuaj, poreetajaaju shipinishano pan miaquenu coteesaaquiaari siete juucara. Pueyacuara secojonaa jiyaniijianucuaari jiyacari Moisés Rootasanojiniji niishitiojonaata roojotooriquiaa Jesuucua. Nojoriiri roojotooriquiaa taa nojori sapojonuta nojori quiatunutaniya Jesu jiyasohuajani, na motusocoriquiano. ² Nojoriiri naa sequetooriquiaa:

—Maja queranacusacari naa pa miiniutij, paa mariqui puetunu pueyajanaa juaatiriiri.

Tamonu maaji totasacari na shanohua jaanutaja Jesuucua
(Mt 26.6-13; Jn 12.1-8)

³ Jesuuri Betania tiacajinia quiriquiaa Simón tiajinia na saquiriojosano pueyataja. Cuno Simónri tarijia lepra cusotaja quiquiaari. Jesu cajishacari tii miaquejajinia, tamonu maajiiri tiuquiquiaari. Shiitaniyojuaja shucuariquiaja pataconiyojua cacatariquiaari, shanohua cohuaaja saajiajiniji quejasano. Mishaja quiriquiaari shanohua jaanutajata, nardo jaamasucujajiniiji shipinishano. Jiyanhohua queraatia cumaneecata masesano quiquiaariiri. Jiyacaritij, cuno maajiiri na shucuariquiaja pataconiyojua cocuateree, na totanura Jesu nacaacua. ⁴ Tamasaca tii quiniaa pueyari juaarii naa cuno shanohua jaanutaja niitiasaanucua. Tama nojoriijaarijia sequetooriquiaa:

—¿Casaara cuno shanohua jaanutaja niitiasaaree najuhuanani? ⁵ ¿Cuno jaanutaja maara niquitiosaacanu queraatia cumaneecara, casamiijiuniucua niquitiosocoriquiano!

Nojoriiri juhuacatecara cuno maaji juaarii.

⁶ Jesuuri nojori sequereee saaja:

—¡Nia tariniitire! ¿Casaara nia rimiaaqueya nio maajiicuarani? Naa na miishano janiyani, cunoori jiyanhohua maninia quiria. ⁷ Casamiijiuniucua pueyacuajaari pueyaraacanu quiriquiano niaata. Nia naatacuajaari maninia miiniu nojori nia panishacari. Janiya saniniuujia, maja cutaraari cua quiniu quiniutianiya pueyaracaanu niaata. ⁸ Nio maajiiri maninia miiri. Majaari na naata miiniu quiriquiaa socua maninia nio na miishanojiniji. Na totasacari cucua na shanohua jaanutajani, nojuajaari juhuacarijia cua cuaqueya jeenucuaa, raaco cua niasaanura janiya jaara mosaareni. ⁹ Seetanujuanaa nia sequeyanijia, puetunu jiyacajiniajanaa tee Pueyaso rupaa pohuatasaanutaniyani, nio maaji miishanoori pueyaracaanu pohuatasaanutaniyajuhuj. Naa na miishano janiyatej, majaari na niyajetasaanu quiniutianiya.

Judas tacartasacari Jesu, na quiatenura
(Mt 26.14-16; Lc 22.3-6)

¹⁰ Jiyacaritij, Judas Iscarioteeri quiaquiaari pueyacuara secojonaa jiyaniijianucuaata roojotoonura taa nojori na quiatenutaniya Jesuni. Nojuajaari Jesu saquiriojosano pueyajinijinio quiquiaarijuhuaj. ¹¹ Jiyaniijianucua jaara tojiquiaari, Judas nojori quiatenu panija Jesu, nojoriiri jiyanhohua shuquiririi. Nojoriiri Judas sequereee:

—Canaa quia niqutionutaniya cumaneecani, canaa quia quiatenu sami Jesu.

Cunora, Judasri niishiriojonu coteequiaari taacari nojori na quiatenutaniya Jesuni.

Jesu miaquesacari na nuhuajiria na pueyata
(Mt 26.17-29; Lc 22.7-23; Jn 13.21-30; 1 Co 11.23-26)

¹² Puetunu marijarajanaa, Judiocuacaari Jerusalén tiacajinia rerejoquiaari poreetesoo pan nojori miaquenuunura siete juuca. Coteenu juuca seasaari quiquiaari “Pascua”. Cuno juuca puecoosaaquiaariiri Pascua riuriotaca borregohua, Pueyaso niqiuara miaquenuusocoriquiano. Naaratej, Pascua juuca quishacari, Jesu saquiriojosano pueyari Jesu nequesotaree:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarjia Pascuarani?

¹³ Jiyacaritij, Jesuuri caapiqui na saquiriojosano pueyajinijinio sequereee:

—Nia quiaare Jerusalén tiacajinia. Niaari tii riuriatanutaniya tamonu pueyano, na mohuaca pataano na patacojinia. Niaa jaara na riuriatasee, niocua na nuhuajimia. ¹⁴ Jaara tiuquishii tiajinia, niocua cuno tia camaru sequesee: “Niishitiojona naa quia sequeya: ‘¿Tee cuniqui cua miaquenutaniya cua saquiriojosano pueyata quiarjia Pascua niucuan?’”

¹⁵ Jiyacaritij, nojuajaari nia niqutinutianiya pueretuuca sohuaca, jiyocuaaanu nataco, tariucua maninia jeenucuasano. Niocua cuniqui borrego majeetesee, niucua pa miaquesocoriquiano.

¹⁶ Na saquiriojosano pueyari quiojoquiaari. Tiacajinia tiuquiiijioseeri. Nojori tiuquiiijosacari, nojoriiri puetunujuanaa riuriatasee taa Jesu sequeree nojoricuajani. Nojoriiri tii majeetese borrego, Pascuara miaquesocoriquiano.

¹⁷ Jaara niniquiaari, Jesuuri tiuquiiijioseer na saquiriojosano doce pueyata. ¹⁸ Nojori miaquenuusacari, Jesuuri nojori sequeree:

—Seetanujuanaa nia sequeyanijia, tamonu nijaniyajinijinio niya cuata miaqueyani, nojuajaari cua tacatanutaniya na quietenura janiya, naquiya cua miishaanura.

¹⁹ Jesu sequesacari naatej, nojoriiri jyanohua taraajequee. Jiyacaritij, tama nojorijiaarjia na nequesoreetanu coteeree:

—¿Janiya jiyoteeri quia quietenutaniyani Jiyaniijianaa?

Puetunu nojorijianaari naa na nequesotaree.

²⁰ Jesuuri nojori riucaaree:

—Niquiriyatujua doce nijaniyajininiocuaja, nojuacuajaari nio, shusha pan shiya miojuajiniani, nojuajaari cua quietenutaniya. ²¹ Janiyacuajaari maninia tohuateenutaniya puetunujuanaani, taa tariucuaaanu Pueyaso Rupaajinia janiyajiniji naajiotasaaquiaaricujani. Saniniuujia, jyanohua taraatia quiniutianiyari cuno pueyanora, cantucujaja cua quietenutaniya mosocoriquianoni. Maara socua maninia quiquiaari cuno pueyanora, nojuaja jaara raaquishaaquiaari.

²² Nojori miaquenuusacari, Jesuuri pan ririi. Na Que Pueyaso secojoree nocuaraari. Na neecasenu nuhuaji, nojori niqutiojoreeri. Na niqutiojosacari, naa miriqui sequequiaari-iri:

—Jajaa. Nia miaquere. Nioori cua cuaqueya.

²³ Na nuhuaji, Jesuuri ratujua pataree. Na Que Pueyaso secojoreeri nojori ratuocoriquianoocua. Na secjonu nuhuaji, na saquiriojosano pueya niqutioereeri nojori ratunura tiji. Puetunu nojorijianaari ratujuajiniji raturee. ²⁴ Nojori sequeree miriquiri:

—Nioori cua nanaca. Cua nanacaari queraatia pueyacuara shoonutaniya. Naacujatij, Pueyasoori seetanujuanaa jyanooniutianiya pueya, saaja nojori tiuuniucua cucua, taa Pueyaso sequequiaaricujani. ²⁵ Seetanujuanaa nia sequeyanijia, maja socua cua ratunu quiniutianihua uva caacajiniji, janiya cuara tacatemohujaatijia pueyaracaanu Jiyaniijianaa cua quiniuria. Jiyacaritij, janiyari shusha niaata na ratunutaniuhani.

Jesu sequesacari Pedro, nojuaja nocuaji seetanutaniya

(Mt 26.30-35; Lc 22.31-34; Jn 13.36-38)

²⁶ Pueyasora na jaaquequenuunu nuhuaji, nojoriiri quiojoquiaari olivo cuhuariquia tuhuananuucua. ²⁷ Na quiojosacari, Jesuuri nojori sequeree:

—Nio niucujani, puetunu nijaniyajanaari cucua tiuuniu tarinitianutaniya. Naa naajiotasano quiyacuajaari nijaniyajiniji tariucuaaanu Pueyaso Rupaajinia. Naa sequeyari: “Janiyari borrego Cojuana monutaniyani. Na borregohuari na camaru nuhuaji niyaquejonutaniya tamajaaja”.

²⁸ Na nuhuaji, janiya jaara samiitiarohua macujinijini, janiyari nia puetanutaniya Galilea jiyajiniani.

²⁹ Pedroori jiyacari Jesu sequeree:

—Niya cuata quiniaa naasucua quiocujaji carajenutaniya. ¡Janiya cutara maja cua catenu quiniutianiya quiocujaji!

³⁰ Jesuuri saaja na sequeree:

—Pedronaa, janiya seetanujuanaa quia sequeyani, nio niucujani, quiaari janiyajiniji naa seetanutaniya pueya niquiara: “¡Maja cua niishiniu Jesu!” Quiaari naa pacutejonutaniya sequenutej, caacaraja caminiuujiaquishacarijia niunijionu.

³¹ Pedroori saaja na pataariquiaa naa Jesu sequesacari nojuajatej. Socua sequerohuari: —¡Janiya cuara mosaaria quiataqui, naajaa, majaari cua seetanu quiniutianiya quiocujaji!

Narta saquiriojosano pueyari naa sequetureejuhuj.

Taraatia Jesu secojosacari Getsemani cuhuariquiajia

(Mt 26.36-46; Lc 22.39-46)

³² Nojoriiri jiyacari tiuquiiioquiaari tamonu cuhuariquiajia. Cuno cuhuariquia sesa quiquiaari Getsemani. Jesuuri na saquiriojosano pueya sequeree:

—Niyaja nia cajitiuri, cua secojosacari cua Que socua nia tacoji.

³³ Nojuajaari saaja nocua ropujyaree jiuujianaraca na pueya: Pedro, Santiago, Juannio. Jesuuri juhuacatecara shiriquiriquiaa. Tacaariquiaajaariuhuj. ³⁴ Nojori sequereeri:

—¡Coojiajia taraajeya jyanohuanijia, quera cusoyanijia! Niyaja nia jiyojetare. ¡Niocua niqutiareja! ¡Majaari maquenu!

³⁵ Jesuuri socua shiitianiyojua quiaaree nojori tajoji. Na secojonura Pueyaso, mojoquetaseeri. Jiyocuara jacamaquiaariiri. Pueyaso masereeri, maja naquiya na miishaanura juucua. ³⁶ Na secojosacari, nojuajaari naa sequequiaaritiij:

—Cua Quenaa, quiara maja jiyajeneta quia panishano quia miiniuria. Naaratej, janiya quia secojiyani, nio raatonuque cucuaji quia tajitiri. Naajaa, cuara quiaquiiiria juhua cua panishano. Saaja cuara quiiria cutara quia paniyacuajani.

“Nio raatonuque” na sequesacari, Jesuuri miriqui sequequiaa naquiya na ishocoriquiano.

³⁷ Na secojonu nuhuaji, na saquiriojosano pueyacuatacategyarohuari. Nojori riuriata-suhua maquetiuyanoori. Jesuuri Pedro sequeree:

—Simónnaa, ¿quiaate maqueya? ¿Majateeri quenaaja quia naata rejeretanu rupaquijia quia maquenu? ³⁸ Nia sutere. Maja maquenu. Pueyaso nia secojore niaa mariqui sesa miitishaareeri. Seetanujanaa, poojiaari maninia miini panijia. Pa cuaqeyari saniniujia sasaca quiyacujua. Majaari pa naata maninia miini pa panishano tamajaaja. Cunora, Pueyaso nia secojore na cumaquiniuria nijaniya maninia nia miiniuria.

³⁹ Jesuuri quiaquiaariuhua socua secojonuhua. Na secojosacari, socua sequenu pacatequiaariiri juhua coteenu na sequesano. ⁴⁰ Na nuhuaji, socua tacatequiaariuhua na saquiriojosano pueyacuari. Nojori riuriatasuhuariuhua maquetiuyanoo. Nojori namijiaari saaja seecutayariquiaa na maquenuujunuta. Jiyacaritiij, nojoriiri maja na niishiniu quiriquiaa taa na riucuatunutanianoj. ⁴¹ Jesuuri socua quiaquiaariuhua na Que secojonura. Na tacatesacariuhua secojonujiniiji, nojori sequesuhuari:

—¿Niaate maquetiuyajaa? ¿Niaate samaateyajaa? ¡Tariucujaj! ¡Quiarijia cutara janiyani sesa miijiaa pueya quiatesaanutanianoo, nojori miiniuria janiya taa nojori panitiuyacuajani! ⁴² Nia saneecuature. Pa quiaare. Cua quiateriquiano tari cumaji.

Na paraa quiasacari Jesu

(Mt 26.47-56; Lc 22.47-53; Jn 18.2-11)

⁴³ Jesuuri pocuariquiaajaa Judas tiuquishacari nojoriicua. Cuno Judasri, Jesu saquiriojosano doce pueyajiniinjio quiquiaarijuhuaj. Queraatia pueyari Judasta nijioquiaari. Cuno pueyari nijiniaquetucuaaja mueruu pooriquiaa, macacanio. Cuno pojoriiri pueyacuara secojonaa jiyaniijianucua jiyaramiquishano pueya quiquiaari, Moisés Rootasanojiniji niishitiojanaa jiyaniijianucua jiyaramiquishanojuhuaj, Judiocuaca camarucua jiyaramiquishanonio. ⁴⁴ Judas, Jesu quiateriquianoni, nojuajaari juhuacarijia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacarini, cunocuaajaari nojuaja. Niocua na quiaase. ¡Niaari maninia morojosano jaatucutaarohuaquinioj!

⁴⁵ Naacuajitij, Judas jaara tiuquiquiaari Jesuucua, nocua catecanoquiaariiri. Na sequereeri:

—¡Niishitiojonanaa!

Jiyacari na nujuereeri. ⁴⁶ Judasta nijionaa pueyari jiyacari Jesu quiaase. Morojosanoori jaatucutashiyarohua.

⁴⁷ Cuniqiu Jesuta quiniaa pueyajiniinjionio, niquiriyatu nojorijiniinjioori na shuucuaaji shitiaquiaari nijiniaquetucuaaja mueruu. Nata jaateree pueyacuara secojonaa jiyaniijia seru nocucoori. ⁴⁸ Jesuuri nocua nijionaa pueya sequeree:

—¿Casaara cucua nia nijioree nijiniaquetucuaaja mueruutani, macacatanio, morojosano nia riniuria janiya juhua nohuasejojuani? ⁴⁹ Janiyacuajaari puetunu juucajanaa nia tajinia quiquiaani, Pueyaso Secojoua tiajinia cua niishitiojosacari pueya niqiuara. Majaari tii cua quishacari nia quianu quiquianu janiya. Naajaa, naa nia miiriqui, tariucuaaanu janiyajiniiji Pueyaso Rupaajinia naajiotasano tohuatenuara.

⁵⁰ Jiyacaritiij, puetunu Jesu saquiriojosano pueyajanaari na shuriucuaaji mashiyocuatiquiaari. Tamajaaja Jesu tiujiatuqueeri. ⁵¹ Saaja tamonu mashajaari Jesu nuhuaji sacuariquiaa cutara. Cuno mashaja sesaari Marco. Nojuajaari saaja puereetuque lino toquerauta cuhuajaatiariquiaa. Jesu quiatunaa niquishacari nojuaja, na quiatureejaariuhuj. ⁵² Nojuajaari saaja na toque tiujiaquee nojori juashiquiajinia. Juhuasuari ritia netequee. Mashimiaari. Janiyacuajaari cuno pueyano quiquiaarini, nio naajionajuhuj.

Judiocuaca camarucua nequesoreesacari Jesu

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesu quiatunaari Jesu jaatucuaquiaari pueyacuara secojonaa jiyaniijia tiajinia. Puetunu nio pojorijianaari tii rerejoquiaari: pueyacuara secojonaa jiyaniijianucua, Judiocuaca camarucujuhuj, Moisés Rootasanojiniji niishitiojanaanio. ⁵⁴ Pedroori Jesu nuhuajiquiaari tucuaaanuji. Jateeseeri pueyacuara secojonaa jiyaniijia tia carijiniacuma. Cuno jiyaniijijajanaa seya tajinia cajishiiri. Mani jitiuriquiaa nojortia cuniquiiri.

⁵⁵ Pueyacuara secojonaa jiyaniijianucua, puetunu Judiocuaca camarucujanaari ni-
ishiriojonuuriquiaa nojori saquiriojotanura Jesuucuara. Jesuucuara tonujuriquianoori
pajesaaquiaari juucua, na motenura. Saaja shaaqui quiquiaariiri sesa casaa, nocuara
tonujusocoriquiano. ⁵⁶ Queraatia pueyari nocuara tonujuriquiaa juucua, nojori saponu-
jonuta. Nojori saquiriojotasanoori saaja rimiajata quiriquiaa puetunujuanaa. ⁵⁷ Na
nuhuaji, tamasaacari sanetaquiaari nocuara nojori tonujunura na sapojonutajuhua.
Nojoriiri naa sequetuquiaaritiij:

⁵⁸—Canaa na tojiqianu sesa sequeyanoni. Naa sequecanuuri: “Janiya nio Pueyaso Seco-
jojua tia niyartanutaniyani, pueya tiasanoni. Jiuujianaraca juucajinia, janiyari tamajaaja
na tianu tucuatanutaniuhuanu. Cunoori maja pueyata tiasano na quiniu quiniutianiya”.

⁵⁹ Nojori saquiriojotasanoori saaja rimiajata quiquiaari jiyaniijianucua niquiara.

⁶⁰ Jiyacaritiij, pueyacuara secojonaa jiyaniijiaari nujuaree pocuanura. Jesu nequesota-
reeri:

—¿Majate quenaaja quia riuucuanuujua? ¡Quia tojiri, pueyaruhua quiocuara tonujiya!

⁶¹ Jesuuri saaja sanaa nujuariquiaa. Majaari na riuucuanu quiriquiaa quenaaja. Puey-
acuara secojonaa jiyaniijiaari socua na nequesotaquiaariuhua:

—¿Quiaate Cristo, jiyocuacaanuji Pueyaso Jiyarosano?

⁶² Jesuuri na riuuaree:

—Jaa, nojuacuajaniija. Niaari cua niquiniutianiya jiyocuacaanu cumaaca Jiitiana mi-
aquetajara cajiyano. Na nuhuaji, niaari cua niquiniutianiya tacatehuano cohuajajinia
jiyocuacaanuji.

⁶³ Pueyacuara secojonaa jiyaniijia jaara tojiquiaari naa Jesu sequesantej, tama na
toquejaaja sutaree na juaniutiaari. Sequereeri:

—¿Casaara pa sashiya tamasa saquiriojotanura saa nocuarajaanihuua? ⁶⁴ Niaacuaja
shusha tojirii Pueyasocuaru na sequesano sacuraatia. ¿Niajanijarijataj, taa nia niishirio-
jiyani?

Puetunu pueyajanaari sequequiaari:

—¡Cuara mosaaria!

⁶⁵ Jiyacaritiij, tamasaacari Jesu riocojonu coteequiaari. Na jiquioco morotureejaariuhua
maja na niquiniuria. Na nuhuaji, pueyari na piquiniu coteequiaari. Na pinu nuhuaji, na
nequesotaturiquiohuari:

—Quia niishiritioj, ¿cante quia piriini?

Secojoua tia cojuanaa pueyari na jiquioco piquitiuriijuhuaj.

Pedro seetasacari Jesujiniji

(Mt 26.69-75; Lc 22.56-62; Jn 18.15-18, 25-29)

⁶⁶ Pedroori jiyaniijia tia carijiniacuma quiriquiaa. Jiyacaritiij, tamonu niyacoori
rucuanejoriquiaa carijiniacuma. Nojuajaari pueyacuara secojonaa jiyaniijia seru
quiquiaari. ⁶⁷ Pedro niqishii cajiyanoori, mani jitiuyano. Tacuriitia na shootariquiaari.
Na nuhuaji na sequereeri:

—Jaj, quiaacuajaruhua Jesuta rucanejojuahuaj, cuno Nazaret tiacajinijinio pueyan-
otani.

⁶⁸ Pedroori na seetaree. Na sequereeri:

—¡Cuno pueyano maja cua niishishano! ¡Majaari quenaaja cua niishiniu casaa quia
sequeyani!

Pedroori canujaree. Mataca tohuatayaji nujuaseeri. Caacarajaari jiyacari niunijoree.
⁶⁹ Cuno niyacoo jaara Pedro niquiquiaariuhua socua, juhuacatecara nata quiniaa se-
quereeri:

—¡Nio pueyanoori cuno Jesu pueyajinijiojuhuaj!

⁷⁰ Pedroori socua na seetaquiaari. Pasaja na tarishishacari, cuniqui nata quiniaari Pedro
sequereere socua:

—Seetanujuanaa, quiaari cuno pueyajinijinio. Quiaacuajaari Galilea jiyajinijinio
pueyano. Canaa tojishacari quiajaniya, quia pocuanuuri juhua nojori pocuanujua.

⁷¹ Pedroori socua jiyanoohua sapojonu coteequiaari. Naa sequereeri:

—¡Pueyaso cuara saniitioora janiyaqui, janiya jaara sapojiyani! ¡Seetanujuanaa, maja cua
niishiniu cuno pueyano, canajiniji nia nequesoreetaacuajani!

⁷² Jiyacaritiij, caacarajaari niunijionu pacuterohuacuahuaj. Pedroori jiyacari niishiquii
naa Jesu sequesano nojuajatej: “Juhuanujuaja caacaraja niunijionu pacutejijaquishacar-
ijia juhuaquenu panishacari, quiaari janiyajiniji tari seetanu pacutejonutaniya”. Pedro
jaara niishiquii naa Jesu sequesano nojuajatej, jiyanoohua nujuquequeeri.

15

Jesuucuaara pueya saquiriojotasacari Pilato

(Mt 27.1-2, 11-14; Lc 23.1-5; Jn 18.28-38)

¹ Tariquicuaji, pueyacuara secojonaa jiyaniijianucuaari rerejoquiaari Judiocuaca camarcuata, Moisés Rootasanojiniji niishitiojonaatajuhuaj, Sanedrín maanutanio. Nojori-iri moronucua Jesu jaatucutaquiaari Pilatoocua. Cuno Pilatocuaajaari Judea jiya jiyaniijia quiquiaari. ² Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquinatejaj, taa quia sequerecuajani.

³ Pueyacuara secojonaa jiyaniijianucuaari Jesuucuaara tonujuriquiaa queraatia sesa casaa. ⁴ Pilatoori Jesu nequesotarohuacuahuaj:

—¿Majateeri quenaaja quia riucuanuuja? Quia tojiri taa cuno pojori saquiriojotaa quiocuarani.

⁵ Jesuuri maja na riucuanu quiriquiaa quenaaja. Cunora, Pilatoori jiyanohua jiuujiatequiaari.

Na paraa sequesacari Jesu cuaara mosaaria

(Mt 27.15-31; Lc 23.13-25; Jn 18.38-19.16)

⁶ Puetunu marijarajanaa, Pascuara queranacunu juuca, Pilatoori nujuatesano pueyano tohuataniniu jiitiquiaari nujuatejojuajiniji, cana pueya paniquiaari na cartesaanuracua-jani. ⁷ Jiyacaritij, tamonu pueyanoori nujuatejojuajinia nujuariquiaa. Na sesa quiquiaari Barrabás. Nojuajaari tamasa pueyata pueyano moquiaari. Cunoori quiquiaari nojori juuashacari, Romano taucuaa jiyaniijia jiitianuucua Judiocuaca. ⁸ Pilato nequesotesacari Jesu, jiyacaritij, queraatia pueyari Pilatoocua nijioquiaari naa nojori secojonura nojuaja:

—Pueyano quia carterohua nujuatejojuajiniji, taa quia miiquiaacuaja puetunu marijarajanaani.

⁹ Pilatoori nojori riucuaaree:

—¿Cana nia paniya cua cartenurani? ¿Niaate niarta Judiocuaca jiyaniijia paniya cua cartenura?

¹⁰ Nojuajaari tama niishiquiaarijiaaja, pueyacuara secojonaa jiyaniijianucuaari Jesu niqiniu paniyaquiquiaari pueya shocotenuucua nojori saniniuujia Jesuucuaara. ¹¹ Pilato nequesotasacari nojori, pueyacuara secojonaa jiyaniijianucuaari jiyacari pueya shiniuujiquiaari nojori sequenura Pilato, nojuaja cuaara carteera Barrabás. ¹² Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequesano niarta Judiocuaca jiyaniijiani?

¹³ Nojoriiri naa nacaree jiyanohua:

—¡Cuaara mosaaria niyacutesanojinia teetesano!

¹⁴ Pilatoori nojori riucuaaree:

—¿Casaarateni? ¿Casaa na miiquianu sesajaarani?

Nojoriiri saaja jiyanohua nacaree:

—¡Niyacutesanojinia quia teetere!

¹⁵ Pilatoori socua tariniquiaari. Nojuajaari maninia quiniu paniquiaari Judiocuacata. Cunora, Barrabás cartereeri. Saniniuujia, Jesu majacuteree cutaraari. Na nuhuaji, na soldadohua na niqitioreeri, niyacutesanojinia na teetsaanura.

¹⁶ Jiyacaritij, soldadohuari Jesu jaatucuquiaari jiyaniijia Pilato tiajiniaaco. Nojoriiri puetunu narta soldadohuajanaa rerejoteree Jesu shocua. ¹⁷ Soldadohuari Jesu cushitiquiaari shaaruque toque, juhua jiyaniijiajanaa cushishano. Juhuacontucua maatusano cushitishaareejaariuhua na nacaquera. ¹⁸ Na nuhuaji, nojoriiri na rupaa paaretanu coteequiaari Jesu na macaatinuria:

—¡Jejee, Judiocuaca camarnuna nooj!

¹⁹ Nojoriiri na naca piqiri naajuata. Na riocojoturejaariuhuj. Nocuara mojoquetacoreeri juhua jiyaniijiajanaa cariquimijaj, nojori sapojonuta na macaatinuria nojuaja.

²⁰ Naa na rerequetesaanu nuhuajitij, toque naatuqueeri nocuaji jocusaaciaari. Tama na toquejaaja cushitishaarohuari. Na nuhuaji, soldadohuari na tohuataniquiaari. Na jyatatuquiaariiri niyacutesanojinia na teetsaanura.

Jesu teetesacari niyacutesanojinia

(Mt 27.32-44; Lc 23.26-43; Jn 19.17-27)

²¹ Soldadohua jiyatasacari Jesu, tamonu pueyanoori jiyacari tacateriquiohua na cuhuariquiajiniji. Cuno pueyano sesa quiquiaari Simón. Soldadohuari Jesu teetejarano niyacutesano patanirii nojuaja. Nojuacuajaari Alejandro que, Rufo quenio.

²² Jesuuri shiitaniyojua tuhuananuucua jiyatasaaquiaari. Cuno tuhuananu sesa quiquiaari Gólgota. Nioori pueyano rupaajinia sequeya, “Pueyano nacaco”. ²³ Soldadohuari Jesu raatequiaari vino juucua, mirrata cojitushano. Saaja na ratuyaquiriiri. ²⁴ Jiyacaritij, nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijioquiaari, nojori niishiniuria cantucua Jesu toque poore nerani. Naacuajitij, nojoriiri Jesu toqueya seraatiaquiaari tama nojoririjaaja.

²⁵ Jiyacaritij, niyacutesanojinia na teetesacari, shusha pananu tacasacariiri quiquiaari. ²⁶ Naajioneeri na nacaacuma rupotasano quiquiaarijuhuaj. Tii sequequiaariiri casaara na mosaareeni. Naa naajiosano quiquiaariiri cuno rupotasanojinia: “Nioori Judiocuaca jiyaniija”. ²⁷ Jiyacaritij, caapiqui nohuasenujuacaari Jesu shuriucua teetejosaquiaari-jiuhua, socua tamonu caapiqui niyacutesanojinia; tamonu na miaquetajara, tamonu na muencara. ²⁸ Naa tohuatequiaariiri taa tariucuaaanu Pueyaso Rupaajinia na naajiotasaaquiaaricujani. Naa sequeyari:

“Na sesaari sesa mijijaca pueya sesacata cojiritiasaaquiaari naajiotasaanujuhua”.

²⁹ Pueya tajishacari nuucuo Jesu shuriuquico, nojoriiri na macaatiquiaari. Na maanuquenuta naa na sequetquiaariiri:

—¡Jaj! ¿Majateeri quiajanía cumaacaracuaaja? ¿Quiaateeri jyaniriquiaa, quiaa jaara Pueyaso Secojoua tia niyartare, quia naata na tianu tucuatunuhua jiuujianaraca juucujinia? ³⁰ Quiaa jaara naa cumaacaraca quirítij, niyacutesanojiniji quia rosereluarajaj.

³¹ Pueyacuara secojona jyanijianucua, Moisés Rootasanojiniji niishitiojonaari na macaatiquiaarijuhuaj. Tama nojorijaariija naa sequetooquiaari:

—¿Maatucua saa tamasaca naatanijioriquiaajaari? Tama nojuaja cutaraari maja na naata niyacutesanojiniji rosenu. ³² Jaara seetanujanaa quiri Pueyaso Jiyarosano, pa jyanijia na quiniuria, cuaara roseera niyacutesanojiniji pa niquiara. Pocua jiyacari nocua tiuuri cutarani.

Cuno nohuasenujuaca Jesu shuriucua teetejosano quiriquiaani, nojoriiri na sesacariquiaajuhua.

Jesu cusosacari

(Mt 27.45-56; Lc 23.44-49; Jn 19.28-30)

³³ Panacari, jiyari ninishiquiria quiquiaari puetunujuanaa. Tarishiquiaariiri. Shusha tenacariishacari cuhuatemohuari. ³⁴ Jiyacaritij, Jesuuri jyanohua na rupaa paaretajiaari:

—Eloi, Eloi, ¿lama sabactani?

Nioori sequeya: “Cua Pueyasonaa, cua Pueyasonaa, ¿casaara quia carteree janiyani?”

³⁵ Na shuriucua nujuatunaa tojitasacari naa Jesu paaretasacari na rupaatej, nojoriiri sequeturee:

—¡Nia tojiri, supuetana Elías jiiquioonuyano, nocua na niniuria!

³⁶ Tamonu pueyanoori ritia netequiaari namasu casaara na shiniuria jereeca vinojinia. Na nuhuaji, na morotaree naajuaacuara, na shitasocoriquiano Jesu rupaama. Na raatereeri. Na nuhuaji, nojuajaari sequequiaari:

—¡Pa shanacure! ¡Supuetana Elías jiyoteeri nocua niniutianiya na roshiniuria niyacutesanojiniji!

³⁷ Jiyacaritij, Jesuuri jyanohua na rupaa paaretarohuacuhua. Cusoqueeri. ³⁸ Jiyacaritij, Pueyaso Secojoua tiajinicuma, shiquiquia toquejiniji sohuacaari suteqee tamajaaja, jiyocuaaanu jiyocuaara. Cunoori pueya pueresano quiquio mishiquiotaja quiquiaari, pueya mariqui cusoqueeri Pueyasocua nojori tiuquishacari juucua, jiyanooshoojua nojori quishacari. ³⁹ Cuno Romano soldadohua jyanijiaari Jesu taccoji nujuariquiaa. Na niquishacari taa Jesu nacaquiaarini, naajuhua, taa Jesu cusoquiaari na rupaa na paaretanutani, jiyacariti nojuajaari naa sequere:

—¡Nio pueyanoqui seetanujanaa Pueyaso niyanu!

⁴⁰ Maajipohuari tii quiriquiaajuhua. Tucuaaanu Jesu shootiatuquiriquiaari. María Magdalenaari nojoritia quiriquiaajuhua, socua narta maajipohuanio. Cuno maajipohuani, nojoriiri quiquiaari Salomé, Mariano, cante Santiago, José nucua quiquiaaricujani. Nio Santiagoni, nojuajaari socua naatujua na sesaanucua Santiagonijini. ⁴¹ Puetunu nio maajipohujanaari Jesu nuhuajinia quiquiaari. Nojoriiri nera pueraquenuuna quiquiaari, Galilea jiyajinia na quishacari. Socua queraatia maajipohuari tii quiriquiaajuhua, canapete Jerusalén tiacajiniara nijioquiaari Jesutacuajani.

*Jesu quete niasacari raaco**(Mt 27.57-61; Lc 23.50-56; Jn 19.38-42)*

⁴² Jesu cusonu juucani, cuno juuca sesa quiquiaari “Jeenucuanu juuca”, maja samaatenu juuca poonijionura. Saniniuujia, tariqui quiquiaariiri samaatenu juuca. Cunora, pueyari juhuacarija jeenucuaquiaari puetunujuanaa. ⁴³ Cuno juucajani, jeenucuanu juuca ninishacari quera, tamonu pueyanoori Pilatoocua quiaquiaari. Nojuajaari José, Arimatea tiacajinjiniño pueyano. Cuno Joseeri tojishano pueyano quiquiaari narta Sanedrín pueyara. Joseeri mijiria Pueyaso Jiyarosocoriguiano niquniuucua jiaatiaja quiquiaar-jiuhuj, canaa Jiyaniijijanaa na quiniuria. Nojuajaari maja na puerenu quiquiaari Pilatoocua na tiuquiniuria, Jesu quete na masenura. ⁴⁴ Pilatoori jiyanohua jiuujiatequiaari na tojishacari Jesu tari cusoquee. Pilatoori soldadohua jiyaniijia sequeree nocua na niniuria. Nocua na tiuquishacari, na nequesotareeri:

—¿Taacari Jesu cusoqueeni?

⁴⁵ Soldadohua jiyaniijia jaara na riucuaquiaari taacari na cusoqueeni, Pilatoori jiyamitia José sequeree Jesu quete na panura. ⁴⁶ Joseeri jiyacari shanohua quenaaruque toque masequiaari tama na cumaneecatajaaja. Na nuhuaji, macu roshiniriiri niyacutesanojiniji. Cuno toquejinia na jiuuicoreeri. Na nuhuaji, na niaquiaari raacoori. Cuno raari jiuutiasano quiquiaari saajiajinia. Joseeri raa tioree jiyanohua puereetuca quejasano saajia. ⁴⁷ María Magdalena, José nucua Marfania, nojoriiri na niqutiariquiaa tee na niasaareeni.

16*Jesu samiitiasacariuhua**(Mt 28.1-10; Lc 24.1-12; Jn 20.1-10)*

¹ Samaatenu juuca jaara shocoquiaari, María Magdalena, Santiago nucua Maríajuhuj, Salomeenio, nojoriiri shanohua jaanutaja masequiaari macuucua na tuujutasocoriguiano. ² Jiyanohua tariquiucují Domingo juuca, shusha pananu muetasacari, nojoriiri raajinia quiojoquiaari. ³ Nucua na quiojosacari, tama nojoriijiaarjia sequetooriquiaa:

—¿Canteeri pocuaji shuuquitiniutianiya tamocora raa tiootiuni?

⁴ Nojori jaara niqiuquiaari raa, saajia niqutiuriiri tariucua tamocora shuuquitishano. Puereetuca saajiaari quiquiaari raa tiootiu. ⁵ Nojoriiri raaco tiuquitiamaa. Mashaja niqutiushiiri tii cajiyano nojori miaquetajara, cohuaja tucuaque toque cajitiaano. Nojoriiri jiyanohua shiriqitiuquiaari na niqutiushacari nojuaja. Cuno mashajaari Pueyaso seru quiriquiaa. ⁶ Maajipohua sequereeri:

—¡Maja nia shiriqiniuni! Janiyari niishiyacuajani, niaari Jesu pajeya, Nazaret tiacajinjiniño pueyano, niyacutesanojinia teetsaarucuaani. ¡Nojuacuaja tari samiitiarohua! Maja niya na quini. Nia niqishuriiria na maja, tee na niasaarucuaacuajani, shaagui. ⁷ Na saquiriojosano pueya nia sequesuhua, Pedrojaajanio: “Nojuajaari nia puetanutianiya Galilea jiyajiniara. Niaari tii na niquniutianiya, taa na sequecanu nijaniyacujani”.

⁸ Maajipohuari netecatuquiaariuhua raajinjiji. Nojoriiri tetecaturiquiaa na shiri-iquiniutia. Majaari quenaaja tamasaca pueya na sequetunu quiquiaari na puerenuta.

*Jesu muetasacari María Magdalenaacua**(Jn 20.11-18)*

⁹ Jesu samiitianu nuhuaji, cuno Domingo juucaja, shusha semaana coteenu juucani, Jesuuri coteenujuanaa muetaquiaari María Magdalenaacua. Jesucuaajaari tarijia siete samaruhua tohuatanijioquiaari cuno Maríajinjiji. ¹⁰ María Magdalena niqiniuni nuhuaji Jesu, nojuajaari quiaquiaari Jesu cojiniaa na numootenura. Cuno pojoriiri jiyacari taraajecoriguiaa. Nujuqueturiquiaari Jesu mosaanuucua. ¹¹ María Magdalenaari nojori sequese:

—Pueyanaa, ¡Jesu tari samiitiarohua! ¡Janiya na niqiriini!

Nojoriiri María sequesano cuaracashitirii saaja.

*Jesu muetasacari caapiqui na saquiriojosano pueyacua**(Lc 24.13-35)*

¹² Na nuhuaji, Jesuuri socua caapiqui na pueyacua muetaquiaari nojori quiojosacari tamocora. Nojuajaari tamaatia niquishano quiriquiaa nojoriira. ¹³ Nojori niishishacari nojuacuaja Jesu quiquiaari, nojoriiri ritia riujuuquiaariuhua tamasaca nojorinjiniño nojori numootenuhuara. Naajuhuj, Jesu saquiriojosano pueyari nojori pahuatasano cuaracashitirijuhuj.

*Jesu rootasacari na jiyaramiquishocoriquiano pueya**(Mt 28.16-20; Lc 24.36-49; Jn 20.19-23)*

¹⁴ Tamacari, Jesuuri na once saquiriojosano pueyacua muetaquiaari. Nojoriiri mi-
aquejajinia cajitiuriquiaa jiyacari. Jesuuri jiyacari nojori juaarii cumajiuujiaaca nojori
quiniuucuaaja. Majaari quenaaja nojori tiuuniu quiquiaari nojorijinijinio pueyacua, nojori
sequesacari: “Canaa Jesu niqiriini, samiitiarohuacuaaqui”. ¹⁵ Na nuhuaji, Jesuuri nojori
sequeree:

—Nia quiaare puetunu jiyacajiniajanaa, janiyajiniji Pueyaso rupaa nia pohuatanura,
puetunu nia pohuatasanoocua tiuujiaa pueyapuejanaa jiyanooshaanura. ¹⁶ Cante moo-
jinia tiuquinishiya Pueyaso rupaacua na tiuuniuucuaani, Pueyasoori na jiyatenutaniya na
pueyanora. Saniniuujia, cante Pueyaso rupaacua tiuyaquiyani, nojuajaari saniitiosano
quiniutianiya. ¹⁷ Cucua tiuujiaaari nocuaji pueya jiuujiatesano casaa miiniutianiya
cua cumaacata, pueya niishiniuria Pueyaso rupaaqui seetanu rupaajanaa. Naacua-
tij, cucua tiuuniaa pueya nia quiniuucua, niaari samaruhua tohuatanijionutaniya cua
cumaacata, nia jiyaniquishacari cua sesa. Niaari nia niishiyaquishoo rupaaca pocuajaca
quiniutianiyajuhuj. ¹⁸ Naajuhuj, niaa jaara soconu sajitishaare, niaa jaara casaa raate-
saarejuhuj nia cusojuasaanura juucua, majaari nia cusonu quiniutianiya. Naajuhuj,
cusosuhua nia niasacari nia juaashiquia, cusosuhuari naataconutaniuhua.

*Jesu tacasacariuhua jiyocuacaanu na Queecua**(Lc 24.50-53)*

¹⁹ Na pocuanu nuhuaji, Jiyaniijia Jesuuri tacanishaaquiaariuhua jiyocuacaanu. Nojua-
jaari Pueyaso miaquetajara cajiquiaariuhua. ²⁰ Na nuhuaji, na saquiriojosano pueyari
quiojoquiaari Pueyaso rupaa nojori pohuatanura puetunu jiyacajiniajanaa. Jiyaniijia
Jesuuri pueyaracaanu nojori cumaquiriqiaa. Pueya niqitiriijiaariuhua na cumaacata
na pueya miijosano, pueya niishiniuria maatia, Jesu jiyaramiquishano pueya pohu-
atansanoori seetanu rupaajanaa.

LUCAS NAAJOTASANO JESUCRISTOJINIJI

Niya pohanashiyari casaara Lucas naajiotaqueiaari nioni

¹ Queraatia pueyari suraatia naajionu saniniujuquiaari puetunu canaa tajinia miishanojuanaa. ² Nojoriiri naajioquiaari taa Jesu jiyaramiquishano pueya pohanataquiaari Jesujiniji pajaniyani. Cuno pojoriiri Jesu niquiniaa quiquiaari, shusha poonijionu na coteesacari. Nojoriiri na nuhuaji na rupaa pohanatanaara jiyatesaaquiaari. ³ Janiyari niishiriojoriquiaani, maniniaruhua quiocuara cua naajionurajuhuj cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniji. ⁴ Naacuajitij, quiocuara naajiyaniija na coteenujiniji, seetanujuanaa quia niishiniuria puetunujuanaa, taa quia niishitiojosaacanucujani.

Pueyaso seru pohanatasacari Tiuquinijiona Juan rasaanutaniya

⁵ Herodes jaara jiyaniija quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niquiohuacuajinio supueno quiquiaari. Necocua sesa quiquiaari Isabel. Cuno maajiiri supuetana Aarón niquiohuacuajinio supueno quiquiaari. Nojori supuetanaari mariyata tariucuacaanu pueyacuara secojona quiquiaari. ⁶ Zacaríasri necocua Isabelta maninia miijiaca quiquiaari Pueyaso niqiara. Nojoriiri puetunu Pueyaso rootasanojuanaa tojtijajaca quiquiaari, taa Pueyaso-jiniji caminiujiuniaa naajionuutaquiaaricujani. Nojoriicuara maja na naata sesa casaa tonujusaanu quiquiaari, saaja maninia miijiaca nojori quishacari. ⁷ Nojoriiri maja na muetunu quijia, niyjaru Isabel quiniuucua. Naajuhuj, nojoriiri maja tari na naata muetunu quiquiaari, saaquiapue nojori quishacari.

⁸ Tamacari, Zacaríasri narta pueyacuara secojonaata poonijioriquiaa Pueyaso Secojoua tiajinia Pueyaso niqiara Jerusalén tiacajinia. Jiyacari saniniuuja nojori poonijosacari-iri quiquiaari. ⁹ Shanohua jaanutaajari catijiasaaquiaari puetunu juucajanaa Pueyaso Shuriucua Quiquiojinia, Secojoua tiajinia. Pueyacuara secojo naari jitiquiaari saajia naajosano jacatanura juhua tacuarishijosacari, nojori niishiniuria teyano nojoriinijiniote Pueyaso Shuriucua Quiquio tiuquiniutianiyani, shanohua jaanutaja na catijanura tii. Cuno juuca saniniuuja, saajiaari Zacaríascuara tacatequiaari. Naacuajitij Zacaríasri seeratasaaquiaari tii na tiuquiniuria shanohua jaanutaja na catijanura. ¹⁰ Na catijiasacari, puetunu pueyajanaari Pueyaso secojonuuriquiaa Secojoua tia carijiniacuma. ¹¹ Jiyacaritij, Pueyaso seruuri Zacaríascuara muetaquiaari. Nujuariquiaari shanohua jaanutaja catijiasaqui miaquetajara. ¹² Zacaríasri shiriqiriiri na niquishacari Pueyaso seru. Jiyanhua na puerereeri. ¹³ Pueyaso seruuri na sequaree:

—Maja puerenu Zacaríasnaa. Pueyasocujajari quia secojosano tojiquiaari. Quia niquiocua Isabelri quiaara muetunutaniya. Quiocua na sesojore “Juan”. ¹⁴ Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuquiritianutaniya na rasacari. ¹⁵ Quia niyanuuri cutara pueyano quiniutianiya Pueyaso niqiara. Nojuajaari vino ratuyashijia quiniutianiya, najatunacunio. Pueyaso Sohanuraca pueyano quiniutianiyari na rasaacarijiyojua. ¹⁶ Nojuajaari queraatia Israel pueya tacatonutaniuhua nojori Jiyaniija Pueyasocua. ¹⁷ Nio Juanri pa Jiyaniija puetana quiniutianiya. Nojuajaari pueyara Pueyaso sequesano caminiujiunia supuetana Elías sohanu jitianutaniya, na cumaacanio. Naacuajitij, pueya jiuujia taraajonutaniyari, nojori jiyanooniuria necohua. Naajuhuj, nojuajaari tojtiaashijia pueya rootanutaniya maninia, Pueyaso tojtijajaca nojori quiniuria. Naacuajitij, pueya jiuujiaacari jeenucuasano quiniutianiya pa Jiyaniijaacujaj.

¹⁸ Zacaríasri Pueyaso seru nequesotaree:

—¿Taa cua niishiniutianiyarini quia sequesano seetanujuanaa tohuateenutaniya quiria? Janiyari tari saaquianoni. Cua niquiocuaari motajajuhuj.

¹⁹ Pueyaso seruuri na riucuaaree:

—Janiyacuajajari Gabrieln, Pueyaso taccoji nujuana, na sequesano cua miiniuria. Nojuajaari cua jiyaroree cua pohanatunura quajaniya nio maninia casaa Pueyasojiniji. ²⁰ Quiaritia saniniuuja, cua sequesanoocua quia tiuquiniuuca, quiaari tiquia quiniutianiya. Majaari quia pocuanu quiniutianiya cuara rasaarejaatijia quia niyanu. Naajaa, puetunu cua sequesanojuanaari naa quiniutianiya taa Pueyaso paniyacuajani.

²¹ Jiyacaritij, pueyari Pueyaso quiquio carijiniacuma sashiriquiaa, Zacarías cuara tohuatohuara. Nojoriiri shiriqiriituri pueyaracaanu Zacarías tarishishacari Pueyaso Shuriucua Quiquiojinia. ²² Zacaríasri socua tohuatamohua. Majaari na naata pocuanu

quiriquiaa. Nareja shishinioriquiaari. Naacujitij, pueyari niishirii Pueyasoqui casaa niqutirii Zacarías, Pueyaso Shuriucua Quiquiojinia na quishacari.

²³ Zacarías jaara puecaquiaari puetunu na poonijionu juucajanaa taa na seque-saaquiaaricujani, na tiajinia quiaarohuari. ²⁴ Na nuhuaji, necocua Isabelri manajeree. Na manaja jamaatiaquiaariiri. Majaari na muetanu quiquiaari na tiajiniji cuara na shocojoquiaarijaatijia cinco raza. Nojuajaari tama sequequiaarijaaja: ²⁵ “Quiarijiani, cua Jiyaniijiaari maninia miirii janiya. Majaari socua pueya rerequetenu quiniutianiya janiya, muetujua cua quishacari tari”.

Pueyaso seru sequesacari Jesu rasaanutaniya

²⁶ Seis raza jaara shocojoquiaari Isabel manajesacaricuaa, Pueyasoori na seru Gabriel jiyaroree Nazaret tiacajinia, Galilea jiyajinia. ²⁷ Tamonu niyacoocua na jiyaroreeri, cante tari sequesaaquiaaricujani José jyanishano pueyanota na caminiuria. Na camiriquianoori supuetana jiyaniijia David niquihuacuajinio supueno pueyano quiquiaari. Niyacoo sesa quiquiaari María. ²⁸ Pueyaso seruuri nocua tiuquimiaa. Na sequereeri:

—Janiyari quiocua jiyarosaareeni, Pueyaso shuquiritiasano niyacoona. Jiyaniijia Pueyasoori quiata quiya, socua shuquiriaatia quia quiniuria tamasa maajipohuajiniji.

²⁹ Mariari jyanohua tacaquiaari naa Pueyaso seru sequesacari nojuaja. Nojuajaari tamajaaja niishirioiquiaa: “¿Casaara naa na sequeree janiyani?” ³⁰ Na nuhuaji, Pueyaso seruuri na sequeree:

—Maríanaa, maja puerenu. Pueyasoori quia shuqiritiniutianiya. Quiaacuajaari na timitiasano. ³¹ Quiarijiani, quiaari manajenutaniya. Quiaari cayaniyojua ranutaniya. Quiocua na sesojore “Jesu”. ³² Nojuajaari cutara pueyano quiniutianiya. Sesojosaanutaniyari “Pueyaso Niyanu”, jiyocuacaanu Quijia Niyanu. Pa Jiyaniijia Pueyasoori na jiyatenutaniya Jiyaniijiarajanaa na quiniuria na supuetana David niti. ³³ Israel pueya jiyaniijia quiniutianiyari. Pueyaracaanu jitianutaniya na pueyari. Majaari na shaajenu quiniutianiya Jiyaniijia na quishacari.

³⁴ Mariari Pueyaso seru nequesotaree:

—¿Taa cua manajenutaniyari, niyacaaju cua quishacari?

³⁵ Pueyaso seruuri na sequeree:

—Pueyaso Sohuanuuri quiocua niniutianiya. Na cumaaca naaquiiri quiocua pacunutaniya. Naacujitij, quia niyanuranoni, cunoori Pueyaso Niyanu quiniutianiya. Nojuajaari seetanujanaa Pueyaso tojjia quiniutianiya. ³⁶ Naajuhua, quia supuetanajinijinio motaja Isabelri neyanu ranutaniyajuhua. Cuno maajiiri sequesaaquiaari “niyajaru maajitia”. Naajaa, seis racaari tari na shocojia na manajesacari. ³⁷ Pueyasora, majaari jiyajeneta casaa quiniu. Nojuajaari cumaacaraca na miiniuria puetunu na panishanojua-naa.

³⁸ Mariari sequeree:

—Maniniacuajaqui. Janiyacuajaari cua Jiyaniijia Pueyaso seruni. Pueyaso cuara miiria janiya taa quia sequereecuajani.

Na nuhuaji, Pueyaso seruuri quiacuhua.

María quiasacari Isabel niqiniuucua

³⁹ Mariari jiyacari quiaquiaari na secoonuta Judea jiyajinia, Zacarías tiajinia tamonu tiacajinia. Cuno jiyari tuhananuhuaraca. ⁴⁰ Zacarías tiajinia María tiuquishacari, Isabel sequereeri. ⁴¹ Isabel tojishacari María sequesano nojuaja, ¡conaajaari na jiniacuma nujuanequequee! Pueyaso Sohuanuuri Isabelcua tiuquiqui na cumaaca na jitianura. ⁴² Naacujitij, Isabelri jiyacari na rupaa paaretaree. Naa María sequereeri:

—¡Pueyasocujaari socua maninia miiriuucua quiajaniya tamasa maajipohuajiniji! ¡Maninia miiniutianiya quia niyanujariuhua! ⁴³ ¿Janiyateeri pueya tojishano maajini, cua Jiyaniijia nucua tiuquiniuria cua tiajinia, na niquiniuria janiya? ¡Maja! Naajaa, jiyanojua timiyaniija! ⁴⁴ Shusha cua tojishacari quiajaniya cua sequeyano, cua mueyari cua jiniacuma nujuanequequee na shuqiritiniutia. ⁴⁵ Shuquiriaatia quia quiri, quia tiuuniuucua Pueyaso sequesanoocua quiajaniya.

⁴⁶ Mariari sequeree:

—¡Coojia jyanohua shuqiritiaa cua Jiyaniijia Pueyaso! ⁴⁷ ¡Cua sohuanuuri cua Jiyanoonia Pueyaso timitiaani! ⁴⁸ Juhua najuhuaa quijianijia. Naajaa, Pueyasoori cua jyanoori. Cua saquiriojorucuaari na tojjia cua quishacari. Quiarijiani, pueyari pueyaracaanu cua sequenutaniya: “Pueyaso shuqiritiasano María”. ⁴⁹ ¡Pueyasoori jyanohua maninia miirii janiya! Nojuajaari puetunu cumaacaracajanaa. Nojuajaari tojtaarucujanaa maninia quijia. ⁵⁰ Nojuajaari pueyaracaanu jyanooquiaa na tojtianaa, canapue te na rerequeteyaquijiacuajani. ⁵¹ ¡Nojuajaari

jijyanohua maninia miiquiaa na cumaacata! Nojuajaari niishijia pueya shocotequiaari, canapue te tama na cuaqueyajaaja jiyatequiaari juhua niishijiacaracuajani. ⁵² Nojuajaari cutara jiyaniijianucua jataree, cuno pojori jiyaniishano niishiyashijia pueya jiyatesaanura jiyaniijia nojori niti saniniujia. ⁵³ Miaajeejunucua tootijoreeri maninia samatuuta. Puera casamiriaca pueya taanuquiaariiri, casaaju nojori quojonura. ⁵⁴ Na pueya Israel naacureeri. Majaari na niyajetanu quiquiaari nojoriicua na taraajenu. ⁵⁵ Naa miiquiaariiri taa na sequequiaari pa supuetanaacuajani. Pueyasoori naa pa supuetana Abraham sequequiaari: “Seetanujanaa quiocua taraajenutaniyanijia, quiocuajinio supueriquiano pueycuano”.

⁵⁶ Na nuhuaji, Mariari queraatia tarishiquiaari Isabel tiajinia. Jiuujianaraca raca nuhuaji, Mariari tacatequiaariuhua na tiajiniohua.

Tiuquinijiona Juan rasacari

⁵⁷ Na nuhuaji, Isabel rasacari quiquiaari. Jiyapueratereeri. ⁵⁸ Na shuriucua quiniaa, mariyata na jiyasocucujinio supueno pueyajuhua, nojoriiri jiyanohua shuquiriquiaari nojori tojishacari taa Pueyaso jiyanohua taraajequiaari Isabelcuan, na shuquiritiniuria neyanuta. Nojoriiri Isabelta shuquiriquiaarijuhua. ⁵⁹ Nojoriiri Zacarias tiajinia rerejoquiaari conaaja jiiiasacari ocho juuca, na cararaatiuquia co matesaanura, taa Moisés rootaquiarcuajani. Nojoriiri na sesojonu paniriquiaa juucua Zacarias, na que sesaanucua na quiniuria. ⁶⁰ Na nucuuari saaja sequeree:

—¡Maja! Sesojosaanutaniyano “Juan”.

⁶¹ Pueyari saaja sequeree:

—¿Casaarateni? ¡Majaari quenaaja tamonu quia pueyajinijinio cuno sesaraca na quiniu quiquiaari! ¿Casaara naa quia sesojonu paniyarini?

⁶² Cunora, pueyari na que Zacarias shishinioree na nequesotanura taa na sesojonu paniriquiaa neyanuni. ⁶³ Zacariasri naajioju casaa maseree na naajionura tii neyanu sesarano. Naajioreeri: “Na sesa, Juan”. ¡Pueyari jiuujiateque! ⁶⁴ Jiyacaritij, Zacarias nitiiri sasaquitiacuhua. Juhucatecara pocuarohuari. Pueyaso miishano pohuateree pueya niquiaraari, na shuquiritiasacari Pueyaso. ⁶⁵ Cunora, na tia shuriucua quiniaa pueyari jiuujiateree. Puetunu niojuanaari caminiujiushaquiaari puetunujanaa cuno Judea tuhananuhucua quijia pueyara. ⁶⁶ Puetunu nio tojitianaa pueyajanaari nishiriojonuquiaari. Tama nojoriiaarijia nequesoreetooquiaari:

—¿Casaaquitiijia cuno mueya quiniutianiya na nuhuajitijia?

Pueyari niishiquiaari Pueyasoori seetanujanaa cuno mueyata quiriquiaa, na cumaquiniuria.

Zacarias sequesano na shuquiritiasacari Pueyaso

⁶⁷ Na que Zacarias jiuujiaari jiyanohua mishaja quiriquiaa Pueyaso Sohuanuta. Pueyaso Sohuanuuri na pohuateree. Naaratej, Zacariasri naa sequequiaari:

⁶⁸ —¡Jiyanohua maninia pa Jiyaniijia Pueyaso, pa supuetana Israel Jiyaniijia! ¡Cuaara jiyanohua shuquiritiasaria mijiria na ninuucua na pueyacua, pocuaji na tacunura! ⁶⁹ Pocua jiyaroree cumaacaraca pocuaji Tacuriquianoori. Pa Jiyaniijiaranoori Pueyaso seru David niquihuaacuajinio rasaanutaniya, taa Pueyaso sequequiaari tariucuaaanucujani. ⁷⁰⁻⁷¹ Tariucuaaanu na sequenu panishano caminiujiaacuajari naa pohuataquiaari pa supuetanaa niquiaratej, taa pa paraa na ritianutaniya pocuajini, pa niqiniu paniyaquijia pueyanio. ⁷² Nojuajaari sequequiaarijuhua, majaari na niyajetanu quiniutianiya na sequesano pa supuetanaa, pocua na taraajenu. ⁷³⁻⁷⁴ Pueyasoori pa supuetana Abraham sequequiaari seetanujanaa, nojuajanaari pocuaji ritianutaniya pa paraa, pa puereyaquiniutia nera pa poonijonura shitimia. ⁷⁵ Nojuajaari Abraham sequequiaarijuhua maninia quijia pa jataniniutianiyaquiniiaari, saaja nera pa quiniuria pueyaracaanu. ⁷⁶ Quiajaniya saniniujia, quianuniyojuanaa, quiaari sesojosaanutaniya Jiyocuaaanu Quinia sequenu panishano caminiujia. ¡Quiaari pa Jiyaniijiaranojuanaa puetanutaniya, juhua na nuu jeenucuariquiano! ⁷⁷ Quiocua Pueyaso saquirojosano pueya niishitiojore, nojoriiri na naata jiyanooshano quiniu sesa nojori miishanojinijia Pueyaso pueya nojori quiniuria. ⁷⁸ ¡Pa Pueyasoori jiyanohua jiyanoojia! Pocua taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua. ⁷⁹ Maninia pa cuhuatanutaniyari, maninia pa rucuanenonura Pueyaso niquiara, panaatia poojiacata. Naacuajitij, majaari socua pa cajitiuniu quiniutianiya taraatia ninishiqui, juhua pa jamaca shuriucua.

⁸⁰ Conaajaari maashiquiaari. Nojuajaari tama na cuaqueyajaaja cumaquiquiaari socua seetanujuaanaa Pueyasocua tiuujia na quiniuria. Nojuajaari pueyaracaanu cariquia jiyajinia quijia quiquiaari nojuaja jaara Pueyaso sequenu panishano caminiujiuniu coteequiaariijaatijia narta Israel pueya niqiuara.

2

Jesu rasacari

(Mt 1.18-25)

¹ Tiuquinijiona Juan rasaanu nuhuaji, jiyaca jiyaniijiajanaa César Augustoori Roma tiacajiniji sequequiaari puetunu na jittiasano pueyapuejanaa cuaara serojosaara puetunu nojori jiyacajiniajanaa. ² Pueya jaara coteenujuanaa serojosaaquiaari, Cirenio jiyaniishano pueyanoori jiyacari Siria jiyajinia jiyaniijia quiquiaari. Nojuajaari jiyaniijiaara César Augusto jiyatesano quiquiaari. ³ Puetunu pueyajanaari sequesaaquiaari nojori cuaara quiojohuara na raja tiacajinia, na sesaca naajiotasaanura tii.

⁴ Joseeri jiyacari Nazaret tiacajinia quiriqiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaaquiaaricuaani. Naaratej, Joseeri Belén tiacajinia quiaquiaariuhua. ⁵ Mariari tari sequesaaquiaari nojuaja Joseeta caminiutianiya. Naaratej, Mariari nata quiaquiaarijuhua Belén tiacajinia, nojori sesaca naajiotasaanura tii. José niqiuocuaranoori tariucua manajaraca quiriqiaa. ⁶ Belén tiacajinia nojori quishacari, jiyacari tari quiquiaari María ranu juuca. ⁷ Tii jiyapuerateereeri. Conaaja juiococquiaari toqueraacuacajiniaari. Na nucuaari na niaquiaari juyaca miaqueejajinia. Mariari naa raquiaari cuniqui maja quiquio quishacari nojoriria rucoonnaa tiuquijia tiajina.

Pueyaso seya muetasacari borrego cojuanaa pueyacua

⁸ Belén tiaca shuriucua cuno niucuaaja, borregohua cojuanaari suteriquiaa cuhuariquajinia, na seya nojori cojuasacari. ⁹ Canashiyajuji Pueyaso seruuri nojoriucua muetaquiaari. Jiyaniijia Pueyaso shacantuca cumaacaari nojori cuhuataquiaari. ¡Nojoriiri jiyanoahua shiriqitiurii! ¹⁰ Pueyaso seruuri nojori sequere:

—¡Maja nia puerenu! Niaacua nimiaanijia, jiyanoahua maninia casaa cua pohuatanura niajaniya. Cunora, puetunu pueyajanaari shuquiriniutianiya. ¹¹ ¡Niaacuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristotuhuaaj. ¹² Niaa jaara nocua quiaare, niaari conaaja riuriatanutianiya toqueraacuacajinia jiuicocoso, juyaca miaqueejajinia maano. Naacuajitij, niaari niishiniutianiya, seetanujuaanaari cua pohuatasano niajaniya.

¹³ Jiyacaritij, narta Pueyaso seyari na cojishii. Jiyanoahua queraatia quiriqiaari. Nojoriiri naa maniniuhuaqueetariqiaa Pueyaso:

¹⁴—¡Jiyanoahua maninia pa Pueyaso, jiyocuaaanu Quijia! ¡Nojuajaari jiyanoahua pa shuqiritiasano, na jiyaronuucua jiyacua quinia Jiyanoonia! Naacuajitij, cana Pueyaso shuqiritiaani, nojoriiri jyanootioonutianiya narta pueyata.

¹⁵ Pueyaso seya jaara tacataquiaariuhua jiyocuaaanu na quiojoiuinohua, borregohua cojuanaari tama sequetooquiaariijaaja:

—¡Belén tiacajinia pa quiaarequij! ¡Pa niquishii cuno, casaajiniji pa Jiyaniijia nu-mooteere pajaniyacujani!

¹⁶ Nojoriiri ritia quiojoquiaari. Conaaja riuriatuseeri, María, Josénio. Conaajaari juyaca miaqueejajinia niasano mariquiaa. ¹⁷ Nojori niquishacari conaaja, nojoriiri ritia tii quiniaa pueya caminiujiurii conaajajiniji Pueyaso seru pohuatasano nojori. ¹⁸ Puetunu pueyajanaa, cante nojori pohuatasano tojiriqiaani, nojoriiri juujiatere. ¹⁹ Majaari María niyajetanu quiquiaari puetunu nojori pohuatasanojanaa. Noojajinia na ni-ishiriojoriqiaa pueyaracaanuuri. ²⁰ Borregohua cojuanaari quiojoquiaariuhua. Nojoriiri Pueyaso maniniuhuaqueetariqiaa nojori tojishanojiniji, nojori niquishanojinijinio. Puetunujuanaari naa quiquiaari taa cuno niucua Pueyaso seru pohuataree nojoricujani.

Conaaja Jesu pasacari Pueyaso Secojoua tiajina, Pueyasora jiyatesocoriquiano

²¹ María conaaja jaara ocho juuca jittiaquiaari, na cararaatiuquia coori miatesaaquiaari, taa Moisés rootaquiaaricujani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Mariacuajani, na manajeyaquishacarijia.

²² Na nuhuaji, Moisés sequesano juucaari quiquiaari na nucua neyacata cuaara juhua tuteera, jeequesano nojori quiniuria Pueyaso niqiuara, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. ²³ Na queyari naa miiquiaaritij, tariucuaaanu Pueyaso Rupajinia naajiotasano tojtiajaca nojori quiniucua. Naajiotasanoori naa quiyatej: “Puetunu

nia jiyapueranuhajanaa cuaara Pueyasora jiyatesaaria". ²⁴ Naaratej nojoriiri quiaaree na seru mosaanura nojoriicuara Pueyaso Secojoja tiajinia, juhua jeequesano nojori quiniuria Pueyaso niquiara, taa pueya rootasaaquiaari Moisés naajiotasanojinijicuaiani. Pueyasoori naa sequequiaari Moisés tarijiatej: "Cuaara puecoosaaria caapiqui mococoonu. Mococoonu jaara quiyaquiri, cuaara puecoosaaria caapiqui shinjia".

²⁵ Jiyacaritij, tamonu pueyanoori Jerusalén tiacajinia quijia quiriquiaa. Na sesa quiquiaari Simeón. Nojuajaari maninia mijia quiquiaari Pueyaso niquiara. Pueyara-caanu Pueyaso shuquiritiaja quiquiaariiri. Nojuajaari pueyaracaanu sashijia Pueyaso cuaara jiyarooraa Israel pueyacuaji Tacuriquiano. Nojuajaari Pueyaso Sohanu jiiitiaja. ²⁶ Pueyaso Sohanuuri na niishitiquiaari majaari na shaajenu quiniutianiya nojuaja cuaara niquiri Cristojaatijia, Pueyaso jiyarosaariquiano. ²⁷ Pueyaso Sohanuuri na jiyatequiaari namitia cuno juuca Pueyaso Secojoja tiajinia. Naacuajitij, Jesu jaara pasaaquiaari Secojoja tiajinia, nera na miishaanura puetunu tariucuacaanu rootasano-juanaa, Simeónri jiyacari tii na niquirii. ²⁸ Simeónri Jesu paree. Na cacanuureeri. Naa Pueyaso sequeree jiyanoohua na shuquiriniutiaari:

²⁹—¡Cua Jiyaniijianaa, tariucuaja! ¡Quiarjia cutara cua naata cusonu juhujaniya, shuquiri-aatia cua quishacari! Quiaacuajaari tari cua niqitirii tarijia quia sequesano janiya, quia seru cua quiniucua. ³⁰ Tari niquirii quia Jiyarosanocujaniija, canacuaji Tacuriquiano. ³¹ Nojuajaari quia niqitiosano puetunu jiyacajinia quinia pueya-pueecuarajanaa. ³² Nojuajaari puetunu taucuaca jiuujajanaa cuhuatanutaniya, maninia nojori niishiniuria quiajaniya. Naajuhuj, quia pueya Israelni, nojoriiri tamasa pueya shuqiritiasano quiniutianiya na seera.

³³ Jesu que, na nucuajuhuj, nojoriiri jiuujatereee naa Simeón sequesacari conaajajiniiji. ³⁴ Na nuhuaji, Simeónri nojoriicua niaree na juashiquia. Naa sequereeri:

—Pueyaso cuaara jiiitaara maninia nijaniya.

Jesu nucua María sequereejariuhuj:

—¡Cua tojiri! ¡Nio conajaari cutara pueyano quiniutianiya! Queraatia Israel pueyari juhua tiuriniutianiya nojori ruoretasacari nojuaja. Saniniuujia, queraatia Israel pueyari cumaatia nuuatujuaca quiniutianiya, nocua nojori tiushacari. Na cumaacata na miniucua, pueyari na naata Pueyaso niishiniu maninia. Naajaa, queraatia pueyari na ruoretanutaniya saaja. ³⁵ Naacuajitij, tama pueya niishirojosano noojiacajinijaariija niishishaanutaniya. Quiaa saniniuujia, jiyanoohua taraatiaari quiniutianiya. Quioojaari juhua mueruuta tohuariquiitishaanutaniya quia mueyacia quia miishacari.

³⁶ Cuniqijia, Pueyaso Secojoja tiajiniani, tamonu motajaari tii quiriquiaajuhuj. Cuno motajaari Pueyaso sequesano caminiujiunia quiquiaari. Na sesa quiquiaari Ana, Fanuel niyatu. Nojuajaari supetana Israel niyanu Aser niqiuoacuajinio supeno maaji quiquiaari. Jiyanoohua motaja quiquiaariiri. Shusha niyocoo na quishacari, nojuajaari camiquiaari. Na nuhuaji, siete marijaari na shocojoquiaari neyacata na quishacari. ³⁷ Neyaca cusonu nuhuaji, socua ochenta y cuatro marijia na shocojoquiaari mashiquio na quishacari. Nojuajaari pueyaracaanu quiquiaari Pueyaso Secojoja tiajinia, Pueyaso na shuqiritiasacari juuca, niucuanio. Nojuajaari sequayarucua miaqueyaquiquiaari Pueyaso na secosacari pueyaracaanu. ³⁸ Simeón pocuasacariija, jiyacaritij, Anaari nocua nimiaa. Na niquishacari conaja Jesu, Anaari noojajinia niishiquiaari cante nojuajani. Cunora, Pueyaso sequeree na shuquiriniutiaari: "¡Paacarasho!" Na nuhuaji, nojuajaari juhucatecara Jesujiniji pohuataree Pueyaso Jiyarosocoriquiano sashijia pueya niquiara. Nojori sequereeri:

—¡Niocujaari pa sashishano pa pueyacuaji Tacuriquiano!

Na queya tacartasacariuhua conaja Nazaret tiacajiniohua

³⁹ Jesu queyari puetunu Moisés naajionejinia Pueyaso rootasanojuanaa tucuaquiaari na conajara. Na nuhuaji, nojoriiri Galilea jiyajinaria tacatequiaariuhua tama nojori tiacajiniohuaaja, Nazaret tiacajinia. ⁴⁰ Naatujua Jesuuri maashiquiaari. Socua cumuecara quiquiaariiri, maninia niishijiaranio. Pueyasoori jiyanoohua na naacujua.

Mashajaniyoja Jesu quishacari Pueyaso Secojoja tiajinia

⁴¹ Puetunu marijarajanaa, Jesu queyari quiojoquiaari Nazaret tiacajiniji, Jerusalén tiacajinaria, Pascua juacajinia nojori queranacunura. ⁴² Doce marijia jaara Jesu shocojoquiaari tari, Jesuuri nojoritia jiyacari quiaquiaari shushajanaa, taa nojori quianu jii-tiquiaaricujani puetunu marijarajanaa. ⁴³ Queranacunuunu jaara puequequiaari, Jesu queyari quiojoriquiohua juhujaniya. Jesuuri jiyacari Jerusalén tiacajinia jiyojequiaari. Majaari na queya niishiniu quiriquiaa. ⁴⁴ Nojoriiri jiyaniquiaari Jesu naasucua narta quiojonaa tajinia quiariquiohuajuhuj. Naacuajitij, nojoriiri juhujaniya rucuanereee

puetunu cuno juucajanaa. Cuno niucuaa, nojoriiri Jesu pajequiaari nojori pueya tajinia, nojori niishishano pueya tajinianio. ⁴⁵ Shaaqui quiriquiaari. Cunora, nojoriiri Jerusalén tiacajinia tacatequiaariuhua, tii na pajenuhuara.

⁴⁶ Jiuujianaraca juuca nuhuaji, nojoriiri socua Jesu riuriataquiaari Pueyaso Secojua tiajinia, Moisés Rootasanojiniji niishitiojanaa pueya tajinia cajiyo. Nojori tojiriquiaari. Nojori nequesoreetariquiaaariuhuj. ⁴⁷ Puetunu pueyajanaa, canapue te na tojtiriarquiaani, nojoriiri jiuujiatequiaari niishijia Jesu quishacari. Jesuuri maninia nojori riuhaneriquiaa saaja, nojori jaara na nequesoreeriquiaa. ⁴⁸ Na queya jaara na niquiquiaari, nojoriiri shiriquitiuhuaari. Na nucuaari na sequeree:

—Quiyanunaa, ¿casaara naa quia miiri canaani? ¡Janiyari quia queta quia pajeriquiaani jiyanohua canaa tacaaniuta quioqua!

⁴⁹ Jesuuri na riuucaree:

—¿Casaara nia pajeriquiaa janiyani? ¿Majateeri nia niishiniu, janiyari cua Que Secojua tiajinia quiniucuaa jiatiaani?

⁵⁰ Majaari nojori niishiniu quiquiaari Jesu sequesano.

⁵¹ Jesuuri na queyata quiaarohua nojori tajiniohua Nazaret tiacajinia. Na queya tojijia quiquiaariiri. Na nucuaari pueyaracaanu noojiajinia racataja puetunu na niishishanojuanaa neyanu Jesujiniji. ⁵² Jesuuri socua maashiquiaari, socua niishijara quiquiaariiaariuhuj. Pueyaso shuquiritiasano quiquiaariiri. Puetunu pueyajanaari na shuquiritiquiaarijuhuj.

3

Tiuquinijiona Juan pohuatasacari Pueyaso rupaa cariquia jiyajinia (Mt 3.1-12; Mr 1.1-8; Jn 1.19-28)

¹ Na nuhuaji, Tiuquinijiona Juanri Pueyaso rupaa pohuatanu coteequiaari. Jiyacarij, quince marijiaari tari shocojoquiaari César Tiberio, jianiijijanaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacarij, Poncio Pilatoori jiyaniijia quiriquiaa Judea jiyajinia. Herodesri saniniuujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaajuhua Iturea jiyajinia, Traconite jiyajinianio. Lisanasri jiyaniijia quiriquiaa Abilinia jiyajinia. Puetunu cuno jiyaniijianucujanaani, nojoriiri jiyaniijianucuaara César Tiberio jiyatesano quiquiaari cuno jiyacajinia. ² Jiyacarij, Anásri Caifásta Judiocuacaacuara secोजनाa jiyaniijianucuaa quiriquiaa. Jiyacarij, Zacarias niyanu Juanri cariquia jiyajinia quiriquiaa. Tii na quishacari, Pueyasoori na rupaa na niishitiquiaari. ³ Naaratej, Juanri puetunu Jordán moo shuriuquico jiyacajanaa tajiquiaari na poojotasacari Pueyaso rupaa pueya niquiaari. Nojuajaari naa pohuataquiaarijij:

—¡Nioojia nia tacatore maja socua sesa nia miiniuria, moojinia cua tiuquinijionura nijaniya, Pueyaso jiyanooniuria nijaniya sesa nia miishanojiniji!

⁴ Naacuajitij, supuetana Isaías naajiotasanoori tohuatteequiaari. Pueyaso sequenu panishano caminiujuunia na quiniucuaa, nojuajaari naa miriqui naajiotaquiaari supueriquiano Juanjiniji:

“Pueyano rupaari tojishiya cariquia jiyajinia nacaano. Sequeyari: ‘¡Jiyaniijia nuura nia jeenucuare! ¡Puetunu maninijanaa nia nuunure, maja shuutiuniu na quiniuria!

⁵ ¡Puetunu tacocujanaa cuaara mishiquiojosaaria maninia jamatunu na nuu quiniuria! ¡Puetunu tuhananuhujanaa cuaara jiuuriiosaaria jacananu na nuu quiniuria! ¡Shuyorocotunu nuu cuaara pooquareesaaria! ¡Puetunu surocoshiquiajanaa cuaara mishiquiojosaaria jacananu na nuu quiniuria! ⁶ Naacuajitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanootriquiano pueyan!’ ”.

Naa miriqui Isaías naajiotasanoori, cunoori pueya numooteriquiaa juhuacarijia nojori jeenucuanura noojiaa, Jiyaniijia Jesu tojtiajaca nojori quiniuria.

⁷ Pueya jaara quiojoquiaari na tiacajiniji Tiuquinijiona Juancua, Juan tiuquinijionura nojori, Juanri naa nojori juaaquiaari:

—¡Niaacuajaari juhua sacocua! ¿Cante nia numooteree nia mashiniuria jiyanohua Pueyaso saniitonu panishacari nijaniyani? ⁸ ¡Maninia miijia nia quiri, canaa niishiniuria niaari seetanujanaa nioojiaa tacatoree sesa nia miniuujiniji! ¡Majaari najuhuaana tama nia cuaqueyajaaja nia sequenu: “Pueyaso pueyanonijia, supuetana Abrahamjinijinio cua supenuucua!” ¡Nia niishiri, Pueyaso jaara paniri, nojuajaari na naata nio saijiniji shipininiu Abraham niqiohuarajuhuj! ⁹ ¡Pueyaso cajiiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijasocoriquiano.

Naajuhuj, niajaniyari juhua sesa muetuna naana, maninia miyashijia nia quishacari. ¡Niaari quera saniitioshiyacuaaja!

¹⁰ Naaratej, pueyari Tiuquinijiona Juan nequesotaree:

—¿Taa canaa miyarinitioj?

¹¹ Juanri nojori riucuaaree:

—Cante queraquaya toqueracani, nojuaja cuaara niqutioora taque cante toqueejuni. Naajuhuj, cante miaquesanoracani, nojuaja cuaara niqutioora miaquesanojunucua.

¹² Roma tiacajinia quijia jiyaniijajanaa Césarra cumaneeca masejonaari Tiuquinijiona Juancua nijioquiaarijuhuj. Nojoriiri tiuquinijosano quiniu paniriquiaajuhuj. Naaratej, nojoriiri Juan nequesotaree:

—Niishitiojonanaa, ¿canaarijiataj, casaa canaa miyarinjia?

¹³ Juanri nojori riucuaaree:

—Maja puera cumaneeca nia masenu pueyajiniji. Saaja nia jiyaniijia sequesano nia masejore.

¹⁴ Naajuhuj, soldadohuari Tiuquinijiona Juan nequesotaree:

—¿Canaarijiataj? ¿Casaa canaa miiniutianiyarinijia?

Juanri nojori riucuaaree:

—Niaacuajaari puecotajaraca. Naajaa, majaari pueya casami nia jaariuutianu, nojori nia miananajonuta, nojoriucua nia tonjusacarijuhua nia sapojonuta. Juhujaniya nia quiri saaja nia jiyaniijia niqutiosano cumaneecata.

¹⁵ Pueyari jiyanhua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriqiano niquniucua jiaatiaja. Naaratej, nojoriiri jiyaniriquiaa Tiuquinijiona Juan naasucua Cristo, tariucuaaanu Pueyaso sequesano na Jiyarosocoriqianotej. ¹⁶ Nocuaaji, Tiuquinijiona Juanri puetunu pueyajanaa sequeree:

—Janiya nareja nia tiuquinijia moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhujia niniutianiya. ¡Nojuajaari Pueyaso Sohuanu tiuquinijionutaniya nioojajinia, na cumaaca nia jitianura, seetanujanaa maninia mijia nia quiniuria! ¡Nojuajaari juhua manitia nia saniniujuniutianiyajuhuj, maninia jiuujaraca nia quiniuria! ¡Nojuajaari socua jiyanhua cumaacaraca janiyajiniji! Janiya maara shuquiriaatia quirini, nojuaja jaara cua sequere cua naacutana nojuaja juhua na seru, quenaaja na sapatu neyocua cua saacatanura. ¹⁷ Niaari niishiyacuaaja taa pueyano miiquiaa na trigoni paratu panura na cocua, na sucuanio, saniniuuja na jajau na racatocoriqiano tiajiniaaco. Naajuhuj, cuno pueyanoori tari niya qujora na pueya na saquisiojonura na tojiyashijia pueya tajiniji, na rijiosocoriqiano nata nojori quiniuria. ¡Sesa pueyari juhua trigo sucua catijasaanutaniya saniniuuja! ¡Nojoriiri jatasaanutaniya manijinija! ¡Cuno maniiri maja na maquesanu quiniutianiya!

¹⁸ Tiuquinijiona Juanri naa pohuataquiaari Pueyaso rupaa pueya niqiuera. Maninia rupaari, na tojitiaja pueya quiniuria shuquiriaatia. Socua queraatia quiquiaariiri na pohuatasano na numootenura pueya. ¹⁹ Jiyaniijia Herodesri jiyacari tarajanu Felipe niqiuocua jitiariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyojoquiaari sesa na miishanojiniji. Herodesri maja na tojinu quiquiaari saaja. Jiyaniijia Herodesri socua queraatia sesa casaa mijia quiquiaari. ²⁰ Na nuhujia, jiyaniijia Herodesri socua sesa miiquiaari: Tiuquinijiona Juan nujuatejojuajiniari.

Jesu tiuquinishacari moojinia

(Mt 3.13-17; Mr 1.9-11)

²¹ Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaarijuhuj. Jesu tohuatasacari moojiniji, na que Pueyaso secoriquiaari. Jiyacariitij, jiya cajiniocuaari riatequee. ²² Pueyaso Sohuanuuri Jesuucua roseyaree juhua mococoonu niquishano. Jiyocuaaanuji, Pueyaso rupaari tojishaaree sequeyano:

—¡Quiaacuajaari cua panishano quianuniojuja! ¡Jiyanhua quia shuquiritiaanjia!

Jesu supuetanaa sesaca

(Mt 1.1-17)

²³ Treinta marijia jaara na shoconujuquiaari, Jesuuri na Que Pueyasora poonijionu coteequiaari. Pueyari jiyaniquiaari José naasucua seetanujanaa na que quiquiaari. Joseeri Elí niyanu quiquiaari. ²⁴ Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. ²⁵ Joseeri Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. ²⁶ Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari. Semeiri Josec niyanu quiquiaari. Josecri

Judá niyanu quiquiaari. ²⁷ Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. ²⁸ Neriiri Melqui niyanu quiquiaari. Melquiiri Adi niyanu quiquiaari. Adiiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. ²⁹ Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. ³⁰ Matatri Leví niyanu quiquiaari. Leviiri Simeón niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. ³¹ Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari Natán niyanu quiquiaari. ³² Natánri David niyanu quiquiaari. Davidri Isaí niyanu quiquiaari. Isaíiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. ³³ Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. ³⁴ Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. ³⁵ Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. ³⁶ Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeeri Lamec niyanu quiquiaari. ³⁷ Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. ³⁸ Cainánri Enós niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

4

Samaruhua jiyaniijia saniniujiushacari Jesu (Mt 4.1-11; Mr 1.12-13)

¹ Jesu quiasacariuhua Jordán moojiniji, Pueyaso Sohuanuuri noojiajinia quiriquiaa puetunu na cumaacajanaa na jitianura. Pueyaso Sohuanuuri na jiyatequiaari pueya jiyaqui cariquia jiyajiniara. ² Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quientaari tii na quishacari. Na nuhuaji miaajequiaariiri. ³ Jiyacaritij, Sesaacaari na sequeree:

—Quiaa jaara seetanujuanaa Pueyaso Niyanu quiri, nio saajia quia jataniri neecaruura na quiniuria.

⁴ Jesuuri saaja na riucuaaree:

—Pueyaso Rupaajiniacuajaari naa naajiotasano quiya:

“Pueyanoori maja saminio na quiniu saa miaquesanotaja. Seetanujuanaa saminio quiyari na tojishacari puetunu Pueyaso Rupaajanaa”.

⁵ Na nuhuaji, Sesaacaari Jesu jiyataaree jiyanoehua jiyaconaja tuhuananuucua. Sesaacaari ritia niqutiriiri Jesu puetunu mijiria jiyacajanaa. ⁶ Jesu sequereeri:

—Janiya quia niqutionutaniya puetunu nio jiyaca jiyaniijianucua cumaacajanaani, maninia jiyaniijiajanaa quia quiniuria mijiria. Janiyari puetunu nio jiyacajanaa niq-uitiosaquiarini. Naacuajitij, janiyari cumaaca niqutioquiaani cana cua niqutionu paniyacuajani, jiyaniijia na quiniuria. ⁷ Puetunjuanaari quiara quiniutianiya, quiaa jaara cucuara mojoquetare quia shuquiritianura janiya.

⁸ Jesuuri saaja na sequeree:

—Pueyaso Rupaajiniacuajaari naa naajiotasano quiya:

“¡Quia Jiyaniijia Pueyaso quia shuquiritiare! ¡Saaja nojuaja quia tojiri!”

⁹ Na nuhuaji, Sesaacaari Jesu jiyataaree Jerusalén tiacajinia. Na tacaniriiri Pueyaso Secojoua tia cacojiria, jiyocuacaanu. Jesu sequereeri:

—Niiquiji quia jaataare jiyocua, quiaa jaara seetanujuanaa Pueyaso Niyanu quiri.

¹⁰ Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. ¹¹ Nojoriiri quia quianutaniya, saajiaacua quia jiriataaquiniuucaaji”.

¹² Jesuuri na riucuaaree saaja:

—Naa naajiotasano quiyajaariuhua Pueyaso Rupaajinia:

“Maja quia Jiyaniijia Pueyaso quia saniniujiuniu”.

¹³ Sesaacaari naa Jesu saniniujiuniu puecaquiaari puetunujuanaa. Majaari quenaaja na naata quiriquiaa sesa na miitiniuria. Naaratej, rupaquijia na tarinitiaquiaari tamacariri-aari.

Jesu coteesacari na poonijosano miiniu Galilea jiyajinia

(Mt 4.12-17; Mr 1.14-15)

¹⁴ Na nuhuaji, Jesuuri tacatequiaariuhua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujiutiooquiaari. ¹⁵ Jesuuri Pueyaso secojojua tiajiniaqueya niishitiojoquiaari puetunu tiacajiniajanaa cuno jiyajinia. Puetunu pueyajanaari na timitiaja.

Jesu quishacari Nazaret tiacajinia

(Mt 13.53-58; Mr 6.1-6)

¹⁶ Jiyacaritij, Jesuuri quiaquiaari Nazaret tiacajinia, tee na canashitishaaquiaaricujani. Samaatenu juuca, Jesuuri Pueyaso secojojua tiajinia tiuquiquiaari taa na jiitiquiaari miini-ucujani. Nojuajaari nujaquiaari Pueyaso Rupaa serojonura pueya niquiara. ¹⁷ Pueyari na niqutioree tariucuaaanu Pueyaso sequesano caminiujinia Isaías naajionee jiuniosano, pueya niquiara na serojosocoriquiano. Jesuuri na saacataree. Serjonu coteereeri tee nio naajiotasano quiyacuajani:

¹⁸ “Pueyaso Sohuanuuri coojajinia quiyani, na cumaaca cua jiitianura. Naacuajitij, Pueyasoori cua seeratarucuaa maninia rupaa cua pohuatanura casamiijiuniucua pueya niquiara. Cua jiyaroreejaariuhua Sesaaca quiosano pueya cua pohuatanura maninia rupaa Pueyasojiniji. Naacuajitij, nojoriiri cartesano quiriohua Sesaaca sapojosanojiniji. Cua jiyaroreejaariuhua cariyojuarujuri pueya namijia cua jeecanura, maninia niqijiaara nojori quiniuhua. Cua jiyaroreejaariuhua taraatia miitiasano pueya cua jiyatenura shuquiriaatia quijiacara. ¹⁹ Cua jiyaroreejaariuhua cua pohuatanura pueya niquiara, quarijiaari Jiyaniijia Pueyaso jiyanooshacari pueya”.

²⁰ Na serjonu nuhuaji, Jesuuri naajionee jiuniorohua. Na niqutiiorohua na cojuanaari. Jesuuri cajiriohua. Puetunu pueyajanaari tacuriitia na shootiaturiquiaa. ²¹ Jesuuri juhuacatecara pocuarohua. Naa sequereeri:

—Quiarijiani, Pueyaso Rupajinia nio naajiotasanoori tari tohuateeree nia niquiara.

²² Puetunu pueyajanaari jiuujiateree shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojoriijaarijia nequesoreetooriquiaa:

—¿Majate nio pueyano José niyanucuaja, niya pa tiacajinia maashiniotej?

²³ Jesuuri nojori sequeree:

—Niaa jiyoteeri cua sequenu paniya nio tariucuaaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miitiniuria cua cumaacata niya tama cua tiacajiniaajaajani, taa nia tojiqiuianucuaja cua miishanojiniji Capernaum tiacajiniacuaani.

²⁴ Jesuuri socua sequeree:

—Seetanujuanaa nia sequenijia, puetunu Pueyaso sequenu panishano caminiujini-aajanaari tojishoo quijia, tama nojori tiacajiniaajaaja. ²⁵ Supuetana Elías quishacari, queraatia mashiquiopueeri quiquiaari Israel jiyajinia. Jyanohua miaajesacari quiquiaari-iri maru niyaquishacari pueyaracaanu. Jiuujianaraca marijiaari shocojoquiaari socua seis racanio, maru niyaquishacari. ²⁶ Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacuajitij, cuno taatu mashiquioori miaquesano jiitiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniucua Pueyasooocua tiuujia, cuno taatu miaquesanoori maja na puetanu quiquiaari nojoriira. ²⁷ Naajuhua, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojoriininijinio naatanishaanu quiquiaari Eliseo jiitiasano Pueyaso cumaacata. Saaja cuno tahue Naamánri naatanishaaquiaari cutara, Siria jiyajininijinio pueyanoni.

²⁸ Pueyaso secojojua tiajinia quiniaa pueya tojishacari naa Jesu pohuatasanootej, puetunu nojoriijanaari jyanohua juaaquioree. ²⁹ Nojoriiri saneecuatuquee. Jesu caponeeturee nojori tiacajiniijiiri. Nojoriiri Jesu jaatucucuaari socua jiyocuaaanu nojori quijia tuhuananujinijiria, teyanooocua nojori tiaca tiasano quiquiaaricujani. Nojoriiri na capotunu paniriquiaa juucua tajojiyaji naa na monura. ³⁰ Jesuuri saaja nojori tajiniaaco canujuquiaari juhuajaniya. Quiniquiji tamocora quiaareeri.

Samaruraca pueyanojiniji pohuatasano
(Mr 1.21-28)

³¹ Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. ³² Nojoriiri jiuujiatereee na niishitiojosano nojori tojishacari. Na niishitiojosanoori seetanujuanaa cumaacaraca quiquiaari juhua jiyaniijia niishitiojosano, maja juhua nareja rootasano caminiujuunia.

³³ Pueyaso secjojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanoohua nacareeri:

³⁴ —¡Nazaret tiacajinijinio Jesunaa! ¿Taa quia miiniu paniya canaani? ¡Canaa quia niquiri nareja! ¿Quiaate tari niyaree canaa saniitionuucua? ¡Quia niishiyacuajanijia, cante quiajaniani! ¡Quiaacuajaari sesa miyashijia Pueyaso Niyanu!

³⁵ Jesuuri samaru sequeree:

—¡Quia sanaajere! ¡Quia tohuatate nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quirii pueyano. ³⁶ Puetunu pueyajanaari shiriqitiurii. Tama Jesujiniji sequetooreejaarijia:

—¡Nia tojiri! ¿Taamueca rupaatucuaanojoni? ¡Nio pueyanoori samaruhua jiyaronu niishiya juhua jiyaniijia! ¡Na rupaari jiyanoohua cumaacaraca! ¡Cunora samaruhua tohuataniriiri!

³⁷ Puetunu cuno jiyajinijanaa, Jesu miishanojinijiiri caminiujuushaquiaari pueya niquiara.

Jesu naatanishacari Simón Pedro reyarucua
(Mt 8.14-15; Mr 1.29-31)

³⁸ Jesuuri Pueyaso secjojua tiajiniji tohuareetaquiaari na pueyata. Quiojiyareeri. Simón tiajinia tiuquitiushiiri. Simón reyarucuaari jiyacari jiyanoohua naseeca matariquiaa. Pueyari Jesu sequeree na naataniniuria. ³⁹ Jesuuri cusosu caco nujuasee. Jesuuri na naseeca cusonu jiyaroree. ¡Na naseecaari ritia shintiaquee! Tariucua jiyotuucari jiyacari sanemaa, na tiajinia quiniaa pueya na mianuutenura.

Jesu naatanijosacari queraatia cusosuhua
(Mt 8.16-17; Mr 1.32-34)

⁴⁰ Pananu tiuquishacari, puetunu pueyajanaa, cante cusosuhua jiitiaquiaarini, nojoriiri na jiyataquiaari Jesuucua. Jesuuri na juaashiquia niaquiaari puetunu cusosuhuaacujanaa. Nojoriiri queraatia tamaatia cusonu jiitiaquiaari. Jiyacari na naatanijioree puetunujuanaari. ⁴¹ Naajuhuaq, queraatia samaruhuari tohuareetaquiaari cusosuhua-jiniji. Samaruhuari naa nacaquiaari Jesuucua:

—¡Quiaacuaja Pueyaso Niyanu!

Jesuuri nojori juarii. Majaari na shanacunu quirii nojori pocuanura, nojori mariqui pueya niquiara pohuatareeri, nojuajaari Pueyaso Jiyarosano.

Jesu pohuatasacari Pueyaso rupaa Pueyaso secjonuujua tiajiniaqueya
(Mr 1.35-39)

⁴² Tariquiiicuaqi, Jesuuri tiacajiniji quiaquiaari tamaquiiicua tamajaaja. Pueyari na pajequiaari. Nojoriiri socua nocua tiuquiiioquiaari na pajenuusacari. Majaari nojori cartenu paniniu quiquiaari Jesu quianura cuniquiji. ⁴³ Jesuuri nojori sequeree saaja:

—Janiyari jiyarosaaquiaarini pueyapue niquiara cua pohuatanura quiarinio Pueyaso Rupaa. Quiarijiani, Pueyasoori pueya jiyanooniu paniya, nojori quiniuria na pueya, nojori tiushacari nocua. Naaratej, janiyari na rupaa pohuatanura quianu paniya tamonu tiacajinijaniuhuaq. Janiyacuajaari cunora jiyarosaaquiaarini.

⁴⁴ Naacuajitij, Jesuuri puetunu Judiucua jiyajinijanaa rucuanajoquiaari Pueyaso rupaa pohuatanura puetunu Pueyaso secjonuujua tiajiniaqueyajanaa.

5

Sapitaaqara jaquerootanaa shiriqitiushacari
(Mt 4.18-22; Mr 1.16-20)

¹ Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohuatariquiaa. Puera jiyanoohua pueyari nocua catecanoquiaari catecapi na tojtianura nojuaja. Nojoriiri Jesu tanuujuriquiaa puera. ² Jesuuri caapiqui bote niquiri caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. ³ Jesuuri Simón botejinia tacaquiaari. Simón sequereeri cuara bote juariocotaara caminia jiuujiajinia naata. Na nuhuaji, Jesuuri cajirii. Quiniquiji pueya niishitiojonu coteequaariiri. ⁴ Jesu jaara niishitiojonu puecaquiaari, Simón sequereeri:

—Querónijinia pa jaaretaare. Niocua tii jartasee nia shiyaruhua sapitiaajara.

⁵ Simónri na riucaaree:

—Niishitiojonanaa, canaacuaajaari tari jaquerootariquiaa najuhuanani. Canaari naajaa nocua juhuaquemaani. ¡Saa shaa quiriquiaanojua! Naajaa, quiaacuaja na sequeya, socua canaa jaquerootarohuacuaraquui.

⁶ Nojori jaara socua na shiyaruhua jartaquiaariuhua, jiyanoohua queraatia sapitiaaja ritiatureeri! Shiyaruhuari sureequetanu coteequiaari. ⁷ Nojoriiri jatiqúi nata poonijionaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqúi bote mishinijioturee sapitiaajataari. ¡Quera tiuquitiariquiaari queraatia sapitiaajata! ⁸ Simón Pedro niquishacari naa Jesu miishano nojoriiriatej, Jesuucuaa mojoquetareeri. Jesu sequereeri:

—¡Jiyaniijianaa, maja cua rupuenú socua! Janiya puera sesa pueyanoni quia rupuenú cua quiniuria.

⁹ Simónri shiriiquiríi, jiyanoohua queraatia sapitiaaja nojori quiasacari. Nata quiniaa pueyari shiriiquitiriijuhua. ¹⁰ Cuno pojoritia quiriquiaajaariuhua Zebedeo niquiohúa, Santiago, Juannio. Nojoriiri Simón cojiniaa quiquiaari. Jesuuri Simón sequereeri miriqui:

—Maja puerenu. Quiaari saniniuujia pueya quioojua quiniutianiya juhua sapitiaaja.

¹¹ Nojori shiitiasacari, nojoriiri puetunu na casaajanaa tiujiaquiaari Jesuta nojori quiojonura.

Jesu naatanishacari lepraraca cusosu
(Mt 8.1-4; Mr 1.40-45)

¹² Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocuara jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusonujiniji.

¹³ Jesuuri na quiaree. Na sequereeri:

—Taaquiriirini. Quia naataniniu panianijia. Quia cuaqueya cuaraa jeequehuara.

Naa na sequesacari, na lepraari shaajequee na cuaqueyajiniji. ¹⁴ Jesuuri na rootaree maja na pohuatanura na miishano tamasaca niquiara. Na sequereeri:

—Saaja pueyacuara secojona jiyaniijia quia niquitishii quia cuaqueya, na cartenuhuara quiajanía, pueya tajinia quia rucuanefonuhua juhuajanía. Naajuhua, quia seru quia niquitioosee Pueyasocuaa catijasocoriquiano. Naa quia miiri taa Moisés rootaquiaaricuajani, puetunu pueyajanaa niishiniuria quiaa tari jeequerohua quia cusonujiniji.

¹⁵ Maninia Jesu miishanojinijiiri jiyanoohua socua tamaquicua caminiujiushaaquiaari pueya niquiara. Naaratej, jiyanoohua queraatia pueyari nocua nijioquiaari na tojinuria, mariyata Jesu naatanijionura nojori, nojori cusonujiniji. ¹⁶ Jesuuri saaja pueya quiaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

Jesu naatanishacari cumatacuruhuana cusosu
(Mt 9.1-8; Mr 2.1-12)

¹⁷ Tamonu juuca, Jesuuri pueya niquiara niishitiojoriquiaa. Na tojitanaa tajinia cajituriquiaajaariuhua Fariseocuaa, Moisés Rootasanojiniji niishitiojonaano. Nojoriiri nijioquiaari puetunu Galilea jiya tiacajinijianaa, Judea jiya tiacajiniji, Jerusalén tiacajinijinio. Jesuuri jiyanoohua Pueyaso cumaaca jitiariquiaa cusosuhua na naatanijionura. ¹⁸ Jiyacari, socua pueyari tiuquijioquiaari. Nojoriiri cumatacuruhuana cusosu patariquiaa na matujinia. Nojoriiri juucua na tiuquitanu paniriquiaa tiajiniaaco Jesuucua. ¹⁹ Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari. Nocuai, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneca majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree cuhuocojiniji na matujinia, Jesu nujuasaqui pueya tajinia. ²⁰ Jesu niquishacari taa nojori tiuuriquiaa nocuani, cunora Jesuuri cusosu sequereeri:

—Pueyanonaa, quiaacuaja tari jiyanooshaaree sesa quia miishanojiniji.

²¹ Naa Jesu sequesacari, Moisés Rootasanojiniji niishitiojonaa, mariyata Fariseocuaaari naa niishiriojonuuriquiaa: “¿Cantejaara cuno pueyanoni? ¡Nojuajaari tama na cuaqueyajaaja jiyateya juhua Pueyaso na quiniuria! ¡Pueyanoori maja na naata tamonu pueyano jiyanooniu sesa na miishanojiniji! ¡Saaja Pueyaso cutaraari na naata pa jiyanooniu!”

²² Jesuuri naa nojori niishiriojosano niishiriquiaa. Cunora, nojori sequereeri:

—¿Casaara naa nia niishiriojiani? ¿Niaateeri cucuai taacanuyajaa? ²³ Janiyara, maja jiyajeneta cua sequenura: “Quiaari tari jiyanooshaaree sesa quia miishanojiniji”. ¿Jiyajenetejaariuhua sequenura: “Quia sanere. Quia rucuanere”? ²⁴ Cunora, janiyari quiarijia

nia niishitiniutianiyani, janiyari mijiria jiyarosaaquiaarini pueya cua jiyanooniuria sesa nojori miishanojiniji.

Naacuaajitij, Jesuuri cumatacuruhuana pueyano sequeree:

—Cua tojiri. ¡Quia sanere! ¡Quia matu quia pataarohua quia tiajinia!

²⁵ Jiyacaritij, pueyanoori sanequee nojori niqiuara. Na tiajinia pataarohua na matuuri. Shuquiriaatia quiariquiohua na tiajiniohuari Pueyaso na maninihuaqueetanuta.

²⁶ Puetunu pueyajanaari shirriiquitiuri. Nojoriiri Pueyaso maninihuaqueetariquiaa cuno maninia casaa nojori niqiniuuca. Nojoriiri na puerenuta naa sequetuquiaarijihuaj:

—¡Paari quiarijia jiyanohua maninia miishano niquiriini! ¡Nocuaaji jiuujiatesano!

Jesu sequesacari Leví, na pueyano na quiniuria

(Mt 9.9-13; Mr 2.13-17)

²⁷ Nio nuhuaji, Jesuuri tohuataquiaari. Tamonu pueyano niquiriiri jiyaniijiajanaa Césarra cumaneeca masejosaqui cajiyano. Na sesa quiquiaari Leví. Jesuuri na sequeree:

—¡Cua nuhuajiri, cua pueyano quia quiniuria!

²⁸ Jiyacaritij, Leviiri ritia sanequiaari. Puetunu na jiiitasanojuanaa tiujiaqueeri. Jesuta quiaqueeri.

²⁹ Na nuhuaji, Leviiri jiyanohua queraatia sumatuquiaari na tiajinia, Jesu na queranacutanura. Queraatia narta cumaneeca masejonaari tii quiriqiaajaacuhuj. Nojoritia miaquejajinia cajitiriqiaari, socua tamasaca pueyano. ³⁰ Moisés Rootasanojiniji niishitiojonaa, mariyata narta Fariseocuacaari juhuacatecara Jesu pueyacua rimiaaquenu coteequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacartajacatajaajanio? Nojoriiri pa paraa sequera cumaneeca masejonaa.

³¹ Jesuuri nojori riuucaree:

—Cante na cuaqueya jiyaniyani nojuaja maja cusosu na quiniu, nojuajaari maja naarajona na paniniu. Cusosuhua cutaraari naarajona paniya. ³² Naajuhuj, majaari mijiria cua ninu quiquiaari maninia miijia pueyacu. Niqiaari cutaranijia sesa miijiaa cua tacatonuhuaa Pueyasocua, maninia miijia nojori quiniuria.

Pueya nequesotasacari Jesu, casaara na pueya carteyaquiya miaquenu quenaajani Pueyaso nojori secojonura

(Mt 9.14-17; Mr 2.18-22)

³³ Pueyari Jesu sequeree:

—Tiuquinijona Juan pueya cutaraari sequeyarucua miaqueyaquiquiaa. Nojoriiri naa Pueyaso secojoquiaa pueyaracaanu. Fariseocuacaari naa miiquiaajuhuj. Quia pueya saniniuuja, saaja miaquequiaari, ratuquiaari. ¿Casaarateni?

³⁴ Jesuuri nojori riuucaree:

—Pueyano camishacari maaji, majaari masuusano pueya miaajenu, camiriquiano pueyano jaara nojoritia quiyajaa. ³⁵ Tamacari, camiriquiano pueyano jaara jaariutiasaare nojori tajiniji, jiyacariti nojori cutaraari miaqueyaquiniutianiya. Naajuhuj, janiyari cua pueya tajiniji jaariutiasaanutaniyani. Jiyacariti nojori cutaraari miaqueyaquiniutianiya.

³⁶ Jesuuri socua nojori niqiuara pahuataquiaari nio miriqui sequesano:

—Majaari pueyano miatenu quijia na toque quiariquijiniji, na toque mocua cuhuoco na cushipirijiotajara. Saniniuuja, jaara naa miiritij, na toque quiariqui sesoyari. Quiarinio toquerauri sesoshiyajuhuj, toque mocujinia na posequesacari. Cua rupaari naajuhuj, juhua quiarinio toque. ³⁷ Naajuhuj, majaari na naata quiariniacu uva caaca mishinishaanu shoque tariucuacojinia, tariucuaco shoque mariqui pojuaretreeri, uva caaca jaara jerema vino na quiniuria. Jaara naa miishaaretej, vinoori najuhuaana niitashiya. Shoqueeri najuhuaana sesoshiyajuhuj. ³⁸ Naaratej, maninia cutaraari quiariniacu uva caaca shuujionu shoque quiariquiojinia, maja vino niitiasaanuucuaaji, na quiquio shoquenio. Naajuhuj, nia niishitiojosanoori juhua tariucuaco shoque. ³⁹ Naajuhuj, pueyano jaara vino tariucuanacu ratujua quiri, majaari na paniniu quiariniacu vino. Sequeyari: “Tariucuanacuuri maniniacuaja”. Naajuhuj, majaari cua niishitiojosano nia paniniu, quiarinio na quiniuuca.

Jesu pueya carojotasacari trigo samaatenu juuca

(Mt 12.1-8; Mr 2.23-28)

6

¹ Tamonu samaatenu juuca, Jesuuri trigo cuhuariquiajiniaaco quiojoriquiaa na pueyata. Na pueyari trigo carojotariquiaa. Nojoriiri na juaashiquiajinia na shuuquiojoriquiaa na

corequetanura. Na nuhuaji, na jajau miojonuuriquiaari. ² Fariseocuacaari na niquitiariquiaa. Nojoriiri Jesu pueya juaarii:

—¿Casaara nia tojtiaaquiya Moisés Rootasanoni, taa na sequequiaaricujani maja pa poonijonura samaatenu juuca?

³ Jesuuri nojori riucaaree:

—¿Majateeri nia serojonu quiquiaacuja casa supuetana David miiquiaari na miaa-jesacarini, mariyata na cojiniaa miaajesacarijihuaj? ⁴ Nojuajaari Pueyaso Secojoua tiajinia tiuquiuaari. Pueyasora niojosano pan pooquiaariiri. Na sareeri. Mariyata nata quiniaa niqutiojoreeri nojori sanurajuhuj. Cuno panri sequesaaquiaari saaja pueyacuara secojona sasocoriquiano. Naajaa, Davidri na saquiaari. Majaari Pueyaso juaniu quiquiaari naa David miiniuucua.

⁵ Jesuuri socua cuno Fariseocuaca sequequiaari:

—Janiyacuajaari Pueyaso Jiyarosanoni. Jiyaniijara jiyatesaaquiaarinijia cua sequenura casaate samaatenu juuca miishiyani, Pueyaso pa shuquiritiniuria.

Jesu jecascacari pueyano juaashiquia, cuseetucjuara joojequetano

(Mt 12.9-14; Mr 3.1-6)

⁶ Tamonu samaatenu juuca, Jesuuri Pueyaso Secojoua tiajinia tiuquiuaari. Tii niishitiojoriuiaari. Quiniqui quiriuaari pueyano, cuseetucjuara joojequetano na juaashiquia miaquetajara. ⁷ Moisés Rootasanonijini niishitiojona, mariyata Fariseocua-caari Jesu shanacutariquiaa. Nocuara tonujunu paniriquiaari Jesu jaara cuseetucjuara joojequetano juaashiquiaraca pueyano jecare samaatenu juuca. ⁸ Jesuuri tari niishiriquiaa taa nojori niishiriojoriuiaani. Jesuuri cuno rimiajatujuua pueyano sequere:

—¡Quia sanere! ¡Niya quia nujuasee pueya tajinia!

Pueyanoori sanequee. Nujuaseeri tee Jesu sequequiaari na nujuanuracuajani. ⁹ Jesuuri nocuara tonujunu panijaca pueya sequere:

—Nia nequesotareeraj. Cua sequere, ¿taa pa niishitiojosaquiaari Moisés Rootasanonijini? ¿Paate maninia miya samaatenu juucani? ¿Paate sesa miya soj? ¿Cusosuhuate naatanijoshiya, puetushiyajanaa monu soj? ¿Taa nia sequeyani?

¹⁰ Jesuuri puetunu na shocuaqueya quiniaajanaa niqunijoree. Na nuhuaji cusosu sequereeri:

—¡Quia juaashiquia quia shiitiore!

Pueyanoori na juaashiquia shiitioree. ¡Na juaashiquiaari ritia jeequequee! ¹¹ Cuno pueyari jyanohua juaaquioree naa Jesu miishacaritij. Nojoriiri naa pocoojuquiaari tamajaaja: “¿Taa pa miinutianiya socua cuno Jesuurini?”

Jesu saquiriojosacari doce pueya na jiyaramiquishocoriquiano

(Mt 10.1-4; Mr 3.13-19)

¹² Jiyacaritij, Jesuuri tamonu tuhuananuucua quiaquiaari, Pueyaso na secojonura. Puetunu niucujanaa secojoriquiaa Pueyasoori. ¹³ Jaara juhuaquequiaari, Jesuuri na tojtiajaca pueya sequequiaari nocua nojori nijionura. Puetunu nojorijinijuanaa, Jesuuri nareja doce pueya saquiriojuquiaari. Nojori sesojoreeri, “cua jiyaramiquishocoriquiano pueya”. ¹⁴⁻¹⁵ Nioori Jesu saquiriojosano pueya sesaca: Simón. Jesuuri na sesojuquiaarijihuua “Pedro”. Simón tarajanu Andrésri saquiriojosaquiaarijihuua, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. ¹⁶ Santiago niyanu Judasri saquiriojosaquiaarijihuua, Judas Iscarioteno. Nojuajaari quiquiaari Jesu quiateriquiano mosocoriquiano.

Jesu niishitiojosacari queraatia pueya

(Mt 4.23-25)

¹⁷ Na nuhuaji, Jesuuri tuhuananujiniji rosetaquiariuhua na saquiriojosano pueyata, jamatujinara. Cuno jamatujinia, queraatia na nuhuajinia pueyari tari nocuaji quiriuaa. Mariyata jyanohua queraatia pueyari tii quiriuaa puetunu Judea jiyajinijinio, Jerusalén tiacajinijiojuhuaj, shoniacu caminia shuriquiumia quijiacajinijinio pueyano. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyano. Puetunu cuno pueyajanaari cuniquiria nijioquiaari nojori tojniuria Jesu, na cusonujiniji nojori naatanijosaanurajuhuj. Jesuuri nojori naatanijoree. ¹⁸ Naajuhuj, taraatia samaruhua miishano pueyari naatanijosaquiaarijihuua. ¹⁹ Puetunu cusosuhujanaari Jesu quiuanu paniriquiaa, naatanijosano nojori quiniuria. Jesu cumaacaari jyanohua poonijoriquiaa. Naaratej, puetunu pueyajanaari naatanijosaariquiaa, saaja nojori quiasacari nojuaja.

Jesu pohuatasano shuquiriaatia quijajiniji, taraatia quijajinijinio
(Mt 5.1-12)

²⁰ Na nuhuaji, Jesuuri na pueya niquiri na pocuanura. Naa sequereeri:

—Niaari Pueyaso shuquiritasano, niaa jaara niishiriquia noojia saaja sesa mijia. Niaa jaara niishiri noojia naa quiyatej, niaari Pueyaso jiiitasano pueya quiniutianiya.

²¹ Niaari Pueyaso shuquiritasano, niaa jaara maninia mijia quiniucua jiaataa, taa miaajeyano pueyano miaquesanoocua jiaataacuaani. Niaa jaara naa quiniucua jiaataa, Pueyasocua jaari na jataniniutianiya maninia quijiaara na quiniuria.

²² Niaari Pueyaso shuquiritasano, niaa jaara sesa nia miiniu nuhuaji taraajequiaa. Niaari na nuhuaji saroojonutianiya nia shuquiriniutia, niaa jaara jiyanooshaarohua.

²³ Niaari Pueyaso shuquiritasano, pueya jaara nia niquiniu paniyaquiri, pueya jaara nia taanuure, pueya jaara nia macaatiri, pueya jaara nia soore cua tojjia nia quishacari. ²⁴ Niaa jaara naa miishaaretej, jyanohua nia timiri. Nia jaacuatere nia shuquiriniutia. Niaa jaara naa nia miishacari rejeretajaca quiri, Pueyasoori nia niishishoo casaa racatasano jiiitaa jiyocuaaanu, na niquitosocoriquiano nijaniya. Nia paraa supuetanaari naa taraatia miiquiaari tariucuaaanu Pueyaso sequenu panishano caminiujuniaa pueyajuhua.

²⁵ Niaari saniniuujia taraatia quijiaa quiniutianiya, jamuejaca casamiriaca pueyanaa. Niaacua jaari tari shuquiriaatia quiquianu, puetunu nia panishanojuanaa nia jiiitasacari.

²⁶ Taraatia quijiaacari nijaniya, cante sequejani: “Janiyacua ja maninia pueyanoni. Janiyatucua casaa paniri Pueyaso jyanooniuria janiyani?” Naa sequejaca pueyanaa, na nuhuaji, niaari niishiniutianiya niaari saaja sesori quia pueya seque.

Taraatia quijiaacari nijaniyajuhua, jeya nia quiaquishacari Pueyasora, saaja tamaaja shuquiriaatia nia quiniuria nia cojesacari pueyaracaanu. Niaari na nuhuaji sapenutianiya Pueyasooju nia quishacari pueyaracaanu.

²⁷ Taraatia quijiaacari nijaniya, puetunu pueyajanaa jaara maninia pohuataquiaa nijaniyajiniji, maninia nia kojiniucua cuno pueya, Pueyaso tojiyashijia pueyani. Cuno pojori supuetanaacua jaari naa shuquiritaquiaari cuno sapojonuujuaca, canapuate maja seetanujuanaa Pueyaso sequesano caminiujuniaa quiquiaaricua jani.

Pa paraa panijaca pa quiri
(Mt 5.38-48; 7.12)

²⁸ Nijaniya, cante niya cua tojjiaacua jani, cua tojitiuri. ¡Nia paraa nia paniri! Maninia nia miiri nia niquiniu paniyashijia pueya. ²⁹ Saaja maninia nia riuquare nia juayano pueyano. Sesa nia mijiaaca pueyacuara nia secore Pueyaso. ³⁰ Pueyano jaara quia maseca piri, quia jyanoori nojuaja. Jaara taquijiria pirijuhua, socua quia jyanoori. Majaari na naminiu. Pueyano jaara shiniquiaacua quia cushishano toque jaariutiare, quia cacojoqui quia niquitiorejuhua. ³¹ Pueyano jaara quia sequere quia casamijiniji quia niquitionura nojuaja, quia niquitiore nareja. Pueyano jaara quia casaa jaariutiare, majaari na sequenu: “Cua niquitiorehua”. ³² Maninia nia miiri tamasa, taa nia paniquiaa tamasa miiniuria nijaniyacuaani.

³³ Niaa jaara saaja nia panijaca paniriquia, majaari nia jyaniniu Pueyasoori nia shuquiritiaa naa nia miishacari. Sesa mijiaaca pueyari naa paniquiaa nojori panijacajuhua. ³⁴ Maja puera maninia mijia nijaniya, niaa jaara maninia miiquiaa saaja noo pojori, canapuate maninia miiquiaa nijaniyacuaani. Sesa mijiaaca pueyari naa maninia miiniu niishiquiaajuhua, noo pojori canapuate maninia miiquiaa nojoricuaani.

³⁵ Maja puera maninia mijia nijaniya, niaa jaara nia masena niquitioquiaa na panishano, nia niishishacari nojuaja ritia niquitionutanihua nijaniyajiniji na maseno casaa. Sesa mijiaaca pueyari na casaa rupaquijia niquitioquiaa narta sesa mijia pueyajuhua, na niishishacari nojori ritia niquitionutanihua nojori maseno casaa rupaquijia.

³⁶ Nia paniri nia paraa. Maninia nia miiri nojori. Nia casami nia niquitiore nareja, pueya jaara na pania rupaquijia. Majaari nia taraajenu cuno pueyano jaara nia niquitioyaquiriohua nia casaa. Naa nia miishacaritij, niaari seetanujuanaa jiyocuaaanu Quijia muerasu. Pueyasoori socua jyanohua queraatia nia niquitionutaniya tamasa nia niquitosanojiniji. Naaratej, capora nia quiri, taa nia Que Pueyasocuaani. Nojuajaari nareja niquitioquiaa sesa mijiaaca pueya, mariyaca canapuate na sequeyashijacani “paacarasho”. ³⁷ Naaratej, jyanootio nia quiri, taa nia Que Pueyasocuaani, jyanoojia.

Maja sesa nia niishiriojonu niarta pueyanoocua
(Mt 7.1-5)

³⁸ Maja nia rimiaaquenu tamasaacua, Pueyaso mariqui saniniuujia nia jyanoyaquiri. Niaa jaara tamasaacua tonujiyashijia quiri, naajuhua, Pueyasoori maja na saneenu quiniutianiya sesa nia miishanojuhua. Niaa jaara jyanootio quiri, Pueyasoori

nia jiyanooniutianiyajaacuhuj. ³⁸ Niaa jaara tamasaca niqutioquiaa na panishano, Pueyasoori naa nia niqutionutaniya nia panishanojuhuaj, maninia shanacusano, jiuuquiutiasano, maninia quianujusano, mishaja quera niitiano. Pueyasoori mariyata juhua nia shanacutajajiniya niqutionutaniya niajaniya, taamueca shanacutajajinia nia niqutioquiaa pueyacuani.

³⁹ Jesuuri socua niishitiojoquiaari pueya, nio miriqui sequesano:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutaniya raama. ⁴⁰ Pueyanoori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiyajaarihuaj, juhua na niishitiojonaja.

⁴¹ ¿Casaara nia niqiyua rucucua maano quia tarajanu namijiajiniani, niaa jaara puereetuuca maca jiiitaa tama nia namijiajiniajaaja? ⁴² Naa jaara puereetuuca maca shanacuya tama nia namijiajiniajaaja, ¿niaatucua casaara sequere quiarta pueyanoni: “Cua tarajanunaa, cuno rucucua pa taqiri quia namijiajiniji”? Sesa jiuujiaracanaa, tama nia namijiajinijiajaaja nia pare coteenu cuno maca. Na nuhuaji cutara nia naata maninia niqiniu, cuno rucucua nia taqiniuria nia tarajanu namijiajiniji. Naaratej, majaari nia rimiaaquenu niarta pueyanooacara.

Naanaari niishishano na jajajiniji

(Mt 7.17-20; 12.34-35)

⁴³ Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu. ⁴⁴ Puetunu naanajanaari maninia niishishano na muetusanojiniji. Majaari pa naata satuna carojonu shuunajiniji. Naajuhuj, majaari pa naata tuhuaracana carojotanu saarianajiniji. ⁴⁵ Naajuhuj, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuaaraatia rimiaaqueja, sesa jiuujiaraca na quishacari. Casaa pa niishiriojoquiaa poojiajiniani, paari cuno pocuaani.

Miriqui Jesu pohuatasano cumueeca jiyajiniji, sasaca jiyajinijinio

(Mt 7.24-27)

⁴⁶ ¿Casaara nia sequequiaa jianiyani, “Cua jiyaniijianaa, cua jiyaniijianaa”, niaa jaara cua rootasano tojtiaaquiuaa? ⁴⁷⁻⁴⁸ Cua tojiri. Cante cua rupenara quiri cua rootasano tojjia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucujaji. Na nuhuaji, moo jaara pajaashiquiaari, pajaacaari jiyanohua cajiquiaari cuno tiaacua. Naajaa, majaari na mueecurujutano quiquiaari, maninia nujatejosano na morijiuuca quishacari cumueeca jiyajinia. ⁴⁹ Saniniuujia, cante najuhuaana cua niishitiojosano tojiaquiquiaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanohua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunujuanaa.

7

Jesu naatanishacari Romano capitán seru

(Mt 8.5-13)

¹ Jesu jaara pueya niishitiojonu puecaquiaari, na pueyata quiaaree Capernaum tiacajiniaari. ² Romano soldadohua capitánri quiniqui quijia quiquiaari. Jiyanohua na panishano seruuri cusosu matariquiaa. Quera cusoriquiaari. ³ Capitán jaara tojiquiaari Jesujiniji, nojuajaari Judiocuaca camarucua jiyaramiquiquiaari Jesucua, nojori sequenura Jesu cuara niiria nocua na seru na naataniniuria. ⁴ Judiocuaca camarucuaari Jesucua quiojoquiaari. Nojoriiri juhuacatecara Jesu secojonu coteequiaari jiyanohua, nojoritia na quianura. Nojoriiri Jesu sequere:

—Cuno Romano capitánri canaa jiyaroreeni, ¡nojuajaari jiyanohua maninia pueyano! ¡Quenaaja quia miiri na panishano! ⁵ Nojuajaari parta Judiocuaca panijia. ¡Nojuacajaari Pueyaso secojojuatiaequiaari canaara tama na cumaneecatajaaja!

⁶ Naacuajitij, Jesuuri nojoritia quiaquiaari capitán tiajinia. Tari Jesu quishacari cateca na tiaacuara, capitánri na rupeanaa pueya jiyaroquiaari Jesucua, nojori caminiujuiniuria na sequesano Jesura. Naaratej, nojoriiri naa Jesu caminiujuishii capitán sequesano:

—Jiyaniijianaa, capitán naa sequeya: “Cua Jiyaniijianaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tiajinia. ⁷ Nocujaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru naatanura. Janiyari niishiyani, quiaa jaara naa sequere,

cua seruuri naatanutaniuhua. ⁸ Janiyari niishiyajaanuhua, cuno cusonuuri quia to-jiniutianiya taa cua tojiqiaa cua jiyaniijianucuaaani. Janiyari cua jiyaramiquishano soldadohua jiiitajuhua. Janiya jaara tamonu sequereni, 'Quia quiaare', nojujaari quiaqueequiaa. Janiya jaara tamonu sequereni, 'Miji', ritia nimiaquiaari. Janiya jaara cua seru sequereni casaa na miiniuria, ritia na miyari. Niishiyaniija quiaari jiyano cumaacaracajuhua".

⁹ Jesu tojishacari cuno pojori caminiujiushano capitán sequesano, Jesuuri jiuujiateree. Jesuuri na nuhujinia pueya niqinijioree. Nojori sequereeri:

—Seetanujuanaa nia sequeyanijia, puetunu parta Israel pueyajinijiojuanaani, ¡majaari quenaaja cua niqiniu quiqianu Pueyasocua tiuujia pueyano juhua nio tahue!

¹⁰ Capitán jiyaramiquishano pueya tiuquijiosacariuhua capitán tiajiniohua, nojoriiri Capitán seru niqishuhua tariucua naatanohua.

Jesu samiitianishacariuhua mashiquio niyanu

¹¹ Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriqiaajuhua, socua queraatia tamasaca pueyano. ¹² Nojori catecanosacari Naín tiacaacua, Jesuuri pueya niqiquiaari macu pataano jamosocoriqiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucua macu nuhuaji sacuariquiaa, jamajiniara nojori quiojosacari. ¹³ Jesu niqishacari mashiquio, nocua taraajereeri. Na sequereeri:

—Maja nujuquenu.

¹⁴ Jesuuri macucua catecanoree. Macu quiquio quiatareeri. Na patanaari pootia na nujuataquee. Jesuuri macu sequereeri:

—Mashajanaa, janiya quia sequeyani: "¡Quia sanere!"

¹⁵ ¡Macuuri cajiquí! Juhucatecara pocuareeri. Jesuuri na nucuaacua na jaatucuree.

¹⁶ Puetunu pueyajanaa jaara naa Jesu miishano niqiquiaari, jiyanohua pueretureeri. Nojoriiri Pueyaso shuquiriitaree jiyanohua. Na puerenuta sequetureeri:

—¡Pueyaso sequenu panishano caminiujiuniaqui niya supuree pa tajinia! ¡Jiyanohua cumaacaraca!

Nojoriiri naa sequetureejuhua:

—¡Pueyasoori shusha quiarijia na saquiriojosano Israel pueya niishiriohuacuhua, na cumaquiniuria pajaniya!

¹⁷ Jesuiniji pueya pahuatasanoori caminiujiushaaquiaari puetunu Judiocuaca jiyajini-ajanaa, mariyata puetunu na shocuaqueya jiyacajinijanaano.

Tiuquinijiona Juan jiyaramiquishano pueya nequesoreesacari Jesu (Mt 11.2-19)

¹⁸ Tiuquinijiona Juan pueyari puetunu Jesu miishanojuanaa pahuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

¹⁹ —Jesuucua nia quiaare. Niocua na sequesee: "¿Quiaate seetanujuanaa Pueyaso Jiyarosano, tariucuaaanu sequesano niriqianotej, tamonute sashishiyajara so?"

²⁰ Naaratej, Tiuquinijiona Juan jiyarosano pueyari Jesuucua quiojoquiaari. Na sequetuseeri:

—Tiuquinijiona Juanri canaa jiyaroree quiocuan, canaa nequesotanura quiajaniya: "¿Quiaatena Cristo, Pueyasojiniji niriqianotej, canaate tamonu sashiyajara so?"

²¹ Nojori tiuquijiosacari Jesuucua, jiyacaritij, Jesuuri queraatia pueya naatanijioree nojori niqiaara; cusosuhua, pueyaracaanu nootunejaca, samaruhuaraca pueyano. Mariyata queraatia cariojuarujuri jiyaterohua niqijiacaraari. ²² Na nuhuaji, Jesuuri naa Tiuquinijiona Juan pueya sequereeri:

—Nia quiaarohua. Tiuquinijiona Juan nia pahuatasuhua taa nia niqiriicujani, nia tojishanonio. Nia sequesuhanoj: "Cariojuarujuriiri niqijiacara quiriohua. Shipiiniuquiujiuniaari maninia rucoorohua. Lepra cusotajacaari cushiritishaarohua juhua juhuanaraja nojori quiniuhara. Numueejuncuaari tojjiacara quiriohua. Macunucuaari samiitaniijosaarohua. Casamijiuniucua pueyari Pueyaso rupaa pahuatasaree, Pueyaso pueyara nojori jiyatasaanura. ²³ Shuquiriaatia quijia cutaraari nooj, cante cucua tiuuniu tarinitiaquiyani".

²⁴ Tiuquinijiona Juan jiyarosano pueya jaara quiojoquiaariuhua, Jesuuri juhucatecara pueya pahuataree Tiuquinijiona Juanjiniji. Jesuuri naa nojori nequesotaree:

—¿Casaa niqiniucua nia quiojocanu cariquia jiyajiniani? ¿Niaate noojia niqijijoteja niqiniucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua. ²⁵ ¿Casaa niqiniucua nia quiojocanunitioj? ¿Niaate maniniqui toque cushijia niqiniucua quiojocanu? Niaacujaari niishiya, shanohua toqueya cushiyonuujuaacari saaja jiyaniijianucua tajinia quiyano niquishano. Nojoriiri tama na

panishanojuuaaja miijiaa. ²⁶ ¿Taateerinitioj? ¿Casaa niquniuucua nia quiojocanuurini? ¿Pueyaso sequenu panishano caminiujuuniate quiquianu? Taaquiriirinj. Nia niquishano pueyanoori seetanujuanaa socua tojishano pueyano puetunu Pueyaso sequenu panishano caminiujuuniainijijianaa. ²⁷ Cuno Juanjinijicuaajaari tariucuaaanu Pueyaso Rupaajinia naajiotasano quiquiaari. Pueyaso sequesano nojuajiniijiri naa naajiotasaaquiaaritij: “Cua sequenu panishano caminiujuuriquiano jiyaroyanjia, na puetanura quiajaniya, nuu jeenucuariquiano quiocuaji”.

²⁸ Seetanujuanaa nia sequeyanijia, puetunu Pueyaso sequenu panishano caminiujuuniaa-jinijiniojuanaani, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarin, Pueyasa, nojuajaari socua cutara pueyano Tiuquinijiona Juanjiniji.

²⁹ Puetunu pueyajanaa, mariyata cumaneeca masejonaa Roma tiacajinia quijia jiyani-ijiarani, nojoriiri niishiquianu Tiuquinijiona Juan pohuatasano Pueyasojinijiri seetanu rupaajanaa quiquianu. Naaratej, nojori tacatosacari nojori jiuujia sesa nojori miishano-jiniji, nojoriiri moojinia tiuquinijosaacanu.

³⁰ Saniniuujia, Fariseocuaca, mariyata Moisés Rootasanojiniji niishitiojonaani, nojoriiri Tiuquinijiona Juan pohuatasano ruuretacanu saaja. Naacujitij, majaari nojori tiuquini-jiosaanu quiquianu, nojori seetanuucua nojoriiri sesa miijiacajuhuaaj. Nojoriiri Pueyaso miiniu panishano nojoriria soocanu saaja. Naacujitij, majaari nojori jiyanooshaanu quiquianu.

³¹ Jesuuri socua sequeree:

—¿Quiarjia nio pa quishacari pueyarijataj? ³² Nojoriiri juhua naatujoori, na tacuarishijon panishacari, na cajitushacari tiaca jiuujiajinia cajitiucuaa curotasanojinia. Nojori-iri narta naatujooriicua nacia: “Canaari juucua naajua jonenejiyani. Majaari nia nianu-junu paniniu. Canaari taraatia jaaquequesosano jaaquequejiyani. Majaari nia sapuenu paniniuujuhuaaj”. ³³ Naajuhuaaj pueyanaa, niaari Tiuquinijiona Juan tojiyaquiquianu Pueyaso rupaa na pohuatasacari nia niquiara. Nojuaja cutaraari miaquesano miaque-yashijia quijia, vino ratuyashijiano. Naaratej, niaari na sequeja, “samaruraca”. ³⁴ Na nuhuaji, janiyari niquianuni. Janiyari saniniuujia miaquesano miaquejojuani, vino ratujuajuhuaaj. Cunora niaari cua sequequiaa: “Cunoori sacuaraatia miaquejoru, ratunu porocuanio, sesa miijiaa rupueja sacuaraatia, mariyata pa soosano cumaneeca mase-jonaa rupuenanio”. Naa nia sequesacari, niaari cua tojitiaaquiyajaacuhuaaj. ³⁵ Naajaa, pueya jaara canaa pohuatasano tojiijiaa quiri, jiyacari cutara nia naata niishiniu canaa ni-shitiojosanoori seetanujuanaa Pueyasojiniji, cua tojiijiaa jatasacari maninia quijiacara.

Jesu miaquesacari Fariseo Simón tiajinia

³⁶ Tamonu Fariseo pueyanoori Jesu masuquiaari na tiajinia na miaquenura. Jesuuri na tiajinia quiaaree. Miaquenuujua shuriuquiumia roshishiiri. ³⁷ Paanatuuri cuno tiacajinia quijia quiquiaari. Na niishishacari Jesuuri cuno Fariseo tiajinia tiuquirii miaquenura, nojuajaari cuno tiajinia quiaquiaarijuhuaaj. Shiitaniyojua seesariquiaja pataconiyojua cacatariquiaari, cohuaja saajiajiniji quejasano. Mishaja quiriquiaari shanohua jaanuta-jata. ³⁸ Maajiiri Jesu cashacuucuma mojoquetasee. Nujuqueriquiaari. Na namijiaacaari Jesu niohuacaacua totejoriquiaa. Naa Jesu niohuaca piquiojoreeri. Na nuhuaji, na muecacata na sacuanijiarohuari. Na niohuaca nujuureeri. Na shanohua jaanutaja totaree Jesu niohuacaacuaari. ³⁹ Cuno Fariseo pueyano niquishacari naa cuno maaji miishan-otej, nojiajinia niishiriojoriquiaari: “Jesu jaara seetanujuanaa Pueyaso sequenu panis-hano caminiujuunia quiri, mariqui niishiri cante na coyani, taamueca maajitijianojoni”. ⁴⁰ Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu panianijia.

Fariseo pueyanoori Jesu riuuaree:

—Cua sequere, Niishitiojonanaa.

⁴¹ Jesuuri na sequeree:

—Caapiqui pueyanoori cumaneeca masequiaari rupaquijiaara tamonu cumaneeca niqutiojonajiniji. Niqiriyatu pueyanoori queraatia cumaneeca masequiaari, juhua quiniento juuca poonijosanojiniji masesano. Tamonu pueyanoori masequiaari nareja juhua cincuenta juuca poonijosanojiniji masesano. ⁴² Na nuhuaji, nojori sequesano juuca jaara tari quiquiaari na camaru nojori niqutionuhuaa na cumaneeca, majaari nojori jitianu quiquiaari cumaneeca. Naaratej, cumaneeca niqutiojonaari nojori sequeree: “Naajaa, maja socua nia niishiriojonu nia niqutionuhuaa tarijia cua niquticosano cumaneeca niajaniya”. Cumaneeca niqutiojonaari naa cuno caapiqui pueya jyanooquiaari. Simónnaa, cua sequereetoj, ¿teyano cuno caapiqui pueyanojinijiniote socua cuno cumaneeca niqutiojona panijiaara quiniutianiyani?

⁴³ Simónri Jesu riucuaree:

—Cunocuaajani, cante socua queraatia cumaneeca niquitiosaaquiaaricuaajani.

Jesuuri na sequereee:

—Taaquiriirinij.

⁴⁴ Jiyacaritij, Jesuuri cuno maajiicua tacateree. Simón sequereeri:

—¿Quiaate nio maaji niquiya? Cua tiuquishacari quia tajiinia, majaari quenaaja quia niqutionu quirii mohuaca janiya, cua niohuaca cua jeequetajara. Nio maaji cutaraari cua niohuaca jeequereee na namijiaacata. Na sacuanijiarohua na muecacataari. ⁴⁵ Majaari quenaaja quia nujuunu quirii janiya, quia saruhuatasacari janiya. Nio maaji cutaraari cua niohuaca nujuunequejoriquiaa pueyaracaanu, niya cua cajishacari. ⁴⁶ Naajuhuaaj, majaari quia totanu quirii mesu nunacu cua nacaacua. Nio maaji cutaraari cua niohuacaacua totaree shanohua jaanutaja. ⁴⁷ Naaratej cua tojiri. Nio maajiiri jiyanoohua sesa miijia quiriquiaa. Naaratej, jiyanoohua cua paniyari puetunu sesa na miishanojinijianaa cua jiyanooniucua nojuaja. Saniniuuja, cante secaja sesa na miishanojiniji jiyanooshaareni, naajuhuaaj, nojuajaari secaja panijia na jiyanoonia.

⁴⁸ Na nuhuaji, Jesuuri cuno maaji sequereee:

—Quiaacuajaari tari jiyanooshaaree sesa quia miishanojiniji.

⁴⁹ Narta masuusano pueya nata cajitiuyanoori juhuacatecara tama sequetooreejaaja:

—¿Cantucuaa nio pueyanoni, sesa miijia jiyanooriquianoni?

⁵⁰ Jesuuri maaji sequereee saaja:

—Cucua quia tiuushacari, quiaacuajaari tari jiyanooshaaree. Juhuaajaniya quia quiaarohua.

8

Jesura pueraquena maajipohuajiniji pahuatasano

¹ Na nuhuaji, Jesuuri rucuanajoquiaari queraatia tiacajinia, shiitianiyojua tiacajinia-juhuaaj. Nojuajaari tii Pueyaso rupaa pohuatariquiaa, taa Pueyaso jiiitanu paniya na muerasuni. Na doce saquiriojosano pueyari na cojiriquiaajaacuhuaaj. ² Noojiaqueya maajipohuari na tarajariquiaajuhuaaj. Cuno maajipohuari tamaatia cusunujiniji Jesu naatanijiosano quiquiaari. Tii quiriquiaajaariuhuaa noo maajipohua, Jesu nojorijiniji tohuatanijioquiaari samarhuatej. Nojorijinijinioori quiquiaari María Magdalena. Jesuuri cuno Marijajiniji tohuatanijioquiaari siete samaruhua. ³ Quiriquiaajaariuhua Juana, Cuza niqiuocuani. Cuzaari jiyaniijia Herodes jiiitasano casami cojuana quiquiaari. Susaanaari nojorijinijinio quiquiaarijuhuaaj. Socua queraatia maajipohuari quiriquiaa. Puetunu cuno maajipohuajanaari Jesu naacutaquiaari tama nojori jiiitasano casaatajaaja. Nojoriiri nera pueraquenuuna quiquiaarijuhuaaj, tiqiyocua nojori rucuanajosacari Jesuta.

Jesu pahuatasano natoojona pueyanojiniji

(Mt 13.1-9; Mr 4.1-9)

⁴ Queraatia cuno jiya tiacajinijinio pueyari nijioquiaari nojori niquniuria Jesu. Jaara nocua rerequeejoquiaari queraatia pueya, Jesuuri nojori niishitiojoquiaari miriqui, nio pohuatasanota. Nojori sequereeri:

⁵ —Tamonu pueyanoori na cuhuariquiajinia quiaquiaari natoojonuucua. Na jacutasacari, secajaari totequiaari nucuaco. Tii rapijiosaaquiaariiri. Shuhuari na miojoquiaari. ⁶ Tajaacaari toteree sai tajiinia. Cuno jajau jaara moritiaquiaari, ritia sorereeri puera joojuashiqui na quishacari. ⁷ Tajaacaari toteree riyocuaca tajiinia. Riyocuacaari socua ritia maashiquiaari. Na natasanoori tarinitiuuara quirii. ⁸ Socua tajaacaari maninia jiyajinia toteree. Tii maashiquiaari maniniaari. Queraatia mueturee cutaraari. Noojiaqueya cuno nataujinijiiri cien jajau quiquiaari niquiriyatu jiyonajiniji.

Nio pohuatasano na puecasacari, Jesuuri na rupaa paaretaree. Naa sequereeri:

—iNiaa jaara numaaraca quiri, nia tojitiare cua pohuatasano!

Casaarate miriqui pahuatasanoni

(Mt 13.10-17; Mr 4.10-12)

⁹ Na nuhuaji, Jesu pueyari na nequesotaree casaa na miriqui pohuatasano niishitiojonu paniyani. ¹⁰ Jesuuri nojori riucuaree:

—Niaari saquiriojosaaquiaari nia niishiniuria taa Pueyaso poonijiya pueya jiuujajiniani, na muerasura nojori quiniuria. Cunoori tariucuaacaanu pueya niishishoo. Janiyari tamasaca pueya niqiara pohuataquiaa miriqui cutarani. Naacuajitij, nojoriiri cua pohuatasano niishiyaquiaa na tojtiasacari. Naajuhuaaj, cua cumaacata cua miishano cariyoshitioquiaari, nojori niqiara cua miishacari.

Jesu niishitiojosacari na pueya, miriqui na pohuatasano natoojonajiniji
(Mt 13.18-23; Mr 4.13-20)

¹¹ Nia niishitiojoreera miriqui cua pohuatasano natoojonajiniji. Pueyano natoojosano jajaari juhua Pueyaso rupaa. ¹² Pueyano jaara Pueyaso rupaa tojiri najuhuanaj, nojuajaari juhua nuucuaco toteno jajau. Sesaacaari nimiaa. Pueyaso rupaa na tojishano jaariutiariohua noojajinijiiri, maja nocua na tiuuniuria, nojuaja mariqui jiyanooshaareeri. ¹³ Sai tajinia toteno jajaari juhua noo pueya, canapueete Pueyaso rupaa tojiriini. Na nuhuaji, ru-paquijia Pueyasocua tiuququiaa shuquiriaatiaari. Naa miijiaaari juhua puera shiitianiy-ojua nujuacaraca. Naacuajitij, nojori jaara saniniujiushaare, nojoriiri ritia Pueyasocuaaji rupatequiaa. ¹⁴ Riyocuaca tajinia toteno jajaari juhua noo pueya, canapueete maninia tojirii Pueyaso rupaani. Na nuhuaji, nojoriiri puera tacaquiaa mijiria casaacua, casamiri-aca nojori quiniuria, tama na cuaqueyajaaja nojori shuquiritiniuriajuhuaj. Naaratej, no-joriiri juhua muetuhuo natau quiya, tarinitiuuara riyocuaca tariyoshitishano. ¹⁵ Maninia jiyajinia toteno jajaari saniniujia juhua noo pueya, canapueete maninia tojitiareecuaaja Pueyaso rupaani. Na racataa maninia noojajiniaari. Pueyaracaanu na tojitiaquiaari. Majaari na pishiniu Pueyasocuaaji. Naacuajitij, nojoriiri juhua queraatia muetujua natau.

Pueyaso muerasuuri juhua samaritiu cuhuataja
(Mr 4.21-25)

¹⁶ Majaari pueya noshitiniu quiquiaa samaritiu, na jamotasocoriquiano conatu cariquiaco, maquetu cariquiaconio. Samaritiu jaara noshitishaare, morijiuucua moro-tashiyari na cuhuatanura, pueya tiuquitasacari tiajiniaaco. Naajuhuj, Pueyaso Rupaari pueya jiuujia cuhuataja. Cunora, Pueyaso Rupaa cuaara maatia pohuatasaria puetunu pueya niqiarajanaa. ¹⁷ Puetunu jamojosano casaajanaari riuriatasaanutaniya. Puetunu jiyasohuaja nia miijiosanojuanaari niishishaanutaniyajuhuj. Cuhuatasaanutaniyari maninia niqishocoriquiano. ¹⁸ Cunora, cua sequesano tojitiajaca nia quiri maninia. Cante maninia jitiaa cua rupaani, nojuajaari socua na niishijara jiyatesaanutaniya. Saniniujia, cante cua rupaa tojiyashijiani, secaja najuhuaana na niishishanoori jaariuti-asaanutaniya, puetunu shaaquiriajanaa.

Jesu tapueyocucata tiuquijiosacari Jesuucua nojori nuucata
(Mt 12.46-50; Mr 3.31-35)

¹⁹ Jiyacaritij, Jesu nuuca Jesu tapueyocucata tiuquijioquiaari Jesu quishaqui. Majaari nojori naata tiuquitianu quiriquiaa Jesuucua. Jiyanohua queraatia pueyari nocuara ritiriquiaa saaja tia tohuateyaji. ²⁰ Tamonuuri Jesu numooteree:

—Quia nuuca quia tarajanuhuaata jati carijiniacuma quiya. Quia niqitiuniu paniaquinia.

²¹ Jesuuri tii quiniaa niquiara sequeree saaja:

—Canapueete seetanujanaa Pueyaso Rupaa tojitiajacani, nojoriiri cua nuuca cutara, cua tarajanuhuanio.

Jesu pueyajetesacari paratu, mohuacanio
(Mt 8.23-27; Mr 4.35-41)

²² Tamonu juuca, Jesuuri botejinia tacataquiaari na saquiriojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niuutiariquiaa. ²³ Nojori niuutiasacari, Jesuuri maqueriquiaa. Canashiyauji paratuuri juhuaacatecara piyarojonu coteeree jiyanohua. Mohuaca queya-quetiriquiaa bote jiniacumaraari. Boteeri quera tiuquitiariquiaa tari. ²⁴ Jiyacaritij, na pueyari Jesu niucujasee ritia. Na sequetuseeri:

—¡Niishitiojonanaa! ¡Niishitiojonanaa! ¡Paa tari tiuquitiaani!

Jesuuri sanemaa. Paratu sequereeri, mohuacanio:

—¡Tariucujaja! ¡Nia suraajere!

Paratu, mohuacaari ritia suraajeeque. Paratu piyarojonuuri tajimiaa, caminia quey-ocuaanonio. ²⁵ Jesuuri na pueya sequerohua:

—Niaacuaja juucua Pueyasocua tiuujiaa. ¿Casa nia tojetareerini?

Nojoriiri Jesuucuaaji jiuujiatecoree. Shiriiquitiuriquiaari Jesu miishano nojori niqishacari. Tama nojoriijaarijia nequesoreetooriquiaa:

—¿Cantucuaanojoni? ¡Paratu, mohuacaari na tojirii na sequesacari!

Gerasa jiyajininio samaruhuaraca pueyanojiniji pohuatasano
(Mt 8.28-34; Mr 5.1-20)

²⁶ Na nuhuaji, nojoriiri shiitiaseequiaari Gerasa jiyajinia, Galilea jiya taquijiria. ²⁷ Jesu jaara rosequiaari botejiniji, jiyacaritij, samaruhuaraca pueyanoori nocua niquiaari, cuno

jiya tiacajinijinio pueyano. Cuno pueyanoori pueyaracaanu samaruhuaraca quiquiaari. Majaari toque na cushiniu quiija. Naajuhua, majaari tiajinia na quiniu quiija. Saaja raacajinia quiijaari, macunucua nucuhua paaquiosaqui. ²⁸ Na niquishacari Jesu, na cariquimijaji mojoquetaseeri. Jesuucua nacareeri:

—¿Casaara quia niyaree miji canaa quia cushitionurani Jesunaa? ¡Quia niishiyaniija! ¡Quiaacuajaari Jiyaniijiajanaa Pueyaso Niyanu! ¡Cua tarinitiare quenaaja! ¡Maja naquiya cua miiniu!

²⁹ Samaruhuaraca pueyanoori na sequeriquiaa Jesutej, Jesu sequesacari tari nojuaja, cuara tohuataara cuno pueyanojiniji. Samaruuri sequeyarucua cuno pueyano miitiqiaari sesa. Narta pueyari juucua na cashacucua, na numatucua morojoquiaari cumayoocua jiyocua shipinishanota, na cojuasaanura maninia. Samaruhuaraca pueyanoori saaja na turojotaquiaari. Samaruuri na mashiquijia tiqiyocua, pueya quiaquishaqui na quiniuria. ³⁰ Jiyacaritij, Jesuuri na nequesotaree:

—¿Taateja quia sesani?

Samaruuri na riucaree:

—Cua sesa “Queraatia”.

Naa Jesu sequequiaariiri jiyanohera queraatia samaruhua na jiiiasacari. ³¹ Samaruhuari jiyanohera secojoree Jesu, maja nojori na jiyaronura puequeetuaju raama saniitiosocoriguano. ³² Jiyacaritij, queraatia cushiyari miaquenuiriquiaa cateca naataja, tuhananujinia quiniqui. Samaruhuari cunora Jesu secojoree nojori na tiuquitianiniuria cushiyajinia. Jesuuri nojori tarinitiaree. ³³ Cunora, samaruhuari pueyanojiniji tohuareetaquee. Cushiyajinia tiuquitiaseeri. Puetunu cushiyajanaari cocuatereje. Tacobiniji totesee caminiajiniaari. Tii shushiniuriiri.

³⁴ Cushiya cojuanaa jaara niquiquiaari naa miishanotej, nojoriiri netecuatuquiaari na shiriquiniutia, Jesu miishano nojori pohuatanura tiacajinia, cuhuariquiacajiniajuhuaj, tee pueya quiriqiaacuajani. ³⁵ Puetunu pueyajanaari Jesuucua nijioquiaari na tiacajiniji, pueya pohuatanuusanoiniji nojori niquiniuria. Nojori tiuquijiosacari Jesuucua, nojoriiri cuno pueyano niquishii, canajiniji samaruhua tohuareetareecuajani. Nojuajaari Jesu shuriucua cajiriquiaa toqueraca, panaatia na quishacariuhua. Naa pueya niquishacari nojuajatej, pueretiquiaariiri. ³⁶ Jiyacaritij, Jesu miishano niquitiuniaari shusha nijiono pueya pohuataree taa samaruhuaraca pueyano naatanishaarohuani. ³⁷ Cunora, puetunu Gerasa jiyajinijinio pueyajanaari jiyanohera puereturiquiaa. Naaratej, ¡Jesu secojotureeri na quianura nojori jiyajiniji! Naaratej, Jesuuri botejinia tacataquiaariuhua na pueyata na quianuhua. ³⁸ Cuno pueyano, canajiniji samaruhua tohuareetareecuajani, nojuajaari Jesu secojoree juucua nata na quianura. Jesuuri saaja naa na sequeree:

³⁹—Quia tiajinia quia quiaarohua. Quia pueya niquiara quia pohuatasuhua taa Pueyaso miirii maninia quiajaniyani.

Pueyanoori quiaarohua. Puetunu na tiacajiniajanaa pohuatasuhuari taa Jesu miiriu-cuaa maninia nojuajani.

Jesu naatanishacari Jairo niyatu, Jesu toque quiana maajinjo
(Mt 9.18-26; Mr 5.21-43)

⁴⁰ Jesu jaara niuutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa. ⁴¹ Jiyacaritij, tamonu pueyanoori Jesuucua tiuquishii. Na sesaari quiija Jairo. Nojuajaari Pueyaso secojoua tia jiyaniijia quiquiaari cuno tiacajinia. Jesu cariquimijaji mojoquetaseeri na secojonura na tiajinia Jesu quianura. ⁴² Neyatuniyojuuari quera cusoriquiaa jiyacari. Majaari socua niquiohuaraca na quiniu quiija. Doce marijiaari tari shocojoquiaari cuno neyatu.

Jesu quiasacari Jairota, jiyanohera queraatia pueyari nata quiojoriquiaajuhua. Pueyari jiyanohera na tanuujuriquiaa, nata nojori quiojosacari nucuaaco.

⁴³ Tamonu maaji cusosuuri cuno pueya tajinia quiriqiaajuhua. Doce marijiaari tari na shocojoquiaari pueyaracaanu na naatesacari. Cuno maajiri puetunu na cumaneeca puecaquiaarijianaa najuhuanaj, na naarajosaanura juucua. Naarajonaari maja na naata na naataniniu quiquiaari. ⁴⁴ Maaji cusosuuri Jesu nijiniji catecanoquiaari nocua. Na tucuaque toque casaca quiasee jiyasohuari. ¡Na nanacaari ritia curetaquee!

⁴⁵ Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaniya.

Pedroori Jesu sequeree:

—Niishitiojonanaa, ¿majateeri quia niquiniucua? Queraatia pueyacuaajaari quia tanu-ujija.

⁴⁶ Jesuuri saaja sequereee:

—Maja. Cusosu cua quiareeni. Niishiyaniija cua cumaacaari tari na naatanirii.

⁴⁷ Maaji niishishacari na miishano jiyasohuaja tari niishishaaree, Jesuucua nimiaari. Na puerenuta tetecariquiaari. Jesu cariquimiaji mojoquetaseeri. Puetunu pueya niquiara-janaa pohuataareeri casaara Jesu na quiareeni. Pohuatareejaariuhuaq taa na naataquee ritiani, Jesu na quiasacari. ⁴⁸ Jesuuri na sequereee:

—Sanaunaa, cucua quia tiuuniuucua, quiaari naatarohua. Quioojia quia cajitiriohua. Juhuaaniya quia quiaarohua.

⁴⁹ Jesu pocoojosacariija cuno maajitia, tamonu pueyanoori tiuquiquiaari Jairo tiajiniji. Jairo sequeeseeri:

—¡Quia niyatu tari cusoquee! Maja najuhuana riniu paniniu Niishitiojona quia tiajiniaara.

⁵⁰ Jesu tojishacari cuno pueyano sequesano, Jairo sequereeri:

—Maja puerenu. Cucua quia tiuuri saaja. Quia niyatucuaaja naatananiuhua.

⁵¹ Jesu tiuquishacari Jairo tiajinia, nojuajaari maja na shanacunu quirii quenaaja tamonu pueyano tiuquiniuria macuucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuanio. ⁵² Puetunu tii quiniaa pueyajanaari maaji samiriucua nujuqueturiquiaa. Sapiyonuuriquiaaariuhuaq. Jesuuri nojori sequereee:

—Maja najuhuana nia nujuquenu. Maaji samiriu maja macu, nareja maqueyano.

⁵³ Naa Jesu sequesacaritij, pueyari na saroojotaree saaja. Nojoricuaajaari niishiriquiaa maaji samiriuuri seetanujuanaa macu quiriquiaa. ⁵⁴ Jiyacaritij, Jesuuri macuucua tiuquiquii. Na juashiquiajiniji na quiaseeri. Jiyanoehua na sequereeri:

—Maaji samiriunaa, ¡quia sanere!

⁵⁵ Na sohuanuuri nocua tacatemohua jiyacari. Samiitiamohuari. Ritia saneequeeri. Jesuuri na nucua sequereee na mianuutenura. ⁵⁶ Na queyari jiyanoehua jiuuiatereee. Jesuuri nojori sequereee, maja nojori pohuatanura tamasaqa niquiara na miishano.

9

*Jesu jiyaramiquishacari na doce pueya Pueyaso rupaa nojori pohuatanura
(Mt 10.5-15; Mr 6.7-13)*

¹ Jesuuri na doce saquiriojosano pueya rerejotequiaari na jiyaramiquishocoriquiano. Nojori niqitiooree cumaacaari, puetunu tamaatia sesa samaruhanajanaa nojori tohuatejonura, cusosuhua nojori naatanijionurajuhuaq. ² Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanooni pania nojorini, na muerasu nojori quiniuria. Nojori jiyaramiquiriijaariuhua cusosuhua nojori naatanijionura. ³ Jesuuri nojori sequereee:

—Maja nia panu nia rucuanajotajara nia panishano. Majaari nia miojotu nia panu, nia caashoque, nia coseyaca, nia cumaneecanio. Saa nia cushishano toquetaja nia quiaare cutara. Maja socua toque nia panu nia cushishocoriquiano. ⁴ Naa jaara tamonu tiajinia tiuquishiquia, niocua cuniqui jiyojetaseequiaja, niaa jaara cuno tiacajiniji quiaarejaatijia. ⁵ Naa jaara tamonu tiacajinia tojinu paniaquishaare, cuno tiacajiniji nia quiaare. Naa nuhuajiria, cuno pueya niquiara niocua nia niocuacajiniji cuno tiaca jaaquia nuutare. Naacuajitij, cuno pueyari niishiniutianiya, Pueyasoori nojori jiyanoaquiniutianiya, nojori tojitianu paniaquiniucua Pueyaso rupaa pohuatanura.

⁶ Na nuhuaji, Jesu pueyari quiojoquee puetunu cuno jiyajinia shiitianiyojua tiacajinia-janaa, Pueyaso rupaa nojori pohuatanura tii. Nojoriiri Pueyaso rupaa pohuatanuuquiaari pueya jiyanooshaanura, Pueyaso pueya nojori quiniuria. Naajuhuaq, cusosuhua naatani-jiotuquiaariiri.

*Jiyaniija Herodes niishiniu panishacari cante Jesuni
(Mt 14.1-12; Mr 6.14-29)*

⁷ Jiyaniija Herodesri pohuatasaaquiaari puetunu Jesu miishanojinijijanaa. Herodesri saaja jiyajenequiaari cante Jesuni. Jiyacaritij, noojiaqueya pueyari sequeriquiaa: “Jesu-cuajaari jiyaniija Herodesri nacatanishano Tiuquiniujona Juan samiitianoehua”. ⁸ Tamasaca pueyari Jesujiniji sequeriquiaajuhuaq: “Supuetana Elíascuaja tari tiuquiriohua”. No-juacuajaari tariucuaacaanu Pueyaso sequenu panishano caminiujunua quijia. Saniniujia, tamasaqa pueyari sequeriquiaajuhuaq: “Jesucuaajaari tamonu tariucuaacaanu Pueyaso sequenu panishano caminiujunua samiitianoehua”. ⁹ Herodesri saniniujia sequereee:

—Janiyacuajaari cua pueyano jiyarocanu Tiuquiniujona Juan na nacatanurani. ¿Cante-jaara cuno Jesuni? Janiyari queraatia nocuaji tojinuuyani.

Cunora, Herodesri jiyanoehua Jesu niqiniu paniriquiaa juucua.

*Jesu mianuutesacari cinco mil pueya
(Mt 14.13-21; Mr 6.30-44; Jn 6.1-14)*

¹⁰ Jesu jiyaramiquishano pueya tacatesacariuhua, nojoriiri Jesu pohuataquiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. ¹¹ Pueya niishishacari tee Jesu quiriquiaani, nojoriiri saaja nocua quiojoquiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanjioreejuhuaj.

¹² Tenacariishacari, Jesu doce pueyari nocua catecanoquiaari. Na sequetureeri:
—Pueya quia jiyaramiquiri cateca tiacajinia, nojori cuaara cuniqui pajenuura na mi-aquenuusocoriquiano, na maquetujarajuhuj. Nojori panishanoori shaaqui niya pa quishaquini.

¹³ Jesuuri nojori sequeree saaja:
—Niaa mariqui nojori mianuutere saniya.
Nojoriiri Jesu sequeturee:

—¿Canaateeri miaquesanoracajaarani? Canaa saaja cinco panniyojua jiiitiani, caapiquiriyatu sapitiaajanio. ¿Canaateeri secaja pa cumaneecata masenutaniya queraatia miaquesano puetunu nio pueyarajanaani?

¹⁴ Cuniqui nojoritia quiriquiaa naasucuaari cinco mil pueya. Jesuuri na pueya sequeree:
—Pueya nia raquiriojotare maninia. Cuaara cajitiuria cincuenta jatiqui, socua cincuenta tamaqui. Mianuutesocoriquiano puetunu pueyajanaa, cuaara naa cajitiuuriatej.

¹⁵ Nojoriiri Jesu sequesano miirii. Puetunu pueyajanaari cajitiurii. ¹⁶ Na nuhuaji, Jesuuri cuno cinco pan pataree, caapiqui sapitiaajanio. Jiyocuaaanu maureeri na Que Pueyaso na secojonura miaquesanoocuaa. Na nuhuaji na neecasereeri. Na pueya na niqutioreeri puetunu pueyajanaa nojori serotasocoriquiano. ¹⁷ Puetunu pueyajanaari na miaquenu-uree. Maninia tooquioreeri. Na nuhuaji, doce canaasatuuri mishinijiosaaquiaari pan raacuata, sapitiaaja raquiquiatanio.

Pedro sequesacari Jesuuri seetanujuanaa Cristo
(Mt 16.13-19; Mr 8.27-29)

¹⁸ Tamacari, Jesuuri Pueyaso secojoriquiaa tamajaaja. Na saquiriojosano pueyari naa quiriquiaa. Jiyacaritij, Jesuuri nojori nequesotaree:

—¿Taa pueya sequequiaa janiyani, cantena janiyani?
¹⁹ Nojoriiri na riucuaaree:

—Noojiaqueya pueyari quia sequequiaa, quiaana nacatasano samiitianohua Tiuquini-jiona Juan. Tamasacaari quia sequequiaajuhuj, quiaana Elías, tariucuaaanu Pueyaso sequenu panishano caminiujuunia. Tamasacaari saniniuujia quia sequequiaa, quiaa naasucuaana tamonu tariucuaaanu Pueyaso sequenu panishano caminiujuunia samiitianohua.

²⁰ Jesuuri saniniuujia nojori nequesotaree:
—¿Niajaniryahuaj? ¿Taa nia sequeyani, cante janiyani?
Pedroori na sequeree:

—Quiajaniyacujaari Cristo, Pueyaso Jiyarosano.

²¹ Jesuuri jiyanoohua nojori rootaree maja nojori pohuatanura tamasaca niquiara cante nojuajani.

Jesu numootesacari na pueya, nojuaja mosaanutaniya
(Mt 16.20-28; Mr 8.30-9.1)

²² Jesuuri naa nojori sequerohuacuhuj:
—Janiyari jiyanoohua naquiya miishaanutaniyani. Pa Judiocuaca camarucuaari cua niqiniu paniyaquiniutianiya, na tojitianu paniyaquishacari janiya. Naajuhuj, pa puey-acuara secojonaa jiyaniijianucuaari cua niqiniu paniyaquiniutianiya, Moisés Rootasano-jiniji niishitiojanaano. Nojoriiri cua monutaniya. Naajaa, jiuujianaraca juucajinia, janiyari samiitianutaniuhuanu.

²³ Na nuhuaji, Jesuuri puetunu pueyajanaa sequeree:
—Cante cua nuhuajiniu paniyani, cua pueyano na quiniuria, nojuaja cuaara niyajetaara tama na miiniu panishanojuaja. Cuaara panitiaara tama na cuaqueyajaaja puetunu juucajanaa, cua tojjia na quiniuria seetanujuanaa. ²⁴ Saniniuujia, cante tama na cuaqueyajaaja shuquiritiniuria niishiriojoquiaani, nojuajaari jiyanoohua taraatia quiniutianiya na nuhuaji. Saniniuujia, cante tama na cuaqueyajaaja panitiaquiaa cua panishano na miinuriyani, nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. ²⁵ Pueyano jaara puetunu nio jiya casamijianaa jiiitiana quiri, cuno maara najuhuaa quiri, nojuaja jaara na shaajesacari jatasare mani quiquiojinia Pueyasooju. ²⁶ Cante cua seera caririqiyi mijiria quiniaa pueya niquiara sequenurani, janiyari nojori jiyaniijiani, naajuhuj janiyari nojori seera caririqiniutianiyani cua

tiuquishacariuhua Jiyaniijia cua quiniuria. Janiyari shanohua niquishano quiniutianiya cua tiuquishacariuhua cua Que shacantuuca cumaacatani, na seya cumaacatajuhuaj. Naa-juhuaj, cante cua rupaa pohuatanu caririquiya sesa miijiaa pueya niquiarani, janiyari nojori seera caririquiniutianiyajuhua. ²⁷ Seetanujuanaa nia sequeyanijia, noojiaqueya niajanijiniinooori maja nia cusonuunu quiniutianiya juhuanojuaja, niaa cuuara niquir-ijiaatijia Pueyaso cumaaca tiuquiyano cucua, na muerasu jitiariquianoni.

Jesu jatasacari shacantuucara
(Mt 17.1-8; Mr 9.2-8)

²⁸ Naa Jesu sequenu nuhuajitij, ocho juuca nuhuaji, nojuajaari tuhuananuucua tacaquiaari na Que Pueyaso na secojonura. Nata quiaareeri Pedro, Santiago, Juannio. ²⁹ Jesu secojosacari Pueyaso, na jiquiocoori tamaatiara jataquiaari. Na toqueeri jiyanoehua cohuajara jataquiaarijuhuaj, shacantuquera. ³⁰ Jiyacaritij, caapiqui pueyari nocua muetaquiaari. Jesuta pocojoriquiaari. Nojoriiri quiriquiaa supuetana Moisés, supuetana Elíasnio. ³¹ Nojori njuuatsaquiiri shacantuuca quiriquiaa puetunu nojori shocujanaa. Nojoriiri pocojoriquiaa taa Jesu mosaanutaniya Jerusalén tiacajiniani. ³² Jiyacaritij, Pedroori jiyanoehua maquenuujuriquiaa, nata quiniaajuhua. Naajaa, majaari nojori maquenu quiriquiaa. Naacuajitij, nojoriiri Jesu shacantuuca niquiquiaari. Cuno caapiqui supuetanaa niqutiuriijaariuhua, Jesuta pocojijano. ³³ Cuno caapiqui pueya quiojonu panishacariuhua Jesu shuriucua, Pedroori Jesu sequeree najuhuanaj:

—Niishitiojonanaa, canaa namitia niya quiyani! ¡Canaa suhuororeera jiuujianaraca suhuorotucua; quiaara, Moisésra, Elíasranio!

Pedroori naa najuhuaa pocuariquiaa. Majaari na niishiniu quiquiaari casaa na sequeriquiaani. ³⁴ Pedro pocaasacarijia, cohuaja najacaari nojori mishiquioma. Nojoriiri puereturiquiaa cohuaja najacajinia nojori quishacari. ³⁵ Na nuhuaji, nojoriiri Pueyaso tojirii pocuaano cuno cohuaja najacajiniji. Naa sequereeri:

—Niioori cua Niyanu, cua saquiriojosano nia Jiyaniijia na quiniuria! ¡Nojuaja nia tojitiare!

³⁶ Naa nojori tojinu nuhuaji cuno rupaatej, nojoriiri Jesu niquirioehua. Tari tamajaaja nujuariquiaari. Nojoriiri sanaa na niqutiariquiaa. Na nuhuaji, majaari quenaaja tamonu nojori pohuatanu quiquiaari nojori niquishano, Jesu jaara samiitiaquiaariuhuaajatiijia.

Caya samijajiniji Jesu tohuatesacari samaru
(Mt 17.14-21; Mr 9.14-29)

³⁷ Tariqui, nojori jaara rosetaquiaariuhua tuhuananujiniji, queraatia pueyari Jesuucua nijioquiaari. ³⁸ Cuno pueya tajiniji, tamonu pueyanooori naa nacaquiaari:

—Niishitiojonanaa, cucua quia taraajere quenaaja! ¡Cua niyanuniyojua quia niquiri! ¡Jiyaniujojanaari quiyanuniyojua! ³⁹ ¡Samaruuri na miiquiaa taraatia! ¡Na sariyotequiaari! ¡Na taquiriocatequiaaariuhua! ¡Na rupaamajiiri cushaaquiaa! ¡Na cuaqueya miiquiaa moqutiuriariaari! Majaari ritia na cartenu paniniu quiquiaa. ⁴⁰ Janiyari juucua quia pueya sequereeni, cuno samaru nojori tohuatenura. Majaari nojori naata quiriquiaa na tohuatenura.

⁴¹ Jesuuri sequeree:

—Pueyaso tojitiaashijiacanaa, niaaqui Pueyasoocua tiuyashijiacajuhuanajaj. ¿Janiya-teeri pueyaracaanu rejeretanutaniya niajaniani? Miji quia niyanu quia jaatucure.

⁴² Caya samijia catecanosacari Jesuucua, samaruuri na pojotequee. Na taquiriocu-ateereeri. Jesuuri samaru sequeree na tohuatenura. Caya samijia naataniriiri. Na niquti-iorohua na queeri. ⁴³ Puetunu pueyajanaari jiyanoehua jiuujiateere nojori niquishacari Jesu miishano Pueyaso cumaacata.

Jesu pacutesacari pohuatanu nojuaja mosaanutaniya
(Mt 17.22-23; Mr 9.30-32)

Pueya jiuujiatesacarijia puetunu Jesu miishanojinijianaa, Jesuuri na pueya sequeree:

⁴⁴ —Maninia nia tojiri casaa cua sequenutaniya niajaniani. Majaari na niyajetanu. Janiyari niqutiosaanutaniya pueya miiniuria janiya taa nojori paniyacuajani.

⁴⁵ Majaari na pueya niishiniu quiriquiaa Jesu sequesano. Juhua miriqui sequesanoori quiriquiaa nojoriira. Naacuajitij, majaari nojori naata niishiniu quiquiaari. Nojoriiri Jesu nequesotanu puereturiquiaajuhua, casaa nojori na pohuatasano sequenu paniriquiaani.

Cante jiyaniijajanaa cutarani
(Mt 18.1-5; Mr 9.33-37)

⁴⁶ Jesu pueyari juhuacatecara juayonuutariquiaa teyano nojorijinijiniote jiyaniijajanaa quiniutianiya. ⁴⁷ Jesuuri nojori niishiriojosano niishirii. Naaratej, Jesuuri naatujua nujuateere na shuriucua. ⁴⁸ Na pueya sequereeri:

—Cante nio mueya rupueya na cumaquiniuria cucua tiuujia cuno mueya quiniucuanu, nojuajaari cua rupueyajuhuj. Cante cua rupueyani, cua Jiyarona rupueyajaariuhuj. Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuani, nojuajaari jiyaniijijanaa quiniutianiya puetunu narta Pueyaso muera-sujinijiniojuanaa.

Cante maja pa paracani, nojuajaari pa jiyano
(Mr 9.38-40)

⁴⁹ Juanri Jesu sequeeree:

—Niishitiojonanaa, canaari pueyano niquiriucuaani samaruhua tohuatanijiyano quia cumaacata. Canaari na tenujurucuaani nojuaja quiaquiniucua pajaniyajinijinio.

⁵⁰ Jesuuri na riucuaeree:

—¿Casaara nia tenujurucuaarinioj? ¿Niaateeri niishiyaquiya, cante pa paraca quiaquiyani, nojuajaari pa jiyano?

Jesu nacasusacari Santiago, Juannio

⁵¹ Quera Jesu tacanu panishacari jiyocuaaanu, nojuajaari juhuacatecara Jerusalén tiacajiniera quiaaree, juhua jiuujiaaju na puereyaquiniutia. ⁵² Jerusalén tiacaacuara nuu cajiniocua Samaria jiyajinia Jesu quishacari na pueyata, noojiaqueya na pueyajinijinio puerateree tamonu tiacajinia nojori masenura tia nojoriicuaajiiri. Naacuajitij, na pueyari Samaria jiyajinia quijia shiitianiyojua tiacajinia quiojoquiaari tii Jesu maquejara nojori pajenura. ⁵³ Cuno Samaria pueya jaara niishiquiaari Jesuuri Jerusalén tiacajiniera quiariquiaa, majaari nojori paniniu quirii Jesu maquenura nojori tiacajinia. ⁵⁴ Santiago, Juan niishishacari cuno Samaria pueyari nojori sooriquiaa, nojoriiri cunora Jesu nequesotaree:

—Jiyaniijianaa, ¿quiaate paniya canaa tininiuria mani jiyocuaaanuji, cuno pojori na catijianura, taa tariucuaaanu Pueyaso sequenu panishano caminiujunua Elías miiquiaaricuaani?

⁵⁵ Jesuuri nojoriicua tacateree. Nojori nacasureeri naa nojori saniitonu panishacari cuno Samaria pueya. Naa nojori sequeeree:

—Majaari nia niishiniu cana sohuanute naa nia niishiriojoteyani. Nia niishiri, majaari cua ninu quiquiaari mijiria cua puecoonura pueya. Saaja niquiaari cutaranijia, pueyacuaji cua tacunura.

⁵⁶ Na nuhuaji, nojoriiri tamonu shiitianiyojua tiacajinia quiojiyaree tii maquenura.

Tamasaca pueya quiniu panishacari Jesu pueyara juucua
(Mt 8.19-22)

⁵⁷ Nojori quiojosacari nucuaco, tamonu pueyanoori Jesu sequequiaari:

—Jiyaniijianaa, quia pueyanora quiniu paniyanijia. Janiyacua quia tarajareni puetunu tiquiyocua quia rucuanesacarijianaa.

⁵⁸ Jesuuri na riucuaeree:

—Quiojojuapueeri na raaca jiiitia cutara. Shuhuari na jesuhua jiiitiaajuhuj. ¿Saniniuujia Pueyaso Niyanuurijataj? Majaari cua jiiitanu tama cua maquejarajaaja.

⁵⁹ Jesuuri tamonu pueyano sequeeree:

—Cua nuhuajiniara quia quiri.

Nojuajaari saa sequeereeja:

—Cuaara Jiyaniijianaa. Cua que cuaara cua niquiara shaajeerajaara. Janiya jaara na jamoreni, janiyacua na nuhuaji quiata rucanejore cutarani.

⁶⁰ Jesuuri na riucuaeree:

—Naajaa, quia tarinitiare. Cua tojtiaashijiacaari juhua macunucua. Naaratej, cuno macunucua cuaara jamoora tama narta macujuaaja. Quia rucanejore cutara Pueyaso rupaa quia pohuatanura.

⁶¹ Na nuhuaji, tamonu pueyanoori Jesu sequeeree:

—Jiyaniijianaa, janiya cutara quiata quianu paniyani. Coteenu cua tiajinia quiquiooraj, cua pueya cua niquiniuria cua nuhuajiria.

⁶² Jesuuri miriqui na riucuaeree:

—Pueyano jaara na juyaca poonitijiya, jiya jiicataja na jayotanura na cuhuariquia na jeenucuanura, maja cumaati na nijinara na niquiniu. Na camaru jaara na nijinara niquiri, sesa naaniutianiyari shuyorocotiyocuara. Naajuhuj, cua pueyano jaara na quiquiojinia tacatenu panijohua quiri, nojuajaari maja maninia Pueyasora poonijiona.

10

Jesu jiyaramiquishacari setenta y dos na pueyajinijinio, Pueyaso rupaa nojori pohuata-nura

¹ Nio nuhuaji, Jesuuri socua setenta y dos pueya saquiriojoquiaari, nojori puetanura nojuaja, puetunu Israel pueya tiacajiniajanaa Pueyaso rupaa nojori pohuatanura. Jesu-uri nojori nuhuaji tii quianu paniriquiaajuhuj. Puetunu nojorijianaa jiyaramiquiriiri caapiqui, caapiqui. ² Nojori nuhuajiria, Jesuuri nojori rootaree nio miriqui sequesano:

—Queraatia Pueyaso muerasuranoori quiya, juhua senoosocoriquiana. Saniniuujia, secaja na senonaari quiya. Cunora, cuhuariquia camaru nia secojore, socua senonaa na jiyaramiquiniuria puetunujuanaa na senoosaanura. ³ Nia quiojiyare pueyanaa. Nia niishiri, janiyari nia jiyaramiquiya juhua borrego niquihuanu puereeta sareya tajinia. Pueyaso paraari juhua puereeta sareya. ⁴ Nia quiojosacari, majaari nia caashoque nia patanu, nia cumaneeca quiquiojuhuj, nia sapatunio. Majaari nucuaco nia tarishiniu pueya nia saruhuatasacari. ⁵ Tamonu tiajinia nia tiuquishacari, coteenu nia saruhuatare na camaru nio sequesano: “Juhujaniya nia quiri, nio tiajinia quiniaanaa”. ⁶ Cuno tiajinia quiniaa pueya jaara jiyanojia quiri, naa nia sequesacari, Pueyasoori nojori miniutianiya maninia. Nojori jaara juaajia quiri saniniuujia, Pueyasoori nojori shuquir-itiyaquiniutianiya. ⁷ Tee nia masesaareni, cuno tiajinia nia jyojere. Nia miaquere, nia rature nojori niqutiosano nijaniya. Nia pohuatanuucua Pueyaso rupaa nojori niqiuara, nijaniya cuara niqutiosaria nia panishano. Majaari tamasa tiajinia nia pacunujunu tii nia miaquenura. ⁸ Nia tiuquijiosacari tamonu tiacajinia, pueyano jaara nia masuure na tiajinia nia quiniuria, niocua niaara nojori rupojosano miaquere. Majaari na soonu. ⁹ Cusosuhua nia naatanijore cuno tiacajinia. Pueya niqiuara nia sequere: “Pueyasoori quiarjia nia jyatenu paniya na muerasu nia quiniuria”. ¹⁰ Nia tiuquishacari tamonu tiacajinia, pueya jaara tii nia tojiniu paniyaquiri, niocua cuno tiaca nuucujinia nia nacara pueya niqiuara: ¹¹ “Nia tiacajinijinio jaquiani, canaari canaa nioluacaacuaji na majiriutiaani. Cunoori nia niishiniuria, Pueyaso jaara nia sanitiore, majaari canaaca na tiutiasaanu quiniutianiya. Pueyasocujaari nia jiyanooniu paniriquiaa juucua, na muerasu nia quiniuria”. ¹² Seetanujuanaa nia sequeyanijia pueyanaa, Pueyaso saniitonu juuca jaara quiri, cuno tiacajinia quiniaari socua jyanohua saniitiosaanutianiya Sodoma tiacajinia quiniaa pueyajiniji.

Jesu piriyosacari Pueyaso tojtiaashijia pueya
(Mt 11.20-24)

¹³ ¡Corazín tiacajinia quiniaa pueyanaa, mariyata Betsaida tiacajinia quiniaa pueyanaa! Cua tojiri. ¡Niaari jyanohua saniitiosaanutianiya! ¡Niaari socua Pueyaso tojiyashijia quiya cuno tariucuacaanu Tiro tiacajinia quiniaa pueyajiniji, Sidón tiacajinia quiniaa pueyajinijinio! Cuno pueya jaara Pueyaso cumaacata miishano niqiuquiaari, taacua miqiuano nia tiacajiniacaani, nojori maara ritia noojia tacatoquiaari cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuquiaari, nojori taraajesacari sesa nojori miinuucua. Naajuhuj, nojori maara juaca niojoquiaari nojori nacaacua quera nojori macaashacari, sesa miijia nojori quiniucua. ¹⁴ Niaa cutaraari cua cumaacata cua miijiosano niqijia. Naajaa, majaari nioojia nia tacatonu quiquianu Pueyasocua. Naaratej, Pueyaso saniitonu juucujinia, ¡niaari socua jyanohua saniitiosaanutianiya Tiro tiaca pueyajiniji, Sidón tiaca pueyajinijinio! ¹⁵ Nijaniyarijiataj, Capernaum tiacajinia quiniaa pueyanaa, ¿niaateeri jiyaniya niaari jiyocuaanu quiniaara jiyataaanutianiya? ¡Maja! ¡Niaari puequeetuuj raama quejoosaanutianiya saniya!

¹⁶ Cua pueyanaa, cante nia tojtiajacani, nojoriiri cua tojtiajacajuhuj. Naajuhuj, cante nia ruuretaa cua rupaa nia pohuatasacari, nojoriiri cua ruuretaajuhuj. Cante cua ruuretaani, nojoriiri cua Jiyarona ruuretaajuhuj.

Jesu jiyaramiquishano setenta y dos pueya tiuquijiosacariuhua nocua

¹⁷ Jesu jiyaramiquishano setenta y dos pueyari Jesuucua tiuquijioquiaariuhua. Nojori-iri jyanohua shuquiriaatia quiriqiaa. Jesu sequetureeri:

—¡Jiyaniijianaa, samaruuari canaa tojtiaacanuni canaa tohuatanijiosacari nojori, canaa jyaniquishacari quia sesa!

¹⁸ Jesuuri nojori sequere:

—Taaquiririni. Janiyari Sesaaca niqiuqianuni juhua niaco tiyano jiyocuaanu. ¹⁹ Janiyacuajaari cua cumaaca nia niqutiocanuni, juhujaniya nia rucuanenura sacocua caco, turucuanini cacionio. Cua cumaacata, niaari puetunu Sesaaca cumaacajanaa shocotanutianiya, juhujaniya panaatia nia rucuanenonura, cua rupaa nia pohuatanura. Majaari quenaaja tamonu casaa miiniu quiniutianiya naquiya nijaniya. ²⁰ Naajaa,

majaari saaja shuquiriaatia nia quiniu samaruhua tojtianuucua niajaniya. Shuquiriaatia nia qiri cutara nia sesaca naajiotasano quishacari jiyocuacaanu, Pueyaso muerasu sesaca naajiotasaqui.

Jesu shuquirishacari
(Mt 11.25-27; 13.16-17)

²¹ Jiyacaritij, Pueyaso Sohuuanuuri Jesu shuqiritirii jiyano. Cunora, Jesuuri na Que Pueyaso sequere:

—¡Quia shuqiritiaanjia cua Quena! ¡Quiaacujaari Jiyaniijajanaa quia jiyocuacaanu, mijiriano! ¡Quiaari maninia miiri! Cua pueyari juhua naatujoori, maja puera niishijia. Naajaa, quiaari quiarjia nojori niishitirii quia niishishano, quia jamosano mijiria niishi-jiaacaacua. Jaa, cua Quena, quiaacujaari naa nojori panitiaja.

²² Cua Queeri tari cua niqitioquiaari puetunu na jiiatasanojuanaa, Jiyaniijiarano cua quishacari. Majaari tamonu niishiniu quenaaja cante Pueyaso Niyanuni, saaja cua Que cutaraari cua niishiya. Naajuhuj, majaari tamonu niishiniu cutara cante cua Queni. Saaja janiya cutaraari na niishiyani. Naajuhuj, noo pueyari na niishiya, canapue cua niishitiniu paniya cua Quecujani.

²³ Na nuhuaji, Jesuuri na pueyacu tacateree. Saaja nojori sequereeri:

—Shuquiriaatia quijia cutaraari niajaniya, nia niqiniuucua puetunu nia niqishanojuanaa nia rupeuucua janiya. ²⁴ Seetanujuanaa nia sequenyajia, queraatia tariu-cuacaanu Pueyaso sequesano caminiujunaa pueya, mariyata jiyaca jiyaniijianucuanio, nojoriiri nia niqishano niqiniuucua jiaatiaquiaari juucua. Majaari na niqitunio quiquiaari. Nojoriiri cuata nia quishacari nia tojishano tojtianuucua jiaatiaquiaari juucujuhuj. Majaari na tojtianu quiquiaari.

Samaria jiyajinijinio maninia mijajiniji pohuatasano

²⁵ Na nuhuaji, Moisés Rootasanojiniji niishitiojona pueyanoori Jesuucua niqiaari nata na poccojonura. Jesu na pocuatenura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaracaanu rishijia cua quiniuriani?

²⁶ Jesuuri na riucaare:

—¿Taate Moisés Rootasanojinia naajiotasano? ¿Taa quia niishiriojoquiaani, quiaa jaara na serojoquia?

²⁷ Moisés Rootasanojiniji niishitiojonaari Jesu riucaare:

—Naa sequyano:

“Quia Jiyaniijia Pueyaso quia paniri puetunu quioojatjanaa, puetunu quia sohuantajanaa, puetunu quia cumaacatajanaa, puetunu quia niishitajatajanao. Naajuhuj, quarta pueyano quia paniri taa quia paniyacuaa tama quia cuaqueyajajani”.

²⁸ Jesuuri na sequere:

—Quiaacujaari maninia riucaare. Naa quia miishacaritij, quiaari pueyaracaanu rishijia quiniutianiya.

²⁹ Moisés Rootasanojiniji niishitiojonaari tama nocuaji tacunu paniriquiaaja, maninia quijia na quiniuria Pueyaso niqiaari. Naaratej, naa nequesotarahua Jesuuri:

—¿Canteeri cuarta pueyanoni?

³⁰ Jesuuri nio pohuatasano na pohuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén tiacajiniji. Nohuasenujuaca pueyari na quiaree. Puetunu na jiiatasanojuanaa na jaariuutiatureeri, na cushishano toquenio. Na piquitiuri. Quera macu na tiujiatuqueeri. ³¹ Na nuhuaji, pueyacuaa secojonaari cuno nucuaco quiariquiaajaacuhuj. Na niqishacari piquishano narta Judio pueyano mataano nuu shuriquiocora, na shocortamaa saajaari. ³² Na nuhuaji, Levita pueyanoori cuno nucuaco quiariquiaajuhuj. Na niqishacari narta Judio piquishano pueyano, nojuajaari saaja na shocortamaajuhuj. ³³ Na nuhuaji, Samaria jiyajinijinio tahueri cuno nucuaco quiariquiaajuhuj. Na niqishacari parta Judio pueyano mataano, Samaria jiyajinijinio tahueri nocua tarajere. ³⁴ Na cacataseeri. Nohuasenujuaca piquiyashiquia matejoree shiyocuataari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijinijaarijia. Ritia na jiyataaree rucojojuaca tiuquijiojua tijajiniaraari. Cuniqiu na cojuatareeri. ³⁵ Tariqui, cuno tahue quianu panishacariuhua, nojuajaari caapiqui cumaneeca pueraree. Ruconaa tia camaru na niqitioereeri. Na sequereeri: “Cucua quia jiyanoori. Nio pueyano quia cojuatare quiria. Quiaa jaara socua quia cumaneeca nocua puecare, janiyacua saniniujuja quia niqitiorohuanijia cua tacatesacariuhua”.

³⁶ Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca rucoonaa pueyajinijini, ¿tetyano cuno pojorijinijiniote narta pueyanoocua taraajeja cutarani?

³⁷ Moisés Rootasanojiniji niishitiojona pueyanoori Jesu riucuaaree:
—Cuno Samaria jiyajinijinio tahuecuajani, nocua taraajequiaarini.

Jesuuri na sequeree:

—Taaquiririni. Quia quiaarohua. Naa pueyacua taraajeja quia quiriijuhua, taa cuno tahue taraajequiaaricuaani.

Jesu quishacari Marta, María tiajinia

³⁸ Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuuquiaari. Naaratej, na tiajinia na tiuquintiareeri. Cuno maaji sesa quiquiaari Marta. ³⁹ Martaari tarajanu jitiiaja. Na sesaari quiquiaari María. Maríaari Jesu niohuaca shuriuquiumia cajiriquiaa, na tojniuria Jesu pohuatasano. ⁴⁰ Marta cutaraari poonijioriquiaa queraatia na miishocoriguiano na jitiiasacari. Cunora, Martaari Jesuucua catecanoree. Na sequereeri:

—Jiyaniijianaa, ¿majate cucua quia taraajenu? Cua tarajanuuri cua tarinitiaquee niquiriyatujua, puetunu nio poonijosanotajanaa. ¡Quia sequere na naacutanura janiya!

⁴¹ Jesuuri saaja na sequeree:

—Martanaa, quioojia quia cajitiri sanaunaa. Quiaari puera quia miishano tacaataia.

⁴² Saaja niquiriyatu casaa cutaraari jyanohua panishano. María cutaraari cuno socua panishano casaa saquiriojoree. Tamonuuri maja na naata na tojishano jaariutianu noojiajiniji.

11

Jesu niishitiojosacari na pueya nojori secojonura Pueyaso

(Mt 6.9-15; 7.7-11)

¹ Tamacari, Jesuuri Pueyaso secojoriquiaa tamaqui. Na puecasacari secojonu, tamonu na pueyajinijiniocori na sequeree:

—Jiyaniijianaa, canaa quia niishitiojore canaa secojonura Pueyaso, taa Tiuquinijiona Juan niishitiojoquiaari na pueyacaani.

² Jesuuri nojori sequeree:

—Pueyaso nia secojosacari, naa nia sequere:

“Jiyocuaaanu quijia canaa Quenaa, puetunu pueyajanaa cuaara niishiiria quiaari tojetaarucujanaa sesa miyashijia. Pueya cuaara seetanujuanaa quia jiyateera nojori jiyaniijia quia quiniuria. Quia panishano cuaara miishiiria mijiria, taa jiyocuaaanu miishiyacuaani. ³ Canaa quia niqutioriquia canaa miaquesocoriguiano canaa panishano puetunu juucajanaa. ⁴ Canaa quia jiyanoori sesa canaa miishanojiniji, taa canaa jiyanooquiaacuaa sesa canaa miiniaani. Naajuhua, canaa quia cojuare, maja sesa canaa miitishaanura”.

⁵ Jesuuri naa sequereehua, socua nojori na niishitiojonura:

—Niaa jaara nia rupuenaacua quiaare shiyaqueya, casaa nia masenura nojuajiniji, ¿nojuajatucua taa quia sequerene?, quiaa jaara na sequere: “Cua rupuenanaa, cua niqutiore jiuujianaraca pan. ⁶ Tamonu cua cojiniaari shusha tiuquiriohua tucuaaanu, miaajeyari. Shaquiri cua sumatuu cua miaquetesocoriguiano nojuaja”. ⁷ ¿Quiaatucua taa miirini quia rupena jaara na tiajiniaacumaji quia riucuaare?: “Maja cua taajetenu. Cua tia tiotiu tioree tarinijia. Tari cua mueya mataa maquetujinianijia. Maja cua naata sanenu cua niqutionura quia panishano”. ⁸ Jaara naa sequeretej, niaa jaara na tia tiotiu piquiniu tarinitiaaquiri, janiyari seetanujuanaa nia sequeyani, nojuajaari sanenutaniya na niqutionura nijaniya puetunu nia panishanojuanaa. Majaari na sanenu quiniutianiya saaja nia rupena na quiniuucua. Sanenutaniyari pueyaracaanu taajeta nia piquishacari na tia tiotiu. ⁹ Naajuhua, maja nia tarinitianu Pueyaso nia secojonu. Nojuajaari nia panishano nia niqutionutaniya. Cunora, nia panishano nia pajoriquia. Niocua na riuriatere. Tiotiu nia piquiriquia. Niaara riatasaanutaniyari. ¹⁰ Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiotiu piquiquiaani, nera riatasaanutaniyari.

¹¹ ¿Niaatucua nia niyanu niqutiore saajia, neecaruu na masacari nijaniya? Maja. ¿Niaatucua soconu niqutiore nia niyanu, sapitiaaja na masacari nijaniya? Maja. ¹² ¿Niaatucua turucuaniniu niqutiore nia niyanu, caacaraja riuriuquiu na masacari nijaniya? Maja. ¹³ Puetunu nijaniyajanaari sesa miiniu niishijia. Naajaa, niari maninia casaa niqutionu niishiya nia niqiohua. ¿Taatucua socua jiyocuaaanu Quijia nia Que Pueyasoni, tojetaarucujanaa sesa miyashijiani? Seetanujuanaa capora na

quishacari, nojuacuajaari na Sohuanu niqutionu niishijia na muerasu, canapuate na masequiaacuajani.

Pueya sequesacari Jesu, samaru cumaacaracana
(Mt 12.22-30; Mr 3.20-27)

¹⁴ Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiquiaari samaru na jitiiasacari. Samaru jaara tohuataquiaari cuno pueyanojiniji, pocujara quiriohuari. Pueya niquishacari naatej, nocuaji jiuujiatereeri. ¹⁵ Tamasaca pueyari saa sequequiaarijia:

—Cuno pueyanoori samaruhua tohuatanijija samaruhua jiyaniijia Satanás cumaacata.

¹⁶ Tamasaca pueyari Jesu saniniujiuniu paniriquiaa. Naaratej, nojoriiri na sequeturee na cumaacata na miiniuria casaa, na niqitiniuria nojori, nojori niishiniuria nojuajaari seetanujuanaa Pueyasojinijinio. ¹⁷ Jesuuri nojori niishiriojosano niishiriquiaa. Nocuaji nojori sequereeri:

—Tamonu jiyajinia, cuno pueya jaara miaquetoojija tama nojori pueyatajaaja, nojoriiri maja na naata na paraa nujuatanu, na paraa jaara nocua tiuquitiare raquiritano nojori quishacari. Naajuhua, niqiriyaatu tiajinia quiniaa jaara tama nojorijiaaja juayonuujutaquiaa, nojoriiri maja na naata jatiqiu quiniu. ¹⁸ Naajuhua, niaari cua sequeriquiaa, janiyana samaruhua tohuatanijija Satanás cumaacatani. Jaara naa quiriti, ¿Satanástucua taa pueyaracaanu quiri jiyaniijiani, nojuaja jaara tama na samaruhuaaja tohuatanijija tama na cumaacatajaaja? ¹⁹ Naajuhua, janiya jaara samaruhua tohuatanijija Satanás cumaacatani, taa nia sequeyacuajani, ¿nia niishitiojosano pueyarihuaj, cana cumaacata nojori tohuatanijioquiaa samaruhuani? ¿Taa nia sequeyani? ¿Satanás cumaacataree? Majaruhua. Naacuajitij, tama nijaniyajaaja nia niishiri, niaari jiyajeneya. ²⁰ Naa Pueyaso cumaacata cua tohuatanijiosacari samaruhuaj, naacuajiti nia niishiri, Pueyasoori tari nia masuya seetanujuanaa na muerasu nia quiniuria.

²¹ Niojinia nia niishiriojorejuhua; cumueca pueyano jaara na tia cojuua queraatia na miaquejotaja casaata, majaari tamonu naata na jitiiasano casami jaariutuani.

²² Saniniujija, socua cumueca pueyano jaara nocua tiuquiri, na miaquejotaja casaa jaariutuiaari, cuno, nocua na tiuushano juucuani. Na nuhuaji, na jaariutuiasano casami paari, na pueya na serotasocoriguiano. Naajuhua, janiyari Satanás jitiiasano jaariutuajani.

²³ Cante cua jiyano quiyaquyani, nojuajaari cua paraca. Cante cua naacutaquiyua pueya rerecojonura Pueyasorani, nojoriiri saaja pueya cocuataa Pueyasocuai. Naaratej, jacaria nia niishiriojore casaa nia niishiriojija janiyajinijini.

Samaruhuari riujuujija na quiquiojiniohua
(Mt 12.43-45)

²⁴ Samaru jaara tohuatare pueyanojiniji, joojuashiquio rucuaniejyari na samaatejara na pajenura. Jaara na riuriataaquiri, niishiriojyari: “Cua quiquiojinia riujuuyarohuaraqui teje cua tohuatacanucujani”. ²⁵ Samaru tiuquishacarihua cuno pueyanooqua, na riuriatasuhuari shaaco, juhua maninia netoonujusano tia, maninia jeenucuasanojuhua. ²⁶ Naaratej, cuno samaruuri socua sesa miijiaa nojuajiniji siete narta samaruhua riqiuhua nata na quiniuria. Puetunu nojorijianaari cuno pueyanojinia tiuquitasuhua. Naacuajitij, cuno pueyanoori socua sesara jiyacateja, tarijia na quiniujiniji.

Seetanujuanaa shuquiriaatia quiniu cutara

²⁷ Jesu pohuatasacari nio, tamonu maajiiri jiyacari pueya tajiniji naa nacaree:

—¿Shuquiriaatia quijia cutaraari cuno maaji cante quia raquiaarini, cante quia canashitiqiaarini!

²⁸ Jesuuri saaja na riucuaree:

—Socua shuquiriaatia quijia saniya sajara cante Pueyaso rupaa tojjiani, cante Pueyaso panishano miiquiaajaanihuaj.

Sesa pueyari saaja Pueyaso cumaacata miishano niqiniu panijiaa
(Mt 12.38-42; Mr 8.12)

²⁹ Socua queraatia pueyari Jesuucua rerejoriquiaa puetunu na shocuaqueyajanaa. Jesuuri juhuacatecara naa pohuataree nojori niqiuara:

—Nio pa quishacari pueyari sesa miijiaa. Nojoriiri cua sequequiaa, jiyajeneta casaa na miiniuria Pueyaso cumaacata, nojori niishiniuria janiyari Pueyaso jiyarosononi. Seetanujuanaa majaari socua cua niqitiniu quiniutianiya nojori, cua cumaacata cua miishano. Nojoriiri saaja niqiniutianiya cutara taa cua miishaanutaniyani, naatej taa supuetana Jonás miishaaquiaaricuaani. ³⁰ Jonás miishaanuuri nocuaji jiuujiatesano quiquiaari cutara. Naacuajitij, Nínive tiacajinia quiniaa pueyari niishiquiaari Jonásri Pueyaso jiyarosano quiquiaari. Janiyari naa miishaanutaniyajaanihuaj, nio pa quishacari pueya

niishiniuria janiyari Pueyaso Jiyarosanoni. ³¹ Cua supuetana Salomón jaara Israel pueya jiyaniijia quiquiaari, jiyacari tamonu maajiiri pananu shuucuaaji jiyajinia jiyaniijia quiquiaari. Nojuajaari jiyanoehua tucuacaanuji niqiaaari narta jiyaniijia Salomón tojinuuucua, jiyanoehua niishijia Salomón quishacari. Jiya puequesacari Pueyaso saniniujishacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretanuucua socua Niishijiajanaa cutara Salomónjiniji. Cuno Niishijiaari niya nia tajinia quiyacuaja. Janiyacuajaari nojuajani. ³² Naajuhuaaj, cuno tariucuaaanu Nínive tiacajinia quiniaa pueyari saneecuatunutaniya Pueyaso nequesoreesacari nio pa quishacari pueya. Nojoriiri nio pa quishacari pueyacuara tonujunutanijajuhuaaj, nojori tacatoyaquiniuucua nojori jiuujia sesa nojori miishanojiniji, Pueyaso rupaa nojori tojiyaquiniuucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiujunua Jonás jaara Pueyaso rupaa pohuataquiaari nojori niqiaara. Pueyaso sequenu panishano caminiujunua quiarijia nia tajinia quiyani, nojuajaari socua cutara Jonásjiniji. Janiyacuajaari nojuajani.

Pueya jiuujia cuhuatanajiniji pohuatasano
(Mt 5.15; 6.22-23)

³³ Pueya jaara samaritiu noshitiri, majaari na jamotanu. Majaari na niatanu conatu cariquiaaco. Maninia cutaraari jiyocuaaanu na morotanu, tiaco tiuquitiánaa cuhuatariquiano. ³⁴ Pa namijiaari juhua pa cuaqueya cuhuatanajuhuaaj. Naacuajitij, paa jaara Pueyaso casaacua jiaatiaja quirini, paari cuhuashiqui quiya puetunujuaanaani. Saniniuuujia, pa namijia jaara sesa casaa niqiniuuucua jiaatiaja quiri, paari ninishiquiqui quiya puetunujuaanaani. ³⁵ Tama nia cuaqueyajaaja nia cojuare, niaa mariqui nioojia cuhuatana maquishajareeri. ³⁶ Niaa jaara puetunujuaanaa juhua cuhuashiqui quiya, sesa casaacua jiaatiaashijia nia quishacari, niocua maninia niqunijia quiri puetunujuaanaa, juhua samaritiu cuhuatasacari niajaniya. Naacuajitij, niocua niishijia quiri, maninia miijia nia quiniuria.

Jesu nacasusacari Fariseocuaca, Moisés Rootasanojiniji niishitiojanaano
(Mt 23.1-36; Mr 12.38-40; Lc 20.45-47)

³⁷ Jesu puecasacari pocuanu, tamonu Fariseo pueyanoori na masuuquiaari na tiajinia na miaquenura. Jesuuri na tiajinia quiaquiaari. Na tiuquishacari, miaquejajinia cajishijianaari. ³⁸ Fariseo pueyanoori jiuujiatequiaari na niquishacari Jesuuri shuquitioo tari cajiriquiaa miaquenura. Judiocuacaari jiyaniijia, nojori rucoojosacari tamasa pueya tajinia, tamasa sesa miishanoori na naata nojoriicua pacunu. Nocuaji nojoriiri shuquitianu niishijia, tiajinia nojori tiuquishacariuhua. ³⁹ Naa cuno Fariseo pueyano niishiriojosacaritij, Jesuuri saa na sequereejaa:

—Niajaniya Fariseocuacanaa, niari juhua noo pueya, canapueete saaja na ratujua cuaqueya jeequejoquiaacuajani, saaja na miacojua cuaqueyanio. Majaari na jiniacuma na jeequenu. Niaari naajuhuaaj. Niaari sapuenu maninia pueya niquishano. Saniniuuujia nioojiaacari jiyanoehua sesa quiya, casami nia masejonuucua nia nohuasejonuta, puetunu sesa nia miiniutiajanaajuhuaaj. ⁴⁰ Mosanucuaanaa, ¿niaateeri niishiyaquiya, pa cuaqueya Shipininiari poojia shipiniquiaarijijuhuaaj? Naaratej, nioojia nia jeequere cutara, maja saaja nia cuaqueya. ⁴¹ Niaa jaara puetunu nioojiajinia nia jiiitasanojuanaa jiyatere Pueyasora na quiniuria, niaa maara juhua jeequesano quiri puetunujuaanaa.

⁴² ¡Niaari taraatia miishaariquiano, Fariseocuacanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucujinijinojuanaa, Pueyasora nia niquitiosocoriquiano. Cuno jaamasucuaari culantro, menta, socua tamonu jaamasucuanijoyuano. Niaari naa maninia miqiaa taa Moisés niishitiojoquiaaricuajani. Naajaa, Moisésri niishitiojoquiaarijuhua maninia pa miiniuria parta pueya, Pueyaso pa paniniurijuhuaaj. Majaari cuno na sequesano nia miiniu quiquiaa. Puetunu na sequesanojuanaa tojjijia nia quiri. Majaari saaja jaamasucua niqutiojojuaca nia quiniu.

⁴³ ¡Niaari taraatia miishaariquiano, Fariseocuacanaa! Niaari jiyaniijianucua shuriucua cajiniuucua jiaatiaquiaa, Pueyaso secojua tiajinia nia quishacari, juhua cutara pueya nia quiniuria pueya niqiaara. Naajuhuaaj, niaari pueya paniquiaa nojori sarhuatanura niajaniya juhua jiyaniijianucua, nia rucuanijosacari tiacajinia.

⁴⁴ ¡Niaari taraatia miishaariquiano! Niaacuajaari juhua niquishoo jamaca. Pueyari juhuajaniya na caco rucooquiaa na niishiyaquishacari. Naajuhuaaj, pueyari juhuajaniya nia rupuequiaa, nojori niishiyaquishacari nioojiaari jiyanoehua sesa, juhua pueyano mocua jamajinia.

⁴⁵ Jiyacaritij, tamonu Moisés Rootasanojiniji niishitiojanaari Jesu sequeree:

—¡Niishitiojanaanaa, naa quia sequesacari Fariseocuacatej, quiaari canaa sequeyajuhuaaj!

⁴⁶ Jesuuri na riucaaree:

—Taaquiriirini. ¡Niaari taraatia miishaariquianojuhuaj, Moisés Rootasanojiniji niishitiojonaanaa! Puetunu nia rootasanojuanaari juhua jiyanohua niiquia casaa nitiaso-coriqiano. Majaari nia tojtiajaca pueya nia naacunu quiquiaa quenaaja nia juaashiquia sacasaruta, cuno niiquia casaa nitiasaanura. Naacujitij, pueyari maja na naata rejere-tanu nia niishitiojosano.

⁴⁷ ¡Niaari taraatia miishaariquiano! Niaari macunucua niojotajara shipinijioquiaa shanohuara, tariucuaaanu pueyara Pueyaso sequesano caminiujiuninaa nucuhacuaji, teyanu nia supuetanaa puecooquiaaricujani. ⁴⁸ Naacujitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuhua.

⁴⁹ Naacujitij, Pueyasoori na niishiniutia sequequiaari:

“Janiyari cua sequenu panishano caminiujiuninaa jiyaramiquiniutianiya Israel pueyacuani, cua rupaa niishitiojonaanio. Israel pueyari noojiaqueya pueconutianiya. Tamasacaari naquiya miishaanutaniyajuhua.”

⁵⁰ Cunora, Pueyasoori nio pa quishacari pueya naminiutianiya puetunu na sequenu panishano caminiujiuninaa nanacaacujanaa, canapueete nio jiya coteejajini puecoosaquiaaricujani. ⁵¹ Coteenujanaa mosaaquiaari Abel. Na nuhuaji, queraatia Pueyaso sequesano caminiujiuninaari puecoosaquiaari. Na nuhuaji, Zacariasri socua jaatesaaquiaari monujuhua. Nia supuetanaari na moquiaari Pueyaso Secojoua tiajinia, Pueyaso Shuriucua Quiquoitacoji, Pueyasoocua catijiasaqui shuriucua. Seetanujanaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

⁵² ¡Niaari taraatia miishaariquiano, Moisés Rootasanojiniji niishitiojonaanaa! Niaari najuhua Pueyaso Rupaa jiiitiaa. Majaari nia tojini paniniu, Pueyaso jiyanooshano pueya nia quiniuria. Saniniuujia, tamasa jaara Pueyaso Rupaa niishini paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

⁵³ Jesu jaara nio sequequiaari, Moisés Rootasanojiniji niishitiojonaa, mariyata Fariseocuaari jiyanohua juaaquioree. Jiyanohua nojori juaaquiocari, nojoriiri Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua.

⁵⁴ Nojoriiri nocuara tonujunu paniriquiaa juucua, jaara sesa quiri na sequesano.

12

Jesu niishitiojosano, maja sapuenu maninia pueyano niquishano pa quiniuria

¹ Jiyacaritij, jiyanohua jiyanohua queraatia pueyari Jesuucua rerejoree. Tama nojoriijaarijia rapijiootoriguiaa puera nojori rerequejosacari. Jiyacaritij, Jesuuri saa na pueyaja sequenu coteeree. Naa nojori sequereeri:

—Tama nia cuaqueyajaaja nia cojuare Fariseocua pan poreetajacuaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniujini. Nojoriiri sapuenu maninia miijia pueya niquishano tamasa niquiara. Saniniuujia, nojori jiuujiaari saa sesaja pueyaracaanu. ² Nia niishiri, puetunu jiyasohuaja miishanojuanaari niishishaanutaniya. Puetunu jamosano casaajanaari niquishaanutaniyajuhua. ³ Puetunu nia sequesanojuanaa ninishiquini, cuhuashiqui caminiujiushaanutaniyari. Naajuhua, nia sasacojosano tama nia sohuacamarajaajani, cunoori jiyocuaaanu tia nijiniji nacatasaanutaniya puetunu pueya tojishocoriquianojuanaa.

Cante puereshiya cutarani

(Mt 10.26-31)

⁴ Cua rupenaanaa, majaari nia puerenu canapueete nareja pa cuaqueya mojuani. Nojoriiri maja na naata socua sesa na miinu pajaniya, paa jaara tariucua macu quiyani.

⁵ Seetanujanaa nia sequereeraj, cante puereshiya cutarani. Noo nia puerere cutara, cante cumaacaraca cutara na jatanura nijaniya mani quiquiojiniani, na cusojuanu nuhuaji nijaniya. Saaja nojuaja nia puerere cutara.

⁶ Cinco shuhuari saaja caapiqui cumaneecaniyojuata masesano. Pueyara, cunoori najuhuanaj. Naajaa, majaari Pueyaso niyajetanu cuno shuhua jaara puecoosaare. Nojua-jaari na niishiya cutara. ⁷ Naajuhua, nia muesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jiyanohua Pueyaso panishano cutara queraatia na cojuasano shuhujiniji.

Tamasaca niquiara pa sequere paari Jesucristo pueyani

(Mt 10.32-33; 12.32; 10.19-20)

⁸ Cua tojitiare. Cante tamasa niquiara sequejani: “Janiya Jesucristo pueyanoni”, naajuhua, janiyari cua Que Pueyaso seya niquiara sequenutaniyani: “Nojuaja cua pueyano”. ⁹ Cante saniniuujia tamasa pueya niquiara seetaa janiyajiniji, cua pueyano na quishacarini, janiyari cua Que Pueyaso seya niquiara na tamacanutaniyajuhua.

¹⁰ Cante cua sesacareeni, nojuaja na naata jiyanooshaanu. Saniniujuja, maja cutaraari na naata jiyanooshaanu cante Pueyaso Sohuanu sesacareeni.

¹¹ 'Cua muerasu nia quiniucua, niaari Pueyaso secojojua tiajiniaqueya jiyatasaanutaniya, nequesoreena niquiara, mijiria jiyaniijianucua niquiaranio. Nojori nequesoreesacari nijaniya, majaari nia niishiriojonu taa nia riucuanutaniyanoj, casaa nia sequenutaniyajanihuaj. ¹² Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanutaniyani.

Puereetaari casamiriaca pa quishacari

¹³ Tamonu pueyanoori pueya tajiniji naa Jesu sequequiaari:

—Niishitiojonanaa, cua tarajanu quia sequere na niquitionura janiya canaa shipininio jiiitiasanojiniji, taa canaa shipininio sequequiaari canaacuajani, saminio na quishacariija.

¹⁴ Jesuuri saaja na riucuaaree:

—Pueyanonaa, ¿janiyateeri pueya nequesoreenara jiyatesaaquiaarini, cua serotanura nijaniya nia shipininio casamini?

¹⁵ Jesuuri naa nojori sequequiaarijuhuaj:

—Jiyanhua nia cojuare tama nia cuaqueyajaaja, maja casamiicua jiaatijaca nia quiniuria. Pa naata shuquiriaatia quiniu casamiiju. Queraatia casamiiri maja na naata seetanujanaa shuquiriaatia quijiacara na jiyatenu pajaniya.

¹⁶ Na nuhuaji, Jesuuri pueya niishitiree nio miriqui pohuatasano. Naa sequereeri:

—Tamonu pueyanoori quiquiaari, jiyanhua casamiriaca. Na cuhuariquijainia na natoosanoori jiyanhua muetuquiaari. Naacuajitij, queraatia miaquesocoriquiano jiiitaquiaariiri na cuhuariquijainiji na carojotasano. ¹⁷ Tama sequereejariija: “¿Taa cua miinitianiyan? Cua tiajosano cua racatajara cua carojotasanoori puetunujanaa tari miishaja quiya. ¿Tee cua racatanutaniya shusha cua carojotasanoorinitioj? ¹⁸ ¡Jaj, niishiquinijia! Coteenu cua tiajosano cua casamiicuaaji niyaroorohuaraj. Janiyari socua puereetucocuara tiajonutaniyani. Janiyari cuniqui mishinijionutaniya puetunu cua carojotasano cua cuhuariquijainijiojuanaani, puetunu cua jiiitiasano casamijianaani. ¹⁹ Na nuhuaji, janiyari cua cuaqueyajaaja sequenutaniyani: ‘Pueyanonaa, quiarijia cutara juhuajaniya quia quiri. Quiaari queraatia casamiriacacuaja, queraatia marijara. Quiaari queraatia quia miaquesocoriquiano jiiitiacuaja. Quiarijia cutara quia samaatere. Quia miaquere. Quia rature. Tama quia cuaqueyajaaja quia shuquiritiri’”. ²⁰ Cuno niucuaaja, Pueyasoori na sequequiaari: “Moseecanaa, quiaari quiarijia macu juhuaque-nutaniya. ¿Canteeri puetunu quia jamuesano casamijianaa jiiitanutaniya quia nuhuajini? ¿Canra na quiniutaniyarini?” ²¹ Naa miishaanutaniyari puetunu pueyajanaa, cante saaja tama nerajaaja reratequiaa casamini. Cuno, jamuejaca casamiriaca pueyani, nojoriiri seetanujanaa casamijianucua Pueyasora.

Pueyasoori na muerasu cojuaja maninia

(Mt 6.25-34)

²² Na nuhuaji, Jesuuri na saquiriojosano pueya sequequiaari:

—Naaratej nia sequeyanijia pueyanaa, majaari nia tacaaniu casaa nia miaquenu-taniyani, casaa nia cushiniutaniyani. ²³ Pueyaso jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhuj. Naajaarihuaj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhuj. ²⁴ Riquiacujua nia niquiriquia. Majaari nojori natoojonu. Majaari nojori carojotanu na racatasocoriquiano, na nuhuaji na miojosocoriquiano. Naajuhuj, majaari nojori jiiitanu na miojosano na racataja. Majaari tiaca nojori jiiitanu na carojotasano nojori racata-jarajuhuj. Naajaa, Pueyasoori nojori miojotequiaa. Naa cutaraari socua jiyanhua Pueyaso panishano cuno riquiacuhujainiji. ²⁵ Naajuhuj, nia nequesotaanijia, niaa jaara socua tamonu juucara rishiniu paniriquia quera nia shaajenu panishacari, ¿nia naatateeri socua rishiniu, jiyanhua nia tacaaniutia? Maja nia naata. ²⁶ Naaratej, nia tacaaniu jaara najuhuaa quiya socua shiitaniyojua nia rishiniuria, ¿niaatucua casaara tacaari tamonu casaacuan?

²⁷ Naa nuhuaju shuucua nia niquishurij, taa nojori corequetaani. Majaari nojori poonijionu. Majaari na cusupuenuunujuhuj. Supuetana jiyaniijia Salomónri jiyanhua shanohua toqueyaraca quiquiaari. Cuno jiyanhua shanohua niquishano na cushishano toqueni, naajaa, majaari na shocotanu cuno natau shuucua. ²⁸ Pueyasoori cuno natau shuucua shipiniquiaari rupaquijia naa shanohua niquishocoriquianotej. Jaara sorere, tariqui catijashiya saniniuurijia pan majeetetajara. Pueyaso jaara naa maniniushitijacuaa shuucuatej, ¿majateeri na naata cushitiniu nijaniyajuhuj, jatarinijia Pueyasoocua tiujujacanaa? ²⁹ Naaratej, nia sequeyanijia, maja nia tacaaniutia nia pajenu casaa nia miaquenutaniyani, casaa nia ratunutaniyani. ³⁰ Pueyaso niishiyashijia pueyari

pueyaracaanu na panishano casaacua tacaquiaa. Niajaniya cutaraari Queraca. Nojuacajaari tari niishiya puetunu nia panishanojuanaa. ³¹ Naaratej, nia niishiriojore Pueyaso panishano nia miiniuria. Nojuajaari saniniuujia nia niqutionutaniya puetunu nia panishanojuanaa.

Nia casami nia racatare Pueyaso shuriucua
(Mt 6.19-21)

³² Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijia. Capora na quiniucua, inia niqutionutaniya puetunu na jiitiasanojuanaari! ³³ Nia casami nia niqutiojore cumaneecara. Na nuhuaji, cuno cumaneeca nia niqutiojore nareja casamiuniucua pueya. Naa nia miishacaritij, niaari jiyocuacaanu racataa nia jiitiasano. Tee Pueyaso racataa nareja nera nia niqutiosanocujani, cuniqui, nia cumaneeca quiquioori maja na piqiniu. Niaari tii nia racatasano jiitianutaniya pueyaracaanu. Majaari nohuasejojua na naata nocua tiuquiniu na nohuasenura. Naajuhuj, surequeyari maja na naata miaquenu nia casami tii. ³⁴ Nia casami jaara naa racatasano quiya jiyocuacaanu Pueyaso shuriucuatej, niaari saaja Pueyasoocua niishiriojonutaniya, tee nia casami racatasano quiyacuana.

Jeenucuasano nia quiri nia Jiyaniijiaacuaji

³⁵ Juhuata jeenucuasano nia quiri pueyaracaanu, nia sashishacari nia Jiyaniijia, taa tiajiniaaco maninia seyacuaani. Nojori sashishacari na jiyaniijia, nojoriiri na toqueya cushiyono quiya tari, na samaritiu noshitishanojuhuaj. ³⁶ Naa jeenucuasano nia quirijihuhuj, juhua cuno seyaja. Nojoriiri na jiyaniijia sashiya na caminiujini nia tiuquishacariuhua. Nojuaja jaara tohuateya piqishuhua, nojoriiri ritia nocuaji riatanutaniya tia tohuateya. ³⁷ Shuquiriaatia quijiaca cutaraari cuno seya, canapuate na jiyaniijiaacuaji suteyajaani, na jiyaniijia cuara tiuquiriohuajaatijia. Seetanujanaa nia sequeyanijia, nojori jiyaniijiaari nojori cajitijionutaniya miaquejajinia. Na toque maniniuqui jocanutaniyari na mianuutenura nojori. ³⁸ Nojori jiyaniijia jaara tiuquiriohua shiyaqueya, juhuaquenu panishacari, naajaa, shuquiriaatia quijiaca quiniutianiyari cuno seya, nojori jaara suteyajaa tia tohuateya riatariquiano nojori jiyaniijiaacuaji. ³⁹ Nio nia niishirijuhuj, tia camaru jaara niishiri taacari nohuasejojua niniutianiyani, nojuaja maara sutere na tia cojuanura, maja nohuasejojua tiuquiniuria na casami na nohuasenura. ⁴⁰ Naajuhuj, jeenucuasano nia quiri pueyanaa, juhua cuno sutejaca seyaja. Naa jaara jiyaniya juhuanajuaja maja cua tiuquiniu quiniutianihua, janiyari jiyacari nia jiyajenetenutaniyani.

Jesu pahuatasano maninia serujiniji, sesa serujinijino
(Mt 24.45-51)

⁴¹ Jiyacaritij, Pedroori Jesu nequesotaree:

— Jiyaniijianaa, ¿quiaate nio pahuataree saa canaaraja, puetunu pueyarajanaa soj?

⁴² Jiyaniijiaari na riucaaree:

— Tamonu seru jaara maninia seru quiri, nocua tiuushano, niishijajuhuj, na jiyaniijiaari cuno na seru jiyatenutaniya narta seya jiitariquiano na niti na niyacari. Nojori jiyaniijia niyacari, cuno seeratasano seruuri narta seya mianuutenutaniya maninia, taa nojori jiyaniijijanaa mianuutequiaa nojoricuaani. ⁴³ Cuno seruuri shuquiriaatia quiniutianiya na jiyaniijia jaara na riuriatasuhua naa maninia miyanojua, taa na sequesaaquaaari na miiniuriacuajani. ⁴⁴ Seetanujanaa nia sequeyanijia, na jiyaniijiaari cuno maninia seru jiyatenutaniya puetunu na jiitiasano casamijianaa cojuana na quiniuria. ⁴⁵ Saniniuujia, cuno seru jaara sesa miiniuria niishiriojore, na jiyaniishacari na jiyaniijiaari jiyanohua tarishiniutianiya, nojuajaari niishiriojonutaniya nojuaja na naata miiniu na panishano. Cunora, nojuajaari narta seya majoonu coteenutaniya, seya maajipohuanio. Naajuhuj nojuajaari saaja miaquejonutaniya. Pueyaracaanu rarujunutaniyari. Mashaasequejonutaniyaariuhuj. ⁴⁶ Na jiyaniishacari na jiyaniijia juhuanajuaja maja na tiuquiniu quiniutianihua, jiyacaritij, cuno juucaja, na jiyaniijiaari tiuquiniutianihua canashyaquiji. Naa cuno seru miiniucua sesatej, na jiyaniijiaari jiyanohua na saniionutaniya. Na jatanutaniyari Pueyaso tojiyajiaca pueyata na saniitosocoriquiano.

⁴⁷ Tamonu jiyaniijia jaara na seru rootare maninia, taa nojuaja miiniutianiyani, cuno seru jaara jeenucuacquiri na jiyaniijiaacuaji, mariyata jaara miyaquiri taa na jiyaniijia sequequiaari na nuhuajiriacuajani, nojuajaari jiyanohua majacusaanutaniya cutara. ⁴⁸ Saniniuujia, tamonu seru jaara sesa miiri na niishiyaquiniucua na jiyaniijia panishano na miiniuria, nojuajaari saaja secaja majacusaanutaniya. Naajuhuj, cante queraatia niqutiosaaareeni, cuno serujinijiri queraatia masenu panishaanutaniya. Naajuhuj, cante jiyatesaaaree queraatia jiitiana na quiniuriani, na jiyaniijiaari nocua tiuuniutianiya socua jiyanohua maninia miijia na quiniuria.

Jesuucua tiuujiaacari narta pueya panishoo
(Mt 10.34-36)

⁴⁹ Mijiria niqiaarinijia, juhua mani cua noshitiniuria pueya tajinia. ¡Seetanujuanaa na noshitiriquia tarinij! Cua rupaari juhua mani quiniutianiya. ⁵⁰ Coteenu, janiyari jiyanoehua saniniujiushaanutaniya juhua manitiani. Nocuaji coojaari tacaya janiya jaara naa miishaarejaatijia. Seetanujuanaa na jiyateriquia tariucua tucuateenonij. ⁵¹ ¿Niaateeri jiyaniya janiyari niqiaarini mijiria quiniaa quiniuria juhuajaniya? ¡Maja! Seetanujuanaa nia sequeyanijia, janiyari niqiaarini pueya cua raquiriojotanura. ⁵² Naaratej, pueyari quiarijia juayonuutunu coteenutaniya. Pueyano jaara necocuata jiitiare jiuujianaraca niqiuohua na tajinia, jiuujianaraca nojorijinijinio jaara cucua tiuuri, cuno caapiqui cucua tiuyashijiaacari saniniuuja nojori juaajiaa quiniutianiya. Naa noojiaqueya pueyajiinijinio tiuuniucua cucuatej, queraatia pueyari naa tama tacaresetanutaniyajaacujua. Naacuajitij, tamonu tajinia, queraajaa pueyari caapiquiriyatu cucua tiuujiaa juaajiaa quiniutianiya. ⁵³ Pueyari necohua paracaajia quiniutianiya, necohua tiushacari cucua. Naajuhuaaj, necohuari na que paracaajia quiniutianiya na que tiushacari cucua. Naajuhuaaj, maajipohuari necojori paracaajia quiniutianiya necojori tiushacari cucua. Naajuhuaaj, necojoriiri na nucua paracaajia quiniutianiya na nucua tiushacari cucua. Naajuhuaaj, maajipohuari necohua niqiuohua paracaajia quiniutianiya, necohua niqiuohua quiniucua cucua tiuujiaa. Naajuhuaaj, pueya niqiuohuari na quinia paracaajia quiniutianiyajuhuaaj, cucua tiuujiaa na quinia quiniucua.

Pueya cuaara niishiiria quiarijia Pueyaso miishanojiniji, casaa na niishitiniu paniyani
(Mt 16.1-4; Mr 8.11-13)

⁵⁴ Jesuuri naa sequequiaari pueyajuhuaaj:

—Niaa jaara niqiuoocua niqiuquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari. ⁵⁵ Naajuhuaaj, paratu jaara piyarojoquiaa pananu shuucuaaji, niaari sequequiaa: “Tacareejonuqui quiniutianiya”. Naa quiquiaari. ⁵⁶ Pueyanaa, ¿niaateeri seetanujuanaa niishijiaa? Niaari maninia niishiquiaa jiya cajiniocua nia niqishano, nio jiyajinia nia niqishanonio. Saniniuuja, nia niqishacari quiarijia Pueyaso miishano nia niqulara, majaari cuno nia niishiniu, casaa na sequenu paniyani. Naaratej, majaari seetanujuanaa niishijiaa nijaniya.

Niaacuara tonujunata nia jeecatoore
(Mt 5.25-26)

⁵⁷ Niaacuajaari niishiya, sesa miijiaacari saniitosaanutaniya. Naaratej, tama niajaniyajaja nia niishiriojore, casaate maninia nia miiniuriani. ⁵⁸ Tamonu pueyano jaara quiocuara tonujure quia sesonuucua na casaa, quia saniri juhuata nata pocoojonu maninia, na jaatucusacari quiajaniya nequesoreena pueyanooocua. Quia sequerenoj casaa quia miiniutianiya nerani, na jiyanooniuria quiajaniya. Quiaa jaara jeecatoyaquiri nata, nojuajaari quiocuara saquiriojotanutaniya nequesoreena pueyano. Jaara quiocuara saquiriojotare nequesoreena pueyano, nequesoreenaari saniniuuja quia niqutionutaniya na pueya, quia nujuatesaanura nujuatejoajinia. ⁵⁹ Seetanujuanaa nia sequeyanijia, majaari nia tohuatanu quiniutianiya nujuatejoajiniji, niaa jaara puetunu nequesoreena sequesano cumanecajanaa niquitiorejaatijia niaacuara tonujuna pueyano.

13

Nioojia nia tacatore sesa nia quiniujiniji

¹ Jiyacari, tamasaca pueyari Jesuucua tiuquijioquiaari. Cuno pueyari naa Jesu pohuataquiaari:

—¡Jiyaniijia Pilatoori Galilea jiyajinijinio pueya puecoorucuaa! ¡Na nuhuaji, nojori nanaca cojitiriiri Pueyasooocua nojori puecoosano seya nanacata!

² Jesuuri nojori sequeree:

—¿Niaateeri jiyaniya cuno Galilea pueyari naa miishaarucuaa socua jiyanoehua sesa miijiaa nojori quiniucua narta Galilea pueyajiniji? ³ Seetanujuanaa nia sequeya cutaranijia, nojoriiri maja socua sesa miijiaa quiquianu niajaniyajiniji. Niajaniyajuhuaaj, niaa jaara tama nioojiaaja tacatoyaquiri sesa nia miiniujiniji, niaari taraatia puecoosaariquianojuhuaaj. ⁴ ¿Cuno dieciocho pueyariuhuaaj, canapete cusonuucanu cuno jiyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaa quiquianu narta Jerusalén tiacajinia quiniaa pueyajiniji? ⁵ Seetanujuanaa nia sequeyanijia, nojoriiri maja socua sesa miijiaa quiquianu niajaniyajiniji. Janiyari quiarijia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhuaaj.

Miriqui Jesu niishitiojosano muetuhuo naanajiniji

⁶ Jesuuri na nuhuaji pueya niishitiojoquiaari nio miriqui pohuatasana:

—Tamonu pueyanoori higo naana jiitiaquiaari na uva cuhuariquiajinia. Tamacari, na camaruuri nocua quiaquiaari na niquiniuria. Na jajau mianu paniriquiaa juucuaari. Shaanoori quiriquiaa. ⁷ Cunora, na cuhuariquia cojuana sequereeri: “Quia niquiri nio naana. Janiyari pueyaracaanu najuhuaana niquiaani na jajau pajenura. Pueyaracaanu muetuyaquiari. Tari na shocojorucuaari jiuujianaraca marijia. ¡Quia nure! Tamonu cuara na nujuasaqui natasaaria, na muetunura cutara”. ⁸ Cuhuariquia cojuanaari na riucaaree: “Jiyaniijanaa, quia tarinitiarejaara tamonu marijia. Janiya na pajama jiya tacarojotanutaniyani na sasetanura. Na nuhuaji, janiyari juunu cueaca na pajama paatiniutaniyani. ⁹ Janiya jaara naa na miirini, muetunutaniya naasucua. Jaara muetuyaqui, pocua socua na nureni”. Naajuhuj pueyanaa, Pueyasoori sashiya, maninia miijia nia quiniuria.

Jesu jeeacasari porocuatucua samaatenu juuca

¹⁰ Tamonu samaatenu juuca, Jesuuri tamonu tiacajinia niishitiojoriquiaa Pueyaso secojojuu tiajinia. ¹¹ Tamonu maaji cusosuuri ti quiriquiaajuhuj. Dieciocho marijiaari na shoconujuquiaari porocuat na quishacari. Samaruuri naa na jiyatequiaari. Majaari quenaaja na naata maninia nujuanu quijia. ¹² Jesu jaara na niquiquiaari, na sequereeri:

—¡Maajiniaa miji! ¡Quia nijiniacuaa tari jeequerohua!

¹³ Jesuuri na juashiquia niaree maajicua. Jiyacaritij, maajiiri maninia jeequequee. Nojuajaari Pueyaso maniniuhaqueetanu coteeree naa na miishaanuucuatej. ¹⁴ Pueyaso secojojuu tiajinia jiyaniijiaari juarii naa Jesu miiniucua samaatenu juuca. Naaratej, ti quiniaa pueya sequeree Jesu niquiaraari:

—¡Seis juucacuaajaari quiya puetunu semaanajiniajanaa pa poonijionura! ¡Niocua cuno juuca nijoriquia nia naatanijiosaanura, maja samaatenu juuca!

¹⁵ Jiyaniijia Jesuuri sequereeri:

—¡Sapuenu juhua maninia miijiaa niquishano pueyanaa, puetunu nijaniyajanaari nia juunu, nia burro samaacartaquiaa samaatenu juuca, nia jaatucusocoriquiano mohuaca na raatenura! ¹⁶ ¿Nio maajiirihuj? Nojuaja cutaraari supuetana Abraham niquiohuacuajinio supueno. ¿Majateeri maniniajuhua samaatenu juuca pa samaacatanura Satanás morojosano? Dieciocho marijiaari tari nio maaji shoconujurucuaa pueyaracaanu porocuat na quishacari.

¹⁷ Naa Jesu sequesacaritij, puetunu na paraajanaari caririquituri. Saniniuujia, puetunu pueyajanaari shuquiriaatia quiriquiaa nojori niquishacari queraatia maninia Jesu miishano na cumaacata.

Miriqui Jesu pohuatasano mostaza jajaujiniji

(Mt 13.31-32; Mr 4.30-32)

¹⁸ Jesuuri sequeriaari:

—¿Taate cua naata niishitiojonu nijaniyani, nia niishiniuria taa Pueyaso poonijia pueya jiuujiajinia na rupaatani? ¹⁹ Na rupaari juhua mostaza jajauniyojuu, pueyano natasano na cuhuariquiajinia. Cuno jajau jaara moritiare, puereetucara caneyari. Naacuajitij, shuhuari na cashacucuaacua jesuya. Naajuhuj, Pueyaso rupaari caneya pueya jiuujiacajinia puetunu nio jiyajiniajanaa maninia miijiaa nojori quiniuria.

Miriqui Jesu pohuatasano pan poreetajiniji

(Mt 13.33)

²⁰ Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijia mijiria na rupaatani? ²¹ Pueyaso rupaari juhua pan poreetaja maaji cojitishano trigo cashojuata, shanacusano jiuujianaraca shiitaniyojuu tohuatashijinia. Pan poreetaari puetunu cuno cashojuu miniquiootasanojuanaa poreeteja. Pueyaso rupaari naa poonijiojuajuhuj.

Juhua shiitaniyojuu tohuateyari quiya Pueyasocua pa quianura

(Mt 7.13-14, 21-23)

²² Jesuuri Jerusalén tiacajiniara quiariquiaa na pueyata. Nucuaaco na quiasacari, pueya niishitiojoriquiaa tiacajiniaari, shiitaniyojuu tiacajinianio. ²³ Jiyacaritij, tamonu pueyanoori na nequesotaree:

—Jiyaniijanaa, ¿saaja quenaaraqui pueyateeri Pueyaso pueyara jiyatesaanutaniya?

Jesuuri nojori riucaaree miriqui:

²⁴ —Jiyanhua nia saniniuujiri shiitaniyojuu tohuateyaco nia tiuquiniuria, Pueyaso nia rupuenura. Juhucarijia nia numooteyanjia, queraatia pueyari nocua tiuquitanu paniniutaniya juucua. Majaari nojori naata quiniutaniya saaja. ²⁵ Cua tojtijare. Tia

camaru jaara sanere, tohuateya tionutaniyari. Niajaninya, cante na tia carijiniacuma quiyajaani, niaari tohuateya piquiniuniutianiya najuhuanaj. Naa jaara naa nacare: “jijaniijianaa, canaacuaji quia riatare tohuateya!” nojuajaari nia riucuanutaniya: “Maja cua niishiniu tejenote niajaninyani”.²⁶ Jiyacaritij, niaari juhuacatecara sequenutaniya: “¿Majateeri canaa quia niishiniu? Canaacuajaari quiata miaquenuujuani. Canaari quiata ratujua mariyatani. Quiaacuajaari canaa tiaca nuucuaajinia niishitiojua”.²⁷ Tia camaruuri nia riucuanutaniya: “Janiyacujaari tari nia sequereeni, maja cua niishiniu tejenote niajaninyani. Nia quiojorohua niiquiji, puetunu niajanijajanaa sesa miijiacanaa”.²⁸ Naa na taanusacari niajaniyatej, niaari nujuquetunutaniya. Naaari nia quiaa miaquenutaniya jijanohua nia taraajenuta, nia niquishacari Abraham, Isaac, Jacobo, puetunu pueyara Pueyaso sequesano caminiujiunaa Pueyaso shuriucua quiyanoocuaa.²⁹ Queraatia tamasa pueyapueeri nijionutaniya puetunu jiyacajinijiojuanaa Pueyaso shuriucua cajitiuniuria, nojori miaquenuunura nata. Nijionutaniyari pananu muetasamaji, pananu tiuquishacojinio, pananu shuucuaaji jiyacajinijio, pananu muetasamaji miaquetajara jiyacajinijiojuhuaj.³⁰ Quiarijiani, queraatia pueyari juhua tojishoo quiya narta pueyara. Cuno quishacari saniniuujia, nojori cutaraari setanujuanaa tojishano pueya quiniutianiya Pueyasora, Pueyaso tojitiajaca nojori quiniuucua mijiria. Naajuhua, quiarijiani, queraatia pueyari juhua tojishano pueya quiya narta pueyara. Saniniuujia, jiya puequesacari, nojoriiri najuhuaa quijiaa quiniutianiya Pueyasora, nojori tojitiaaquiniuucua nojuaja.

Jesu taraajesacari Jerusalén tiacajinia quiniaa pueyacia

(Mt 23.37-39)

³¹ Jiyacari noojiaqueya Fariseocuacaari Jesuucua tiuquijioquiaari. Nojoriiri Jesu nu-mooteree:

—jNiiquiji quia mashiri! jjiyaniijia Herodes quia monu paninya!

³² Jesuuri nojori sequeree saaja:

—Cuno pueyanoori niishijia juhua jaami. Naa nia caminiujiushuhua cua sequesano cuno jaamiria: “Janiyari samaruhua tohuatanijiyani. Janiyari cusosuhua naatanijija-jaaniuhua. Janiyari naa miya quiarijiani, tariquijiuhuaj. Janiyari tama tariqui tu-cuatanutaniya puetunu cua miiniu panishanojuanaani”. Naa nia sequesuhua cuno pueyano.³³ Cuaara rupaquijia cua sashiiria. Janiya quiarijia rucuanenutaniyajaanani, tariqui, tama tariquinio. Janiya cuaara mosaaria cutara Jerusalén tiacajinia, tee cuniqui puetunu pueyara Pueyaso sequesano caminiujiunaajanaa puecoosaaquiaricuaani. Majaari tamaqui cua monu quishaanutaniya.

³⁴ Jerusalén tiacajinia quiniaa pueyanaa, niaacuajaari Pueyaso sequesano caminiuji-uniaa puecojuaca. Naaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatiajani, taa caacaraja necohua rijioquiaacuaa na nesu cariquiaconi. Naaari saaja paniaquiquiaa cua cojanura niajanija.³⁵ jCunora, cua tojitia! Nia quiquioori tojetaarucuaajanaa shaquiquiutianiya. Naajuhua, majaanari socua nia niquini quiniutianiya janiya, niaa jaara nia timitiasacari janiya sequerejaatijia: “jCuaara shuquiriaatia quiiria pa Jiyaniijia, Pueyasojiniji tiuquihuano!”

14

Jesu naatanishacari cusosu poreeno pueyano

¹ Tamonu samaatenu juuca, Jesuuri tamonu Fariseocuaca jiyaniijia tiajinia quiaquiaari miaquenura, socua tamasa Fariseocuacatanio. Nojoriiri Jesu shootiaturiquiaa nojori niishiniuria casaa na miiniutianiya samaatenu juucani. ² Jiyacaritij, tamonu pueyanoori Jesu tajoji nujuariquiaa, poreeno cusotaano. ³ Jesuuri Moisés Rootasanojiniji niishitiojonaa nequesotaree, Fariseocuacanio:

—¿Taa nia serojuquia Moisés Rootasanojiniani? ¿Maniate cusosu pa naataniniu samaatenu juuca?

⁴ Nojoriiri saaja sanaa na tojitiaquiaa. Jesuuri cusosu quiree jiyacari. Na naataniriiri. Na jiyarorohua na tiajiniaari. ⁵ Na nuhuaji, Jesuuri cuno Fariseocuaca sequeree:

—Nia burro, nia juunu jaara raama tiyare samaatenu juuca, ¿niaatucua samaatenu juuca shocoterejaara, raamaji nia jaaniuhuaa nia seru?

⁶ Majaari nojori riucuanu quirii quenaaja.

Taa pa miyani queranacunura masuusano pa quishacari, taamueca pueyate masu-shiyajaaniuhua

⁷ Jesuuri shootiaquiaa taa masuusano pueya socua panishano cajitiucuaajinia nojori cajitiuniuria riutioconeetariquiaani. Jesuuri cunora nojori niquira pohuataree nio pohuatasano. Naa sequereeri:

⁸—Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajanijajiniji. ⁹ Socua tojishano pueyano jaara tiuquishii, nia masuuna pueyano naasucuaari quiocua niniutianiya na sequenura quiajaniya: “Shiiquia. Quia sanere nio pueyanooquaji”. Naacuaajitij, quiaari cajitishaanutianiya quia caririqiniutia pueya paniyaquishano cajitijinia, miaqueja puequeetujinia. ¹⁰ Nocuaij nia sequeyanijia, niaa jaara masuusaariquia miaquenura tamonu tiajinia, niocua cajishiicua socua paniyaquishano cajitijinia. Naacuaajitij, quia masuuna jaara niquiri quiajaniya, nojuajaari quia sequenutianiya: “Cua rupuenanaa, iniya quia cajishii socua panishano cajitijini-ani!” Naacuaajitij, cuniqui quata quiniaari niishiniutianiya, quiajanijiaqui nia masuuna panishano pueyano. ¹¹ Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutianiya. Saniniuuja, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutianiya juhua tojishano pueyanora.

¹² Jesuuri na masuuna pueyano sequereejuhuj:

—Quiaa jaara queranacunu paniya, majaari quia masuunu saaja quia rupuenaa, quia tapueyocua, quia panishano pueyano. Naajuhuj, majaari quia masuunu quia shuriucua quiniaa casamiriaca pueya. Quiaa jaara nojori masuure, nojoriiri quia masuunutianiya saniniuuja. Naacuaajitij, quiaari tari namishaarohuacuaaja. Cunora, majaari socua quia masenu quiniutianiya Pueyasojiniji. ¹³ Naaratej, quiaa jaara queranacunu paniya, quia masuure casamijiunucua pueya, sesaruneca pueya, sesacujanucua pueya, cariyojuarujurinio. ¹⁴ Naacuaajitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajaniya saniniuuja. Naaratej, Pueyaso cutaraari maninia miiniutianiya quiajaniya saniniuuja, na samiitianijiosacariuhua maninia miijia pueya.

Miriqui Jesu pohuatasano na queranacunujiniji
(Mt 22.1-10)

¹⁵ Jesuta cajiyano pueyano tojishacari naa Jesu pohuatasantej, Jesu sequereeri:
—¡Shuquiriaatia quijia cutaraari cuno, cante Pueyaso shuriucua miaquenutianiya jiyocua-
caanuni!

¹⁶ Jesuuri na sequeree:

—Tamonu pueyanoori queraatia sumatuquiaari pueyata na queranacunura. Nojuajaari coteenu queraatia pueya masuucuaari. ¹⁷ Quera miaquenuusacari, na seru jiyaroreeri na masuusano pueya na sequenura: “Miji, puetunjuanaa tari jeenucusaaree niaacuaij. Nia miaquesee”.

¹⁸ Puetunu masuusano pueyajaanaari juhuacatecara sequequiaari maja na naata quianu miaquenuucua. Coteenu masuusano pueyanoori cuno seru sequeree: “Janiyari shusha maseree tamonu cuhuariquiani. Janiyari nocua quiaa na niquiniucua. Cua jiyanoori quenaaja. Maja cua naata quianu quata queranacunuucua”. ¹⁹ Tamonu masuusano pueyanoori sequeree: “Janiyari diez poonijiojuaca juyaca masereeni. Na saniniucua quiaanjia. Quiocua cua jiyanoori cua quiaaquishacari queranacunujinia”. ²⁰ Tamonu masuusano pueyanoori sequereejuhuj: “Shusha camiriinjia. Cunora, maja cua naata quianu”. ²¹ Seruuri tamajaaja tacateyarohua na camarnu tiajiniohua. Na jiyaniija pohuatasuhua na masuusano pueya sequesanoori. Na jiyaniijaari juaaquii. Na seru sequereeri: “Ritia quia quiaare tamasa pueya masuunuucua tiaca nucuaacaco. Miji quia rijiocoo casamijiunucua pueya, sesaruneca pueya, sesacuja pueya, cariyojuarujuri pueyano”. ²² Seru tiuquishacariuhua, na jiyaniija sequesuhari: “Jiyanijanaa, janiyari tari miirini taa quia sequeree janiyacuajani. Juhuanajuaja maja tia mishiniu”. ²³ Na jiyaniijaari na sequeree: “Socua pueya quia pajecoo tiaca nucuaacaco, tamasa tiaca-jiniara nucuaacacoo. ¡Socua pueya quia nenecojocoo nojori niniuria, cua tia mishiniuria! ²⁴ Seetanujanaa nia sequeyanijia, coteenu cua masuusano pueyanijinijoni, majaari quenaaja niquiriyatu nojerijinjiniyo sanini quiniutianiya cua sumatusano”.

Saja tama na cuaqueya panitajajaarija na naata Cristo nuhuajiniu
(Mt 10.37-38)

²⁵ Jiyanohua queraatia pueyari Jesuta quiojoriquiaa. Jesuuri nojoriicua tacateree. Nojori sequereeri:

²⁶ —Cante cucua nia quia pueyano na quiniuriani, nojuaja cuaara niishiiria nio. ¡Maja nia naata quia pueyano nia quiniu nia paniyaquishacari janiya socua nia quejiniji, nia nucuaajinjiniyo! Nia niquiocua, nia niquiohua, nia tapueyocua, nia rimiatuhajuhuj, nia panishacari nojori socua janiyajiniji, ¡majaari nia naata quia pueyara nia quiniu! Naajuhuj, ¡majaari quenaaja nia naata tama nia cuaqueyajaaja panijia nia quiniu socua

janiyajiniiji! ²⁷ Cante tama na cuaqueyajaaja panitiaaquijia cucuarani, majaari na naata cua pueyanora na quiniu. ²⁸ Niaa jaara jiyaconaja tia tianu paniri, ¿majate coteenu nia cajiniu nia niishiriojonura taa cumaneecate panishaanutaniyani, na tucuatunura puetunujuaana? Naajuhua, niaari niishiriojiya, queraatia quiyacuajate nia cumaneeca. ²⁹ Niaa jaara coteenu naa miyaquiri, niaari najuhua morijiucua nujuatejonutaniya, na nuhuaji majaari socua nia cumaneeca quiniu nia tucuatunura nia tia. Puetunu nia tia niquiniaajanaari juhuacatecara nia macaatiniutianiya. ³⁰ Nojoriiri sequenutaniya: “Cuno pueyanoori tianu coteecanu najuhuanaj. Majaari na naata na tucuatunu quiar-ijia”. ³¹ Naajuhua, jiya jiyaniijia jaara quianu paniri narta jiyaniijata miaquetoona, ¿majate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? ³² Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetoonu quiniutianiya. Saniniuujia, tucuaaanu narta jiyaniijia quishacarijia, nocua jiyaramiquiniutianiya na pueyari, nata nojori pocoojonura maninia, nojori jiyanootoonura. ³³ Naajuhua, niaa jaara carteyaquiri puetunu nia jiiitasanojuanaa, majaari nia naata cua pueyanora nia quiniu.

Miriqui Jesu pahuatasano shonijini
(Mt 5.13; Mr 9.50)

³⁴ Shoni jaara tiqiriiquia quiya, maniniaari, pa panishano. Jaara shaacara quiqii, ¿taate na naata tiqiriiquiara na quiniuhuanu? Maja na naata. ³⁵ Najuhua quiyari. Majaari quenaaja maninia na quiniu cuhuariquiajinia jatasocoriquiano maninia na moritianiniuria natacuaca. Majaari quenaaja maniniajuhuaj, na paatishaanura na moquijianura, natau pajama nojosocoriquiano. Jaara naa maninia quiyaquiritij, nareja jatashiyari. Cante numaaracani, cuaara tojtiaara miriqui cua pahuatasano. Cuaara na niishiirijuhua. Seetanujuaana cua tojtiaaja pueyani, nojoriiri juhua shoni mijiria.

15

Jesu pahuatasano miriqui tashucuanu borregojini
(Mt 18.10-14)

¹ Roma tiacajinia quijia jiyaniijara cumaneeca masejona, mariyata sesa miijia pueyari Jesuucua nijioriquiaa na pahuatasano nojori tojtianura. ² Cuno pojoriiri Fariseocuaa soosano pueya quiriquiaa, Moisés Rootasanojinij niishitiojona soosano pueyano. Cunora, Fariseocuaari, mariyata Moisés Rootasanojinij niishitiojonaari tama rimiaaqueturiquiaaja Jesuucua. Naa pocuaturiquiaa Jesuuri:

—Cuno pueyanoori sesa miijia pueya shanacuquiaa nocua nojori nijionura. ¡Juhua-janiya nojoritia miaquequiaaariuhua!

³ Naaratej, Jesuuri nojori niqiuara pahuataree nio miriqui pahuatasano:

⁴ —Niaa jaara cien borregohua jiiitariquia, nojorijinijinio niquiriyatunioyua jaara tashucua, ¿taa nia miiquiaani? ¿Niaatucua nia noventa y nueve borregohua cureeno tiujiaaquiri rupaquijia cuhuariquiajinia, tashucuanu borrego nia pajenura, niaa cuaara na riariatrohuaajatija? Taaquiririni. Niaacuaaari naa miiquiaaquij. ⁵ Naa jaara na riariatasee, niaari nia shuquiriniutia na paquiohua nia numeecuaji. ⁶ Naa jaara na tiuquitarohua nia tiajiniohua, niaari nia rupuenaa, mariyata nia shuriucua quiniaa rerejotenutaniya nia sequenura nojori: “¡Cuata nia shuquiriri quiarijia! ¡Tari riariatrohua cua borregonioyua tashucuanonijia!” ⁷ Seetanujuaana nia sequenurijia, naajaariuhua, jiyocuaaanu quiniaari jyanohua shuquirituquiaa niquiriyatu sesa miijia jaara noojia tacatore sesa na miiniujini. Cuno pueyanoori socua jyanohua shuquiritasano tamasa noventa y nueve pueyajini, canapuetucua tari maninia pueyacuani.

Jesu pahuatasano miriqui juurequetesano cumaneejini

⁸ Naajuhua, tamonu maaji jaara diez cumaneecaraca quiri, jaara niquiriyatu juure-quetere tiajiniaaco, ¿maatucua taa miirini? Na samaritiu noshitiniutianiyaari, na tia na netoonujunura. Pueyaracaanu jacaria na pajenutaniyaari cuaara na riariatareajatija. ⁹ Na riariatasacari na juurequetesano cumanee, maajiiri na rupuenaa, mariyata na shuriucua quiniaa maajipohua rerejotenutaniya na sequenura nojori: “¡Miji nia nimia! ¡Cuata nia shuquiriri! ¡Tari riariatrohua cua juurequetesano cumaneenijia!” ¹⁰ Seetanujuaana nia sequenurijia, jiyocuaaanu Pueyaso seyari naa shuquiriquiaajuhua sesa miijia jaara noojia tacatore sesa na miiniujini.

Jesu pahuatasano taa tamonu pueyano jiyanooquiaari neyanuni

¹¹ Na nuhuaji, Jesuuri nio pahuatareejuhuaj:

—Tamonu pueyanoori caapiqui niyanuraca quiquiaari. ¹² Socua naatujuaari na que sequeree: “Cua quena, quiarjia cua niqutiore quia jitiiasanojiniji, quiria quiriqiano quiaa jaara shaajeyare”. Naacuajitij, na queeri puetunu na jitiiasanojuanaa niqutiorejore necohua. ¹³ Socua naatujuaari rupaquijia camuenujuquiaari na que tiajinia. Na nuhuaji, puetunu na que niqutiiosanojuanaa nojuajani, nojuajaari saniniuujia tamasca na niqutiorejore na cumaneecara. Na nuhuaji, na cumaneecata quiaquiaari tucuaaanuuri, tamonu jiyajinia. Cuniqiu, puetunu na cumaneecajanaa puecaquiaariiri sesa na miiniutia. ¹⁴ Nojuaja jaara puetunu na cumaneeca puecaquiaarijianaa, cuno jiyajiniaari jiyanohua miaaesacari quiquiaari. Mashajaari juhuacatecara miaajequiaari. ¹⁵ Cunora quiaaree tamonu tahuecua cuno jiyajiniaari, nera na poonijionura. Cuno tahueri na jiyaroree na cuhuariquiajinia na cushiya na cojuanura. ¹⁶ Mashajaari cushiya miaquesano miaquenu paniriquiaa juucua na miaajenuta. Cunoori tamaatia purootu cocua quiquiaari. Majaari tamonu pueyano niqutionu quijia quenaaja na miaquesocoriqiano. ¹⁷ Na nuhuaji, tama sequereearjia: “Cua queeri queraatia na tiajiniaaco seyaraca. Nojoriiri maninia miaquenuquiaa taquiya. Nojori sumatuuri cureequiaajuhua. ¿Janiyarijiataj? ¡Janiyari niya quera cusoya cua miaajenutani! ¹⁸ ¡Cua queecua tacateyarohuaraqui! Janiyacua na sequesuhuanu: ‘Cua quena, janiyari Pueyaso miiquianu sesani. Janiyari sesa miiquianu quiajanijuhua. ¹⁹ Majaari socua cua sequenu quia niyanuta. Janiyari puera sesa miijiani. Cua jiyatere juhuari juhua quia seru cua quiniuria, quiara cua poonijionura’ ”. ²⁰ Naa na niishiriojonu nuhuajitij, mashajaari quiaquiaariuhua na queecua.

“Tucuaaanu na quishacarijia na que tiajiniji, na queeri na niquirii. Nocua taraajereeri. Nocua neteyareeri na naacnura. Na cacaseeri. Na nujuuneequereeariuhua. ²¹ Neyanuuri na que sequeree: “Cua quena, janiyari sesa miiquianu Pueyasoni, quiajanianio. Majaari cua sequenu quia niyanuta”. ²² Na queeri saaja na tiaco seya sequeree: “¡Ritia! ¡Socua maniniuqui toque miji nia riguoo! ¡Niocua quianu cushitirinoj! ¡janiisho nia cushitiri! ¡Sapatu nia cushitirijuhua! ²³ Pa riuutianishano juunu niqiojua nia quiaoco mosocoriqiano. Quiarjia pa queranacure. Pocua miaquenuureni, quianu pa shuquiritiasacari. ²⁴ Nio quianunijoujaari juhua macu quiriqiaa. Quiarjia samiitiarohuari. Nojuajaari shaajequiaari. ¡Tari pocua muetarohuari!” Naacuajitij, nojoriiri juhuacatecara queranacuaari.

²⁵ Jiyacaritij, jiyapueranuuri cuhuariquiajinia quiriqiaa. Na tacatesacariuhua tiajiniohuara, jaara tari cateca quiriqiaa, saaja pueya tojirii jaaquequenuyanoori, nianujuniuyanonio. ²⁶ Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?” ²⁷ Seruuri na riuuaree: “Quia nuhuajishanacuaa tari tiuquiriohuano. Quia queeri shuquiriaatia quia maninia na tiuquishacariuhua, maja cusosu. Naaratej, canaa sequereeri querasapiquia juunu niqiojua canaa monura”. ²⁸ Jiyacaritij, jiyapueranuuri jiyanohua juaaqui. Majaari tiajinia na tiuquiniu paniniu quiriqiaa. Nocuaji na queeri nocua tohuatamaa carijiniacuma, na nenecojonura tiajinia na tiuquiniuria. ²⁹ Na que sequeree saajaari: “Quiaacuaari niishiya, janiyari pueyaracaan poonijioquiaa quiarani. Majaari quenaaja cua tarijonu quiaquia quiajanija. Naa maninia tojjia cua quishacari quiajanijatej, ¡majaari quia niqutionu quiaquiaari janiya quenaaja niquiriyatu cabranijouja, cua queranacunura cua rupuenaa! ³⁰ Quiarjia saniniuujia, quia niyanu seque tiuquishacariuhua, ¡quiaari querasapiquia juunu niqiojua moree nera! ¡Nojuajaari quia cumaneeca puecacanua paanatujiicua!” ³¹ Na queeri na sequeree: “Sanajanaa, quiaari pueyaracaanua cuata quia. Puetunu cua jitiiasanojuanaari quia casaa. ³² Naajaa, quiarjiani, maninia pa queranacure. Shuquiriaatia pa quirij. Quia tarajanuuri juhua macu quiriqiaa tari. Quiarjia samiitiarohua pajaniyaraari. Nojuajaari juhua tashucacuanu pocuaji. Quiarjia pocua muetarohuari”.

16

Miriqui Jesu pohuatasano pueyanofiniji, cante na jiyaniijia cumaneeca riutiocojuani

¹ Jesuuri na pueya pohuataquiaari nio miriqui pohuatasanojuhuaj, nojori na niishitiojonura:

—Tamonu casamiriaca pueyanoori tamonu pueyano jitiiaja na casami cojuariquiano, na cumaneecano. Tamasaca pueyari cuno camarnu pohuataree na seruna na cumaneeca riuticoriquiaa jiyasohuaa, tama nerajaaja. ² Cunora, jiyaniijiaari cuno na seru sequeree: “¿Taa quia miiquiaa janiyani? ¡Quiaana sesa miiquiaa! Quiarjia cua niqutiore quia naajiotasano puetunu quia miishanojinijianaa. Majaari socua quia quiniu quiniutianiya cua casami cojuana”. ³ Cunora, cumaneeca cojuanaari niishiriojooquee. Tama sequereearjia: “¿Taa cua miiniutianiyarini cua jiyaniijia jaara cua jatere cua

poonijiosanojiniji? Janiyari maja cumueecani, cuhuariquiajinia cua poonijionura. Naajuhujaj, jiyanoahua cararaatiari quiria, pueyajiniji nareja cua mashiniquijionura cua panishano. ⁴ ¡Jaj! Tari niishiquiinijia taa cua miiniutianiyani tamasaca taraajenura cucua, nojori masuunura janiya nojori tiajinia cua quiniuria, janiya jaara nio poonijiosanojiniji jataasareni”. ⁵ Naaratej, nojuajaari naa miiquiaari. Juhucatecara sequequiaari pueyari, nojori nijionura nocua, canapue na jiyaniijia niqutiojoquiaari casamicuajani. Coteenu tiuquinia pueyano nequesotareeri: “¿Casaa cua jiyaniijia niqutiojocanu quiajanianiyani?” ⁶ Pueyanoori na riucaree: “Cua niqutiojocanu cien patacocua mishaja shiyocuanii”. Cumaneece cojuanaari na sequeree: “Ritia quia cajiri. Niya quiya quia masesano casamijiniji naajiotasano. Tamonu quiarinio quia miiri. Quia naajiotare saaja cincuenta patacocua mishaja shiyocua”. ⁷ Na nuhuaji, tamonu pueyano nequesotareeri: “¿Quiajanianiyariuhujaj? ¿Casaa cua jiyaniijia niqutiojocanu quiajanianiyani?” Na riucareeri: “Cua niqutiojocanu cien canaasatu mishaja trigoni”. Cumaneece cojuanaari na sequeree: “Niya quiya quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”. ⁸ Na jiyaniijia jaara niishiquiaari sesa na seru miishano, na sequereeri: “¡Quiaaquii jiyanoahua niishijia tama quia cuaqueyajaaja quia cojuanura!”

⁹ Seetanujuanaa pueyanaa, Pueyaso niishiyashijiaa pueyari socua jiyanoahua niishijiaa cuhuashiqui quijiaa pueyajiniji. Nojori cutaraari niishijia maninia nojori miiniuria narta pueya, pueya paniniuria saniniuuja nojori.

⁹ Naarate nia nacasuyanijia, naa capora nia quirijiuhujaj, maninia nia miiniuria pueya. Maja nia casami nia jamuenu. Cunocuaajaari nareja Pueyaso niqutiosano niajaniana. Naacuajitij, capora nia quishacari mijiria jaara puequema, nia Jiyaniijaari nia tiuquinitianutaniya pueyaracaanu quishaquii jiyocuaaanu, jiyanoahua na shuquiritiasacari niajaniana.

¹⁰ Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenutaniya. Saniniuuja, cante jiyatesaare secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohujaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniyajaariuhujaj. ¹¹ Naajuhujaj, niaa jaara maninia jiiitaaquiquiaa mijiria casami, Pueyasoori niaacua tiuyaquiniutianiya seetanujuanaa maninia jiyocuaaanuji casami nia jiiitianura. ¹² Naacuajitij, niaa jaara tamonu pueyano casami cojuaaquiquiaa maninia, ¿Pueyasotucua taa niqutiore niaarano na riuriotacani? Maja cutaraari nia niqutiosaanu quiniutianiya.

¹³ Poonitijosano pueyanoori maja na naata caapiqui jiyaniijaara poonijionu. Jaara caapiqui jiyaniijaaraca quiri, tamonu samiritiaari, na panishacari tamonu. Naajuhujaj, niquiriyatu jiyaniijia tojjia quiniutianiya maniniaari, na soosacari tamonu. Naajuhujaj pueyanaa, majaari nia naata Pueyasocua jiaatianu, cumaneeceacuano. Niaa jaara cumaneece panijia quiri, niaari cumaneece poonijiotesaanutaniya saaja. Naacuajitij, Pueyasoori maja na naata nia poonitijionu nera.

¹⁴ Fariseocuaacari jiyanoahua cumaneece panijiaa quijia. Naaratej, nojori tojishacari Jesu sequesano, nojoriiri saaja na rerequeterree. ¹⁵ Jesuuri nojori sequeree:

—Niaacuajaari tama nia cuaqueyajaaja jiyatequiaa sapuenu pueyano maniniu nia niqushaanura. Pueyasocuaajaari nioojia niishiya. Niaari pueya jiyajenetequiaa nojori jiyaniishacari niaari Pueyaso panishano cutara, queraatia casami nia jiiitiasacari. Saniniuuja, casaa pueya jiyatequiaa socua jiyanoahua na panishanorani, Pueyasoori cuno soya cutara.

Moisés Rootasanoori coteenu quiquiaari, quiarijia quiya cutaraari quiarinio Pueyaso Rupaa

¹⁶ Moisés Rootasano, mariyata puetunu tariucuaaanu Pueyaso sequenu panishano caminiujuiniaa pohuatasanojuanaari pueya tojitasocoriquiano quiquiaari, Tiuquiniijiona Juan pohuatasanojuhuaj. Quiarijia saniniuuja, maninia rupaa Pueyasojinijiiri pohuatasaaquiaa, taa Pueyaso jiyanooniu paniya pueyani, na muerasu nojori quiniuria. Quiarijiani, puetunu pueyajanaari jiyanoahua saniniujiya Pueyaso muerasu nojori quiniuria.

¹⁷ Nio jiyari shaajeriquiano, jiya cajiniocuanio. Saniniuuja, tariucuaaanu pueyara Pueyaso sequesano caminiujuiniaa pohuatasano cutaraari maja na shaajenu quiniutianiya quenaaja.

*Jesu niishitijosano, pueyano carteyaquiniuria necocua
(Mt 19.1-12; Mr 10.1-12)*

¹⁸ Pueyano jaara necocua cartere tamonu maajitia na caminiuria, cuno pueyanoori jiyanhohua sesa miya Pueyaso niquiara. Naajuhuj, cante cartesano maajitia camiyani, cunoori sesa miyajuhuj.

Jesu pohuatasano casamiriaca pueyanojiniji, Lázarojinjinio

¹⁹ Casamiriaca pueyanoori quiquiaari. Jiyanhohua maniniuqui toqueya cushiyojoojuaari, juhua jiyaniijianucua toqueya. Jiyanhohua na shuquiriniutia, puetunu juucajanaa queranacujuaari. ²⁰ Jiyacaritij, casamiiju pueyanoori quijiajuhuaj. Jiyanhohua sapueyaraca. Nojuajaari cuno casamiriaca pueyano tia tohuateyaji nojotasano puetunu juucajanaa. Na sesaari quijia Lázaro. ²¹ Nojuajaari casamiriaca miaquejajiniji totinijosano raacua miaguenu panijia juucua. Saaja sareyari na sapueya rimianacunuujua. ²² Na nuhuaji, cuno casamiiju pueyanoori cusoquiaari. Pueyaso seyari na riquiaari supuetana Abrahamta na quiniuria, Pueyaso muerasurano shanhohua quiquiojinia. Cuno casamiriaca pueyanoori cusoquiaarijuhuaj. Jamosaquiaariiri. ²³ Sesa miijiacarano quiquiojinia na quishacari, naquiya na miishacari tii, nojuajaari mauquiaari. Cuniqiji tucuaaanu niquirii Lázaroori, shuquiriaatia quiyano supuetana Abrahamta. ²⁴ Casamiriaca pueyanoori nacaree: “¡Cua supuetana Abrahamna, cucua quia taraajere quenaaja! ¡Lázaro quia jiyarore cucua! ¡Cuaara na juaashiquia nacatu shiiria mohuacajinia! ¡Cua niti shiniajaquee quenaajacua! ¡Janiyari puera jiyanhohua naquiya miya nio manijiniani!” ²⁵ Abrahamri saaja na riu-cuaree: “Sanajanaa, quia niishiri taa jiyanhohua maninia quia quiquiaarini, pueyara-caanu jiyocua quia quishacari. Lázaroori saniniuujia jiyanhohua taraatia quiquiaari pueyaracaanu, jiyocua na quishacari. Lázaroori quiarijia niya cumanijiashiya. Quiaari saniniuujia naquiya miishiyacujua. ²⁶ Naajuhuj, jiyanhohua tucuaa tacoori pa tajinia quia. Cunora, cante niqiji niuuniu paniya cuniqijiria quiocuani, majaari na naata. Naajuhuj, cante quia quiquiojiniji niuuniu paniya niqijiriani, majaari na naatajuhuaj”. ²⁷ Casamiriaca pueyanoori supuetana Abraham sequerohuacuahuaj: “Naa naasucua cu supuetana Abrahamna. Naajaa, quia secojyanijia, Lázaro quia jiyarorohua cua que tiajinia. ²⁸ Tii quiyajaari cua tapueyocua. Cinco tarajanuhuaracanjia. Lázaro cuara nojori numooteera, maja nojori quejoosaanurajuhua nio saniitiosaqui quiquiojinia”. ²⁹ Abrahamri na riu-cuaree: “Nojoricuajaari Moisés Rootasano jiitiaa, puetunu Pueyaso sequesano caminiujunaa naajiotasanojuanaanio. Quia tapueyocua cuara tojtiaara cuno”. ³⁰ Casamiriaca pueyanoori riu-cuaree: “Naa naasucuatuhuj, cua supuetana Abrahamna. Naajaa, tamonu pueyano macunucujajinjinio jaara muetarohua nojoricua, nojoriiri noojia tacatonutaniya sesa nojori miiniuujiniji”. ³¹ Abrahamri saaja na riu-cuaree: “Nojori jaara Moisés Rootasano tojtianu paniyaquiquiaa, Pueyaso sequesano caminiujunaa naajionuutasanonio, majaari nojori tojtianu quiniutianiyajuhuj, macu pueyano jaara samiitiarohua”.

17

Puereetaari quiniutianiya sesa miijiacara

(Mt 18.6-7, 21-22; Mr 9.42)

¹ Na nuhuaji, Jesuuri na pueya sequequiaari:

—Mijiria, pueyari pueyaracaanu sesa miitishaaquiaa. Jiyanhohua taraatia quijiaari cuno, cante sesa miitirii tamonuni. ² Jiyano pueyanoratej, maara socua maninia quiri nera, puereetuca saajia jaara na riquiajiniji morotasaare, shoniniacu caminia jiuujiajinia jartasocoriquiano. Jaara naa miishaaretej, maara maninia quiri, maja sesa miijiaara na jiyatenura niquiriyatu nio muerasuniyojajinjinio. ³ Cunora, tama nia cuaqueyajaaja nia cojuare maja quenaaja sesa nia miitiniuria pueya.

⁴ Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniuucua quiajaniya, quia jiyanoorinij. ⁴ Nojuaja jaara sequeyarucua sesa miya quiajaniya niquiriyatu juuca, naajaa, quia jiyanooriquia, nojuaja jaara quia sequere: “Sesa miirii quiajaniyanijia. Cua jiyanoori quenaaja”. Nojuaja jaara quia pacutejore sesa miiniu siete cuno juucaja, naajaa, majaari na tarinitianu jiyanooni.

Pueyasocua tiuujia pueyanoori jiyanhohua cumaacaraca

⁵ Jesu saquiriojosano pueyari Jesu sequequiaari:

—Jiyaniijanaa, socua jiyanhohua canaa quia tiutiri Pueyasocua, socua cumaaca canaa jitianura.

⁶ Jiyaniijia Jesuuri nojori riu-cuaree:

—Pueyasocua nia tiuuniu jaara quiri quenaaja juhua mostaza jajauniyojua, jiyanhohua shiitianiyojua, niaa jaara nio satuna jiyona sequere: “Niiquiji quia pacure. Moojinia quia nujuasee”, maara nia sequesano tojiri.

Pueyasora poonijionatucua taa miijia quiriquiani

⁷ Níaa jaara seruraca quiriquia, nojuaja jaara tajinia tiuquiriohua quia cuhuariquia-jiniji tee na namitiariquiaacuajani, quia seya cojuanujiniji soj, ¿niaatucua na sequere: “Miji, quia miaquesuhua?” ⁸ Majaruhua. Niaari saaja na sequenutaniya: “¡Quiria quia sumature! Cua mianuutere coteenu. Cua raaterējuhuaj. Cua miaquenu nuhuaji, quiocua saniniujia miaquerohua. Quiocua raturohuajuhua”. ⁹ Na nuhuaji, nia seru jaara puetunu nia sequesanojuanaa miiri, ¿niaateeri na sequequiaa “paacarasho”? ¡Maja! ¹⁰ Naajuhua, niaa jaara puetunu Pueyaso sequesanojuanaa miiri, tama nia sequere-jaaja: “Janiyari maja maninia seruni. Majaari tama cua niishitajajinjijiaaja cua miiniu quiquiaa cua Jiyaniijia. Janiyari saaja pueyaracaanu paniquiaa cucua na tequejonura juhua naatujuacuani”.

Jesu naatanijosacari diez pueya, lepraraca cusosuhua

¹¹ Jesuuri Jerusalén tiacajiniara na pueyata quiariquiaacuahuaj. Jiyacari, Galilea jiya, Samaria jiya tajiniaaco quiariquiaari. ¹² Quera na tiuquishacari shiitianiyojua tiacajinia, diez pueya lepraraca cusosuhuari na naacuquiaari. Nojoriiri tucuaaanujijia Jesuucua jiju njuatusee. ¹³ Nojoriiri Jesuucua nacaree:

—¡Niishitiojona Jesunaa, canaacua quia taraajere!

¹⁴ Jesu niquishacari nojori, nojori sequereeri:

—Nia cuaqueya nia niqitishii pueyacuara secojona, taa supuetana Moisés seque-quiariacuajani.

Nojori canujuucuatucarajia, nojori cusunuuri shaajequee. ¹⁵ Tamonu nojorijinjinio niquishacari na cuaqueya tari cushiriquii, nojuajaari Jesuucua tacateyarohua. Nojuajaari na rupaa paaretariquiaa na maniniuhuaqueetasacari Pueyaso. ¹⁶ Jesu cariquimijia mojoquetaseeri. Jiyocuara naniriiri. Jesu sequereeri: “¡Paacarasho Jesunaa!” Cuno pueyanoori Samaria jiyajinjiniio tahue quiquiaari. ¹⁷ Jesuuri na pueya niquiara naa sequere:

—¿Majateeri diez cusosuhua naatanijosaanu quiri? ¿Teeteeri narta naataconohua nueve pueyani? ¹⁸ ¿Saaja nio tahueteeri tacaterohua Pueyaso na maniniuhuaqueetanura?

¹⁹ Na nuhuaji, Jesuuri cuno tahue sequere:

—Quia sanere. Quia quiaacuaja naatarohua cucua quia tiuuniucua.

Taa na quiniutianiyani, Jiyaniijia Cristo tiuquishacariuhua
(Mt 24.23-28, 36-41)

²⁰ Fariseocuacaari Jesu nequesotaquiaari taacari Pueyaso Jiyarosocoriquiano ninu-tianiya jiyaniijia na quiniuria mijiriani. Jesuuri nojori riucaaree saaja:

—Pueyaso Jiyarosano jiiiasacari na muerasu, majaari namijiaa niquishano. ²¹ Majaari na naata sequesaanu: “Níya quia pa Jiyaniijia quiquío”, “Jati quiyaruhua”. Pueyasocua-jaari tari níya jiiiaa na muerasu nia tajinia.

²² Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Niaari cua niqiniucua jiaatianu-taniya niaata cua quiniuria rupaquijia, taa niaata cua quia quiarijiacuaani. Majaari nia niqiniu quiniutianiya janiya. ²³ Tamasacaari nia sequenutaniya: “¡Níya quiyacuaja nia Jiyaniijia!” Tamasacaari saniniujia sequenutaniyacujua: “¡Noj, jati quiyatej!” Majaari nia tojinu jiyano pueyatej, nojori jaara naa nia sequeriquia. Majaari nojori neteyotanu najuhanaj. ²⁴ Mijiria cua tacatesacariuhua, cuno juuca, janiyari niquishaanutaniyani, naatej, taa miacana puetunu jiya cajiniocuajanaa niquishaaquiaacuuaani na nunujusacari.

²⁵ Saniniujia, mijiria cua quishacarijia, janiyari coteenu jiyanohua naquiya miishaanutaniyani. Nio pa quishacari pueyari cua paniyaquiniutianiya. ²⁶ Quera cua tiuquiniu panishacariuhua mijiria, naa quiniutianiyari taa mijiria quiniaa pueya quiquiaaricuaa supuetana Noé quishacari. ²⁷ Naa quiquiaariiri cuno quishacari. Mijiria quiniaa pueyari juhuajaniya miaquenuujua. Raruujuaari. Juhuaaniya maaji camiyojuaari. Pueyari necojori camiyoteja. Pueyari naa juhuajaniya miijioriquiaa Noé jaara tiuquitiaquiaari na pueretuuca buquejinia. Canashyaquiji, maruuri jiyanohua niquiaari. Puetunu mijiria quiniaajanaari cusunuquiaari pajaacajinia. ²⁸ Naa quiquiaarijuhua supuetana Lot quishacari Sodoma tiacajinia. Cuno pueyari juhuajaniya miaquenuujua. Raruujuaari. Casami masejojuaari. Juhuaaniya na casami niqitiojuaari. Na cuhuariquiaca natojuaari. Na tiacara tiajojuaariuhua. ²⁹ Naa juhuajaniya nojori quishacarijij, Lotri tohuataquiaari Sodoma tiacajiniji. Jiyacaritij, maniiri asufreta cojitishano juhua maru niquiaari jiyocuacuanu. Puetunu cuno sesa miijiacajanaari manijinia catequiaari. ³⁰ Naa quiniutianiyajariuhua quera jiya puequesacari. Pueyari juhuajaniya quiniutianiya. Janiyari jiyacari canashyaquiji tiuquiniutianihuani.

³¹ Cuno juuca, pueyano jaara na tia cacojiria quiya, cuaara roseyaquiiria na casam-
ica tiajiniaaco. Naajuhuaaj, pueyano jaara na cuhuariquiajinia quiya, nojuaja cuaara
tacateyaquiuhuaara na tiajinia. ³² Nia niishiriquia supuetana Lot niquiocua. Na
mashishacari, nojuajaari ritia cusoquiaari na nijiniara na niquiniuucua, na casamiuca na
taraajasacari. ³³ Cante saaja shuquiriaatia mijiria na quiniuria niishiriojojuani, nojuajaari
na nuhuaji jiyanohua taraatia quiniutianiya Pueyasooju. Saniniujia, cante tama na
cuaqueyajaaja panitiaja cua tojjijara na quiniuriani, nojuajaari pueyaracaanu shuquiri-
aatia quijjara jiyatesaanutaniya.

³⁴ Cua tojiri. Cuno niucujuhuaaj, caapiqui pueya jiuriatoosacari juucua na maquetu-
jinia, niquiriyatujaari rishaanutaniya jiyocuaaanura, Pueyaso pueyano na quiniuucua.
Tamonuuri tiujiasaanutaniya saniitiosocoriquiano. ³⁵ Cuno juucajuhuaaj, caapiqui ma-
jipohua riiquiniushacari jatiqui juucua, cucua tiuujjaari tarajanu shuriucuaaji rishaanu-
taniya. Tamonuuri tiujiasaanutaniya saniitiosocoriquiano. ³⁶ Caapiqui pueya qushacari
cuhariquiajinia, cua pueyanoori rishaanutaniya. Tamonuuri tiujiasaanutaniya sani-
itiosocoriquiano.

³⁷ Jesu pueya tojjishacari naa Jesu sequesantej, nojoriiri na nequesotaree:

—¿Tee nio quia pohuatasano niquishaanutaniyarini?

Jesuuri nojori riucaree miriqui:

—Tee casaa moqueyani, mohuari tii rerejiya.

Naajuhuaaj, majaari quenaaja niquiriyatu Pueyaso tojjiyashijia cureneo quiniutianiya
saniitiosoo.

18

Jesu pohuatasano mashiquiojiniji, pueya nequesoreena pueyanojinijinio

¹ Jesuuri na pueya pohuataquiaari nio miriqui pohuatasano nojori na niishitiojonura,
nojori cuaara Pueyaso secojooa pueyaracaanu, nojori taacanuyaquiniutia. ² Naa nojori
sequereeri:

—Tamonu tiacajinia, pueya nequesoreena pueyanoori quijia. Pueyaso puereyashijia
quijjaari, pueya rerequetejanio. ³ Cuno tiacajiniaja tamonu mashiquioori quiquiaariji-
uhuaaj. Mashiquioori cuno nequesoreenaacua rucuanajojuua pueyaracaanu. Na secojo-
juuari sesa na miinia pueyano cuaara na niquitiohuara na casaa saniniujia, sesa na
miishanojiniji nojuaja. ⁴ Majaari nequesoreena tojinu paniniu quijia pueyaracaanu cuno
mashiquio. Naajaa, pueyaracaanu nocua na rucuanajosacari, cuno nequesoreenaari
socua tama sequequiaarijaaja: “Janiyari maja Pueyaso puerejani. Janiyari pueya to-
jjiyashijia cutarani. ⁵ Naajaa, naa nio mashiquio taajetesacari janiya pueyaracaanutej,
janiyari quiarijia na panishano miiniutianiya nerani, mariqui cua juaatijiore pueyara-
caanuuri na nenecojosacari janiya”.

⁶ Maninia na pueya niishiniuria na pohuatasano, Jiyaniijia Jesuuri naa nojori sequero-
huacuhuaaj:

—Naa miiquiaariiri, cuno pueya nequesoreena seque. Jiyanohua pueya rerequeteja
quiquiaariiri, naajaa, nojuajaari maninia miiquiaari cuno mashiquiora. ⁷ ¿Nia que
Pueyasoorijataj? ¿Niaateeri jiyaniya maja nojuaja tojinu quiniutianiya na muerasu,
canapuate na secojoquiaani juuca, niucuanio? ¿Pueyasoteeri nia sashitiniutianiyajaara?
¡Maja! ⁸ Nojuajaari maja na tarishiniu quiniutianiya. Ritia nia naacunutaniyari sesa nia
miijiaa pueyacuaji. Sesa nia miijiaacari namishaanutaniya niaacua. Naaratej, majaari
secojonu nia tarinitianu. Mijiria cua tiuquishacaraniuha, ¿janiyate Pueyasoojua tiuujiaa
riuriatanutaniya naa pueyaracaanu secojonujuacani?

*Jesu pohuatasano miriqui Fariseo pueyanojiniji, Romano jiyaniijia cumaneeca mase-
jojuajinijinio*

⁹ Jesuuri socua nio miriqui pohuatasano pohuataquiaari noo pueya niquiara, canapuate
tama na cuaqueyajaaja jiyaniijiani nojoriiri maninia pueyano. Naacuaajtij, nojoriiri
tamasaca pueya soojee, janiyari jiyaniishacari cuno pueyari socua sesa miijiaa nojorijiniji.
Cunora, Jesuuri nojori niquiara naa pohuataquiaari:

¹⁰ —Fariseo pueyanoori quiaquiaari Pueyaso Secojooa tiajinia na secojonura Pueyaso.
Jiyacarijij, Romano jiyaniijia cumaneeca masejojuua pueyanoori quiaquiaari Pueyaso
na secojonura tiijjuhuaaj. ¹¹ Fariseo pueyanoori nujuariquiaa Pueyaso na secojosacari.
Naa sequeriquiaari: “Pueyasonaa, paacarasho janiyari maja juhua tamasaca pueyani.
Tamasaca cutaraari nohuasenujuuca, sesa miijiaa, maaji porocujuhuaaj. Naajuhuaaj,
shuquiriaatia quiyaniija, janiyari maja sesa miijiani juhua nio pueyanojuua niya cuata sec-
ojiyani, cumaneeca masejona pueyanoni. ¹² Janiyari caapiqui juuca miaqueyaquiquiaani

puetunu semaanajanaa cua shuquiritiniuria quiajaniya. Naajuhuaq, janiyari pueyara-caanu puetunu cua masesanojinijijianaa niqutioquiaa quiarani, taa Moisés rootaquiaar-icuaajani”.¹³ Cumaneeca masejonaari saniniuujia tucuaacaanuji nujuasee. Na secijosacari, majaari quenaaja na maunu quiriqiaa jiyocuacaanu. Tama nojuajaari na jiriqia piquiriqiaa na taraajenuta sesa na miishanojiniji. Naa sequereeri: “Pueyasonaa, cucua quia taraajere. ¡Cua jiyanoori! ¡Sesa miijianijia!” Naa secjoquiaariri.¹⁴ Seetanujuanaa nia sequeyanijia, cumaneeca masejonaari Pueyaso jiyanooshano tacateyarohua cutara. Fariseo pueyanoori saniniuujia jiyanoyaquishoo tacateyarohuacujua. Naacujitij, cante tama na cuaqueyajaaja jiyateya juhua maninia pueyano na quiniuria tamajaajani, nojuajaari cararosaanutaniya. Saniniuujia, cante sesa na miishano seetaaquijiani Pueyaso jiyanooniuria nojuajani, Pueyasoori cuno pueyano jiyatenutaniya seetanujuanaa sesa miyaquijia na quiniuria.

Jesu niasacari na juaashiquia conaajaacua
(Mt 19.13-15; Mr 10.13-16)

¹⁵ Jiyacaritij, conaajaari poosaariquiaa Jesuucua, Jesu nianura nojoriicua na juaashiquia, Pueyaso jiiitianura maninia nojori. Jesu saquiriojosano pueya jaara niqutioquiaari conaaja pooshiyano Jesuucua, nojoriiri na poonaa juaari.¹⁶ Jesuuri saaja conaaja poonaa sequeree, conaaja cuaara nocua poosaaria. Na nuhuaji, na pueya sequereeri:

—Naatujoori cuaara poosaaria cucua. Maja na poonaa tenujunu. Cante Pueyaso muerasura quiniu paniani, nojori cuaara jiyateera tama na cuaqueyajaaja juhua nio naatu-jooriria.¹⁷ Seetanujuanaa nia sequeyanijia, cante tama na cuaqueyajaaja jiyateyaquiya juhua naatujooriria Pueyaso rupaacua na tiuniuriani, cuno pueyanoori maja na naata Pueyaso muerasura na quiniu.

Casamiriaca pueyano pocoojosacari Jesuta
(Mt 19.16-30; Mr 10.17-31)

¹⁸ Tamonu Judiocuaca camarnuuri Jesu nequesotaquiaari:

—Maninia niishitiojonanaa, ¿taa cua miiniutianiyani, jiya puequesacari cua samiitian-ishaanura, pueyaraaanu quijiara cua quiniuria Pueyasotani?

¹⁹ Jesuuri na riucaaree:

—¿Casaara quia sequeya janiya maninia pueyanotani? Saaja Pueyaso cutaraari seetanujuanaa maninia. Majaari socua tamonu quiniu.²⁰ Pueyanonaa, quiaacuajaari Moisés Rootasano niishijia. Naa naajiotasanocuaajaari quiya: “Maja quia camishoo maaji numuetucunu. Maja monu. Maja nohuasenu. Maja tamonuucua saquiriojotanu quia saaponuta. Quia que, quia nucua tojjia quia quiri”.

²¹ Pueyanoori Jesu riucaaree:

—Janiyacuaajaari cua naatujuajiniji puetunu cuno tojjijajanaani.

²² Naa na sequesacaritij, Jesuuri na sequeree:

—Quiyajaari niquiriyatu casaa quia miishoojua. Nio quia miiri: puetunu quia jii-tiasanojuanaa quia niqutiojore cumaneecara. Na nuhuaji, casamiijiuniucua pueya cuno cumaneeca quia niqutiojore nareja. Naacujitij, quiaari jiyanohua casamiriaca quiniutianiya cutara jiyocuacaanu. Na nuhuaji, quiocua nimiohua cutara, cua pueyano quia quiniuria.

²³ Na tojjishacari Jesu sequesano, nojuajaari jiyanohua taraajequee, jiyanohua queraatia casamiriaca na quishacari.²⁴ Jesu niquishacari nojuaja taraajeyano, Jesuuri na pueya sequeree:

—Casamiriaca pueyara, jiyanohua jiyajenetaari Pueyaso muerasu nojori quiniuria.

²⁵ ¿Camelloteeri na naata cusupuetaja cuhuoco tamajiria tajiniu? Maja na naata. Naajuhuaq, casamiriaca pueyanora, socua jiyanohua jiyajenetaari Pueyaso muerasu na jatanishaa-nura.

²⁶ Pueya tojjishacari naa Jesu sequesanotej, nojoriiri naa na nequesotaree:

—¿Canteeri Pueyaso muerasura quiniutianianitioj?

²⁷ Jesuuri nojori riucaaree:

—Maja pueya na naata tama na cuaqueyajaaja jiyatenu Pueyaso muerasu nojori quini-uria. Naajaa, Pueyaso cutaraari na naata.

²⁸ Pedroori Jesu sequeree:

—Jiyaniijianaa, ¿canaarijijataj? Canaari puetunu canaa jii-tiasanojuanaa tiujiaquiarini canaa nuhuajiniuria quiajaniya.

²⁹ Jesuuri na riucaaree:

—Seetanujuanaa nia sequeyanijia, cante na panishano casaa tiujiaquiaari Pueyasora na poonijonurani: na tia, na que, na nucua, tapueyocuaa, necocua, necohua, nojuajaari socua jiyanoehua queraatia masenutaniya mijiria na quishacarijia. ³⁰ Na nuhuaji, samiitianishano quiniutianiyari pueyaracaanu shuquiriaatia na quiniuria Pueyaso shipinshocoriquiano quiarinio jiyajinia.

Jesu pacutesacari pohuatanu, nojuaja mosaanutaniya
(Mt 20.17-19; Mr 10.32-34)

³¹ Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quiarijia Jerusalén tiacajinia quiaani. Janiyari quiniqui puetunujuanaa miishaanutaniyani taa tariucuacaanu pueyara Pueyaso sequesano caminiujuunaa sequequiaaricuaaja janiyajinijini. ³² Naacuajitij, janiyari tahua niqutiosaanutaniyani. Nojoriiri cua macaatiutianiya. Taraatia cua miituniutianiyari. Cua riocojotunutaniyari. ³³ Cua piqutiutianiyajaaariuhuj. Na nuhuaji, cua motunutaniyari. Naajaa, jiuujianaraca juucajinia, janiyari samiitiananuihuanu.

³⁴ Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

Jesu jeeacasacari cariojuaru pueyano Jericó tiacajinia
(Mt 20.29-34; Mr 10.46-52)

³⁵ Na pueyata Jesu quishacari tari cateca Jericó tiacaacuara, cariojuaru pueyanoori nuu shuucuaaji cajiriquiaa, cumaneeca na masejonura pueya tajishacari nucua.

³⁶ Cariojuaru tojishacari queraatia pueya tajiyano, pueya nequesotareeri:

—¿Casaatejanojoni?

³⁷ Pueyari na sequereeri:

—Nazaret tiacajinijinio Jesucuaaja tajiya.

³⁸ Cariojuaruuri nacaquee:

—¡Jesunaa! ¡Supuetana David niqiuohuacujinio supueno pueyanonaa! ¡Cucua quia taraajere quenaaja!

³⁹ Jesu puetanaa pueyari na juaari na sanaajanura juucua. Nojuajaari saaja socua jiyanoehua nacaree:

—¡Supuetana David niqiuohuacujinio supueno pueyanonaa! ¡Cucua quia taraajere!

⁴⁰ Jesu tojishacari nojuaja, nujuaseeri. Jesuuri pueya sequereeri cariojuaru cuaara jaatucusaaria nocua. Cariojuaru tiuquishacari nocua, Jesuuri na nequesotaree:

⁴¹ —¿Casaa quia paniya cua miiniuria quiajaniani?

Cariojuaruuri Jesu riucaeree:

—¡Jiyaniijanaa, niquijiaa quiniu paniuhanijia!

⁴² Jesuuri na sequereeri:

—¡Niquijiaa quia quirohuhua! Quia namijiacuaaja tari jeequerohuhua cucua quia tiuushacari.

⁴³ Jiyacaritij, cariojuaruuri maninia niquijiaa quiqui. Jesu nuhuaji sacuaareeri na shuqiritianuta Pueyaso. Puetunu Jesu miishano niquninaajanaari Pueyaso maninuhuaqueetariquiaa.

19

Jesu pocojosacari Zaqueo

¹ Jesuuri Jericó tiacajinia tiuquijioquiaari na pueyata. Tiaca jiuujiaaco quiariquiaari.

² Cuno tiacajinia quiquiaariri casamiriaca pueyano. Na sesa quiquiaari Zaqueo. Zaqueoeri Roma tiacajinia quijia jiyaniijiaa cumaneeca masejonaa camarnu quiquiaari.

³ Nojuajaari Jesu niishiniu panijia juucua. Majaari na naata niquninu quiriquiaa Jesu, puera jiyanoehua pueya quiniucua Jesu shocua. Naajuhuj, Zaqueoeri puera posucushu quijia. ⁴ Cunora, Zaqueoeri neteqiaari Jesu taccoji. Nu shuucuaaji sicómoro naanaacua macaseeri, maninia na niquninuria tiji Jesu, jaara cunoco tajimia. ⁵ Jesu tajishacari Zaqueo cariquiaa, Jesuuri nocua mauree. Na sequereeri:

—Zaqueonaa, ¡ritia quia rosemohua! Janiya quiarijia quia tiajina maquenutaniyani.

⁶ Zaqueoeri ritia rosemohua. Jesu tiuquiniaree na tiajinaari jiyanoehua na shuquiriniutia. ⁷ Tamasaca pueya jaara Jesu niqiquiaari Zaqueo tiajina tiuquiyano, puetunu nojorijianaari Jesu sesacanu coteequiaari. Tama sequeturiquiaajaarijia: “Cuno pueyanooeri sesa mijia pueyano tiajina tiuquishii”. ⁸ Na nuhuaji, Zaqueoeri nujuaree. Jesu sequereeri:

—Seetanujuanaa quia sequeyanijia, jiyaniijanaa, janiyari quiarijia quocua tiuuriini. Naacuajitij, janiyari casamijuniucua nareja niqutijonutaniya puetunu cua jiiitasano cajiniocujinijianaani. Naajuhuj, janiya jaara puera cumaneeca masecanu tamasaca

pueyajiniji cua sapojonutani, janiyari nojori niqutionutaniuhua socua jiyanoohua quer-
aatia cumaneecani cua nohuasesanojiniji nojori.

⁹ Jesuuri na sequeree pueya niquiara:

—¡Quiarrijiani, nio tiajinia quiniaa pueyari tari jiyanooshaaree! Nio pueyanocuajaari
supuetana Abraham niquiohuacuajinio supuenojuhua. Nojuajaari cucua tiuuri taa
Abraham tiuquuaari Pueyasocuaacuaani. ¹⁰ Janiyacuajaari cunora mijiria niquiaarini,
tashucuanu pueya cua pajenura, nojori cua jaariutianura Sesaaca.

Miriqui Jesu pahuatasano diez cumaneecajiniji
(Mt 25.14-30)

¹¹ Tii quiniaa pueyari Jesu pahuatasano tojitiariquiaa. Jesuuri tari cateca quiriquiaa
Jerusalén tiacajiniji. Pueyari jyaniriquiaa Jesuuri Israel pueya jyaniiijara quiniutianiya
tari, Pueyaso muerasu na jitiianura mijiria. Nocua. Jesuuri nojori pahuataree nio miriqui
pahuatasano, nojori na niishitiojonura. ¹² Naa nojori niquiara pahuataree:

—Tamonu jyaniiijia niyanuuri quiquiaari. Nojuajaari tucuaaanu tamonu jiyajinia
quiaquaari jyaniiijara na jiyatesaanura. Jyaniiijara na jiyatesaanu nuhuaji, nojuajaari
tacateriquianohua quiriquiaa, narta pueya jyaniiijia na quiniuria. ¹³ Na nuhuajiria,
nojuajaari diez na seya sequeree nocua nojori nijionura. Nojuajaari puetunu nojorijianaa
niqutiojoree niquiriyatu cumanee, orojiniji shipinishano. Nojori sequereeri: “Nio cumane
nie nia poontijiore, janiya cuaara tiuquiriohuajaatiinijia”. ¹⁴ Na nuhuaji quiaqueeri. Na
jijajinijio pueyari maja na niquiniu paniniu quijia cuno pueyano. Cunora, nojoriiri
pueya jiyaramiquirii na nuhuaji, jyaniiijajanaa nojori sequenura: “Maja canaa paniniu
cuno pueyano, canaa jyaniiijia na quiniuria”.

¹⁵ Naajaa, nojuajaari saaja jiyatesaaree jyaniiijia na quiniuria. Na nuhuaji, na jiyajinia
tacateyaruuari. Jaara tiuquishuhua, na cumaneeca na niqutiojosano seya sequereeri,
nocua nojori nijionura. Nojuajaari niishiniu paniriquiaa taa cumaneeca socua nojori
reratequiaarini, nojori poontijiosacari na niqutiojosano cumaneeca. ¹⁶ Coteenu seruuri
nocua nimiaa. Na jyaniiijia sequeeri: “Cua jyaniiijianaa, cua poontijiosacari quia niqui-
tiosano cumanee janiya, janiyari socua diez cumaneeca reratecanuni”. ¹⁷ Na jyaniiijiaari
na sequeree: “¡Maniniacuaja! ¡Quiaacuajaari maninia cua seru! Quiaari secaja cua niqui-
tiosano quiajaniya poontijioriquiaa shitimia quiria. Naaratej, janiyari quia jiyatenu-
tianiya diez tiaca jyaniiijara quia quiniuriani”. ¹⁸ Na nuhuaji, tamonu na seruuri nocua
nimiaajuhua. Nojuajaari na jyaniiijia sequeree: “Cua jyaniiijianaa, cua poontijiosacari
quia niqutiosano cumanee janiya, janiyari socua cinco cumaneeca reratecanuni”. ¹⁹ Na
jyaniiijiaari na sequereehua: “Quiaari cinco tiaca jyaniiijara quiniutianiya”.

²⁰ Na nuhuaji, tamonu na seruuri nocua nimiaajuhua. Na jyaniiijia sequeeri:
“Jyaniiijianaa, nia quiyua quia cumanee quia niqutiosano janiya. Janiyari na cojuacan
maniniani, toqueraujinia jiniocosano. ²¹ Janiyari naa miiquianuni cua pueresacari quia-
janiya. Janiyari niishiyani, quiaari quiarta pueyacuara taraajeyashijia. Quiaari tamasa-
racatasanojiniji poojua. Quiaari tamasa natosanojiniji senoojuajuhua”. ²² Na jyanii-
ijiaari na juaari: “Sesaacanaa, tama quia sequesanojaja janiyari quia negesoreenu-
taniyani. ¿Naatee? ¿Quiaateeri niishiquianu janiyari pueyacuara taraajeyashijiani? ¿Janiy-
ateeri tamasa racatasanojiniji poojuani? ¿Janiyateeri tamasa natosanojiniji senoo-
juajuhua? ²³ Quiaa jaara jyaniquianu janiya naa miijiani, ¿casaara cua cumanee quia
niqutioyaquiquianu cumaneeca cojuanaarini? Nojori jaara cua cumanee poontijiocanu,
janiya maara socua queraatia na riuriatasuhuanu, cua tiajinia cua tiuquishacariuhua”.
²⁴ Cunora, na jyaniiijiaari tii quiniaa pueya sequeree: “¡Cua cumanee nia jaariutiane cuno!
Nia niqutiore cua maninia seru, cante diez cumaneeca jitiacuajani”. ²⁵ Nojoriiri na se-
queree: “Jyaniiijianaa, ¿casaarateni? Nojuacuaja tari diez cumaneeca jitiiaa”. ²⁶ Jyaniiijiaari
saaja nojori riucaaree: “Seetanujanaa nia sequenijia, cante tari jitiiaani, nojuajaari
socua niqutiosaanutaniya. Cante na jitiiaaquiyani, secaja na jitiiasanoori puetunujuanaa
jaariutiasaanutaniya, cucua tiuyashijia na quiniucua. ²⁷ Quiarrijia, cua paraa saniniuujia,
cuno nojori canapueete cua paniaquiquianu nojori jyaniiijia cua quiniuriani, miji nia
jayore nojori. Niya cua niquiara nia puecoore cua ruuretajaca seque”.

Jesu tiuquishacari Jerusalén tiacajinia
(Mt 21.1-11; Mr 11.1-11; Jn 12.12-19)

²⁸ Nio na pahuatanu nuhuaji, Jesuuri na pueya puetaareecuahuaj Jerusalén tiacajiniara.
²⁹ Jaara cateca quiriquiaa tari Betfagé tiaca, Betania tiacanio, Olivo cuhuariquia tuhua-
nanujuhua, Jesuuri caapiqui na pueya sequeree:

³⁰ —Cuno shiitianiyojua tiacajinia nia quiaare, pa taccoji niquishiyani. Niaa jaara
tiuquishii, niari burro riuriatanutaniya morotasano, pueyano cajishoojua na nijinia.
Niaa jaara na niquishii, niocua na samaacartasee. Niaari na jaatucumohua miji. ³¹ Pueya

jaara nequesotare nijaniya casaara nia samaacartaanoj, niocua na riucua: “Jiyaniijia na paniya”.

³² Jesu pueyari quiaaree. Nojoriiri na riuriatasee taa Jesu sequequiaaricujani. ³³ Nojori samaacartasacari burro, na camaruhuari nojori nequesotaree:

—¿Casaara nia samaacartaa canaa burroni?

³⁴ Nojoriiri na riucuaaree:

—Jiyaniijia na paniya.

³⁵ Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajijiara. Na nuhuaji, nojoriiri Jesu cajitirii na nijinia. ³⁶ Na quiasacari Jerusalén tiacajiniara, pueyari na toqueya muevoquiaari nucua Jesuucua. ³⁷ Nojori rosetanu panishacari Olivo cuhuariquia tuhananujiniji, puetunu Jesu pueyarianaari juhuacatecara nacoquiaari nojori shuquiriniutia. Nojoriiri Jesu maninihuaque-
etariquiaa puetunu na cumaacata na miishanojuanaa nojori niqiniuucua. Nojoriiri cunora jiyanohua shuqiritiariquiaa Pueyaso. ³⁸ Nojoriiri naa nacooriaquiaa:

—¡Pueyaso cuara shuqiritiaria pa Jiyaniijia, Pueyaso Jiyarosano na quiniuucua! Pueyaso pocua taraajerohuani. Pa jiyanooriohuani. ¡Nojuajaari jiyanohua maninia! ¡Pa shuqiritiareno!

³⁹ Cuniqiu pueya tajinia quiniaa Fariseocuaca tojishacari naa nojori sequesantej, nojoriiri Jesu sequere:

—¡Niishitiojonanaa, quia pueya quia sanaajare, maja naa nojori sequenura!

⁴⁰ Jesuuri saa sequerejaa:

—Seetanujuanaa nia sequeyanijia, nio pojori jaara sanaajetare, ¡sairi saniniuuja na-
coonutanijacujua!

⁴¹ Tari Jesu quishacari Jerusalén tiaca shuriuucua, na niquishacari cuno tiaca, Jesuuri cuno tiacajinia quiniaacua nujuqueree. ⁴² Cunora, juhua pueyano sequeree Jerusalén tiacaari:

—Jerusalén tiacanaa, quia niishitiriquia quarijiani, casaa quia paniya jiyanooshano quia quiniuriani, shuquiriaatia quia quiniurijuhua. Taraatia quijianaa, quia Jiyanooriquianoori juucua niya quia. Majaari quia niishini nojuaja, juhua nimishiti quia quishacari. ⁴³ Cunora, na nuhuajiiri jiyanohua taraatia quiniutianiya quia. Quia paraari quia mataconutaniya quia shocuaqueya, na cosenura maninia quiajaniya quia mashiaquiniuucua. Naacuajitij, quia paraari quia juhuacacutananiya na miaquejonura quiajaniya. ⁴⁴ Quiaari jiyareta sureesaanutaniya. Quia tiacajinia quiniaari puecoasaanutaniya. Quia tiacaari puetunu niyartasaanutaniyanaa. Majaari tamonu saajia curenu quiniutianiya quenaaja tamonu saajia caco maano. Quiaari naa miishaanutaniyatej quia niishiaquiniuucua, Pueyasoori quia quiaari najuhuanaj, quia quiaari na tacunura juucua. Quiaari saaja na ruuretacanu.

Jesu jaacasacari seya niqutiojonaa Pueyaso Secojoja tajiniji

(Mt 21.12-17; Mr 11.15-19; Jn 2.13-22)

⁴⁵ Na nuhuaji, Jesuuri Pueyaso Secojoja tajinia tiuquiquiaari na pueyata. Nojuajaari juhuacatecara pueya tohuatanijoree, canapuee na seya niqutiojoriquiaacuajani Pueyasoocua puecoosocoriquiano. ⁴⁶ Jesuuri nojori sequeree:

—Tariucuaaanu Pueyaso Rupaajinia na naajiotasaaquiaari Pueyaso sequesano: “Cua tiaari pueya secojonuuja janiya”. ¡Niaari saniniuuja na jiyatecanu nohuasenujuaca quiquiora!

⁴⁷ Puetunu juucajanaa, Jesuuri jiyacari pueya niishitiojoriquiaa Pueyaso Secojoja tajinia. Narta Judiocuaca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojonaa, mariyata narta Judiocuaca jiyaniijianucuanio, puetunu nojorijianaari tari rojotooriquiaa juucua taa na motunutaniya Jesuni. ⁴⁸ Puetunu pueyajanaari saaja shamaatia tojitiariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriquiaa Jesu.

20

Pueya nequesotasacari Jesu, cante na jiyaronani

(Mt 21.23-27; Mr 11.27-33)

¹ Tamonu juuca, Jesuuri Pueyaso Secojoja tajinia niishitiojoriquiaa. Pueya niqiuara pohuatiariquiaari taate nojori naata Pueyaso muerasura quiniuni. Jiyacarij, pueyacuara secojonaa jiyaniijianucuaari Jesuucua nijiomaa. Moisés Rootasanojiniji niishitiojonaari nojoritia nijiomajuhua, narta Judiocuaca camarucuanio. ² Nojoriiri Jesu nequesotaree:

—¿Cante quia jiyatecanu Pueyaso Secojoja tia jiyaniijia quia quiniuriani? ¡Canaa quia riucua! ¿Cante quia jiyaronani?

³ Jesuuri nojori sequereee saniniuujia:

—Janiya nia nequesotanu paniyajuhaaj. Cua riuucature. ⁴ ¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaja soj?

⁵ Nojoriiri juhuacatecara tamajaaja pocoojoquiaari. Tama sequetooriquiaajaariia:

—¿Taa pa riuucanutaniyani? Paa jaara sequereni: “Pueyaso na jiyaroquiaari”, nojuaaari pa sequenutaniya: “¿Casaara nocua nia tuyaquiquiaariiriini?” ⁶ Saniniuujia, paa jaara na sequereni: “Juancuaja nareja pueya jiyarosano quiquiaari”, puetunu pueyajanaari pa jacunutaniya saitia na puecoonura pajaniya. Nojoricuajaari sequequiaa: “Juanna seetanujuanaa Pueyaso sequenu panishano caminiujuunia quiquiaari”.

⁷ Nojoriiri cunora Jesu riuucaree:

—Johuaj. Maja canaa niishiniu canaquitijia Juan jiyaroquiaari na tiuquinijionura pueyatej.

⁸ Naaratej, Jesuuri nojori sequereee:

—Janiyajuhaaj, majaari cua sequenu quiniutianiya niajaniya, cante cua jiyaroquiaarini naa cua miiniuriatej.

Miriqui Jesu pohuatasano sesa miijiaca poonijionaaajiniji
(Mt 21.33-44; Mr 12.1-11)

⁹ Na nuhuaji, Jesuuri pueya niishitiojonu coteerohuacuuhaj nio miriqui pohuatasanota. Sequereeri:

—Tamonu pueyanoori cuhuariquiajinia uva natoquiaari. Na nuhuaji, na niqutionquiaari tamasaca pueyari, nojori cojuanura nera. Na camaruuri tucuaaanu quiaaree, tii na shocotejonura marijia. ¹⁰ Uva quishacari noshuriujua, saniya cuhuariquia camarujuaanaari na seru jiyaroree cuhuariquia cojuanaa pueyacia. Jiyarosaareeri tiji na masenura na camarujanaa, uva carojotasanoiniji. Na camarujanaacuaajaari tarijia pocoojoquiaari cuhuariquia cojuanaa pueyata, taa nojori niqutionutaniya na carojotasanoinijini. Cuhariquia camaruuri tii quishacari, ¡cuhariquia cojuanaari na piquitiurii saaja! Na jiyaroturohua juhuasuuri. ¹¹ Cunora, cuhuariquia camarujanaari tamonu na seru jiyaroree. Cuhariquia cojuanaari na miitiurii sesajuhaaj. Na saarijotureeri. Na piquitiuriiri. Na jiyaroturohua juhuasujaariuhaj. ¹² Cuhariquia camarujanaari socua tamonu na seru jiyaroree nojoriicua. Nojoriiri sesa miitiurii nojuajuhaaj. Na nuhuaji, nojoriiri na caponeeree cuhuariquiajiniji tariucua naatishano.

¹³ Naaratej, cuhuariquia camaruuri tama sequerejaaja: “¿Taa cua miiniutianiyarini? Quiyanuniyojua jiyaroreeraquij. Cuno pojori jaara cua panishano niyanu niqutiuri, maja naasucua nojori rerequetenu quiniutianiya nojuaja”. ¹⁴ Saniniuujia, cuhuariquia cojuanaa jaara cuhuariquia camaruuri niyanujuanaa niqiriiri nojoriicua niyano, tama nojoriijaarijia sequetoorree: “Nojuacuaja cuhuariquia camarura quiniutianiya na que niti, na que jaara shaajeyariquia. ¡Pa morej! Paari nio cuhuariquia camarura quiniutianiya saniniunijia”. ¹⁵ Naacuajitij, cuno cuhuariquia cojuanaa pueyari cuhuariquia camaruuri niyanu jaatiurii cuhuariquiajiniji. ¡Cuniqui na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniucua neyanutej, ¿taa na que miiniutianiya cuno sesa pueyarini?

¹⁶ Seetanujuanaa nia sequeyanijia, nojuajaari nocua quianutaniya nojori na puecoonura. Na nuhuaji, na cuhuariquia niqutionutaniya tamasaca pueyari, nera nojori cojuanura cutara.

Pueya tojishacari nio, nojoriiri sequequiaari:

—¡Juhuej! ¡Pueyaso cuaara naa miyaquiiuriatej!

¹⁷ Jesuuri nojori niqunijioree. Nojori sequereeri:

—¿Naate? ¿Nio naajiotasanooriuhaj, tariucuaaanu Pueyaso Rupaajiniani? ¿Niaate niishiya casaa na sequeyani? Naa sequeyariquij: “Saitia tianaa pueyari tamonu saajia soojotanutaniya, nojori jiyanihacari cuno saajia sesarujuajau. Na nuhuaji, cuno saajiaari socua panishano saajiaari jiyatesaanutaniuhua”.

¹⁸ Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanoocua tiyare, cuno pueyano jacananutaniyani. Shahuej.

¹⁹ Jiyacaritij, pueyacuara secojonaa jiyaniijianucua, mariyata Moisés Rootasanoiniji niishitiojonaari Jesu quianu panirii juucua. Nojoricuajaari niishirij, Pueyaso saquirojosano Israel pueya jiiitanaa nojori quiniucua, Jesuuri miriqui pohuatariquiaa nojoriiniji, tianaajiniji na pohuatasacari. Naajaa, jiyacaritij, majaari nojori quiatunu quiquiaari Jesu, nojori pueresacari Jesu panijiaa pueya.

Jiya jiyaniijia cuaara niqutiosaaria na sequesano cumaneece
(Mt 22.15-22; Mr 12.13-17)

²⁰ Naaratej, nojoriiri tamasaca pueya jiyaramiquiquiaari Jesuucua, sapuenu juhua maninia pueya niquishano. Cuno pueyari jiyaramiquishaquiaari Jesu nojori pocu-atenura sesa juucua, nocuara tonujusaanura. Jesu jaara nojori riucuaquiaari sesa, maara Romano jiyaniijia niqutiosaaquiaari saniitosocoriquiano. ²¹ Naacujitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhuj, majaari rimiajata quia niquniu pueya. Quiaacuaajaari seetanujanaa niishitiojoquiaa, taa Pueyaso paniya canaa miiniuriacuajani. ²² Cunora, canaa quia sequere taa canaa miiniutianiyani. Roma tiacajinia quijia jiyaniijiaari pa sequequiaari Judiocuaca cuaara cumaneeca niqutiojora nera, na jiiitasano pueya pa quishacari. Naaratej, ¿maninateeri pa miiniuria na sequesano?

²³ Jesuuri niishiquii nojoriiri nojuaja nequesotariquiaa najuhuanaj, nojori sapojonuta. Cunora, nojori sequereeri:

²⁴ —Cua niqutiri quia cumanee. ¿Niooriuhuj? ¿Cana naaquiti nocuani? ¿Cana sesate nocua naajiotasanoni?

Jesu riucuatereeri:

—Cunocuaaja canaa sequesano Roma tiacajinia quijia jiyaniijia César naaqui, na sesajuhuj.

²⁵ Jesuuri nojori sequere:

—Jiyaniijia César cuaara tama na casaajaaja niqutiosaaria. Nojuacuajaari na camaru. Saniniuuja, Pueyaso nia niqutiore cutara nerano tama na casaajaaja. Nojuajaari pa camarnu.

²⁶ Saaja maninia Jesu riucasacari pueya niquiara nojori, majaari nojori naata nocuara tonujunu quirii. Nojoriiri saniya jiuujiateree Jesu riucasacari saaja maninia nojori. Naacujitij, nojoriiri socua sanaajetaree.

¿Paate samiitiaconutaniuhuanu?

(Mt 22.23-33; Mr 12.18-27)

²⁷ Na nuhuaji, noojiaqueya Saduceocacajinijiniori Jesuucua niquiaari. Saduceocua- caari jiyaniijia macunucua pueya maja na samiitiaconu quiniutianihua. Naaratej, nojori-iri Jesu sequere:

²⁸ —Niishitiojonanaa, supuetana Moiséscaajaari pa rootaa na naajionejinia, pueyano jaara cusoyare mueyaju, tarajanu cuaara camiriia mashiquio, mueya na mueratenura tarajanu niti. ²⁹ Tamonu mashajaari seis tapueyocucaraca quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari muetuhuoja. ³⁰ Cunora, na nuhuajishanaari na mashiquio camiri. Nojuajaari muetuhuoja cuso- quiaarijiuhuj. ³¹ Naaratej, neyaca tarajanuuri mashiquio camiquiaarijiuhuj. Nojuajaari muetuhuoja cusoquiaarijiuhuj. Puetunu cuno mashiquiorijianaari naa camiyoqueiaari cuno maajitia. Puetunu nojorijianaari cusonuuquiaari muetuhuoja. ³² Na nuhuaji, pueya mashiquioori shaajequiaarijiuhuj. ³³ Naacujitij, macunucua jaara samiitiacorohua, ¿teyano cuno siete neyacaajinijiniote seetanu neyacajanaa quiniutianiyani? Cuno mashiquiocuaajaari puetunu cuno siete pueya niquiocua quiquiaari.

³⁴ Jesuuri nojori riucuaere:

—Mijiria pa quishacarijia, canuu, maajipohuari camiyoqueiaa. ³⁵ Saniniuuja, ma- jaari noo pojori camiyonu quiniutianiya canapuate samiitianijiosaanutanihuacuajani, maninia quijiaa nojori quiniucua Pueyaso niquiara mijiria. ³⁶ Majaari nojori shaajenu quiniutianihua. Nojoriiri shaajeyashijiaa quiniutianiya juhua Pueyaso seya. Nojori samiitiaconucua macujiniji, cunora, nojoriiri Pueyaso muerasujanaa quiniutianiya cutara. ³⁷ Supuetana Moiséscaajaari pa niishitiquiaari, macunucuaari samiitianijiosaanu- taniuhua. Moisésri naa naajiotaqueiaari Pueyaso sequesano nojuaja nequeru casaja noshiyanojinijitij. Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiano, quia supuetana Jacobo Jiyaniijiajuhuaj”.

³⁸ Naacujitij, paari niishiyani, puetunu Pueyasocua tiuujiaca shaajecono pueyajanaani, nojoricuaajaari saminiucua quia Pueyasora. Pueyasoori maja macunucua Jiyaniijia. Na pueya shaajecocuaajaari saminiucua quia nera cutara.

³⁹ Noojiaqueya Moisés Rootasanojiniji niishitiojona pueya tojishacari naa Jesu sequesantej, nojoriiri Jesu sequere:

—Maniniacuajaari quia sequesano, Niishitiojonanaa.

⁴⁰ Naa Jesu rihuanesacari saaja maninia nojoritij, majaari socua pueya nequesoreenu paniniu quiriquiaa nojuaja.

*¿Cante Cristo supuetanani?
(Mt 22.41-46; Mr 12.35-37)*

⁴¹ Jesuuri naa nojori nequesotaree saniniuuja:

—¿Casaara na sequesaaquiaacuaraarini, Pueyaso Jiyarosanaari supuetana David niqiuohuacuajinio supuenutaniya? ⁴²⁻⁴³ Supuetana Davidjanaacuajaari naa naajio-taquiaari na jaaquequejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajiriji-aara, janiya cuaara quia paraa shocotare puetunujuanaajaatijia’”.

⁴⁴ ¿Cristotucua taa David niqiuohuacuajinio supuereni? Davidcuaajaari na sequeya “cua Jiyaniijia”.

Cuno pueyari maja na naata na riucuanu quiriquiaa.

*Jesu numootesacari na pueya, Moisés Rootasanojiniji niishitiojonaa pueyacuaji
(Mt 23.1-36; Mr 12.38-40; Lc 11.37-54)*

⁴⁵ Puetunu pueyajanaa tojtiasacarijia Jesu, Jesuuri naa na saquiriojosano pueya se-
quere:

⁴⁶ —Tama nia cuaqueyajaaja nia cojuare Moisés Rootasanojiniji niishitiojonaa puey-
acuaji, nia miyaquiniucuaaji taa nojori miiquiaacuani. Nojoriiri tucuaque toqueya
cushiniu maniniucuaquiaa na rucuanejotajara pueya niqiuara, pueya shootianura no-
jori. Nojoriiri paniquiaa pueya saruhuatanura nojori juhua tojishano pueya, nojori
rucuanajosacari tiaca jiuujiajinia curotasano cajitiucuajinia. Nojoriiri socua panishano
cajitiucuajinia cajiniu maniniucuaquiaa Pueyaso Secojoju tiajinia, tamasa tiajinia-
juhuaj, nojori jaara masusaare queranacunura. ⁴⁷ Naajuhuj, nojoriiri mashiquiopue
tiaca masequiaa secaja cumaneecata nojori sapojonuta. Naa jiyasohuaja nojori miiniu
nuhuajitij, pueya niqiuara, nojoriiri najuhuana tucuyocua secujojuaa Pueyaso, pueya
jiyaniniuria nojori maninia pueya cutara. Naa nojori miiniuucuatej, nojoriiri jiyano-
hua saniitiosano quiniutianiya.

21

*Casamiiju mashiquio niqitiosacari na cumanee juuranee Pueyasora
(Mr 12.41-44)*

¹ Pueyaso Secojoju tiajinia, Jesuuri casamiriaca pueya shootiariquiaa na cumaneeca
niojiyano cumaneeca racataja quiqiojinia, nojori niqitiosano Pueyasora. ² Jesuuri
tamonu casamiiju mashiquio niqiriijuhua caapiqui cumaneeyojua niaano tijiuhuj.
Na niasanoori nareja cobrejiniiji shipinishano cumaneeca quiquiaari. ³ Jesuuri na pueya
sequere:

—Seetanujanaa nia sequeyanijia, cuno casamiiju mashiquioori socua queraatia ni-
qitiooree Pueyaso, cuno casamiriaca pueyajiniiji. ⁴ Puetunu cuno pojorijianaari saaja na
cureeno cumaneecajiniiji niqitiojiya puetunu nojori panishanojuanaa nojori masejonu
nuhuaji. Cuno mashiquio cutaraari puetunu na miaajaara na masetajara cumaneecajanaa
niqitiooree.

*Jesu pohuatasacari, Pueyaso Secojoju tia niyartasaanutaniya
(Mt 24.1-2; Mr 13.1-2)*

⁵ Noojiaqueya tii quiniaa pueyari pocoojoriqiaa Pueyaso Secojoju tiajiniji. Jiyano-
hua shanohua saitia shipinishano quiriquiaari. Nojoriiri na shootiariquiaa, naajuhuj taa
na maniniushitishaquiaari nareja pueya niqitiojosano casamitiani. Jesuuri nojori
sequere:

⁶ —Puetunu cunojuanaa niaa na niqiyani, tamacari niyartasaanutaniyari. Majaari
quenaaja tamonu saajia cureenu quiniutianiya tamonu caco maano. Puetunu ni-
yartasaanutaniyajanaari.

*Taa nio jiya puequenu panishacari quiniutianiya
(Mt 24.3-28; Mr 13.3-23)*

⁷ Na pueyari Jesu nequesotaquiaari:

—Niishitiojonaana, ¿taacari nio tia niyartasaanutaniyarini? ¿Casaa canaa niqiniutiani-
yarini, canaa niishiniuria quia sequesanoori quera tohuateya?

⁸ Jesuuri nojori riucuaere:

—Tama nia cuaqueyajaaja nia cojuare niaa mariqui sapojosaareeri. Queraatia sapo-
jonuujuaca pueyari supuenutaniya. Nojoriiri sequenutaniya: “¡Janiya Cristoni, Pueyaso
Jiyarosano! ¡Nio jiya quera puequeya!” Niaa jaara naa sequesaretej, majaari nia
tojiniu cuno sapojonuujuaca. ⁹ Naajuhuj, majaari nia puerenu niaa jaara tojiri tamonu
jiyajinijinio pueyari tamasa jiyacajiniiji pueyata miaquetoojiya, naajuhuj, pueya jaara

juaatiooquiaa tama nojori jiyaniijia nojori jatanurajaaja. Naa quiniutianiyari coteenu. Naajaa, juhuanojuaja maja nio jiya puequesacari.

¹⁰ Jesuuri naa nojori pohuatariquiaa socua:

—Tamonu rupaa pocuajacaari miaquetoohonutaniya tamaatia rupaa pocuajacata. Naa-juhuaj, tamonu jiyajiniijio jiyaniijiaari miaquetoohonutaniya tamonu jiyajiniijio narta jiyaniijia. Naa queraatia miaquetoohonuuri quiniutianiya. ¹¹ Rijiaari jiyanoehua jiu-uquiujiutianutaniya queraatia jiyacajinia. Jiyanoehua miaajenuuri quiniutianiya queraatia tamonu jiyacajiniajuhuaj. Paaqueja cusonuuri quiniutianiya niya, tamaquicuajahuaj. Naajuhuaaj, jiyanoehua puereeta casaari niqushaanutaniya jiyocuacaanu, mijiria quiniaa niishiniuria jiya puequenuraari tari catecanoya.

¹² Cuno puereeta quiyaquishacarijia, niaari quioosaanutaniya naquiya nia miishaanura, cua pueya nia quiniucua. Niaari jaatucusaanutaniya Pueyaso secojonuujua tiajiniaqueya nequesoresocoriquiano. Niaari nujuatejojuacajinia nujuatejosaanutaniya. Niaari nia pueya camarucuaacua, mariyata jiyaca jiyaniijianucuaacua jaatucusaanutaniya nequesoresocoriquiano. Niaari naa miishaanutaniya nia pohuatanucua janiyajiniijijia pueya niqiuara. ¹³ Naacuajitij, nia naata cuno jiyaniijianucua niqiuara pohuatanu janiyajiniijijia. ¹⁴ Nioojia nia cajitiri, maja juhuacarijia nia niishiriojonura taa nia riucuanutaniya nojorini. ¹⁵ Janiyacuajaari jiyacari nia niishitiojonutaniyani taa nia riucuanutaniyanoj, mariyata casa nia pohuatanutaniya jiyanoehua nia niishitiajatani. Niaari nojori sanaajanutaniya maninia nia riuhanesacari saaja. Nia paraari maja na naata nia sequesano rerequetenu quiniutianiya. ¹⁶ Jiyacarijuhuaj, tama nia queyajaarijia nia tacartanutaniya, cua pueya nia quiniucua. Nia tapueyocuaacari nia tacartanutaniyajuahuaj, nia jiyasocujajinio supueno pueyajuhuaaj, nia rupueaanio. Nojoriiri noojiaqueya nijaniyajiniijio puecoonutaniya. ¹⁷ Puetunu mijiria quiniaa pueyajanaari nia niqiniu paniyaquiniutianiya cua pueya nia quishacari. ¹⁸ Naajaa, majaari nia puereenu. Majaari quenaaja niquriyatu muesu shaajenu quiniutianiya nia nacajiniijia, Pueyaso jaara paniyaquiri. Pueyaso jaara naa nia muesu cojuaacuaa, ¿maatucua casaara cojuaquiri saniya nijaniyani? ¹⁹ Naaratej, rejeretajaca nia quiri. Naa cutaraari shacantuuca quijacara jatanishaanutaniya pueyaracaanu nia rishiniuria, niaa jaara cumaatia nujuatere pueya miishacari sesa nijaniyani.

²⁰ Niocua niishiri Jerusalén tiaca tari niyartasaanutaniya, niaa jaara na paraa niquri puetunu na shocuaqueyjanaa maano. ²¹ Jiyacaritij, canapueete Judea jiyajinia quiyani, cuno pojori cuara mashiiria tuhuananuhuaacua. Canapueete Jerusalén tiacajinia quiyani, nojori cuara ritia mashiiria tiji. Canapueete na cuhuariquiajia quiyani, nojori cuara tacateyaquihuara Jerusalén tiacajiniohua. ²² Cuno quishacari, jiyanoehua saniitiosacariiri quiniutianiya. Jiyacaritij, puetunu Pueyaso Rupaajinia naajiotasanojuanaari tohuatenuutaniya. ²³ Jiyanoehua taraatia quiniutianiyari noo maajipohuara, canapueete manajaatohua quia jiyacari, mariyata canapueete conaaja supueja jiiitiaani. Jiyanoehua naquiya quiniutianiyari cuno quishacari nio jiyajinia. Nio jiya pueyari jiyanoehua saniitiosaanutaniya. ²⁴ Noojiaqueya nojorijiniijioori puecoosaanutaniya tahua miaquetoosacari nojoritia. Tamasaca nojorijiniijioori quioosaanutaniya. Nojoriiri puetunu jiyacajiniarjanaa rijiosaanutaniya poonitijosocoriquiano. Taucuacaari Jerusalén tiaca jiiitanutaniya tama nojorirajaaja, Jerusalén tiaca nojori jiiitanu cuara puequerejaatijia, taa Pueyaso sequequiaari tamajacuajani.

*Taa na quiniutianiyani Jesu tacatesacarihua
(Mt 24.29-35, 42-44; Mr 13.24-37)*

²⁵ Mijiria quiniaa niishiniuria jiya quera puequeya, nojoriiri puereeta casa niqiniutianiya pananujinia, racajinia, riyajiniajuhuaj. Shoniniacu caminiaacuaa shiriiquitiutianiyajaarihuaj, jiyanoehua na queyocuasacari. Nojoriiri cushitiutianiyani na puereetunutajuhuaaj, jiyanoehua cojuata shoniniacu caminia cajiniucuasacari. ²⁶ Mijiria quiniaari cusojonuunutaniya na puereeta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso shipinishano casaajanaari jiuquitiutiasaanutaniya jiyanoehua. ²⁷ Jiyacaritij, mijiria quiniaari cua niqitiutianiyani cohuaja najacajinia niyano, jiyanoehua shacantuuca cua cumaacata. ²⁸ Naaratej, niaa jaara nio cua pohuatasano niquri tari coteyano, niocua tama cumaquitiorejaaja. ¡Niocua timiri! ¡Niaacuajaari quera rijiosaanutaniya niquiji, pueyaracaanu cuata nia quiniuria!

²⁹ Jesuuri nojori pohuataree nio miriqui pohuatasanojuhuaj:

—Higo naana nia niquri, tamonu jaranacujua naananio. ³⁰ Na jaamasucua jaara mueratuure, niaari niishiya, tacareejonuqui quera quiniutianiya. ³¹ Naajuhuaaj, niaa jaara puetunu cua pohuatasanojuanaa niquri tari tohuateyano, niocua jiyacari niishiri, janiyari quera tiuquihuani, Jiyaniijijanaa cua quiniuria.

³² Seetanujuanaa nia sequeyanijia, puetunu cua sequesanojuanaari tohuateenutaniya Pueyaso tojtiaashijiaca pueya puequeyaquishacarijia. ³³ Jiya cajiniocua, mariyata nio jiyari shaajenutaniya. Cua sequesanoori saniniuujia puetunu tohuateenutaniyajanaa cutara, taa cua sequeyacuajani.

³⁴ Tama nia cuaqueyajaaja nia cojuare niaa mariqui cua tojiyashijiacara quiriohuari. Naaratej, majaari shuquiriaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutatio. Maja naa nia quiniu, janiya mariqui nia cariyatureeri, jeenucuasoo nia quishacari, canashiyaquiji cua tiuquishacariuhua. ³⁵ Cua tiuquishacariuhua, juhua norijiotaja quiniutianiyari puetunu mijiria quiniaa pueyarajanaa, taa norijiotaja canashiyaquiji majaacuaani. ³⁶ Cunora, cucuaji jeenucuasano nia quiri juhuacarijia. Pueyaso nia secojore pueyaracaanu, maja naquiya nia miishaanura cuno taraatia quishacari, taa cua sequeyacuajani, mariyata juhuajaniya nia nujuatunura cua tajoji, cua nequesoreesacari puetunu pueyajanaa.

³⁷ Jesuuri puetunu juucajanaa niishitiojua Pueyaso Secojoua tiajinia. Saniniuujia, niucua quiojowaari Olivo cuhuariquia tuhuananujinia tii na quiniuria. ³⁸ Puetunu pueyajanaari tariquicuajaji quiojowa Pueyaso Secojoua tiajinia, nojori tojiniuria Jesu pohuatasano.

22

Judiocuaca camarucua roojotoosacari Jesu nojori quianura

(Mt 26.1-5, 14-16; Mr 14.1-2, 10-11; Jn 11.45-53)

¹ Quera Pascuara queranacunuusacari quiquiaari, pueya miaquesacari pan na poreetajaaju shipinishano. ² Jiyacari, pueyacuara secojonaa jiyaniijianucua, mariyata Moisés Rootasanojiniji niishitiojonaari roojotooriquiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jyanohua queraatia pueya paniniuucua Jesu.

³ Jiyacaritij, Satanási Jesu pueyano Judas Iscariote jiuujiajinia tiuquiquiaari. ⁴ Nojuajaari pueyacuara secojonaa jiyaniijianucua quiaquiaari, Pueyaso Secojoua tia cojuanaa jiyaniijianucuaacuajuhua. Judasri cuno pojoritia pocoojoquiaari. Nojori sequereeri nojuaja na naata nojori quiatenu Jesu. ⁵ Nojoriiri shuquiririi. Cunora, Judas sequetureeri taa shumaneeca nojori niqutionutaniya nojuajani. ⁶ Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quiatenutaniya Jesu jiyasohuajani.

Jesu miaquesacari na nuhuajiria na pueyata

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Poreetajaaju pan miaquenu juucaari tari quiquiaari. Cuno juucajuhuaj, borre-goori mosano quijia, Pueyaso niquiara miaquesocoriquiano Pascuara queranacusacari. ⁸ Cunora, Jesuuri Pedro jiyaroree Juannio, nojori miaquesocoriquiano nojori majeetenura. Nojori sequereeri:

—Nia quiaare. Borrego nia majeetesecuaa pocuaji, pa miaquesocoriquiano quiarijia Pascuara.

⁹ Nojoriiri na nequesotaree:

—¿Tee quia paniya canaa majeetenurani?

¹⁰ Jesuuri nojori riucuree:

—Niaa jaara Jerusalén tiacajinia tiuquishii, niaari tamonu pueyano riuriatanutaniya mohuaca taquitiaano patacojinia. Niocua na nuhuaji rupaamia na tiajinia. ¹¹ Cuno tiajinia na tiuquishacari, niocua cuno tia camaru sequesee: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarijia Pascua niucuan?’” ¹² Nojuajaari nia niqitiniutianiya puereetuua sohuaca, nataco na tiajinia, tariucua jeenucuasano. Niocua cuniqui miishii puetunujuanaa pa miaquesocoriquiano.

¹³ Jesu pueyari quiaare. Nojoriiri puetunujuanaa riuriataguiaari taa Jesu sequequiaari nojoricuajani. Nojoriiri tii miishii puetunujuanaa, Pascua niucua nojori miaquesocoriquiano.

¹⁴ Jaara tari quiquiaari Pascuara miaquesacari niucua, Jesuuri na saquiriojosano puey-ata cajitiushii miaquejajinia. ¹⁵ Jesuuri nojori sequeree:

—Janiyari jyanohua niaata miaquenu paniriquiaa nio Pascua niucuan, pueya moy-aquishacarijia janiya. ¹⁶ Seetanujuanaa nia sequeyanijia, majaari socua cua miaquenu quiniutianiya Pascuara, janiya jaara tiuquiriohuajaatijia puetunu Pueyaso muerasuran-otajanaa. Jiyacari cutara, paari jatiqui miaquenutaniyani. Jiyaniijijanaa cua quishacari.

¹⁷ Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

—Jajaa, nio nia masetare. Nia rature puetunu niajanijajanaa. ¹⁸ Seetanujuanaa nia sequeyanijia, majaari socua cua ratunu quiniutianiya uva caacajiniji, janiya jaara tiuquiriohuajaatijia, Jijaniijajanaa cua quiniuria puetunu Pueyaso muerasurajanaa.

¹⁹ Na nuhuaji, Jesuuri pan ririi. Pueyaso secojoree nocuaraari. Na neecasereeri. Na pueya na niqitiojoreeri. Nojori sequereeri:

—Nioori cua cuaqueya niaacuara mosocoriquiano. Niocua naa miiriquia pueyara-caanutej, nia niishiriojonura janiya.

²⁰ Nojori miaquenu nuhuaji, Jesuuri ratujua patareejuhuj. Naa sequereeri:

—Cua nanacaari niaacuara shoonutaniya nia jiyanooshaanura seetanujuanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

²¹ Cua tojtitiare. Quiarijiani, cante cua tacartanutaniya pueya na motenura janiyani, nojuajaari cuata miaqueya. ²² Janiyari naa miishaanutaniya taa janiyajiniji juhuacarijia pohuatasaquiaricujani tariucuacaanu Pueyaso Rupaajinia. Saniniujia, cua tacartanaari jiyanohua taraatia quiniutianiya naa na miiniuucua janiya.

²³ Jesu pueyari jiyacari juhuacatecara nequesoreetoree tama nojorijiaaja:

—¿Canteeri na tacartanutaniyani?

Cante seetanujuanaa jiyaniijajanaani

²⁴ Jesu pueyari tama juayonutariquiaajaacujua, teyano nojorijiniiniote jiyaniijajanaani. ²⁵ Jesuuri nojori sequereee saaja:

—Mijiria, jiya jiyaniijianucuaari jiyanohua jiyaramiquiniu niishijia nojori jütiasano pueya, juhua nojori poonitijosano pueya. Nojoriiri tama nojorijiniijiaaja sequeja: “Canaari maninia miiquiaa canaa pueyani”. ²⁶ Niajanijia saniniujia, majaari naa nia quiniu juhua nojorijia. Cante socua tojishano pueyano quiya niajanijajiniinioni, nojuaja cuara tama na cuaqueyajaaja jiyateyaquiria na cumaaca paaretaja pueyacua. Cuara quiiria jacaria pocuaja. Naajuhuj, cante jiyaniijajanaa quiya niajanijajiniinioni, nojuaja cuara jiyateera tama na cuaqueyajaaja juhua nia serura. ²⁷ ¿Taa nia sequeyani? ¿Cante jiyaniijajanaani? ¿Miaqueyano pueyanotee? ¿Na mianuutena soj? ¡Miaqueyano pueyanocuaja! Naajaa, janiyari juhua nia seru quiquiaa niaarani, maninia cua miiniuria niajanijia. Naajuhuj, naa maninia miijiaa nia quiriquia.

²⁸ Niacuajaari pueyaracaanu cua cojiriquiaa janiya jaara saniniujiushaariquiaani. ²⁹ Naaratej, janiyari nia jiyatanutaniya jiyaniijianucua nia quiniuriani, taa cua Que jiyatequiaari janiyacuaani, Jiyaniijia cua quiniuria. ³⁰ Naacuajitij, niaari cua miaquejajinia cajitiniutianiya cuata nia miaquejonura, cuata nia raruujunurajuhuj, Jiyaniijajanaa cua quishacari. Niaari mariyata jiyaniijianucua quiniutianiya, supuetana Israel doce niqiuohuacujajinio supueno pueyapue nequesoreenaa nia quiniuria.

Jesu sequesacari Pedro, nojuaja nocuaji seetanutaniya

(Mt 26.31-35; Mr 14.27-31; Jn 13.36-38)

³¹ Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara sequerucuaa Pueyaso, jiyanohua na saniniujiunuria niajanijia. Naacuajitij, niaari jiyanohua saniniujiushaanutaniya, naatej, taa trigo quejooshiya jiyocuacaanucuaani, paratu panura na cocua. ³² Janiyari saniniujia Pueyaso secojoree quiocuara cutarani Simónnaa, cucua tiuuniu quia tarinitiaaquiniuucujia. Naacuajitij, quiaa jaara quioojia tacatorohua cucua, quiocua quiarta pueya cumaquiriohuajuhuj, nojori tiuunuria seetanujuanaa pueyaracaanu cucua.

³³ Simónri Jesu sequereee:

—¡Cua Jiyaniijanaa, quiaa jaara nujuatejojuajinia nujuatesaare, janiya cuara nujuatesaaria quiatajuhuj! ¡Quiaa jaara mosaare, naajaa, janiya cuara cojiritiasaaria quiajanijajuhuj!

³⁴ Jesuuri na sequereee:

—Pedronaa, seetanujuanaa quia sequeyanijia, caacaraja niunijiaquishacarijia quiarijia, quiaari tari naa cucuaji seetanu caminiujiunutianiya pueya niqiuara: “¡Maja cua niishiniu Jesu!”

Quera Jesu miishacari taraatia

³⁵ Jesuuri na pueya nequesotaree:

—Janiya jaara nia jiyaramiquiquiaari Pueyaso rupaa nia pohuatanura caashoqueejuni, cumaneeca quiquooju, sapatuujunio, ¿niaateeri nia panishano casaa niqitioy-aquishaquiaari?

Nojoriiri Jesu riucaaree:

—Maja. Canaacuajaari puetunu canaa panishanojuanaa niqutiojosaaquiaarini.

³⁶ Jesuuri nojori sequeeree:

—Quiarijia saniniujia, cante caashoqueracani, cuaara na pataara. Cante cumaneeca quiquioracani, cuaara na pataarajuhuj. Cante nijiniaquetucua mueruu jiti-aquiyani, cuno cuaara niqutioora na shiniquiaacuaji toque, nijiniaquetucua mueruu na masenura na toque samitia. ³⁷ Seetanujuanaa nia sequeyanijia, tariucuacaanu Pueyaso Rupaajinia janiyajiniji naajiotasanoori tohuateenutaniya. Janiyajiniji naajiotasanoori naa sequeyatej: “Nojuajaari jiyanishaaree sesa miijia, sesa miijiacata na teetesacari”. Puetunu janiyajiniji naajiotasanojuanaari tari tohuateya taa na naajiotasaaquiaaricua-jani.

³⁸ Nojoriiri Jesu sequeeree:

—Jiyaniijianaa, niya quiya caapiqui nijiniaquetucua mueruu.

Nojori riucuaereeri:

—Tariucuaja.

Jesu secojosacari Pueyaso, Getsemani cuhuariquiajinia

(Mt 26.36-46; Mr 14.32-42)

³⁹ Na nuhuaji, Jesuuri tohuataquiaari tiajiniji. Olivo cuhuariquia tuhuananujiniara quiaareeri. Nojuajaari cuniqui quianura jitiquiaari. Na saquiriojosano pueyari na nuhuajiyaree. ⁴⁰ Na tiuquishacari tii, Jesuuri nojori sequeeree:

—Pueyaso nia secjore, niaa mariqui sesa miiriiri niaa jaara saniniujishaare.

⁴¹ Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojqoqetasee Pueyaso secjonuraari. ⁴² Naa secjoreeri:

—¡Cua Quenaa, maja cua miiniu paniniu naquiya! Naajaa, janiya cuaara miyaquishaaria taa cua paniyani. Janiya cuaara miishaaria cutara taa quia paniyacuajani.

⁴³ Jiyacaritij, Pueyaso seruuri jiyocuacaanuji nocua nimiaa na cumaquiniuria. ⁴⁴ Jesuuri jiyanohua naquiya miiriquiaa. Nojiaari quera jiaqueriquiaa na tacaaniutia. ¡Jiyanohua, jiyanohua secjoriquiaa Pueyasoori! Cunora, na paneyacaari puereetujuaa juhua nanaca quiriquiaa, na caatesacari jiyocua. ⁴⁵ Na secjonu nuhuaji, Jesuuri sanerohua. Na pueyacuatacayarohuari. Nojori niqushuhua maquetiuyano saajaari, puera nojori taraajenuucua. ⁴⁶ Jesuuri nojori sequeeree:

—¿Casaara nia maquetiuyani? Nia saneecuaure. Pueyaso nia secjore na cojuanura niajaninya, maja sesa nia miiniuria niaa jaara saniniujishaare.

Judiocuaca camarucua quiasacari Jesu

(Mt 26.47-56; Mr 14.43-50; Jn 18.2-11)

⁴⁷ Jesu pocuasacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano pueyajinijinio quiquiaari. Judasri Jesucua nimiaajanaa. Na saruhuataseeri na nujuunuta. ⁴⁸ Jesuuri na sequeeree:

—Judasnaa, ¿quiaate tama cua tacartaajaaja, quia nujuunuta sapojonu janiya?

⁴⁹ Jesu pueya niqushacari casaa cuno pueya miiniu paniriquiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

⁵⁰ Tamonu nojorijinijinoori pueyacuara secjonaa jiyaniijia seru piri na mueruuta. Saaja na miaquetajara numoco jaatereeri. ⁵¹ Jesuuri na sequeeree:

—¡Tariucuaja! Maja naa miiniu.

Jesuuri numoco ririi. Na ruporohuari. ⁵² Judasta quiriquiaari pueyacuara secjonaa jiyaniijianucua, Pueyaso Secjojua tia cojuanaa jiyaniijianucujuhuj, Judiocuaca camarucuanio. Nojoriiri Jesucua nijioquiaari na quianura. Jesuuri cuno pojori sequeeree:

—¿Casaara cucua nia nijioree nijiniaquetucua mueruutani, macacatanio nia quianura janiyani? ¿Janiyateeri nohuasejojuani, naa nia nijionura cucuatej? ⁵³ Pueyacaanu cua quishacari niaata Pueyaso Secjojua tiajinia, majaari nia quianu quijia janiya. Naajaa, quiarijia cutaraari nijaniyara, na panishano nia miiniuria janiya. Quiarijiani, Sesaacari cumaacaraca na panishano na miiniuria.

Pedro seetasacari Jesujiniji

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jiyacaritij, nojoriiri Jesu quiaree. Na jaatucutiuyareeri pueyacuara secjonaa jiyaniijia tiajinia. Pedroori tucuaaanuji na nuhuajiriquiaa. ⁵⁵ Jiyacaritij, pueyari jiyaniijia tia carijiniacuma mani noshitirii. Na shocua cajitiuriohuari. Pedroori nojori tajinia cajishijuhuj. ⁵⁶ Cuno jiyaniijia serujinijinioni, niyacoori Pedro niquirii mani jitiuyano. Nojuajaari Pedro shootariquiaa. Na nuhuaji, niyacoori Pedro shishirii. Sequeereeri:

—Noo pueyanoori cuno quiasano pueyanota quijiajuhuj.

⁵⁷ Pedroori seetaree. Naa sequereeri:

—Niyacoonaa, imajaari quenaaja cua niishishano cuno pueyano!

⁵⁸ Na nuhuaji, tamonu pueyanoori Pedro niquiriijuhuj. Nojuajaari cuno jiyaniijia seru quiriquiaajuhuj. Pedro sequereeri:

—¡Quiaaqui cuno pojorijiniinio pueyanojuhuj!

Pedroori saa sequereejaa:

—¡Maja, pueyanonaa! ¡Janiya maja nojorijiniinioni!

⁵⁹ Pasaja na tarishiniu nuhuaji, tamonu pueyanoori sequenu pacuterohua:

—Nio pueyanocujaari cuno pueyanota quijia. Nojuajaari Galilea jiyajiniiniojuhuaj.

⁶⁰ Pedroori saa sequereejaa:

—¡Pueyanonaa, maja cua niishiniu quenaaja casaa quia sequeyani!

Pedro pocuasacarijia, jiyacaritij, caacarajaari niunijioree. ⁶¹ Jiyaniijia Jesuuri tacatequee. Na nijinara niquirii Pedroori. Pedroori jiyacari Jiyaniijia sequesano nojuaja niishiquii, naa na sequesanotej: “Quiaari tari seetanu caminiujuniutianiya janiyajiniijii pueya niqiara, caacaraja niunijyaquishacarijia”. ⁶² Pedroori cuniquiji tohuataquee. Jiyanhua nujuquereeri na taraajenuta, sacuaraatia na seetanuucua.

Pueya macaatisacari Jesu

(Mt 26.67-68; Mr 14.65)

⁶³ Jesu cojuanaa pueyari Jesu macaatisacari. Nojoriiri na piqutiuriquiaa. ⁶⁴ Nojoriiri Jesu namijia morotuquiaari coteenu. Na jiquioco piqutiurihuuari. Na nuhuaji, na sequetureeri:

—¡Quia niishiritioj! ¿Cante quia piriini?

⁶⁵ Nojoriiri socua queraatia sesa casaa sequeturiquiaa na macaatiinuria Jesu.

Judiocuaca jiyaniijianucua nequesoreesacari Jesu

(Mt 26.59-66; Mr 14.55-64; Jn 18.19-24)

⁶⁶ Jaara juhuaquequiaari, Judiocuaca camarucuaari rerejoree pueyacuara secojonaa jiyaniijianucua, mariyata Moisés Rootasanojinijii niishitiojonaatajuhuaj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua taccoji, nojori nequesoreenura tii nojuaja. Nojoriiri naa Jesu nequesoreere:

⁶⁷ —Canaa quia sequere, ¿quiaate Cristo, Pueyaso Jiyarosano?

Jesuuri nojori riucaaree:

—Janiya jaara nia sequerene: “Taaquiriirinij”, niaari saaja cua sequenutaniya: “Quiaa sapojiya”. ⁶⁸ Saniniujia, janiya jaara nia nequesoreere Pueyaso Jiyarosanojinijini, majaari nia riucaanu quiniutianiya janiya. ⁶⁹ Naajaa, quiarijiani, janiyari puetunu cumaacaraca Quijijanaa miaquetajara cajiniutianiya jiyocuaanuni.

⁷⁰ Naa Jesu sequesacarij, puetunu nojorijianaari na sequere:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucaaree:

—Taaquiriirinij. Naacuaaquinatejaj, taa nia sequeyacuajani.

⁷¹ Nojoriiri tama sequetooreejaja:

—¿Paatucua casaara socua tamonu pueyano pajere nocuara tonujuriqianoni? Paacuaajari tari tama pa numaatajaaja sesa na sequesano tojtiaareni.

23

Pilato nequesoreesacari Jesu

(Mt 27.1-2, 11-14; Mr 15.1-5; Jn 18.28-38)

¹ Cuno nuhuaji, puetunu nojorijianaari sanetaree. Jesu jiyatatiuyareeri jiyaniijia Pilatoocua. ² Cuniqii, nojoriiri juhuacatecara Jesuucua saquiriojotaree na sapojonuta. Pilato sequetureeri:

—Canaari nio pueyano niishiyani. Nojuajaari canaa Israel pueya nasojouquiaa pocuara. Nojuajaari niishitioquiaajuhuj, maja canaa Israel pueya niqitiojona canaa cumaneeca pa jiyaniijijanaa Césarra, taa César sequequiaaricujani. Naajuhuj, tama nojuajaari na sequequiaa: “Janiya Cristoni, Pueyaso Jiyarosano, nia jiyaniijia cua quiniuria”.

³ Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Taaquiriirinij. Naacuaaj, taa quia sequereecuajani.

⁴ Jiyacaritij, Pilatoori pueyacuara secojonaa jiyaniijianucua sequere, pueya maanunio:

—Nio pueyano nequesoreere tarinijia. Nojuajaari maja sesa miijia.

⁵ Nojoriiri saaja socua jiyacateere Jesuucua tonujunu. Naa sequetureeri:

—¡Nojuajaari puetunu canaa Judiocuacajanaa sesoya na niishitiojosanota! Nojuajaari Galilea jiyajinia niishitiojonu coteequiaari. Quiarjia, niya niishitiojijajaariuhua Judea jiyajiniani.

Jiyaniijia Herodes nequesoreesacari Jesu

⁶ Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajinijinio?

⁷ Nojoriiri na riucuree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari. ⁸ Nojuajaari pueyaracaanu Jesu niqiniuuca jiaatiaja juucua. Herodesri tari pohuatasaaquiaari Jesujiniji. Naaratej, Herodesri Jesu miishacari na cumaacata niqiniuu panijia juucua. Naacaujiti, na niquishacari Jesu, nojuajaari timirii. ⁹ Herodesri queraatia nequesoreeree Jesu. Majaari quenaaja Jesu riucuanu quiquiaari nojuaja. ¹⁰ Pueyacuara secojona jiyaniijianucuaari tii quiriquiaajuhua, Moisés Rootasanojiniji niishitiojonaanio. Cuno pojoriiri jiyanhua Jesuucua saquiriojotariquiaa queraatia sesa casaa. ¹¹ Herodesri na soldadohuata Jesu rerequeteriquiaa. Na macatiriiri. Na cushitirii jiyanhua shanhua toqueeri juhua jiyaniijia cushishano. Na nuhuaji, Herodesri pueya jiyarotarohua Jesu Pilatoocua. ¹² Herodesri cuno juuca Pilato rupuenara quiquiaari. Coteenu, majaari nojori niqitioonu paniniu quiija. Nojoriiri saaja shocotetoojua.

Puetunu pueyajanaa sequesacari Jesu cuaara mosaaria

(Mt 27.15-26; Mr 15.6-15; Jn 18.39-19.16)

¹³ Na nuhuaji, Pilatoori pueyacuara secojona jiyaniijianucua rerejotequiaari na tacoji, Judiocuaca camaracuajuhua, tii quiniaa pueyano. ¹⁴ Nojori sequereeri:

—Niaari nio pueyano jaatucuree cucua najuhuanaj. Niaari cua sequeturee, nojuajaari narta pueya nasojouquiaa. Janiyacuajaari na nequesoreeriquiaa nia niquiarani. Niacuajaari cua tojitiariquiaa cua nequesoreesacari nojuaja. Quiarjia niishiya cutaranijia, puetunu nocuara nia tonujusanajuanaari maja seetanujuanaa. ¹⁵ Jiyaniijia Herodesquiiri tari niishiyajuhua, majaari seetanujuanaa nocuara nia saquiriojotasano. Cunora, Herodesri pocua na jiyarorohua. Seetanujuanaa, majaari sesa na miiniu quiquianu na mosaanura. ¹⁶ Janiyari na majacutenutaniya narejani, cartesaarohuari.

¹⁷ Pascua juucara queranacusacari, Pilatoori nujuatesano pueyano cartenu jitiquiaari nujuatejojuajiniji. Nojuajaari naa miiquiaari pueyaracaanutej, pueya na shuqiritiniuria. ¹⁸ Jiyacariitij, puetunu pueyajanaari juhuacatecara jiyanhua nacaree jatiqui:

—¡Jesu quiaa more! ¡Barrabás quiaa cartere saniniuuja!

¹⁹ Tarijia cuno Barrabási narta nasojosano Judiocuacata Romano pueya taanuquiaari juucua Jerusalén tiacajiniji. Nojuajaari jiyacari pueyano moquiaarijuhua. Cunora, nojuajaari nujuatejojuajinia nujuatesano quiriquiaa. ²⁰ Pilatoori Jesu cartenu panijia juucua. Naaratej, Pilatoori pueyata pocoojorohua socua. ²¹ Pueyari saaja jiyacaterree jiyanhua nacoonura jatiqui:

—¡Cuaara mosaaria niyacutesanojinia teetasano! ¡Cuaara mosaaria!

²² Pilatoori pueya sequenu pacuterohuacuhua:

—¿Maatucua casaara mosaaajaarani? ¿Sesa miiriitijiaaraj? Janiyacuajaari tari na nequesoreereeni. Majaari sesa na miiniu quirii na mosaanura. Janiyari na majacutenutaniya narejani. Na nuhuaji cartesaarohuari.

²³ Pueyari saaja socua jiyanhua nacoree niyacutesanojinia na mosaanura. Pueyacuara secojona jiyaniijianucuaari mariyata pueyata jiyanhua nacoeriquiaa. Puera jiyanhua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. ²⁴ Naaratej, Pilatoori socua tariniriohua. Pueya panishano miiriiri. ²⁵ Pueya sequesano pueyano cartereeri, cante nujuatesaaquiaari nujuatejojuajiniacuajani na taanuunu paniniuuca Romano pueya, na monucua pueyanohua. Na nuhuaji, Pilatoori Jesu tarinitariere socua, nojori mosocoriquiano, taa nojori paniriquiaacuajani.

Niyacutesanojinia Jesu teetasari

(Mt 27.32-44; Mr 15.21-32; Jn 19.17-27)

²⁶ Pueya jiyatasacari Jesu puecoosaquiria, nojoriiri tamonu pueyano quiaree Jerusalén tiacajiniara riujuyano juucua. Nojuajaari Cirene jiyajinijinio pueyano quiquiaari. Na sesa quiquiaari Simón. Nojuajaari niyacutesano patesaree Jesu nuhuaji.

²⁷ Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuuriquiaari,

nocua nojori taraajenuta. ²⁸ Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuajaaja nia nujuquette, nia niquiohuacuanio. ²⁹ Na nuhuaji, jyanohua taraatia quishacariiri quiniutianiya niaara, jyanohua taraatia. Jiyacaritij, pueyari sequenutaniya: “Socua shuquiriaatia quijiaa cutaraa noo maajipohua cante muetuyashijiani, cante manajeyashijianucuan, mariyata cante mueya supueteyashijianucujanuhuaaj”. Mueyaraca maajipohuari jiyacari jyanohua taraajenutaniya, nojori niquishacari necohua miishacari naquiya. ³⁰ Naquiya miishacari, jiyacaritij, pueyari tuhuananuhua sequenutaniya: “¡Canaacua quia jiyaretaare!” Naajuhuaaj, shiitianiyojua tuhuananuhua sequenutaniyari: “¡Canaacua nia tiyare canaa nia jamonura!” ³¹ Jiyacariiri jyanohua naquiya miishacari quiniutianiya. Quiarijia, janiya jaara naa naquiya miishiyacuaani, ¿taaquitijia Pueyaso tojtiaashijiaa miishaanutaniyatejaj?

³² Caapiqui sesa miijiaaari jaatucunuusaariquiaajuhuaaj, mariyata teetesocoriquiano Jesuta. ³³ Nojoriiri puecoosaqui tuquijiosee. Cuniqiu pueya puecoosaquini, na sesa quiquiaari “Pueyano Nacaco”. Nojoriiri tii Jesu teeteree maca niyacutesanojinia. Cuno caapiqui sesa miijiaaari teetesosaareejuhuaaj, niquiriyatu na miaquetajara, tamonu na muenecara. ³⁴ Jesu jaara tari pijiosaariquiaa maca niyacutesanoocua, nojuajaari na Que Pueyaso sequeree:

—¡Cua Quenaa, quia jiyanoori nio pojori! Majaari nojori niishiniu casaa na miitiyani. Na nuhuaji, soldadohuari saitia tacuarishijioree, nojori niishiniuria taa nojori seraatianutaniya Jesu toqueni. ³⁵ Pueyari Jesu shootiariquiaa. Judiocuaca jiyaniijianucuaari jaarajaaja Jesujiniji naa tama sequetooriquiaajaaja:

—Nojuajaari saaja tamonu pueya naatanijiojua. Quiarijia, nojuaja jaara seetanujuanaa Pueyaso Jiyarosano Cristo quiri, cuaara roseera niyacutesanojiniji pa niquiara.

³⁶ Soldadohuari Jesu macatiriquiaajuhuaaj. Nojoriiri Jesu raateree piiquia vino juucua. ³⁷ Jesu sequetureeri:

—Quiaa jaara Judiocuaca jiyaniijia quiri, ¡niyacutesanojiniji quia roserecarajaj!

³⁸ Jesu nacaacuma, suruhuatuneeri rupotasaquiaari naajiosano Griego rupaajinia, Romano pueya rupaajinia, Hebreo rupaajinianio. Tii naajiotasano quiriquiaari naa nocuara pueya saquiriojotasano: “Nio pueyanoori Judiocuaca jiyaniijia”.

³⁹ Tamonu cuno sesa miijiacajinijinio Jesu shuriucua teetesano quiriquiaani, nojuajaari Jesu rerequeteriquiaajuhuaaj. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserejaaja cuniqiji. ¡Canaa quia roshinijiorejuhuaaj!

⁴⁰ Narta sesa miijiaari na juaarii:

—¿Quiaateeri Pueyaso puereyashijia? Quiaari mosaanutaniyajuhuaaj. ⁴¹ Pajaniya cutaraari sesa pa miiniucua naquiya miishiyani. Paacuajaari maninia saniitioshiyani sesa pa miiniucua. Saniniujia, nio pueyano pa tajinia nujuataani, ¡nojuajaari sesa miyashijia cutara!

⁴² Na nuhuaji, narta sesa miijia juaaniaari Jesu sequeree:

—Jesunaa, majaari cua niyjetanuuja, Pueyaso jaara quia jiyatere Jiyaniijiajanaa quia quiniuria.

⁴³ Jesuuri na riuacuaree:

—Seetanujuanaa quia sequeyanijia, quiarijiani, nio juucaja, quiaari cuata quiniutianiya shuquiriaatia quishaqui cutara.

Jesu cusosacari

(Mt 27.45-56; Mr 15.33-41; Jn 19.28-30)

⁴⁴ Panacari, jiyari ninishiquiria quiquiaari puetunujuanaa, juhua niucua! Pananu piriushacari, cuhuatemohuari. ⁴⁵ Jiya quishacarijia ninishiqui, jiyacaritij, Jerusalén tiacajinia Pueyaso Secojojua tajinia, jiyanoohua shiquiquiaa toquejiniji sohuacaari noojiaacoji suteqiaari puetunujuanaa querajaquera! ⁴⁶ Jiyacarijijuhuaaj, Jesuuri nacaree:

—¡Cua Quenaa, cua sohuana quia cojuare!

Naa na sequenu nuhuajitij, Jesuuri cusoquee.

⁴⁷ Romano soldadohua jiyaniijia niquishacari puetunu niojuanaa, nojuajaari maninia sequeree:

—¡Seetanujuanaa, nio pueyanoqui sesa miyashijia quiquianu!

Naa na sequesanoori Pueyaso shuqiritirii.

⁴⁸ Puetunu pueyajanaa, canapete Jesu shootiariquiaa cusoyanoni, nojoriiri taraatia na tajinia quiojoquiaariuhua. Nojoriiri tama na jiriquiaaja piquiniuuquiaariuhua, jyanohua nojori tacaaniutia naa nojori monucua Jesu. ⁴⁹ Saniniujia, puetunu Jesu

niishishano pueyajanaari tii jiyojetarohuajaa, maajipohuajuhua, canapuete Jesu nuhua-jiquiaari Galilea jiyajinjicuaani. Puetunu nojorijianaari tucuaaanuji niqutiariquiaa Jesu.

Jesu quete niasacari raaco

(Mt 27.57-61; Mr 15.42-47; Jn 19.38-42)

⁵⁰ Tamonu maninia pueyanoori quiquiaari. Nojuajaari Pueyaso tojjia pueyano quiquiaari Arimatea tiacajinjio. Cuno tiacaari Judea jiyajinjiajuhuaj. Cuno pueyano sesa quiquiaari José. Nojuajaari Judiocuaca jiyaniijianucuaajinjio quiquiaari. ⁵¹ Cuno Joseeri Pueyasocua tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuara Jiyaniijia jiyatesaaria cutara. Cunora, majaari José panini quiquiaari cutara, narta jiyaniijianucua sequesacari Jesu cuara mosaari. ⁵² Naacaujiti, Jesu cusosacari, Joseeri Pilatocua quiquiaari, Jesu quete na masenura. ⁵³ Na nuhuaji, Jesu quete roshinirii niyacutesanojinijiri. Na jiuniooreeri cohuajaque quenaarueque toquejinia. Jesu quete niaree tarija na jiuutianishano saajajiniaari. Cuno raajinia, juhanajuaja maja macu niasaanu quiquiaari. ⁵⁴ Cuno juucaari quiquiaari Judiocuaca jeenucuasacari juhuacarija samaatenu juucaacuara. Nojori samaatenu juucaari quera coteeriquiaa tari. Judiocuacuara, pananu tiuquishacari, tamonu juucaari tari coteequiaari nojorria.

⁵⁵ Cuno maajipohua, cante Jesuta nijioquiaari Galilea jiyajinjicuaani, cuno pojoriiri José nuhuajiquiaari raajiniara. Nojoriiri raaco niquishii, taa Jesu quete niasaareeni. ⁵⁶ Nojori riujiuushacariuhua na tiajiniohua, nojoriiri juhuatata shanohua jaanutaja cojitijosuhua, macucua nojori niojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaaricuaani.

24

Jesu samiitiasacariuhua

(Mt 28.1-10; Mr 16.1-8; Jn 20.1-10)

¹ Coteenu semaana juucajinia, cuno maajipohuari tariquicuaji raajiniara quiaquiaari. Nojori cojitijosano shanohua jaanutaja patootaareeri. ² Nojori tiuquijiosacari raajinia, saajajinjia quejasano raa tiotiu niqutiushiiri tariucua tamocora shuucquitishano. ³ Naaratej, nojoriiri raaco tiuquitiamaa. Shaaqui quiriquiaari Jiyaniijia Jesu quete. ⁴ Nojoriiri shiriquirii. Majaari nojori niishiniu quiriquiaa taa nojori miinutianiyani. Canashyaquiji caapiqui pueyari nojori shuriucua nujuatuquee. Nojori toqueeri shacantuque quiriquiaa. ⁵ Maajipohuari na puerenuta jiyocuara naniquieree. Cuno canuuri nojori sequaree:

—¿Casaara nia pajeya saminio pueyano macu niojosaquini? ⁶ Maja tari niya na quiniu. ¿Tari samiitarohuano! ¿Niaateeri tari niyaretaree na sequesano niajaniya, Galilea jiyajinia na quishacarija? ⁷ Nojuajaari tari nia sequecanucuaja, nojuaja sesa miijiaa niqutiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitanutaniuhua jiuujianaraca juucajinia.

⁸ Jiyacaritij, maajipohuari shusha niishiquii tarija Jesu sequesano nojori. ⁹ Nojori tacatesacariuhua jamajinjia, nojoriiri Jesu once saquiriojosano pueya caminiujishuhua puetunu niojuanaa, puetunu Jesuucua tiunuaa pueyajanaano. ¹⁰ Cuno maajipohua, Jesu saquiriojosano pueya pohuataquiaariuhua, nojoriiri nio maajipohua quiquiaari: María Magdalena, Juana, Santiago nucua Maríajuhuaj, socua tamasaca maajipohuanio. ¹¹ Jesu once pueyara, maajipohua pohuatasanoori juhua paateca sequesano quiquiaari saaja. Nojoriiri saa cuarachitirijiaa maajipohua pohuatanuuso.

¹² Naajaa, Pedroori tiajiniji netequiaari raajiniara. Raaco na cuquesacari, saaja Jesu jiuniocotaja cohuajaque toque niquiquiaari maanoori. Pedroori juhua jiuujiaaju tacateyarohua na shiriinquiniutia, na niquishanojiniji, maajipohua pohuatasanojinijio.

Jesu tojtianaa pueya niquishacari Jesu, nojori quiasacari Emaús tiacajiniara

(Mr 16.12-13)

¹³ Cuno domingo juucaja, caapiqui Jesu pueyari Emaús tiacajiniara quiojoriquiaa. Emaús tiacaari querajaa hora quiquiaari Jerusalén tiacajinjia, niouacata quiasacari tirara. ¹⁴ Nojori quiojosacari nucuaco, nojoriiri Jesujinjia pocojoriquiaa, mariyata shusha naataja pueya miishanojiniji Jesu. ¹⁵ Naa nojori pocojosacari nucuacotej, Jesujuanaari jiyacari nojori rupuesee. Juhuaajaniya nojoritia pacutaareeri. ¹⁶ Majaari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. ¹⁷ Jesuuri nojori nequesotaree:

—¿Casa nia pocojotaacuani?

Nojoriiri nujuatuquee. Taraajecoyano niquishaariquiaari.

¹⁸ Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucaaree:

—Puetunu pueyajanaacuajaari niishiya casaate Jerusalén tiacajinia miishaarucuaa taraatiani. Quiaacuajaari Jerusalén tiacajinia quiquianujuhuaj. ¿Quiaatucua casaara niishiyaquirini casaate miishaarucuaani?

¹⁹ Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—iNazaret tiacajinijinio Jesuuri mosaarucuaajaj! Nojuajaari Pueyaso sequesano camini-
ujiunia quiquianu. ¡Jiyanohua maninia quijiaari na cumaacata na miijosano, na niishi-
tiosanojuhuaj! Pueyaso timitiasano quijiaari, puetunu pueya panishanojuanaano.
²⁰ Pueyacuara secोजना jiyaniijnucua, mariyata pa camarucuaari na niqitiorucuaa
Romano jiyaniijia na motesocoriquiano. Niyacutesanojinia mosaarucuaari. ²¹ Canaari
juucua jiyaniquianuni, nojuajaari Romano pueya taanuunutaniya, pa Israel pueya quini-
uria juhuajaniya tama pajaniyajaaja. Quiarijiani, jiuujianaraca juucaari tari na shoconu-
jia na mosaanujiniji. ²² Tamasaca maajipohua canaa maanujinijinoori canaa shiiree
nojori pohuatasanta. Nojoriiri quiarijia tariquicuaji quiojomaa Jesu raajinia. ²³ Nojoriiri
maja na riuriatanu quishii na quete. Nojori tacatesacariuhua, nojoriiri canaa pohuata-
suhua, nojorinia Pueyaso seya niqirii juhua na maquenujinia. ¡Cuno Pueyaso seyanaari
nojori sequeree, Jesu tari samiitarohua! ²⁴ Na nuhuaji, tamasa canaajinijinoori
raajinia quiojyareejuhua. Seetanujanaa naa quiriqiaari, taa maajipohua sequeree
canaacuajani. Maja cutaraari nojori niqiniu quirii Jesu.

²⁵ Jiyacaritij, Jesuuri nojori sequeree:

—Pueyanaa, majaquiri juhuanojuaja nia niishiniu. Niaari taacanuyajaa puetunu
tariucuaanu Pueyaso sequesano caminiujiunia naajiotasanoocujanaa nia tiuuniuria.
²⁶ ¿Majateeri naa na pohuatasaanu quiquiaaricuaa: “Cristoori coteenu naa mosaanu-
taniyaquij. Na nuhuaji cutara, jiyanoohua cumaacaracara quijiaari jiyatesaanutanihuari
Jiyaniijiajanaa na quiniuria”?

²⁷ Jesuuri juhuacatecara nojori niishitiojoree puetunu tariucuaanu Pueyaso Rupa-
ajinijijianaa, tee nojuajiniji naajiotasano quiyacuajani. Moisés naajiotasanojiniji pohu-
atanu coteereeri, na nuhuaji, puetunu Pueyaso sequesano caminiujiunia naajiotasano-
jinijijianaano.

²⁸ Nojori tiuquishacari cuno tiacajinia, terara nojori quiojoriqiaacuajani, Jesuuri juhua
shocoriquiano canujiriquiaa. ²⁹ Nojoriiri nojoritia na jiyojetenu paniriquiaa jiyanoohua.
Nojoriiri na sequeree:

—iNiyaja canaata quia jiyojere! Paa tari niniyareeni.

Naaratej, Jesuuri nojoritia jiyojese cuniqui. ³⁰ Jesu jaara nojoritia cajiriquiaa tari mi-
aquejajinia, nojuajaari pan ririi. Nocuara Pueyaso secorejere. Nojoriria na neecasereeri.
Na nuhuaji, nojori serotareeri. ³¹ Jiyacaritij, nojori namijaari juhua riateguequee. Jiy-
acariqui na niishitiquiri. Jesuuri saaja shaajeequee cuniquijia nojori tajiniji. ³² Nojoriiri
sequeetooree:

—¡Jesucuaajiquiri quiriqiaa! ¡Cunora poojiaqui jiyamitia timiriquiaa na pocojosacari
pajaniyata nucuamaji, nojuaja jaara niishitiojoriqiaa pajaniya Pueyaso Rupaajinia naa-
jiotasantej!

³³ Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén
tiacajinaria tacaretarohuari. Nojori tiuquishacariuhua, nojoriiri puetunu Jesu once
saquiriojosano pueyajanaa riuriatasuhua tii tariucua rerejono, mariyata socua narta Jesu
pueyata. ³⁴ Tariucua tiajinia quiniaari Emaús tiacajiniji tiuquijionaa sequeree:

—¡Pa Jiyaniijiaqui seetanujanaa samiitarohua! ¡Simónri na niqirii!

³⁵ Na nuhuaji, shusha tiuquijionaari nojori pohuatareejuhuaj, taa Jesu pocojoriqiaa
nojoritiani, nucuaco nojori quiasacari, mariyata taa nojori niishirii nojuajani, pan na
neecasacari nojoriria.

Jesu muetasacariuhua na saquiriojosano pueyacua
(Mt 28.16-20; Mr 16.14-18; Jn 20.19-23)

³⁶ Nojori pocojosacarijia nojori niquishanojiniji Jesu, jiyacaritij, Jesujuanaari
canashiyaquiji nojori tajinia nujaaquee. Naa nojori sequereeri:

—¿Niaate quiyajaa? Nioojia nia cajitiri.

³⁷ Nojoriiri shiriqitiqui. Jiyanoohua puereturiqiaari. Nojoriiri Jesu jyaniriquiaa
naaqui. ³⁸ Jesuuri nojori sequeree:

—¿Casaara nia pueretiuyani? ¿Casaara nia jiyajenetaa janiyani? ³⁹ Cua juaashiquia nia niqiri, cua niohuacanio, nia niishiniuria janiyacuaajaari quiyani. ¡Cua cootiuri! ¡Cua niq-uitiuri! Naaquiiri maja cuaqueyaraca, maja nucuhuaraca taa nia niqiya janiyacujani.

⁴⁰ Naa nojori na sequesacaritij, Jesuuri nojori niqitijioree na juaashiquia, na niohuacanio. ⁴¹ Puera nojori jiuujiatesacari, puera nojori shuquirishacarijiuhuj, nojoriiri taacanuuriquiaajaa, maja naasucua Jesu. Cunora, Jesuuri nojori sequere:

—¿Niaate miaquesocoriquiano jiitiaacuaa?

⁴² Nojoriiri Jesu niqitioree sapitiaaja raqui caquishano. ⁴³ Jesuuri na maseree. Nojori niqiara na miaquereeri. ⁴⁴ Na nuhuaji, nojori sequereeri:

—Janiyari naa miishaarucuaani taa cua pohuataquiaari nijaniyacujani, pueyara-caanu niaata cua quishacari tarijia. Nia sequequiaaricujajinjia, janiyari naa miishaanu-taniyani, taa Moisés naajiotaquiaari janiyajinjicujani. Puetunu Pueyaso sequesano caminiujuniaajanaari janiyajinjijaa naajionuutaquiaarijiuhuj. Supuetana Davidri janiyajinjijaa naajiotaquiaarijiuhua na jaaquequejoneejinia. Quiarijia tari tohuateerucuaari puetunu janiyajinjijaa cuno naajionuutasanojuanaa.

⁴⁵ Jiyacaritij, Jesuuri nojori niishitirii tariucuaaanu Pueyaso Rupaa naajiotasano. ⁴⁶ Nojori sequereeri:

—Tariucuaaanu naa naajiotasanoori quiya: “Pueyaso Jiyarosocoriquianoori mosaariquiano, na nuhuaji, jiuujianaraca juucajinia samiitianutaniuhuuri”. ⁴⁷ Naa naajiotasaaquiaarijiuhuj, Jerusalén tiacajinia, janiyajinjijiri pohuataaanutaniya pueya niqiara, na nuhuaji puetunu jiyacajiniajanaanio. Pueya tiuushacari cucua, nojori jaara noojiaca tacatorohua sesa nojori miiniuujinjijaa, sesa nojori miishanoori tuujusaanutaniya, Pueyaso jiyanooshacari nojori. ⁴⁸ Niaacuaajaari puetunu cua miishanojuanaa niqijijaa. ⁴⁹ Cua tojitiare. Janiya jaara jiyocuaaanu quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricujani. Niyaja pootia nia qiri Jerusalén tiacajiniani, niaa jaara jiyocuaaanuji niriquiano cumaaca maserejaatijia.

*Jiyocuaaanu Jesu tacasacariuhua
(Mr 16.19-20)*

⁵⁰ Na nuhuaji, Jesuuri nojori jiyataquiaari Jerusalén tiacajinjijaa, Betania tiacajiniara. Cuniqi nojori quishacarijia, Jesuuri na juaashiquia shiitioquiaari nojoriicuara na secijosacari Pueyaso, Pueyaso jiitianura maninia pueyaracaanu nojori. ⁵¹ Nojoriicuara na secijosacarijia, Jesuuri nojori shuriucujaa tacanishaaquiaari jiyocuaaanu. ⁵² Nojoriiri na shuqiritiaree. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanohua shuquiriaatia quiriqiaa. ⁵³ Nojoriiri pueyaracaanu quijia Pueyaso Secojua tijajinia. Tii Pueyaso maniniuhuaqueetatujaa pueyaracaanuuri. Tariucujaa.

JUAN NAAJOTASANO JESUCRISTOJINIJI

Pueyaso Rupaa jatasacari pueyanora

¹ Paari Jesucristojiniiji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijijaariuhua. ² Jiya coteesacari, nojuajaari na Que Pueyasota quiriqiaa. ³ Na Queeri na shipinitiquiaari puetunu casaajanaa. Puetunu casaajanaari na shipinishano. Maja tamonu shipininia quiniu socua. ⁴ Nojuajaari quijiajuhanajaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniuriajuhuaj. ⁵ Jesucristoori cuhuashiqui quijia. Naaratej, na rupaata poojia cuhuataari. Saniniuujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. ⁶ Pueyasoori quari naataja tamonu pueyano jiyaroquiaari. Neyanujiniiji pohuatariquiano. Na sesa quiquiaari Tiuquinijiona Juan. ⁷ Pueyasoori na jiyaroquiaari pueya na niishitiniuria cante Jesucristoni, pueya tiuuniuria Jesuucua, nojori jiuujia na cuhuatanura. ⁸ Juanri maja pueya jiuujia cuhuatana. Nojuajaari Jesucristojiniiji pohuataquiaari pueya niishiniuria cante saniya poojia cuhuatana cutarani. ⁹ “Pueyaso Rupaari” seetanu poojia cuhuatanajanaa. Nojuajaari Jesucristo. Jiyocua niquiaariiri puetunu pueyajanaa niishiniuria cante Pueyasoni.

¹⁰ “Pueyaso Rupaari” mijiria rucanejojua quiquiaari. Pueyari tama nojori Shipinijaja niishiyaquiquiaari. ¹¹ Tama na saquiriojosano Israel pueyacua niquiaariiri. Nojoriiri na tamacaquiaari saaja. ¹² Saaja noojiaqueya pueyari nocua tiuquiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. ¹³ Nojoriiri Pueyaso jatanishano, seetanujanaa na muerasu nojori quiniuria. Pueyaso saquiriojosano pueyajiniiji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata tamona muetunu tariucua Pueyaso pueya. Naajujuhuaj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiuushacari saaja.

¹⁴ “Pueyaso Rupaari” seetanujanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumaacata na miijiosano niquiquiaariiri. Jiyanoohua maninia quiquiaariiri. Na Que Pueyasoori na cumaquijia jiyanoohua maninia na miiniuria, Neyanuniyojua na quishacari. Nojuajaari saaja seetanu rupaajanaa sequeja Pueyasojiniji. Jiyanoojia quijiaari. ¹⁵ Tiuquinijiona Juanri Jesucristojiniiji pohuataquiaari pueya niquiara. Jiyanoohua na rupaa paaretaquiaariiri pueya tojtianura nojuaja. Naa sequejaari:

—Janiyacuaajari nojuajiniiji nia pohuatajani, janiya jaara nia sequejani: “Tamonu pueyano cua nuhuaji niiniutianiya”. Nojuajaari jiyaniijiajanaa cutara janiyajiniiji. Nojuajaari tari quijia cua quiyaquishacarijia.

Juanri naa pohuataquiaari Jesucristojiniiji.

¹⁶ Jiyaniijiajanaa Jesucristo quiniuucua, puetunu pajaniyajanaari na jiiitasanojiniji masequiaani. Jiyanoohua capora na quiniuucua, nojuajaari pueyaracaanu pa cumaquiquiaa. ¹⁷ Pueyasoori supuetana Moisés naajitequiaari na rootasano pajaniyara. Cunoori maja na cumaquiniu quiquiaari pajaniya. Quiarijia saniniuujia, pa panijia Pueyaso quiniuucua, nojuajaari Neyanujanaa jiyaroquiaari pocua, pa jiyanooshaanura, naajujuhuaj, seetanu rupaajanaa pa niishiniuria nojuajiniiji. ¹⁸ Majaari quenaaja tamonu pueyano niquiniu quijia Pueyaso. Neyanu, cante na Que shuriucua quijiacuajani, nojuajaari na Que pa niishitioquiaari.

Tiuquinijiona Juan pohuatasano Jesucristojiniiji

(Mt 3.11-12; Mr 1.7-8; Lc 3.15-17)

¹⁹ Jerusalén tiacajiniijinio canaa Judiocuaca camarucuaari na pueya jiyaramiquiquiaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví niquiohuacuajinio supueno pueya. Noojiaqueya cuno pojorijiniijinoori quiquiaarijuhua pueyacuara secojonaa pueya. ²⁰ Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujanaa naa nojori sequequiaariiri:

—Janiyari maja Pueyaso Jiyarosano Cristoni.

²¹ Cuno pueyari socua na nequesotarohua:

—¿Canteeri quiajaniyani? ¿Quiaa jiyoteeri Pueyaso sequesano caminiujunia Elías soj? ¿Quiaa jiyoteeri samiitarohuacuaa?

Tiuquinijiona Juanri saaja nojori riucaaree:

—Maja. Janiya maja supuetana Elíasni.

Cuno pueyari socua na nequesotaroahuacuahuaj:

—¿Quiaa jiyoteeri Pueyaso sequesano caminiujunía, nooj tariucuaaanu sequesaaquiaari niriqiuantej?

Juanri saaja nojori riucaaree:

—Maja.

²² Cuno pueyari socua na sequereee:

—Canaa quia pohuatateja, ¿cante quiajaniani? Canaacua saniniuujia canaa camarucua pohuatasuhanijia.

²³ Juanri saaja naa nojori riucaaree:

—Janiyacuajaari nooni, cariiquia jiyajinia nacajatej, taa supuetana Isaiás juhuacarijia naajiotaquiaari janiyajinjicuaajani: “¡Jiyaniijiaacuaji nia nuunore maninia! ¡Maja shuutiuniu!”

²⁴ Jiyacaritij, Fariseocuaca camarucua jiyaramiquishano pueyari Tiuquinijiona Juan nequesotaree:

²⁵ —Quiaa jaara quiyacuri Cristo, Elíasjuhuaj, cuno tariucuaaanu sequesaaquiaari niriqiuano Pueyaso sequenu panishano caminiujuniatej, ¿casaara pueya quia tiuquinijia moojiniaacuaraarini?

²⁶ Juanri nojori riucaaree:

—Janiyari nareja moojinia tiuquinijia pueyani. Saniniuujia, tamonuuri niya quia, nia niishiyacquishoojua. ²⁷ Nojuajaari cua nuhuaji niniutianiya. Nojuajaari Jiyaniijijanaa cutara. Majaari quenaaja cua naata na seru quiniu na sapatu neyocua cua saacatanura nera.

²⁸ Naa cuno pojori nequesoreesacari Tiuquinijiona Juantej, cunoori quiriquia Betania jiyanihano tiacajinia, Jordán moo taquijiria, tee cuniqui Juan tiuquinijioriquiaa moojinia pueyacuajani.

Jesu juhua Pueyaso borregoniyojua pocuara mosaariquiano

²⁹ Tariqui saniniuujia, Tiuquinijiona Juanri Jesu niquirri nocua niyano. Juanri naa sequereee canaa niquiara:

—Paari pueyaracaanu mooquia borregohanu Pueyaso jiyanooniuria pajaniya. ¡Nia niquirri! ¡Cuno cumaji canujiani, cunoori Pueyaso Jiyarosano, juhua borrego puetunu pueyacuara mosocoriquiano, seetanujanaa sesa pa miishanojiniji pa jiyanooshaanura!

³⁰ Janiyacuajaari nojuajiniji nia pohuatajani janiya jaara nia sequejani: “Cua nuhuaji niniutianiyari Jiyaniijijanaa cutara. Nojuajaari tari rishijia cucuaji cua quiyacquishacarjia”. ³¹ Janiyari na niishiyacquijiajuhuaj, cante nojuajani. Naajaa, janiyari parta Israel pueya tiuquinijioquiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

³² Tiuquinijiona Juanri pueya sequereejuhuj:

—Janiyari Pueyaso Sohuanu niquiriucuaani jiyocuaaanuji roseyano nocua juhua mococoonu. Nocua tiuushiiri. ³³ Cuno, cua jiyaroquiaari pueya cua tiuquinijionura moojiniani, nojuajaari cua sequequiaari: “Quiaa jaara cua Sohuanu niquiri pueyanoocua roseyano, nocua na tiuuniuria, quiocua niishiri, cunocuajaari cua sequesano quiajaniani. Nojuajaari cua Sohuanu tiuquinijionutianiya pueya jiuujajinia cutara, seetanujanaa cua muerasu nojori quiniuria”. Nojuaja jaara naa cua sequeyacquiaari, janiya maara na niishiyacquianuni. ³⁴ Janiyacuajaari tari na niquiquianuni. Naaratej, janiyari saniniuujia nia pohuataani pueyanaa, ¡nojuajaari seetanujanaa Cristo, Pueyaso Niyanu!

Coteenujanaa Jesu pueyajiniji pohuatasano

³⁵ Tariqui, Tiuquinijiona Juanri tii quishiquihua caapiqui na pueyata. Janiyari niquiriyatu cuno caapiqui pueyanojinijinio quiriquiaani. ³⁶ Tiuquinijiona Juan jaara Jesu niquiquiaari shocoyano, jiyacari canaa sequereeri:

—¡Nia niquirri! Cunoori cua sequesano nijaniya, Pueyaso Jiyarosano pocuara mosocoriquiano juhua borrego, sesa poojia sequejeequesaanura.

³⁷ Naa canaa tojishacari Juan sequesantej, canaari Jesu nuhuajiquiaarini. ³⁸ Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Casa nia panianiani?

Canaari na sequereeni:

—Niishitiojonanaa, ¿tee quia maquequiaacuani?

³⁹ Jesuuri canaa riucaaree:

—Miji. Nia niquiquii.

Canaari nata quiaareeni. Canaari na quijia niqutiushiini. Tari pananu piriuushacariiri quiriqiaa jiyacari. Cunora, canaari tii maquetusee Jesutani.

⁴⁰ Tiuquinijona Juan niqutiniucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jiitiaja. Na sesaari quijia Simón Pedro. ⁴¹ Tariquicuaji, Andrésri ritia tarajanu Simón pajenuucua quiaquiaari. Na riuriasacari, na sequereeri:

—¡Cua tarajanunaa, canaari Cristo niquiriquiacuaani, tariucuaaanu Pueyaso sequesano na jiyarocoriquianotej!

⁴² Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacuaajaari Simón, Juan niyanu. Quiarijia saniniuujia, quia sesaari quiniutianiya Cefas.

Griego rupaajinia, niiori sequeya Pedro. Pedroori saniniuujia pueyano rupaajinia sequeya “Saajia”.

Jesu saquiriojosacari Felipe, Natanaelno

⁴³ Tariqui, Jesuuri Galilea jiyajiniara quiariquiaa. Felipe riuriatamaari. Na sequereeri:

—Cua tarajare cua pueyano quia quiniuria.

⁴⁴ Felipeeri nata quiaaree. Nojuajaari Betsaida tiacajinijinio quiquiaari. Andrésri tarajanu Pedrota cuno tiacajinijinio quiquiaarijuhuaj. ⁴⁵ Na nuhuaji, Felipeeri Natanael pajeree. Na riuriasacari, na sequereeri:

—¡Canaa noo pueyano niquiriini, Moisés nojuajiniji naajiotaquiaari tariucuaaanutej! Tariucuaaanu Pueyaso sequesano caminiujunaa pueyari nojuajiniji naajionuutaquiaarijuhuaj. ¡Nojuajaari Nazaret tiacajinijinio Jesu, José niyanu!

⁴⁶ Natanaelri saa riucaareejaa:

—¡Jaj! ¿Na naatate maninia miijia pueyano supenujuuara cuno sesa miijia Nazaret tiacajiniji?

Felipeeri na sequere saaja:

—¡Miji! ¡Pa niquishii!

⁴⁷ Jesuuri Natanael niquirii nocua niyano. Na sequereeri:

—Nio pueyanoori seetanu pa supuetana Israel niquiohuacujinio supenujuanaa cutara. Majaari na niishiniu sapojonu.

⁴⁸ Natanaelri na sequereeri:

—¿Taa quia niishiya janiyarini?

Jesuuri na riucaaree:

—Felipe sequeyaquishacarijia quiajaniya cucua quia niniuria, janiyari tari quia niquirii coojiatani, higo naana pajama tateyano.

⁴⁹ Natanaelri shiriquirii. Jesu sequereeri:

—Niishitiojonanaa, ¡quiaacuaajaqui Pueyaso Niyanu! ¡Quiaari parta Israel pueya jiyani-ijiaranojuhuaj!

⁵⁰ Jesuuri na sequereeri:

—¿Quiaateeri cucua tiuuquii shusha saaja cua sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua miijiosano niquiniutianiya cutara.

⁵¹ Jesuuri cuniqui quiniaa pueya sequereejuhuaj:

—Seetanujuanaa nia sequeyanijia, niaari jiya cajiniocua niquiniutianiya riateno. Pueyano cua quishacari, niaari Pueyaso seya niquiniutianiya cucua roseetaano, cucuaji taqueetaanojuhuaj.

2

Jesu jatanishacari mohuaca vinora, pueyano camishacari

¹ Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masusano pueyari queranacuriquiaa. Jesu nucuaari tii quiriqiaajuhuaj. ² Jesuuri na saquiriojosano pueyata masuusaquiaarijuhuaj, camishacari queranacunura. Janiyari na saquiriojosano pueyano quiriqiaa jiyacari tarijuhuaj. ³ Jiyacaritij, mashacaari ritia puequema. Na nucuaari Jesu sequereeri:

—Sanaa, mashaca tari puequema.

Mashacaari quiquiaari uva caaca, vinotuhuaj. ⁴ Jesuuri na nucua riucaaree saaja:

—Maajiniaa, ¿casara quia sequeya janiyani? Juhuanajuaja maja cua poonijosacari Pueyaso cumaacata.

⁵ Na nucuaari pueya raatojonaa sequereeri:

—¡Niocua Jesu tojirijia! Jaara nia sequere, niocua puetunu na sequesanojuanaa miiri.

⁶ Tii cajituriquiaari seis conatu, saajiajiniji quejasano. Canaa Judiocuacaari sequeyaru-cua shuquirioojua tiajinia nojori tiuquishacariuhua, juhua jeequesano nojori quiniuria Pueyaso niquiara. Nojori mohuaca cajitiacojua quiquiaariiri cuno conaa. Jiyanohua puereetucocua quijiaari. Cuno conatuuri setenta tumococua mishaja mohuacata mishin- ishano quijia. ⁷ Jesuuri pueya raatojonaa sequere:

—Mohuaca nia taquirioore. Niocua nio conaa mishinijiore.

Pueya raatojonaari conaa mishinijioree. Mohuacaari conaa rupaacuma puecacosee.

⁸ Jesuuri nojori sequere:

—Quiarrijiani, tiji nia shuuri. Queranacunu camaru nia sanitiore coteenu.

Raatojonaari na raatesee. ⁹ Queranacunu camaruuri vinora jatano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaaree vinora. Saaja pueya raatojonaa cutaraari na niishiriqiaa. Nojoricuajaari mohuaca mishini- jioree cuno conaajinia. Queranacunu camaru saniniu nuhuaji cuno ratusano, camiyano pueyano piiriiri. ¹⁰ Na sequereeri:

—Pueyaruhuatijia coteenu raateja shocuanacu vinote. Puetunu masuusano pueya jaara tari raruure queraatia, na nuhuaji raatesano cutaraari shaarunacu vino. ¡Quiarjia saniniuuja, nio cua ratusanoni, cunoori socua maniniuniacu vino coteenu quia raatojote- sanojiniji!

¹¹ Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojuajaari naa niqitiquiaari Pueyasojiniji na cumaaca. Naacuajitij, canaa na saquiriojosano pueyani, canaari ni- ishiquiaarini Jesuuri seetanujuanaa Pueyaso Jiyarosano.

¹² Na nuhuaji, Jesuuri Capernaum tiacajinia quiaaree na nucuata, tapueyocucata- juhuaj, canaa na saquiriojosano pueyano. Canaari tii camueenujuquiaari pasajani.

Jesu jaacasacari seya niqutiojonaa Pueyaso Secojojua tiajiniji

(Mt 21.12-13; Mr 11.15-18; Lc 19.45-46)

¹³ Quera canaa Judiocuaca queranacacari Pascua juucara Jerusalén tiacajinia, Je- suuri tii canaa jiyataareejuhuj. ¹⁴ Na tiuquishacari, Pueyaso Secojojua tiajinia quia- maari. Tii niquishii pueyari juyaca niqutiojijano Pueyasocucara puecosocoriquiano, borregohua, noseyanio. Pueyari tii na juhuacutucujinia cajituriquiaajuhuj, pueya na tacatojonura taucuaa cumaneeca, Pueyaso Secojojua tiajinia niqutiojosocoriquiano cumaneecara. ¹⁵ Naa na niquishacari pueya miyano Pueyaso Secojojua tiajiniatej, Jesuuri seya morojotaja jiyocua taticuaree. Na majacutajara na shitiareeri. Cunota, puetunu nojorijanaa jacaree Pueyaso Secojojua tiajinijiri, puetunu nojori borregohuatjanaa, mariyata puetunu nojori juyacatajanaa. Cumaneeca rerecojoree jiyocua juhuacutu- cuajinijiri. Naajuhuj, cumaneeca juhuacutucua caponeetareeri. Pojotaariquiaacuari.

¹⁶ Noseya niqutiojonaa pueya sequereeri:

—¡Niiquiji nia patootare nio noseya! ¿Casaara nia jiyatecanu juhua casami niqutio- josaquiria cua Que tiani?

¹⁷ Jiyacaritij, canaa, Jesu saquiriojosano pueyani, canaari niishiquiini, seetanujuanaa tariucuaaanu Pueyaso Rupaajinia naa naajiotasanoori quiya:

“Quia tiaacua juaatishaaree jiyanojuanijia, jiyanohua cua panishacari quia tia”.

¹⁸ Naa Jesu miiniucuatej, narta Judiocuaca camarucuaari Jesu nequesotaree:

—¿Cante quia sequerucuaa naa quia miiniuriani? ¡Canaa quia niqitiricuaraja Pueyaso cumaacata quia miishano, canaa niishiniuria quiaari seetanujuanaa Pueyaso Jiyarosano!

¹⁹ Jesuuri nojori riuuaree miriqui:

—Pueyaso tia nia niyartare, janiyacua saaja jiuujianaraca juucajinia na tucuatrohua tianu tamajaajani.

²⁰ Narta Judiocuaca camarucuaari na riuuaree:

—¡Cuarenta y seis marijaari shoconujuquiaari pueya tucuatnura nio secojojua tia! ¿Quiaateeri jiyaniya quia naata na tianuhua ritia, saaja jiuujianaraca juucajinia? ¡Maja quia naata!

²¹ Jesuuri tama na cuaqueyajaaja pohuatariquiaa, Pueyaso tia na sequesacari.

²² Naacuajitij, Jesu jaara samitiaquiaariuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuaaanu Pueyaso Rupaajinia naajiotasanoocua tiuqujaarini, Jesu sequesanoocuanio.

Jesu puetunu jiuujia niishijajanaa cutara

²³ Canaari ocho juuca camueenujuquiaari Jesuta Jerusalén tiacajiniani, Pascuaa quer- anacunuusacari. Tii canaa quishacari, tii quiniaa pueyari Jesu cumaacata na mijiosano niqiquiaari. Naaratej, queraatia pueyari nocua tiuququiaari. ²⁴ Naajaa, majaari Jesu tiuuni quiriqiaa seetanujuanaa nojoricua. Nojuajaari nojori niishiriqiaa, taamueca

pueyate nojorini. ²⁵ Tamonu pahuataaquishacarijia nojuaja, nojuajaari tari niishiya taamueca jiuujiaracate pueyani.

3

Nicodemo pocoojosacari Jesuta

¹ Niucua, tamonu pueyanoori niquiaari Jesuucua. Na sesa quiquiaari Nicodemo. Nojuajaari canaa Judiocuaca camarucujinijinio quijia, Fariseocuaca maanujinijinojuhujaj. Tojishano pueyano. ² Jesuucua na tiuquishacari, naa na sequeeseeri:

—Niishitiojonanaa, quia cumaacata quia miiniuucua canaa niiquiara, canaari cunora niishiyani quiaari Pueyaso jiyarosano, canaa niishitiojoriquiano. Seetanujuanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatani-jionu taa quia miiquiaacuaani.

³ Jesuuri Nicodemo sequeeree:

—Seetanujuanaa quia sequeyanijia, pueyano jaara juhua conaaja raaquishaarohua, majaari na naata Pueyaso pueyanora na quiniu, Pueyaso jiitianura nojuaja.

⁴ Nicodemoori Jesu nequesotaree:

—¿Pueyanotucua taa rasaarohuani, nojuaja jaara tari cumantumaca quiya? Majaari na naata na nucua saracajinia tiuquiniuhua na rasaanuhua.

⁵ Jesuuri na riuuaree:

—Seetanujuanaari cua sequesano. Cua tojiri. Paari coteenu rasaanuquiaari pueyano pa quiniuriani. Saniniuujia, cante quiarinio pueyanora jataniyaquishano Pueyaso Sohuanu-tani, nojuajaari maja Pueyaso jiitiasanoniyojua na quiniu quiniutianiya. ⁶ Mijiria pueya muetusanoori saaja pueyano. Saniniuujia, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano.

⁷ Naaratej, majaari quia shiriquiniu puera, naa cua sequenuucua quiajanigatej, quiaa cuara rasuhua, seetanujuanaa quiarinio pueyano quia quiniuria. ⁸ Mijiria, paratuuri piyarojoquiaa taa na paniyacuajani. Paari nareja na cojuatunenu tojiquiaani. Majaari pa niishiniu teje na piyarojiyani, tee cunocora na quiaaaniuhujaj. Naajaariuhujaj, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

⁹ Nicodemoori Jesu nequesotaruahuaj:

—¿Pueyanotucua taa quiarinio pueyanora jatanishaarejarani?

¹⁰ Jesuuri na riuuaree:

—¿Majateeri quia niishiniu cua sequesano quiajaninya? Quiaari Pueyaso Rupaa niishitiojonacuaja Israel pueyara. ¹¹ Canaari seetanujuanaa pahuataquiaa canaa niishishanoni, canaa niquishanojuhujaj. Niaari saniniuujia saaja na cuaracashitiquiaa, canaa pahuatasacari nijajaniya seetanu rupaaajanaa. ¹² Naa jaara saaja cuaracashitiquiaa cua pahuatasano mijiria casaajinjij, ¿niaatucua taa niishiriquiani, janiya jaara nia pahuatare jiyocuacaanuji casaani? ¹³ Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tijinio roseno cutara. Nojuacuajaari janiya. ¹⁴ Cariiquia jiyajinia pa supuetanaa Israel pueya rucuanijosacari, Moisésri na shipinishano soconu nujuaretaquiaari macaacua, soconu sasuhua niquishocoriquiano. Na niquiniaa pueyari naatacoquiaariuhua. Naajuhujaj, janiyari macaacua nujuaretasocoriquianoni. ¹⁵ Naacuajitij, puetunu cucua tiunnaajanaari pueyaracaanu quijiaa quiniutianiya.

Pueyasoori puetunu mijiria quiniaa pueyajanaa panijia

¹⁶ Jiyanohua cua Que Pueyaso paniniuucua puetunu mijiria quiniaa pueyajanaa, nojuajaari Neyanujuanaa jiyaroquiaari puetunu pueyapueecuarajanaa mosocoriquiano. Puetunu cucua tiunnaa pueyajanaari saniitioyaquishaanutaniya cutara. Nojori cutaraari pueyaracaanu rishijiaa quiniutianiya Pueyaso shuriucua. ¹⁷ Pueyasoori maja na jiyaronu quiquiaari janiya pueya cua saniitionura. Seetanujuanaa cua jiyaroquiaari cutaraari pueyacuajaj Tacuna cua quiniuria.

¹⁸ Cante cucua tiuujiani, majaari na saniitiosaanu quiniutianiya. Saniniuujia, cante cucua tiuyashijiani, nojuajaari tari pueyaracaanu saniitiosocoriquiano jiyatesano quiya. ¹⁹ Janiyari mijiria niquiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniuucua. Sesa mijiaa nojori quini-uucua, majaari nojori paniniu cuhuatasano nojori quiniuria. Naaratej, nojori saniitiosaanutaniya. ²⁰ Puetunu sesa mijiacajanaari cua niquinu paniyashijia, pueya jiuujia cuhuatana cua quishacari. Majaari nojori ninu paniniu cucua, sesa nojori miishano mariqui niishishaareeri. ²¹ Saniniuujia, cante maninia miiquiaani taa Pueyaso sequeya

na Rupaajiniacuajani, nojoriiri cuhuashiqui quiniu panijiaca cutara. Nojoriiri cucua nijioquiaa na niishishaanura nojori miishano cutaraari puetunu maniniajanaa, taa Pueyaso panyacuajani.

Tiuquinijiona Juan pahuatasacari socua Jesujiniji

²² Na nuhuaji, Jesuuri quiojoquiaari canaata Judea jiyajinia, canaa na saquiriojosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. ²³ Tiuquinijiona Juanri jiyacari pueya tiuquinijioriquiaajuhua Enón tiacajinia, Salim tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaarijihuaj tiuquinijosano nojori quiniuria. ²⁴ Juanri jiyacari nujuatejojuajinia nujuatesoo quiriquiaajaa.

²⁵ Cuno quishacari, Tiuquinijiona Juan pueyari tamonu narta Judio pueyanota pocojoriquiaa taate pueya naata juhua jeequesano quiniu Pueyaso niquiarani. ²⁶ Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pahuatacanutej, noo quiata quiquianu Jordán moo taquijiriatej, nojuajana pueya tiuquinijiyajuhua. Puetunu pueyajanaana nocua quiojiya tiuquinijosano nojori quiniuria.

²⁷ Tiuquinijiona Juanri nojori riucaaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora. ²⁸ Niajaniryacuajari cua tojiquianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiarini”. ²⁹ Pueyano rupüena jaara camiya necocua, quiarjia cutara necocuaari seetanujuanaa saaja nerano. Naajaa, na rupüena quishacari na shuriucua, na timitiaari na tojishacari necota pocojiyano shuquiriaatia. Naajuhua, janiyari cunora shuquiriaatia quiarjia quiyani pueya rupuesacari Jesucristo. ³⁰ Janiyari cunora jiyarosaaquiaricuajani, pueya cua tojitiniuria nojuaja. Naaratej, pueya cuuara carτερα janiya, Cristoocua nojori pacunura saniniuuja, nojori tojiinuria nojuaja. ³¹ Cante jiyocuaaanuji niqiaaricuajani, nojuajaari Jiyaniijajanaa cutara. Janiyari saaja mijiria quiniiani. Cunora, cua pahuatasanoori saaja mijiria cua tojishano. Jesucristo saniniuuja, nojuajaari jiyocuaaanuji ninio cutara. Nojuajaari Jiyaniijajanaa. ³² Naacuajitij, na pahuatasanoori tama na niqiuishanojuaja jiyocuaaanu, na tojishanonio. Pueyari na pahuatasano cuaracashitiquiaa saaja. ³³ Canapüete Jesucristo pahuatasanoocua tiuujiacani, nojoriiri sequeya, seetanujuanaaqui Pueyaso sequesano Neyanujiniji. ³⁴ Pueyasoori jiyanojua queraatia na Sohuanu niqitioquiaari na jiyarosano. Naacuajitij, seetanu Pueyaso rupaajanaa pahuataari. ³⁵ Pueyasoori jiyanojua panijia Neyanu. Naaratej, nojuajaari na jiyatequiaari puetunu casaa jiiitanarajanaa na quiniuria. ³⁶ Canapüete Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuuja, canapüete Neyanuucua tiuyashijiacani, nojoriiri tariucua Pueyaso juaashano quiya. Nojoriiri sanitiosaanutaniya Pueyasooju nojori quiniuria pueyaracaanu.

4

Jesu pocojosacari Samaria jiyajinijinio maajitia

¹ Fariseocuacaari pahuatasaaquiaari, jiyanojua queraatia pueya Jesuucua quiojiya na tojitianaa nojori quiniuria. Nojoriiri pahuatasaaquiarjihuaj, Jesuuri socua queraatia pueya tiuquinijia Tiuquinijiona Juanjiniji. ² Seetanujuanaa majaari Jesujuanaa tiuquinijionu quiriquiaa pueya. Saaja canaa cutaraari pueya tiuquinijioriquiaani. ³ Jesu jaara niishiquiaari Fariseocuaca naa pahuatasaarucuaa nojuajinijitij, nojuajaari Judea jiyajiniji jiyacuquiarjihuua canaa Galilea jiyajiniara.

⁴ Canaa quiasacari nucaaco, canaari Samaria jiyacuma tajiriquiano quiriquiaani. ⁵ Naa canaa quiasacari nucaacotej, canaari Sicar tiacajinia tiuquishiini, Samaria jiyajinia. Cuniqijij, cateca quiriquiaari supuetana José cuhuarigua, na que Jacobo niqitiosano nojuaja. ⁶ Cuno cuhuariquajinia quiriquiaari cuari, supuetana Jacobo jiuutiasano tariucuaaanu. Pueyaracaanu Jesu rucuanenuucua nucaamaji, nojuajaari cuno cuari shuriucua cajishii na samareenuta. Panacariiri quiriquiaa. ⁷⁻⁸ Jiyacaritij, canaari tiacajinia quiamaanu canaa miaquesocoriguiano canaa masenura casaa. Canaa niyacari, cuno Samaria tiacajinijinio maajiiri cuarimia quiaquiaari mohuaca taquitianura. Jesuuri na sequeree:

—Cua raatere.

⁹ Cuno maajiiri Jesu sequeree:

—Pueyanonaa, ¿casaara quia sequeya Samaria jiyajinijinio maaji raatenura quiajaniani? Quiaacuajari Judio.

Cuno maajiiri naa sequeree Jesutej, na niishiniuucua Judiocuacacujaari maja na niquiniu paniniu quijia Samaria jiyajinijinio pueya.

¹⁰ Jesuuri saaja na sequeree:

—Majaari quia niishiniu cante quia sequereeni: “Cua raatere”. Quiaa jaara niishiriquia casaa Pueyaso jiitiaa quiarani, quiaa maara cua sequere cua raatenura quiajaniya. Quiaa jaara cua masere, janiya maara quia raatere pueya samiitianijia mohuacani.

¹¹ Maajiiri na sequeree:

—Jiyaniijianaa, majaari quenaaja quia jitianu casaa, mohuaca quia taquiriatajara. Nio cuariiri jiyanohua tucuaa. ¿Quiaatucua teje taquitiare cuno mohuacani, pueya samiitianijiani? ¹² ¿Quiaateeri jiyaniijianaa cutara, socua pa supuetana Jacobojini? Nojuajaari nio cuari tiujaquiaari canaara. Nojuajaari niqiuji ratujua quiquiaari necohuata, na seesano seyanio.

¹³ Jesuuri na riuqueree miriqui:

—Puetunu nio cuarijini ratujuacajanaari saaja jiyamucoquiaa. ¹⁴ Saniniuujia, cante cua mohuaca ratunutaniya, majaari socua na jiyamuenu quiniutianihua. Cua mohuacaari juhua samo naca pacartanutaniya pueyaracaanu noojiajini, shuquiriaatia na rishiniuria pueyaracaanu.

¹⁵ Cuno maajiiri Jesu sequeree:

—¡Pueyananaa, cuno mohuaca cua niqutiore cua ratusocoriquiano, maja socua cua jiyamuenu, naajuhua, maja pueyaracaanu cua taquiriojonura nio cuarijini!

¹⁶ Jesuuri na sequeree:

—Miji quia niyaca quia sequecoo coteenu.

¹⁷ Maajiiri na riuqueree:

—¿Janiyate niyacaracaaranani, quiaa jaara naa cua sequere?

Jesuuri na sequeree:

—Quiaacujaari seetanujuanaa cua sequeree: “Niyacaajunijia”. ¹⁸ Seetanujuanaari. Quiaari tari cinco niyacaaraca quiquiaari. Mariyata cuno, quiarijia quiata quiyani, majaari quia niyacajuhua.

¹⁹ Naa cuno maaji tojishacari Jesu sequesantej, Jesu sequereeri:

—Jiyaniijianaa, ¡quiaaqui Pueyaso sequenu panishano caminiujia! ²⁰ Canaa supuetanaa pueyari niya nio tuhuananuucua Pueyaso secojonuujua tarijia. Niajaniya saniniuujia, Judiocuacani, niari sequequiaa Pueyaso cuaara secojosaaria saaja Jerusalén tiacajinia.

²¹ Jesuuri na riuqueree:

—Seetanujuanaa quia sequereera maajiniaa. Cua sequesanoocua quia tiurii. Quera quiniutianiyari Pueyaso nia secojosacari puetunu tiquiyocua nia quishacarijanaa. Majaari tari Pueyaso secojosaanu quiniutianiya saaja Jerusalén tiacajinia, nio tuhuananuucujuhua, ta quia sequerecuajani. ²² Niajaniyari maja nia niishiniu cana nia secojoquiaani. Canaa Judiocuacani, canaa cutaraari niishiyani cana canaa secojoquiaani. Pueyasocujaari canaa Judiocuaca supuetanaa niishitioquiaari pueyacuaji Tacunaari supuentaniya tama canaa Judiocuacajinijiojuaaja. ²³ Quiarijia cutara, cante seetanujuanaa Pueyaso shuquiritiajani, nojoriiri na Que Pueyaso secojonutaniya puetunu noojatatajanaa, seetanujuanaa na tojijiaa nojori quishacari. Pueyasoori naa paniya pueya secojonura nojuaja, cante na secojonuujacuajani. ²⁴ Pueyasoori sohuano. Naaratej, cante Pueyaso shuquiritini panijiacani, nojori cuaara secojora Pueyaso puetunu noojatatajanaa, Pueyaso Sohuano tojijiaa nojori quishacari.

²⁵ Cuno maajiiri Jesu sequeree:

—Janiyacujaari niishiyani Pueyaso sequesano Cristo mijiria na jiyarosocoriquianoori niniutianiya. Nojuaja jaara tiuquiri, nojuajaari puetunu maninia pa pohuatanutaniyanaa.

²⁶ Jiyacaritij, Jesuuri maatia na sequeree:

—Janiyacujaari cunoni, quiata pocoojiyacujani.

²⁷ Jiyacaritij, canaari Jesuucua tiuquijiorohuani. Canaari jiuujiatequiaarini canaa niquishacari Jesu pocoojiyano cuno maajitia. Majaari quenaaja canaa nequesotanu quiri Jesu, casaa cuno maaji paniriquiaani, mariyata casaajini nojori pocoojoriquiaani. ²⁸ Cuno maajiiri cuniquijia na pataco tiujiaquee. Na tiacajinia quiaarohuari. Na tiuquishacari, na tiacajinia quiniaa pueya sequesuhuari:

²⁹ —¡Miji pueyanaa, nia niqiquii pueyano! ¡Nojuajaari cua sequeree puetunu cua miishanojuanaa! ¿Majate Cristoni, tariucacaanu Pueyaso sequesano pocua na jiyarosocoriquianotej?

³⁰ Pueyari cuno tiacajiniji Jesuucua nijioquiaari. ³¹ Cuno maaji quiasacari na tiacajiniohua, jiyacaritij, canaari Jesu mianuutenu paniriqúiaa juucani. Canaari na sequeriquiaani:

—¡Niishitiojonanaa, quia miaquere!

³² Jesuuri saaja canaa sequeree:

—Janiyacuaja miaquesanoracani, cuno miaquesanoori nia niishishoo.

³³ Canaa, Jesu saquiriojosano pueyani, canaari naa tama nequesoreetoreejaanijia:

—Pa niyacari miaquetesaaquere jiyotucuaajaari.

³⁴ Jesuuri miriqui canaa sequeree:

—Cua miishacari cua Jiyarona panishano, cunoori cua miaquesano, naajuhua, cua tucuatasaari na panishano. ³⁵ Niaari sequequiaa: “Cuaara shocoorajaara cuatro raza. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia riatare maninia nia niquniuria. Nataacuacuaja tari noshiqua, carojotasocoriqúiano. ³⁶ Na carojotanaari na poonijionu sami niqúitoshia. Na carojotanoori pueyaracaanu quiriquiano. Naacuajitij, cuhuariquia natoonaari jatiqui shuquiriniutianiya nataacuaca carojotanaata. ³⁷ Naaratej, seetanujuanaari nio tariucuaaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniuuja na carojotaja”. ³⁸ Janiyari saniniuuja nia jiyaramiquiquianuni nataacuaca nia carojotanura quenaaja nia poonijiyaquishoo cuhuariquiajinia. Cunoori tamasaca poonijosano quiquiaari. Niaari juhuajaniya tamasaca poonijosanojiniji carojotaquiaa shuquiriaatia.

³⁹ Queraatia pueya cuno Samaria tiacajinijinoori Jesuucua tiuquíaari, nojori tojishacari naa cuno maaji sequesanootej: “Cua sequeree puetunu cua miishanojuanaani”.

⁴⁰ Naaratej, cuno pueya jaara Jesuucua tiuquijioquiaari, nojoriiri na masuuquiaari tii na camueenujuna nojori tiacajinia quenaaja. Naaratej, canaari Jesuta tii camueequiaari caapiqui juucani. ⁴¹ Socua queraatia cuno pueyajinijinoori Jesuucua tiuquíaari, nojorijanaa jaara Jesu tojiqúiaari Pueyaso rupaa pohuataano. ⁴² Naaratej, nojoriiri cuno maaji sequeturee:

—Quiarijiani, majaari canaa tiuuniu Jesuucua, saaja canaa quia pohuatanuucua nojuajiniji. Quiarijia cutara, canaacuajaari tama canaa numaatajaaja tojirii na pohuatasano. Naaratej, canaari quiarijia niishiyani, Jesuuri seetanujuanaa Pueyaso jyanootiriquiano pajaniya, puetunu mijiria quiniaa pueyajanaano.

Jesu naatanishacari jiyaniijia Herodes pueyano niyanu

⁴³ Caapiqui juuca Jesu camueetanu nuhuaji canaa, Samaria pueya tiacajinia, nojuajaari cuniquiji canaa na pueya jiyataaree Galilea jiyajiniara. ⁴⁴ Jesuuri tarijia sequequiaari: “Nio tariucuaaanu sequesanoori seetanujuanaa sequesano. Naa sequeyari: ‘Pueyaso sequenu panishano caminiujuuniara maja tojishano quijia tama na jiyajinijaja’”.

⁴⁵ Naajaa, Jesu jaara canaa tiuquitiaseequiaari jiyacari Galilea jiyajinia, cuniquijinio pueyari maninia na tiuquitiqúiaari saaja. Nojoriiri naa maninia na tiuquitiqúiaari tari nojori niquniuucua Jesu miishano na cumaacata Jerusalén tiacajinia, Pascuara nojori queranacusacari tii.

⁴⁶ Galilea jiyajinia canaa quishacari, Jesuuri canaa jiyataaree Caná tiacajinia, tee na jataniquiaari mohuaca vinoracuajani. Jiyacaritij, Capernaum tiacajinia quiquiaariiri tamonu pueyano, Galilea jiya jiyaniijia jiyatesano camarnura. Cuno pueyano niyanuuri jyanohua cusosu matariquiaa. ⁴⁷ Cuno camarnu jaara niishiquiaari Jesu tari tiuquiriohua Judea jiyajiniji, nojuajaari jiyacari niqúiaari Capernaum tiacajiniji Jesuucua, Caná tiacajinia. Na tiuquishacari Jesuucua, na sequeseri:

—¡Jiyaniijianaa, cucua quia taraajere! ¡Cua niyanu quia naataniquii, quera cusoyano!

⁴⁸ Jesuuri na riucaaree:

—Niaa jaara cua cumaacata cua miishano niqúiaquiri, niaari cucua tiyuaquiquiaa.

⁴⁹ Cuno camarnuuri saaja Jesu sequeree:

—¡Jiyaniijianaa, mijijiaj, jati pa quiaare cua tiajinia, quiyanu cusoyaquishacarijia!

⁵⁰ Jesuuri na sequeree:

—Quia quiaarohua. Quia niyanucujaja tari naatarohua.

Cuno camarnuuri Jesu sequesanoocua tiuuri. Quiaarohuari. ⁵¹ Jiyacari na tiajinia, na seyari niqúiaquari camarnu niyanuuri seetanujuanaa maninia naatarohua. Naaratej, nojoriiri quiojoquiaari na camarnu numootenucua. Nojori quiojosacari, na camarnu naacuturee saaja nuu cajiniocuaari. Nojoriiri na sequeree:

—¡Quia niyanu tari naatarohua!

⁵² Nojori camarnuuri nojori nequesotaree:

—¿Taacari na cusonu tajiyatemohuacuaani?

Nojoriiri na riuacuaree:

—Naseeca nocuaji tajimiohuacuaa shusha pananu mueecosacari nio niniriquiacuaani.

⁵³ Cusosu queeri niishiquii, Jesucuaajaari jiyacari na sequeriquiacuaa: “Quia niyanu tari naatarohua”. Naaratej, camarnuuri necocuataja Jesucuaa tiuuri, puetunu necohuata-janaanio.

⁵⁴ Judea jiyajiniji Jesu tiuquishacarihuaj, naa na naatanishacari cuno cusosutej, cunota tari caapiqui quiquiaariiri na cumaacata na miishano Galilea jiyajinia.

5

Jesu naatanishacari cumatacuruhuana cusosu Betzata cuari shuriucua

¹ Tamacariuhua, socua canaa Judiocuaca queranacusacari quiquiaari Jerusalén tiacajinia. Naaratej, canaari Jesuta nocua quiojoquiaarijiuhua. ² Jerusalén tiacaari puetunujuanaa puereetuca sohuacajiniacuma quiya. Tohuateyaacaari quiya tiuquitiajara. Tamonu tohuateya sesa quiquiaari “Borregohua tiuquitiaja”. Na shuriucua quiyari cuari. Canaa Judiocuaca rupaajiniani, cuno cuariiri sejosoaquiaari “Betzata”. Cinco suhuorotucuaari quijia cuno cuari shuriuquioco. ³ Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariojuarujuri, shipiiniquiujiunaa, cumatacuruhuana cusosuhuanio. Nojoriiri mohuaca sashijia cuaara queyaquetesaaria. ⁴ Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante coteenujuanaa rosequiaari tiini, nojuajaari naataquiaariuhua na cusonujiniji. ⁵ Tamonu cusosuuri tii narta cusosuhua tajinia matariquiaajuhua. Tari na shoconujuquiaariiri treinta y ocho marijia, pueyaracaanu na matasacari. ⁶ Jesuuri na niquiquiaari mataano. Noojiajinia niishirijiaariuhua cuno pueyano tari shocotejoquiaari queraatia marijia, naa pueyaracaanu na matasacari. Nocuaji Jesuuri na sequereee:

—¿Quiaate naatanu pania?

⁷ Cusosuuri na riuacuaree:

—¿Cantucua cua naacure cuarijinia cua rosenurani, mohuaca jaara queyaquetesaarecuaa? Janiya jaara rosenu paniquiaa juucuan, cuarta cusosuuri saaja cua shocotaquiaani.

⁸ Jesuuri na sequereee:

—¡Quia sanere! Quia matu quia pataarohua.

⁹ Jiyacariitij, cusosuuri ritia jeequequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquiara. ¹⁰ Canaa Judiocuaca camarucua jaara cusosu niquiquiaari na matu pataano, na juaatiuriiri. Naa na sequetureeri: —¿Majateeri quia niishiniu, quiarijiaari Sábado? ¡Maja quia matu quia patanujaj!

¹¹ Cusosu naatanohuari nojori riuacuaree:

—Cua naataniniacaja cua sequereeno: “Quia matu quia pataarohua”. Janiyari cunora na pataani.

¹² Narta Judiocuaca camarucuaari na nequesotaree:

—¿Cantejaara naa quia sequereeni?

¹³ Nojori riuacuareeri:

—Johua. Maja cua niishiniu canaquitijia cua naataniriitij.

Jesu naatanishacari cuno pueyano, queraatia pueyari namitia tii quiriquiaa. Naacuajitij, Jesuuri ritia tajiniocuareequiaari pueya tajinia, na naatanishano pueyanocuaaji. ¹⁴ Na nuhuaji, Jesuuri na riuriataquiaari cuno juucaja Pueyaso Secojua tajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhua socua, quiaa mariqui socua taraatia miiruuri.

¹⁵ Naacuajitij, cuno pueyanoori Jesu niishirii. Cunora, canaa Judiocuaca camarucuaacua quiaareeri. Nojori sequeseeri:

—Jesuqui cunocuaaja cua naataniriini.

¹⁶ Naa Jesu miiniucua samaatenu juucatej, narta Judiocuaca camarucuaari na quiatunu panijia juucua. ¹⁷ Jesuuri saaja nojori sequereee:

—Cua Queeri pueyaracaanu poonijia. Janiyari cunora poonijiyajaacuhua.

¹⁸ Naa Jesu sequesacari nojoritij, narta Judiocuaca camarucuaari jiyanohua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijionuucua. Socua jiyanohua na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

Jesuuri Jiyaniijajanaa, Pueyaso Niyanu na quishacari

¹⁹ Nocuaji Jesuuri narta Judiocuaca camarucua sequereee:

—Seetanujuanaa nia sequeyanijia, Pueyaso Niyanu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niquiquiaa

miyanocuaani. Casaa cua Que miiquiaacuaani, janiyari naa miiquiaajaacuhuaaj. ²⁰ Cua Queeri cua panijia. Cunora, nojuajaari puetunu na miishanojuanaa cua niishitiojoquiaa. Naajuhuaaj, cua niishitiojonutaniyari socua jiyajeneta casaa tariucua cua miishanojinijicuaa. Niaari nocuaji shiriqutiuniutianiya. ²¹ Cua Queeri macunucua samiitianijioquiaa, pueyaracaanu rishijia nojori quiniuria. Naajuhuaaj, janiyari pueya samiitianijioquiaani, cana cua samiitianiniu paniyacuaajani. ²² Cua Queeri maja na nequesoreenu quiniutianiya pueya. Nojuacuajaari tari cua niqutiocanu na cumaaca, puetunu pueyajananaa cua nequesoreenura. ²³ Nojuajaari naa miiquianu puetunu pueyajananaa quiniuria cua tojitiajaca, naatej, taa cua Que na tojitiatuquiaacuaani. Cante cua ruuretajanani, cunoori cua Que ruuretajajuhuaaj, nooj, cante mijiria cua jiyaroquiaaricuaajani.

²⁴ *Seetanujuanaa nia sequeyanijia, cante cua sequesano tojjijiani, mariyata cante cua Jiyaronaacua tiuyajaanihuaaj, nojuajaari pueyaracaanu Pueyasota rishiriquiano cutara. Nojuajaari maja na saniitiosaanu quiniutianiya. Nojuacuajaari tari samiitianishaarohua juhua macu na quiniujiniji Pueyasooju na quishacari. ²⁵ Seetanujuanaa nia sequeyanijia, quera quiniutaniyari juhua macunucua quijiaa samiitiacosacari. Seetanujuanaa quiarijiaari, juhua macunucua quijiaaari cua rupaa tojitianutaniya. Cua rupaa tojitiajacaari samiiticonutaniya, pueyaracaanu rishijiaa nojori quiniuria. ²⁶ Cua Queeri quijiajuhuanaj. Majaari na naata shaajenu. Nojuajaari naa quijiaa naa quijiaa cua jiyatequiaarijihuaaj, juhua nojuarajuhuaaj. Naacuajitij, cua naata pueya jiyatenu naa quijiarajuhuaaj. ²⁷ Pueyanora cua quiniucua, na cumaaca cua niqutioreeri cuarta pueya cua nequesoreenura, nojori cua saniitionurajuhuaaj. ²⁸ Cua tojitiare. Majaari nio sequesanoocuaaji nia shiriqiniuu. Tamacari, puetunu macunucuaajani cua rupaa tojitiuniutianiya. ²⁹ Macunucua tojitiushacari cua rupaa, nojoriiri samiiticonutaniya, na jamacajiniji nojori tohuareetanura. Cante maninia mijiaa quiquiaarini, samiiticonutaniuhuari pueyaracaanu shuquiriaa-tia quijiaa nojori quiniuria Pueyasota. Saniniuujia, cante sesa mijiaa quiquiaarini, puetunu nojorijianaari quejoosaanutaniya pueyaracaanu saniitiosocoriquiano.

Jiyaniijajanaa na quiniucua, Jesu tama nojuajiniji pahuataajaaja

³⁰ *Pueyaso Niyanu cua quishacari, naajaa, majaari cua miiniu tama cua panishanojuaja. Janiyari sesa mijiaa juaaquiaacuaajani, saaja cua Que niishitishacari janiya, nojori miishanoori sesa. Tama cua panishanojuaja miyashijia cua quiniucua, janiyari namitajanaa nojori juaaquiaani. Janiyari pueyaracaanu miiquiaa saaja cua Jiyarona panishanoni. ³¹ Pueyano jaara tama nojuajinijiaaja pahuataa narta pueyano, na pahuatasanoocua maja tiushano. Naaratej, janiya jaara tama janiyajiniji pahuatariquia nia niquiarani, tama cua pahuatasanojuaja maara najuhuaana quiriquiaaj. ³² Naajaa, quiarijia cutara nia naata niishiniu cua pahuatasanoori seetanujuanaa. Tamonucuaajari janiyajiniji pahuataa seetanujuanaa. Nojuajaari cua Que. Cunora, niishyanijia na pahuatasano janiyajinijiri maja najuhuanaj.

³³ *Niaari nia pueya jiyarocanu Tiuquinijiona Juancua, nojori nequesotanura janiyajiniji. Nojuajaari saaja seetanujuanaa nia pahuatacanu janiyajiniji. Majaari na seetanu quiquianu janiyajiniji. ³⁴ Nojuaja jaara seetacanu janiyajiniji nijaniya, quiria, naajaa. Janiyacuaajaari niishyani seetanujuanaari cua pahuatasano nijaniya tama janiyajinijiaaja. Tiuquinijiona Juanri seetanujuanaa pahuatacanu janiyajiniji nijaniya. Naa cuaara na pahuatasanoocua tiuuria, Pueyaso jiyanooniuria nijaniya. Janiyari saaja cunora nia pahuataa Tiuquinijiona Juanjinijini. ³⁵ Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari nijaniya. Niaari najuhuaana tojiquianu na pahuatasano. ³⁶ Tiuquinijiona Juan pahuatasano janiyajinijiri seetanujuanaa. Naa jaara na pahuatasanoocua tiuuniu paniyashijiaa quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyaroquiaari. Nojuacuajaari cua sequequiaari naa cua miiniuriatej. ³⁷ Cua Quejanaari cua jiyaroquiaari. Nojuajaari janiyajiniji niishitioquiaari pueya. Naajaa, majaari quenaaja nia tojinuu quiquiaari na pocuanu. Nojuajaari nia niquishoojuhuaaj. ³⁸ Majaari quenaaja na rupaa quiniu niioojiajinia, nia tiuyaquishacari na Jiyarosanocua. ³⁹ Niaari suraatia serojoquiaa tariucuaacuanu naajiosano Pueyaso Rupaa. Niaari jiyaniya nia jaara Pueyaso Rupaa niishijiaa quiri, niaari naa pueyaracaanu quijiaa quiniutianiya. Seetanujuanaa majaari naatej. Cuno Naajioneejinia, tiiri janiyajiniji naajiotasano quiyacuaja. ⁴⁰ Niaari saaja cucua ninuu paniaquiquiaa cua jiyatenura nijaniya pueyaracaanu quijiacara cutara.

⁴¹ *Maninia cua miishanoori maja pueya sequenura janiya: “Quiaari maninia pueyano”. Janiyari saaja cua Que shuquiritiquiaa cutarani. ⁴² Janiyari seetanujuanaa nia niishyani. Niaari Pueyaso shuquiritiaashijiaa, nia paniaquishacari nojuaja. ⁴³ Cua Quecuajaari cua jiyaroquiaari cua niishitiojonura nijaniya nojuajiniji. Quiarijiani, majaari nia tojinuu

paniniu janiya. Saniniuujia, tamonu jaara tama na cuaqueyajaaja jiyateya juhua Pueyaso Jiyarosanora na quiniuria, niaa maara cuno tojiri cutara, nojuaja jaara niaacua nimia na niishitiojonura niajaniya tama na niishishanojuaja. ⁴⁴ Majaari nia naata cua pohu-atasanoocua tiuuniu, niaa jaara saaja niarta pueya shuquiritasano quiniu paniquiaa, maja Pueyaso shuquiritasano. ⁴⁵ Majaari nia jiyaniyu janiya niaacuara tonujunutaniya cua Queni. Tama Moisés cuajaari niaacuara tonujunutaniya, cua tojitiaashijia nia quini-uucua. Niaari jiyaniya niaa Pueyaso muerasu, juhua Moisés tojijia nia quishacari. ¿Ni-aateeri seetanujuanaa Moisés tojijia? ¡Maja! ⁴⁶ Nojuacuajaari janiyajiniji naajiotaquiaari. Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiuuriujuhuaj. ⁴⁷ Nocuaij, niaa jaara Moisés naajiotasanoocua tiyaquiquiaa, ¿niaatucua taa tiuuri quiarjia cua pohuatasanoocuanii?

6

Jesu mianuutesacari cinco mil canuu

(Mt 14.13-21; Mr 6.30-44; Lc 9.10-17)

¹ Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarijuhua Tiberias caminia. ² Jiyanhua queraatia pueyari Jesu niquiquiaari tari, cusosuhua na naatanijiosacari. Naaratej, nojoriiri Jesu neteyotariquiaa caminia shuriquiuoco. ³ Canaa shiitiasacari caminia taquijiria, Jesuuri canaa tacatamaa tuhananuucua. Tii cajitiasee canaari. ⁴ Jiyacaritij, quera Pascuara queraacusacariiri quiriquiaa. ⁵ Jesu niquishacari jiyanhua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

⁶ Naa Felipe nequesotareeri nareja na saniniuria. Jesuuri tari niishiriquiaa taa nojuajanaa mianuutenutaniya cuno pueyani. ⁷ Felipeeri na riucuaeree:

—¡Paa jaara cumaneeca jiitiare doscientos juuca pa poonijiosanojiniji pan pa masetajaranii, cuno maara najuhuaa seaja quiri puetunu nojoririjanaa!

⁸ Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquiriojosano pueyanojuhuaj. Jesu sequeseeri:

⁹ —Jiyaniijianaa, caya samijia niya cinco pan jiitiaa cebada cashojuajiniji shipinishano, caapiqui sapitiaajanio. Naajaa, cunoori najuhuaa puetunu cuno pueyarajanaa.

¹⁰ Jesuuri saaja canaa na saquiriojosano pueya sequereeri:

—Puetunu pueyajanaa nia sequere cuaara cajitiuuria.

Cuniqui, canaa tii quiriquiaani, shanhua jiyasocuaari quiriquiaa, maninia cajitiujia. Naaratej, pueyari cajitiiuria. Puetunu cuno pueya maanujinijiojuanaani, saaja canuuri quiquiaari cinco mil pueya. ¹¹ Jiyacaritij, Jesuuri cuno pan pataree. Pueyaso secojoree nocuaari. Na nuhuaji, canaa na serotaniriiri. Canaari cajitiuyano pueya puetunu na panishanojuanaa niqutiojoreeni nojori miaquenuusocoriquiano. Jesuuri naa miirii sapitiaajahuaj. ¹² Puetunu pueyajanaa jaara tooquiquiaari, Jesuuri canaa na saquiriojosano pueya sequereeni:

—Puetunu miaquesano raquiquiajanaa nia reraterohua, maja najuhuaa na niitiasaanura.

¹³ Canaari cuno cinco panjiniji pueya miaquesano raacua reratereeni. Canaa reratesacari, canaari doce canaasatu mishinijoreeni. ¹⁴ Pueya niquishacari naa Jesu miishano na cumaacatatej, nojoriiri sequeturiquiaa:

—¡Nio pueyanoqui seetanujuanaa Pueyaso sequenu panishano caminiujunia, nooj, tariucuaaanu sequesaaquiaari pocua niriqianotej!

¹⁵ Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaij, Jesuuri tamajaaja tacaquee socua jiyaconaja tuhananuucua.

Jesu rucuanesacari mohuaca caco

(Mt 14.22-27; Mr 6.45-52)

¹⁶ Tariucua pananu tiuquishacari, canaa, Jesu saquiriojosano pueyani, canaari rose-taarahua caminiajinarani. ¹⁷ Canaari botejinia tacataseeni, cuniquiji Capernaum tiacajiniara canaa niuutianura caminia taquijiria. Tariucua ninishiquiiri quiriquiaa. Majaari Jesu tiuquiniu quiriquiohua juhanajuaja canaacua. ¹⁸ Tari canaa niuutiasacari, paratuuri jyanohua piyarojoriquiaa. Caminiaari cunora jyanohua cajiniuucuariquiaa. ¹⁹ Canaari tari caminia juuujiajinia quiriquiaani, seis kilómetroruhua canaa ruparetasaquiji. ¡Canaari jiyacari casaa niquirii canaacua catecanoyanoni! ¡Mohuaca caco canujuriquiaari! ¡Canaari nocuaij shiriquitiiuri jyanohuani! ²⁰ Jiyacaritij Jesuuri canaa sequereeni:

—¡Maja pueretunu! ¡Janiyacuajanijia!

²¹ Na rupaa canaa tojshacari, canaari shuquiriaatia na tacanitiurii botejiniani. Canashiyaquiji boteeri ritia shiitiasee terara canaa quiariquiaacuajani.

Jesu mianuutesano pueya pajesacari nojuaja

²² Jaara juhuaquequiaari, Jesu mianuutesano pueyari na pajenuunu coteequiaari tee canaa quiriquiaa caminia taquijiriacuajani. Nojoricuajaari tenacari niquiquiaari saaja niquiriyatu boteeri shiitariquiaa. Saaja canaa, Jesu saquiriojosano pueyani, canaari cuno botejinia quiaquiaariuhua nojori niquiarani. Majaari Jesu quianu quiriquiaa cutara canaata. ²³ Jiyacaritij, Tiberias tiacajiniji boteeri tiuquijioquiaari catecaja nojorijiniji, tee Jesu mianuutequiaari nojoricuajani. ²⁴ Cuno pojori niishishacari maja Jesu quiniu quiriquiaa tari tii, canaa na saquiriojosano pueyajuhaaj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

Jesu Cristo juhua poojia miaquesano

²⁵ Cuno pojori tiuquijiosacari caminia taquijiria, Jesu riuriatuseeri. Na nequesotatureeri:

—Niishitiojonanaa, ¿taacari quia niyarohuacuaarini?

²⁶ Jesuuri saaja nojori sequeree:

—Janiyari seetanujuanaa nia sequeyani, majaari nia pajenu janiya nia niquiniucuaa cua cumaacata cua miishano. Niaari cua pajenuya saaja cua mianuutenuucua nijaniya, taa nia tooguiorucuaacuajani, cua mianuutesacari nijaniya. ²⁷ Maja saaja miaquesanoocua nia tacaaniu, nia cuaqueya nia cumaquitajara. Cunoori maja na jiyatenu quiniutianiya nijaniya pueyaracaanu rishijia. Saaja nia tacaari cutara nioojia samitiianijia miaquesanoocua, pueyaracaanu rishijia nia quiniuria. Janiyacuajaari cuno nia niquitioriquianoni, pueyano cua quiniucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosononi.

²⁸ Cuno pueyari Jesu nequesotaree:

—¿Casaa canaa miiniutianiya ni Pueyaso panishano canaa miiniuria, Pueyaso shuquiritiasano canaa quiniurijuhuaaj?

²⁹ Jesuuri nojori riucuree:

—Pueyaso jiyarosanoocua nia tiuuri. Saaja naa nia miishacaritij, Pueyasoori nia shuquiritianutianiya.

³⁰ Cuno pueyari Jesu sequeturee:

—Canaa niqiaara quia cumaacata casaa quia miiricuarajaj, canaa niishiniuria quiaari seetanujuanaa Pueyaso Jiyarosano. ¿Casaa canaa quia niquitiniutianiya canaa tiuunuria quiocuanii? ³¹ Canaa quia niquitiricuaraja quia cumaacata quia miishano, taa Moisés niquitiquiaari canaa supuetanaacuaani. Nojuajaari jiyocuacaanuji pan tiniquiaari pueyaracaanu nojoriria, cariiquia jiyajinia nojori rucuanijosacari. Naa naajiotasano quiyacuajaari tariucuaaanu Pueyaso Rupaajinia: “Nojuajaari nojori mianuutequiaari jiyocuacaanuji tinio pan”.

Naacuajitij, canaari niishiyani Moisés cuajaari Pueyaso jiyarosano quiquiaari.

³² Jesuuri nojori riucuree:

—Seetanujuanaa nia sequeyanijia, cuno jiyocuacaanuji panni, cunoori maja Moisés tinishano quiquiaari. Majaari seetanujuanaa jiyocuacaanuji pan na quiniu quiquiaarijihuaj. Quiaritia cutara, cua Queeri niaacua jiyarorucuaa seetanujuanaa jiyocuacaanuji panjanaa cutara. ³³ Cuno, Pueyaso niquitiosano pan jiyocuacaanuji rosenoni, cunoori puetunu mijiria quiniaa pueyajanaa samiitianijiojua cutara.

³⁴ Naaratej, cuno pueyari Jesu sequeree:

—Jiyaniijianaa, quiocua pueyaracaanu canaa niquitioriquiaa cuno pan!

³⁵ Jesuuri nojori sequeree:

—Janiyacuajaari cuno panni, pueya samiitianijiojuani. Cante cucua niyani, majaari na miaajenu quiniutianiya socua. Cante cucua tiuuriijiaaniuhuaaj, majaari na jiyamuenu quiniutianiya juhuaj. ³⁶ Taa cua sequeree tari nijaniyacuaajani, niaari juucua cua niquiya. Majaari quenaaja cucua nia tiuunuu. ³⁷ Naajaa, puetunu cua Que niquitiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretano nojori. ³⁸ Majaari jiyocuacaanuji cua roseno quiquiaari cua miiniuria tama cua miiniu panishanojuaja. Mijiria niqiaarinijia saaja cua Que panishano cua miiniuria, cante cua jiyaroquiaaricuajani. ³⁹ Majaari cua Jiyarona paniniu cua juurequetenura quenaaja niquiriyatujua na niquitiosanojiniji janiya. Nojuajaari paniya cutara, nojori cua samiitianijionura jiya puequesacari. ⁴⁰ Canapuet cucua tiuujicani, nojori niishishacari janiya

Pueyaso Niyanuni, cua Queeri puetunu cuno pojorijianaa paniya pueyaracaanu rishijiaca nojori quiniuria. Naacuajitij, janiyari nojori samiitianijionutaniya jiya puequesacarini.

⁴¹ Jesu sequenuucua, “Janiya jiyocuacaanuji roseno panni”, tii quiniaa narta Judiocuacaari cunora juaaquioree. ⁴² Sequetureeri:

—¿Majate nio pueyano Jesucuaja, José niyanutej? ¡Paacujaari na queya niishiyani! ¿Casaara quiaritia na sequeyari: “Jiyocuacaanuji rosenonijia”?

⁴³ Jesuuri nojori sequeere:

—¡Tariucuaja! ¡Maja nia juaaquiounu! ⁴⁴ Pueyanoori maja na naata tiuuniu cucua tamaajaaja, cua Que jaara noojiajinia poonijiaquiri. Janiyari puetunu cucua tiuuniaajanaa samiitianijionutaniya jiya puequesacarini. ⁴⁵ Tariucuacaanu pueyara Pueyaso sequesano caminiujiumia naajiotasanocujaari naa sequeya: “Pueyasocujaari puetunu nojorijianaa niishitiojonutaniya”.

Naacuajitij, cante cua Que niishitiojosano tojijia seetanujuanaani, nojuajaari cucua tiuya.

⁴⁶ Cua Queeri maja pueya niqushano quenaaja. Saaja na niquinia cutaraari janiya cante Pueyasojinijia niquiaaricuajani. ⁴⁷ Seetanujuanaa nia sequeyanijia, cante cucua tiuujiani, nojuajaari tari pueyaracaanu rishijia jatanishaaree. ⁴⁸ Janiyacuajaari pueya samiitianijia panni. ⁴⁹ Cariiquia jiyajinia nia supuetanaa camarucuneejotasacari, nojoriiri cuno jiyocuacaanuji tinio pan miaquenuquiaari juucua. Naajaa, saaja cusonuquiaariiri. ⁵⁰ Saniniujia, cante quiaritia seetanujuanaa jiyocuacaanuji roseno pan miaqueyani, majaari Pueyaso shaajanu quiniutianiya nojuaja. ⁵¹ Janiyacuajaari cuno samiitianijia panni, jiyocuacaanuji rosenoni. Cante nio panjinijia miaquejani, nojuajaari pueyaracaanu quijia quiniutianiya. Nio pan, janiya na niquitionutaniya puetunu mijiria quiniaa pueyacuarajanaani, cunoori tama cua cuaqueyajaaja.

⁵² Jiyacaritij, tii quiniaa narta Judiocuacaari naa sequetooree tamajaaja na juaaniutia:

—¿Nio pueyanotucua taa miaquetere tama na cuaqueyajaaja pajaniyani?

⁵³ Jesuuri jiyacari nojori sequeere miriqui:

—Seetanujuanaa nia sequeyanijia, niaa jaara miaqueyaquiri cua shu, niaa jaara ratuyaquiri cua nanacajuhua, majaari samiitianijosano nia quiniu quiniutianiya, pueyaracaanu quijia nia quiniuria. ⁵⁴ Cante cua shu miaquereeni, cante cua nanacaturreejaniuhua, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianiuutianihua jiya puequesacarini. ⁵⁵ Cua shuuri seetanujuanaa miaquesano cutara. Naajuhua, cua nanacaari seetanujuanaa ratusanu cutara. Cunoori maja juhua mijiria nia miaquesano. ⁵⁶ Cante cua shu miaquenani, cante cua nanaca ratunajaniuhua, nojuajaari coojia rupueja. Janiyari noojia rupuejajuhua, pueyaracaanu rupuetotesano canaa quiniuria. ⁵⁷ Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu quijia quiniutianiyajuhua, na rupesacari janiya. ⁵⁸ Janiyari maja juhua nia supuetanaa miaquesano panni. Nia supuetanaari cuno pan miaquenuquiaari najuhuanaj. Naajaa, saaja cusonuquiaariiri. Janiyari seetanujuanaa jiyocuacaanuji roseno pan cutarani, nia miaquesocoriquiano. Cante cua miaquejani, jaara cusoyare, naajaa, samiitianutianihuari pueyaracaanu quijia na quiniuria.

⁵⁹ Jesuuri puetunu niojuanaa pohuataquiaari pueya niquiara Pueyaso secojojua tiajinia Capernaum tiacajinia.

Queraatia Jesu nuhuajinia pueya cartesacari nojuaja

⁶⁰ Naa pueya tojishacari Jesu niishitiojosanotej, queraatia na nuhuajinia pueyari naa sequetooquiaari tamajaaja:

—Cuno na sequesanoori jiyanohua jiyajeneta pa miiniuria puetunujuanaa. Maja pa naata. ¿Cantucua na tojirijaarajaanijia?

⁶¹ Jesuuri naa nojori sequesano niishiriji noojiajinia. Nocuaaji nojori sequeereeri:

—¿Niaateeri naa cua sequenuucua juaya? ⁶² ¿Niaatucua taa sequeere socuani, niaa jaara cua niquiri tacaano jiyocuacaanuhua, teje cua niquiaaricuajani? ⁶³ Cua shu maja cumaacaraca pueya na samiitianijia. Saaja cua Sohuanu cutaraari pueya samiitianijia, pueyaracaanu rishijiaca nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianijia niajaniya. ⁶⁴ Noojiaqueya niajanijajiniioori cucuaji taacanuyajaa.

Jesuuri tarjia niishijia cante nocua tiuyashijiacani, mariyata cante na paraa na quiatenutaniyani.

⁶⁵ Naa sequeere socua cuno pojoriiri:

—Janiyacujaari cunora nia sequeereeni: “Maja pueyano naata cucua tiuuniu, cua Que jaara noojiajinia poonijiaquiri”.

⁶⁶ Jiyacaritij, queraatia Jesu nuhuajiniaa pueyari na cartequiaari. Nojoriiri maja tari Jesuta na rucojonu quijia. ⁶⁷ Nocuaij, Jesuuri jiyacari canaa na saquirojosano pueya nequesotaree:

—¿Niajanियariuhuj, niaateeri cua cartenutaniyajaacuhuj?

⁶⁸ Simón Pedroori Jesu riucuree:

—¡Maja Jiyaniijijanaa! ¿Canaatucua tamonu jiyaniijiaacua pacureni? Canaa quia pohuatasanocujaari na naata canaa jataniniu pueyaracaanu rishijia canaa quiniuria. ⁶⁹ Canaacujaari tari quiocua tiuuquianuni, canaa niishishacari quiaari Pueyaso Niyanu, saa maninia miijiaja.

⁷⁰ Jesuuri canaa sequeree:

—Niaacujaari tama cua saquirojosano doce pueyajaaja. Saniniuujia, niquiriyatu nijaniyajinijinoori sesaaca.

⁷¹ Naa Jesu sequesacaritij, Judasjiniji sequeriquiaari, Simón Iscariote niyanuni. Nojuajaari seetanujanaa niquiriyatu canaajinijinio Jesu doce saquirojosano pueyajinijinio quiquiaari. Naajaa, tama na Jiyaniijiajaaja tacartariquiano quiriquiaaquiiri.

7

Tama Jesu tapueyocucajaaja Jesuucua tiuyashijiaa quiquiaari

¹ Na nuhuaji, Jesuuri Galilea jiyajinia rucuanerjoriquiaa. Canaari na cojiriquiaani. Majaari na quiniu paniniu quiriquiaa Judea jiyajinia, tii quiniaa Judiocuaca monu panishacari nojuaja. ² Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariria pueyari ocho juuca shocotejoquiaari suhuorotucujinia nojori quishacari. Naa miituuquiaari puetunu marijijarajanaa canaa niishiriojonura, canaa supuetanaa Israel pueyari saaja suhuorotucujinia quijiaa quiquiaari, pueyaracaanu nojori camarucuneejotasacari carriquia jiyajinia nojori quishacari. ³ Jiyacaritij, tama Jesu tapueyocucajaari naa Jesu sequeturee nojori macatiniuria nojuaja:

—¡Majaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumaacata, quia jiyopue niquniuria puetunu quia miishanojuanaa. ⁴ Pueyano jaara puetunu pueyajanaa tojinu panishano pueyano quiniu paniri, ¿maatucua casaara jiyasohuaja miijiore na cumaacatani? Naatej, taa niya quia miijioquiaa quia cumaacatacuaani, naa quia miijiosee puetunu pueya niqijarajanaa Jerusalén tiacajiniajuhuaj.

⁵ Majaari quenaaja tapueyocucua tiuuniu quijia Jesuucua. Cunora naa na sequetureeri.

⁶ Jesuuri saaja nojori riucuree:

—Juhuanajuaja maja cua quiasacari cua miiniuria taa nia sequeyacuajani. Naa jaara quianu paniri, niama juhuajaniya quiaaretej. ⁷ Niarta mijiria quijiaa pueyari maja na naata juaani niajaniya. Janiya cutaraari nojori niquniu paniaquishooni. Cua niqitiuniu paniaquiquiaari, nojori cua niishitishacari nojori miishanoori sesa. ⁸ Nia quiojijare queranacunuucua. Janiya cutaraari maja cua quianu quiniutianiya juhuanojuaja. Quiarijiani, puera juhuacarijiaari cua miiniuria taa nia sequeree janiyacujani.

⁹ Naa nojori na sequenu nuhuajitij, Jesuuri cuniquijia jiyojeree Galilea jiyajinia.

Jesu quishacari cuno queranacunuujinia

¹⁰ Na tapueyocucua jaara quiojoquiaaricuaa Jerusalén tiacajiniara tii queranacunuunura, Jesuuri jiyasohuaja quiaaree nojori nuhuajijihuaj. ¹¹ Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

¹² Puetunu pueyajanaari Jesujiniji sasacotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—¡Maja maninia pueyano! ¡Pueya sapojoja najuhanaj!

¹³ Puetunu pueyajanaari naa sasacotooriquiaa jiyasohuaja, nojori pueresacari narta Judiocuaca camarucua.

¹⁴ Jiuujianaraca juuca jaara tari shocujoquiaari nojori queranacunuusacari, Jesuuri jiyacari shusha tiuquiquiaari Pueyaso Secojoja tiajinia. Tii coteeree pueya niishitiojonuuri. ¹⁵ Canaa Judiocuaca camarucuaari jiuujiatequiaari nojori tojishacari Jesu niishitiojosano. Naa sequetureeri:

—¡Cuno pueyanoori maja quenaaja na serojonu quiquiaari! ¿Taa na niishiya pueraarini?

¹⁶ Jesuuri nojori sequeree:

—Cua niishitiojosanoori maja tama cua niishishanojuaja. Cunoori cua Jiyarona niishitishano janiya. ¹⁷ Cante Pueyaso panishano miiniu paniyani, nojuaja cuaara miiria

taa cua niishitiojiyacuaani. Naacuaajitij, nojuajaari jiyacari niishiniutianiya, cua niishitiojosanocuaajaari Pueyasojiniji seetanujuanaa, maja tama cua niishishanojuaja. ¹⁸ Cante tama na niishiriojosanojuaja pohuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuaraa tojiyaquishaaria. Saniniuujia, cante na jiyarona niishitiojosano pohuataa pueyani, pueya tojinuria na jiyarona, cuno pueyano pohuatasano cutaraani seetanujuanaa. Cuno pueyanoori maja pueya sapojoua.

¹⁹ ¿Niaateeri seetanujuanaa supuetana Moisés Rootasano tojtiajaca? Majaruhua. Majaari quenaaja niquiriyatu niajanijinijinio na rootasano tojjia. ¿Casaara nia monu paniya janiyani? ¿Supuetana Moiséste naa nia niishitiojiya na naajioneejinia?

²⁰ Nojoriiri Jesu riucautere na juaaniutia:

—¿Quiaaqui samaruraca! ¿Cante quia monu paniyani? ¿Canaa quia sequeretoj!

²¹ Jesuuri nojori sequeree:

—Puetunu niajanijajanaari shiriiquitiuquianu samaatenu juuca cua miishacari niquiriyatu casaaniyoyua cua cumaacata. ²² Supuetana Moiséscaajaari nia rootaquiari nia mueya cararaatiuuquia co nia miatenura, ocho juuca jaara na shocojore na rasaanujiniji. Seetanujuanaa, nio niishishanoori maja tama Moisés niishishanojuaja. Cunoori tariucuaaanu pa supuetanaa niishishano Moisés niyacarijia. Pueyari nia rootasaaquiari nia nojori miiniuria necohua, seetanujuanaa Pueyaso saquiriojosano Israel pueya nojori quiniuriajuhuaj. Naaratej, jaara quiri samaatenu juuca, naajaa, niaari nia nia niquiohua cararaatiuuquia co miatejoquia. ²³ Naa nia miishacari samaatenu juucatej Moisés Rootasano nia tojinuria, ¿casaara nia juaya janiyani, cua naataniniuucua cusosu samaatenu juucani? Niaari saaja shiitianiyojua miatejiya, maninia nia niquiohua quiniuria Pueyaso niquiara. Janiya cutaraari puetunu cuno cusosu cuaqueyajanaa jeecacanuni. ²⁴ Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojua nia quiri, niaa mariqui najuhua pueya juaariiri na miishano jaara sesa quiaquiri.

Jesu pohuatasacari tama nojuajinijiaaja

²⁵ Jiyacaritij, nojiaqueya Jerusalén tiacajinijinio pueyari tama sequetooreejaaja:

—¿Majate nio pueyano pa camarucua pajesanocuaa na mosocoriquianotej? ²⁶ ¿Taateni? Noocujaruhua juhuajaniya pohuataa pueya niqularatej. Majaari quenaaja pa camarucua tenuityunoj. ¿Pa camarucuate jiyaniya soj, nojuaja seetanujuanaa Cristo, tariucuaaanu sequesano pocua jiyarosariquianotej? ²⁷ Paacuaajaari nio pueyano niishiyaari, tejenote nojuajani. Saniniuujia, Cristojuanaa jaara tiuquiri, majaari quenaaja na niishishaanu quiniutianiya cutaraa tejenote nojuajani.

²⁸ Jesuuri jiyacari niishitiojoriquiaa Pueyaso Secojuajinia. Naa na tojishacari pueya sequesantej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri niishiya juhuaj, tejenote janiyani? Naajaa, majaari cua ninu quiquiari tama cua panishacarijiaaja. Janiyari jiyarosanoni. Cua jiyaronaari seetanujuanaa quijiajuhanaj. Nojuajaari nia niishishoo. ²⁹ Janiyari na niishiya cutarani. Janiyacuaajaari tiji ninioni. Nojuajaari cua jiyaroquiari.

³⁰ Nojoriiri jiyacari Jesu quiatunu panirii. Naajaa, majaari quenaaja tamonu naata quiriquiaa na quianura. Majaari na naata quianu quishaaquiari, juhuanajuaja na monu juuca quiaquishacarijia. ³¹ Saniniuujia, queraatia cuniqui quiniaa pueyari Jesuucua tiuquiari. Nocua tiunuaari nia sequesatiquiaari:

—¿Cristojuanaa jaara tiuquiri, nojuajatucua socua jiyajeneta casaa miiri na cumaacata nio pueyano miishanojiniji?

Fariseocuaca quiatenu panishacari Jesu juucua

³² Fariseocuacaari cuno pueya tojiquiari nia nojori maninihuaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojori-jianaari Jesuucuaa roojotooquiari. Na nuhuaji, nojoriiri Pueyaso Secojuaja tia cojuanaa pueya jiyaramiquiquiaari Pueyaso Secojuaja tiajinia, tii nojori quianura Jesu. ³³ Jesuuri jiyacari nojori sequeree:

—Janiyari saaja rupaquijia niaata quiniutianiyan. Na nuhuaji, janiyani cua jiyaronaacua riujuuniutianihuani. ³⁴ Niaari cua pajenuunutaniya najuhuanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyacuaani.

³⁵ Nocuaaji, cuno Judiocuacaari tama sequetooreejaaja:

—¿Tee na quianutaniyajanojoni nia pocuaaniquitij, na riuriataaquishaanurajuhuj? ¿Parta Judiocuacaacua quianutaniya soj, noo pojoricua Griegohua tajinia niaquejoquiariitij? ¿Tii niishitiojonutaniya cuno taucuaa soj? ³⁶ ¿Casa na sequenu paniya pajaniyarini na sequesacari: “Niaari cua pajenutaniya najuhuanaj. Majaari nia riuriatanu

quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuaani?”

Jesu pahuatasano miriqui Pueyaso Sohuanujiniji

³⁷ Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujaquiaari pueya niquiara. Jiyanohua na rupaa paaretareeri. Naa sequereeri:

—¡Cante jiyamueyani, nojuaja cuara niiria cucua, na ratunura janiyajiniji! ³⁸ Cucua na tiuushacari, nera quiniutianiyari taa na naajiotasaaquiaari tariucuacaanu Pueyaso Rupaajiniacuajani. Naa sequeyari:

“Cante cucua tiuyani, pueyano samiitianijiojua mohuacaari noojajiniji jaatenutaniya”.

³⁹ Naa Jesu sequesacariitij, nojuajaari Pueyaso Sohuanujiniji pahuatariquiaa miriqui. Jiyacaritij, Pueyaso Sohuanuuri juhuanojuaja maja na quiniu quiriquiaa mijiria, Jesu tacaquishacarijia Jiyaniijajanaa na quiniuria. Naaratej, tii quiniaa pueya sequeriquiaari, cante quiarjia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanuji.

Pueya juaatiosacari Jesuucua

⁴⁰ Jesu jaara pahuatanu puecaquiaari, tii quiniaa pueyari tama pocojoriquiaajaaja. Noojiaqueya nojorijinijinioori sequereeri:

—¡Nio pueyanoqui seetanujanaa Pueyaso sequenu panishano caminiujunia, nooj, tarijia sequesaaquiaari pocua niriqianotej!

⁴¹ Tamasacaari saniniuujia naa sequeriquiaacujua:

—¡Nojuacuajaari Cristo, Pueyaso Jiyarosano pocua!

Tamasacaari saaja nojori riucaaree:

—¿Cristoteeri Galilea jiyajiniji supuenutaniya? ¡Maja! ⁴² Tariucuacaanu Pueyaso Rupaajinia naajiotasanojiniji, paari niishiyani, Cristoori pa supuetanaa jiyaniijia David niquiohuajiniji supuenutaniya. Belén tiacajinia rasaanutaniyari, supuetana David tiacajinia.

⁴³ Naacujitij, puetunu pueyajanaari Jesuucua juayonuutaquiaari. ⁴⁴ Tamasacaari saniniuujia Jesu quianu paniriqiaa juucua. Naajaa, majaari na quiatunu quirii.

Judiocuaca camarucua tiuyaquishacari Jesuucua

⁴⁵ Pueyaso Secojoja tia cojuanaa pueyari Jesu tojitariquiaa juhuajaniya. Na nuhuaji, socua quiojyarohuari na jiyaramiquiniaa pueyacua. Nojori jiyaramiquiniaa pueyari quiquiaari Fariseocuaca, pueyacuara secojonaa camarucuanio. Nojori jiyaramiquiniaari nojori sequereeri:

—¿Casaara Jesu nia jaatucuyaquimiohuani?

⁴⁶ Nojori jiyaramiquishano pueyari saaja nojori riucaaree:

—¡Majaari quenaaja tamonu pueyano pocuanu juhua cuno pueyanojua, seetanu rupajanaa pahuataja cutara!

⁴⁷ Fariseocuacaari cunora nojori juaarii:

—¿Niaateeri niaacua na shanacuree na sapojonura niajanijajuhua? ⁴⁸ ¿Tamonu pa camarucujinijinote nocua tiuurii, canaa Fariseocuacajinijiojuhuaj? ¡Maja! ⁴⁹ ¡Cuno pojori Jesuucua tiuujiacani, nojoriiri Moisés Rootasano niishiyashjiaca! ¡Nojoriiri sesoriquia seque!

⁵⁰ Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niquiaari niucatej. Nojuajaari narta Fariseocuaca sequereeri:

⁵¹ —Pueyanaa, supuetana Moisés cuajaari pa rootaquiaari maja najuhua na sesacanura pueyano, paa jaara coteenu na nequesoreyaquiriní casaa na miiriini.

⁵² Narta Fariseocuacaari Nicodemo juarii saaja:

—¿Quiaateeri narta Galilea jiyajinijinio pueyanohua? ¡Jacaria quia pajere tariucuacaanu Pueyaso Rupaajinia! ¡Quiocua jiyacari niishiri majaari quenaaja niquiriyatu Pueyaso sequesano caminiujunia pueyano supueno quiniutianiya Galilea jiyajinia!

⁵³ Na nuhuaji, puetunu cuno pojorijianaari na tiajinia quiojyarohua.

8

Jesu jiyanooshacari maaji

¹ Jesuuri saniniuujia Olivo cuhariquiajinia quiaaree. ² Jesuuri tariquicuajii tiuquiriohua Pueyaso Secojoja tiajinia. Canaari nata quiriquiaajuhua. Pueyari nocua rerejoquiaari. Nojuajaari cajirii pueya na niishitiojonura juucua.

³ Moisés Rootasanojiniji niishitiojonaa, mariyata Fariseocuanio, cuno pojoriiri jiyacari maaji jaatucumaa Jesuucua. Cuno maajiri riuratasaaquiaari numuetucushiyano. Nojoriiri cuno maaji nujuateree pueya taccoji. ⁴ Jiyacari Jesu sequetereeri:

—Niishitiojonanaa, nio maajiiri quiasaaree numuetucushiyano. ⁵ Moisés Rootasano-jiniji paari niishiyani, jiyano maaji cuara mosaaria saitia jacusano. ¿Quiajaniyarijiataj, taa quia sequeyanijia?

⁶ Judiocuaca camarucuaari naa Jesu nequesotaree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiriojotare nojori jiyaniijianucua. Jesu cutaraari maja quenaaja nojori na riucuanu quirii. Nojuajaari saaja jorejoree, jiyajinia na naajionura na juaashiquiata. ⁷ Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajaniyajinijiniote sesa miyashijiani, nojuaja cuara na coteetaara janu.

⁸ Jesuuri jororohuacuhua socua na naajionura jiyacua. ⁹ Cuno pojori tojishacari naa Jesu sequesantej, puetunujuanaari sanaa quiojorohua. Juhucatecara quiojonu coteequiaariiri socua saaquiapue, na nuhuaji, socua naatujoori nojorijiniji. Nojoriiri naa quiojoquiaariuhua puetunujuanaa. Saaja Jesuuri jateeqee cuno maajitia. ¹⁰ Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu cureenu quirii na jacunura quiajaniya saitia?

¹¹ Maajiiri Jesu riucuaaree:

—Shaaqui puetunujuanaa, Jiyaniijianaa.

Jesuuri maaji sequereeri:

—Janiyari quia jiyano ya cutarani. Juhujaniya quia quiaarohua. Majaari sesa quia miini socua.

Jesuuri pueya jiuujia cuhuatana

¹² Nojori nuhuaji, Jesuuri pueya niishitiojonu coteerohua. Nojori sequereeri:

—Janiyari pueya jiuujia cuhuatanani. Cante cucua tiuuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

¹³ Tii quiniaa Fariseocuacaari naa Jesu juaarii:

—¡Quiaacuajaari tama quia cuaqueyajiniji pohuataa! ¡Puetunu quia pohuatasanojuanaari maja tojishano!

¹⁴ Jesuuri nojori riucuaaree:

—Tama cua cuaqueyajinijiaa cua pohuatasacari, cunoori maja najuhua pohuatasano. Cua pohuatasanoori seetanujuanaa cutara. Janiyacuajaari niishiyani teje cua niqiaarini, tee cua quianutaniuhua. Niaari saniniujia niishiyacuyacuua teje cua niqiaarini, tee cua quianutaniuhua. ¹⁵ Niaari pueyacuara saquiriojotaquiaa saaja nia niqishanojiniji, nia tojishanojinijijuhua. Janiya cutaraari maja cua saquiriojotanu pueyacuara. ¹⁶ Janiya jaara juaari sesa miijia cutarani, cua sequesano cutaraari seetanujuanaa, niqiriyatujua cua quiaquishacari. Cua Jiyarona cua Quecuajaari cua cojqiaa cuata na juaaniuria sesa miijia. ¹⁷ Niaacuajaari Moisés Rootasanojiniji niishitiojotaa: “Caapiqui pueyano pohuatasano jaara juhua tarajanu pohuatasano quiriijuhua, cuno cutaraari seetanujuanaa”. ¹⁸ Naajuhua, canaari caapiquini. Tama cua cuaqueyajaaja cua pohuatasacari, cunoori seetanujuanaa, cua Jiyarona cojishacari janiya. Nojuajaari cua Que.

¹⁹ Fariseocuacaari na nequesotaree:

—¿Teeteeri quia queni?

Jesuuri nojori riucuaaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijuhua.

²⁰ Jesuuri puetunu nio pohuatariquiaajanaa Pueyasora niqutiojosano cumaneeca racataja shuriucuaji, Pueyaso Secojoja tiajinia. Naajaa, majaari pueya quianu quiriinquinijioj, juhuanajuaja na monu juuca quiaquishacarija.

Jesuucua tiyashijitacaari jyanoyaquishaanutaniya

²¹ Jesuuri cuno Fariseocuaca sequerohuacuhua:

—Janiyari quianutaniyani. Niaari cua pajenuunutaniya juucua. Niaari cusunuunutaniya sesa miijiacaja, jiyanooshoo nia quishacarija, cucua nia tiyacuiniucua. Naaratej, majaari nia naata quianu quiniutianiya tee cua quianutaniyucaani.

²² Naa Jesu sequesacarijij, cuno narta Judiocuacaari tama sequetooreejaaja:

—¿Casaara na sequerecuaraarini: “Maja nia naata quianu quiniutianiya tee cua quianutaniyucaani”? Tama na cuaqueyajaaja miaquenutaniya jiyoteeri.

²³ Jesuuri nojori sequereeri:

—Niaari ninishiqui quiquojinijinio. Janiya cutaraari jiyocuaanujinijinioni. Niaari saaja miijia quijia. Janiya cutaraari maja niiquijinioni. ²⁴ Janiyacuajaari cunora

nia sequereeni, niaari jiyanooshoojua cusonuunutaniya nia cuaracashitiniuucua janiyari maja Pueyaso Niyanuni, taa cua sequequiaa nijaniyacujani. Cunora niaari jiyanooshoo quiniutianiya, pueyaracaanu saniitiosano nia quiniuria.

²⁵ Nojoriiri Jesu nequesotaree:

—¿Canteeri quiajaniyani?

Jesuuri nojori riucaaree:

—Janiyari najuhuaana niaata pocoojiyani. Majaari nia tojiniu janiya. Janiyacuajaari tari nia sequereeni cante janiyani. ²⁶ Janiyari queraatia jiitiajaa cua sequesocoriquiano nijaniyani. Naa jaara nocua tiyacuiri, niaari pueyaracaanu saniitiosaanutaniya. Puetunu cua sequesanojuanaa nijaniyani, cunoori seetanujuanaa. Cua pohuatasano mijiria, cunoori cua Jiyarona sequesano janiya. Na sequesanoori seetanujuanaa cutara.

²⁷ Majaari nojori niishiniu quiriquiaa Jesuuri na Que Pueyasojiniji pohuatariquiaa na sequesacari “cua Jiyarona”. ²⁸ Jesuuri cunora nojori sequeree:

—Naa jaara cua teetere, niaari shusha jiyacari niishiniutianiya, janiyari Pueyaso Niyanuni. Niaari niishiniutianiyajuhuaaj, majaari tama cua niishiriojosanojuaja cua miiniu quijia. Janiyari saaja cua Que niishitiojosano pohuatajani. ²⁹ Cua Jiyaronacuajaari cuata quiya. Majaari cua Que cartenu janiya, pueyaracaanu cua miiniuucua na panishano.

³⁰ Naa Jesu pohuatasacari pueya niquiaratej, queraatia pueyari jiyacari nocua tiuuri.

Pueyaso pueyajiniji pohuatasano, Sesaaca pueyajinijino

³¹ Jesuuri shusha nocua tiuuniaa narta Judiocuaca sequeree:

—Naa jaara seetanujuanaa cua pohuatasano tojjijaca quiri pueyaracaanu, niaari cua pueya quiniutianiya. ³² Naa jaara naa miiritij, niaari seetanu rupaajanaa niishijaca quiniutianiya. Naacuajitij, niaari seetanujuanaa juhua cartesano pueya quiniutianiya, juhujaniya quijiaa nia quiniuria.

³³ Narta Judiocuacaari Jesu riucaaree:

—Canaacuajaruhua supuetana Abraham jihuacuajinio supueno pueyani. Majaari quenaaja canaa quiniu quijia tamasaca poonijioteseano pueya. ¿Casaara naa quia sequeya canaarini, canaa quiniuria cartesano pueyani?

³⁴ Jesuuri nojori sequeree:

—Seetanujuanaa nia sequeyanijia, cante sesa miijiacani, nojoriiri juhua poonijioteseano pueya quiya. Majaari na naata maninia miijia na quiniu. ³⁵ Poonijioteseano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaracaanu quiniutianiya cua camarnutani”. Na camarnu jaara na paniyacuiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua. ³⁶ Naajuhuaaj, janiya jaara nia jaariutiare nia poonijiotenajinijini, niaari seetanujuanaa cartesano pueya quiniutianiya, Pueyaso muerasura nia quiniuria cutara. ³⁷ Janiyacuajaari niishiyani, niaari seetanujuanaa pa supuetana Abraham jihuacuajinio supueno pueya. Naajaa, niaari cua tojiniu paniyacuia. Niaari cunora cua monu pania. ³⁸ Janiyari nia pohuatariquiaa cua Quejiniji cua niquishanoni. Niaari saniniujia nia que sequesano miiquiaacujua.

³⁹ Nojoriiri Jesu sequeree:

—¡Abrahamcuajaari canaa shipininio!

Jesuuri nojori riucaaree saaja:

—Abraham jaara seetanujuanaa nia shipininio quiri, niaa mariqui maninia miijiaa quiricuara, taa Abraham quiquiaaricuuaani. ⁴⁰ Saniniujia, niaari cua monu pania saaja cua pohuatanuucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara. ⁴¹ Niaari saaja sesa miijiaa taa nia que miiquiaacuuaani.

Nojoriiri Jesu juarii:

—¿Casaa quia sequeyani? ¡Canaari maja saa maaji rasanajuani! ¡Pueyasocuajaari canaa Que, maja tamonu!

⁴² Jesuuri nojori sequeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua ninu quiquiaari. Cua Que Pueyasocuajaari cua jiyaroquiaari. ⁴³ Cua rupaa nia tojiniu paniaquishacari, niaari cunora cua pohuatasano niishiyacuia. ⁴⁴ Seetanujuanaa, nia quecuajaari Sesaaca, samaruhua jiyanjia. Niaari cunora miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuanaa. Pueyaracaanu sapojuajaari. Na sapojosacari, naa miyari sapojuaja na quiniuucua. Sapojonu niishiniuni, cunoori nojuajiniji supuequiaari. Niaari cuno nia que tojjijaca. Nocujaji niaari naa sapojonuujuacuajuhuaaj. ⁴⁵ Saniniujia, cua pohuatasacari seetanu rupaajanaa nijaniya, majaari cucua nia tiuuniu quiquiaa. ⁴⁶ ¿Casaa cua miiquianu

sesani? Cante na niishiyani cuara sequeera. Saniniuuja, janiya jaara sesa miyashijia quirini, ¿casaara cucua nia tiyuaquiyacuaraarini, seetanu rupaajanaa cua pohuatasacari niajaniani? ⁴⁷ Cante Pueyaso pueyani, nojoriiri Pueyaso rupaa tojiquiaa cutara. Nia-janiya saniniuuja, niaari na rupaa tojiaquiya, na muerasu nia quiyaquishacari.

Jesucristoori tariucuacaanu quijiajuhuanaja Abrahamjiniji

⁴⁸ Narta Judiocuacaari naa Jesu juaarii:

—¡Canaacuajaquiri maninia sequeriquiaa quiajanijajinijini, quiaari Samaria jiyajinijinio tahue, samaruraca pueyanotuhuj!

⁴⁹ Jesuuri nojori riucaaree:

—Majaari janiya samaruracani. Janiya cutaraari saaja cua Que tojiquiaani. Naaari saniniuuja cua rerequetequiaacujua. ⁵⁰ Naajaa, majaari cua tacaaniu naa nia sesacasacari janiya. Tamonu cutaraari quiya, nojuajaari paniya pueya tojinuria janiya. Nojuajaari cua rerequetejaca saniitioriquiano. ⁵¹ Seetanujuanaa nia sequeyanijia, cante cua rupaa tojjiani, nojoriiri maja na shaajenu quiniutianiya.

⁵² Narta Judiocuacaari na sequeeree:

—¡Quiaritia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujuunaaajanaano. Quiaari saniniuuja quiaritia sequeyacuaja: “Cante cua rupaa tojjiani, majaari na shaajenu quiniutianiya”. ⁵³ ¿Quiaateeri jiyaniya quiaa socua cutara pueyano canaa supuetana Abrahamjiniji? ¡Maja! Nojuajaari shaajequiaari. Mariyata puetunu Pueyaso sequesano caminiujuunaa pueyajanaari shaajequiaarijuhuaj. ¿Canteeri quiajaniani naa quia sequenuratej?

⁵⁴ Jesuuri nojori riucaaree:

—Janiya jaara tama cua cuaqueyajaaja jiyatenu paniri juhua jiyaniijarani, cunoori najuhuanaj. Seetanujuanaa, cua Quecuajaari cua jiyatequiaari jiyaniijarajanaa. Nojuajaari nia sequesano nia Pueyasota. ⁵⁵ Naaari seetanujuanaa na niishiyashijaca. Janiya cutaraari cua Que Pueyaso niishiyani. Janiya jaara nia sequereni, maja cua niishiniu nojuaja, janiya maara sapojoua quirini taa nia quiyacuaani. Janiya cutaraari na niishiyani. Janiyari cunora na rupaa tojjiani. ⁵⁶ Nia supuetana Abrahamri timiquiaari na niishishacari janiya mijiria supuenutaniyani. Nojuaja jaara cua niquiquiaari mijiria quiyano tari, jiyanohua timiquiaariiri.

⁵⁷ Narta Judiocuacaari Jesu juaarii. Naa na sequetureeri:

—¡Jaj! Majaruhua juhuanouaja cincuenta marijia shocojonu quiajanija. ¿Taa quia sequeyarini quiaa canaa supuetana Abraham niquiquiaari?

⁵⁸ Jesuuri nojori riucaaree:

—Janiya nia sequeya seetanujuanaani, Abraham raaquishacaritia, janiyari tari quijiani.

⁵⁹ Naa nojori tojishacari Jesu sequesanotej, narta Judiocuacaari sai pajenuree Jesu na jacutajara juucua. Jesuuri nojoriicujaji jamaarii saaja. Pueyaso Secojojua tiajiniji tohuatamaari.

9

Jesu jeeacasacari cariojuaru namijia, naa rasanouhuanajaj

¹ Tamacari Jesu rucuanajosacari canaata, canaari cariojuaru pueyano niquirini, naa rasanouhuanajaj. ² Canaari cunora Jesu nequesotareeni:

—Niishitiojonanaa, ¿casaara naa cuno pueyano rasaanquiaari cariojuaruni, na queya miiniuucua sesatee, tama sesa na miiniuucuaajaaja soj?

³ Jesuuri canaa riucaaree:

—Maja. Maja cunora naa na rasaanu quiquiaari. Naa rasaanquiaariiri Pueyaso cumaaca niishishaanura, na namijia jaara jeeacaare niquijiara na quiniuria. ⁴ Juuca quishacaritia, pa tucuatere miiniu cua Jiyaron sequesano cua miiniuria. Paa quera niniyani. Jaara niniquii, majaari pa naata poonijonu quiniutianiya tari. ⁵ Mijiria cua quishacaritia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa shaajenujiniji sequeriquiaa miriqui.

⁶ Naa Jesu sequenu nuhuajitij, nojuajaari jiyocua riocoree. Na riacauta coniquioreeri. Coriyacau mara ruporohua cariojuaru namijiaacuaari. ⁷ Cariojuaru sequerohuari:

—Siloé cuarimia quia jeequese quia namijia.

Hebreo rupaajinia, Siloé cuariiri sequeya “Pueyaso Jiyarosano cuari”. Cariojuaruuri cuarimia quiaaree. Tii na namijia jeequeseeri. Tariucua niquijiaari na tiajinia tiuquirihua. ⁸ Cariojuaru na quishacaritia, nojuajaari na miajajau na masetajara cumaneeca

mashiniquijiojua quiquiaari. Puetunu pueyajanaari na niquitiujia naa na mashiniquijiosacari. Naacuajitij, nojuaja jaara niquijiara quiquiaari, tarijia na niquiniaa pueyari, mariyata na shuriucua quiniaa pueyano, nojoriiri tama sequetooquiaarijiaaja:

—¿Cante cuno pueyanojaarani? ¿Majate noocuaja tarijia cumaneeca mashiniquijiojuatej?

⁹ Noojiaqueya pueyari sequereee:

—¡Taaquiririniij, nojuajacuaj!

Tamasacaari saniniuujia sequereecujua:

—Nojuajaquinio naasucua. Juhua nojuaja niquishiyacuaj, majaari seetanujuanaa nojuaja.

Tarijia quijia cariyojuaruuri saa sequereeejaa:

—Taaquiririniij, janiyacuaaquinatejaj.

¹⁰ Naaratej, pueyari na nequesotaree:

—¡Quiaacuaja cariyojuaru quijaruhua! ¿Taa niquijiara quia quiriohuarini?

¹¹ Nojuajaari pueya riuacuaree:

—Cuno, Jesu jiyaniashano pueyanoni, nojuajaari mara coniquioree cucuara. Cua namijiaacua na ruporohuari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, jjaniyari niquijiara quiquini!

¹² Pueyari na nequesotaree:

—¿Teeteeri quia namijia jeecana pueyanoni?

Nojori riuacuareeri:

—Johuaj. Maja cua niishiniu.

Fariseocuaca nequesoreesacari na namijia jeeacasano pueyano

¹³ Pueyari Fariseocuacaacua jiyataaree Jesu jeeacasano cariyojuaru pueyano. ¹⁴ Jesu jaara mara coniquioquiaari na jeeanura cuno pueyano namijia, cuno juucaari Judiocuaca samaatenu juuca quiquiaari. ¹⁵ Nocuaji Fariseocuacaari tarijia cariyojuaru quijia nequesotaree taa niquijiara na quiiriini. Nojuajaari nojori riuacuaree:

—Jesu cua namijiaacua rupojorucuaa marani. Na nuhuaji, janiyari cua namijia jeequeeseeni. Naacuajitij, janiyari quiarjia niquijia quiyani.

¹⁶ Noojiaqueya cuno Fariseocuacajiniiniioori saa sequereeejaa:

—Cuno pueyano, nio pueyano namijia jeeacarucuaani, nojuaja maja Pueyaso Jiyarosano. ¡Nojuajaari Moisés Rootasano tojiyashijia, naa na miiniucua samaatenu juuca!

Tamasacaari saniniuujia sequeriquiaacuajua:

—Jaara sesa miijia quiri, ¿maatucua casaara poonijiore Pueyaso cumaacatacuaraarini?

Naa nojori juayonuutunuucuatej, nojoriiri juhua raquitiiri. ¹⁷ Nocuaji tarijia quijia cariyojuaru nequesotaturoruhuarihuaj:

—Niquijia quia quishacari quiarjia, ¿taa quia sequeya Jesuni? ¿Maninia miijiatee?

Nojuajaari saaja Fariseocuaca riuacuaree:

—Janiyara, nojuajaari Pueyaso sequesano caminiujiunia.

¹⁸ Tii quiniaa Judiocuacaari na cuarachashitirii saaja. Nojoriiri jiyaniquiaari maja naasucua seetanujuanaa cariyojuaru cuno pueyano quiniu quijia. Nocuaji nojoriiri na queya sequeturee nojoriicua na niniuria. ¹⁹ Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequesano cariyojuaru rasanoruhuanani? ¿Taa quiarjia niquijiara na quiriohuarini?

²⁰ Na queyari cuno pojori riuacuaree:

—Taaquiririniij, nojuacuacuaquinateja canaa niyanujuaj. Naa cariyojuaru rasaquiaariiri. ²¹ Majaari canaa niishiniu cutara taa na quiriohua niquijiarani. Majaari canaa niishiniujuhuaj, cante na namijia jeeacarucuaani. Nojuaja nia nequesotare, tari cumantumacacuaja. Nojuajanaa cuara nia pohuataara cutara.

²² Na queyari naa riuacuquiaari narta Judiocuaca camarucuatej, na pueretusacari nojori. Judiocuaca camarucuaari tari sequetuguiaari: “Cante Jesu sequeyani nojuaja seetanujuanaa Pueyaso Jiyarosano, naa sequejaca pueya cuara tenujusaaria maja Pueyaso secojojua tiajinia na tiuquiniuria socua”. ²³ Naaratej, na queyari naa narta Judiocuaca riuacuquiaari: “Nojuaja nia nequesotare, cumantumacacuaja”.

²⁴ Cunora cuno Judiocuacaari socua piiriohua na namijia jeeacasano pueyano. Nojoriicua na nishacari, na sequetureeri:

—¡Paacuajaari Pueyaso niquiara niya quiyani! Naaratej, ¡seetanujuanaa canaa quia pohuatare cuno pueyanoinijij! ¡Canaa cutaraari niishiyani cuno pueyanoori sesa miijia!

²⁵ Na namijia jeeacasano pueyanoori nojori riuacuaree:

—Naajaa, jaara sesa miijia quiri, jaara maninia miijia quirijiuhuaj, maja cua niishiniu cuno. Janiya cutaraari niishiyani, jjaniyari tarijia niquiyashijia quiquiaarini! jJaniyari saniniuujia quiarijia niquijia quiya cutarani!

²⁶ Nojoriiri na nequesotaroahuacuahuaj:

—¿Taa na miirucuaa quiajanijajaarani, niquijia quia quiniuriani?

²⁷ Narta Judiocuaca camarucua sequeree saajaari:

—Janijacuaja tari nia pohuataareeni. Majaari nia tojiniu paniniu janiya. ¿Casaara nia paniya socua cua pacutenura sequenu nijaniyani? ¿Niaate na pueyara quiniu paniya soj?

²⁸ Naa na sequesacari nojoritij, cuno Judiocuaca camarucuaari na sesacaturee. Naa na sequeteeri:

—¡Quiaari cuno pueyano tojjijacuaja! ¡Canaa cutaraari supuetana Moisés Rootasano tojjitajacani! ²⁹ ¡Canaa cutaraari niishiyani Pueyasojuanaari Moisésua muetaquiaari na rootanura nojuaja! ¡Saniniuujia cuno pueyanoorijiataj, majaari quenaaja pa niishiniu teje na supuequiaarini!

³⁰ Na namijia jeecasano pueyanoori nojori riucaaree:

—¡Niaaquiiri mosanucua seetanujanaa! ¿Majateeri nia niishiniu teje na supuequiaarini? ¡Nojuajaari cua namijia jeecarucuaa! ³¹ ¡Paacuajaari niishiyani Pueyaso maja na tojiniu quijia sesa miijiaa secijosano! ¡Saaja na timitiajaca secijosano tojiya cutaraari, cante na panishano miiguaacuajani! ³² ¡Majaari quenaaja pa tojiniu quijia tamonu pueyanojiniji, cante cariojuaru namijia jeecajani, naa cariojuaru rasanoyuhuanaj! ³³ Cuno pueyano jaara Pueyaso Jiyarosano quiaquiri, ¿taa cua namijia na jeecarucuaacuaaarini?

³⁴ Cuno pojoriiri na juanikutia na sequeteeri:

—¡Quiaari sesa miijia rasaaquiaari! ¿Quiaateeri jijanojuaa canaa niishitiojonu paniaruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso seciojua tiajinia. Naacuajitij, cuno pueyanoori juhua taanusano pueyano quiquiaari narta Pueyaso timitiajaca pueyajiniji.

Jesu tojjitaaashijiaa pueya juhua cariojuaru

³⁵ Jesuuri niishiquiaari cuno pueyanoori tenujusaarucuaa. Jaara na riuriataquiaari, Jesuuri na sequeree:

—¿Quiaate Pueyaso Niyanuucua tiuujia?

³⁶ Jesu sequereeri:

—Jijaniijianaa, cua sequere canteeri nojuajani, nojuaja cua niishiniuria nocua cua tiuuniuria.

³⁷ Jesuuri na sequeree:

—Quiaacuaja na niquiyaruhua. Nojuajaari cunocuaaja, quiata pocoojiyani.

³⁸ Jiyacaritij, pueyanoori Jesu cariquimijaji mojoquetaree. Na sequereeri:

—¡Quiocua tiuyanijia, cua Jijaniijianaa!

³⁹ Na nuhuaji, Jesuuri cuniqui quiniaa pueya niquiara sequeree:

—Janiyari mijiria niquiaarini juhua cua raquiriojotanura mijiria quiniaa. Naacuajitij, cante niishiyani nojuaja juhua cariojuaru quiya, nojuajaari juhua namijiaraca quiniutianiya cucua na tiuushacari. Saniniuujia, cante jjaniyani nojuaja niquijia cutara, nojuajaari juhua cariojuarura tari jiyatesaaree, cucua na tiuyaquiniuucua.

⁴⁰ Tii quiniaa Fariseocuaca jaara tojiquiaari naa Jesu sequesantej, nojoriiri Jesu sequeree:

—Naa quia sequesacaritij, ¿quiaateeri sequeya canaari cariojuarujirijiuhuaj?

⁴¹ Jesuuri nojori riucaaree:

—Niaa jaara tama nia cuaqueyajaaja jiyatere juhua cariojuarura cucua nia tiuuniuria, Pueyaso maara nia jiyanoori. Quiarijiani, tama nia sequenuucuaajaaja, “Canaa niquijia cutarani”, niaari jiyanooshoojua nioojia nia tacatoyaquiniuucua.

10

Jesu pohuatasano miriqui borrego cojuanajiniji

¹ Jesuuri socua pohuatarohua pueya niquiara. Naa sequereeri:

—Seetanujanaa nia sequeyanijia, cante borrego mataca tohuatayaco tiuquiyajiniani, nojuaja jaara tamocoji tiuquimia, cunoori nohuasejooja. ² Saniniuujia, cante tohuatayaco tiuquijia cutarani, cunoori borregohua camarujanaa cutara. ³ Tohuataya cojuanaari tiootiu riataquiaa nocuaji. Borregohua camaruuri puetunu na seya sesacajanaa jjaniquijia. Na borregohuari na rupaa niishijia. Na camaruuri naa na tohuatanijooja puetunujanaa na matacainiji. ⁴ Puetunu na borregohujanaa jaara tohuareetama, na camaruuri na puetaja. Na seyari na nuhuaji sacuaaja, na camaru rupaa nojori niishishacari. ⁵ Saniniuujia,

borregohuari maja na nuhuajiniu quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

⁶Jesuuri naa pohuataquiaari miriqui nojori niquiara. Nojoriiri saaja niishiyaquiaari casaa na niishitiojonu paniriquiaa nojorini.

Jesuucristo, maninia pa cojuana

⁷Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuatayani, cua borregohua tiuquitianura cua Que Pueyasocua. ⁸Cante cua niyacarijia nijioquiaari coteenuni, nojoriiri sesa miijiaa quiquiaari, nohuasenujuaca. Cua borregohuari namitia nojori numueejushiquiaari. ⁹Janiyari juhua tohuatayani. Cante janiyarinijia tiuquiya cua Queecuaní, nojuajaari Pueyaso pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutianiyani, tii na quiniuria maninia cojuasano. Janiyari juuca na tohuatenutaniyani, jiyasocua cua miaquetenura carijiniacuma.

¹⁰'Nohuasejojuaari saaja tiuquijia borregohuacua na nohuasenuura, na puecoonura-juhuaj. Naa na shaajaaja puetunujuanaari. Janiyari saniniuuja niquiaarini cua borregohua cua jiyatenura pueyaracaanu quijiacara, seetanujuanaa jiyano hua shuquiriaatia quijiaa nojori quiniuria. ¹¹Janiyari maninia cojuananí, maja tamonu. Pueyano jaara maninia na seya cojuana maniniu quiri, tama na cuaqueyajaaja panitaja na seyacuara. ¹²Saniniuuja, borregohua camarujuanaa jaara tamonu cojuateya na seya, cuno pueyano jaara niquiri sare nocua canujiyano, nojuajaari na puerenuta neteja. Borregohua tiu-jiaqueeri. Naa miijiaari cuno borregohua quiaquiniuuca na seyajanaa. Naacuajitij, sareeri borregohua soojua. Naa na cocuatajaari. ¹³Cuno borregohua cojuanaari naa neteja sarecuajij na tacayaquishacari seetanujuanaa cuno borregohuacua. Nojuajaari saaja paniya na poonijiosano sami na niqitiosaanura.

¹⁴'Janiya cutaraari maninia cojuaja borregohuani, na camarujuanaa cua quishacari. Janiyari puetunu cua seyajanaa niishijiani. ¹⁵Nojoriiri cua niishiyajuahuaj, taa cua Que niishiya janiyacuaani, mariyata taa cua niishiya cua Quejanihuaj. Janiyari tama cua cuaqueyajaaja panitaja cua borregohuacuarani. ¹⁶Janiyari socua borregohua jiiitiaani. Nojoriiri maja nio cua borregohua maanujinijinio. Janiyari nojori rijionutaniya niyara-juhuaj. Nojoriiri cua tojtiriqiuano. Naacuajitij, puetunu cua borregohujanaari jatiqui quiriqiuano, niquiriyatu cojuanaracajuhuj.

¹⁷'Cua Queeri cua paniya naa cua panitiasacari tama cua cuaqueyajaaja cuno borregohuacuarani. Janiyari tama cua panishacarijaaja mosaanutaniyani, na nuhuaji cua samiitianuhuara, pueyaracaanu quijia cua quiniuhuara. ¹⁸Majaari quenaaja tamonu naata monu janiya cua paniaquishacari. Janiyari cua panishacari cusonutaniya cua borregohuacuarani. Janiyari cumaacaracani nojoriicuaa cua cusonura. Janiyari cumaacarcacajuhuj cua samiitianuhuara. Cua Quecuajaari naa cua miiniuria cua jiyaroquiaari mijiria.

¹⁹Narta Judiocuaca jaara tojiquiaari naa Jesu sequesantej, nojoriiri socua tama juay-onuutaquiaarijaaja Jesuucua. ²⁰Queraatia pueyari jiyacari sequere:

—¡Cuno pueyanoori samaruraca! ¡Maja na tojinu, pueyanaa! ¡Najuhuaa pocuaano!

²¹Tamasacaari saniniuuja sequeriquiaacujua:

—¿Samaruraca pueyanoteeri maninia casaa pohuatajajaara juhua nio pueyanojua? ¡Maja! ¿Pueyanoteeri na naata samaru cumaacata jeeccanu cariyojuaru namijiajaara? ¡Maja na naata!

Judiocuaca camarucua niqiniu paniaquishacari Jesu

²²Tamacari, Jerusalén tiacajiniari queranacusaariquiaa. Cunoori quiriqiaa pueya niishiriojonura nojori juhua cuno juacajinia Pueyaso Secojoua tia jiyatequiaarihuua seetanujuanaa juhua Pueyaso quiquiora na quiniuhuara. Jiyacariiri shuniya quiriqiaa. ²³Jesuuri tii quiriqiaajuhuj. Pueyaso Secojoua tiajinia quiriqiaari. Nojuajaari pueya jiyaniquishano tariucuacaanu jiyaniijia Salomón canujuucojojuajinia riujuuni-quojoriqiaa. ²⁴Jiyacariitij, canaa Judiocuaca camarucuaari tii na cosesee. Naa na nequesotatureeri:

—¿Taacari canaa quia sequenutaniya socuacari cante quiajaniani? ¡Quiaa jaara seetanujuanaa Pueyaso Jiyarosano quiri, quiarijia canaa quia sequere!

²⁵Jesuuri nojori riucuaaree:

—Janiyacuaaja tari nia sequecanuni. Niaari saaja na cuaracashitiquianu. Naa cuaara niishiiria cante janiyani, nia niquishacari cua miishano cua Que sequesano janiya. ²⁶Niaari saaja cucua tiyauquiaa cua borregohua maanujinijinio nia quiaquishacari. ²⁷Cua borregohuari cua rupaa tojijia cutara. Janiyari nojori niishiyajaanihuaj. Nojoriiri cunora

cua nuhuajiquiaa. ²⁸ Janiyari pueyaracaanu quijiara nojori jiyatequiaani. Majaari nojori juurequenu quiniutianiya. Majaari quenaaja tamonu naata jaariuutianu quiniutianiya nojori janiyajiniji. ²⁹ Cua Queeri cua borregohua cua niqutioquiaari. Nojuajaari socua jiyanoehua cumaacaraca tamasaca cumaacaraca quijiacajiniji. Naacujatij, maja quenaaja tamonu naata cua borregohua jaariuutianu cua Quejiniji. ³⁰ Janiya cua Queta, canaari juhua niquiriyatuni.

³¹ Jiyacaritij, canaa Judiocuaca camarucuaari sai rijiorohuacuhuj, Jesu na jacutajara juucua. ³² Jesuuri saaja nojori sequeree:

—Janiyari queraatia maninia casaa miiquianu saaja cua Que cumaacata nia niquiarani. ¿Teyanoocua nia jacunu paniya janiyani?

³³ Nojoriiri Jesu riucuaaree:

—Majaari canaa jacunu quiniutianiya quiajaniya maninia quia miiniuucua. ¡Canaari quia jacunutaniyani sacuaraatia quia pocuanuucua Pueyaso niquiara! ¡Quiaari tama quia cuaqueyajaaja jiyateya juhua Pueyasora! ¡Cunoori jiyanoehua sesa! ¡Quiaacujaari pueyano, juhua canaajuhuj!

³⁴ Jesuuri nojori sequeree:

—Niaacujaari tariucuacaanu naajiosano Pueyaso Rupaa jiitiaa. Pueyaso sequesanoori naa naajiotasano quia tii:

“Janiyacujaari nia sequequiaarini, niaari pueyasohua”.

³⁵ Paacujaari niishiyani, Pueyaso Rupaajinia naajiotasanoori maja na naata cuarachitishaanu. Pueyasojuanaari pueya jiyaniquiquiaari “pueyasohuata”, noo pojori, teyano nojuaja jiyatequiaari Israel pueya jiiitanaaracuajani. ³⁶ Naajuhuj, Pueyasocujaari cua saquirioquiaari mijiria na jiyarosocoriquiano. Naa Pueyasojuanaa Jiyarosano cua quishacaritij, ¿niaatucua casaara sequereni janiya Pueyaso niquiara pocuaaree sesani, cua sequesacari janiya Pueyaso Niyanuni? ³⁷ Janiya jaara cua Que panishano miyaquiri na cumaacatani, janiya maara nia juayaquirini cucua nia tiuyaquiniuucua. ³⁸ Niaacujaari cua Que cumaacata cua miishano niqiquiaa. Naa jaara cua pohuatasanoocua tiuniu paniyaquiri, naajaa, cua Que cumaacata cua miishanoocua nia tiuuri quenaaja. Naa jaara niishiri puetunu cua miishanojuanaari cua Que Pueyaso cumaacata miishano, niaa maara niishiri Pueyasoori coojia rupueja, janiyari noojia rupueyajaaniuhuj.

³⁹ Jiyacaritij, nojoriiri socua Jesu quiatunu paniriohuacuhuj. Jesuuri saaja nojoriicuaaji mashiquii.

⁴⁰ Jesuuri canaa jiyatarohua Jordán moo taquijiria tee Juan tiuquinijioquiaari tarijia pueyacuajani. Canaari tii quishiini. ⁴¹ Queraatia pueyari Jesuucua nijioquiaari tee canaa quiriqiaacuajani. Nojoriiri tama sequequiaarijaaja Jesujiniji:

—Tiuquinijiona Juanri maja quenaaja na miiniu quijia casaa Pueyaso cumaacata. Naajaa, puetunu nio pueyanojiniji na sequesanojuanaaquiri seetanujuanaa quijia.

⁴² Naacujatij, queraatia pueyari Jesuucua tiuquiquiaari tii, tee canaa quiriqiaacuajani.

11

Lázaro shaajenujiniji pohuatasano

¹ Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiojuanaa quiquiaari, Judea jiyajinia. Na rimiatuhua quiquiaari María, Martiano. Nojoriiri cunoo Betania tiacajinijinio quiquiaarijuhuaj. ² Lázaro rimiatu Mariani, nojuajaari noo maajicuaja Jesu niohuaca sacuanijiaquiaari na mueccatatej, nocua na totanu nuhuaji na shanohua jaanutaja. ³ Lázaro matasacari cusosu, na rimiatuhuari pueyano jiyarotuhua Jesu numootenuucua. Naaratej, cunoo pueyano tiuquishacari Jesuucua, nojuajaari naa caminiujuquiaari Lázaro rimiatuhua sequesano nojuaja:

—Jiyaniijianaa, quia panishano pueyanona cusosu mataa.

⁴ Jesu tojishacari naa cunoo pueyano sequesanootej, tii quiniaa pueya sequereeri, canaajuhuj:

—Nojuajaari maja na cusonu quiniutianiya na shaajenura puetunujuanaa. Cuno cusonu na jiiitasanojinijini, pueyari Pueyaso cumaacata miishano niquiniutianiya. Pueyari cunora Pueyaso Niyanu maninihuaqueetanutianiya, cua Que Pueyasojuhuaj.

⁵ Marta, María, Lázaroni, nojoriiri Jesu panishano pueya quijia. ⁶ Naajaa, Jesu jaara numootesaacquiaari Lázarojiniji, majaari nocua na quianu quiquiaari ritia. Caapiqui juuca camueeree cuniquijiaaraari, tee canaa quiriqiaacuajani. ⁷ Na nuhuaji, canaa na saquiriojosano pueya sequereeri:

—Judea jiyajinia pa quiaarohuacuara socua.

⁸ Canaari Jesu sequereeni:

—Niishitiojonanaa, cuniquijinio Judiocuacacujaari shusha naataja tii quia jacunu paniquianu. ¿Casaara socua tii quia quianu paniuhuariniuhua?

⁹ Jesuuri canaa riuuaree miriqui:

—Janiyara, juuca juhuanojuaja. Juucaari maninia seetanujuanaa pa rucuanefonura. Paa jaara pananu tiuquiyaquishacarijia rucuanefoneni, paari maninia niquiya pocuajini. Majaari pa tiuriini. ¹⁰ Paa jaara ninishiqui rucuanefonore saniniunijia, paari tiurijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriquiaa Judiocuaca niquiara na rucuanefonura, na mosaanu juuca quiyaquishacarijia. ¹¹ Na nuhuaji, Jesuuri naa canaa sequereee socua:

—Pa rupuena Lázaroori tari maquequee. Janiyari na niucujanuuca quianutaniyani.

¹² Canaari Jesu sequereeni:

—Jiyaniijianaa, nojuaja jaara maqueya, maniniacuajaqui. Naacuajiti paari niishiyani naatanutaniuhacuajaqui. ¿Paatucua casaara najuhanaa nocua quiaareni?

¹³ Naa Jesu pohuatasacari canaa Lázaroinijitij, canaa sequeriquiaa juucuaari Lázaroo tari macu quiriquiaa. Canaari saniniuuja jiyaniquiaani Jesu naasucuaari canaa pohuatariquiaa Lázaroo nareja maqueriquiaa. ¹⁴ Nocuaji Jesuuri maatia canaa sequereee:

—Lázaroo tari cusoyarucuaa. ¹⁵ Janiyari timiyani tii cua quiyaquiniuucua Lázaroo quishacarijia saminio. Naa quiarjia macu na quishacaritij, niaari socua jiyajeneta casaa cua miishano niquniutianiya, seetanujuanaa cucua nia tiuuniuria cutara. Quiarijia cutara, nocua pa quiaare.

¹⁶ Jiyacaritij, Tomásri canaa narta saquiriojosano pueya sequereee:

—Pa Jiyaniijiaata pa quiaarejuhuaj, nata pa cojiritiasaanura pueconno.

Cuno Tomásri pueya sesojosano quiquiaari “Caapueya muetusano”.

Jesu, macunucua samiitianijiojua

¹⁷ Canaa jaara tiuquijioseequiaarini, Jesuuri pohuatasaaquiaari Lázaroo tari cuatro juuca shocotejoriquiaa raaco na niasaanujiniji. ¹⁸ Betania tiacaari catecaja Jerusalén tiacajiniji. (Nareja media hora paa jaara ritia rucuaneyareni). ¹⁹ Naaratej, queraatia narta Judiocuacaari quiojoquiaari Marta, María tiajinia, nojori na cumanijanura na nanu nuhuaji. ²⁰ Marta jaara niishiquiaari Jesu shusha tiuquiriquiaa, nojuajaari nocua tohuataquiaari canaa na naacunura. Majaari María niniu quiriquiaa cutara. Tiajiniaja quiriiri. ²¹ Canaacua Marta tiuquishacari, nojuajaari Jesu sequereee:

—Jiyaniijianaa, iquiaa jaara niya quiquianu, cua nanu maara shaajeyaquiquianu! ²² Naajaa, janiyari niishiyani quiaa jaara Pueyaso secojore, Pueyasoori quia secojosano tojiniutianiya.

²³ Jesuuri Marta sequereee:

—Quia nanucujaja samiitianutaniuhua.

²⁴ Martaari na riuuaree:

—Taaquiriirinij, janiyacujaja niishiyani nojuajaari samiitianutaniuhua macunucua samiitiasocariuhua jiya puequesacari.

²⁵ Jesuuri na sequereee:

—Janiyacujajaari macunucua samiitianijiojuani. Cante cucua tiuujiiani, jaara cusoyare, naajaa, samiitianutaniuhuari. ²⁶ Cante cucua tiuurii saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

²⁷ Nojuajaari Jesu riuuaree:

—Jaa, Jiyaniijianaa. Janiyacuaja niishiyani quiaari Cristo, Pueyaso Niyanu, noj tariucacaanu sequesaaquiaari mijiria niriqianotej.

²⁸ Naa Marta riuucuanu nuhuaji Jesutej, na tiajinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quia quianura.

²⁹ Naa María tojishacari Marta sequesantej, ritia sanequeeri. Jesuucua nimiaari tee canaa quiriquiaacuajani. ³⁰ Jesuuri juhuanojuaja maja na tiuquitianu quiquiaari canaa cuno tiacajinia. Canaari tiaca shuriucua quiriquiaajaani tee Marta naacuquiaari canacuajani, Jesuucua na nishacari. ³¹ Nojori cumanijianaa pueya jaara María niquiquiaari ritia tohuataano tiajiniji, nojoriiri na jiyaniquiaari na nanu raajinia nujuquenuucua quiaa naasucua. Naaratej, nojoriiri na nuhuaji quiaaree.

³² María tiuquishacari canaacua, Jesu cariquimiaaji mojuquetaseeri. Naa na sequereeri:

—Quiaa jaara niya quiquianu, cua nanu maara shaajeyaquiquianu.

³³ Jesu niquishacari María nujuqueyano, mariyata nata quiniaa nujuqueyanojuhuaj, Jesuuri nojori taraajetaree. ³⁴ Jesuuri pueya nequesotaree:

—¿Tee na niasaarucuaani?

Pueyari Jesu sequeree:

—Miji, Jiyaniijiana. Quia niqiqui. Niya niasaarucuaano.

³⁵ Jesuuri nujuqese. ³⁶ Tii quiniaa Judiocuaca niquishacari Jesu nujuqueyano, tama sequetooreejaarijia:

—¡Nia niqiri! Jiyanoehua Lázaro panijiaquiiri.

³⁷ Noojiaqueya cuno pojorijiniiniori sequeriquiaajuhua:

—Jesu jaara cariojuaru namijia jeecacanicuaa, maara Lázaro naataniquianujuhua: maja na shaajenura.

Jesu samiitianishacari Lázaro

³⁸ Jesuuri jiyanoehua na taraajenuta raa jiyajiria catecanoquiaari, canaajuhua. Raari puereetuca saajiaa mishiquosano quiriquiaa. ³⁹ Jesuuri pueya sequeree:

—¡Saajia nia ruutiniri tamocora!

Martaari Jesu sequeree:

—¡Jiyaniijiana, cuatro juuca tari na shoconujija! ¡Tari mocuaatia jaaniyu naasucia!

⁴⁰ Jesuuri Marta sequeree:

—Janiyacuaa tari quia sequereeni, quia jaara cua sequesanoocua tiuuri, quiaari Pueyaso cumaacata cua miishano niqiniutianiya.

⁴¹ Jiyacarij, pueyari saajia ruutinirii tamocora. Jesuuri jiyocuaaanu mauree. Naa Pueyaso sequereeri:

—Cua Quena, quia timitiaanjia. Quiaari tari cua sequesano tojiriucuaacuaa.

⁴² Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaa pueya niishinuria quiaari mijiria cua jiyarocuaari.

⁴³ Naa Jesu sequenu nuhujitij, jiyanoehua na rupaa paaretareeri. Naa sequereeri:

—¡Lázaronaa, quia tohuatama!

⁴⁴ Macuuri tariucua saminio tohuatamaa. Na juaashiquiaa, na nihoacaari jiunio-cosano quiriquiaajaa. Na nacaari puetunu na jiquiocotajanaa mishiquosano quiriquiaajuhua, toquerauta morosano. Jesuuri pueya sequeree:

—Nia saacatare, cuara rucaneera.

Judiocuaca camarucua rojotoosacari na monura Jesu

(Mt 26.1-5; Mr 14.1-2; Lc 22.1-2)

⁴⁵ Naa Jesu samiitianishacari Lázarotej, queraatia narta Judiocuacaari nocua tiuquuaari, noo pojori canapuee Mariacua nijioquiaari na cumanijianuracuajani. ⁴⁶ Noojiaqueya cuno Judiocuacajiniiniori Fariseocuaacuaa quiojoquiaari nojori pohuatanura Jesu miishano. ⁴⁷ Naaratej, Fariseocuaa, pueyacuara secojonaa jiyaniijianucuanio, nojoriiri rerejoquiaari puetunu Judiocuaca camarucuatajanaa. Nojoriiri sequetuquiaari:

—¿Taa pa miiniutianiyani? Cuno pueyanoori queraatia casaa miiquiaa na cumaacata pueya niqiuara. ⁴⁸ Paa jaara nareja na shanacure naa na miiniuriatej, ¡puetunu pueyajanaari na pueyara quiniutianiya, nocua nojori tiushacari! Nojoriiri na jiyaniijiaara socua na jiyatenutaniya. Naaratej, pa jiiitianaa Romano pueyari pocua nijionutaniya Pueyaso Secojoua tia nojori niyatunura, pa pueya na pueconurajuhua.

⁴⁹ Caifásri tii quiriquiaajuhua. Nojuajaari canaa pueyacuara secojonaa jiyaniijiajanaa quiriquiaa cuno marijia. Jiyacarij, nojuajaari narta camarucua sequeree:

—¡Niaquiiri niishiyashijiaa seetanujuanaa! ⁵⁰ ¿Majateeri nia niishiniu? Maninia cutaraari niqiriyatu pueyano cusonura pa niti, maja najuhua puetunu pa pueyajanaa puecoosanura.

⁵¹ Caifás sequesanoori maja tama na sequesanojuaaja quiquiaari. Pueyacuara secojonaa jiyaniijiajanaa na quishacari, Pueyasoori naa na pohuaterree taa Jesu cusonutaniya puetunu Judiocuacaacuarajanaani. ⁵² Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapuecuarajanaajuhua, tee tiqiyocua niyaquejonu na muerasurano quiyacuajani. Nojuajaari cusoriquiano puetunu cuno pojorijiana na rerejotenura, jatiqui na quitiinuria juhua niqiriyatu maanu. ⁵³ Naacuajitij, cuno juucajiniji, cuno Judiocuaca camarucuaari rojotooriquiaa taa nojori monutaniya Jesuni.

⁵⁴ Nocuaaj, Jesuuri maja tari na rucanejonu quijia narta Judiocuaca niqiuara. Cunora tamaquiria canaa jiyataquiaari. Canaari nata quishii cariiquia jiya shuriucua tamonu tiacajiniani. Cuno tiaca sesa quiquiaari Efraín.

⁵⁵ Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajiniijiaaja. Nojoriiri quiojoquiaari juhuacarija nojori jeenucuanura na cuaqueya nojori puecoosacari tama na seyajaaja nojoriucua. Nojoriiri naa miiquiaari jiyanooshano nojori quiniuria Pueyaso niqiuara,

taa supuetana Moisés rootaquiaaricujani. Nojoriiri naa miiquiaari juhuajaniya nojori queranacunura Pueyaso niquiaara Pascua juuca. ⁵⁶ Pueyari tii Jesu pajenuiriquiaa. Pueyaso Secojoua tiajinia nojori quishacari, nojoriiri tama nequesoreetooriquiaajaaja: —¿Taa nia sequeyani? ¿Pa queranacunujinia niniutianiyatenojotij, maja soj? ⁵⁷ Pueyacuara secojonaa jiyaniijianucua, Fariseocuacanio, nojoriiri tari pueya rootaquiaari, tamonu pueyano jaara niishiri tee Jesu quiyani, cuaara nojori numooteera nojori quiatenura Jesu.

12

María totasacari na shanohua jaanutaja Jesuucua
(Mt 26.6-13; Mr 14.3-9)

¹ Seis juuca jaara cureeriquiaajaa Pascua juucara, canaari jiyacari Jesuta Betania tia-cajinia quiaareeni, Lázaro quijia tiacajinia, teyano Jesu samiitiani quiaaricujani. ² Cuno tiacajiniinio Jesu rupuenaa pueya timitiasacari Jesu, nojoriiri sumatunuquiaari nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuiriquiaa narta masuusano pueyata, canaatanio. ³ Jiyacaritij, Mariari Jesuucua pataree na shanohua jaanutaja. Cunoori “nardo” jiyaniishano natau-jiniji shipinishano quiquiaari. Jiyanohua queraatia cumaneecata masesano. Puereetuca motiiquio cajiniocua puecariquiaari cuno shanohua jaanutaja. Mariari Jesu niohuacaacua na totaree. Na nuhuaji, na sacuanijiarohua na muecacataari. Puetunu tiacojuanaari shanohua jaanuriquiaa. ⁴ Naa María miishacaritij, niquiriyatu canaajiniinio Jesu saquiri-ojosano pueyanoori juaarii. Nojuajaari Judas Iscariote quiri quiaa, na nuhuaji Jesu quiatiquiaari na paraani. Nojuajaari naa sequere:

⁵ —¿Casaara cuno shanohua jaanutaja niqutitioyaquishaaree queraatia cumaneecarani, casamijiuniucua pueya niqutitiojosocoriquianoni? ¡Jaara masenu panishaare, maara niqutitiosaare juhua niquiriyatu marijara pueyano poonijionu sami!

⁶ Naa Judas sequesacaritij, majaari seetanujuanaa na taraajenu quiri quiaa casamijiuni-ucua pueyacuara. Naa sequereeri saaja cumaneecaacua jiaatiaja na quiniucua, nohuase-jojua na quishacari. Judasri cumaneeca quiquio cojuatana quijia puetunu canaarajanaa. Naacuajitij, nojuajaari tiji nohuasejojua, pueya niqutitiojosanojiniji canaara. ⁷ Jesuuri saaja Judas sequere:

—Nareja quia niquiri. Nojuajaari nio shanohua jaanutaja cojuataja pueyaracaanu, juhuacarijia na jeenucuatajara cua cuaqueya, pueya niaaquishacarijia janiya raajinia, janiya jaara mosaareni. ⁸ Casamijiuniucua pueyari pueyaracaanu niaata quiri quiano cutara. Saniniuujia, janiyari maja pueyaracaanu niaata quiri quianoni.

Pueyacuara secojonaa jiyaniijianucua roojotoosacari Lázaroocua

⁹ Queraatia canaa Judiocuacaari niishi quiaari Jesu Betania tiacajinia quiri quiaa. Cunora, nojoriiri nocua quiojo quiaari na niquniucua, Lázaro niquniucua juhuaj, teyano Jesu samiitiani quiaaricujani. ¹⁰⁻¹¹ Jesu samiitiani niucua Lázaro, queraatia canaa Judiocuacaari Jesuucua tiuquiaari, na pueya nojori quiniuria. Cunora, canaa puey-acuara secojonaa jiyaniijianucuaari roojotoo quiaari Lázaro na motunurajuhua.

Juhua jiyaniijianucua Jesu tiuquishacari Jerusalén tiacajinia
(Mt 21.1-11; Mr 11.1-11; Lc 19.28-40)

¹² Cuno queraatia pueya, tari Jerusalén tiacajinia quiri quiaa Pascua juucara quer- anacunurani, nojoriiri niishi quiaari Jesu tariqui tiuquiniutianiyajuhua. ¹³ Nocuaji, no- joriiri tucuru piyotaree. Na nuhuaji, nijiyareeri Jesu naacunuucua, na tucuru shiiniotan- uriquiaari. Naa nacooriquiaajariuhua nojori shuquiritiasacari Jesu:

—¡Pocujia Tacuna! ¡Pocujia Tacuna! ¡Cuaara shuquiriaatia quiiria pa Jiyaniijia, teyano Pueyaso jiyaro quiaari pocuacuajani! ¡Nojuacuajaari Israel pueya jiyaniijianucua!

¹⁴ Jesu quiiri jiyacari burro niquiojua riuriatamaa. Tari na nijinia cajiriquiaari, taa tariucua cananu Pueyaso Rupaajinia naajiotasano quiyacuajani. ¹⁵ Naa sequeyari: “¡sion tuhananuucua quinia pueyanaa, maja puerenu! ¡Nia niquiri! ¡Nia jiyaniijia cumaji niya niaacua! ¡Burro niquiojua nijinia cajiyari!”

¹⁶ Jiyacaritij, majaari canaa niishini quiri quiaa naa canaa tiuquitishacari canaa jiyaniijia Jesutej, canaari nio tariucua cananu Pueyaso Rupaajinia naajiotasano tohua- teeriquiaani. Pueyaso jaara Jesu samiitiani quiaariuhua, canaari jiyacari shusha ni- ishiquiaarini cuno naajiotasano quiiri Jesujiniji quiquiaari.

¹⁷ Cuno pueya, Jesu samiitianishacari Lázaro niquiquiaarini, nojoriiri pueya pohu- atariquiaa taa Jesu jiquio quiaari Lázaro na raacoji na tohuatanurani. ¹⁸ Queraatia pueya niishishacari naa Jesu miishano na cumaacatatej, nojoriiri Jesu naacunuucua nijiyaree. ¹⁹ Nocuaji, Fariseocuacaari tama sequetooriquiaajaaja:

—¡Canaacuajaari cunora nia sequequiaani pa morejanaa! ¿Niaate na niquiya? ¡Puetunu pueyajanaari cuno pueyanoocua pacuree, na pueya nojori quiniuria!

Grecia jiyajiniinio taucuaca pocoojonu panishacari Jesuta

²⁰ Grecia jiyajiniinio taucuacaari Jerusalén tiacajiniara nijioquiaarijuhuaj Pueyaso niquiara nojori queranacunuunura Pascuara. ²¹ Cuno pojoriiri canaa cojinia Felipeecua catecanoquiaari. Felipeeri Betsaida tiacajiniinio quiquiaari. Cunoori Galilea jiyajinia tiaca. Cuno Griegohuari Felipe sequeturee:

—Pueyanonaa, canaa quia Jiyaniijia Jesuta pocoojonu paniyani.

²² Jiyacaritij, Felipeeri Andrés sequesee cuno pojori sequesano nojuaja. Na nuhuaji, Andrésri Felipeeta quiaaree Jesuucua. Nojoriiri Jesu pohuatasejuhuaj. ²³ Jesuuri naa nojori riucaaree:

—Quiarijiani, tama janiyajaarijia mosaanutaniya pueya nitini. ²⁴ Seetanujuanaa nia sequeyanijia, sohuajajau jaara raama jataaquishaare, pueyaracaanu niquijijau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. ²⁵ Naajuhuj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuujia, cante tama na cuaqueyajaaja panitijaa na tojniuria janiya mijiriani, nojuajaari pueyaracaanu shuquiriaatia rishijiaa jiyatesaanutaniya. ²⁶ Cante quiria poonijionu paniyani, cuara seetanujuanaa cua tojjijia quiriia. Tee cua quiniutianiyacuaani, cua tojtijajacaari tii quiniutianiyajuhuj. Cua Queeri cua tojjijiaa timitianutaniya. jiyanhuaa maninia nojori miiniutianiyajaarijuhuaj!

Jesu pohuatasacari nojuaja mosaanutaniya

²⁷ Quiarijiani, janiyari jiyanhuaa tacayani. ¿Casaa cua sequeyarini? ¿Janiyate sequeya soj: “Cua Quenaa, maja naquiya cua miitiniu”? Maja. Maja naa cua sequenu quiniutianiya. Janiyacuajaari cunora niquiaraa mijiriani. ²⁸ ¡Cua Quenaa, janiya cuara miishiiriaqui taa quia paniyacujani, pueya niishiniuria quiaari jiyanhuaa maninia!

Jiyacaritij, Pueyasoori tojishaaree pocuaano jiyocuacaanuji. Naa Neyanu sequereeri:

—Janiyacujaari naa nishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuaa mosaare.

²⁹ Cuno pueya, canaata tii quiriqiaa Jesutani, nojori tojishacari Pueyaso pocuaano, nojoriiri sequeturee:

—¡Miacanacuja cuno tojishaareeni!

Tamasacaari saniniuujia sequereecujua:

—¡Pueyaso serucujaja nocua pocuareeno!

³⁰ Saniniuujia, Jesuuri canaa sequeree:

—Cuno rupaa niaa na tojiriini, majaari quiria na quiniu quiriqiaa. Cunoori nia tojishocoriquiano quiriqiaa, nia niishiniuria cua Queeri cua tojiquiaa cua secojosacari nojuaja. ³¹ Quiarijiani, mijiria quiniaa miishacari naquiya janiya, nojoriiri saniniuujia sanitiosocoriquiano jiyatesaaree tari. Naajuhuj, mijiria jiyaniijia Sesaacaari jataसानutaniyajuhuj, maja cumaacaraca na quiniuria socua. ³² Janiya jaara nujuaretasaareni, janiyari puetunu pueyapuejanaa nijiotenutaniya cucuani. Nojoriiri juhua jaatiasaanutaniya cucua, cucua nojori tuuniuria, nojori ruuretanura janiya soj.

³³ Naa Jesu sequesacaritij, canaa nishitiriiri taa pueya monutaniya nojuajani. ³⁴ Tii quiniaa pueyari na riucaaree:

—Canaacuajaari tariucuaaanu Pueyaso Rupaajiniji niishiyani, Pueyaso Jiyaroscocoriquiano Cristoori pueyaracaanu rishiriquiano cutara. Quiajanijarijiaataj, ¿casaara quia sequeyariniijia, Pueyaso Jiyarosanoori nujuaretasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarosanooni?

³⁵ Jesuuri nojori sequere saaja:

—Janiya, nioojia cuhuatanani, janiyari niaata quiniutianiyajaara rupaquijiani. Nocua nia tiuuri juhuacarijia, ninishiqui quiaquishacarijia. Cante ninishiqui rucuanajojuani, nojuajaari maja na niishiniu tee na quiaani. ³⁶ Nioojia cuhuatanaaca nia tiuuri, niaata cua quishacarijia, seetanujuanaa cuhuashiqui quijiaca nia quiniuria.

Naa Jesu sequenu nuhuaji cuno pojoritij, quiacuhuari. Nojoriicujaji jamaashiiri.

Judiocuaca tiuyaquishacari Jesuucua

³⁷ Jesuuri jiyanhuaa queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiaari. ³⁸ Naacuajitij, tariucuaaanu Pueyaso sequenu panishano caminiujunia Isaías pohuatasanoori tohuatteequiaari, nojuaja jaara naa sequequiaari:

“Jiyaniijianaa, ¿cante canaa pahuatasanoocua tiuuriini, canaa pahuatasacari quia Jiyarosocoriquianojinijini? ¡Shaaqui! ¿Cante niishirijiaaniuhuj, jiyajeneta casaa nojori niquishanoori seetanujuanaa quia cumaacata miishano quiriquiaa? ¡Shaaqui!”
³⁹ Naacuajitij, majaari nojori naata tiuuniu quiquiaari Jesuucua. Isafasri naa naajio-taquiaarijuhuaj:

⁴⁰ “Pueyasoori nojori jiyateree juhua nimishitiuria, maja nojori niquiniuria na namijiaata. Nojori niishitiaja cushitioorejaariuhuj, maja nojori niishiniuria nojori jiuujiaata. Naa nojori miiriiri maja nojori tacatonura nojori jiuujia, cua jiyanooniuria nojori, quiarinio pueyara cua jataniyaquiniuria nojorijiuhuaj”.

⁴¹ Supuetana Isafasri naa caminiujuquiaari Pueyaso niishitishano nojuajatej, Jesu na niquiniuucua na shacantuca cumaacajinia quiyano. Naa na pahuatasacariitij, nojuajaari juhuacarijia Jesujiniji pohuatariquiaa.

⁴² Naajaa, queraatia narta Judiocuacaari Jesuucua tiuuquiaari. Queraatia canaa jiyani-ijianucuaari nocua tiuuquiaarijuhuaj. Cuno jiyaniijianucuaari maja na pohuatanu quijia pueya niquiara, Jesuucua tiuujiaca nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujureeri maja socua nojori tiuquitianura Pueyaso secojojua tiacajinia. ⁴³ Nojoriiri saaja narta pueya shuquiri-tiasano pueya quiniu panijia, maja Pueyaso shuquiritiasano cutara.

Pueya tojittaaquiniuucua Jesu sequesano, nojoriiri saniitosariquiano

⁴⁴ Jesuuri jiyanoohua na rupaa paaretaree. Naa sequereeri:

—¡Cante cucua tiuuriini, majaari saaja na tiuuniu cucua! ¡Cua Queecua tiuuriijaari-uhuj, cante cua jiyaroquiaaricujani! ⁴⁵ ¡Cante cua niqiriini, nojuajaari cua Jiyarona niqiriijiuhuaj! ⁴⁶ Janiyari mijiria niquiaarini cua cuhuatanura niajanija. Naacuajitij, cante cucua tiuuriini, majaari tari na quiniu ninishiqui. ⁴⁷ Pueyano jaara cua rupaa tojiriquia najuhuanaj, janiyajanaari maja nocuara cua saquiriojotanu quiniutianiya na saniitosaanura. Majaari cua ninu quiquiaari mijiria, pueya cua saniitionura. Janiya cutaraari niquiaarini nojoriicujajia cua tacunura. ⁴⁸ Cante cua ruuretaja saajani, cua sequesano tojijaquiyajariuhuj, nojuajaari tari nocuara saquiriojotana jittaa na saniitosaa-nura. Nojoriria cua sequesano cutaraari tama nojoriicua saquiriojotariquianojuaja nio jiya puequesacari. ⁴⁹ Cua pahuatasanoori maja tama cua niishishanojuaja. Cua Jiyarona cua Quecuajaari cua niishitiquiaa casaa cua sequenutaniyani, mariyata casaa cua niishitiojonutaniyani. ⁵⁰ Janiyari niishiyani cante cua Que rupaa tojijiani, nojuajaari pueyaracaanu quijia quiniutianiya cutara. Naaratej, janiyari seetanujuanaa saaja na sequesano caminiujuquiaani, taa na niishitiquiaa janiyacujani.

13

Jesu jeequejosacari na saquiriojosano pueya niohuaca

¹ Jesuuri canaa na saquiriojosano pueyata rerejoquiaari Pascuaacuara juucajinia. Jesuuri jiyacari niishiquiaari tari quiquiaariiri quera na tiujiasacari canaa mijiria, na Queecua na tacanuhua. Nojuajaari canaa paniriquiaajaa, taa canaa na paniquiaari pueyaracaanucujani, mijiria na quishacari canaata.

² Cuno niucujaja, Jesuuri canaa na saquiriojosano pueyata miaqueriquiaa. Sesaa-caari tari Judas Iscariote niishitirii noojiajinia, nojuaja cuara Jesu quiateera na paraa, na mosaanura. Cuno Judasri tamonu Simón jiyaniishano pueyano niyanu quiquiaari. ³ Jesuuri niishijia nojuaja seetanujuanaa Pueyasojiniji niquiaari. Naajuhuj, nojuajaari niishiquiaari, na Que Pueyasoori na jiyatequiaari Jiyaniijiarajanaa, puetunu casaa jiti-tianajanaa na quiniuria. Niishiriquiaajaariuhua nojuajaari quera na Queecua tacanu-taniuhua. ⁴ Jiyaniijiajanaa na quishacari, naajaa, nojuajaari miaquejajiniji sanequiaari. Na tucaque toque jocuareeri. Na nuhuaji na cajiniocua camarucuteree cuaqueya tu-ujutajaari. ⁵ Na nuhuaji, mohuaca shuuri tohuatashijiniiaari. Canaa niohuaca jeeque-joriquiaari juhua tiaco seru. Na nuhuaji, na sacuanijiariquiaajaariuhuj na cajiniocua na camarucutesano cuaqueya tuujutajata.

⁶ Na jeequenu panishacari Simón Pedro niohuaca, Pedroori saaja Jesu sequereeri:

—Jiyaniijianaa, ¿taa quia miyani? ¿Quiaateeri cua niohuaca jeequenutaniya?

⁷ Jesuuri Pedro riucaaree:

—Quiarijiani, majaari quia niishiniu casaara naa cua miyani. Naajaa, quiaacuaja na nuhuaji niishiniutianiya.

⁸ Pedroori Jesu sequereeri:

—¡Cua Jiyaniijianaa, janiya cutaraari maja quenaaja cua shanacunu quiniutianiya cucua quiajanija, cua niohuaca quia jeequenura!

Jesuuri na riucaaree:

—Janiya jaara quia niohuaca jeequejiyaquirini, majaari cua pueyano quia quiniu quiniutianiya.

⁹ Simón Pedroori na sequeree:

—Jaara naa quiriritij Jiyaniijianaa, maja saaja cua niohuaca jeequenucuarajaj! ¡Quia jeequerejuhua cua juaashiquiaca, cua nacanio!

¹⁰ Jesuuri na sequeree:

—Cante shusha nanajani, saaja na niohuacaari jeequeshiya cutara. Na cuaqueyacuajaari tariucua jeequesano quiya. Puetunu niajanijajanaari tari jeequejosano quiyacuaja. Saa niquiriyatujuaari jeequesoo quiya saniniuuja.

¹¹ Jesuuri tari niishiquiaari cante na quietanutaniya na paraani. Nocuaji sequeriquiaari: “Niquiriyatu pueyanoori jeequesoo quiya cutara”.

¹² Canaa niohuaca na jeequejonu nuhuaji, Jesuuri na toque cushiriohua. Miaquejajinia cajiriohuari. Canaa nequesotareeri:

—¿Niaate niishiya casaara naa cua jeequejoree nia niohuacani? ¹³ Niaacuajaari cua sequeriquiaa “Niishitiojonata”, nia “Jiyaniijiatanio”. Seetanujuanaa nojuacuajanjia, taa nia jiyaniiquiuaa janiyacuaajani. ¹⁴ Naaratej, janiya jaara jeequejoree nia niohuacacuaani, nia Jiyaniijia cua quishacari, nia Niishitiojonajuhua, naa nia miiriquia niarta Pueyaso muerasujuhua. ¹⁵ Janiyari naa miiriini, cua niishitiojonura niajanijia, naa nia miitioonurajuhua, taa cua miirii niajanijacuaani. ¹⁶ Seetanujuanaa nia sequeyanjia, seruuri maja socua tojishano quijia na camarnujiniji. Naajuhua, jiyarosano pueyanoori maja socua tojishano quijia na jiyaronajiniji. ¹⁷ Naa jaara cua rootasano niishiri, niaari shuquiriaatia quijia quiniutianiya niaa jaara na tojjijia quiri.

¹⁸ Shusha cua sequesano niajanijani, cunoori maja puetunu niajanijaranojuanaa. Janiyacuajaari niishiyani canapue cua saquiriojoquiaarini, taamueca pueyate niajanijani. Naacuajitij, tariucuaaanu Pueyaso Rupaajinia janiyajiniji naajiotasanoori tohuateenutaniya. Naa sequeyari:

“Tama cuata miaquenajaarijia cua paracara quirii”.

¹⁹ Janiyari juhuacarijia nia toyani. Naacuajitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Nijanuni. ²⁰ Seetanujuanaa nia sequeyanjia, cante cua jiyaramiquishano pueya tojjijiani, nojuajaari cua tojjijuhua. Cante cua tojjijia quirini, nojuajaari cua Jiyarona tojjijia quiriijuhua.

Jesu pohuatasacari, Judascuajaari na paraa na quieteriquiano

(Mt 26.20-25; Mr 14.17-21; Lc 22.21-23)

²¹ Naa Jesu sequenu nuhuaji canaatej, jyanohua na taraajenuta naa canaa sequereeri:

—Seetanujuanaa nia sequeyanjia, niquiriyatu niajanijajinijinoori cua paraa cua quietanutaniya.

²² Canaari jiyacari tama niqitiooreejaanjia. Majaari canaa niishiniu quiriquiaa canajiniji naa Jesu sequeriquiaani. ²³ Jiyacaritij, janiyari na shuriucuaji cajiriquiaa miaquenuujajiniani, na panishano pueyano cua quiniucua. ²⁴ Naaratej, Simón Pedroori cua mashiniquirii sanaa cua nequesotanura Jesu, canajiniji naa na sequereeni. ²⁵ Naarate janiyari Jesuucua tatereeni, jiyasohuaa cua nequesotanura nojuaja. Janiyari naa na sasacareeni:

—Jiyaniijianaa, ¿canteeri naa quia miiniutianiyani?

²⁶ Jesuuri cua riucuaaree:

—Janiyari pan rau piquiojonutaniya caacajiniani. Cana cua niqitiojonutaniyani, nojuajaari cuno.

Jesuuri jiyacari pan rau piquiojoree. Judas Iscariote na niqitiooreeri. Nojuajaari tamonu Simón jyanishano nianu. ²⁷ Judas masesacari cuno pan rau, Satanásri noojiajinia tiuquiquii. Jesuuri jiyacari Judas sequeree:

—Cuno, quiaa na niishiriojiya miiniuni, quiocua ritia miirinioj.

²⁸ Canaa na saquiriojosano pueya nata miaquenuuriquiaani, majaari quenaaja canaa niishiniu quiriquiaa casaara naa Jesu sequeree Judasni. ²⁹ Judasri canaa cumaneeca cojutana quijia. Naaratej, noojiaqueya canaajinijinoori jyaniriquiaani Jesu naasucua na jiyaroriguaa socua casa na masenura canaa queranacunutuajara, casamijuniucua na niqitiojonura cumaneeca soj. ³⁰ Judas jaara masequiaari Jesu niqitiosano pan, jiyacari tohuataqueeri. Tariucua niucuaari quiriquiaa.

Jesu rootasano quiarinio

³¹ Judas tohuatanu nuhuaji, Jesuuri canaa sequeree:

—Quiarijia cua miishanojiniji, janiyari maniniuhuaqueetasaanutaniyani. Pueyasoori jyanohua maniniuhuaqueetasaanutaniyajuhua, naa cua miishanojiniji. ³² Pueyaso

jaara maniniuhuaqueetasaare naa maninia cua miiniuucuatej, nojuajaari cua jiyatenu-taniya cumaacaraca quijia na quiniuria na shuriucua. Quera naa cua miiniutiani-yari. ³³ Quiquiohuaniyojuanaa, janiya rupaquijia niaata quiniutianiyajaanani. Taa cua sequecanu parta Judiocuacacuaani, janiyari naa nia sequeyajaanihuaj. Niaari cua pajenuunutaniya juucua. Majaari nia naata quianu quiniutianiya cucua, tee cua quianu-taniyacuaani. ³⁴ Quiarijia nia niishitiriiria nio quiarinio rootasano. Nia tojiri. ¡Panitiojuaca nia quiri! Naatej, taa cua paniquiaacuaa nijaniyani, naa nia panitioorejuhuaj. ³⁵ Niaa jaara naa panitioojuaca quiri, puetunu Pueyaso niishiyashijica pueyajanaari naacuaji niishiniutianiya, niaari cua tojitiajaca pueya.

Jesu pohuatasacari Pedro nocuaji seetanutaniya

(Mt 26.31-35; Mr 14.27-31; Lc 22.31-34)

³⁶ Simón Pedroori jiyacari Jesu nequesotaree:

—Jiyaniijianaa, ¿tee quia quianutaniyani?

Jesuuri na riucaaree:

—Tee cua quianutaniyacuaani, majaari quia naata nuhuajiniu janiya. Naajaa, quiaari na nuhuaji quiariquiano.

³⁷ Pedroori na sequeree:

—Jiyaniijianaa, ¿casaara quia sequeyarini, quiarijia cutara maja cua naata quianu quiata? Janiyacuaja tama cua cuaqueyajaaja tarinijiotaaree quioocarani.

³⁸ Jesuuri na riucaaree:

—¿Naatee? ¿Quiaate tama quia cuaqueyajaaja tarinijiotaaree cucuara? Janiyari seetanujuanaa quia sequeyani: juhuaquenu panishacari caacaraja niunijiyacquishacarijia, quiaari jiyacari cucuaji seetanu pacutejonutaniya tari.

14

Jesuuri juhua nuu Pueyasocua

¹ Jesuuri naa canaa sequeree socua:

—Maja nia tacaani, pueyanaa. Nioojia nia cajitiri. Saaja Pueyasocua nia tiuuri. Cucua nia tiuurijuhuaj. ² Cua Que tiaari puereetuca. Queraatia quiquioori tii quiya. Cunora, janiyari coteenu nia puetanutaniyani, niaacuaji cua jeenucuanura nia quijia. Jaara naa quiyaquiritij, janiya maara nia sequeyaquirini janiya nia puetanutaniyani, niaacuaji cua jeenucuanura. ³ Cua jeenucuanu nuhuaji nia quiquiora, janiyari niaacua tacatenutanihuani, cua rijionuhara nijaniya, cuata nia quiniurijahuaj tee cua quiniutianiyacuani. ⁴ Niaacuajaari cua quiquiojiniara neteja nuu niishiya, tee cua quianutaniyacuaani.

⁵ Tomásri Jesu sequeree:

—Jiyaniijianaa, ¡maja canaa niishiniu quenaaja tee quia quiaani! ¿Canaatucua taa cuno nuu niishirini, quiaa na sequeyani?

⁶ Jesuuri na riucaaree:

—Janiyacuajaari cuno nuuni, Pueyasocua nia quianura. Janiyacuajaari seetanujuanaa Pueyaso Rupaani. Janiyari pueya samitianijahuaj. Majaari pueya naata Pueyaso rupuenu tamajaaja. Saaja janiya cutaraari pueya rupueteja Pueyasoni, nojori tiuushacari cucua. ⁷ Niaa jaara seetanujuanaa cua niishiquiaaricuaa, niaa maara cua Que niishirijihuaj. Seetanujuanaa, niaari tari na niishiyacuaja. Niaari na niquiquiaajahuaj.

⁸ Felipeeri na sequeree:

—Jiyaniijianaa, quiaa jaara canaa niqitiri quia Que Pueyaso, canaacua panaatia quiri-huani.

⁹ Jesuuri Felipe riucaaree:

—Felipena, janiyacuaruhua pueyaracaanu niaata quiquiaa juucua. ¿Majateeri juhuanujuaja quia niishiniu janiya? Cante cua niquiquiaani, cua Que niquiquiaajaarihuaj. ¿Casaara quia sequeya cua niqitiniuria cua Que nijaniyarini? ¹⁰ ¿Majateeri quia tiuuni cucua cua sequesacari quiajaniya, janiyari cua Que jiuujiajinia quiyani, cua Queeri saniniuujia coojiajinia quiyacuaja? Canaari maja rimiajatani. Nio, cua sequesano nijaniyani, cunoori maja tama cua niishishanojuaja. Cua Que, coojiajinia quiyani, nojuajaari na panishano miitiquiaa janiya. ¹¹ Cucua nia tiuuri cua sequesacari nijaniya, janiyari cua Que jiuujiajinia quiyani, cua Queeri saniniuujia coojiajinia quiyacuaja. Niaa jaara cua sequesanoocua tiuuni paniaquiri, cucua nia tiuuriqui na cumaacata cua miiniucua nia niquiara. ¹² Seetanujuanaa nia sequeyanijia, cante cucua tiuujiani, nojuajaari puetunu cua miishanojuanaa miiniutianiyajahuaj. Cua tacasarihuua cua Que shuriucua cua quiniuhua, cucua tiuujiaari cua cumaacata seetanujuanaa socua jiyajeneta casaa miiniutianiya cua miishanojiniji. ¹³ Seetanujuanaa nioojiajinia cua

quishacari, janiyari niaara miiniutianiyani puetunu nia masesanajuanaa nia secojosacari
 cua Que. Naacujitij, pueyari cua Que timitianutaniya, nojori niishishacari cua Queeri
 jiyano hua maninia mijia. ¹⁴ Nioojia rupueetosacari coojata, janiyari puetunu nia
 masesanajuanaa miiniutianiya niaarani.

Jesu sequesacari, nojuaja Pueyaso Sohuanu jiyaronutaniya mijiria

¹⁵ Niaa jaara seetanujuanaa cua panijiaa quiri, niaari cua rootasano tojtiaajaca quiniu-
 tianiya. ¹⁶ Naajuhuj janiyari cua Que secojonutaniyani, niaacua na jiyaronura tamonu
 cua niti mijiria, nia cumaquiriquiano. Nojuajaari pueyaracaanu niaata quiri quiano.
¹⁷ Nojuajaari Pueyaso Sohuanu, seetanu rupaa jitianajanaa. Pueyaso tojiyashijiaa
 pueyari maja na naata cuno Sohuanu na jitianu, nojori niquiyaquiniuucua nojuaja, na
 niishitiyaquiniuucua nojuajuhuj. Niaa cutaraari na niishijiaa. Nojuajaari niaata
 quiyacuaja. ¡Pueyaracaanu nioojiajinia quiri quiano jaariuhuj!

¹⁸ Majaari seetanujuanaa cua tiujianu quiniutianiya niajanija juhua japueyojuaca
 nia quiniuria. Janiyacuajaari tacatenutaniuhuan niaata cua quiniuhua. ¹⁹ Pueyaso
 tojtiaashijiaa pueyari quiri naataja cua niquiyaquiniutianiya socua. Niaa cutaraari cua
 niquijiaa quiniutianiya. Samiitianiujua cua quiniuucua, niaari pueyaracaanu quijiaa
 quiniutianiyajuhuj. ²⁰ Jiyacaritij, niaari niishiniutianiya janiyari cua Que jiuujia rupue-
 jani, niaari coojia rupuejajuhuj. Janiyari saniniuujia nioojiajinia quijiani. ²¹ Cante
 cua rootasano niishijiani, nojuaja jaara na tojjia quiriuhuj, nojuajaari cua panijia
 cutara. Cante cua panijiani, cua Queeri na panijia quiniutianiyajuhuj. Janiyari na
 panijia quiniutianiyajuhuj. Janiyari cua panijiaacua niniutianiyani, seetanujuanaa na
 niishiniuria janiyari nata quiyani.

²² Canaa cojinia Judasni, nooj, Judas Iscariote sesaanucuatej, nojuajaari Jesu nequesota-
 ree:

—Jiyaniijianaa, ¿casaara saaja canaacua quia niniutianiyarini, maja puetunu mijiria
 quiniaa pueyacuajanaa?

²³ Jesuuri na riucuaare:

—Cante cua panijiani, cua rootasano tojjiajaariuhuj. Cua Queeri jiyano pueyano
 panijia. Naaratej, canaari nocua niniutianiyani, noojiajinia canaa quiniuria, canaa
 quiquiora canaa jiyatenura nojuaja. ²⁴ Saniniuujia, cante cua panijiaquijiani, jiyano
 pueyari cua rootasano tojiyashijiaacajuhuj. Puetunu cua rootasanojuanaa, niaa na
 tojiqiaani, cunoori maja tama cua niishishanojuaja. Cunoori cua Que niishishano
 janiya, cante mijiria cua jiyaroquiaaricujani.

²⁵ Janiyari puetunu niojuanaa nia pohuataani, niaata cua quishacarija mijiria. ²⁶ Cua
 Que jiyarosocoriquiano na Sohuanuuri nia cumaquiriquiano. Nojuajaari nia niishitio-
 jonutaniya puetunu cua niishitio panishanojuanaa niajanija. Naajuhuj, nojuajaari
 nia niishitiniutianiuha puetunu tari cua pohuatasano niajanijajanaa.

²⁷ Janiyari nioojia cajitiniutianiyani. Janiyari coojia nianutaniya nioojiajiniani, juhua-
 janiya quijiaa nia quiniuria taa cua quiyacuani. Naacujitij, niaari seetanujuanaa
 juhujajaniya quiniutianiya. Mijiria quiniaa pueyari maja na niishiniu cumanijianu juhua
 janiya. Naaratej, maja nia tacaaniu. Majaari puerenujuhuj. ²⁸ Tari nia sequerecua-
 janija: “Janiya quera quiohuani. Janiyari na nuhuaji tacatenutaniuhuan niaata cua
 quiniuria”. Niaa jaara seetanujuanaa cua panijiaa quiri quia, niaa maara shuquiriri
 nia niishishacari janiyari cua Queecua quiohuani. Nojuajaari seetanu Jiyaniijajanaa
 cutara janiyajiniji. ²⁹ Janiyacuajaari juhuacarija nio nia sequenyani. Naacujitij, niaa
 jaara niquiri tohuatayano cua sequesano niajanija, niaari niishiniutianiya puetunu
 cua pohuatasanojuanaa seetanujuanaa.

³⁰ Majaari puera cua pocojonu quiniutianiya niaata tari. Cua Paraca cucua quena-
 coya tarini, na miiniuria janiya taa na panijiaacujani. Nojuajaari Pueyaso tojtiaashijiaa
 jiyaniijia. Pueyaracaanu cua Que Pueyaso tojjia cua quiniuucua, cua Paraca maara
 naquira cua miyaquiri janiya jaara cucua na shanacuyaquirini. Na cumaacaari maja na
 shocotanu cua cumaaca cutara. ³¹ Naajaa, na miishanojiniji janiya, puetunu pueyajaari
 niishiniutianiya, janiyari puetunu cua Que sequesanojuanaa tojjiani, na panijia cua
 quiniuucua.

’Nia sanetare. Niiquiji pa quiaare.

15

Jesu pueyari juhua Jesu cashacucua, Jesu quishacari juhua neyona

¹ Jesuuri naa pohuataquajaari socua canaa niquira:

—Janiyari juhua uva jiyonani, cua Que natau. ² Cua pueyari juhua cua cashacu-
 cua. Tamonu cua cashacucujinijinio jaara muetuyashijia quiri, cua Queeri na piyotaja.

Teyano cua cashacucua jininiote muetujua saniniunijia, cua Queeri na nacareetaja, socua queraatia na muetunura. ³ Nia tojinuucua cua rootasano, niaari tari juhua nacareetasano quiya. ⁴ Pueyaracaanu coojia nia rupuere, taa cua rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaaji piyotasaare, majaari na naata muetunu tari. Naajuhua, majaari nia naata muetujua quiniu, niaa jaara coojia rupueyashijia quiri.

⁵ 'Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya niajanijacuaani, naacuaajitij, niaari juhua queraatia muetujua quiniutianiya. Cucuaaji rupatejacaari maja na naata casaa miiniu janiyaju. ⁶ Cante cua rupueyashijiani, nojuajaari taraatia miishaanutaniya juhua uva cashacucua piyotasanoneyonajiniji, tamocora jaquerootasano. Jaara sorere, tatucusaarohuari manijinia quejooosocoriquiano. Tii cateyari.

⁷ 'Niaa jaara coojia rupuejaca quiri, niaa jaara cua rootasano tojjijaca quirijihua, puetunu nia panishanoocuarajanaa nia secjore Pueyaso. Nojuacuajaari nia masasano miiniutianiya. ⁸ Naa cua Que miishacari nia panishanotej, niaari juhua queraatia muetujua quiniutianiya. Naacuaajitij, cua Queeri jiyanoehua timitiasaanutaniya. Naacuaajitij, niishishaanutaniyajaariuhua niaari cua tojtiajaca pueyaniojua. ⁹ Janiyari nia panijiani, taa cua Que panija janiyacuaani. Coojia rupuejaca nia quiri pueyaracaanu, cua panishano pueya nia quiniuria. ¹⁰ Janiyari cua Que panishanoni, pueyaracaanu cua miiniucua na panishano. Naajuhua, niaa jaara cua rootasano tojjijaca quiri quia, niaari pueyaracaanu cua panishano pueya quiniutianiyajuhua.

¹¹ 'Janiyari naa nia sequeyani, shuquiriaatia quijia nia quiniuria, taa shuquiriaatia quijia cua quiyacuani. Naacuaajitij, niaari tojetaarucujanaa shuquiriaatia quijia quiniutianiya. ¹² Cua tojiri. Niioori cua sequesano niaara: "¡Pueyaracaanu panitiojuaca nia quiri quia, taa cua panija niajanijacuaani!" ¹³ Cante tama na cuaqueyajaaja panitija na cusonura na rupuenaa nitini, naa miijia cutaraari seetanujanaa jiyanoehua narta pueya panija. ¹⁴ Niaa jaara cua sequesano miijia quiri, niaari cua rupuenaa. ¹⁵ Naacuaajitij, majaari cua sequenu quiniutianiya tari niajanija cua seyata. Pueyano seruuri maja na niishiniu casaa poonijosano na camarnu miiquiaacuani. Janiyari quiarijia nia sequeya cua rupuenaatani, cua niishitiniucua niajanija puetunu cua Que sequesanojuanaa janiya. ¹⁶ Majaari nia saquiriojonu quiquiaari janiya. Janiya cutaraari nia saquiriojoquiarini cua jiyaramiquiniuria niajanija, cua panishano nia miiniuria. Naa nia miishacari cua panishanotej, niaari juhua queraatia muetujua naana quiniutianiya. Puetunu nia miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhuanaj. Naaratej, cua Queeri puetunu nia masasanojuanaa nia niqutionutaniya seetanujanaa coojia rupuejaca nioojia quishacari. ¹⁷ Janiyari cunora nia sequeyani: "Pueyaracaanu panitiojuaca nia quiri".

Pueyaso niishiyashijia pueyari Pueyaso muerasu niquiniu paniyashijia

¹⁸ 'Pueyaso niishiyashijia jaara nia niquiniu paniyaquiri quia, majaari nia tacaani. Cuno pojoricuaajari naa cua niqutiuni paniyaquijiacuaa. ¹⁹ Niaa jaara Pueyaso muerasu quiyaquiri quia, Pueyaso niishiyashijia maara nia panijia quiri quia, taa nojori paniquiaa narta Pueyaso niishiyashijiacuaani. Niaari Pueyaso niishiyashijia quiquiaarijuhua. Naajaa, janiyari nojori tajiniji nia saquiriojoquiarini, cua pueya nia quiniuria. Cunora, Pueyaso niishiyashijia nia niquiniu paniyaquiquiaa, maja tari nia quishacari juhua nojori. ²⁰ Majaari nio cua sequesano nia niyajetanu: "Seruuri maja socua tojishano na camarnujiniji". Naaratej, Pueyaso niishiyashijia jaara naquiya cua miiquiaacuaa, niaari naquiya miishaanutaniyajuhua. Naajuhua, nojori jaara cua rootasano tojiaquiacuaa, nojori nia rootasano tojjijaca quiniutianiyajuhua. ²¹ Nojori nia naquiya miiniutianiya niajanijatej, cua pueya nia quiniucua, nojori niishiyaquishacari cua Jiyarona.

²² 'Janiya jaara niyaquiquiaari nojori cua pohuatanura Pueyaso rupaani, nojoricuara maara saquiriojotaquishaare, sesa nojori miishanojiniji. Nojori niquiarua cua pohuatanuucua Pueyaso rupaa, majaari nojori naata sequenu quiniutianiya: "Cua jiyanoori. Maja cua niishiniu quiquiaari quia rootasano". ²³ Cante cua niquiniu paniyashijiani, nojori nia cua Que niquiniu paniyashijiajuhua. ²⁴ Sesa nojori miishano maara nojoricuara saquiriojotaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta casaa miijioquiaari cua cumaacata nojori niquiarani, socua tamasaca miishanojiniji. Naajaa, nia nojori niquishacari cua cumaacata cua miishanotej, nojori saaja cua niqutiuni paniyaquijia, cua Que niqutiuni paniyaquijiacajauhua. ²⁵ Naajaa, nia nojori miiniucua janiyatej, tariucuaacuana Pueyaso Rupaajinia naajotasano janiyajinijiri tari tohuateeree. Naa sequeyari:

“Janiyari najuhuana niquiniu paniyaquishiyani”.

²⁶ Janiya jaara cua Que shuriucua quishuhuani, janiyari tiji Pueyaso Sohuanu jiyaronutaniya mijiriani. Nojuajaari seetanu rupaañanaa jiiitaja. Nojuajaari janiyajiniji niishitiniutianiya pueya. ²⁷ Niaari janiyajiniji pohuatanutaniya pueyajuhuj, pueyaracaanu cuata nia quiniucua shushajanaa cua coteesacari pohuatanu Pueyaso rupaa.

16

¹ Janiyari naa nia numooteyani maja nia tarinitianura cucua tiuuniu niaa jaara naquiya miishaare. ² Cua pueya nia quiniucua, majaari nia shanacusaanu quiniutianiya nia tiuquitianura Pueyaso secojoja tiacajinia. Pueya jaara nia puecoorejuhuaj cua tojtiajaca nia quiniucua, nojoriiri jiyaniutianiya nojori maninia miya Pueyasora, naa nojori miishacari. ³ Nojoriiri naa miiniutianiya nijaniyatej, nojori niishiyaquiniucua janiya, cua Quejuhuaj. ⁴ Janiyacuajaari juhuacarijia naa nia sequeyani. Naacuajitij, niaa jaara naquiya miishaare, niocua jiyacari niishiri janiyacujaari tari naa nia sequequiaarini. Majaari quenaaja nio cua sequenu quijia nijaniya, pueyaracaanu niaata cua quiniucua.

Pueyaso Sohuanu miishanojiniji pohuatasano

⁵ Quiarijiani, janiyari cua Jiyaronacua quiohuani. Quiarijiani, majaari quenaaja nijaniyajinijinio nequesotanu janiya: “¿Tee quia quiohuarini?” ⁶ Janiya jaara nia sequereeni janiya quianutaniuhuani, niaari saaja taraajequee. ⁷ Seetanujuanaa nia sequeyanijia, socua maninia quiniutianiya niaaraari, janiya jaara quiaarohuani. Janiya jaara quiaaqui-yarohuani, majaari Pueyaso Sohuanu niniu quiniutianiya niaacua, na cumaquiniuria nijaniya. Janiya jaara quiaarohua cutarani, janiyari niaacua na jiyaronutaniyani. ⁸ Mijiria na tiuquishacari, nojuajaari pueya jiuujiajinia poonijionutaniya, nojori na niishitiniuria nojoriiri seetanujuanaa sesa miijaca. Nojori niishitiniutianiyajariuhua nojoriiri na naata sesa miyashjiacara jiyatesaanu. Naajuhuj, nojori niishitiniutianiyari Pueyasoori na naata jiyanooni nojori, maja Sesaacata nojori cojiritiasaanura mani quiquiojinia quejoonu. ⁹ Seetanujuanaa, Pueyasora, nojoriiri sesa miijaca nojori tiuyaquiniucua cucua. ¹⁰ Jiyocuacaanu cua tacasacariuhua cua Queecua, majaari socua nia niquiniu quiniutianiya janiya. Naacuajitij, Pueyaso Sohuanuuri pueya niishitiniutianiya, janiyari seetanujuanaa cua Que Pueyaso jiyanoottijia cucua tiuuriquiano pueyani. ¹¹ Cua shocotasacari Sesaaca, Pueyaso Sohuanuuri pueya niishitiniutianiya, nojoriiri saniitiosaanutaniya. Naacuajitij, nojori jiyaniija Satanás jaara tari saniitiosocoriquiano quiyacuaa, nojoriiri saniitiosaanutaniyajuhuj, cucua nojori tiuyaquiniucua.

¹² Janiyari queraatia jiiitajaa cua pohuatanura nijaniyani. Naajaa, majaari cua pohuatanu quiniutianiya quiarijia nijaniya. Juhuanujuaja maja nia naata na niishiniu. Pueraruhua. ¹³ Pueyaso Sohuanu tiuquishacari niaacua, nojuajaari nia niishitiniutianiya puetunujuanaa cutara. Nojuajaari seetanu rupaañanaa jiiitaja. Nojuajaari maja tama na niishishanojuaja nia niishitini quiniutianiya nijaniya. Puetunu na tojishanojuanaa janiyajinijini, cuno nia niishitiniutianiya cutaraari. Nia niishitiniutianiyajariuhua taate nio pa quishacari nuhuaji quiniutianiyani. ¹⁴ Niaari cua shuquiritianutaniya, nojuaja niishitiniucua nijaniya janiyajiniji. ¹⁵ Puetunu cua Que jiiitiosajuanani, cunoori cua casaajuhuj. Naaratej, janiyari nia sequereeni, Pueyaso Sohuanuuri janiyajiniji masenutaniya cua jiiitiasano niaara, na caminiujiuniuria nijaniyarajuhuj.

¹⁶ Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuahuaj.

Nia taraajenuuri jatanutaniya shuquiriaatia nia quiniuria

¹⁷ Jiyacaritij, noojiaqueya canaa na saquiriojosano pueyajinijinoori tama nequesoree-tooreejaja:

—¿Casaa na sequenu paniyarini, nojuaja jaara sequeree: “Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya”? ¿Casaa na sequenu panijajaraniuhua na sequesacari: “Pasa naataja na nuhuaji niaari cua niquiniutianihuacuahuaj”, na sequesacarijuhuaj: “Cua Queecua quianutaniuhuanijia”? ¹⁸ Naajuhuj, ¿casaa na sequeyarini na sequesacari “quiarijiani”, mariyata “pasa naataja na nuhuaji”? ¡Majaari pa niishiniu casaaraqui na sequeyatejaj!

¹⁹ Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarijia cua niquiya, na nuhuaji cutara maja socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuahuaj”. ¿Niaatejaara niojiniji nequesoreetoya tama nijaniyajaja? ²⁰ Seetanujuanaa nia sequeyanijia, niaari nujuquenutaniya. Niaari taraajeconutaniyajuhuj. Jiyacaritij,

Pueyaso niishiyashijiacaari taquuya shuquiriaatia quiniutianiyacuaa niajanijajini. Naajaa, cuno nia taraajenuuri jatanutaniya shuquiriaatia nia quiniuria. ²¹ Naajaarihuaj, maaji ranu panishacari na mueya, jiyanoehua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari. ²² Quiarrijiani, niaari naa taraatia quiyajuhua. Naajaa, niaacua tacatenutaniuhuanijia. Niaari jiyanoehua shuquiriniutianiya nia niquishacari janiya. Majaari quenaaja tamasa pueya naata quiniutianiya cuno nia shuquiriniu jaariutianu.

²³ Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua Queeri nia niqutionutaniya puetunu nia masesanujuanaa nojuaja, seetanujuanaa coojia rupuejaca nioojia quishacari. ²⁴ Majaari juhuanajuaja nia secjonu Pueyaso seetanujuanaa taa cua sequeyacujani, seetanujuanaa coojia rupuejaca nioojia quishacari. Naa nia secjoretej. Niocua nia panishano niqutiosaare, seetanujuanaa shuquiriaatia nia quiniuria.

Jiyaniijia Jesuuri Sesaaca shocotana

²⁵ Janyari pueyaracaanu nia pohuataniya maatia seetanujuanaa cua Quejini cutarani. ²⁶ Jiyacaritij, niaari cua Que secjonutaniya coojia rupuesano nia quishacari. Jiyacaritij, majaari na panishaanu quiniutianiya cua shiniujuniuria cua Que, na tojiniuria niajanija. ²⁷ Cua Quejanaacuajani nia panijia, nia paniniuucua janiya, nia niishiniuucujuhua janyari na jiyarosanoni. ²⁸ Niaacuajaari niishiya, janyari cua Que shuriucujani niqiaarini pueyanora cua quiniuria mijiria. Quiarjia saniniuujia, janyari nio jiya tiujianutaniyani, cua Queecua cua quianuhua.

²⁹ Naa Jesu sequesacari canaatej, canaari na sequereeni:

—Quiarjia cutara, quiaari maatiajanaa sequeree, maja miriqui. ³⁰ Quiarjia cutara, canaari niishiyani quiaari puetunu casaajanaa niishija. Majaari quenaaja na panishaanu pueya nequesoreenura quiajanija. Naacuajitij, canaari niishiyani, quiaacuajaqui Pueyaso jiyarosanoni.

³¹ Jesuuri canaa sequeree:

—¿Naatee? ¿Niaate shusha cucua tiyuruhua? ³² Tari quenaacoyari naquiya cua miishaanura. Seetanujuanaa quiarjiaari. Niaari cucuaji cocuatasanutaniya puetunujuanaa. Niaari tamajaaja cua tiujianutaniya. Naajaa, seetanujuanaa maja cua quiniu tamajaaja. Cua Quecuajaari cua cojiyani. ³³ Janyari puetunu niojuanaa nia sequeyani, nioojia nia cajitiniuria nio cua pohuatasanoocua nia tiuushacari. Mijiria nia quishacari, niaari seetanujuanaa naquiya miiniutianiya. Naajaa, janyacuajaari mijiria jiyaniijia shocotareeni. Naacuajitij, nioojia nia cumaquiri tamajaaja.

17

Jesu secjosacari na pueyacuara

¹ Naa Jesu sequenu nuhuajitij, jiyocuaaanu na mausacari, naa na Que sequereeri:

—Cua Quena, janiya nio juuca naquiya miishaanutaniyani taa quia sequequiaaricujani. Cua tojiniuucua quiajanija, quia Jiyarosanoni quia jiyatere pueya timitiasano cua quiniuria. Naacuajitij, janyacua saniniuujia quia jiyatere pueya timitiasano quia quiniuriani, tojetaarucujanaa maninia miiija quia quiniuucua. ² Quiaacuajaari quia cumaaca cua niqutioquiaari puetunu pueyajanaa cua jitianura. Naacuajitij, janyari saniniuujia nojori jiyatenutaniya pueyaracaanu quijia nojori quiniuriani, teyano pojori quia niqutioquiaari janyacuajani. ³ Nojori niishishacari saaja quiajanijari seetanujuanaa Pueyasocujia, naajuhua, nojori niishishacari janyari quia jiyarosanoni, naacuajitij, nojori pueyaracaanu quijia quiniutianiya shuquiriaatia.

⁴ Janyari tari tucuatere quia sequesano cua miiniuria mijiriani. Naa cua miiniuucua puetunu quia panishanojuanaatej, pueyari quia timitia. ⁵ Jiya shipiniyaquishacarijia, janyari jiyanoehua shuquiriaatia quijia quiquiaari quia shuriucuanu, jiyaniijajanaa cua quishacari. Cua Quena, naa quijara cua jiyaterohua quiarrijiani, quia shuriucua cua quiniuhua.

⁶ Quia niqutiosano pueya janiya, quia saquiriojosano pueya quia niishiyashijiaca pueyajinijinioni, quiarjia cutara, nojoriiri niishiya cante quiajanijani. Nojoriiri quia niishiya, nojori niquiniuucua cua mijiosano quia cumaacata, cua pohuatasano quiajanijini nojori tojiniuucujuhua. Nojoriiri quia pueya quijia. Quiaari saniniuujia nojori cua niqutioquiaari. Nojoriiri quiarjia quia rupaa tojtiajaca cutara. ⁷ Nojoriiri niishiya puetunu cua jitiananojuanaani, cunoori quia niqutiosano janiya. ⁸ Janyari quia rupaa rootacanu nojorini, quia nishitishano janyari. Nojoriiri seetanujuanaa nocua tiurii. Nojoriiri seetanujuanaa niishiya, janyari quia shuriucujani niqiaarini. Niishitiyajaarihuaj, janyari seetanujuanaa quia jiyarosanoni.

⁹ Janiyari cunora nojoriicuaara quia secojiyani, seetanujuanaa quia pueya nojori quini-uucua. Majaari cua secojonu quia niishiyashijiaca pueyacuaara. Saaja noo pojoriicuaara quia secojianijia, quiaa na niqutioquiaari janiyatej. ¹⁰ Naaratej, puetunu cua jiiti-asano pueyajanaari quia pueyajuhuj. Mariyata puetunu quia jiitiasano pueyajanaari cua pueyajuhuj. Nojori tiuuniuucua cucua, nojoriiri jatanishano pueya quiniutianiya. Naacuajitij, queraatia pueyari cua timitianutaniyajuhuj, naa nojori niqishacari cua cumaaca.

¹¹ Majaari puera cua tarishiniu quiniutianiya mijiria. Cua pueya cutaraari mijiria quiniutianiyajaara, janiya jaara quiaarohua quiocuaani. Jiyanoehua maninia cua Quenaa, nojori quia cojuare quia cumaacata, teyano pojori quia niqutioquiaari janiyacuaajani. Naa quia jiitiare nojori, jatiquni nojori quiniuria juhua niquriyatu jiuujiaraca, taa pa quiy-acuaani. ¹² Mijiria cua quishacari nojoritia, janiyari nojori cojuajani quia cumaacata, quia rupaacua tiuujiaa nojori quishacari. Majaari quenaaja niquriyatu nojorijiniio cua juurequetenu quiquaari. Saa nojuuari juurequecanu cutara, tariucua juurequeriquiano quijiacuajatej. Naacuajitij, tariucuaaanu quia rupaajinia naajotasanoni tohuatecanu.

¹³ Quiarijiani, janiyari quiocua quianutaniyani, tee quia quiyacuaani. Niya cua quishacarijia, janiyari nio sequeya nojori niquiarani, nojori jiitianura cua shuquiriniujihuj, tojetaarucuaajanaa shuquiriaatia quijiaa nojori quiniuriajuhuj. ¹⁴ Janiyari nojori niishitiocanu quia rupaani. Naa nojori tojishacari quia rupaatej, quia niishiyashijiaca pueyari nojori niquniu paniyaquiquiaa. Cua pueya nojori quishacari, nojoriiri maja saaja mijiria quijiaa na quiniu tari, taa janiyacuaani. Naaratej, mijiria quijiaa pueyari nojori niquniu paniyaquiquiaa. ¹⁵ Naa cua secojosacari quiarijia nojoriicuaratej, majaari cua sequenu quiajaniya nojori quia rijionura niquiji. Saaja quia secojia cutaranijia, nojori quia cojuanura Sesaacaacuaaji. ¹⁶ Nojoriiri maja mijiria quijiaa na quiniu tari cua pueya nojori quishacari, taa nio jiyajiniio cua quiyaquiyacuaani. ¹⁷ Quia rupaa quia poonijiotere nojori jiuujiajia, tojetaarucuaajanaa quia tojjiaa nojori quiniuria. Quia rupaari seetanu rupaajanaa cutara. ¹⁸ Quiaacuajiaari cua jiyaroquiaari mijiria quiniaa pueya niquiara cua pohuatanura quia rupaa. Naajuhuj, janiyari cua pueya jiyaramiquiyani mijiria quiniaa pueyacujuhuj. ¹⁹ Quia tojjiaa nojori quiniuria seetanujuanaa, janiyari tama cua cuaqueyajaaja jiyateya puetunu quia panishanojuanaa mijiaa cua quiniuriani. Naacuajitij, nojori niishishacari seetanu rupaajanaa janiyajini, nojoriiri tojetaarucuaajanaa maninia miijiacara jatanishaanutaniya.

²⁰ Majaari saaja cua secojonu nio pojoriicuaara, tariucua quia tojtiajacacuaani. Janiyari secojiyajuhuj na nuhuaji cucua tiuuriquiano pueyacuaara, noo pojoriicuaara cante cucua tiuuniutianiya na nuhuajini, nojori tojishacari nio pojori pohuatanu janiyajini. ²¹ Cucua tiuuriquiano pueyacuaara secojianijia puetunu cucua tiuuniaajanaa cuaara quiiria jatiquni, juhua rupuetootesano, taa pa quiyacuaani, cua Quenaa. Naatej, taa cua quia quioojiajiniacuaani, quiaari saniniuujia coojiajia quiyacujua. Nojori jiuujia cuaara juhua rupuetootesano quiiria poojiajuhuj, mijiria quiniaa pueya niishinuria, quiaari cua jiyaroquiaari mijiria. ²² Janiyari nojori cumaquia quia Sohuanutani, quia niqutiosano janiyacuaa, juhua niquriyatu jiuujiaraca nojori quiniuria, naatej, taa niquriyatu jiuujiaraca pa quiyacuaani. ²³ Quiaari coojiajia quia. Naajuhuj, janiyari nojori jiuujiajia quiyajacuhuj. Naacuajitij, paari nojoritia juhua niquriyatu quiniutianiya. Naacuajitij, mijiria quijiaaari niishiniutianiya, quiaari seetanujuanaa mijiria cua jiyaroquiaari. Nojoriiri niishiniutianiyajuhuj, quiaari jiyanoehua cua pueya panijia, taa quia paniya janiyacuaani.

²⁴ Cua Quenaa, cuno pueya quia niqutiosano janiyani, janiyari paniyani nojori quiniuria cuata quia shurucua, nojori niquniuria cua shacantuuca cumaaca. Quiaari cuno cumaaca cua niqutioquiaari pueyaracaanu quia paniniuucua janiya, jiya shipiniyaquishacarijia. ²⁵ Tojetaarucuaajanaa sesa miyashijia cua Quenaa, mijiria quijiaa pueyari maja na niishiniu quiajaniya. Janiya cutaraari quia niishiyani. Nio cua pueyari niishiyajuhuj, janiyari seetanujuanaa quia jiyarosanoni. ²⁶ Janiyari nojori niishitiocanu-cuajani cante quiajaniyani. Janiyari naa pueyaracaanu nojori jiuujiajia niishitiniutianiya quiajaniyajini, seetanujuanaa nojori niishinuria quiajaniya. Naacuajitij, taa quia paniya janiyacuaani, nojori cuaara cuno paniniu jiitiaara nojori jiuujiajiajuhuj. Naa nojori niishishacari quiajaniyatej, janiyari nojori jiuujiajia quiniutianiyajuhuj.

18

*Na paraa quiasacari Jesu
(Mt 26.47-56; Mr 14.43-50; Lc 22.47-53)*

¹ Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari matacosano quijia puetunu na shocujanaa. Jesuuri tii tiuquitiamaa canaa, na Que Pueyaso na secojonura. ² Jesuuri tii jitiiquiaari canaata na rerejonura. Naacuajitij, na paraa na quiateriquiano Judasri cuno cuhuariquia niishiquiaarijuhuaj. ³ Canaa quishacari tii, Judasri jiyacari soldadohua tiuquitiasee, Pueyaso Secojoua tia cojuanaa pueyano. Cuno pojoriiri pueyacuara secojonaa jiyaniijianucua jiyaramiquishano pueya quiriquiaa, Fariseocuaca jiyaramiquishano pueyano. Nojoriiri pueya na miaquetaja pooriquiaa, nocuaji na nunutaja jayoco, samarinio. ⁴ Jesuuri tari puetunujanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia matacajiniji tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

⁵ Na paraari na riucuaaree:

—Canaa Nazaret tiacajinijinio Jesu pajeyani.

Jesuuri nojori riucuaaree:

—Janiyacuaaja nojuajani.

Jesu tacartana Judasri cuno pojoritia quiriquiaa tii. ⁶ Jesu sequesacari, “Janiyacuaaja nojuajani”, na paraari na nijiniara pojotuquee. ⁷ Jesuuri socua nojori nequesotarohua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

⁸ Jesuuri nojori riucuaaree:

—Janiyacuaaja tari nia sequereeni, janiyacuaaja nojuajani. Niaa jaara cua pajeya, nareja nia niquiri nio, cua cojiniaani.

⁹ Naacuajitij, tama Jesu sequesanojuuariria tohuatequiaari, nojuaja jaara naa na Que sequequiaari: “Majaari quenaaja niquiriyatu pueyano cua juurequetenu quiquiaari quia niquitiosano pueyajinijinio janiya”. ¹⁰ Jiyacaritij, Simón Pedroori tama na mueruujuaaja shitiaree na shuucuaji shiyano. Nata, pueyacuara secojonaa jiyaniijia seru numoco jaatereeri, na miaquetajara na numoco. Cuno seru sesa quiquiaari Malco. ¹¹ Jesuuri Pedro sequeree:

—Na co jiniacuma quia shiiriohua quia mueruu. Cua Que jaara paniya naa na miishaanura naquiyatej, ¿janiyatucua nio pojoriria tama cua cuaqueyajaaja tarinitiaaquiri naquiya cua miishaanurani? ¡Taaquiririnij!

Anás nequesoreesacari Jesu

(Mt 26.57-58; Mr 14.53-54; Lc 22.54)

¹² Jiyacaritij, na paraari Jesu quiaree. Nojoriiri quiquiaari Romano soldadohua, nojori jiyaniijiajuhuaj, Pueyaso Secojoua tiaco cojuanaa pueyano. Nojoriiri Jesu morojoturee. ¹³ Na nuhuaji, nojoriiri coteenu na jaatucutaquiaari Anáscua, canaa pueyacuara secojonaa jiyaniijia Caifás cama na quiniucua. Cuno marijiaara, Caifásri pueyacuara secojonaa jiyaniijiajanaa quiriquiaa. ¹⁴ Cuno Caifáscuajaari tari naa sequequiaari narta Judiocuaca camarucua: “Maniniacuajaari niquiriyatu pueyano mosaanura puetunu pueya nitijianaa, maja najuhua puetunu pueyajanaa puecoosaanura”.

Pedro coteesacari seetanu Jesujiniji

(Mt 26.69-70; Mr 14.66-68; Lc 22.55-57)

¹⁵ Simón Pedroori cuata Jesu nuhuajiriquiaa tucuaaanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacuajitij, janiyari tiuquinishaaree cutara Jesutani, jiyaniijia tia shocua mataca jiniacuma. ¹⁶ Saaja Pedro cutaraari tohuateyaji jateese. Jiyaniijiajanaa niishishano pueyano cua quiniucua, janiyari tohuateyaji cojuana niyacoota pocoojoseeni, Pedro na tiuquininiuriajuhuaj. ¹⁷ Cuno niyacoori Pedro nequesotaree:

—¿Majate quiajaniya cuno Jesu pueyajinijiniojuhuaj?

Pedroori na riucuaaree:

—¡Maja janiya!

¹⁸ Shiniquiaari jiyacari jaanujiriquiaa. Nocuaji cuno jiyaniijia seyari Pueyaso Secojoua tiajinia cojuanaa pueyata mani naatequiaari. Nojoriiri na jitiuriquiaa. Pedroori nojoritia tii quiquiaajuhuj. Mani jitiuriquiaari.

Pueyacuara secojonaa jiyaniijia nequesoreesacari Jesu

(Mt 26.59-66; Mr 14.55-64; Lc 22.66-71)

¹⁹ Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiojosanojiniji Jesu nequesoreereejaarihuaj.
²⁰ Jesuuri na sequere:

—Janiyacuaajaari pueyaracaanu puetunu pueya niqiarajanaa maatia niishitiojo-
 quiaani. Janiyari pueyaracaanu tiqiyocua Pueyaso secojonuujuaca tiacajiniaqueya
 niishitiojoquiaa pueyani. Naajuhuj, janiyari niya Jerusalén tiacajinia Pueyaso Secojo-
 jua tiajinia niishitiojoriquiaani, tee puetunu parta Judiocuacajanaa rerejoquiaacuajani.
 Majaari quenaaja jiyasohua cua rootanu quiquiaa pueya. ²¹ ¿Casaara quia nequesoreya
 janiyani? Quia nequesoreere juhuari cuno pojori, canapueete cua pohuatasano tojiquia-
 nuni. Nojoricuaajaari quia sequenutaniya casaa cua rootaquiaa nojorini.

²² Jiyacaritij, Pueyaso Secojouua tiaco cojuana pueyanoori Jesu shuriucua nujuariquiaa.
 Naa Jesu riuucasacari jiyaniijia Anástej, Secojonuujuua tiaco cojuana pueyanoori Jesu
 jiquioco maseteree. Naa Jesu sequereeri:

—¿Naa riuucasanote pueyacuara secojonaa jiyaniijia?

²³ Jesuuri na riucuaree:

—Janiya jaara sesa riucuareeni, cua sequere casaate sesa quiriini. Saniniuuja, janiya
 jaara maninia sequereeni, ¿casaara quia maseteree cua jiquiococuaraarini?

²⁴ Canaa pueyacuara secojonaa jiyaniijiajanaa Caifás quiniucua, jiyacaritij, Anásri Jesu
 moronucua jiyarotaree Caifás.

Pedro pacutesacari seetanu Jesujiniji
 (Mt 26.71-75; Mr 14.69-72; Lc 22.58-62)

²⁵ Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari
 na nequesotaree:

—¿Majate quiajaniya cuno pueyano pueyajinijiniojuhuaj?

Pedroori saaja seetaree. Sequereeri:

—¡Maja janiya!

²⁶ Pueyacuara secojonaa jiyaniijia seruuri Pedro niquirii. Nojuajaari noo pueyano cuna
 quiriquiaa, Pedro jaatesano na numocotej. Nojuajaari Pedro sequere:

—¡Janiyacuajaruhua quia niquirii cuno pueyanota quia quishacari olivo cuhuariquiajini-
 ani!

²⁷ Pedroori na seetarohuacuhua. Caacarajaari jiyacari niunijioquee.

Jiya jiyaniijia Pilato nequesoreesacari Jesu
 (Mt 27.1-2, 11-14; Mr 15.1-5; Lc 23.1-5)

²⁸ Caifás tiajiniji, Jesuuri jaatucusaquiaari Romano jiyaniijia tiajinia. Cuno tiaari
 jiyanohua puereetuua quiriquiase, jiyaniijiaacuaji tiasano. Cuno jiyaniijiani, nojuajaari
 Romano jiyaniijiajanaa César jiyatesano quiquiaari jiyaniijiajanaa na quiniuria Judea
 jiyajinia. Na sesa quiquiaari Pilato. Canaa Judiocuaca jaara tiuquijioquiaari Jesuta Pilato
 tia carijiniacuma, shusha juhuaqueriquiaari. Nojoriiri maja na tiuquitianu quiquiaari
 Pilato tiaco, nojori mariqui juhua curuushiriiri Pueyaso niquiara, naacuajitij, nojori
 maara Pascuara miaquesano borrego miaqueyaquirij. ²⁹ Naaratej, Pilatoori nojoriicua
 tohuataquiaari. Nojori nequesotareeri:

—¿Casaa nio pueyano miiriucuaani, miji nia nitianura cucuani?

³⁰ Nojoriiri saaja riucuaree:

—Jaara sesa miyashijia quiriquia, ¿canaatucua casaara quiocua na nitiamani?

³¹ Pilatoori nojori sequere:

—¡Niiquiji nia jiyataarohua! ¡Tama nia nequesoreeshuajaaja, taa nia supuetanaa
 rootasano sequeyacuajani!

Canaa Judiocuaca camarucuaari Pilato riucuaree:

—¡Niajaniya Romano pueyani, niaacuajaari canaa sequecanu maja canaa monura
 pueyano!

³² Naacuajitij, naa tarijia Jesu sequesanoori tohuateeriquiano quiquiaari, nojuaja jaara
 sequequiaari taa na mosaanutaniya niyacutesanojiniani. Saaja Romano pueyari naa
 monu niishiquiaari niyacutesanojinia. ³³ Jiyacaritij, Pilatoori na tiaco tiuquiyarohua. Jesu
 piiriiri nocua na niniuria. Tii Jesu nequesotareeri:

—¿Quiaate seetanujuanaa Judiocuaca jiyaniijia?

³⁴ Jesuuri Pilato sequere:

—¿Cunote tama quia niishishanojuajaaja naa quia nequesotanura janiyatej? ¿Tamonu soj
 quia pohuatacanu janiyajiniji?

³⁵ Pilatoori Jesu juarii. Na sequereeri:

—¡Quiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? ¡Tama quiarta Judiocuacuaajaari cucua nitiamaa quiajaniya, nia pueyacuara secojonaa jiyaniijianucuaata! ¡Cua sequere casaa quia miiriucuaani!

³⁶ Jesuuri na riucuaaree:

—Janiyacuaajaari Jiyaniijiani, maja juhua mijiria jiyaniijia. Janiya jaara mijiria jiyaniijia quiriquiani, cua pueya maara cua quiatunaa cuarta Judiocuacata miaquetoore, maja nojori quiatunura janiya. Majaari jiyaniijia cua quiniu mijiria, taa quia quiyacuaani.

³⁷ Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucuaaree:

—Jaa. Janiyacuaja Jiyaniijiani. Janiyacuajaari cunora rasaquiarini. Janiyari mijiria niqiaarini seetanu rupaajanaa cua niishitiniuria pueya. Cante seetanu rupaajanaa panijiani, nojoriiri cua sequesano tojitiajaca.

³⁸ Pilatoori najuhuana na nequesotaree:

—¿Casaateeri cuno seetanu rupaajanaani?

Naa na nequesotanu nuhuajitij, Pilatoori tohuatamohuacuhua canaa Judiocuacaacua.

Pueya sequesacari Jesu cuara mosaaria

(Mt 27.15-31; Mr 15.6-20; Lc 23.13-25)

Pilatoori jiyacari pueya sequeree:

—Nio pueyano nequesoreecuaajanijia. Nojuajaqui maja sesa na miiniu quiquianu.
³⁹ Niajaniya Judiocuacani, niaari puetunu Pascua juucarajanaa cua nenecojoquiaa cua cartenura nujuatejojuajiniji nujuatesano pueyano. Quiarijiani, ¿cana nia pania cua cartenura nio Pascua juucarani? ¿Niarta Judiocuaca jiyaniijiatee?

⁴⁰ Puetunu pueyajanaari naa jyanohua nacoorohuacuhuj:

—¡Maja cuno cartenu! ¡Barrabás quia cartere cutara!

Cuno Barrabásri nohuasejoju quijia.

19

¹ Jiyacaritij, Pilatoori na soldadohua majacuteree Jesu, coqueeca casaata. ² Soldadohuari juhuacontucua maaturee Jesu nacaquera. Na nuhuaji cushitishaarohuari. Na macaatiuria, shaaruque toque cushitishaarohuari, juhua jiyaniijia toque. ³ Naa nojori miiniu nuhuaji Jesutej, nojoriiri nocua catecanoquiaari. Na sequetureeri:

—¡Judiocuaca jiyaniijianaa! ¡Quia timiri, Judiocuaca jiyaniijianaa!

Naa nojori sequesacari Jesutej, nojoriiri na jiquioco piquitiuri.

⁴ Pilatoori socua tohuataquiaari canaa Judiocuacaacua. Nojori sequereeri:

—¡Nia niquiri! Janiya na tohuateya niaacuani, nia niishiniuria janiyacuaaja tari na nequesoreereeni. Janiyari quiarijia niishiyani, nio pueyanoqui maja sesa na miiniu quiriucaaa.

⁵ Jesu muetasacari nojoriicua, juhuacontucujiniji nacaque cushiriquiaari, shaaruque toquenio. Pilatoori Judiocuaca sequeree:

—Nia niquiri niarta pueyano.

⁶ Canaa pueyacuara secojonaa jiyaniijianucua, Pueyaso Secojoju tiaco cojuanaa pueyajuhaaj, nojori jaara Jesu niqiquiaari, naa nacoonu coteetureeri:

—¡Niyacutesanoinia quia teetere tii na cusonura! ¡Niyacutesanoinia quia teetere!

Pilatoori nacoyano riucuaaree saaja:

—¡Maja! ¡Janiyacuaajaari niishiyani, nio pueyano maja sesa na miiniu quiquianu! ¡Niaa jaara na monu paniri, nia teetere tama niajanijajaaja!

⁷ Canaa Judiocuacaari Pilato riucuaaree:

—¡Canaari Pueyaso Rootasano naajione jiiitiaani! ¡Canaari cunojiniji niishiyani, nio pueyano cuara mosaaria tama na cuaqueyajaaja na jiyatenuucua Pueyaso Niyanura!

⁸ Pilato tojishacari naa canaa Judiocuaca sequesanootej, nojuajaari socua puerequiaari.

⁹ Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajanijiani?

Jesuuri maja na riucuanu quirii. ¹⁰ Pilatoori na sequeree:

—¡Cua riucuaarejaj! ¿Quiaate niishiyaquiya, janiya jiyaniijiani? ¡Janiya jaara panirini, cua naata cua pueya sequenu na teetenura quiajaniya! ¡Janiya jaara paniaquiriijuhuaaj, cua naata quia cartenujuhaaj!

¹¹ Jesuuri saaja na riucuaaree:

—¡Jiyocuacaanu Quijia jaara quia jiyateyaquiquiaari jiyaniijia quia quiniuria, quiaa maara quia cumaaca paaretaaquiri cucuaaj. Naaratej, cante niyara cua nitiamaa quiocuani, nojuajaari socua jyanohua sesa miirri quiajanijiniji.

¹² Naa Pilato tojishacari Jesu sequesantej, nojuajaari socua shiriiquiquiaari. Nocuari, Jesu cartenu saniniujiuriquiaa juucuaari. Judiocuacaari saa nacoorejaa. Naa Pilato sequetureeri:

—¡Cante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! ¡Naaratej, quiaa jaara cuno pueyano cartere, majaari socua pa jiyaniijiajanaa César rupueña quia quiniu quiniutianiya!

¹³ Naa Pilato tojishacari pueya sequesano nojuajatej, nojuajaari na soldado sequeree na tohuatenuhuara Jesu pueya niquiara. Pilatoori jiyacari cajiri pueya na nequesoreesaquiji cajitiujinia. Pilato tii cajiri quiaani, na tajoji pueya nujuatusaquini, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitishano”. Judiocuaca rupaajinia saniniujia, cunoori quiquiaari “Gábata”. ¹⁴ Jiyacariiri panacari quiriquiaa. Cuno juuca, canaa Judiocuacaari juhuacarijia jeenucuariquiaa Pascuara juucajinia. Pilatoori jiyacari tii quiniaa Judiocuaca sequeree:

—¡Nia niquiri nia jiyaniijia!

¹⁵ Pueyari saa nacoorejaa:

—¡Cunoori maja canaa panishano canaa jiyaniijia na quiniuria! ¡Niyacutesanojinia quia teetere!

Pilatoori nojori sequeree:

—¿Janiyatucua nia jiyaniijia teetereni? ¡Maja!

Pueyacuara secojona jiyaniijianucuaari Pilato sequeree:

—¡Jiyaniijia César cuajaari canaa jiyaniijiajanaa! ¡Maja socua tamonu jiyaniijia canaa jitianu!

¹⁶ Pilatoori socua Judiocuaca niqutioree Jesu, nojori teetesocoriquiano. Naaratej, nojoriiri na jiyataquiaari na teetenuuca.

Jesu teetasacari

(Mt 27.32-44; Mr 15.21-32; Lc 23.26-43)

¹⁷ Jesuuri tama na teejaranojuajaaja canujutaaree pueya puecoosaquiria. Puecoosaqui sesa quiquiaari “Pueyano nacaco tuhuananu”. Judiocuaca rupaajinia saniniujia, “Gólgota”. ¹⁸ Jesuuri tii teetesaaquiaari, socua caapiqui pueyano. Jesuuri cuno pojori tajinia nujuaretasaare. ¹⁹ Pilatoori naa naajiotequiaarijuhuaj Jesu nacaacuma rupotasocoriquiano: “Nazaret tiacajinijinio Jesu, Judiocuaca jiyaniijia”. ²⁰ Naajiosano quiriquiaari canaa Judiocuaca rupaajinia, Romano pueya rupaajiniajuhuaj, Griego rupaajinianio. Jesuuri catecaja teetesaaquiaari Jerusalén tiacajiniji. Naacuajitij, queraatia Judiocuacaari cuno naajio serojoquiaari. ²¹ Naaratej, Judiocuacaacara secojona jiyaniijianucuaari Pilato juatiuri:

—¿Casaara naa quia naajiotereeni: “Judiocuaca jiyaniijia”? Cuaara naajiosaaria cutara: “Tama na cuaqueya sequejajaaja, Judiocuaca jiyaniijianijia”.

²² Pilatoori nojori riucaaree saaja:

—Janiyacujaari naa naajiotereeni. ¡Cuaara naa quiiriatej!

²³ Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriquiaari Jesu tucuaque cacojoqui. Cuno toqueeri shitiasano quiquiaari na riquiajiniji jiyocuara. Maja cusupuesano. ²⁴ Naaratej, cuno soldadohuari sequetooquiaari:

—Maja pa surenu nio toque. Coteenu pa tacuarishijiore, pa niishiniuria cante nera na panutaniyani.

Naacuajitij, tariucuacaanu Pueyaso Rupaajinia naajiotasanoori tohuateequiaari. Naa naajiotasano quiyari:

“Cua toqueeri seraatiasaaree. Cua tucuaque toqueecuaa tacuarishiyonuureeri, na pasocoriquiano”.

Seetanujanaa, naa miitiquiaariiri cuno soldadohua.

²⁵ Niyacutesano shuriucua tee Jesu teeriquiaacuajani, tii nujuatruquiaari na nucua, na nucua tarajanujuhuaj, Cleofas niquiocua Maríajuhuj, María Magdalenano. ²⁶ Jiyanohua Jesu panishano pueyanoori Jesu nucua shuriucua nujuariquiaa. Cuno pueyanocujaari janiya. Jesu niquishacari canaa, na nucua sequereeri:

—Maajiniaa, cua panishano pueyano cuaara quiiria juhua quia mueya cua niti.

²⁷ Na nuhuaji, cua sequereejariuhuj:

—Juanna, cua nucua cuaara quiiria juhua quia nucua.

Naaratej, janiyari María riquiaari cua tiajinianani, tii na quiniuria canaata.

Jesu cusosacari

(Mt 27.45-56; Mr 15.33-41; Lc 23.44-49)

²⁸ Na nuhuaji, Jesuuri niishiquiaari puetunu nojuajiniji naajiotasanojuanaari tari tohu-ateeree. Naajuhuaij, tariucuacaanu Pueyaso Rupaajinia naajiotasano tohuateenurajuhuaij, Jesuuri sequequiaari:

—¡Jiyamueyanijia!

²⁹ Cuniqúi, vino jereecaari patacojinia mishaja cajitiariquiaa. Jiyacaritij, namasu casaari jereeca vinojinia shishaaree. Naajuaacua na morotatureeri. Na nuhuaji, Jesu rupaama shitiasaareeri. ³⁰ Jesu ratunu nuhuaji cuno jereeca vino, naa sequerohuari:

—¡Tari tucuateree puetunujuanaacujanijia!

Naa na sequenu nuhuajitij, naniquiiiri. Cusoqueeri.

Soldado jitasacari Jesu shuucuaji na cashanata

³¹ Cuno juucaari canaa Judiocuaca jeenucuasacari quiriquiaa Pascuaacuara juucajinia. Cuno marijiaara, Pascua juucaari Sábado juucajinia quiriquiaajuhuaij, samaatenu juuca. Naaratej, canaa Judiocuaca camarucuaari maja na paniniu quiquiaari samaatenu juuca macunucua jaasuconura na niyacutesanojinia. Naaratej, nojoriiri Pilato sequeree cuno teetejosano pueya cashacucua na shuniitianiniuria, ritia nojori cusunuunura, na roshinijiosaanura cuno juucaja. ³² Naaratej, Pilatoori na soldadohua jiyaramiquirii. Cuno soldadohuari coteenu shuniitiaree niquiriyatu pueyano cashacucua. Na nuhuaji, tamonu cashacucua shuniitiatureejaariuhuaij. ³³ Saniniuujia, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitiaaquirii.

³⁴ Naajaa, tamonu soldadoori Jesu shuucuaji jitiaree na cashanata najuhuanaj. Ritia shooqueeri nanaca, mohuacanio. ³⁵ Cuno pueyano, na naajiojinia naa nia pohuataani, cunocuaajari janiya. Janiyajanaari na niquiquiaarini. Naarate janiyari seetanujanaa nia pohuataani. Tama janiyajaarjia niishiyani cua sequesanoori seetanujanaa, nocua nia tiuuniuria. ³⁶ Jesuuri naa miishaaquiaaritij, tariucuacaanu nojuajiniji naajiotasano tohuateenura. Naa sequeyacuajaari juhuacarijia nojuajiniji naajiotasano:

“Majaari quenaaja na nucu shuniitiasaanu quniutianiya”.

³⁷ Tamaquiiiri nojuajiniji naa naajiotasano quiyajuhuaij:

“Cashanata na shuucuaji na jitiatasano niqutiunitianiyari”.

Jesu quete niasacari raaco

(Mt 27.57-61; Mr 15.42-47; Lc 23.50-56)

³⁸ Na nuhuaji, Arimatea tiacajinijinio Joseeri Pilato sequesee:

—Cua niqutiore Jesu quete raaco cua niasocoriquiano.

Nio Joseeri jiyasohuaij Jesuucua tiuujia quiquiaari, na pueresacari narta Judiocuaca. Pilatoori na sequequiaari na panura Jesu quete. Naacuajitij, Joseeri quiaaree. Macu paquiaariiri. ³⁹ Nicodemojuhuaj, noo pueyano Jesuucua niqiaari niucua nata pocoojonuratej, nojuajaari jiyacari tiuquishii Joseecua. Nojuajaari queraatia shanohua jaanutaja nitiariquiaa, macucua niojosocoriquiano. Na niqiaaari quiquiaari cuarenta y cinco kilo. Cuno shanohua jaanutajaari quiquiaari mirra, aloeta cojitijosano. ⁴⁰ Joseeri Nicodemota Jesu jiniocoree toqueneecajinia. Nojori jiniocosacari, nojoriiri nocua niojoriquiaa cuno shanohua jaanutaja. Canaa Judiocuacaari naa miitujiaa quiquiaari, na macu na niatunura raaco. ⁴¹ Tee Jesu teetesaaquiaaricujani, cuniquijia na shurucua quiquiaariiri cuhuariquia. Cuno cuhuariquajiniani, quiarinio jiuutiasano raari quiriquiaa, macunucua niojojuara. Cuno raaconi, juhuanojuaja maja macu niasaanu quiquiaari. ⁴² Macuuri cuno raaco niasaaquiaari, cateca na quniuucua. Naajuhuaij, quera puequeriquiaari canaa Judiocuaca jeenucuuanu juuca. Cunoori, Pascuaacuara juuca.

20

Jesu samitiasacariuhua

(Mt 28.1-10; Mr 16.1-8; Lc 24.1-12)

¹ Domingo, coteenujuanaa semaana juucani, María Magdalenaari tariquicuajia quiaquiaari Jesu raajinijia. Ninishiquiiiri quiriquiaajaa. Na tiuquishacari, cuno puereetuca saajia niquishii tariucua tamocora ruutinishano, teyanota raa tiosaaquiaaricujani. ² Naa na niquishacaritij, nojuajaari neterohua Simón Pedroocua, cucuanio. Canaa sequesuhuari:

—¡Pueyanaa, pa Jiyaniijiaqui na raajiniji pasaaree! ¡Majaari canaa niishiniu teeriquitijia na niasaareteja!

³ Naaratej, janiyari Pedrotta netequiaari raajiniarajuhuaij. ⁴ Canaari mariyata netecuaturiquiaa coteenu. Janiya cutaraari socua ritia netequiaari Pedrojinijini. Naacuajitij, janiyari coteenu tiuquishii raajiniani. ⁵ Janiyari raaco cuuqueseeni. Janiyari saaja Jesu jiniocotaja toque niquirii maanoni tee Jesu quete niasaarucuaacujani. Majaari cua tiuquiniu quimaa raaco. ⁶ Simón Pedroori cua nuhuaji tiuquishii. Cami tiuquimaaajanaa

cutaraari. Nojuajaari Jesu jiunioctaja toque niqushii tii maanojuhuaj. ⁷ Jesu naca jiunioctaja niqiriijiaariuhuj tamoco maano, maninia mariquiosano. Majaari na manu quiriquiaa Jesu cuaqueya jiunioctaja toqueta. ⁸ Pedro tiuquiniu nuhuaji raaco, janiyari shusha jiyacari tiuquimiaaaniuhuj. Cua niquishacari Jesu jiunioctaja toque, janiyari niishiquiini Jesuqui tari samiitiarohua. ⁹ Canaari juhuanajuaja maja canaa niishiniu quiriquiaa tariucuacaanu Pueyaso Rupaajinia naajiotasano Jesujiniji. Tii sequeyacuajaari Jesuuri samiitianutaniuhua macujiniji. ¹⁰ Na nuhuaji, canaari tiajinia quiaarohuani.

Jesu muetasacari María Magdalenaacua

(Mr 16.9-11)

¹¹ Canaa quiojosacariuhua raajiniji, María Magdalenaari tijia jateequiaari. Raa shuriucua nujuqueriquiaari. Na nujuquenuta, raaco cuqueeri. ¹² Raaco na niquishacari, caapiqui Pueyaso seya niqiriiri, cohuajaque toqueyaraca. Nojoriiri macu niasaqui cajituriquiaa, tamonu na nacaacora, tamonu na cashacuucumara. ¹³ Pueyaso seyari María Magdalena sequeree:

—Maajinia, ¿casaara quia nujuqueyani?

Nojuajaari Pueyaso seya riucaaree:

—Cua jiyaniija quete niqiji pasaarucuaa. Majaari cua niishiniu teeriquitijia na niasaarucuaatejaj.

¹⁴ Naa na sequenu nuhuajitij, na nijiniara tacaterohuari. Saaja Jesu niquirii na shuriucua nujuanoori. Maja cutaraari na niishiniu quiriquiaa nojuaja Jesu.

¹⁵ Jesuuri na nequesotaree:

—Maajinia, ¿casaara quia nujuqueyani? ¿Cana quia pajeyani?

Maríari na jyanirii cuno cuhuariquia cojuana pueyano naasucua. Cunora, naa na sequereeri:

—Pueyanonaa, quiaa jaara canaa macu parucuaa, cua sequere tee quia niarucuaano. Janiyacua nocua quiaare na panurani.

¹⁶ Jesuuri na sequeree:

—¡Maríanaa!

Jiyacaritij, Maríari nocua tacatequee na niishishacari nojuajaari Jesu. Hebreo rupaajinia na sequereeri:

—¡Rabunil!

Cunoori sequeya, “Cua Niishitiojonanaa”. ¹⁷ Jesuuri María sequeree:

—Maja cua quianu. Juhuanajuaja maja cua tacanu quiquioo cua Queecua. Quia quiaarohua. Cua tapueyocuaca quia sequesuhua: “Janiya cua Que Pueyasooocua tacanutanihuani. Nojuajaari nia Quejuhuaj. Nojuajaari cua jiyaniija, nia jiyaniijajuhuj”.

Jesuuri naa na saquiriojosano pueya sequeree na tapueyocuacata, na Que Pueyaso na jiyatasacari nojori Quejuhuaj. ¹⁸ Jiyacaritij, María Magdalenaari nimiohua canaacua, Jesu saquiriojosano pueyacuani. Nojuajaari canaa pohuatasuhua taa Jesu na niqiriini. Naajuhuj, Jesu sequesano caminiujirii canaaraari.

Jesu muetasacari na saquiriojosano pueyacu

(Mt 28.16-20; Mr 16.14-18; Lc 24.36-49)

¹⁹ Cuno domingo juucajani, shusha ninishacari, canaa, Jesu saquiriojosano pueyani, canaari jatiqi quiriquiaa tiaconi. Canaari tia tohuateya mishiquiojoquiaari cumaatiani, canaa pueresacari Jesu motenaa Judiocuaca. Naa tia tiotiu mishiquiojosano quishacaritij, Jesuuri saaja canaacua tiuquimiaa. Canashyaquiji nujuasee canaa tajiniaari. Naa canaa sequereeri:

—¿Niaate quiyajaa? Juhujaniya nia quiri.

²⁰ Naa canaa na sequenu nuhuajitij, canaa niqitijoree na juaashiquiaari, na shuucujaj cashana jyanio. Canaari jyanohua timiriini canaa niquishacari canaa jiyaniija. ²¹ Jesuuri socua pacuterohua sequenu:

—¡Juhujaniya nia quiri! Naatej, taa cua Que jiyaroquiaari janiya mijiria na rupaa cua pohuatanuracuanaani, janiyari naa nia jiyaramiquiniutianiyajuhuj.

²² Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuqiniri nioojajinia. ²³ Niaa jaara pueyano jyanoori sesa na miishanojiniji, seetanujanaa jyanoooshano quiniutianiyari. Saniniujia, niaa jaara pueyano jyanoyaquiri sesa na miishanojiniji, Pueyasora, jyanoooshoo quiniutianiyajaariuhuj.

Tomás niquishacari Jesu, saminio seetanujanaa

²⁴ Majaari Tomás quiniu quiriquiaa canaata, narta saquiriojosano pueyatani, Jesu muetasacari canaacua. ²⁵ Naaratej, canaari Tomás sequequiaari na nuhuajini:

—¡Caapueyanonaa, canaa pa Jiyaniijia niquiriicuaani!

Tomásri saa canaa sequereejaa:

—Majaari cua tiuuniu quiniutianiya nia sequesanoocua, janiya jaara Jesu juaashiquia-jinia niquiyaquiri clavo jiyacani. Janiya jaara cua juaashiquia shiyaquiri clavo jiyamani, janiya jaara cashana jiyama pueraaquiri na shuucujijihuuj, janiyari nia cuaracashitiniutianiyani.

²⁶ Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaariuhuani. Tomásri jiyacari canaata quiriqiaa cutara. Tia tiootiuuri maninia mishiquiojosano quiriqiaa. Naajaa, Jesuuri saaja canaacua tiuquiquiaari. Canashyaquiji canaa tajinia nujuaseeri. Canaa sequereeri:

—¿Niaate quiyajaa? Juhujaniya nia quiri.

²⁷ Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucujij quia puerarejuhuaj. ¿Casaara cucujij quia taanuyajaani? Cucua quia tiuuri.

²⁸ Tomásri jiyacari Jesu sequereeri:

—¡Cua Jiyaniijianaa! ¡Cua Pueyasonaa!

²⁹ Jesuuri na sequereeri:

—Quia niquishacari janiya, quiaari shusha cucua tiuya. Socua shuquiriaatia quiniutianiya cutaraari noo pojori, canapute cucua tiuuniutianiya saaja nojori tojishacari janiyajiniini, nojori niquiyaquishacari janiya.

Casaara Juan naajioquiaari nio naajioneeni

³⁰ Jesuuri jiyanohua socua queraatia casaa miqiaari na cumaacata canaa na saquiriojosano pueya niqiuara. Cunoori nio nequesoreetuneejinia naajiotasoo. ³¹ Janiyari secaja saquiriojoree niya cua naajiotasocoriquianoni, nia niishiniuria Jesuuri seetanujuaanaa Pueyaso Jiyarosano, Pueyaso Niyanutuhuj. Janiyari nio naajioneeni nocua nia tiuuniuria, Pueyaso muerasura nia jiyatesaanura, pueyaracaanu rishijiaca nia quiniuria.

21

Tiberias caminiajinia Jesu muetasacari na saquiriojosano pueyacua

¹ Na nuhuaji, Jesuuri canaa na saquiriojosano pueyacua muetaquiaarihuua Tiberias caminiajinia. Naa quiquiaariti na muetasacari canaacua. ² Nio pojoriiri jiyacari mariyata quiriqiaa: Simón Pedro, Tomás (Caapueyano jiyaniishano), Natanaeljuhuaj. Nojuajaari Caná tiacajinijinio quiquiaari, Galilea jiyajinijinio. Janiyari cua tarajanuta tii quiriqiaa-janiuhuaj. Canaari Zebedeo niqiuohuani. Socua caapiqu Jesu saquiriojosano pueyajini-jinooori tii quiriqiaajuhuj. ³ Simón Pedroori jiyacari canaa sequereeri:

—Sapitiaajara quejootaseera shiyaru.

Canaari na riucaareeni:

—Canaa quiata quiaajuhuj.

Naacujitij, canaari quiojiyareeni. Canaari botejinia tacataseeni. Canaari puetunu cuno niucujanaa shiyaru quejootariqiaa sapitiaajara juucuan. Canaari shaa juhuaquetumaani. ⁴ Jiyacaritij, Jesuuri caminia casaqueyaji jaaquiajinia nujuariqiaa. Majaari canaa niishiniu quiquiaari cante nojuajani. ⁵ Jesuuri canaa jiiquiooree. Canaa nequesotareeri:

—¡Sanajoorinia! ¿Niaate na quiaree?

Canaari na riucaareeni:

—¡Majal! ¡Shaaqui sacaj!

⁶ Jesuuri canaa sequereeri:

—¡Nia shiyaru nia jartare nia miaquetajara bote tamajiria! ¡Niaari cuniqui na quianutaniya cutara!

Canaari naa miiriini taa na sequereeri canaacujani. Na nuhuaji, majaari canaa naata canaa shiyaru jaatanu quiriqiaa, queraatia sapitiaajaa canaa ritiasacari. ⁷ Jiyacaritij, janiyari Pedro sequereeni:

—¡Pa Jiyaniijiaqui!

Naa Pedro tojishacari cua sequesanotej, nojuajaari ritia na toque cushirii. Nojuajaari juhuasu quiriqiaa. Na toque na cushiniu nuhuaji, caminiajinia jaataareeri Jesuucua na quianura. Jiritiuuri quiriqiaa. ⁸ Canaari na nuhuaji jaatiariqiaa shiyaru botejinijini. Jaaquiaari namitia maja tucuaaanu na quiniu quiriqiaa, saaja cien metruruhua. ⁹ Canaa rosetasacari botejiniji, canaari na mani niquishiini. Sapitiaajaaari tii majeeriquiaa, pannio. ¹⁰ Jesuuri canaa sequereeri:

—Nia sapitiaajajiniiji miiji nia riri rarishocoriquiano.

¹¹ Simón Pedroori ritia botejinia tacamaa. Shiyaru tacanitiaree jaaquiajiniiaari. Queraatia sapitiaajaari quiriquiaa. Ciento cincuenta y tres sapitiaaja, saa puereetunucuaaja. Naa queraatia sapitiaaja quishacaritij, naajaa, majaari shiyaru turejetanu quirii quenaaja.

¹² Jesuuri canaa sequeree:

—Pueyanaa, miji. Nia miaquesee.

Majaari quenaaja niquiriyatu canaajinijinio nequesotanu quiriquiaa, cantejaaranononi. Canaacuaajaari niishiriquiaani nojuacuaajaari canaa Jiyaniijia Jesu. ¹³ Jiyacaritij, Jesuuri pan rishii manijiniji. Canaa na serotareeri. Sapitiaaja rariquia canaa niqutiojoreejaari-uhuaaj.

¹⁴ Jiyacari Jesu muetasacari canaa na saquiriojosano pueyacuatej, cunota tari quiquiaari jiuujanaraca na muetasacari canaacuaa na samiitianu nuhuaaji.

Jesu pocojosacari Simón Pedrota

¹⁵ Canaa miaquenuunu nuhuaaji, Jesuuri Simón Pedrota pocojoriquiaa. Na nequesotareeri:

—Juan niyanu Simónnaa, ¿quiaate cua panijia socua nio cuarta saquiriojosano pueyajiniji?

Pedroori na riucuaaree:

—Jaa, Jiyaniijianaa, quiaacuaajaari niishiya janiyari quia paniyani.

Jesuuri na sequeree:

—Cua borregohua niqiohuaniojua cojuanara quia quiriqui.

Naa Jesu sequesacari Pedrotej, nojuajaari miriqui na sequeriquiaa maninia na jitianura narta Pueyaso muerasu. ¹⁶ Jesuuri Pedro nequesotarohuacuuhuaaj:

—Juan niyanu Simónnaa, ¿quiaate cua panijia?

Pedroori Jesu riucuaaree:

—Jaa, Jiyaniijianaa. Quiaacuaajaari niishiya janiyari quia paniyani.

Jesuuri na sequeree:

—Cua borregohua cojuanara quia quiriqui.

¹⁷ Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja. Seetanujuaanaa Jesu riucuaareeri:

—¡Jiyaniijianaa, quiaacuaajaari puetunujuanaa niishijia! ¡Quiaari niishiya janiyari quia paniyani!

Jesuuri na sequeree:

—Cua borregohuaniojua cojuanara quia quiriqui. ¹⁸ Seetanujuaanaa quia sequeyanijia, mashaja quia quishacari, tama quiajanijiaarijia quia toque cushijia, quia quianura quia panishaqui. Saniniuujia, quiaa jaara saaquiano quiri, quiaari nareja quia numatucua shitionutaniya tamasaca cushitiniuria quia toque. Na nuhuaaji, quiaari canujutesaanutaniya quia paniyaquishaquiria.

¹⁹ Naa Jesu pohuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutaniya na mosaanuucua. Na nuhuaaji, Jesuuri na sequeree:

—¡Pueyaracaanu cua tojjia quia quiri! Pa quiaarej.

Juanjiniji pohuatasano

²⁰ Pedro tacatesacari na nijiniara, Jesu panishano pueyano niquirii na nuhuaaji sacuaanoori. Nojuacuaajaari janiya. Janiyari noo pueyanocuaajani, canaa miaquenuusacari Pascuara, Jesu shuriucua cua cajishacari na nequesotaquiaaritij: “¿Cantejaara cunoni, quia quiatenutaniyani?” ²¹ Quiaarijiani, Pedro niquishacari janiya saniniuujia, Jesu nequesotareeri:

—Jiyaniijianaa, janiya jaara naa mosaanutaniyacuaani, ¿nojuajaarijiataj, taa na miishaanutaniyarini?

²² Jesuuri Pedro riucuaaree:

—Janiya jaara paniri nojuaja rishiniuria pueyaracaanuni, janiya jaara jiyocuaaanuji tiuquiriohuaajatijia, quiara, naajaa. Quiajaniya cutara, pueyaracaanu cua tojjia quia quiri.

²³ Naa Jesu sequenuucua Pedrotej, puetunu cuarta Jesu pueyajanaari jyaniriquiaa janiya naasucua shaajeyaquiriquianoni. Jesuuri seetanujuaanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuaaanuji tacatemohuaajatijia, quiajaniyara naajaa”.

²⁴ Janiyacuajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pohuataani. Cua pohuatasanoori seetanujuanaa.

²⁵ Jesuuri jiyanoehua queraatia socua casaa miiquiaari na cumaacata mijiria. Puetunu na miishanojuanaa jaara naajiotasaare, naa naasucua nio jiyajinia maara quiquio quiyaquiri puetunu cuno nequesoreetuneecaacuajijianaa.

JESUCRISTO JIYARAMIQUISHANO PUEYA MIISHANO

“Pueyaso Sohuanu niaacua jiyarosaanutaniya”

¹ Quiocuara naajionu pacuterohuanijia, cua panishano Teófilonaa. Coteenu cua naajiosanojinia, janiyari quia pahuataquiaarini taa Jesu na poonijiosano coteequiaari mijiriani. Puetunu na miishanojuanaa naajiotaquiaarinijia, mariyata na niishitiojosano na coteenujiniji, jaara tacanishaaquiaariuhua jiyocuacaanu na Queta na quiniuhuara. ² Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. ³ Jesu cusonu nuhuaji, nojuajaari muetaquiaariuhua na saquiriojosano pueyacia. Nojoriicua mueranacujuquiaariiri. Cuarenta juuca nuhuaji tacaquiaariuhua puetunujuanaari. Na miishanota nojoriicua na mueranacujusacari, nojori niishitiriiri nojuaja seetanujuanaa saminio quiya. Nojoritia pocoojuquiaariiri taa Pueyaso jitianutaniya na muerasuni.

⁴ Nojoritia na pocoojosacari tamonu juuca, Jesuuri nojori numotequiaari maja ritia nojori quianuhuara Jerusalén tiacajiniji. Nojori sequequiaariiri:

—Nia sashirijiaara cua Que cuara niqutiioorajaara na Sohuanu nijaniya. Nojuajaari cua sequequiaari na niqutionutaniya nijaniyana, taa cua caminiujuquiaari tari niaaracuajani. ⁵ Naa sequequiaari nijaniyacujani: “Tiuquinijiona Juanri nia tiuquinijioquiaari moojinia, Pueyaso tojjijara nia jatasacari. Pueyasoori saniniuujia na Sohuanu nioojiajinia tiuquinjonutaniya, seetanujuanaa Pueyaso tojjijara nia quiniuria”. Quera niaacua tiuquinutaniyacuaajari. Naaratej, nia sashiri.

Jesu tacasacariuhua jiyocuacaanu

⁶ Tamonu juuca, Jesu pueyari Jesuucua rerejoquiaari. Na nequesotatureeri:

—Jiyaniijianaa, ¿quiaate Jiyaniijara jiyatesaanutaniya quiarijia Israel pueyara, maninia pa quiniuhuara tama pa jiyaniijataaja, taa pa supuetanaa quiquiaaricuaani?

⁷ Jesuuri nojori riucaaree:

—Nio cutaraari maja nia niishishocoriquiano, taacari Israel pueya jiyaniijara cua jiyatesaanutaniyani. Pa Que Pueyasoori cuno niishishano racataa tama nerajaaja. Saa nojuajaari na niishiya cutara. ⁸ Naajaa, niaari Pueyaso cumaaca masenutaniyacuaaja, Pueyaso Sohuanu jaara nioojiajinia tiuquiri. Niaari janiyajiniji pohuatanutaniya pueya niquiara Jerusalén tiacajinia, puetunu Judea jiyajiniajanaano, Samaria jiyajiniajuhuaj. Naa pohuataaanutaniyaariuhua puetunu jiyacajiniajanaa, socua tucuacaanu jiya puequeetujiniano.

⁹ Jesu puecasacari pocuanu, nojuajaari tacanishaaquiaari na pueya shootiasacarijia nojuaja. Cohuajajinia shaajemaari pueya niquiyaquiniuucuaaji nojuaja. ¹⁰ Nojori mautasacari jiya cajiniocua Jesu tacasacari, canashiyaquiji, caapiqui pueyari nojori shuriucua nujuatuquiaari. Nojori toqueeri jianohua cohuajaque quiriquiaa. Nojoriiri jiyocuaaanujinio Pueyaso seya quiquiaari. ¹¹ Nojoriiri Jesu pueya sequeere:

—Galilea jiyajininio pueyanaa, ¿casaara nia mautaa jiyocuacaanuni? Taa nia niquirii tacaanocujani, niaari naa na niqiniutianiya tacatehuanohuajuhuj.

¹² Nojoriiri jiyacari Olivo nacuhua tuhuananuucua quiriquiaa. Pueyaso seya nuhuaji, Jesu pueyari Jerusalén tiacajiniocua tacatequiaari. Cuniquiji, cateca naataja quiquiaari Jerusalén tiaca. Moisés Naajiotasanojiniji, Judiocuacaari naa rootasaaquiaari maja socua tucuacaanu nojori rucuanenura samaatenu juuca. ¹³ Nojori tiuquijiosacari Jerusalén tiacajinia, nojoriiri nojori quijia tajinia tiuquitiaquiaariuhua. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanucujani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricujani. Quiquiaarijaariuhua Simón, cante tari quiquiaari Romano pueya jatanu panijiacujani. Mariyata quiriquiaari Judas, Santiago tarajanu. ¹⁴ Nojoriiri jiyacari pueyaracaanu Pueyaso seconuuriquiaa tii maajipohuata, mariyata Jesu nucua Mariata, Jesu tapueyocuatatanio.

Pueya saquiriojosacari Matías Judas niti

¹⁵ Nojori sashishacari Pueyaso Sohuanu tii, tamonu juuca, Pedroori njuajaquiaari pueya niquiara na sequenura nojori. Naa naasucuatuhuj ciento veinte pueyari tii quiriquiaa puetunujuanaa. Naa nojori sequeereeri:

¹⁶ —Cua tapueyocuaanaa, Pueyaso Sohuanu sequesanoori maja na naata naajaa tajiniu. Seetanujuanaa tari tohuateerucuaari Judasjiniji na pohuatanishano pa supuetanaa jiyaniijia David. Naacuajitij, Judasri Jesu monaarano niishitiquianu tee Jesu quiriquiaani, nojori na quiatenura. Judasri cunora niqutiosaacanu cumaneeca, naa

nojori na niishitiniuucua Jesu quiasaanura. ¹⁷ Nojuacuajaari parta Jesu saquiriojosano pueyano quiquiaarijihuhaj. Nojuajaari mariyata Jesu jiyaramiquishano quiquiaa juhua pajaniyajuhuj. ¹⁸ Tamonu cuhuariquiaari masesaacanu sesa na miishano samitia. Na nuhuaji, tama cusoyareejaarijia. Jiyocuaaanuji tiqianu na nacaraari. Na sara-caari cocuaretasee. ¹⁹ Jerusalén tiacajinia quiniaa jaara na niishiquianu, nojoriiri cun cuhuariquia sesojoree “Acéldama”. Acéldamaari pueyano rupaajinia sequeya “Nanaca samitia masasano cuhuariquia”. ²⁰ Judasjinijiiri naa naajiotasaaquiaarijihuhua tariucuaacanu supuetana David jaaquequejojuajinia. Naa sequeyari:

“Na quiquo cuaara quiiria shaaco. Cuaara quiiria sanaaca, camaruuju”.

Sequeyajaariuhuj:

“Tamonu pueyano cuaara jiyatesaaria na poonijiosano miiriquiano na niti”.

²¹ ‘Cuarta Jesu saquiriojosano pueyanaa, niya quiyacuaja pueya, canapuetucujaja pa tarajaquiaarini pueyaracaanu pa Jiyaniijia Jesu quishacari pata. ²² Nojoriiri Juan niqiuquiaarijihuhaj Jesu tiquiniyano moojinia, Jesu tacasariuhua jiyocuaacaaunio. Canapuetucujaja puetunu nio niqiuquiaarijianaani, niquiriyatu nojorijinijinio cuaara jiyatesaaria Jesu jiyaramiquishanora, pata na quiniuria, Jesu samiitianujiniji na pohuata-nurajuhuj.

²³ Naaratej, pueyari caapiqui pueya saquiriojoquiaari. Cuniqiu quiquiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiquiaarijuhuj, Matías. ²⁴ Na nuhuaji, pueyari naa secojoquiaari Pueyaso:

—Jiyaniijianaa, quiaari puetunu pueya jiuujia niishijajanaa. Canaa quia niishitiri teyano pueyano tari quia saquiriojoreeni, quia jiyaramiquishocoriquiano na quiniuria, Judas niti poonijioriquiano. ²⁵ Judasri quia niquitiosano poonijiosanojiniji catecanu sesa na miiniuucua, naquiya miishaqui na quianura, sesa miijia na quiniuucua.

²⁶ Na nuhuaji, pueyari naajiosano saajia jaquerooree nojori niishiniuria teyanote Pueyaso panishano pueyanoni. Saajiaari Matíascuara tacatasee. Naacuajitij, Matiasri Jesu saquiriojosano pueyanora quiquiaarijuhuj. Naacuajitij Jesu saquiriojosano pueyari juhua juhuanoraja quiquiaariuhua doce.

2

Pueyaso Sohuanu tiuquishacari

¹ Pentecostés juuca jaara quiquiaari, puetunu Jesuucua tiuniaajanaari rerejono quiquiaari tamonu tiajinia Jerusalén tiacajinia. ² ¡Canashiyacujiji, paratuuri tojishaquiaari jiyocuaaanuji, juhua paratu pocuaano jyanohua cojuata! Jyanohua tojishaareeri cun tiajinia tee Jesu pueya cajituriquiaacuajani. ³ Jiyacari, juhua maniiri niqushaaree pueya caco rimianuqueyano. Puetunu nojori cacojuanaa rimianacuriquiaari juhua mani. ⁴ Jiyacaritij, Pueyaso Sohuanuuri puetunu tiajinia quiniaa jiuujiajiniajanaa tiuquirii. Pueyari juhuacatecara tamaatia rupaaca pocuaree. Pueyaso Sohuanuuri naa nojori pocooteree puetunujanaa tamaatia rupaaca.

⁵ Cuno quishacari, queraatia Judiocuaca puetunu jiyacajinijiniojuanaari camueenu-juriquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojoriiri Pueyaso tojtiajaca quiquiaari. ⁶ Nojori tojishacari cun cojuatunenu, nojoriiri cuqueree tee Jesu pueya pocooriquiaa tamaatia rupaacacuajani. Nojori tojishacari naatej, nojoriiri jyanohua cushitirii. Naatej, puetunu rucoanaajanaari tama na jiyajinijinio rupaacajaja tojtiaquiaa, cun pojori pocosacari. Nojoriiri maja na niishiniu quiquiaari casaara naa nojori miiriini. ⁷ Nojoriiri jyanohua jiuujiatecoree. Tama sequetooreejaarijia:

—¡Juhuej! ¿Cuno pojoriti maja Galilea jiyajinijinio pueyacuaja naa pocoyaniquitij? ⁸ ¿Taa nojori pocuaa puetunu coteenu pa rupaacajanaani? Pajaniyacujajaari queraatia tamaatia jiyacajinijinioni, puetunu tamaatia rupaaca pocuajacajanaa.

⁹ Seetanujanaari. Cuno pojoriiri Partiya jiyajinijinio nijiono quiquiaari, Media jiyajinijinio, Elam jiyajinijinio, Mesopotamia jiyajinijinio, Judea jiyajinijinio, Capadocia jiyajinijinio, Ponto jiyajinijinio, Asia jiyajinijinionio. ¹⁰ Quiquiaarijiaariuhuj Frigia jiyajinijinio, Panfilia jiyajinijinio, Egipto jiyajinijinio, África jiyajinijinionio. Cuno Africa jiyajinijinio pueyari quera Cirene tiaca shuriucuaji quiquiaari. Roma tiacajinijinio pueyari tii quiquiaarijuhuj, canapueete Jerusalén tiacajinia pacunaa quiquiaariacuajani. Puetunu cun pojorijianaari Judiocuaca quiquiaari. Noojiaqueyari rasaaquiaari Judiocuacajanaa. Tamasacaari na cararaatiuuquia co miatejosaaquiaari Judiocuacara na quiniuria, Pueyaso tojijiacara nojori quiniu panishacari. ¹¹ Creta jiyajinijinio pueyari tii quiquiaarijuhuj, Arabia jiyajinijinionio. Puetunu cun jiyacajinijianaari tamaatia rupaaca pocuajaca quiquiaari. Nojoriiri socua naa sequetoocujajaari:

—¿Taateni? ¡Puetunu pajaniyajanaari cuno Galilea pueya tojtiaani Pueyaso cutara miishano pohuataano, tama pa coteenu rupaaajiniaaja!

¹² Puetunu nojorijianaari jiuujiateriquiaa nojori jiyajenenuta. Tama nojorijiaarjia nequesoreetooquiaari nojori tacaaniutia:

—¿Casaa na miitiuyajaaranonjoni?

¹³ Tamasaca nojorijiniinooori saaja Jesu pueya macaatirii. Tama nojorijiaarjia tama sequeutooreejaacujua:

—Cuno pojoriqui mashaasequenuya shocuanacuhuata.

Pedro pohuatasano pueya niquiara

¹⁴ Jiyacaritij, Pedroori juhuacatecara pocuaree cuno pojori niquiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojtiare casaa cua sequenutaniya niajaniyani. Puetunu Jerusalén tiacajinia quiniaajanaa cuaara niishiiria cua pohuatasano. ¹⁵ Niaari canaa jiyaniya mashaasequenuyano. Pananucuajaari shusha taqueejiya. Maja canaa mashaasequenuunu. ¹⁶ Niaari canaa tojtiaa tamaatia rupaaca pocuaano. Niocuajaari taruacuacaanu Pueyaso sequesano caminiujunia Joel pohuatasano. Cuno niaa na niquiayani, cunocuajaari na sequesano, shusha tohuateyani. Nojuajaari na sequequiaaritij:

¹⁷ “Pueyasoori naa sequeyaquij: ‘Quera jiya puequesacari, janiyari cua Sohuanu niq- uitionutaniya puetunu pueyarajanaani. Naacuajitij, mashiquoriiri janiyajiniiji pohuatanutaniya, niyacojorinio. Cua Sohuanuuri cua niishishano niqitiniu- tianiya mashiquori juhua na maquenujinia. Cua niishishano niishitiojonutaniya saaquiapue na maquenujiniaaariuhuaaj. ¹⁸ Cuno quishacari, janiyacua cua So- huanu niqitioere puetunu cua tojtianaajanaani, canuu, maajipohuanu. Nojori- iri janiyajiniiji pohuatanutaniya pueya niquiara. ¹⁹ Puereeta cua miishanoori jiya cajiniocua niquishaanutaniya. Cua miishanoori jiyacua niquishaanutaniya- juhuaj, pueya na numootenura. Nanacaari niquishaanutaniya, mani, jyanohua najacanio. ²⁰ Pananuuri ninishiquiria quiniutianiya. Racaari juhua nanacara quiniutianiyajuhaaj. Naa coteenutaniyari jiya puequenura. Na nuhuaji, jiyani- ijjajanaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutianiyari, puereetajuhaaj. Jyanohua shanohua quiniutianiyari na rosesacari. ²¹ Puetunu Jiyaniijia secojonaa pueyajanaari jyanooshaanutaniya Pueyaso pueya nojori quiniuria’”.

‘Supuetana Joelri naa naajiotaqueiaari Pueyaso sequesano tarijiatej. ²² Naaratej, socua cua tojtiare cuarta Israel pueyanaa. Jesujiniiji nia pohuatanutaniyanijia, Nazaret tia- cajinijinio pueyano. Pueyasocuaajaari pa niishitiquiaari, Jesuuri na jiyarosano pueyano quiquiaari. Naacuajitij, Pueyasoori na poonitijioquiaari pa niquiara jyanohua jiyajeneta casaa na miiniuria. Paacuajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri see- tanujuanaa Pueyaso Jiyarosano quiquiaari. Niajanuyacuajaari maninia niishiya puetunu maninia na miishanojuanaa. ²³ Saniniuuja, Jesu jaara niqitiosaarucuaa nijaniya, niaari na quiarucuaa juhua sesa miijia. Na nuhuaji, niaari Pueyaso tojiyashijiaa pueya na moterucuaa maca niyacutesanojinia, taa Pueyaso paniquiaari tarijiacuajani. Pueyasocuaajaari niishiquiaari naa mosaanutaniyari Jesu. ²⁴ Pueyaso cutaraari na sami- tianiriohuacuaa macujiniiji. Na carterohua macujiniijiri. Majaari quenaaja tamonu cumaacaraca quijia quiniu quiquianu Jesu na jiyojetenura macu quiquiojinia pueyaraca- nura. ²⁵ Pueyaso Sohuanu jaara pohuataquiaari pa supuetanaa jiyaniijia David, nojuajaari juhuacarjia naa pohuataquiaari Jesu sequesocoriquianotej:

“Cua shuriucua niquiquiaa Jiyaniijianijia. Nojuajaari cua shuriucua quiya, cua miaqueta- jara, maja quenaaja casaa teteyatenura janiya. ²⁶ Naaratej, coojiaari timirii. Cua niti taquiriocrateree cua shuquiriniutianijia. ²⁷ Naajuhaaj, cua cusosacari, cua queteeri juhuajaniya quiniutianiya, cua niishishacari quiaari cua tarinitiaaquinutianiya macunucua quiquiojinia. Quiaari cua shu moquijiaaquinutianiya saa maninia miijiaja cua quishacari quia niquiara. ²⁸ Quiaari cua niishitiojoree maninia cua miiniuria, pueyaracaanu quijara cua quiniuria. Quiaari jyanohua cua shuquiri- tianutianiya quiaata cua quishacari pueyaracaanu”.

²⁹ ‘Cua pueyanaa, paacuajaari niishiyani, pa supuetanaa jiyaniijia Davidri jamosaaquiaari na cusosacari. Na jamaari niya quiyajaa Jerusalén tiacajinia. ³⁰ Nojuajaari niishiquiaari Pueyasoori tari na sequequiaaricuja:

“Davidnaa, tamonu pueyanoori supenutaniya quiajanijiniiji, jyanohua quia nuhuaji. Cuno pueyanoori Jiyaniijiaa cua jiyatesano quiniutianiya quia niti. Nojuajaari cua

jiyarosocoriquiano Cristo. Seetanujuanaa naa quiniutianiyari Davidnaa. Maja cua sapojonu”.

’Pueyanaa, paacuajaari niishiyani Davidri Pueyaso sequesano caminiujunia quiquiaari. ³¹ Naacuajitij, Davidri Cristojiniji pohuatariquiaa jiyanohua tariucuaaanujiniji, juhua tari na niquishano. Pueyaso Sohuanuuri na niishitiquiaari taa Cristo miishaanutianiyani. Naacuajitij, Davidri Cristo samiitanujiniji pohuatariquiaa naa na sequesacari: “Pueyasoori na tarinitiaaquiniutianiya macunucua quiquiojinia”, mariyata naa na sequesacari: “Na quete moquijiaaquiniutianiyari”. ³² Pueyasoori nio Jesu samiitianiriohuacuaa. Na samiitanu nuhuaji, puetunu canaajanaari na niquiquianuni. Janiyari nia pohuataa seetanu canaa niquishanojuanaani. ³³ Cutara na cumaacata, Pueyasoori na tacaniriohua na miaquetajara cajiriquiano, Jiyaniijajanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequequiaari tarijiacuajani. Jesuuri saniniuujia quiarjia canaa na niqutioree. Naaratej, niaari canaa niquriit tamaatia rupaaca pocuaano. ³⁴ Majaari David tacanu quiquiaari jiyocuaaanu cutara. Nojuacuajaari Jesujiniji sequequiaari: “Jiyaniijia Pueyasoori cua Jiyaniijia sequequiaari: ³⁵ ‘Cua miaquetajara quia cajishijiaara, janiya cuaara quia paraa shocotarejaatijia’ ”.

³⁶ Cunora, puetunu nijaniyajanaa Israel pueyanaa, niaa cumaati niishiya, Pueyasocuaajaari nio Jesu jiyatecanu Jiyaniijajanaa na quiniuria. Niaacuajaari niyacutesanojinia na mocanucuaaja. Nojuajaari Cristo, Pueyaso jiyatesano Jiyaniijiaara. Majaari canaa pohuatasanojiniji nia taacanunu pueyanaa.

³⁷ Pueya tojishacari naa Pedro pohuatasanojete, nojoriiri tetecatuquiaari. Pueyari saniniuujia Pedro nequesotaquiaari, na cojiniaanio:

—Canaa pueyanaa, ¿taa canaa miiniutianiyarinijia?

³⁸ Pedroori nojori riuacuajiaari:

—Nioojia nia tacatore sesa nia miiniujiniji. Nijaniya cuaara moojinia tiuquinijosaaaria Jesucristoocua nia tiuushacari, nia jiyanooshaanura sesa nia miishanojiniji. Naa nia miishacariitij, Pueyasocua nia niqutiore na Sohuanu. ³⁹ Pueyaso sequesacari nojuaja na Sohuanu niqutionutianiya pueya, cunoori niaaranocuaaja, nia niqiuohuaranonio, tucuaaanu quijiacarajuhuj. Pueyaso Sohuanucuaajaari puetunu pueyajanaa niqutiosaanutaniya, cana pa Jiyaniijia Pueyaso sequeya na muerasura na quiniuracuajani.

⁴⁰ Pedroori jiyacari pueya pohuataree queraatia socua Jesujiniji na niishishano. Jiyanohua nojori nacasureeri. Naa nojori sequereeri:

—Nioojia nia tacatorohua Pueyasocua, maja Jesu ruuretajaca nia cojiritiasaanura quejoonu mani quiquiojinia.

⁴¹ Pedro pohuatasanoocua tiuuniaari tiuquinijosaaquiaari. Cuno juuca, tres mil pueya naasucuaari coteenu Jesu tojtianaa rupuenaa quiquiaari. Pueyaso pueyari naa canequiaaritij. ⁴² Puetunu nojorijianaari maninia tojtiaquiaari pueyaracaanu Jesu jiyaramiquishano pueya niishitiojosano. Nojoriiri jatiqui quijia maninia. Majaari nojori juayonuujutanu quijia. Nojoriiri pueyaracaanu rerejojua neecaruu serotanura Jesu cusonu niishiniuria. Mariyata Pueyaso secojonuujua pueyaracaanuuri.

Panitioojuaca Jesu tojtianaa quishacari juhua tapueyocucata

⁴³ Jesu jiyaramiquishano pueyari jiyajeneta miishano miijioriquiaa Pueyaso cumaacata. Naacuajitij, puetunu pueyajanaari puereturiquiaa. Pueyari shiriquitiurii. ⁴⁴ Puetunu Jesucua tiuuniaajanaari maninia rupuetooquiaari juhua tapueyocucata. Nojoriiri maja jamuejaca quiquiaari. Casamiriaca pueyari na casami niqutiojoquiaari nareja casamiijiuniucua pueya. ⁴⁵ Tamasacari na jiiitasano casami niqutioquiaari na cumaneeca na masenura na casami sami. Na cumaneeca na masenu nuhuaji, nojoriiri tamasa niqutioquiaarijuhuj, casamiijiuniucua jiiitanura puetunu nojori panishanojuanaajuhuj. Tamasaca pueyari na cuhuariquia niqutioquiaari nojori jiiitanura na cumaneeca, tamasa na naacunurajuhuj. ⁴⁶ Nojoriiri jatiqui rupuetooquiaari. Nojoriiri rerejojua puetunu juucajanaa Pueyaso Secojoua tiajinia. Mariyata tama nojori tiajiniajaaja nojoriiri rerejojua, neecaruu neecasenura Jiyaniijia Jesu cusonu nojori niishiniuria, mariyata jatiqui nojori miaquenuunura nojori shuquiriniutia. Nojoriiri maninia jiuujaraca quiquiaari. Nojoriiri maja tamonu pueya shocotanu panijiaa quiquiaari. ⁴⁷ Nojoriiri pueyaracaanu Pueyaso manihuuaqueetariquiaa nojori shuquiriniutia. Puetunu Jesucua tiuyashijiaa pueyajanaari nojori paniquiaari. Puetunu juucajanaa, Jiyaniijia Jesuuri nojori canijiariquiaa, socua pueya tiuushacari nocua.

3

Sesarunocua pueyano jeeecasari

¹ Tamonu juuca, Pedroori Juanta tacatariquiaa Pueyaso Secojoua tiajinia. Tari quiquiaariiri pananu piriushacari. Nojoriiri jiyacari quiojonu jitiiquiaari Pueyaso secjonura Secojoua tiajinia. ² Jiyacaritij, tamonu sesarunocua pueyanoori tii cajitiariquiaa Secojoua tia tohuatējaji. Nojuajaari naa rasanohuanaja quiquiaari. Pueyaracaanu patoojotasaquaaariiri Pueyaso Secojouajiniara, pueya na mashiniquiniuria cumaneeca nojori tiuquitasacari. Na cajitiasaqui tohuatēja sesa quiquiaari “Tohuatēja Maniniu”. ³ Sesarunocua pueyano jaara niquiquiaari Pedro, Juannio, nojori tiuquitianu panishacari Secojoua tiajinia, nojori maseree juucua na cumaneecaari. ⁴ Pedroori Juanta na shootiaree tacuriitia. Jiyacaritij, Pedroori na sequeeree:

—Canaa quia niquri.

⁵ Sesarunocuaari juucua shootiariquiaa nojori. Cumaneeca niquitiosaariquiano jiyaniriquiaa juucuaari. ⁶ Pedroori na sequequiaari:

—Shaaqui cua cumaneeca. Shaaqui tojetaarucujanaa. Naajaa, cua jitiiasanota quia naacureera quarijia. Quia sequeya Jesucristo sesajinianijia: “Quia sanere. Quia rucanerejuhuaj”.

⁷ Pedroori na juashiquiaajiniji na quiaquiaari. Na nujuatereeri. Na niohuacaari jiyacari ritia jeequequiaari na sanesacari. Na sairi maniniuiaacara quiquiijuhuaaj. ⁸ Sesarunocuaari juhuacatecara rucaneguaari. Nojoritia tiuquiquiaari Pueyaso Secojoua tiajiniaari. Maninia rucuaneriquiaari. Jaacatariquiaari. Pueyaso maniniuahuacquetariquiaajariuhuaaj. ⁹ Puetunu pueyajanaari na niquiquiaari rucuaneyano, Pueyaso maniniuahuacquetanaajuhuaaj. ¹⁰ Puetunu pueyajanaari na niishiquiaari nojuajaari sesarunocuaaja, Secojoua tiajinia tohuatēja Maninijinia cumaneeca mashiniquijiojuatej. Pueyari cunora jiuujiatequiaari. Jiyanohua shirriquitiuquiaariiri.

Pedro pahuatasacari Pueyaso rupaa pueya niquiara

¹¹ Sesarunocuaari Pedro juashiquia carteyaquiquiaari, Juan juashiquiano. Nojoriiri Pueyaso Secojouajinia nujuaturiquiaa tamocora. Nojori nujuatusaquiiri pueya jiyaniquishano tariucuaaanu jiyaniijia Salomón canujuucojojoua quiquiaari. Puetunu pueyajanaari nocua netecuatuquiaari na shirriquiniutia. ¹² Pedro niquishacari nojori, pueya sequequiaariiri:

—Cuarta Israel pueyanaa, ¿casaara nia jiuujiateya nocujajini? ¿Casaara nia niquitiaa canaani? ¿Niaate jiyaniya canaa na niohuaca jeeceareeni? Maja canaa. Majaari canaa cumaacata na jeequenu quriri. Naa naasucuaari jiyaniya canaari nio miiriini socua maninia miijia canaa quiniucua Pueyaso niquiara tamasaca pueyajiniji. ¡Maja! ¹³ ¡Jesucuaajari na jeecearohua! Nojuacuajaari na Que Pueyaso jiyatesano jiyaniijijanaa na quiniuria. Jiyaniijijanaara na jyatenucaajaari Pueyaso, cante nio pojori pa supuetanaa jiyaniijia quiquiaaricujajini: Abraham jiyaniijia, Isaac jiyaniijiano, Jacobo jiyaniijiajuhuaj. Tama pa supuetanaa jiyaniijia Pueyasocuaajari Neyanu Jesu jiyatequiaari jiyaniijijanaa na quiniuria. Naa cutaraari Pueyaso Niyanu niquitioceanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiquianu na cartesaanura. ¹⁴ Naa maara maninia pueyanoocuaaji tacucanu saniya cutara, niaari pueyano puecojuaacua shirriquitiurii saaja Pilato cartenura jiyano sesoriquia pueyano seque. ¹⁵ Naaari naa motecanu pueyano samitianijiacuajatej. Naajaa, Pueyasoari na samitianiquianuhua macujiniji. Canaari na niquiquianuni. Naacuajitij, canaari nojuajiniji nia pohanuani. ¹⁶ Nio sesarunocua pueyanoori Jesucuaa tiuuri. Naacuajiti jeequerohuari. Nojuacuajaari sesarunocua quiquiaari taa nia niquiquiaaricujajanoj. Jesucuaa na tiuushacari, na cuaqueya cumaquiriiri. Na cuaqueyari seetanujanaa jeequerohua maninia, taa nia niquiyacuajanoj. ¹⁷ Cuarta Israel pueyanaa, quarijia niishyanijia, majaari nia niishiniu quiquianu casaa nia miiquianuni. Majaari pa camarucua niishiniu quiquianujuhuaaj. Naaari Pueyaso Jiyarosano mocanu nia niishyaquishacari cante nojuaja quiquianuni. ¹⁸ Naacuajitij, Pueyasoari na sequesano tohuateecanu, tarijia na niishitishano na rupaa caminiujunaa. Seetanujanaa, puetunu Pueyaso sequesano caminiujunaaajanaari pa supuetanaa niquiara poojotaquiaari: “Pueyaso Jiyarosanoari na quia nia miishaanutaniya”. Jesuuri naa miishaacanu taritij. ¹⁹ Naaratej, nioojia nia tacatore sesa nia miishanojiniji. Pueyasoocua nia tacaterohua sesa nia miiniu tuusaaanura. ²⁰ Naacuajitij, pa jiyaniijia Pueyasoari na naata juhua maniniushiquiariria jiyatenuhua pajaniyara, shuquiriaatia pa quiniuhuara mijiria na jiyarosacariuhua Jesu. Pueyasoari tarijia na sequequiaari pa jiyaniijia nia quiniuria. ²¹ Nojuajaari jiyocuaaanu quiniutianiya na Que shuriucua, Pueyaso cuara tucuatereajatiija puetunu tariucuaaanu na pohanatishanojuanaa na sequenu panishano caminiujunaa. ²² Moiséscaajaari naa sequequiaari pa supuetanaatej:

“Jiyaniijia Pueyasocuaajaari niaacua jiyaronutaniya nojuajiniji pohuatana tama nia niqiuohuacujinino supuenojuaaja, taa na jiyaroquiaari janiyacuaani. Nojuaja jaara supuere, niocua puetunu na sequesanojuanaa tojiri. ²³ Canapueete cuno pueyano pohuatasano ruuretanutaniyani, nojoriiri Pueyaso saquiriojosano pueya tajiniji shaajasanutaniya puetunurajanaa”.

²⁴ Pueyanaa, puetunu Pueyaso sequesano caminiujiuniaajanaari Moisés nuhuaji naa Jesujiniji pohuatanoquaiarijiuhuj. Naacuajitij, Samuelri Jesucristojiniji pohuataquiaari taa na niniutianiyani. Naajuhuj, Samuel nuhuaji, puetunu Pueyaso sequesano caminiujiuniaajanaari naa pohuatanoquaiarijiuhuj. ²⁵ Puetunu Pueyaso sequesano Jesujinijianaani, cunoori quiarijia pajaniyara, taa Pueyaso pohuataniquiaari tariucuacaanu na sequenu panishano caminiujiuniaacuajani. Nojoriiri pa supuetanaa quiquiaari. Pajaniyara-nojaariuhuj Pueyaso sequesano pa supuetana Abraham. Pueyasoori naa sequequiaari pa supuetana Abraham:

“Quia muetusanonijini tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajiniajanaacuajani”.

²⁶ Pueyaso jaara na tojjia Niyanu samiitianiquianu, coteenu na jiyaroree pocuaari poojia tacatoriquiano, sesa pa miiniu pa cartenura, shuquiriaatia quijiara pa quiniuria.

Pedroori naa pohuataquiaari pueya niquiaratej.

4

Judiocuaca camarucua nequesoreesacari Pedro, Juannio

¹ Pedro pohuatasacarijia pueya niquiara, nocua nijioquiaariiri pueyacuara secojonaa, Pueyaso Secojoua tia cojuanaata, Saduceocucatanio. ² Nojoriiri Pedro tojiquiaari pueya niishitiojiano. Nojuajaari pueya niishitiojioriquiaa macunucuaari saneecuautunaniuhua na jamacajiniji, naatej taa Jesu samiitiarohuacaani. Cuno jiyaniijianucua jaara naa tojiquiaari seqeshiyanotej, nocuaji jiyanohua juaaquoquiaariiri, na ruretasacari Pedro sequesano. ³ Cuno juaaquiyoanoori Pedro quiatuquiaari, Juannio. Jiyacariiri tariucua tenacari quiquiaari. Tariucua niucua nujuatejosaaquiariiri. Nojoriiri tii juhuaquequiaari nujuatejojuajinia. ⁴ Naajaa, queraatia pueyari Jesuucua tiuquiaari Pedro pohuatasacari Jesujiniji. Quera cinco mil saaja canuuri tari Jesuucua tiuuniaa quiquiaari. Maajipohuari serojosoo quiquiaari.

⁵ Tariqui, Judiocuaca camarucuaari rerejoquiaari camarucua nacasunaata, Moisés Rootasanojiniji niishitiojonaatanio. Nojoriiri Jerusalén tiacajinia rerejoquiaari Jesujiniji pohuatanaa nojori nequesoreenura. ⁶ Anásri tii quiriqiaajuhuj. Nojuajaari pueyacuara secojonaa jiyaniijia quiquiaari. Caifásri tii quiriqiaajuhuj, tamonu Juannio, Alejandro, mariyata puetunu secojonaa jiyaniijia tapueyocucuanio. ⁷ Pedro, Juannio, nojoriiri nujuatejojuajiniji tohuatejosaaquiari. Nujuatejosaaree jiyaniijianucua tajiniaari. Pedro shocua, Juan shocua cajitiuniaari nojori nequesoreere:

—¿Taa nia miiruucuaa noonijia, sesarunocuatej? ¿Cana cumaacata nia jecarohuacuaanoj? ¿Cante nia sequecanu naa nia miinuriiani?

⁸ Jiyacariitij, Pueyaso Sohuanuuri Pedro jiuujia cumaquiquiaari Pueyaso niishitijata na pocuanura. Naacuajitij, Pedroori naa nojori riucuaquiaari:

⁹ —Canaa camarucuaanaa, nia pohuatareera sesarunocujiniji, taa na jeequerohuacaani. ¹⁰ Naa canaa nequesoreetaate, nia tojitiare cana sequesano, nia niishinuria cua pohuatasano, puetunu Israel pueyajanaa niishinuriajuhuaj. Nio pueyano niya nujaani, nojuajaari Jesucristo cumaacata jeequerohuacuaa. Niaari Nazaret tiacajinijinino Jesu cusojucuanu niyacutesanojinia. Pueyaso cutaraari na sanacanhua macujiniji, pueyaracaanu na quiniuhua. ¹¹ Niajanitari juhua saitia tiajonaa Pueyasora. Nia tiasacari, niaari maniniujajau saajia jataquiaari, nia jyanishacari sesarujajau naasucua. Na camaruuri saniniujia sequeya:

“Cuno nia jatasano saajiani, cunoori saniya cua maniniujajau saajia”.

Niaari naa Jesu jataquiaari juhua saajia sesarujajau. Naajaa, Pueyasoori na niaquiaariuhua socua maniniushiqui. ¹² Majaari tamonu quiniu pocuaji tacuna. Puetunu pueya tajinijinijiojuanaani, maja Pueyaso tamonu pueyano sesa jiyaniquiniu quiquiaari cante pocuaji tacuriquianoni. Saaja Jesu cutaraari sequesaaquiari pocuaji tacuriquianora.

¹³ Judiocuaca camarucuaari jyanohua na namijiaa riunitiuquiaari nojori niquishacari taa Pedro, Juan seetanujanaa cumaacata pohuatariquiaa nojori niquiarani. Nojoriiri Pedro, Juan niishiquiaari nojoriiri seetanujanaa maja puera naajionujuuca quiquiaari. Nareja poonijionujuuca pueyajinijinino quiquiaariiri. Naa nojori niishishacariitij, nojoriiri seetanujanaa niishirii nojoriiri Jesu cojiniaa quiquiaari.

¹⁴ Sesarunocua jeequenohuari cuniqui nojori shuriucua nujuariquiaajaacuhuj.

Naaratej, jiyaniijianucuaari socua sanaajetaquiaari. Saaja niishiriojonuuriquiaari.¹⁵ Camarucuaari Pedro, Juan tohuatanijioquiaari tamocora nojori tajiniji. Jiyareta camarucuaari tama pocojoquiaariijiaaja.¹⁶ Naa sequetuquiaariiri:

—¿Taa pa miya socua nio pueyarini? Puetunu Jerusalén tiacajinia quiniaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jeeccasoo. Nojoricuaajari tari maninia na niishitiuya.¹⁷ Nio pojori pa piriyojore juhuari, maja socua quiarijia nojori pohuatanura Jesujiniji pueya niquiara, nojori miishano paaqueyaquiniuria socua niya pa tiacajiniani.

¹⁸ Camarucuaari socua piiquiaariuhua Pedro, Juannio. Nojori nacasuree jiyanohuari, maja socua quenaaja nojori pohuatanura Jesujiniji pueya niquiara.

¹⁹ Pedroori Juanta nojori riucuaquiaari:

—¿Canaatucua casaara Pueyaso samiritiare canaa tojiniuria nijaniyani? ¿Taa nia sequyani jiyaniijianucuaanaa? ²⁰ Maja cutaraari canaa naata tariitianu pohuatanu canaa niqishano, canaa tojishanonio.

²¹ Camarucuaari nojori piriyojoquiaari juucuhuj. Puetunu pueyajanaari saaja maniniuhuaqueetariquiaa Pueyaso, puetunu maninia na miishanojinijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu quirii.²² Pedro jeeccasanhua sesarunocua pueyanoni, nojuajaari cuarenta marijia shoocotejoquiaari tari na quishacari.

Jesu pueya secosacari Pueyaso, na cumaquiniuria nojori

²³ Pedro, Juan jaara cartesaquiaari, nojoriiri narta Pueyaso pueyacia quiojoquiaariuhua. Nojori pohuatatureeri Judiocuaca camarucua sequesano nojori, camarucua nacasunaa sequesanojuhuj.²⁴ Na tojishacari camarucua piriyojosano, puetunu nojorijianaari Pueyaso secosajonu coteequiaari. Naa sequetuquiaariiri:

—Canaa jiyaniijianaa, quiaari jiya cajiniocua shipinina, jiyanio. Shoniniacu caminiaari quia shipinishanojuhuj. Puetunu casaajanaari quia shipinishano. Quiaari jiyanohua maninia.²⁵ Canaa supuetanaa jiyaniijia Davidri quia seru quiquiaari. Naacuajitij, quia Sohanuuri na pohuatequiaari quia sequesano Jesujiniji juhua tariucua miishano. Quiaari naa na pohuatequiaaritij:

“¿Casaara jiyacia quiniaa pueya juayani? Pueyari najuhuaana sesa niishiriojoriquiaa juucua.²⁶ Jiyajinijinio jiyaniijianucuaari na juaaquiaca sanetaree. Queraatia tiacajinijinio camarucuaari jiyaniijia Pueyasoocuaa roojotooree, na jiyarosano Cristocuaranio”.

²⁷ Pueyasonaa, naacuaaquinatejaj. Jiyaniijia Herodes, Poncio Pilatonio, nojoriiri nio tiacajinia rerejocanu narta taucucata, Israel pueyatano. Quia Niyanuucuaa roojotoocanuuri, tama quia jiyarosanoocuarajaaja.²⁸ Naa nojori miiniucuatej, nio pueyari tari quia miini panishano miiriucuaa, taa quia sequequiaari tariucuaaanucujani: “Cua Niyanu cuaraa mosaaria puetunu pueyacuarajanaa”.²⁹ Canaa Pueyasonaa, quia tojishuriucuaraj. Nojoriiri quiarijia canaa miananojiya saniniujia. Canaacuaajari quia seyani. Canaa jiuujia quia cumaquiri quiarijia, canaa pohuatanura socua quia rupaa canaa puereyaquiniutia.³⁰ Cusosuhua cuaraa naatanijiosaaria quia cumaacata. Canaa jiyaniquishacari quia Niyanu sesa, jiyajeneta casaa cuaraa miiijiosaaria quia cumaacata pueya niqishocoriquiano. Nojuacuajari saa maniniaja.

³¹ Nojori puecasacari secosajonu, nojori quishaqui tiaari canashiyajuii jiuuquiuti- aquiaari. Pueyaso Sohanuuri puetunu nojori jiuujiajinia tiuquiquiaari, nojori na cumaquiniuhua. Naacuajitij, pueyari saaja maninia pohuataquiaari Pueyaso rupaa pueya niquiara. Majaari na pueretunu quiquiaari.

Jamueyashijiaca Jesu tojtianaa quishacari

³² Jesuucua tiuniaari maninia juhua rupuetootesano quiquiaari puetunujuanaa. Nojoriiri juhua seetanujanaa tapueyocucataja quiquiaari. Majaari nojori sequenu quiquiaari: “Cua casami saaja quiria quiniutianiya”. Nojori jiiitasano casamiiri sanini- uujia puetunu narta Jesuucua tiuniaarajanaa quiquiaarijuhuj.³³ Jesu saquiriojosano pueyari Jesu samiitianujiniji poojotaquiaari jiyanohua cumaacata. Naajuhuj, Pueyasoori puetunu Jesuucua tiuniaajanaa naacuriquiaa jiyanohua, shuquiriaatia nojori quiniuria.³⁴ Puetunu Pueyaso pueyajanaari na panishano jiiitiaquiaari puetunujuanaa. Nojorijini- jinio jaara cuhuariquia jiiitiaquiaari, tianio, nojoriiri na niqutioquiaari cumaneecara.³⁵ Jaara cumaneeca masequiaari na casaa sami, nojoriiri nareja na niqutioquiaari Jesu saquiriojosano pueya. Nojoriiri saniniujia casamiijiu Pueyaso pueya na serotaquiaari, nojori jiiitanura na panishanojuhuj.³⁶ Nojorijinijinio, tamonu pueyanoori quiquiaari. Na sesaari José, Levita pueyano. Jesu jiyaramiquishano pueyari na sesojoquiaari Bernabé.

Nioori sequeya “Cumanijiana”. Chipre jiyajinia na raja. ³⁷ Bernabeeri cuhuariquia jiiti-aquiaari. Na cuhuariquia niqutioquiaari cumaneecaraari. Jaara masequiaari cumaneeca na cuhuariquia sami, nojuajaari nareja na niqutioquiaari Jesu jiyaramiquishano pueya, casamijiu narta Pueyaso pueya niqutiojosaanura saniniujuja.

5

Ananías, Safira sesa miishanoiniji pohuatasano

¹ Tamonu pueyanoori quiquiaari. Na sesaari Ananías quijia. Necocua sesa quiquiaari Safira. Nojoriiri na cuhuariquia niqutioquiaari cumaneecarajuhuj. ² Ananíasri na cuhuariquia samijiniji queyataquiaari nera. Na cureeno pataquiaari Jesu saquiriojosano pueyacuuaari. Juhua papatasoo niqutioquiaari na sapojonutaari. Necocuaari na miishano niishiquiaarijuhuaj. Majaari neyacata na quiniu quiriquiaa Ananías niqutiosacari nareja na cumaneeca. ³ Ananías niqutiosacari na cumaneeca, Pedroori na sequere:

—Ananíasnaa, ¿casaara quia tiuquinirii Sesaaca quioojajiniani, quia sapojonura Pueyaso Sohuanu juucuani? ¡Nojuacuajaari cua niishitiquii nio cumaneecaari maja puetunu quia masanojuanaa quia cuhuariquia samijiniji! ¡Quiaacuajaari tiji queyataree! ⁴ Quia cuhuariquia quia niqutioyaquishacarijia cumaneecara, cuno cuhuariquiaari quia casaa quiriquiaa. Na nuhuaji, quiaa jaara quia cuhuariquia niqutioree cumaneecara, quia cuhuariquia samiiri quia casaa quiriquiaajuhuj. ¿Casaara naa sesa quia niishiriojoreerini? Naa sacuarataa quia miishacaritij, majaari quia sapojonu quirii parta pueyano. ¡Quiaa cutaraari Pueyaso sapojoree juucua!

⁵ Ananías tojjishacari naa Pedro sequesantej, ¡macuuri pojoquee! Puetunu pueyajanaa jaara tojinuuquiaari nocuaji, jiyanojua shiriqutioquiaariiri. ⁶ Mashiquioriiri na jiunio-coquiaari toquejinia. Na nuhuaji, na patuquiaari na jamonuraari.

⁷ Jiuujianaraca hora nuhuaji, necocuaari juhuajaniya tiuquiquiaari Pedroocajuhuj. ⁸ Pedroori na nequesotaree:

—Cua sequere, ¿niojuanaate nia cuhuariquia sami quiricuua?

Na riuacuareeri:

—Jaa, niojuanaacuaaquinatejaj.

⁹ Pedroori na sequere:

—¿Casaara naa nia roojotoorucuaa Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquijiohua. Nojoriiri quiarijia quia panutaniyajuhuj.

¹⁰ Jiyacaritij, maajiri macu pojoquee Pedro shuriucujuhuj. Mashiquiori tiuquijiosacariuhua, nojoriiri Safira niquishuhua pojijanojuhuj, tariucua macu. Nojoriiri na patuquiaarijuhuaj. Neyaca shuriucua na jamotuquiaariiri. ¹¹ Puetunu Pueyaso pueyajanaa, tamasa pueyano, nojori jaara tojinuuquiaari puetunu nio miishanoinijianaa, jiyanojua pueretuquiaariiri.

Queraatia mijiosacari Pueyaso cumaacata pueya niquiara

¹² Jesu jiyaramiquishano pueyari jiyanojua cutara casaa mijioquiaari Pueyaso cumaacata. Queraatia pueya naatanijioquiaariiri. Puetunu Pueyaso pueyajanaari pueyaracaanu rerejoquiaari pueya jiyaniquishano tariucuaaanu jiyaniijia Salomón canujuucojojua-jinia, Pueyaso Secojua tijajinia. ¹³ Tamasaca pueyari nojori puerequiaari. Majaari nojori rupesaanu quijia. Na pueretujuacaari nojorijiniji sequetujua:

—Cuno pojoriiri maninia pueya.

¹⁴ Queraatia pueyari Jiyaniijia Pueyasoocua tiuquiciaari, canuu, maajipohuanio. ¹⁵ Naajuhuj, cusosuhuari patootasaquiaari na maquetucujajinia nuujiniara. Pueyari naa niishiriojioquiaari, Pedro jaara cusosuhua shuriuquico tajimia, cusosuhuari naat-aconutaniuhua Pedro naaqui jaara nojori caco netema. ¹⁶ Queraatia Jerusalén tiaca shocua quiniaa pueyari na cusosuhua patootaquiaarijuhuaj, Jerusalén tiacajiniara. Samaruhua sesosano pueyari jaatucunuusaaquiaarijuhuaj. Puetunu pueyajanaari naatanijosaaquiaari.

Pedro, Juan nujuatejosacari nujuatejojuajinia

¹⁷ Naaratej, pueyacuara secojonaa jiyaniijia, nata quiniaa narta Saduceocucacano, nojoriiri juaaquioquiaari shocotasano nojori quishacari. ¹⁸ Secojonaa jiyaniijiaari na pueya jiyaroquiaari Jesu jiyaramiquishano pueya nojori quioonura. Jaara na quiootuciaari, nujuatejosaquiaariiri Judiuca nujuatejojuajinia. ¹⁹ Pueyaso seruuri niucua jiyocuaaanuji nojoriuca rosequiaari. Nujuatejojuua tohuateya riataseeri. Na tohuatejosacari Pedro, Juannio, nojori sequereeri:

²⁰ —Juhujaniya nia quiaarohua. Pueyaso Secojoua tiajinia puetunu Jesujinijijanaa nia pohuatare pueya niquiara. Nia pohuatarehujaj taa jatanishano pueya nia quiya quiarijiani.

²¹ Nojoriiri Pueyaso seru sequesano tojiqiaari. Nojoriiri tariquicuaji quiojoqiaari Pueyaso Secojoua tiajinia. Tii niishitiojonuuriquiaa juhujaniya Jesujiniji pueyari. Jiyacari, pueyacuara secोजनाa jiyaniijiaari nata quiniaata saniniuujia quiojoqiaari pueya nequesoreesaqui. Puetunu Israel pueya camarucujanaa rerejotereeri, nojori nequesoreenura Jesu jiyaramiquishano pueya. Puetunu nojorijianaa jaara tari rerejoqiaari, na pueya sequeqiaariiri nojori tohuatejonura Jesu jiyaramiquishano pueya nujuatejojuajiniji, nequesoreesocoriqiano. ²² Na pueya jaara tiuquitiaqiaari nujuatejojuajinia, majaari nujuatejosano na riuriatatanu quishii nujuatejojuajinia. Nojoriiri tacaretacuhua na shaacanu nuhuaji. ²³ Naa pohuatanuusuhua camarucua niquiaraari:

—Canaa tiuquishacari nujuatejojuajinia, canaari maninia cumaatia mishiquionucua na riuriataseeni. Tii cojuanaari maninia cojuariquiaa na tiotiu. Canaa riatasacari tohuateya, jshaacoori quiriqiaa!

²⁴ Secojoua tia cojuanaa camarnu, mariyata pueyacuara secोजनाa jiyaniijianucuaari tama segetoqiaarijiaaja nojori shirriqiniutia:

—¿Taateerini? ¿Taariquitijia socua na nuhuaji quiniutianiyatej?

²⁵ Jiyacaritij, tamonu pueyanoori camarucuaacua tiuquishii. Naa nojori sequeeseeri:

—¡Noo pojori, niaa na nujuatejocanu nujuatejojuajiniatej, nojoriiri juhujaniya pueya niishitiojonuya Pueyaso Secojoua tiajinia!

²⁶ Tari nojori niishishacari tee Jesu jiyaramiquishano pueya quiriqiaani, Secojoua tia camarnuuri na pueyata quiojoqiaari Jesu jiyaramiquishano pueya quioonura. Jaara na quiootquiaari, nojoriiri jacaria na jaatucunuquiaariuhua. Secojoua tia camarnuuri pueya puereriquiaa. Nojori jaara caponeere Jesu jiyaramiquishano pueya na juaaniutia, pueya mariqui nojori jacure saitia saniniuujia. Nojoriiri cuno puereqiaari. Nocuaji Jesu jiyaramiquishano pueyari jacaria jaatucunuusaaqiaari. Majaari na caponeesaanu quiquiaari. ²⁷ Jaara tiuquitasaaqiaariuhua, nojoriiri Israel pueya camarucujanaa tajinia nujuatejosaaqiaari, Sanedrincuaa tajiniatuhuj. Pueyacuara secोजनाa jiyaniijiaari nojori sequeqiaari:

²⁸ —¡Majaquiiiri nia niishiniu tojinii! Canaacuaajaari tari nia tenujucanu juucuanii maja socua cuno Jesujiniji nia pohuatanura pueya niquiara. ¿Niaate nia numaa shama tojiqianu canaa sequesano? Naa nia niishitiojosacaritij, ¡puetunu Jerusalén tiacajinia quiniaajanaari canaacua tiutianutaniya Jesu mosaanu! Canaa segetunutaniyari: “Cuno pojoriiri Jesu motucanu”.

²⁹ Pedroori narta Jesu saquiriojosano pueyata nojori riucuaqiaari:

—Seetanujanaari, pueya cuaara Pueyaso sequesano miiria coteenu, maja narta pueya sequesano. Maja cutaraari canaa tarintianunoi. Na nuhuaji cutara, nio jiyajinia jiyaniijianucua sequesano cuaara miishaaria. ³⁰ Pueyasoori tariucuaaanu pa supuetanaa Jiyaniijia quiquiaarijuhuj. Cuno Pueyasojuaanaacuaajaari niyacutesanojinia nia cusojuasano samiitianiquianuhua. ³¹ Pueyasoori na tacaniquianu jiyocuaaanu. Na miaquetajara na cajitiqianuuri Jiyaniijijanaa na quiniucua, pocuaji Tacuna na quiniucuaquahuaj. Naa miiquianuuri Israel pueya tacatonuhuaa noojia Pueyasocua, Pueyaso jiyanooniuria pajaniya sesa pa miishanojiniji. ³² Naaratej, canaari canaa tojishano pohuataani, canaa niquishanonio. Naajuhuj, Pueyaso Sohuanuuri canaa niishitiojoquiaa maninia canaa pohuatanura pueya niquiara. Pueyasocuaajaari na tojtianaa niqitioquiaa na Sohuanu.

³³ Naa Judiucuaa camarucua tojishacari nojori sequesantej, juaaquioreeri. Nojori puecoonu panirii juucuaari. ³⁴ Jiyacaritij, tamonu pueyanoori narta camarucua tajiniji nujuaqiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuaaanu rootasano niishijia quiquiaari cutara. Naajuhuj, nojuajaari jiyanohua narta Israel pueya tojishano pueyano quiquiaari. Gamalielri Secojoua tia cojuanaa camarnu sequeqiaari Jesu jiyaramiquishano pueya na tohuatanijionura rupaqijia. ³⁵ Na nuhuaji, saa camarucua quishacarijia tii nata, nojuajaari naa nojori sequeqiaaritij:

—Cuarta Israel pueyanaa, jacaria nia niishiriojore taa nia miiniutianiya nio pueyani.

³⁶ ¿Majateeri nia niishiniu taa Teudas miiquiaari quiari naatajani? Nojuajaari jiyaniijiaa quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaqiaari. Puetunu na pueyajanaari niyaquejoqiaariuhua. Naa puequeqiaariiri Teudas miiniu panishano. ³⁷ Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajinijinio tamonu Judasri jiyacari César ruuretaqiaari. Queraatia pueyari na nuhuajiquiaari nojori jiyaniijia na quiniuria

juucua. Nojuajaari mosaaquiaarijuhuaj. Puetunu na pueyajanaari niyaquejoquiaari-uhuajuhuaj. ³⁸ Naaratej, naa nia sequeyanijia: nia tarinitiare nio canuu. Nojori niishitiojosano jaara tama nojori niishishanojuuaaja quiri, shaajenutaniyari. ³⁹ Saniniuujia, nojori miishano jaara seetanujuanaa Pueyasojiniji quiri, majaari nia naata nojori tarinitiniu quiniutianiya nojori miishanojiniji. Nocuaji tama nia cuaqueyajaaja nia cojuare, majaari Pueyasota nia miaquetojonuruhua, naa nojori nia miishacaritij.

⁴⁰ Puetunu camarucujanaari Gamaliel sequesano tojiquiaari. Na nuhuaji, Jesu jiyaramiquishano pueyari tiuquinitiasaaruhi. Camarucuaari nojori mojooree nareja. Nojori tenjutureeri maja Jesujiniji nojori pohuatanura socua pueya niquiara. Naa nojori miishaanu nuhuajitij, Jesu pueyari carteqesaaquiaariuhua. ⁴¹ Jesu jiyaramiquishano pueyari camarucua rerejojuajiniji tohuareetaquiaariuhua shuquiriaatia. Nojoriiri timiquoriquiaa cararaatia nojori camarucua miiniucua nojori, Jesujiniji nojori poojotanucua maninia. Majaari nojori seetanu quiquiaari nojori Jiyaniijia Jesujiniji. ⁴² Majaari nojori pishiniu quiquiaari nojori pohuatanura Jesujiniji. Socua pueya niishitiojonura jiyacatequiaariiri. Nojoriiri pueyaracaanu pueya niquiara pohuatariquiaa Jesucristojiniji, puetunu juucajanaa, Pueyaso Secojojua tiajinia, mariyata puetunu Jerusalén tiacajini-aqueyajanaano.

6

Mashiquiopue mianuutenaara saquiriojosacari

¹ Jiyacaritij, Jesuucua tiuunaa pueyari socua canequiaari. Puetunu nio pojorijinijiojuanaani, noojiaqueyari Judio rupaa pocuanaa quiquiaari. Naajuhuaaj, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juuaquejoquiaari Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niqutioyaquiquiaa miaquesanonijia?

² Nocuaji, Jesu jiyaramiquishano doce pueyari puetunu Jesuucua tiuunaa pueyajanaa rerejojuiaari. Naa nojori sequequiaariiri:

—Maja maninia canaa cartenura Pueyaso rupaa pohuatanu, canaa mianuutenura mashiquiopue. ³ Cunora canaa tapueyocuaacanaa, tama nijaniyajinijinio nia saquiriojore siete maninia miiijaca pueya, niishijaca, Pueyaso Sohuanuraca cutara. Nojori nia seeratare nio poonijosano, maninia nojori mianuutenura pa mashiquiopue. ⁴ Canaacua saniniuujia saa Pueyaso secojorenijia. Naajuhuaaj, majaari canaa tarinitianu quiniutianiya Jesujiniji niishitiojonu.

⁵ Puetunu pueyajanaari na shuquiriniutia naa riucuaquiaari:

—Taaquiriirinij, naacuaaquiniateja maniniaajaj.

Jiyacaritij, pueyari Esteban saquiriojoquiaari. Nojuajaari jiyanohua Pueyasocua tiuujia pueyanu quiquiaari. Nojuajaari Pueyaso Sohuanu cumaacaraca quiquiaarijuhuaj. Nio pojoriiri Estebanta saquiriojosaaquiaarijuhuaj: Felipe, Prócoronio, Nicanornio, Timónnio, Parmenasjuhuaj, Nicolásnio. Nicolásri tahue quiquiaari Antioquiya tiacajinijinio. Tii rasaquiaariiri. Nojuajaari tarijia Judiocuaca niishitiojosano pueyano quiquiaari, Judio pueyanora na quiniuria. ⁶ Puetunu pueyajanaa jaara cuno siete pueya saquiriojoquiaari, nojori jiyataquiaariiri Jesu jiyaramiquishano doce pueyacua. Jesu saquiriojosano pueyari cuno siete canuu nacaacua niaquiaari na juashiquiaaca. Pueyaso secojoturee nojoriicuaari Pueyaso Sohuanu cumaquiniuria nojori, miaquesano niqutiojonaa nojori quiniuria.

⁷ Jiyacariti Pueyaso rupaari socua tojishano quiquiaari. Jesuucua tiuunaaari socua canequiaarijuhuaj. Queraatia Judiocuacaacuara secojonaa pueyari Jesuucua tiuquiaarijuhuaj.

Jesu ruuretajaca quasacari Esteban

⁸ Estebanri Pueyaso cumaacaraca quiquiaari jiyanohua. Pueyasoori maninia na jiitiaquiaari. Naacujitij, nojuajaari cusosuhua pueya naatanijioquiaari Pueyaso cumaacata. Pueyari niishiquiaari Esteban pohuatasanoori seetanujuanaa Pueyasojiniji quiquiaari, nojori niquishacari jiyajeneta na miishano Pueyaso cumaacata.

⁹ Jiyacariti, tamasaca Judiocuacaari Jerusalén tiacajinia quiriquiaa. Nojori maanuuri sesojosaaquiaari “Quioosanojiniji carteqesano pueya”. Quiquiaarijaariuhua Cirene tiacajinijinio pueya, Alejandria tiacajinijinio pueya, Cilicia jiyajinijinio pueyajuhuaaj, Asia jiyajinijinio pueyanio. Puetunu nojorijianaari Estebanua rerejojuiaari nata juayonuutanura. ¹⁰ Nojoriiri maja na naata Esteban shocotanu quiquiaari nojori niishishanota. Estebanri saniya nojori shocotaquiaarijia. Nojuajaari Pueyaso Sohuanu niishitiojosanota saa maninia pohuataquiaarijia nojori niquiara. ¹¹ Maja socua

nojori rejeretasacari Esteban pohuatasano, nojoriiri tamasaca pueya niqutioquiaari cumaneeca, najuhuana nojori cuaracashiniuria camarucua niquiara Estebancuara. Cuno pueya, cumaneeca niqutiojosaquiaari na cuaracashiniuriani, nojoriiri naa sequequiaari Judiocuaca camarucua niquiaratej:

—¡Taaquiriririnj, canaacuajaari cuno pueyano tojiquianu Moisés sesacaanoni, Pueyaso sesacaanojuhuaj!

¹² Naa nojori sequesacariitj, puetunu pueyajanaari juaaquioree, Judiocuaca camarucua juhuaj, Moisés Rootasano niishitiojonaanio. Puetunu nojorijianaari Estebancua catecanoquiaari. Na quiatuereeri. Na nuhuaji, na jaatucutuquiaari pueya nequesoreesacariaari, Israel pueya camarucua nequesoreesocoriquiano tii nojuaja. ¹³ Socua pajesaquiaariiri tamasaca, Estebancuara tonujuriquiano najuhuanaj, na cuaracashiniuria. Cuno pojoriiri naa sequequiaari camarucua niquiaratej:

—Nio pueyanoori pueyaracaanu sesacaquiaa Pueyaso Secojojuua tia. Moisés Rootasano sesacaariquihuariuhuj. ¹⁴ Canaari socua naa na sequesano tojiquiaajaaniuhuj: “Nazaret tiacajiniinjio Jesuni, nojuajaari Pueyaso Secojojuua tia niyartanutaniya”. Naa juhuaj, tariucuacaanu Moisés niishitiojosano pajaniya pa cartetenutaniyaquiaari.

¹⁵ Puetunu camarucujanaari na cajitiushaquiiji niqutiariquiaa Esteban. Nojoriiri na jiquioco niquiquiaari shacantuua, juhua Pueyaso seru jiquioco.

7

Esteban pohuatasano

¹ Pueyacuara secojonaa jiyaniijaari Esteban nequesotaquiaari:

—¿Seetanutejanaa taa nio pojori sequereecuajani?

² Nojuajaari na riucuaaree:

—Cua panishano pueyanaa, cua camarucua, cua tojitiare. Pueyasoori jiyanoohua maninia. Nojuajaari pa supuetana Abrahamcua muetaquiaari Mesopotamia jiyajinia na quishacari, na pacuyaquishacarijia Harán tiacajinia. ³ Pueyasoori jiyacari naa na sequequiaari:

“Quia tiujiaare quia jiya, quia pueyano. Niiquiji quia quiaare, janiya cuara quia sequerejaatijia, niya quia quishii. Quiocua tii jiyojese cutara”.

⁴ Abrahamri Pueyaso sequesano tojiquiaari. Quiaquiaariiri Caldeo pueya jiyajiniji. Harán tiacajinia quishiiri. Tii shaajaquiaari na shipininioori. Na nuhuaji, niyara pacuquiaariiri, paa tii quiyani. ⁵ Jiyacariitj, Pueyasoori juhuanojuaja maja Abraham na niqutionu quiquiaari nio jiya. Naacuajitij, Abrahamri maja quenaaja jiya na jitianu quiquiaari tama na quijiarajaaja. Naajaa, Pueyasoori na sequequiaari:

“Janiya na nuhuaji quia niqutionutaniya nio jiyani. Quiaa jaara shaajeyare, quia niquihuara quiniutianiya saniniurijia”.

Pueyaso jaara naa sequequiaari Abrahamtej, Abrahamri jiyacari juhuanojuaja niquihuaju quiquiaari. ⁶ Pueyasoori naa pacutequiaari sequenu Abrahamtej:

“Puetunu quia jianuucuaajinio supueno pueyajanaani, nojoriiri na niishishoo pueya jiyajinia quiniutianiya. Cuno jiya pueyari nojori poonijiotenutaniya jiyanoohua. Naa naquiya miishaanutaniyari. Tii nojori quishacari, na shoconjunutaniyari cuatro ciento marijia”.

⁷ Pueyasoori Abraham sequerejuhuaj:

“Janiyari saniniujia cuno taucuaca naminiutianiya quiocuajinio supueno pueyacuani. Janiyari nojori saniitiotenutaniya saniniunijia nojori poonijiotenuucua quiocuajinio supueno pueya. Na nuhuaji, nojoriiri tiji quiojonutaniuhua niyara. Nojori tiuquijiosacariuhua, nojoriiri cua secojonuujuaa quiniutianiya niya”.

⁸ Pueyasoori naa Abraham rootaquiaarijuhuaj:

“Niocua nia cararaatiuuquia co miatejore. Cunoori juhua naajiosano nia cuaqueyajinia quiniutianiya, pueyaracaanu nia niishiniuria cua sequesano niajaniya”.

Naa Pueyaso sequesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaanquiaari, na queeri neyanu cararaatiuuquia co miatequiaari na camuesacari ocho juuca. Isaacri naa miiquiaari neyanu Jacobojuhuaj. Pueyasoori Jacobo sesojoquiaari “Israel”. Jacoboori naa miiquiaari necohujahuaj. Necohuari quiquiaari doce canuu. Cuno doce canuu, Jacobo niquihuani, nojoriiri puetunu pa doce Israel pueyapue supuetanaajanaa.

⁹ Pa supuetana Jacobo niquihuajinijionioni, tamonuuri sesojosaquiaari José. Tapueyacuacaari José juaajaca quiquiaari jiyanoohua, puera na que panishano José quishacari. Majaari nojori niqutiuniu paniniu quijia nojuaja. Na queeri socua jiyanoohua José panijia quiquiaari na pueranaajiniji. Tapueyocuacaari cunora casami niqutiojonaa pueya

niquitioquiaari cumaneecara tarajanu José. Casami niquitiojonaari José jiyataquiaari Egipto jiyajinia, saniniujia tii na niquitiosocoriquiano serura. Naajaa, Pueyasoori Joseeta quiriquiaa. ¹⁰ Pueyasoori na naacuquiaari naquiya na miishacari. Pueyasoori na jiyatequiaari niishijara. Naaratej, Egipto jiya jiyaniijia Faraónri na maniniucuaquiaari. Na jiyatequiaariiri puetunu Egipto jiya pueya camarnurajanaa. Na jiyateree na tia camarnurajariuhuj.

¹¹ 'Na nuhuaji, miaajenuuri quiquiaari puetunu Egipto jiyajiniajanaa, Canaán jiyajiniano. Pa supuetanaa quishacari Canaán jiyajinia, nojoriiri quera titiacoquiaari na miyajajara. Seetanujuanaa shaaqui quiquiaariiri nojori miasano. ¹² Jiyacaritij, Jacoboori caminiujushaaquiaari: "Egipto jiyajinia quiaquinia trigo". Naaratej, necohua jiyaroreeri trigo masenura. Jiyacari nojori quiojosacarini, cunoori shushajanaa nojori quianu quiquiaari Egipto jiyajinia. Cuno Jacobo niquiohuani, nojoriiri pa supuetanaacuaja. ¹³ Coteenu nojori masenano jaara puequequiaari, nojoriiri Egipto jiyajinia tacatequiaariuhua socua trigo nojori masenura. Jiyacaritij, Joseeri tapueyocua sequequiaari: "Janiya nia tarajanuni". Joseeri Faraón niishitioquiaari tapueyocujahuaj. Naaratej, Faraónri shusha niishiquiaari tejeno pueyanote José quiquiaarini. ¹⁴ Joseeri tapueyocua sequequiaari: "Pa que Jacobo nia riquioo niyara, puetunu necohuatajanaa". Puetunu nojorijianaari quiquiaari setenta y cinco pueya. ¹⁵ Jacoboori naa pacuquiaari Egipto jiyajinaratej. Na nuhuaji, saaquianoori tii shaajeseequiaari. Necohuari tii pueque-seequiaarijuhuaj, tariucua saaquiapue. ¹⁶ Na nuhuaji, Egipto jiyajiniji pacusaaquiaariiri nojori nucuhua. Siquem tiacajinia niojosaquiaariiri na supuetana Abraham raaco. Cuno raari cuhuariquiajia quijia. Abrahamri cuno cuhuariquia masequiaari tariucuaaanu pueyajiniji raa na jitianura necocua na niajara jaara cusoyare. Cuno cuhuariquia masequiaariiri cumaneecata Hamor niquiohuajiniji, Siquem tiacajinia.

¹⁷ 'Pueyasocujaaari tariucuaaanu Abraham sequequiaari nojuajaari nio jiya na niquitionutaniya. Quera na niquitionu panishacari, Israel pueyari jiyanojua canequiaari Egipto jiyajinia. ¹⁸ Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanojua tarijia quiquiaari José shaajenu nuhuaji. Naacuajitij majaari cuno jiyaniijia niishiniu quiquiaari José. ¹⁹ Cuno jiyaniijiaari taraatia miiquiaari shusha roosano pa supuetanaa niquiohua. Pa supuetanaa sequequiaariiri shusha roosano cuaara quejoosaari moojinia. Pa supuetanaari taraatia miiquioquiaari naacuatej. ²⁰ Moisésri jiyacari rasaquiaari. Pueyasoori na maniniucuaquiaari. Na yaari na jitiaciaquiaari rupaquijia. Jaara na shoconujuquiaari jiuujianaraca raca, conaajaari carijiniacuma niasaaquiaari. ²¹ Faraón niyatuuiri na paquiaari saniniujia. Na canashitiquiaari juhua na mueyari. ²² Egipto pueyari Moisés niishitiojuaari puetunu nojori niishishanojuanaa. Puetunu Moisés sequesanojuanaari jiyanojua tojishano quiquiaari cutara. Puetunu na miishanojuanaari maninia quiquiaarijuhuaj.

²³ 'Cuarenta marijia jaara shocojoquiaari Moisés, mashaja na quishacarijia, narta Israel pueyacu rucuanenu paniquiaariiri, nojori na niquiniuria. Judiocacacujaaari cuno pojori, naa sesojoshiya Israel pueyatani, maja tamonu. ²⁴ Naacuajitij, Moisés jaara quiaquiaari narta Israel pueya niquiniucua, saaja Egipto pueyano niquishii narta Israel pueyano majacuyanoori. Moisésri narta Israel pueyanocua namiquiaari. Na juaaniutia moquiaari saniniujia cuno Egipcio pueyanoori. ²⁵ Moisésri juucua jiyaniquiaari narta Israel pueyari niishiniutianiya Pueyasoori na jiyaroree nojori na mashiquiniuria Egipto jiyajiniji. Majaari nojori niishiniu quiquiaari saaja. ²⁶ Moisésri socua tariqui quiaquiaari narta Israel pueya niquiniucuaquiohuaj. Nojuajaari saaja riuriatasee tama nojori piyotaanojuaja. Juucua nojori ruparetanu panishiiri. Nojori sequereeri: "¿Niaateeri tamonu, niaa jaara naa miitioyaniquitij? ¿Casaara naa nia nootujoteyani?" ²⁷ Cuno narta pueyano piquiriquiaani, nojuajaari saaja Moisés caporee. Na sequereeri: "¿Cante quia jiyatecanu juhua canaa jiyaniijia quia quiniuriani, naa quia sequenura canaatej? ¿Cante quia jiyatecanu canaa nequesoreenarani?" ²⁸ ¿Quiaateeri cua monu panijajuhuj, naatej taa quia morucuaa cuno Egipto pueyanocuaani?" ²⁹ Moisés tojishacari naa cuno pueyano sequesantej, ritia mashiquiaari Egipto jiyajinijiiri. Madián jiyajinia quishiiri tamonu pueya jiyajinia. Moisés quishacari cuno jiyajinia, tii camiquiaariiri. Caapiqui canuunyojua mueratejoquiaariiri.

³⁰ 'Cuniqui na quishacari, na shocojoquiaariiri cuarenta marijia socua. Tamonu juuca, Moisésri rucuaneriquiaa cariquia jiyajinia, pueya sesojosano Sinai tuhuanu shuriucua. Pueyaso seruuri tii nocua muetaquiaari nequeru casaja noshiyanojiniji. ³¹ Moisés niquishacari mani noshiyano, nojuajaari shiriiquiaari. Jaara nocua catecanoquiaari na niquiniuria maninia, saaja jiyaniijia Pueyaso tojirii manijiniji pucuaanoori. ³² Pueyasoori naa na sequequiaaritij:

“Janiyacuaajaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniijia-ajuhuaaj, Jacobo Jiyaniijiano”.

Moisés jaara naa tojiqiaaariitij, tetecareeri. Majaari mani noshiyano na niquiniu paniniu quiqiaaari na puerenuta. ³³ Pueyasoori na sequeqiaaari:

“Cuniquijia quia jocojore quia sapatu. Niya, quiaa tii nujuaani, niiori cua quishaqui. ³⁴ Janiyacuajaari cua pueya niqiquiaa Egipto jiyajinia quianoni. Egipto pueyari nojori miitiaa puera. Cua pueyari noonu rejeretacoya. Janiyari nojori sariyocuatunu tojiqiaa taraatiani. Nojoriicua roseyareenijia cua mashiquiniuria nojori Egipto pueyajiniji. Cunora, janiyari quia jiyaronutaniya Egipto jiyajiniani”.

Pueyasoori naa Moisés sequeqiaaariitij.

³⁵ Israel pueyari tarijia Moisés juaaquaaricuaaja. Naa na sequetuqiaaariiri: “¿Cante quia jiyatecanu juhua canaa jiyaniijia quia quiniuriani, canaa nequesoreenarajuhuaaj?” Naajaa, Pueyaso cutaraari seetanujuanaa na jiyaroqiaariuhua nojori jiyaniijia na quiniuria, Pueyaso seru jaara nocua pocuaqiaaari nequeru casaja noshiyanonijiji. Na jiyaroqiaaariiri puetunu nojori tohuatanijioriquianojuanaa Egipto jiyajiniji. ³⁶ Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano mijioqiaaari Pueyaso cumaacata cuno jiyajinia, mariyata nojori niutiasacari Naatunacu jiyaniishano caminiajuhuaaj. Naa miiquiaari pueyaracaanu cariquia jiyajiniaariuhuaaj. Cuarenta marijaari nojori shocojoqiaaari pueyaracaanu nojori rucuanesacari tii. ³⁷ Nio Moisésni, nojuajaari naa sequeqiaaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohuatariquiano nia niqiuara, taa na jiyaroqiaaari janiyacuaani. Tama nia niqiuohuacuajiniouuaaja supuenutaniyari. Niocua saa nojuaja tojiri cutara”.

³⁸ Nio Moisésri narta Israel pueyata quiqiaaari cariquia jiyajinia. Nojuajaari Pueyaso seruta pocoojoqiaari Sinaí tuhananuucua pa supuetanaa jateesacari tuhananu cari. Moisésri Pueyaso seru rootasano na tojishano niishitiojoqiaariuhua pa supuetanaa. Cuno rootasanoori samiitianijia rupaa quiqiaaari pajaniyara, maninia pa quiniuria pueyaracaanu.

³⁹ Pa supuetanaari saa na ruuretaqiaarijia. Majaari nojori tojinu paniniu quiqiaaari Moisés. Egipto jiyajinia tacatenu paniquiaariuhua saajaari. ⁴⁰ Naacuajitij, Moisés tarishishacari tuhananuucua Pueyaso seru na tojishacari, pueyari socua Moisés tarajanu Aarón sequeqiaaari: “Puera quia shipinijiorequi pueyasohua, nojori puetariquiano pajaniya. Majaari pa niishiniu taa Moisés miishicuaani. Shaajeseecuaa naasucuajuhuanajaj, mariqui tiuqiriohua. Nojuajaari najuhuaana pa mashiquiquiano Egipto jiyajiniji”. ⁴¹ Naacuajitij, nojoriiri na pueyasora shipiniquiaaari juhua seru juunu niyanujua niquishano. Nojoriiri na seya puecocoqiaari na shuquiriniutia na juaashiquiaata na shipini-tiushano pueyasocuaari. Nojoriiri jiyacari sacuaaraatia timiquioriquiaa. ⁴² Pueyasoori socua nojoriicuaaji pishiquiaari. Nojori tarinitiaqiaaariiri jiya cajiniocua nunucojuuaa nojori jiyatenura tama nojori pueyasohuarajaaja. Seetanujuanaa naa naajiotasano quiyajaariuhua tariucuaaanu Pueyaso sequesano caminiujuninaa naajioneenijia. Naa sequeyari:

“Israel pueyanaa, ¿canaacuara nia puecocoqiaaari pueyaracaanu nia seyani cariquia jiyajinia nia camarucuneetasacari cuarenta marija cuaara nia shocojoqiaariijaatijia? ¿Cucuarate? ¡Maja! ¿Canaacuara nia catijiaqiaaari nia seyani? ¿Cucuarate? ¡Maja! Niaari puetunu cuno miiquiaarijianaa tama nia jiyatesano pueyasohuacuaraajaaja. ⁴³ Niaari Moloc suhuorotu pataqiaaari, shoquejiniji suhuorotu, nia pueyasora nia jiyatesanoni. Cunocuaajaari nia sequesano, ‘canaa pueyaso’. Niaari Refam pataqiaarijiuhuaaj, juhua rijia niquishano shipinishano. Niaari puetunu nio shipinijioqiaarijianaa nia pueyasohuara, nojori cariquimiaji nia mojoquetaconura, nia shuquiritiasacari nojori. Nocuaaji, janiyari nia jiyaronutaniya tucuaaanuni, Babilonia jiya tamajiria”.

Pueyasocuaajaari naa sequeqiaaari pa supuetanaatej nojori miiniucuaa sesa.

⁴⁴ Estebanri socua pohuataqiaaari naatej:

—Pa supuetanaari Pueyaso secojojua suhuorotu jiitiaqiaarijiuhuaaj, cariquia jiyajinia nojori quishacari. Nojoriiri tii racataqiaaari Pueyaso niqitiosano saajianeeca. Nocua naajiotasano quiqiaaariiri Pueyaso rootasano na pueyara. Pueyasoori cuno suhuorotujiniji pocuaqiaaari na pueyacu. Cuno suhuorotuuri shipinishaaqiaaari taa Moisés niqutishaaqiaaricuaajani Sinaí tuhananuucua na quishacari. Pueyasoori jiyacari naa sequeqiaaari Moisés: “Quia shipiniri taamueca cua niqutiquianu quiajaniyacuaajani”.

⁴⁵ Na nuhuaaji, pa supuetanaa, canapuate naatujoori quiriquiaa Moisés quishacarini, nojoriiri cuno suhuorotu pataqiaari. Na patatuqiaaariiri Josuéta nojori pacusacari nio jiyajinia paa tii quiyani. Nojori miaquetoosacari taucuaata, nojoriiri Pueyaso secojojua

suhorotu patariquiaa. Pueyasoori cuno taucuaca jataquiaari nio jiyajinjii, saniniuujia pa supuetanaa jiya na quiniuria. Cuno suhorotuuri pa supuetanaata quiquiaarijia, David jaara jiyaniijia quiquiaari. ⁴⁶ Jacoboori pa supuetanaa jiyaniijia David supuetana quiquiaarijuhuaj. Davidri Pueyaso tojjia quiquiaarijuhuaj. Pueyasoori na shuquiriti-aquiaari. Naaratej, Davidri Pueyaso Secojoua tiara tianu paniquiaari juuca. ⁴⁷ David niyanu Salomón cutaraari Pueyaso tiaquiaari. ⁴⁸ Naajaa, jiyocuaaanu Quijiaari maja na quiniu pueyano tiasanojiniaaco. Tariucuacaanu Pueyaso sequesano caminiujiuniaari naa naajiotaquiaari Pueyaso sequesano nojuaa:

⁴⁹ “ Jiyocuaaanuuri cua quiquio. Jiyari saniniuujia cua niohuaca cua niaja. ¿Taamueca tia nia tianutaniya quiriajarani? Jiyaniijiaari naa sequeyaquij. ‘¿Taa nia sequeyani: na mueecujuara pa miiri, shuquiriaatia na quijiaa? Maja. ⁵⁰ ¿Majateeri puetunu nio jiyajinia niquishanojuanaa cua juaashiquiata cua miishanocuaaja, jiyocuaaanu-juhuaj? ”

⁵¹ Estebanri socua nojori sequequiaari:

—¡Niaari tojtiaashijianucua! ¡Niaari Pueyaso sequesano ruuretaquiaa juhua nia supuetanaa! Nioojiaari maja juhua Pueyaso pueya jiuujia. Nia numaacaari maja Pueyaso rupaa na tojiniu paniniu. Niaari pueyaracaanu tojijaquiya Pueyaso Sohuanu niishitiojosano. Niaari Pueyaso tojjiyashijianucua juhua nia supuetanaajuhua. ⁵² Nia niishiritioj, ¿nia supuetanaate quena niquiriyatujua Pueyaso sequesano caminiujiuniaa miitaaquiquiaari? Nia supuetanaari puetunu Pueyaso sequesano caminiujiuniaa-janaa miiquioquiaari naquiya. ¿Quenaaja niquiriyatu nojorijinjiniote miitiasoo cureequiaari? Maja. Nojoriiri tari puecooquiaari noo pueya, canapuate maninia miijia mijiria niriqianojiniji pohuatenuquiaaricuajani. Cuno maninia miijia jaara tiuquiquiaari, niaari sesa miijia pueya na niquitocanu nojori mosocoriqiano. ¡Niaari naa mocanu Pueyaso Jiyarosantej! ¡Niaari pueyaracaanu Pueyaso ruuretaquiaa! ⁵³ Naacuajitij jiyocuaaanuji Pueyaso seya pohuatasano Pueyaso rootasano niaarani, majaari cuno nia tojiniu quiquiaajuhuaaj.

Jesu ruuretajaca mosacari Esteban

⁵⁴ Pueya jaara naa tojtiquiaari Esteban sequesantej, nojoriiri jiyanoehua juaaquioeree. Na juaaniutia miaquenuuree na quiaaari. ⁵⁵ Jiyanoehua Pueyaso Sohuanu cumaquishacari Esteban jiuujia, nojuajaari jiyocuaaanu mauquiaari. Saaja Pueyaso shacantuuca niquiriiri. Jesu niquirijiaariuhua na Que Pueyaso miaquetajara nujuano. ⁵⁶ Naa na niquishacaritij, nojori sequeeree juucaari:

—¡Nia niquishurinaja! Jiyocuaaanu niquiya riatenonijia. ¡Pueyaso Niyanu niquiyaniijia na Que miaquetajara nujuano!

⁵⁷ Pueyari na numaaca mishiquiojonuuquiaari saaja, maja na tojtiniuria Esteban sequesano. Jiyanoehua sariyocuatiquiaari na juaaniutiaari. Na nuhuaji, Estebancua cocuatequiaariiri. ⁵⁸ Na caponeetuquiaari Jerusalén tiacajinjiiiri. Tiacajinjii tohuatesaaree tamamaari. Na tohuatesaanu nuhuaji, ti na jacutuquiaari saitiaari. Na jacuturiqianoori na toqueya cojuatequiaari tamonu mashaja. Nojori toqueya cojuana sesa quiquiaari Saulo. ⁵⁹ Nojori jacutusacari saitia Esteban, Estebanri Pueyaso secojoriquiaa naatej:

—Jiyaniijianaa, cua sohuanu quia riri quia shuriucuaa.

⁶⁰ Na nuhuaji, mojoquetereeri. Jiyanoehua nacaquiaari na nuhuajiriaari:

—¡Jiyaniijianaa, majaari nio pojori saniitionu naa nojori miiniuucua janiyatej!

Naa na sequenu nuhuajitij, cusoqueeri.

8

Saulo miishacari naquiya Jesuucua tiuunaa

¹⁻² Pueyaso panijiaa pueyari Esteban quete patuquiaari na jamotusocoriquiano. Nojoriiri Esteban sapuequiaari. Cuno juuca, Jerusalén tiacajinia quiniaa Judiocuaaari juhuacatecara miitianu coteequiaari puetunu Jesuucua tiuunaaajanaa. Nocuaji, puetunu nojorijianaari tiji mashiquiaari. Saaja Jesu saquiriojosano doce pueyari tii cureequiaari nojori nuhuaji. Nojoriiri na mashishacari niyaquejoquiaari puetunu Judea jiyajiniajanaa, Samaria jiyajiniaranio. ³ Jiyacari Sauloeri socua jiyacateriquiaa miitianu Pueyaso pueya. Nojori pajequiaari puetunu tiacajiniaqueyajanaari Jerusalén tiacajinia. Na riuriasacari, na jayoquiaari tiacojiiri, na nujatejosocoriquiano nujatejojuajinia, maajipohua, canuunio.

Jesujiniji pohuatasacari Samaria jiyajinia

⁴ Mashiyocuatuno pueyari puetunu na quiasacojuanaa Jesujiniji pohuatanuquiaari pueya niquiara. ⁵ Nojorinjiniño quiquiaarijuhuaj Felipe. Nojuajaari mashiquiaarijuhuaj tamonu tiacajiniara Samaria jiyajinia. Cuno tiacajinia juhuacatecara pohuataquiaari Jesucristojinijiaarihuaj. ⁶ Puetunu pueyajanaari Felipe pohuatasano tojinuucua rerejoquiaari. Pueyari sanaa na tojtiaquiaari. Nojoriiri Felipe shootiaquiaari tacuritia, na miishacari jiyajeneta casaa Pueyaso cumaacata. ⁷ Samaruhua tohuatanijioriquiaa pueyajiniiri. Samaruhua tohuareetasacari pueyajiniji, sariyocumaquiaari. Queraatia cumatacuruhuaana cusosuhuari naatanijosaaquiaarijuhuaj, sesacujuanucuanio. ⁸ Naaratej, puetunu cuno tiacajinia quiniaa pueyajanaari jiyanohua shuquiriquiaari.

⁹ Shimiacuuri cuno tiacajinia quiijahuaj. Na sesa quiquiaari Simón. Cuno tiacajinia quiniaa pueyari na pueretujua. Puetunu pueyajanaa sapojojuaari jiyajeneta na mijiosanota. Naa sequeja tama na cuaqueyajaarijia: “Janiya cutaraari tojishano pueyanoni”. ¹⁰ Puetunu pueyajanaari na tojtia quiquiaari, camarucua, maerasunio. Nojoriiri sequequiaari: “Nio pueyanoqui jiyanohua Pueyaso cumaaca jitiaa”.

¹¹ Puereeta Simón miishacari pueyaracaanu, pueyari sapojosaaquiaari. Naaratej, pueyari na sequesanoocua tiuquiaari. ¹² Na nuhuaji, nojori jaara tojiquiaari Felipe pohuatasacari Pueyaso rupaa, Jesucristojinijiuhuaj, cuno Samaria pueyari Jesuucua tiuquiaari cutara. Canuu, maajipohuajuahuaj, nojoriiri tiuquinijosaaquiaari moojinia. ¹³ Simónri Jesuucua tiuquiaarijuhuaj. Tiuquinishaaquiaarijuhuaj. Na tiuquinishaanu nuhuaji Felipecua sacuaquiaariiri. Felipe shootiaquiaari tacuritiaari Felipe mijiosacari jiyajeneta casaa Pueyaso cumaacata.

¹⁴ Jerusalén tiacajinia Jesu saquiriojosano pueya jaara tojiquiaari taa Samaria pueya tiuiri Pueyasoocuan, nojoriiri cuniquiji jiyarotuchiaari Pedro, Juannio. ¹⁵ Nojori tiuquishacari Samaria jiyajinia, cuniqui quiniaa Pueyaso pueyacuara secojotureeri nojori jiuujajinia Pueyaso tiuquitiniuria na Sohanujuhuaj. ¹⁶ Majaari Pueyaso Sohanu tiuquinu quiquiaari juhanuajuaja nojori jiuujajinia. Nojoriiri nareja moojinia tiuquinijosano quiquiaari Jesuucua nojori tiushacari. ¹⁷ Pedro, Juan, cunora na juaashiquia niojoquiaari pueyacu, nojoriicua na secojotusacari Pueyaso. Naa nojori miishacarij, Pueyaso Sohanuuri cuno pueya jiuujajinia tiuquiaari cutara.

¹⁸ Simónri niquiriquiaa taa Pueyaso Sohanu tiuquiaari pueya jiuujajinia Jesu saquiriojosano pueya niasacari na juaashiquia nojoriicuan. Naaratej nojuajaari Jesu saquiriojosano pueya niqutionu paniquiaari cumaneeca juucua, cuno cumaaca na jitiaturajuhuj. ¹⁹ Simónri naa sequequiaari nojori:

—Cua niqitiotureja cuno cumaaca. Janiyacu Pueyaso Sohanu panijiacacua niare cua juaashiquianija, Pueyaso Sohanu nojori masenurajuhuj, taa nia miyacuani.

²⁰ Pedroori na sequequiaari saaja:

—¡Quia cumaneeca cuara shaajeera quiatajuhuaj! Quiaa naasucuaari jiyaniya quiaa Sohanu cumaneecata masesano. Quia niishiri, Pueyasoori na Sohanu niqitioquiaa nareja na tojtiajaca pueya. ²¹ ¡Pueyaso Sohanu cumaacaari maja quiarano! Quioojiaari jiyanohua sesa quia Pueyaso niquiara, nocuaji maja na cumaaca niqitiosaanu quiniutianiya quiajaniya. ²² Jiyanohua sesa quia niishiriojosanojiniji quia pishiriohua. Pueyaso quia secojore na jiyanooniuria quiajaniya naa quia niishiriojosanojiniji quioojajiniatej. ²³ Niishiyacuajaniya, quiaari juhua cartesoo quiyajaa, sesa miiniucua jitiinio quia quishacarijia. Quioojiaari puera najiquitishano quiyajaa jiyanoashijia quia quiniucujuhuj.

²⁴ Simónri na riucuaquiaari:

—¡Pueyaso nia secojorequi cucuara, mariqui cua saniitioreeri taa nia sequeyacuajani!

²⁵ Na nuhuaji, Pedroori Juanta socua pohuataquiaari Jiyaniija Pueyaso rupaa cuno pueya niquiara. Pueya niquiara pohuataureeri socua Samaria jiya tiacajinia, cuniqui quiniaa tiuiniuria Jesuucujuhuj. Maninia rupaari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaarihua Juanta Jerusalén tiacajiniohua.

Jesujiniji Felipe pohuatasacari Etiopie pueyano

²⁶ Cuno nuhuaji, Pueyaso seruuri Felipecua rosequiaari. Na sequeseeri:

—Quia sanere Felipeana. Pananu shuucujiria nucuama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajiniara. Cuno nuuri cariiquia jiyacuma neteya.

²⁷ Felipe tojishacari naatej, nojuajaari ritia sanequiaari. Nucuama quiaquiaariiri. Nuujinia naacuneetoquiaari saaja Etiopia jiyajiniño pueyanotaari. Cuno pueyanoori riyacajajaaju quiquiaari Etiopia jiya jiyaniija naacutana na quiniucua, maaji na jiyaniija quiniucua. Na jiyaniija sesa quiquiaari Candace. Cuno maajiiri cuno pueyano

jiyatequiaari Etiopía jiya casami jitianara, na cumaneeca cojuariquiano nera. Nio Etiope pueyanoori Jerusalén tiacajinia quiaquiaari Pueyaso secjonuucua. Cuniqiji tacateyanoori Felipe naacuneetoquiaari nuujinia. ²⁸ Nucucoji na tacatesacariuhua na jiyajinihuara, caballoori na jaatiariquiohua, rucuanegotajarujinia cajiyano. Pueyaso rupaa serojoriquiohuari, tariucuaaanu Pueyaso sequesano caminiujunია Isaiás naajionejiniji. ²⁹ Pueyaso Sohuanuuri jiyacari Felipe sequequiaari:

—¡Ritia nocua quia catecanore! Quiocua nata quiaare.

³⁰ Jaara nocua catecanouiaari, Felipeeri Etiope pueyano tojiquiaari Isaiás naajiosano serojiyano cojuata. Felipeeri na nequesotaquiaari:

—¿Quiaate quia serojosano niishiyaa casaa na sequeyani?

³¹ Etiope pueyanoori na riucuaquiaari:

—¿Janiyatucua taa niishirinio, tamonu jaara cua serojosano niishitioyaquiri janiyani?

Felipe sequeereeri:

—Miji quia tacama. Cua shuriucua quia cajishii.

³² Etiope pueyanoori nio serojoriquiaa tariucuaaanu Pueyaso Rupaajinia: “Juhua borrego jaatucusaquiaariiri mosocoriquiano. Naatej, taa borregocuaani sanaa niqiyari na cajaca miatejosacari, nojuajaari naa quiquiaarijuhuaj. Majaari na sariyocuanu quiquiaari quenaaja naquiya na miishacari. ³³ Naquiya miishaaquiaari cararaatiaari. Nocua namiyaquishaaquiaariiri. Mashaja na quishacarijia, nojuajaari shaajasaquiaari nio jiyajiniji. Cunora, majaari na muetunu quiquiaari. Niquiohuajuuri mosaaquiaari”.

Etiope pueyanoori nio serojoriquiaa Pueyaso rupaajiniji.

³⁴ Na nuhuaji, Etiope pueyanoori Felipe nequesotaree:

—Cua sequere pueyanonaa, ¿canajiniji Isaiás pohuataa niya na naajiosanojiniani? ¿Tama nojuajiniji pohuataatee? ¿Tamonujiniji soj?

³⁵ Felipeeri Etiope pueyano niishitiojonu coteequiaari Jesujiniji shusha na serojosano Isaiás naajiosanojiniji. Felipeeri naa na sequeree:

—Isaiás naajiosacari nio, nojuajaari juhuacarijia Jesujiniji pohuataquiaari, taa quiarijia Jesu miishaacanuu taraatiacuajani.

Felipeeri socua na pohuataquiaari Jesu miishanojiniji. ³⁶ Nojori quiasacari nucucaco, caminiaco shuriuquico tajitiriquiaari. Etiope pueyano jaara caminiaco niquiquiaari, Felipe sequeereeri:

—¿Majate maninia cua tiuquinishaanura niya?

³⁷ Felipeeri na sequeree:

—Quiaa jaara seetanujanaa tiuuri Jesuucua, quia naata tiuquinishaanu. Cuno pueyanoori na riucuaaree:

—Jaa, janiya Jesucristoocua tiuyani. Nojuacuajaari Pueyaso Niyanu. Na niishiyanjia.

³⁸ Etiope pueyanoori jiyamitia na seru sequeree:

—Quia nujuaretare rucuanegotaja.

Felipeta rosetamaa caminiacojiniaari. Felipeeri tii na tiuquiquiaari Jesuucua na tiushacari. ³⁹ Nojori tacatasacariuhua caminiacojiniji, Pueyaso Sohuanuuri Felipe riqiaari canashiyaquiji cuno Etiope pueyano shuriucujaji. Nojuajaari juucua tacareecuquiaari na tiuquiniaacua. Majaari socua na niqiniu quiquiaari Felipe. Tariucua tiuquinshanoori shuquiriatia quiaquiaariuhua na jiyajinihuua. ⁴⁰ Pueyaso Sohuanuuri Felipe jataquiaari Azoto tiacajinia. Nojuajaari cuniqiji puetunu tiacajinia poojotaquiaariuhua janaa Pueyaso rupaa Jesujiniji. Naa tiuquishuhua Cesareya tiacajiniaari.

9

Saulo jatasacari Jesu tojinia na quiniuria

¹ Sauloori jiyacari pueyaracaanu Jesuucua tiuuniaa miananajoriquiase. Nojori puecoonu paniquiaari puetunujuanaari. Naaratej, Sauloori pueyacuara secjonaa jiyani-ijiaacua quiaquiaari. ² Naa na sequeereeri:

—Damasco tiacajinia quianu panianijia. Quiria quia naajiore cuniqui secojojua tiaca camarucuaacuara Damasco tiacajiniani, cuno naajioneeta cua tiuquijionura nojori rere-jojuacajinia. Jesu tojiniaa pueya morojonu paniya cuniqijinjia. Janiyari cua quioosano jaatucunutanija niyara Jerusalén tiajinarani, canuu, maajipohuanio.

³ Naacuajitij, nucucaco Saulo quiasacari, tari quenaacoturiquiaa Damasco tiacajinaraari. Jiyacaritij, ishacantuucaari canashiyaquiji nunuquiaari jiyocuaanuji!

⁴ Sauloori juhua jatasaaquiaari na cari. Na pojosaquiji tojiquiaari rupaa na sequeyanoori:

—¡Saulonaa, Saulonaa, cua tojiri! ¿Casaara quia miitiaa puera janiyani?

⁵ Sauloori na riucuaaree:

—¿Cantequia Jiyaniijianaa?

Jiyocuaaanuji nocua pocuaanoori na riucuaquiaari:

—Janiya Jesuni. Quiaari puera cua miitiaajanaajataj, cucua tiuuniaa quia miitiasacari puera. Naa quia miishacari puera quia juaniutiateg, quiaari tama quia cuaqueya sesoyajaacujua. Quiaari juhua juajia pueyano. Quiaari quia juaniutia juhua jiohuaca patiyashijiya.

⁶ Sauloori na puerenuta na tetecasacari na sequequiaari:

—Jiyaniijianaa, ¿casa quia paniya cua miiniuriani?

Jiyaniijaari na sequeree:

—Quia sanere. Naajaa quia tiuquishii Damasco tiacajinia. Quiaari tii sequesaanutaniya cua panishano quia miiniuria.

⁷ Saulota quiojonaari shiriiquituquiaari nojori jaara tojituquiaari jiyocuaaanuji pocuanu. Nojoriiri juucua na niqiniu paniquiaari. Saaja shaaquiiri quiriquiaa. ⁸ Na nuhuaji, Sauloori na pojosaquiiji sanerohua juucua. Majaari na naata niqiniu quiquiaari saaja. Nata quiniaari na jaatucutaquiaari Damasco tiacajiniara. ⁹ Nojuajaari tii camueenujuquiaari jiuujianaraca juuca, cariyujuaru na quishacari. Majaari na miaquenu quiquiaari pueyaracaanu cariyujuaru na quishacari. Ratuyaquiquiaariijaariuhuj.

¹⁰ Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniijia Jesuuri na sequequiaari juhua na maquenujina:

—¡Ananíasna!

Nojuajaari na riucuaquiaari:

—¿Casaate cua Jiyaniijianaa?

¹¹ Jiyaniijaari na sequeree:

—Quiaritia quia quiaare Saulo pajenuucua. Nojuajaari noo Saulo, Tarso tiacajinijinio pueyanotej. Nojuajaari Judas tiajinia quiya. Judas tiaari jati tamonu nuujinia quiya. Cuno nuu sesa, Nuu Maniniu. Sauloori cuno tiajinia secojiya Pueyaso. ¹² Nojuajaari juhua na maquenujina tari niquirii quiajaniya nocua tiuquiyano. Tari quia sesa niishiyajaariuhuj. Sauloori tari quia niquirii na maquenujina. Quiaari quia juaashiquia niariquiaa nocua, na namijia jeequenuhuara, maninia na niqiniuhuara.

¹³ Ananías jaara naa tojiquiaari Jiyaniijia sequeyanotej, nojuajaari sequeree:

—¡Cua Jiyaniijianaa, queraatia pueyari cuno pueyanojiniji cua pohuatacanuni! ¡Quiocua tiuuniaa pueya miitiaquiaa taraatia Jerusalén tiacajiniara! ¹⁴ Pueyacuara secojonaa jiyaniijia jiyarosanaaari cunohuj, quiaritia niya tiuquiriini. ¡Nojuajanaari quia secojonaa pueya quioonutaniya, morojonucuaa canaa na jiyatasocoriquiano Jerusalén tiacajiniara!

¹⁵ Jiyaniijaari Ananías sequequiaari saaja:

—Naajaa, quia quiaare. Janiyacuajaari cuno pueyano saquiriojoquiaari tarijia cua jiyaramiquishocoriquianoni. Nojuajaari tamasaca jiyacajinia poojotanutaniya janiyajiniji taucuaa niquiara. Taucuaa jiyaniijianucua poojotanutaniya janiyajinijiaariuhuj, Israel pueyano. ¹⁶ Janiyacuajaari Saulo niishitiojnutaniani taa jiyanojuaa naquiya pueya miitianutaniya nojuajani, janiyajiniji na pohuatasacari.

¹⁷ Naarateg, Ananíasri quiaquiaari. Judas tiajinia tiuquishiiri, tee Saulo quiriquiaacua-jani. Na tiuquishacari, Saulocua niasee na juaashiquiaari. Na sequereeri:

—Cua tarajanunaa, pa Jiyaniijia Jesu, quiocua muetarucuaa nio tiaca nucumaji niyara quia nishacari, nojuajaari quiocua cua jiyaroreeni. Cua jiyaroreeni quia namijia jeequenuhuara maninia, Pueyaso Sohuanu tiuquiniuria quioojiajiniajuhuaj.

¹⁸ Jiyacari ritia totequiaariiri juhua sapitiaaja cocua Saulo namijiajiniji. Maninia niquiquiaariuhua na nuhuajiri. Na nuhuaji, Sauloori ritia tiuquinishaquiaari moojinia Jesuucua na tiuushacari. ¹⁹ Na nuhuaji, miacquereeri, raturohuajaariuhuj. Noojia jatarohuari. Pasaja camueenujuquiaari Damasco tiacajiniara Jesuucua tiuuniaa pueyata.

Jesujiniji Saulo pohuatasacari Damasco tiacajinia

²⁰ Sauloori juhucatecara coteequiaari Jesujiniji pohuatanu narta Judiocuaa secojjuaca tiajinia Damasco tiacajinia. Nojuajaari pueya niquiara na pohuatasacari sequeja:

—¡Jesuuri seetanujuanaa Pueyaso Niyanu!

²¹ Naa nojori tojishacari Saulo pocuaanotej, pueyari shiriiquiquiaari. Na shiriiquitu-niutia sequetureeri:

—Nio pueyano pocuaani, ¿majate nootej, naquiya miiquiaa Jesuucua tiuuniaa pueya Jerusalén tiacajiniateg? Niyara niyareejaariuhuj, Jesuucua tiuuniaa pueya na moro-jonura. Nojuajaari nojori jiyatanu paniriquiaa juucua Jerusalén tiacajinia secojonaa jiyaniijianucua na niqitiojosocoriquiano, nojori nujatejosaanura.

²² Sauloori socua noojia cumaquiquiaari Pueyaso Sohuanuta, jiyanojuaa maninia na pohuatanura puetunu juucajanaa. Nocuaji pataquiaari saaja Damasco tiacajinia quiniaa

narta Judiocuacaari. Sauloori maninia pohuataquiaari tariucuacaanu Pueyaso Rupaajiniji, seetanujuanaa maatia pueya niishiniuria Jesuuri Pueyaso Jiyarosano pocuaji tacuriquiiano.

Saulo mashishacari narta Judiocuacaacuaji

²³ Quiniqui Saulo camueenujusacarijia pueyaracaanu, narta Judiocuacaari nocuara roojotooquiaari na motunura juucua. ²⁴ Tamonuuri Sauloocua jiyanoocuaaari. Naa na sequequiaariiri:

—¡Quiaa monu panishiya sacaj!

Judiocuacaari na sashiriquiaa tiaca tohuateyaji, na monu paniniutia juucua Saulo. Na shanacuturiquiaari juuca, niucuanio. ²⁵ Damasco tiacaari puereetuuca sohuacaraca quiquiaari puetunu na shocujanaa. Jesuucua tiuuniaa pueyari saaja Saulo mashiquiaari niucua. Sohuacajiniji roshinitiasaaquiaari jiyocuacaanuji puereetuuca canaasatujiniaari. Sauloori naa mashiquiaariti.

Saulo quishacarihua Jerusalén tiacajinia

²⁶ Na tiuquishacarihua Jerusalén tiacajinia, Sauloori Jesuucua tiuuniaa pueya rupuenu paniquiaari juucua. Nojoriiri saaja na puerequiaari. Na puerenua sequetuquiaariiri:

—Pueyasooocua tiuujiaquinio naasucua jiyanotej.

²⁷ Bernabé cutaraari maja na puerenu quiquiaari Saulo. Nojuajaari Jesu saquiriojosano pueyaca na jiyataquiaari, Saulo niishiniuria puetunu nojorijianaa. Bernabeeri Jesu jiyaramiquishano pueya sequequiaari:

—Sauloori pa Jiyaniijia niiquiaianu Damasco tiacaacua neteja nucuamaji. Jiyaniijiaari nata pocoocuanu. Sauloori cunora juhuajaniya pohuatariquiaa Jesujiniji Damasco tiacajinia.

²⁸ Sauloori narta Jesuucua tiuuniaa pueyata jijojequiaari cuniquijia Jerusalén tiacajinia. Nojoritia rucanejojuaari, mariyata Jesujiniji pohuataja juhuajaniyari. ²⁹ Saulo pocuasacari, nojuajaari seetanujuanaa cumaacata pocuaquiaari Jiyaniijia Jesuucua na tiuushacari. Griego rupaa pocuanaa Judiocuacata pocojojquiaariiri. Noojiaqueyari Saulota juayonuutaquiaari saaja. Nojoriiri socua na motunu paniquiaari. ³⁰ Jesuucua tiuuniaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniquijij jiyarosaaquiaari na raja Tarso tiacajiniaari.

³¹ Na nuhuaji, puetunu Judea jiyajinia Jesuucua tiuuniaa pueyajanaari panaatia quiquiaari quenaaja, Samaria jiyajinia, Galilea jiyajinianio. Tamasacaari maja tari naquiaa na miishaanu quijia. Nojoriiri socua Jiyaniijia tojitiacacara quiquiaari nojori pueretusacari nojori mariqui na tojiyashijiaa quiriohuari. Pueyaso Sohuano naacusacari nojori, Pueyaso pueyari socua canequiaari queraatiara.

Pedro naatanishacari Eneas

³² Pedroori pueyaracaanu rucanejojua Jesuucua tiuuniaa pueyaca, nojori na niishitiojonura socua Jesujiniji. Tamonu juuca nojuajaari Pueyaso pueya niqiniuucua quiaquiaari Lida tiacajiniajuhuaj. ³³ Tii quiriquiaari tamonu pueyano. Na sesa quiquiaari Eneas. Cuno pueyanoori cumatacuruhuana cusosu quijia. Tari na shocojoquiaari ocho marijia pootia na matasacari na matujinia. ³⁴ Pedroori cuno cusosu sequequiaari:

—Eneasnaa, ¡Jesucristo tari quia naatanirii! ¡Quia sanere! Quia matu quia jeeicare.

Eneasri ritia sanequiaari. ³⁵ Puetunu pueyajanaa Lida tiacajinia quiniaa, mariyata Sarón tiacajinijinio pueyajuhuj, puetunu nojorijianaari nio miishano niquiquiaari. Nojoriiri cunora tama na supuetanaa niishitiushano casaajaaja cartequiaari. Puetunu nojorijianaari Jesuucua tiuquiaari.

Dorcas samiitianishaanujiniji pahuatasano

³⁶ Jiyacarijuhuaj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupaajinia sequesano “Dorcas”. Dorcasri saniniuujia pueyano rupaajinia sequeshiyacujua “nequeru”. Cuno maajiiri Jesuucua tiuujia quiquiaari. Nojuajaari maninia miijia maaji quiquiaari. Casamiijiuucua pueya niqitiojojua nareja na jiitiasanajiniijiri. ³⁷ Na nuhuaji, Pedro quishacari Lida tiacajinia, Dorcasri cusoquiaari. Na cusonu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tijinia nataco, tamonu sohuacajinia. ³⁸ Jope tiacaari cateca quiya Lida tiacajiniji. Pedroori Lida tiacajinia quiriquiaajaa Dorcas shaajesacari. Jesuucua tiuuniaa pueyari tari niishiriquiaa tee Pedro quiyani. Naaratej, caapiqui pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Majaari tarishiniu”.

³⁹ Pedroori nojoritia tacatequiaarihua Jope tiacajiniahua. Na tiuquishacari, quiniqui quiniaari Pedro tiuquiniquiaari macuucua sohuacamara. Mashiquiopueeri Pedro shocua

rerejoquiaari na nujuquetunuta. Nojoriiri Pedro niqutiioquiaari Dorcas cusupuenusano toqeya, cacojoquiyanio. Cunoori quiquiaari na cusupuenusano saminio na quishacarijia. ⁴⁰ Pedroori jiyacari puetunujuanaa pueya tohuatanijioquiaari sohuacama. Na nuhuaji, nojuajaari mojqetaquiaari Pueyaso na secojonura. Na secojonu nuhuaji, macuucua tacatereri. Na sequereeri:

—¡Dorcashaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. ⁴¹ Pedroori na juaashiquiajiniji na quiaquiaari. Na nujuatereeri. Na nuhuaji sequequiaari Jesuucua tiuunaa pueyari, mashiquiopenio:

—Miji pueyanaa, ¡nia nimia!

Nojori tiuquitasacari, saaja maaji niqutiushii nujuaanoori, tariucua saminio. ⁴² Pedro miishanoori puetunu Jope tiacajiniajanaa niishishaaquiaari. Queraatia pueyari cunora Jesuucua tiuquiaari. ⁴³ Pedroori na nuhuaji janiya camueenujuquiaarijiaara Jope tiacajinia. Nojuajaari Simón tiajinia quiriquiaa cuniqui na camueenujusacari. Nio Simónri piiquia casaata shoqeya majeetejojua quiquiaari, casaara shipinishocoriqiano shoquejiniji.

10

Pedro quasacari Cornelio niquniuucua

¹ Cesareya tiacajinia quiquiaariiri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuuri sesojosaquiaari “Italiano”. ² Cornelioori Pueyaso secojojua pueyano quiquiaari, mariyata puetunu na tiajinia quiniaatajanaano. Nojuajaari seetanujuanaa Pueyaso shuquiritiniu panijia quiquiaari. Cornelioori queraatia na cumanecajiniji niqutiiojojua quiquiaari nareyajuhua, casamiijuniucua Judiocuaca niqutiiosocoriqiano. Pueyaso secojojua pueyaracaanuuri. ³ Tamonu juuca, tariucua pananu piriushacari, Cornelioori Pueyaso seru niqiquiaari juhua na maquenujinia nocua niyano na tiajinia. Na sequeeeri:

—Cornelionaa.

⁴ Cornelioori saaja Pueyaso seru shootiaquiaari na shiriiquiniutia. Na nuhuaji na riuquareeri:

—¿Casaate jiyaniijianaa?

Pueyaso seruuri na sequereeri:

—Pueyasoori quia secojosano tojiquiaa. Quia timitiaari capora quia quiniuucua, quia jütiasanojiniji quia niqutiiosacari nareja casamiijuniucua pueyara. ⁵ Naaratej, quia seya quia jiyaramiquiri Jope tiacajinia. Nojori cuara Simón masuunuucua quiaara. Na sesaari Pedrojuhua. ⁶ Nojuajaari na sesaanucua pueyano tiajinia quia. Tia camaruuri shoque majeetejojua piiquiajinia. Cunoori na poonijosano. Na tiaari shoniniacu caminia casaqueyaji naniya. Simón Pedroori quia sequenutaniya casaa quia miiniutianiyani Pueyaso jiyanooniura quiajaniana.

⁷ Pueyaso seru jaara quiaquiaariuhua, Cornelioori caapiqui na seyajinijinio piiquiaari, niquiriyatu na soldadonio. Cuno soldadoori Pueyaso secojona quiquiaarijuhua. Maninia na jiyaniijia naacujua quiquiaarijiaariuhua. ⁸ Cornelio jiyarosacarijia na seya, nojori pohuataree coteenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquiriri Jope tiacajiniaari.

⁹ Tariqui, Cornelio seya quasacari nuacuaco, nojori quenaacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa nacasuhojuajinia quiquiaari jiyacari. ¹⁰ Nojuajaari jiyacari miaajeriquiaa. Neraari juuca sumatusaariquiaacujua. Nera sumatusacarijia, Pueyasoori casaa na niqutiiaari juhua na maquenujinia, na quishacari tia cacojiria. ¹¹ Pedro niquishacari jiyocuaaanu, saaja jiya cajiniocua niquiriri riatelyanoori. Sonaque queraque niquiriri tiji roshinitiahiyanoori, na nacatucujiniji morojotasano. Pedroocua roshinitiasaareejanaari. ¹² Sonaque jiniacuma quiriquiaari puetunu casaajanaa: sacocua, jiyacua rucojuacanio, jiyocuaaanu jaacuatujuaajuhua. Cuno casamiiri quiquiaari Judiocuaca pueresano casaa puetunujuanaa. Maja nojori miaquesano. ¹³ Jiyacaritij, Pedroori rupaa tojiriri jiyocuaaanuji na sequeyano. Naa sequeriquiaari:

—¡Pedronaa, nocua quia sanere! Quia puecoore quia miaquesocoriqiano.

¹⁴ Pedroori na riuquareeri:

—¡Maja cua Jiyaniijianaa! ¿Janiyatucua taa miaquere sacuraatia cua miaquesooni? ¡Cunocujaaari tarijia quia sequesano canaa pueresocoriqiano!

¹⁵ Jiyocuaaanuji rupaari socua na sequerohua:

—Pedronaa, majaari miaquesocoriqiano Pueyaso jiyatesano soonu.

¹⁶ Pueyasoori naa pacutejoquiaari sequenu Pedrotej. Na nuhuaji, sonaqueeri tacaniti-
tiasaaquiaariuhua jiyocuacaanu. ¹⁷ Pedro tacaashacari naa na niquniuucua juhua na
maquenujinatej, jiyacari Cornelio jiyaramiquishano pueyari tia tohuatayaji tiuquijio-
quiaari, Simón tia na pajetunura. Cornelio pueyari nequesoreetariquiaa nuacucoji nojori
tiuquiniuria Simón tiajinia. ¹⁸ Nojoriiri tohuatayaji nacaquiaari:

—¿Niyá quiyate Simón jyanishano pueyano? Na sesaari Pedrojuhujaj.

¹⁹ Pedroori juhuanojuaja niishiriojoriquiaa na niquishanojiniji juhua na maquenujina
tia cacojiria. Pueyaso Sohuanuuri jiyacari na sequeree:

—Pedronaa, jiuujianaraca pueya quia pajeya. ²⁰ Tariucuaja. Quia sanerohua. No-
joriicua quia roseyarohua. Quiocua nojoritia quiaarohujuhujaj. Majaari taacanuunu.
Janiyacujaari nojori jiyaramiquiriucuaa quiocuaní.

²¹ Pedroori Cornelio jiyarosano pueyacia rosequiaari. Nojori sequeeseeri:

—Janiyacuja nia pajesano pueyanoni. ¿Casaacua nia niyareecuarani?

²² Nojoriiri na riuuaree:

—Canaa jyanijiaari Romano soldadohúa jyanijia. Na sesa Cornelio. Nojuajaari canaa
jiyarorucuaa quiocuaní. Maninia mijia pueyanoori. Jyanijia Pueyaso tojjijiaariuhujaj.
Puetunu Judiocuacajanaari maninia na miiniuucua na panitiyua. Pueyaso seruuri na
sequerucuaa, nojuaja masuunura quiajaniya na tiajinia quia quianura, na tojinuria
puetunu quia sequesanojuanaa.

²³ Pedroori Cornelio pueya tiuquinitiaquiaari na quijia tiajinia. Nojori sequereeri:

—Niyaja nia maqueseajaara. Pocua tariqui quiaariquiani.

Jaara juhuaquequiaari, Pedroori nojoritia quiaquiaari. Nata quiojoquiaarijiaariuhua
Jope tiacajinijinio Jesuucua tiuuníaa pueya.

²⁴ Tama tariqui saniniuujia, nojoriiri Cesareya tiacajinia tiuquijioquiaari. Corne-
lioori na tiajinia sashiriquiaa Pedro, puetunu na tiajinia quijiacatajanaa, queraatia na
rupuenaatanio. Cornelioori puetunu nio pueyajanaa masuquiaari, nojori rerejonura
juhucarijia na tiajinia Pedro tiuquiyacuishacarijia. ²⁵ Pedro tiuquishacari, Cornelioori
nocua tohuataquiaari. Carijiniacuma na naacuseeri. Pedroocuaa mojuquetaquiaariiri
juhua Pueyasocuara. ²⁶ Pedroori saaja na sanaquiaari. Na sequereeri:

—¡Quia nujuare! Janiyari cayajuhujaj, juhua quiajaniya.

²⁷ Tiaco na tiuquitasacari, pocoojoriquiaa Pedrotaari. Pedro tiuquishacari, saaja
queraatia pueya niquishiiri. ²⁸ Pedroori nojori sequeree:

—Taucuacanaa, niaacuajaari niishiya canaari Judiocuacani. Judiocuacari
rootasaaquiaari maja canaa rupenura taucuaca, maja quenaaja tahue tiajinia canaa
tiuquiniuriajuhujaj. Saniniuujia, Pueyasoori quiarjia quia niishitiorucuaa cutara maja
cua soonura tamasa. Taucuacari maja sacuaraatia quiarjia quiria. ²⁹ Naaratej,
cua niishishacari niaari cua masuurucuaa niyara, janiyari ritia canujiyarucuaani
taacanyaquiniutia. Cua totureja, ¿casaara nia masuurucuaa janiyani?

³⁰ Cornelioori na riuuaree:

—Cuatro juucaari tari shoconujia. Janiyari jiyacari Pueyaso secojoriquiaa juucua
tiajiniani, pananu mueecosacari. Jiyacaritij, pueyanoori cucua muetarucuaa. Jiyacaricua-
jaari quiriquiaa, tee pananu tiyanijia. Cuno pueyano toqueeri shacantuque quiriquiaa.

³¹ Cua sequereeri: “Cornelionaa, Pueyasoori quia secosojano tojirii. Naajuhujaj, niishiyari
taa quia niquntiojoquiaa quia casami casamijiuiniucuaní. ³² Naaratej, quia seya quia
jiyaramiquiri Jope tiacajinia, cuara Simón masuunuucua quiatuura. Na sesaari Pedro-
juhujaj. Nojuajaari na sesaanucua tiajinia quia, shoniniacu caminia casaqueyaji. Tia
camaruuri piiquiajinia shoqueya majeetjonu poonijioja. Simón Pedro jaara nimia quia
tiajinia, quiata pocoojonutaniyari”. Pueyaso seruuri naa quia sequerucuaaqui Simónnaa.

³³ Janiyari jiyamitia ritia jiyarorucuaa quia seya Jope tiacajiniani, nojori pajenura tii quia-
janiya. Quiaacuajaari maninia miirii cucua quia nishacari. Quiarjiani, puetunu pajaniya-
janaari niya Pueyaso niquiara quiyani. Naa quia pohuatare canaa tojishocoriquiano
quiarjia, taa Pueyaso niishitiojorucuaa quiajaniya canaa quia pohuatanuracuajani.

Pedro pohuatasacari Cornelio tiajinia

³⁴ Pedroori juhuacatecara pohuatanu coteequiaari. Sequereeri:

—Quiarjia niishiya seetanujuanaa cutaranijia, Pueyasoori maja rimiajata na niquniu
pajaniya. Majaari nia jyaniniu Pueyasoori saaja Judiocuacuaa jiaatiaa, Israel pueya no-
jori quiniuucua. Maja. Nojuajaari tamasaacua jiaatiaajuhujaj. ³⁵ Tiquiyocua jiyacajinia
Pueyaso secojojua pueya quishacari, nojoriiri Pueyaso jiyanooshano pueya quiyajuhujaj,
maninia mijia nojori quishacari. ³⁶ Pueyasoori na rupaa pohuataniquiaari puetunu canaa
Israel pueyarajanaa, jiyanooshano canaa quiniuria Jesucristoocua canaa tiuushacari. Nio
Jesucristoori puetunu mijiria quiniaa Camarnujuanaa. ³⁷ Tiuquinjiona Juanri Pueyaso

rupaa pohnatuaquiaari pueya tiuquinijiosaanura. Na nuhuaji, Jesuuri cutara miishano miiniu coteequiaari Pueyaso cumaacata. Niaari tari niishiyacuaaja na miishano canaa Galilea jiyajinia, na nuhuaji na miishano puetunu Judea jiyajiniajanaanio. ³⁸ Niaari niishiyajuhuj, Pueyasoori na Sohanu niqutioquiaari Jesu, na cumaaca na jiiitanura. Nojuajaari maninia miiquiaari pueya, tiqiyocua na rucuanesacari. Cusosuhua naatanijiojuuari. Samaruhua camarnu sesosano jeecaquiaarijiaariuhuj. Puetunu naa miijia maniniajanaari na Que Pueyaso quiniucua nata. ³⁹ Canaari puetunu na miishanojuanaa niqiuquiaarini, puetunu canaa Judiocuaca jiyajiniajanaa, Jerusalén tiacajiniajuhuaj. Janiyari seetanujuanaa canaa niqushano pohnatani. Na nuhuaji, pueyari na teetequiaari niyacutesanojinia. Tii na cusojuatuaquiaari. ⁴⁰ Jiuujianaraca juucajinia, Pueyasoori na samiitianiquiaariuhua. Jiyacaritij, na saqiriojosano pueyacia na mueratereeri. ⁴¹ Majaari na muetanu quiquiaari puetunu pueyacuajanaa. Saaja canaacua muetaquiaari-iri, teyano Pueyaso saqiriojoquiaari coteenu tariucuacaanucujani, Jesujiniji pohnatanuuriquiano. Na samiitiasacariuhua, canaari nata miaquenuquiaari mariyatani. Canaari nata raruquiaarijuhuaj. ⁴² Jesu jaara canaa jiyaramiquiaari, nojuajaari canaa sequequiaari: “Naa nia pohnatara pueya niqiuara: ‘Pueyasoori Jesu jiyatequiaari puetunu mijiria quiniaa nequesoreenarajanaa, macunucua nequesoreeriquianojuhuaj’ ”. ⁴³ Tariucuacaanu pueyara Pueyaso sequesano caminiujuniaari naa juhuacarijia sequequiaari Jesujinijiuhuj: “Cante nocua tiuyani, nojuajaari jiyanooshaanutaniya sesa na miishanojiniji”.

Pueyaso Sohanu tiuquishacari taucuaca jiuujiajiniajuhuaj

⁴⁴ Pedro pohnatasacarijia taucuaca niqulara, Pueyaso Sohanuuri Pedro tojitianaa taucuacaacia niqiaari, nojori jiuujiajinia na tiuquiniuria. ⁴⁵ Pueyasocua tiuuniaa Judiocacani, Pedrota niqioquiaari Jope tiacajinijini, nojoriiri shiriqiuquiaari Pueyaso niqutiosacari cuno taucuaca na Sohanu. ⁴⁶ Cuno taucuacaari nojori niqiuara pocooriquiaa tamaatia rupaacajinia. Pueyaso maniniuhuaqueetariquiaari. ⁴⁷ Naaratej, Pedroori sequequiaari:

—Nio pueyari tari jiiitaa Pueyaso Sohanu noojiajinia, taa pa jiiitacuaani. Naaratej, nojori cuara tiuquinijiosaaria quiarijia. ¿Cantucua nojori tenujura maja na tiuquinijiosaanurani?

⁴⁸ Pedroori na nuhuaji sequequiaari cuno taucuaca tiuquinijiosaanura Jesucristo sesajinia, nojori tiuushacari nocua. Na nuhuaji, Cornelioori Pedro sequequiaari:

—Niyaja quia camueenujrejaara canaata. Maja senota quianuhua.

11

Taucuacajiniji Pedro pohnatasacari Jerusalén tiacajinia

¹ Jesu jiyaramiquishano pueya, mariyata puetunu Jesuucua tiuuniaa pueyajanaa Judea jiyajinia, nojoriiri naa pohnatasaaquiaaritij: “Taucuacanaari Pueyaso rupaacua tiuuriucuaajuhuj”. ² Nocuaji, Pedro jaara tacatequiaariuhua Jerusalén tiacajiniuhua, narta Pueyaso pueyari na juaaquiaariuhua. Na juanaari taucuaca cararaatiuquia co miatejonu panijiaa quiquiaari, taucuaca quiniuria seetanujuanaa Pueyaso pueya nojoriria. ³ Nojoriiri naa juaaquiaari Pedro:

—¿Casaara quia quiaarucuaa cuno taucuacaacuaani? Nojoriiri maja Judiocuaca juhua pajaniya. ¡Quiaanaari nojortia miaquejocanujuhuj! Quia miishanoori maja maninia taa Pueyaso rootaquiaari tariucuacaanucujani.

⁴ Pedroori suraatiaja nojori pohnatuaquiaari puetunujanaa tahuajiniji. Coteenu pohnatarae na niquishano juhua na maquenujiniaari. Naa sequereeri:

⁵ —Jope tiacajinia cua quishacari, janiyari panacari secoriquiaani. Janiyari jiyacari juhua cua maquenujina sonaque na nacatucujiniji morojotasano niqiriini. Jiyareta cucujanaa roshinitiasaareeri. ⁶ Cua niquishacari sonaquejina cua niishiniuria casaate mii quiriqiaani, janiyari saa puereeta casami niqiriijiaani. Janiyari niqiriini jiyacia rucojuaca, sacocuajuhuj, jiyocuaaanu jaacatujuacanio. Puetunujanaari pa miaquesocoriquiano pa pueresano casa quiriqiaa. ⁷ Janiyari jiyacari jiyocuaaanuji rupaa tojiriini. Cua sequereeri: “Pedronaa, nocua quia sanere. Quia puecoore quia miaquesocoriquiano”. ⁸ Janiyari saaja na riucaareeni: “¡Maja cua Jiyaniijiana! ¿Janiyatucua taa miaquere sacuraatia cua miaquesooni?” ⁹ Jiyocuaaanuji rupaari socua cua sequerohuani: “Pedronaa, majaari miaquesocoriquiano Pueyaso jiyatesano soonu”. ¹⁰ Pueyasoori na pacutejocanu sequenu juucua janiyatej. Na nuhuaji, sonaque tacanitarohua jiyocuaaanuuri. ¹¹ Jiyacaritij, jiuujianaraca canuuri cua quijia tiajinia tiuquishii. Nojoriiri Cesareya tiacajiniji jiyaramiquishano quiquianu, na pajenuunura janiya. ¹² Nojori tiuquiyaquishacarijia, Pueyaso Sohanuuri cua sequeree: “Quiocua

nojoritia quiaare. Majaari taacanuunu. Majaari tahua soonu nojori quia rupuesacari". Naa cua tojiniuucuatej, janiyari cunora juhuajaniya nojoritia quiaarucuaani. Nio seis parta Jesuucua tiuunaa pueyari cuata quiojiyarucuaajuhuaaj. Canaari mariyata cuno tahua tiajinia tiuquishiini. ¹³ Tia camaruuri canaa pohuatarucuaa taa na niqiuqianu Pueyaso seru na tiajinia nocua nujuaanoni. Pueyaso serunaari na sequeree: "Jope tiacajinia quia jiyarore quia seya, nojori cuara quiaara Simón masuunuucua. Na sesaari Pedrojuhuaaj. ¹⁴ Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiajinia quiniaajuhuaaj". ¹⁵ Saaja cua coteesacari Pueyaso rupaa pohuatano nojori niquiara, Pueyaso Sohuanuuri nojoriicua niqianu, taa pocua coteenujuanaa na niqianucuaani. ¹⁶ Janiyari jiyacari niishiquii pa Jiyaniijia sequesani. Naa na sequesantej: "Juanri moojinia tiuquiniijia pueya. Pueyaso cutaraari na Sohuanu jiyaronutaniya niaacua, nioojiajinia na tiuquiniuria". ¹⁷ Naacuajitij, taucuaca tiushacari pa Jiyaniijiaacua, Pueyasoori na Sohuanu niqitiorucuaa nojoriijuhuaaj, taa na niquitiocanu pajaniyacuani. Cante Jesucristoocua tiuyani, Pueyasoori na Sohuanu na niqitioya. ¿Janiyatucua taa Pueyaso sequereruhuarini: "Maja cuno pojori niqutionu quia Sohuanu"?

¹⁸ Jerusalén tiacajinia quiniaa Pueyaso pueya jaara tojiqiaari naa Pedro sequesantej, nojoriiri sanaajetaquiaari. Tama nojoriijaarijia Pueyaso maniniuhuaqueetaquiaari. Naa sequetuquiaariiri:

—jPueyasojuhuanaaja jiyanoohua maninia! Nojuajaari taucuaca paniyajuhuaaj nojori tacatonura noojia sesa nojori miishanoinijij, jiyanooshano nojori quiniuriajuhuaaj, pueyaraanu nojori rishiniuria Pueyaso.

Antioquiya tiacajinia Jesu pueyainijij pohuatasano

¹⁹ Esteban jaara mosaquiarucuaa, Judiocuacaari juhuacatecara Jesuucua tiuunaa miiquiaari naquiyajuhuaaj. Queraatia Jesuucua tiuunaa pueyari nocuaji mashiycuatuquiaari. Nojoriiri tiqiyocua niaquejoquiaari. Noojiaqueyari na mashiycuatusacari tiuquijioquiaari Fencia jiyajinia. Tamasacari tiuquijioquiaari Chipre jiyajinia. Noojiaqueyari Antioquiya tiacajinia tiuquijioquiaarijuhuaaj. Nojoriiri tii pohuatanuquiaari Pueyaso rupaa Jesujinijij saa Judiocuacaraja, maja taucuacaa. ²⁰ Mashiyocuatunaa tajinia quiquiaariiri Chipre jiyajinijinio pueya, Cirene tiacajinijinio pueyajuhuaaj. Nio pueya jaara tiuquijioquiaari Antioquiya tiacajinia, nojoriiri Jesujinijij pohuataquiaari Griegohua niqiarajuhuaaj. ²¹ Jiyaniijia Jesu cumaacaari nojoritia quiquiaarijuhuaaj. Naacuajitij, queraatia Griegohuari tariucuaaanu tama nojori niishishanojuaaja cartequiaari, Jiyaniijia Jesu tojiijaa nojori quiniuria.

²² Jerusalén tiacajinia quiniaa Pueyaso pueya jaara nio niishiquiaari, nojoriiri Bernabé jiyarotuhuaari Antioquiya tiacajinia. ²³ Bernabé jaara tiuquiquiaari nojoriicua, nojuajaari jiyanoohua shuquiriquiaari na niqishacari taa Pueyaso miirucuaa maninia cuno Griegohuani, nocua nojori tiushacari. Naaratej, nojuajaari naa rootaquiaari nojori:

—Pa Jiyaniijiaacua nia tiuuri pueyaraanu. Majaari nocua tiuuniu nia cartenu. Suraatia na tojiijara nia quiri.

²⁴ Bernabeeri jiyanoohua maninia pueyano quiquiaari. Pueyaso Sohuanuuri noojia cumaquiquiaari jiyanoohua. Naacuajitij, na pohuatasacari Jesujinijij, queraatia pueyari Jiyaniijiaacua tiuquiaari.

²⁵ Na nuhuaji, Bernabeeri Tarso tiacajinia quiaquiaari Saulo pajenuucua. Jaara na riuriataquiaari, na jiyataquiaari Antioquiya tiacajiniaari. ²⁶ Nojori quishacari Pueyaso pueyata cuno tiacajinia, nojoriiri tii shocotequiaari niqiriiryatu marijia. Nojoriiri queraatia Pueyaso pueya niishitiojonuquiaari. Tii Antioquiya tiacajiniani, Jesuucua tiuunaa pueyari coteenu sesojosaquiaari "Cristiano". Nioori pueyano rupaaajinia sequeshiya "Cristo tojiniaa pueya".

²⁷ Cuno quishacari, Jerusalén tiacajinijij Pueyaso sequenu panishano caminiujunaa pueyari tiuquijioquiaari Antioquiya tiacajinia. ²⁸ Tamonu nojoriinijinioni, na sesa quiquiaari Ágabo. Nojuajaari Jesuucua tiuunaa pueya rerejonaa tajinijij nujuaquiaari pocuanura. Naa caminiujuquiaari Pueyaso Sohuanu niishitiosano nojuajaari:

—jPueyanaa, puetunu pa jiyacajiniajanaani, miaajenuuri quiniutaniya!

Seetanujanaa sequequiaariiri Ágabo. Cuno miaajenuuri quiquiaari Claudio quishacari jiyaniijiajanaa, Césarthuhuaaj. Nojuajaari Roma tiacajinijij jiiitiaquiaari puetunu jiyacajanaa.

²⁹ Antioquiya tiacajinia quiniaa Pueyaso pueya tojishacari naa Ágabo sequesantej, nojoriiri sequesquiaari:

—jJudea jiyajinia quiniaa parta Pueyaso pueya pa naacure!

Nojoriiri naa miiquiaari. Naaratej, cante queraatia cumaneeca jiiitiaquiaarini, nojoriiri queraatia niqitioquiaari. Saniniuuja, cante maja puera cumaneecaraca quiquiaarini,

nojoriiri secaja niqutioquiaari na jiiatasanojiniji. ³⁰ Na nuhuaji, nojoriiri nareja na niqutiojosano cumaneeca jiyarotaquiaari Bernabeeta, Saulotanio. Nojoriiri Pueyaso pueya jiiatanaa niqutioquiaari saniniuujia Judea jiyajinia.

12

Jacobo nacatasaanujiniji pohuatasano, Pedro nujuatesaanujinijinio

¹ Jiyacaritij, Herodesri jiyaniijia quiquiaari Judea jiyajinia. Nojuajaari Jesuucua tiu-uniaa miiquiaari naquiya. Noojiaqueya quiootequiaari na saniitosocoriquiano nujuatejojuajiniaari. ² Naa Juan tarajanu Santiago motequiaaricuaajaari nijiniaquetucuaaja mueruuta. ³ Judiocuacaari shuquiriquiaari naa nojori jiyaniijia motesacari Santiagotej. Naaratej, Herodesri Pedro quietequiaari na soldadohuajuhuaaj, Judiocuaca timitianura socua nojuaja. Pedroori quiasaaquiaari Judiocuaca queranacunuusacari, nojori sasacari pan na poreetajaaju majeetesano. ⁴ Pedro quiasaanu nuhuaji, Herodesri na nujuatequiaari nujuatejojuajinia. Na tohatenu paniriquiohua juucua Pascua nuhuajiiri, na nequesoreesocoriquiano puetunu quiniaa Judiocuaca niqiarajanaa. Dieciséis soldadohuari Pedro cojuariquiaa pueyaracaanu. Nocua sanitijiootooquiaariiri; coteenu cuatro, na nuhuaji socua cuatro. Nojoriiri naa sanitijiootooquiaaritij. ⁵ Pedroori maninia cojuasaaquiaari nujuatejojuajinia. Jiyacaritij, Jesuucua tiuuniaa pueyari saniniuujia nocuara secojonuuriquiaa jiyanhua, Pueyaso naacunura Pedro.

Pueyaso mashiquishacari Pedro nujuatejojuajiniji

⁶ Cuno niucujani, na juhuaqueyaquishacarjia, quera Herodes tohuatesee tariquicuajii Pedroni, na nequesoreesocoriquiano puetunu pueya niqiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuata na numatucua cajiniocua. Tamasaca soldadohuari nujuatejojuua tohuateyaji cojuariquiaacujua. ⁷ Jiyacaritij, Pueyaso seruuri canashiyauji coretaquiaari jiyareta Pedro shuriucujanaa nujuatejojuua jiniacuma. Na shacantucaari jiyanhua cuhuataquiaari nujuatejojuua. Pueyaso seruuri Pedro jiuuquirii na shuucujaji. Na niucujareeri. Na niucuasacari, na sequereeri:

—¡Ritia quia sanere!

Cumayocuarai tamajaaja saacarejetaquiaari Pedro numatucuaacujaji. ⁸ Pueyaso seruuri na sequereehujaj:

—¡Quia cajiniocua camarucujua quia saatiri socua! ¡Quia sapatu quia cushirijihuaaj!

Pedro jaara naa miiquiaari puetunu na sequesanojuanaa, Pueyaso seruuri socua na sequerohua:

—¡Quia toque quia cushiri ritia! Majaari tarishiniu. ¡Quiocua cua nuhuaji rupaashijia!

⁹ Pedroori ritia Pueyaso seru nuhuaji sacuariquiaajaa. Jiyanhua jiyajeneriquiaari. Majaari na niishiniu quiriquiaa puetunu na niquishanojuanaa. Nojuajaari jiyaniiriquiaa na maquenujinia niquiya naasucua. ¹⁰ Nojoriiri coteenu shocomaa na tacoji cojuanaa soldadohua. Socua na tacoji cojuanaa tajitiumiaajariuhuaaj. Naa quenaacoturee nujuatejojuua tohuateyajiiri. Nojuajaari Pueyaso seruta nujuatusee jiyareta tohuateyaji. Tohuateyaji cumueca casaata shipinshano quiquiaari. Jiyacaritij, tohuateyari tamajaaja riatequee. Nojoriiri tohuareetamaa carijiniacuma. Pueyaso seruuri Pedro jiyatariquiaa sapuenujaara tiaca jiuujiaaco. Na nuhuaji, na shuriucujaji shaajequeeri. ¹¹ Pedroori jiyacari shusha niishiquii. Naa sequereeri:

—¡Seetanujuanaaquii quiriquiaa! ¡Cua Jiyaniijiaquiiri na seru jiyaroree cucua, na mashiquiniuria janiya Herodescujaji, cuarta Judiocuacaacujijihuaaj! Naa na jiyaroreeri maja cua miishaanura taa nojori niishiriojoriquiaa na miiniuria juucua janiyani.

¹² Nojuajaari naa na niishiriojonuta María tijajinia quiaquiaari. Nio Mariacuajaari tamonu Juan nucua. Cuno Juan sesaari Marcojuhuaaj. Cuno tijajinia, queraatia Pueyaso pueyari Pedroocua tii secojonuuriquiaa jiyacari. ¹³ Pedroori jiyacari piquiquiaari carijiniacuma mataca tohuateyaji. Tiaco seruuri na tojiquiaari piquiyano. Nio seru sesaari quiquiaari Rode, niyacoo. Nojuajaari juucua catecanoquiaari tohuateyaji, na niquiniuria cante quiriquiaani. ¹⁴ Nojuajaari saaja Pedro tojishii tia camaru jiyaniquiyano, na tiotiu na riatanura nocujaji. Niyacoo tojishacari seetanujuanaa Pedro rupaa, majaari tiotiu na riatanu quiquiaari na shuquiriniutia. Saaja netequiaariuhua tiaco quiniaa numootenuraari. Nojori sequesuhuari:

—¡Pedrocujajaj nooj, tohuateyaji nujuaatej!

¹⁵ Pueyari saa niyacoo riucuaquiaarijia:

—¿Quiaate paateya? Teyano Pedrote nujuatesaarucuaacujani.

Niyacoori nojori sequenu pacutequiaariuhua:

—¡Taaquiririniij! ¡Pedrocuaaquiniatejaj, nooj nujuaatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuacuaaja.

¹⁶ Nojori nacoosacari tiaco, Pedroori tohuateyaji piquijioriquiaajaa. Tiootiu jaara socua riatasaquiaari, nojuacuajaari quiriquiaa. Pueyari na niquishacari shiriqiu-tiuquiaari. ¹⁷ Pedroori nojori sanaajaree jiyacari na juashiquiata. Cuniqiu quiniaa pohuatareeri taa Pueyaso tohuaterohua nojuaja nujuatejojuajini. Pedroori naa seque-
quiaari nojoritij:

—Niocua naa pohuatare Santiagojuhuaj, parta Jesuucua tiuuniaanio.

Na nuhuaji, Pedroori tiji tohuatacuhua. Tamaqui quiaareeri.

¹⁸ Jaara juhuaquequiaari, nujuatejojuajinia cojuanaa soldadohuari jiyanoehua shiriqiu-tiuquiaari. Majaari nojori niishiniu quiquiaari taa Pedro miiri nujuatejojuajini nojori tajinijini. Tama nojorijiaarijia naa sequetuquiaari na puerenuta:

—¡Pa jiyaniijia Herodesri quiarijia pa pueconutaniya, maninia pa cojuaaquiniucua Pedro!

¹⁹ Herodes niishishacari, na shuriucua nujuatunaa soldadohua jiyaroquiaari nujuate-
jojuajinia nojori pajenura Pedro. Nojori jaara na riuriataaquiquiaari, Herodesri nujuate-
jojuajinia Pedro cojuanaa soldadohua nequesoreequiaari na juaniutia, na niishiniuria
juucua taa Pedro juurequere nojori shuriucujini. Na nuhuaji, Herodesri jiyanoehua na
juaniutia na shuriucua nujuatunaa soldadohua sequequiaari, nojori pueconura narta
soldadohua, nojori cojuaaquiniucua maninia Pedro nujuatejojuajinia. Naa na miiniu
nuhuajitij, Herodesri Judea jiyajini pacuquiaari. Cesareya tiacajinia quishiiri.

Herodes shaajenujini pohuatasano

²⁰ Jiyacaritij, Herodesri jiyanoehua juariquiaa Tiro tiacajinia quiniaa pueyata, Sidón
tiacajinia quiniaatano. Nio caapiqui tiacajinijinio pueyari jiyaniijia Herodes tiacajinia
quijoquiaari nata nojori pocoojonura juucua. Majaari cuno juuca nojori pocoojonu quirii
jiyaniijia Herodesta. Nocuaji, nojoriiri Herodes seru sequare:

—Quiocua quia jiyaniijia sequare, canaa nata jiyanoootionu paniani.

Cuno Herodes seru sesaari quiquiaari Blasto. Nojuajaari na jiyaniijia panishano
quiquiaari. Na jiyaniijia maqueja cojuana quiquiaarijiaariuhua. Tiro tiacajiniji pueya,
maryata Sidón tiacajinijinio, nojoriiri na cumaneecata masetujua na miaquesocoriquiano
jiyaniijia Herodes jiiatano pueyajiniji. Nojoriiri jiyamitia jeecatoonu paniriquiaa cuno
jiyaniijia, maninia nojori quiniuhuara nata, Herodes niqitiojotenuhuara na jiiatano
pueya na miajajaura Sidón tiacajinijinio pueya, Tiro tiacajinijinio pueyano. ²¹ Herodes
seruuri nojori sequequiaariuhua:

—Niocuaana tamonu juuca nimia, jiyaniijia nia pocoojonura.

Na nuhuaji, cuno pueyari na sequesano juucajinia niqiaariuhua. Jiyaniijia Herodesri
nojoriicua maniniushiquiaari. Na maniniuqui toque cushiquiaariiri. Jiyaniijiaacuajinio
shipinishano cajitujinia cajiriohuari. Tiji pocuaquiaari cuno pueyacuuaari. ²² Puetunu
cuniqiu quiniaa pueya tojishacari naa maninia Herodes pocuaano nojori niqiaratej,
nojoriiri nacoonu coteequiaari. Naa sequetuquiaari na nacoosacariiri:

—¡Nio pueyano pocuaani, majaari nareja pueyano! ¡Nojuajaqui Pueyaso!

²³ Pueya sequesacari naa Herodestej, nojuajaari juhua shuquiuriosaaquiaari saa-
jaruhua. Majaari quenaaja cuno pueya na sequenu quirii: “Maja naa cua sequetunutej.
Janinya maja Pueyasoni”. Nocuaji, Pueyaso seruuri canashiyajiniji na tojetequiaari. Na
pocuasacarijia cusomaari. Na sarapiyari na jiniacuma miaquequiaari. Naa cusotaquiaari
tama na sarapiyajaarijia.

²⁴ Pueyaso rupaaari saniniujia socua niyacasaquiaari, tiqiyocua pohuatasacari
puetunu pueya niqiarajanaa. Naacuajitij, Pueyasocua tiunnaa pueyari socua queraa-
tiara canequiaarijiaariuhua. ²⁵ Bernabé, Saulonio, nojori jaara niqitioquiaari cumaneeca
Jerusalén tiacajinia Pueyaso pueya jiiatanaa, nojoriiri ritia quijoquiaariuhua Antioquiya
tiacajiniohua. Nojoriiri jiyacari Jerusalén tiacajiniji riquiaariuhua Juan. Juan sesaari
quiquiaarijiaariuhua Marco.

13

Saulo Bernabeeta rucuanajonu coteesacari Jesujiniji pohuatanura tiqiyocua

¹ Antioquiya tiacajinia Jesuucua tiunnaa pueyajinijionio, noojiaqueyari quiquiaari
Pueyaso sequenu panishano Pueyaso pueyara caminiujunnaa. Quiquiaarijiaariuhua
Pueyaso Rupaa niishitiojonaa. Niioori nojori sesaca: Bernabé; Simónnio, na sesa tarajanu
quiquiaari Negro; Lucionio. Nojuajaari Cirene tiacajinijinio pueyano. Quiquiaarijiaari-
uhua Manaén. Nojuajaari maryata Galilea jiyajinia jiyaniijiarano Herodesta canashiti-
jiosaquiaari. Quiquiaarijiaariuhua Saulo. ² Tamonu juuca, puetunu nojorijianaari

Pueyaso secjonuuriquiaa. Cuno juucajuhuj, majaari nojori miaquenuunu quiriquiaa socua na secjonuunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequequiaari tariucuacaanucujani.

³ Nojoriiri jiyacari socua maja na miaquenuunu quiquiaari. Saaja Pueyaso secjonuuriquiaa socua jiyanohuari. Na secjonuunu nuhuaji, nojoriiri Bernabé nacaacua, mariyata Saulo nacaacua niatuquiaari na juaashiquiaa. Nojoriiri naa miishaaquiaari nojori jiyatesaanura Pueyaso jiyaramiquishano pueyara, Pueyaso rupaa pohuatanuuriquiano jiyanohua Pueyaso Sohuanu cumaacata.

Jesujiniji pohuatasacari Chipre jiyajinia

⁴ Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiaquiaarijaara nuacu Seleucia tiacajiniara, shoniniacu caminia casaqueyaji. Nojoriiri cuniquiji quiaquiaari puereetuca buquejina Chipre jiyanihana jiyajiniara. Chipre jiyari jiya tucuaatijaja, shoniniacu caminia juujajinia. ⁵ Nojori tiuquijiosacari Salamina tiaca tacatajajiniji, tii Pueyaso rupaa pohuatanuunu coteequiaari puetunu cuniqui quiniaa Judiocuaca secjojuaca tijajiniaqueyajanaari. Juanri nojoritia quiriqiaajuhuj, nojori naacuriquiano. ⁶ Naa nojori rucojosacari Pueyaso rupaa pohuatanura Chipre jiya tucuaatijajacuatej, socua tiuquijioseequiaari Pafos tiacajiniara Chipre tamajiria. Nojoriiri tii riuriataquiaari shimiacu, narta Judio pueyano. Na sesa quiquiaari Barjesús. Nojuajari cuniqui quiniaa sapojoquiaari naatej: “Janiyacuaja Pueyaso sequenu panishano caminiujunია pajaniyarani”.

⁷ Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniija quiquiaari. Cuno jiyaniijaari jiyanohua niishijia quiquiaari. Nojuajari Bernabé masuquiaari Saulonio, nojori pohuatanura Pueyaso rupaa nojuaja. ⁸ Cuno shimiacu sesaari Griego rupaajinia sequesaaquiaari Elimas. Nojuajari saaja cuno jiyaniija niquiara cuaracashitiquiaari Pueyaso rupaa. Naa sequereee cuno jiyaniijaari:

—Maja cuno pojori tojinii. Jiyanohua sesaari nojori pohuatasano. Quia sapojotuyano.

⁹ Saulo sesaari Pablo quiquiaarijuhuj. Jiyacari, Pueyaso Sohuanu cumaquishacari nojuaja, Pabloori jiyanohua shitimia shimiacu jiquioco shootiaree naa na sequesacari nojuaja:

¹⁰ —¡Sesaaca niyanu sequena! ¡Maninia miijaca paracaajiana! ¿Casaara pueya quia tenujia Pueyasocujajini? ¹¹ ¡Cua Jiyaniijaari quiarjia quia saniitonutaniya! ¡Quiaari cariyojuarura quiniutianiya seetanujanaa! ¡Quiaari pasaja tarishiniutianiya cariyojuarura quia quishacari!

Jiyacaritij, juhua niquiaari na namijajinia cajimaa. Cariyojuarura quiquiiri. Juhua ninishiqui quiaquejoquiaari puetunu cunocojuanaari, na juaashiquiaajiniji na jaatucusaanura juucua. ¹² Cuno jiyaniija jaara naa niquiquiaaritij, Pueyasocua tiuuriiri na niquiara nojori pohuatasacari shanohua Jiyaniija Jesujiniji.

Pablo, Bernabé quishacari Antioquiya tiacajinia, Pisdia jiyajinia

¹³ Pabloori na cojiniaata Pafos tiacajiniji quiaquiaari buquejina Perge tiacajiniara, Panfilia jiyajinia. Juanri Perge tiacajinia cateseequiaari nojoriicua. Tiji rujuuquiaariuhua Jerusalén tiacajiniohuari. ¹⁴ Na nuhuaji, Pabloori Bernabeeta Perge tiacajiniji quiaquiaari Antioquiya tiacajinia. Antioquiya tiacaari Pisdia jiyajinia. Tii nojori quishacari, nojoriiri samaatenu juuca quiaquiaari narta Judiocuaca secjonuujaja tijajinia. Na tiuquishacari, cajitiushiiri. ¹⁵ Jiyacaritij, tariucuacaanu Moisés Rootasanoori serojosaaquiaari. Tariucuacaanu Pueyaso sequesano caminiujunია naajiotasanoori serojosaaquiaarijuhuj. Na nuhuaji, rerejua tia camarnuuri naa sequequiaari Pablo, Bernabeenio:

—Cuarta Judiocuacanaa, niaa jaara Pueyasojiniji nia niishishano casaa sequenu paniri, nia niishitiojore quiarjia nia quiniaa niquiara.

¹⁶ Pabloori sanequiaari. Na juaashiquiata sanaajaree pueyari. Naa nojori sequereeri:

—Nia tojtiare cuarta Israel pueyanaa, nijaniyajuhuj, canapete Pueyaso tojtijacacujani tamasa pueyapuejinijinio. ¹⁷ Paari sequequiaari: “Pueyasoori pa Jiyaniija, Israel pueya pa quiniucua”. Seetanujanaa, paacuaajari Pueyaso saquiriojosano pueyacujajinioni. Tariucuacaanu, Pueyasoori maniniushiquiari pa supuetanaa saquiriojocujajini na pueyara quiriquiano. Na nuhuaji, jiyanohua pa supuetanaa canetequiaariiri Egipto jiyajinia nojori quishacari. Na nuhuaji, Pueyasoori nojori mashiquiaari cuno jiyajiniji na cumaacata. ¹⁸ Cuarenta marijiaari pa supuetanaa shoconujocujajini pueyaracaanu nojori rucojosacari najuhua cariquia jiyajinia. Pueyasoori jiyacari nojori rejeretaquiaari na tojtiaquishacari nojuaja. ¹⁹ Na nuhuaji, Pueyaso cumaacata, siete tamaatiucua rupaa pocujaja taucuaari puecoosaaquiaari Canaán jiyajiniji, saniniujaja cuno jiya na niquitiosocoriquiano pa supuetanaa. ²⁰ Pa supuetanaa jaara

Canaán jiya camaruhua quiquiaari tari, socua cuatrociento cincuenta marijiaari nojori shoconuquiquiaari saaja nequesoreenaa jittiasacari nojori. Na nuhuaji Samuelri nojori nequesoreenara jiyatesaaquiarrijuhua. Nojuajaari Pueyaso sequesano caminiujunia quiquiaarrijuhua. ²¹ Samuel quishacarjia, pa supuetanaari Pueyaso seconuquiquiaari na panitushacari jiyaniija, nojori jitiariquiano nequesoreenaa niti. Naacujitij, Pueyasoori nojori jiyaniijara jiyatequiaari Saúl, Cis niyanu, supuetana Benjamin niqiuohuacujinjo supueno pueyano. Saúlri nareja cuarenta marijia shocotejoquiaari pa supuetanaa jiyaniija na quishacari. ²² Na nuhuaji, Pueyasoori Saúl soojotaquiaariuhua Saúl tojiyaquini-uucua nojuaja. Saúl niti David jiyatequiaariuhua Israel pueya jiyaniijara saniniuurjia. Pueyasoori naa sequequiaari Davidjiniji, na timitiasacari nojuaja: “Isai niyanu Davidcuajaari cua shuquiuriojua. Nojuajaari cua panishano pueyano. Nojuajaari puetunu cua panishano miiniutianiyajanaa”.

²³ Quiari naataja, Pueyasoori na sequesano tohuateequiaari na mueratesacari pocuaji Tacuna. Nojuajaari Jesu, David niqiuohuacujinjo supuenoni. Pueyasoori na seerataquiaari Israel pueyacuaji Tacuna quiriquiano, taa na sequequiaari tariuacuacaanucujani. ²⁴ Jesu coteyaquishacarjia rucuanenu na Quejiniji pohuatanura, Tiuquinijiona Juanri coteenu nocuaji pohuataquiaari Pueyasojiniji puetunu Israel pueya niqiarajanaa. Tiuquinijiona Juanri nojori sequequiaari noojia nojori tacatonuhua Pueyasoocua, naajuhua, moojinia nojori tiuquinijosaanura, Pueyaso tojiijara nojori quiniuria. ²⁵ Quera Tiuquinijiona Juan shaajesacari, nojuajaari naa sequequiaari: “Janiyari maja Pueyaso Jiyarosani taa nia jiyaniquiaa najuhua janiyacujani. Na Jiyarosano cutaraari cua nuhuaji niniutianiya. Nojuajaari seetanujanaa Jiyaniijajanaa cutara. Janiya maara jiyanojua shuquiriaatia quirini, nojuaja jaara cua sequere na serura cua quiniuria quenaaja na sapatu cua jocuanura nera. Nojuaja cutaraari saaja maninia miijia”.

²⁶ ‘Cuarta pueyanaa, nijaniyara cante Abraham niqiuohuacujinjo pueyacuajani, cua tojitiare, nijaniyajuhua taucacanaa, canapueete Pueyaso tojiijacuajani. Niaanoori nio maninia rupaa Pueyasojiniji, nia jiyanooshaanura sesa nia miishanojiniji. ²⁷ Jerusalén tiacajinia quinia, mariyata na camarucuanio, nojoriiri maja na niishiniu quijia cante Jesu quiquiaarini. Majaari nojori niishitiunio quiquiaarijuhua Pueyaso sequesano caminiujuniaa naajiotasano tariuacuacaanu. Cunoori najuhua nojori serojonuusano puetunu samaatenu juucajanaa. Naacujitij, nojori jaara moquiaari Jesu, maninia tohuateequiaariiri Pueyaso sequesano caminiujuniaa naajiotasano, taa Jesujiniji sequesaaquiaari tariuacuacaanucujani. ²⁸ Jesuuri seetanujanaa maja na miiniu quiquiaari sesa. Tama nojoriijaarijia juhua sesa miijara na jiyatequiaari cutara. Naacujitij, Pilato sequetuquiaariiri cuara na moteeranoj. ²⁹ Nojori jaara tari miiquiaari taa nojuajiniji naajiotasano quiyari tariuacuacaanu Pueyaso Rupaajiniacuajani, na roshintiquiaari niyacutesanojinijiiri. Raaco na niatureeri. ³⁰ Naajaa, macu na quishacari, Pueyasoori saaja na samiitiani quiaariuhua. ³¹ Na samiitanu nuhuaji, Jesuuri sequeyarcua na pueyaca mueranacujuquiaari, noo pojoriicua canapueete na tarajaquiaari na quiasacari Galilea jiyajiniji Jerusalén tiacajiniaracuajani. Nojoricuajaari quiarjia nojuajiniji poojotaniuhua puetunu pueya niqiarajanaa.

³² ‘Canaari timiyari canaa pohuatasacari nijaniyara, ¡Pueyaso pohuatasano pa supuetanaari tari tohuateecanu! ¡Pocuaji Tacunacuajaari tari miiquianu puetunu pa jiyanooshaanurajanaa! ³³ Seetanujanaa, Pueyaso sequesano pa supuetanaa Israel pueyarani, cunoori shusha pajaniyara tohuateecanu, pa supuetanaa Israel pueyacuajinjo pa quiniucua. Pueyasoori tari tohuateecanu na sequesano pajaniyara, na samiitianiishacariuhua Jesu, naatej, taa David jaaquequejonee Salmojinia na sequesano quiyacuajani. Naa naajiotasano quiyari segundo Salmojinia:

“Quiaari cua Niyanucua. Janiyari quiarjia quia samiitianiiri”.

³⁴ Pueyasoajaari sequequiaari, nojuacuajaari na samiitianiutianihua na moqueyaquiniucua pa raaco. Nioori naajiotasano quiyajuhua tariuacuacaanu Pueyaso Rupaajinia. Naa sequeyari:

“Janiyari maninia niaara miiniutianiyani taa cua sequequiaari Davidcuajani”.

³⁵ Naa naajiotasanoori Jesujiniji quiyajuhua David jaaquequejonee Salmojinia:

“Majaari quia panishano seru cuaqueya quia shanacunu quiniutianiya na moquenura”.

³⁶ Pueyanaa, paari seetanujanaa niishiyani Davidri puetunu Pueyaso panishano na miiniu nuhuajijanaa shaajequiaari. Nojuajaari na supuetanaa rupuequiaari macunucua quiquiojinia. Na cuaqueyari seetanujanaa moquequiaari cutara. ³⁷ Noo Jesu saniniujia, Pueyaso cutaraari na samiitiani quiaariuhua. Majaari na moquenu quiquiaari cutara.

³⁸ Cuarta Israel pueyanaa, niaa cumaati canaa pohuatasano niishiya. Canaari Jesujiniji nia pohuataani. Niaa jaara nocua tiuuri, niaari sesa nia miishanojiniji jiyanooshaanutaniya. ³⁹ Moisés Rootasanojinia, paari tariuacuacaanu niishitiojsaaquiaarini pa seya

pa puecoonura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniuuja. Majaari seetanujuanaa pa jiyanooshaanu quiquiaari naa pa miishacaritij. Quiarijia cutara, canapueete Jesuucua tiuya saniniunijia, nojoriiri puetunu sesa na miishanojinijijianaa jiyanooshiya. ⁴⁰ Naa cutaraari cocuaatia miiniutianiya pueyanaa, nia jaara cua pohuatasano ruuretare. Pueyasoori na tojiyashijiaa saniitionuniya taa tariucuacaanu Pueyaso sequesano caminiujuninaa sequequiaaricujani. Naa sequetuquiaariiri:

⁴¹ “Nia tojitiare, rerequetejacanaa. Niaari jiuujiatenutaniya najuhuanaj. Na nuhuaji, niaari shaajasaanutaniyajuhaaj. Janiyari Pueyasoni. Janiyari tarijia nia niquishoo casaa miiniutianiya. Tamasaca jaara nia pohuatate, niaari saaja na cuaracashitiniutianiya”.

⁴² Na nuhuaji, Pabloori narta Judiocuaca rerejojua tiajiniji tohuareetaquiaariuhua na cojiniaata. Taucuacaari tii quiriqiaajuhuaaj. Nio taucuacaari Judiocuacaacua pacunaa quiquiaari, Judiocuaca nojori quiniuriajuhuaaj, Pueyaso sequesano tojitianaara na quiniuria. Nojoriiri Pablo sequequiaari, Bernabeenio:

—Niocua tamonu sábadó canaa pohuatateeruhuaaj, socua canaa tojiniuria Jesujiniji.

⁴³ Nojori quiojosacariuhua Judiocuaca rerejojua tiajiniji, queraatia narta Judiocuacaari nojori nuhuajiquiaari, queraatia taucacajinijinio Judiocuacaacua pacunaanio. Cuno pojoriiri maninia Moisés niishitiojosano tojitianaa quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta naa rootaquiiaari nojori:

—Saaja Pueyasocua tiuujiaca nia quiri. Majaari nocuaji taacanuunu. Nojuacuajaari pa cumaquijia.

⁴⁴ Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniuucua rerejojuaari. ⁴⁵ Judiocuaca secojojua tia camarucua jaara niqiquiaari queraatia pueya na rerejojuaajinia mishiyano, Pablo pohuatasano na tojitianura, nojoriiri juaaquiouquiaari. Nojoriiri tama sequetooquiaarijiaaja:

—Puetunu pueyajanaari cuno pojori tojitiajacara quiniutianiya. Pa tojiyaquiniutianiya saniniuuriija.

Naa sequeturiquiaa pueya niqiuara Pablorinijijiaariuhuaaj:

—¡Pabloori maja maninia na niishiniu Pueyaso rupaa! ¡Najuhuaana sesa pohuataano! ¡Nojuajaari niishiyashijia!

⁴⁶ Pabloori saaja Bernabeeta sequequiaari na puereyaquiniutia:

—Maniniacuajaaj, cuarta Judiocuacanaa. Canaacuajaari na panitiaja nijaniyatej, Pueyaso rupaa canaa coteetanura pohuatanu nijaniya, Pueyaso saquiriojosano Judiocuaca nia quiniuucua. Niacuajaari saa na ruuretareejaa. ¡Majaquiiri nia rishiniu paniniu, pueyaracaanu nia quiniuria Pueyasota! Quiarijiani, canaari saniniuuja taucuacaacua quianutaniyani, Pueyaso rupaa canaa pohuatanura nojori niqiuara. ⁴⁷ Canaa Jiyaniijia jaara canaa jiyaramiquiaari, nojuajaari naa canaa sequequiaaritij: “Quia jiyatequiaari mijiria cuhuatariquianonijia. Quia pohuatasano janiyajinijiri caminiujiushaanutaniya taucuaca niqiuara puetunu jiya puequetujinijianaa, Pueyaso jiyanooniuria nojorijihuaaj”.

⁴⁸ Cuniqiu quiniaa taucuaca jaara na tojiqiaari sequeshiyanotej, nojoriiri shuquiriquiaari. Pueyaso rupaa maniniuhuaqueetareeri. Sequetureeri:

—¡Jiyanohua maninia pa Jiyaniijia Pueyaso rupaa!

Teyano pueya Pueyaso saquiriojoquiaari tariucuacaanu na pueyara quiriqianocujani, pueyaracaanu nata rishiniuriacuajani, jiyacaritij, nojoriiri Jesuucua tiuuquiaari. ⁴⁹ Jiyaniijia rupaari pohuatasaaquiaari puetunu cuno jiyajinijianaa. ⁵⁰ Judiocuacaari na juaaniutia Pueyaso panijiaa maajipohua shiniujuquiaari na cojitiuniuria nojori, nojori miiniuria naquiya Pablo, Bernabeenio. Naa rootatuquiaari cuno tiacajiniji camarucua-jaariuhuaaj, mariyata cuno jiyajiniji nojori taanuunura Pablo, Bernabeenio. ⁵¹ Naaratej, na nuhuajiria, Pablo, Bernabeenio, nojoriiri na niocuacajiniji seseeca rapijionuutaquiaari. Naacuajitij, Antioquiya tiacajinia quiniaa pueyari niishiquiaari, Pueyaso saniitosacari nojori, majaari nojori Pabloori, Bernabeecua na tiuutianu quiniutianiya Pueyaso jiyanoayaquishacari nojori. Na nuhuaji, Pabloori Bernabeeta cuno tiacajiniji quiaquiaari Iconio tiacajinia. ⁵² Jesuucua tiuuninaa pueyari saniniuuja shuquiriaatia jateequiaari Antioquiya tiacajinia, nojori jütiasacari Pueyaso Sohuanu.

¹ Pablo, Bernabeeta naa miiquiaarijiihuhua Iconio tiacajinia. Nojoriiri narta Judiocuaca rerejojua tiajinia tiuquitiaquiaari. Nojoriiri tii pohuataquiaari Jesujiniji puetunu nojori niqiarajanaa. Queraatia pueyari Jesuucua tiuquiaari, Judiocuaca, taucucanio. ² Noojiaqueya Judiocuacajinijiniori maja na tojiniu paniniu quiquiaari Jesujiniji pohuatasano. Cuno pojoriiri taucuaa shiniujuquiaari nojori juaaniuria Jesuucua tiuunaa pueya. ³ Pabloori, Bernabeeta cunora socua jyojequiaari pueyaracaanu cuniqui, Jesuucua tiuunaa nojori cumaquiniuria. Nojoriiri maja na puerenu quiquiaari Jiyaniijajiniji nojori pohuatasacari. Seetanujanaa, Jiyaniijaari nojori naacuquiaari jyanohua cutara maninia miishano nojori miiniuria, pueya naatanijionurajuhuj. Jiyaniijaari nojori naacuquiaari cuno pueya niishiniuria, seetanujanaa quiquiaari Pablo, Bernabé pohuatasano. ⁴ Cuno tiacajinia quiniaa pueyari raquitiiaquiaari. Noojiaqueyari tama narta Judiocuaca tojiquiaarijaaja. Saniniuujia, tamasaacari Jesu jiyaramiquishano pueya tojijara quiquiaari. Nojoriiri naa quiquiaari cuno tiacajinia. ⁵ Naa nojori quishacaritij, Judiocuacaari taucucata roojotooquiaari cuno tiacajinia jiyaniijanucuaa. Naa roojotooquiaari nojori sesacanura Pablo, Bernabeenio, na jacutunura saitiajuhuaj. ⁶ Pablo, Bernabé jaara niishiquiaari naa cuno pueya miiniu panishacari nojoritij, tiji mashiyocuatuuquiaari Licaonia jiyajiniara. Nojoriiri Listra tiacajinia quiojoquiaari, Derbe tiacajinariano, cuno caapiqui tiaca shocua quijiaca tiacajiniajuhuaj. ⁷ Nojoriiri tii poojotaquiaari Jesujiniji nojori niishishano.

Listra tiacajinia pueya jacutusacari Pablo saitia

⁸ Listra tiacajinia quiquiaari sesarunocua pueyano. Majaari na rucuanenu quiija. Nojuajaari naa rasaquiaarijuhanajaj. Majaari na pooniniu quiija na cajitujiniji. ⁹ Cuno pueyanoori Pablo tojiriquiaa na pohuatasacari Jesujiniji. Pablo jaara na niquiquiaari, na niishiriiri nojuajaari seetanujanaa tiuuriquiaa na pohuatasanoocua. Naa Jesuucua na tiuuniucuatej, Pabloori niishirii cuno pueyano na naata na cashacu jeequenuhua. ¹⁰ Pabloori jiyamitia jyanohua na sequeree:

—¡Maninia quia nujuare! ¡Maja porequetanu!

Cuno pueyanoori ritia saneqhee. Rucuanenu saniriiri. ¹¹ Cuno Licaonia pueya jaara niqituuquiaari naa Pablo miishanotej, nojoriiri tama na rupaajiniajaaja sequetuquiaari:

—¡Cumaacaraca quijiacaari juhua pueyasohua pocua rosetareeni, juhua pueya niqishano!

¹² Naa nojori sequesacaritij, majaari Pablo, Bernabé niishiniu quiquiaari nojori sequesano tama nojori rupaajiniajaaja. Cuno pueyari Bernabé sesojoree Júpiter, juhua nojori pueyaso sesa. Pabloori sesojosaareecujua Mercurio, jyanohua pocuanu niishijia na quiniucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jiiitasano juhua na pueyasohuara cuno jiyajinia. ¹³ Júpiter secojojua tiaari Listra tiaca tohuataya shuriucua quiquiaari. Jiyacaritij, Júpiter secojojua tia cojuanaari juyaca jaatucunuquiaari, Pabloori nojori puecoosocoriquiano Bernabeecuaranio, juhua nojori pueyasohuacuara. Maniniushitijara naana shuucuaa shiyosano patootaquiaarijiaariuhuj. Cuno pueyanoori puetunu pueyatajanaa Pablo, Bernabé shuquiritianu paniriquiaa juucua, juyaca na puecoosacari nojoriicuaa juhua Pueyasooacuara. ¹⁴ Pablo, Bernabé jaara niquiquiaari naa cuno pueya miiniu paniano nojoritij, nojoriiri na toqueya sutaquiaari nojori tacaaniuita. Pueya tajiniaaco netecuatuquiaari nojori miiniu panishano nojori tarinitianura. Pabloori naa nacaquiaari puetunu cuno pueya tojishocoriquianojanaa:

¹⁵ —¡Pueyanaa! ¿Casaara naa nia miya canaani? ¡Canaari nareja pueyani taa nijaniyacuaani! ¡Canaari naacua niyarucuaa niaacuatej canaa sequenura nijaniya, puetunu nio najuhuaana nia miishanojanaa nia cartenura! ¡Saaja nia shuquiritiare cutara pueyaracaanu rishijia Pueyaso! Nojuajaari nio jiya shipiniquiaari, jiya cajiniocua. Na shipinishanojaariuhua shoniniacu caminia. Puetunu pa niqishanojuanaari na shipinishano. ¹⁶ Pueyasoori tarijia puetunu pueyajanaa tarinitiaquiaari nojori miiniuria tama nojori panishanojaaja. ¹⁷ Naajaa, nojuajaari pa supuetanaa niishitiquiaari cante nojuajani, maninia na miishacari nojoriira. Nojuajaari maru nitiquiaa pajaniyara, pa nataacuaca moritianura, pa miasocoriquiano pa jiiitianura queraatia, shuquiriaatia pa quiniuriajuhuaj.

¹⁸ Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojoriicuaa na puecoonu panishano juyaca.

¹⁹ Jiyacaritij, Antioquiya tiacajinijinio Judiocuacaari tii tiuquijioseequiaari, Iconio tiacajinijinio. Nojoriiri cuniqui quiniaa naso Josee Pabloori, Bernabeecuaranio. Cuniqui jacuturee saitia Pabloori. Nojori jaara jyaniquiaari Pablo naasucuaari tari cusoyaree saitia jacusano, na jaatiuquiaari tiacajiniji tamamaari. ²⁰ Jesuucua tiuunaa pueya

jaara rerejoquiaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiquiaariuhua saajaari. Tariqui cuno tiacajiniji quiaquiaari Bernabeeta Derbe tiacajiniaari.

²¹ Jaara Jesujiniji pohnuataquiaari tii, queraatia pueyari Jesuucua tiuquiquiaari. Na nuhuaji, nojoriiri Derbe tiacajiniji riujuutuiaquiaariuhua. Tiuquijioquiaariuhuari Listra tiacajinia, Iconio tiacajinia, Antioquia tiacajinianio. ²² Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

—Canapueye Pueyaso shuriucua quiriqiuani, nojoriiri naquiya miinitianiya mijiria.

²³ Nojoriiri maninia Pueyaso tojjiaa pueya saquiriojotuaquiaari, nojori jiyateso-
coriqiano Pueyaso pueya jiiitariqiano. Naa miitiquiaari puetunu cuno tiacajini-
ajanaari, Pueyaso pueya jiiitianura tama nojori nacasunaaaja. Jesu saquiriojosano
pueyari maja na miaquenuunu quiquiaari Pueyaso na secojonuusacari. Nojoriiri naa
secojoquiaari Pueyasotej, narta Pueyaso pueya jiiitariqianooacara:

—Canaa Jiyaniijanaa, nio pueya quiocua tiuuiacani, nojori quia naacure quiocua
tiuninaa narta pueya nojori jiiitianura maninia.

Pablo tacatasacariuhua Bernabeeta Siria jiyajinia Antioquia tiacajiniara

²⁴ Nojori riujuuniuhua Antioquia tiacajiniohuara, Pisidia jiya shocotomuhuari.
Na nuhuaji, tiuquijioquiaariuhua Panflia jiyajiniaari. ²⁵ Tii Pueyaso rupaa pohnu-
atatuquiaari Perge tiacajiniaari cuno pueya niqiuara. Nojori pohnuatanu nuhuaji, Atalia
tiacajinia quiojoquiaariuhua. ²⁶ Cuniqijij, buquejina jaaretatuquiaari Antioquia
tiacajiniaraari. Cuno Antioquia tiacari quiquiaari tee cuniqui narta Pueyaso pueya
niaquiaari nojoriicua na juaashiquiacuajani, Pueyaso nojori secojosacari. Nojori naa
miiquiaari, Pablo, Bernabé jiyatesaanura tucuaaanu nojori quiojonura Pueyaso rupaa
nojori pohnuatanura taucuaa. Cunoori quiquiaari shushajanaa nojori coteenu pan-
ishacari rucuanenonu tamaquicua. Naacuajitij, nojori tohuatenu nuhuaji puetunu
Pueyaso panishanojuanaa, jiyacari shusha tiuquijioriquiohuari. ²⁷ Antioquia tiacajinia
nojori quishacari tari, nojoriiri puetunu Jesuucua tiunina pueya masuunujuquiaarijanaa.
Cuniqui pohnuataree puetunu nojori niquiarajanaari, taa Pueyaso naacucanu maninia
nojori pohnuatasacari Jesujinijini. Pohnuatanuquiaariuhua taa Pueyaso taraajete-
quiaari taucuaa jiuujiani, Jesuucua nojori tiuuniurajuhua. ²⁸ Pabloori, Bernabeeta
cuniqui tarishiquiaarijanaa narta Jesuucua tiuninaata.

15

Jesuucua tiuninaa jiiitianaa nacoosacari Jerusalén tiacajinia

¹ Jiyacariitij, Judea jiyajinijinio pueyari Antioquia tiacajinia quiojoquiaari. Nojoriiri tii
sesa niishitiojonu coteequiaari cuniqui quiniaa Jesuucua tiuninaa pueya. Nojoriiri naa
sequeriquiaa Antioquia tiacajinia quiniaa narta Pueyaso pueyatej:

—¡Pueyanaa, Jesuucua tiuninaa pueya cuaara na cararaatiuquua co miatejoteera, taa
Moisés niishitiojoquiaaricuajani! ¡Jaara miatesoo quiri, majaari Pueyaso jiyanooniu
quiniutianiya jiyanotej, na pueya nojori quiniuria!

² Pablo, Bernabeeno, nojori jaara tojjiaaari naa cuno pojori niishitiojosanotej, nojori-
iri cuno pojoritia nacojoquiaari jiyanohua. Naacuajitij, Antioquia tiacajinia quiniaa
Pueyaso pueyari Pablo, Bernabé sequequiaari nojori quianura noojiaqueya cuniquijinio
pueyata Jerusalén tiacajinia. Nojori jiyaroreeri na nequesotanura Jesu jiyaramiquishano
pueya Jerusalén tiacajinia, mariyata Jesuucua tiuninaa pueya jiiitiananio. Nojoriiri
jiyaramiquishaaree cuno pojori nequesotasaanura, ¿seetanutejanaa naa miishiyatena, taa
cuno Judea jiyajinijinio nijiono pueya niishitiojiya canaacuajani?

³ Naacuajitij, Pabloori Bernabeeta jiyarosaaquiaari Jerusalén tiacajiniara. Nojori
quiasacari Jerusalén tiacajiniara, Fenicia jiyacuma quiojomaquiaariiri, Samaria jiy-
acumanio. Nojoriiri cuno jiyacajinia Pueyaso pueya pohnuatanuquiaari taa taucuaa
cartequiaari tama sesa nojori miishanojuajani, Pueyaso tojjiaa nojori quiniuria. Jesu-
cua tiuninaa pueya jaara naa tojjiaaariitij, nojoriiri jiyanohua shuquiriquiaari.

⁴ Nojori tiuquijiosacari Jerusalén tiacajinia, puetunu Jesuucua tiuninaa pueyajanaari
nojori rerejotaquiaari, mariyata puetunu Jesu jiyaramiquishano pueyajanaanio. Pablo,
Bernabeeri jiyacari nojori pohnuataquiaari puetunujuanaa, naajuhua, taa Pueyaso
naacuquiaari maninia nojorini, nojori pohnuatasacari taucuaa Jesujiniji. ⁵ Cuniqui
quiriquiaaariuhua Fariseocuaca, tariucua Jesuucua tiuuiacani. Cuno pojoriiri rerejona
tadiniji nuuatquiaari. Naa sequetureeri:

—Cuno taucuaca Jesuucua tiuuniaani, na cararaatiuuquica co cuaara miatejosaaria Judiocuaca nojori quiyaquishacari. Na nuhuaji, nojori cuaara Moisés niishitiojosano tojjijara quiiria, taa Moisés rootaquiaari tariucuacaanucujani.

⁶ Naa nojori nacojonu nuhuajitij, saa Jesu jiyaramiquishano pueyajaari rerejoquiaari jiyareta Jesuucua tiuuniaa narta pueya jiiñanaa. Nojoriiri maninia niishiriojonu-uquiaari taa na miiniutianiyani. ⁷ Naa pueyaracaanu nojori pocoojosacaritij, Pedroori socua nojori tajiniji nujuajiaari. Naa nojori sequereeri:

—Pueyanaa cua tojitiare. Niaacuajaari niishiya, pa Jiyaniijiaari cua saquiriojoquiaari na rupaa pohuatariquiano taucuaca tojishocoriquiano, nojori tiuuniuria Pueyasocua-juhuaj. ⁸ Pueyasocuaajari poojia niishijia. Nojuajaari cuno taucuaca niishitioquiaari, nojuajaari nojori jiyateree na pueyarajuhuj, na Sohuanu na niqutiosacari nojori, taa na niqutioquiaari pajaniyacuaani. ⁹ Majaari nia jiyaniiniu Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya panijajanaa. Cuno taucuaca jaara nocua tiuquiaari, nojuajaari nojori jiuujia jeequerejuhuaj saaja Jesuucua nojori tiuushacari. ¹⁰ Naa nia tamacasacari taucuacajinijinio parta Pueyaso pueyatej, niaari Pueyaso miishano soojotaruhua. ¿Casaara nia tamacaa Pueyaso miishanoni? Niaari quiarijia Moisés niishitiojosano tojitiinu paniya Jesuucua tiuuniaa pueya, juhua pa tojishanocuaa. Saniniuujia, majaari quenaaja pa supuetanaa na naata na miiniu quiquiaari puetunujuanaa, taa Moisés niishitiojoquiaaricujani. ¹¹ Paari niishiyani pa Jiyaniijia Jesuuri pa jiyanoojia. Naaratej, pa jiyanooquiaari, na pueya pa quiniuria. Mariyata naa miiquianu cuno taucuacajaariuhuj. Majaari seetanujanaa maninia pa miinu quiquiaari pa jiyanooshaanura.

¹² Naa Pedro sequesacaritij, puetunu pueyajanaari socua sanaajetaquiaari. Bernabeeri Pablota jiyacari pohuataquiaari taa Pueyaso na cumaacata miitioquiaari maninia taucuaca niqiarani, naajuhuj, taa nojori naatanijioquiaari cusosuhujaniuhuj. ¹³ Naa nojori pohuatanu nuhuajitij, Santiagoori sequequiaarijuhuaj:

—Cuarta Pueyaso muerasunaa, cua tojitiare. ¹⁴ Simón Pedrocuajaari tari pa pohuataree taa Pueyaso coteecanu shusha na Sohuanuta poonijionura cuno taucuaca jiuujiajiniani. Pueyasocuaajari nojorijinijinio jiyateya seetanujanaa na pueyara, nojori maniniuuaqueetanura nojuaja. ¹⁵ Seetanujanaari nio. Naajuhuj, tariucuacaanu Pueyaso sequenu panishano caminiuujiaacuajaari naa naajionuutaquiaari Pueyaso sequesantej:

¹⁶ “Janiyari David niquihuacuajinio mueratenutaniya tamonu pueyanoni. Davidcuajaari na supuetanarano. Nojuajaari Jiyaniijajanaa quiriquiano puetunu pueyapuerajanaa, taa David quiquiaari Israel pueya jiyaniijiacuaani. ¹⁷ Naacuajitij, puetunu taucuacajanaari cua pajenuunutaniya, noo pojori teyano cua saquiriojoquiaari tariucuacaanucujani, nojori jiyatesocoriquiano na Jiyaniijiaari janiya’.

¹⁸ Jiyaniijiaari naa sequeyaquij. Nojuajaari tariucuacaanu pueya toquiaari nio”.

¹⁹ Naaratej pueyanaa, janiyari nia sequeyani, nareja nia niquiri cuno taucuaca, Jiyaniijia Jesuucua tiuuniaani. Majaari nojori najiqutiniinu Pueyasocuaaji, nia tojitiinu panishacari nojori tariucuacaanu Moisés niishitiojosano. ²⁰ Nareja nojoricuara pa naajiore. Pocua pa naajioneejinia sequere nojorini, maja tari nojori miaquenuunura shipinishano pueyasocuaara na puecototusano casa, juunu, borregonio. Cuaara quitiuuria saa necocataja, maja tamonu na numuetucunura socua. Jaara shu miaquetunu paniri, cuaara na miaqueera puetunu na nanaca caatinijiasanojuanaa, naajuhuj, maja na miaquenuunura casami nanaca. ²¹ Puetunu nio cua sequesanojuanaari parta Judiocuaca tojishano. Cuno niishitiojosanoori pueyaracaanu parta Judiocuaca rerejojuaca tijaniaqueya naa serojosaquiaa Moisés naajioneejiniji puetunu samaatenu juucajanaa, puetunu tiqiyocua tiacajinijanaa.

²² Naa nojori pocoojonu nuhuajitij, Jesu jiyaramiquishano pueya, puetunu tii quiniaa Jesuucua tiuuniaa pueyajanaano, nojori jiiñanaajuhuj, puetunu nojorijanaari mariyata niishiriojonuquiaari. Naacuajitij, nojoriiri narta Pueyaso pueya saquiriojotuchiaari na jiyarotusocoriquiano Antioquiya tiacajinia Pablota, Bernabeetanio. Jiyacari saquiriojosaareeri Judas, Silasnio. Judas sesaari Barsabás quiquiaarijuhuaj. Cuno pojoriiri Jesuucua tiuuniaa pueya tojishano quijia cutara, cuniqui Jerusalén tiacajiniani. ²³ Nojoritia jiyarotasaquiaariiri naajionee. Cuno naajioneejiniaari naa sequequiaari:

“Niaacuara naajionaani, canaari Jesu jiyaramiquishano pueyani, Jesuucua tiuuniaa jiiñanaano, Jerusalén tiacajinia niarta Jesuucua tiuuniaa pueyajuhuj. Canaari nia saruhuataani pueyanaa. Taucuaca nia quishacari, naajaa. Jesuucua tiuuniaa nia quishacari, niaari canaa tapueyocucajuhuj, tiqiyocua Antioquiya tiacajinia quijia, Siria jiyajinia quiniaano, Cilicia jiyajinia quiniaajuhuj. ²⁴ Canaari nijaniyajiniji pohuataaarucuaani, niiquiji pueyanaari niaacua quiacanu. Canaa nia jiyanoori. Majaari canaa jiyaronu quiquianu nojori. Cuno pojoriniari nia taajetecanu tamaatia nojori niishitiojosacari

nijaniya. Naajuhuj, nia cushiticonuuri nojori sequesacari nia cararaatiuuquia co nia miatejonura taa Moisés niishitiojoquaaricuaajani. Nojoriniia nia shiniujuquianu nia tojtianura socua Moisés Rootasanojuhuaj. Quarijia maja naate pueyanaa. ²⁵ Naaratej, saa jiyareta canaajaari niya rerejoreeni canaa niishiriojonura canapue canaa saquiriojonutaniyani niaacua jiyaramiqushocoriquiano. Canaari nojori saquiriojoree tarini canaa jiyarosocoriquiano Pablota, Bernabeetani, nojori poccojoriquiano maninia niaata. ²⁶ Canaa panishano pueya Pablo, Bernabeenio, nojoriiri tama na cuaqueya panitiquiaarijiaaja Jesujiniji nojori pahuatasacari tiquiyocua. ²⁷ Quarijiani, canaari niaacua jiyaroya canaajiniinio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miiniutianiyani, naatej, taa canaa poccojoree canaa rerejosacariicuaajani. ²⁸ Canaa niishiriojosanoori maninia quiya Pueyaso Sohuanura. Canaari na shuquiritiaajuhuj. Majaari canaa cushitonu paniniu nijaniya puera canaa supuetanaa niishitiojosanota najuhanaj. ²⁹ Canaari saaja nio nia sequenu paniyani pueyanaa. Nia tojtiare. Majaari socua nia miaquenu shipinijosano pueyasohuacuara puecoosano casaa. Majaari nanaca miaquenu. Naajuhuj, niaa jaara shu miaquenu paniri, nia miaquere maninia na nanaca caatinijiasano. Naajuhuj, saaja nia niquicohuata nia quiriquia. Majaari socua tamonu numuetucunu. Niaa jaara nio tojijia quiri, niaari maninia miyacuaja. Tariucujaja pueyanaa”.

³⁰ Naacujitij, cuno cuatro pueyari jiyarosaaquiaari Jerusalén tiacajiniji. Jaara tiuquijioquiaari Antioquiya tiacajinia, nojoriiri puetunu Jesuucua tiuuniaa pueyanaa numootejoquiaari na rerejonura. Puetunu nojorijianaa jaara tari rerejoquiaari, jiyacari niqutiosaaquiaariiri cunu naajione puetunu nojori niquiarajanaa serosocoriquiano. ³¹ Naajione jaara serojosaaquiaari, puetunu Jesuucua tiuuniaa taucacajanaari shuquiriquiaari jyanohua. Naacujitij, nojoriiri noojia cajitiquiaariuhua tacaquoyano juucua. ³² Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jiitiaquiaari, Pueyaso sequenu panishano nojori caminiujuniuria. Naacujitij, nojoriiri Jesuucua tiuuniaa pueya cumanjiaquiaari jyanohua. Na rootatuquiaariiri maja nojori tarinitianura Jesuucua tiuuniu. ³³ Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacariuhua Jerusalén tiacajiniuhua na jiyaronaacua, Antioquiya tiacajinia quiniaa Pueyaso pueyari nojori sequequiaari:

—Maniniacuaja. Juhujaniya nia quiaarohuaqui.

³⁴ Silasri saaja na cojiniaacuaji jateequiaari cuniquijia Antioquiya tiacajinia. Naacujitij, Judasri tamajaaja tatequiciaariuhua Jerusalén tiacajiniuhua. ³⁵ Pablo, Bernabeeri Antioquiya tiacajinia camueenujuquiaarijuhuaj. Nojoriiri cuniqui Jesuucua tiuuniaa pueya niishitiojoquiaari. Queraatia cuniquijinio pueyari nojori rupuequiaari niishitiojonurajuhuj. Puetunu nojorijianaari Jiyaniijia Jesujiniji pahuataquiaari tamasaca niquiarajuhuj.

Pablo pacutenu panishacariuhua quianu Pueyaso pueya na niquiniuhua

³⁶ Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocuara socua niquiniuhua, paa tii pahuatacanu Jiyaniijia rupaatej. Naa pa miiri pa niishiniuria taa parta Jesuucua tiuuniaa pueya quiyani.

³⁷ Bernabeeri na riucaaree:

—Jajaa. Juan pa riyarecuarajaj, pa tarajariquiano.

Juan sesaari Marco quiquiaarijuhuaj. ³⁸ Majaari Pablo paniniu quiquiaari Juan quianura nojoritia. Nocujia Bernabé sequequiaariiri:

—¿Paatucua casaara rupoyare pocua Marco saajaraniuhua? Nojuacuajaari pa tiujuquiaariuhua Panfilia jiyajinia pa quishacari. ¿Pueyaso rupaa pa pahuatasacari pa tarajacanu maniniatucua? Naacuajaa.

³⁹ Saa nojorijiaari socua juayonuutaquiaari Juan Marcoocua. Nocujia Bernabeeri jiyacari Pablocuajia rupatequiaari. Na rupatesacari na rupena Pablojiniji, nojuajaari Juan riquiaari cutara na tarajariquiano. Jiyacaritij, tama nojorijiaarijia buquejinia quiaquiaari Chipre jiyajiniara. ⁴⁰ Pabloori saniniuuja Silas saquiriojoquiaari na tarajariquiano. Nojori quiaaquishacarijia, Jesuucua tiuuniaa pueyari nocuara Pueyaso secojotuguiaari. Naa na miitiuniu nuhuajitij, Pablo, Silasnio, nojoriiri panaatia quiaquiaari cutara Pueyaso rupaa pahuatanura. ⁴¹ Nojori quiasacari Jesuucua tiuuniaa pueya shiniujuuiucua, Siria jiyacuma tajitiumiaquiaariiri, Cilicia jiyacumano. Pabloori cuno jiyaca tiacajinia socua poojotaquiaari Jesujiniji. Naa cumaquiquiaari Jesuucua tiuuniaa pueyari.

¹ Pabloori Silasta tiuquiijoquiaari Derbe tiacajinia, Listra tiacajinianio. Tii riuritatatquiaari Timoteo jiyannishano pueyanoori. Cuno mashajaari Jesuucua tiuuja pueyano quiquiaari. Na nucaari Judio maaji quiquiaari, Jesuucua tiuunijuhua. Timoteo queeri tahue quiquiaari cutara. ² Listra tiacajinia Jesuucua tiuunaa pueyari Timoteo maniniucuatujua. Naa sequetujuaari nojori: “Timoteori jiyano hua maninia pueyano”. Iconio tiacajinijinio Jesuucua tiuunaa pueyari naa sequetujuhua. ³ Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiuquia co miatetequiaariiri, cuno jiyajinia quiniaa Judiucuaa soojotanuucujaji nojuaja. Puetunu pueyajanaari na niishijia, na queeri seetanujanaa tahue quijia. Nocujaji naa miishaareeri. Na nuhuaji, Timoteo cutaraari Pablo cojiquiaari. ⁴ Pabloori Jesuucua tiuunaa taucaaca niquiquiaari puetunu tiacajinijanaa. Nojori niqiuara caminiujuquiaari Jerusalén tiacajiniji Jesu jiyaramiquishano pueya sequesano nojoriiaari, mariyata Jesuucua tiuunaa pueya jiiitanaa sequesanojuhua. ⁵ Naa Pablo caminiujushacaritij, puetunu Jesuucua tiuunaa pueyajanaari socua nojia cumaquiquiaari jiyano hua. Tamasacaari socua Jesuucua tiuquiaarijuhua. Jesuucua tiuunaa pueyari naa canequiaari socua. Naa caneriquiaa puetunu juucajanaari.

Pueyaso Sohuanu tosacari Pablo, Macedonia jiyajiniara na quianura

⁶ Na nuhuaji, Pueyaso Sohuanuuri Pablo tenujuquiaari maja nojori pohuatanura Jesujiniji Asia jiyajinia. Naacuajitij, nojoriiri Frigia jiyacuma quiojoquiaari, Galacia jiyacumanio. ⁷ Naa tiuquiijoseequiaari Misia jiya shuricuaari. Nojoriiri cuniquiji quianu paniquiaari Bitinia jiyajinia juucua. Naajuhua, majaari Pueyaso Sohuanu paniniu quiquiaari tii nojori quianura. ⁸ Cunora, Pabloori na cojiniaata cuaniquiaari Misia jiyacuma. Troas tiacajinia tiuquiijoseeri. Nio Troas tiacaari shoniniacu caminia casaqueyaji quiya. Tiiri buque tiuutiacojua. ⁹ Pabloori cuno niucua juhua na maquenujini niquiquiaari Macedonia jiyajinijinio pueyano nocua nujaano. Cuno pueyanoori Pablo sequequiaari: “¡Miji! Canaa quia naacutaquee Macedonia jiyajinia”. Cuno Macedonia jiyari quiquiaari shoniniacu caminia taquijiria. ¹⁰ Naa Pablo niqiniu nuhuaji juhua na maquenujinatej, canaari jiyacari ritia pajequiaarini taa canaa quianunijia cuniquijini. Canaari sequereeni:

—¡Pa quiaarequij! Pueyasocujaari pa panitiaa Jesujiniji pa pohuatanura cuno pueya niqiarajuhua.

Pablo quishacari Filipo tiacajinia Silasta

¹¹ Canaari Troas tiacajiniji quiaquiaari buquejiniani. Canaari Samotracia jiya tucuaatijaacua tiuquishiini. Canaari cuniquiji sanequiaari tariquiniuhua, tiuquishiiri Neápolis tiacajinia. ¹² Canaari cuniquiji quiamaa Filipo tiacajiniani. Filipo tiacaari socua panishano tiaca quiquiaari tamasaaca tiacajiniji Macedonia jiyajinia. Roma tiacajinijinio pueyari tii pacuquiaari tarijia. Nojoriiri cuno Filipo tiaca jiyatequiaari nojori quiquiaari. Canaari tii camueenujuquiaari rupaquijiani. ¹³ Cuniqui canaa quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jiiitiquiaari Pueyaso seconjura. Canaari tii narejashiquijia cajituuquiaari mariyatani. Jiyacaritij, maajipohuari cuniqui rerejoquiaari na seconjunura juucua. Canaari saaja nojori niqiuara pohuataree Jesujinijini. ¹⁴ Cuniqui maajipohua rerejosaquini, nojori tajinia quiquiaariiaariuhua tamonu maaji. Na sesa quiquiaari Lidia. Nojuajaari Tiyatira tiacajinijinio quiquiaari. Shanohua quenaaruqueya naatuque toqueya niqitiojojua quiquiaari na cumaneecaraari. Nio maajiri tarijia Pueyaso seconjua quiquiaari. Tii na quishacari, Pablo pohuatasano tojiriquiaari. Pueyasoori jiyacari na tojeteree. Juhua nojia riatareeri seetanujanaa Pablo pohuatasano na tojinuria maninia. Jesuucua tiuuriiri. ¹⁵ Na nuhuaji, Lidiaari puetunu na tajinia quiniaatajanaa tiuquunijiosaquiaari moojinia. Canaa tiuquunijionu nuhuaji puetunu nojorijanaa, Lidiaari canaa sequequiaari:

—Niaa jaara cucujaji taacanuyaquiri, miji, nia quishii cua tajinia. Janiyari pa Jiyaniijia tojijiajuhua.

Nojuajaari seetanujanaa canaa panitiaquiaari na tajinia canaa quiniuria. Naacuajitij, canaari na tajinia camueenujuquiaarini.

¹⁶ Tamonu juuca, socua canaa pacutesacari quianu pueya seconjunuuajiniara, canaari samaruraca niyacoo niquiquiaarini. Cuno niyacoori camaruhuaraca quiquiaari. Niyacoori “niishijia samaru” jiiitaja. Naaratej, cuno niyacoori puetunu pueya niishiniu panishanojuanaa pohuataja nojoriira. Naa na miishacaritij, na camaruhua maseja queraatia cumaneecaari. ¹⁷ Cuno niyacoori canaa nuhuaji sacuariquiaa. Naa nacariquiaa canaa na nuhuajishacariiri:

—¡Nio canuu cutaraari jiyocuaanuji Jiyaniijajiniji pohuataanaa! Nia niishitiojiyari Pueyaso jiyanooshano nia quiniuria, pueyaracaanu nia rishiniuria nata.

¹⁸ Saa naa canaa nuhuaji nacajaari, cuno tiacajinia canaa camueenujusacari. Pabloori socua na juaatiaquiaari. Nocua tacatequiaariiri. Cuno niyacoojinia quijia samaru sequereeri:

—¡Janiyari Jesucristo sesajinia quia jiyaroyani! ¡Cuno maajijiniji quia tohuatare!

Naa Pablo sequesacaritij, samaruuri na tojiquiaari. Ritia tohuataquiaari cuno niyacoojinijiiri.

¹⁹ Cuno niyacoo camaruhuari niishiquiaari maja tari nojori masenu quiniutianiya socua cumaneeca juhua coteenu, niyacoo pohuatasanojiniji. Naaratej, nojoriiri Pablo, Silas quiooquiaari na juaaniutia. Nojori jaatucunuquiaari tiaca jiuujiajinia curotasano pueya cajitiucujiniaraari. Tiaca jiyaniijianucuaari tii quijiaa pueyaracaanu, nojori jitianura pueya. ²⁰ Niyacoo camaruhuari Pablo, Silas nujuatejoquiaari tiaca jiyaniijianucua tajoji, cuniqui na nequesoreesaanura. Jiyaniijianucua sequiteeri:

—¡Nio canuuri Judiocuaa! Nojoriiri niya pa tiacajinia quiniaa pueya juaatijiose.

²¹ Nojoriiri tamaatia niishishano niishitiojonuya. Maja cumaati pa tojinunioj. ¡Paari Romano pueyani!

²² Naacuajitij, puetunu cuno pueyajanaari na juaaniutia, Pablo, Silas cosequiaari ritia. Jiyaniijianucuaari nojori toqueya jaamitiquiaari jyanohua, na jocojosacari nojorijiniji. Na nuhuaji, tamasaari seeratsaaree nojori na mojoonura macata. ²³ Jyanohua na mojoosaanu nuhuaji, nojoriiri socua na tiuquinijioquiaari nujuatejojuajinia. Na nuhuaji, nujuatejojuua tia camarnu seeratsaareeri maninia na cojuatenura nojori nujuatejojuajinia. ²⁴ Naacuajitij, cuno nujuatejojuua tia camarnuuri Pablo, Silas nujuatejoquiaari socua mij, nujuatejojuua cariquimiatej. Cuniqui nujuatejosaaquiaariiri tii na cojuasaanura maninia, na mashyocuatunuucuaaj. Nojori cashacucuaari suruhuatuneeca quejasano tajiniocoma saatijiosaaquiaarijuhuaj.

²⁵ Cuno niucua shiyaqueya, Pabloori Silasta Pueyaso secojonuuriquiaajaa. Pueyaso maninihuaqueetaturiquiaari na jaaquequejosanota. Cuniqui nujuatejosano pueyari nojori tojtariquiaa. ²⁶ Jiyacaritij, rijiaari canashiyaquiji jiuuquitiuquiaari jyanohua cuno nujuatejojuua tia. Puetunu na tiotiuhujanaari riateguequiaari. Puetunu pueya numatucuaacua morojotasano casaajanaari tamajaaja saacarejetaquiaari. ²⁷ Nujuatejojuua camarnuuri ritia niucuaquiaari. Saaja niquirii puetunu tohuateya riateguenojuanaari. Cunora, na nijiniaquetucuaaja mueruu shitiaree ritia na shuucujijiir tama na cuaqueya na mianquenurajaaja. Naa miiriiri na jyanishacari puetunu nujuatejosano pueyajanaa naasucuaari tari mashyocuatunee. ²⁸ Pablo jaara na niquiquiaari, nocua nacareeri:

—¡Maja najuhuaana naa miiniutij! ¡Canaacuaajaari puetunujuanaa niya quiyani!

²⁹ Nujuatejojuua camarnuuri na shiriquiniutia tetecariquiaa. Tamonu sequereeri ritia samaritiu na patanura nocua. Samaritiu caaniuji netequee cutaraari nujuatejojuua jiniacumara. Pablo, Silas cariquimijiji mojoquetaseeri. ³⁰ Jiyacari nojori tohuatejoree carijiniacumaari. Nojori nequesotareeri:

—¡Pueyanaa! ¿Taa cua miyarinjia, Pueyaso jiyanooshano cua quiniurijahuaj?

³¹ Nojoriiri na riucaree:

—Jiyaniijia Jesucristoocua quia tiuuri jiyanooshano quia quiniuria, puetunu quia tiajinia quiniaa quiniuria jiyanooshanojuhuaj.

³² Naaratej, Pabloori Silasta na niquiara pohuataree Pueyaso rupaa Jesujiniji, mariyata puetunu na tiajinia quiniaajanaa niquiaranio. ³³ Jiyacaritij, nujuatejojuua camarnuuri cuno niucuaaja Pabloocua jiyanoocuaari, Silascuanio. Nojori cuaqueya majacyashiquia jeequejoreeri. Na nuhuaji, puetunu cuno pueyajanaari ritia tiuquinijiosaaquiaari moojinia Jesuocua nojori tiushacari. ³⁴ Jiyacari na tiajinia nojori jiyataquiaariiri. Tii Pablo, Silas mianuutereeri. Cuno nujuatejojuua camarnuuri jyanohua shuquiriaatia quiriquiaa puetunu na tiajinia quiniaatajanaa, Pueyasocua tiuuniaa nojori quishacari.

³⁵ Cuno tariqui, Filipo tiaca jiyaniijianucuaari na seya jiyaroquiaari nujuatejojuua tia camarnuucua, na sequenura nojuaja cuara Pablo, Silas tohuatanijioora tari. ³⁶ Nujuatejojuua camarnuuri Pablo sequesee:

—Tiaca jiyaniijianucua cucua jiyaree na rupaani, cua cartenura quiarijia nijajaniya. ¡Juhujaniya nia quiaarohuaqui!

³⁷ Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano pueyajuhua? Canaa mojooturiquiaacuaa puetunu pueya niquiarajanaari. Majaari coteenu canaa nequesoreesaanu quiriuucuaa. Canaari jiyanojuua nujuatejosaarucuaani. ¿Taa na miitiuniu paniya quiarijia canaari, jiyasohuaa tohuatejonu paniniu? ¿Jiyasohuaa mojooturiquiaacuaa canaatu-cuaa? ¡Nojorijianaa cuara niiria quiarijia, niiquiji nojori tohuatejonura canaa!

³⁸ Jiyaniijianucua seya jaara tacatequiaariuhua, puetunu Pablo sequesanojuanaa pohuataquiaari Filipino tiaca jiyaniijianucua niquiaraari. Nocuaji jiyaniijianucuaari puere-tuquiaari nojori niishishacari Pablo, Silas Romano pueya quiquiaarijiuhua. ³⁹ Naaratej, cuno jiyaniijianucuaari ritia quiaquiaari nujuatejojuajinia Pabloocua, Silascuanio, nojori jiyanoootionura. Jiyaniijianucuaari nojori tohuatejosee. Nojori sequereeri cuara quio-joora quenaaja nojori tiacajiniji. ⁴⁰ Naacuajitij, Pablo, Silas jaara tohuareetaquiaari nuju-atejojuajiniji, Lidia tiajinia quiojoquiaariiri. Tii rootatuquiaari socua Jesuucua tiuuniasa pueyari, socua Pueyasocua nojori tiuuniuria. Na nuhuaji, tiji quiojoquiaariuhuari.

17

Tesalónica pueya juaashacari Pueyaso pueya

¹ Pablo rucuanajosacari Silasta Jesujiniji nojori pohuatasacari, nojoriiri jiyacari shoconujutuquiaari Anfipolis tiaca, Apolonia tiacanio. Naa tiuquijioseequiaari socua Tesalónica tiacajiniaari. Cuno tiacajinia quiquiaariiri Judiocuaca rerejojuia tia. ² Taate Pablo quijiacuajani, nojuajaari narta Judiocuaca rerejojuia tiajinia quiaquiaari. Cuno tiacajinia na quishacari, jiuujianaraca semaana shocotejoquiaariiri. Puetunu semaana shocojosacarijianaa, samaatenu juuca, cuno pueya niquiara pohuataquiaari Pueyaso rupaari. ³ Pabloori nojori niishitiojoquiaari taa tariucuacaanu Pueyaso sequesano camini-ujuniasa naajiotaquiaari Pueyaso Jiyarosocoriquianojinijicujani. Niishitiojoquiaariiri cuno naajiotasanoori tari tohuateequiaari Jesu jaara naquiya miishaaquiaari, naajuhua, Jesu jaara na cusunu nuhuaji samiitiaquiaariuhua. Naa nojori sequereeri:

—Nio Jesucujani, janiya nia pohuataani, nojuajaari Pueyaso Jiyarosano pocua.

⁴ Jiyacaritij, noojiaqueya Judiocuacaari Jesuucua tiuquiaari. Queraatia taucuaacari Jesuucua tiuquiaarijiuhua, canapuete tari Moisés niishitiojosano tojijiaa quiquiaar-icujani. Queraatia cuno tiacajinia quiniaa pueya tojishano maajipohuari Jesuucua tiuquiaarijiuhua. ⁵ Pueyasocua tiyashijiaa Judiocuacatej, nojoriiri juaaquoquiaari juhua shocotasano nojori quiniucua. Nocuaji, nojoriiri sesa miijiaa taajecori masu-unujuquiaari. Nooj, nareja rucoojuaca tiacaacacotej. Cuno pojoriiri masuusaquiaari nojori na cojinuria, tamasaca nojori nasojonura. Na nuhuaji, puetunu cuno pojori-jianaa jaara tonujutooquiaari taa na miitiuniutianiyani, nojoriiri puetunu cuno tiacajinia quiniaajanaa juaatiquiaari Pueyaso pueyacuara. Nocuaji, puetunu cuno pojorijianaari Jasón tiaco tiuquitiaquiaari, Pablo, Silas nojori quioonura juuca, juaaquooyano pueya nojori niqutiosocoriquiano. ⁶ Nojori jaara na riuritaquoquiaari, noojiaqueya Jesuucua tiuuniasa pueyari Jasóna cojiritiasaquiaari quioonu. Cuno tiacajinia jiyaniijiaacuaa na jayotuquiaariiri. Naa nacatureeri:

—¡Nio canuuri puetunu jiyacajinia pueya sesojijajanaa! ¡Niya tiuquijioreejaariuhua naa na miiniurijuhua! ⁷ ¡Jasónri nojori masecanu maninia na tiajinia! ¡Puetunu nojori-jianaari pa jiyaniijia César sequesano tojitiaashijiaa! ¡Nojoriiri saaja sequequiaa socua tamonu jiyaniijianaari quiya! ¡Na sesanaari “Jesu”! Naa sequetuquiaaqui nio pojori.

⁸ Puetunu pueyajanaa, mariyata tiaca jiyaniijianucuanio, nojori jaara naa tojiquiaari sequeshiyantej, nojoriiri juaaquoquiaari. ⁹ Jiyacaritij, tiaca jiyaniijianucuaari queraatia cumaneeca masequiaari Jasónjiniji, narta Jesuucua tiuuniasa pueyajinijinio. Naa seque-ture nojoriiri:

—¡Pablo jaara niiquiji quiaaquiri, majaari canaa niqutionu quiniutianihua nia cuma-neeca!

Naa na miishaanu nuhuajitij, Jasónri nata quioosano pueyata carteqesaaquiaariuhua.

Berea tiacajinia Pablo quishacari Silasta

¹⁰ Cuno niucuaa, cuno tiacajinia quiniaa Jesuucua tiuuniasa pueyari Berea tiacajiniasa mashiquiaari Pablo, Silasno. Berea tiacajinia na tiuquijiosacari, cuniqui quiniaa Judiocuaca rerejojuia tiajinia quiojoquiaariiri. ¹¹ Cuniqui quijiaa Judiocuaca cutaraari maninia pueya quiquiaari, maja juhua Tesalónica tiacajinia quiniaa. Naacuajitij, Pablo jaara Jesujiniji pohuataquiaari nojori niquiara, nojoriiri maninia tojitiaquiaari na pohu-atasano. Na nuhuaji, puetunu juucajanaa, tama nojoriijaarijia tariucuacaanu Pueyaso Rupaajinia naajiotasano pajenuquiaari, nojori niishiniuria seetanujuaanaa quiriquiaate Pablo niishitiojosano. ¹² Naacuajitij, queraatia Judiocuacaari Jesuucua tiuquiaari, quera-attia taucuanio, canuu, mariyata queraatia tojishano maajipohuanio. ¹³ Tesalónica tiacajinia quiniaa Judiocuaca jaara niishiquiaari Pabloori Berea tiacajinia Pueyaso rupaa

pohuataseecuhuj, nojoriiri nocua quiojoquiaari nojori taanuunura nojuaja cuniquijiji-uhuj. Na tiuquijiosacari Berea tiacajinia, cuniqui pueya nasojooseeri, Pablo na juaatiuni-uria. ¹⁴ Nocuaji, Jesuucua tiuuniaa pueyari cuniquiji ritia mashi quiquiaari Pablo shonini-acu caminiyajiniara. Silasri Timoteota Berea tiacajinia jateequiaari saaja. ¹⁵ Berea tiacajini-jinio pueyari Pablo mashitiaquiaari, nuu na niishitiniuria. Nojoriiri Pablo jiyataquiaari Atenas tiacajiniara. Nojoriiri cuniqui jataquiaari Pablo. Cuno pojori jaara tacaretanu paniquiaariuhua cuniquiji Berea tiacajiniuhua, Pabloori nojori sequequiaari:

—Niocua ritia jiyarosuhua Silas, Timoteonio. Nojoricua niyaja cua coquesee.

Pablo quishacari Atenas tiacajinia

¹⁶ Pabloori Silas, Timoteo sashiquiaari Atenas tiacajinia. Cuno tiacajinia na rucanejosacari pueya na sashishacari, Pabloori niquiquiaari tama cuno pueya shipinijiosanojuaja na pueyasohuara. Nojori shipinijiosanoori puetunu cuno tiacajinijanaa quiriquiaa. Pabloori cunora jiyanojua taciaquiaari. ¹⁷ Pabloori Jesujini Judiocuaca poojotaquiaari nojori rerejonuujua tiajinia, noo pojori taucuaajuhuj, canapueye Pueyaso tojtiajaca quiquiaaricujani. Naajuhuj, Pabloori cuno tiaca jiuujiajinia pueya cajituu- cuara curotasanoinia pohuataquiaari Jesujini cuniqui quiniaa niquiara. ¹⁸ Tamasaca niishijiaaari Pablo pohuatasacari Jesujini tojtiaariquiaa. Nojoriiri caapiqui maapuejini-jinio quiquiaari. Tamonu maanuuri sesojosaaquiaari “Epicureohua”, Epicuro jyanishano niishijia niishitiojosano tojtiajaca nojori quiniucua. Tamonu maanuuri saniniuujia sesojosaaquiaari “Rejeretajaca”. Naa sesojosaaquiaari Zenón jyanishano niishijia niishitiojosano nojori tojiniucua. Pablo pohuatasacari nojori niquiara, nojoriiri maja na niishituniu quiquiaari casaa na pohuatariquiaani. Nocuaji tama nojorijiaarjia seque- tooquiaari:

—¿Casaariquitijia cuno paateca pohuataa pajaniyatejaj? Najuhuana pocuaa pueyara- caanuuri.

Tamasacaari saniniuujia sequetuquiaari:

—Tamasaca pueyasohujajini poojotana juhuanaruhua.

Nojoriiri naa sequeriquiaa Pablo pohuatanucua Pueyaso rupaa Jesujini, mariyata taa cusununo samiiaticonatunihua. ¹⁹ Na nuhuaji, nojoriiri Pablo jiyataquiaari tuhuananujini, tee nojori jiiatiquiaari rerejonuunucujani. Cuno tuhuananu sesaari quiquiaari Areópago. Nojoriiri naa sequetuquiaari Pablo:

—Miji. Socua canaa tojishocoriquiano quia pohuataqueeruhuj. Canaari quia pohu- atasanoiniji socua maninia niishiniu paniyani. ²⁰ Quiaari jiyajeneta sequeriquiaa canaa niquiara quia pohuatasacari. Quarijia canaa quia tore maninia.

²¹ Puetunu Atenas tiacajinia quiniaa pueyajanaa, mariyata tamonu jiyacajinijinio cu- niqui quiniaajuhuj, nojoriiri maja socua tamonu casaa na miituniu quijia. Saaja quiarinio sequesanojiniji niishituniu panijiaaari.

²² Jiyacarij, Pabloori Areópagojiniji nujuaquiaari na pohuatanura na tojtianu panijiaa niquiara. Naa coteereeri:

—Atenas tiacajinia quiniaa pueyanaa, janiyari quarijia niishiyani, niaaqui pueyasohu- acua jiaatijaca jyanohua. ²³ Janiyari naa nia sequeyani pueyanaa, cua niquniucua queraatia nia shipinijosano pueyasohua, cua rucanejosacari nia tiacajinia. Naajuhuj, janiyari saajiajiniji nia shipinishano juhua juhuacutara niquiriucuaajuhuj. Nocua naajoori sequeya, “Niishishoo Pueyasora”. Cuno Pueyaso niaa na tojtiaquiaa na ni- ishyaquiniutiani, nojuajaari nio Pueyasocujaja janiya nia pohuataani.

²⁴ Cuno Pueyasoori nio jiya shipiniquiaaricujaja, puetunu pa niquishanojuanaano. Nojuajaari jiyocuaaanu camarnujuhuj. Nojuajaari puetunu tiquiyocujanaa Quijia. Majaari pueya tijasano secejoja tiajinia na quiniu. ²⁵ ¿Taa nia jiyaniyani pueyanaa, cutara Pueyasojanaate pa jiiitasano casamijiniji panijajuhuj? Maja. Nojuacujajari puetunu pa jiiitasanojuanaa shipiniquiaari puera. Pa rishiniuria, na Sohuanujini pa niqitioquiaariuhuj, pa rijiosocoriquiano paratunio.

²⁶ Pueyasoori niquriyatu pueyano shipiniquiaari juhuacatecara. Paari cuniquiji canequiaarini, puetunu jiyacajinijanaa pa quiniuria. Pueyasoori tarijia sequequiaari tee pueya quiniutianiyan. Sequequiaariuhuj taacari tii pa quiniutianiyan.

²⁷ Pueyasoori naa panitiaquiaricujaja puetunu jiyacajinia quiniaa pueyajanaa pajenura nojuaja. Pueyasoori pa saniya, na niishiniuria, ¿pueyate na pajenutianiyan pa riuriantanura nojuaja? Pueyasocujajari maja na quiniu tucuaaanu pajaniyajiniji. ²⁸ Pueyasoori pa samiiianiya. Pa cumaquiquiaaariuhua pa poonijionura. Pa rishitiquiaaariuhuj. Naatej, taa nia pohuatajaca sequequiaaricujani: “Paari Pueyaso muerasuni”. ²⁹ Paa jaara seetanujanaa Pueyaso muerasu quirini, majaari socua pa jyaniniu Pueyaso naasucuaari juhua orojiniji pa shipinijosano niquishano. Majaari juhua platajiniji shipinishano, juhua

saajiajiniji shipinishanonio. Pueyaso cutaraari maja na niquishaanu juhua tama pa niishiriojosanojuaja. Majaari na niquishaanu taa pueya shipinijioquiaacuaajani, nojori jiyanihacari Pueyaso naasucuaari naa niquishanotej. ³⁰ Pueyasocuaajaari pueya miiniu sesa rejeretariquiaa pueyaracaanu. Saniniuujia, nojuajaari quiarijia puetunu tiqiyocua quijiaa pueyajanaa sequeya, nojori cartenura puetunu sesa na miiquisosanojuanaa, saaja nojuaja nojori tojtianura. ³¹ Pueyasocuaajaari tari saquiriojoquiaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunujua-naari. Pueyasoori tari na saquiriojosano pueyano jiitiaa pa nequesoreeriquianojuhuaj. Na samitianishacari cuno pueyano macujiniji, nojuajaari naa pa niishitiquiaari, cunocua-jaari na saquiriojosano pueyano.

³² Nojori jaara tojiquiaari Pablo pahuatasacari taa macunucua samiitiaconutaniuhuani, cuno niishijiaacari na saroojotaquiaari na rerequetenuta. Tamasacaari saniniuujia Pablo sequequiaari:

—Canaacua tamacari quia tojiriirianiuhuaj.

³³ Na nuhuaji, Pabloori cuno pueya tajiniji quiaacuhua. ³⁴ Noojiaqueya cuno pueya-jinijinoori Jesuucua tiuquuaari, Pablo pahuatasano nojori tojtiasacari. Nojorijinijin-oori quiquiaari Dionisio jiyanihano pueyano. Nojuajaari Areópago niishijiaa pueya maanujinijinio quiquiaari. Jesuucua tiuquuaariiaariuhua tamonu maaji. Dámaris na sesa. Socua tamasa pueyari Jesuucua tiuquuaarijuhuaj.

18

Pablo quishacari Corinto tiacajinia

¹ Na nuhuaji, Pabloori Atenas tiacajiniji quiaquiaari Corinto tiacajinia. ² Cuniqiriuri-ataseequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasaacquiaari. Aquilaari necocua Priscilata shusha Italia jiyajiniji tiuquijiono quiriquiaa Corinto tiacajinia, tii Pablo tiuquishacari. Jiyacaritij, Claudioori jiyaniijia-janaa quiquiaari Roma tiacajinia, Italia jiyajinia. Nojuajaari puetunu pueyapue camar-nujuanaa quiquiaari puetunu jiyacajiniajanaa. Nojori jiitiaquiaari Roma tiacajinijiiri. Nojuajaari tama na tiacajinia pueyajaaja sequequiaari puetunu Judiocuacajanaa nojori taanuunura Roma tiacajiniji. Naaratej, Aquilaari necocuata quiaquiaari Roma tiacajiniji. Corinto tiacajinia quishiiri. Pabloori nojoriicua quiaquiaari nojoritia na pocojonura. ³ Aquilaari necocuata suhuoronuutaja toqueya cuspuenuujua quiquiaari juhua Pablo-juhuaj. Naaratej, Pabloori nojoritia quishi, mariyata na poonijionuunura tii. ⁴ Pabloori maja nareja na shocotenu quijia samaatenu juuca. Nojuajaari Judiocuaca rerejojua tiajinia rucanejojua. Tii nojori pahuataquiaari Jesujinijiiri, taucuaa niquiaranio, noo pojori canapueje Judiocuacaa jiyatesaaquiaaricuaajani, tariucuaaanu Moisés niishitio-josano nojori tojishacari.

⁵ Silas jaara Timoteuta Pabloocua tiuquijioquiaari Macedonia jiyajiniji, Pabloori jiy-acari coteequiaari puetunu juucajanaa Jesujiniji pahuatanura Judiocuaca niquiara. No-jori sequequiaariiri:

—Jesucuaajaari nia sashishano, Pueyaso Jiyarosano seetanujanaa pocua!

⁶ Judiocuaca jaara tojiquiaari naa Pablo sequesantej, na tojtiaaquiri saajaari nojori cuaracashitiniutia Pablo sequesano. Saaja juuaquioreeri. Sesa pocooreejaariuhuaj. Naaratej, Pabloori nojori niquiara na toque nuutojoquiaari, nojori niishiniuria Pablo tari nojori tiujiaarohua. Pabloori nojori sequequiaari:

—Majaari cucua nia tiutianu, Pueyaso jaara mijiria quiniaa saniitiore. Niaacuaajaari Pueyaso rupaa ruuretaquiaa saaja. Quiarijia taucuaacua quiaa cutaranijia, nojori cua pohuatanaa Pueyaso rupaa Jesucristojiniji.

⁷ Na nuhuaji, Pabloori cuno Judiocuaca rerejojua tiajiniji tohuataquiaariuhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quijia. Na taari jiyareta Judiocuaca rerejojua tia shuriucua quiriquiae.

⁸ Crispoori jiyacari cuno Judiocuaca rerejojua tia camaru quijia. Nojuajaari puetunu na tiajinia quiniaa pueyatajanaa Jesuucua tiuquuaari. Naajuhua, queraatia Corinto pueyari Jesuucua tiuquuaari Pueyaso rupaa nojori tojishacari. Naaratej, puetunu Jesuucua tiu-niaaajanaari moojinia tiuquinjiosaaquiaari. ⁹ Jiyacari tamonu niucua, Jiyaniijia Jesuuri Pablo sequequiaari na maquenujinia:

—Maja quia puerenu Pablonaa. Socua quia pohuatere cuno pueya tojishocoriquiano. Majaari sanaajenu. ¹⁰ Janiyacuajaari quiaata quiyani. Majaari quenaaja tamonu pueyano jiyashiniu quiniutaniya taa na miiniu paniniuria quiajaniya. Janiyari queraatia pueya nio tiacajinia jiitiaa cucua tiuuriquianoni.

¹¹ Naaratej, Pabloori Corinto tiacajinia jiyojequiaari. Tii na quishacari, quera shocojotequiaari caapiqui marijiaari. Cuniqiu na quishacari, Pueyaso rupaa niishitiojoriquiaa cuno pueyari.

¹² Jiyacaritij, Galión jiyaniishano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiriquiasejuhuj. Jiyacari, Judiocuacaari tii Pabloocuara rojotooquiaari. Na nuhuaji, na quiatuquiaariiri. Naa na jaatucutuquiaari cuno jiya camarnuucuaari, Pablo nequesoreesaanura. ¹³ Naa sequetusee camarnuuri:

—¡Canaa camarnunaa, nio pueyanoori pueya shiniujiya Pueyaso nojori shuquiritianura tamaatia canaa supuetana Moisés Rootasanojiniji!

¹⁴ Pabloori jiyacari juuca pocuanu paniriquiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocuacanaa, niaa jaara maninia miyashijiaa cucua jaatucure cutara, sesa miijiaa sequenio, janiya maara jiyano pueyanoochuara nia tonujusacari tojiri cutarani. ¹⁵ Naaari saaja tama nia niishishanojiniji juayonuutaajaacujua. Maja cua nequesoreenu quiniutianiya tama nia juayonuutasacarijiaaja nia sequesano tamasaca shaajeceno pueya sesacajiniji, tama nia supuetanaa rootasanojinijijiaajanio. ¡Tama nia jeecatoorejaaja!

¹⁶ Na nuhuaji, cuno camarnuuri nojori juaari. Na shuriucuaji na jiyaramiquiriohuari. ¹⁷ Naa Galión miishacari nojoritij, narta taucuacaari cuniquijiaa quiatuquiaari Sóstenes, Judiocuaca rerejojua tia cojuana. Na piqutiuri camarnu Galión niqiuara cuniquijiaari. Majaari Galión tenujunu quirii nojori. Nareja na niquiriquiaari.

Pablo riuujiushacariuhua Antioquiya tiacajiniohua. Na nuhuaji jiuujianaraca pacutequiaariuhua quianuuri

¹⁸ Pabloori cuniqui queraatia camueenujuquiaarijiaara Corinto tiacajinia. Tari na riuujiushacariuhua cuniquiji, na nuhuajiria saruhuataarohua narta Jesuucua tiuuniaa pueyari. Buquejinia quiaarohua Siria jiyajiniohuari. Na cojiriquiaajaari Priscila, neyaca Aquilano. Nojori tacataaquishacarijia buquejiniaacuma, Cencrea tiacajiniji na quiojonura, Pabloori jiyacari na naca riuujiuquiaari caritianajara. Nojuajaari Pueyaso sequequiaari tari, maja na naca na riuujiutiniu quiniutianiya nojuaja jaara na sequesano Pueyaso tucuataaquiri.

Cunora, naa quiarijia riuujiutirii na nacaari. ¹⁹ Nojori tiuquijiosacari Éfeso tiacajinia, Pabloori tii jatamaquiaari Priscila, Aquilano. Nojuajaari tajimiaa Judiocuaca rerejojua tiajinia. Cuniqui rerejono Judiocuaca pohuatasee Jesujiniijiri. ²⁰ Nojoriiri Pablo nenecojoquiaari juucua cuniqui na camueenujunurajaara nojoritia. Majaari Pablo paniniu quiquiaari. ²¹ Cuniqui quiniaa sequereeri:

—Quiohuanijia pueyanaa. Jerusalén tiacajiniara secohuanijia. Canaari tii rerejonutaniya Jesuucua tiuuniaa pueyatani. Pueyaso jaara paniri, janiyacua nia niquiniuria tacatemohuaraniuhuj.

Cuniquiji tacaquiaariuhua buquejiniaari. Éfeso tiacajiniji quiaarohuari. ²² Pablo tiuquishacariuhua Cesareya tiacajiniohua, cuniquiji quiamaa Jerusalén tiacajiniaari, puetunu Jesuucua tiuuniaa na saruhuatanurajanaa. Na nuhuaji, quiaarohua Antioquiya tiacajiniaari. ²³ Cuniqui tarishiquiaari pasajaari. Na nuhuaji, socua quiaquiaariuhua cuniquijiiri puetunu jiyacajinarajanaa. Quiariquiaari na niqiniuhuara Jesuucua tiuuniaa pueya Galacia jiyajinia, Frigia jiyajinianio. Pabloori nojori niqiuara pohuataquiaari socua Pueyaso rupaaajiniji. Jesuucua tiuuniaa nacasuquiaariiri maja nojori tarinitanura Jesuucua tiuunio.

Éfeso tiacajinia Apolo pohuatasacari Pueyaso rupaa

²⁴ Jiyacaritij, tamonu Judio pueyanoori Éfeso tiacajinia tiuquiquiaari. Alejandría tiacajinijio pueyano. Na sesaari Apolo quijia. Nojuajaari maninia Pueyaso rupaa pohuatana quiriquiase. Tariucuacaanu Pueyaso Rupaa naajiosano niishijia quiquiaarijiaariuhuj. ²⁵ Nojuajaari maninia niishitiojosaquiaari jiyaniijia Jesu niishitiojosanojiniji. Shitimia pohuataja pueya niqiuaraari. Maninia niishitiojojua Jesujiniji na pohuatasacarijiaariuhuj. Seetanujuanaa sequeja Jesujiniji puetunujuanaari. Maja cutaari na niishiniu quijia Pueyaso Sohuanute pueyano jiuujiajinia tiuquijia. Saaja moojinia tiuquinijionu niishiquiaariiri, taa Tiuquinijiona Juan niishitiojoquiaaricuani. ²⁶ Apoloori na puerenu jataquiaari tii na pohuatasacari Pueyaso rupaa narta Judiocuaca rerejojua tiajinia. Aquilaari Priscilata tii quiriquiaajuhuj. Apolo pohuatasano tojtariquiaari. Apolo jaara puecaquiaari pohuatana, nojoriiri tamocora na jaatucuquiaari na niishitiojonura taa pa jatanishaquiaa Pueyaso Sohuanutani, Pueyaso muerasu pa quiniuria cutara. ²⁷ Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuuniaa pueyari na cumaquiquiaari. Naajuhuj, nojoriiri Acaya jiyajinia Jesuucua tiuuniaa

pueyacuara naajioquiaari Apolo patasocoriquiano, maninia cuno pueya tojiniuria nojuaja na tiuquishacari tii. Jaara tiuquishiiquiaari Acaya jiyajinia, Apoloori Jesuucua tiuuijaca cumaquiuaari jiyanoehua, nojori na niishitiojosacari. ²⁸ Apoloori nojori niqiuara niishitiojoquiaari tariuacuacanua Pueyaso Rupaajiniji naajiotasano. Jiyanoehua maninia na niishitiojosacari Jesuuri seetanujuanaa nojori sashishano quiquiaari, naacuajitij Judiocuaca niishishano pataquiaariiri.

19

Pablo quishacari Éfeso tiacajinia

¹ Apolo quishacari Corinto tiacajinia, Pabloori saniniuuja Antioquiya tiacajiniji quiaquiaari nuuaco Éfeso tiacajiniara. Na quiasacari, tuhuananuhua shoconujuquiaariiri. Naa tiuquishiiquiaari Éfeso tiacajiniara. Tii riuriataquiaari Pueyaso pueya maanuuri. ² Pabloori jiyacari nojori nequesotaquiaari:

—¿Niaate Pueyaso Sohuanu tiuquiniquianu nioojiajinia, Pueyaso rupaacua nia tiuushacari?

Pablo riucatureeri:

—Majaari quenaaja canaa niishiniu quijia Pueyaso Sohuanute quiyajuhuj.

³ Pabloori nojori sequequiaari:

—¿Casaara nia tiuquinijiosaacanucaraarini?

Nojoriiri na riucuaquiaari:

—Canaari tiuquinijiosaacaqiaarini taa Tiuquinijiona Juan niishitiojoquiaaricujani.

⁴ Pabloori nojori riucuaaree:

—Taaquiriirini. Tiuquinijiona Juancuaaquinateja pueya tiuquinijioquiaarijiaj, nojori jaara noojia tacatoquiaari sesa na miitiushanoinijia. Nojori sequequiaarijiaariuhuj: “Cua nuhuaji Niriquianoocua nia tiuuri”. Naa Tiuquinijiona Juan sequesacaritij, nojuajaari Jesucristojiniji sequeriquiaa.

⁵ Cuno pojori jaara Pablo pahuatasano Jesucristojiniji tojiquiaari, nojoriiri socua tiuquinijiosaacaqiaariuhua Jesuucua nojori tiuushacari seetanujuanaa. ⁶ Naacuajitij, Pablo niasacari na juaashiquia nojori nacaacua Pueyaso na secojosacari, Pueyaso Sohuanuuri cuno pojori jiuujiajinia tiuquiquiaari. Naacuajitij, nojoriiri niishishoo rupaacajinia pocooere. Naajuhuj, Pueyaso Sohuanu niishitiojosano Pueyasojiniji pahuatanuquiaariiri. ⁷ Cuno pojoriiri doce canuu quiquiaari.

⁸ Pablo quishacari cuno tiacajinia, nojuajaari tii shocotejoquiaari jiuujianaraca raca. Jiyacari, puetunu samaatenu juucajanaa quiaja Judiocuaca rerejojua tiajiniaari. Tii pahuataja Pueyaso rupaa pueya niqiuaraari. Naajuhuj, nojori niishitiojojuuuri taa Pueyaso jitianutaniya pueyaracaanu Jesuucua tiuninaa pueyani. Pueyari na tojitiaquiaari maninia, na pueyeraquiniutia na niishitiojosacari. ⁹ Noojiaqueya cuno pueyajinijinoori saaja ruuretaquiaari Pueyaso rupaa. Na rerequetequiaari saajaari. Sacuaraatia pocooquiaari Jesu rupaajiniji pueya niqiuaraari, Jesuucua nojori tiuuniu paniaquishacari. Nocuaji, Pabloori saa jiyareta Jesuucua tiuninaa pueya jiyataquiaari cuniquiji, tamaquiria serojonuuja tiajiniaari. Tirano jyanishano pueyanoori cuno serojonuuja fia camaru quiquiaari. Pabloori cuniqui puetunu juucajanaa niishitiojojuua Pueyaso rupaa Jesuucua tiuninaa pueya. ¹⁰ Caapiqui marijaari socua Pablo shocajoquiaari tii na poojotasacari Pueyaso rupaa Tirano serojonuuja tiajinia. Naacuajitij, puetunu Asia jiyajinia quiniaa pueyajanaari Pueyaso rupaajiniji caminiujushaaquiaari, Judiocuaca, taucacajuhuj. ¹¹ Pueyasoori jiyacari Pablo cumaquiuaari jiyajeneta casaa na miiniuria Pueyaso cumaacata. ¹² Naacuajitij, pueyari Pablo paneyaca tuujutaqueya rijioquiaari, Pablo cooshano toqueraacuano. Cuno pueya jaara na cusosuhacuua niojoquiaariuhua cuno toqueraacua, ¡cusosuhuari naatacoquiaariuhua! Naajuhuj, samaruuari tohuareetaquiaarijuuhuj, samaruhua jiitiaja pueyacuaji.

¹³ Tamasaca Judiocuacajinijinoori quiriquiaajuhuj, pueyajiniji samaruhua tohuatanijojua. Nojoriiri puetunu tiacajinijanaa rucojojuaca quiquiaari. Jiyacaritij, nojoriiri juhua Pablo miiniu paniquiaarijuuhuj. Juucua naa sequetuquiaari samaruuari:

—Pablo pahuatasano Jesu sesajinia nia sequeyanijia: “¡Nio pueyanojiniji nia tohuareetare!”

¹⁴ Naa miijiaacari siete canuu quijia. Nojoriiri Esceva jyanishano pueyano niquiohua quiriquiaa. Escevaari pueyacuara secojonaa camarnu quiriqiuasejuuhuj, Judio pueyanotuhuj. ¹⁵ Cuno pojori jaara saniquiaari juucua Jesu sesajinia samaruhua tohuatanijonura pueyanojiniji, samaruuri saaja nojori riucuaquiaari:

—Jesu niishiyacuajanjia. Janiyari Pablo niishiyajaniuhuj. ¿Canteerini nijanyanijia, naa nia sequenura janiyatej?

¹⁶ Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiiri juhua-sunucua, jiyareta naatiquishanojuhuaj. ¹⁷ Puetunu Éfeso tiacajinia quiniaa Judiocuacajanaa, mariyata tii quiniaa taucucanio, nojori jaara niishiquiaari naa miishanojinijitij, jiyanohua pueretuquiaariiri. Naacuajitij, puetunu Éfeso tiacajinia quiniaa pueyajanaari sequequiaari:

— ¡Jesuqui seetanujuanaa Jiyaniijiajanaa cutara!

¹⁸ Naajuhuj, queraatia Jesuucua tiuuniaa pueyari nijioquiaari, tarijia sesa na itiushano pohuatanura puetunu pueya niquiarajanaa. ¹⁹ Naajuhuj, queraatia pueyari juhua shimiacuro miijiojuaca quiquiaari. Nojoriiri na nequesoreetuneececa mueratejo-taquiaari. Cuno nequesoreetuneecejinaari serojosano quijia taate pueyano cumueeca shimiadura quiniuni. Na camaruhuari jiyacari puetunu cuno nequesoreetuneececajanaa patootaquiaari. Na catijiaquiaari puetunu pueya niquiarajanaari. Puetunu cuno nequesoreetuneececajanaa catijiasaaquiaarini, cunoori cincuenta mil platajiniji shipinijosano cumaneecata masenan quiquiaari. ²⁰ Naacuajitij, Pueyaso ruupaari socua cuna jiyajinia paaquequiaari, na cumaaca poonijosacari pueya jiuujiajina.

²¹ Na nuhuaji, Pabloori cuniquiji naqueretoquiaari Macedonia jiyajiniarajuhuj, Acaya jiyajiniarano. Cuniquiji ruujuuni paniriquiohua Jerusalén tiacajinihuaraari. Sequequiaarijiaarihuaj:

— Janiya jaara tiuquishuhua Jerusalén tiacajinihuani, janiyari Roma tiacajinia tajiriquianohuani.

²² Jiyacaritij, Pabloori na naacuna jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jyojequiaarijaara.

Éfeso pueya cushitiishacari na juaaquionuta najuhuanaj

²³ Pablo quishacari Éfeso tiacajiniaja, Éfeso tiacajinia quiniaa pueyari jiyanohua juaaquioquiaari Pablo niishitiojonuucua Jesucristojiniji. ²⁴ Naa quiquiaariiri. Demetrio jyanishano pueyanocujaari juhuacatecara narta pueya nasojoquiaari. Cuno pueyano, Demetroni, nojuajaari shiirijiaa tia platajiniji shipinijiojua quiquiaari. Cuno shiirijiaa tiacaari juhua nojori jyanishano pueyaso secojojua tia niquishano quiquiaari. Nojori pueyasoori maaji sesaanucua quijia, “Artemisa”. Na shipinijosano niqutiojojua na cumaneecaraari. Naacuajitij, Demetrioori nata poonijionaa pueyata queraatia cumaneecaraa quijia. ²⁵ Demetrioori jiyacari nata poonijionaa rerejotequiaari nojori nacootanura Pablo miishanojiniji nojori tiacajinia. Nojoritia rerejoquiaariiri tamasca pueya, casaa shipinijionaa platajiniji juhua nojoriujuhuaj. Puetunu cuno pueyajanaa jaara tari rerejoquiaari, Demetrioori nojori sequequiaari:

— Pueyanaa, niaacuajaari niishiya, paari puetunu pa panishanojuanaa jiitiaani pa niqutiojosacari pa cumaneecara pa shipinijosano. ²⁶ Quiarjiaa cuno Pablo jyanishano pueyanoni, nojuajaari queraatia pueya niishitiojquiaa, pueyano shipinijosano pueyasohuanaari maja seetanu pueyasohujanaa. Niaari na niquiriquiaacuaja naa na niishitiojosacari. Niaari na tojiriquiaajuhuj. Naacuajitij, majaari tari pueya masenu quiniutianiya pa shipinijosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejanaari na sequesano tojtiaajuhuj. ²⁷ Taa cua sequeyacuajani, pa shipinijosano jaara shocotesaare saaja, paari pa poonijosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetenutaniyaariuhuj. Nocuaji, majaari pueya nijionu quiniutianiya tari pa pueyaso Artemisa secojojua tajiniara, tii nojori seconura, naa cuna Pablo niishitiojonuucua pueyaracaanu pueyatej. ¡Naacuajitij, puetunu pa Asia jiyajinijinio pueya, mariyata puetunu jiyacajinijinio pueyapuejanaari pa pueyaso Artemisa rerequetejacara jatanutaniya! ¡Puetunu pueyapuejanaari naa niyajetanutaniya socua pa pueyaso Artemisatej!

²⁸ Cuniqui quiniaa pueya jaara tojiquiaari naa Demetrio sequesantej, nojoriiri jyanohua juaaquioquiaari. Naa nacoquiaariiri:

— ¡Pa timitiasano Artemisa cuara pueyaracaanu quiiira Éfeso tiacajinia quiniaa pueyaso!

²⁹ Naa nojori juaaquiosacaritij, puetunu cuna tiacajiniajanaa pueyari cushitiquiaari. Nojoriiri jiyacari quiooturee caapiqui Pablo cojiniaa pueya, Macedonia jiyajinijinio pueya. Nojoriiri quiquiaari Gayo, Aristarconio. Na jayoturee Éfeso tiacajinijinio pueya rerejojua tajiniaraari. ³⁰ Pabloori cuna pueya nacoosaqui tajinia tiuquini paniquiaari juucajuhuaj. Quera na pocuasee cuna pueya tajiniani. Jesuucua tiuuniaa pueyari saa na

cosequiaarijia na tiuquiyaquiniucuaaji. ³¹ Asia jiya camarucuaari na seya jiyaroquiaari Pabloocuaajuhuaaj. Camarucuaari coteenu naa sequequiaari na seya:

—Niocua Pablo sequesee, maja cumaati jaarajaaja na tiuquiniu pueya nacoosajaqui, mariqui mosaareeri.

Cuno camarucua na seya jiyaroquiaari nocuani, nojoriiri Pablo rupuenaa quijia. ³² Cuno nasojosano rerejono pueyari saaja cushitiiquiaari na juaaquionuta. Jiyanohua nacooreeri. Tamasacaari saniniuuja tamaatia nacooriqiaajuhuaaj. Jiyacaritij, tama cuno nojorijinijinio pueyari maja na niishiniu quiquiaari casaajiniji na nacooriqiaani. Secaja nojorijinijinoori na niishiquiaari cutara. ³³ Jiyacaritij, Judiocuacaari Alejandro jyanishano pueyano caponeequiaari pueya nacoyano tacoji na nujuatesocoriquiano. Cuniquijinio pueyajaari tii toquiaari Alejandro casaara pueya nacoyani. Alejandro Judiocuacaari quiquiaarijuhuaaj. Naaratej, Judiocuacaacuaaji tacunu paniriquiaa juucuaari. Alejandro jaara nujuaquiaari pocuajajiniji, na juashiquia shiitioquiaariiri pueya sanaajetanura. ³⁴ Saniniuuja, cuno pueya jaara niishiquiaari Alejandro Judiocuacaari pueyano, puetunu pueyajaanaari socua jiyacatequiaari nacoonura. Nojoriiri caapiqui hora shocoteree pueyaracaanu naa na nacoosacari najuhuanaj. Naa sequeturiquiaa na nacoosacariiri:

—¡Pa timitiasano Artemisa cuara pueyaracaanu quiria Efesio tiacajinia quiniaa pueyaso!

Naa pueyaracaanu nacooriqiaari. ³⁵ Cuno tiaca camarucuaara naajiona pueyano jaara na naata quiriquiaa nojori na sanaajanura, nojori sequeereeri:

—Cuarta Éfeso pueyanaa, puetunu jiyacajinia quiniaajanaari niishiya, pajaniya Éfeso tiacajinia quiniaari pa pueyaso Artemisa secojoja tia cojuanaani. Niishitiyajaariuhuaaj paacuajaari cuno casaa juhua pa pueyaso Artemisa niquishano cojuaquiaani, jiya cajiniocuaji tinio pa riaritasanoni. ³⁶ ¡Canteeri nio niishiyaquianija! Shaaqui. Cunora tariucuaaja. ¡Nia sanaajetarohua! Majaari najuhuaana sesa nia miitiuniu, maninia nia niishiriojiyaquishacari. ³⁷ Nio canuu niaa niyara na jayoreeni, nojoriiri maja na nohuasenu quiri casa pa pueyaso secojoja tiajiniji. Majaari na sesacatunu quiquiaa pa pueyasojuhuaaj. ³⁸ Demetrio jaara nata poonijionaata cuno pueyacuara tonujunu paniri, ¿casaara na quiaaquiya pa nequesoreenaa niquiara tonujunuraarini? ¿Casaara pa jiiitia nequesoreenaa pa tiacajiniaarini? ¿Najuhuanaj? Pa nequesoreenaa pa paraa tacujua pocuaji. ³⁹ Niaa jaara tamonu casaacua juaaquioreja, pocua tamonu juuca na rerejotariquiani pa jyaniijianucuaata pa jeecanura puetunu nia sequesanojuanaa. ⁴⁰ Pueyanaa, ¿majate nia puerenu, Roma tiacajinia quijia pa jyaniiijajanaa jaara pocuara tosaare pa nacojonujiniji? Paa jaara sequesaare nocua quiojonurani, ¿paatucua taa pocuaji tacureni jaara pa nequesoreere pa nacojonujiniji?

⁴¹ Tiaca camarucuaara naajiona pueyano jaara puecaquiaari pocuanu, pueya sequequiaariiri:

—Nia quiojorohua pueyanaa.

Naacuajitij, puetunu pueyajaanaari cuniquiji niaquejoquiaariuhua.

20

Pablo rucuanesacariuhua Macedonia jiyajinia, Grecia jiyajiniano

¹ Pueya jaara na juaaniutia na nacojonu nuhuaji sanaajetaquiaariuhua, Pabloori jiyacari Jesuucua tiunnaa pueya sequequiaari tama jiyareta nojorijiaaja rerejonura. Tii nojori nacasuree maniniaari. Tari na quiasacari cuniquiji, na nuhuajiria cacanuquiaari puetunu nojorijianaari. Na nuhuaji, Macedonia jiyajinia quiaareeri. ² Nojuajaari puetunu cuno jiyajinia rucuanequiaarijianaa. Jesuucua tiunnaa pueya cumashitiquiaari socuaari, maja nojori tarintianura Jesuucua tiunni. Naa na rucuanesacari cuno jiyajiniatej, socua tiuquishiiquiaari Grecia jiyajiniaari. ³ Pabloori tii na quishacari shocotejoquiaari jiuujianaraca raca. Juucua cuniquiji quianu paniriquiaa buquejinia Siria jiyajiniaraari. Judiocuacaari na niishiquiaari saaja. Nojoriiri jiyacari na monu paniquiaari. Naa Pablo niishishacariitij, nojuajaari nocuaji Macedonia jiyajiniara neteja nuacucohua tacatequiaariuhua saaja. ⁴ Nucuaaco na quiasacariuhua, na tarajaquiaariiri Sópater jyanishano pueyano Berea tiacajinijinio, Pirro niyanu. Na tarajaquiaarijiaariuhua Aristarco, Segundonio. Nojoriiri Tesalónica tiacajinijinio pueya quiquiaari. Nata quiaquiaarijiaariuhua Gayo, Derbe tiacajinijinio. Timoteori nojoritia quiriquiaajaacuhuaaj, Tíquiconio, Trófimojuhuaaj. Nojoriiri Asia jiyajinijinio quiquiaari. ⁵ Puetunu nio canaa tapueyocucajanaari canaa puecaquiaari. Canacuaji tiuquijioseequiaari coteenu Troas tiacajiniaari. Cuniqui

sashitiuquiaari canaari. ⁶ Jiyacariiri queranacunuusacari quiquiaari, poreetajaaju ship-inijosano pan miaquesacari. Queranacunuunu nuhuaji, canaari Filipo tiacajiniji jaaretaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

Pablo niishitiojosacari Troas tiacajinia

⁷ Shusha semaana coteejajinia domingo juuca, canaari rerejoquiaarini pan neecasenura pa Jiyaniijia cusosacari niishiriojonura. Pabloori jiyacari Jesuucua tiuunaa pueya rootariquiaa niucua. Nojuajaari cuno tariqui quiariquiano quiiriquiaa cuniquiji. Naaratej, na nuhuajiria pocoojoriquiaa pueyataari. Pueyaracaanu na pahuatasacari, shiyaqueyari tari quiquiaari. ⁸ Cuno tiajinia canaa tii quiiriquiaani, canaari jiyocuaaanu tercero na nat-acojina rerejoriquiaani. Queraatia samariiri canaa caaniuji noshiquioriquiaa. Pabloori shitimia pohuatariquiaa pueya niqiara. ⁹ Jiyacaritij, tamonu mashajaari tia shuucujii tacuhajiniji cajiriquiaa. Na sesaari Eutico quijia. Pablo pahuatasacari pueyaracaanu, socua maquequiaari na cajishaquiiiri. Jiyanoehua na maquesacari, jiyocua tiquii socuaari. Cusoseejaanaari. ¹⁰ Pabloori nata quiniaata ritia nocua netecuatiquiaari jiyocua. Pabloori nocua jacamasee na cacatanura. Narta Jesuucua tiuunaa pueya sequeereeri:

—Maja najuhuaana shiriititiuniu. Saminiocuaaja.

¹¹ Na nuhuaji, puetunu nojorijianaari tiniota shuquiriaatia tacataquiaariuhua. Pabloori neecaruu neecasequiaari canaa miaquenuusocoriquiano. Pabloori socua pohuataquiaari pueya na niishitiojonura. Naa juhuaquemaajaa socuaari. Tariucua juuca quiaqueeri. Nojuajaari nucuaco quianu paniquiaari cuniquiji Asón tiacajinara. ¹² Cuno mashajaari saminio jaatucusaquiaariuhua na tiajiniohua. Puetunu pueyajanaari noojia cajitiquiaariuhua, saminio mashaja tacatesacariuhua.

Pablo quiasacari Mileto tiacajiniara

¹³ Pabloori na quiaaquishacarijia tari canaa sequequiaari:

—Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniyani.

¹⁴ Naacuajitij, canaari coquetoquiaari Asón tiacajiniani. Canaari cuniquiji Pablo tacanimiaquiaarini. Canaari mariyata tiji quiaaree Mitilene tiacajiniani. ¹⁵ Canaari tariqui shocomaa Quoío jiya tucuaatijani. Canaari tama tariqui tiuquishii Samos tiaca tacatajajinijini. Canaari rupaquijia samaatemaacuara Trogilio tiacajiniani. Canaari cuniquiji sanetaaree tariquiniuhaj. Canaari Mileto tiacajinia tiuquishiini. ¹⁶ Canaari naa secooriquiaahua ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tiacajiniajuhuj. Ritia tiuquiniu paniquiaariuhua Jerusalén tiacajiniara. Pentecostés juucara quiniu paniriquiaa tiiri.

Pablo cumashitishacari Éfeso tiacajinijinio Jesuucua tiuunaa jiitianaa pueya

¹⁷ Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuunaa pueya jiitianaa. ¹⁸ Nojori jaara canaacua tiuquijioquiaari, Pabloori nojori sequeere:

—Niaacuaajari maninia niishiya taa cua quishiiquiaari niaatani, cua tiuquishacari Asia jiyajinia niaacua. ¹⁹ Niaata cua quishacari, janiyari pueyaracaanu nia niishitiojuani, pueyaracaanu pa Jiyaniijiaara cua poonijosacari. Naa cua miishacaritij, majaari cua quiniu paniniu quijia juhua nia jiyaniijia. Janiyari niaacua cua tacaashacari nujuquejojuani. Janiyari pueyaracaanu naquiya miishanoni, cuarta Judiocuaca paracaashacari janiya. ²⁰ Naajaa, majaari cua pishiniu quijia nia niqiara na pohuatanura Pueyaso rupaa. Janiyari nia niishitiojuani puetunujuanaa maninia nia quiniuria, maninia miijia nia quiniurajuhuj. Majaari cua niishitiojonu quijia jiyasohuaja. Janiyari puetunu pueya niqiaraajanaa nia niishitiojuani, tama nia tiacajiniaqueyajaajanio. ²¹ Janiyari Judiocuaca sequejani taucacano, nojori tacatonuhua noojia Pueyasocua, sesa nojori miishanojiniji, pa Jiyaniijiaacua nojori tiuuniuria cutara. ²² Quiarijiani, Pueyaso Sohuuanuri cua jiyaroya Jerusalén tiacajinia. Majaari cua niishiniu taa cua miishaanutaniya cuno tiacajiniani. ²³ Janiyari saaja niishiya cutarani, puetunu tiacajiniajanaa cua quiasacari, Pueyaso Sohuuanuri cua sequeya: “Quiaari nujuatesaanutaniya. Quiaari naquiya miishaanutaniyajuhuj”. ²⁴ Janiya jaara naa niishirini, majaari cua tacaaniu quiquiaa. Cuaraa cua motuuraqui jaara monu panitiuri. Janiyari saaja pa Jiyaniijia sequesano tucuatani paniya cutarani. Pa Jiyaniijia Jesuuri cua jiyaroquiaari cua pohuatanura pueya niqiara, taa Pueyaso jiyanooni paniya pueyani.

²⁵ Janyari seetanujuanaa nia sequeyani pueyanaa. Puetunu niajanijayanaa, cana niquiara cua pohuataquiaari Pueyaso rupaacuajani, majaari socua nia niquniu quiniutianiya mijiria janiya. ²⁶ Naaratej, janyari nia sequeyani, majaari na nuhuaji nia sequenu: “Maja canaa pohuatasaanu quiquiaari Pueyaso rupaani”. ²⁷ Janyacuajaari tari nia pohuataquiaari puetunu Pueyaso sequesanojuanaa pajaniyarani. ²⁸ Quiarjiani, tama nia cuaqueyajaaja nia cojuare. Maninia nia cojuare Jesuucua tiuunaa pueyajuhaaj. Pueyaso Sohuanucuaajaari nia jiyatequiaari Jesuucua tiuunaa pueya jiiitianaa nia quiniuria. Nojuajaari nojori masequiaari na nanacata tama nerajaaja, pocuara na cusosacari. ²⁹ Janyari seetanujuanaa niishiyani, janiya jaara niiquiji quiaqueeni, tamasaacari cua nuhuaji nijionutaniya. Jesuucua tiuunaa pueya sesonutaniyari, sacuaaata nojori niishitiojosanota. Nojoriiri juhua marucuatuque sareya tiuquitianutaniya Jesuucua tiuunaa pueya tajinia. Taa marucuatuque sare tiuquiya borregohua tajiniacuani, puetunu na soosejanaanari, cuno pojoriiri naa miiniutianiya Pueyaso muerasutej. ³⁰ Naajuhuaaj, tama niajanijajiniujuaraarija najuhuaa tamaatia niishitiojonu coteenutaniya na sapojonuta. Majaari Pueyaso panishano na niishitiojonuunu quiniutianiya tari. Naa sapojotunutaniya Jesuucua tiuunaa pueyari, pueya tojiniuria nojori saniniujuja. ³¹ Janyacuajaari nia sequeyani, jyanohua nia cojuare tama nia cuaqueyajaaja. Nia niishirijuhuaaj, jiuujianaraca marijaari tari cua shocoree pueyaracaanu cua niishitiojosacari nijaniya. Majaari cua tarinitianu quijia rootanu niajanija, juuca, niucuanio. Janyari naajaa cua namijiaacatenuta niishitiojotua puetunu niajanijajanaani. Majaari naa cua miishano nia niyajetanu pueyanaa.

³² Nia tiujanutaniya tarinjia. Janyacuajaari pa Jyanijia juaashiquiajinia nia jataani. Na rupaa nia tojiriquia pueyaracaanu, juhua rishimiaca pueyano nia quiniuria, cumueecara. Nia jaara naa miiritij, Pueyasoori nia rijionutaniya na shuriucua, na saquirojosano pueyata nia quiniuria. ³³ Naaata cua quishacari, majaari tama quiriajaaja cua paniniu quijia cumaneca, toquenio. ³⁴ Naaari nia quiyano cua niqijiajuhuaj. Janyari tama cua juaashiquiatajaaja poonijiojuani, cua panishano cua masetajara, cua cojiniaa panishano masetajarajuhuaaj. ³⁵ Janyari nia niishitiojotua, naa poonijiosanotej casamijuniucua pa naacunura pa jiiitiasanota. Majaari pa Jyanijia Jesu sequesano nia niyajetanujuhuaaj. Naa sequequiaariiri: “Maninia pueyano jaara na jiiitiasanoiniji niqitiotiore nareja tamonu pueyano, na niqitiosacari tamonu, nojuajaari socua shuquiriaatia quiya, niqitiosano masejajiniji”.

³⁶ Naa nojori na sequenu nuhuajitij, Pabloori mojuquetaree. Puetunu nojoritijanaa secojoreeri. ³⁷ Puetunu pueyajaanaari nujuqueturee. Pablo cacanuuttureeri. Na nujuuuequetureejaariuhuaaj. ³⁸ Pueyari jyanohua taraajeriquiaa Pablo sequenuucua nojori, maja tari socua na niqitituniu quiniutianiya nojuaja. Nojoriiri caminiajiniaara rosetaquiaarijuhuaj, Pablo na niqitituniuria buquejinia na tacasacari.

21

Pablo quiasacari Jerusalén tiacajiniara

¹ Éfeso tiacajiniji canaa ruparetasacari, canaari shoniniacu caminia jiuujiaaco quiaareeni. Canaari Cos tiacajinia tiuquishiini. Cuniquiji canaa quiasacari tariqui, canaari Rodas tiacajinia tiuquishiiniuhuaaj. Tama tariqui canaa quiasacari Rodas tiacajiniji, canaari Pátara tiacajinia tiuquishiini. ² Pátara tiacajinia canaa tiuquishacari, canaari tii riuriatasee tamonu buque quera Fenicia jiyajiniara ruparetaanoni. Canaari tii tacataareeni. ³ Canaa jaaretasacari, canaari canaa muenecara niqumiohua Chipre jiya tucuaatiajani. Canaari Siria jiyajinia tiuquishiini. Cuno buquejinia canaa tii quiariquiaani, casami pariquiaari Tiro tiacajinia jatasocoriquiano. Naaratej, canaari Tiro tiaca tacatajajiniji tiutiaseeni, casami jatanura tii. ⁴ Jesuucua tiuunaa pueyari tii quijiajuhuaj. Canaari nojoritia quishiini. Canaari siete juuca camueenujusee cuniqui nojoritiani. Pueyaso Sohuanuuri cuniquijinio Jesuucua tiuunaa pueya niishitioquiaari taa Pablo miishaanutaniyani. Nocuaaji nojoriiri Pablo sequetotuaari maja na quianura Jerusalén tiacajinia. ⁵ Naajaa, siete juuca jaara tari shocototuaari cuniqui canaa quishacari, canaari tiji quiaquiaarini. Jiyacaritij, puetunu Jesuucua tiuunaa pueyajaanaari necocohuata, mariyata necohuata canaata quiaquiaari canaa na jatanura buquejinia. Canaari rosetaquiaari tiacajiniji tacatajajinijiriani, Pueyaso canaa seconjona jaaquajinia. Puetunu canaajanaari mojuquetacoquiaarini shoniniacu caminia casaqueyaji. ⁶ Na nuhuaji, canaari nojori cacanuuree canaa nuhuajiriani. Canaari buquejinia tacataqueeni. Nojoriiri tacatajajiniji quiojoquiaariuhua na tijajinohua.

⁷ Canaari Tiro tiacajiniji jaaretaareeni. Canaari Tolemaida tiacajinia tiutiaseeni. Canaari cuniqui tacatasee puetunujuanaani. Canaari tii quijiaa Jesuucua tiuunaa pueya

saruhuataseeni. Canaari nojoritia quishii niquiriyatu juucani. ⁸ Tariqui saniniuuja, puetunu canaajanaari mariyata quiojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriquiaa. Canaari na tiajinia quishiini. Felipeeri Jesujiniji pohuatana quijia. Nojuacuajaari Jerusalén tiacajinia coteenujuanaa tamasacata jiyatesaquiaari mashiquiopue mianuuteriquiano. ⁹ Felipeeri necojori jiiti-aja, saa caqueetacaneje, niyacoojori. Cuno niyacoojoriiri Pueyaso Sohuanu jiitiajaca. Naacuajitij, Pueyaso Sohuanu niishitiojosano nojori jiuujiajinia Pueyasojiniji pohuatanu-ujuaari. ¹⁰ Canaa camueenujusacari cuniqui, jiyacari tiuquishiiquiaariiri Judea jiyajini-jinio pueyano. Nojuajaari Pueyaso sequenu panishano caminiujunua quijiajuhuaj. Ágabo jiyaniishano pueyano. ¹¹ Nojuajaari canaacua niquiaari Felipe tiajinia. Jiyacaritij, Pablo cajiniocua camarucujua samaacataseeri. Nata morojoree tama na cashacucuaajaarijia, na numatucuanio. Na nuhuaji sequerohuari:

—Jerusalén tiacajinia parta Judiocuacaari naa morojonutaniya nio cajiniocuaque camarutej. Na nuhuaji, taucuaca niquitiosaanutaniyari. Pueyaso Sohuanuuri naa cua sequereequij.

¹² Naa Cesareya tiacajinia quinia Jesuucua tiuuniaa pueya tojishacaritij, canaajuhua, puetunu canaajanaari juucua Pablo nenecojoquiaarini maja na quianura Jerusalén tiacajinia. ¹³ Saa canaa sequereajaari:

—¿Casaara nia nujuquetiuyajaarani? ¿Niaateeri cua taraajonu paniyaruhua? Majaari saaja cua paniniu pueya morojonura janiya Jerusalén tiacajinia; janiyari tama cua cuaqueyajaaja panitiaacujua. Cuaara cua motuuraqui, cua pohuatanuucua cua Jiyaniijia Jesujiniji.

¹⁴ Maja canaa naata na tarinitiniu quishacari, canaari socua na tarinitiareeni.

—Cuajaquij. Pueyaso cuaara miiria taa na miiniu paniyacujani.

¹⁵ Naa canaa sequenu nuhuaji nojuaja juucuatej, canaari canaa jiitiasano casaa jeenu-cuareeni. Canaari Jerusalén tiacajinia quiaareejaaniuhua. ¹⁶ Canaata quiojoquiaariiri Cesareya tiacajiniji Jesuucua tiuuniaa pueyajuuhua. Canaata quiariquiaajaariuhua Mnasón jiyaniishano pueyano. Nojuajaari Chipre jiya tucuaatiajajinijinio pueyano quiquiaari. Nojuajaari tarijia Jesuucua tiuujia quijia. Nojuajaari canaa sequequiaari:

—Paa jaara Jerusalén tiacajinia tiuquishiini, niocua cua tiajinia quishii cuata.

Pablo pocojosacari Santiagota

¹⁷ Canaa tiuquijiosacari Jerusalén tiacajinia, cuniquijinio Jesuucua tiuuniaa pueyari canaa timitiaree canaa tiuquijiosacari. ¹⁸ Pabloori tariqui canaata quiaquiaari Santiago niqiniuucua. Tii quiriquiaajaariuhua puetunujuanaa Jesuucua tiuuniaa jiitianaa pueya. ¹⁹ Canaa tiuquishacari, canaari nojori saruhuaatquiaarini. Na nuhuaji, Pabloori nojori pohuaatquiaari puetunu Pueyaso miishanojuanaa na pohuatanuucua Jesujiniji, na ru-cuanejosacari tucuaaanu taucuaca quijia jiyacajinia. ²⁰ Pueya jaara naa tojiquiaari Pablo pohuatatanotej, puetunu tii quiniaajanaari Pueyaso maniniuhuaqueetaquiaari nojori shuquiritiasacari Pueyaso.

Na nuhuaji, nojoriiri Pablo sequequiaari:

—Canaa tarajanunaa, taa quia niqiquiaacuajani, jiyanohua queraatia parta Judiocuacaari Jesuucua tiuya. Puetunu nojorijianaari tariucuaaanu Moisés niishitiojosano tojitiajajuhua, nocua nojori jiaatianua jiyanohua. ²¹ Nio Jerusalén tiacajinia quinia Jesuucua tiuuniaa pueyari quiocuaji tojiquianuhua. Quiaanaari tamonu jiyacajinia quijia parta Judiocuaca niishitioquiaa maja nojori miicuaari tariucuaaanu Moisés niishitiojosano. Quiaanaari niishitiojoquiaajuhua maja nojori necohua cararaatiuuquia co nojori miatejonura, taa pa supuetanaa niishitiojosaaquiaaricuaani. ²² Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? ²³ Canaari naa niishiriojijani, naa quia miiri juhuari. Niya quiyari cuatro pueya na naca tuquenuuteriquiano, tarijia na sequetusano Pueyaso na tohuateenura. ²⁴ Nojori quia jiyataare Pueyaso Secojoua tiajinia. Niocua nia cuaqueya jequejosee taa pa supuetanaa sequequiaaricujani. Naajuhua, quiocua nojoriria cumaneeca niq-uitiore nojori naca riuujishaanura. Quiaa jaara naa miiritij, puetunu pueyajaari niishiniutianiya majaqui seetanujanaa quiquianu pueya sequesano quiajanijajiniji. Niishitiniutianiyajaariuhua, quiaaqui tariucuaaanu Moisés niishitiojosano miyajaa. ²⁵ Majaari Jesuucua tiuunio taucuacaacua quia tacaaniu. Canaacuajaari tari nojori nacasuquiaari canaa naajioneejimiani, nojoriicuaa canaa naajiosacari. Canaari nojori sequequiaari cutarani maja tari nojori tojiniuria Moisés niishitiojosano. Canaari nojori sequequiaarijuhuaj, maja na miaquenuunura shipinishano pueyasohuacuara puecoosano casaa, naajuhua, maja na miaquenuunura nanaca. Canaari nojori sequequiaarijuhuaj maja na miaquenuunura shu na nanacataja, naajuhua, maja na numuetucunura na

camishoo maaji. Puetunu pa supuetanaa rootasanojinijijianaani, saa niojuuari taucuaa tojishocoriqiano rootasano.

Na cojiniata Pablo quioosacari Pueyaso Secojojua tiajinia

²⁶ Pabloori narta Pueyaso pueya sequesano tojiquiaari jaarajaaja. Naaratej, nojujaari cuno cuatro pueya jiyataquiaari tariqui. Nojoritia jeequejoquiaari na cuaqueyari taa Moisés niishitiojoquiaaricujani. Naa na miiniu nuhuajitij, Pueyaso Secojojua tiajinia tiuquitiaquiaariiri pueyacuara secojonaacua. Na sequetuquiaariiri casaa juuca na tucaatanutaniya na cuaqueya na jeequejonuununi, naajuhuj, casaa juuca nojori panutaniya Pueyasora na niqutiosocoriqianoni.

²⁷ Quera nojori tucuatascari puetunu cuno semaana juucajanaa, Asia jiyajinijinio narta Judiocuacaari Pablo niqiuquiaari Pueyaso Secojojua tiajinia. Nojoriiri puetunu pueyajanaa nasajoquiaari ritia. Jiyacari Pablo quiatureeri. ²⁸ Na quiatusacari Pablo, pueya na jiiquioonuutareeri:

—¡Israel pueyanaa, miji! ¡Canaa nia naacuseeja! Nioori noo pueyanocuaa tiqiyocua na rucuanesaqui pueya niishitiojoquiaa sacuaraatia pocuaratej, nio Pueyaso Secojojua tiaacuaraajuhuj. Naajuhuj, tariucuaacaano Moisés Rootasano sesacatequiaa pueyajaariuhuj. ¡Quiarijiani, pa Secojojua tiajinia sacuaraatia tiuquiniatieree taucuaacari!

²⁹ Cuno Judiocuacaari naa sequetuquiaari Pablotej, Tróximo jiyajiniano pueyanota nojori niqiniuucua nojuaja tarijia na rucuanesacari cuno tiacajiniaja. Tróximoori Jesuucua tiuunia tahue quijia, Éfeso tiacajinijinio pueyano. Naaratej, cuno Judiocuacaari jiyaniquiaari Pablo naasucuaari cuno tahue tiuquinirii Pueyaso Secojojua tiajinia.

³⁰ Puetunu Jerusalén tiacajinia quiniaa pueyajanaari juaaquiocuaari. Pabloocua netecuatuquiaariiri. Na quiatureeri. Pueyaso Secojojua tiacoci na jaatiuquiaari carjiniacumaari. Pueyaso Secojojua tia tohuatayari ritia tionujusaquiaari na nuhuaji. ³¹ Pueyari tari monu paniriqiaa Pablo. Jiyacaritij, tii Jerusalén tiacajinia quijia Romano soldadohua comandanteeri numootesaaquiaari: “¡Judiocuaa na juaniutia nacoya!” Cuno comandanteni, nojujaari soldadohua capitánucua jiyaniijia. ³² Jiyacaritij, comandanteeri na soldadohua rerejotequiaari ritia, na capitánucuanio. Tee pueya nacooriguaani, nocua netecuatuquiaariiri. Judiocuaa jaara niqiuquiaari comandante na soldadohua neretaano nojoriicua, jiyacari shusha cartetuquiaari Pablo piqutiuniuuri. ³³ Comandante tiuquishacari nojoriicua, Pablo quiaseejanaari. Na soldadohua sequereeri:

—Caapiqui cumayocua casaa nia saatijiore na numatucua cajiucua.

Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

³⁴ Pueyari saaja jiyajeneta nacooriguaa. Nioori tamaatia nacooriguaacujua. Tamasacaari socua tamaatia nacooriguaajanaajataj. Comandanteeri cunora maja na niishiniu quiquiaari casaa Pablo miiriijaarani, puera nojori cojuatunenuucua na nacoosacari. Cunora na soldadohua sequereeri:

—¡Pa quijia tiajinia nia jaatucuyarohua!

³⁵ Soldadohua tacatasacari tari nojori quijia tia tacatuhuoco Pablo nojori jaatucusacari, Judiocuacaari jiyacari quera na macaaniutia socua shiiniuquitiaquiaari Pabloocua, na monu paniniuria juucua. Soldadohuari nojoriicuai Pablo shiitioquiaari jiyocuaacaano. ³⁶ Pueyari soldadohua nuhuaji na cocuatesacari jiiquioonuuriquiaa:

—¡Nia more cuno sesaaca! ¡Nia more!

Tama nocuaji Pablo tacusacarijaaja

³⁷ Quera soldadohua tiuquinishacari Pablo nojori quijia tiaco, Pabloori soldadohua comandante sequereeri:

—Quenaaja niqiriyatu rupaa sequereera cuno pueya.

Comandanteeri na riuucaree:

—¿Quiaaquiiri Griego rupaa pocuaja? Janiya juucua quia jiyaniriqiaa Egipto jiyajinijinio pueyanoni. ³⁸ ¿Majateeri noo quiajaniya quiquianucuaaja, cariquia jiyajinia jiyatacanu cuatro mil puecoojuuca pueyatej?

³⁹ Pabloori saaja na sequereeri:

—Janiyari Judio pueyanoni, Tarso tiacajinia rasanotuhuj. Naacuajitij, janiyari Tarso tiacajinijinio pueyanoni, teyano tiacatucuaaja socua panishano tiaca Cilia jiyajiniani. Quenaaja rupaquijia cua tarishitiricuarajaj. Cuno pueya sequenu paniya niqiriyatu rupaa quenaajanijia.

⁴⁰ Comandanteeri socua na sequereeri:

—Quia pocuare.

Pabloori jiyacari tacatujiniji nujaquiaari. Na juaashiquia shiitioquiaari pueya na sanaajanuraari. Puetunujuanaa jaara sanaajetaquiaari, nojoriucara pocuaree tama nojori Hebreo rupaaajiniaari. Naa nojori sequereeri:

22

¹—Cua tapueyocucanaa, cua jiyaniijianucunaa, nia tojitaree cua sequesano nijaniya tama cua tacusacarijaaja cucuaji.

² Cuno pueya jaara tojiquiaari Pablo pocuasacari nojoriucara Hebreo rupaaajinia, pueyari maninia sanaajetaquiaarijianaa. Pabloori nojori sequereer:

³—Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaarini. Gamalielri cua niishitiojona quijia. Jiyanohua rootasaaquiaari pa supuetanaa niishitiojosanonijia. Janiyari pueyaracaanu Pueyaso panishano miiniucua jiaatiaquiaani, taa quiarijia nia miiniu paniyanijia. ⁴ Janiyari tarijia Jesuucua tiuunuaa pajejani naquiya cua miitiasocoriquiano. Janiyari na mooquiaarijuhuaj. Janiyari canuu kojiritiaquiaari quioonu maajipohuatajani, cua nujuatejosocoriquiano nujuatejojuajinia. ⁵ Pueyacuara secojonaa camarnuuri cua miijosano niishiyajuhua, puetunu pa jiyaniijianucujanaano. Nojoricuajaari cua niqutioquiaari nojori naajione Damasco tiacajinia quiniaa parta Judiocuacaacuara. Janiyari juucua quiariquiaa Jesuucua tiuunuaa pueya cua pajenura Damasco tiacajiniani. Quera cua quioosano cua nitiamohua niya Jerusalén tiacajiniani, saniitiojosocoriquiano.

Pablo pohuatasacari Jesuucua na tiuuniujiniji

⁶ Janiyari juucua nucucua quiariquiaani. Quera cua tiuquishacari Damasco tiacajinia, panacariiri quiriquiaa. Canashiyaquiji jiyanohua shacantuuca juhua miacanaari cua nunuquiaari. ⁷ Janiyari juhua jatasaareeni. Jiyacaritij, janiyari rupaa tojirii na sequyanoni: “Saulo, Saulonaa, ¿casaara quia miitiaa puera janiyani?” ⁸ Janiyari na nequesotareeni: “¿Cantequia jiyaniijianaa?” Cua sequereeri: “Janiyacuajaari Jesuni, Nazaret tiacajinijinio pueyano. Cunocuajaari quiaa na miitiaani”. ⁹ Cua cojiniaa pueyari cuno shacantuuca na niquishacari shiriqitituaquiaari. Majaari na tojitiunuu quiquiaari cutara jiyocucuanuji rupaa cucua pocuaano. ¹⁰ Janiyari socua na sequereeni: “¿Casaa cua miyarini jiyaniijianaa?” Jiyaniijaari cua sequereeni: “Quia sanerohua. Naajaa quia quiaare Damasco tiacajinia. Quiaari tii sequesaanutaniya puetunu cua panishanojuanaa quia miiniuria”. ¹¹ Cuno shacantuuca cua nunuquiaari jiyocucuanujini, cua namijia sesoquiaariiri. Janiyari cariyouaru quiriquiaani. Naacuajitij, cua cojiniaari cua jaatucutuquiaari. Naa cua tiuquiatusee Damasco tiacajiniaari.

¹² Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari seetanujuanaa tariucucuaanu Moisés niishitiojosano tojijia cutara. Puetunu Damasco tiacajinia quiniaa Judiocuacaari na panijia. Nojoriiri na sequetujua: “Ananías cutaraari maninia pueyano”. ¹³ Ananíasri jiyacari cua niqiniucua niquiaari. Jaara tiuquiquiaari cucua, cua sequeereeri: “Cua tarajanu Saulonaa, maninia niqijijara quia quiriouhua”. Jiyacaritij, cua namijiaari ritia jeequequee. Janiyari maninia niqiqui Ananíasri. ¹⁴ Cua sequereeariuhua: “Pa supuetanaa jiyaniija Pueyasocuaajaari quia saquirioquiaari tariucucuanujiniji, na niishitonura quiajaniya na panishano quia miiniuria. Quia saquirioquiaarijiaariuhua quia niqiniuria taquiya pocuajinio sesa miyashijia cutara, tama na camaru rupaaajiniji quia tojinuria na sequesanojuhuaj. Nojuacuajaari pa jiyaniija Jesucristo. ¹⁵ Quiaari puetunu pueyapue niquiarajanaa pohuatanutaniya nojuajiniji quia niquishano, quia tojishanonio”.

¹⁶ Ananíasri socua cua sequequiaari: “¿Casaara quia tarishiyarini? Quiarijiani, quiaa cuara tiuquinishaaria. Jiyaniija Jesu quia sequere: ‘Cua jiyanoori sesa cua miishanojiniji’. Nocua quia tiuushacari, quia sesa miishanoori jeequesaanutaniya”.

Pablo pohuatasano taa Jesu jiyaroquiaari nojuaja taucacaacuani

¹⁷ Janiya jaara riujuuquiaariuhua Jerusalén tiacajiniohuani, janiyari Pueyaso Secojonuuja tiajinia secojoriuani. ¹⁸ Cua secojosacari, janiyari Jesu niqiquiaari juhua cua maquenujiniani. Cua sequereeri: “Ritia quia quiaare niqijiji. Nio pueyari maja na tojitianu quiniutianiya quiajaniya, nojori quia pohuatasacari janiyajiniji”. ¹⁹ Janiyari saaja na sequereeni: “Cua jiyaniijianaa, nojoricuajaruhua niishiya janiyari quiocua tiuunuaa pueya quioojuani puetunu rerejoja tiajinijianaa cua nujuatejosocoriquiano nojori. Janiyari nojori mojujuajuhua. ²⁰ Naajuhua, quia rupaa pohuata Esteban jaara mosaaquiaritij, janiyari catecaji saitia na jacusacari shootiaquiaarini. Janiyari na jacunaa toqueya cojuariquiaaaniuhua, nojori mosacari Esteban. Janiyari jaarajaaja sequequiaarini: ‘Cuara mosaaria’”. ²¹ Naa cua sequesacaritij, jiyaniijaari saaja cua

sequereeni: “¡Niiquiji quia quiaarejaj! Janiyacuajaari tucuaaanu quia jiyaronutaniya tucuacaacuanu!”.

Comandante jütiasacari Pablo

²² Pueyari sanaa tojtitiariquiaa Pablo pohuatasacari. Saniniuujia, Pablo jaara jiyaniquiquiaari tucuaca, pueyari jiyacari coteequiaari nacoonu, tucuaca soojeaca nojori quiniuucua:

—¡Cuaara mosaaria cuno pueyano! ¡Majaari maninia jiyano pueyano rishiniuria socuatej! Cuno pueyari naa nacooriguiaa.

²³ Na juaaquionuta na nacoosacarijia, na toqueya quejootuquiaari jiyocuacaanuuri quera na macaanitua. Naa quejootuquiaari jiyajuajariuhuj. ²⁴ Comandanteeri na capitancuaca sequequiaari Pablojiniji:

—Nio pueyano nia tuquiniri nia quijia tiajinia. Niocua na saniri majacununoj, cuaara sequeera casaara naa pueya nacoyani.

²⁵ Soldadohua jaara tari Pablo morojotuquiaari tiaacuara na majacutusocoriquiano juucua, Pabloori capitán sequequiaari:

—¿Jiyaniijia César rootasante, naa nequesoreesoojua nia majacunura narta Romano pueyanotej?

²⁶ Capitán jaara tojiquiaari naa Pablo sequesante, ritia netequiaariiri. Na comandante sequeeseeri:

—¡Quiaa cocuaatia miya! ¡Cuno pueyanona Romano!

²⁷ Comandanteeri ritia Pablocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riucaaree:

—Taaquiririnij.

²⁸ Comandanteeri na sequerohuacuahuaj:

—Romano pueyano cua quiniuria, janiyari queraatia cua cumaneeca niqutioquiaarini. Pabloori saaja na sequeere:

—Janiyari Romano cutarani, nojori tiacajinia cua rasaanuucua.

²⁹ Cuno pojori, Pablo majacunura seeratasaaquiaari juucuanu, naa nojori tojtiasacarij, Pablo shuriucuaaji ritia shiriqutiaquiaariiri. Comandante niishishacari Pablo seetanujuaana Romano quiquiaari, puererejaariuhuj, Pablo na morojotenuucua.

Tama nocuaji Pablo tucacacarijiaa Judiocuaca jiyaniijianucua niquiara

³⁰ Tariqui saniniuujia, comandanteeri maninia niishiniu paniquiaari casaara Judiocuaca nacootariquiaacuaa naa Pabloni. Naaratej, comandanteeri Judiocuacaacuara secojonaa jiyaniijianucua rerejotequiaari. Puetunu Judiocuaca camarucua nacasunaa maanujuaana rerejotequiaariiaariuhuj. Nojoricuajaari Sanedrín maanu. Jiyacari Pablo numatucuaajiniji rupareetaquiaari cumayocua saatijiotasanoori. Puetunu nojorijianaa jaara tari rerejoquiaari, jiyacari Pablo tohuatequiaariiri. Nojori taccoji na nujuatereeri.

23

¹ Pabloori juhuacatecara pohuatanu coteequiaari camarucua niquiara. Nojori sequereeri:

—Cua tapueyocuaanaa, janiyari pueyaracaanu juhuajaniya quiquiaani, Pueyaso tojijia cua quishacari pueyaracaanu.

² Naa Pablo sequesacarij, pueyacuara secojonaa jiyaniijiajanaari juarii. Ananías na sesa. Nojuajaari Pablo jiyaniquiaari najuhuaana pocuaa naasucua. Nocuaji, Ananíasri Pablo shuriucua nujuatunaa sequequiaari ritia:

—¡Na rupaajinia nia piri naa pocuaaniquitij!

Pablo shuriucua nujuanaari jaarajaaja na piquii. ³ Majaari Pablo niishiniu quiquiaari casaate Ananías quiquiaarini. Naacuajitij, Pabloori juhuajaniya Ananías sequequiaari:

—¡Pueyasoori saniniuujia cucua quia naminiutianiyacujua, Moisés Rootasano tojiyashijianaa! Nia jiyaniishacari janiyari Moisés Rootasano tojiyashijiani, niari coteenu cua nequesoreya maninia taa Moisés rootaquiaaricuaajani. ¡Quiaa sajara Moisés Rootasano tojiyashijia cutara, quia sequesacari cua pishaanura nia nequesoreyaquishacarijia maninia janiya!

⁴ Pablo shuriucua nujuatunaaari Pablo sequequiaari:

—¿Quiaateeri saa rerequeteyajaa pueyacuara secojonaa jiyaniijiaruhua?

⁵ Pabloori nojori riucaaree:

—Cua tapueyocuaanaa, cua jiyanoori. Paacuajaari naa rootasaaquiaari Moisés nequesoreetuneejiniani:

“Majaari sacuaraatia rimiaaquenu nia camarnuucuaa”.

Cua pueyanaa, maja cutaraari cua niishiniu quiriquiaa nojuajate pueyacuara secojonaa jiyaniijia.

⁶ Pabloori niishiquii cuno Judiocuaca camarucua nacasunaa cuniqui quiriquiaani, noojiaqueya nojorijininiioori Saduceocuaca maanujiniji quiriquiaa. Tamasacaari sanini-
uujia narta Fariseocuaca maanujiniji quiriquiaacuua. Naaratej, Pabloori jiyanoohua na
rupaa paaretaquiaari naa na sequenura nojori:

—¡Cua tapueyocucanaa, janiyari Fariseo pueyanoni! Cua shipininioori Fariseo
pueyano quiquiaarijuhuaj. Canaari Pueyaso Rupaacua tiuujacani. Naacuajitij
canaari niishiyani Pueyasoori macunucua samiitianijionutaniuhua taa puetunu cuarta
Fariseocuaca niya quiniaa tiuyanijia. ¡Niaaquiiri jiyamitia cua nequesoreya!

⁷ Pablo jaara naa sequequiaaritij, Fariseocuacaari Saduceocuacata juhuacatecara juay-
onuutaquiaari tama nojorijiaaja. Naacuajitij, nojoriiri caapiqui maapuera raqutiijiaari.

⁸ Saduceocuacaari jiyaniya maja macunucua samiitiaconu quiniutianiuha. Nojori-
iri sequeyajuahuaj: “Maja Pueyaso seya quiniu”. Pueyapuenari sohuanuujujuhuaj.
Fariseocuaca cutaraari nojori cuarachitishanoocua tiuya. ⁹ Naacuajitij, puetunu pueya-
janaari nacooriquiaa na juayonuutasacari. Jiyacaritij, tariucuaaanu Moisés Naajio-
tasanojiniji niishitiojonaa pueyari sanetaquiaari. Nojoriiri Fariseocuaca quiijajuahuaj.
Nojoriiri naa sequetuquiaari Pablojiniji:

—¡Nio pueyanoori maja sesa na miiniu quiquianu! Maninia sohuanu jiyoteeri nocua
muetacanu, Pueyaso seru soj. Majaari pa niishiniu. ¿Paatucua casaara tenujure Pueyaso
panishano na miishacarini?

¹⁰ Pueyari socua jiyatequiaari nacoonu. Comandanteeri puerequiaari, na jijan-
ishacari Pablo naasucua socua sureesaanutaniyaquij. Naa jiyaniquiaariiri, puerajanaa
pueya juaaquiosacari. Nocuaji, comandanteeri ritia na soldadohua jiyaramiquiiaari,
na tiajinia nojori tiuquininiuhua Pablo pueya tajiniji. Naa miitiquiaariiri.

¹¹ Cuno niucujajani, Jiyaniijia Jesuuri Pabloocua muetaquiaari. Na sequereeri:

—Quioojia quia cumaquiiri Pablonaa. Naatej, taa quia pohuatarucuaa janiyajiniji
niya Jerusalén tiacajiniacuaani, quiaari naa pohuatanutaniya janiyajiniji Roma tiacajinia
quiniaajuahuaj, Césarjanaa niqiarajuahuaj.

Judiocuaca roojotoosacari Pablo na motunura juucua

¹² Tariqui saniniuujia, noojiaqueya Judiocuacajininioori Pabloocuara roojotooquiaari
na monura. Nojoriiri naa sequetuquiaaritij:

—Paa jaara Pablo moyaquirini, pocua miaqueyaquirini, pocua ratuyaquirijianiuhuaj.

¹³ Nojoriiri cuarenta canu quiquiaari, naa sequetuquiaarini. ¹⁴ Na nuhuaji, cuno po-
joriiri pueyacuara secojonaa jiyaniijanucuaacua quiaquiaari, Sanedrín maanuucuanio.
Nojoriiri naa sequetuquiaari:

—Majaari canaa miaquenu quiniutianiya quenaaja casaa, canaa cuaara more Pablo-
jaatijia. ¹⁵ Niajaniya, pueyacuara secojonaa jiyaniijanucuaanaa, puetunu Sanedrín maanu-
juanaano, nia sequere comandante cuaara nitiaara tariqui Pablo niaacua. Niocua naa na
sequerenoj: “Miji Pablo quia nitiaare. Canaari socua maninia na nequesoreenu paniani”.
Canaacua jiyacari niaacua na tiuquiaquishacarijia nuu cajiniocua na moreni.

¹⁶ Tamonu pueyanoori Pablo raaquia caminiujuquiaari naa cuno pojori sequesano
camarucatej. Pablo raaquiaari nocuaji ritia soldadohua quiija tiajinia quiaquiaari na
cama Pablo na pohuatanura. ¹⁷ Jaara tari na pohuataquiaari, Pabloori jiyacari cuniqui
cojuanaajininijioo capitán piiquiaari. Na sequereeri:

—Nio caya samijia quia jiyataare comandanteecua. Nojuajaari comandante numootenu
paniya.

¹⁸ Jiyacaritij, capitánri Pablo raaquia jiyataquiaari. Na tiuquishacari, comandante
sequequiaariiri:

—Pa quiasano Pabloori cua piiriini. Cua sequereeri cua nitianura quiocua nio caya
samijia. Nojuajanaari casaa quia sequenu paniya.

¹⁹ Jiyacaritij, comandanteeri caya samijia numatujiniji quiaquiaari. Tamocora na
jaatucureeri. Tii na nequesotaseeri:

—¿Casaa quia sequenu paniya janiyani?

²⁰ Caya samijiaari na sequereeri:

—Noojiaqueya Judiocuacajininioori Pabloocuara roojotoorucuaa. Quiaari saponu
sequesaanutaniya tariqui quia jiyatanura Pablo, puetunu Sanedrín maanujanaa
niquiara nequesoreesocoriquiano. ²¹ Quiaa jaara sequesaa, majaari nojori tojinuu.
Cuarenta canuuri tari nuu cajiniocua nocuaji jamaatiuya. Cuno pojoriniiaari maja na
miaquenuunu quiniutianiya, majanaari na raruunu quiniutianiyajuahuaj, cuaara moture
Pablojaatijia.

²² Comandanteeri caya samijia sequequiaari:

—Maniniacuaja. Majaari tamasaca pohuatanu quia sequesano janiya. Tariucuaja. Quia quiaarohua.

Soldadohua jiyatasacari Pablo camarnu Félix

²³ Comandanteeri caapiqui capitán piiquiaari. Nojori sequereeri na numootejonura dosciento soldadohua, Cesareya tiacajinia quiojoriquiano cuno niucuaja. Mariyata cuara quiojora setenta soldadohua caballohua nijinia cajitiuacajuhua, socua dosciento soldadohua saa cashiriacajanio. ²⁴ Comandanteeri na capitáncuaca sequequiaarijuhuaj, nojori niojotanura cajitiuaca tamasaca caballohua nijinia Pablo cajijia. Nojori sequequiaarijuhuaj:

—Niocua maninia cojuare Pablo, cuara tiuquiiria camarnu Félix nequesoreesoriquiano.

²⁵ Comandanteeri na naajionee niqutioquiaari Pablo jiyatanaa. Naa naajiosanoori quiquiaari camarnu Félixcuara:

²⁶ “Camarnu Félixnaa. Nio Claudio Lisias naajionee. ¿Taa quia quiyani cua panishano camarnunaa? ²⁷ Cua jiyarotasano pueyanonijini quia pohuatereeraj. Na sesa Pablo. Narta Judiocuacaari na motunu paniquiano. Janiyari jiyacari cua soldadohuata nocua tiuquishii namitiani. Janiya jaara niishiquianuni nojuaja Romano pueyano, janiyari cua soldadohua sequereeni: ‘Judiocuacaacujaji nia quiare ritia cuno pueyano, mariqui na motureeri’. ²⁸ Maninia cua niishiniuria casaara naa pueya nacootariquiaa Pablóni, janiyari puetunu Judiocuaca camarucua nacasunaa rerejotecanuni. Janiyari nojoriicua tohuatecanu Pablóni, nojori nequesoreenura nojuajanaa cua tojishocoriquiano. Janiyajanaa jaara Pablo tojiquianuni, casaara pueya monu paniriquiaanoj, janiyari jiyacari shusha niishiriini. ²⁹ Nojoriquiiri na nacoatacanu Pablo tojiyaquiniucua tariucuacaanu tama nojori supuetanaa rootasanojuaja. Cunora na motunu paniriquiaari. Janiyari quia sequeyani, ¿maatucua cunora mosaareeri? Majaari quenaaja sesa na miiniu quiquianu, pueyaracaanu na nujuatesaanura. ³⁰ Janiyari sequesaarucuaajuhua, noojiaqueya Judiocuacajinijionaaari na monu paniya. Janiyari jiyamitia quiocua cua soldadohua na jiyarotareeni. Janiyari nocuara saquiriojotanaa sequerucuaajuhua, cuara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuaja”.

³¹ Soldadohuari naa miiquiaari taa comandante sequequiaari nojoricuajani. Nojoriiri cuno niucuaja Pablo jiyataquiaari. Antipatris tiacajinia tiuquijioseeri. ³² Na niohuacata quiojona soldadohuari Antipatris tiacajiniji tariquicuaji riujuuatiacquiaarihuua Jerusalén tiacajinohua. Caballohua nijinia cajitiunaa soldadohua cutaraari Pablo jiyataquiaari. ³³ Pablo jiyatanaa jaara tiuquijioseequiaari Cesareya tiacajinia, nojoriiri comandante naajionee niqutioosee camarnu Félix. Pablo na niqutiootureejaarihuaj. ³⁴ Camarnu serojonu nuhuaji comandante naajionee, Pablo nequesotaquiaariiri:

—¿Tee quia rasaaquiaarini?

Pabloori na riuuaree:

—Cilicia jiyajinia rasanonijia.

³⁵ Camarnuuri na sequere:

—Janiyacua quia nequesoreeriquiani quiocuara saquiriojotanaa jaara tiuquijiore.

Jiyacaritij, camarnuuri na soldadohua sequequiaari cuara maninia cojuatuura Pablo tariucuacaanu jiyaniijia Herodes tiaco. Herodes quishacari jiyaniijia, cuno tiaari nocuaji tiasaaquiaari na quijia.

24

Tama Pablo tacusacari nocuajijiaaja camarnu Félix niquiar

¹ Pabloori cinco juuca camueequiaari tari Cesareya tiacajinia. Jiyacari tiuquijioquiaariiri nocuara saquiriojotanuuriquiano pueya. Nojoriiri quiquiaari pueyacua secojona jiyaniijia Ananías, mariyata secaja Judiocuaca camarucuanu. Nojoritia tiuquiquiaariiri Tértulo jyanishano pueyanohua. Jyanohua pocuanu niishijia. Puetunu nio pojorijanaari camarnu Félixcuua tiuquitiaquiaari Pablocuara na saquiriojotanura. ² Pablo jaara tohuatesaaquiaari nojoriicua, Tértulo juhuacatecara coteequiaari camarnu Félix saquiriojotanu nocuara. Naa sequequiaari camarnu Félixri:

—Canaa camarnunaa, quiaari jyanohua niishijia. Naa niishijia quia quishacaritij, quiaari maninia quia pueya jitiia. Canaari naacua juhuajaniya quiyani, maninia canaa quia jitiiasacari. ³ Canaari cunora quia timitiaani camarnunaa, maninia quia jitianucua canaa pueyaracaanu, puetunu canaa jiyajinijanaa. ⁴ Maja puera cua tarishitiniu

paniniu quiajaniya. Quenaaja rupaquijia canaa quia tojiricuara. ⁵ Nio pueyanoori tariucuacaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojoquiaa tamonu jiyacajinia quinia Judiocuacajuhua. Naa sesa na niishitiojonuucua pueyatej, tamasaacari maja tari na rupeenu paniniu narta pueyano. Nio pueyano tojtiajacari sesojosaaquiaari Nazarenoocua tiunnaa maapue. Nio pueyanocuaajari cuno pojori jiyaniija. ⁶ Juucua Pueyaso juaatinu paniquianujaar-iuhua, tahue na tiuquininiu panishacari Pueyaso Secojoua tiajinia. Canaari jiyamitia na quiarucuani, canaa nequesoreescoriquiano taa tariucuacaanu canaa supuetanaa rootasaaquiaaricuajani. ⁷ Comandante Lisiasri canaa na jaariutiarcuaa saajani. ⁸ Caa sequerucuaajaariuhua: “Cante nio pueyanocuaa saquirojotanu paniani, cuara quiaara camarnu Félixua”. Naa canaa sequerucuaari. Nio pueyano quia nequesotasure, quia niishiniuria maninia. Seetanujuanaacua, canaari cunora nocuaa quia saquirojotaani.

⁹ Cuniqui quinia Judiocuacari jaarajaaja sequeturee:

—Taaquiririnij, camarnu Félixua. Naacuaaquiniatej, taa Tértulo sequeyacuajani.

¹⁰ Camarnuuri na juashiquia shiitioquiaari Pablo pocuanura saniniuujia. Pabloori jiyacari coteeree. Naa sequereeri:

—Taaquiririnij, pocuashiyacuaaquiniatej. Camarnunaa, janiyari niishiyani, quiaari tari queraatia marija shocotejiya cuarta Judiocuaca nequesoreena quia quishacari. Naaratej, janiyari juhuajaniya quia niqiaara tama cucuaji tacunu paniani, cuarta Judiocuaca saquirojotasacari cucuara quiajaniya. ¹¹ Janiyari shusha tiuquiriohuacuaa Jerusalén tiacajiniani, Pueyaso cua seconjura Secojonuujua tiajinia. Janiyari shusha camueeshua doce juucani. Cucuara saquirojotanaa quia nequesoreesureeraj. ¹² Nojoriiri maja quenaaja na riuriatanu quiqianu janiya tamonu pueyanota juayonuutaano. Majaari na riuriatatunu quiqianu janiya pueya ruutaqueyano quenaaja Pueyaso Secojoua tiajinia. Majaari quenaaja nojori riuriatanu quiqianu janiya canaa Secojoua tiajinia juayonuutaano pueyata. Majaari quenaaja naa cua miinu quiqiaari puetunu tiacajinijanaa cua rucanejosacari. ¹³ Nio pojori cucuara quia saquirojotaani, nojoriiri maja na naata sequenu seetanujuanaa janiya sesa miijiani. ¹⁴ Nojori sequesacari janiyanaari Pueyaso tojijia tamaatia nojorijinijini, cua tojinuucua cuno Nazareno pueyano, taquiririnij. Saaja cuno nojori sequesano cutaraari seetanujuanaa. Janiyari Nazareno tojijiani seetanujuanaa cua tiuushacari puetunu Moisés naajiotasanoocujanaa, naajuhua, cua tiuushacari puetunu canaa supuetanaa caminiujiushano Pueyasojiniji naajionuutasanoocujanaano. ¹⁵ Janiyari juhua cucuara saquirojotanaa pueya tiuya Pueyasoocua juhuaj, taa Pueyaso samiitianijionutanihua macunucuan; maninia miijiaa, sesa miijiacano. ¹⁶ Naaratej, janiyari pueyaracaanu sesa miyaquiniu saniniujuquiaani, maninia cua quiniuria Pueyaso niqiaara, pueya niqiaranio. Naacuajitij, janiya jaara samiitiarohuani, majaari cua macuhuaquini quiniutianiya.

¹⁷ Queraatia marija cua shocotejonu nuhuaji cua rucanejosacari tamonu jiyacajinia, janiyari shusha tiuquiriohuacuaa cua jiyajiniani. Tamonu jiyacajiniji Jesuucua tiunnaa niqitiojosano cumaneeca tiuquitiarohuacuaanijia. Janiyari na tiuquitiarohuani na jatanuhua Jerusalén tiacajinia, Jesuucua tiunnaa casamiijiuucua niqitiojosocoriquiano, mariyata cua jiiitasanojiniji cua niqitiohuara Pueyasora. ¹⁸ Naa cua miiniu nuhuaji Pueyaso Secojoua tiajiniatej, Asia jiyajinijinio Judiocuacari cua naacutucanu tohuataano juucua Pueyaso Secojoua tiajiniji. Janiyari juucua tohuatariquihuani cua cuaqueya cua jeequenu nuhuaji, taa canaa supuetanaa niishitiojosaaquiaaricuajani. Cuno juuca, majaari queraatia pueya quiniu quiriqiaa Pueyaso Secojonuujua. Majaari quenaaja pueyata cua juayonuutanu quiriqiaajuhua. ¹⁹ ¿Teete cunu pojoriarani? Mariqui niya nimiacuara cucuara na saquirojotanuunura, janiya jaara sesa miiquianuni. ²⁰ Cucuara saquirojotanaa jaara nijyaquimia, naajaa, nio pojori niya quiyani, nojoriiri Judiocuaca camarucua nacasunaa nequesoreesacari janiya tii quitiuquianu jiyacarijuhuaj. Nojori cuara sequeera, ¿cuno camarucuate cua sequecanu janiya sesa miiquianuni? ²¹ ¿Pueyateeri cucuara saquirojotaa soj, nio cua sequenuucua Judiocuaca camarucua: “Niaari cua nequesoreya quiarijia, cua niishishacari macunucuaari samiitianijiosaanutanihua”? Janiyacuajari naa nacacanu camarucua nequesoreesacari janiyani.

²² Camarnu Félix jaara naa tojiquiaari Pablo sequesantej, nojuajaari pueya sequequiaari:

—Comandante Lisias cuara tiuquiriajaara, janiyacu Pablo nequesoreeriquiani.

Camarnu Félixri Jesujiniji pohuatasano tari maninia niishiquiaari. Naaratej, nojuajaari Pablocuara saquirojotanaa pueya tarintiaquiaarijaara. ²³ Na nuhuaji, camarnu Félixri soldadohua capitán sequequiaari:

—Pablo nia tiuquiniriohuaajaara. Niocua maninia na cojuarenoj. Na rupuenaa, tapuey-ocuaicano, nojori jaara Pabloocua nimiaquia, majaari nocuaji na tenujununoj. Nojori cuaara na niqutiotuura na panishano.

²⁴Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiquiaariuhua necocuaataari. Necocua Drusilaari Judiocuacajiniinjio maaji quijia. Camarnu Félixri na soldadohua sequequiaari:

—¡Pablo nia tohuatere! Janiyari cua niqiuocuaata na tojiniu paniyani. Cuaara canaa niqiuara pohuataara taate Jesuucua tiuushanojuaarani.

²⁵Naacujitij, Pabloori Félix pohuataquiaari nojori niqiuara taate pa naata maninia miijia pa quiniuni. Pohuataquiaariuhuaaj taate pa naata tama pa cuaqueyajaaja pa cojuanu maniniani, sesa pa miyaquiniucuaaji. Naajuhaaj, Pabloori na numotequiaari Pueyasoori sesa miijiaa saniitionutaniya.

Camarnu Félix jaara naa tojiquiaaritij, jiyanohua shiriiquiaariiri. Pablo sequeereeri:

—¡Tariucuaaja! Quia quiaarohuacuarajaara. Janiya jaara jeya quiriqiani, janiyacua quia sequeeraniuhuaaj.

²⁶Camarnu Félixri naa sequeyarucua na soldadohua sequequiaari Pablo na jiyatanura nocua, nata na pocoojonura. Nojuajaari juucua jiyaniquiaari Pablo naasucuaari cumaneeca na niqutionutaniya na cartesaanura. ²⁷Pablo shocojoquiaariiri caapiqui marijia, nujuatesano na quishacari Cesareya tiacajinia. Jiyacaritij, Porcio Festoori saniniujia camarnura jiyatesaaquiaari Félix niti. Majaari Félix tohuatenu quiquiaari na nuhuajiria Pablo. Naajaa na tiujiaquiaari nujuatesanoori. Naa miiquiaariiri Judiocuaca timitianura nojuaja.

25

Pablo pohuatasacari Festo niqiuara Jesujiniji

¹Jiyacaritij, Festoori tiuquiquiaari Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quiaquiaari Jerusalén tiacajiniaari.

²Jerusalén tiacajinia na quishacari, pueyacuara secojonaajiyaniijianucuaari tii Judiocuacajiniinjio socua tojishano camarucuaata Pabloocuaa saquirojotaquiaari camarnu Festo.

³Nojoriiri camarnu Festo sequequiaari cuaara na soldadohua jiyaroora, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nucuamaji na nishacari. ⁴Camarnu Festoori saaja nojori riucuaquiaari:

—Nujuatesano quia Cesareya tiacajiniacuajaruhua. ¿Maatucua casaara niyara rishaareni? Janiyacuajaari nocua tacatenutaniuhuanu.

⁵Camarnuuri nojori sequequiaarijuhuaj:

—Niajanijajiniinjio socua tojishano pueya cuaara quiojohuara cuata Cesareya tiacajinia. Nojoriiri na naata Pabloocuaa saquirojotanu cua niqiuara tii, cua niishiniuria maninia, Pablote seetanujuaana sesa miiquianujuuara.

⁶Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaariuhua Cesareya tiacajiniuhuari. Na tiuquiniu nuhuaji, saniniujia tariqui cajiquiaari nequesoreesaqui camarnu cajitijiniiaari, camarnu na quishacari. Jiyacari na soldado sequequiaariiri cuaara Pablo tohuateera na nequesoreeso-coriqiuano. ⁷Judiocuacaari tari tiuquijioquiaari Jerusalén tiacajiniijijiuhuaj, Pabloocuaa na saquirojotanuunura. Pablo jaara nujuatesaaquiaari camarnu tacoji, cuno pojoriiri jaarajaaja catecanoquiaari Pabloocua. Nojoriiri jiyanohua sesa nocuara saquirojotanu- quiaari najuhuaa queraatia casa. ⁸Jiyacaritij, Pabloori tama nocuaji na tacusacarijiaaja naa sequequiaari:

—Maja sesa cua miiniu quiquianu. Janiyari tariucuaaanu Moisés Rootasano tojiquiaa- jaaniuhuaaj. Majaari sesa cua miiniu quiquianu Pueyaso Secojojua tiajuhuaj. Majaari Roma tiacajinia quijia pa jiyaniijia tojiyashijia cua quiniu.

⁹Camarnu Festoori jaarajaaja Judiocuaca panishano miiquiaari, cuno pueya paniniuria nojuaja. Naaratej, Pablo nequesotaquiaariiri:

—¿Quiaate Jerusalén tiacajinia quianu paniya, tii cua nequesoreenura quiajaniya?

¹⁰Pabloori na riucuaquiaari:

—¿Majateeri Roma tiacajiniji pa jiyaniijijanaa quia jiyatecanu niya camarnura quia quiniuriacuaja? ¿Casaara niyaja quia nequesoreyacuia janiyarini? Roma tiacajinia quijia pa jiyaniijiacuajaari niya camarnura quia jiyatecanu. Quiaacuajaari niishiyajuhaaj, majaari sesa cua miiniu quiquianu Judiocuaca. ¹¹Janiya jaara sesa miiri seetanujua- naani, cuaara cua motuuraqui. Cucuara cuno pojori saquirojotasano jaara coriaa quiri, majaari quenaaja tamonu pueyano naata niqutionu janiya cua mosaanura. ¿Janiyatucua

casaara mosaare najuhanani? Naaratej, janiyari quia sequeyani camarnunaa: jiyaniijia Césarjanaa cuaara cua nequesoreeraqui.

¹² Camarnu Festo pocoojonu nuhuaji na nacasunaata, Pablo sequequiaariiri:

—Quiaacuaajaari cua sequeree cua jiyaronura quiajaniya pa jiyaniijia Césarjua, nojuajanaa nequesoreenura quiajaniya. Janiyari nocua quia jiyaronutaniya cua soldadohutatani.

Jiyaniijia Herodes Agripa niqiara Pablo pohuatasacari Jesujiniji

¹³ Naa Pablo sequesaanu nuhuajitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhuatanura nojuaja. Agripaari tiuquiquiaari na rimiatu Bereniceta. ¹⁴ Nojori camueenujusacari camarnu Festo tiacijinia, Festoori socua jiyaniijia Agripa pohuataquiaari Pablojiniji. Na sequequiaariiri:

—Tamonu pueyanoori niya quiya, Félix tiujiasano njuatesano. ¹⁵ Jerusalén tiacajinia cua quishacari, Judiocuacuara secojonaa jiyaniijianucuaari nocuara cua saquirojotacanu, Judiocuaca camarucuata. Nojoriiri cua sequetucanu Pablo cua motenura. ¹⁶ Janiyari saaja nojori riuucuanuni: “Roma tiacajiniji jiyaniijiaari maja ritia na monu pueyano. Nocuara saquirojotanaa cuaara nijjoma niya nocuara saquirojotanuunura-jaatijia. Monu panishano cuaara rihuaneera tamajaaja quenaaja nocuaji, jaara seetanujuanaa quiaquiri nocuara saquirojotasano”. ¹⁷ Naacuajitij, Jerusalén tiacajinijinio pueya nocuara saquirojotanuuriquiano jaara cucua tiuquijiocanu, majaari socua cua tarishiniu quiqianu. Janiyari tariquicuaji nequesoreeja cajitujinia cajiqianuni, pueya camarnu cua quishacari. Janiyari jiyacari cua soldadohua sequereeni nojori jaatucunura cucua cuno pueyano. ¹⁸ Cuno pojori Pabloocua saquirojotanuucanuni, nojoriiri maja quenaaja na saquirojotanuunu quiuucuaa juhua cua niishiriojosano. ¹⁹ Saaja tamaatia nocuara cua saquirojotanuureeri. Pablonaari nojori supuetanaa Pueyasojiniji rootasano tamacaquiaa saaja. Cua sequetureejaariuhuj, Jesu jiyanishano pueyanonaari mosaaquiaari. Pablonaari saaja pueya niishitiojiyacujua, cuno Jesu jiyanishanonaari samitiaciaariuhua. Saminionaari quiari quiyajaa. ²⁰ Naa cua tojihacari nocuara pueya saquirojotasantej, majaari cua niishiniu quiqianu taa cua miiniutianiyani. Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quiajaniya?” ²¹ Nojuajaari saaja cua sequecanu: “Jiyaniijia César Augustojuanaa cuaara cua nequesoreera juhuari”. Janiyari cunora niyaja njuatesano na jiiitaani, janiya cuaara na jiyarore jiyaniijia César Augustoocuaajaatijia.

²² Jiyaniijia Agripaari camarnu Festo sequequiaari:

—Janiyari cuno pueyano tojinu panijajaacuhuj.

Festoori na riucaquiaari:

—Quiaacuaajaari tariqui na tojinutianiya.

²³ Tariqui, jiyaniijia Herodes Agripaari niqiaariuhua Bereniceta. Nojoriiri tiuquiti-aciaari nequesoreeja sohuacajinia, shanohua jacaria na rucuanenuta, shanohua na toqueya maniniuquiyatajuhuaj. Puereeta niqushano. Nojori tiuquitiacacari, nojori cojiquiaariiri soldadohua camarucua, mariyata tama cuno tiacajinijinio camarucuaajaanio. Camarnu Festoori jiyacari na soldadohua seerataquiaari Pablo na rinuria, nojori tacoji na njuatesocoriguiano. ²⁴ Pablo tiuquishacari, Festoori sequequiaari:

—Jiyaniijia Agripanaa, puetunu niya canaata rerejono pueyajanaanaa, cua tojitiare. Cuno pueyano niaa na niqiyani, queraatia Judiocuacuari nocuara cua saquirojotanu- quiaa, Jerusalén tiacajinia cua quishacari, niya Cesareya tiacajiniajuhuaj. Nojoriiri pueyaracaanu cua taajetequiaa. Cua sequetuquiaari: “Cuno pueyano cuaara mosaare camarnunaa”. ²⁵ Janiyacuajaari tari niishiyani, nio pueyanoori maja sesa na mi- niu quiqianu. Naacuajitij, janiyari niishiriojiyani, ¿pueyanotucua casaara najuhuaana mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustoocua, pa jiyaniijiajanaa nequesoreenura nojuaja. Janiyari cunora na jiyaronu- tianiyani. ²⁶ Saniniuujia majaari cua niishiniu taa cua pohuatanutaniya cua jiyaniijia cua naajiojiniani. Cunora, nio pueyano nitirii niya nia nequesoreesocoriguanonijia, pueyanaa. Janiyari quia panitia cutara nojuajanaa quia nequesoreenurani, jiyaniijia Agripanaa. Quia nequesoreere, cua naajionura pa jiyaniijia Augustoocua casaara nio pueyano cua jiyarore nocuani. ²⁷ Majaari cua naata naajaa jiyaronu quiasano pueyano, maninia nequesoreyaquishoojua.

26

Pablo riuhuanesacari jiyaniijia Agripa

¹ Jiyacaritij, jiyaniijia Agripaari Pablo sequequiaari:

—Quiocuaji quia riuhanereja, jaara seetanujuanaa quiyaquiri quiocuara pueya saquiriojotasano.

Pabloori na juaashi quia sana quiaaari. Naa coteequiaari pocuanuuri:

²—Timiyaniija jiyaniija Agripanaa, quia sequesacari cua pocuanura quia niqiuara, tama cua tacunura cucujijiaaja, Judiocuaca saquiriojotasanojiniji cucuara. ³ Quiaari puetunu cuarta Judiocuaca miijiosanojuanaa niishijajuhuj, puetunu canaa nacojo-tasanojuanaano. Janiyari cunora quia sequeyani, nareja cua tojiri cua pohuatasacari quiajanija.

Pablo pohuatasacari taa na quiquiaari Jesuucua na tiuyaquishacarijiani

⁴ Puetunu Judiocuacajanaari niishiyajuhuj taa quijia cua quiquiaari cua naatujajiniiji nojoritia cua quishacari cua jiyajiniani, Jerusalén tiacajiniano. ⁵ Cuno Judiocuaca quia nequesotasureeraj. Nojori cuara quia pohuataara jaara paniri pohuatanu. Cua mashajajiniiji, janiyari seetanujuanaa Fariseo quijiani. Fariseocuacaari puetunu canaa supuetanaa rootasano Pueyasojinijijianaa tojtiaja cutara, socua tamasaca cuarta Judiocuacajiniiji. ⁶ Nojorijiaari cucuara saquiriojotacanu cua tiushacari Pueyasooocua, taa na samiitianiijionutaniuhua macunucuanu. Pueyasoori nojori samiitianiijionutaniuhua taa na sequequiaari tariucuaaanu canaa supuetanaacujani. ⁷ Quiarijiani, canaa supuetana Israel doce niqiuohuacujinino caneno pueyari naa seetanujuanaa Pueyaso sequesano niqiniuria sashiyajaa. Naaratej, nojoriiri pueyaracaanu Pueyaso secojonuquuaa, juuca, niucuanio, Pueyaso na tojtiasacari. Naa cua sashishacari Pueyaso sequesanojuhuaj Jiyaniija Agripanaa, nio cuarta Judiocuacaari quiarijia cucuara saquiriojotanuquuaa. ⁸ Naaateeri jiyaniya Pueyasoori maja na naata macunucua samiitianiijionuhua?

Taa Pablo miitiaquiaari Jesuucua tiuuniaa tarijiani

⁹ Janiyari tarija sequequiaari tamajaajani sesa cua niishiriojosacari Jesujiniiji: “Nazaret tiacajinijinio pueyanooocua tiuuniaa pueya paracaariiraj”. ¹⁰ Janiyari seetanujuanaa taraatia nojori miitiaquiaari Jerusalén tiacajiniani. Pueyacuara secojona jiyaniijianucuaari cua jiyatequiaari nojori cua miitianura. Naacujitij, janiyari queraatia Jesuucua tiuuniaa riuniujuquiaari nujuatejojuajiniani. Nojori jaara puecoosaaquiarijihuhuj, janiyari jaarajaaja sequequiaarini: “Maniniacuaja, cuara puecoosaria”. ¹¹ Janiyari sequeyarucua naa miitiaquiaari Jesuucua tiuuniaa pueyani, nojori cua pishojonura Jesuucua nojori tiuuniu.

Janiyari naa miiquiaari nojorini puetunu cuarta Judiocuaca rerejojua tiacajiniaqueyajanaa canaa jiyajinia. Janiyari jiyanoehua nojori juaajia quiquiaarini. Majaari quenaaja nojori cua niqiniu paniniu quijia. Naa cua miitiasocoriquiano nojoritij, janiyari nojori pajequiaari tucuaaanu tamonu jiyaca tiacajiniani.

Pablo pohuatasacari taa Jesuucua tiuujara na quiquiaarini

¹² Naacujitij, janiyari juucua quiariquiaa Damasco tiacajiniani, pueyacuara secojona jiyaniijianucua jiyarosano. Janiyari tiriara quiariquiaani cua pajenura socua Jesuucua tiuuniaa pueya cua miitiasocoriquiano. ¹³ Nucucua cua quiasacari jiyaniija Agripanaa, janiyari jiyocuaaanuji nunusaaquiarini, cuata quiojonaajuhuj. Cuno shacantuucaari socua jiyanoehua shacantuuca quiquiaari pananujiniiji. Panacariiri jiyacari quiri quiaa. ¹⁴ Cuno shacantuuca jaara canaa nunuquaaari, canaari juhua quejoosaaquiarini. Janiyari jiyacari tojiquiaari rupaani. Hebreo rupaajinia cua sequeriquiaari: “¡Saulo, Saulo! ¿Casaara puera quia miitiaa janiyani? Naa quia miishacaritij, quiaari tama quia cuaqueya miitiaajacujua. Juhua juajaaja pueyano, na juaashacari saaja mocoshoco patiyashiyari”. ¹⁵ Janiyari na sequereeni: “¿Cantequia Jiyaniijianaa?” Cua riucureeri: “Janiyacuajaari Jesuni, quiaa na miitiaquiaani. ¹⁶ Quia sanerohua. Janiyacuajaari quiocua muetareeni puetunu cua panishanojuanaa miijara cua jiyatenura quiajanija, quiarijia janiyajiniiji quia niquishano quia pohuatanurajuhuj. Naajuhuj, na nuhuaji janiyari quiocua muetanutaniuhuanu janiyajiniiji quia niquishanorano pohuatana quia quiniuria. ¹⁷ Cua jiyarosacari quiajanija, janiyari quiarta Judiocuacaacujia quia cojuanutaniyacujani, tamonu jiyacajinijinio taucuaacaacujinino, tiqiyocua quia rucuanijosacari janiyajiniiji quia poojotasacari. ¹⁸ Nojoricua quia jiyaroyaniija, janiyajiniiji nojori quia pohuatana, maja juhua nimishituu nojori quiniuria pueyaracaanu. Quia pohuatasacari janiyajiniiji nojori, nojori juuujiaari juhua cuhuatasaanutaniya cucua nojori tiushacari. Nojori jaara naa miiri, Sesacaari maja tari nojori jiyaniija na quiniu quiniutianiya. Naa nojori tiushacari cucuatej, Pueyasoori puetunu sesa nojori miishanojuanaa jiyanoonutianiya. Pueyasoori puetunu na saquiriojosano pueyatajanaa nojori rupuetootenutaniya, puetunu Pueyaso jiiitasanojinijijianaa nojori jiiitanurajuhuj”.

Pablo pohuatasano Jesu tojiijara na jatanujiniiji

¹⁹ Naacuaajitij jiyaniijia Agripanaa, janiya jaara naa tojiquiaari sequeshiyano jiyocuaaanujini, majaari cua tarijonu quiquiaarinioj. ²⁰ Janiyari jiyacari juhuacatecara Damasco tiacajinia Pueyaso rupaa Jesujiniji pohuatanu coteequiaarinini, na nuhuaji Jerusalén tiacajinia, mariyata puetunu cuno Judea jiyajiniajaaniano. Maja saaja cuarta Judiocuaca cua pohuatanu quiquiaari Jesujiniji, janiyari taucuaa pohuataquiaarijuhuaj. Nojori nacasuquiaarinijia cuaara sesa nojori miishano carteera, Pueyasooocua nojori tacatonuhuaa nojori jiuujia. Janiyari nojori sequequiaarijuhuaj, cuaara saaja maninia miijiaa quiiria, na niishishaanura Pueyasoori seetanujuanaa nojori jataniquianu. ²¹ Naa cua pohuatanuucuatej jiyaniijianaa, cuarta Judiocuacaari cua quiatucanu Pueyaso Secojonuuja tiajinia. Cua motunu paniquianuuri. ²²⁻²³ Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pohuatanu Pueyasojiniji; poonijionuutesano pueya, tojishano pueyanio. Majaari tama cua niishishanojuaja cua pohuatanu quiquiaa. Janiyari pueya niishitiojoquiaani taa tariucuaaanu Pueyaso sequesano caminiujunaa naajionuutaquiaaricuaajani, naajuhuj, taa Moisés naajiotasano quiya tariucuaaanu Pueyaso Rupajiniacuajani. Nojori naajionuutasanoori seetanujanaa. Naa sequeyari:

“Pueyaso Jiyarosocoriqianoori naquiya miishaanutaniya. Na cusonu nuhuaji, nojuajaari coteenu samiitariquianohua. Jaara samiitiarohua, nojuajiniji pohuatasanoori puetunu pueyapuejanaa cuhuatanutaniya. Naacuaajitij, nojoriiri niishiniutianiya nojori jaara nocua tiuuri, nojoriiri samiitiaconutaniuahuajuhuj; Judiocuaca, taucacanio”.

Pablo tiutiniu panishacari jiyaniijia Agripa Jesuucua juucua

²⁴ Pablo jaara naa sequequiaari tama nocuaji na tacusacaritij, camarnu Festoori nacaquiaari:

—¿Taa quia miyani Pablona? ¡Quia mueyocuaquui seseree puera quia niishiniucua!

²⁵ Pabloori na riucuaquiaari saaja:

—Maja cua paatenu, camarnu Festonaa. Cua sequesanoori seetanujuanaa, maja cuarcashiniu. ²⁶ Jiyaniijia Agripaari puetunu cua sequesanojiniji niishiyajuhuj. Cunora majaari cua puerenu na niquiara pocuanu. Nojuaja naasucuaari tarijia tosaaquiaaricuaaja Jesujiniji, Jesuucua tiuunaa pueya miishanojinijijuhuj. Puetunu canaa miishanojuanaari maja jiyasohuaja na miishaanu quiquiaa. ²⁷ Jiyaniijia Agripanaa, ¿quiaate tariucuaaanu Pueyaso sequesano caminiujunaa naajionuutasanoocua tiuyajuhuj? Quiaacuajaari nocua tiuya. ¿Naatejaaratej?

²⁸ Jiyaniijia Agripaari na sequequiaari:

—¿Quiaateeri ritia cua jiyatenu paniya Jesuucua tiuuniara?

²⁹ Pabloori na riucuaquiaari:

—Naajaa, ritia, na nuhuaji soj, taa quia paniyacuajani. Pueyaso maara seetanujuanaa naara quia jiyatere taa quia sequeyacuajani; maja saaja quiajaniya, mariyata puetunu pueyajanaa niya cua tojitiaani, juhua janiya nia quiniurajuhuj. Maja naatej, taa cumayocuata moronucua cua nujuatashuyanijia.

³⁰ Jiyacaritij, jiyaniijia Agripaari sanequee, camarnu Festojuhuj, Berenicio, puetunu cuniqui nojoritia cajitiunaa pueyanio. ³¹ Nojoriiri cuniquiji tamaqui pacutaquiaari jiyareta nojori pocoojonura Pablojiniji. Tama nojoriiri sequetooquiaari:

—Cuno pueyanoqui seetanujuanaa maja sesa na miiniu quiquianu na mosaanura, maja quenaaja na nujuatesaanurajuhuj.

³² Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyaquiquianu pa jiyaniijiaacua quia jiyaronura nojuaja.

27

Roma tiacajiniara Pablo jiyarosaanujiniji pohuatasano. Nio naajiona Lucasri nata quiriquiaa na cojiriquiano

¹ Camarucua jaara sequequiaari canaa buquejinia jiyarosaanutaniya Italia jiyajiniani, Pabloori jiyacari narta quiuosano pueyata cojiritiasaquiaari niqutiono soldadohua capitán. Cuno capitán sesaari quiquiaari Julio. Na soldadohua maanuuri sesojosaaquiaari “Augusto”. ² Jiyacaritij, Adramitio tiacajiniji buqueeri quera ruparetariquiaa, Asia jiya tiacajinia shiiniuquitiariquiano. Canaari cuno buquejinia jaaretaquiaarinini. Canaata quiriquiaajaariuhua Aristarco. Nojuajaari Macedonia jiyajinia Tesalónica tiacajinijinio pueyano quijia. ³ Canaa quianu nuhuaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Juloori jiyacari cuniqui maninia

miiquiaari Pablo. Nojuajaari Pablo tarinitiaquiaari cuaara tacaara na rupuenaa puey-acua, nojori na saruhuatanura Sidón tiacajinia, naajuhuj, na rupuenaa niqutionura puetunu Pablo panishanojuanaano. ⁴ Canaa jaara jaaretaquiaari Sidón tiacajinijini, canaari canaa muenecara niqumiaa Chipre jiya tucuaatijani. Paratuuri buque nacaacoji piyarojoriqiaa saaja. ⁵ Canaari Sidón tiacajiniji niuutiaquiaari Cilicia jiyacuani, Panfilia jiyacuani. Canaari na shuriquiumia jaaretamaani. Canaari Mira tiacajinia tiutiaseeni, Licia jiyajinia.

⁶ Capitánri cuniqui riuriataquiaari Alejandría tiacajinijinio buque. Italia jiyajinia quiariquiaari. Naaratej, canaa tacanitiaquiaari cuno buquejinaari, tii canaa quianura saniniujia. ⁷ Canaari camueenujuquiaarini, puera jacaria canaa jaaretanuucua. Naa canaa tarishiniuucatej, canaari socua tiuquishiiquiaari Gnido tiaca taquijiriani. Paratuuri saa canaa patariquiaajaa. Naacuajitij, canaari Salmón jiya tucuaatijaniyojua shuri-uucaratamaani. Canaari Creta jiya tucuaatijaa camarucutamaajaniuhuj. ⁸ Naa puera canaa tarishiniuucua canaa jaaretasacari Creta jiya shuriquiumiatej, canaari socua tiuquishiiquiaari pueya jiyaniquishano “Tacataja Maniniujiniani”. Cunoori Lasea tiaca shuriuucua quiya.

⁹ Canaari puera tarishiquiaari tarini. Judiocuaca miaquenuyaquiniu juucaari tari shocoquiaari. Jiyacaritij, shoniniacu caminijainiaari puereeta quijia tari buqueta jaaretanura. Pabloori juucua sequequiaari:

¹⁰—Camarucuanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiniutianiya. Paa naasucuaari cusununutanijayuhuj. ¿Casaatejaj pa toyani?

¹¹ Pablo jaara naa sequequiaaritij, majaari buque jiyatana capitán tojinu quiquiaarinoj. Saaja buque camarucuanaa tojiquiaariiri, buque capitánio. ¹² Cuno tacatajainijii canaa tii tiuutiariquiaani, majaari maninia quiquiaari shuniya canaa tajitiniuria tii. Nocujaj, puetunu pueyajanaari sequetuquiaari:

—¡Niiquiji pa quiaarej! Fenice tiacajinia pa quishii shuniyacuaji.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatijaacuaaja.

Shoniniacu caminijainia paratu piyarojosacari jiyanoehua nojori

¹³ Jiyacaritij, paratuuri jacaria piyarojonu coteequiaari pananu shuucujaj, canaa muenecarajiniji. Naaratej, nojoriiri sequetuquiaari:

—¡Pa naatacuajaqui niiquiji quianu!

Canaari cuniquiji ruparetaquiaarini. Creta jiya tucuaatijaa shuriquiumia jaaretaareeri. ¹⁴ Na jaaretasacari shiitianiyojua, paratuuri canashiyaquiji jiyanoehua piyarojoriaari buque. Cuno paratu sesaari quijia “Noreste”. ¹⁵ Paratuuri buque capotariquiaa na shuucujajiria saaja. Naaratej, majaari canaa naata jaaretanu quiriquiaa paratu piyarojosacaji. Paratuuri saa canaa patariquiaajaa. Nocujaj, canaari buque tarinitiaquiaarini paratu cuaara na capotara tamajaaja. ¹⁶ Paratuuri canaa capotaquiaari tamonu jiya tucuaatijaa tamajiria. Cuno jiya tucuaatijaa sesaari quiquiaari Cauda. Majaari puera paratu piyarojonu quiriquiaa tii. Canaa rishano boteniyojuaari buque pajamaji jaasutariquiaa. Canaari jiyanoehua poonijioquiaari cuniquini, canaa tacaniniuhuaa buque cacojiria cuno boteniyojua. ¹⁷ Bote tacanishaanu nuhuaji, canaari buque cuaqueya morojoquiaarini na cumaquiniuria na jiaqueyaquiniuucujaj. Pueyari na puerenuta sequetuquiaari:

—¡Paratuuri pa capotanutaniya jaaquiajiniara! ¡Paari tii riiitianutaniyani!

Cuno canaa pueresano jaaquiani, na sesa quiquiaari Sirte. Nocujaj, nojoriiri buque toqueya roshinitiaquiaari. Paratuuri saaja capotaquiaari buque. ¹⁸ Jaara juhuaquequiaari, paratuuri saaja jiyanoehua piyarojoriqiaajaa. Naaratej, nojoriiri buque pasano casami quejooonu coteequiaari moojinia. ¹⁹ Canaa camueenujusacari jiuujianaraca juuca naquiya canaa miishacari, canaari buque casamijanaa quejooquiaari socuani, buque namuenura quenaaja. ²⁰ Tari canaa shocojoquiaariiri queraatia juuca. Majaari quenaaja canaa niqiniuu quiquiaari pananu, riyanio. Paratu piyarojosacari canaacua, mohuacaari socua jiyanoehua cajiniuucuaquiaari canaacua. Nocujaj, canaari niishiriojoriqiaani canaari quiarijia cusununutanianiyani.

²¹ Majaari tojeterucujanaa quenaaja canaa miaquenu quiquiaari pueyaracaanu. Pabloori jiyacari nujaquiaari canaata quiniaa tajiniji. Naa nojori sequequiaariiri:

—Camarucuanaa, niaa jaara tojiquianu quenaaja cua sequesano, maja pa ruparetanura Creta jiya tucuaatijainijii, paatuma naa miya naquiyani. ²² Naajaa, nioojia nia cumaquiri. Maja quenaaja niqiriyaatu pajaniyajinijinio cusonu quiniutianiya. Pa buque cutaraari juhua rapitiasaanutaniya puetunujuanaa. ²³ Janiyari quiarijia cua maquenujinia cua

Jiyaniijia Pueyaso seru niqiriiri cua shuriucua nujuaanoni. Janiyari cuno Pueyaso toji-jiani. Janiyacuajaari na pueyanoni. ²⁴ Pueyaso seruuri cua sequeree: “Majaari puerenu Pablonaa. Quiaacuajaari jiyaniijijanaa Augustoocua tiuquiniutianiya Roma tiacajinia. Quiaari na tajoji nujanutaniya quia pocuanura. Naajuhua, Pueyasoori quia secojosano tojiirucuaa. Naaratej, puetunu quiata quiniaajanaari quiata rishiniutianiyajuhua.”

²⁵ Naacuajitij camarucuaana, nioojia nia cumaquiri. Janiyacuajaari seetanujuaana niishiyani, naa quiniutianiyari taa Pueyaso seru sequeree janiyacuaajani. ²⁶ Naajaa, paari tamonu jiya tucuaatiajaacua juhua niojosaanutaniyani.

Pabloori naa canaa cumanijiaquiaari.

²⁷ Pueyaracaanu canaa jaaretasacari shoniniacu caminiajinia, caapiqui semaanaari tari canaa shocoquiaari. Tamonu niucua canaa jaaretasacari, canaari Adrijinia quiriquiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneetariquiaa jiyareta. Jaara shiyaqueya quiriquiaa cuno niucua, buque jiniacuma poonijionaari niishiquiaari canaari tari jiyacua catecanoyani. ²⁸ Buque jiniacuma poonijionaari jiya shanacuquiaari, na niishiniuria queroniti quiriquiaajaa. Na shanacutusacari, saaja treinta y seis metro queroni quiriquiaari. Jaara socua na tajoji shanacutuquiaariuhua, saaja veintisiete metro queroni quiriquiaari. ²⁹ Nojoriiri puerequiaari buque naasucuaari shoniniacu caminia casaqueyaji pojotujua saicua cutanutaniya. Nocua, buque pajamaji sohuaneyocuata morojotasano cuatro niajaaca casaa quejootuquiaariiri, buque nujuatanura pootia. Nojoriiri cuniquijia na puerenuta sashiquiaari cuara juhuaqueera. ³⁰ Jiyacaritij, buquejinia poonijionaa pueyari juucua cuno niucuaaja jiyasohuaa mashiyocuatunu paniriquiaa buquejiniji. Naaratej, nojoriiri buque nacaacoji sapojonu tinijiotariquiaa niajaaca casaa moojinia. Jiyasohuaa roshini-tiuriquiaa jiyocuaacaanu tacanishano boteeri, tii na mashiyocuatunura. ³¹ Pabloori jiyacari na jiyatana capitán toquiaari, na soldadohuanio. Naa nojori sequequiaariiri:

—Cuno pojori jaara nia juhuaqueyaquimia pata, niaari cusunuiriquiano.

³² Soldadohuari ritia jiyocuaacaanu tunusano bote neyocua jiyatajotaquiaari. Moojinia na tinitiuriiri. Paratuuri na piyarojoquiaari tamoco nojorijiniiji.

³³ Juhuaquenu panishacari, Pabloori puetunu buquejinia quiniaajanaa sequequiaari cuara quenaaja miaquenuura. Naa nojori sequequiaariiri:

—Tari nia shocojiyari catorce juuca pueyaracaanu nia sutesacari. Majaari nia miaquenu quiquiaajuhua. ³⁴ Quiarijia nia miaquerecuara, nia cuaqueya nia cumaquitajara quenaaja. Majaari quenaaja niqiriiryatu niajanianijiniio cusonu quiniutianiya quiarijia.

³⁵ Naa na sequenu nuhuajitij, Pabloori pan riquiaari. Na miaqueyaquishacarijia, coteenu Pueyaso secojeree puetunu nata quiniaa niquiarijanaari. Na nuhuaji miaque-rohuari. ³⁶ Tamasaca jaara naa niqiquiaari Pablotej, puetunu nojorijianaari noojia caji-tiquiaari. Pan satureejaariuhua. ³⁷ Cuno buquejinia, puetunu canaajanaari quiquiaarini doscientos setenta y seis pueya. ³⁸ Puetunu pueyajanaa jaara tooquioquiaari, na nuhuaji trigo quejootuquiaari moojiniaari, buque namuenura quenaaja.

Buque coquesacari caminiajinia

³⁹ Jaara juhuaquequiaari, buquejinia poonijionaa pueyari maja na niishiniu quiquiaari teyano jiya tucuaatiajatejaara cunoni, nojori na niqiriiquiaani. Nojoriiri cuno jiya tucuaatiajaacua niqiquiaari puereetuca surocohua. Jaaquiaari puetunu na shocujanaa quiriquiaa. Naacuajitij, nojoriiri sequetuquiaari:

—Buque pa saniri shiitianiini surocohuama.

⁴⁰ Buquejinia poonijionaa pueyari niajaaca sohuaneyocua jiyatajotaquiaari. Cuno niajaacaari caminia jiuujiajinia jateequiaari cuniquijia. Nojoriiri buque niqiniijiotetajaa roshiniatiaquarijiiuhua, buque tacutajara. Buque nacaacuaji teja toque tacanitiaturee-jaariuhua. Buqueeri canujutaaree jaaquiajiniara, paratu piyarojosano. ⁴¹ Buqueeri saacariji jaaquiajinia riitiaseequiaari, caminia cajiniuucuasacari mohuaca paatishano jaaquiajinia. Buque nacaari jiyanohua tiuquishii cumaatia jaaquiajinia. Majaari quenaaja na naata pooniu quiriquiaa na matasaquiji. Na pajaari maa rapuequiaarijia moo cajiniuucuasacari jiyanohua nocua. ⁴² Soldadohuari nojori jiyatasano quioosano pueya puecoonu paniquiaari cuniquijia, nojori jiyaniishacari cuaconutaniya naasucua, mashiyocuatumaari. ⁴³ Capitán cutaraari Pablo tiuquitiini paniquiaari jiyaniijia Augustoocua. Naaratej, na soldadohua sequequiaariiri:

—¡Maja quioosano pueya puecootunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuara cuacoora coteenu, jaaquiajinia rupaatiushicu-aari. ⁴⁴ Cuaashijianucua saniniuuja cuara buque jiniacumaji suruhuatuneeacaaca jacamatuura na cuatajara. Tamasaca cuara buque neecaacua jacamatuurajuhua.

Naa miitiuquiaariiri. Puetunu pueyajanaari jaaquiajinia rupaatiushiiquiaari.

28

Pablo quishacari Malta jiya tucuaatiajajinia

¹ Puereeta canaa cuaconu nuhuaji shoniacu caminiajinia, canaari namitia puetunu-juanaa maninia tacataseequiaari cuno jiya tucuaatiajaacuani. Canaari jiyacari shusha niishiquiaarini, cuno jiya tucuaatiaja sesaari quiquiaari Malta. ² Cuno jiya tucuaatiajaacua quijia tucuaacaari maninia canaacia jiyanoquiaari. Shiniquiaari quiriqiaaa. Maru-
uri niriqiaajuhuaaj. Naa canaa shiniquiosacaritij, tucuaacaari canaara noshitiquiaari puereetuca mani. Na nuhuaji canaa sequetureeri:

—Miji. Nia jitiushii.

³ Pabloori naanacuaa reratejoriqiaajuhuaaj. Manijinia na quejooriquiaari. Jiyacaritij, soconuquiri manicuaji mashiriquiaa juucua. Pablo juaashiquia saariiri. ⁴ Cuno jiya tucuaatiajaacua quijia pueyari soconu niquiquiaari Pablo juaashiquiaacuaji sohuataano. Jaara naa niqutiuaaariitij, tama nojorijiaarijia sequetooquiaari:

—¡Nio pueyano naasucuaari pueyano moju! Cocuaatia miirii juucua shoniacu caminiajinia na cuasacari buquejinijiri. Pueyasoori quiarjia saniniuujia cunora soconu na sajitirii na cusonura.

⁵ Pabloori saaja manijinia majiriataree soconu. Majaari quenaaja na sajiyashi noonu quirii. ⁶ Puetunu pueyajanaari na sashiriquiaa, taacari na porenutaniyani. Na sashituriqiaajuhuaaj na jivanitushacari canashiyajijia cusunutaniya naasucua. Naa pueyaracaanu na sashitushacari juucuatej, nojoriiri socua tamaatia niishiriojonu-
uquiaari. Nojoriiri Pablojiniji sequetooquiaari:

—¡Cuno pueyano naasucuaari pueyasojuhuanajaj!

⁷ Cuniqii canaa quishaquini, canaari tamonu pueyano cuhuariquia shuriucua quiriqiaani. Na camaruuri cuno Malta jiya tucuaatiaja camarnu quiquiaari. Na sesaari Publio quijia, maninia pueyano. Nojuajaari canaa masuuquiaari na tiacora. Canaa mianuntequiaari maninia tiiri. Canaari jiuujianaraca juuca na tiajinia camueequiaarini. ⁸ Cuno camarnu queeri jiyacari cusosu matariquiaa. Jiyanohua naseecaari quiriqiaaa. Coriyacau rurequeriquiaajuhuaaj, na jiniacuma noonunio. Pabloori nocua tiuquiquiaari na matasaqui. Pueyaso secojoree nocuaraari. Na secojosacari, nocua niaquiaari na juaashiquiaari. Pueyanoori naatarohua. ⁹ Cuno jiya tucuaatiajaacua cusosuhua jaara niishiquiaari naa Pablo naatanishanocuaa cuno pueyanotej, nojoriiri nijioquiaarijiiuhuaaj. Pabloori puetunujuanaa na naatanijioquiaari. ¹⁰ Naa Pablo miiniuucatej, cuno pueyari na jiiitasano casamijinjii canaa niqutiojoquiaari nareja. Na nuhuaji, canaa jaara quiaquiaari cuniqii tamonu buquejiniani, nojoriiri canaa jiyatajara canaa panishano niqutiojotujuiaari narejajuhuaaj.

Pablo tiuquishacari Roma tiacajinia

¹¹ Canaa sashishacari shuniya cuara tajiiria, jiuujianaraca racaari canaa shocojo-
quiaari Malta jiya tucuaatiajaacua canaa quishacari. Alejandria tiacajinijinio buqueeri tii nujuatariquiaajuhuaaj. Shuniyacuaijii tiutiaquiaari tiiquiri. Cuno buque nacatuuri juhua nojori pueyasohua Cástor nacara quejasano quiquiaari, juhua Pólux nacanio. Canaari cuno buquejinia quiojoquiaari cuniqijini. ¹² Canaari Siracusa tiaca tacatajajinjii tiu-
tiaseequiaarini. Canaari jiuujianaraca juuca camueenujusee tiini. Siracusa tiacaari Sicilia jiya tucuaatiajaacua. ¹³ Cuniqii canaa quiasacari, canaari cuno jiya tucuaatiaja shuriucuaataareeni. Canaari Regio tiacajinia tiuquishii. Tariqui, paratuuri maninia piyatoriquiaa buque nijinjii. Canaari cunora tama tariqui tiuquishii Puteoli tiacajiniani. Canaari quiniqii tacatasee puetunujuanaani. ¹⁴ Puteoli tiacajinia Jesuucua tiuuniaa pueyari canaa masuuquiaari na tiajinia. Canaa sequetuuquiaariiri:

—¡Maja canaa shoconu pueyanaa! Canaa tiajinia nia camueenujumajaara.

Naaratej, canaari siete juuca nojoritia camueenujuquiaarini. Na nuhuaji, canaari cuniqii Roma tiacajiniara neteja nucuaco quiaquiaarini. ¹⁵ Roma tiacajinijinio Jesuucua tiuuniaa pueya jaara niishiquiaari canaa tari nucuamaji niyani, nojoriiri nucuacoji canaa naacunuucua nijioquiaari. Coteenu nijionaari canaa naacuquiaari Foro de Apio tiacajinia. Tamasacaari saniniuujia canaa naacuquiaari Tres Tabernas jiyanishano tiacajinia. Pablo jaara narta Jesuucua tiuuniaa niquiquiaari, noojia cumaquiquiaariiri. Naaratej, Pueyaso sequetuuquiaariiri:

—¡Paacarasho cua Pueyasonaa!

¹⁶ Canaa jaara tiuquiquiaari Roma tiacajiniani, Pablo jiyatana capitánri puetunu quioosano pueyajanaa niqutiojoquiaari Roma tiacajinia quioosano cojuanaa camarnu.

Pabloori saniniuuja tarinitiasaaquiaari tamonu tiajinia na quiniuria tamajaaja, tamonu soldadota na cojuariquiano.

Pablo pahuatasacari Jesujiniji Roma tiacajinia

¹⁷ Jiuujianaraca juuca na quishacari tari Roma tiacajinia, Pabloori puetunu tii quijiaa narta Judiocuaca camarucuajanaa masuuquiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

—Cua tapueyocuaanaa, majaari cua miiniu quiquiaari sesa parta Judiocuacani. Majaari cua numueejushiniu quiquiaa pa supuetanaa niishitiojosanojuhuaj. Naajaa, pueyari cua quiatucanu Jerusalén tiacajinia. Cua niquitiotucanu Romano pueyari, cua morosaa-nura. ¹⁸ Nojori nequesoreenu nuhuaji janiya, cua cartetunu paniquianu juucuaari, nojori niishishacari maja sesa cua miiniu quiquiaari cua mosaanura. ¹⁹ Romano camarucua jaara cua cartenu paniquianu, parta Judiocuacaari saaja juaaquioree. Janiyari jiyamitia sequecanuni, cuaara cua jiyarotuura jiyaniijiajanaa cua niya Roma tiacajiniani, Césarjanaa nequesoreenura janiya. Naajaa, majaari cua saquirojotanu quiniutianiya saniniuuja nojoriucara, cuarta Judiocuaca nojori quiniucua. ²⁰ Janiyari cunora nia niqiniu paniriquiaani, cua pahuatanura niajanija taa puetunujuanaa parta Israel pueya niishiy-acuajani, niajanijajuhuj; macunucuaari samiitianijiosaanutanihua. Janiyari cunora cumayocuata moronucua niya quiyani.

²¹ Judiocuaca camarucuaari Pablo riucuaquiaari:

—Maja quenaaja canaa masetanu quiquianu Judea jiyajiniji naajionee, canaa pahuatasaanura quiajanijajiniji. Cuniqijinio parta Judiocuacaari niya tiuquijiocanujuhuj. Naajaa, nojoriiri maja quenaaja sesa na pahuatanuunu quiquianu canaa quiajanijajiniji. ²² Canaari saaja niishiyani, puetunu tiqiyocujanaa sesacasaquiaaquiniaari, Pueyaso pahuatasano. Quiaa mariqui cunojiniji canaa pahuatare, canaa niishiniuria socua.

²³ Jiyacaritij, Judiocuacaari Pablo sequetuquiaari:

—Canaacua tamonu juuca quia tojiqiiquiani.

Na nuhuaji, nojoriiri na sequetusanu juuca nijioquiaari. Pablo quijia tiajinia mishitiquiaariiri. Pabloori nojori niqiuara pahuatanu coteequiaari tariquicuaji. Naa niniyareejaari. Juucua nojori niishitiojoquiaariiri, Jesuuri seetanujanaa Pueyaso Jiyarosano quiquiaari. Nojori sequequiaarijuhuaj taa Pueyaso jittiaa na jiyanooshano pueyani. Naajuhuj, tariucuaaanu Moisés naajiotasano Jesujiniji niishitiojoquiaariiri, Pueyaso sequesano caminiujuninaa naajionuutasanonio. ²⁴ Noojiaqueya nojorijinijinoori Pablo sequesano tojiquiaari cutara. Tamasacaari saaja na cuaracashitiquiaari saniniuuja. ²⁵ Nojorijinijinio jaara Pablo niishitiojosano tojiquiaari cutara, tamasaari nojoritia juayonuutano coteequiaari. Naa na juayonuutasacaritij, tohuareetaquiaariiri na quiojonuhua. Pabloori jiyacari nojori sequequiaari:

—Pueyaso Sohuanuquiiri seetanujanaa tariucuaaanu Pueyaso sequenu panishano caminiujunina Isaiás pahuataniquiaari parta Israel pueya niqiuara, jaara na sequequiaari:

²⁶ “Quia quiaare cuno pueyacua. Quiocua nojori sequesee: ‘Niaari cua rupaa tojiniutianiya. Majaari nia niishiniu quiniutianiya casaa nia tojiyani. Niaari cua cumaacata cua miishano niqiniutianijajuhuj. Majaari quenaaja nia niishiniu quiniutianiya’. ²⁷ Cuno pueyari noojia cumantaree maja na tojtianura cua rupaa. Naaratej, saaja sesa tojtiaquiaari. Nojori namijiaari mishiqiojosanojuhuaj, na niqutiaaquiniucuaaji, maja na numaata na tojtianura, noojiata na niishituyaquiniuriano. Naa jiyatecanu nojorinjia, maja na niishituniuria janiya, mariqui cucua tacateturohuari, nojori cua naaronura”.

²⁸ Pueyanaa, nia niishiri. Naa jaara ruuretare cua pahuatasano Jesujiniji, taucuaacari saniniuuja pahuatasaanutaniyacujua, taa Pueyaso jiyanooni panija pueyani, maninia na jitianura nojori. Taucuaacari na tojtianutaniya cutara.

²⁹ Pablo jaara naa sequequiaari nojoritij, Judiocuacaari quiojiyarohua. Tama nojorijiaarija juayonuutaarohua na quiojosacarihua.

³⁰ Caapiqui marijaari Pablo shocojoquiaari rupaquijia na masano tiajinia moronucua na quishacari Roma tiacajinia. Puetunu pueyajanaa jaara nocua niqiuari na niqiniuria, nojuajaari maninia na masequiaari na quijia tiajinia. ³¹ Majaari jiyasohuaja na pahuatanu quijia taa Pueyaso jittiaa na jiyanooshano pueyani. Jiyaniija Jesujiniji niishitiojojaariuhuj. Majaari na sanaajasaanu quijia.

PABLO NAAJIONEE ROMA TIACAJINIA QUINIAA PUEYASO PUEYACUARA

Pablo saruhatasacari Pueyaso pueya

¹ Janiyari Pabloni, Jesucristo seru. Nojuajaari cua saquirojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupaajanaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niaacuarani.

² Pueyasocuaajaari tariucuaaanu na sequenu panishano caminiujiunaa pueya niishi-tiquiaari, nojori naajiotanura Pueyaso Rupaa, pa niishiniuria taa Neyanu na miiniu-tianiya pocuarani. ³ Pueyano na quiniuria mijiria, Neyanu Jesucristoori rasaanquiaari. Na supuetanaari quiquiaari Israel pueya jiyaniijia David. ⁴ Jesu sohuanuuri sanini-uujia pueyaracaanu Pueyaso Niyanujuhanajaj. Paa cutaraari quiari naataja niishi-tishaaquiaarini, nojuajaari seetanujanaa Pueyaso Niyanu. Paari quiarjia na niishiya seetanujanaa cutarani, Pueyaso Sohuanu samiitianiniucua nojuaja macujiniji. Nojuajaari tari jiyatesaquiaari Jiyaniijiajanaa na quiniuria, puetunu cumaacajanaa na jitianurajuhujaj. Nojuajaari pa Jiyaniijia Jesucristo.

⁵ Nocua canaa tiuuniucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaquiriiri puetunu jiyacajinjini pueyajanaa canaa tiutiniuria Neyanuucua, na tojtiajaca nojori quiniuria. ⁶ Nijaniyajuhujaj, Roma tiacajinia quiniaa Pueyaso pueyanaa, Pueyasoori nia saquirojoquiaari Jesucristo pueya nia quiniurajuhujaj. ⁷ Puetunu Pueyaso panishano pueyajanaa, canapue Pueyaso saquirojoquiaari saa maniniaja nojori quiniuricujajani, janiyari niaacuara naajioteyani. Pa Que Pueyaso, pa Jiyaniijia Jesucristojuhujaj, nojori cuara cumaquiriia nijaniya, maninia na tojijia nia quiniuria. Naajuhujaj, nojori cuara nioojiaa cajitiiria shuquiriaatia nia quiniuria pueyaracaanu.

Pablo naquerejosacari Roma tiacajiniana

⁸ Coteenu nia sequenu panianijia, janiyari nia timitiaquiaani, maninia nijaniyajiniji pueya pohuatanuucua puetunu jiyacajinijanaa. Nojoriiri pohuataquiaa, niaanaari maninia tiuujia pa Jiyaniijia Jesucristoocua. Naa Jesucristo miiniuucua nijaniyatej, janiyari cua Pueyaso sequequiaani: “¡Paacarasho! Quiaari jiyanoohua maninia”. ⁹ Janiyari pueyaracaanu cua Pueyasora poonijioquiaani puetunu cua cumaacatajanaa, Neyanujiniji cua pohuatanura. Pueyasocuaajaari niishiya, pueyaracaanu cua secojosacari nojuaja, janiyari niaacuara secojoquiaajuhujaj. ¹⁰ Naa cua secojosacari nojuajatej, janiyari na sequequiaani cuara cua tiuquitiiria niaacua, rupaquijia cua quiniuria niaata, nojuaja jaara naa paniri. ¹¹ Janiyari nia niquiniucua jiaatiaani, cua cumaquiniuria socua nijaniya na Sohuanu cumaacata, socua jiyanoohua Pueyasooocua tiuujia nia quiniuria. ¹² Majaari cua cumaquini paniniu saa nijaniyaja. Janiyari paniyani nia cumaquiniuria janiyajuhujaj. Naacaujiti, mariyata pa tiuushacari Jesucristoocua, paari mariyata cumaquitiiojonutaniyani.

¹³ Cuarta Pueyaso muerasunaa, janiyari nia sequenu paniyani nia niishiniuria, janiyari sequeyarucua niaacua naquerejoquiaa juucuanu. Majaari juhuanujuaja cua naata quianu niaacua. Janiyari Jesucristojiniji pohuatanu paniya tii Roma tiacajiniani, tee nia quiyacuajani, cuno taucuaa tiuuniuria Jesucuaajuhujaj. Tamonu jiyacajinia taucuaari tari Jesucristoocua tiuujiaa quiyacuaa, cua pohuatanuucua Jesucristojiniji nojori niquiara. Janiyari naa miiniu paniya nia tajinijuhujaj. ¹⁴ Cua Jiyaniijiaari cua jiyatequiaari na rupaa pohuatanara. Janiyari cunora na rupaa pohuataquiaani. Majaari na tojijashijia cua quini paniniu. Naaratej, janiya cuara pohuataara na rupaa puereetuca tiacajinia pueya niquiara, mariyata tiquiyocua quijiaa pueya niquiarajuhujaj. Janiya cuara na rupaa pohuataara niishijia pueya, niishiyashijia pueyano. ¹⁵ Janiyari cunora quianu paniya Roma tiacajiniani, cua pohuatanura Jesucristojiniji nijaniya.

Pueyaso Rupaari cumaacaraca na jataniniuria pajaniya

¹⁶ Maja cutaraari cua caririquniu Jesucristojiniji cua pohuatanura. Jesucristo ru-paacuaajaari Pueyaso cumaacaraca, pueya na jataniniuria Pueyaso muerasu nojori quiniuria, nocua nojori tiuushacari. Puetunu Jesuucua tiuunaa pueyapuejanaari Pueyaso pueyara jatanishaanutaniya, taa Judiucuaa jatanishaaquiaa Pueyaso pueyaracaani. ¹⁷ Jesucristo pohuatasanojiniji paari niishiyani, Pueyasoori pa jiyanooquiaa sesa pa miishanojiniji, saaja Jesucristoocua pa tiuushacari. Saaja nocua pa tiuuniucua, paari

Pueyaso pueyara jatanishaaquiaani. Cunora, naa naajiotasano quiyacuajaari tariucua-caanu Pueyaso Rupaajinia:

“Pueyaso jiyanooshano pueyanoori pueyaracaanu shuquiriaatia quijia quiniutianiya, saaja Pueyasooqua na tiuushacari”.

Pueyasora, puetunu pueyajanaari sesa miijiaca

¹⁸ Pueyasoori jiyocuacaanuji na tojiyashijiaca pueya saniitioquiaa. Naa nojori na saniitiosacaritij, Pueyasoori nojori numootequiaa, nojuajaari puetunu na tojiyashijiaca pueyajanaa saniitionutianiya jiyanoohua na juaaniutia. Naa saniitiosaanutaniyajaari-uhua, puetunu sesa miijiaca pueyajanaa. Naa sesa miijiaca pueya quishacaritij, nojoriiri Pueyasojiniji niishishano ruuretaquiaa saaja. ¹⁹ Nojori jaara Pueyaso niishiniuucua jiaa-tiariquia, nojori maara na niishirij. Pueyasocuaajaari tari nojori niishitiquiaari taamuecate nojuajani. Nojoricuaajaari tari maninia nojuajiniji niishiya. ²⁰ Majaari pa naata Pueyaso niquniu pa namijiata, pa niishiniuria taamuecate nojuajani. Naajaa, Pueyaso shipinini-uucua jiya, maatia niishishiyacuajaari nojuajaari Pueyaso, pa niquishacari puetunu na shipinishanojuanaa. Na shipinishanojiniji niishishiyajaariuhua, majaari na cumaaca puequenu quiniutianiya. Pueyaracaanu quiriquianoori. Naacuajitij, Pueyaso saniitonu panishacari na tojiyashijiaca pueya, nojoriiri maja na naata sequenu quiniutianiya Pueyaso: “Maja canaa niishiniu quijia quiajanijajiniji”. ²¹ Nojoricuaajaari Pueyaso niishijia najuhuanaj. Na niishijia nojori quishacari, nojoriiri saaja na rerequetaja. Nojoriiri na tojtiaaquiquiaajuhua. Pueyaso miiniuucua maninia pueyaracaanu nojori, nojoriiri maja quenaaja na segutunu quijia: “Paacarasho Pueyasonaa”. Tama nojoriijaarijia jiyanoohua cushitiquiaa sesa nojori niishiriojonuusacari najuhuanaj. Naa mosanucua nojori quishacaritij, nojori jiuujaari juhua ninishiquiria quiquiaa. ²² Nojori jiyanihacari nojori cutaraari seetanujuanaa niishijia, naacuajitij nojoriiri socua niishiyashijiacara quiquiaa. ²³ Nojoriiri Pueyaso shuquiritiaaquiquiaa tama nojori shipinishano casaa-jaaja nojori shuqiritianura. Pa shipininia Pueyaso cutaraari jiyanoohua cumaacaraca, pueyaracaanu quijiajuhuanaj. Nojoriiri Pueyaso niti shuqiritiaquiaa tama nojori shipinijosanojuaja. Cuno, nojori shipinijosano Pueyaso niti na shuqiritiasocoriquianoni, cunoori quiquiaa juhua shaajeja pueya niquishano, juhua jaacuatujuaca niquishano-juhuaj, juhua nacujiniaaco canujuucuatujuaca niquishanojuhuaj, juhua roshiyocuatujuaa niquishanonio.

²⁴ Naaratej, Pueyasoori nojori tarinitiaquiaa sacuraatia casaa nojori miiniuria tama na cuaqueyatajaaja, taa nojori miiniu paniquiaacuajani. Nojoriiri socua jiyacatequiaa sesa miiniuria. Naacuajitij, pueyari tama na cuaqueyajaaja miiquiaa sesa, cararaatia nojori miitiosacari narta pueyanota. ²⁵ Naa sesa miijiaca nojori quishacaritij, pueyari seetanu casaajanaa Pueyasojiniji niishishano ruuretaquiaa, sajonuunu nojori tojinuria saniniujia. Naaratej, pueyari Pueyaso shipinijosano casami shuqiritiaquiaa, saniya na Shipininia niti. Nojuajaari pa Pueyasojanaa cutara. Nojuaja cuara shuqiritiasaaria pueyaracaanu cutara.

²⁶ Pueya jaara Pueyaso cartequiaa, Pueyasoori nojori tarinitiaquiaajuhua, cararaatia casaa nojori miiniuria, taa nojori jiaatiaquiaa miiniuriacuajani. Naacuajitij, maajipohuari maja na caminiu paniniu quiquiaa. Saaja narta maajipohuata cararaatia casaa miiquiaari juhua canuu. ²⁷ Naajuhua, canuuri maajitia quiniu paniaquiquiaa, sacuraatia na jiaatiasacari narta canuucua. Canuuri jiyanoohua cararaatia miitiooquiaa. Naa nojori miiniuucuatej, nojoriiri tama na cuaqueyajaaja miitiquiaa naquiya na miishaanura.

²⁸ Nojori niishiniu paniaquiniuucua Pueyaso, Pueyasoori nojori tarinitiaquiaa nojori miiniuria tama nojori niishiriojosano sesajaaja. Nojoricuaajaari niishiya, nojori miishanoori sesa. Naajaa, nojoriiri saaja na miijiaca quiquiaa, cararaatia miiniu niishiriojonu-juaca nojori quiniuucua. ²⁹ Naacuajitij, nojoriiri puetunu tamaatia sesa miishanojuanaa miiniu niishijia. Jaara sesa miiri, timiquioyari. Nojoriiri nio miijiaca: puera casamiriaca quiniuucua jiaatiajaca. Sesa miiquiaari na panishano nojori jitianura. Nojoriiri tamasa pueya jitianu casamiica jiaatiajaca. Nojoriiri pueya puecojuaca. Nojoriiri pueya ruutaqueja. Nojoriiri na panishano casami nohuasenujuaca jiyasohua. Nojoriiri narta pueya miitianu panijia. Rimiaacaturijaariuhua. ³⁰ Nojoriiri sacuraatia sequejoju narta pueya. Nojoriiri Pueyaso niquniu paniyashijia. Nojoriiri tamasa soojeaca. Nojoriiri tama na cuaqueyajaaja jiyatequiaa juhua socua maninia pueyara tamasaajiniji. Nojoriiri najuhua sequeja: “Janiya maninia miijiani”. Nojoriiri jiyanoohua niishijia, niishishoo sesa casaa na miiniuria. Nojoriiri na queya tojiyashijia. ³¹ Nojoriiri seetanujuanaa mosanucua Pueyaso na tojtiaaquiniuucua. Nojoriiri saaja tama na rupaa-jaaja jataja. Majaari na sequesano na miiniu. Nojoriiri narta pueya paniyashijia.

Majaari nojori niishiniu jiyanooni. Majaari nojori niishiniu taraajenu narta pueyacu. ³² Nojoricuajaari tariucuacaanu naa Pueyaso sequesano niishiya: “Cante naa sesa miijiacani, cuaara puecoosaaria”. Naajaa, nojoriiri saaja sesa miiquiaa juhuajaniya. Majaari nojori quiniu shuquiriaatia saaja tama nojori miishacarijaaja sesa, nojoriiri shuquiriquiaajuhuaq tamasaca jaara sesa miiri juhua nojori.

2

Pueyasoori sesa miijiacaa saniitionutaniya sesa nojori miiniuucua

¹ Naacuajitij pueyanaa, niaa jaara tamonuucuaa tonujujua quiriquia, majaari nia jiyaniinu niaari sesa miyashjiaca cutara. Niaa jaara tamonuucuaa tonujure sesa na miishano, niaari tama niaacuarajaaja tonujiya naa sesa miiniu niishjiaca nia quishacarijuhuaj. ² Paacuajaari niishiyani, Pueyasoori puetunu sesa miijiacajanaa saniitionutaniya, maninia na niishshacari nojori miijosano. ³ Quiajaniya saniniuuja, quiarta pueyacuara tonujujanaa, majaari quenaaja quia jiyaniinu quiaa saniitioyaquishaanutaniya. Quiaari saniitosaanutaniyajuhuaq. Quiaacuajaari juhua nojori, sesa miijiajuhuaj. ⁴ ¿Majateeri quia niishiniu, Pueyasocujaari pueyaracaanu quia sashiquiaa juucua, quioojia quia tacatonuhuaa nocua? Naaratej, nojuajaari pueyaracaanu maninia quia miiquiaa. Quia rejeretaquiaajariuhuaq. ¿Quiaateeri jiyaniquiaa Pueyasoori naa maninia quia miiquiaa, maninia quia quiniuucua na niquiara? ¡Maja! ⁵ Quiaari quioojia tacatonu paniyaquiquiaa, sesa quia miishanojiniji quia taraajeyaquishacari. Cunora, quiaari puetunu sesa quia miishanojinijijianaa saniitosaanutaniya jiya puequesacari. Jiyacaritij niishishaanutaniyari, Pueyasoori seetanujujanaa maninia saniitioja. ⁶ Pueyasoori puetunu pueyajanaa miiniutianiya taa nojori miishano quiquiaari mijiriacuajani. ⁷ Naacuajitij, Pueyasoori maninia miijiacaa jiyatenutaniya pueyaracaanu rishijiacara. Nojoriiri pueyaracaanu maninia miijiacaa quiquiaari mijiria, Pueyaso timitiasano nojori quiniuria, shaajeyashjiaca nojori quiniuriajuhuaj. ⁸ Saniniuuja, Pueyasoori na tojiyashjiaca saniitionutaniya jiyanoohua na juaaniutia. Naa saniitosaanutaniyajaariuhuaa noo pojori, canapuate saaja sesa miiniu panjiaca quiquiaarini. ⁹ Puetunu sesa miijiacaa pueyapuejanaa naquiya miishaanutaniya, taa Pueyaso tojiyashjiaca cuarta Judiocuaca miishaanutaniyacuaani. ¹⁰ Saniniuuja, Pueyasoori puetunu maninia miijiacaa pueyapuejanaa miiniutianiya maninia, taa maninia miijiacaa Judiocuaca miishaanutaniyacuaani. Pueyaso timitiasano pueya nojori quiniuucua, nojoriiri jiyanoohua shuquiriaatia quijiacaa quiniutianiya pueyaracaanu. Naacuajitij, nojoriiri juhuajaniya quiniutianiya Pueyasota pueyaracaanu.

¹¹ Pueyasoori maja rimajata na miiniu quiniutianiya taucuaa, Judiocuacano. Puetunu maninia pueyajanaari maninia miishaanutaniya. Sesa pueyari saniitosaanutaniyacujua. ¹² Naacuajitij, pueya jaara Pueyaso rootasano Moisés niishiyashjiaca quiriquia, naajaa, nojori jaara sesa miijiacaa quiri, nojoriiri saniitiosocoriquiano. Naajuhuaq, pueya jaara Pueyaso rootasano Moisés niishjiaca quiriquia, nojori jaara na tojiyashjiaca quiquiaar-jiuhuaq, nojoriiri cuno Moisés Naajioneejiniji nequesoreesaanutaniya na tojitiaaquiniuucua. ¹³ Majaari nia jiyaniinu niaari jiyanooshaanutaniya sesa nia miishanojiniji nareja najuhuaa nia tojishacari Moisés Rootasano. Niaari jiyanoaquishaanutaniya maja seetanujujanaa na tojiijaca nia quiniuucua. Noo pojori cutaraari jiyanooshaanutaniya, canapuate seetanujujanaa na tojiijacuajani. ¹⁴ Moisés Rootasano jiitiaashjiaca pueya jaara tamajaaja maninia miiniu niishjiaca quiriquia, naacuajitij, niishshiyari, nojoriiri tamajaaja maninia miiniu niishjiaca cutara. ¹⁵ Naa maninia miiniu niishjiaca nojori quiniuucuatej, niishshiyari, Pueyaso rootasano Moisésri juhua nojori jiuujiajinia naajiotasano quiya. Naaratej, nojori jaara sesa miiri, tama nojori jiuujiajaarijia nojori niishitiya: “Sesa miiriinjia”. Naajuhuaq, nojori jaara maninia miiri, tama nojori jiuujiajaarijia nojori niishitiya: “Maninia miiriinjia”. ¹⁶ Naacuajitij, cuno juuca, Pueyaso nequesoreetesacari Neyanu Jesucristo puetunu mijiria quiniaa pueyajanaani, jiyacaritij, tama pueya jiuujiaari nojoriicuara tonujunutaniya sesa nojori miishanojiniji jiyasohua. Naaratej, janiyari pueyaracaanu pueya numootequiaacuajani cua pohuatasacari Pueyaso rupaa Jesucristojiniji.

Pablo nacasusacari Judiocuaca nojori tojitiaaquiniuucua Moisés Rootasano

¹⁷ Cuarta Judio pueyanonaa, quiaari jiyaniya quiaa Pueyaso pueyano cutara, na saquirojosano Israel pueyajinijinio quia quishacari, Moisés Rootasano niishijia quia quishacarijuhuaj. Cunora, quiaari sequequiaa: “Janiya cutaraari Pueyaso pueyanoni. ¹⁸ Janiyari niishiyani casaa Pueyaso paniya cua miiniuriani. Moisés Rootasano niishijia cua quishacari, janiyari niishiyani teyano casaate socua tojishocoriquiano rootasanoni Pueyaso cua shuquiritiniuria”. ¹⁹ Quiaari sequequiaajuhuaq: “Janiyacuajaari seetanu rupaaajanaa niishiyashjiaca pueya niishitiojonani. Janiyari juhua ninishiqui quijiacaa

pueya cuhuatanani. ²⁰ Janiyari niishiyashijiaca niishitiojojuani, naatujoorinio, maninia cua niishishacari seetanu rupaajanaa Moisés Naajioneejiniji”. ²¹ Naa tamasaca niishitiojona quia quishacaritij, tama quia cuaqueyajaaja quia niishitiojore coteenu, maninia mijia quia quiniuria. Quiaa jaara tamasaca niishitiojoquiaa maja na nohuasenuunura, ¿casaara nohuasejojua quia quiyacuaraarini? ²² Quia rootasacari tamasaca, maja nojori numuetucunura niyacaraca maaji, ¿casaara saniniujia naa quia miiquiaacuaraarini? Quiaacuajaari sequeja: “Janiyari pueya shipinijosano casaa soojeani, nojori shipinijosano na secojonuusocoriquiano juhua Pueyasoni”. Naa quia soosacari nojori shipinijosano casaatej, ¿casaara quia nohuasejoquiaa cuno casaa nojori secojonuujuua tiacajinijicuaraarini? ²³ Quiaari sequequiaajuhua: “Moisés Rootasanoori jiyanohua maninia. Na timitiaanijia”. Naajaa, quiaari Pueyaso rerequetequiaa quia tojijaquishacari Moisés Rootasano. ²⁴ Cunora, tariucuacaanu Pueyaso Rupaajinia naajiotasanoori seetanujuanaa naa sequeya:

“Pueyaso niishiyashijiaca taucuacaari Pueyasooquara rimiaaquequiaa sacuraatia, Pueyaso tojijashijiaca nia quiniuucua nojori niquiara”.

²⁵ Cuarta Judiocuacanaa, Pueyasocujaari pa supuetanaa rootaquiaari pa cararaatiuuquia co cuaara miatesano quiriira, na saquiriojosano pueya pa quiniuucua. Naacuajitij, nia cararaatiuuquia co jaara miatesano quiri, cunoori maniniacuaja, nia jaara seetanujuanaa Pueyaso Rootasano tojijica quiri. Saniniujia, niaa jaara Moisés Rootasano tojijashijiaca quiri quia, niaari juhua miatesoo quiyajaa Pueyaso niquiara. Nia cararaatiuuquia coiri najuhuana miatesano quiya. ²⁶ Saniniujia, taucuaca jaara maninia mijia quiri taa Moisés rootasano sequeyacuajani, miatesoo nojori cararaatiuuquia co quishacari, naajaa. Pueyasora, nojoriiri juhua miatesano quiya, na muerasu nojori quiniuria. ²⁷ Naacuajitij, na cararaatiuuquia co miatesoo tahue jaara maninia mijia quiri, taa Moisés Rootasano sequeyacuajani, nojuajaari jiyanooshaanutaniya, Pueyaso muerasu na quiniuria. Quiajaniya saniniujia Judio pueyanonaa, quiaari Moisés Rootasano niishijiacuaja. Quiaacuajaari quia cararaatiuuquia co miatesanoraca. Naajaa, quiaa cutaraari saniitiosaanutaniya quia tojijaquiniuucua Moisés Rootasano. Naacuajitij, cuno tahueri quiocuara tonujuriquiano saniya, Judio pueyanonaa. ²⁸ Pueyasocujaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasorani? ¿Na cararaatiuuquia co miatesano pueyanotee, Judio pueyacuajinino supueno pueyanotejuhuaj? Maja. ²⁹ Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyaso Sohuanu jaara pueyano jiuujia jataniri Pueyaso tojijia na quiniuria, cunoori juhua na cararaatiuuquia co miatesano cutara, seetanujuanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohuanu cutaraari na naata.

3

¹ Naa cua sequesacari niajanijatej, niaa naasucuaari sequeya: “Taucuaca jaara naa maninia miishaanutaniya nojori quiyaquishacari Pueyaso saquiriojosano Judiocuaca, naatej, taa pajaniyacuaani, ¿casaara pa cararaatiuuquia co miatejosaaquiaaricuaraarini? ¿Paateeri najuhuana Pueyaso saquiriojosano Judiocuacani?” ² Maja, Judiocuacanaa. Maniniacuajaari pa quishacari Judiocuaca. Pueyasocujaari Judiocuacaacua tiuquuaari nojori jiiitanura na rupaa. ³ Noojiaqueya Judiocuacajinijino jaara Pueyaso Rupaacua tiuyashijiaca quiya, ¿Pueyasoteeri cunora na rupaa jatanutaniyajuhua? ¡Majal! ⁴ Puetunu pueyajanaa jaara sapojonuujuaca quiri quia, naajaa, Pueyaso cutaraari tojetaarucujanaa sapojijashijia. Naaratej, nojuajiniijiri naa naajiotasano quiya tariucuacaanu na Rupaajinia:

“Puetunu pueyajanaari niishiniutianiya puetunu quia sequesanojuanaari seetanujuanaa cutara. Naajuhua, pueya jaara quiocuara tonujure juucua, puetunu nojorijianaari sanaajasaanutaniya, saa maninijia quia miiniuucua pueyaracaanu”.

⁵ Pa supuetanaa tiuyaquiniuucua seetanu Pueyaso rupaacuajanaa, naacuajitij, mijiria quiniaa pueyari niishiya, Pueyasoori socua jiyanohua maninia pueyajiniji. Sesa pa miiniujiniji, paari niishiyani Pueyaso cutaraari jiyanohua maninia. Naacuajitij, nojuaja jaara pa saniitiore sesa pa miiniuucua, ¿taa nia sequeyani? ¿Nojuajate sesa, jaara pa saniitiore sesa pa miiniuucua? ¡Jua! Juhua niishiyashijia pocuareenijia. ⁶ ¡Seetanujuanaa, Pueyasoori sesa miyashijia! Nojuaja jaara sesa mijia quiri quiajuhua, ¿maatucua taa mijiria quiniaa nequesoreereni?

⁷ Tamasaca naasucuaari sequequiaa: “Sapojoua cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaajanaa jitiiaja. Naaratej, ¿Pueyasotucua casaara cua saniitioireni?” ⁸ Teyano pueyanote naa sequejani, nojuaja naasucuaari naa sequejajuhua: “Socua sesa pa miiri, Pueyaso jiyanooniuria pajaniya. Naacuajitij, pocua Pueyaso shuquiritiare socuani, nojuaja jaara pa jiyanoori”. Tamasacaari canaacuara tonujuquiaa najuhanaj, canaanaari naa niishitiojoquiaani. Canapuate naa sapojonuuquiaa canaacuarani, nojoriiri saniitiosaanutaniya, nojori sesacanuucua canaa.

Pueyasora, puetunu pajaniyajanaari sesa miijiacani

⁹ Quiarijia, jaara naa quiriritij cuarta Judiocuacanaa, ¿paateeri socua maninia miijiaca taucuaajiniji Pueyasoari? Maja. Janiyacuajaari shusha nia pohuatariquiaani, puetunu mijiria quiniaa pueyajanari sesa miijiaca; Judiocuaca, taucuacanio. ¹⁰ Tariucuacaanu Pueyaso Rupaajiniacuajaari naa naajiotasano quiya:

“Majaari quenaaja niquiriyatu maninia miijia quiniu. Shaaqui tojetaarucujanaa. ¹¹ Majaari quenaaja maninia niishiriojoua pueyano quiniu. Majaari quenaaja Pueyasocua jiaatija pueyano quiniujihua. ¹² Puetunu pueyajanaari Pueyasocua tashuquioorucuaa. Puetunu nojorijianaari seserucuaa. ¿Cante maninia miijiani? Shaaqui. Shaaqui tojetaarucujanaa. ¹³ Nojoriiri miananajonu maniniu. Nojori rupaari saa monujua. Nojoriiri na niti taquiriocateja saa sapojonuraja. Cuno pojoriiri juhua soconu noonacu jiitiaa na rupaama, rimiaacatujuri nojori quiniucua. ¹⁴ Nojori jaara pocuare, saaja tamasa sesacaquiaari, puera juaajia nojori quishacari. ¹⁵ Nojoriiri puecojuaca. Puereeta nanaca shootejaca. ¹⁶ Puetunu mijiria nojori miishanojuanaari casaa sesoja, narta pueya taraajetejajuhua. ¹⁷ Majaari nojori niishiniu jiyanooni. ¹⁸ Nojoriiri juhujaniya miiquiaa sesa saaja. Majaari na pueretunu Pueyaso”.

¹⁹ Paacuaajari niishiyani, puetunu Pueyaso Rupaajinia naajiotasanojuanaari Pueyaso saquiriojosano Judiocuaca quiquiaari, nojori niishiniuria, puetunu pueyajanaari sesa miijiaca. Naacuajitij, puetunu mijiria quiniaajanaari sanaajetanutaniya, nojori niishishacari puetunu nojorijianaari sesa miijiaca; Judiocuaca, taucuacanio. ²⁰ Naacuajitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijara. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

Paari Pueyaso jiyanooshano cutarani, Jesuucua pa tiuushacari

²¹ Pueyasoori quiari naataja pa niishitiquianu cutara, taate pa naata maninia miijia pa jatanishaanuni. Moisés Rootasanojinia, tariucuacaanu Pueyaso sequenu panishano caminiujunaa naajionuutasanojiniaari naa sequeyajuhua. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojiyashijiaa quiri. ²² Quiarijiani, Pueyasoori pa jiyanooquiaa cutara, saaja Neyanu Jesucristoocua pa tiuushacari. Judiocuaca, taucuaajuhua, Pueyasoori puetunujanaa jiyanooquiaa Neyanuucua nojori tiuushacari. Majaari rimiajata na jiyanooni. ²³ Puetunu pueyajanaari sesa miijiaca; Judiocuaca, taucuacanio. Naacuajitij, nojoriiri juhua tuucaanu quiya Pueyasojiniji. Sesa miijiaca pueya quiniucua, nojoriiri soosano pueyara jataquiaari. Naacuajitij, pueyari Pueyaso timitiasoo quiquiaari. ²⁴ Naajaa, jiyanohua panijia Pueyaso quiniucua, nojuajaari pa jiyanooquiaari Jesucristo cusunucua pocuara. Naacuajitij, Pueyasoori pa jiyatequiaari juhua sesa miyashijara. ²⁵ Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonuucua niyacutesanojinia. Naacuajitij, pueya jaara niishiriquia Jesucristo nojori niti cusoquiaari, saaja naa nojori tiuushacari nocuatej, nojuajaari na Que Pueyaso jiyanootiquiaa pueya. Naajuhua, Pueyaso saniitioyaquishacari tariucuacaanu nocua tiuijaca pueya Jesu cusoyaquishacari, majaari najuhua puera jiuujiaajia na quiniu quiquiaari. ²⁶ Pueyasoori niishiquiaari Neyanu Jesucristoori nojoriicuara mosocoriquiano, sesa nojori miijosano tuujasaanura seetanujanaa. Naaratej, nojuajaari pueyaracaanu sesa nojori miijosano rejeretaquiaari saaja. Jesucristo cusunucua quiari naataja pocuara, paari niishiyani, Pueyasoori seetanujanaa maninia miijia. Nojuajaari maja najuhua na jiyanooni pajaniya. ¡Neyanu motequiaari pocuaraari!

²⁷ ¿Teyano nijaniyajinijinote tojetaarucujanaa saaja maninia miijiani? Shaaqui. Naacuajitij, maninia miyashijia pa quishacari, puetunu pueyajanaari sanaajasaanutaniya Pueyaso nequesoreesacari pueya. Saniniujia, paa jaara puetunu Moisés Rootasanojuanaa tojtijaca quiriquia maniniani, paa maara tama pa cuaqueyajaaja shuquiritijaca quiriquia cutarani. Saniniujia, Pueyasoori pa jiyanooquiaa saaja pa tiuushacari Jesucristoocua. Naacuajitij, majaari pa jitiianu tama pa miishanojuaja pa

shuquiritiasocoriguano. ²⁸ Naacuajiti paari niishiyani, Pueyasoori pa jiyanoojia puetunu sesa pa miishanojinijijianaa saaja Jesucristoocua pa tiuushacari. Majaari na jiyanooniu pajaniya, Moisés Rootasano pa tojishacari.

²⁹ ¿Niaateeri jiyaniya, Pueyasoori saaja Judiocuaca Jiyano? ¡Maja! Pueyasocuaajaari puetunu mijiria quiniaa pueyapuejanaa Jiyano. ³⁰ Pueyasoori maja caapiqui. Nojuajaari saaja niquiriyatu. Naacuajitij, majaari niquiriyatu Pueyaso quiniu Judiocuacaca, socua tamonu Pueyaso taucuacaca. Naaratej, puetunu pueyapuejanaari jiyanooshaaquiaa saaja Jesucristoocua nojori tiuushacari; tariucuacaanu na saquiriojosano Judiocuaca, taucuacano. ³¹ Pueyaso muerasu pa quishacari saaja Jesuucua pa tiuushacari, ¿paateeri Moisés Rootasano shocoteyani? Maja. Paacuajaari Moisés Rootasanojiniji niishiyani, paari sesa miijiacani. Naacuajitij, Moisés Rootasanoori panishiya, pa niishiniuria paa cuaara Jesucristoocua tiuuria, jiyanooshano pa quiniuria.

4

Pueyaso jiyatesacari Abraham juhua sesa miyashijia

¹ Naaratej cuarta Judiocuacanaa, ¿taa nia sequeya pa supuetana Abrahamjinijini?

² ¿Casaara Pueyaso jiyatequiaari nojuaja juhua sesa miyashijiarani? Abrahamri maja na jiyanooshaanu quiquiaari maninia na miiniuucua. Pueyaso jaara nojuaja jiyanooquiaari maninia na miiniuucua, nojuaja maara tama na cuaqueyajaaja timitiaja quiquiaari. ³ Saniniuujia, tariucuacaanu Pueyaso Rupaajinia naa naajiotasano quiyari Abrahamjiniji: “Abrahamri Pueyasocua tiuquuaari. Naaratej, Pueyasoori na jiyatequiaari juhua sesa miyashijia”.

⁴ Cua tojiri pueyanaa. Pueyano jaara poonijiore tamonura, na poonijiotenaari na poonijionujiniji na cumaneeca niqutiojua. Jaara niqutiosaare, cuno cumaneecaari maja nareja niqutiosano. Cunoori seetanujuanaa na poonijosanojiniji. ⁵ Saniniuujia, maninia miyashijia jaara Pueyasocua tiuuri, Pueyasoori na jiyatenutaniya juhua sesa miyashijia saaja nocua na tiuiniuucua. ⁶ Pa supuetanaa jiyaniijia Davidcuajaari naa pohuataquiaari taa shuquiriaatia pa quiyani, Pueyaso jaara pa jiyatere juhua sesa miyashijia pa quiniuria na niqiura, maninia miyashijia pa quishacarija. Naa naajiotasaaquiaariiri David sequesano:

⁷ “Shuquiriaatia quijica cutaraari noo pueya, canapue Pueyaso jiyanoa sesa na miijiosanojinijicuaani, Pueyaso jaara tuujure sesa nojori miijiosanojuhuaj.

⁸ Shuquiriaatia quijicaari noo pueyajuhua, puetunu sesa nojori miishanojuanaa Pueyaso saneyaquishootej”.

⁹ Janiyacuajaari tari sequeereni, Pueyasoori Abraham jiyatequiaari juhua sesa miyashijia na quiniuria, saaja nocua na tiuushacari. Pueyaso jaara naa jiyanooquiaaricuaa Abrahamtej, ¿Pueyasote saaja Judiocuaca jiyanooniu panijia, noo pojori canapue te na cararaatiuuquia co miatesano jiiitaani, taa nojori supuetana Abrahamcuaani? ¿Taa nia sequeyani? ¿Taucuacaarijiaataj? ¿Nojoriti jiyanooshiyajuahuaj? ¡Taaquiririnij! ¹⁰ ¿Taa nia sequeyanijia? ¿Abrahamte tari na cararaatiuuquia co miatesano quiquiaari Pueyaso jiyanoosacari nojuaja? Maja. Pueyasocuaajaari na jiyanooquiaari miatesoojua na quishacari. ¹¹ Na tiuuniu nuhuaji Pueyasocua, Pueyasoori shusha jiyacari na niishitiquiaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasocua na tiuushacari, Pueyasoori na jiyatequiaari juhua sesa miyashijia, miatesoojua na quishacari. Naacuajitij, miatesoo taucuaca tiuushacari Jesucristoocua, taa Abraham tiuquuaaricuaani, Pueyasoori nojori jiyateya juhua sesa miyashijia nojori quiniuriajuhuaj, mariyata juhua Abraham niqiohua nojori quiniuria. Naacuajitij, puetunu Pueyaso sequesano Abrahamjanaani, cunoori nojoririjahuaj. ¹² Naajuhua, pueya jaara na cararaatiuuquia co miatesano quiri Judiocuaca nojori quiniuria, naajaa. Nojori jaara Jesucristoocua tiuuri taa Abraham tiuquuaaricuaani miatesoo na quishacarija, Pueyasoori nojori jiyateya juhua Abraham niqiohua nojori quiniuriajuhuaj.

Pueyaso sequesano Abrahamni, cunoori Jesucristoocua tiuujicarajuhua

¹³ Pueyasocuaajaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiuushacari. Majaari naa Abraham sequesano quiquiaari Moisés Rootasano tojjia na quiniuucua. Jiyacaritij, Moisés Rootasanoori maja na quiniu quiquiaari juhanoojuaja. ¹⁴ Pueyaso sequesano Abraham jaara saaja Moisés Rootasano tojjiacara quiri quia, na sequesano maara najuhua quiri Pueyasocua tiuujica pueyara. Naajuhua, pueya maara najuhua Pueyasocua tiuujica quiri quiajuhuaj. Seetanujuanaa Pueyaso sequesano Abrahamni, cunoori puetunu Pueyasocua tiuujicarajanaa. ¹⁵ Cunoori maja saaja Moisés

Rootasano tojjiiacara. Pueyasocuaajari niishiquiaari, pueyari maja na naata Moisés Rootasano tojiniu quiniutianiya puetunujuanaa. Moisés Rootasanojiniji, paari niishiyani, paari saniitosaanutaniyani pa tojtiaaquiniuucua cuno rootasano. Saniniuujia, Moisés Rootasano jaara quiyaquiriquia, pueya maara sequeyaquishaare: “Niaari sesa miijiaca”.

¹⁶ Pueyasoori tariucuaaanu na sequesano Abraham nareja niqutionu paniquiaari, puetunu necohuarajanaano. Naaratej, seetanujuanaa pa masenura na sequesano Abraham, Pueyasoori sequequiaari, nojuajaari nareja na niqutionutaniya nocua tiuujia. Naacuajitij, Pueyaso sequesanoori maja saaja Moisés Rootasano tojjiiacara. Cuno sequesanoori puetunu pueyapuerajanaa, canapuate Pueyasooqua tiuujiaa quiyani, taa Abraham quiquiaari Pueyasooqua tiuujiaa. Naa Pueyasooqua tiuujiaa pa quishacari taa Abraham tiuquuaari Pueyasooqua tiuujiaa, paari Abraham niqiuohuani. Naaratej, Pueyasora, Abrahamri pa que. ¹⁷ Pueyasocuaajari naa sequequiaari Abrahamtej nojuajaari queraatia niqiuohuaraca quiriquiano. Naacuajitij, Pueyaso sequesanoori naa naajiotasano quiya:

“Abrahamnaa, janiyari quiarjia quia jiyateree queraatia tamaatia rupaaca pocujaca que quia quiniuriani”.

Abrahamri Pueyaso sequesanoocua tiuquuaari. Nojuajaari niishiquiaari Pueyasoori macunucua samiitianiija. Niishiquiaariijaariuhuj, Pueyasoori cumaacaraca na panishano na shipininiuria shaquijiniija.

¹⁸ Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso sequesanoocua tiuquuaari. Naacuajitij, nojuajaari seetanujuanaa queraatia tamaatia rupaaca pocujaca pueyapue que, taa Pueyaso sequequiaari nojuacuajani. Pueyasoori naa na sequequiaari: “Quia niqiuohuari tojetaarucujanaa queraatia quiriquiano”.

¹⁹ Naa Pueyaso sequesacari nojuajatej, nojuajaari tari cien marijia shocotejoquiaari. Naa saaquiano na quishacariitij, necocua Saarajuhuj, naajaa, majaari na tarintianu quiquiaari Pueyaso sequesanoocua tiuuniu. ²⁰ Saaja Pueyasooqua na tiuushacari, nojuajaari noojia cumaquiquiaari socua. Naacuajitij, nojuajaari naa maninihuaqueetaquiaari Pueyaso: “Paacarasho cua Pueyasonaa. Niishiyaniija quiaari canaa muetutenutaniya taa quia sequecanu janiyacujani. ²¹ Quiaacuajari cumaacaraca quia miiniuria puetunu quia sequesanojuanaa”. ²² Naa Abraham tiuuniuucua Pueyasooquatej, Pueyasoori na jiyatequiaari juhua sesa miyashijia pueyanora.

²³ Jaara naa naajiotasaaquiaari Abrahamjiniji: “Pueyasoori na jiyatequiaari juhua sesa miyashijia”, cunoori maja saaja Abrahamra sequesano. ²⁴ Cunoori pajaniyara sequesanojuhuaj. Cunora, Pueyasoori pa jiyateya juhua sesa miyashijiarajuhuj, nocua pa tiuushacari, pa niishishacarijiuhuj nojuacuajari pa Jiyaniija Jesucristo samiitianiijaariuhua macujiniija. ²⁵ Pueyasocuaajari mijiria na jiyaroquiaari sesa pa miishanoocura mosocoriquiano. Nojuajaari na samiitianiijaariuhua, Jesu jaatianura nocua pajaniya, juhua tariucua sesa miyashijiaa.

5

Jesuucua tiuunaa pueyari jiyanooshano

¹ Naacuajitij, paa jaara tari jiyanooshano quiyani Jesucristooqua pa tiuushacari, paari juhuajaniya quiya Pueyaso niquiarani. Jesucristoori na Que pa jiyanootiquiaari, pocuara na cusosacari. ² Jesucristooqua tiuujiaa pa quishacari, Pueyasoori pa timitiaquiaa. Pa cumaquiquiaajariuhuj maninia necohua pa quiniuria. Paari shuquiriyajaacuhuj, pa niishishacari paari jatanishaanutaniyani, shacantuca quijiaa pa quiniuria juhua nojuajuhuj. ³ Majaari saa cunojua. Paari shuquiriquiaajuhuj, paa jaara taraatia miishaareni. Paacuajari niishiyani, paa jaara naquiya miishaareni, paari socua juhuajaniya rejeretajaca quiniutianiyani. ⁴ Naa rejeretajaca pa quishacariitij, paari cumueeca Pueyaso muerasu quiniutianiyani. Naa cumueeca Pueyaso muerasu pa quishacariitij, paari juhujaniya sashijiaa quiniutianiyani, pa niishishacari Pueyasoori seetanujuanaa maninia miiniutianiya pajaniya, taa na sequequiaaricujani. ⁵ Naa pa niishishacariitij, majaari sapojosano pa quiniu quiniutianiya. Pueyasocuaajari tari jiyaroquiaari na Sohanu, poojajinia quiriquiano, seetanujuanaa Pueyaso paniniu pa jiitianura poojajinia.

⁶ Pueyaso tojjiyashijiaa pa quishacariija, majaari pa naata quiquiaari Pueyaso jiyanootiniu tama pa cuaqueyajaaja. Jesucristoori jiyacari namitia pocuara cusoquiaari na Que na jiyanootiniuria pajaniya. ⁷ Sesa miyashijia pueyano jaara monu panishiya juucua, çtamonu maninia pueyanoteeri quiya na sequenura: “Janiya cuara mosaaria juhuari

cuno pueyano niti”? Majaruhua. Monu panishano pueyano jaara seetanujuanaa maninia pueyano quiri, na rupena pueyano jaara jiyanohua na panijia quiri, nojuaja maara sequere: “Janiya cuaara na niti mosaaria juhuari”.⁸ Saniniuujia, sesa miijiac pa quishacarijia, Jesucristoori pa niti cusoquiaari cutara. Naacuajitij, paari niishiyani, Pueyasoori jiyanohua pa panijia.⁹ Quiarijia, paari sesa miyashijia quiya Pueyaso niqiarani, Jesucristo cusunuucua pocuara. Naacuajitij, paa cutaraari niishiyani, Pueyaso saniitiosacari na tojiyashijia pueya, Cristoori pocuaji tacunutaniya cutara, tariucua na jatanishano pueya pa quiniuucua.¹⁰ Na paraa pa quishacarijia, Pueyasocuaajaari pa jiyanoquiaari, Neyanu cusunuucua pocuara. Quiarijia, nata jeecatoono pa quishacari, Neyanuuri saminio quiya pueyaracaanu pocuaji na tacunura.¹¹ Majaari saaja cunora shuquiriaatia pa quiniu. Paari shuquiriyajuhua, pa Jiyaniijia Jesucristo rupuetootenuucua pajaniya na Que Pueyasota.

Pa supuetana Adánri maja juhua pa Jiyano Cristo

¹² ¿Casaara pa cusunuuquiaani? Juhucatecara pa supuetana Adán miiniuucua sesa, naaratej puetunu pueyajanaari sesa miijiacajuhua. Pueyasocuaajaari tari sequequiaari: “Cante sesa miijiani, cuaara shaajeera”. Seetanujuanaa naari. Puetunu pajaniyajanaari shaajeriquianoni, sesa miijiac pa quiniuucua.¹³ Moisés Rootasano quiyaquishacarijia, pueyari tari sesa miiniu niishijia quiquiaari. Jiyacaritij, pueya miishacari sesa, majaari nojoriucara saquiriojotasaanu quijia sesa nojori miishacari.¹⁴ Cuno pojori, Moisés niyacari quiquiaarini, nojoriiri maja na tojiyaquiniu quiquiaari Pueyaso sequesano taa Adán tojiyaquiquiaari Pueyaso sequesano cunaan. Naajaa, puetunu nojoriijianaari cusunuuquiaarijuhua sesa miijiac nojori quiniuucua, sesa miijia Adáncaujinio nojori supuenucua. Quiarijia saniniuujia, nia pohuatareera Adán miishanojiniji, Jesucristo miishanojinijinio.

¹⁵ Adán miishanoori jiyanohua tamaatia Jesu miishanojiniji. Coteenu shipinishano pueyano miiniuucua sesa, puetunu pueyajanaari shaajenu niishiya. Saniniuujia, Jesucristo miiniuucua maninia, Pueyasoori queraatia pueya jiyatequiaa pueyaracaanu rishijia nojori quiniuria cutara.¹⁶ Pueyaso miishano maninia pajaniyarani, cunoori sesa Adán miishano shocotaa jiyanohua cutara. Naa niquiriyatu sesa casaa Adán miiniuucuatej, puetunu pueyajanaari saniitiosocoriquiano. Saniniuujia, maninia Jesucristo miiniuucua pajaniyarani, Pueyasoori pa jiyanoquiaa puetunu sesa pa miishanojinijianaa.¹⁷ Niquiriyatu pueyano miiniuucua sesa, puetunu pueyajanaari cusunuujuacara quiquiaari. Saniniuujia, niquiriyatu pueyano miiniuucua maninia pajaniyara, cunora, Pueyasoori pa jiyateya juhua sesa miyashijia pa quiniuria. Cunoori, Jesucristoocua pa tiushacari. Majaari saaja cuno, naajuhua, paari shuquiriaatia quijia jiyaniijianucua quiniutianiya maniniushiquini, Jesucristo rupuesano pa quishacari.

¹⁸ Naa Adán miiniuucua sesatej, nojuajaari puetunu nocuajinio supueno pueyajanaa jiyatequiaari sesa miijiacara, saniitiosano nojori quiniuria. Naajuhua, Jesucristo miiniuucua maninia, puetunu pueyajanaari na naata jiyanooshaanu, nojori saniitioyaquishaanucua, pueyaracaanu quijia nojori quiniuria.¹⁹ Adán tojiyaquiniuucua Pueyaso sequesano, puetunu pueyajanaari sesa miijiacara jiyatesaaquiaarijuhua. Saniniuujia, Jesucristo tojiniuucua Pueyaso sequesano, puetunu nocua tiuujiacajanaari juhua sesa miyashijianucua jiyatesaaquiohua.

²⁰ Moisés Rootasano jaara niishishaquiaari, pueyari socua sesa miijiacara jiyacatequiaari. Naa socua sesa miijiacara pa quishacarijia, naajuhua, Pueyasoori socua jiyacatequiaari pocua taraajenujuhua.²¹ Sesa miiniu tarinitianu niishiyashijia pa quiniuucua, puetunu pueyajanaari cusunuriquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo motequiaari pa niti, pa jiyanooshaanura. Naacuajitij, nojuajaari juhua pa samiitianijioquiaariuhua, pueyaracaanu rishijia pa quiniuria pa Jiyaniijia Jesucristota.

6

Pablo niishitiojosano moojinia tiuquinijonujiniji

¹ Pueyaso jaara naa pa jiyanoquiaa pocua na taraajesacari, ¿taa nia sequeyani pueyanaa? ¿Paate socua pueyaracaanu sesa miijia quiniutianiya, pueyaracaanu Pueyaso jiyanooniuria pajaniya, pueya niishiniuria, Pueyasocuaajaquijiyanohua maninia na jiyanooniuria pajaniya? ² ¡Maja pueyanaa! ¡Maja naa nia niishiriojonu! Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, ¿paatucua casaara socua sesa miijia quirini? Pueyasora, paacuajaari tari cusunuuquiaari Jesutani. ³ ¿Niaateeri cuno niishyaquiyajaa? Naajuhua, paa jaara moojinia tiuquinishaare

Jesucristoocua pa tiuushacarini, Pueyaso niquiara, paari Jesu rupuequiaari niyacutesanojiniani. Nojuacuajaari pa niti saniitiosaaquiaari. ⁴ Naacuajitij, paa jaara moo cariquimia shishaareni, jiyacaritij, paari juhua Jesuta jamoshiyajuhua. Naa juhua macu pa quishacaritij, paari samiitianijiosanohuani, taa Jesucristo samiitianishaaquiaariuhua macujiniji jiyanohua Pueyaso cumaacatacuani. Naa samiitianijiosanohua pa quishacaritij, maninia miijiaca pa quiri juhua quiarinio pueya.

⁵ Paa jaara Jesucristo rupuetesaaquiaari sesa pa miishanoocuara na cusosacarini, naajuhua, paa cutaraari tari samiitianijiosanohua juhua nojuajani, maninia quijiaca pa quiniuria. ⁶ Tariija, majaari pa naata tarinitianu quijia sesa pa miiniu, sesa jiuujiaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa tiuushacari, maja socua cumaaca na jitianura, sesa na miitiniuria pajaniya. ⁷ Naacuajitij, sesoriquia poojia seque jaara tari jatanishano quiya, majaari tari sesa miijiaca pa quiniu. ⁸ Paa jaara tari naa cojiritiasaaquiaari monu Jesuta nocua pa tiuushacarini, paari quiarijia niishiya cutarani, paari pueyaracaanu nata quiriqiano saminioni. ⁹ Cristocuaaari samiitiaquiaariuhua. Paari niishiyajuhua, majaari socua na pacutenu quiniutianiuhua cusonu. Nojuacuajaari tari cusoquiaari puetunu sesa pa miishanoocuarajanaa. Naaratej, nojuajaari maja na naata socua cusajuasaanuhua. ¹⁰ Majaari socua Jesucristo pacutenu quiniutianiuhua cusonu, sesa pa miishanoocuara. Nojuacuajaari tari cusoquiaari, Pueyaso jyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiriquiano Pueyasora cutara. ¹¹ Naajuhua pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Naa niishirijuhua, niaacuajaari Jesucristota samiitiaconohua, Pueyaso tojjijaca nia quiniuria.

¹² Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujuanaa nia niyaretare tama nia cuaqueya panishanojuaja nia miyaquiniuria. ¹³ Majaari nia cuaqueya nia panitianu sesa nia miiniuria, taa na paniya nia miiniuria juucuacuajani. Saniniuujia, nia cuaqueya nia jiyatere cutara saaja Pueyaso panishano miijia na quiniuria. Niaacuajaari tari samiiticoquiaariuhua juhua macunucua nia quiniujiniji. Naacuajitij, nia cuaqueya nia jiyatere saa maninia miijia na quiniuriaja. ¹⁴ Naa jaara nioojajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari nijaniya. Naa niishiri, niaari quiarijia Pueyaso tojjitajaca cutara, maja tari Moisés Rootasano tojjijaca.

Pueyaso tojyashijia pueyani, nojoriiri Sesaaca pueya

¹⁵ Cua sequesacari nijaniya, pajaniya maja tari Moisés Rootasano tojjiacani, ¿niaateeri cunora sesa miiniutianiya, Pueyaso quishacari pa jyanoojia? ¡Maja naa nia miiniu pueyanaa! ¹⁶ Niaacuajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacuajitij, paari pueyaracaanu na tojjia quiniutianiyani. Naajuhua, niaa jaara sesa miijiaca quiriuhua, niaari Sesaaca tojjijaca. Naa sesa miijiaca nia quishacaritij, niaari cusonutaniya. Saniniuujia, niaa jaara Pueyaso tojjiacara quiri, niaari sesa miyashijia quiniutianiya. ¹⁷ Tariija, niaari Sesaaca tojjijaca quijia, juhua na seya, sesa miijiaca nia quishacari. Quiarijia, janiyari Pueyaso timitiaani nia tojiniucua Jesucristo rootasano puetunu nioojiatajanaa, taa nia niishitiojosaaquiaaricujani. ¹⁸ Jesucristo rupaa nia tojjishacari, Pueyasoori nia jiyatequiaari na muerasu nia quiniuria, maja Sesaaca seya nia quiniuria socua. Naacuajitij, niaari Pueyaso tojjiacara jatanishano, saaja maninia miijiaca nia quiniuria. ¹⁹ Janiyari naa pahuataa serujiniji nijaniyani, maatia nia tojiniuria cua niishitiojosano. Majaari juhuanojuaja nia naata puera jiyajeneta niishitiojosano niishiniu, cumueeca Pueyaso muerasu nia quiyaquishacarijia. Tariija, niaari tama nia cuaqueyajaaja jiyatequiaari Sesaaca panishano nia miiniuria. Naacuajitij, niaari jyanohua sesa miijiacara jiyatequiaari. Naajuhua, quiarijia saniniuujia, tama nia cuaqueyajaaja nia jiyatere Pueyaso panishano nia miiniuria. Naa jaara naa miiri, niaari tojetaarucujanaa maninia miijiaca quiniutianiya Pueyasora.

²⁰ Naa jaara sesa miijiaca quiquiaari Sesaaca tojjijaca nia quishacarijia, niaari juhuajaniya Pueyaso tojyashijia quiquiaari. ²¹ ¿Sesaacate maninia nia miiquiaari sesa nia miiniucua nera? ¡Maja! Naa cutaraari saaja caririquiquiaa sacuaraatia casaa nia miiniucua tariija. Niaari quiarijia niishiyajuhua, cante sesa miijiaca quiquiaani, nojoriiri shaajasaariquiano. ²² Naa sesa miyashijia nia quishacari quiarijia saniniuujia, niaari Pueyaso tojjiacara jiyatesaaquiaari, saaja na panishano nia miiniuria cutara. Naa Pueyaso tojjijaca nia quishacaritij, nojuajaari nia jiyatenutaniya seetanujuanaa maninia miijiaca nia quiniuria. Naacuajitij, niaari pueyaracaanu shuquiriaatia rishijia quiniutianiyajuhua. ²³ Saniniuujia, sesoriquia pueya miiniucua sesa saaja, nojoriiri naa na miiniucua shaajasaanutaniya. Saniniuujia, saaja Jesucristoocua tiuujia pa quishacari,

Pueyasoori saa cunoraja pa jiyatequiaa pueyaracaanu rishijiaa pa quiniuria, pa Jiyaniijia Jesucristo rupuejaca pa quishacari.

7

Paari juhua camishanoni

¹ Pueyanaa, niaacujaari Moisés Rootasano niishijiaa. Niaari niishiyajuhuj, paa jaara shaajequeeni, paari jiyacari Moisés Rootasano cartequue shushani. ² Naajuhuj, paacujaari rootasaaquiarini, maaji jaara camishano quiri, cuaara tamonu cayata quiyaaquiria, neyaca jaara saminio quiyajaa. Neyaca jaara cusoyare, caminio pueyara Moisés rootasanoori maja tari na quiniu cuno mashiquio tojishocoriquiano. ³ Saniniuujia, maaji jaara tamonu pueyanota quiri quia neyaca quishacaribia saminio, cuno maajiiri sequeshiya paanatuta, naa na quiniuucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés Rootasano tojiyashijia na quiniu cunora. Nojuajaari maja paanatu, naa na miishacari.

⁴ Niaari naajuhuj pueyanaa. Jesucristo cusonuucua pa niti, niaari juhua cusonu-uquiaarijuhuaj, maja Moisés Rootasano tojiijiaa nia quiniuria socua. Naacujitij, niaari tamonu tojiijiaa quiya cutara. Nojuajaari pa Jiyaniijia Jesucristo, nooj, macujiniji samiitiaquiarihuatej. Naacujitij, quiaribia pa Jiyaniijia Jesucristo tojiijiaa pa quishacari, paari maninia miijiaa Pueyasorani. ⁵ Tarijia, Pueyaso tojiyashijiaa pa quishacaribia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniujuquiaari sesa pa miiniuria. Naacujitij, tama sesa pa miishacaribiaaja, paari tama pa cuaqueyajaaja jiyateriquiaa saniitosano pa quiniuria maquesaashijia mani quiquiojiniani. ⁶ Tarijia, paari juhua quioosano pueya Moisés Rootasano tojitishaaquiarini. Saniniuujia, Jesucristota pa cusonuucua, nojuaja jaara pocuara cusoquiaari, paari tari Moisés Rootasano tojinu cartequiarini. Moisés Rootasano pa tojiyaquishacari quiaribia, naacujiti pa naata Pueyasojuanaa tojinu shitimia cutara, na Sohanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojtiajaca quiquiaari maniniani, pa puerenuta paa mariqui saniitosaaereeri pa tojiyaquiniuucua niquiriyatu queraatia na rootasanojiniji.

Poojiaari saa sesa miiniu niishijiaa

⁷ Tamasaca naasucuaari jiyaniya janiyari Moisés Rootasano soojeani. Maja. Quiria, jiyanhua maniniacujaari Moisés Rootasano. Moisés Rootasanojiniji, paacujaari niishiyani paari sesa miijiacani. Moisés Rootasano jaara quiyaaquiquia, janiya maara niishiyaaquiquiarini, cua jiaatiasacari tamasaca jiitiasano casamiicua, cunoori sesa Pueyasora. ⁸ Saniniuujia, Moisés Rootasanojiniji cua niishishacari maja tamasaca casamiicua cua jiaatianura, janiyari saaja juhua shiniujuushaaquiarini casamiicua jiaatiaja cua quiniuria socuani. Naacujitij, Moisés Rootasano cua niishiyaaquishacaribia, coojiaari juhuajaniya quiquiaari juhua maqueja. Saniniuujia, janiya jaara Moisés Rootasano niishiquiaarini, coojia sequeeri juhua niucuaquiaari, puetunu sesa casaajanaa na miniu paniniuria. ⁹ Moisés Rootasano cua niishiyaaquishacaribia, janiyari juhuajaniya quijia quiquiaarini. Saniniuujia, Moisés Rootasano cua niishishacari, janiyari jiyanhua taraajequiarini, cua niishishacari janiyari jiyanhua sesa miijia Pueyaso niquiarani. ¹⁰ Naa sesa miijia cua quishacaritij, janiyari niishiquiaarini, janiyari quera jatashiya saniitosocoriquianoni. Janiya jaara Moisés Rootasano tojiquiaari shushajanaani, janiyari jiyaniquiaarini, janiya jaara cuno rootasano tojrini, janiya naasucuaari pueyaracaanu rishijia quiniutianiyani. Saniniuujia, Moisés Rootasanoori saaja cucuara tonujuquiaari puetunu sesa cua miishanojinijianaa. ¹¹ Naacujitij, janiyari jiyanhua jiyajenequiarini, cua jiyaniishacari cua naatacuaja Moisés Rootasano tojinu maninia, Pueyaso jiyanoonuria janiya. Jaara maja cua naata quiquiaari Moisés Rootasano cua tojinuria maninia, janiyari niishiquiaarini Pueyasoori cua jiyanoyaquiniutianiya.

¹² Seetanujuanaa nia sequeyanijia pueyanaa, Moisés Rootasanoori jiyanhua maninia. Tojetaarucujanaa maninia rootasano. Cunoori seetanujuanaa rupaa maniniu Pueyasojiniji. ¹³ Moisés Rootasano jaara naa maninia quiri, ¿janiyateeri nia sequeyani cuno na rootasanoori pa cusouaja? Maja. Janiyari nia sequeyani, Moisés Rootasanojiniji, paari niishiyani sesa pa miishano cutaraari jiyanhua sesa Pueyasora. Naacujitij, paari Moisés Rootasanojiniji niishijiani, paari puetunujuanaa jatasocoriquiano quijia juucuanu, seetanujuanaa sesa miijiaa pa quiniuucua.

¹⁴ Paacujaari niishiyani, Moisés Rootasano, cunoori maja nareja pueyano niishitiojosano. Pueyaso niishitiojosanocujaari pa tojishocoriquiano puetunu poojiatajanaa. Saniniuujia, coojiaari Pueyaso tojiyashijia. Janiyari tamajaaja juhua coojia seruni, na panishano cua miiniuria. Naa sesa juujiaraca cua quishacaritij, majaari cua naata Moisés

Rootasano tojiniu. ¹⁵ ¿Casaara naa sesa cua miiquiaani? Janiyari saaja cua niishishano sesa casaa miiquiaani. Majaari maninia cua miiniu quiquiaa, taa cua paniyacuajani. ¹⁶ Janiya jaara cua panishoo sesa casaa miirini, naacujitij, janiyari sequequiaani, Moisés Rootasanoori seetanujuanaa maninia. ¹⁷ Naa cua panishoo sesa casaa cua miishacaritij, cunoori maja tama cua miishanojuaja. Cuno sesa cua miishanoori coojiajiniji supueno tamajaaja. ¹⁸ Quiaritia niishiya cutaranijia, coojaari tojetaarucujanaa sesa miiniu niishijia. Naacujitij, janiyari juucua maninia miiniucua jiaatiaquiaani. Naajaa, majaari cua naata quiquiaa maninia cua miiniuria tamajaaja. ¹⁹ Naacujitij, cua miishanoori maja maninia, taa cua miiniu paniquiaa juucacuajani. Cua miishanoori saaja cua miiniu paniyacuajani quiquiaa. ²⁰ Naacujitij, janiya jaara cua panishoo sesa casaa miirini, janiyari niishiyani, cunoori tama coojiajiniji supuenojuaja, majaari tama cua miiniu panishanojuaja.

²¹ Quiaritia niishiya cutaranijia, janiyari naa sesa miijiani: janiya jaara maninia casaa miiniu paniyani, janiyari saaja sesa miiquiaani. ²² Janiya cutaraari niishiyani Pueyaso rootasano Moisésri seetanujuanaa maninia cua tojishocoriqiano. Na tojiniucua jiaatiaquiaa juucuanijia. ²³ Janiyari niishiyajaniuhua, coojaari juhua cua niishitaja paraca quiya. Naacujitij, cua niishiriojosacari, “Maninia miiniutianianijia”, coojaari saaja sesa cua miitiquiaa. Naacujitij, tama janiyajaaritia juhua coojia seruni, cua miishacari puetunu sesa na panishanojuanaa.

²⁴ ¿Taa cua miiniutianiya socuarini? ¡Tojetaarucujanaa taraatia quijianijia! Pueyaraaanu sesa miijianijia. Majaari cua naata tamajaaja maninia miijia cua quiniu. Naa sesa miijia cua quishacaritij, cua cuaqueyari macu quiriquiano. ¿Cante na naata cua jataniniuni, naa sesa miijia cua quishacaritij? ²⁵ ¡Pueyaso shuquiritiaanijia cua niishishacari, nojuacuajari cua jiyaniijia Jesucristota cua jataniniutianiya tojetaarucujanaa maninia miijia cua quiniuria! Naacujitij, mijiria cua quishacaritia, janiyari Pueyaso tojjia quiniu paniyani. Saniniuujia, naa coojia quiniucua sesatej, saaja sesa cua miiniu paniquiaari.

8

Pueyaso Sohuanu pa tojishacari, paari maninia miijia quiniutianiyani

¹ Pa rupuesacari Jesucristo, nocua pa tiuushacari, Pueyasoori pa jiyanooquiaa. Naacujitij, paari tojetaarucujanaa jiyanooshano quiyani. ² Puetunu pueyajaarari cusonuriqiano quijia, sesa miijiaa nojori quishacari. Saniniuujia, Jesucristo pa rupuesacari, Pueyaso Sohuanuuri pa jiyatequiaa saaja maninia miijia pa quiniuria. Naacujitij, majaari tari sesa miijiaa pa quiniu pa saniitiosaanura. ³ Moisés Rootasano pa tojishacari juucua, majaari pa naata quiniu jiyanooshano. Cunoori saaja sesa miijiaa pa quiniucua. Naaratej, Pueyasoori Neyanujuanaa jiyaroquiaari mijiria, pueyano na quiniuria juhua pajaniya, pa niti na mosaanura. Naacujitij, Jesucristo jiiitasacari juhua pa cuaqueyajuhaaj, Pueyasoori juhua sesa miijiaara na jiyatequiaari, pa niti na saniitiosocoriqiano. ⁴ Naacujitij, Pueyaso Sohuanu pa jiiitasacari quiaritia, pa naata maninia miijiaa quiniu, taa Moisés Rootasano sequeyacuajani. Pueyaso Sohuanu tojjiaa pa quishacari, majaari tari pa quiniu sesa miijiaa, taa pa quiquiaari tarijacuajani.

⁵ Canapuate tama na panishanojuaja miiquiaani, nojoriiri tama na cuaqueyajaaja shuqiritiniuria jiaatiaquiaa. Saniniuujia, canapuate Pueyaso Sohuanu tojjiaa cutarani, nojoriiri saaja Pueyaso shuqiritiniuria jiaatiaquiaa. ⁶ Tama na cuaqueyajaaja shuqiritiniuria jiaatiajacaari saaja shaajecoriqiano cutara. Saniniuujia, Pueyaso shuqiritiniuria jiaatiajacaari pueyaraaanu rishiriqiano cutara. Nojoriiri juhujaniya shuqiritiatia quijiacajuhua. ⁷ Cante tama na cuaqueyajaaja shuqiritiniuria jiaatiaquiaani, nojuajaari Pueyaso paraca. Majaari Pueyaso tojjia na quiniu paniniu. Seetanujuanaa majaari na naata Pueyaso tojjia na quiniujuhua. ⁸ Naacujitij, canapuate saaja tama na cuaqueyajaaja shuqiritiniuria jiaatiaquiaani, cuno pojoriiri maja na naata Pueyaso shuqiritiniu.

⁹ Nijaniya cutaraari maja nia quiniu juhua cuno pojoritia, tama na cuaqueyajaaja shuqiritiniuria jiaatiajacani. Naa cutaraari Pueyaso shuqiritijiaa, Pueyaso Sohuanu cumaquishacari nijaniya, nojuaja jaara seetanujuanaa noojiajinia quiya. Cante Pueyaso Sohuanu jiiitaaquiyani, nojuajaari maja Pueyaso pueyano. ¹⁰ Cristo quishacari poojiajinia, pa sohuanuuri tari jatanishano quiya maninia miijiaa pa quiniuria, pueyaraaanu rishijiaa pa quiniurajuhaaj. Pa cuaqueya cutaraari shaajasocoriqiano, sesa miijiaa pa quiniucua. ¹¹ Naajaa, Pueyaso Sohuanu jaara poojiajinia quiya, nojuajaari pa cuaqueya samiitianiionutaniuhua, taa na samiitianiiquaariuhua macujiniji Jesucuaani.

¹² Naa Pueyaso miishacari maninia pajaniyatej, maninia miijiaca pa quiri Pueyaso Sohanu cumaquishacari pajaniya. Maja cumaati tama pa cuaqueyajaaja pa shuquiri-tiniuria pa jiaatianu tari, taa pa miiquiaari tarijiacuajani. ¹³ Cante naa miijiaca quiya-jaani, nojoriiri shaajasaariquiano. Saniniuuja, niaa jaara Pueyaso Sohanu cumaacata rejeretariquia saaja tama sesa nia cuaqueya miiniu panishanojuaaja, niaa cutaraari pueyaracaanu shuquiriaatia quijiaca quiniutianiya.

¹⁴ Canapuate Pueyaso Sohanu tojtiajacani, nojoriiri Pueyaso niquiohua cutara. ¹⁵ Pueyaso Sohanucuaajaari pa jiyatequiaari Pueyaso muerasuniyojua pa quiniuria. Naacujitij, cuno pa jiiitasano Sohanuuri Pueyaso pa sequetequiaa, “cua Quenaa”. Naa Pueyaso muerasuniyojua pa quishacaritij, majaari tari pa puerenu paari saniitosaan-taniyani, Moisés Rootasano pa tojiyaquiniucua. ¹⁶ Pueyaso Sohanuuri pa sohanu rupuequiaa, na niishitiniuria pajaniya, paari Pueyaso muerasuni. ¹⁷ Naa Pueyaso muerasu pa quishacaritij, puetunu Pueyaso jiiitasanojuaanaari pa jiiitasano quiniutianiya-juhuaj. Pueyasoori Neyanu Jesucristota pa cojiritianutaniya naa maninia na miiniuria pajaniya, paa jaara naquiya miiniu rejeretajaca quirini, Jesucristoocua tiujujaca pa quiniucua. Paa jaara naquiya miishaare nocuara mijiriani, paari jiyanojua maninia quijiacara jiyatesaanutaniyani juhua nojuajuhua.

Pueyasoori maninia miiniutianiya na muerasu

¹⁸ Quiarijia mijiria naquiya pa miiniuni, cunoori saaja rupaquijia. Janiyara, naa-ja, cua niishishacari naa naquiya pa miiniu nuhuajitij, paari jiyanojua maninia miishaanutaniyani, pueyaracaanu shuquiriaatia pa quiniuria. ¹⁹ Quiarijiani, puetunu Pueyaso shipinishano casaajanaari pa niquiniucua jiaatiaa paa jaara quiarinora jatanishaareni. Na niishiniu paniyari taamueca quijiacara Pueyaso jataniniutianiya pajaniya na cumaacatani, tojetaarucuaajanaa maninia jeenucuasano na muerasu pa quiniuria. ²⁰ Coteenujuanaa pa supuetana pueyano jaara juhuacatecara sesequiaari, jiyacaritij, puetunu Pueyaso shipinijosano casaajanaari sesequiaarijuhuaj. Majaari na sesenu quiquiaari tama na panishacarijiaaja. Pueyasocuaajaari naa paniquaaari sesa na quiniuria, na shipinishano pueya sesenucuajuhua. Naajaa, majaari pueyaracaanu sesa na quiniu quiniutianiya. ²¹ Pueyaso muerasu jaara jatanishaare shacantuuca quijiaca pa quini-uria, jiyacaritij, puetunu Pueyaso shipinijosano casaajanaari pata cojiritiasaanutaniya jeecanujuhua. Naacujitij, puetunu Pueyaso shipinijosano casaajanaari maniniera quiniutianihua, maja na sesenura socua. ²² Quiarijiani, puetunu Pueyaso shipinijosano-juanaari jiyanojua noojia niojia taraatia na quishacari. Quiatojiyari juhua maaji noyano, cuara quiarinora jatanishaarejaatijia. ²³ Majaari saaja puetunu Pueyaso shipinishano casaajanaa quiatotojua, poojiaari juhua quiatotojijuhua, na panishacari tojetaarucua-janaa jatanishano quijiaca pa quiniuria. Paacuaajaari tari jiiitaa Pueyaso Sohanu poo-jiajiniani, pa niishiniuria, paari seetanujuanaa Pueyaso muerasuni. Saaja pa cuaqueya cutaraari juhanojua jatanishoojua. Paari cunora quiatotojijajaani. ²⁴ Paacuaajaari tari Pueyaso muerasu quiyani. Jesucristo cutaraari pa saquiriojoquaaari shacantuuca quiji-acara pa jatanishaanura. Paari naa na jataniniuria pajaniya sashiyajani. Pa cuaqueya jaara tari jatanishano quiriquia, paa maara na jataniniucua jiaatiaquirini. Paa jaara tari jiiitariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhanojua jatanishoojua. ²⁵ Naajaa, paacuaajaari niishiyani pa cuaqueyari jatanishaanutaniya, jiyocuacaanu pa rupenura pa Jiyaniijia. Cunora, paari mijiria taraatia pa quishacari juhuajaniya rejeretaquiaani pueyaracaanu pa sashishacari.

²⁶ Naa rejeretajaca pa quishacari mijiria pa sashishacari pueyaracaanutej, Pueyaso Sohanuuri pa cumaquiquiaa, cumueca pa quiaquishacari. Naacujitij, Pueyaso pa secojosacari, pa niishiyacquishacari casaacuara pa secojonutaniyani, Pueyaso Sohanu-cuaajaari poojiajiniji Pueyaso secojoquiaa pocuara. Jiyanojua na secojosacari pocuara, jiyasohua quiatotojia poojiajiniaari. ²⁷ Poojia niishijia Pueyasoni, nojuajaari niishiyacuaja casaa na Sohanu secojiaa nojuaja pocuarani. Na Sohanucuaajaari maninia secojojua cutara, taa Pueyaso miiniu paniya na muerasuracuajani.

Jesucristo pa shocotanjia cutara

²⁸ Paacuaajaari niishiyani, paa jaara maninia miishaareni, paa jaara sesa miishaare-juhuaj, Pueyasoori puetunu cuno miishanojuanaa jiyatequiaa saaja maninia na quiniuria na panijiacara. Nojuacuajaari pa saquiriojoquiaari na muerasuniyojua pa quiniuria. ²⁹ Naajuhua, jiya shipiniyaquishacarijia, Pueyasoori tari niishiquiaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quiriquianojuhua. Naa sequequiaariiri Jesucristo quiniuria pa puerana, queraatia tapueyocucaraca na quiniuria. ³⁰ Naacujitij, canapue Pueyaso saquiriojoquiaari na muerasu nojori quiniuracuajani, juhua Jesucristo nojori quiniurajuhua, Pueyasoori

cuno pojori niishitiquiaa nojori tiuuniuria Neyanuucua. Jesucristoocua nojori tiushacari, Pueyasoori nojori jiyatequiaa juhua sesa miyashijiacara. Jiyanooshano nojori quishacari, Pueyasoori nojori niqutioquiaa na Sohuanu, na Sohuanu jataniniuria nojori shacantuuca quijiaca nojori quiniuria juhua Neyanu.

³¹ Naa Pueyaso miishacari maninia pajaniyatej, ¿taa pa sequeyani? Pueyaso jaara pa jiyano quiya, ¿tamonute na naata sesonu pajaniya? ¡Maja! ³² Pueyasoori jiyanoohua pa panijia. Nojuajaari Neyanuniyojua jiyaroquiaari pocuara mosocoriquiano. Nojuaja jaara Neyanu jamueyaquiquiaaricuaa, ¿maatucua casaara quiarijia niqutioyaquiri puetunu pa panishanojuanaani? ³³ ¿Cantucua Pueyaso saquiriojosano pueyacuara saquiriojotare sesa nojori miishanoni? Pueyasojuanaacuaajaari pa jiyatequiaari juhua sesa miyashijiaca pa quiniuria. ³⁴ Jesucristocuaajaari tari cusoquiaari pa niti. ¿Cantucua saniniuuja quiarijia Pueyaso sequeriquia pocuarani: “Cuno pojori quia shaajare”? Pocuaji Tacunacuaajaari samitiiaquiaruhua. Quiarijia na Que Pueyaso miaquetajara cajiyari, pocuara na Que na secojonura pueyaracaanu. ³⁵ Nojuajaari jiyanoohua pa panijia. ¿Tamonu casaate na naata Cristo tarinitiniu maja na paniniuria pajaniya? ¡Majaari quenaaja casaa quiniu na tarinitiniuria nojuaja! Naaratej, majaari nia jiyaniu Cristo pa paniyaquiya, paa jaara taraatia miishiyani, paa jaara casaacua tacayani, tamasa jaara naquiya miya pajaniyani. Naajuhua, paa jaara quera titiacoya pa miaajenutani, majaari nia jiyaniu Cristo pa paniyaquiyani, naajuhua, paa jaara toqueju quiyani, paa jaara cocuaatia miyani, paa jaara miananajoshiya monurajaniuhua. Puetunu niojuanaari maja na tarinitiniu Jesucristo, na paniyaquiniuria pajaniya. ³⁶ Paacuajaari taraatia miishocoriquianoni, naatej, taa tariucuaaanu Pueyaso Rupaajinia naajiotasano quiyacuajani. Naa sequeyari:

“Canaa Pueyasonaa, canaari puecooshiya pueyaracaanuni, quia tojitiajaca canaa quiniucua. Nojoriiri juhua miaquesocoriquiano borregohua canaa puecooquiaa juhua-janiya”.

³⁷ Paari naa miishaaquiaajaaniuhua. Naajaa, naa taraatia pa miishacarij, Jesucristo panishacari pajaniya, nojuajaari shocotajacara pa jiyatequiaa. Naacuajitij, majaari saaja pa rejeretanu naquiya pa miishacari. Jesucristoori seetanujanaa cuno naquiya pa miini jiyatequiaa maninia na jecanura pajaniya, juhua nojuaja pa quiniuria socua. ³⁸ Seetanujanaa niishyanijia, Pueyaso panishacari jiyanoohua pajaniya, majaari quenaaja tamonu casaa na naata rupatanu pajaniya Nojuajiniji. Paa jaara quiri saminiujuani, macu soj, naajaa, pa panijia Pueyasocuaajaari pata quiyajaa. Naajuhua, Pueyaso seya, samaruhanio, puetunu cunoujanaari maja na naata pa rupatanu Pueyasocuaaji. Naajuhua, majaari quenaaja tamonu cumaacaraca quijiaca na naata pa rupatanu Pueyasocuaaji. Pueyaso paniniu pajaniyani, cunoori maja na puequenu quiniutianiya quiarijia, tamacarinio. ³⁹ Naajaariuhua, tee pa quiyani, jiyocuaaanu, jiya cariquimia soj, naajaa. Pa panijia Pueyasoori tii quiya patajuhua. Naacuajitij, pa Jiyaniijia Jesucristota rupuetootesano pa quishacari, puetunu Pueyaso shipinijosano casaajanaari maja na naata pa rupatanu Pueyasojiniji.

9

Pueyasojanaari pueya saquiriojojua na pueyara

¹⁻³ Naa Pueyaso pueyano cua quishacarij, janiyari jiyanoohua cuarta Israel pueyacuara taraajequiaani, nojori tiyaquiniucua pa Jiyaniijia Jesucristoocua. Janiyari pueyacaanu nojoricua taraajequiaa jiyanoohuani, maja cua naata quishacari cuarta Israel pueya tiutiniu Jesucristoocua. Seetanujanaa nia sequeyanijia, Pueyaso jaara na naata quiri mani quiquiojini na jatanura janiya nojori niti, janiya maara sequereni, maniacuaajaari naa cua miishaanura. Nojori jaara na naata quiri Jesucristoocua rupuetesaanu cua niti, janiya maara Pueyaso sequereni: “Cua rupatare cutara Jesucristojiniji, saniya cuarta Israel pueya jiyatesaanura Pueyaso muerasura cutara”. Naa cua sequesacari niajaniatej, janiyari coojiajini niishiyani, seetanujanaari cua sequesano. Pueyaso Sohuanuuri cua niishitijuhua majaari cua sapojonu. ⁴ Cuarta Judiocuaaari pa supuetana Israel niqiohuacuajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiushacari. Pueyasoori nojori niqutioquiaari shacantuuca na cumaaca, tariucuaaanu nojoritia na quishacari. Pueyasoori nojori sequequiaari: “Janiyacuaajaari Pueyasoni. Niaari cua pueya quiniutianiya niaa jaara cucua tiuuri”. Naajuhua, Pueyasoori Moisés niqutioquiaari caapiqui saajianecua na naajiosano, saniniuuja Moisés niishitiojonura tiji nojori. Pueyasoori nojori niishitiquiaarijihuua taa nojori miiniutianiyan, tariucua jiyanooshano nojori rerejonura na niqiara. Pueyasoori

nojori sequequiaarijuhuaj, nojuajaari puetunujuanaa na sequesano Abraham tohua-teenutaniya nojoriria. ⁵ Israel pueya supuetanaari quiquiaari Abraham, Isaac, Jacobonio. Pa Jiyaniijia Cristoori cuno pojori niquiohuacuajinio supuequiaari. Nojuajaari tari jiyatesaaquiaari Jiyaniijijanaa na quiniuria, puetunu casamijianaa jiitiana na quiniuria-juhuaj. Nojuajaari Pueyasojuhuanajaj, juhua na Quejuhuaj. ¡Nojuaja cuara pueyaracaanu maniniuhuaqueetasano quiiria! ¡Cuara naa quiiria pueyaracaanutej!

⁶ Quiarrijiani, queraatia parta Israel pueyajinijinio pueyari maja Pueyaso muerasu. Naa cua sequesacari niajaniatej, majaari nia jyaniniu tariucuacaanu Pueyaso sequesano pa supuetanaari tohuatayaquiniutianiya. Maja pueyanaa. Tohuateenutaniyanocujaja. Jaara naa quiriritij, ¿casaara puetunu Israel pueyajanaa maseyaquiniutianiya Pueyaso sequesano nojoririarini? Cua tojitiare pueyanaa. Puetunu pa supuetana Israel niquiohuacuajinio supueno pueyajanaari maja seetanujuanaa Israel pueya Pueyasora. ⁷ Naajaariuhua Abraham niquiohua. Puetunu Abraham niquiohuajanaari maja seetanujuanaa Abraham niquiohua na quiniu quiquiaari Pueyasora. Pueyasocujajaari naa sequequiaari Abraham: “Cua sequesano quiajaniyari saaja quia nyanu Isaaccuajinio supueno pueyarano quiniutianiya cutara”.

⁸ Naa Pueyaso sequesacari Abrahamtej, naacuajiti paari niishiyani, majaari puetunu Pueyaso saquiriojosano pueyacuajinio supueno pueyajanaa seetanujuanaa Pueyaso muerasu. Saniniuujia, seetanujuanaa Pueyaso muerasu cutaraari noo pojori, Pueyaso sequesanoocua tiuujiacatej, taa pa supuetana Abraham tiuquuaari Pueyaso sequesanoocuaacuaani. Pueyasora, nojori cutaraari Abrahamcuajinio supueno pueya. ⁹ Abrahamri Pueyaso sequesanoocua tiuquuaari, Pueyaso jaara naa na sequequiaari: “Abrahamnaa, janiyari quiocua tacatenutaniuhua tamacarini. Janiyari jiyacari quia niqiuo Saara riuriatanutaniuhua tariucua mueyaracani”.

Naacuajitij, Isaac jaara rasaaquiaari, Pueyaso sequesanoori tohuateequiaari. Naacuajitij, puetunu Abraham niquiohuajinijiojuanaani, saaja Isaacri Pueyaso saquiriojosano pueyano quiquiaari.

¹⁰ Naa quiquiaarijaariuhua Isaac niquiohua. Isaac jaara neco Rebeca manajoquiaari, Rebecaari caapueya manajequiaari. ¹¹⁻¹³ Cuno caapueya royaquishacarijia, juhuanojuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenutaniya na nuhuajishana tojijiarani”.

Naa Pueyaso sequesacariitij, cunoori juhua Pueyaso sequesano tariucuacaanu. Naa sequequiaari cuno royaquishoojua caapueyajinijiiri:

“Jacoboori cua panishano quiniutianiya. Esauuri saniniuujia cua soosano quiniutiani-
acuaja”.

Naa Pueyaso sequesacariitij, paari niishiyani, Pueyasoori saquiriojoquiaa cana na saquiriojonu paniyacujani, tama na miiniu panishanojuaja na tohuateenura. Naacuajitij, Pueyaso jaara saquiriojore pueya, nojuajaari maja na niishiriojonu nojori miishanojiniji; maninia, sesa soj.

¹⁴ Naa Pueyaso miishacari tama na panishanojuajatej, ¿taa pa sequeyani? ¿Pueyasote sesa miya, naa rimiajata na saquiriojosacari pueyatej? Maja. ¹⁵ Pueyasocujajaari naa Moisés sequequiaari:

“Janiyari pueya jyanooniutianiyaniteyano pueyano cua jyanooniu paniyacujani. Naajuhuaaj, janiyari pueyanooocua taraajenutaniyani, teyano pueyanooocua cua taraajenu paniyacujani”.

¹⁶ Naacuajitij paari niishiyani, pueyano maja na naata tama na cuaqueyajaaja jiyatenu Pueyaso pueyano na quiniuria. Pueyasocujajaari tama saquiriojoquiaajaaja cana na jyanooniu paniani. ¹⁷ Naajuhuaaj, tariucuacaanu Pueyaso sequesano Egipto jiyaniijiaaraari naa naajiotasano quiyajuhuaaj:

“Faraónnaa, janiyari quia jiyatequiaari Egipto pueya jiyaniijia quia quiniuriani, cua cumaacata cua mijiosano cua niqutiniuria quiajaninya. Naacuajitij, puetunu jiyacajinia quiniaa pueyapuejanaari niishiniutianiya, janiyari Pueyasojanaa cutarani”.

¹⁸ Naacuajitij, paari niishiyani, Pueyasoori taraajaja teyanooocua na taraajenu paniani. Naajaariuhuaaj, nojuajaari na tojiyashijia pueyano jiuujia jiyateja cumajiuujiaacara, teyano pueyano jiuujia na jiyatenu paniya naaracuajani.

¹⁹ Naa cua sequesacari niajaniatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacuajani, ¿maatucua casaara sesa pa miiniuucua pa saniitioreni? ¿Canteeri na naata Pueyaso tarinitiniu na miiniu panishanojinijini?”

²⁰ Majaari naa sequenu pueyanonaa. ¿Canteeri quiajaniani, naa quia juaaniuria Pueyasotej? Paacuajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaanuu: “Juashiquiaracanaa, ¿casaara quia

panirii conatura janiyani?"²¹ Paniyojojuacuajaari na naata paniniu maraujiniji na panishano casaa, shanohua pataconiyojua, mashaca quiquiora manijinia cajitiriQuiano conatunio.

²² Naajuhua, ¿taa pa sequenutaniyani, Pueyaso jaara niishitiniu paniya na juaaniu, na cumaacanio, na saniitiosacari sesa miijiaca? Naajaa, Pueyasoori jiyanoohua rejeretaquiaa sesa miijiaca, cante tari saniitiosocoriquiano quiyacuajani. ²³ Pueyasoori naa tarishiyajaara na sanitionura na tojitiashijiaca pueya. Naa na tarishishacaritij, nojuajaari pueya niishitiquiaa na shacantuuca cumaaca, maninia na miishacari na jiyanooshano pueya, cante tari saquiriojosano quiya na shuriucua quiriQuianocujani. ²⁴ Paacuajaari cuno jiyanooshano pueyani, canapue tari Pueyaso saquiriojoquiaaricujani Judiocacajinijinio, taucuacajinijinio. ²⁵ Naa naajiotasano quiyacuajaari Pueyaso sequesano supuetana Oseas naajioneejinia:

“Cante cua pueya quiyacuajiaarini, janiyari nojori sequenutaniyani: ‘Niaari cua quiquihuaniyojua’. Naajuhua, cante cua shuquiritiasoo pueya quiquiarini, nojoriiri cua timitiasano pueyara quiniutianiya”.

²⁶ Naa naajiotasanoori quiyajuhua:

“Tee cuniqui naa pueya sequesaaquiaaricujani: ‘Niaari maja cua pueya’, nojoriiri cuniquijia jiyaniquishaanutaniya: ‘Niaari Pueyaso niquihujanaa cutara’ ”.

²⁷ Saniniuujia, supuetana Isaíasri naa sequequiaari Jacobo niquihucacujinio supueno pueyajiniji:

“Israel pueyari jiyanoohua canenutaniya, juhua shoniniacu caminia shuriuquioco paajia jaaquia, serojosoo. Saniniuujia, saaja secaja nojorinjiniioori Pueyaso pueyara jatanishaanutaniya. ²⁸ Pueyasoori mijirira na sequesano tohuateenutaniya. Majaari na tarishiniu quiniutianiya”.

²⁹ Supuetana Isaíascuajaari naa sequequiaari tarijiajuhua:

“Pa Jiyaniijia Pueyaso jaara Israel pueya niquihua jiyanoyaquiquiaari, Israel pueya maara quiaritia quiyaquiri. Maara tari shaajasaacanu tojetaarucujanaa, naatej, taa Sodoma tiacajinia quiniaa pueya puecoosaaquiaaricuaani, Gomorra tiacajinia quiniaa pueyano”.

Judiocuaari Pueyaso rupaacua tiuyashijiaca saaja

³⁰ Naa cua pohuatasacari niajaninya tariucuaaanu Pueyaso Rupaajinijitij, paari quiaritia nio niishiyani: taucuacaari maja quenaaja na tacaaniu quijia taate nojori naata Pueyaso jiyanooshano quiniuni. Nojoriiri juhuajaniya quijia saaja. Naajaa, quiaritia, Pueyasoori nojori jiyatequiaa juhua sesa miyashijacara, saaja Jesucristoocua nojori tiushacari.

³¹ Israel pueyari saniniuujia jiyanoohua Moisés Rootasano tojijiaa juucua, nojori jiyaniishacari Pueyaso naasucuaari naa nojori miishacari nojori jiyanooniutianiya. Majaari Pueyaso jiyanooni quijia nojori. ³² ¿Niaate niishiya casaara Pueyaso jiyanoyaquiquiaari nojorini? Pueyasoori nojori jiyanoyaquiquiaari nojori tiyacuquiniucua nocua. Nojoriiri jiyaniquiaari tama nojorijiaaritia na naata tama nojori cuaqueyajaaja jiyatenu juhua sesa miyashijacara, Moisés Rootasano nojori tojishacari. Naaratej, majaari nojori tiuuni quiquiaa Jesucristoocua. Nojoriiri saaja na sooquiaa. Naacuajitij, Jesucristoori juhua saaja nojoriria, nocua nojori tiuriiniuria. ³³ Jesucristojiniji miriqui Pueyaso sequesano cuajaari naa naajiotasaaquiaari tariucuaaanu, Jesucristo niyacarija:

“Cua tojitiare. Janiyari Sión tuhananuucua nianutaniya saajiani, pueya tiuriiniuria nocua. Saniniuujia, cante nocua tiuyani, nojoriiri puetunu Pueyaso sequesanojuanaa na muerasurano masenutianiya”.

10

¹ Cuarta Pueyaso muerasunaa, janiyari jiyanoohua Pueyaso secojoquiaani parta Israel pueyacuara, Jesucristoocua nojori tiuiniuria, Pueyaso pueya nojori quiniurajuhua. Janiyari jiyanoohua nojoriicua tacayani. ² Janiyacuajaari seetanujanaa niishiyani, Israel pueyari seetanujanaa Pueyaso panishano miiniu panijiaa juucua, na mueraso nojori quiniuria. Nojoriiri naa miiquiaa najuhuanaj, nojori niishiyaquishacari maninia. ³ Nojoriiri saaja sequequiaa, majana Pueyaso naata pueya jiyanooni saaja nojori tiushacari nocua. Naaratej, nojoriiri jiyanoohua saniniuujiquiaa maninia nojori quiniuria Pueyaso niquiara tama nojori miishanotajaaja. Naacuajitij, nojoriiri Jesucristoocua tiyacuquiquiaa Pueyaso jiyanooniuria nojori. Pueyasojuanaari Cristo jiyatequiaari pa niti mosocoriquiano. ⁴ Naacuajitij, Cristo jaara mosaaquiaari, nojuajaari Moisés Rootasano tojinu tohuateequiaari cutara. Naacuajitij, Pueyasoori puetunu nocua tiuuniaajanaa jiyatequiaa juhua sesa miyashijacara. ⁵ Moisés cuajaari naajioquiaari taa na rootasano

tojjiaca miiniutianiyani, juhua sesa miyashijiaca nojori quiniuria. Nojuajaari naa naajioquiaari:

“Cante puetunu cua rootasanojuanaa tojjiani, nojuajaari pueyaracaanu rishijiara jiyatesaanutaniya”.

⁶ Saniniuujia, saaja Jesucristoocua pa tiuushacari, paari juhua sesa miyashijiacara jiyatesaaquiaani, pueyaracaanu rishijiaca pa quiniuria. Naacuajitij, majaari naa nia niishiriojonu nioojiajinia nia taacanusacari: “¿Cante na naata jiyocuacaanu tacanu Jesucristo na roshiniuria Pueyaso pueyara na jataniniuria pajaniyani?” ⁷ Naajuhuaaj, majaari naa nia niishiriojonu: “¿Cante na naata macunucua quiquojinia quianu, Jesucristo na tacaniniuria pocuani?” ¡Pueyanaa, majaari quenaaja naa nia niishiriojonutej! ⁸ Pueyaso Rupaacuajaari tari naa naajiotasaaquiaari pajaniyara:

“Niaacuajaari cua rupaa jiiitaa. Niaari na niishiyajuhuaaj, Nioojiajinia quiyacuajaari”.

Cuno rupaa canaa na pohuataquiaa najaniyani, cunocuajaari Jesucristoocua nia tiuuniuria. ⁹ Naacuajitij, Pueyasoori pueya jiyatequiaa na pueya nojori quiniuria, Jesucristoocua tiuujia jaara pueya niquiara pohuatare: “Jesucristoori seetanujuanaa Jiyaniijajanaa cutara”, noojiajinia na niishishacarijuhuaaj Pueyasoori Jesu samitiianiquiaariuhua macujiniji. ¹⁰ Seetanujuanaa naari: pojiata pa tiuushacari Neyanuucua, Pueyasoori pa jiyateya juhua sesa miyashijia pa quiniuria. Naajuhuaaj, pa rupaa pa pohuatasacari: “Janiya Jesucristoocua tiuujiani”, jiyacaritij, Pueyasoori pa jataniquiaa na pueya pa quiniuria cutara.

¹¹ Tariucuaacaanu Neyanujiniji Pueyaso sequesanoori naa naajiotasano quiyajuhuaaj:

“Puetunu nocua tiuuniaajanaari puetunu cua sequesanojuanaa cua muerasurano masenutaniya”.

¹² Naacuajitij Judiocuaca, mariyata taucacanio, nojori jiyanooshaanutaniya nojori jaara sequere: “Jiyaniijanaa, cua jiyanoori”. Pa Jiyaniijiaari maja rimijata na jiyanooni nocua tiuujiaa pueya. Nojuajaari jiyanoohua capora. Jiyaniijajanaa cutaraari.

¹³ Tariucuaacaanu Pueyaso Rupaajiniaari naa naajiotasano quiyajuhuaaj:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijanaa, cua jiyanoori’ ”.

¹⁴ Jaara naa quiriritij, ¿pueyatucua taa Jiyaniijia secojonuureni, nojori jaara nocua tiuyaquiyajaa? Naajuhuaaj, ¿pueyatucua taa nocua tiuurini, nojori jaara nojuajiniji pohuataaquishoo quiyajaa? ¿Nojoritiucua taa nojuajiniji niishijia quirini, tamasaca jaara quenaaja nojori pohuataaquiri? ¹⁵ ¿Pueyaso Rupaa pohuataanaatucua taa cuno pojoricua quiaareni, nojori jaara jiyaramiquiyaaquishaare? ¿Pueyaso rupaa pohuataanaate jiyaramiquiyaaquishaaquiaari? ¡Maja! Jiyaramiquishaaquiaaricuaaja. Naaratej, naa naajiotasano quiyari tariucuaacaanu Pueyaso Rupaajinia:

“Jiyanoohua timitiasano pueya cutaraari, noo pojori canapuede tamasacaacua quiajani, nojori na pohuatanura Pueyaso rupaa”.

¹⁶ Naajaa, majaari puetunu pueyajanaa tojiniu quiquiaa, Pueyaso Rupaa jaara nojori niquiara pohuatasaaare. Naacuajitij, supuetana Isaíasri naa sequequiaari na taraajenuta: “Jiyaniijanaa, majaari pueya tojiniu paniniu canaa pohuatasano quiajanajiniji”.

¹⁷ Naacuajitij pueyanaa, paa jaara Jesucristo rupaa pohuatasaaareni, paari pa numaata na tojijani. Paa jaara pa tojishanoocua tiuurini, Pueyasoori pa jiyatenutaniya na pueya pa quiniuria.

¹⁸ Pa jaara Pueyaso pueyara jiyatesaaquiaa saaja pa tiuushacari Pueyaso rupaacua, jaara naa quiriritij, ¿casaara puetunu Israel pueyajanaa Pueyaso pueyara jiyateyaquishaaquiaariirini? ¿Cristo rupaateeri nojori niquiara pohuataaquishaaquiaari? Maja. Nojori niquiaracuajaari pohuatasaaquiaari. Naa naajiotasano quiyacuajaari tariucuaacaanu Pueyaso Rupaajinia:

“Pueyaso Rupaacuajaari puetunu jiyacajiniajanaa pohuatasaaquiaari. Na rupaari tojishaaquiaari puetunu tiquiyocujanaa, jiya puequeetujinia”.

¹⁹ Jaara naa pohuatasaaquiaaritij, ¿Israel pueyateeri Pueyaso rupaa niishiyaaquiquiaari nojori tojishacari? Maja. Nojoricuajaari na niishijiaa quiquiaari. Nojoriiri saaja na ruuretajaca quiquiaari. Supuetana Moisésuajaari naa naajiotaquiaari Pueyaso sequesano Israel pueyara, tariucua na tojijashijiaca nojori quishacari:

“Maninia cua miishacari tiquiyocua quijiaca taucua nia niti, janiyari nia juaatiniutianiyani. Niaari jiyanoohua juaaniutianiya cua jiyanooshacari mosanucua taucua”.

²⁰ Na nuhuaji, supuetana Isaíasri naa maatia sequequiaari Pueyaso niishitiosano nojuaja: “Cucua jiaataashijiaca taucua cutaraari cua riuriataquiaa, cua tojjijaca nojori quiniuria cutara. Naajuhuaaj, janiyari cua pajeyashijiaca taucuaacua muetaquiaani”.

²¹ Saniniuujia, Isaíasri naa Pueyaso sequesano Israel pueyajiniji naajiotaquiaari:

“Janiyari puetunu juucajanaa Israel pueyacuaji masequiaa juucuan, maninia cua miiniu panishacari nojori. Nojoriiri saaja cua shocotequiaa, cua tojiyashijiaca pueya nojori quishacari”.

11

Israel pueyajiniji cureenoori Pueyaso saquiriojosano

¹ Israel pueya jaara naa Pueyaso tojiyashijiaca quiya, ¿Pueyasote seetanujuanaa nojori tarinitiacanu, na tojiyashijiaca nojori quiniuucua? ¡Maja pueyanaa! Janiyacuajaari Israel pueyanojaniuhuj. Abrahamri cua supuetana. Janiyari na jinianu Jacobo niyanu Benjamincujajinio supuenoni. ² Naacujitij, janiyari niishiyani, Pueyasoori maja na cartenu quiquianu puetunu tariucuacaanu na saquiriojosano Israel pueyajanaa. ¿Niaateeri supuetana Elíasjiniji naajiotasano niishiyacuia? Tariucuacaanu Pueyaso Rupaajinia naa naajiotasano quiyacuajaari Elías sequesano Pueyaso, na tacaashacari Israel pueya quiniuucua sesa:

³ “¡Cua Jiyaniijianaa, cuarta Israel pueyari puetunu quia sequesano caminiujiunaa pueyajanaa puecoorucuaa! ¡Saa janiyajaari cureyani! Naajuhuj, nojoriiri puetunu juhucutucujanaa niyarequetarucuaa, tee quia tojtiajaca pueya catijiaquiaa na seya quiociaracuajani. ¡Nojoriiri quiarjia cua pajenuyajuhuj, na motunura janiya!”

⁴ Pueyasoori naa Elías riucuajiaari saaja:

“Janiyari siete mil pueya jiiitiajaani. Nojoriiri cua tojtiajaca. Nojoriiri maja na mojoquetaconu quiquiaa cuno sacuaratia shipinishano Baalcuara cua niti, taa narta Israel pueya miiquiaacuani”.

⁵ Quiarjiaari naajuhuj, Pueyasoori secaja na saquiriojosano Israel pueyajinijinio jiiitaa, jyanootio na quiniuucua. ⁶ Naa Pueyaso muerasu nojori quishacari saaja Pueyaso jyanooniuucua nojori, naacujiti paari niishiyani, majaari Pueyaso saquiriojonu quiquiaari nojori, maninia nojori quiniuucua. Nojori jaara maninia miijiaa quiriquia, nojori maara paniyaquiri na jyanoooshaanura.

⁷ Naacujitij, paari niishiyani, Pueyasoori saaja na saquiriojosano pueya jiyatequiaa na muerasura. Israel pueya saniniuuja, nojoriiri saaja maninia quiniuria saniniuuja juucua. Naajaa, majaari nojori naata tama na cuaqueyajaaja jyatenu quiquiaari Pueyaso muerasu nojori quiniuria. Cuno pojori jiuujaari saaja cumajiuujaacara quiquiaari, tojetaarucujanaa niishiyashijiaca nojori quiniuria. ⁸ Tariucuacaanu Pueyaso Rupaajiniacuajaari naa naajiotasano quiya:

“Pueyasoori nojori jiyatequiaari niishiyashijiacara, maja nojori niishiniuria nojuaja. Naaratej, majaari nojori niishiniu quijia, nojori niquishacari Pueyaso miishano. Majaari nojori niishiniu quijiajuhuaj, nojori tojishacari na rupaa. Israel pueyari naa Pueyaso tojiyashijiaca quiyajaa quiarjiani”.

⁹ Supuetana David sequesanoori nojorijiniji naa naajiotasano quiyajuhuj:

“Pueyasonaa, Israel pueyari puetunu nojori panishanojuanaa jiiitaa, maninia quia miishacari nojori. Saniniuuja, nojori tojiyaquiniuucua quiajaniya, nojori shuquiritiasano casaa cuara quiiria juhua norijia tama nojoririjajaaja, nojori saniitiosaanura.

¹⁰ Nojori jiuujia cuara jataara juhua cariyujuarujuriria, maja nojori niishiniuria seetanu Pueyaso rupajanaa. Nojori cuara porequetacoora socua, pueyaracaanu taraatia nojori miishacari”.

Pueyaso jyanoooshaacari taucuaca, Israel pueya niti

¹¹ ¿Niaateeri jiyaniya Pueyasoori Israel pueya cartequiaarijanaa, tojiyashijiaca nojori quiniuucua? Maja. Pueyaso tojiyashijiaca nojori quiniuucua, taucuacaari saniniuuja Pueyaso muerasura quiquiaa, nojori tiushacari Jesucristoocua. Cunoori Israel pueya jiaatianiquiaa taucuacaacua, Pueyaso muerasu nojori quiniurijuhuj. ¹² Quiarjia, puetunu jiyacajinijianaa taucuacaari shuquiriaatia quiya, Pueyaso muerasu nojori quishacari Israel pueya tiuyaquiniuucua Jesucristoocua. Saniniuuja, Israel pueya jaara Pueyaso muerasura quirohua Jesucristoocua nojori tiushacari, jiyacaritij, socua jyanohua maninia quiniutianiari puetunu pueyaperujanaa, puetunu jiyacajinijianaa.

¹³ Taucuacajinijinio cuarta Pueyaso muerasunaa, cua tojiri. Nia sequenu paniyanijia. Janiyari seetanujuanaa jiyaramiquishaaguiaari Jesucristo rupaa cua pahuatunura taucuaca niquiarani. Naaratej, janiyari puetunu cua cumaacatajanaa pahuataquiaa Jesucristojiniji taucuaca niquiarani, nojori quiniuria Pueyaso muerasujuhuj. ¹⁴ Janiyari seetanujuanaa naa miiquiaani cuarta Israel pueya jiaatianura niaacua, nojori tiuniuria Jesucristoocujuhuj, noojiaqueya nojorijinijinio Pueyaso jyatenu na pueyara. ¹⁵ Pueyasoori juhua taanuquiaari Israel pueya nocuaji, nojori tiuyaquishacari Neyanuucua. Naajaa, naacujiti Pueyasoori puetunu mijiria quiniaa pueyapuejanaa

jiyanooquiaa, na muerasu nojori quiniuria. Saniniuuja, Israel pueya jaara jiyanooshaaru-hua, jiyacaritij, jiyanohua maninia quiniutianiyari puetunu pueyapuerajanaa. Israel pueya tiushacari Jesucristoocua, nojoriiri juhua macujiniji samiitaconutaniuhua. ¹⁶ Seetanujuanaa maninia nia niishiniuria nio miriqui cua pohuatasanoni, maatia nia pohuatareeraj. Nia tojiri. Coteenujanaa pa jiunocotasano neecaruu jaara maninia quiri Pueyasora pa niqitiosocoriguiano, tariquiaari puetunujuanaa maniniajuhua Pueyasora. Naajuhua, naana nujuaca jaara maninia quiri puetunujuanaa, na cashacucuaari manini-uquiucujuhua. Nio miriqui cua pohuatasanoori nia niishitiya cutara Israel pueyajiniji. Naacujitij, Pueyaso jaara Abraham jiyanooquiaaricuaa nocua na tiushacari, naacujiti paari niishiyani, Pueyasoori puetunu Israel pueyajanaa jiyanooniutianiyajuhua, nojori jaara tiuuriquia Jesucristoocua.

¹⁷ Supuetana Abrahamri juhua Pueyaso panishano olivo naana nujuaca. Saniniuuja, na jinianuucujinino supueno Israel pueyari juhua na cashacucua. Cuno na cashacucua-jinijinio jaara Jesucristoocua tiuyaquiquiaari, Pueyasoori na piyotauquiaari. Niajaniya saniniuuja taucacanaa, niaari panishoo quiquiaari, juhua nacujiniaacoji olivo naana cama, maja natau. Naajaa, Jesucristoocua nia tiushacari, Pueyasoori nia rupotaquiaari na panishano naanaacua nia moritianura. Naa Pueyaso panishano naanaacua nia moritiasacaritij, cuno naana nujuacaari nia nujuacajuhua. Naacujitij, niaacujajiti puetunu Pueyaso sequesanojuanaa supuetana Abrahamra masequiaa tari. ¹⁸ Naa Pueyaso rupotanuucua niajaniya na panishano naanaacuatej, majaari tama nia cuaqueyajaaja nia shuquiritianu. Majaari nia jiyaniinu niaa cutaraari socua maninia pueya, Pueyaso cartesano Israel pueyajiniji. Naa jaara jiyaniya niaari socua maninia pueya nojoriiniji, nia niishiri, niaari maja nia nujuaca rishitija. Naa nujuaca cutaraari nia rishitiya.

¹⁹ Naa naacucuaari sequeya: “Taaquiririnij. Cuno olivo cashacucuaajaari canaacuaji piyotasaquiaari, saniniuuja canaa rupotasaanura nocua nojori niti”. ²⁰ Taaquiririnij, seetanujuanaacuaquiniateja nia sequesanojuaj. Saniniuuja nia niishiri, nojoriiri Pueyaso panishano naanajiniji piyotasaquiaari, nojori tiuyaquiniucua Jesucristoocua. Naaari saniniuuja cuno naanaacua rupotasano quiya, saaja Jesucristoocua nia tiuni-uucua. Naacujitij, maja tama nia cuaqueyajaaja nia shuquiritianu nia jiyaniushacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucacanaa, niaa mariqui piyotasaarohuari, niaa jaara Pueyaso tojiyashiji-acara quiriuhua. ²¹ Pueyaso jaara jiyanoyaquiquiaari na saquiriojosano pueyacuaa, nojori tiuyaquiniucua nocua, ¿maatucua casaara jiyanoori niajanianijia? Naaacujajiti taucua. Naaacujajiti maja na saquiriojosano Israel pueyacujinino. ²² Naacujiti pueyanaa, nia niishiri. Pueyasoori jiyanohua maninia. Naajuhua, nojuajaari saniitonu niishijia cutara. Naaratej, nojuajaari na tojtiaashijia Israel pueya jiyanoyaquiquiaari. Saniniuuja, nojuajaari jiyanohua maninia miiquiaa niajaniya na jiyanooshano pueya nia quishacari, niaa jaara pueyaracaanu nocua tiuujiaa quiriquia. Niajaniya taucacanaa, niaa jaara nocua tiuyashijiacara quiriuhua, niaari nocuaji rupatasanutaniuhua. ²³ Saniniuuja, Israel pueya jaara Jesucristoocua tiuujiacara quiriuhua, Pueyasoori nojori rupotanutaniuhua na panishano olivo naanaacua. Pueyasoori jiyanohua cumaacaracucua nia rupotanutaniuhua na panishano naanaacua. ²⁴ Niajaniya taucacanaa, niaari maja seetanujuanaa Pueyaso saquiriojosano Israel pueya. Naaari juhua nacujiniaacoji olivo naana cashacucua. Naajaa, nia tiushacari Cristoocua, Pueyasoori nia rupotaquiaari na panishano olivo naanaacujanaa. Naaratej, majaari jiyajeneta Pueyasora, na piyotasano olivo cashacucua na rupotanutaniuhua tama neyonaacujajaaja, nojori jaara Jesucristoocua tiuujiacara quiriuhua.

Pueyaso jatanishacari puetunu Israel pueyajanaa na pueyara

²⁵ Taucacujinijinio cuarta Pueyaso pueyanaa, tariucuaaanu pueyari niishiyaquijia taa Pueyaso miiniutianiya Israel pueyani. Quarijia cutara nia niishiri Pueyaso niishitishano janiya, maja nia jiyaniuria Pueyasoori nia paniya socua Israel pueyajiniji. Naarate na tojtiaare. Quera puetunu Israel pueyajanaari Pueyaso tojiyashijiaa quiya. Nojoriiri naa quiniutianiya, puetunu Pueyaso saquiriojosano taucacujinijinio pueyajanaa cuara Jesucristoocua tiuurijiaatija. ²⁶ Jiyacaritij, puetunu Israel pueyajanaari jiyatesanutaniya Pueyaso pueyarajuhua, taa tariucuaaanu Pueyaso Rupaajinia naajiotasaquiaricua-jani. Naa sequeyari:

“Sión tiacajinia supuenutianiyari pueyacujiti Tacuriquiano. Nojuajaari puetunu sesa casaajanaa jaariutianutaniya Jacobo niqiuhuacujinino supueno pueya jiuujia-jiniji. ²⁷ Naa cua jiyanoosacari puetunu sesa nojori miishanojuanaatej, janiyari jiyacari tohuateenutaniya tariucuaaanu cua sequesano nojori supuetanaani”.

²⁸ Quiarijia Israel pueya tiuyaquishacari Jesucristo rupaacua saniniuujia, nojoriiri juhua Pueyaso paraa, Pueyaso jiyanooniuria nijaniya saniniuujia, taucuacanaa. Naajaa, Pueyasoori cuno Israel pueya paniyajaa, nojori supuetanaa quiniuucua na saquiriojosano pueya. ²⁹ Pueyasoori maja na jaariutianu quijia na niquitosano. Na saquiriojosano pueya jiyanoojaari. Majaari nojori na ruuretanu. Pueyasocuaajari Israel pueya saquiriojo- quiaari na pueya nojori quiniuria, maninia na miiniuria nojori. ³⁰ Maniushiquiari, nijaniya taucuacanaa, niaari Pueyaso tojiyashijiaca quijia. Israel pueya tojiyaquini- uucua Pueyaso quiarijia saniniuujia, Pueyasoori niaacua taraajequiaa. ³¹ Nojoriiri Pueyaso tojiyashijiaca quiya quiarijia, Pueyaso taraajenura nojoriicua taa na taraajeya niaacuacuaani. ³² Naacuajitij, Pueyasora, puetunu pueyajanaari na tojiyashijiaca quiya, Israel pueya, taucuacano. Naacuajitij, Pueyasoori na naata jiyanooni nojorijihuhaj, nojori tiushacari Jesucristoocua. Pueyasoori maja rimiajata na jiyanooni.

³³ ¡Pa Pueyasoori jiyanhua niishijia, maninia na miiniuria! ¡Nojuajaari puetunu niishi- jiajanaa cutara! ¿Cante niishiquiaarini casaa Pueyaso miiniutianiyani? Na miishanoori jiyanhua jiyajeneta. ¿Cante na naata na niishiniuni? Shaaqui. ³⁴ Naaratej, seetanujua- naari nio tariucuacaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? ¡Maja! ³⁵ ¿Pueyasoteeri na panishano jiiti- aaquiquiaari tamonu niqutionura nojuaja na panishano, na nuhuaji na niq- tionuhua? ¡Maja!”.

³⁶ Seetanujuaanaa puetunu casaajanaacuaajari Pueyaso shipinishano. Na camaruuri na rishitiquiaa na cumaacata. Puetunu cunojuanaari nerano. ¡Pueyaracaanu pa shuquiritiare pa Que Pueyaso! ¡Nojuajaari jiyanhua maninia! ¡Cuaara naa quiriartej!

12

Saaja Pueyasora pa quiri

¹ Cuarta Pueyaso niquiuhuaanaa, jiyanhua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucujanaa saa neraja nia quiniuria. Naacu- ajitij, niaari Pueyaso shuquiritiniutianiya, pueyaracaanu na tojijiaca nia quishacari.

² Majaari socua nia quiniu taa Pueyaso tojiyashijiaca quiquiaacuaani. Saniya Pueyaso Sohanu tojijiaca nia quiri cutara, seetanujuaanaa quiariniora jatanishano pueya nia quiniuria. Naacuajitij, niaari niishiniutianiya casaa Pueyaso paniya nia miiniuriani. Nia niishitiaja jaara jatanishano quiri, naacuajiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutianiya, cunoori tojetaarucujanaa jiyanhua maninia.

³ Jiyanooja Pueyaso quiniuucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu nijaniyajanaa cua tojitiare quiarijia. Naa jaara Pueyaso cumaaca masequiaari nocua nia tiushacari, nojuajaari puetunu nijaniyajanaa jiyatequiaari tamaatia poonijosano miijiaca nia quiniuria. Naaratej, majaari tama nia cuaqueyajaaja nia jiyatenu paniniu socua maninia quijia nia quiniuria tamasaajiniji. Saaja jacaria niishiriojojuaca nia quiri, maninia nia miiniuria nia poonijosano, teyano Pueyaso sequequiaari nia miiniuracuajani. ⁴ Pa cuaqueyajiniacua, paari queraatia tamaatia casaa jitiiani. Puetunu cunojuanaari tamaatia miiniu niishijia, maninia pa quiniuria. ⁵ Paari naajuhuj, taa pa jiniacuma casaacuaani. Queraatia Pueyaso muerasu pa quishacari, naajaa, paari juhua niquiriyatu cuaqueyani, Cristota rupetootesano pa quishacari, maninia pa miitiohura.

⁶ Naatej, taa pa cuaqueyajiniacuma casaa tamaatia poonijosano miiniu niishiyacuaani, naajuhuj, Pueyasoori puetunu na muerasujanaa na cumaaca niqutioquiaa, tamaatia miiniu niishijia pa quiniuria. Naaratej, cante Pueyaso cumaaca jitiiani, Pueyaso niishitishano nojuaja na pohuatanurani, nojuaja cuaara seetanujuaanaa pueya niquiara pohuataara na taacanuyaquiniutia. ⁷ Naajuhuj, cante Pueyaso cumaaca jitiia pueya na naacnurani, nojuaja cuaara maninia naacuura pueya. Naajuhuj, cante Pueyaso cumaaca jitiia Pueyaso rupaa niishitiojona na quiniuriani, nojuaja cuaara maninia niishitiojora Pueyaso rupaa pueya niquiara. ⁸ Cante Pueyaso cumaaca jitiia pueya na shiniujiunuriani, nojuaja cuaara pueya shiniujiuuria, maja pueya cartenura Pueyaso rupaa. Cante na jitiiasanojiniji nareja niqutiojojua casamijiuniucua pueyani, nojuaja cuaara juhujaniya niqutiojoora nareja, nojori na paniniutia. Naajuhuj, cante Pueyaso pueya jitiiani, nojuaja cuaara jitiiaara Pueyaso pueya nojoriicua na tacaaniutia. Cante taraatia miishano pueya naacujuani, nojuaja cuaara shuquiriaatia na naacuuranaj.

Pueyaso tojijiaca nia quiri, taa Pablo rootacuajani

⁹ Seetanujuanaa panitioojuaca nia quiri. Puetunu sesa casaajanaa soojea nia quiri. Majaari maninia miiniu nia tarinitianu cutara. ¹⁰ Jiyanoehua panitioojuaca nia quiri, taa nia paniquiaa nia tarajanucuaani. Niarta Pueyaso muerasu nia jiyatere juhua socua maninia pueya niajanijajiniji. Majaari nojori nia rerequetenu.

¹¹ Tama nia cuaqueyajaaja nia cumaquiri maninia nia poonijionura pa Jiyaniijara. Majaari taajecori nia quiniu.

¹² Shuquiriaatia nia quiri pueyaracaanu, nia niishishacari taa Pueyaso miiniutianiya jiyanoehua maninia na muerasuni. Saaja juhuajaniya nia rejeretare niaa jaara naquiya miishaare. Pueyaracaanu Pueyaso nia secojore. Majaari quenaaja nia tarinitianu na secojonu.

¹³ Niarta Pueyaso pueya jaara na panishano jittiaaquiri, nareja nia niqutiore nojori nia jittiasanojiniji. Naacujitij, nojori jaara rucoonaa quiri, nojori nia masuure nia tiacora.

¹⁴ Niaa jaara naquiya miishaariquia, majaari nia miitianaa nia sesacanu. Saaja nia secojore Pueyaso nojoriicuaa, Pueyaso taraajenura nojoriicua.

¹⁵ Cante shuquiriaatia quiyacuaani, nojoritia nia shuquiririjihuhaj. Saniniuujia, cante nujuqueyacuanaa, nojoritia nia nujuquerejuhuj.

¹⁶ Jyanootioojuaca nia quiriquia, jatiqui nia quiniuria maninia. Majaari tama nia cuaqueyajaaja nia jiyatenu juhua socua maninia quijiaca pueya tamasacajiniji. Majaari pueya rerequeteja nia quiniu. Saniniuujia, tama nia cuaqueyajaaja nia mueyashitiri cutara, maninia nia rupenura paniyaquishoo pueyajuhuj. Majaari tama nia cuaqueyajaaja nia jiyatenu juhua socua niishijiaca pueya nia quiniuria tamasacajiniji.

¹⁷ Niaa jaara sesa miishaariquia, majaari nia paraa nia naminiu saniniuujia. Puetunu nia miishanojuanaa cuaara quiria maninia puetunu pueya niquliarajanaa. ¹⁸ Maninia nia quiri puetunu pueyatajanaa, majaari nojori ruutaquenu niaacuara. ¹⁹ Socua cua tojitiare cua panishano cuarta Pueyaso pueyanaa. Niaa jaara sesa miishaariquia, majaari nojori nia naminiu. Juhujaniya nia rejeretare saaja. Pueyasocuaajari niaacuanaa naminiutianiya nojori. Pueyaso sequesanojuajari nia naajiotasano quiya na rupaaajinia:

“Quiria nia tarinitiare puetunu sesa nojori miishanojuanaa niajaninya. Janiyacuajaari nojori naminiutianiya niaacuani”.

Cua tojiri. Pueyasojuaanaacuajaari nia sequesiaari. ²⁰ Naaratej pueyanaa, majaari nia paraca nia naminiu. Saaja maninia nia miiri nojori taa tariucuacaanu Pueyaso Rupaajinia naajiotasaaquiaricuaajani. Naa sequeyari:

“Quia paraca jaara miaajeya, quia miaqueterenoj. Jaara jiyamueyajuhuj, quia raatorenoj. Quiaa jaara nia na miiritij, tama nojuajaarijia jiyanoehua caririqiniutianiya noojiajinia”.

²¹ Naacujitij, niaa jaara sesa miishaariquia, majaari nia juaaniu, niaa mariqui sesa mijijara quirijiaariuhuj. Saaja maninia nia miiriquia nia paraca. Naacujitij, niaari Sesaaca shocotanutaniya.

13

Pa jiya jiyaniijianucua tojiijaca pa quiri

¹ Pueyanaa, mijiria nia jiyaniijianucua tojitiijaca nia quiri. Nojoricuaajari Pueyaso jiyatesano, nia jiya jiyaniijianucua nojori quiniuria. Majaari pueyano na naata jiyatesaanu jiyaniijia na quiniuria, Pueyaso jaara paniyaquiri. ² Naacujitij, cante mijiria jiyaniijianucua tojiyashijiani, nojuajaari jiyaniijara Pueyaso jiyatesano tojiyashijia. Cante naa mijiria jiyaniijianucua tojiyashijiani, nojuajaari saniitiosaanutaniya. ³ Paa jaara maninia mijijaca quirini, ¿paatucua casaara pa jiyaniijianucua puereriquiani? Jiyaniijianucuaari maja na pueretenu maninia mijijaca. Sesa mijijaca cuaara na pueereera cutara, sesa mijijaca nojori quiniucua. Saaja maninia mijijaca nia quiri. Naacujitij, nia jiyaniijianucuaari maninia poojotanutaniya niajanijajiniji. ⁴ Nojoricuaajari Pueyasora poonijionaa, maninia nojori jittianura niajaninya. Saniniuujia, niaa jaara sesa miiri, nia puerere cutara. Jiyaniijianucua pueyari maja najuhuanaj. Nojoricuaajari jiyaniijianucua cumaacaraca, sesa mijijaca nojori saniitionura. ⁵ Naacujitij, nia jiyaniijianucua tojiijaca nia quiri maja nia saniitiosaanura, naajuhuj, maja Pueyaso tojiyashijiaca nia quiniuria. ⁶ Naajuhuj, nia cumaneecajiniji nia niqutiore nia jiyaniijianucua, taa nojori sequesiaa nia niqutionuracuajani. Nojoricuaajari Pueyasora poonijioquiaa pueyaracaanu, maninia nojori jittianura niajaninya. Naaratej, nojoriiri cumaneeca masequiaa niajanijajiniji.

⁷ Naaratej, puetunu nojorijianaa nia niqutiore, taa nojori sequesiaa nia niqutionuracuajani. Naacujitij, niaa jaara sequesaa nia cumaneecajiniji nia niqutionura nia jiya jiyaniijara, nareja nia niqutiore. Naajuhuj, cumaneeca jaara jiya jiyaniijara masenu cojiritiasaare, casami nia masesacari, majaari nia juaaniu. Naajuhuj, majaari

nia jiyaniijia nia sesacanu, jiyaniijianucuaara na jiyatesano pueyano. Majaari nojori nia rerequetenu. Naajuhuaaj, nia jiyaniijianucuaa tojjiaca nia quiri, nojori quiniucua Pueyaso jiyatesano nia jiyaniijianucuaara.

⁸ Pueyanaa, majaari najuhuaana casami nia poonu, niaa jaara cumaneecaaju quiri. Saniniuuja pueyanaa, maja cutaraari niarta pueya paniniu nia puecanu. Pueyaracaanu nojori panijaca nia quiri cutara. Naacuaajitij, cante narta pueya panijiani, nojuajaari Moisés Rootasano tojjia cutara. ⁹ Supuetana Moiséscaajaari naa naajiotaqueiaari puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja nohuasejonu. Maja tamasaca jittiasano casamiicua jiaatiaja nia quiniu”.

Socua queraatia na rootasanoori quiya. Niocuaajaari socua pa tojishocoriquiano na rootasano:

“Quiarta pueyano panijia quia quiri, taa quia paniya tama quia cuaqueyacuani”.

Paa jaara saaja nio Moisés rootasano tojjia quirini, paari tari puetunu na rootasanojuanaa tojjia quiyani. ¹⁰ Cante seetanujuanaa pueyano panijiani, nojuajaari maja sesa na miiniu narta pueyano. Naaratej, paa jaara panijia quiriquiani, paari puetunu Moisés Rootasano tojjia cutarani.

¹¹ Pueyanaa, nio nia niishiri. Pa Jiyaniijia rijionu juuca pajaniyari tari quenaacoya. Cuno juucaari quiarijia socua cateca quiya paa jaara nocua tiuquuaarini. Naaratej, cante juhua maqueyajaani, nojuaja cuara niucuaara, pa Jiyaniijia na poonijonura. ¹² Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa Jiyaniijiaari quera tiuquihua. Nojuaja cutaraari na cumaacata pa cuhuatanutaniya. Naaratej, puetunu sesa pa miinujanaa pa cartere. Majaari juhua ninishiqui quijaca pa quiniu socua. Taa pueya cushiquiaa na toque tariquicuaji na poonijionuracuaani, naa nia cushiri Pueyaso cumaacajuhuaaj. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniurajuhuaaj. ¹³ Seetanujuanaa juhua Pueyaso pueya nia quiri. Majaari juhua ninishiqui quijaca pueya nia quiniu. Niaacuaajaari cuhuashiqui quijaca. Naaratej, majaari mashaasequenuucua nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatiajaca nia quiniu. Majaari sacuaraatia casaa miiniucua nia jitiiniu. Majaari juayonuujutajaca nia quiniujuhuaaj. Naajuhuaaj, majaari tamonu pueyano jittiasano casaacua nia jiaatianu. Naajuhuaaj, majaari nia juaaniu tamonu jaara nia shocotare. ¹⁴ Naacuaajiti pueyanaa, majaari nia niishiriojonu nia cuaqueya nia shuquiritiniuria taa nia paniya sacuaraatia nia miiniuriacuajani. Saniniuuja, maninia cutaraari Jiyaniijia Jesucristo niishitaja nia jitiianura, na cumaacanu. Naa nia miishacaritij, niari juhua soldadohua miaquetoojotaja toque cushiyojua, maja Sesaaca miitiniuria sesa nijaniya.

14

Maja quiarta Pueyaso pueyacuara nia rimiaaquenu sacuaraatia

¹ Pueyaso pueyajinijinio pueyano jaara Pueyaso rootasanojiniji taacanuujua quiriquia pueyaracaanu, naajaa, na rupuejaca nia quiri. Majaari nata nia juayonuujutatanu tamaatia na niishiriojosacari Pueyaso rootasanojiniji. ² Naacuaajitij, Pueyaso rootasano niishijia nia quishacari cutara, niaa naasucuaari niishiya nia naata puetunu miaquesanojuanaa miaquenu cutara. Saniniuuja, cante Pueyaso rootasanojiniji taacanuujuaani, nojuaja naasucuaari jiyaniya na naata saaja na natau miaquenu, na shuquiritiniuria Pueyaso. ³ Cante puetunu casaajanaa miaqueja cutarani, nojuaja cuara shuquiqiiria narta Pueyaso pueyano, cante na miaquesano miaqueyashijia saniniunijia. Naajuhuaaj, cante puetunu casaajanaa miaqueyashijiani, nojuaja cuara sesacaquiiira puetunu casaa miaquejacajanaa. Cuno nojori, shu miaquejaca cutarani, nojoricuaajaari Pueyaso jiyatesano na muerasu nojori quiniurajuhuaaj. ⁴ ¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuaajaari nojori sequenutaniya, nojori miishanote maninia, sesa soj. Naajuhuaaj, pa Jiyaniijia Jesucristocuaajaari cumaacaraca, na muerasu na jiyatenura maninia quijaca nojori quiniuria.

⁵ Cua tojiri pueyanaa, noojiaqueya Pueyaso muerasujinijinioori niquiriyatu juuca seamaanijiniji jiyatequiaa nojori maniniuhuaqueetanura Pueyaso. Tamasacaari saniniuuja sequequiaa, puetunu juucajanaanaari maninia, Pueyaso pa maniniuhuaqueetanura. Puetunu nijaniyajanaa cuara taacanuuyaquiiira tama nia miishanojinijijiaaja, maja nia macuhuajetenura nioojia. ⁶ Cante niquiriyatu juuca seamaanajinia jiyatequiaa samaatenu juucara Pueyaso na maniniuhuaqueetanurani, maniniacuajaari. Nojuajaari naa miiquiaa

Pueyaso na shuquiritiniuria. Naajuhuaaj, cante puetunu casaa miaqueyajanaani, manini-acuajaari. Pueyaso na shuquiritiniuria, nojuajaari na miaquequiaa nocuara na secojonu nuhuaji. Naajuhuaaj, cante shu miaqueyaquijia Pueyaso na shuquiritiniuriani, cuaara naa miiria. Nojuajaari Pueyaso shuquiritijuhuaaj na secojosacari Pueyaso, na natau na miaquenura.

⁷ Seetanujuanaa pueyanaa, majaari pa quiniu tama pajaniyarajaaja. Naajuhuaaj, majaari quenaaja pa shaajenu tama pajaniyarajaaja. ⁸ Paa jaara mijiria quiyani, paari pa Jiyani-ijia rishiquiaani. Paa jaara cusoyareni, paari pa Jiyaniijia cusoqueeni. Naaratej, paa jaara saminio quiyajaani, naajuhuaaj, paa jaara tariucua macu quiyani, paari pa Jiyaniijia jiiiasanoni. ⁹ Jesucristocuaajaari cunora cusoquiaari, macunucua Jiyaniijia na quiniuria. Nojuajaari samiitiaquiaarihua saminiucua Jiyaniijia na quiniurijuhuaaj. Naacuajitij, nojuajaari pa Jiyaniijiajanaa cutara.

¹⁰ Naaratej, saaja niquiriyatu Jiyaniijia pa jiiiasacari, ¿paatucua casaara parta Pueyaso muerasu soojeaca quirini, nojori miaqueyaquiniucua shuni? Naajuhuaaj, ¿paatucua casaara parta Pueyaso pueya sesacajaca quirini, nojori miaquenuucua puetunu casaa-janaani? Nia niishiri pueyanaa. Puetunu pajaniyajanaari nujuatejosaanutaniya Pueyaso tacojini, Pueyaso nequesoreenura pajaniya. ¹¹ Tariucuaacaanu pa Jiyaniijia sequesanoori naa naajiotasano quiya na rupaajinia:

“Seetanujuanaa sequeyanijia, puetunu pueyajanaari cucuara mojuquetaconutaniya, nojori niishacari janiyari seetanujuanaa Jiyaniijiajanaa cutarani. Puetunu nojori-janaari sequenutaniya: ‘Jiyaniijianaa, quiaari Pueyasojuanaa cutara! Puetunu quia miishanojuanaari maninia’ ”.

¹² Naacuajitij, paari niishiyani, puetunu pajaniyajanaari Pueyaso rihuanenutaniya tama-jaajani, na nequesoreesacari pajaniya.

Maja sesa pa miitini parta Pueyaso pueya

¹³ Naacuajitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijaca quiri parta Pueyaso pueyajiniji saniniunijia. Tama nia cuaqueyajaaja nia cojuare maja niarta Pueyaso pueya niqiuara nia miiniuria nojori jiyaniushano sesa casaa. Nojori jaara saniri miiniu nia miishanocuaa, naacuajitij, niaari tari sesa miitiri nojori Pueyaso niqiuara. ¹⁴ Janiyacuajaari niishiyani, majaari quenaaja tamonu sumatuu quiniu pa miaquesacari sesa miijiacara na jiyatenura pajaniya Pueyaso niqiuara. Janiyari naa niishiyani cua Jiyaniijia Jesu rupaacua tiuuja cua quiniucua. Saniniuuja, cante jiyaniyanijia tamonu sumatuu na naata na jiyatenu sesa miijiaara nojuaja jaara na miaquere, nojuaja cuaara miaqueyaquirianoj. Jaara na pueresano saniri miaquenu, nojuajaari tama noojiajaaja macuhujanutaniya. ¹⁵ Naacuajitij, paa jaara parta Pueyaso pueyano macuhujetere pa miaquenuucua na miaqueyaquishoo casaani, majaari seetanujuanaa parta Pueyaso pueyano panijia pa quiniu. Jesucristocuaajaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casaa pa miaquesacari na niqiuarani? ¹⁶ Naacuajitij, majaari nia shanacunu Pueyaso tojiyashijia pueya sesacanura Pueyaso rupaa, nia miaquesano casaacua nia juayonuujutanucua niarta Pueyaso pueyata. ¹⁷ Seetanujuanaa nia sequeyanijia, majaari Pueyaso muerasu pa quiniu casaa pa miaqueyaquiniucua, casaa pa ratuyaquiniucuanio. Pueyaso muerasu pa quishacari, nojuaja cutaraari panijia maninia miijia pa quiniuria, jatiqiu pa quiniuria juhuajaniya. Pa panitiaquiaarihua shuquiriaatia quijia pa quiniuria. Paacuajaari na Sohuanu jiiiaani, naa maninia pa quiniuria. ¹⁸ Paa jaara naa quijia quiriqiuani Cristora pa poonijiosacari, Pueyasoori pa shuquiritiaa. Naacuajitij, Pueyaso tojiyashijia pueyari maja na rerequetenu quiniutaniya pajaniya.

¹⁹ Naarate cuarta Pueyaso pueyanaa, jiyanojua nia saniniujiuri taate nia naata maninia rupetoosano quiniu puetunu niarta Pueyaso pueyatajanaani. Naacuajitij nia naata tama cumaquitioonujuaaja maninia Pueyaso muerasu nia quiniuria. ²⁰ Majaari nia sesonu Pueyaso miishano niarta Pueyaso pueya jiuujiajinia, saaja nia miaquenuucua nojori niqiuara nojori pueresano casaa. Seetanujuanaa, Pueyasora, puetunu miaquesano casaa-janaari maninia pa miaquesocoriguano. Saniniuuja, tama nia cuaqueyajaaja nia cojuare cutara, maja niarta Pueyaso pueya niqiuara nia miaquenura nojori miaquesoo casaa, niaa mariqui nojori cushioreeri. Naacuajitij, majaari nia naata maninia rupetoosano quiniu niaa jaara nia miishanota taraajoriquia niarta Pueyaso pueya. ²¹ Naacuajitij, socua maninia juhuari maja pa miaquenura parta Pueyaso pueya pueresano casaa. Naajuhuaaj, majaari pa ratunu jereeca mashaca nojori niqiuara, cuno naa pa miishano jaara quiri nojori shiniujuniuria sesa nojori miiniuria. Naajuhuaaj, pa cartere puetunu parta Pueyaso

pueya jyanishano sesa miiniu casaajanaa, maja nojori pa taraajonura nojori ruparetanura pocuaji. ²² Naacuajitij, Pueyaso Rupaacua nia tiushacari seetanujuanaa, niaa jaara niishiya nia miishanoori maja sesa, tamajaaja nia miirinioj saaja Pueyaso niquiara. Shuquiriaatia quijia cutaraari noo pueyano, cante niishiyani na miishocoriquiano casaari maninia Pueyasora, maja noojia na macuhajetenura na miiniu nuhuaji. ²³ Saniniuujia, cante niishiriojiyani na miaquenu panishano casa naasucuaari sesa quiniutianiya Pueyasora, jaara naa niishiriojiya, seetanujuanaa naa sesa quiniutianiyaari taa na niishiriojiyacuajani. Paa jaara casaa miaquere seetanujuanaa pa tiuyaquiniutia Pueyasocuaani, pa miaquesacari, paari tari sesa miirii Pueyaso niquiarani. Seetanujuanaa, puetunu pa miishanojuanaari sesa, paa jaara pa taacanunuta na miiriquiani. Naaratej poojiaari macuhajenutianiya.

15

Parta Pueyaso pueya pa shuquiritiri, maja tama pa cuaqueyajaaja

¹ Noojiaqueya parta Pueyaso muerasuuri juhuanouaja seetanujuanaa Pueyaso Rupaacua tiuyashijiaa. Naacuajitij cuarta Pueyaso pueyanaa, pajaniya, cante tari seetanujuanaa Pueyaso Rupaa tojjijiacuaani, pajaniya cuaara nojori rejeretaara juhuajaniya. Paa jaara socua Pueyaso Rupaa niishijiacuaani, nojori pa cumaquiri. Majaari pa niishiriojONU tama pa cuaqueyajaaja pa shuquiritiniuria tamajaaja. ² Puetunu pajaniyajanaa cuaara niishiriojora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojjijia na quiniuriajuhuaj. ³ Paacuaajaari niishiyani, majaari quenaaja pa Jiyaniijia Jesucristo niishiriojONU quijia tama na cuaqueyajaaja na shuquiritiniuria. Saniniuujia, nojuaja cutaraari taraatia miiniu rejeretaquiaari na rupenura mijiria quiniaa pueya, nojori na jaariutianura Sesaaca. Naacuajitij, nojuajaari nio tariucuaaanu tama nojuajiniijiaaja naajiotasano tohuateequiaari:

“Cua Quena, cuno pojori, canapute quia sesacajacani, nojoriiri cua sesacajuhuj, cua miiniuucua quia panishano”.

⁴ Seetanujuanaari pueyanaa, puetunu tariucuaaanu Pueyaso Rupaajinia naajiotasanojuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumaniijaajaariuhuj. Naacuajitij, paari juhujaniya sashiya pa Jiyaniijiani. ⁵ Pueyasocuaajaari pa cumaquiniuni, maninia rejeretajaca pa quiniuria, cumaniijasano pa quiniuriajuhuaj. Nojuaja cuaara nia jiyateara jyanoojiaca nia quiniuria taa Cristo quiquiaari jyanoojiacuaani, rupuetoojuaca nia quiniuria niarta Pueyaso pueyata. ⁶ Naacuajitij nia naata pa Que Pueyaso, mariyata pa Jiyaniijia Jesucristo maninuhuaqueetanu, juhua niquiriyatu pueyano, maninia rupuetoojuaca nia quishacari.

Pueyaso rupaari maja saaja Judiocuacara

⁷ Pueyanaa, jyanootiojuaca nia quiriquia, taa Jesucristo jyanooquiaa pajaniyacuaani, maninia rupuetosano nia quiniuria. Naacuajitij, pueyari Pueyaso timitianutaniya nojori niquishacari Judiocuaca taucacata Pueyaso maninuhuaqueetaano jatiqui. ⁸ Janiyari seetanujuanaa nia sequeyani, Cristoori mijiria niquiaari Judiocuacaacua, na tohuateenura Pueyaso sequesano nojori supuetanaa. Tariucuaaanu Pueyaso sequesanoori seetanujuanaa. Nojuajaari maja na sequesano na jatanu. ⁹ Judiocuacara Cristo miishanoori taucacara quiquiaarijuhuaj, nojori maninuhuaqueetanura Pueyaso, na jyanooniuucua nojori juhuaj. Tariucuaaanu Pueyaso Rupaajinia supuetana David naajiotasanoori naa quiyajuhuj:

“Maninia quia miiniuucua janiya Pueyasonaa, janiyari quiajaniyajiniji poojotanutaniya maniniani taucuaa jiyacajinia. Maninia quia miiniuucua janiya, janiyari quia timitianutaniya cua jaaquequejosanotani”.

¹⁰ Tamaqui Pueyaso Rupaajinia naa naajiotasanoori quiyajuhuj:

“Pueyaso niishiyashijiaa taucacanaa, Pueyaso saquiriojosano pueya nia cojiri, mariyata jatiqui nia shuqiritianura pa Pueyaso”.

¹¹ Pueyaso Rupaajinia, supuetana David naajiotasanoori naa sequeyajuhuj:

“Pa Jiyaniijia Pueyaso nia maninuhuaqueetare, puetunu nijaniyajanaa, tamaatia rupaaca pocuajaca taucacanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniuucua pajaniya”.

¹² Supuetana Isaías naajiotasanojinijijuhuj, paari niishiyani Pueyasoori taucuaa jitianu panijia pueyaracaanu, maja saaja Judiocuaca. Naaratej, Isaíasri naa naajiotaquiaari:

“Supuetana Isaí niyanujiniji supenutaniyari pueya jitianu. Nojuajaari puetunu mijiria quiniaajanaa jiyaniijia quiriqiano. Puetunu jiyacajinijinio taucacajanaari nocua tiujiaca quiniutianiya”.

¹³ Pueyasocuaajaari poojiajinia poonijiojua, juhuajaniya pa sashiniuria pueyaracaanu, nojuaja cuaara miirrijaatijia puetunu na sequesanojuanaa pajaniyara. Pueyanaa, Pueyaso cuaara nia timitiiria jiyanojua. Naajuhuj, nojuaja cuaara nia jiiitaara juhuajaniya, canapuetet nocua tiuujiacacuaajani. Naacuaajitij, mijiria nia sashishacari, niaari shuquiriaatia rejeretajaca quiniutianiya Pueyaso Sohuanu cumaquishacari nijaniya, seetanujuanaa nia niishishacari pa jiyaniijaari pa rijionuucua tacatenutaniuhua.

¹⁴ Cua panishano Pueyaso niqiuohuanaa, naa cua naajiojinia cua nacasusacari jiyanojua nijaniyatej, majaari nia jyaniniu janiyari niaacuaji taacanuyajaani. Maja. Janiyacuajaari niaacua tiuyani niaacuajaari seetanujuanaa maninia quijiaca. Niaacuajaari Pueyaso rupaa niishijiacajuhuj. Naacuaajitij, nia naata tama nacasutoojonujuaa maninia, maninia rupuetoojuaca nia quiniuria Pueyaso niquiara. ¹⁵ Naajaa, quiarjia janiyari niaacuara naajiyani cua niishifiniuhua niajaniya tarijia nia niishishano. Cua jyanootiuri, nio cua naajiojinia jiyanojua cua nacasunuucua nijaniya. Naa nia rootaanijia Pueyaso jyatenuucua janiya Neyanu Jesucristo jiyaramiquishano, taucuaa cua pohuatanura na rupaa. ¹⁶ Pueyaso jyatenuucua janiya nera poonijionara, janiyari cunora Jesucristo rupaa pohuataquiaa taucuaani. Naacuaajitij, Pueyaso Sohuanu poonijionuucua nojori jiuujiajinia, nojoriiri Pueyaso shuquiritiasano muerasu quiniutianiyajuhuj.

¹⁷ Pueyasora cua poonijosacari, janiyari jiyanojua timitiaa Jesucristoni, cua niquishacari taa taucuaa tiuuquiaa na rupaacuani. ¹⁸ Majaari cua timitianu tama cua miishanojuaaja. Janiya cutaraari Jesucristo miishano timitiaani. Nojuacuajaari taucuaa tiutuquiaa na rupaacua. Nojoriiri nocua tiuuquiaa nojori niquiara cua pohuatasacari na rupaa, naajuhuj, Pueyaso Sohuanu cumaacata cua miiniucua nojori niquiara. ¹⁹ Nojori niquishacari Pueyaso Sohuanu cumaacata cua miijiosano, nojoriiri niishiquiaa cua pohuatasanoori seetanu rupaajanaa. Janiyari pocuaji Tacuna Jesucristojiniji tari pohuataquiaari puetunu tiquiyocujanaani, Jerusalén tiacajiniji, puetunu Iliria jiyajiniarajanaano. ²⁰ Naa cua pohuatasacari pa Jiyano Jesucristojiniji puetunu cuno jiyacajinijanaatej, janiyari pueyaracaanu pohuataquiaari cuniquini, tee Jesucristojiniji tojiyaquishaaquiaari juhuanojuajacuajani. Majaari cua pohuatanu paniniu quiquiaari tee tamasaqa pohuataquiaari tari Jesucristojiniji. ²¹ Naa cua pohuatasacari Jesucristojiniji cuno pueya niquiaratej, janiyari nio tariucuaaanu Pueyaso Rupaajinia naajiotasano tohuateeriquiaani. Naa sequeya Jesucristojinijiiri: "Nojuajiniji pohuatasoojua pueyari nojuajiniji pohuatasaanutaniya. Nojoriiri jiyacari niishiniutianiya cante nojuajani".

Pablo naquerejosacari Roma tiacajiniara

²² Pueyaracaanu nio jiyacajinia cua pohuatasacari Jesucristojiniji, majaari jeya cua quiniu quiriquiaa nia niquiniucua cua quianura. ²³ Quiarjia cutara, janiyari Jesucristojiniji pohuatanu tucatarucuaa tarini, tee Jesucristo rupaa tojiyaquishaaquiaari juhuanojuajacuajani. Janiyari Espania jiyajinia pohuatanu paniya Jesucristojinijijuhuj. Queraatia marijaari tari cua shocojocanu pueyaracaanu cua naquerejosacari niaacua cua quianura. ²⁴ Naacuaajitij, Espania jiyajiniara cua quiasacari, janiyacua nia tiacajinia jateemani. Janiya jaara pasaja camueenujusee niaata shuquiriaatiani, na nuhuaji, janiyari paniniutianiyani nia naacunura janiya, cua quianura Espania jiyajiniara. ²⁵ Janiyari coteenu Jerusalén tiacajinia tacatenutaniuhua tii quiniaa parta Pueyaso muerasu cua niqutionuhuaa cumaneecani, niya quiniaa parta Pueyaso pueya niqutionosano nojoriiri. ²⁶ Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanojua maninia miya. Nojoriiri tama niishiriojonuucuanujuaaja nareja na cumaneeca niqutiononura Jerusalén tiacajinia quiniaa casamijjuniucua Pueyaso pueyara. Cunora, nojoriiri quiarjia na rerateya cuata na jiyarosocoriquiano. ²⁷ Nojoriiri naa miya nojori niishiriojosacari, maniniacuajaari nojori naacunura narta Pueyaso pueya. Seetanujuanaa maniniacuajaari nojori miishano. Judiocuacaari maja na jamuenu quiquiaari Pueyaso rupaa pohuatasaanura taucuaa niquiara. Naaratej, taucuaa cuaara saniniujia quiarjia naacuara casamijjuniucua Judiocuaca, nojori jitasano cumaneecata. ²⁸ Naacuaajitij pueyanaa, janiyari nojori jiyarosocoriquiano cumaneeca niqutionutaniya Jerusalén tiacajinia parta Pueyaso pueya jiiitianaani. Na nuhuaji, janiyari Espania jiyajiniara quianutaniya cutarani. Cua quiasacari, janiyari nia tiacajinia tacanutaniya cua niquiniuria nijaniya. ²⁹ Janiyari seetanujuanaa niishiyani, Cristoori cua naacunutaniya maninia pa shuquiriniuria jatiqii, niaacua cua tiuquishacari.

³⁰ Cuarta Pueyaso pueyanaa, cua Jiyaniija Jesucristo nia jiiitanuucujuhuj, mariyata Pueyaso Sohuanu panitiootesacari pajaniya, janiyari jiyanojua paniyani nia cojiniuria janiya, Pueyaso nia secojonuta cucuara. ³¹ Cucuara nia secojore Pueyaso, na cojanura janiya Jesucristo rupaa paraa Judiocuacaacuaji, Jerusalén tiacajinia cua quiasacari.

Naajuhuaaj, nia secojore Pueyaso, Jerusalén tiacajinia quiniaa Pueyaso pueyacuara. Nojoriicuarua nia secojore, nojori masenura shuquiriaatia narta Pueyaso pueya taucuaa jiyarosocoriquiano cumaneeca nojoriria. ³² Naajuhuaaj, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua quishacari niaata, janiyacua tii samaatesee nia shuriucuan. ³³ Pa jiyanoojia Pueyaso cuaara maninia jittiaara puetunu niajanijajanaa. Cuaara naa quirirotej.

16

Nata quiniaata Pablo sarhuatasacari nojori niishishano pueya

¹ Cuarta Pueyaso pueyanaa, nio maaji niaacua tiuquiniutianiyani, nojuajaari maninia maaji, Pueyaso tojjia. Na sesaari Febe. Nojuajaari Cencrea tiacajinia Pueyaso pueya maanu naacujua maninia. ² Pa Jiyaniijia panijiaa nia quishacari, nia paniniutia nia masure nia tiacora nio parta Pueyaso muerasu naacuna maaji. Niocua nia tiaco jittiarenoj, taa nia jittiaquiaacuaa parta Pueyaso muerasuni, maninia na quiniuria na camueenujusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujuaacuaa. Cua naacujuaaariuhuaaj.

³ Quiria nia sarhuatate Priscila, neyaca Aquilano. Nojoriiri cua cojiniaa pa Jiyaniijia Jesucristora poonijionura. ⁴ Nojoriiri tama nojori cuaqueyajaaja panitiaquiaari cucuara, nojori tacunura cucuaji cua moyaquishaanura. Janiyari cunora jiyanojua nojori timitiaani, naa nojori jiyanootiuniucua cucuatej. Majaari saa janiyaja nojori cua timitianu. Seetanujuanaa puetunu parta Pueyaso muerasu taucacajiniujuaanaari nojori timitiaajuhuaaj, naa nojori miiniucua. ⁵ Quiria nia sarhuatatejuhua parta Pueyaso pueya, noo pojori Priscila, Aquila tiajinia rerejoquiaa Pueyaso secojonunuratej. Quiria nia sarhuatatejuhua cua rupueña Epéneto. Nojuajaari coteenujuanaa Jesucristoocua tiuquiciaari Asia jiyajinia. ⁶ Maria nia sarhuatate quiriajuhuaaj. Nojuajaari jiyanojua poonijioquiaari niaara. ⁷ Quiria nia sarhuatatejuhua Andrónico, Juniasnio. Nojoriiri cuarta Judiocuaca. Nojoriiri cuata nujuatejosaquiaari nujuatejojuajinia, canaa pohuatanuucua Jesucristojini. Puetunu cuarta Jesucristo jiyaramiquishano pueyajanaari nojori panijiaajuhuaaj. Andrónico, Junias, nojoriiri socua coteenu janiyajini tiuquiciaari Jesucristoocua.

⁸ Nia sarhuatatejuhua Ampliato. Nojuajaari cua panishano pueyano, Jesucristoocua na tiuuniucua. ⁹ Naajuhuaaj, quiria nia sarhuatate Urbano. Nojuajaari pa Jiyaniijia Cristora poonijionuhuaaj. Cua rupueña Estaquis nia sarhuatatejuhuaaj. ¹⁰ Apeles nia sarhuatate quiriajuhuaaj. Nojuajaari puetunu casaajanaa rejeretaja cutara, Jesucristoocua tiuujia na quiniucua. Aristóbulo tiajinia quiniaa pueya nia sarhuatate quiriajuhuaaj. ¹¹ Naajuhuaaj, quiria nia sarhuatate Herodión, parta Judio pueyano. Naajuhuaaj, Narciso tiajinia quiniaa pueya nia sarhuatate quiria, noo pojori pa Jiyaniijiaacua tiuujiaa pueyatej. ¹² Trifena nia sarhuatate quiria, Trifosajuhuaaj. Cuno maajipohuari pa Jiyaniijia poonijionujuaca. Naajuhuaaj, pa panishano maaji Pérsida nia sarhuatate quiria. Nojuajaari jiyanojua poonijiojua pa Jiyaniijia. ¹³ Rufo nia sarhuatatejuhuaaj. Nojuajaari maninia tojjia pa Jiyaniijia. Na nucua nia sarhuatatejuhuaaj. Nojuajaari juhua cua nucua quiquiaari quiria. ¹⁴ Nio pojori quiria nia sarhuatatejuhuaaj, Asíncrito, Flegonte, Hermes, Patrobas, Hermasnio, mariyata nojoritia quiniaa parta Pueyaso pueyano. ¹⁵ Naajuhuaaj, nio pojori nia sarhuatate quiria, Filólogo, necocua Julianio, Nereo, na rimitatunio, Olimpasjuhuaaj, mariyata nojoritia quiniaa parta Pueyaso muerasunio.

¹⁶ Niarta Pueyaso pueya nia sarhuatate seetanujuanaa nia paniniutia nojori. Puetunu niiquijinio parta Pueyaso pueya maapuejanaari cua sequecanuni cua sarhuatanura niajanija.

¹⁷ Cuarta Pueyaso pueyanaa, nia numooteyanijia, jiyanojua nia cojuare tama nia cuaqueyajaaja najuhuaana tamaatia niishitiojonujuaca pueyacuaji. Nojoriiri Pueyaso pueya maapue cushitiojoquiaa, sesa nojori niishitiojosanota. Naacujajitj, Pueyaso pueyari juaatiojoquiaa. Majaari nojori niishitiojonu pueya taa coteenujuanaa nia niishitiojosaaquiaari seetanu rupaajanaa cutarani. Naa sesa niishitiojonujuacaacuaji nia rupa-tere. ¹⁸ Nojoriiri maja seetanujuanaa na poonijionu pa Jiyaniijia Jesucristora. Nojoriiri poonijioquiaa tama nojori panishanojuaaja nojori masenura. Najuhuaana shanohua nojori pohuatasanota, nojoriiri niishiyashijia pueya sapojoquiaa. ¹⁹ Puetunu tamonu jiyacajiniujua parta Pueyaso pueyajanaari niishiya, niaari seetanujuanaa Jesucristo rupa tojjitajaca cutara. Naaratej, janiyari jiyanojua nia timitiaani. Naajuhuaaj, janiyari paniyani niishijia nia quiniuria, saaja seetanu rupaajanaa tojjia nia quiniuria, maninia miijia nia quiniuriajuhuaaj. Saniniuujia, sesa niishitiojosano niishiyashijia

nia quitiriquiani, maja sesa miijiaa nia quiniuria. ²⁰ Naacujitij, poojia cajitijia Pueyasoori nia cumaquiniutianiya, Satanás nia shocotanura na sapojosacari niajaniya juucua. Niaari juhua na tanacunutaniya jiyocuara, Pueyaso tojjijiaa nia quiniucua. Pa Jiyaniijia Jesu cuaara nia cumaquiiria, shuquiriaatia nia quiniuria.

²¹ Timoteo, cuata poonijiona Jesucristorani, nojuajaari cua sequeya nera cua saruhuata-nura niajaniya. Cuarta Judiocuaca Lucio, Jasón, Sosípater, nojoriiri nia saruhuataajuhuaaj.

²² Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyarosocoriquiano. Janiyari nia saruhuataajaaniuhuaaj Cristoocua tiujia cua quishacarijihuaj. Niojuanaa, pueyanaa.

²³ Parta Pueyaso pueyano Gayoori nia saruhuataajuhuaaj. Nojuajaari na tiajinia cua quiniuria cua masuucanu. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquijiosacari nio tiacajinia. Parta Pueyaso pueyano Erastoori nia saruhuataajuhuaaj. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoori nia saruhuataajuhuaaj.

²⁴ Pa Jiyaniijia Jesucristo cuaara cumaquiiria puetunu niajaniyajanaa.

Pablo maniniuhuaqueetasacari Pueyaso, quera na tucuatasaacari na naajio

²⁵ ¡Pueyanaa, jiyanoehua pa maniniuhuaqueetare pa Pueyaso! Nojuajaari na naata cumaquiniu niajaniya, seetanujuanaa na muerasu nia quiniuria na rupaacua nia tiushacari. Janiyari naa rootaquiaa niajaniyacujani, cua pohuatasacari Jesucristojiniji. Pueyasojuaanaacujaari tarijia cua niishitiquiaari Neyanu Jesucristojiniji cua pohuata-nura. Jiya shipiniyaquishaacarijiyojua, Pueyasoori jiyasohua tamajaaja na niishishano jiiitaja Neyanu Jesucristojiniji. ²⁶ Saniniuuja, quiari naataja, paari niishiquiaarini, Jesucristocujaari mijiria niquiaari puetunu pueyajanaa na jaariuutianura Sesaaca. Tariucua-caanu Pueyaso sequesano caminiujiuniaa naajionuutasanojiniji paari quiarijia seetanujuanaa na niishiya cutarani. Pueyaracaanu Quijia Pueyasocujaari naa paniquiaari quiar-ijia pa niishiniuria Neyanujiniji. Quiarijiani, Pueyasoori Neyanujiniji pohuataniquiaa puetunu jiyacajinjinio pueya niquiarajanaa, Neyanuucua nojori tiuuniuria. Naa na pohuataniquiaariiri Neyanu Jesu tojjijiaa nojori quiniuria, Judiocuaca, taucucanio.

²⁷ Pa Pueyasoori jiyanoehua niishijia cutara. ¡Pueyaracaanu pa maniniuhuaqueetare nojuaja, maninia na miiniucua pajaniya, Neyanu Jesucristoocua pa tiuushacari! Cuaara naa shuquiritiasaaria pueyaracaanutej.

COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo sarhuatasacari Corinto pueya

¹⁻² Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sóstenesjuhuaj, canaari nia saruhuataani. Janiya Pablóni, Jesucristo jiyarosano na rupaa cua pohuatanura taa Pueyaso paniquiaaricujani. Canaa niaacuara naajiyani, socua canaa niishitiojonura nijaniya, Pueyaso saquiriojosano pueya nia quiniuucua. Niaari maninia quiya Pueyaso niquiara, Jesucristo nia rupuesacari. Niaari seetanujanaa Pueyaso muerasu, puetunu jiyacajinia pueyatajanaa, canapueete Jesucristoocua tiuujia-cacuajani. Jesucristocuaaari nojori Jiyaniijia, pa Jiyaniijiajuhuaj. ³ Pa Que Pueyaso, pa Jiyaniijia Jesucristo cuaara cumaquiiria nijaniya, juhuajaniya nia quiniuria.

Paari maninia miishaaquiaani Cristo pa rupuesacari

⁴ Maninia nia quiniuucua, janiyari pueyaracaanu Pueyaso sequequiaani “Paacarasho”. Pueyasocuaaari jiyanoehua maninia miiquiaari nijaniya, nia rupuesacari Jesucristo. ⁵ Nia rupuesacari Jesucristo, Pueyasoori puetunu cumaquiiaarijianaa nijaniya na cumaacata, nia poojotanura puetunu na rupaajanaa, puetunu na rupaajanaa nia niishiniuriajuhuaj. ⁶ Maninia nia tojtiasacari Cristojiniji pohuatasano, niaari maninia miishaaquiaari taa canaa sequequiaari nijaniyacujani. ⁷ Naacujitij, niaari tari masequiaari puetunu Pueyaso niqutionu panishanojuanaa, maninia na muerasu nia quiniuria, nocua nia jiaatianuta nia sashishacari pa Jiyaniijia Jesucristo tiuquishacari-uhua. ⁸ Pueyasoori nia cumaquiniutianiya pueyaracaanu, maja quenaaja niaacua casaa tiutiasoo quiniuria, sesa nia miishanojiniji. Naacujitij, pa Jiyaniijia Jesucristo jaara tiuquiriohua na ruuretajaca na saniitionura, niaa cutaraari juhuajaniya quiniutianiya. ⁹ Pueyasocuaaari maninia tohuateequiaa na sequesano. Nojuacuajaari pa sequequiaari pa cojiniuria Neyanu, maninia pa miishaanura Neyanutajuhua. Cuno Neyanuni, nojuacuajaari pa Jiyaniijia Jesucristo.

Pueyaso muerasu juhua tamasaca niqutiooquiaari

¹⁰ Cuarta Jesuucua tiuuniaanaa, cua tojitiare. Pa Jiyaniijia Jesucristoori cua sequeteya nio. Maninia nia niishiriojore. Maja juhua tamasaca nia niqutioonu. Maja tamasaca nijaniya. Maninia nia niishiriojore, maja tamaatia. Nia jiuujiaatioorejuhuaj. ¹¹ Naa nia sequeyanijia cuarta Jesuucua tiuuniaanaa, Cloe niquiohua pohuatanuucua janiya nijaniyajiniji. Nojoriiri cua sequerucuaa niaana juayonuujutaquiaa. ¹² Naa pohuatasaarucuaa nijaniyajinijini: puetunu pueyajanaana tama sequequiaajaaja: “Canaari Pablo pueyani”. Tamasacanaari saniniujia sequequiaacujua: “Canaari Apolo pueyani”. Tamasacanaari sequequiaaacuhua: “Canaari Pedro pueyani”. Tamasacanaari sequequiaajuhua: “Canaari Cristo pueyani”. ¿Naatee pueyanaa? ¿Casaara tamajaaja naa nia raquitiijiquianuni? ¹³ ¿Majateeri nia niishiniu? Paari Jesucristo cuaqueyani. ¿Pa Jiyaniijia cuaqueyateeri neequeresetanocuaa? ¿Janiyateeri niaacuara cusoquiaari niyacutesanojiniani, cua pueya nia quiniuria? ¿Niaateeri cua sesajinia tiuquinijosaaquiaari moojiniajuhuaj? ¡Maja, cuarta Pueyaso pueyanaa! ¹⁴ Janiyaquiiri namitia nia tiuquinijiaquiiciaari moojiniani. Naacujitij, majaari nia naata sequenu niaa cua sesajinia tiuquinijosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. ¹⁵ Naacujitij, majaari quenaaja tamonu na naata sequenu janiyari na tiuquiniquiaarini. ¹⁶ Quera niyajetaanjia. Janiyari Estéfanas tiuquinijioquiaarijuhua necohuatajani. Majaruhua socua pueya cua tiuquinijionu quiquiaari.

¹⁷ Jesucristoori maja na jiyaronu quiquiaari janiya pueya cua tiuquinijionura. Cristo cutaraari cua jiyaroquiaari na rupaa cua pohuatanura. Majaari cua maniniushitiniu na rupaa cua pohuatasacari, pueya mariqui shanohua cua pohuatasanoocua tiuuri najuhuaanaari. Cuaara tiuutiuria cutara Jesucristoocua, na miiniuucua maninia pocuara. Pueyasoori pa jiyanoocua saaja Jesucristo cusonuucua niyacutesanojinia pocuara.

Cristoori Pueyaso cumaaca jitiiaa, Pueyaso niishitijajuhua

¹⁸ Canaa pohuatasano Cristo cusonujiniji niyacutesanojinia pocuarani, cunoori juhua mosanucua pohuatasano shaajecoriquiano pueyara. Naajaa, Jesucristo rupaari Pueyaso cumaacaracacuaa na tojtianaara, Pueyaso muerasura na jataniniuria pajaniya. ¹⁹ Pueyaso sequesanoocuaaari naa naajiotasaaquiaaritij: “Janiyari niishijiaa niishishano cushionutaniani. Mijiria pueya niishishano jiyatenu-taniya najuhuanaranijia”.

Naacuajitij, cante mijiria pueya niishishanoocua tiuyani, nojuajaari maja na jiyanooshaanu quiniutianiya.

²⁰ ¿Pueyanoteeri jiyanoohua niishitijaraca Pueyaso muerasura na jataniniuria pajaniya? ¡Maja! Niishijiajanaa jaara jiyanoohua niishiriojore, ¿pa naatate na sequesanoocua tiuuniu, Pueyaso na jyanootiniuria pajaniya? Maja. ¿Niishitiojona rootasanote na naata Pueyaso pueyara jyatenu pajaniya nocua pa tiuushacari? Maja. Naacuajitij, puetunu mijiria niishishanojuanaari najuhua quiya Pueyasora. ²¹ Pueyari maja na naata Pueyaso niishiniu quiquiaari tama nojori niishitijatajaaja. Pueyasoori tama sequequiaarijiaaja na niishitijata cutara:

“Jaaja. Maninia naatej. Pueya jiyanooriiria saaja nojori tiuushacari cua Niyanuucua”. Pueyari saniniuujia jiyaniya Jesucristo rupaari nareja sequesanojuhanajaj, tojishoo. ²²⁻²³ Naaratej, cuarta Judiocuacaari maja Jesucristoocua tiuuniaara na quiniu ritia. Nojoriiri Pueyaso cumaacata miishano niqiniuu paniquiaa coteenu saaja. Cunora, nojoriiri canaa tojtiaaquiquiaa canaa pohuatasacari Jesucristo mosaanujiniji niyacutesanojinia teetasano. Nojoriiri saaja sequequiaa: “¿Pa Jyanijiaranotucua casaara naa cararaatia mosaareni?” Griego pueyari naajuhuj. Majaari ritia nojori quiniu paniniu Jesucristoocua tiuuniaara. Nojoriiri saaja niishiniuucua jiaatijaca. Nojoriiri jiyaniya Jesucristoori najuhua cusoquiaari juhua moseeca. Naacuajitij, canaa pohuatasacari Jesucristo niyacutesanojinia mosaaquiaari, Judiocuacaari jiyaniya Jesucristoori cumaacaju quiquiaari. Nojoriiri jiyaniyajuhuj Pueyaso Jiyarosocoriguanoori ritia Judiocuaca jyanijiaara quiniutianiya cutara. Majaari na niishitiumiu quijia Cristo cuara coteenu miishaaria naquiya, jiyanooshano nojori quiniuria sesa nojori mijiosanojiniji. Griego pueyari canaa pohuatasano tojiaquiquiaajuhuj. Nojoriiri jiyaniya Pueyasoori niishiyashijia quiquiaari Neyanu na motenura. ²⁴ Paa cutaraari niishiyari Cristoori pocuara cusoquiaari. Naacuajitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griegohanio. ¡Pueyasoori jiyanoohua niishijia cutara! ²⁵ Pueyari jiyaniya Pueyasoori niishiyashijia quiquiaari. Cunora Neyanu cusojuaquiaari niyacutesanojiniaari. Naajaa, naacuajiti Pueyasoori pa jyanooquiaari. Pueyasoori jiyanoohua socua niishijia cutara mijiria niishijiacajiniji. Pueyari jiyaniyajuhuj, Pueyasoori cumuecaaju quiquiaari Cristo cusosacari niyacutesanojinia. Naajaa, naacuajitij, ¡Cristoori Sesaaca shocotaquiaaricuaaja! Pueyasoori jiyanoohua socua cumueeca pajaniyajiniji.

²⁶ Cuarta Jesuucua tiuuniaanaa, niaacuajaari niishiya taamueca pueya nia quiquiaari pueya niqiarani, Pueyaso sequesacari niajaniya na muerasu nia quiniuria. Saaja secaja niajaniyajinijinoori niishijiaaca quiriqiaa. Saaja secaja niajaniyajinijinoori tojishano pueya quiriqiaajuhuj. Saaja secaja niajaniyajinijinoori jyanijianucua niquihuacujinijo supeno quiriqiaa. ²⁷ Mijiria quiniaa pueyara, Pueyasoori socua niishiyashijiaaca pueya saquirioquiaari, na muerasu nojori quiniuria. Naacuajitij, mijiria niishijiaacari tamajaaja caririqiniutianiya nojori jaara saquiriojiaquishaare. Pueyasoori tojishoo pueya saquiriojiaarijijuhuj, na muerasu nojori quiniuria, mijiria tojishano pueya caririqiniuria nojori jaara saquiriojiaquishaare. ²⁸ Pueyasoori soosano pueya saquiriojiaarijijuhuj, tojishoo pueyano. Pueyasoori naa saquiriojiaari najuhua quijiaaca. Canapueete tama na cuaqueyajaaja jiyaniya cutara pueyanoni, cuno nojoriiri saniniuujia quejoosaanutaniya. ²⁹ Naacuajitij, majaari quenaaja jiyanoohua pocuaja cureenu quiniutianiya Pueyaso niqiarani. Tojetaarucujanaa shaaquiiri pocuajaca quiniutianiya. ³⁰ Pueyasojuanacuajaari nia rupequequiaari Jesucristo. Naacuajitij, niaari Pueyaso niishitijia jitiaa. Nia rupesacari Jesucristo, niaari maninia mijia quiya Pueyasora. Pueyasoori nia jataniya saa na tojjiacaraja nia quiniuria, juhua Neyanu nia quiniuriajuhuaj. Niajaniyari puetunu jecasaanutaniyajanaa. Paari naa miishiyari Jesucristo pa rupesacari. ³¹ Seetanujunani nio sequesano tariucuaaanu Pueyaso Rupaajiniji: “Cante shuquiriaatia quiniu paniyani, nojuaja cuara shuquiritaara pa Jyanijiaa”.

2

Jesucristo mosaanujiniji pohuatasano

¹ Cuarta Jesuucua tiuuniaa pueyanaa, janiya jaara niaacua tiuquiquiaarini, niaacuajaari niishiya taa cua pohuataquiaari Pueyasojiniji Jesucristo rupaa niajaniyani. Majaari jiya-jenetu cua pohuatanu quiquiaari niishijiaaca niishishano rupaacata. Cua pohuatasanoori niishishaatia quiquiaarijia, maja juhua cutara pueyano pohuatasano. Janiyari jacaria pohuataquiaari Pueyaso rupaa niajaniyani. ² Janiyari tari tama sequequiaarijianija: “Janiyari saaja Jesucristojiniji pohuatanu paniya Corinto pueya niqiarani, naajuhuj, taa na cusoquiaari pocuara niyacutesanojiniani”. ³ Cua pohuatasacari Jesucristo rupaa nia

niquiara, janiyari sasaca quiriquiaa cua puerenutani. Janiyari tetecariquiaani. ⁴ Majaari cua paniniu quiquiaari cua tiutiniuria nijaniya Jesucristoocua tama cua niishitiajata-jaaja. Naaratej, majaari cua pohuatasano quiniu quiquiaari juhua shanohua pohuataja sequesano. Naacuajitij, cua pohuatasacari Jesucristo rupaa nia niquiara, Pueyaso So- huanu cutaraari nooijacajinia poonijioquiaari Pueyaso cumaacata cutara. ⁵ Naacuajitij, naari Jesucristoocua tiuquiaari Pueyaso cumaaca mishacari maninia nooijajinia. Maja cutaraari nia tiuuniu quiquiaari saaja pueya niishishanoocua.

Pueyaso Sohuanucuaajari pa niishitiya Pueyaso

⁶ Naajaa, canapueete Pueyasoocua tiuujia seetanujuanaa cutarani, nojoriiri niishiya canaa pohuatasano Jesucristojiniijiri seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniijianucua niishishano. Mijiria niishijiaacari shaajeconutaniya. Nojori niishishanoori najuhuaa quiniutianiya. ⁷ Canaa pohuatasano cutaraari Pueyaso niishishano tarjia, jiya shipinishaacarijiyojua. Pueya-soori jiyacari niishiriojioquiaari jiyanoohua maninia na miiniuria pajaniya, shuquiriaatia pa quiniuria pueyaracaanu pa Jiyaniijia Jesucristo shuriucua. Nio rupaari maja pueya niishishano tari. Pueyasoori maja nio na niishitionu quiquiaari pueya tari. ⁸ Mijiria jiyaniijianucuaari nio niishiyaquiquiaari. Nojori jaara na niishiquiaari tarjia, nojori maara pa Jiyaniijia moyaquiquiaari niyacutesanojinia. ¡Na Shipininia motuquiaarijiaari, pueyaracaanu shacantuca quijia! ⁹ Naa naajiotasano quiyacuajaari tariucacaanu Pueyaso Rupaajinia:

“Pueyasoori jiyasohuaja casaa jeenucuasano jiitiaa na panijiaa pueyara. Cunoori maja pueya niquishano quenaaja. Majaari cunojiniji nojori tojishano quenaajajuhujaj. Majaari quenaaja pueya niishiriojonu quiquiaari jiyano casaate na naata quiniu nojoriria”.

Quiarijiani, canaari saniniuujia pueya niquiara na pohuataani. ¹⁰ Pueyasocuaajari quiarijia canaa niishitiquiaari canaa jiuujajinia na miiniu panishano pajaniyara. Canaa niishitiquiaariiri na Sohuanuta. Na Sohuanuuri puetunu Pueyaso niishiriojosanojuanaa nooijajinia niishiya. ¹¹ ¿Cante pueyano niishiriojosano nooijajinia niishiyani? ¿Majate saa na camaru sohuanujua niishiniu? Taaquiriirinij. Naajuhujaj, saaja Pueyaso Sohuanuuri Pueyaso niishiriojosano nooijajinia niishiya. ¹² Naaratej, Pueyasoori na Sohuanu niquitioquiaari pajaniya, pa niishiniuria Pueyaso niishishano. Naacuajitij, majaari pa jiiitanu saaja tama pa sohuanujuaaja Pueyaso niishishano pa niishiniuria. Paa cutaraari Pueyaso Sohuanuracajaniuhujaj. Naacuajitij, Pueyaso Sohuanu cumaquishacari pajaniya, pa naata puetunu Pueyaso niquitiosano pajaniyarajanaa niishiniu. ¡Jiyanoohua capora Pueyaso! ¹³ Naacuajitij, canaa pohuatasanoori maja saaja mijiria pueya niishishano. Pueyaso Sohuanujuanaari canaa niishitiojioquiaari Pueyaso rupaa canaa niishiniuria canaa jiuujajinia. Naacuajitij, canaa naata Pueyaso Sohuanu jiitanaa niishitiojonu seetanu Pueyaso rupaajanaa, mariyata taa Pueyaso Sohuanu niishitiojioquiaa canaacuaani.

¹⁴ Mijiria quiniaa pueyari Pueyaso Sohuanu niishitiojosano niishiniu paniyaquiquiaa. Nojoriiri saaja juhua tama mijiria niishiriojosanojuaja na jiyatequiaa. Seetanujuanaa, nojoriiri maja na naata na niishiniu. Saa Pueyaso Sohuanutaja pa naata Pueyaso Sohuanu niishitiojosano niishiniu. ¹⁵ Cante Pueyaso Sohuanu jiitiaani, nojuajaari na naata puetunu niishishanojuanaa saniniuujituni. Saniniuujia, tamasaca pueyari maja na naata Pueyaso Sohuanu jiitanaa miishano niishiniu nocuara na rimiaaquenura. ¹⁶ Tariucacaanu Pueyaso Rupaajinia naa naajiotasaaquiaarijiuhujaj:

“¿Cante pa Jiyaniijia jiuujajinia na niishiriojosano niishiyani, socua na niishitiojonura nojuajani? Shaaquí”.

Paa cutaraari Jesucristo niishishano niishiyani Pueyaso Sohuanuraca pa quishacari. Naacuajitij, majaari pa niishiniu saa mijiria pueya niishishanojua.

3

Pueyasora poonijionaa pueya cuaara poonijionuuriquia nojori panitioonuta

¹ Cuarta Jesuucua tiuuniaanaa, cua quishacari niaata, majaari cua naata jiyajeneta Pueyaso niishishano cua niishitiojonu quiquiaari nijaniya. Niaari quera juhua Pueyaso Sohuanuuju quiriquiaajaa. Niaari juhua Cristo conaaja quiriquiaajaa, maja Pueyaso tojjijia seetanujuanaa. Nocuaji, janiyari nia niishitiojoriquiaa jacariani, juhua Pueyaso niishiyashijia pueya nia quishacarijia. ² Cua niishitiojosano nijaniyari niishishaatia quiquiaarijia, maja jiyajeneta. Majaari cua naata Pueyaso cutara niishishano cua pohuatanu quiquiaari nijaniya. Cuno niishishanoori cumueeca Pueyaso pueyara, naatej, taa shu quiaa tariucua puereetuca pueyaracaani. Juhua naatujoori nia quishacarijia,

majaari nia naata na tojiniu quiquiaari. Juhuanajuajaari maja nia naata na tojiniu quiarijiani. ³ Niaari juhua Pueyaso Sohuanuuju quiyajaa, juhua Pueyaso niishiyashijiaca pueya. ¿Naatejaaratej? Niaana niarta Pueyaso muerasu shocotanu paniquiaa juucua. Niaanaari juayonuujutaquiaa. Naa nia quishacaritij, niaari juhua Pueyaso Sohuanuuju quiyajaa pueyaracaanu, juhua Pueyaso niishiyashijiaca pueya. ⁴ Niaana sequequiaa: “Canaari Pablo pueyani”. Tamasacanaari sequequiaajuhuj: “Canaari Apolo pueyani”. Naacuajitij, puetunu nijaniyajanaari saaja juhua Pueyaso niishiyashijiaca pueya quiyajaa.

⁵ Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaajuhuanani. Canaari saa Pueyaso panishano miiquiaajaani, Jesucristo rupaa nia tojitianura. Canaari panishano miiquiaarini taa na sequequiaari canaa miiniuriacuajani. ⁶ Naacuajitij, janiyari Pueyaso rupaa nia pahuataquiaarini, naatej, taa casaa jajau pueyano natojoquiaacuuaani. Apoloori saniniuujia socua Pueyaso rupaa nia niishitioquiaari na cumaquiniuria nijaniya, naatej, taa pueyano na natau shiijioya mohuacacuuaani, maninia na maashiniuria. Pueyaso cutaraari na rupaa maashitiquiaari nioojiacajinia, na muerasu nia quiniuria cutara. ⁷ Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasojua cutaraari cumaacaraca. Saaja nojuaja cutara na naata pa tojitini na rupaa, seetanujuanaa na muerasu pa quiniuria. ⁸ Naacuajitij, paari niishiyani, cante natojonani, cante mohuacacuuaani, canaari mariyata saaja Pueyaso poonitijiosanoni. Pueyasocujaari canaa niqutionutaniya na jiišanaso, nera canaa poonijionuucua. Cante socua poonijioereni, Pueyasoori socua na jiišanasojiniji na niqutionutaniya taajecori pueyajiniji. ⁹ Canaari mariyata Pueyasora poonijionaani. Niaari juhua Pueyaso nataacuaca nera. Niaari na muerasu cutara, maja canaa muerasu. Naajuhuj, Pueyasoori juhua nia tiaa saitia, na quiqiorano. Saitia tiasacari, sairi coteenu cumaatia niojoshiya na morijiuria, maja tia matanura. ¹⁰ Pueyaso jaara jiyaroquiaari janiya, janiyari Jesucristo rupaa pohuatunu coteequiaari maninia nijaniyani, Pueyaso muerasu nia quiniuria nia tiuushacari cua pohuatasanoocua. Naacuajitij, janiyari juhua Pueyaso tiara shipininiu coteequiaarini. Cua niishitiojosano nijaniyani, cunoori juhua morijiu nujuatejosano quiquiaari. Cua nuhuaji, tamasacaari nia niishitiojoriquiaa socua Jesucristo rupaa, juhua Pueyaso tia tu-cuatasaanura. Nojori cuara niishiiria maninia, maninia nojori niishitiojonura nijaniya, juhua maninia tiasano nia quiniuria.

¹¹ Majaari socua tamonu rupaa quiniu nocua pa tiuuniuria Pueyaso pueya pa quiniuria. Saaja Jesucristo rupaa cutaraari pa jatanijia Pueyaso pueya pa quiniuria. Janiyacujaari na rupaa pohuataquiaari nijaniyani. Saa na rupaacuaja nia tiuushacari, niocua maninia quiri, juhua maninia morijiuacuacua tiasano tia, maja na matanura. ¹²⁻¹³ Cante socua Jesucristo rupaa niishitiojia nijaniyani, cunoo cuara niishitiojooora jyanohua maninia. Cuara niyajetaaquiria cutara, nojuajaari na niishitiojosanojiniji nequesoreesaanutaniya Jesucristo muetasacarihua pocua, pa miishano na saniniuuniuria juhua maninia. Puetunu niishishaanutaniyajanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitiojosanooroo juhua pueyano tiasano. Pueya jaara tiare orota, platatanio, shanohua saitanio, maniiri maja na naata na catijianu. Cante saniniuujia tiaree macacatani, tucurutajuhuj, turequenacatanio, cunoori taraatia quiniutianiya na tia jaara sanishaare catijianu. Naaratej, pa niishiriojore, ¿pa rootasanote seetanujuanaa maninia? ¹⁴ Tamonu jaara maninia mijia quiquiaari Pueyaso cumaacata, na miishanoori maja najuhuaa quiniutianiya Pueyasora. Pueyasoori cunoo pueyano niqutionutaniya na jiišanasojiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaariiri, maja na tia catenura jaara sanishaare senu. ¹⁵ Cante saniniuujia tiaquiaari cateja casaatani, na tiasanoori catenutaniya. Puetunu na jiišanasojuanaari juurequenutaniya. Saaja nojuajaari Sesaaca jaariutiasaanutaniya juhua manijiniji jaashano. Naa miishaanutaniyari Jesuucua tiuuniaa, canapuee maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijiniji jaashano.

¹⁶ ¿Majateeri nia niishiniu pueyanaa? Niaacuajaari Pueyaso quiquio, juhua na tia. Na Sohuanuuri nioojiacajinia quijia. ¹⁷ Tamonu jaara Pueyaso quiquio sesore, Pueyasoori cunoo pueyano saniutionutaniya saniniuujia. Puetunu Pueyaso muerasujuanaari juhua na tia quiya. Pueyaso quiquio cuara quiri tojtaarucujanaa maninia, saa neraja, maja raquiriojotasano. Niaacuajaari na quiquio.

¹⁸ Tama nia cuaqueyajaaja nia cojuare tamonu mariqui nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyaso niishiyashijiaca niqiuara. Cuno pueyano cuara jataara cunoo na niishishano juhua niishiyashijia na quiniuria narta pueya niqiuara. Na nuhuaji, cuara maseera Pueyaso niishitijaa, seetanu niishijia na quiniurijanaa. ¹⁹ Mijiria pueya niishishanooroo juhua

paateca sequesano Pueyasora. Tariucuacaanu Pueyaso Rupaajinia naa naajiotasanoori quiya:

“Pueyasoori mijiria quiniaa pueya cushiriquitianiniutianiya, tama nojori niishitiushanoocuaajaaja nojori tiuushacari najuhuanaj”.

²⁰ Naa naajiotasanoori quiyajuhuaaj:

“Pueyasocuaajari mijiria niishijiaca niishiriojosano niishiya. Naa sequeyari: ‘Najuhua-naari cuno pojori niishiriojonuusano’ ”.

²¹ Naaratej, maja shuquiriaatia nia quiniu saaja niquiriyatu Pueyaso rupaa pohuatana nia tojishacari. Pueyasoori tamasaca pueya jiyaramiquiquiaa nia cumaquiniuriajuhuaj, maja saa niquiriyatu niishitiojonaja. Puetunu casaajanaari niara, maninia nia quiniuria. Naaratej, majaari saa niquiriyatu pueyanoocuaaja nia jiaatianu. ²² Pueyasoori canaa jiyaramiquiquiaari canaa cumaquiniuria niajaniya. Naacujitij, janiya, Apolo, Pedro, canaari niara quiyani, maninia canaa miiniuria niajaniya Pueyaso rupaata. Nio jiyari niara quiyajuhuaaj. Pueyaso shipinishanocuaajari niara. Naajuhuaaj, mijiria nia quishacari, cunoori niara quiya, socua maninia quijiara nia quiniuhuaa. Taa nia miishiya quiarijiacuajani, taa nia miishaanutaniyani, puetunu cunojuanaari niara, cumueeca Pueyaso muerasu nia quiniuria. Nia shaajesacariiri maninia quiniutianiya niaarajuhuaaj. Pueyasoori nia shaajeteya na shuriucua nia quianura. Naacujitij, puetunu casaajanaari niara quiya. ²³ Niajaniyari Cristora quiya saniniuuja. Cristoori saniniuuja Pueyasora quiyacujua.

4

Jesucristo jiyaramiquishano poonijiosano

¹ Naaratej pueyanaa, niajaniya cuaara niishiiria canaari saaja Jesucristo seyani. Canaari maja cutara pueyani. Pueyasoori canaa jiyatequiaari na rupaa canaa niishitiojonura niajaniya, Pueyaso niishitiojosano canaa. Cunoori tarijia pa niishishoo. ² Cante Pueyaso niishitiaja jiiitiaani, cuno cuaara quiiria seetanujanaa Pueyaso miiniu panishano panijia, na rupaa na pohuatanura puetunu maniniajanaa. ³ Niajaniya, tamasaca pueyajuhuaaj jaara sequenu paniya taamueca pohuatanate janiyani, quiria, naajaa. Mijiria nequesoreena jaara cua nequesoreere cua niishitiojonujiniji, naajaa. ¿Janiya sesa niishitiojoquiaani? Johuaaj. Maja cua niishiniu. ⁴ Janiya jaara sesa miiriquiaa cua Jiyaniijiaara cua poonijiosacarini, majaari cua niishiniu. Majaari coojia macuhuaajenu quijia. Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijiaja na naata sequenu taa cua quiquiaarini. ⁵ Naaratej, maja nia rimiaaquenu tamonuucuaa, Jesucristo tiuquiyaquishacarihua pocua. Nia sashiri. Pa Jiyaniijia jaara tiuquiriohua, puetunu jiyasohua pa miishanojuanaari niishishaanutaniya. Niishishaanutaniyaajariuhuaaj casaara pa miiquiaari puetunu pa miishanojuanaani. Cuno quishacari, pa Jiyaniijiaari maninia pohuatanutaniya cante maninia miijia quiriquiaa mijiria na quishacarini.

⁶ Cua tojitiare cuarta Jesucuaa tiuuniaanaa. Janiyari nareja nia pohuatariquiaa Apol-jinijini, janiyajinijiiuhuaaj, maninia nia niishiniuria casa cua niishitiojiya niajaniyani. Naacujitij, nia niishitiojoriquiaanijia saa Pueyaso rupaa nia tojitanura suraatiaja. Majaari socua tamonu niishitiojosano nia tojinu. Naajuhuaaj, maja nia sequenu tamonu niishitiojonajiniji: “Cuno niishitiojonaari sesa pohuataja. Tamonu niishitiojona cutaraari shanohua pohuataja. Na tojiriiriaj, na shuquiritiniucua janiya”. Maja naate pueyanaa. Mariyata nia tojitiare puetunu Pueyaso jiyaramiquishano pueyajanaa, seetanujanaa nojori pohuatasacari Pueyaso rupaa. ⁷ ¿Niajaniyariuhuaaj? ¿Taa nia sequeya tama nia cuaqueyajinijijiaajani? ¿Niaateeri socua maninia pueya tamasacajiniji, socua niishijiacajuhuaaj? Majaruhua. Naajaa, niaa jaara seetanujanaa socua niishijiaca quiri tamonujiniji, ¿taa jiyanohua niishijiacara nia quiquianuni? ¿Tamajaate? ¡Maja tamajaaja! Niaacuajaari Pueyaso niishitiaja jiiitiaa. Naaratej, maja nia jyaniniu niaa socua maninia pueya tamasaca pueyajiniji, tama nia niishishanotajaaja.

⁸ Naa jiyoteeri jiyaniya niaa tari cutara niishijiacara quirii. Naa jiyoteeri jiyaniya-juhuaj, niaa tari jiiitiaa puetunu Pueyaso niqutionu panishanojuanaa niajaniya. Naajuhuaaj, niaa jiyoteeri jiyaniya Pueyasoori nia jiyateree jiyaniijanucua nia quiniuria. Naa naasucuaari canaa shototaree tari. ¿Naatejaaratej? Seetanujanaa naara nia jiyateriquiani, canaa quiniuria niarta jiyaniijanucuaajuhuaaj, shuquiriaatia pa quiniuria mariyata. ⁹ Janiyari cuarta Jesucristo jiyaramiquishanoocua niishiriojoriquiaani, Pueyaso naasucuaari canaa jiyatequiaari juhua najuhuaa quijiacara, saa puecosocoriquiano-ju. Canaa naasucuaari naa quiya mijiriani, puetunu pueyajanaa shootianura canaa,

Pueyaso seya shootianura canaajuhuaaj. ¹⁰ Canaa tojtiasacari Cristo, canaa naasucuaari niishiyashijiaca quiya tamasarani. Niajanitari saniniuuja niishijiaca quiya tamasarara, Jesucristo nia rupuesacari. Canaa naasucuaari Pueyaso muerasu sasaca quiya saajani. Niaari saniniuuja Pueyaso muerasu cumueeca quiya tama nia niquiarajaaja. Pueya jiyoteeri nia shuquiritiaa. Canaari saniniuuja saaja rerequetesano quiyani, pueya soosanojuhuaj. ¹¹ Canaari pueyaracaanu miaajequiaaajaani. Canaari jiyamuequiaaajaaniuhuaaj. Canaa cushishano toqueniyojaari jiyareta sesaruqueniyojua. Pueyari canaa miiquiaa taraatiani. Shaaquiiri canaa tia, canaa rucojonuucua pueyaracaanu. ¹² Canaari samareequiaani pueyaracaanu canaa poonijosacari tama canaa juaashiquiatajaaja. Pueyari canaa sesacaquiaani. Canaari maninia na riucuaquiaa saajani. Canaa jaara naquiya miishaareni, canaari na rejeretaquiaa juhuajaniya saajani. Majaari canaa naminiu quiquiaa saniniuuja nojori. ¹³ Pueya jaara tamasaca niquiara rimiaaquequiaa canaajiniji, canaari nojoritia jeecatoonu saniquiaa juucuanu. Pueyari canaa jiyatequiaa juhua rucucuarani. Canaari naa quiyajaaja nojoririani.

¹⁴ Naa cua naajiosacari niaacuaratej, majaari cua cararonu paniniu niajaninya. Janiyari saaja nia niishitiojonu paniya cutarani. Janiyari nia rootaa juhua cua muerasuniyojuani. ¹⁵ Naa naasucuaari queraatia Jesucristo rupaa niishitiojonaaraca. Naajaa, saa janiyajaari juhua nia quen. Nia tojtiasacari Jesucristo rupaa cua pohuatasacari niajaninya, niaari Pueyaso muerasura quiquiaari. ¹⁶ Juhua nia que cua quishacari, nia nacasureenijia pueyanaa. Naate taa maninia muerasu na queecua jiaatiaacuaani, naa cucua nia jiaatiarejuhuaj, juhua janiya nia quiniurajuhuaaj.

¹⁷ Naaratej, janiyari niaacua jiyaroya cua panishano Timoteoni. Nojuajaari juhua cua nianyana quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonutaniuhua taa cua niishitiojoquiaacuaa puetunu Pueyaso maapuejanaa puetunu jiyacajiniajanaacuaani. Naa nia rootanutaniyari nia niishiniuhua maninia cua niishitiojosano niajaninya tarijia. Nojuajaari nia pohuatanutaniyajuhaaj taa quiyia cua quiyani cua tojishacari pa Jiyaniijia Jesucristo, naa maninia nia miiniurajuhuaaj.

¹⁸ Noojiaqueya niajanijiniinooori shuquiriaatia quiya, juhua jiyaniijianucua nojori jiyatesacari tama na cuaqueyajaaja. Nojoriiri naa miiriqiu nojori jyanishacari maja naasucuaari cua tacatenu quiniutianihua, cua niquiniuhua niajaninya socua. ¹⁹ Janiyacuaajaari niaacua naquerejiya tarini, cua Jiyaniijia Jesucristo jaara paniri niaacua cua quianura. Cua tiuquishacari niaacua, janiyari cuno niishijiaca pueya saniniujuiniutianiyani, cua niishiniuria casaate nojorini, maja naa sacuraatia nojori quiniuriatej. ¿Cumaacaracate nojori, saaja pocujaca soj? ²⁰ ¿Canteeri seetanujanaa Pueyaso pueyanoni? ¿Saaja pocujatej? ¡Maja pocujaj! Cante Pueyaso Sohuanu jitiata na cumaquiriqianano Jesucristo na tojiniriani, cunoori seetanujanaa Pueyaso pueyanu cutara. ²¹ Nia niishiriojore, cuarta Jesucristo tiuniananaa. ¿Taa nia paniya cua miiniuria niajaninya cua quiasacari niaacuani? ¿Niaateeri paniya cua saniitionura niajaninya, jacaria cua niishitiojonura niajaninya cua paniniutia soj? ¿Taa nia paniyani?

5

Na que niquiocuata quiijajiniji pohuatasano

¹ Niajanijajiniji pohuatasaarucuaa taraatianijia. Tamonu niajanijajinijionaaari jyanohua sesa miya. ¡Na que niquiocuata quiyaquiniaari! ¡Pueyanaa, cuno miishanooori socua jyanohua cararaatia Pueyaso niishiyashijiaca miishanojiniji! Pueyaso niishiyashijiaca pueyani, majaari quenaaja nojori naa sesa miiniu niishiniutij. ² Naa cuno pueyano miishacari sesa nia tajiniatej, ¿niaateeri saaja juhuajaniya cuniqui na jitiaruhua? ¡Naa cuara na tacaatiaara! Cuno sesa mijia cuara taanuusaaria nia tajiniji, maja na cojinuria socua niajaninya nia rerejosacari. ³ Cua tojiri taa pa miiniutianiyani. Janiyari maja cua quiniu niaata. Naajaa, coojaari niaata quiya cua niishiriojosacari niajaninya. Naacuajitij, janiyari juhua nia tajinia quiyani. Naacuajitij, janiyari tari cuno sesa mijia saniniujiiriini. ⁴⁻⁵ Naaratej pueyanaa, cua tojitiare. Nia rerejore cuno sesa mijia nia tarinitianura Sesaacara. Coojaari niaata quiniutianiya naa nia miishacari pa Jiyaniijia Jesucristo cumaquishacari niajaninya. Naacuajitij, Sesaacaari naquiya na miiniutianiya; na cusojuanura naasucua, maja soj. Naajaa, na cuaqueyari naa naquiya miishaanutaniya noojia na tacatonuhua, Pueyaso tojijiaara na quiniuhua. Naacuajitij, pa Jiyaniijia Jesucristo muetasacariuhua pocua, nojuajaari samiitianishaanutaniuhua juhua puetunu Pueyaso muerasutajanaa.

⁶ Cuarta Jesuucua tiuuniaanaa, ¿taate nia naata shuquiriaatia quiniu tamajaani, naa sesa miijia quishacari nia tajiniatej? ¿Majateeri nia niishiniu? ¡Niaa jaara cojiya sesa miijia saniniujiushoojua, socua pueyari mariyata naa sesa miiniutianiyaquij! Sesa miijia niishishanoori tamasaacua paaquenutaniya. Niaacuajaari niishiya, shiitianiyojua pan poreeteja jaara niasaare cashojuajinia, ritia poreeteja puetunu cashojua miniquootasanojuanaari. Naajuhuaaj, sesa miijia jaara sequeyaquishaare na miishano, sesa na miishanoori socua paaquenutaniya.

⁷ Tariija, Pueyasoori pa supuetanaa Judiocuaca rootaquiaari puetunu na pan poreetejajanaa nojori jatanura puetunu marijarajanaa. Nojoriiri naa rootasaaquiaari saaja poreetesoo pan nojori miaquenura siete juuca, shuquiriaatia nojori quiniuria Pueyaso niquiara. Pueyasoori naa nojori niishitiojoquiaari miriquitij, nojori cartenura puetunu sesa nojori miitiushanojuanaa, nojori rupenura Pueyaso. Naajuhuaaj quiarijiani, nia taanuure cuno sesa miijia nia tajiniji, seetanujuanaa sesa miyashijiaca nia quiniuria Pueyaso niquiara. Pueyaso jiyanooniuria pajaniya, Cristoori tari mosaaquiaari pocuara, taa borregohua puecoosaaquiaari Pascua juucacuaani. Tariucuacaanuuri naa miishano quijia, Pueyaso jiyanooniuria pa supuetanaa Judiocuaca, sesa nojori miishanojiniji. ⁸ Naa Pueyaso pa cojishacari quiarijiatej, tojetaarucujajanaa sesa miyashijiaca pa quirij, shuquiriaatia pa quiniuria pa Jiyanoonia niquiara. Pueyaso pueya maanu pa cojuare puetunu maninijajanaa, maja sesa miijiacata cojitishano. Seetanujuanaa maninia pa quiri puetunu pajaniyajanaa.

⁹ Pueyanaa, janiyari tari niaacuara naajiocanuni cua sequenura niajaniya, maja nia cojiniuria sesoriquia pueya, cuno pojori canapue te na camishoo maaji numuetucuquiaani. ¹⁰ Naa cua sequesacari niajaniyatej, majaari cua sequenu nia rupeyaquiniuria puetunu sesoriquia pueya sequejanaa mijiria. Saa nia shaajesacarijia cutara nia naata puetunu sesoriquia pueyacuajijianaa rupertenu. Nio jiyacua, pueyari naa sesa miijia quiya: nojoriiri sesa miiquiaa tama na niishiriojosanotajaaja. Nojoriiri tama nerajaaja paniquiaa socua casami pueyaracaanu. Nojoriiri nohuasenuquiaa. Nojoriiri tama na panishanoocuajaaja jiaatiaquiaa puera, maja Pueyasooqua. ¹¹ Cua tojitiare casaa cua sequecanu tari niajaniyani. Cante tama na cuaqueyajaaja sequejani: “Janiya Pueyaso muerasuni”, maja cunota nia cojitianu, cuno jaara na camishoo maaji numuetucujuquiaa. Naajuhuaaj, majaari nia cojiniu nooj cante casamiriacara quiniucua jiaatiaquiaani. Majaari nia cojiniu nooj cante tama na panishanoocuajaaja jiaatiaquiaajaaniuhuaaj, maja Pueyasooqua. Majaari nia cojiniu narta pueya sesacaja. Majaari nia cojiniu mashaasequejoja. Majaari nia cojiniu nooj, cante tamonu casami nohuasejoquiaa na sapojonutani. Janiyacuajaari tari naa nia sequecanuni maja jiyano pueyata nia cojitianura. Majaari jiyano pueyanota nia miaquenu quenaaja. ¹²⁻¹³ Naa cua sequesacari niajaniyatej, majaari cua sequenu quiriquiaa tamasa pueyajiniji, canapuetucujaja maja Pueyaso muerasuni. ¿Paate nojori nequesoreenaani? Maja. Pueyasocujaari nojori saniniujiuniutianiya. Pajaniya cumaati parta Pueyaso pueya saniniujiuniaani, nojori jaara sesa miiriquia. Naaratej, nia jatere cuno sesa miijia nia tajiniji, noo cante sacuraatia na que niquicuata quiyacuajani.

6

Sesa miijia cuaara nequesoreesaaria narta Pueyaso muerasu niquiara

¹ ¿Seetanutejanaa naa niajaniyajiniji pueya pohuatasanojuhuaaj? Niarta Jesuucua tiuunia jaara sesa miiri niajaniya, niaanaari Pueyaso niishiyashijiaca nequesoreena tonujuquiaa nocuara. ¿Casaara tamajaaja niarta Pueyaso muerasu niquiara nia jecatoyaquiquiaani? ² ¿Niaate niishiyaquiya, Pueyaso muerasu niquiara Pueyaso niishiyashijiaca nequesoreeriquianocuaa, Pueyaso saniniujiushacari nojori? Pueyaso jaara naa nia nequesoreetenutaniya na ruuretajaca, ¿majate nia naata quiarijia niarta Pueyaso muerasu nequesoreenu tamajaaja, nojori jaara sesa miiri shiitianiyojua? ³ ¿Majate nia niishiniujiuhuaaj, paari Pueyaso seya nequesoreeriquianojuhuaaj? Pueyaso jaara pa nequesoreetenutaniya na seya na tojiyashijiaca, ¿majate quiarijia nia naata maninia nequesoreenu niarta Pueyaso muerasu mijiria? ⁴ Niaa jaara nia tapueyocuaacuara tonujunu paniya sesa na miishacari, ¿niaateeri Pueyaso ruuretajaca tonjunutaniya nojoriicuara? ¡Maja maninia naatej! Cuno pojoriiri maja Pueyaso muerasu jiiitanaa. ⁵ Naa nia sequeyanijia cua cararonura quenaaja niajaniya, cua niishiriojotenura niajaniyajuhuaaj. ¿Seetanujuanaa tojetaarucujajanaa shaaquiti niishijia niajaniyajinijinio, cante na naata nia tonujutoosacari nequesoreenu niajaniya maniniani? ¡Quiya jiyotucuaajaari! ⁶ Niajaniyanaari tama niarta Jesuucua tiuuniaacuaraajaaja tonujutoojoquiaa Pueyaso niishiyashijiaca nequesoreena niquiara. Naa nia miishacaritij, ¡niaari sesa miiquiaa pueyanaa!

⁷ Niaari jiyanoehua jiyajeneya nia juayonuujutasacari. Niaa jaara sesa miishaare, niaa cuara jiyanootoora saniniujia, nia casami jaara nohuasesaarejuhuj. ⁸ Niajanijarijataj, i niaari saaja sesa miiquiaacujua! iNiaanaari niarta Pueyaso muerasu miiquiaa sesa! Niaanaari tama niarta Jesucua tiunuaajaaja nohuasejoquia, sesa miijaca nia quiniucua.

⁹⁻¹⁰ Maja tama nia cuaqueyajaaja nia sapojonu, pueyanaa. iNiaateeri niishyaquia Pueyasoori maja na rijionu quiniutianiya sesa miijaca na shuriuca nojori quiniuria? Jiyano pueyari puetunu quejoosaanutaniyajanaa. Quejoosaanutaniyari noo pojori canapue te na camishoo maajipohua numuetucujuquiaani, naajuhuj, noo pojori, canapue te tama na panishanoocuaajaaja iaatiaquiaani, maja Pueyasocua. Quejoosaanutaniyajaariuhua noo pojori, canapue te narta pueyano niqiuocua numuetucujujuaani, naajuhuj, canapue te maajishuriutia quijia juhua maajitiani. Nohuasenuujuaaari quejoosaanutaniyajuhuj, noo pojorijuhuj canapue te pueyaracaanu socua casami paniquiaa tama nerajaajani. Mashaasequenuujuaaari puetunu quejoosaanutaniyajuhuj, tamasaca sesacajacanio, tamasacaacuara rimiaaquejacajuhuj. Naa quejoosaanutaniyajaariuhua noo pojori, canapue te nohuasejoquia na sapojonutani. Puetunu jiyano pueyajanaari maja Pueyaso muerasu na quini quiniutianiya, Pueyasota nojori quiniuria shuquiriaatia pueyaracaanu. ¹¹ Noojiaqueya niajanijiniioori jiyano sesa miijaca pueya quiquiaari tarija. Na nuhuaji, sesa nia miishanoori jeequesaaciaari Jesucristoocua nia tiushacari. Pueyaso Sohuanuuri nioojiajinia tiuquiquiaari, Pueyaso na tojitiuria niajanija. Naacua-jitij, nia rupesacari Jesucristo, Pueyasoori nia jiyanoocuaari. Nia sequeereeri: “Niaari saa maninija quiya cua niqiuara”.

Pa cuaqueya cuara quiria saa Pueyasoraja

¹² Queraatia pueyari sequequia: “Pueyaso jiyanooshacari pajaniya, paari tariniti-asaare puetunu pa miiniu panishanojuanaa pa miiniuriani”. Seetanujuanaa naacuaaj. Saniniujia, majaari puetunu pa miiniu panishanojuanaa maninia na quini pajaniyara. Seetanujuanaa cua naata miiniu puetunu cua miiniu panishanojuanaa. Naajaa, maja cutaraari cua miiniu puetunu cua miiniu panishanojuanaa, janiya mariqui puera nocua jiyartuureeri. Naa pa jiyartuusacariitij, na nuhuaji majaari pa naata pa jitiishano casaa pa tarinitianu. ¹³ Pueyari sequequia: “Pueyasoori miaquesano shipiniquiaari pa seecora. Pa seeco shipiniquiaari sumatuucuaaji saniniuurija, shuquiriaatia pa quiniuria”. Seetanujuanaari cuno sequesano. Naajaa, majaari nio pa niyajetanu, na nuhuaji, Pueyasoori na shaajanutaniya puetunujanaa. iPa cuaqueyariuhuj? iPueyasoteeri pa cuaqueya shipiniquiaari pa numuetucunura pa camishoo maajipohua? iMaja! Pa cuaqueya cutaraari shipinishaquiaari pa jiyaniijara, na panishano pa miiniuria. Naajuhuj, pa jiyaniijaari pa cuaqueyara quiyacujua, na cumaquiniuria pajaniya, maninia pa quiniuria pueyaracaanu. ¹⁴ Naajuhuj, taa Pueyaso samiitiani quiaaricuaa pa jiyaniija Jesu na cuaqueyatani, nojuaari macujiniji naa pa samiitianiutianihua na cumaacatajuhuj.

¹⁵ iNiaateeri niishyaquiyajuhuj, Pueyaso Sohuanu quiniucua poojiajinia, pa cuaqueyari seetanujuanaa pa jiyaniija cuaqueya quiya? Naaratej, Jesucristo cuaqueya pa quishacari, maja cumaati pa curuushojonu pa cuaqueya, maaji paanatu pa numuetucunuta. iCunoori jiyanoehua sesa! ¹⁶ Pueyasocuaaari coteenujuanaa na shipinishano pueyano sequequiaari:

“Quia camishacari maaji, niaari niquiriyatu cuaqueyara quiniutianiya”.

iNiaateeri nio niishyaquia, cante paanatu numuetucureeni, Pueyasora, nojoriiri niquiriyatu cuaqueyaracara quiqui? ¹⁷ Naajuhuj, paa jaara Jesucristo rupuereni, pa sohuanuuri rupuetoree na Sohuanuta, niquiriyatu sohuanuraca pa quiniuria Jesucristota.

¹⁸ Naaratej, nioojia nia tacatore maja nia numuetucunura tamasaca, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesojua. Saniniujia, cante na camishoo maajipohua numuetucujuani, nojuaa cutaraari tama na cuaqueyajaaja sesoya. ¹⁹⁻²⁰ iMajateeri nia niishiniu, nia cuaqueyari Pueyaso Sohuanu quiquio? Pueyasoori na Sohuanu jiyaroquiaari poojiajinia na quiniuria. Pueyasoori nia masequiaari tama nerajaaja nia quiniuria. jiyanoehua naquiya na miiniutia nia masereeri Neyanu na motesacari pocuara! Naacua-jitij, Pueyasoori quiarijia pa camarnu quiya. Naaratej, quiarijia maja pa quiniu tama pa cuaqueya camarujuaaja. Naaratej, pa shuqiritiri pa Pueyaso pa cuaqueyata, pa sohuanutajuhuj. Nojuaajaari pa cuaqueya camaru, pa sohuanu camarujuhuj.

7

¹ Quiarijiani pueyanaa, cucuara nia naajosanojinia nia nequesotasano riucaareeraj. Cante niquiriyatu quiniu paniya tamajaajani, cuno pueyanoori maninia miya, maaji na camiyaquishacari. ² Saniniuujia, quiarijiani, pueyari puera sesa miiniu niishiquiaa. Nocuaij pueya cuara camiriia. Maajipohua cuara camiriiajuhuaj. ³ Pueyano jaara camiri, necocua cuara na cuaqueya jamueyaquiiria neyaca numuetucunu panishacari. Naajuhuj, neyaca cuara na cuaqueya jamueyaquiiria necocua panishacari na numuetucusaanura. ⁴ Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuj, neyacaari maja tama na cuaqueya camarujuaaja na quiniujuhuaj. Necocuaari neyaca cuaqueya camaru cutara. ⁵ Naacujiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu niajaniya. Naajuhua niajaniya canuunaa, maja nia niquiocua nia tarijonu na panishacari na numuetucusaanura. Saniniuujia, jiyanoohua Pueyaso nia seconjonu panishacari, jiyacari cutara nia naata tarinitianu numuetucunu rupaquijia, Pueyaso nia seconjonura, niaa jaara mariyata naa miiniu paniri. Na nuhuaji cutara, nia numuetucurohua nia niquiocua, Sesaaca mariqui sesa nia miitiriiri tamonu maaji nia paniniuria, nia camueenujusacari puera. ⁶ Nioori quiarijia maja niaara Pueyaso rootasano janiya. Janiyari nareja naa sequeya niajaniani socua panaatia nia quiniuria. ⁷ Naaratej, nia jiyateriquiani taa cua quiyacuaani, niquiocuaaju. Naajaa, Pueyasoori puetunu pa cumaquiquiaajanaa tamaatia pa quiniuria, taa Pueyaso paniyacuajani. Camishoo, camishano soj, naajaa. Taa pa quiyani, paari shuquiriaatia quiquiaa Pueyaso cumaquishacari pajaniyani.

⁸ Camiyojua pueyanaa, mashiquiopuena, cua tojitiare: niaa jaara juhuajaniya quiya taa camiyojua cua quiyacuaani, niaari maninia quiniutianiya. ⁹ Cante saniniuujia maja na naata tama na cuaqueya panishanojuaaja rejetenu maninia tamajaajani, cuno cuara camiriia. Socua maninia cutaraari nia caminiuria, maja maajicua nia jiaatianura pueyaracaanu. ¹⁰ Camiyono pueyanaa, nio nia tojitiare cutara. Nioori pa Jiyaniijia Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca. ¹¹ Cante neyaca carteyani, nojori cuara jyanootioora, na rupuetoonuhua. Jaara maja na naata jyanootioonu, cuara quiiria tamajaaja pueyaracaanu. Cuara camiyaquiiria socua. Canuunaa, pa Jiyaniijia Jesucristo sequesanoori mariyata niaarajuhuj. Naa sequeyari: “Maja nia cartenu nia niquiocua”.

¹² Quiarijiani, socua nia niishitiojoreeraj. Nioori tama cua niishitiojosanojuaaja, maja niaara Jesucristo rootasano. Pueyano jaara Pueyaso tojiyashijia niquiocuaraca quiri, cuara jiiitaara maninianoj. Quia niquiocua jaara quiata quiniu panijajaa, majaari na cartenu. ¹³ Naajuhuj, maaji jaara Pueyaso tojiyashijia niyacaraca quiri, cuara maninia jiiitaara neyaca. Majaari na cartenu, quia niyaca jaara quiata quiniu panirijia. ¹⁴ Cuarta Pueyaso muerasunaa, Pueyaso tojiyashijia pueya nia jyanoori, nojori jaara Jesuucua tiuuniaata caminio quiya. Nojoriiri seetanujuaanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, niajaninya cuara neyaca jyanooria necocua quiniucua niarta Pueyaso pueyano. Nareja nia niquirinij, niaata na rerejonu panishacari. Naajuhuj, nia jyanoori niarta Pueyaso pueyano niquiocua, naajaa, Jesuucua tiuyashijia na quishacarijia. Naa Pueyaso pueyano neyaca quishacarij, necocua cuara nareja niquishaariajuhuaj, na rerejosacari niaata. Naajuhuj, maja rimiajata nia niquiniu necohua. Necohuari maniacuaja Pueyasora, maja juhua tama maaji muetusanujuaaja. ¹⁵⁻¹⁶ Pueyaso muerasunaa, canuu, maajipohuanio, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari niajaninya, niaari juhua camishoo quiriohua. Majaari socua nia tojinu coteenu nia niyaca, coteenu nia niquiocuanio. ¡Maja cutaraari nia cartenunoi! Nia niishiriojore pueyanaa, nia niquiocua jaara Pueyaso tojiyashijia quiri, ¿nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhuj, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijiaaja na cartenura quiajaninya. Naatej, Pueyasoori paniquiaa juhuajaniya pa quiniuria, camishano, cartesano soj.

¹⁷ Cuarta Jesuucua tiuuniaanaa, taa nia quiquiaari Pueyaso sequesacari niajaninya na muerasu nia quiniuriacuajani, naajaa, naa nia quiri Pueyasora. Janiyari naa nia sequeyani, taa cua rootaquiiaacuaja puetunu Pueyaso pueya maapuerajanaani. Taa nia quiquiaarini, naajuhuj casaate quia poonijosano quiquiaarini, cunocujajari Pueyaso panishano quiquiaari niaara. ¹⁸ Naacujitij, cante tarijia na cararaatiuquua co miatesano quiquiaari Judio pueyano na quiniuriani, naajaa, cuno pueyano cuara naa quiiria pueyaracaanutej, Jesucristoocua na tiuushacari quiarijia. Naajuhuj, cante miatesoo quiquiaari Pueyaso sequesacari na pueyano na quiniuriani, cuno cuara quiiria naajuhuj. ¹⁹ Cante Judio pueyano na quiniuria miatesaquiiaarini, naajaa. Cante miate-

soo quiyani, naajaa. Saaja maninia cutaraari pa tojtianura Pueyaso niishitiojosano pajaniya. ²⁰ Naarate nia sequeyanijia, nia quiri taa nia quiquiaaricuaiani shushajanaa Pueyaso sequesacari na muerasu nia quiniuria. ²¹ Cante poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishiriojonu nocua. Juhuaiani nia poonijiore saaja. Saniniuuja, jaara nia naata quiriquia cartesano pueyano nia camarnujiniji, maniniacuaajaari. ²² Cante poonitijiotasusano pueyano quiquiaari Pueyaso sequesacari niajaniya na muerasu nia quiniuriani, naajaa, niaari seetanujanaa cartesano pueya quiya pa Jiyaniijia. Naajuhua, cante camarnuuju quijia quiquiaari Pueyaso sequeyaquishacari nia muerasu nia quiniuriani, quiarijiani, niaari pa Jiyaniijia poonitijosano pueya quiya cutara. ²³ Pueyasoori jiyano nia quiyani miqiuiaari na cusojuasacari Neyanuniyojua, na masenura niajaniya, na muerasu nia quiniuria. Nia masequiaari tama nerajaaja nia quiniuria. Naaratej, majaari juhua tamonu camarnu poonitijosano nia quiniu socua. Quiarijia saa Pueyasoraja nia quiri maninia. ²⁴ Naaratej cuarta Pueyaso muerasunaa, taa nia quiquiaari tarijia Pueyaso muerasu nia quiyaquishacarijiani, naa nia quiri quiarijia Pueyaso cumaquishacari pueyaracaanu niajaniya.

²⁵ Quiarijia nia sequereera cua niishiriojosano, taa camishoo pueya miiniutianiyani. Nioori maja pa Jiyaniijia rootasano janiya. Majaari na sequenu quiquiaari cunojiniji. Naajaa, pa Jiyaniijiaari cucua tiuuquiaa na sequenu panishano cua caminiujuniuria niajaniya, na Sohuanu cumaquishacari janiya. ²⁶ Naacujitij, naa nia sequeyanijia: niaacuaajaari niishiya, quiarijiani, jiyano nia puereeta quishacari. Nocuai niajaniya cuaara quiiria taa nia quiyacuajani. ²⁷ Cante niquiocuaracani, maja nia paniniu na cartenu. Cante niquiocuaaju quiyani, majaari nia niquiocuaani paniniu. ²⁸ Naajaa, mashaja jaara camiri, cunoori maja sesa. Naajuhua, niyacoo jaara camiri, majaari sesa na miishano. Saniniuuja, camishano pueyari socua taraatia miishaanutaniya camishoo pueyajiniji, puereeta quishacari quiniuucua mijiria quiarijiani. Majaari cua paniniu taraatia nia miishaanura. Nocuai janiyari naa nia niishitiojiani puera sesa quishacari quiniuucua quiarijiani.

²⁹ Cuarta Pueyaso muerasunaa, niajaniya cuaara niishiiria nio jiyari puequenutaniya. Majaari mijiria pa quiniu quiniutianiya pueyaracaanu. ¿Taariquitijia mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacarijia, jiyano nia pa tojtiane pa Jiyaniijia. Naacujitij, cante niquiocuaraca quiyani, majaari nocua nia niishiriojonu puera. ³⁰ Cante na shaajasanocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijiorejuhua. Cante casami niquitiojojua quiquiaani, naajaa, maja casami nia niishiriojonu puera. Socua nia niishiriojore cutara Pueyasocua. ³¹ Canapute niishijiacani, queraatia casami na masejonura mijiriani, nojori cuaara niishiiria maja casami panijia nojori quiniuria puera. Nio jiyari tari puequeya puetunu pa niquishano casaatajanaa. Naaratej, maja casami nia niishiriojonu. Saaja Pueyaso nia tojiri cutara.

³² Janiyari paniani mijiria casaacua tacayashijia nia quiniuria. Pueyaso nia tojtiane juhuaiani cutara. Camishoo pueyano na naata saaja pa Jiyaniijia nia niishiriojonu na tojiniuria maninia, pa Jiyaniijia na shuquiritiniuria. ³³ Cante niquiocuaraca saniniunijia, nojuajaari niishiriojoquiaa mijiria casaacua, necocua na shuquiritiniuria. ³⁴ Naacujitij, noojia niquijitoyari. Naajuhua, camishoo maajiri pa Jiyaniijia nia niishiriojoquiaa maninia, tama na cuaqueya na cojuasacarijaaja Jesucristora, nera na poonijionura puetunu noojiatajanaa. Saniniuuja, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacujitij, majaari puera jeya na quiniu Pueyaso panishano na miiniuria.

³⁵ Janiyari naa nia sequeyani socua shuquiriaatia nia quiniuria. Maja cua taajetenu paniniu niajaniya puera nia rootasanta. Janiyari nareja naa nia niishitiojiani, maninia nia quiniuria, pa Jiyaniijia nia tojtianura maninia. Naa jaara cua niishitiojosano tojiri, nia naata pa Jiyaniijia tojiniu maninia. Naacujitij, niaari nioojia niquijitoyequiniutianiya.

³⁶ Pueyano jaara naa niishiriojore: “Majaari maninia cua miiniu cua jamuesacari cua niyatu pueyaracaanu na camiyaquiniuria”, cuno pueyano cuaara miiria taa na miiniu paniyacuajani. Camishocoriquiano maaraja, cuaara camitioora. Quia niyatu jaara camiri, majaari sesa. ³⁷ Cante saniniuuja nia noojia niquijitoyequiyani nia niishiriojosacari neyatucuanu, cunoori maninia miiniutianiya na camitiyaquishacari, jaara na naata neyatu cojuanu maninia. ³⁸ Naacujitij, cante neyatu camitiriini, maninia miyari. Cante neyatu camitiyaquiyajaniuhua, nojuajaari socua maninia miya. Naacujitij, cuno neyatuuri na naata Pueyaso panishano miiniu socua, camishoo na quishacari.

³⁹ Camishano maaji cuaara carteyaquiiria neyaca, saminio neyaca quishacarijia. Pueya-soori naa sequequiaariti. Neyaca jaara cusoyare, na mashiquioori maja tari na quiniu juhua camishano. Na panishacari, cuaara camiiria cana na caminiu paniyacuajani. Jaara caminiu paniri, cuaara camiiria Pueyasocua tiuujia pueyanota cutara. ⁴⁰ Naajaa, mashiquio jaara camiyaquiriohua, socua shuquiriaatia quiniutianiyari, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequeteree nio.

8

¿Maniniate cuno shu pa miaquenura, seya jaara puecoosano quiri nareja shipinishano casaacuaara, juhua Pueyasocuarajanaa?

¹ Cuarta Jesucua tiuuniaa pueyanaa, janiya quiarjia nia niishitiojonutianiyani teyano pa miaquesanojinijiti puereshiyani. Pueyaso niishiyashjiacaari na miaquesocoriquiano seya puecoonu niishijia shipinishano casaacuaara juhua Pueyasocuaara. Pueyari nequesotaquiaa, ¿maniniate cuno shu, Pueyaso muerasu miaquesocoriquianojuhujaj, cuno seru jaara taucuaa jyanishano cumaacaraca quijiaacuara mosano quiri? ¡Janiya cutaraari maja cua miaquenunoj! Nia pohuatereera casaara cua miaqueyaquiquiaanoj. Cua tojitiare. Paacuajaari niishiyani cuno shipinishano casaari nareja pueyano shipinishano najuhuanaj, nojori jyanitiushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocuaa puecoosano miaqueriquiani. Naa niishijiaari shuquiriaatia quiya tamajaaja. Saniniuujia, majaari na niishiriojonu narta Pueyaso pueyanocua. Cante narta pueya paniquiaani, cunoori narta pueyacu niishirioquiaa cutara, nojori juujia na cumaquiniuria maninia. Jiyano pueyanoori cumueeca Pueyaso pueyano quiniutianiya. ² Naacuajitij, cante tama na cuaqueyajaaja jyaniya niishijiani, cunoori juhuanajuaja maja niishijia seetanujanaa. ³ Cante Pueyaso panijia saniniunijia, cunoori narta Pueyaso muerasuucua niishiriojquiaa. Cunoori Pueyaso panishano pueyano cutara. Seetanujanaa niishijia cutaraari cuno.

⁴ Juhuanajuajaari maja cua riuuanu nia niishiniu panishano: “¿Maniniatenaari cuno shu pa miaquenu, seru jaara pueya jyanishano pueyasocuaara mosano quiri?” ¿Casaatejaara cuno nojori jyanishano pueyasoni? Paacuajaari niishiyani cuno shipinishano casaari maja saminio. Pueyano shipinishano casaari maja cumaacaraca quijia. Naaratej, nojori jyanishano pueyasoni, cunoori maja seetanujanaa Pueyaso. Niquiriyatu Pueyasoori quiya cutara. Jiyocuaaanu Quijia. Maja socua tamonu quiniu juhua nojuaja. ⁵ Tamasaca pueyari jyaniya queraatia cumaacaraca quijiaacari quiya juhua Pueyaso, jiya cajiniocua, mijiriano. Nojoriiri na jiyatequiaa nojori cojuanara, nojori cumaquiriquianojuhujaj. ⁶ Naajaa, paari niishiyani saa niquiriyatu Pueyasojuaari quiya. Nojuacuajaari pa Que Pueyaso, pa shipininia. Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jyaniiijaari quiyajuhujaj. Cunoori pa Jyaniiija Jesucristo. Na Queeri na shipiniquiaari puetunu na shipinishanojujanaa. Pajaniyajuhujaj, paari rishiyani saaja na cumaquishacari pajaniya.

⁷ Noojiaqueya Pueyaso pueyari saniniuujia jyaniyajaa taucuaa shipinijosano casaari seetanujanaa cumaacaraca quijiaa juhua Pueyasojuhujaj. Nojoriiri najuhuaana sesa niishiriojonuujuaa. Jiyano pueya jaara Pueyaso muerasura quiri, juhuanajuaja maja na niishiniu maninia. Majaari tarijia na niishishano na tarinitianu juhuanajuaja. Naacuajitij, nojori jaara shu miaquere teyanote mosaaree nojori jyanishano cumaacaraca quijiaacuuarani, nojori miaquenu nuhuaji, noojia niquijitoyari. Nojoriiri tama sequeyajaaja: “¡Janiya naasucuaari sesa miirii Pueyaso niquiarani!” Naacuajitij, nojoriiri noojia macuhujatequiaa. ⁸ Pueyanaa, paacuajaari niishiyani, casaa pa miaquequiaani, naajaa. Pa miaquesanoori maja na naata Pueyaso jyanootiniu pajaniya. Cante cuno shu miaqueyaquiquiaani, naajaa, majaari socua maninia pueyanora na quiniu Pueyasora. Naajuhujaj, cante na miaquequiaani, majaari socua sesa pueyanora na quiniujuhujaj. ⁹⁻¹¹ Niaacuajaari jyanohua tiuquiaa Pueyasocua. Naacuajitij, niaa naasucuaari na naata juhujaniya tiuquiniu cuno shu miaquenura nojori jyanishano pueyaso quiquojinia. Niaacuajaari niishiya, cuno, nojori sequesano pueyasoni, majaari seetanujanaa Pueyaso cuno. Naacuajitij, nia naata nocuaa mosano seru miaquenu juhujaniya. Saniniuujia, nia cajishacari cuno miaquenuujajinia, niarta Pueyaso pueyanoori nia niquiniutianiya na pueresano shu miaquenuyano. Na niquishacari najaniya, tamajaaja sequenutianiyari: “¡Jaj! ¡Nojoriqui cuno shu miaquenuyacuaa! Saniriirajataj”. Naa sequetatej, nojuajaari jyaniyajaa cuno miaquesanoori mosaaree seetanujanaa tamonu

cumaacaraca quijiaacuara. Naacuaajitij, na sanishacariuhua cuno shu miaquenu, tama-jaaja noojia macuhuanutaniyari. Naacuaajitij, niaari niarta Pueyaso pueyano sesoya, na niquiara nia miaquesacari cuno shu. Na niqiniuucua niajaniya cuno shu miaquenuyano, nojuajaari cunora na miaquereejuhua. Saniniuuja, nojuajaari juhuanajuaja maja jyanohua Cristoocua tiuuniu na niishiniu. Cristo cutaraari nocuara cusoquiaari, sesa na miishanojiniji na jiyanooshaanura. Niajanitari saniniuuja quiarijia na sesorohuacuhua nia niishishanota. Nocuaji janiyari nia sequeyani, maja socua nia miaquenu cuno shu, cuno shu miaqueyaquijia mariqui na pueresano shu miaquerohuariuhua, na rupuesacari niajaniya. ¹² Nia miaquesacari, niaari na pueresano shu na miaqueteya. Naacuaajitij, noojiaari macuhuanutaniya. Naacuaajitij, niaari sesa miya niarta Pueyaso pueyano. Niaari pa Jiyaniijia Cristo miya sesajuhua, naa nia sesosacari tama na pueyanojuaja. ¹³ ¿Taa nia sequeyani pueyanaa? ¿Maninate shu pa miaquenu, seya jaara taucuaca jyanishano pueyasocuaru puecoosano quiri? Janiya cutaraari maja socua cuno shu cua miaquenu quiniutaniya, cuarta Pueyaso pueyano mariqui sesereeri cua miishanojiniji. Saaja maninia miijacara nia jiyateriquiani, taa cua miiquiaa saaja maniniacuani.

9

Taa quijia Pablo quiquiaarini, Jesucristo jiyaramiquishano na quishacari

¹ Janiya jaara cuno shu miaquenu paniyani, cua naata miaquenu cua panishano. Naajuhuaq cua naata puetunu cua panishanojuanaa miiniu taa cua Jiyaniijia sequequiaari na jiyaramiquishano pueyacuajani. Janiyacuajaari Jesucristo jiyaramiquishanojaaniuhuaq. Seetanujuanaa cua namijiata Jesucristo niqiquiaarinijia. Nojuajaari cua jiyatejiniiaari na jiyaramiquishano cua quiniuria. Naajuhuaq, cua pohuatasacari Jesucristojiniji nia niquiara, niaari na muerasura quiquiaari cua pohuatasanoocua nia tiuushacari. Naacuaajitij niishishiyari janiyari Jesucristo jiyaramiquishanojaaniuhuaq. ² Tamasaca jaara jiyaniya janiya maja Jesucristo jiyaramiquishanoni, naajaa. Niaacuajaari na niishiya. Niaacuajaari Jesucristo jiyaramiquishanoni, naajaa. Naacuajaari nia tojishacari cua pohuatasano nojuajiniji. Naacuajitij, niaacuajaari niishiya janiyari Jesucristo jiyaramiquishanoni. Na jiyaramiquishano cua quiniuucua, cua naata miiniujuhuaq taa cuarta Jesu jiyaramiquishano pueya miiquiaacuani.

³ Tamonu jaara cua nequesoreere taa cua miiquiaani, janiyari saaja naa na riu-cuaquiaani: ⁴ “Pueyasoori sequequiaari, na jiyaramiquishano pueya cuaara niqitiosaarria na miaquesocoriqiani”. Naaratej, canaa jaara naa miiniu paniriquiani, canaa maara nia sequereni canaa nia niqitiojonura canaa panishano. Naajaa, majaari canaa masenu quiquiaa canaa panishano niajanijajiniji, janiya, Bernabeenio. ⁵ Naajuhuaq, canaa jaara niquiocuaraca quiriqiani, canaa maara canaa niquiocua rupojoriquia canaacuani, taa cuarta Jesucristo jiyaramiquishano pueya miiquiaacuani. Pa Jiyaniijia Jesu tapueyocuaari nia miiquiaajuhuaq. Pedrojuanaari necocuata rucuanajo-quiiaajuhuaq, Jesucristo rupaa na poojotasacari. Naajaa, majaari naa canaa miiniu quiquiaaquij. ⁶ Jesucristoori sequequiaarijuhuaq: “Cua jiyaramiquishano pueya cuaara niqitiosaarria cumaneeca, na panishano nojori masetajara”. ¿Niaateeri jiyaniya cuno sequesano maja quiria, maja Bernabeerajuhuaq? ¿Cunocuaajari naa sequesaaquiaari canaarajuhuaq! Naaratej, canaa jaara naa paniriquiani, canaa maara canaa panishano masere niajanijajiniji, canaa niishitiojonuucua niajaniya. Naajaa, canaari tama canaa juashiquiatajaaja poonijioquiaani, canaa panishano canaa masetajara.

⁷ ¿Soldadoteeri tamonu poonijosano jitiata, na miaquesano na masetajara? ¡Maja! Soldadohua jiyaniijiaari na niqitiojua puetunu na miaquesanojuanaa. ¿Pueyanoteeri na cuhuariquia nataja najuhuanaj? ¡Maja! Na nuhujia na natau mianutaniyari na poonijosanojiniji. ¿Majateeri seru juunu camaru ratunu na seru quitiaaca, jaara na paniri? ¡Taaquiririnij! Na ratuyacuaaquiniatejaj. ¿Maatucua casaara najuhuaa seesaareerini? ¿Canaarjijiataj? Canaa jaara na paniriquiani, canaa naata nia masenu canaa panishano niajanijajiniji. Naajaa, majaari canaa mashiniquijionu quiquiaa quenaaja canaa panishano niajanijajiniji. Canaari nareja poonijioquiaa tama canaa juashiquiatajanijia, Jesucristo rupaa canaa pohuatasacari niajaniya.

⁸ Nio cua pohuatasano niajaniani, majaari tama canaa niishirijosanojuaja. Nio niishitiosanoori tariucuaaanu Pueyaso Rupaa naajiosanojinia quiyajuhuaq, taa cua sequeriquiaacuajani. ⁹ Supuetana Moisés caminiujuushano Pueyasojinijiiri naa naajio-tasaquiaaritij:

“Maja quia juunu rupaa quia seecutanu maja na miaquenura quia carojotasano, quiaa jaara na rapijioteya na coreetanura”.

¿Pueyasoteeri saa juyacaacua niishiriojoriquiaajaa naa na sequenuratej? ¡Maja!
¹⁰ Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijionaani, na niishitiojosano pueya cuaara nojori niqutiojoora na panishano. ¿Taa nia sequeyani? ¿Pueyanote shuquiriaatia cuhuataja na cuhuariquiara? Taaquiririinj. Na camaruuri niishiya na poonijiosanojiniji mianutaniya na nuhuajiiri. ¿Majateeri pueyano carojotanu shuquiriaatia na natajuhuaj? Jaa. Niishiyacuajaari na mianutanitari. ¹¹ Naajaa, niaata cua quishacari, canaari naa poonijioriquiaa Pueyasorani, nioojiaca canaa cumaquiniuria maninia. Naacuajitij, canaa cuaara niqutiojosaaria saniniuuja canaa panishano. Naajaa, majaari canaa paniniu canaa panishano nia niqutionura canaa. ¹² Tamasaca pueya niishitiojosacari nijaniya, niaa cutaraari nojori niqutiojoquiaa nojori panishano. Canaari saniya coteenujuanaa pohuataquiiaari Jesucristo rupaa nijaniyani. ¿Majateeri coteenu canaa niqutioosaanu canaa panishanojuhuaj? Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa panishano. Canaa jiitiaaquishacari canaa panishano, canaari sanaa rejeretaja saajani. Majaari canaa taajetenu paniniu quijia nijaniya, canaa jiitiaaquishacari canaa panishano. Canaari naa miiquiaaritij, niaa mariqui Jesucristo rupaa tojinu paniyaquiriiri canaa taajetesacari nijaniya, pueyaracaanu canaa mashiniquijosacari canaa panishano nijaniyajiniji.

¹³ Niaacuajaari niishiyajuhuj, Jerusalén tiacajinia Pueyaso Secojoua tiajinia, cuarta Judocuaca miaquesocoriquianoori puecoosaquiaa Pueyasocuara, taa Pueyaso rootaquiiaari canaa supuetanaacuajani. ¿Niaateeri niishiyaquiyajuhuj, shu camaruuri secojouiinia poonijionaa niqutioquiaa nojori miaquesocoriquianojuhuaj? Naacuajitij, Pueyaso secojoui tiajinia poonijionaari miaquesanoraca quiquiaajuhuj. ¹⁴ Pa Jiyaniijia Jesucristoori na rupaa pohuatanaara naa sequequiaarijuhuj: “Cua rupaa pohuatanaa cuaara niqutiojosaaria na panishano pueyaracaanu”. ¹⁵ Naacuajitij, cua naata puetunu na panishanojuanaa sequenu nia niqutiojonura janiya, juhuajaniya cua quiniuria, taa cuarta Jesucristo jiyaramiquishano pueya miiquiaacuaani. Naajaa, majaari cua masenu quijia nijaniya cua panishano cua masetajara. Niaa naasucuaari jiyaniya janiyari quiarijia niaacuara naajioree nioni, cua shiniujuniuria nijaniya nia niqutiojonura janiya cua panishano. ¡Maja! Majaari cua paniniu nia niqutionura janiya cua panishano. Janiya jaara titiaare cua miaajenutani, naajaa. Janiyari tama cua juashiquiatajaaja poonijionu paniyani. Jesucristo rupaa nia tojitianura, cua panishano cua maseyaquiniutia nijaniyajiniji. Naacuajitij, janiyari tamajaaja shuquiriaatia quiya Pueyaso niquarani.

¹⁶ Cua tojitianaa jaara niqutiore janiya cua panishano, maja cua naata shuquiriaatia quiniu tamajaaja, cua pohuatasacari Jesucristo rupaa. Janiya jaara pohuataaquiri Jesucristo rupaani, cua Jiyaniijia mariqui cua saniitioreeri cua tojiyaquiniuuca nojuaja. Cua pohuatasacari na rupaa, janiyari saaja na tojiyani. Nojuacuajaari cua jiyaroquiiaari na rupaa cua pohuatanura. Cunoori maja tama cua niishiriojosano cua miiniurijaaja. ¹⁷ Majaari cua sequenu quiquiaari cua Jiyaniijia: “Cua Jiyaniijianaa, quia rupaa pohuatareera quiajanijara”. Janiya jaara naa na sequequiaarini, cua Jiyaniijia maara cua niqutiore cua poonijiosanojiniji nera, na shuquiritasacari janiya. Saniniuuja, tama na panishacarijiaaja cua Jiyaniijianaacuajaari cua jiyaroquiiaari na rupaa cua pohuatanura. Cunora, majaari cua naata na tarijionu. Janiyacuajaari na seruni. ¹⁸ Naacuajitij, ¿taa cua miya socuani, cua Jiyaniijia cua shuquiritiniuria socuani? Naa miiquiaacuajanijia, nareja poonijioquiaanijia tama cua juashiquiatajaaja cua panishano cua jiitianura, na rupaa cua pohuatasacari. Naaratej, majaari cua sequenu quiquiaa cua tojitianaa, nojori niqutiojonura janiya cua panishano. Jesucristocuaajari sequequiaari na rupaa pohuataanaa cuaara niqutioosaaria na panishano. Naajaa, majaari naa cua sequenu quiquiaa nijaniya. Naacuajiti cua naata pa Jiyaniijia shuquiritini socua, cua pohuatasacari na rupaa cua maseyaquishacari cua panishano cua tojitianaajiniji. Naacuajitij, janiyari shuquiriaatia pohuataquiaa Pueyaso rupaa pa Jiyaniijiarani.

¹⁹ Majaari pueya niqutionu quiquiaa janiya na jiitiasanojiniji cua niishitiojonuucua nojori. Naacuajitij, janiyari maja juhua nojori seruni. Pueyanoori maja cua jiyarana. Naajaa, janiyari tama cua cuaqueyajaaja jiyatequiiaari juhua puetunu pueya serujuanaa cua quiniuriani, socua pueya quiniuria pa Jiyaniijia Jesucristo tojitianaara. ²⁰ Jesucristo rupaa cua pohuatasacari cuarta Judocuaca niqiuara, janiyari juhua Judio pueyanora quiquiaani. Janiyari naa miiquiaani nojori mariqui cua tojiyaquiriiri, janiya jaara juhua tahue quiri nojori niquliarani. Naacuajitij, socua Judocuacaari Jesucristo rupaa tojitiaa. Jesucristoocua cua tiuushacari, janiyari maja socua cua quiniu juhua cua supuetanaa Judocuaca rootasano tojijia. Naajaa, na tojiquiaajaanijia cua quishacari cuarta Judocuacata, noo pojoritiatej cante cuno rootasano tojitiaaani. Naacuajitij, cua quishacari juhua nojori, nojoriiri socua cua tojitiaa cua pohuatasacari Jesucristojiniji. ²¹ Naajuhuj, cua

quishacari tamasaca pueyata, janiyari juhua nojori quiquiaani, nojori tojiniuria maninia janiya. Nojoriiri maja Judiocuaca supuetanaa rootasano tojiniu niishiniu. Naaratej, janiyari na tojiaquiquiaajuhua, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia quijia quiri nojori niquiarani. Naajaa, Pueyaso rootasano tojiquiaa pueyaracaanu cutaranijia. Naajuhua, puetunu Jesucristo niishitiojosojuanaa tojiquiaanijia. ²² Noojiaqueya Pueyaso muerasuuri maja na naata tarinitianu najuhuana na supuetanaa rootasano. Cuaara tarinitiaara najuhuana na supuetanaa rootasano. Naajaa, janiyari mariyata cuno najuhuana rootasano tojiquiaajuhua nojoritia cua quishacari. Nojori jyanishacari tamonu casaa sesa quiya, janiyari mariyata maja cua miiniu nojori pueresano casaa. Naacujitij, cua naata nojori cumaquiniu maninia Pueyaso rupaata, nojori tojtiasacari janiya, juhua nojori cua quishacari. ²³ Janiyari puetunu naa miiquiaajanaani, socua pueya cua tojtiniuria Jesucristo rupaa. Naa maninia poonijioquiaa cua Jiyaniijaranijia, cua masenura puetunu maninia na sequesanojuanaa na maserasura.

²⁴ Niaacuajaari niishiya taa pueya tacuarishiyajoquiaacuajani. Pueya netecuatusacari, puetunu pueyajanaari jyanohua netecuatujuu jaarajaaja. Cante narta netecuatusanaa shocotajani, shanohua casaa niqutioshiyari. Ritiuquua pueyanoori jyanohua shuquiriaatia quijia na shocotanjini na masacari casaa. Naajuhua pueyanaa, jyanohua nia poonijiore Pueyasora mijiria, shuquiriaatia nia masenura nia poonijosanojiniji na jitasanojiniji jiyocuacaanu. ²⁵ Naajuhua, pueya jaara tacuarishijionu paniri, cante shocotanu paniani, cuno pueyanoori puetunu najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniniuujia, na masesano na shocotanuucuanu, cunoori saaja shanohua nacaque jaamasujiniji shitasano. Majaari na rishiniu. Pajaniyari saniniuujia pueyaracaanu shuquiriaatia quiniutianiyani Pueyaso niqutiosanota pajaniya, paa jaara maninia miiri mijiria pa quishacari. Naaratej, pa tarinitiare puetunu najuhuana tama pa miiniu panishanojuanaa, pa shuqiritiniuria pa Pueyaso.

²⁶ Pueya netecuatusacari, netecuatusanaa cuaara niishiiria tee netenu puequeetu quiyani. Majaari najuhuana na camaruncneejonu. Naajuhua, cua poonijosacari Pueyasora, majaari cua niqijiotenu cojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhua, pa cartere najuhuana pa miijosano. Saaja pa niishiriojore Pueyasocua, maninia pa tojiniuria nojuaja. ²⁷ Janiyari jyanohua saniniuujia quiquiaa maja cua miiniuria tama cua cuaqueya miiniu panishanojuajani. Janiyari cua cuaqueya jiyartuutenu paniquiaani saa Pueyaso cua tojiniuraja. Janiyari tari queraatia pueya niishitiojoquiaari Pueyaso rupaani. Janiya jaara tama cua niishitiojosanojuaja tojiaquirini, Pueyaso mariqui cua cartereeri, maja na rupaa cua pohuatanura socua.

10

Supuetanaa Israel pueya miishanoori pajaniyara naajiotasaaquiaari pa niishiniuria maninia

¹ Cuarta Pueyaso pueyanaa, nia niishiri taa pa supuetanaa Judiocuaca miishaquiaricuaani nojori rucuanijosacari pueyaracaanu cariquia jiyajinia. Majaari nia niyajetanu niaa mariqui Pueyaso tojijashijara quiriohuajuhua. Nojori mashishacari Egipto jiyajiniji, Pueyasoori cohuaja najaca shipiniquiaari nojori na cojuanura, nojori puetariquianojuhua. Pueyasoori puereetuca shoniniacu caminia raquitiaquiaari nojori nuura caminia cajiniocua. Naacujitij, puetunu pueyajanaari niutiiaquiaari joojuashiquio. ² Naaratej, puetunu nojorijanaari juhua Moisés muerasura jiyatesaaquiaari, nojori nuhuajishacari Moisés puereetuca caminia tajiniaaco, cohuaja najaca cariquiano. Majaari socua na quituiniu quiquiaari Egipto pueya seya. ³ Puetunu nojorijanaari jiya cajiniocuaji casaa miaquenuujua, Pueyaso tinishano nojori miaquesocoriquiano pueyaracaanu cuno cariquia jiyajinia nojori rucuanijosacari. ⁴ Naajuhua, nojori jiyamuetusacari, Pueyasoori mohuaca pojuartaniquiaari saajiajiniji. Puetunu pueyajanaari cuno mohuaca ratuquiaari. Pueyasoori cuno saajiajiniji naa raatequiaari nojoritij, na niishitiojonura cuno pueya, nojuajaari nojori nuhuajiriquiaa jiyasohuaja, pueyaracaanu nojori na cojuanura. ¡Nojuacuajaari pa Jiyaniijia Cristo quiquiaari! ⁵ Puetunu cuno supuetanaa Israel pueyajanaari naa maninia cojuasano quiquiaari cariquia jiyajinia. Naajaa, quera puetunu nojorijanaari Pueyaso tojtiaashijia quiquiaari saaja. Pueyasoori cunora nojori shuqiritiaaquiquiaari. Naaratej nojori cusojuanuuriquiaari cuno cariquia jiyajinia nojori camaruncunetasacari pueyaracaanu, cuaara puequequiaarijiaatijia puetunu cuno tojijashijiacajanaa.

⁶ Naa miishaaquiaariti cua supuetanaa Judiocuaca, sesa casaacua nojori jiaatianuucua. Nojorijiniiri puetunu naajiotasaaquiaarijanaa pajaniyara, pa niishiniuria maja sesa casaacua pa jiaatianurajuhua. ⁷ Shushajanaa nojori cotesacari rucuanenu cariiquia jiyaco, noojiaqueya nojorijiniiniori caapiqui casaa shipiniquiaari orojiniji juhua juunu niquisano. Nojoriiri tama nojori shipinijosano casaajaaja sequequiaari: “Nioori pa Pueyashohua, pa mashiquiniaa Egipto jiyajinia pa camarucuaacujaji”. Naacujitij, nojoriiri na shipinishano casaa shuquiritiaquiaari sacuaraatia. Jiyacari nojori miishanoori naa naajiotasaaquiaariti:

“Pueyari cajitiriiri queranacunura. Na nuhuaji, nujuatuquiaariiri na shipinishano juyaca tacoji na jiareyocuatunura. Socua sacuaraatia casaa miitiquiaariiri”.

¡Maja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

⁸ Na nuhuaji, tamacari, noojiaqueya nojorijiniiniori sesa miiquiaari taaturitia, cararaatia taucua miishacari nojori shuquirishacari na shipinishano casaa tacoji. Pueyasoori nocuaji naa sequequiaari: “¡Cuaara puecoosaaria cuno sesa miijica!” Cunora, veintitres mil Judiocuacaari puecoosaaquiaari cuno juuca. Cunojiniji pa niishiri maja pa miiniuria sesajuhua, taa nojori miiquiaaricuaa taaturitiani.

⁹ Na nuhuaji, noojiaqueya nojorijiniiniori Pueyasota juaaquoquiaari, tamonu mi-aguesanoocua nojori jiaatiasacari, puera nojori jishacari nojori miaguesano. Nocujaji Pueyasoori sacocua satejoquiaari cuno pueya. Queraatia pueyari cusonuquiaari. Naaratej pueyanaa, maja cumaati pa juaaniu, Pueyaso jaara pa saniniujiuri. Maja naa pa miiniutij paa mariqui Pueyaso juaatiriiri.

¹⁰ Tamacari, noojiaqueya cuno pueyajiniiniori Moisésta juayonutaquiaari. Moiséscajaari nojori jitianara Pueyaso jiyatesano quiquiaari. Nocujaji Pueyasoori na seru jiyaroquiaari cuno juaajica na cusojuanura. Queraatia pueyari cusonuquiaari jiyacari. Naaratej pueyanaa, majaari pa juaatianu pa jyanijianucua.

¹¹ Puetunu pa supuetanaajiniji naajiotasanojuanaari tariucuaaanu naajiotasaaquiaari, pa numootesaanura quiarijiani, quera pa Jyanijia muetasacariuhua. ¹² Naaratej pueyanaa, tama nia cuaqueyajaaja nia cojuare nia jyanishacari niaari Pueyaso tojjia seetanu cutarajanaa, niaa mariqui sesa miiriiri, juhuajaniya nia quishacari tamajaaja. ¹³ Niaari mariyata saniniujushaaquiaajuhua, taa puetunu parta Pueyaso pueyajanaa saniniujushaaquiaacuaani. Naajaa, nia naata Pueyasocua tiunuu maja puera nia saniniujushaanura. Pueyasocujaaari niishiya taate nia naata rejeretanuni. Majaari puera pa saniniujushaanu quiniutianiya. Pueyasocua nia niishitiojore taate nia naata cartesano quiniuhuaani taraatia nia miiniuucujaji. Naacujiti pa naata rejeretanu, Pueyaso jaara Sesaaca saniniujutiri pajaniya.

Maja pa cojiniiu tamasaca, na miaquenuusacari na jyanitiushano na pueyasocuuara na puecootusano

¹⁴ Cua panishano Pueyaso muerasunaa, maja nia tiuquitianu tamasaca pueya jyanitiushano pueyaso quiquiojinia, na tojtianaa nia cojinioria, nojori shuquiritiasacari juaashiquiata shipinishano casaa Pueyaso niti. Maja nojori cojiniiu, niaa mariqui sanitiosaareeri. ¹⁵ Niaacuajaari niishijiaca. Naaratej, nia niishitiojore cua sequesanoocua.

¹⁶ Paa jaara rerejore pa Jyanijia cusonu juuca pa niishiniuriani, pa ratunu panishacari, paari sequequiaani: “Paacarasho canaa Jyanijijanaa, quia nanacaari puetunu canaacuarajanaa shooquiaari”. Naa pa ratuacari cuarta Pueyaso muerasunaa, puetunu pajaniyajanaari pa Jyanijia rupuesano quiquiaani, na nanaca shoonuucua puetunu pocuarajanaa. Naajuhua, pa miaguesacari, paari sequequiaani: “Canaa Jyanijijanaa, quiaari quia cuaqueya nootnequequiaari puetunu canaacuarajanaa”. Naa pa miaguesacari, puetunu pajaniyajanaari jatiqui pa Jyanijia cojiquiaani, na cuaqueya cusonuucua pocuara. ¹⁷ Cuno pan pa miaguesacari, puetunu pajaniyajanaari niquiriyatu panjiniji neecasequiaani. Naacujitij, paari niishiyani puetunu pajaniyajanaari rupuetoono quiya pa Jyanijiatani, juhua niquiriyatu cuaqueyaja.

¹⁸ Nia niishitiojoriquiaa taa Israel pueya miiquiaacuaani. Nojori miaguesacari Pueyasocuuara na mosano Pueyaso niquiara, na niti nojori mosano seruuri juhua tama nojorijiaaja, Pueyaso jyanooniuria nojori. Naacujitij, nojoriiri na naata Pueyaso rupueno, nojori secojonura nojuaja. ¹⁹ Jaara naa quiritij, ¿taateerini, pueya jaara shipinijosano casaacuara mosano shu miaguere? ¿Casaate pueya jyanishano pueyasocuuara mosano shuni? Nareja shucujaaari. ¿Cumaacaraca quijiate cuno, pueya shipinishano casaa juhua Pueyasorani? ¡Maja! ²⁰ Naajaa, nia tojtiare casaa cua sequenutaniyani. ¡Pueyaso niishiyashijiaca pueyari na miaguesocoriquiano na seya puecooquiaa samarhuacuara! Naa nojori miishanoniquitij, cunoori maja Pueyasora. Naacujitij, nojoriiri samaruhua rupuequiaa,

maja Pueyaso. ¡Majaari cua paniniu nia rupuenura samaruhua! Nocuaji, maja Pueyaso niishiyashijiaca nia cojiniu cuno shu nia miaquenura. ²¹ Majaari pa naata pa Jiyaniijia rupuetoonu, samarhuata pa rupuetosacarijihuhaj. ¿Pueyasote samarhuata cojitishiya? Pa Jiyaniijia cusonu juuca pa niishiniuria, ¿paateeri na sequesano miaquenutaniyani, samarhuacuara mosano casaajuhuj? ¿Cojitishiyaate? ¡Maja pueyanaa! ²² ¿Paateeri pa Jiyaniijia paraca cojiniu panyani, pa Jiyaniijia pa juaatiniuriani? ¿Pajaniyate socua cumueeca pa Jiyaniijiajinijini? ¿Majateeri nia puerenu pa Jiyaniijia saniitionu?

Taa pa miiniutianiyani

²³ Tari sequereecuajaniijia, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquiniu quiniutianiya parta Pueyaso pueya. ²⁴ Naaratej, majaari pa niishiriojonu saaja maninia pa quiniuria tamajaaja. Pa niishiriojore parta pueyacu, maninia nojori quiniuriahuhaj. ²⁵⁻²⁶ Seetanujuanaari nio naajiosano: “Nio jiyari pa Jiyaniijia jiya, puetunu tii quijia casaajanaanio”. Naaratej, niaa jaara shu masere shu niqitiojosaquiji cumaneecata, majaari nia nequesotanu: “¿Nio shujiyo casaacuara mosano?” Maja naa nia nequesotanutej. Nia panishano nia masere nareja, nia miaquesocoriquiano juhuajaniya. Pa Jiyaniijia shipinishanocuaajaari. Pa miaquesanoori maja na naata na sesonu pajaniya Pueyasora.

²⁷ Pueyaso niishiyashijia jaara nia masuure nata nia miaquenura, nia quiaare, niaa jaara quianu paniri. Juhujaniya nia miaguere na rupojosano niaara. Majaari nia nequesotanunoj: “¿Nio shuti casaacuara mosaarucuaa?” Majaari naa nia nequesotanu niaa mariqui nioojia macuhujareteri niaa jaara niishiri nia miaquesanoori shipinishano casaacuara mosano juhua Pueyasocuaari. Juhujaniya nia miaguere nareja. Puetunujuanaari pa Jiyaniijia shipinishanocuaaja. ²⁸ Saniniuujia, nia cojinia jaara numootere nijaniya: “Nio shuuri mosaaree shipinishano casaacuara juhua Pueyasocuaara”, majaari nia miaquenunoj, niaa jaara naa sequesaaere. Maja nia miaquenunoj, nia cojinia mariqui na miaguerejariuhuj na cojishacari nijaniya. Nia tarajana jiyoteeri jiyaniyajaa cuno shipinishano casaari seetanujuanaa cumaacaraca quijia. Naacuajitij, na miaquesacari nocuara mosano shu, noojia macuhujanutaniyari. ²⁹ Majaari nio cua sequenu niaara. Niaacuajaari tari niishiya nia naata cuno shu miaquenu. Nia sequeya nio cutaraniijia nia cojiniaa pueyara, maja nia miaquenura cuno shu nojori niquiara, nia cojinia mariqui noojia macuhujareteri cuno shu na miaquesacari niaata.

Niaa naasucuaari cua nequesotanu paniya: “¿Paatucua pa panishano shu miaqueyaquirini saaja tamonu pueyano pueresacari pa miaquenu panishano shu? ³⁰ Paa jaara Pueyaso sequerene ‘paacarasho’ cuno sumaturani, ¿majateeri maninia pa miaquenura? ¿Tamasacatucua casaara pa sesacare cuno miaquesano pa miaquesacari?” ³¹ Cua tojitiare quenaaja cuarta Pueyaso muerasunaa. Nia miaquesacari, nia ratusacari, casaa nia miishacarinio, pueyaracaanu puetunu maninia nia miirijianaa Pueyaso nia shuquiritiniuria. ³² Puetunu nia miishanojuanaa cuara quiri maninia Judiocuaca niquiara, taucuaca niquiarajuhuj, parta Pueyaso pueya niquiaranio. Jiyanohua taraatia cutaraari, pueya jaara tojiyaquiya Pueyaso, juhuajaniya pa miishacari nojori jiyantiushano sacuraatia casaa. ³³ Naaratej, janiyari pueyaracaanu maninia miiniu paniquiaa puetunu pueya niquiarajanaani, nojori cuara tojitiaara Pueyaso, Pueyaso pueyara nojori jiyatesaanura. Majaari cua niishiriojonu tama cua panishanojuaja cua miiniuria. Janiyari socua niishiriojoquiaa tamasaacuani, maninia cua miiniuria nojori niquiara.

11

¹ Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuani, juhua nojuaja cua quiniuria. Mijiria na quishacari, nojuacuajaari pueyaracaanu maninia miiquiaari pueyacuua.

Maajipohuatucua taa quiriquiani Pueyaso pueya rerejosacari

² Cuarta Jesuucua tiunuaanaa, janiyari nia shuquiritiiani, pueyaracaanu nia niishacari janiya, naajuhuj, maninia nia tojitiyacari puetunu cua niishitiojosanojuanaa Pueyasojiniji. ³ Janiyari paniya cutarani socua nio nia niishiniuria: Cristocuaajaari caya camarnu. Cayari saniniuujia necocua camarnu, taa pa Que Pueyaso pa Jiyaniijia Cristo camarnu quiyacuani. ⁴⁻⁵ Naaratej, nia secojosacari Pueyaso, nia caminiuujishacari Pueyaso sequenu panishano Pueyaso pueya maanu niquiarajuhuj, jiyacaritij, canuu cuara jocuara na nacaque na pocuasacari. Saniniuujia, maajipohua pocuanura, nojori cuara mishiquioora na naca toquerauta. Cararaatia cutaraari caya jaara pocuare Pueyasora, Pueyasotajuhuj, na naca mishiquiosano. Cararaatiaariuhuj, maaji pocuasacari Pueyasota, Pueyasoranio, na naca mishiquiosoo. Maaji jaara caririquiyashijia quiri,

¿casaara na naca na tuquetyaquiya puetunujuanaacuaraarini? ¿Maajiti juhua cayara quiniu paniya? Maja naasucua. ⁶ Maaji jaara na naca mishiquionu paniyaquiri pueya niqiuara na pocuanura Pueyasora, Pueyaso na secojonuranio, cuno tojiyashijia cuara tuqueteera na naca. ¿Cararaatiatee, maaji jaara na naca tuquesano quiri juhua caya? Taaquiririni. Cararaatia quiyajaarihuaj, na secojosacari Pueyaso, na caminiujiushacari Pueyaso sequenu juhua Pueyaso na quiniuria, Pueyaso shipinishano casami camarnura na quiniurijahuaj. Cayari Pueyaso shuquiritiya Pueyaso tojjia na quishacari. Naaratej, maaji cuara mishiquioora na naca na secojosacari Pueyaso, pueya niqiuara, maja neyaca na rerequetenura. Canuuri shipinishaquaaari juhua Pueyaso na quiniuria, Pueyaso shipinishano casami camarnura na quiniurijahuaj. Cayari Pueyaso shuquiritiya Pueyaso tojjia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyasojuhuaj.

⁸ Pueyaso jaara coteenujuanaa caya shipiniquiaari, majaari maajijiniji na shipiniu quiquiaari caya. Maaji cutaraari caya riuquiocujiniji shipinishaquaaari. ⁹ Naacuajitij, maajiiri cayara shipinishaquaaari. Majaari caya shipinishaanu quiquiaari maajiria. Naaratej, maaji cuara caya tojjia cutara. ¹⁰ Naacuajitij, maaji secojosacari Pueyaso, na caminiujiushacari Pueyaso sequenu panishano pueya niqiuara, cuno maaji cuara mishiquioora na naca. Naacuajitij, pueyari niishiniutianiya cuno maajiiri maja neyaca rerequeteja. Naa maninia quiya Pueyaso seya niquiarajaarihuaj. ¹¹ Naajaa, puetunu pajaniyajanaari mariyata Pueyaso muerasuni, Jesucristoocua pa tiuushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiiri maja na naata tamajaaja supueno cayaju. Naajuhua, cayari maja na naata supueno tamajaaja maajijiu. ¹² Seetanujuanaari, maajiiri coteenu shipinishaquaaari caya cuaqueyajiniji. Na nuhuaji, puetunu canujujanaari saniniujuia supuequiaa maajijiniji. Naajaa, puetunu pajaniyajanaari Pueyasojiniji supuequiaani. Naacuajitij, caya, maajinio, nojoriiri mariyata panishano pa naacutoojonura.

¹³ ¿Taa nia sequeyani pueyanaa? ¿Maniniateeri, maaji jaara Pueyaso secojore na naca mishiquioosoo pueya niqiuara? Maja maninia. ¹⁴ Naajuhua, quera puetunu pueyajanaari sequeja, cararaatia niquishanoori caya jaara tucuumuejaru quiya juhua maaji. ¹⁵ ¿Maajiirijiataj? Jaara tucuumuejaru quiri, cunoori maninia niquishano cutara. Pueyasoori naa maninia shipiniquiaari maaji, tucuumuejaru na quiniuria, na naca mishiquioriquiano na muecacata. ¹⁶ Tamonu jaara naacoonu paniyajaa socua pa muesujiniji, niocua na sequere: “Pablocuajaari tari pa niishitiojore puetunu na niishishanojuanaa. Naajuhua, puetunu Pueyaso pueya maapejanaari tamaquiciaa naa miiquiaa taa Pablo pohuataree pajaniyacuaajani. Majaari socua pa niishiniu tamaatia quiniu”. Niojuanaari cua rootasano cunojiniji, pueyanaa.

Corinto pueyari sesa miiquiaari na miaquenuujuajinia, pa Jiyaniijia cusonu nojori niishishacari

¹⁷ Cuarta Jesuucua tiuuniaanaa, nio, janiya niaacuara na naajiyani, nioori maja cua shuquiritianura niajanija. Nia rerejosacari pa Jiyaniijia cusosacari nia niishiniuria, niaanaari saaja sesa miiquiaa. Nia rerejonuni, cunoori nia cumaquitioonura juucua. Nia rerejosacari saniniujuia, niaari saaja socua seseyaree. ¹⁸ Janiyari naa pohuataaarucuaa niajanijajiniji: “Corinto pueyari sesa na niishiriojonuta nojori jiuujiajinia raquirijitiquiaa nojori rerejosacari”. ¿Seetanujanaa nio pohuatasano niajanijajiniji? Naa naasucua. ¿Casaate cua toyani? ¹⁹⁻²⁰ Seetanu naasucujanaa niaari nioojiajinia naa niaaquejoquiaaquij. Paacuajaari tari niishiquiaarini noojiaqueya pueyari Pueyaso pueya maapeecuaji rupanenutaniya. Naa niishishanote canaputeje maja Pueyaso muerasuni. Cante seetanujuanaa Pueyasocua tiujiani, majaari na rupatenu quiniutianiya narta Pueyaso muerasuucua. Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyaniijia cusonu nia niishiniuria, maja sesa nia niishiriojonu juhua niaaquejono nia quiniuria. Naa jaara naa niaaquejoriquiatej, majaari pa Jiyaniijia cusonu nia niishiniu quiquiaa seetanujuanaa. ²¹ Nianianianaari tama nia patasanojuaja coteetaquiaa miaquenu. Niaanaari nia miaquesano serotaaquiquiaa. Naacuajitij, casamijuniucuaanaari miaajecoquiaacujua. ¿Saniniujuia casamiriicanaari juhuajaniya mashaasequenuquiaacujua! ²² ¿Jianohua cararaatiaari naa nia miishanotej! Naa jaara naa jamuejaca quiriquiatej, ¿majate nia naata tama nia tiajiniajaaja nia miaquenuunu, ratunonio? ¿Niaateeri niarta Pueyaso muerasu sooquiaa? Naa nia miishacari casamijuniucuatej, niaacuajaari nojori cararocuaa, casamijuniucua nojori quiniucua. ¿Taa nia sequeyani pueyanaa? ¿Janiyate nia maniniuhuaqueetaani? ¿Majal Jyanohua tacayanijia. Majaari cunora cua shuquiritianu niajanija.

Pa Jiyaniijia rootasano na cusunu pa niishiniuria

²³ Janiyacuajaari nia rootacanu tari pa Jiyaniijia Jesu pohuatasano janiyani, taa na miaquequiaari na saquiriojosano pueyatani. Cuno niucuaaja, Judasri pa Jiyaniijia quiateriquiano quiriquiaa taucuaca mosocoriquiano. Cua tojtitarohuacuara pueyanaa. ²⁴ Judas quiateyaquishacarijia nojuaja, pa Jiyaniijia Jesucristoori pan riquiaari. Na Que Pueyaso sequereeri: “Paacarasho cua Quenaa”. Na nuhuaji, na neecaserohuari na serotanura na pueya. Nojori sequereeri: “Nioori cua cuaqueya, niaacuara cua panitiaca nia jiyanooshanura. Nia miaquere. Niocua naa miiriquia pueyaracaanutej, nia niishiniuria cua miishano niaacuara”.

²⁵ Naajuhuaaj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secorejereeri. Na nuhuaji, na pueya sequerohuari: “Pueyaracaanu nia ratusacari nio, nia niishiriquia, cua Queeri cua nanaca seera nia jiyanooquiaa, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanooshanura juucua. Janiya cutaraari nia niti mosaanutaniyani”. Pa Jiyaniijiaari naa sequequiaari. ²⁶ Naa nia miaquesacaritij, nia ratusacarijuhuaj, pueyari niishiniutaniya niaari Pueyaso jiyanooshano pueya, pa Jiyaniijia Jesu cusonuucua pa niti. Naa nia miaqueriquia pueyaracaanu na sequesano pan, pa Jiyaniijia cuara tiuquiriohuajaatjia.

Nia niishiri taate pa naata miaquenu pa Jiyaniijia cusunu pa niishiniuria

²⁷ Naaratej, niaa jaara sesa miiri, Pueyaso nia secoreje ritia na jiyanooniuhuara nijaniya, nia miaquenuhuara pa Jiyaniijia cusunu nia niishiniuria. Niaa jaara pa Jiyaniijia pan miaquere jiyanooshoo nia quishacarijia, niaa jaara na cusunu mashacaturate jiyanooshoo nia quishacarijuhuaj, niaari na cusunu rerequeteya! Niaari juhua sequeruhua, pa Jiyaniijia najuhuaana cusoquiaari. Naa nia miishacaritij, niaa cutaraari saniitiosaanutaniya.

²⁸ Naaratej, tama nioojajiniaajaaja nia niishiriojore taa nia quiquiaani, casaa nia miqiuani sesani. Naa nia miiri coteenu, niaa mariqui sesa nia miishano miaquetareeri Pueyaso jiyanoaquiashacarijia nijaniya. Naa nia miiniu nuhuajitij, niocua shuquiriaatia juhuajaniya miaquerohua pa Jiyaniijia pan. Niocua juhuajaniya raturohua pa Jiyaniijia raatonuquejiniji cutara. ²⁹ Cante juhuajaniya miaquereeni, cante juhuajaniya ratoree najuhuanani, jiyanooshoo na quishacarijia, cuno pueyanoori Pueyaso saniitiotenutaniya tama na cuaqueyajaaja. ³⁰ Naacuajitij, jiyanooshoo nia quishacarijia nia miaquesacari, queraatia nijaniyajinijinioori cunora cusosuhua quiya. Noojiaqueya nijaniyajinijinio cutaraari tari cusonuucanujuhuaaj, Pueyaso saniitiosacari nojori. ³¹ Nocujaji tama nia cuaqueyajaaja nia jeeicare suraatia, pa Jiyaniijia mariqui saniniuujia nia saniitoreeri. ³² Pa Jiyaniijia jaara pa saniniuujuri, canapueete sesa quiyani, Pueyasoori na saniitioquiaa na muerasu nojori quiniucua, maninia nojori quiniuhuara juhua maninia na muerasu. Naacuajitij, juhuacarijia na saniitiosacari na muerasu, majaari pa saniitiosaanu quiniutianiya na ruuretajacata jiya puequesacari, Pueyaso jaqueroosacari na tojijashijiaa.

³³ Naaratej cuarta Jesuucua tiuuniaanaa, niaa jaara pa Jiyaniijia pan sanu paniriquia na cusunu niishiniuria, nia sashiri niarta Pueyaso muerasu, jatiqiu nia miaquenura maninia. ³⁴ Miaajeyano maaraja, cuara miaqueera coteenu tama na tiajiniaajaaja, Pueyaso mariqui nia saniitoreeri, sesa nia miiniuucua nia rerejosacari nia jamuenuta.

Socua nia nequesotasanojiniji janiya, janiyari nia sequenutaniyani cua tiuquishacari niaacua.

12

Pueyaso Sohuanu cumaquishacari puetunu Pueyaso muerasujanaa

¹ Cuarta Pueyaso muerasunaa, niaacuajaari tari niishiya Pueyasoori na Sohuanu niqitioquiaa puetunu pajaniyajanaa, na cumaaca pa jitianura. Quiarijiani, socua nia niishitiojonu paniya cunojinijinia. ² Niaacuajaari niishiya taa nia quiquiaari tarini, Pueyaso niishiyashijia nia quishacarijia. Niaari puetunu sapojosaaquiarijianaa, pueya shipinishanocua nia tiuuniucua najuhuanaj. Sesaacaari naa nia tojtiquiaari najuhuaana pueya shipinishano, nia jyanishano pueyasohuani. ³ Naaratej cua pueyanaa, maja sapojosano nia quiniu socua. ¿Taate pa naata niishiniuni, cante seetanujanaa Pueyaso Sohuanu cumaacata pohuataa Pueyasojinijini? Naa nia saniniuujuritij: Pueyaso Sohuanu pohuatesacari pueyano, nojuajaari maja na naata Jesucristo sesacano. Naajuhuaaj, saaja Pueyaso Sohuanu cumaquishacari pueyano na naata sequenu: “Jesuacuajaari Jiyaniijijanaa”. Naacuajitij, maja nia tojiniu na rupaa, cante Jesucristo sesacajani.

⁴ Pueyaso Sohuanuuri niquiriyatujua. Naajaa, Pueyaso Sohuanuuri puetunu Pueyaso muerasujanaa cumaquiquiaa tamaatia miishano pa miiniuria na cumaacata. ⁵ Queraatia

tamaatia poonijiosanoori Pueyasora quiya. Naajaa, puetunu pajaniyajanaari niquiriy-atujua Jiyaniijiara poonijioquiaani. ⁶ Puetunu pajaniyajanaari tamaatia miiquiaa pa poonijiosanoni. Saniniuujia, Pueyasojuaanaari na panishano miiquiaa puetunu pueya jiuujiajiniajanaa. ⁷ Pueyasoori puetunu na muerasujuaanaa cumaquiquiaa na Sohuanuta, maninia pa miitioonura, Pueyaso muerasu maapue cumaquishaanura puetunujuaanaa. ⁸ Pueyasoori pa cumaquiquiaa tamaatia miishano pa miiniuria. Naacujitij, Pueyaso Sohuanuuri tamonu pueyano pohuataniquiaa Pueyaso niishishano na muerasura. Pueyaso Sohuanuuri tamonu pueyano niishitiquiaajuhua Pueyaso sequenu panishano pajaniya. ⁹ Pueyaso Sohuanuuri tamonu cumaquiquiaa Pueyasooocua na tiu-niuria jiyanoehua, na shiniujiuniuria Pueyaso miini panishano pa miiniuria. Pueyaso Sohuanuuri tamonu cumaquiquiaajuhua cusosuhua na naatanijionura Pueyaso cumaacata. ¹⁰ Pueyaso Sohuanuuri tamonu pueyano jiyajeneta miishano miitijuhua Pueyaso cumaacata. Tamonuuri niishitishaquiaa Pueyaso sequenu panishano na pohuatanura pueya niqiuara. Pueyaso Sohuanuuri tamonu niishitiquiaa teyano sohuanute tamonu pueyano cumaquiyani, Pueyaso Sohuanu, sapojona samaru soj. Pueyaso Sohuanuuri tamonu pueyano pocuatequiaa tamaatia rupaaca, na niishishoo rupaa. Pueyaso Sohuanuuri tamonu pueyano niishitiojoquiaa tamaatia rupaajinia sequesano na pacunura pueya rupaajiniajuhua, pueya tojiuria maninia tama nojori rupaajiniajaaja. ¹¹ Naacujitij, Pueyaso Sohuanujuaanaari puetunu pa cumaquiquiaajanaa, tamaatia pa miiniuria. Naa pa poonitijioquiaari taa na paniyacuajani, cana na paniyajaniuhua.

Puetunu Pueyaso pueyajanaari juhua niquiriyatu cuaqueya quiya

¹² Tamaatia poonijiosano puetunu pajaniyajanaa jiitiasacari, paari juhua niquiriyatu cuaqueya quiyani. Mijiria pa cuaqueyari jiyanoehua maninia shipinishano jiyanoehua Pueyaso niishitiajata. Pa cuaqueyari maja saaja shu na quiniu. Pa cuaqueyari queraatia tamaatia casaaraca. Puetunu pa cuaqueya casaajanaari jatiqui poonijioquiaa pa cuaqueyajinia, maninia pa quiniuria. Puetunu pa cuaqueya casaajanaari saa niquiriyatu cuaqueyaja quiya. Jiyano pa cuaqueyatej, Pueyaso muerasuuri naa quiyajuhua. Naacujitij, Cristota rupueotoesano pa quishacari, puetunu pajaniyajanaari juhua niquiriyatu cuaqueyaja quiyani, pa Jiyaniijiara pa poonijionura jatiqui. ¹³ Pueyasoori pa rupueotoequiaa na Sohuanuta, puetunu jatiqui pa quiniurijanaa. Pueyasoori puetunu na muerasujuaanaa samiitianiquiaari na Sohuanuta. Pueyaso Sohuanu pa jiitiasacari, puetunu pajaniyajanaari rupueotoesano quiya niquiriyatu Sohuanutani. Naacujitij, paari juhua niquiriyatu cuaqueya quiyani: Judiocuaca, taucucanio, poonitijiosano pueyajuhua, camarnuuju pueyano.

¹⁴ Pa cuaqueyajiniji pohuatereeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa cuaqueyajinia. ¹⁵ ¿Taa nia sequeyani pueyanaa? Pa niohuaca jaara sequere: “Janiyari maja juaashiquiani. Naaratej, janiyari maja pueyano cuaqueyajinijini”. ¿Taa nia sequeyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Naajuhua, majaari na soonu tamaatia poonijiosano pa jiitiasacari Pueyasora. ¹⁶ Naajuhua, pa numaa jaara sequere: “Janiyari maja namijiani. Naaratej, janiyari maja pueyano cuaqueyajinijini”. ¿Taa nia sequeyani pueyanaa? ¿Pa numaate maja pa cuaqueyajiniji, maja namijia na quishacari? ¿Sooshiyatee? Maja. ¹⁷ Paa jaara saaja puereetuca namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiani? Maja pa naata.

¹⁸ Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupueotoesaquiaari tee Pueyaso paniquiaari nianucujani. Naajuhua, Pueyasoori puetunu na muerasujuaanaa cumaquiquiaa mariyata, tamaatia poonijiosano pa jiitianura taa na paniyacuajani. ¹⁹ Pa cuaqueya jaara quiriqiaa saa namijia puetunujuaanaa, ¿pa cuaqueyatuma tee quiriqiaa socuani? ²⁰ Puetunu pa cuaqueya casaajanaari namitia saaja niquiriyatu cuaqueya quiya.

²¹ ¿Taa nia sequeyani pueyanaa? Pa namijia jaara pa juaashiquia sequere: “Juaashiquianaa, niaari najuhua quijiaca. Maja nia naata niquiniu”, ¿majate pa juaashiquia pa panishanojuhua? Taaquiririnij. Naajuhua, pa naca jaara pa niohuaca sequere: “Niohuacanaa, niaari najuhua quijiaca. Maja cua paniniu niya nijaniya”, ¿majate pa niohuaca pa panishanojuhua pa rucuanetotajara? Taaquiririnij. Pueyanaa, naa pa quiri jatiquijuhua puetunu parta Pueyaso muerasutajanaa, taa puetunu pa cuaqueyajinia pa jiitiasano casaajanaa quiya jatiquicuaani. Naaratej, puetunu parta Pueyaso muerasujuaanaari pa panishano quiya, pa cumaquitioonura maninia. ²² Teyano casaate pa cuaqueyajinia socua sasaca quiya pa niqiarani, cunoori socua pa panishano. Maja pa naata rishiniu cunooju. ²³ Naajuhua, teyanote maja puera

maninia niquishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niquishaanura. Paari caririquijia cutarani, juhuasu pa quishacari. ²⁴ Saniniuujia, maninia niquishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojuanurajuhua teyanote maja maninia niquishano pa cuaqueyajiniani. ²⁵ Naacujitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitiooquiaa, puetunu maninia pa cuaqueya quiniurijanaa. Naatej, taa pa tacaquiaa pa cuaqueyaracuaani, naa pa miiri parta Pueyaso muerasujuhuj. ²⁶ Pa niohuaca jaara noore, puetunu pa cuaqueyajanaari na tacaatiaa. Pa niohuaca jaara shaaterohua, pa cuaqueyari jaarajaaja puetunujanaa shuquiriaatia quiriohua. Naajuhuj, parta Pueyaso muerasu jaara taraatia miishaare, naa nojori pa taraajetarejuhuj. Naajuhuj, parta Pueyaso muerasu jaara maninia miishaare, nojoritia pa timirijuhuj.

²⁷ Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujanaa rupueteja Cristo cuaqueyajinia, saa niquiriyatu cuaqueyaja pa quiniuria, pa camarnura pa poonijionura. ²⁸ Cristo cuaqueya pa quishacari, Pueyasoori coteenujanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuatanaa nojori quiniuria, nojori caminiujiuniuria Pueyaso sequenu panishano pueya niquiarajuhuj. Naajuhuj, Pueyasoori tamasaca jiyatequiaari na rupaa niishitiojanaa nojori quiniuria. Pueyasoori tamasaca jiyatequiaari jiyajeneta casaa nojori miijionura na cumaacata. Tamasacaari jiyatesaaquiaari cusosuhua naatanijionaa nojori quiniurijuhuj, Pueyaso Sohuanu cumaquishacari nojori. Tamasacaari jiyatesaaquiaarijuhuj Pueyaso muerasu naacunaara nojori quiniuria. Tamasacaari jiyatesaaquiaarijuhuj Pueyaso muerasu jiiitianaa nojori quiniuria. Tamasacaari pohuatesaaquiaari tamaatia rupaacajuhuj. Naacujitij, queraatia tamaatia poonijosanoori quiya. ²⁹ ¿Puetunu Pueyaso muerasujanaateeri jiyaramiquishaaquiaari Jesucristojiniji nojori pohuatanaa tamasaca niquiara? Maja. ¿Puetunu Pueyaso muerasujanaateeri Pueyaso rupaa pohuatanaa? Maja. ¿Puetunu Pueyaso muerasujanaateeri Pueyaso rupaa niishitiojanaa? Maja. ¿Puetunu Pueyaso muerasujanaateeri jiyajeneta miishano miijiaca? Maja. ³⁰ ¿Puetunu Pueyaso muerasujanaateeri cusosuhua naatanijionaa? Maja. ¿Puetunu Pueyaso muerasujanaateeri tamaatia rupaaca pocujaja? Maja. Tamaatia rupaajinia pohuatasana jaara quiriquia, ¿puetunu Pueyaso muerasujanaateeri na naata na pacunu tama nojori rupaajinijajaaja? Maja. ³¹ Naaratej, nijaniya cuaara jiaatiaara socua maninia poonijosano nia jiiitianura Pueyaso Sohuanujiniji, niarta Pueyaso muerasu nia cumaquiniuria maninia.

Cuarta Jesucua tiuunianaana, quiarijiani nia niishitiojoreera casaate socua panishanoni, Pueyaso shuquiritianura pajaniya.

13

Panijiaca pa quirij

¹ Pueyaso Sohuanu jaara cua pohuatare queraatia cua niishishoo rupaaca, Pueyaso seya rupaajuhuj, naajaa, janiya jaara pueya paniyashijia quirini, janiya maara saaja cojuatuneja quirini Pueyasorani. ² Naajuhuj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniyaquishacari pueya, janiya maara najuhuana quijia quirini. Naajuhuj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaanio, naajaa, janiya jaara pueya paniyashijia quirini, janiya maara najuhuana quijia quirini Pueyasorani. Naajuhuj, janiya jaara Pueyaso cumaacaraca quirini, tuhuananuhua cua jatanura tamocora Pueyasocua cua tiuuniucua jyanohuani, naajaa. Cua paniyaquishacari pueya, janiya maara najuhuana quijia quiriquia Pueyasorani. ³ Naajuhuj, janiya jaara puetunu cua casamijianaa nareja niqutiore casamijiuniucua cua paniyaquiniutiani, cua Jiyaniijia maara cua shuquiritiaaquiri. Naajuhuj, janiya jaara tama cua cuaqueyajaaja panitiare Pueyaso rupaa cua pohuatanurani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini. Naajuhuj, janiya jaara mosaare Pueyaso rupaa cua pohuatanuucuan, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini.

⁴ Cante pueya panijiani, nojuajaari panaatia sashijia. Cante pueya panijiani, nojuajaari maninia miijia puetunu pueyarajanaa. Cante pueya panijiani, nojuajaari tamonu pueya jiiitiasanocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhuj, cante pueya panijiani, majaari pueya rerequeteja na quiniu. ⁵ Cante pueya panijiani, majaari pueya na cararajonu. Cante pueya

panijiani, majaari saaja nera niishiriojowa tamajaaja. Cante pueya panijiani, majaari ritia juaajia. Majaari na niishiniu naminiujuhuaj, tamonu jaara sesa na miiri. ⁶ Cante pueya panijiani, nojuajaari pueyacua taraajeja, nojori miishacari sesa. Saniniuujia, nojuajaari shuquiriaatia quiya pueya miishacari Pueyaso panishano. ⁷ Cante pueya panijiani, juhuajaniya pueyaracaanu rejeretaari, tamasaca miishacari sesa nojuaja. Majaari na taacanuuu Pueyaso sequesanojiniji, tamonu sequesanojinijinio. Naajuhuj, majaari na tarinitianu maninia miiniu pueyaracaanu. Pueya panijaari naa puetunu rejeretajanaa, taraatia na miishacari.

⁸ Panijia pa quiniuni, cunoori pueyaracaanu panishaanutaniya, maja saa mijiria pa quishacarijia. Naaratej, socua cutara panijara pa quirij. Mijiria pa quishacari, Pueyaso Sohuanuuri pa cumaquiya Pueyaso sequenu panishano pa caminiujuniuria, pa niishishoo rupaaca pa pocuanurajuhuj, Pueyaso niishitishano pajaniya pa pohu-atanurano. Puetunu nio niishishanojuanaari puequenutaniya Jesucristo tiuquishacariuhua pocua. Paniniu cutaraari puequeyaquiniutianiya. ⁹ Mijiria pa quishacari, paari saaja shiitianiyojowa Pueyaso niishishano jiitiaani. Pa niishishano Pueyasojiniji pa pohu-atasanoni, cunoori saaja shiitianiyojowa Pueyaso niishishanojiniji. ¹⁰ Naacujitij, mijiria pa niishishanoori najuhuaana quiniutianiya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutianiyaajanaani.

¹¹ Janiya jaara naatujua quiquiaarini, juhua naatujua pocuaquiarinijia. Juhua naatujua niishiriojoquiarinijia. Saaja naatujua niishitijaa jiitiquiaarinijia. Saniniuujia, janiya jaara cumantumaca quiquiaarini, janiyari cua naatujua quiniu niyajetaquiarini. Naajuhuj mijiria pa quishacari, paari juhua naatujoori quiyajaa Pueyaso niquiarani. Pa Jiyaniijia tiuquishacariuhua, paa cutaraari cumueeca Pueyaso pueya quiniutianiyan. ¹² Mijiria pa quishacarijia, paari shiitianiyojowa niishiyani. Paari juhua ninitia niquiya jariyani, juhua sesarunee niqutiujinia. Pueyaso shuriucua pa quishacari, paari maatia niishiniutianiyan. Quiarijiani, saa shiitianiyojuaari pa niishishano. Na nuhuaji, Pueyasota pa quishacari, paari puetunu maniniajanaa niishiniutianiyan, naatej, taa Pueyaso niishiya puetunu pajaniyaajanaacuaani. ¹³ Quiarijiani, paari Pueyaso rupaacua tiuumiu niishiyani. Naajuhuj, paari juhuajaniya sashiniu niishiyani, maatia pa niishishacari nojuajaari maninia miiniutianiya pajaniya. Nioori maniniacujaja. Naajaa, pa panishacari Pueyaso, pueyano, cunoori socua maninia cutara Pueyasora, puetunu tamonu casaajini-jiniojuanaa.

14

Niishishoo rupaaca pocuanujiniji niishitiojosano

¹ Naarate cua panishano Pueyaso muerasunaa, nia jiaatiare socua jyanohua pueya panijiaa nia quiniuria, Pueyaso panijiacajuhuj. Naajuhuj, nia jiaatiare Pueyaso Sohuanu cumaaca nia jitianura maninia nia miiniuria. Panishano cutaraari Pueyaso Sohuanu niishitijaa nia jitianura, Pueyaso sequenu panishano nia caminiujuniuria Pueyaso pueyara. ² Cante niishishoo rupaa pocuaa pueya niquiarua Pueyaso Sohuanu cumaacatani, cunoo pueyanoori maja na cumaquiniu narta Pueyaso pueya. Na pohu-atasanoori saaja Pueyaso tojishano, maja pueya tojishano. Cuno pueyanoori jiyasohujaja Pueyaso Sohuanu niishitishano pohuataa pueya niquiarua najuhuanaj. Majaari pueya niishiniu casaa na sequeyani. ³ Saniniuujia, cante Pueyaso sequenu panishano camini-ujuijia pueya rupaajiniani, cunoori narta Pueyaso muerasu cumaquiya. Na numooteyari. Na cumanijiaajariuhuj. ⁴ Na pohuatasanoori maja najuhuaana na quiniu pueyara. Pueyaso pueya maanu tojishacari na pohuatasano, nojoriiri socua cumaquishaanutaniya. Saniniuujia, cante niishishoo rupaajinia pocuaa Pueyaso pueya maanu tajiniani, najuhuaana pocuaari. Saa tama noojia cumaquiyajaarijia. ⁵ Puetunu nijaniyaajanaa jaara niishishoo rupaaca pocuanu niishijiaa quiriquia, janiya maara shuquiriaatia quirini. Naajaa, janiya maara socua shuquiriaatia quirini puetunu nijaniyaajanaa jaara Pueyaso sequenu panishano caminiujuniaa quiriquia Pueyaso cumaacata. Cante Pueyaso rupaa pohuatanani, cunoo pueyanoori socua tojishano pueyano niishishoo rupaa pocuanajiniji. Naajaa, niishishoo rupaa pocuaanaari mariyata panishano quiya, na sequesano jaara pueya rupaajinia pacusaare pueya tojishocoriquano. Naacujitij, Pueyaso maapueeri cumaquishaanutaniyajuhuj, maatia Pueyaso sequesano nojori tojishacari.

⁶ Cuarta Pueyaso muerasunaa, ¿niaatucua taa sequereni, janiya jaara Pueyaso rupaa pohuataasee nijaniya nia niishishoo rupaajiniani? ¿Niaatucua cumaquishaare cua pocuasacari najuhuaana naa nia niquiaratej? Maja. Niaa cutaraari cumaquishano quiniutianiya, janiya jaara nia pohuatare nia rupaajiniajanaa Pueyaso niishitiojosano janiyani.

Maniniajaarihuaj janiya jaara nia niishitiojore Pueyaso rupaa nia rupaajiniani. ⁷ Nia niishiriojore. Jiuujiaaju casamiiri rupaaracajuhuaaj. Naaratej, paari shuquiriaatia tojtijaa naajuaa jonesesarini, jaaquequejotaja taquiniosacarijuhuaj. Saniniuujia, pueyano jaara naajuaa jonenejonu saniniuujia na niishiyaquishacarijia, saaja nareja cojuatuneyari. Naacuajitij, cante na tojiyani, majaari na niishinu casaa na jonenenu paniya juucuanu. ⁸ Naajuhuaaj, trompeta jaara sesa jonesesaare, ¿soldadohuate na naata niishiniu casaa na miiniutianiyani? Maja. ⁹ Mariyata naajaarihuaj, niaa jaara niishishoo rupaa pocuaa pueya niquiara, ¿pueyatucua taa niishirini casaa nia sequeyani? Niaari saaja nia niti taquiriocateya najuhuana nojori niquiara. ¹⁰ Niaacuajaari niishiya queraatia rupaacaari mijiria quiya. Puetunu maniniajanaa cutaraari na niishiniaara. ¹¹ Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa pocuaanari tahue quiya quiriajuhuaj. ¹² Cuarta Jesuucua tiuuniaanaa, niaacuajaari Pueyaso Sohanuucua jiaatiaquiaa, na cumaaca nia jitianura. Maniniacuaja. Naajaa, nijaniya cuaraa jiaatiaara Pueyaso Sohanu cumaquiniuria nijaniya, puetunu tamaatia poonijosanojuanaa nia miiniurijuhuaaj, maja saaja tamaatia rupaacajinia nia pocuanura. Naacuajitij, nia naata niarta Pueyaso pueya cumaquiniu maninia puetunu nia miishanotajanaa, Pueyaso Sohanu cumaquishacari nijaniya.

¹³ Naaratej, cante niishishoo rupaajinia pocuaquiaa pueya niquiara Pueyaso Sohanu cumaacatani, cuno cuaraa secojora Pueyaso, Pueyaso Sohanu cumaquiniuria nojuaja, na sequesano na pacutenura pueya rupaajiniajuhuaj. ¹⁴ Pa secojosacari Pueyaso pa niishishoo rupaajinia, Pueyaso Sohanuuri pa sohanu secoteyaja Pueyaso. Majaari pa niishitiaja niishiniu cutara casaa pa sequeyani. ¹⁵ Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohanu cuaraa secojora Pueyaso pa niishishoo rupaajinia. Pueyaso pa secojorejuhua tama pa rupaajiniaaja. Naajuhuaaj, pa sohanu cuaraa jaaquequejora Pueyaso niquiara pa niishishoo rupaajinia. Pa jaaquequejorejuhua tama pa rupaajiniaaja. ¹⁶ Pueyaso Sohanu jaara nia sohanu secotere niishishoo rupaajinia, nia tojtianaari maja na naata sequenu: “Jaa, cuara naa quiriataej”. Majaari nojori niishiniu tamaatia rupaajinia nia secojosano. ¹⁷ Niaa naasucuaari jiyano hua maninia secojiya Pueyaso. Naajaa, saaja najuhuana quiyari tamasacara, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasaca. ¹⁸ Pueyanaa, shuquiriaatia quianijia Pueyaso niquiara, Pueyaso Sohanu pocuatesacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuaaja socua nijaniyajiniji cutarani. ¹⁹ Naajaa, janiya jaara pueyaracaanu pocuariquia niishishoo rupaajinia Pueyaso pueya maapue niquiarani, cuno maara najuhuana quiriquiaj. Rupaquijia pohuatasano tama pueya rupaajiniaajani, cunoori jiyano hua socua maninia tucuyocua pohuatasanojiniji niishishoo rupaajinia. Saaja pueya niishishano rupaajinia cutara cua naata nojori cumaquiniu.

²⁰ Cuarta Pueyaso muerasunaa, niaari najuhuana shuquiriya niishishoo rupaajinia nia pocuasacari pueya niquiara, naatej, taa naatujoori shuquiritiaquiaa quiarinio tacuarishijiotajacuaani. Niaa jaara juhua naatujoori quiniu panijajaa, sesa niishiriojiyashijiacua nia quiri, taa naatujoori quiyacuaani. Saniniuujia, majaari seetanujuanaa naatujoori nijaniya. Naaratej, cumantumaca nia quishacari, nia niishiriojore maninia nia cumaquitioonura nia rerejosacari. ²¹ Tariucuacaanu, tama Pueyaso sequesanojaarijia naajiotasaquiaari. Naa sequeyari:

“Janiyari taucuaca jiyaramiquiniutianiya cua saquirojosano Israel pueyacuani, cua sequenu panishano nojori pohuatanura cua pueya. Cua pueya niishiyaquishoo rupaacajinia pohuatanutaniyari. Naajaa, niishiyaniija, tahuu pohuatasacari cua rupaa, cua pueyari saa cua ruuretanutaniyajaa, taa nojori ruuretaquiaa cua rupaacuaani jaara tama nojori rupaajiniaaja pohuatasariquiaa”.

²² Naa Pueyaso sequesacarijij, paari niishiyani, Pueyasoori tamaatia rupaacata na tojiyashijiaa tojtiniu saniniuujia nia rupaa juucua. Paari saniniuujia tari na rupaa tojtijajaca cutarani. Naaratej, majaari socua panishano Pueyaso sequenu pajaniya pa niishishoo rupaajinia, na tojtiniuria pajaniya nojuaja. Pueyaso sequenu panishano caminiujushano cutaraari pajaniyara. Cunocuaajaari tama pa rupaajiniaaja. Cunoori maja Pueyasoocua tiuyashijiacara. ²³ Naaratej, Pueyaso pueya maapue rerejosacari, saaja secaja nijaniyajinijinio cuaraa pocuaara niishishoo rupaacajinia. Naa pocuanu nia tariniitire quenaaja, tamasaca Jesuucua tiuyashijiaa quishacari nia rerejojuajinia, nojori mariqui jiyaniiri: “¡Nio pueyaqui puetunu paatecoorijuhuanajaj!” ²⁴ Saniniuujia, puetunu nijaniyajanaa jaara Pueyaso sequenu panishano caminiujia tama nia rupaajiniaaja, tamonu pueyano jaara niaacua tiuquiri, nojuajaari maninia niishiniutianiya nia pohuatasano. Puetunu nia pohuatasanojuanaari noojia tacaatinutianiya sesa miijia

na quiniuucua. Tama nojuajaarjia niishiniutianiya: “¡Janíyaqui sesa miijia Pueyaso niquiarani!”²⁵ Nia pahuatasano Pueyasojinijiri puetunu sesa na miishanojuanaa na niishitiniutianiya noojiajinia. Nocuaji, nojuajaari Pueyaso tojjijara quiniutianiya. Sequenutaniyari: “¡Pueyasoqui seetanujuanaa nia tajinia niya quíya!”

Puetunu nia miirijianaa maninia. Majaari nia riutiocojonu tamonu pocuasacari

²⁶ Naaratej, cua tojitiare taa nia miiniutianiyani cuarta Pueyaso muerasunaa. Naa nia miiri nia rerejosacari. Puetunu nia miishanojuanaa cuara quíria nia cumaquitioonura, socua maninia Pueyaso tojtianaara nia quiniuria. Naacuajitij, Pueyaso Sohuanu cumaacata, tamonu naasucuaari jaquequejonutaniya. Tamonu naasucuaari Pueyaso rupaa niishitiojonutaniya. Tamonu naasucuaari Pueyaso Sohuanu niishitiojosano noojiajinia caminiujiuniutianiya. Tamonu naasucuaari niishishoo rupaajinia pocuanutaniya. Na nuhuaji, tamonu cuara na pacuura nia rupaajinia, maninia nia tojiniuria. Naa nia miiri maninia. Niquiriyatujua cuara pocuaara coteenu, na nuhuaji tamonu, na nuhuaji socua tamonu. Naate nia miiri. Majaari nia riutiocojonu tamonu pahuatasacari.²⁷ Níaa jaara niishishoo rupaajinia pocuanu paniri, cuara pocuaara saa querajaa pueyaja, maja socua. Cuaara pocuaara niquiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuara pacuura pueya rupaajinia, niishishoo rupaajinia nia sequesano, pueya tojiniuria maninia.²⁸ Niishishoo rupaa pacuna quíyaquishacari, cuara pocuaquíria cante tamaatia rupaajinia pocuanu paniriquíaa nia niquiarani. Na naata sanaa pocuanu noojiajinia tamajaaja, saa Pueyaso niquiaraja.

²⁹ Naajuhuj, niaa jaara Pueyaso Sohuanu niishitiojosano nioojiajinia pahuatanu paniri, cuara pocuaara saa querajaa pueyaja, maja socua. Na nuhuaji, Pueyaso Sohuanu cumaaca jíitianaa cuara saniniujiuria nia pahuatasano, nia niishiniuria, cunote seetanujuanaa Pueyaso Sohuanu niishitiojosano, maja soj.³⁰ Nia pahuatasacari Pueyaso rupaa, tamonu jaara pahuatanu paníya shusha Pueyaso Sohuanu niishitiojosano noojiajinia, cante pahuataajaani cuara sanaajeera, na tarajana pocuanura.³¹ Naacuajitij, puetunu Pueyaso niishitiojosano jíitianaajanaari na naata na pahuatanu. Naaratej, niquiriyatujua cuara pahuataara, na nuhuaji tamonu, na nuhuaji socua tamonu. Naacuajitij, puetunu niajaníyajanaa na naata pahuatanu nia niishishano Pueyasojiní. Naacuajitij, puetunu Pueyaso muerasujanaari maninia niishitiojosano quiniutianiya, maninia cumaquis-hanojuhuaj, maninia nia miiniuria.³² Maja timia pocuanu jaarajaaja tamonu pocuasacari. Majaari Pueyaso Sohuanu pocuatenu tari niajaníya, tari tamonu pocuasacari. Níaa naata cutaraari sashini nia pocuanura.³³ Pa Pueyaso cutaraari maninia miijiajanaa. Maja cushitiojua. Naarate pueyanaa, maja tamasa pocuasacari pa riutiocojonu. Saaja maninia pa miiriquia pueyaracaanu.

Cua tojitiare socua. Puetunu Pueyaso pueya maapuejanaa cuara naa miiria na rerejosacari.³⁴ Maajipohua cuara sanaa tojtiaara Pueyaso rupaa pahuatasacari. Maajipohua cuara niishitiojíaquíria pueya níquiara. Maajipohua cuara tojjijara quíria, taa pa niishitiojosaaquíari Moisés Rootasanojinícuajani.³⁵ Maajipohua jaara niishiniu paníya socua pahuatana niishitiosanojiní, nojori cuara nequesotohuara neyaca tama na tiajiníajaaja, na que maaraja. Cararaatia cutaraari maaji jaara nequesoretare caya pahuatasacari, Pueyaso muerasu rerejojuajinia.³⁶ Níaa tojiri nio cua rootasano pueyanaa. Níaaacuajari niishiya, Pueyaso rupaari supueyaquíquiari niajaníyajiní. Naajuhuj, majaari Pueyaso rupaa pahuatanaa jíyaramíquiniú quíshaquíari saa níacuaja. Tamonu jíyacajinia, queraatia Pueyaso pueya maapueeri cua niishitiojosano tojtiaquíaa maninia cutara.³⁷ Níaajaníyajiníjino, noojiaqueya pueyari Pueyaso Sohuanu cumaaca jíitiaa, nia niishiniuria cana cumaacata tamonu pueyano niishitiojiani. Naacuajitij, ¿taa nia sequeyani? ¿Majate Pueyaso Sohuanu niishitiojosano cua sequesano niajaníya? ³⁸ Cante nio niishiniu paníyaquiyani, cuno jíyoteeri maja Pueyaso Sohuanu cumaacaraca quíja. Cuno pueyano cuara tojíaquíshaaria saniniujuja.

³⁹ Naacuajitij cuarta Pueyaso muerasunaa, nia jíaatiare Pueyaso Sohuanu cumaaca nia jíitianura, pueya níquiara nia pahuatanura Pueyaso Sohuanu niishitishano niajaníya. Naajuhuj, majaari nia tenujuno noo pojori, canapuee niishishoo rupaacajinia pocuanu paníyani, Pueyaso Sohuanu cumaquishacari nojori.⁴⁰ Nareja maninia nia miiriquia puetunujuanaa. Naacuajitij, niquiriyatu cuara pocuaara coteenu, na nuhuaji tamonu, na nuhuaji socua tamonu.

¹ Cuarta Jesucua tiuniaanaa, Jesucristo rupaa nia niishiriohua, tarijia cua pohuatasano nijaniya, nia jiyanooshaanurani. Niaari nocua tiuquaaari maninia. Niaari quiarijia maninia na tojitiaajaa. ² Naacuaajitij, Jesucristoori niaacuaaji tacuquiaa quiarijia, maninia nia tojitiyacari na rupaa, taa cua pohuataquiaari nijaniyacuaajani. Niaacuaajaari Pueyaso pueyara jatanishano quiya niaa jaara maja najuhuana na rupaa tojiyaquiquiaari. ³ Janyari niaara caminiujuquiaari Jesucristo rupaani, taa cua tojiyaacuaani. Nio cutara rupaa nia coteetaquiaari pohuatanunijia: Cristoori pocuara cusoquiaari niyacutesanojinia, sesa pa miiniuucua. Tariucuaaanu Pueyaso sequenu panishano caminiuju-niaari naa naajotaquiaari, taa Cristo miishaanutaniya naquiyani. Seetanujuanaa naa miishaaquiaariiri. ⁴ Jesucristo cusonu nuhuaji, raaco niasaaquiaariiri. Jiuujanaraca juuca jaara na shoconujuquiaari macu na quishacari, na raaco samiitiaquiaariuhuari. Naa tohuateequiaariiri puetunu tariucuaaanu Pueyaso Rupaajanaa, taa nojuajinjini naajotasaaquiaaricuaajani. ⁵ Na nuhuaji, Jesucristoori Pedroocua muetaquiaariuhua. Na nuhuaji, na jiyaramiquishocoriquiano pueyacu muetaquiaarijiaarihuaj. ⁶ Na nuhuaji, muetaquiaarijihuuj na tojitianaa rerejosaquiiri. Socua quiniento pueyari na niquti-aquiaari jiyacari. Queraatia jiyacari na niquiniaajinjini pueyari saminio quiyajaa. Noo-jiaqueyari tari shaajecocanu. ⁷ Na nuhuaji, pa Jiyaniijaari Santiagoocua muetaquiaar-ijuhuaj. Na nuhuaji, muetanu pacutequiaariuhua na doce jiyaramiquishocoriquiano pueyacuari.

⁸ Puetunu cuno pojori nuhuaji, Jesucristoori socua cucua muetaquiaarijihuuj, nocua tiuujia cua quiyaquishacarijia. Naa na paraca cua quishacarijiatej, Jesucristoori cucua muetaquiaari na jiyanooniuria janiya. Ritia cua jiyatequiaariiri na jiyaramiquishano cua quiniurijahuuj. ⁹ ¿Casaaraqitijia na saquiriojoquiaari janyatejaj, na jiyaramiquishano cua quiniurijahuuj? Janyari puera sesa miijia quiquiaarini cua niishiyaquishacari Jesucristo. Cucua na muetaaquishacarijia, janyari Pueyaso saquiriojosano pueya mi-itiaquiaarini. Cuarta Jesucristo jiyaramiquishano pueyari maja naa sesa miijiaa na quitiuni quiquiaari. ¹⁰ ¡Pueyasoori jiyanoohua maninia! Cua jiyanooquiaariiri Jesucristo jiyaramiquishano cua quiniurijahuuj, taa cua quiya quiarijiacuaajani. Naa quiyaniija Pueyaso jiyanooniucua janiya. Majaari najuhuana na jiyanooni quiquiaari janiya. Na jiyanoosacari janiya, janyari socua jiyanoohua nera poonijiocanu cuarta Jesucristo jiyaramiquishano pueyajinjini. Naajaa, maninia cua poonijosanoori maja tama cua miishanojuaaja na quiniu. Pueyasocuaajaari cua cumaquiquiaa na Sohuanuta, maninia cua miiniuria na panishano.

¹¹ Naacuaajitij, naa sequeriquiaa nijaniyanijia: cante nia pohuataquiaari Jesucristo rupaani, naajaa. Janyari Jesucristo rupaa pohuataquiaaacuahuuj, mariyata taa cuarta Jesucristo jiyaramiquishano pueya pohuataquiaacuaani. Majaari rimiajata canaa pohu-atasano. Niaari cuno rupaacua tiuquaaari maninia.

Pueyaso muerasu macunucua samiitiasacariuhua

¹² Cuarta Jesucua tiuniaanaa, canaa jaara pohuatariquiaa taa Cristo samiitiaquiaar-ihua macujinjini, ¿casaara noojiaqueya nijaniyajinjini sequequiaani: “Macunucua maja na samiitiaconu quiniutianiuhua”? ¹³ Macunucua jaara samiitianiyaquishaan-utaniya taa nia sequequiaacuaajani, Jesucristo jiyoteeri macu quiyajaacuahuuj. ¿Cristoteeri macu quiyajaa? ¡Maja! ¹⁴ Cristo jaara macu quiriquiaaja, canaa maara najuhuana pohuataa na rupaani. Naajuhuj, niaa najuhuana Jesucristoocua tiuya, na pueya nia quiniu paniniuria juucua. ¹⁵ Canaacuaajaari pohuatanuquiaani Pueyasoori Jesucristo samiitian-iquiaariuhua. Macunucua jaara samiitianiyaquishaanutaniya taa nia jiyaniquiaacuaajani, canaa jiyoteeri sapojonujuaca Pueyaso jiyaramiquishano pueyani. Naacuaajitij, nia se-quesano jaara seetanujuanaa quiri, maja jiyoteeri Pueyaso samiitianini quiquiaariuhua Jesu. Saniniujia, ¡niaari jiyajeneya cutara! ¡Pueyasocuaajaari seetanujuanaa Jesu samiitian-iquiaariuhua! ¹⁶ Macunucua jaara samiitianiyaquishaanutaniya taa nia sequequiaacua-ajani, Cristo maara samiitiaaquiquiaariuhujahuuj. ¹⁷ Cristo jaara samiitiaaquiquiaari, niaa jiyoteeri Cristoocua tiuya najuhuanaj, Pueyaso na jiyanooniuria juucua nijaniya. ¿Macuteeri na naata pocuaaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusojuua quiyajahuuj. ¿Naatejaaratej? ¹⁸ Cristo jaara macu quiriquiaaja, tariucua shaajecono nocua tiuniaa pueya maara taraatia quiriquiaaj. Nojori maara taraatia shaajeconu puetunurajanaa, maja quenaaja nojori samiitianuhua. ¹⁹ Pajaniyajuhuj, canapute saminio quiyajaani, paa maara jiyanoohua taraatia quiyani, pueyaracaanu najuhuana naquiya pa miishacari mijiria. Jaara naa quiriritij, pa Jiyaniija Je-sucristo jaara macu quiriquiaaja, paa maara najuhuana poonijioriquia pa shuquiritiniuria nojuaja juucuanu.

²⁰ ¡Namitia naa quiyaaquiyari! ¡Cristoori seetanujuanaa samiitianishaaquiariuhua! ¡Canaari na niqutiaquiariini! Naacuaajitij canaari niishiyani Jesucristoori saminio quiyacuaja. Pueyaracaanu saminio quiniutianiyari. Naa pa Jiyaniijia Jesu samiitiasacariuhua coteenu pocuajicuaatej, naacuaajitij paari niishiyani puetunu shaajecono nocua tiuuniaajanaari samiitianishaanutaniuhuaaacuahuaj. ²¹⁻²² Paacuajaari niishiyani, pa supuetana Adánri coteenujanaa shaajequiaari, Pueyaso na jiani quiniutianiuuca. Naacuaajitij, puetunu nojuajiniji supuenaajanaari shaajecoquiaajuhua. Adán nuhuaji, parta pueyano Jesucristoori saniniuuja Pueyaso tojjia quiquiaari cutara. Naacuaajitij, nojuajaari samiitiaquiariuhua. Naaratej, puetunu nocua tiuuniaajanaari samiitianishaanutaniuhua, pueyaracaanu saminio pa quiniuhua pa Jiyaniijia. ²³ Pa Jiyaniijia Jesucristoori coteenu samiitiaquiariuhua. Cristo nuhuaji, puetunu nocua tiuuniaajanaari samiitiaconutaniuhua, pa naacuneetonura nata, na nishacariuhua pocua. Paari naa samiitiaconutaniuhua Pueyaso panishacarini. ²⁴⁻²⁶ Na nuhuaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutianiuuca, na tucuataniuhua puetunu na Que panishanojuanaa. Na Queeri na jiyaronutianiya puetunu na paraajanaa na pueconura. Jesucristoori Jiyaniijiajanaa quiniutianiya, na Que cuaara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoonutaniyajanaa, mariyata puetunu jiya cajiniocua cumaacaraca quijiacajanaano. Sesaacaari jataaanutaniyajuhua, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhuaji puetunu na paraajanaa, jiyacari pueya cusojuana shaajanutaniyaariuhua. Majaari cusonu niishishaanu quiniutianiya socua, shaajenunio. Puetunu casaajanaa jaara maninia jiiitiasano quiriohua, Jesucristoori na Que na niqutionutaniuhua, na Que jiiitianuhua puetunujuanaa.

²⁷ Na Que Pueyasoori Jesu jiyatequiaari Jiyaniijia na quiniuria jiyanhua na cumaacata. Naacuaajitij, nojuajaari na naata puetunu casaajanaa na tojitanini. Nojuajaari Jiyaniijiajanaa. Saa na Que Pueyasoojaari socua Jiyaniijiajanaa, maja tamonu. Pueyasoojuanaari Neyanu jiyaroquiaari puetunu na shipinishanojuanaa na jeenucanura na cumaacata. ²⁸ Na tucuatasacari, pa Jiyaniijia Jesucristoori na Que sequenutianiya: “Cua Quena, tari tucuataree quia panishanonijia. Puetunu quia paraajanaa quejoore tarinijia. Majaari socua sesa na miiniu quiniutianiya. Saa quiajanijiaari pueyaracaanu Jiyaniijiajanaa quiniutianiya cutara, quia socua tamonu”. Naacuaajitij, pa Que Pueyasoori Jiyaniijiajanaa quiniutianiya pueyaracaanu, puetunu na shipinishanojuanaa na jiiitianura maninia.

²⁹ Socua nia niishiriojore pueyanaa. Niaa jaara jiyaniyajaa macunucuaari maja na samiitianishaanu quiniutianiuhua, ¿casaara pueya tiuquiniijosaaquiaa moojinia macu nitini, cuno macu jaara na shaajeyaquishacarijia Jesucristoocua tiuurii? Paa jaara tiuquiniijosaaquiaa Jesucristoocua pa tiushacarini, paari miriqui miyani taa pa Jiyaniijia Jesucristo miishaaquiariicuaani. Nojuajaari raaco niasaaquiaari na cusosacari. Na nuhuaji samiitiaquiariuhuari. Naajuhua, paari mariyata samiitianishaanutaniuhuaani. Niaari sequenea macunucuaari maja na samiitianishaanu quiniutianiuhua. ¿Naatejaaratej? Macunucua jaara samiitianijiaquishaanutaniuhua taa nia jiyaniyacuaani, ¿casaara pueya tiuquiniijosaaquiaa shusha shaajeno macu niticuaarini?

³⁰ Paa jaara samiitianiyaquishaanutaniyani taa nia sequequiaacuajani, canaquiiri najuhuaana tama canaa cuaqueyajaaja panitiaquiiani, pueyaracaanu canaa poonijosacari pa Jiyaniijia. ³¹ Seetanujuanaa nia sequeyanijia, janiyari jiyanhua shuquiriaatia quiyani, Jesucristoocua nia tiushacari, cua pohuatanuucua na rupaa niajanija. Seetanujuanaajariuhua, pueyari cua monu paniquiaa pueyaracaanuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiaquiaa puetunu juucajanaani, cua niishishacari janiyari samiitianishaanutaniuhuaani. ³² Pa Jiyaniijia jaara macu quiya taa nia sequequiaacuajani, janiyaqui najuhuaana Jesucristo rupaacuaji tacuriquiaani nio sesaaca pueya tajinia cua quishacari niya Éfeso tiacajiniani. Nojoriiri juhua puereta sayoru quiriquiaa cucuaji. Janiyaqui najuhuaana Jesucristo shuquiritiriquiaa juucuaani, nojuaja jaara samiitianiyaquishaaquiariuhua. Paa jaara samiitianiyaquishaanutaniyani, pa miriqui taa Pueyaso tojiyashijia sequequiaacuajani: “Pa shuquiriri saminio pa quishacarijia. Pa queranacunuure. Pa mashaasequenuurejuhua. Naajaa, pa shaajesacari, pocua puetunu shaajeequijanaani”. Naa sesa miiquioquiaari noo pojori, canapute jiyaniyani macunucuaari maja na samiitianishaanu quiniutianiya.

³³ Pueyanaa, tama nia cuaqueyajaaja nia cojuare, niaa mariqui sapojosaareeri naa sesa nia niishiriojonurajuhua. Tamonu pueyanoori naa sequequiaari seetanujuanaatej: “Maninia miijiaari sesa miijia jatanishaaree na cojinuucua sesa miijia”. Naaratej, majaari nia cojinu sesoriquia pueya, niaa mariqui seserejariuhua. ³⁴ Niishiriojuara

nia qiri. Sesa nia miini nia cartere. Noojiaqueya nijaniyajiniinjioori Pueyaso ni-shiyashijiaca quiyajaa. Naa nia sequereenijia pueyanaa, quenaaja nia caririqiniuria.

Taamueca pa quiniutianiuhuani pa samiitiasacariuhua

³⁵ Tamonu nijaniyajiniinjioori naasucuaari niishiriojija: “¿Taa macunucua samiitiani-jiosaanutaniuhuajaarani? ¿Taamuecate na cuaqueya quiniutianiyani?” ³⁶ Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaaquinatejaj. Saa na co moquesacarijia na naata moritanu. ³⁷ Naajuhujaj, niaa jaara saaco natare, tamaatia jajajuhujaj, nia natasano jajauri maja juhua neyonarano niquishano. Nia natasanoori saaja shiitianiyojua jajau quiya. Na moritiasacari, jijanohua tamaatia niquishiyari. ³⁸ Pueyasoori na maashitiya puetunu na jaamasucuatajanaa, taa na paniyacuajani. Pueyasoori puetunu jajajuhua moritianiijia tamaatia niquishano na quiniuria. Naa quiniutianiyajaariuhua macunucua samiitiasacariuhua. Majaari pa cuaqueya quiniutianiya taa na quiya quiarijiacuajani. ¡Pa cuaqueyari jijanohua maninia quiniutianiuhua!

³⁹ Majaari puetunu cuaqueyaraca casaajanaa mariyata na quiniu. Naacuajitij, pueyano cuaqueyari tamaatia quiya casa cuaqueyajini. Shuhua cuaqueyari tamaatia quiyajuhujaj. Sapitiaaja cuaqueyari tamaatia quiyajuhujaj, moojinia na quiniuria. ⁴⁰ Jiyocuaaanu quijiacaari tamaatia cuaqueyaraca, maja juhua mijiria quiniaa cuaqueya. Pueyaso seya cuaqueyari shanohua niquishano. Nojori cuaqueyari tamaatia niquishano mijiria quiniaa cuaqueyajini. ⁴¹ Naajuhujaj, pananuuri jijanohua shacantuuca quijia. Raca shacantuucaari tamaatia niquishano pananu shacantuucajiniji. Riya shacantuucaari socua tamaatia niquishano. Naajuhujaj, puetunu riyajanaari tamaatia niquishano narta riyajiniji. Puetunu Pueyaso shipinishanojuanaari naa tamaatia quiya.

⁴² Naajuhujaj, Pueyaso muerasuuri samiitianishaanutaniya tamaatia cuaqueyata. Moquejacaari jamojosaanutaniya. Moqueyashijiacaari saniniuujia samiitianishaanutaniuhua, pueyaracaanu na quiniuria. ⁴³ Jamosano pa quete sequeeri samiitianishaanutaniuhua, jijanohua shanohua niquishano na quiniuria. Cumaacaaju jamosanoori samiitianishaanutaniuhua jijanohua cumaacaraca na quiniuria. ⁴⁴ Pa cuaqueya jamosanoori saaja jiyacua rucanejaca quiquiaari. Paari samiitianishaanutaniuhuaani tamaatia cuaqueyata, jiyocuaaanu quijiaca pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucanejonura, ¿majateeri Pueyaso niishiniu tamaatia cuaqueya shipininu na muerasura, na shuriucua pa quiniuria? Taaquiririniji.

⁴⁵ Pueyasoori coteenu na supuetana shipiniquiaari marajiniji. Na nuhuaji, na samiitian-iqiaariiri. Moisés Naajioneejiniaari naa naajiotasaquiaritij: “Adánri saminiora quiquiaari Pueyaso nooshacari na jiquicoo”.

Jesucristoori saniniuujia jiyatesaaquiaari juhua pa supuetanara na quiniuria pa supuetana Adán niti. ¡Jesucristoori jijanohua socua cutara Adánjiniji! Adánri samiitianishaquiaari saminio na quiniuria. Jesucristo cutaraari pa samiitianijajanaa na Sohuanuta. ⁴⁶ Coteenujanaa pa supuetanani, majaari na shipinishaanu quiquiaari jiyocuaaanu quijiarano. Cunora, coteenu pa cuaqueyari saaja mijiria quijia. Na nuhuaji, pa cuaqueyari jiyocuaaanu quijia jatanishaanutaniya mariyata juhua Jesucristo cuaqueyara. ⁴⁷ Adánri saaja mijiria quiriqiano quiquiaari. Marajiniji shipinishaquiaariiri. Jesucristoori saniniuujia jiyocuaaanujinio. ⁴⁸ Puetunu Adáncuanio supuenojuanaari saaja mijiria quijiaca. Naaratej, puetunu pajaniyajanaari saaja cusonuujacani, juhua pa supuetana Adánjuhujaj. Jesucristo muerasuuri saniniuujia juhua pa Jijaniijia Jesucristo quiniutianiya, jiyocuaaanu quijiaca pa quiniuria. ⁴⁹ Mijiria pa quishacari, pa cuaqueyari juhua pa supuetana Adán cuaqueya quiya, marajiniji shipinishano. Majaari pa cuaqueya quiarijia socua maninia Adán cuaqueyajini. Pa samiitiasacariuhua, pa cuaqueya cutaraari quiniutianiya mariyata juhua cuno jiyocuaaanu Quijia cuaqueya. Nojuacuajaari pa samiitianinia Jesucristo.

⁵⁰ Cuarta Pueyaso muerasunaa, maja pa naata Pueyaso rupeenu nio pa cuaqueyataja. Pa rishiyashijia cuaqueyari maja na naata cuno pueyaracaanu Quijia rupeenu. ⁵¹ Naajaa, cua tojitiare. Nia pohuatareera pueya niishishoo. Majaari puetunu pajaniyajanaa cusonuuriquianoni. Puetunu pa cuaqueyajanaa cutaraari jatanishaanutaniyani, maninia cuaqueya pa jitianura, juhua Jesucristo cuaqueyajuhujaj. ⁵² Jiyocuaaanuji trompeta jonesacari, pa cuaqueyari ritia jatanishaanutaniya, naatej, taa pa nimishiniuquiya ritiaacuani. Pa Jijaniijia naacuneetoonu panishacari pajaniyata, Pueyaso trompetaari tojishaanutaniya joneseshiyano, na muerasu na jiquioonura. Canapete macu quiyani, quiarinio cuaqueyata ritia samiitianutaniuhuari. Pajaniyajuhujaj, canapete saminio quiyajaani, pa cuaqueyari ritia jatanishaanutaniyajuhujaj, quiarinio cuaqueya pa jitianurajuhujaj, shaajeyashijiaca pa quiniuria. ⁵³ Cusunuuja cuaqueya cuaara jatanishaaria,

rishijia cuaqueya pa jitianura saniniuuja. Nio moqueja pa cuaqueyani, jataniniu panishiyari, maninia cuaqueya pa jitianura, pueyaracaanu pa quiniuria Pueyasota.

⁵⁴ Moqueja pa cuaqueya jaara maninia cuaqueyara jatanishaarohua; pa rishiyashijia cuaqueya jaara rishijia cuaqueyara jatanishaarohua; jiyacaritij pocua niishirini tariucacaanu sequesanoori tari tohuateeree. Naa naajiotasaquiaari tariucacaanu Pueyaso Rupaajiniatej:

“¡Jejeel! ¡Pa Jiyaniijiaari na muerasu mashiquirii macunucua quiquojiniji!
⁵⁵ Cusojuananaa, ¡quiaaqui tari shocotasaaree! ¡Quiaari shocotasaaree! Sesacanaa, quia cusojuatajaari juhua mohuacara quiquii cumaacaaju. ¡Shaajeconoori samiitiacoree!”

⁵⁶ Pueyanaa, puetunu pajaniyajanaari cusonuuquiaa sesa miijiaa pa quiniucua mijiriani. Paari sesa quiquiaani pa tojiyaquishacari tariucacaanu Moisés Rootasano Pueyasojiniji. Naaratej, puetunu pueyajanaari cusonu niishiya. ⁵⁷ Naajaa, pa Jiyaniijia Jesucristo miishnota pocuara, Pueyasoori pa mashiquiquiaa pa cusoyajiniucuaaji. Naaratej, paari Pueyaso sequequiaani: “¡Paacarasho canaa Pueyasonaa! Quiaacuaajaari canaa shocotaniniutianiya cusonu, quia Niyanu csonuucua canaacuara, pueyaracaanu canaa quiniuria quia shuriucua. ¡Jiyanoohua paacarasho!” Paari naa maniniuhuaqueetaa pa Que Pueyasoni.

⁵⁸ Naaratej cua panishano pueyanaa, nia numaama nia racatare cua niishitiojosano niajaniya. Saa Pueyaso rupaaja nia tojitiare, maja tamaatia niishitiojosano. Pa Jiyaniijia nia poonijiore socua jiyanoohua, na panishano nia miiniuria saaja. Pa Jiyaniijia nia poonijosanoori maja najuhuana na quiniu.

16

Casamiijuniucua Pueyaso pueyara cumaneeca reratesacari

¹ Quiarijiani, nia riucaareera taa nia miiniutianiya, cumaneeca nia reratanura casamiijuniucua. Cuno cumaneecani, paari na jiyaronutaniya parta Pueyaso muerasura Jerusalén tiacajiniani. Naa cuuara maninia miiria, mariyata taa cua rootacanucuaaja Pueyaso pueya maapue Galicia jiyajiniani. ² Naa nia miiritij. Puetunu domingo juucajanaa, puetunu pueyajanaa cuuara racataara tama na niqutiosocoriquiano cumaneeca, teyano nia niqutionutaniya niarta Pueyaso muerasuracuaajani. Naa nia racatare juhutaja nia niqutiosocoriquiano cumaneeca puetunu semaanajanaa, maja na reratesaanura shusha cua tiuquishacari niaacua. ³ Niocua maninia pueya saquiriojore, nia niqutiojosano cumaneeca nojori patanura Jerusalén tiacajinia. Naacuajitij, cua tiuquishacari niaacua, janiyari cua naajioneeca jiyarotanutaniya nojorini. Naajioreera parta Jesuucua tiunuaa pueyacuara Jerusalén tiacajinia, nojori cuuara shuquiriaatia maseera cumaneecata nia jiyarotasano pueya. ⁴ Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhuaj.

Pablo naquerejosacari

⁵ Cua quiasacari niaacua, janiyari Macedonia jiya tajiniu paniyani. Na nuhuaji, janiyari niaacua tiuquiniutianiya. ⁶⁻⁷ Janiyari maja ritia cua tajiniu paniniu niajaniya. Niaata camueenujunu paniya pueyaracaanunijia, pa Jiyaniijia jaara naa panijajuhaaj. Janiyari shuniya shocotenu paniya niaatani. Na nuhuaji, nia naata cua naacunu cua jitianura cua panishano, cua pasocoriquiano tee Pueyaso jiyaronu paniya janiyacuaajani. ⁸⁻⁹ Janiyari niya Éfeso tiacajinia camueenujijajaarani, Pentecostés juuca cua sashishacari. Queraatia pueyari Jesucristo rupaa tojtianu paniya niya. Naajuhuaaj, queraatia pueyari Jesucristo rupaa ruuretaa saniniuuja. Naaratej, janiyari jiyanoohua socua Jesucristo rupaa pohuatanu panijajaa Éfeso pueya niquiarani. Naajaa, janiyari niaacua quianutianiya Pentecostés juucara queranacunuunu nuhuaji.

¹⁰ Timoteo jaara niaacua tiuquishii, niocua na cumaquiri Pueyaso rupaa na pohuatanura na puereyaquiniutia. Timoteocuaajaari pa Jiyaniijia poonijioquiaa mariyata taa cua poonijioquiaacuaani. ¹¹ Naaratej, maja Timoteo nia rerequetenu. Niocua na naacere saniniuuja, cucua na tiuquiniuhuaa shuquiriaatia, maninia nia miiniucua nera. Janiyari niya na sashiya parta Pueyaso muerasutani. ¹² Janiyari Apolota pocoojoriquiaani. Janiyacuajaari na nenecojoriquiaa juucuanu, niaacua na quianura parta Pueyaso muerasuta quiarijiani. Nojuajaari saaja cua sequeree majana na quianu paniniu quiarijiani. Tamacari niaacua quianutaniyaquiniaari, jaara na naata quiri.

Pablo sequesano, naajionu na puecasacari

¹³ Cuarta Jesuucua tiunuaanaa, niishiriojuuca nia quiri. Jesucristo rupaa nia niishiri maninia, seetanujuaanaa na tojtianaara nia quiniuria. Juhua cumueeca mashaja nia

quiri Pueyaso Sohanu cumaacata, pa Jiyaniijia panishano nia miiniuria. ¹⁴ Puetunu nia miishanojuanaa cuaara quiiria seetanujuanaa nia paniniutia.

¹⁵ Pueyanaa, niaari niishiya Estéfanasri necohuata coteenu Jesucristo tojitianaara quiquiaari cuniqui Acaya jiyajiniani. Nojoriiri Pueyaso muerasu naacuquiaa pueyara-caanu nojori paniniutia. ¹⁶ Naarate nia sequenu paniyanijia, nijaniya cuaara qui-iria juhua nojori seya, nia cumaquiniuria nojori, maninia nojori miishacari. Naa nia cumaquiriti puetunu jiyano pueyajanaa, noo pojori canapuate naa maninia miiquiaa Pueyaso muerasucuajani.

¹⁷ Jiyanhua shuquiririucuaanijia Estéfanas tiuquishacari nijaniyajiniji Fortunatota, Acaicotajuhua. Nojoriiri cua shuquiriritiucuaa nia niti, cua jiaatiasacari cua niqiniuria nijaniya juucua. ¹⁸ Nojoriiri coojia cajitiriucuaa puera cua niishiriojiaquiniucuaaji niaacua. Nojori naasucuaari nioojia cajitiquianujuhua, nojori pohuatasacari nijaniya janiyajiniji. Nijaniya cuaara shuquiritiaara nojori, naa nojori miishacari maninatej.

¹⁹ Pueyaso muerasu maapue niya Asia jiyajiniaari cua sequerucuaa, cua saruhuatanura nijaniya. Aquila, Priscilano, nojoriiri jiyanhua nia saruhuataajuhua, narta Jiyaniijia muerasu nia quiniucuaajuhua. Pueyaso pueya maanuuri nia saruhuataajuhua, nooj, teyanote Aquila tijinia rerejoquiaacuajani. ²⁰ Puetunu parta Pueyaso muerasujanaari niya nia saruhuataajuhua. Nia saruhuatatoosacari, nia saruhuatatoore seetanujuanaa Pueyaso paniniutia.

²¹ Quiarijiani, tama cua juaashiquiatajaaja saaja nioniyojua naajioreeraj, cua saruhu-atanura nijaniya. Naacujitij, niocua niishiri nio naajioneeri seetanujuanaa janiyajiniji.

²² Cante maja pa Jiyaniijia panijia quiyani, Pueyaso cuaara jataara cuno, saniitioso-coriquiano.

jjiyaniijianaa, quia nimiohua!

²³ Pa Jiyaniijia Jesu cuaara cumaquiiria nijaniya na Sohanuta. ²⁴ Janiyari puetunu nijaniyajanaa paniyani Jesucristo paniniutia. Tariucuaa, cua panishano pueyanaa.

TANEE PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya maanu Corinto tiacajinia

¹ Janiyari Pablóni. Pueyaso panishacari, janiyari Jesucristo jiyaramiquishanora jiyatesaquiiaari na rupaa cua poojotanurani. Janiyari Timoteota naajiyi nio niaacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanuucuaa naajiyani, puetunu Acaya jiyajinia Pueyaso tojtijajaca pueyacuara janaanio. ² Pa Que Pueyaso, mariyata pa Jiyaniijia Jesucristo cuaara cumaquiiria niajaniya. Nojori cuaara jiyateera niajaniya juhuajaniya quijiaca nia quiniuria.

Pablo miishacari naquiya

³ Pa Jiyaniijia Jesucristo Que pa shuquiritiare. Nojuajaari pa Quejuhuaj, pocua taraajeja cutara. Nojuajaari pa Pueyaso, pueyaracaanu pa cumanijiana. ⁴ Nojuajaari pueyara caanu pa cumanijaquiaa naquiya pa miishacari. Naacuajiti pa naata cumanijianu tamasacajuhua, naquiya nojori miishacari, taa Pueyaso cumanijaquiaa pajaniyacuaani. ⁵ Seetanujuanaa, Cristo rupējaca pa quishacari, paari naquiya miishaaquiiaajuhua, taa naquiya na miishaaquiiaaricuaani. Naajaa, nojuajaari pa cumanijaquiaa shuquiriaatia pa quiniuria. ⁶ Naacuajitij, canaa jaara naquiya miishaaquiiaa Cristojini canaa pohuatanuucuaani, Pueyasoori canaa cumaquiiaa saaja canaa rejeretanura. Naacuajitij, majaari canaa tarinitianu Pueyaso Rupaa pohuatanu nia niquiara, seetanujuanaa Pueyaso pueya nia quiniuria, nia cumanijiasaanurajuhua. Naajuhua, Pueyaso jaara canaa cumanijiarecuaa, naacuajitij, canaa naata nia cumanijianujuhua. Canaari nia cumanijiaani, maninia rejeretajaca nia quiniuria naquiya nia miishacari, taa canaa rejeretaquiiaa naquiya canaa miishacari. ⁷ Canaari seetanujuanaa niaacua tiuyani, niaari cumanijiasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniucuaajuhua, taa canaa miiquiaa naquiyacuaani. Naacuajitij, Pueyasoori nia cumanijanutanijajuhua, taa na cumanijaquiaa canaacuaani.

⁸ Canaa panishano Pueyaso pueyanaa, canaari paniyani nia niishiniuria taa canaa tacaacuanuni, jyanohua naquiya canaa miishacari Asia jiyajinia. Canaari puera jyanohua taraatia miiquianuni. Jiyacari, majaari tari canaa jitianu quiriquiaa cumaaca canaa rejeretanura socua. Canaari jyaniriquiaani maja naasucua tari canaa rishiniu quiniutianiya. ⁹ Seetanujuanaa, canaari jyanijiani Pueyaso naasucuaari nareja canaa shanacunutaniya canaa cusonunura. Naajaa, naacuajitij, Pueyasoori jiyacari canaa niishitiriquiaa maja canaa tiuuniuria tama canaacuaajaaja, saaja nocua canaa tiuuniuria cutara. Nojuacuajaari macunucua samiitianijiojua. ¹⁰ Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusonunura. Nojuacuajaari socua canaa cojuanutaniya nocua canaa tiuuniucua, niaa jaara canaacuara secojorejuhuaj. ¹¹ Naacuajitij, Pueyaso miishacari maninia canaa, queraatia pueya seconuucua canaacuarajuhua, queraatia pueyari Pueyaso sequenutaniya, “paacarasho”.

Pablo pohuatasano casaara na quiaaquiiaari Corinto pueyacuani

¹² Canaari shuquiriaatia quiyani canaa niishishacari canaari maninia quijiaca quiquiaari canaa quishacari niaatani, Pueyaso niishiyashijaca niquiaranio. Majaari canaa sapojonu quijia niajaniya. Canaari seetanujuanaa niaacua taraajejani Pueyaso jyatenuucua canaa nia panijaca canaa quiniuria. Canaari naa maninia quiquiaari niaatani, saaja Pueyaso cumaquishacari canaa, maja tama canaa niishitijatajaaja. ¹³ Cunora, janiyari nia nequesotaani, ¿casaara nia cushitiiquianu canaa naajione nia serojosacarin? Puetunu canaa naajioneecajiniajanaa majaari canaa naajionu quiquiaa jiyajeneta casa, nia cushitiiniuria. Puetunujuanaacuaajaari maatia niishishaatia quiquiaa nia serojosocoriquiano. ¹⁴ Niacuaajaari tari secaja niishiya taa canaa paniya jyanohua niajaniyani. Pa Jiyaniijia Jesucristo tiuquishacarihua, niaari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijaca quiquiaarini. Naajuhua, niajaniyari canaa timitiasano quiniutianijajuhua.

¹⁵⁻¹⁶ Cua jyanishacari niaa naasucuaari seetanujuanaa cua panijaca, taa cua paniquiaa niajaniyacuaani, janiyari cunora naquerejocanu niaacua juucuaani. Niiquiji cua quiasacari Macedonia jiyajiniara, janiyari nia niquiniu paniriquiaa juucua nia tiacajiniani. Janiyari Pueyaso rupaata nia cumaquiniu paniriquiaa juucua cunoco cua tajishacarin. Naacuajitij, janiyari niishiriojoriquiaani cua naata naasucua nia shuquiritiniu Pueyaso rupaata, cua quiasacari Macedonia jiyajiniara, naajuhua, cua

tacatesacariuhua cunocojiuhua. Janiyari niishiriojoriquiaani nia naata naasucua cua naacunu cua panishanotajuhua, Judea jiyajinia cua quianuhua. ¹⁷ ¿Niaateeri jiyaniquianu janiyari nareya nia sequecanuni, naa cua sequesacari coteenujuanaa cua naajiojiniatej? ¿Niaateeri jiyaniya, naa cua naquerejosacaritij, janiyari tama cua panishanojuaja miiniu paniquianuni, maja Pueyaso panishano? Seetanujuanaa, majaari coojia cua niqijiotenu quiquianu naa cua sequesacari nianianiyatej. ¹⁸ ¿Janiyateeri coojia niqijiotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani? Pueyasocuaajaari niishiya, na rupaa canaa pohuatasacari, majaari canaa jataniniu quiquiaa. Pueyaso rupaacuajaari seetanujuanaa. ¹⁹ Naajuhua, Neyanu Jesucristoori jataashijia. Silvano, Timoteo, janiyajuhua, canaari nojuajiniji nia niquiara pohuataanaani. Paari nojuajiniji niishiyani puetunu Pueyaso sequesanojuanaari seetanu rupaajanaa cutara. ²⁰ Jesucristocuaajaari tari tohuateequiari puetunu tariucuaaanu Pueyaso sequesanojuanaa pajaniyara. Naacuajitij, pa tiuushacari Jesucristocuaa, paari niishiyani, Pueyaso sequesanoori seetanujuanaa. Naaratej, pa shuquiristasacari Pueyaso, paari na sequequiaani: “Seetanujuanaari canaa quia sequesano, Pueyasonaa”. ²¹ Jesucristo rupuejaca pa quishacari, Pueyasocuaajaari pa cumaquiquiaa, socua maninia na tojjiaa canaa quiniuria, niajanijuhua. Pueyasoori pa niqitioquiaari na Sohanu, seetanujuanaa na muerasu pa quiniuria. ²² Pueyaso Sohanu pa jittiasacari poojajinia, naacuajitij, paari tari Pueyaso sesa jittiaa juhua naajiotasano poojajiniani, saa neraja pa quiniuria. Na Sohanu pa jittiasacari poojajinia, paari niishiyani, paari puetunu na sequesanojuanaa maseriquianoni.

²³ Niaari cua jiyaniquianu janiyari najuhua coojia niqijiotejani, niaacua cua quiaaquinuucua taa cua sequecanu coteenu niajanijacuaajani. Pueyasocuaajaari niishiya, majaari cua quianu quiquianu niaacua Corinto tiacajinia, maja cua tacaatiniuria niajaniya, janiya jaara nia nacasuse jiyanoahuani. ²⁴ Canaari maja nia jiyaniijiani canaa shiniujiniuria puera niacajia, Jesuucua nia tiuuniuria. Niaacuajaari tari maninia Jesuucua tiuujiaa. Canaari saaja niarta Pueyaso pueyani, canaa cumaquiniuria niajaniya, socua pa Jiyaniijia tojjiaa nia quiniuria, seetanujuanaa shuquiriaatia quiijia nia quiniuria.

2

¹ Janiyari tama sequecanujuanijia, maja juhua niaacua cua quianu quiniutianiya, maja cua taraajetenura niajaniya. ² Janiya jaara nia taraajetere cua nacasusacari niajaniyani, ¿cantucua cua timitiri quenaajani? ¿Cua taraajetesano pueyateeri cua shuquiritiniutianiya? Maja. ³ Naaratej, janiyari niaacuara naajiocanuni, cua nacasunura juhuacarijia niajaniya, cua taraajeyaquiniuria niaacua cua tiuquishacari. Janiya jaara sashiri cua nacasunura niajaniya cua tiuquishacari niaacuani, janiya maara jyanohua nia taraajetereni, jecatoojua nia quishacari. Saniniuuji, niaa jaara juhuacarijia jecare puetunu sesa nia miishanojuanaa, naacuajitij, cua tiuquishacari niaacua, niaari cua cojiniutianiya maninia, shuquiriaatia pa quiniuria jatiqui. ⁴ Janiya jaara niaacuara naajiocanu coteenu cua naajioneeni, janiyari jiyacari jyanohua tacaariquiaa niaacuani. Coojiaari jyanohua taraajeriquiaa. Janiyari jiyacari nujuqueriquiaaajaniuhua. Majaari cua naajionu quiquianu cuno naajionei cua taraajonura niajaniya. Cunoori seetanujuanaa quiquianu cutara cua niishitiniuria niajaniya, taa cua pania jyanohua niajanijani.

Cuno sesa miijia cuaara jiyanooshaaria jaara tari pishiri sesa na miiniujiniji

⁵ Cuno sesa miijiaari maja na taraajetenu quiquianu saa janiyaja. Quera puetunu niajanijajanaa naasucuaari taraajecanu cuno pueyano miiniucua sesa. Seetanujuanaa, majaari puetunu niajanijajanaa taraajenu quiquianu. Janiya jaara sequereni: “Puetunu niajanijajanaa taraajecanu”, janiya maara puera na maateyani. ⁶ Puetunu niajanijajanaa jyatenuucua nojuaja saniitosano na quiniuria, nojuajaari tari noojia tacatorohua sesa na miiniujiniji. Tariucuaaja. Majaari socua na saniitionu. ⁷ Quiarijiani nojuaja nia jyanooriohua. Nia cumanijiarohua, nojuaja mariqui puera tacaariiri jyanohua na taraajesacari. ⁸ Nocuaaji janiyari jyanohua nia rootaani, maninia nia miiriohua cuno pueyano, na niishiniuria niaaqui na panijajaa. ⁹ Janiyacuajaari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujuanaa pa Jiyaniijajiniji cua rootasano tojjiaa. ¹⁰ Cua tojjiare, cana nia jyanooriicuaani, janiyari na jyanoyajuhua. Naacuajitij, pueyano jaara sesa miiriquia, janiyari Cristo niquiara na jyanooquiaajuhua, jatiqui nia quiniuhua. ¹¹ Naaratej, niarta Pueyaso pueya nia jyanooriquia, Sesaaca mariqui pocua riutiocoreeri, juaajia na jiyatenura pajaniya, pa jyanootioyaquinuucua. Paacuajaari maninia niishiyani taa Sesaaca niishiriojiquiaa sesa miijiacara na jyatenuura pajaniyani, paa jaara jyanoyashijia quiriqiani.

Pablo tacaashacari Troas tiacajinia na quishacari

¹² Jani yaara Troas tiacajinia tiuquiquianu Jesujini cuu pohuatanurani, cuno pueyari jiyanhua tojtianu paniriquiaa Jesujiniji cuu pohuatanura juucua. Jiyacaritij, seetanujuanaa nojori niquiara pohuatasaaia quiriquiaari. Pa Jiyaniijia Jesuuri juhua tootiu riatacanu cucuaji juucua, cuu pohuatanura nojuajiniji tii. ¹³ Janiyari saaja nojori tiujia-canuhuanu puera cuu tacaashacari, cuu riuritaaguiniuucua pa tarajanu Tito. Janiyari juucua paniriquiaani cuu pohuatasaanura niyajaniyajiniji. Janiyari cunora tacaariquiaa jiyanhuanu. Naaratej, janiyari Macedonia jiyajinia quiaarohuani, Tito cuu pajenuhuara tii.

Pa Jiyaniijia Cristoori pa paraa pa shocotanijia

¹⁴ Janiyari jiyanhua shuquiritiaa Pueyasoni. Nojuajaari pueyaracaanu pa shocotaniquiaa pa paraca segue, pueyaracaanu pa sacuanuucua pa Jiyaniijia Cristoocua. Pueyasoori na rupaa pohuataniquiaa canaa. Naacuajitij, canaa niishishano Jesucristojinijiiri juhua shanhua jaanutaja jaanujuquiaa pueya tajinia puetunu tiqiyocujanaa. ¹⁵ Pueyasora, canaari juhua shanhua jaanutajani, Cristo quishacari canaa jiuujajinia. Nojuajiniji canaa pohuatanuusacari, canaari puetunu pueyarajanaa jaanuuqiaani: Pueyaso muerasurano, saniitosaariquiano pueyaranio. ¹⁶ Saniitosaariquiano pueyara, Jesucristo rupaari mocuaatia jaanujua saniniuuja. Naa nojori soonuucua Jesucristo rupaatej, nojoriiri shaajasaariquiano cutara. Pueyaso jiyanooshocoriquiano pueyara saniniuuja, Jesucristo rupaari shanhua jaanuuqiaa. Naa nojori paniniuucua Jesucristo rupaatej, nojori cutaraari pueyaracaanu quijiacara jiyatesaanutaniya. ¿Canapueeteeri seetanujuanaa Pueyaso jiyaramiquishanoni, na rupaa nojori pohuatanura, pueya na tiuutiniuria Jesucristoocuanii? ¹⁷ ¿Noo pojoritii, najuhuaa Pueyaso rupaa pohuatanuuquiaa, pueyajiniji na masejonura cumaneeca na sapojonuunutatej? Maja. Majaari canaa pohuatanu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujuanaa Pueyaso jiyaramiquishano pueyani, na rupaa canaa pohuatanura. Canaari seetanujuanaa pa Jiyaniijia rupaa pohuataquiaa Pueyaso niquiarani, Cristo rupesano canaa quishacari.

3

Quiarinio rupaa Jesucristojiniji

¹ Naa canaa naajiosacari niaacuaratej, niaa naasucuaari jiyaniya canaari tama canaa cuaqueyajiniijiaaja nia pohuatohuanihuaj, canaacua nia tiuuniuria. ¿Niaateeri pa niishishano pueyanojiniji naajionee paniya, canaajiniji na pohuatanura coteenu niyajaniya, canaacua nia tiuuniuria cutara? Tamasaca cutaraari naa miiquiaa. Niaacuajaari canaa niishijiaa cutara. Puetunu tiqiyocujanaa quijiaa pueyari canaajiniji niishiyacuaja, canaari seetanujuanaa Pueyaso jiyaramiquishano pueyani, na rupaa canaa pohuatanura. Naacuajitij, majaari quenaaja canaa paniniu, canaa nia niqutionura nia naajionee, canaa patasocoriquiano, tamasa tiuuniuria canaacua. ² ¿Naajioneetucua casaara panishaareni? Puetunu pueyajanaari na naata niishiniucuaa canaari seetanujuanaa Pueyaso jiyaramiquishano pueyani, nojori niishishacari taa canaa paniya jiyanhua niyajaniyani. ³ Cristocuajaari nioojajinia naajiotaquiaari na rupaa, nojuajiniji canaa pohuatanuucua nia niquiara. Majaari na rupaa na naajiotanu quiquiaari nioojajinia minianata. Seetanujuanaa na Sohanuta na naajiotaquiaariiri. Majaari na naajiotanu quiquiaari saajaneecua. Seetanujuanaa nioojajinijanaa naajiotaquiaari na rupaari. Naa jatanishano pueya nia quishacaritij, puetunu pueyajanaari niishiya niaari seetanujuanaa Pueyaso pueya, nojuajiniji canaa pohuatanuucua niyajaniya.

⁴ Naacuajitij, canaari seetanujuanaa niishiyani canaari Pueyaso jiyaramiquishanoni. Cristocuajaari naa canaa niishitiquiaa maninia. ⁵ Majaari canaa niishirojonu canaa miijiosanoori tama canaa cumaacata canaa miishanojuaja. Maja. Canaari saaja Pueyaso cumaacata poonijioquiaani. ⁶ Na cumaacata, nojuajaari canaa jataniquiaari quiarinio na rupaa pohuataanaa canaa quiniuria. Quiarinio na rupaaari seetanujuanaa Pueyaso Sohanu cumaacaraca cutara, pueya na jataniniuria seetanujuanaa Pueyaso niquihua nojori quiniuria. Tariucuaaanu, Pueyaso rupaari naajiotasano quiquiaari pueya tojishocoriquiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojiniuucua saaja. ⁷ Naajaa, cuno rootasano saajaneecaacia quejasanoni, cunoori jiyanhua maninia quiquiaari. Naacuajitij, Moisés jaara cuno rootasano niishitiojosaariquiaa Sinaí tuhuananuucua, Pueyaso shacantuucaari nocua pacuriquiaa. Naacuajitij, na rosesacariuhua Israel pueyacu, na jiquicoori puera shacantuuca quiquiaarija. Naaratej, narta Israel pueyari maja na naata na jiquicoo niqiniyu quiquiaari. Na nuhuaji, cuno shacantuucaari jacaria maquesaquiaariuhua.

⁸ Quiarrijani, Pueyaso Sohanuuri poonijioquiaa pueya jiuujiajinia saniniuuja, nojori tiuuniuucua canaa pohuatasanoocua. Cunoori socua shanohua shacantuuca cutara Moisés jiquiocojiniji. ⁹ Moisés pohuatasano Pueyaso rootasano nojuajani, cunoori seetanujuanaa jiyanohua maninia quiquiaari. Naaratej, Moisés jiquiocoori shacantuuca quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojoriiri sesa miijiaa quiquiaari. Saniniuuja, quiarrijaari socua jiyanohua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuquuaa seetanujuanaa sesa miyashijacara nojori jiyatesaanura Pueyasora. ¹⁰ Pueyaso jiyatenuucua Moisés tariucuacaanu na rupaa pohuatana na quiniuria, Moisésri shacantuucara jataquiaari. Quiari naataja saniniuuja, Pueyasoori canaa niishitiquiaari socua jiyanohua maninia rupaa canaa pohuatanura Moisés pohuatasanojiniji. ¹¹ Moisés shacantuuca maquesaquiariuhuani, cunoori maja na jataniniu quiquiaari Israel pueya. Quiarjia saniniuuja, Pueyaso Sohanu cutaraari pa jataniquiaa seetanujuanaa pueyaracaanu shacantuuca quijiaa pa quiniuria.

¹² Quiarrijani, canaari niishiyani paari pueyaracaanu shacantuuca quijiacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. ¹³ Majaari canaa miiniu taa Moisés miiquiaaricuaani. Nojuajaari quenaaruque toqueta na jiquico mishiquioquiaari narta Israel pueya niquiyaquiniuria na shacantuuca maquesaano. ¹⁴ Israel pueya jiuujiaacari juhua toqueta mishiquiosano quiquiaarijuhuaj. Cumajiuujiaaca nojori quiniuucua, majaari Israel pueya niishiniu quijia Moisés caminiujushano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhuanujuaja tii quiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. ¹⁵ Quiarrijaari naajuhujaj. Moisés naajioneeca jaara serojosaariquia Israel pueya niquiara, nojori niishitiajari juhua toqueta mishiquiosano quiyajaa, maja nojori niishiniuria nojori tojishano. ¹⁶ Quiarrijani, pueyano jaara pa Jiyaniijiaacua tiuuri, cuno toqueeri juhua na niishitiajajiniji jaariutiasaaciaa, maninia na niishiniuria Pueyaso Rupaa. ¹⁷ Pa Jiyaniijiaari Pueyaso Sohanujuhanajaj. Pa Jiyaniijia Sohanu jaara poojiajinia quiya, paari Sesaacajiniji jaariutiasanoni, maja pa camarnu na quiniuria socua. Naajuhujaj, majaari tari poojia quiniu juhua toqueta mishiquiosano. ¹⁸ Naacuajitij, puetunu pajaniyajanaari juhua niquitiu nenecuaquiaani, pa Jiyaniijia shacantuuca pacusacari pocua. Cunoori pa sohanu rupuetoosacari nata. Naacuajitij, nojuajaari pueyaracaanu pa jataniquiaa jacaria, socua shacantuuca quijiaa pa quiniuria juhua nojuaja, na Sohanu poonijosacari poojiajinia.

4

¹ Naa pa Jiyaniijia poonijosacari canaa jiuujiajiniatej, majaari canaa pishiniu quiquiaa canaa poonijosacari nera. Pueyaso jiyanooniuucua canaa, nojuajaari canaa jiyatequiaari na rupaa pohuatanaa canaa quiniuria. ² Majaari canaa miiniu quiquiaa cararaatia casaa, taa tamasa miiquiaacuaa jiyasohuani. Majaari canaa pohuatanu quiquiaa Pueyaso rupaa canaa cuaracashiniutia. Naajuhujaj, canaa pohuatasacari, majaari canaa jataniniu quiquiaa Pueyaso rupaa. Canaari seetanujuanaa maatia pohuataquiaa Pueyaso Rupaani, puetunu pueyajanaa niishiniuria nojoriiri na naata canaacua tiuuniu. ³ Teyano pueyate canaa pohuatasano Jesucristojiniji niishiyaquiyani, cuno pojoriiri shaajasaariquiano. Nojoriiri niishiyaquiya, juhua toqueta mishiquiosano nojori jiuujia quishacari. ⁴ Pueyaso rupaacua tiuyashijaca nojori quishacari, nojori jiyaniijia Sesaacaari nojori jiuujia jiyatequiaa juhua cariyouarura, Pueyaso Rupaa mariqui nojori jiuujia cuhuatareeri. Nojori jaara Pueyaso rupaacua tiuuriquia, nojori maara niishiri, Cristoori seetanujuanaa shacantuuca quijia cutara, juhua na Que Pueyasojuhuaj. ⁵ Canaa pohuatasacari Pueyaso rupaa nijaniya, majaari tama canaajinijiaaja canaa pohuatanu quiquiaa nia timintianura canaa. Canaari saaja nia pohuataquiaa cutarani, Jesucristoori seetanujuanaa Jiyaniijiajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniijia Jesu. ⁶ Canaari naa maninia miijiacani, Pueyaso cuhuatanuucua canaa jiuujia. Jiya shipinishacari, nojuajaari sequequiaari: “Cuhuashiqui cuara coretaraa ninishiquiji”.

Quiarrijaari naajuhujaj, nojuajaari poojia cuhuataquiaajuhujaj, pa niishiniuria nojuajaari tojetaarucujanaa maninia quijia. Paari cuno niishiyani, Jesucristojiniji pa niishishacari. Nojuajaari seetanujuanaa shacantuuca quijia cutara, Pueyaso Niyanu na quiniuucua.

Paari maninia quijiaa quiniutianiyani saaja Pueyaso rupaacua pa tiuushacari

⁷ Cuno cumaaca canaa na jiitiaani, cunoori Pueyaso cumaaca cutara. Saniniuuja, canaa cuaqueyari cumaacaaju, saaja juhua maraujiniji panishano pataco. Naacujiti niishishiyari, cuno cumaaca pueya jatanijiani, cunoori seetanujuanaa Pueyaso cumaaca, maja tama canaa cumaacajaaja. ⁸ Naacujitij, canaa paraa cosejosacari canaa, majaari canaa tarinitianu quiquiaa Pueyaso rupaa pohuatuano, cuno cumaaca canaa jiitiasacari. Jiyanohua canaa tacaashacari, naajaa, majaari canaa tarinitianu quiquiaa Pueyasora poonijionu. ⁹ Canaari naquiya miishaaquiaaanihuaj. Naajaa, majaari Pueyaso cartenu quiquiaa canaa. Naajuhuj, canaari juhua quiaquesano jiyocuara jaqueroosaquiaajaa-niuhuj. Naajaa, majaari canaa cusojuasaanu quiquiaani. ¹⁰ Puetunu tiqiyocuajanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyanijia Jesu panitiaquiaa tama na cuaqueyajaaja pocuaracuaani. Naacujitij, canaa na niqutiosano cumaaca poonijosacari canaa rishiyashijiaa cuaqueyajinia, pueyari niishiquiaa, Jesuuri seetanujuanaa saminio. ¹¹ Mijiria canaa quishacarijia, pueyari pueyaracaanu canaa puecoonu paniquiaani, Jesujini canaa pohuatanuucua. Naacujitij, saminio na jiitiasacari canaa, Jesu cumaacaari niquishaaquiaa rishiyashijia canaa cuaqueyajinia. ¹² Canaari juhua piriuguuniuquiaani, canaa pohuatanuucua Pueyaso rupaa nia niqiara. Niaari pueyaracaanu rishijacara quiriquiano saniniuuja, canaa pohuatasanoocua nia tiunuuucua.

¹³ Tariucuacaanu Pueyaso Rupaajinia, supuetana David naajiotasanoori naa sequeya: “Pueyasooocua cua tiunuuucua, janiyari pocuareeni”. Canaari naajuhuj. Pueyasooocua canaa tiunuuucua, canaari na rupaa pohuataquiaani. ¹⁴ Canaa jaara puecoosaariquia na rupaa canaa pohuatanuucua, naajaa. Canacuajaari niishiyani, pa Jiyanijia Jesu Samiitaniniacuajaari canaa samiitanijionutaniuhujuhuj, Neyanu Jesu rupuesano canaa quiniuucua. Pueyasoori canaa rijionutaniya puetunu niajaniyatajanaa, pueyaracaanu na shuriucua pa quiniuria. ¹⁵ Naacujitij, canaa jaara rejeretaquiaa naquiya canaa miishaanu Pueyaso rupaa canaa pohuatanuucua, puetunu cunojuanaari niaacuara, maninia nia quiniuria Pueyasora. Naa Pueyaso jiyanooniucua niajaniyacuaatej, socua queraatia pueyari na timiniutia na sequenutaniya, “paacarasho”. Pueyasoori jiyanohua shuquiritiasaanutaniya, queraatia pueya na jiyanooniucua.

¹⁶ Naaratej, majaari canaa pishiniu na rupaa canaa pohuatanura. Canaa cuaqueyari saaquianoshiya. Naajaa, canaa jiuujiaari saniniuuja puetunu juucujanaa socua mashajashiyacujua. ¹⁷ Janiyara, puetunu naquiya canaa miishacarijianaa mijiria, cunoori secaja, rupaquijiajuhuaj. Cuno naquiya miiniu canaa rejeretanuucua, ¡Pueyasoori cunora jiyanohua maninia miiniutianiya canaa! Cunora, canaari shacantuaa quijiacara jatanishaanutaniyani, pueyaracaanu rishijiaa canaa quiniuria. ¹⁸ Naaratej, majaari canaa jiaatianu quiquiaa canaa jiitianura mijiria canaa niquishano casa. Canaa cutaraari Pueyaso jiitiasano niquishoo casaacua jiaatiaquiaani. Mijiria niquishano casaari saaja shaajeja casa. Pueyaso jiitiasano pa niquishoo casa saniniunijia, cuno cutaraari shaajeyashijia.

5

¹ Mijiria pa quishacarijia, nio pa cuaqueyari saaja juhua suhuorotu quiya pa sohuanura, nareja juhua ruconaa pa quishacari mijiria. Mijiria pa jiitiasano pa shoque jaara cusoque, paacuajaari niishiyani, paari tari jiitiaa tamonu cuaqueya jiyocuacaanuni. Cuno cuaqueyari juhua shanhua tia, Pueyaso shipinishano pajaniyara. Cuno cuaqueyari pueyaracaanu rishiniutianiya pa sohuanu quiquora. Cunoori maja pueyano shipinishano. ² Mijiria canaa quishacarijia nio canaa sohuanu suhuorotujiniani, canaari taraatia miishaaquiaani. Cunora, canaari juhua quiatojoquiaani, canaa jiaatiasacari canaa sohuanu pacusaanura jiyocuacaanu. Tii quiyacuajaari canaa sohuanuucuaaji tiasano quiquio. ³ Canaari cuno quiarinio cuaqueya cushiyonutaniya juhua toqeni, maja juhuasu canaa sohuanu quiniuria. ⁴ Nio cuaqueyajinia canaa quishacari mijiria juhua suhuorotujinia, canaari quiatojoquiaani taraatia canaa miishacari mijiria. Maja cutaraari canaa quiniu paniniu cuaqueyaju, juhua juhuasunucua. Canaa cutaraari canaa quiarinio cuaqueya cushiniu panyani, Pueyaso shipinishano canaarani. Naacujitij, nio shaajeja canaa cuaqueyari puetunu maninia jatanishaanutaniyajanaa Pueyaso cumaacata, pueyaracaanu rishijia cuaqueyaraca canaa quiniuria. ⁵ Pueyasojanaacuajaari na muerasura pa saquirojoquiaari, naa na jataniniuria pajaniyatej. Naaratej, nojuajaari na muerasu niqutioquiaa na Sohuanu, pa niishiniuria nojuajaari seetanujuanaa naa pa miiniutianiya.

⁶ Naa canaa niishishacarijij, majaari canaa tacaaniu quiquiaa. Canacuajaari niishiyani nio cuaqueyajinia canaa quishacarijia, majaari juhuanuujaja pa quiniu pa Jiyanijia shuriucua. Naacujitij, paari tucuacaanu quiyajaani pueyaracaanu pa quijiarano

quiquojiniji. ⁷ Cunora, mijiria canaa quishacarijia, majaari canaa quiniu tama canaa niishitiajataaja. Canaa cutaraari canaa jiyaniijiaacua canaa tiuuniutia quiquaani. ⁸ Naacuajitij, canaari shuquiriaatia quiya mijiriani, nocua canaa tiuushacari. Naajaa, canaari nio canaa cuaqueya tarinitianuucua jiaatiaani, canaa pacunura pa Jiyaniijia shuriucua, tii canaa quiniuria nata. ⁹ Naacuajitij, canaa jaara nio cuaqueyajinia quiyajaa mijiriani, naajuhuaaj canaa jaara na cartequeni, canaari saaja pa Jiyaniijia shuquiritiniuucua jiaatiaani. ¹⁰ Puetunu pajaniyajanaacuajaari Jesucristo taccoji na nequesoreesaqui nujuatejosaariquianoni. Cuniqui, puetunu mijiria pueya miishanojuanaari maatia niishishaanutaniya, maninia pa miishano, sesa pa miishanonio. Na nuhuaji, pa Jiyaniijiaari maninia miiniutianiya maninia miijiaa. Saniniuujia, sesa miijiaaari taraatia miishaanutaniyacujua.

Pueyasoori pueya jiyanooniu panijia cutara

¹¹ Naaratej, canaa niishishacari jiyanoohua puereeta quiniutianiari pa Jiyaniijia sanitiosacari na tojtiaashijiaa, canaari cunora saniniuujiaacua pueya tojtiniuria Pueyasoro Rupaani. Pueyasocuajaari niishiya canaari seetanujuanaa nera poonijionaani. ¡Seetanujuanaa naa nia niishitiriqiaaanihuaj! ¹² Majaari nia jiyaniiniu canaari tama canaajiniijiaaja nia pohuatanu coterohuanihuua, canaacua nia tiuuniuria. Canaari saaja naa nia pohuataani nia niishiniuria casaarate nia naata timitianu canaani. Canaa nia timitiare cutara, seetanujuanaa Pueyasora poonijionaa canaa quiniuucua. Naacuajiti nia naata cuno pueya tacunu canaacuaji, cuno pojori canapue te sapuenu juhua maninia quijiaa niquishano pueya najuhuanacuajani. Majaari nojori niishiniu tacaani taameca jiuujiaracateja nojorini. ¹³ Noojiaqueya niajanijiniimio naasucuaari jiyaniya canaari juhua paateca pocuaquiaani. Naajaa, canaa jaara seetanujuanaa paateca quirini, canaari paateca quiya Pueyasorani. Saniniuujia, canaa jaara maninia niishiriojuaca quiriquiani, canaari naa quiya niaarani, maninia canaa niishitiojonura niajanija. ¹⁴ Cristo paniniuucua canaa, cuno na paniniuuri canaa shiniujuquiaa nera canaa poonijionura. Naaratej, canaari pueyaracaanu nojuajiniji pohuataquiaani. Canaacuajaari niishiyani, nojuajaari puetunu pueyacuarajanaa cusoquiaari. Naa na cusonuuca puetunu pueya nitijianaatej, Pueyasora, puetunu pueyajanaari tari cusonuuquiaari Cristota. Naacuajitij, Pueyasoori na naata jiyanooniu puetunu Neyanuucua tiuuniaajanaa. ¹⁵ Cristocuajaari puetunu pueyacuarajanaa cusoquiaari, na samiitianishano pueya quiniuria saa neraja. Pocuara cusoquiaariiri. Nojuajaari pocuara samiitiaquiaarihuajuhuaaj. Naaratej, paa cuaraa miiria saa na panishanojua. Majaari socua pa miiniu tama pa panishanojuaaja. ¹⁶ Tarijia, canaari saaja canaa panishano pueyacua taraajejani. Quiarijia saniniuujia, Pueyasoro jatanishano pueya canaa quishacari, majaari rimiajata canaa paniniu pueya. Tarijia, canaari Cristo jyanijiani nojuaja naasucuaari nareja pueyano, juhua pajaniyajuhuaaj. Quiarijia cutara, majaari naa canaa niishiriojonu nojuajiniji. ¹⁷ Naajuhuaaj, cante Cristo rupesanonni, nojuajaari quiariniora jatanishano pueyano. Tariucuaanu sesa na quiniuuri tari jatanocuaaja. Saniniuujia, puetunujuanaari quiarinio quiya.

¹⁸ Puetunu cunojuanaari Pueyasoro miishano. Nojuajaari Neyanu Cristo cusojuaciaari pocuara, na jiyanooshano pueya pa quiniuria. Na nuhuaji, nojuajaari canaa jiyaramiquiaari puetunu pueyajanaa canaa pohuatanura, nojori jiyanooshaanurajuhuaaj. ¹⁹ Naacuajitij, Pueyasoori mijiria quiniaa jiyanoocua saaja Neyanu Cristocua nojori tiuushacari. Naa na jiyanooshacari pueyatej, majaari quenaaja sesa nojori miishano na saneenu quiniutianihuua socua. Nojuajaari canaa jiyatequiaari na rupaa pohuataanaa canaa quiniuria, pueya canaa tiuutiniuria Neyanu Jesucristocua, jiyanooshano nojori quiniurijuhuaaj. ²⁰ Naacuajitij, canaari Jesucristo jiyaramiquishanonni, canaa caminiujuniuria niaara na sequesano canaa. Naa canaa caminiujushacari Jesucristo rupaatej, Pueyasorujuanaari nia masuya na muerasu nia quiniuria, Neyanuucua nia tiuushacari. Naacuajitij, canaari Cristo niti nia secojijyani, ¡tama nia cuaqueyajaaja nia jiyanootiri Pueyasoro! ²¹ Pa Jiyaniijiarano Jesucristoni, nojuajaari tojetaarucuaajanaa sesa miyashijajuhuanajaj. Naajaa, na Que Pueyasoori nocua tiutiaquiaari puetunu sesa pa miishanojuanaa, pa niti na saniitiosocoriquiano. Naacuajitij, Neyanuucua pa tiuushacari, Pueyasoori pa jiyatequiaa juhua sesa miyashijia pa quiniuria.

6

¹ Naa Pueyasora poonijionaa canaa quiniuucuatej, canaari jiyanoohua nia secojijyani cuarta Pueyasoro muerasuna, saa Pueyasoraja nia quiri, nia jiyanoojia na quiniuucua. Maninia na muerasu nia quiri. ² Tariucuaanu na sequesanojuajaari naa naajiotasano quiya na rupaajinia:

“Quiaari namitia cua secojocanu, pueya cua naacunu panishacari. Pueya cua jiyanooshacarihua, janiyari quia naacucanujuhua”. Cua panishano pueyanaa, quiarijiaari Pueyaso jiyanooshacari pueya. Nojuajaari quiarijia pueya jiyatequiaa na muerasu nojori quiniuria.

³ Cunora, canaari tama canaa cuaqueyajaaja cojaquiaani, maja canaa miiniuria sesa tamasaca niquiara. Canaari naa maninia miiquiaani, nojori mariqui Jesucristoocua tiuyaquiriiri, nojori mariqui Pueyasora canaa poonijiosano sesacarejaariuhua. ⁴ Canaa cutaraari saaja maninia miiquiaa pueya niquiarani, puetunu pueya niishiniurijanaa canaari seetanujuanaa Pueyasora poonijionaani. Naaratej, canaari juhuajaniya rejere-taquiaa naquiya canaa miiniuni, canaa panishano canaa jiiitaquishacarijuhuaj. Naajuhua, canaari rejere-taquiaani puera canaa tacaashacari, canaa niishyaquishacari taa canaa miiniutianiya socuani. ⁵ Naajuhua, canaari juhuajaniya rejere-taquiaa canaa jaara majacujusaquiaani, canaa jaara nujuatejojuajinia nujuatejosaquiaaaniuhua. Nasojosano pueya jaara miitianu paniquiaa canaani, canaari na rejere-taquiaajuhua, pueya tiuiniuria canaa pohuatasanooocua. Naa Pueyaso jiyaramiquishano pueya canaa quishacaritij, canaari jiyanoohua poonijioquiaa nerani. Canaari sequeyarucua sutequiaani. Canaari miaajequiaajuhua. ⁶ Naajuhua, pueyari na naata niishiniu canaari seetanujuanaa Pueyaso seyani, sesa miyashijiaa canaa quiniucua, maninia canaa niishiniucua Pueyaso rupaajuhua. Niishishaatiajaari, canaari Pueyaso seyani, jacaria pocuajaca canaa quishacari juaajiaa pueyata, naajuhua, maninia canaa miishacari puetunu pueyajanaano. Naa niishishaatiajaariuhua canaari Pueyaso seyani Pueyaso Sohuanu cumaquishacari canaa, seetanujuanaa canaa panishacari pueyajuhua. ⁷ Niishishaatiajaariuhua canaari Pueyaso seyani seetanu rupaajanaa canaa pohuatanoocua pueya, naajuhua, casaa canaa miiniucua Pueyaso cumaacata. Canaari Sesaaca nujuataquiaa cumaatiani, Pueyaso jiyanooshano pueya canaa quiniucua. Pueyaso rupaata, canaa cutaraari saaja Sesaaca jiyatequiaa canaacuajini. ⁸ Naa Pueyasora canaa poonijiosacaritij, noojiaqueya pueyari canaa shuquiriaquiaani. Tamasacaari canaa rerequetequiaa saniniujia. Naajuhua, noojiaqueya pueyari maninia pohuatanoocua tamasaca niquiara canaajini. Tamasacaari canaa sesacquiaa saniniujia. Noojiaqueya pueyari canaa sequequiaa sapojonuujacatani. Tamasacaari saniniujia maninia tojitaquiaa canaa, seetanu rupaajanaa canaa pohuatasarani. ⁹ Noojiaqueya pueyari canaa niiquiaa juhua najuhuaa quijiaa pueyani. Tamasacara saniniujia, canaari tojishano pueya cutarani. Canaari sequeyarucua quera puecoosaquiaani. Naajaa, canaari saminiyo quiyajaani. Canaari jiyanoohua miitiasaquiaani. Naajaa, majaari canaa puecoosaanu quiquiaani. ¹⁰ Taraatia canaa quishacari, naajaa, canaari pueyaracaanu shuquiriaatia quiquiaani, Pueyaso pueya canaa quiniucua. Canaari seetanujuanaa casamiijiuniucuaajuhua. Naajaa, canaari queraatia pueya jiyatequiaa queraatia casamiriaca nojori quiniuria Pueyaso casaatani. Canaari juhua casamiijiuniucua niquishanoni. Naajaa, canaari puetunu canaa panishanojuanaa jiiitaacuajani.

¹¹ Corinto tiacajinia quiniaa cuarta Pueyaso pueyanaa, canaa nia tojitiare. Canaa jiaatiasacari niaacua, canaari seetanujuanaa puetunu canaa jiuujiajini canaa niishiriojosanojuanaa nia sequereeni. ¹² Majaari canaa tarinitianu canaa paniniu jiyanoohua nijaniya. Nijaniya sajaraj, majaari nia paniniu canaa, taa canaa paninya nijaniyacuaani. ¹³ Janiyari nia nenecojiyani, naatej, taa pueyano nenecojoquiaa necohuacuaani, ¡majaari canaacuaji nia taacanunu! Seetanujuanaa canaa nia paniri, taa canaa paniquiaa nijaniyacuaani, seetanujuanaa panitiojuaca pa quiniuria.

Paari Pueyaso quiquioni

¹⁴ Saniniujia, maja Pueyaso tojiyashijiaa pueya nia paniniu, nojori nia cojiniuria. Naajuhua, maja cutaraari nia caminiu Pueyaso tojiyashijiaa, niaa mariqui rimiajata quijiaa quiriiri. ¿Maninia miijiatucua shuquiriaatia quijia quiriquia, sesa miijiaa na quishacari? Maja. Cua riucaareto pueyanaa. ¿Cuhushiqui quijiateeri na naata juhuajaniya jatiqui quiniuni ninishiqui quijiaa? Maja na naata. ¹⁵ Seetanujuanaa pueyanaa, Cristoori maja Sesaaca rupena. Naajuhua, Pueyasooocua tiujia pueyanoori maja na naata maninia rupetoonu Pueyasooocua tiuyashijia pueyanota. ¹⁶ Paa jaara Pueyaso quiquo quirini, ¿paateeri Pueyaso quiquojinia shanacunutianiya samaruhua tiuquitanura tiini? ¡Maja! Paacuajaari pueyaracaanu Quijia Pueyaso quiquioni. Na pueyara na sequesanoocuaari naa naajiotasano quiya:

“Janiyari nojorijinia quiriquianoni. Janiyari nojori tajinia rucuanenonutaniyani. Janiyari nojori Jiyaniijajanaa quiniutianiyanoni. Nojoriiri cua pueya quiniutianiycua”.
¹⁷ Cunora, pa Jiyaniijiaari na pueya sequeya:

“¡Cua tojtitaashijiaca pueya tajiniji nia pacure! Nia shiriquiri tamocora nojoriicuai. Majaari sesa casaa nia saniniu paniniu. Naa jaara cua tojjijaca quiri, janiyari nia jiyatenutaniya quirianoni. ¹⁸ Janiyari nia Que quiniutianiyani. Naacuajitij, niaari cua niqiuohua quiniutianiya. Naa sequeyanijia, puetunu cumaacaracajanaa cua quiniuucua”.

7

¹ Naacuajiti canaa panishano pueyanaa, paacuaajaari naa seetanujuanaa pa Jiyaniijia sequesano pajaniyarano jiiitiaani. Naaratej, pueyaracaanu tama pa cuaqueyajaaja juhua jeequesano pa jiiitariquia, poojijuhua. Majaari pa shanacunu juhua curuushojosano pa quiniuria sesa pa miishanota. Pueyaso puerejaca pa quiriquia, tojetaarucujanaa sesa miyashijiaca pa quiniuria, saa neraja pa quiniurijuhua.

Corinto pueya tacatosacari nojori jiuujia, maninia nojori qiniuhuara

² Pueyanaa, ¿taa nia miiquianuni? ¡Canaa panijia nia quiriouha! Majaari canaa miiniu quiquianu sesa nijaniya. Majaari quenaaja niquiriyatu nijaniyajinijio canaa sesonu quiquianu canaa niishitiojosanota. Majaari canaa sapojonu quijia nijaniya. ³ Naa cua sequesacari nijaniyatej, majaari cua sequenu cua cararonura nijaniya. Janiyacuajaari tari nia sequereeni, canaari jyanohua nia paniyani. Naacuajitij, canaari shuquiriaatia quiniutianiyani canaa jaara puecoosaare canaa cumaquiniuucua nijaniyani, seetanujuanaa Pueyaso muerasu nia quiniuria. Naacuajitij, niaa jaara shaajerejuhuaj, paari pueyaracaanu jatiqui quijia quiniutianiya Pueyasotani. ⁴ Janiyari seetanujuanaa naa nia sequeyani cua panishacari nijaniya. Quiarijiani, janiyari jyanohua nia timitiaani, maninia cua tojiniuucua nijaniyajiniji. Canaari seetanujuanaa naquiya miiquiaani. Naa-jaa, maninia canaa tojiniushacari nijaniyajiniji, cunoori cua cumanijacanu. Cunora, janiyari jyanohua nia shuquiritiaani.

⁵ Canaa jaara tiuquiquianu niya Macedonia jiyajiniani, majaari quenaaja rupaquijia canaa quiniu quiquianu juhuajaniya. Canaari puetunu taraatia miishaacanjunaani. Pueyasocua tuyashijiacaari canaa juaariquiaa. Canaa jiuujiaari niaacu tacaariquiaa saniniuuja. ⁶ Jiyacaritij, Pueyasoori canaa cumanijacanu Tito tiuquishacariuhua canaacua. ¡Pa Pueyasocuaajaari tacaajiaa cumanijana! ⁷ Canaa jiuujia canaa cajitishacari, cunoori maja saaja canaa niquishacari Tito canaacua tiuquihuano. Canaa cutaraari canaa jiuujia cajitiquianuni, nojuaja jaara canaa pohuatacanu nijaniyajiniji jyanohua na timiniutia. Nojuajaari canaa pohuatacanu, niaanaari canaa niquiniuucua jiaatiaa. Niaanaari cucua taraajeya, jyanohua nia taraajetenuecua janiya. Niaanaari cucua tacaya jyanohua, cua rootasano tojjijaca nia quiniuria quiarijia cutara. Naa cua tojishacari niaacuajitij, janiyari jyanohua shuquiriquianuni.

⁸ Niaacuara cua naajioneeri nia taraajetecanu. Janiyari taraajecanjuhua, naa cua taraajetenuecua nijaniyatej. Quiarijia cutaraari maja cua taraajenu. Cua naajioneecua-jaari saaja rupaquijia nia taraajocanu. ⁹ Quiarijiani, ¡shuquiriaatia quiyani! Majaari nia jyaniniu janiyari shuquiriaatia quiyani naa cua taraajonuecua nijaniyatej. Shuquiriaatia quiya cutaranijia, cua niishishacari, naa cua taraajonuecua nijaniyatej, niaari nioojia tacatorohuacuaa Pueyasocua, Pueyaso tojtijaca nia quiniuhuara. Naacuajitij, janiyari quiarijia niishiyani, majaquiri cua sesonu quiquianu nijaniya, naa cua taraajonuecua nijaniyatej. Pueyasocuaquiri maninia poonijioriquiaa nioojiacajinia, naa nia taraajesacaritij. ¹⁰ Pueyasojunaana jaara pa taraajetere, cunoori maninia, poojia pa tacatonuhuara nocua, na jyanooniuria pajaniya. Na nuhuaji, paari shuquiriaatia quiya cutarani. Saniniuuja, tama pa taraajesacarijaaja, cunoori tama poojia pa shaajanurajaaja. ¹¹ Nia taraajesacari cua nacasusacari nijaniya cua naajioneejiniani, cunoori seetanujuanaa Pueyaso taraajetesano quiquianu nijaniya. Naa nia taraajenuucuatej, nia niquishuriirij, majaari nia tarishiniu quiquianu maninia nia miiniuria. Niaari ritia cua niishitiniu paniriquiaa juucua, maja niaacu na tiuutiasaanura cuno pueyano miishano sesa. Niaacuajaari maninia miiquianu nia juaashacari cuno sesa miijia. Niaari na naaqui puerecanujuhua, niaa mariqui nata cojiritiasaare saniitionuuri. Niaari cua jaqueroojocanu. Niaari ritia miiquianu cua naajiojinia cua sequesano nijaniya. Naacuajitij, niaari ritia cuno sesa miijia taanuucanu nia tajiniji, maja socua nia rupesano na quiniuria. Naa nia miiniuucua puetunu maninijanaatej, janiyari quiarijia niishiyani, majaquiri nia maniniucuanu quiquianu naa sacuaatia cuno pueyano miishanotej. ¹² Pueyanaa, niaari maninia canaa tojjijaca. Seetanujuanaa, cua naajiosacari niaacuara, majaari cua naajionu quiquianu saaja cuno sesa miijia pueyanojiniji, sesa miishano pueyanojinijio. Janiya cutaraari niaacuara naajiocanuni tamajaaja nio nia niishiniuria Pueyaso niquiara:

niaacuajaari seetanujuanaa canaa panijiaa quiyajaa, nia tojishacari canaa. ¹³ Naaratej, canaari canaa jiuujia cajitiquianuni, canaa tojishacari Tito pohuatasano nijanijajinjiji.

Majaari saaja Tito pohuatasano cumanijianu quiquianu canaa. Canaari Tito timitia-canujuhuj, canaa niquishacari nojuajaari shuquiriaatia tiuquiriohua canaacua. Puetunu nijanijajanaari na naacucanu, noojia na cajitiniuhua, najuhua na tacaaniucua niaacuajuhuj. ¹⁴ Tito quiaaquishacari niaacua, janiyacuaajaari juhuacarjia na pohuatacanu nijanijajinjijini, maja puera na taacanunura niaacuaji. Naa maninia nia quishacari Tito tiuquishacari niaacuatej, majaari cua caririquiniu quiquianu nijanijajinjiji. Puetunu cua pohuatasanojuanaa Tito nijanijajinjijiri seetanujuanaa quiquianu Titora. Naajuhuj, puetunu cua pohuatasano nijanijajanaari pueyaracaanu seetanu rupaajanaa quijia. ¹⁵ Quiarjia Tito niishiriojosacari nijaniya, nojuajaari socua jiyanohua nia panijia quiya, nia tojiniucua maninia nojuaja. Niaacuajaari tetecatucanu nia puerenuta na tiuquishacari niaacua. Majaari nia rerequetenu quiquianu nojuaja. ¹⁶ Janyajuhuj, jiyanohua shuquiriaatia quiyanjia, cua niishishacari quiarjia cutara cua naata niaacua tiuuni seetanujuanaa.

8

Capora pa quiriqiaa

¹ Quiarjiani pueyanaa, canaari nia pohuatanu paniyani, taa Pueyaso cumaquiya jiyanohua na muerasu maapue niya Macedonia jiyajinjiani. ² Nojoriiri jiyanohua taraatia miqiuoquiaa. Naajaa, nojoriiri saaja jiyanohua shuquiriaatia quiya. Naajuhuj, casamijiuucua nojori quishacari, naajaa, nojoriiri caporaturjuri. Nojoriiri na cumaneecajinjiji nareja niqutiojoquiaa queraatia, Judea jiyajinia casamijiuucua Pueyaso pueyara. Nojori niqutiojosanoori juhua casamiriaca pueya niqutiojosano. ³ Seetanujuanaa narta Pueyaso pueyaca nojori taraajenuta, nojoriiri naa na cumaneecajinjiji niqutiojocanu queraatia. Nojoriiri puetunu na jiiatasano cumaneecajanaa niqutiojonuucanu. Naacujitji, janyari jyaniquianuni, maja naasucuaari nojori naata niqutiojonu quiniutianiya socua. Naajaa, na nuhuaji, nojoriiri socua niqutiojocanu! Seetanujuanaari cua sequesano nijaniya. Janyacuajaari nojori miishano niquiniani. ⁴ Niya Macedonia jiyajinia quiniaa parta Pueyaso pueyani, nojoriiri nijanijajinjiji tojiquianu. Niaanaari cumaneeca reratenu paniriqiaacuaa, nia jiyarosocoriguiano Judea jiyajinia quiniaa casamijiuucua parta Pueyaso pueyara. Naaratej, nojoriiri jyanohua canaa nenecojanu canaa masenura nojori niqutionu panishano cumaneecajuhua, parta Pueyaso muerasa. ⁵ Seetanujuanaa Pueyaso tojjijia nojori quiniucua, nojoriiri maja saaja na cumaneeca na niqutiojonu quiquianu. Nojoriiri coteenu tama nojori cuaqueyajaaja jiyatecanu seetanujuanaa nojori quiniuria saaja pa Jyanijjia, taa Pueyaso paniya pa miiniuricajani. Naajuhuj, nojoriiri tama na cuaqueyajaaja jiyatecanu canaa tojjijia nojori quiniurijuhuj. Cunora, canaari nojoriicuaaji jiuujiatecanuni. ⁶ Naa capora niqutiojonaa nojori quiniucuatej, canaari Tito sequerucuaani, niaacua na quianuhuaa quiarjia. Nojuacuajaari tarijia naacucanu nijaniya, nia reratenu nia niqutionu panishano cumaneeca. Niaacuajaari maninia niqutiojocanu juhua capora pueya. Naaratej, nojuaja cuara nia naacuura, nia tucuatunura reratenu puetunu nia niqutionu panishano cumaneecajanaa. ⁷ Nijaniya, Corinto tiacajinia quiniaanaa, niaacuajaari jyanohua maninia Pueyaso muerasa. Niaari Pueyasocua tiuujiaa jyanohua. Naajuhuj, niaari jyanohua maninia Pueyaso rupaa niishitiojonuujuaca. Niaari Pueyaso niishitiaa jiiiaajuhuj. Niaari mariyata shitimia poonijionuujuaca, tamasa nia naacunura. Naajuhuj, niaari canaa panijiaa jyanohua. Naatej, taa maninia miijiacatucuaa nijaniyani, capora nia quiriuhuj, nia cumaneeca nia niqutiojonura nareja parta Pueyaso pueyara.

⁸ Majaari juhua nia jyanijia cua sequenu nijaniya, nia cumaneeca cua niqutiojotenura nijaniya. Janyari nareja nia pohuatariquiaa capora Macedonia pueyajinjijini, tama nia niishiniurijajaaja, niaate seetanujuanaa canaa panijiacajuhuj, taa Macedonia jiyajinjijini pueya paniya canaacuaani. ⁹ Niacuajaari pa Jyanijia Jesucristojinjiji niishiya; na Que Pueyaso shuriucua na quishacarjia, nojuajaari puetunu maninia casaa-janaa jiiitiaa quiquiaari. Naajaa, nojuajaari juhua casamijiuurua quiquiaari, mijiria na rosesacari pocua. Nojuajaari naa taraatia quijia quiquiaari, saniniucua jyanohua shuquiriaatia quijia na jiyatenura pajaniya, juhua jyanohua queraatia casamiriaca pueya pa quiniuria. Naa jaaara seetanujuanaa panijiaa quiriqiaa, naa nia miirijuhuj, taa pa Jyanijia miiquiaricuaani.

¹⁰ Janyari niishiriojoriquaani, taate socua maninia nia naata miiniu parta casamijiuucua Pueyaso pueyarani, shuquiriaatia nia quiniurijuhuj. Cua tojiri. Niacuajaari niishiya, noo marijara pa shococanutej, niaacuajaari juhuacatecara cumaneeca reratejonu

cotecanuu. Niaari naa maninia miiquianu tama nia tacaashacarijiaaja niarta Pueyaso pueyacuua. ¹¹ Niaari shitimia juhuacatecara nia cumaneeca niqutiojonu cotecanucuaja. Naaratej, quiarjia nia sequeyanijia, niaa cuaara naa shitimia niqutiojonu tucataara puetunu nia niqutiojonu panishano cumaneecajanaa. Nia jiitiasano cumaneecajinjii nia niqutiojore, taa cumaneeca nia niqutiojonu paniyacuajani. ¹² Nia tojiri. Paa jaara seetanujanaa nareja niqutiojonu paniriqira pa cumaneecajinjijini, Pueyasoori pa niqutiosano shuquiritiaja, paa jaara juhua capora niqutiojore pa jiitiasanojinijini. Maja cutaraari Pueyaso paniniu pa niqutiojonura, pa jaara na jiitiaaquiyani.

¹³ Majaari Pueyaso paniniu cutara puera nia niqutiojonura nia cumaneeca, tamasaca quiniuria casamiriaca, saniniuujia nia jiitiaquiniuria nia panishano. ¹⁴ Maninia cutaraari puetunu Pueyaso muerasujanaa jiitianura na panishano. Naaratej, quiarjiani, niaa cuaara niqutiojora nia jiitiasanojinijii, nojori jiitianura na panishanojuhuaj. Tamacari saniniuujia, nojoriiri saniniuujia nia jiitiaquishoo casaa nia niqutiojonutaniyacuujia, niaa jaara na jiitiaaquiri. Naacuajitij, puetunu Pueyaso muerasujanaa na panishano jiitianutaniya mariyata, maja rimiajata. ¹⁵ Naajuhuj, tariucuacaanu Pueyaso Rupaajinjiani, jiyocacaanuji Pueyaso tinishano Israel pueya miaquesocoriquiano panjiniijiiri naa naajiotasano quiya:

“Cante queraatia reratequiaarini, majaari quenaaja na cureenu quiquiaari. Naajuhuj, cante secaja reratequiaarini, majaari nojoriria na pueetanu quiquiaari”.

Naaratej, Pueyasocuaa tiuujiaca nia quiri. Nia jiitiasanojinijii nia niqutiojore nareja, nia jamueyaquiniutia.

Pablo pohuatasano Titojinjii, Tito cojiniaajinjijinio

¹⁶ Titoori jiyanoohua niaacua jiaatiaja, taa cua jiaatiaa niaacuacuuaani. Pueyasocuaajari na jiyatequiaari nia panijia na quiniuria. Janiyari cunora Pueyaso sequequiaani: “iPaacarasho Pueyasanaa!” ¹⁷ Naacuajitij, janiya jaara Tito sequerucuuaani nia niquniuucua na quianura, nojuajaari cua timitiriucuaa. Tama nojuajaarijia nia niquniuucua jiaatiaa. Naacuajitij, nojuajaari quiarjia quianutaniya niaacua.

¹⁸ Canaari tamonu parta Pueyaso pueyano jiyaroya Titotani, na tarajariquiano. Cuno pueyanoori puetunu Pueyaso muerasu maapuejanaa shuquiritiasano pueyano, maninia na pohuatanuucua pa Jiyaniijia Jesucristojinjii. ¹⁹ Macedonia jiyajinia quiniaa Pueyaso muerasu maapueeri tari na saquiriojocanu na tarajanura canaa, pa niqutiojosano cumaneeca canaa jiyatanura nata, Judea jiyajiniara. Naa pa niqutiojonuucua pa cumaneeca parta Pueyaso muerasuratej, queraatia pueyari pa Jiyaniijia timitianutaniya socua. Naajuhuj, parta Pueyaso pueya Judiocuacaari niishiniutianiya, narta Pueyaso pueya taucuacaquiiri nojoriicua taraajecajuhuj. ²⁰ Maniniacuajaari parta Pueyaso pueya maapue saquiriojosano pueyano quianura canaata. Naacuajitij, majaari pueya jiyaniinu quiniutianiya canaari nio queraatia canaa reratesocoriquiano cumaneecajinjii nohuasenutaniyani. ²¹ Canaari pueyaracaanu maninia miiniu paniquiaani puetunu pueya niquiarajanaa, maja saaja Pueyaso niquiar.

²² Quiarjijiani, niaacua canaa jiyarosocoriquiano pueyata, canaari niquijijinio tamonu parta Pueyaso pueyano jiyaronutaniyani. Pueyaracaanu na poonijiosacari pa Jiyaniijia, janiyajanaari na niqiquianuni. Nojuajaari seetanujanaa pueya panijia, Pueyaso panijia na quiniuucua. Quiarjia cutara, seetanujanaa niaacua na tiuushacari, janiyari niishiyani, nojuajaari jiyanoohua maninia Pueyaso pueyano. ²³ Tamonu jaara nia nequesotare cante Titoni, niocua na riuacure: “Nojuacuajaari Pablota poonijiona, na cumaquiniuria pajaniya”. Naajuhuj, Tito cojiniaari niquiji Pueyaso muerasu maapue jiyarosano niaacuajuhuj. Pa Jiyaniijia Jesucristoori socua maninihuaqueetasano, maninia na tojtiajaca nojori quiniuucua. ²⁴ Naaratej, nio pojori jaara niaacua tiuquiiijisee, niocua puetunujanaa maninia miiri nojoriria, nia paniniutia nojori. Naacuajitij, puetunu Pueyaso muerasu maapuejanaari niishiniutianiya niaaqui seetanujanaa panijia. Naajuhuj, puetunu Pueyaso pueyajanaari niishiniutianiya, majaari cua sapojonu quiquianu, maninia cua pohuatasacari nojori nijaniyajinjii.

9

Pablo shiniujiushacari pueya, cumaneeca nojori reratenura narta Pueyaso pueyara

¹ Janiyaruhua najuhua niaacuara naajiyani, cua sequenura nijaniya, nia cumaneecata nia naacunura Judea jiyajinia quiniaa parta Pueyaso pueya. ² Janiyacuajaari niishiyani, niaari tarijia na naacunu paniquianucuaja. Cua shuquiritiasacari cunora nijaniya, janiyari pueyaracaanu niya Macedonia jiyajinia quiniaa parta Pueyaso pueya niquiar pohuataquiaa nijaniyajinjini. Janiyacuajaari nojori pohuataquiaani, nijaniya

Acaya jiyajinia quiniaa pueyani, niaari nia cumaneeca niqutionu paniquianu noo mar-
 iijara pa shococantej. Naaratej, queraatia niya Macedonia jiyajinia quiniaa Pueyaso
 pueyari cunora jaarajaaja na cumaneeca niqutionu panijajuhuaaj, naa nojori cua po-
 huatanuucua nijajaniyajinijitij. ³ Janiyari niaacua tiuya seetanujuaanaani, niaacuaajaari
 canaacuajaj tariucuaa reratesano jiitianutaniya nia cumaneeca, taa cua pohuataquiaa
 niya nijajaniyajinijicuaarani. Naajaa, janiyari nio parta Pueyaso pueya jiyarunutaniya
 niaacuani, seetanujuaanaa juhuacarijia nia reratenura nia niqutiojosocoriquiano cuma-
 neeca. Majaari cua paniniu cutara cua pohuatasano nijajaniyajiniji cuaracashitishaa-
 nura. ⁴ Macedonia jiyajinijinio parta Pueyaso pueya naasucuaari cuaa tiuquiniutianiya
 niaacua. Nojori jaara cuaa tiuquishii niaacua, canaa jaara nia riuriatasee nia cuma-
 neeca rerateyojuani, canaari caririquiniutianiyanani. Niaari caririquiniutianiyajuhuaaj.
⁵ Naaratej, janiyari Tito sequereeni, parta Pueyaso muerasuta na quianura coteenu
 niaacua cucuajaj, nia niqutiojonu panishano cumaneeca cuaara tari reratesano quiriia
 canaacuajaj. Naacuajitij, nia niqutiojosano cumaneecaari seetanujuaanaa nareja nia niq-
 uitionu panishano quiniutianiya, maja canaa niqutiojotesano nijajaniya.

⁶ Pueyanaa, nio sequesano nia niishiriquia. Naa sequeyari: “Cante secaja natajani, se-
 caja senoonutaniyajaariuhuaaj. Saniniuujia, cante queraatia natajani, queraatia senoonu-
 taniyajaariuhuaaj”. Naajuhuaaj, paa jaara capora quiriquiani, Pueyasoari saniniuujia socua
 queraatia pa niqutionutaniya pa niquticosanojiniji. ⁷ Naaratej, puetunu nijajaniyajanaa
 cuara niqutioora taa nioojajinia nia niishiriojoree nia niqutiojonuracuajani. Majaari
 nia cumaneeca nia niqutiojonu nia jamuenuta, nocua nia taraajenutano. Naajuhuaaj, ma-
 jaari nia niqutionu nia cumaneeca saaja tamasaca shiniujiushacari nijajaniya. Pueyaso
 cutaraari shuquiriaatia niqutiojuaca timitiaja. ⁸ Pueyasocuaajaari cumaacaraca na niq-
 uitionura nijajaniya puetunu nia panishanojuanaa nia jiitiasocoriquiano pueyaracaanu.
 Naacuajitij, niaari pueyaracaanu socua queraatia jiitiajaca quiniutianiya, tamasaca nia
 niqutiojonurajuhuaaj, nojori jaara jiitiaquiriquia nojori panishano. ⁹ Naa jaara naa
 capora quiriquiatej, niaari nio tariucuaaanu Pueyaso Rupaa naajiotasano tohuateenu-
 taniya. Naa sequeyari:

“Maninia pueyanoori juhua capora nareja niqutiojojua na casamijiniji casamiiuniucua
 pueya. Na miishanoori pueyaracaanu maninia quiniutianiya Pueyasora. Majaari
 Pueyaso niyajetanu quiniutianiya”.

¹⁰ Pueyano natasacari casaa jajau na cuhuariquiajinia, Pueyasoari na canijiaquiaa.
 Naacuajitij, na camaruuri socua jiitianutaniya tamacari na natasocoriquianohua, na
 miaquesocoriquianonio. Naajuhuaaj, juhua capora nia niqutiojosacari nia jiitiasanojiniji,
 niaari juhua nia cuhuariquiajinia nataa. Naacuajitij, Pueyasoari nia jiyatenutaniya socua
 queraatia jiitiajaca nia quiniuria, pueyaracaanu maninia nia miiniuria tamasarajuhuaaj.

¹¹ Naa capora nia quiniucua nia casaatatej, Pueyasoari juhua capora nia niqutiojonu-
 taniya puetunu na jiitiasanojinijijianaa, queraatia nia jiitianura, tamasaca nia niqutio-
 jonura pueyaracaanu. Naacuajitij, canaa jaara nia niqutiojosano cumaneeca tiuquitiasee
 Judea jiyajiniani, parta Pueyaso pueyari Pueyaso timitianutaniya. Capora nia quiniuu-
 cua, nojoriiri Pueyaso sequenutaniya, “paacarasho”. ¹² Naacuajitij, nojori jaara masere
 nojoririano nia jiyarosano cumaneeca, majaari saaja nojori jiitianu quiniutianiya nojori
 panishano. Cunoori saniya nojori shiniujiuniutianiya nojori shuqiritiniuria Pueyaso,
 queraatia nojori sequesacari: “Paacarasho Pueyasonaa”. ¹³ Nojori jiitiasacari puetunu no-
 jori panishanojuanaa, nojoriiri Pueyaso maniniuhuaqueetanutaniya jiyanoohua. Nojoriiri
 naa maniniuhuaqueetanutaniya Pueyaso, nojori niishishacari niaaqui seetanujuaanaa
 Jesucristo Rupaa tojitiajacajuhuaaj, naajaa, taucuaa nia quishacari nojoriria. Nojoriiri
 Pueyaso maniniuhuaqueetanutaniyajuhuaaj jiyanoohua capora nia quiniucua nojoriria,
 tamasaranio. ¹⁴ Nojoriiri Pueyaso secojonutaniya niaacuarajuhuaaj, jiyanoohua nojori
 paniniutia nijajaniya, Pueyaso jyatenuucua nijajaniya nojori panijiaa nia quiniuria.

¹⁵ Naajuhuaaj, janiyari jiyanoohua Pueyaso sequeyani, “paacarasho”, jiyanoohua maninia na
 miiniucua nijajaniya, Neyanu Jesucristo jataniniucua nioojia.

10

Pablo cuaara tojishaaria, Jesucristo jiyatenuucua nojuaja na rupaa pohuatanara

¹ Janiyacuajaari Pablani. Quenaaja cua tojitiare. Cua Jiyaniijia Cristoari jiyanoojia
 quiquiaaricuaa, jacaria pocuajajuhuaaj. Janiyari naa quiniu panijajuhuaaj. Naaratej, jani-
 yari quiarijia nia nenecojiyani, cua tojitiare quenaaja. Tamasacanaari cua pocuaquiaa,
 janiyanaari jacaria pocuaja quiquiaa juhua puerejani, nia tajinia cua quishacari. Sanini-
 uujia, tucuaaanu cua quishacari, janiyanaari jiyanoohua nia nacasuquiaa cua naajione-
 jiniani, juhua nia puerasano jiyaniijia. ² ¿Seetanutejanaa, janiyate naani? Janiya jaara naa

quiya niaarani, naajaa. Quiarijia tucuaaanu cua quishacarijia, janiyari nio cua naajiojini nia nenecojiyani, nia tojiniuria janiya. Saniniuujia, niaacua cua tiuquishacari, janiyari noo pojori nacasunutaniya jiyano huani, sacuaratia cucuara rimiaaquenuuquiiaani. Janiyari naa miinitianiya nojorini, nojori jaara tarinitiaquiyajaa naa sacuaratia na pocoojonutej. Cuno pojoriiri jiyaniya canaari saaja juhua mijiria quiniaa pueya miqiuiaani, maninia canaa quiniuria nia niqiuara. ³ Seetanujuanaacuaaquiniatejaj, canaari nareja pueyani. Naajaa, majaari canaa miaquejonu quiqiuiaa canaa paraa, taa pueya miaquetojoquiaacuaani. ⁴ Mijiria quiniaa pueyari miaquetojoquiaa cutara tama nojori shipinishano casaatajaaja. Canaa miaquetojotaja saniniuujia, cunoori Pueyaso cumaacajanaa cutara. Naacuajitij, canaa naata Sesaaca niishishano shocotanu. ⁵ Pueyaso cumaacata, canaari mijiria niishijiaa niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishiniuria Pueyaso. Naajaa, Pueyaso cumaacata, canaari puetunujuanaa najuhuaana pueya niishiriojosano jataniquiaani, Cristo tojjiaa nojori quiniuriajuhuaj. ⁶ Canaacuajaari Pueyaso jenucuasano pueyani, canaa nacasunura puetunu tojiyashijiacajanaa. Naacuajitij, niaa jaara puetunu Pueyasojiniji canaa niishitiojosanojuanaa tojtiajacara quiriohua, na nuhuaji cutara canaa naata puetunu cureeno tojiyashijiacajanaa saniitionu.

⁷ Niaari tama cushitiquiaajaacujua nia tiuushacari cuno sapojonuujuaca pohuatasanoocua. Nojoriiri sapuenu juhua Jesucristo jiyaramiquishano niqushiya najuhuanaj. Maninia nia niishiriojore pueyanaa, nijaniya cante sapojosaacanucujani. Niaa jaara niishiri niaari seetanujuanaa Cristo saquirojosano pueya, naacuajitij, nijaniya cuara niishiiria canaari Cristo saquirojosano pueyajanihuaj. ⁸ Niaa jaara jiyaniya janiyari juhua pueya shocotaja nia sequeyani: "Canaari nia jitianaaani", naajaa, majaari cua caririqini niaa cua sequesacari nijaniyatej. Pa Jiyaniijia Cristojuanaacuaajaari canaa jiyatequiaari nia jitianaa canaa quiniuria. Canaari naa jiyatesaquiniaarini, canaa cumaquiniuria nijaniya na rupaata, seetanujuanaa Cristo pueya nia quiniuria. Majaari canaa jitianu najuhuaana na cumaaca, canaa sesonura nijaniya. ⁹ Naa cua naajiosacari niaacuaratej, majaari nia jiyaniyu janiyari nia piriyojiyani nia puerenura janiya. ¹⁰ Tamasaca nijaniyajinijinio pueyanaari cua sequequiaajuahuaj: "Pabloori puera jiyano huana pa nacasuquiaa na naajioneejinia. Naajaa, pa tajinia na quishacari, nojuajaari juhua tojishoo pueyano niqushano quiqiuiaa. Naajuahuaj, na pohuatasacari pa niqiuara, na pohuatasanoori maja shanohua tojishano". ¹¹ ¿Seetanutejanaa? Cante naa pocuaquiiaani, nojuaja cuara niishiiria quiarijia, taa canaa naajiocanu niaacuaracuaja tucuaaanu canaa quishacarijiani, canaari nia miinitianiyan niaacua canaa tiuquishacari.

¹² Cuniqini naata quiyajaarihuua tamasa pueya, canapue te nia sequequiaacujani, nojoriniiaari socua maninia Pueyaso rupaa pohuatanaa tamasaajiniji, canaajiniijiuahuaj. ¿Nojoriitiri seetanujuanaa socua maninia Pueyaso rupaa pohuatanaa canaajiniji? Johuaj. Naajaa. Majaari canaa tacaaniu quiqiuiaa juhua nojori canaa quiniuria. Cuno pojoriiri tama na cuaqueya timitiacoquiaajaacujua, nojori soosacari narta Pueyaso rupaa pohuatanaa. Nojoriiri naa quijiatejaj, nojori jiyanihacari nojori cutaraari socua tojishano pueya tamasaajiniji. Naa nojori miishacarijij, nojori cutaraari seetanujuanaa mosanucua. ¹³ Canaa cutara, majaari tamasa poonijosano canaa jiyatenu quiqiuiaa juhua canaa poonijosano Pueyasora. Canaa cutaraari saaja canaa miishano shuquiritiaquiiaani, tee Pueyaso jiyaroquiaari canaacujani. Nojuacuajaari canaa jiyaramiquiiaari niaacua Corinto tiacajinia, nia niqiuara canaa pohuatanaa na rupaa. Naacuajitij, niaari na muerasura quiqiuiaa. ¹⁴ Majaari najuhuaana canaa timitianu nijaniya, Pueyaso muerasu nia quiniucua. Niacuajaari Pueyaso muerasura quiqiuiaari canaa pohuatanaa nia niqiuara seetanu rupaaajanaa Jesucristojiniji. Canaa cutaraari seetanujuanaa Pueyaso rupaa pohuatanaa coteetanaa nia niqiuarani. ¹⁵ Majaari canaa shuqiritianu najuhuaana nijaniya. Canaa cutaraari nia tiuutiquiaari Jesucristoocuan, niaacua Pueyaso jiyaronucua canaa. Naajaa, canaari socua nia pohuatana panya Pueyaso rupana, seetanujuanaa Jesucristo rupaaacua tiuujia nia quiniuria. Naacuajitij, niaa jaara seetanujuanaa Pueyaso rupaa tojjiaa quiri, niaari saniniuujia na naata canaa cumaquiniyu. ¹⁶ Niocua canaa cumaquiri canaa quianura tamaqui, tee Jesucristojiniji pohuatasoojua quiyacuajani, ti canaa pohuatanaa nojuajiniijiuahuaj. Majaari canaa quiniyu paniniyu pootia tamasa poonijosaqui, taa cuno rimiaacoori quiqiuoia shuquiriaatia canaa poonijosaquicuani. ¿Nojori shuqiritiasanoteeri tama nojori poonijosanojuaja? Maja. Niacuajaari Pueyaso muerasura quiqiuiaari canaa nia tojtianuucua.

¹⁷ Pueyanaa, nio tariucuaaanu naajiotasanoori niaara, nia niishishocoriquiano. Naa sequeyari: "Cante shuquiriaatia quijia quiniyu paniyani, nojuaja cuara pa Jiyaniijia shuqiritiaara cutara". ¹⁸ ¿Taa nia sequeyani pueyanaa? ¿Cana Pueyaso sequenutaniya

socuaarini: “Quiaa cutara maninia cua pueyanoniyojua”? ¿Cunotee, tama na cuaqueyajaaja sequejani: “Cutara cutaraari maninia Pueyaso pueyanoni”? Maja. Pueyaso shuquiritiasano cutaraari noo pueyano, cana pa Jiyaniijiajanaa sequenutaniyacujani: “Quiaa cutaraari maninia cua pueyanoniyojua”.

11

Pablo pohuatasano na paraajiniji

¹ Pueyanaa, cua tojitiuri nareja. Juhua paateca tama cua cuaqueyajiniijiaaja nia pohuatanu paniyanijia. Naajaa, quenaaja nia rejeretare janiya. ² Janiyari jiyanoehua nia tacaatiaquiaani, saaja Jesucristora nia quiniuria. Niaacuajaari niishiya, naatej, taa pueyano cojuacuuaa neyatunioyua canuucujani, saaja na camiriquiano pueyanora na quiniuria, naajuhua, janiyari nia cojuanu paniyani sesosoo nia quiniuria nia Jiyaniijia. Cristocuajaari juhua nia niyacarana. Nia jiiitana cua quishacari, janiyari juhua nia queni. ³ Tarijia, niaacuajaari saaja Cristo tojtiajaca quiquiaari, na panijiaa nia quishacari. Quiarjia saniniuuja, janiyari Sesaaca nia pueretaani, nojuaja mariqui nia sapojoreeri Cristocuajani nia rupatenura, taa cuno Susanacu sapojoquiaari Eva tariucuaaanucuaani. ⁴ Cuno sapojonuujuaa tiuquijiosacari niaacua, tamaatia nojori pohuatasacari Jesujiniji niajaniya, niaari jaarajaaja ritia na tojiquiaa. Nojori niishitiojosanoori tojetaarucujanaa tamaatia canaa niishitiojosanojiniji niajaniya. Nojori nia tojishacari, niaari juhuajaniya samaruhua niishishano tojtiaquiaajuhua. Niaacuajaari tari tiuquiaari Jesucristoocua, Pueyaso jiyanoehua niajaniya. Saniniuuja, cuno pojori pohuatasacari tamaatia, taa nia miiniutianiya Pueyaso pueya nia quiniuriani, niaari jaarajaaja ritia nojori tojiquiaajuhua. ⁵ ¿Cuno sapojonuujucateeri socua tojishocoriguiano janiyajiniji, niaa na jiyatecanu juhua seetanujanaa Pueyaso jiyaramiquishano pueyarani? ¡Janiyara maja! ⁶ Seetanujanaa, majaari cua niishinu maniniuhuaqueenu cua niishishano Pueyaso rupaa, taa cuno pojoricuaani. Naajaa, Pueyasojiniji cua niishishano cutaraari seetanu rupaajanaa, tojishocoriguiano cutara. Maja najuhuanaj. Niaacuajaari cuno niishiya, pueyacaanu saaja maninia cua miishacari nia niquiara, cua pohuatasanojinijinio.

⁷ ¿Casaara nia tojtiaa cuno pojori quiarjianiijia, majaari saniniuuja nia tojtianu janiya? ¿Janiyateeri sesa miiquianu niajaniyani, cua masejoaquiniuuca nia cumaneeca cua pohuatanuucua Pueyaso rupaa, Pueyaso pueyara nia jatanishaanura? Janiyacuajaari tama cua cuaqueyajaaja mueyashitiquiaarini cua cumaqiniuria niajaniya. Naa cua miiniuucaatej, ¿cunoteeri sesa niaara? ⁸ Janiyari tamonu jiyacijinia Pueyaso pueya maapuejiniji masejoquiaari cumaneecani, cuno cumaneecata cua quianura niaacua, nia niquiara cua pohuatanura Pueyaso Rupaa. ⁹ Saniniuuja, nia tajinia cua quishacari, cua jiiitaaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua jiiitaaquishacari cua panishanotej, Macedonia jiyajinijinio parta Pueyaso pueyari namitia tiuquijioquiaari. Nojori cutaraari cumaneeca cua niqutioquiaari, cua panishano cua masetajara. Janiyari naa pueyacaanu tama cua cuaqueyajaaja cojuacuuaani, maja cua taajetenura niajaniya cua panishano cua jiiitaaquishacari. Janiyari naa miiniutianiya pueyacaanuni. ¹⁰ Cua Jiyaniijia Cristocuajaari niishiya, majaari quenaaja cumaneeca cua masejonu quiquiaari Acaya jiyajinia quinia parta Pueyaso pueyajiniji. Naacuajitij, majaari quenaaja niqiriyatu pueyano Acaya jiyajinijinio naata sequenu janiya: “Pablocuajaari cumaneeca mashiniquijioyua canaajiniji”. ¹¹ Pueyanaa, ¿niaate niishiya casaara pueyacaanu cua sequequiaani, maja cumaneeca cua masejonu quiquiaa Acaya jiyajinia quinia Pueyaso pueyajiniji? Naa cua sequesacariitij, ¿janiyateeri nia paniaquiyani? ¡Maja! Pueyasocuaajaari niishiya, janiyari jiyanoehua nia panijiani.

¹² Nia sequereera casaara cua mashiniquijiaquiquiaa nia cumaneecani, cua pohuatasacari Pueyaso rupaa nia niquiara. Cuno pojori, nia jiyanihano Pueyaso jiyaramiquishano pueyani, nojoriiri nia jiyajenetenu paniquiaa. Nojoriniiaari seetanujanaa Cristo jiyaramiquishanojuhua, taa canaacuaani. Saniniuuja, nojori mashiniquijosacari nia cumaneeca, nojori nia niqutiojonura nareja, naacuajiti maatia niishishiyari, ¡nojoriiri jiyanoehua tamaatia canaajiniji! Naaratej, majaari quenaaja canaa mashiniquiniu quiniutianiya nia cumaneeca, canaa pohuatanuucua Pueyaso rupaa niajaniya. ¹³ Seetanujanaari, ¡nojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya nojori quiniuria. Naacuajitij, nojoriiri nia sapojia. Nojoriiri sapuenu juhua Cristo jiyaramiquishano pueya niqushano najuhuanaj. ¹⁴ Cunoori maja jiyajeneta naa nojori miiniuriatej. Satanascuajaari tama na cuaqueyajaaja jatanijia shacantuucara, juhua Pueyaso seru na niqushaanura, pueya na sapojonura. ¹⁵ Naaratej, majaari cua jiuujiatenu cuno pojori jaara tama na cuaqueyajaaja jiyatecanu juhua seetanujanaa maninia miijiaa pueya

nojori quiniuria. Nojoriiri naa miiquiaa, Satanás seya nojori quiniuucua. Naajaa, ¡nojoriiri saniitiosaanutaniya sesa nojori miiniuucua!

Pablo pohuatasacari naquiya na miiniujiniji, Cristo jiyaramiquishano na quiniuucua

¹⁶ Socua nia sequenu pacuteyanijia, majaari nia jiyaniinu janiyari paatecani cua pohuatasacari tama janiyajiniijiaaja. Naa jaara jiyaniya janiyari seetanujuanaa paatecani, naajaa, rupaquijia cua tojtitiare quenaaja. Janiyari juhua paateca tama janiyajiniijiaaja niaara pohuatanu panyajaanihuaj, taa nia tojishano pueya miiquiaacuani. ¹⁷ Naa cua pohuatasacari tama janiyajiniijiaajatej, cunoori maja cua Jiyaniijia Cristo pohuatesano janiya. Cunoori tama cua pohuatasanojuaja, juhua paateca cua quishacari. ¹⁸ Naatej, taa queraatia Pueyaso rupaa pohuatanaa tama nojoriijiniijiaaja pohuatanuuquiaacuani, janiyari quiarijia naa tama janiyajiniijiaaja pohuatanu panyajuhuj. ¹⁹ Jiyanhua niishijia nia quishacari, niaari cuno paatecoori tojtiaquiaa juhuajaniya. Naatej, taa nia tojtiaquiaa cuno pojoricuaani, quiarijia cua tojtitiarejuhuaj. ²⁰ Naajuhuj, niaanaari juhuajaniya rejeretaquiaa cuno pojori, nojori jaara nia poonijio-tequiaa juhua nojori seya. Niaanaari nojori rejeretaquiaa nojori jaara nia jitiiasano casami riutiocojoquiaa niaacuaji. Juhua nia jiyaniijia nojori quishacari, niaanaari nojoriicua shiiniuquiquiaa saaja, naajaa, nojori soosacari niajaniya. Niaanaari juhuajaniya nojori rejeretaquiaa-juhuaj, nojori jaara nia jiquioco maseteriquia. ²¹ ¡Nojoriquiiri jiyaniijinucujanaa cutara! Saniniujia, janiyari nojori naaqui caririqiyani juhua nojori cua quiyaquiniuucua, maja naa canaa miiniuucua niajaniya, taa nojori miiquiaa sesa niajanijacuani.

Naajaa, quiarijia cutara, janiyari tama janiyajiniijiaaja pohuatanutaniyani, taa nojori pohuataquiaa juhua paateca tama nojoriijiniijiaajacuani. ²² ¿Taa nojori sequequiaani? ¿Nojoritiniiaari Hebreo pueya, Hebreo rupaa pocuajacajuhuj? Janiyajuhuj. Janiyari Hebreo pueyanojuhuaj, Hebreo rupaa pocuajano. ¿Nojoritiniiaari Pueyaso saquiriojosano Israel pueyajiniijio? Janiyacuajaari Israel pueyacuajinio supuenojuhuj. ¿Abrahamtenaari nojori supuetana? Abrahamcuajaari cua supuetanajuhuj. ²³ ¿Nojoritiniiaari Cristo jiyaramiquishano pueya? Janiya cutaraari seetanujuanaa Cristo seruni. Janiyari jiyanhua soyani, juhua paateca naa cua pohuatasacari tama janiyajiniijiaajatej. Naajaa, janiyari seetanujuanaa nia sequeyani. Janiya cutaraari socua jiyanhua nojoriijiniji poonijio-quiaari Cristorani. Janiya cutaraari pueyaracaanu caminiujijushaaquiaari nujuatejojuajinia nujuatejonuni, Jesucristojiniji cua pohuatanuucua. Naajuhuj, janiyari pueyaracaanu caminiujijushaaquiaari majacununi. Naajuhuj, janiyari pueyaracaanu cocuaatia miiquiaarini, pueya monu panishacari janiya. ²⁴ Cuarta Judiocuacaari cua caminiujiquiaari majacunu puetunu niquiriyatu pa juaashiquiajanaa. Cuarta Judiocuaca majacuacari, nojoriiri na majanu serojoua. Nojori majasano jaara treinta y nueve qiri, nojoriiri jiyacari carteja na majacusano pueyano. ²⁵ Naajuhuj, janiyari jiuujianaraca caminiujijushaaquiaari macata piquiniuni. Tamacari, janiyari saitia jacusaquiaarini. Shoniacu caminijinia cua jaaretasacari buquejinia, jiuujianaraca buqueeri tiuquiti-quiaari. Naa tamacari buque tiuquitiacarijuhuaj, janiyari na raucua cuataquiaarini puetunu niucujanaa, niquiriyatu juucanico. Cunoori quiquiaari puereeta shoniacu caminia jiuujiajinia. ²⁶ Janiyari pueyaracaanu tiquiyocua rucanejojua quiquiaarini. Naacuajitij, moocua cua niuuniujishacari, janiyari cocuaatia miiquiaarini. Naa cua rucanejosacari, janiyari pueyaracaanu puereeta nohuasenujuaca quishaqui shoco-quiaarini. Naajuhuj, tama cuarta Judiocuacajarijia pueyaracaanu cua miitanu panijia, taucacanio. Puereetaari quiquiaarijuhua cua rucanejosacari tiacajinia, tiquiyocua pueya quiyaquishaqui, shoniacu caminijinianio. Naajuhuj, puereetaari quiquiaari janiyara, cua jyanishacari janiyari cuarta Pueyaso muerasu tajinia quiyani, saaja cua paraa nojori quishacari. ²⁷ Jiyanhua cua poonijosacari cua Jiyaniijiaara cua samareenuta, janiyari pueyaracaanu sutequiaarini. Janiyari miaajequiaarini. Janiyari jiyamuequiaar-ijuhuj. Janiyari noojiaqueya miaqueyaquiquiaarijuhuaj, jeya cua quiyaquishacari. Janiyari naquiya miiquiaari cua rucanejosacari shiniquijainiajuhuaj, toqueeju cua quishacarijuhuaj.

²⁸ Janiyari naa naquiya miishaaquiaarini, mariyata tamaatia naquiya miiniujuhuj. Naajuhuj, janiyari puetunu juucujanaa niishiriojoquiaani, taariquitijia Pueyaso muerasu maapue quiya puetunu jiyacajinijanaatej. Janiyari jiyanhua nojoriicua tacaquiaani. ²⁹ Naacuajitij, tamonu cuarta Pueyaso pueyano jaara rejeretaquiquia Sesaa saniniujishacari nojuaja, janiyari jiyanhua taraajeja nocuani. Tamonu jaara sesa miitishaare, janiyari na naaqui caririqiyajuhuj. ³⁰ Naa jaara panija socua cua pohuatanura nia-janiya tama janiyajiniijiaaja, nia pohuatareeraqui pueyaracaanu taraatia cua miishaanujiniji. Tama janiyajaja, janiyari maja cumueecani. ³¹ Pa Jiyaniijia Que Pueyasocujari

niishiya janiyari seetanujuanaa sequeyani. Nojuajanaa cuaara pueyaracaanu manini-uhuaqueetasaaria cutara, maja nojuajiniji pohuatanaa. ³² Tariija, Damasco tiacajinia cua quishacari, tamonu pueyanoori Damasco tiaca jiyaniijia quiriquiaa. Nojuajaari cuno jiya jiyaniijia Aretas jiyatesano quiquiaari, Damasco tiaca jiyaniijia na quiniuria. Cuno jiyaniijiaari na soldadohua nujuatejoquiaari tiaca shocua sohuaca tohuatayaji, nojori qianura juucua janiya. Nojoriiri cua quiatunu paniriquiaa Jesucristojiniji cua pohu-atanuucua. ³³ Naajaa, cuarta Pueyaso pueyari namitia cua roshinitiaquiaari shuquiri-aaia, puereetuua canasatujinia, cuno tiaca sohuaca tacuhua shuucujaji. Janiyari naa mashiquishaaquiaari cua paraacuajini.

12

Pablo pohuatasano Pueyaso niquitishanojiniji nojuaja

¹ Paa jaara tama pajaniyajiniji pohuatariquia juhua paatecani, cunoori najuhuanaj. Naajaa, socua nia pohuatereeraj. Nia pohuatereera taa cua niquitishaaquiaari pa Jiyani-ijia casaa jiyocuaaanuni. ² Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiquojianirani. Naa cua tacan-ishaanujinijitij, tari shocorucuaari catorce marijia. Majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohanu soj. Johuaj. Saaja Pueyasocuaajaari na niishiya. ³ Cua tojitiare, seetanujuanaa majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohanu soj. Pueyasocuaajaari na niishiya. ⁴ Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pohuatasaanu mijiria quiniaa rupaaajinia. Pueyasoori cua tenujuquiaari maja cua caminiujiniuria jiyocuaaanu cua tojishano mijiria quiniaa pueyara. ⁵ Naa Pueyaso niquitiniucua janiyatej, janiya maara tama janiyajinijijiaaja poojotariquia cua timiniutiani, juhua tamasaca shocotaja cua quishacari. Naajaa, ma-jaari cua timitianu tama cua cuaqueyajaaja. Saaja shuquiriaatia quia cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. ⁶ Naajuhua, janiya jaara tama janiyajinijijiaaja pohuatanu paniriquiani, cuno maara seetanujuanaa pohuatasano quiriquia, maja juhua paateca pohuatasano. Seetanujuanaa majaari naa cua pohuatanu paniniu, pueya mariqui cua pohuatasanojiniji cua jiyaniiri janiya jiyanoehua maninia pueyanoni. Pueya cuaara niishiiria cutara taamuca pueyan-ote janiyani, saaja nojori namijiata nojori niquishacari cua miishano, tama nojori nu-maatajaaja nojori tojishacari cua niishitiojosanojuhuaj. ⁷ Pueyaso niquitishano janiyani, na niishitishano janiyajuhua, cunoori puera jiyanoehua maninia quiquiaari. ¡Cunoori jiyanoehua cua timitiquiaari! Naaratej, janiyari cua cuaqueyajinia nootusaquiaari juhua jiohuacatani, janiya mariqui pueya shocotajara quiriiri. Cuno taajeta noonuuri Sa-tanás miishano quiquiaari, na tacaatiniuria janiya. ⁸ Janiyari jiyanoehua secojoquiaari pa Jiyaniijiani, nojuaja cuaara shaataara cua nootunenu. Janiyari jiuujianaraca pa-cutejoquiaari secojonuni. ⁹ Cua Jiyaniijiaari saaja cua sequequiaari: “Janiyacuaajaari quia cumaquiniutianiyani, cua panishano pueyano quia quiniucua. Saaja cunocua-jaari quiara. Cua naatacuajaari socua jiyanoehua poonijiotenu cua cumaaca sasaca cua pueyajinia, tamasaca niishiniuria cunoori seetanujuanaa cua cumaaca, maja pueyano cumaaca”. Naa cua Jiyaniijia riuucasacari janiyatej, janiyari shuquiriaatia quiyani cumaacaaju pueyano cua quiniucua pueyaracaanu. Naacuajitij, Cristo cumaacaari socua janiyajinia niquishaaquiaa poonijiyano. ¹⁰ Naacuajitij, janiyari shuquiriquiaani cuma-acaaju pueyano cua quiniucua, Pueyaso cumaquiniuria janiya. Naacuajitij, tamasaca jaara sacuaaraatia casaa sequeriquia janiya na juaashacari, janiyari Pueyaso cumaacata juhuajaniya na rejeretaquiaani. Naajuhua, janiya jaara cua panishano jitiaaquiriquiani, naajaa. Pueyaso cumaquishacari janiya, janiyari juhuajaniya rejeretaquiaani. Naajuhua, janiya jaara naquiya miitiasaquiaani, taraatia cua miishacarijuhua Cristora cua poonijionuucua, naajaa. Pueyaso cumaacata, janiyari juhuajaniya rejeretaquiaa saajani. Naacuajitij, janiya jaara tojetaarucuaajanaa cumaacaaju quiquiaani, janiyari jiyacari socua jiyanoehua cumaacaraca quiquiaani, Pueyaso cumaquiniucua janiya.

Pablo tacaashacari Corinto tiacajinia quiniaa Pueyaso muerasu maanuucua

¹¹ Janiyari seetanujuanaa juhua paateca tama janiyajinijijiaaja pohuatareeni, juhua pueya shocotaja. Niaacuajaari naa cua pohuatere, niaacuaja naara cucujaji tacuyaquiquianu cua sesacaja pueyatej. Janiyanaari najuhua quijia pueyanoni. Naajaa, niaacuajaari niishiya, janiyari maja socua najuhua quijia cuno pojorijinijini. Cuno pojori nia tojishano pueyani, nojoriiri tama na cuaqueyajaaja jiyatecanu juhua seetanujuanaa Jesucristo jiyaramiquishano pueyara cutara. ¹² Juhuaajaniya

cua rejeretasacari naquiya cua miiniu nia tajinia cua quishacari, naajaa, janiyari pueyaracaanu jiyajeneta casaa miijioquiaari Pueyaso cumaacata nia niquiarani. Niaari nocuaji jiuujiatecoquiaari. Naacujitij, niaa cutaraari niishiquiaari janiyari seetanujuanaa Cristo jiyaramiquishano pueyano cutarani. ¹³ ¿Janiyateeri sesa nia jiitiaquiaarini, Pueyaso rupaa cua niishitiojosacari nijaniya? ¡Maja! Janiyari nia miiquiaari maniniani, naajuhua, taa cua miiquiaari tamasaca jiyacajinia quiniaa Pueyaso pueya maapuecuaani. Majaari rimiajata cua miiniu quiquiaari nijaniya, niaata cua quishacari. Maja cutaraari cua mashiniquijionu quiquiaari cumaneeca nijaniyajiniji. ¡Cua jiyanoori cunora, jaara sesa quiquiaari nijaniyara!

¹⁴ Quiarijiani, janiyacuaajari quera quiaa niaacuani. Janiya jaara niaacua quiaareni, cunota quiniutianiyari jiuujianaraca cua pacutenu niaacua cua quianu. Majaari nia jiyaniniu janiyari nia cumaneeca mashiniquijionuucua quianutaniyani. Janiya cutaraari maja cua jiaatianu nia jiiitasano casamiicua. ¡Janiyari saaja niaacua jiaatiaa cutarani! Niaacuaajari juhua cua muerasuniyojua. Niaacuaajari maninia niishiya, muerasuniyojua maja na reratenu cumaneeca na quera. Na que cutaraari saniya cumaneeca rerateja necohuara. Naacujitij, cua mashiniquijiyaquishacari cumaneeca nijaniyajiniji, janiyari seetanujuanaa juhua nia queni. ¹⁵ Janiyari shuquiriaatia tama cua cumaneecajaaja puecanutaniyani cua quishacari niaata, socua cua niishitiojonura nijaniya. Naacujitij, janiyari tama cua cumaacajaaja puecanutaniyajuhua, nioojia cua cumaquiniuria. Janiyara, nioori taraatia: janiya jaara socua nia paniquiaani, niaari socua jiyacatequiaa secaja nia paniniuria janiya.

¹⁶ Niaacuaajari niishiya, majaari quenaaja nia niquitionu quijia nia cumaneeca janiya. Naajaa, tamasaca nijaniyajinijionaaari soquecuya, janiya naasucuaanaari jiyasohuaaja nia cumaneeca nohuasejoquiaani, cua sapojonuta nijaniya. ¹⁷ ¿Seetanutejanaa pueyanaa? ¿Janiyateeri nia sapojoquiaari niaacua cua jiyaramiquishano pueyatani? ¿Nojoritiri nia cumaneeca masequiaari? ¡Maja! ¹⁸ Janiyacuaajari Tito jiyaroquiaari niaacua na quianurani, na cumaquiniuria nijaniya. Janiyari nata jiyaroquiaari tamonu Pueyaso pueyanoyuhua. ¿Titoteeri jiyacari nia cumaneeca mashiniquiquiaari? ¡Majaruhua! Niaacuaajari niishiya, Titocuaajari cumaneecaacua jiaatiaashijia, juhua janiyajuhua. Janiya Titota, canaacuaajari jiyanoohua nia paniquiaani.

¹⁹ Sacuaraatia canaacuara nia rimiaaquenuucua pueyanaa, naajaa, majaari nia jiyaniniu canaa tama canaacuaajiaaja tacuyani, juhua canaa nequesoreenaa nia quishacari. Saniniuujia, canaari niya Pueyaso niquiara nio naajiyia niaacuarani, Cristo pueya canaa quiniucua. Naajuhua, puetunu cua sequesanojuanaa nijaniya nio cua naajiojiniani, cunoori cua cumaquiniuria nijaniya cua panishano pueyanaa. Janiyari naa nia nacasuyani, seetanujuanaa Jesucristo tojjijia nia quiniuria. ²⁰ Janiyari puereyani, niaacua cua tiuquishacari, janiyari niaacua taraajenutaniyani cua riuriatasacari nijaniya sesa quiyanojua, maja maninia taa cua paniriquiaacuajani. Janiya jaara nia riuriatasee naa sesa quiyanojuani, jecatoojua, niaari saniniuujia taraajenutaniya nia niishishacari taa cua miiniutianiya nijaniyani. Janiyari puereyani niaa naasucuaari juayonuujutaajaa. Niaa naasucuaari niarta pueyano jiiitasanoocua jiaatiajaca quiyajaa. Niaa naasucuaari juaanu porocua quiyajaa. Niaa naasucuaari tama nia panishanojuaja miijiaa quiyajaa. Niaa naasucuaari niarta pueyacuara coriaacojojuaca quiyajuhua. Naajuhua, niaa naasucuaari niarta pueyacuara rimiaaquenuujuaa quiyajaa. Naajuhua, niaa naasucuaari tama nia cuaqueyajaaja jiyaniya niaa socua maninia pueya tamasaca pueyajiniji. Niaa naasucuaari jatiqui quiyashijiacajuhua, pueyaracaanu nia juayonuujutanuucua. ²¹ Naacujitij, janiyari puereyani janiya naasucuaari Pueyaso niquiara caririquiniutianiya nia naaquini, niaa jaara naa sesa miijiaa quiyajaa. Janiyari puereyajaanuhua, janiya naasucuaari nujuquentaniya cua taraajenuta noo sesa miijiaa pueyacuani, cuno pojori jaara sesa na miishano tarinitiaaquianujua. Noojiaqueya nijaniyajinijioori sacuaraatia miijiaa quiquianujua: cararaatia miijiaa sacuaraatia, na camishoo maaji numuetucunu porocujuhua, naajuhua, majaari tama nojori cuaqueya panishanojuaja nojori rejetenu quiquiaa.

13

Socua Pablo nacasusacari Pueyaso pueya

¹ Nioori quiniutianiya jiuujianaraca cua pacutesacari quianu niaacua. Tariucuaaanu Pueyaso rupaajinia, paari nio niishitiojosaaquiaarini: querajaa pueya jaara mariyata pohuatatare nojori niqishanojiniji, pa naata seetanujuanaa na pohuatasanooocua tiuuniu

cutara. Naajuhuaaj, niaacua cua tiuquishacari, janiyari naa miiniutianiyanii cua nequesoresacari cuno sesa miijiaca. ² Pueyanaa, janiya jaara pacutequiaariuhua niaacua quianutej, janiyacuaajaari puetunu niajaniyajiniinjio cuno sesa miijiacajanaa piriyojoquiaarini. Quiarijiani, tucuacaanu cua quishacarijia, janiyari puetunu cuno sesa miijiacajanaa socua piriyojijiani. Naacuajitij, janiya jaara niaacua tiuquishiini, cuno pojori jaara noojia tacatoyaquiyajaa, majaanori cua jiuujiaani quiniutianiya, narta sesa miijiacanio. ³ Cua nequesoresacari cuno sesa miijiaca, niaari jiyacari niishiniutianiya janiyari seetanujuanaa Cristo sequesano caminiujumiani, taa nia niishiniu paniriquiaacua-jani. Niaacuajaari tari niishiya, pa Jiyaniijia Cristoori maja na jitianu niajaniya juhua cumaacaaju pueyano. Niaacuajaari na cumaaca niquiquiaa tama niajaniyajiniajaaja na saniitiosacari niajaniya. ⁴ Seetanujuanaa, Cristoori juhua cumaacaaju quiquiaari jaara niyacutesanojinia teetesaaquiaari. Saniniuujia, Pueyaso samiitianishacari nojuaja, nojuajaari quiarjia puetunu Pueyaso cumaacajanaa jitiiaa. Naajuhuaaj, canaa, na rupaa pohuatanaani, canaari naacuiya miishaaquiaajaaniuhua saaja mijiria quiniaa canaa quiniucua, taa nojuaja quiquiaaricuaani. Saniniuujia, Cristo rupuesano canaa quishacari quiarijiani, canaa cutaraari Pueyaso cumaacaracani, maninia canaa jitianura niajaniya.

⁵ Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujiaa, maja soj? ¿Niaate maninia miijiaca taa Pueyaso muerasu niiquiaacuaani? ¿Majateeri nia niishiniu, niaa jaara seetanujuanaa Jesucristoocua tiuujiaa quiri, nojuajaari nioojiajinia quiya? ⁶ Naajuhuaaj, jacaria nia niishiriojore canaajiniji. Nia niishitiriquiani, canaari seetanujuanaa Jesucristo jiyaramiquishano pueyani, maja sapojonuujuaca. ⁷ Canaari Pueyaso secojoquiaa naacuarani, tojetaarucujanaa sesa miyashijiaa nia quiniuria, maninia Pueyaso muerasu nia quiniuria. Majaari naa canaa secojonu quiquiaa saaja pueya niishiniuria canaa seetanujuanaa Jesucristo jiyaramiquishano pueyani. Canaari saaja nia panitiaa cutarani, maninia miijiaca nia quiniuria Pueyasora. Niaa jaara naa maninia miijiacara quiriohua, majaanori canaa saniitionu quiniutianiya niajaniya Pueyaso cumaacata. Naacuajitij, majaanori pueya niquiniu quiniutianiya Pueyaso cumaaca canaa jitiiasano. Naajaa, pueya jaara jiyaniya canaa najuhuaa quijiaa pueyani, naajaa. ⁸ Canaa jitiiasano cumaacaari maja canaa saniitotajara seetanujuanaa Pueyaso rupaa tojtiajaca. Canaa cumaaca cutaraari canaa cumaquiniuria niajaniya, socua maninia Pueyaso Rupaa tojtiajaca nia quiniuria. ⁹ Naacuajitij, canaari shuquiriquiaani niaacua canaa paaretaaquishacari canaa cumaaca, canaa saniitionura niajaniya niaa jaara Pueyaso tojtiaashijiaa quiriquia. Naacuajitij, canaari juhua cumaacaaju pueya niquis-hano quiniutianiyanii, cumueeca Pueyaso muerasu nia quishacari saniniuujia. Canaari cunora Pueyaso secojoquiaani, tojetaarucujanaa maninia miijiaca Pueyaso muerasu nia quiniuria seetanujuanaa. ¹⁰ Janiyari nio cua naajioneejinia jiyanoehua nia nacasuyani tucuacaanu cua quishacarijia, maja jiyanoehua cua nacasunura niajaniya, niaacua cua tiuquishacari. Pa Jiyaniijiacuaajaari cua jiyatequiaari juhua nia jiyaniijia cua quiniuria, na cumaacata cua canashitijionura niajaniya, seetanujuanaa cumueeca na muerasu nia quiniuria. Pueyaso niqutiosano na cumaaca janiyari maja cua sesonura niajaniya.

¹¹ Cua tucuatunura nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniucua jiaatiajaca nia quiri. Nioojia nia cumaquiri, maninia cua rootasanota. Naajuhuaaj, nia jiyanoootooriquia maninia rupuetootesano nia quiniuria. Naa nia quishacarijia, Pueyasoori nia rupueja quiniutianiya. Nojuajaari pa panijia, pa jiyanoojiajuhuaj. ¹² Pueyanaa, Pueyaso tojijia nia quiniucua, nia saruhuaajotooriquia nujuunuta, seetanujuanaa nia paniniutia niarta Pueyaso pueya. ¹³ Puetunu niquijinio parta Pueyaso muerasujuaanaari cua sequeya cua saruhuatunura niajaniya.

¹⁴ Pa Jiyaniijia Jesucristo cuara cumaquiri niajaniya pueyaracaanu. Niajaniya cuara quiriia pa Que Pueyaso panishano pueyaracaanujuhuaaj. Naajuhuaaj, niaa cuara quiriia Pueyaso Sohuanu rupuesano pueyaracaanu. Puetunu niajaniyajanaa cuara naa quiriia.

PABLO NAAJIONEE GÁLATA JIJAJINIA QUINIAA PUEYASO PUEYACUARA

Gálata pueyacuara naajione

¹ ¿Niaate quiyajaa pueyanaa? Janiyari Pablóni, pa Que Pueyaso jiyaramiquishano. Janiyari maja nareja pueyano jiyaramiquishanoni. Mijiria quiníaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristojuanaacuaajaari cua jiyatequiaari na jiyaramiquishano cua quiniuria. Nojuacuajaari na Que samiitianishanohua macujiniji. ² Niya cuata quiníaa parta Pueyaso pueyatani, janiyari nio naajiyani. Nio cua naajioneeri puetunu Galacia jiyajinia quiníaa Pueyaso pueya maapuerajanaa. ³ Pa Que Pueyaso, mariyata pa Jiyaniijia Jesucristoni, nojori cuaara cumaquiiria nia-janiya, nioojia cajitishano nia quiniurijahuaj. ⁴ Jesucristoori tama na cuaqueyajaaja panitiaquiaari pocuara na mosaanura. Naacuajitij, nojuajaari pa jeequequiaari puetunu sesa pa miishanojinijianaa. Nojuajaari naa miiquiaari sesa miiniucua jiaatiano pa cartenura. Nojuajaari naa cusoquiaari pocuaratej, taa pa Que Pueyaso paniquiaaricua-jani, na muerasu pa quiniuria. ⁵ Naaratej, pa Que Pueyaso cuaara maninuhuaqueetasano quiiria. Cuaara naa quiiria pueyaracaanutej.

Maja tamonu maninia rupaa quiniu socua Jesucristo rupaajiniji

⁶ ¿Taa nia miiquianuni pueyanaa? Quiarijiani, janiyari jiyanohua tacaya niaacuani. ¿Ni-aateeri ritia carteanu Jesucristo rupaa, tamaatia niishitiojosano tojtiajaca nia quiniuria? Pueyasocuaajaari Neyanutaja nio cojiritiaquiaari paniniu, Jesucristo miiniucua maninia niaara, na panishano pueya nia quiniuria. ⁷ Seetanujuanaa, majaari socua tamonu rupaa quiniu Pueyaso pueyara pa jatanishaanura. Noo juhuari nia cushitiojoquiaa saajatejaj, najuhuaana tamaatia nia niishitiojonuuquiaatej. Nojoriiri Jesucristo rupaa cushitiojoquiaa niaara, nojori tacarajosacari najuhuanaj, mariyateyacato nojori quiniucua. ⁸ Cua tojiri pueyanaa, tamonu pueyano jaara pocuaji Tacuna rupaa niishitiojoriquia niajaniya tamaatia canaa niishitiojosanojiniji niajaniya, Pueyasoori na saniitionutaniya. Naajuhuaaj, janiya jaara tamaatia pohuatere Jesucristojiniji niajaniyani, jiyocuaacuaji roseno Pueyaso serujuhuaaj, Pueyasojuaanaari canaa saniitionutaniya. ⁹ Janiyacuajaari naa sequeja niajaniyani. Quiarijia socua pacuterohuacuara sequenu nia niishishocoriquiano. Cua tojiri pueyanaa. Níaa jaara tamaatia pohuataasaariquia Jesucristojiniji, maja naate taa tari cua pohuataquiaari niajaniyacuajani, Pueyaso cuaara saniitiooranuj.

¹⁰ ¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniyani. Janiya jaara saaja pueya timitiasano quiniu paniriquiani, janiya maara pa Jiyaniijia Jesucristo seru quiyaquirini.

Taa Pablo jatanishaquiaari Jesucristo jiyaramiquishano na quiniuriani

¹¹ Cuarta Pueyaso pueyanaa, nia pohuatereera cante cua niishitiojoquiaari Jesucristo rupaaní, cua pohuatasano niajaniyani. Pueyanaa, nio rupaa janiya na pohuataa nia-janiyani, nioori maja mijiria quiníaa pueya niishitiojosano janiya. ¹² Taa cua sequeya niajaniyacuajani, majaari nio rupaa cua niishiniu quiquiaari tamasaca pueyajiniji. Jesucristojuanaacuaajaari na rupaa cua niishitiquiaari.

¹³ Níaa naasucuaari janiyajiniji tojinuujiacuaja tarijia. Seetanujuanaa cuarta Judiocuaca miishano miijia cua quishacarijia, janiyari Pueyaso saquiriojosano pueya pueconu panijia puetunujuanaani. Janiyari jiyanohua paracaajia nojorini. ¹⁴ Janiyari seetanujuanaa canaa supuetanaa niishitiojosano tojjia quijia cutarani, socua cuarta Judiocuaca mashiquiorijiniji. ¹⁵ Naajaa, jiyanohua panijia Pueyaso quiniucua, cua supueyaquishacarijia, ¡nojuajaquiiri tari cua saquiriojoquiaari na pueyano cua quiniuria! ¹⁶ Naacuajitij, tama na panishacarijiaaja, nojuajanaari Neyanu cua niishitiquiaari, Neyanujiniji cua pohuatanaura taucuaa. Neyanu na niishitiniu nuhuaji janiya, majaari quenaaja tamasaca nequesotanucua cua quianu quiquiaari, cua niishiniuria seetanutejanaa na niishitishano janiya. Pueyasocuaajaari maninia cua niishitiquiaari puetunujuanaa Neyanujiniji. ¹⁷ Naajuhuaaj, majaari cua quianu quiquiaari Jerusalén tiacajinia, tii cua niquiniuria cuarta Jesu jiyaramiquishano pueya. Nojoriiri coteenujuanaa Jesu jiyaramiquishano pueya quijia. Jiyacaritij, majaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiyaquishaqui Arabia jiyajiniani. Na nuhuaji, janiyari tacatequiaarihuua Damasco tiacajiniohuani.

¹⁸ Jiuujanaraca marijia cua shocotejonu nuhuaji Damasco tiacajinia, janiyari shusha jiyacari quiaquiaari Jerusalén tiacajiniani, Pedro cua niishiniuria shushajanaa. Nata

cua quishacari, quince juucaari cua shocojoquiaari tiini. ¹⁹ Jiyacaritij, majaari socua Jesu saquiriojosano pueya cua niqiniu quiquiaari. Janiyari saaja Santiago niqiuquiaari cutarani. Nojuacuajaari pa Jiyaniijia Jesu tarajanu. ²⁰ Pueyanaa, Pueyasocujaari niishiya, janiyari nio cua naajiojinia seetanujuanaa nia pohuataani.

²¹ Na nuhuaji, janiyari quiaquiaari Siria jiyajiniano, Cilicia jiyajiniano. ²² Saniniuujia, Judea jiyajinia Jesu tojtiajaca maapueeri juhuanojuaja maja na niishitiuniu quijia janiya. ²³ Nojoriiri saaja naa poojotasaaquiaari janiyajiniitij: “Noo pueyano tarijia pa miitijaja naquiya Jesujiniji pa pohuatasacaritij, nojuajanaari quiarijia pa Jiyaniijiajiniji pohuataa pueya niqiarajuhuaaj”. ²⁴ Naa nojori tojiniuushacari janiyajiniitij, nojoriiri Pueyaso maniniuhuaqueetaquiaari nojori paraca na jataniniuucua Jesu rupaa pohuatana na quiniuria.

2

Jesu jiyaramiquishano pueya niishishacari, Pablo seetanujuanaa Jesu jiyaramiquishano pueyanohuhuaaj

¹ Catorce marijia jaara shocojoquiaari, janiyari Bernabeeta Jerusalén tiacajinia pacutequiaariuhua quianuni. Janiyari jiyacari Tito rupoquiaari cucuajuhuaaj. ² Pueyasocujaari cua toquiaari cua quianura Jerusalén tiacajinia. Janiyari cunora quiaquiaarini. Tii cua quishacari, janiyari Jesu tojtiajaca jiiitanaa pueyata rerejoquiaarini. Maja seetanu puetunu nojoritijajanaa, saaja nio pojoritia: Santiago, Pedro, Juannio. Janiyari saaja cuno pojori niqiuara pohuataquiaarini taa cua pohuataquiaa Jesujiniji puetunu taucuaacajanaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate najuhuana sesa niishitiojiya taucuaani?” Cua segetureeri: “Maja. Quiaacuaja seetanu rupaaajanaa niishitiojiya taucuaa, naa Jesucristojiniji quia pohuatasacari nojori”. ³ Naajuhuaaj, parta Pueyaso pueyano Titoni, cuata quiquiaari tiini, nojuajaari Grecia jiyajinijinio tahue. Naajaa, majaari na sequesaanu quiquiaari na cararaatiuuquia co miatesaanura, seetanujuanaa Pueyaso pueyano na quiniuria. Nojuajaari maja naa na sequesaanu quiquiaari. Canaa rerejosacari Pueyaso pueya jiiitanaata, nojoriiri Tito niqiuquiaari nareja, nojori na rupuenurajuhuaaj. Nojoriiri niishiquiaari nojuajaari seetanujuanaa Pueyaso pueyanohuhuaaj, saaja Jesucristoocua na tiuuniuucua. ⁴ Saniniuujia, noojiaqueya canaa Judiocuacajinijinoori tama nojori cuaqueyajaaja jiyatequiaari juhua Jesu tojtijaca pueyara, nojori cojinuria canaa. Nojoriiri naa canaa rupuequiaari na sapojonuta. Canaata nojori quishacari, nojoriiri canaa shanacutajia nojori niishiniuria canaate seetanujuanaa Pueyaso muerasuni, saaja Jesuucua canaa tiuushacari. Nojoriiri juucua canaa jiyatenu paniquiaari tariuacuacaanu Moisés Rootasano tojtijaca canaa quiniuhuaa. ⁵ Canaari nojori niishitiojosano pataquiaari saajani. Majaari quenaaja shiitianiyojua nojori rootasano canaa tojiniu quiquiaari. Canaari naa miiquiaarini seetanu Jesucristo rupaaajanaa canaa cojuanura niaara, seetanujuanaa Pueyaso muerasu nia quiniuria saaja Jesucristoocua nia tiuuniuucua. Majaari canaa cojitiniu paniniu quiquiaari Jesucristo rupaa, tariuacuacaanu niishitiojosanota.

⁶ Cuno pojori Pueyaso pueya maapue jiiitanaa Jerusalén tiacajiniano, nojoriiri jiyanohua tojishano pueya quijia. Janiyara naajaa. Pueyasocujaari najuhuana quijia jiyanoocuaajuhuaaj, taa na jiyanoocuaa tojishano pueyacuani. Naajaa, cuno tojishano pueya jaara tojiquiaari taa cua pohuataquiaa Jesucristo rupaani, majaari quenaaja niqiriyaatu rupaa nojori sequenu quiquiaari, nojori niishitiojonura janiya socua. ⁷ Nojori cutaraari niishiquiaari Pueyasocujaari seetanujuanaa cua jiyatequiaari na rupaa pohuatana cua quiniuria taucuaaca, taa Pedro na jiyatequiaari Judiocuaca niqiuara pohuatana na quiniuriacuani. ⁸ Pedro Jiyatena Judiocuaca niqiuara Jesucristojiniji pohuatariquianoni, cuno Pueyasojuaanaacuajaari cua jiyatequiaarijuhua taucuaa niqiuara pohuatana cua quiniuria. Naacuajitij, canaari mariyata Pueyaso jiyaramiquishano pueyani.

⁹ Santiago, Pedro, Juannio, nojoriiri socua tojishano quijia puetunu Jesuucua tiuunaa cuarta Judiocuacajinijinojuanaa. Nojoriiri seetanujuanaa puetunu Pueyaso muerasu jiyaniijianucuaajanaa quijia. Naajaa, nojoriiri seetanujuanaa niishiquiaari Pueyasoori maninia cua jiyanoocuaari, na jiyatenura janiya Neyanujiniji pohuatana cua quiniuria taucuaa niqiuara. Naaratej, nojoriiri na juaashiquia niqitiojoquiaari canaani, janiya, Bernabeenio. Nojoriiri cunota juhua canaa sequeturiquiaa canaari seetanujuanaa nojori cojiniaani. Naa canaa sequetuquiaarijuhuaaj: “Maniniacuaja. Nia quiojiyare taucuaacuaa tii nia pohuatanura Jesujiniji nojorijuhuaaj. Canaari saniniuujia parta Judiocuaca tajinia poonijionutaniyanijia, nojori niqiuara canaa pohuatanura Jesujinijijuhuaaj”. ¹⁰ Nojoriiri canaa sequetuquiaarijuhuaaj: “Canaa panishano pueyanaa, majaari

nia niyajetanu casamiiuniucua pueya naacunu”. Naaratej cuarta Pueyaso pueyanaa, puetunu tiqiuycuajanaa cua rucuanesacari, janiyari naa miiquiaa seetanujuaani.

Antioquiya tiacajinia Pedro nacasusaanujiniji pahuatasano

¹¹ Tamacari, canaa quishacari Antioquiya tiacajinia, Pedroori canaacua niqiaarijihuaj, canaata na quiniuria tii. Tii na quishacari canaata, Pedroori sesa miiquiaari cua niqiaara. Cunora, janiyari jiyanoohua na nacasuquiaarini. Cuno na miishanoni, cunoori seetanujuaanaa sesa quiquiaari Pueyasora. Naa na miishacaritij, tamajaaja miiriqiaa cocuaatiaari. ¹² Pedroori naa miiquiaaritij. Coteenu canaa cojiqiaari maniniaari tariucua Jesuucua tiuujiaa taucacata, canaata na miaquejonura jatiqui. Jiyacaritij, canaacua tiuquiiqiaariiri socua cuarta Judiocuaca Jerusalén tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii canaata, Pedroori canaacuaji rupatequiaari. Majaari tari na miaquenu paniniu quijia canaata, tariucua Jesuucua tiuujiaa taucacata. Narta Judiocuaca puerequiaariiri maja na sequesaaanura: “Cunoqui sacuaaraatia miaquejojua taucacata”. ¹³ Tii quiniaa Jesuucua tiuujiaa Judiocuaca jaara niqiuqiaari naa Pedro miishanocuaatej, nojoriiri jaarajaaja canaacuaji rupatequiaarijihuaj, Pedro na cojitiuniuria. Naajuhuaaj, ¡Bernabeeri jaarajaaja canaacuaji rupatequiaarijihuaj cuno mosanucua na cojiniuria! ¹⁴ Naaratej, janiya jaara naa nojori niqiuqiaari tariucua Jesuucua tiunio taucaca tamacatiuyanoni, janiyari niishiquiini, cuno pojoriiri maja maninia na miituniu quiriqiaa. Cunoori maja na quiniu quiriqiaa taa nojori rootasaaquiaari Pueyaso rupaacuajani. Cunora, janiyari puetunu Pueyaso pueya maanu niquiarajanaa naa sequequiaari Pedroni: “Quiaari Judio pueyano. Naajaa, majaari seetanujuaanaa juhua Judio pueyano quia quiniu quiqiaa. Quiarijia saniniuujia, quiaari Jesuucua tiunio taucaca shiniujiya nojori quiniuria seetanujuaanaa juhua Judiocuaca, nojori rupuenura pajaniya. ¿Casaara naa quia shiniujiya nojoriiri? ¹⁵ Paacuajaari Moisés Rootasano tojjijaca cutarani, Judiocuaca pa quiniucua. Paari maja tahuani, Pueyaso tojjiyashijia. ¹⁶ Naajaa, paacuajaari niishiyani, majaari Pueyaso jiyanooni pajaniya Moisés Rootasano tojjijaca pa quiniucua. Maja. Pueyaso cutaraa pa jiyanoojia, Neyanu Jesucristoocua pa tiuushacari. Paari cunora Jesucristoocua tiuquiaani, nojuaja jiyanooniuria pajaniya puetunu sesa pa miishanojinijijanaa. Sesa pa miishanoori maja na jiyanooshaanu quiqiaa Moisés Rootasano pa tojjishacari. Maja. Naajuhuaaj, majaari quenaaja niquiriyatu pueyano jiyanooshaanu quiniutianiya Moisés Rootasano tojjia na quiniucua. Maja.

¹⁷ Paacuajaari Jesucristoocua tiuquiaarini, jiyanooshano pa quiniuria, maja socua Moisés Rootasano tojjijaca pa quiniuria. Na nuhuaji, paa jaara jiyaniyani paa sesa miijiaa quirihoani Moisés Rootasano pa tojjiaquishacari tarini, saaja Jesucristoocua pa tiuushacari, paari jiyanoohua jiyajeneyani. Naa pa jiyaniishacaritij, paari juhua sequeyani Cristoori pa jiyaterohua sesa miijiaa pa quiniuhuaa nocua pa tiuuniucua. ¿Quiaateeri naa sequenu paniya Pedronaa? ¡Maja! ¹⁸ Paacuajaari maninia miiquiaarini pa tarinitiasacari tojjini Moisés Rootasano, jiyanooshano pa quiniuria saaja Jesucristo rupaacua pa tiuushacari. ¿Paateeri socua maninia miijiaa quiniutianiya Pueyaso niquiarani, paa jaara Moisés Rootasano tojjijaca quirihoani? ¡Maja! Paa jaara naa niishiriojiyani, paari jiyanoohua jiyajeneyani. Paacuajaari seetanujuaanaa pahuatanuquiaa puetunu pueya niquiarajanaani, nojoriiri jiyanooshaanutianiya saaja Jesuucua nojori tiuushacari. Naa pa pahuatanuusano jaara sapojosano quiriqia, paa maara jiyanoohua sesa miijiaa quiriqiani. Saniniuujia, Pueyaso cutaraari seetanujuaanaa pa jiyanooquiaa saaja Neyanucua pa tiuushacari”.

Janiyari naa nacasuquiaari Pedroni puetunu tii quiniaa Pueyaso pueya niquiarajanaa. ¹⁹ Pueyanaa, cua niishishacari maja cua naata Moisés Rootasano tojjini maninia puetunujuanaa, janiyari niishiquiaarini Pueyasoori cua shaajanutaniya na shuriucuaaji. Naaratej, janiyari tama cua cuaqueyajaaja jiyatequiaari juhua tariucua macuni, maja Moisés Rootasano tojjia cua quiniuria socua. Naacuajitij, janiyari quiarijia saaja Pueyasora quia cutarani. Janiyara, janiyari tari cojiritiasaaquiaari monu Cristota niyacutesanojiniani. ²⁰ Naacuajitij, quiarijiani, majaari nio janiya quiyani. Jesucristocuaajaari nio, cojiajinia quiyani. Majaari tamajaaja saminio cua quiniu. Jesucristo cua rupuesacari, naacuajiti janiyari saminio quiyani. Naa saminio cua quishacari puetunu cua cuaqueyatajanaatej, janiyari rishiyani Pueyaso Niyanuucua tiuujia cua quishacari. Nojuajaari cua paniquiaari. Naaratej, tama na cuaqueyajaaja tarinitiaquiaariiri cucuara na mosaanura. ²¹ Majaari cua ruuretanu Pueyaso jiyanooni panishacari janiya. Jaara pa naata quiriqiaa tama pa cuaqueyajaaja jiyanooni Pueyaso, Moisés Rootasano tojjijaca pa quiniucua, Jesucristo maara najuhuaa cusoquiaari pocuara.

3

¿Teyano tojjia pa quishacari pa jiyanooshaaquiaani, Moisés Rootasano, Jesucristoocua tiuuniu soj?

¹ Mosanucua Gálata pueyanaa, ¿cante nia shimiojocanuni, naa pa Jiyaniijia Jesuucua tiuuniu nia tarinitianuratej? Canaa jaara shushajanaa nia niquiara pohuataquiaari Jesucristojinijitij, canaacuajaari maatia nia niishitiquiaarini, nojuajaari pocuara mosaaquiaari pa jiyanooshaanura. ¿Quiarijiaarihuaj, cante tari nia sapojocanuni, Jesucristoocua tiuuniujini nia pishiniuriani? Naa nia miishacarij, ¿niaateeri jiyaniya niaa tama nia cuaqueyajaaja jiyanootiniutianiya Pueyaso? Maja nia naata pueyanaa. ² Quiarijiani pueyanaa, janiya saaja nio nia nequesotanu panianiyani. Cua riucature. ¿Niaateeri Pueyaso Sohuanu tiuquiniquiaari nioojiajinia Moisés Rootasano nia tojjiniuucua, Jesucristo rupaaca nia tiuuniuucua soj? ¿Taa nia sequeyani? Niacuajaari niishiya, niaari Pueyaso Sohuanu tiuquiniquiaari nioojiajinia Jesucristoocua nia tiuushacari, niaa jaara na rupaa tojiquiaari. ³ ¡Niaaquiiri tojetaarucujanaa mosanucujuhuanajaj! Nia niquishuririiaj, niacuajaari Pueyaso muerasura quiquiaari Pueyaso Sohuanu nia shanacunuucua nioojiajinia na tiuquiniuria, Jesucristoocua nia tiuushacari. Quiarijia saniniujia, ¿niaateeri jiyaniya nia naata Pueyaso jiyanootiniu tama nia cuaqueyajaaja Moisés Rootasano nia tojishacarihuua juucua, tama nia cumaacatajaaja? ¡Maja! ⁴ Pueyasocujaari jiyanoohua maninia miiriquiaa nijaniya, saaja Neyanuucua nia tiuushacari. Naa Pueyaso miishano niaarani, ¿cunoteeri najuhuana quiquiaarijuhuaj? ⁵ Pueyanaa, Pueyaso jaara na Sohuanu niqutioquiaa nijaniya, na nuhuaji na cumaacata miiquiaa nia niishishoo casaari, nia sequeretaj, ¿casaara naa na miiquiaarini? ¿Pueyasoteeri naa maninia miiquiaa nijaniyatej, Moisés Rootasano tojjia nia quiniuucua? Maja. Nojuajaari naa maninia miiquiaa nijaniyatej, saaja na rupaaca tiuujia nia quiniuucua, canaa pohuatasano nijaniyani.

⁶ ¿Niaate niishiya, casaara Pueyaso jiyanooquiaari canaa supuetana Abrahamni? Abrahamcuajaari Pueyaso sequesanoocua tiuquiaari. Naaratej, Pueyasoori na jiyatequiaari juhua tojetaarucujanaa sesa miyashijia pueyanora. Naa na jiyatequiaari saaja nocua na tiuuniuucua. ⁷ Naacuajitij pueyanaa, quiarijia nia niishiri cutara, cante Pueyasooocua tiuujiani taa supuetana Abraham tiuquiaaricuaani, nojoriiri seetanujanaa canaa supuetana Abraham niquihuajanaa cutara. ⁸ Pueyaso jaara na sequenu panishano naajiotaniquiaari tariucuacaanu, nojuajaari tari niishiquiaari taa taucuaca na jiyanooniutianiyajanihuaj, nojori jaara nocua tiuuri. Naaratej, nojuajaari na sequequiaari supuetana Abrahamtej: “Quiaacuajaari cua sequesanoocua tiuuri, Abrahamnaa. Naaratej, quia jinianuucujinio supueno pueyanoori jiyanoohua maninia miiniutianiya puetunu pueyapuerajanaa. Noo pojori shuquiritiniutianiyari, puetunu jiyacajinijiniojuanaa nocua tiuuriquiano pueyatej”. ⁹ Naaratej, cante Jesucristoocua tiuujiani, Pueyasoori na jiyanooniutianiyajuhua, taa supuetana Abraham na jiyanooquiaaricuaani, na sequesanoocua Abraham tiuushacari. Cunora, Pueyasoori maninia miiquiaa Jesucristoocua tiuujia, taa na miiquiaari Abrahamcuaani.

¹⁰ Saniniujia, cante jiyaniyani Pueyasoori na jiyanooniutianiya Moisés Rootasano tojjia na quiniuucua, nojuajaari pueyaracaanu saniitiosaanutianiya. Naa naajiotasano quiyacuajaari tariucuacaanu Pueyaso Rupaajinia:

“Moisés Rootasano tojjia cuara tojiiria puetunu Pueyaso naajiotanishanojuanaa. Cante niquiriyatu na sequesano tojiyaquijiani, nojuajaari pueyaracaanu saniitiosocoriquiano”.

¹¹ Naacuajitij, niaari niishiyacuja, majaari quenaaja niquiriyatu pueyano jiyanooshaanu quiniutianiya, Moisés Rootasano na tojjiniuucua. Saniniujia, naa naajiotasano quiyacuajaari Pueyaso Rupaajinia:

“Pueyaso jiyanooshaano pueyanoori pueyaracaanu rishiriquiano cutara, Pueyasooocua na tiuuniuucua”.

¹² Saniniujia, Moisés Rootasani, cunoori maja na niishitiojonu Pueyasooocua pa tiuuniuria, jiyanooshaano pa quiniuria. Maja. Saaja naa sequeyari:

“Cante puetunu nio naajioneejinia rootasanojuanaa tojjiani, nojuajaari cuno na tojjiniuucua rishiniutianiya”.

¹³ Maja maninia pa tojiyaquiniuucua Moisés Rootasano, paari Pueyaso puecoosocoriquiano quiquiaarini. Naajaa, Pueyasoori pa Jiyaniijia Jesucristo jiyatequiaari na sesacasano pueyanora pa niti, pocuara na cusonura. Naa sequeyajaarihuua tariucuacaanu Pueyaso Rupaa:

“Pueyaso sesacasanoori cuno, niyacutesanojinia teetasani”.

¹⁴ Naa Jesucristo csonuucua pocuaratej, saaja nocua nia tiuushacari, Pueyasoori na naata shuquiritini nianianiya taucuacajuhua, puetunu na sequesanojataanaa canaa supuetana

Abraham. Naajuhuaq, saaja pa tiuuniucua Jesuucua, puetunu pajaniyajanaari Pueyaso Sohanu masequiaani, taa seetanujuanaa Pueyaso sequequiaari tariucuaacaanucujani.

Moisés Rootasanoori maja na naata Pueyaso sequesano Abraham jataniniu

¹⁵ Cuarta Pueyaso pueyanaa, maatia nia pohuatereera maninia nia niishiniuria cua pohuatasano. Cua tojiri. Pueyano jaara maninia miiniu paniri narta pueyanora, naa miiji-aari: na sesa naajiotajaari naajioneeginia, tee cuniqwi na miishocoriquiano naajiotasano quiyacuajani. Jaara naa miiritij, majaari quenaaja tamonu na naata cuno naajioneeginia naajiotasano jataniniu, socua na maatenunio. ¹⁶ Tariucuaacaanu, Pueyasoori naa sequequiaari Abrahamtej:

“Janiyari seetanujuanaa maninia quia miiniutianiyani, quia jinianuucujainio superiquiano pueyanonio”.

Nia niishiri pueyanaa, tariucuaacaanu Pueyaso Rupaajinia naajiotasanoori maja na sequenu: “Abraham jinianuucujainio supueno pueyara”. Maatia sequeyacuajaari: “Abraham jinianuucujainio supueno pueyanora”. Niquiriyatu pueyano sequeyari, maja queraatia. Nojuajaari pa Jiyaniijia Cristocuja. ¹⁷ Cunora pueyanaa, janiyari seetanujuanaa nia sequeyacuajani, Pueyasoori seetanujuanaa sequequiaari Abraham taa nera na miiniutianiyani. Seetanujuanaa Pueyaso sequesanoori maja na naata jatanishaanu. Naacujitij, Moisés Rootasanoori maja na naata Pueyaso sequesano Abraham jataniniujihuaq. Seetanujuanaa Pueyaso sequenu nuhuaji Abraham, taa nera na miiniutianiyani, cuno nuhuaji, shocojoquiaarijaaraari cuatrociento treinta marijia. Cuatrociento treinta marijia shocojonu nuhuaji, Pueyasoori jiyacari shusha Moisés niqutioquiaari na rootasano, saajianeecaacua na quejasano. Moisésri saniniujia pueya na niishitiojoquiaari. Naacujitij, Moisés Rootasanoori maja na naata Pueyaso sequesano Abraham jataniniu, najuhua na quiniuria pajaniyara. ¹⁸ Pueyaso niqutionu panishano pajaniya jaara pa niqutiosaariquia saaja pa tojiniucua Moisés Rootasano, na niqutiosocoriquiano pajaniya maara nareja niqutiosoo quiri. Saniniujia, Pueyasocujaari seetanujuanaa naa Abraham sequequiaari:

“Janiyari nareja quia niqutionutaniya cua sequesano”.

¹⁹ Nia naasucuaari sequeya: “Jaara naa qiritij, ¿casaarano socuateeri Moisés Rootasano?” Nia sequereera pueyanaa. Jiyanoahua Abraham nuhuaji, Pueyasoori Moisés caminiujitiquiaari na rootasano, pueya niishiniuria nojoriiri seetanujuanaa Pueyaso tojiyashijaca. Cunora quiquiaariiri Moisés Rootasano. Cuno Rootasanoori quiquiaari Abraham jinianuucujainio supueno pueyano cuaara tiuquiquiaarijiaatijia, taa Pueyaso sequequiaari Abrahamcujani. Nojuajaari pa Jiyaniijia Jesucristocuja. Naacujitij, Jesucristocujaari Pueyaso jiyaniquishano quiquiaari, na sequesacari Abraham, “quia jinianuucujainio superiquiano pueyano”. Cristocujaari puetunu Pueyaso sequesano Abrahamjanaa masequiaari pajaniyarajuhuaq, taa Pueyasojuanaa sequequiaari Abrahamcujani. Saniniujia, Moisésri saaja pueya niishitiojoquiaari Pueyaso seya caminiujishano nojuaja. ²⁰ Abrahamra saniniujia, majaari quenaaja tamonu pueyano quiniu quiquiaari nera na caminiujiuriquiano. Pueyasojuanaacujaari nocua muetaquiaari, na sequenura seetanujuanaa taa Neyanuucua tiuujica na miiniutianiya maniniani. Cunora, Pueyaso rupaa Jesucristojiniji pa tojishano, cuno cutaraari socua pa tojihocoriquiano Moisés Rootasanojiniji.

Casaarante Moisés Rootasano

²¹ Naa cua sequesacarijij, ¿niateeri jiyaniya, Moisés Rootasano naasucuaari pajaniyarano Pueyaso sequesano paraca? Majaari naa cua sequenutej. Janiyari saaja sequeyani, Moisés Rootasano jaara na naata quiriquia Pueyaso jiyanooniniuria pajaniya, paa maara Moisés Rootasano tojtijajaca quiriqiani, Pueyaso jiyanooniniuria pajaniya. ²² Saniniujia, tariucuaacaanu Pueyaso Rupaajiniini, paari niishiyani puetunu pajanyapuejajanaari Sesaaca pueya. Naaratej, majaari pa naata tarinitianu quiquiaari sesa miiniu. Naacujitij, paari maatia niishiyani, puetunu pueyajanaa cuaara tiuuria Jesucristoocua, Pueyaso sequesano Abraham nojori masenura.

²³ Pa niishiyaquishacarijia Jesucristoocua pa tiuuniuria, paari juhua Moisés Rootasano jittiasano pueya quijiani. Paari naa quijia taraatia pueyacuana, paa jaara tojiquiaari Jesucristojinijiaatijia, nocua pa tiuuniuria. ²⁴ Naacujitij, Moisés Rootasanoori juhua pa jittiana quiquiaari. Juhua naatujooriniyojua pa pueratejojua Jesuucuaari. Naa na miishacari pajaniyatej, juhuacarijia Jesujiniji pa niishitiojojuuari. Naacujitij, paa jaara Jesuucua tiuquijaarini, paari puetunu sesa pa miishanojinijianaa jiyanooshaaquiaarini. ²⁵ Naa Jesuucua tiuujica pueya pa quishacari quiarijiatej, majaari socua pa tojiniu tariucuaacaanu pa canashitijona. Moisés Rootasanoori juhua pataaco seru quiquiaari, Pueyasora na canashitijonura pajaniya, juhua naatujoori pa quishacarijia. ²⁶ Quiarijia

cutara, puetunu niäjaniyajanaari Pueyaso pueya, Jesuucua nia tiuuniuucua. ²⁷ Naacuaajiti pueyanaa, niaa jaara moojinia tiuquinishaacanu, seetanujuanaa nioojiata nia tiuushacari Jesuucua, niaari na coquetesaaquiaa. Naa nia quishacari natatej, na Que niqiuara, niaari juhua nojuaja niquishano, na panishano muerasuniyojua nia quiniuucua juhuaj. ²⁸ Naa Pueyaso muerasu pa quiniuucuatej, majaari Pueyaso niqiniu rimiajata pajaniya. Tamonu jaara Judio pueyano quiri, naajaa. Tamonu jaara tahue quiri juhuaj, naajaa. Poonijjotesano pueyano maaraja, camarnuuj pueyanonio, cunoori maja rimiajata Pueyasora. Naajujuaj, caya, maaji, cunoori maja rimiajata Pueyasora. Jesucristoocua tiu-ujiaa pa quishacari, Pueyasora, puetunu pajaniyajanaari juhua niqiriyaatu pueyanoni. ²⁹ Naajujuaj, niaa jaara seetanujuanaa Jesucristo pueya quiri, niaari seetanujuanaa canaa supuetana Abraham jihuacuajinio supueno pueya cutara. Naacuaajitij, niaari Pueyaso sequesano Abrahamrano maseriquianojuhuaj.

4

¹ Nia sequenu paniya socuanijia pueyanaa. Cua tojiri. Mijiria, pueyano jaara jiyaniijia quiri, na shaajesacari, neyanuuri camarnura jiyatesano na que niti. Shaajeno pueyano niyanu jaara naatujua quiriija, neyanuuri juhuanojuaja maja na naata na que casami jiiitanu. Nojuajaari saaja juhua pataaco seru, naatujua na quishacariija. ² Naacuaajitij, tamasacaari cuno mueya canashitijia, cuaara mashajara quiriijaatijia, jiyaniijara jiyate-socoriquiano, taa na shipininio sequequiaaricuaajani. Juhucariija niishitiojoshiyajaari-uhua, maninia na jiiitanura nerano na que riuriotaca. ³ Paari naajujuaj. Pueyaso pueya pa quiaquishacariija, paari juhua naatujoori quiquiaarini. Paari mijiria niishishano tojiti-shaaquiaarini, pa supuetanaa niishishanonio. Paari naa taraatia jiiitiasaaquiaarini. ⁴ Na nuhuaji, Pueyaso jaara tari na sequesano tohuateenu paniquiaari, nojuajaari Neyanu jiyaroquiaari pocua, mijiria na rasaanura maninia maajijiniijijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti. ⁵ Naacuaajitij, nojuajaari na naata Moisés Rootasano tojijiaa jiyanooni, maja socua pa tojiti-shaanura Moisés Rootasano. Naaratej, Pueyasoori na naata pa jiyatenu na muerasu pa quiniuria cutara. ⁶ Seetanujuanaa na niishitiniuria pajaniya paari necohuani, nojuajaari Neyanu Sohanu jiyaroquiaari pocua, poojiajinia na quiniuria. Naa poojiajinia na quishacariitij, nojuajaari Pueyaso pa sequetequiaa, “cua Quenaa”. ⁷ Naacuaajitij pueyanaa, majaari tari nia quiniu Moisés Rootasano tojijiaa, juhua pataaco seru. Niaacuajaari seetanujuanaa Pueyaso niqiuohua cutara. Naa na muerasu nia quishacariitij, niaari tariuacuanaa Pueyaso sequesano Abrahamrano maseriquianojuhuaj, taa na muerasurano niqitikonu na sequequiaaricuaajani.

Pablo tacaashacari Galacia jiyajinia quiniaa Pueyaso pueyacua

⁸ Pueyaso nia niishiyaquishacariija pueyanaa, niaari juaashiquiaata shipinijosano nia pueyasohua tojijiaa quiquiaari taraatia. Cuno casaari maja seetanujuanaa Pueyaso. ⁹ Quariija saniniujia, niaari Pueyasojuanaa niishiya. Pueyasojuanaa cutaraari saniya nia niishiya. Naa Pueyaso panishano muerasu nia quishacariitij, ¿casaara najuhuaa supuetanaa pueya niishishano miiniuria nia paniuhua socuani? Cuno, canaa supuetanaa Judiocuaca rootasanoni, cunoori maja na naata cumaquiniu niäjaniya. Niaari najuhuaa na tojijiaa quiniutianiya. ¹⁰ Niaanaari puetunu juucajanaa niishijiaa quiaa, juhua canaa supuetanaa Judiocuaca. Niaanaari sequetequiaa: “Cuno juuca, majaari pa miaquenu quiniutianiya. Cunoori pueresano juuca, Pueyaso jiyanooniuria pajaniya”. Niaanaari naa miiquiaa puetunu shuniyarajanaa, puetunu marijarajanaanio. ¿Casaara naa miijiacara nia quirihoacuuarini cuarta Pueyaso pueyanaa? ¹¹ Naa nia miiniuucuatej, janiyari jiyanoohua tacaya quariija niaacuani. Janiyari tama sequequiaajaacujua: “Cuno pueya tajinia Pueyaso rupaa cua pohuatasanoquiri najuhuaa quiquiaari?”

¹² Cuarta Pueyaso pueyanaa, janiyari seetanujuanaa nia sequenu paniyani. Nia miirio-huarohua taa cua miiquiaaricuaani, shusha cua tiuquishacari niaacua. Moisés Rootasano niishiyashijiaa nia quishacari, janiyari na tarinitiaquiaari tojiniuni, juhua niäjaniya cua quiniuriajuhuaj. Saaja Jesucristo rupaa nia tojiriohua cutara taa cua miiquiaaricuaani. Cua panishano pueyanaa, niaari maninia cua jiiitiquiaari niaata cua quishacari. ¹³ Niaacuajaari niishiya, cusosu cua quiniuucua, janiyari shushajanaa Jesucristojiniji pohuataquiaari nia niqiarani. ¹⁴ Naa cusosu cua quishacari niaatatej, naajaa, majaari nia ruuretanu quiquiaari janiya, naa sacuaraatia cusosu cua quishacariitij. Majaari quenaaja nia soonu quiquiaari janiya. Saniniujia, niaari cua tojitiacquiaari juhua Pueyaso serujuanaa, nia niqiuara cua pohuatasacari Jesucristojiniji. Naa cutaraari seetanujuanaa cua tojiquiaari juhua Jesucristojuanaa. Niaari naa timitiaquiaari janiyatej, Jesujiniji cua pohuatanuucua niäjaniya. ¹⁵ Quariijaariuhua pueyanaa, ¿casaa nia tojetacanu? ¿Casaara

nia tarinitiarohuacuaa shuquiriaatia nia quiniuurini, taa nia quiquiaari coteenucua-jani? Janiyacuajaari niishiquiaarini, jiyanoehua nia paniniucuaa janiya, jaara nia naata quiquiaari, niaa maara nia namijia samiriootaquiaari nia niqutiosocoriquiano janiya, cucua nia taraajesacari. ¹⁶ Quiarijia naa cua sequesacari seetanujuanaa nijaniyatej, ¿ni-ateeri cunora cua niqunutiianiya juhua nia paraca? ¹⁷ Cuno pueya, najuhuaana tamaatia nia niishitiojoquiaa Pueyaso rupaani, quiarijia nojoriiri maninia miiquiaa nijaniya na sapojonuta. Nojoriiri nia shuquiritiya, nojoriicua nia tiuuniuria. Nojoriiri naa miya, canaa nia cartenura, saniniuuja nojori tojjijaca nia quiniuria. Naacuajitij, majaari tari cua rootasano tojtiajaca nia quiniu quiniutianiya. Niaari cua cartenutaniyajuhaaj. ¹⁸ Quiarijiani, cuno pojoriiri nia shuquiritiyacuaa. Majaari nia jyaniniu janiya nia sequeyani, maja maninia parta pueya pa shuquiritiyuaria. Taaquiriirini, maniniacuajaari parta pueya pa shuquiritiyuaria, seetanujuanaa pa naacunura nojori. Niaacuajaari niishiya pueyanaa, janiyar jiyanoehua nia tojishano pueyano quiquiaarini, Jesucristojiniji cua pohuatanuucua nia niqiuara. ¡Naa seetanujuanaa pueyaracaanu pa panijiacara nia jiyateriquiani, maja saaja nia shuriucua cua quishacari! ¹⁹ Quiquiohuaniojuanaa, jyanohua cua tacaashacari niaacua, coojiaari jyanohua noonu pacuterohuacuhuaaj, naatej, taa maaji nooquiaacuaa na manajani, quera na ranu panishacari. Naajuhuaaj, janiyar nia pueyaracaanu miijionutaniya naquiya niaacuani, niaa cuara jatanishaajeajia, quiarinio pueya nia quiniuria. Niaari nia quiniutianiyaquij, seetanujuanaa Jesucristo quishacari nioojiacajinia, juhua nojuaja nia quiniuria. ²⁰ ¡Seetanujuanaa nia shuriucua cua jatariquiani, maninia cua niishitiojonura nijaniya! Naa cua quishacari tucuaaanu nijaniyajinijitij, majaari cua niishiniu taa nia quiya seetanujuanaani. Niaanaari Moisés Rootasano tojjijacara quiriohuacuaa. ¿Niaateeri seetanujuanaa Jesucristo rupaa cartecanu, maja soj?

Miriqi pohuatasano Agarjiniji, Saaranijinijio

²¹ Moisés Rootasano tojtiajacanaa, cua tojiri. ¿Majateeri tariucuaaanu Pueyaso Rupaajinia nia serojonu quiquiaacuaja, taa Abrahamjiniji na pohuataani? ²² Moisés Rootasanocuaajaari Abrahamjiniji sequeya, nojuajaari caapiqui nianuraca quiquiaari, caapiqui nucuaacujinijuhuaaj. Abrahamri neco seru muetuequiaari. Na sesojoquiaari-iri Ismael. Na nuhuaji, saniya necojuanaari nera muetuquiaarijuhuaj. Na sesojoquiaari-iri Isaac. ²³ Pueyanaa, Agar jaara Abrahamra muetuquiaari, cunoori tama Abraham miishanojuaja quiquiaari, mueya na panishacari. Maja cutaraari Pueyaso panishano. Saniniuuja, saniya necocujanaa jaara nera muetuquiaari na nuhuaji, cunoori Pueyaso panishano quiquiaari cutara, na camishano maajijianaa muetusacari nera. Naacuajitij, Pueyasoori tarijia na sequesano Abraham tohuateequiaari. Naa na sequequiaariiri: “Abrahamnaa, quiaari nianuraca quiniutianiya”. Naa Pueyaso sequenucuatej, necocua Saaraari muetuquiaari, motaja na quishacari. Cunoori maja tama nojori cumaacatajaaja. Cunora, Isaacri Pueyaso sequesanojuanaa mueya cutara, maja juhua Ismael, seru mueya. ²⁴ Nio caapiqui maajipohuani, Agar, Saaranio, nojoriiri juhua caapiqui seetanujuanaa Pueyaso sequesano na pueyara. Naacuajitij, Agarri miriqui juhua Moisés Rootasano, Sinaí tuhuananujinia Pueyaso niishitiojosano Moisés. Naaratej, Moisés Rootasano tojtiajacaari juhua seya quiquiaa, taa Agar quiquiaari serucuaani. ²⁵ Seetanujuanaari, Agarri miriqui juhua Sinaí tuhuananu Arabia jiyajinia. Saniniuuja, nio pa quishacarinii, Jerusalén tiacaari juhua Sinaí tuhuananu, cuno tiacajinia quiniaa pueya quiniucua Moisés Rootasano tojjijaca. Cunora, Moisés Rootasanoori juhua nojori jiitiana quiya, juhua poonijiotasano seya nojori quiniuria. ²⁶ Saniniuuja, quiarinio Jerusalén tiacani, jiyocuaaanu Pueyaso racatasano pa quiquioranoni, cunoori seetanujuanaa Pueyaso muerasurano cutara. Cunoori maja Moisés Rootasano tojjijacara. Cuno tiacaari miriqui juhua Saara. Paacuajaari juhua Saara niquiohua cutarani. Majaari tari pa quiniu seru niquiohua. ²⁷ Tariucuaaanu Pueyaso sequesanoacuajaari naa naajiotasano quiyajuhaaj: “Niyajaru maajinia, shuquiriaatia quia quiri. Quiaacuajaari mueya noonu saniyashijia. Naajaa, majaari quia taraajenu. Quia shuquiriniutia quia jaaquequejoro cutara. Quiaacuajaari cartesaquiaari niyajaru quia quiniucua. Naajaa, quiaacuajaari socua queraatia niquiohuaraca quiriquiano cuno niyacaraca maajijiniji”.

²⁸ Cuarta Pueyaso pueyanaa, paacuajaari juhua Isaacni. Na nucuarano Saara tiuuniucua Pueyaso sequesanoocua, taa na muetunutaniyani, naacuajiti nojuajaari neyanu Isaac raquiaari. Quiarijiani, paari naajuhuaaj. Jesucristo rupaacua pa tiushacari, Pueyasoori na cumaacata pa jataniquiaari seetanujuanaa na muerasu pa quiniuria. ²⁹ Maninia nia niishiri nio pohuatasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Saniniuuja, saniya necocujanaa jaara nera muetuquiaari, cunoori Pueyaso Sohanu cumaacata raaquiaari cutara. Na nuhuaji,

seru niyanuuri Pueyaso Sohanu cumaacata rasano miitiaja quiquiaari. Quiariijaari naajuhuj, Pueyaso ruuretajaca pueyari Pueyaso Sohanu jatanishano pueya miitiaquiaa.³⁰ Quiariija nia niishiri cutara, naa naajiotasaaquiaaricuajaari tariucuacaanu Pueyaso sequesano Abraham:

“Quia niquiocua seru quia taanuure neyanuta puetunujuanaa. Cuno, janiya seetanujuanaa quia sequequiaari niqutionuni, cunoori maja Agar niyanurano. Cunoori seetanujuanaa quia niquiocua muetusanorano, cua Sohanu cumaacata rasano mueyaranotuhuj”.

³¹ Paari naajuhuj, cuarta Pueyaso pueyanaa. Paari maja seru niquiohuani. Paari Jiyaniija niquiohuajanaa cutarani.

5

Saaja Jesucristoocua tiuujiaca pa quiri

¹ Jesucristo cusunucua pocuara, nojuajaari Pueyaso niquiohuara pa jiyatequiaari, maja socua Moisés Rootasano tojiija pa quiniuria. Naarate pueyanaa, jiyanohua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojiijaacara nia quiniuhua. ¿Moisés Rootasano tojiijicateeri jiyanooshaanutaniya? ¡Maja! Maja pa naata tama pa cuaqueyajaaja jiyanoootini Pueyaso, Moisés Rootasano pa tojinuucua. ² Cua tojitiare pueyanaa. Janiyari Pablóni. Janiyajanaari seetanujuanaa nia sequeyani, niaacuajaari Jesucristoocua tiuujiaca, Gálata jiyajinia quiniaa pueyanaa. Cunora, Pueyasoori nia jiyatequiaari na muerasu nia quiniuria. ¿Niaateeri jiyaniya niaa seetanujuanaa Pueyaso pueyara quiniutianiya cutara, nia cararaatiuuquia co miatejosaanuucua? ¡Maja! Niaa jaara naa niishirojiya, niaari Jesucristo cusunu jiyatenutaniya najuhua na quiniuria nijaniyara. ¡Pueyanaa, majaari nia tojinu cuno Judiocuaca, canapue nia shiniujuquiaa nia cararaatiuuquia co miatejosaanuracuajani, seetanujuanaa Pueyaso pueya nia quiniuria! ³ Janiyari socua sequenu paniya noo pojoririani, cararaatiuuquia co miatejonujuacatej, nojori jiyaniuuquia naa nojori miishacaritij, nojori cutaraari seetanujuanaa Pueyaso muerasu. Cante naa miijiani, nojuaja cuaara tojiiria puetunu Moisés Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojinu, Pueyaso jiyanooniuria nijaniya? ¡Maja! ⁴ Naa tama nia cuaqueyajaaja nia jiyanoootiniu panishacari Pueyasotej, Moisés Rootasano nia tojinuucua, niaari Jesucristojiniji carejerucuaa. Majaari Pueyaso naata maninia miiniu nijaniya socua, taa maninia na miujuacuua na panishano muerasuni. ⁵ Pajaniya saniniuujia, paari Pueyaso Sohanuraca cutarani, Jesucristoocua pa tiuuniucua. Naacuajitij, paari niishiyani paari tojetaarucujanaa sesa miyashijiacara jiyatesaanutaniyani. ⁶ Quiarijiani, Jesucristo rupesano pa quishacari nocua pa tiuuniucua, paa jaara pa cararaatiuuquia co miatesano quirini, maja soj, naajaa. Cunoori najuhuanaj. Socua maninia cutaraari Jesuucua tiuuniu, Pueyaso panijia pa quiniuria, parta pueya pa paniniurajuhuj.

⁷ Cuarta Pueyaso pueyanaa, niaacuajaruhua Jesuucua tiuujiaca quijia seetanujuanaa. ¿Quiariijaariuhuj, cante nia tarinitiriohuacuaa seetanu rupaacuajanaa nia tiuyaquiniurani? ⁸ Cuno pojori niishitiojosano Jesuucua tiuuniu nia tarinitianurani, cunoori maja Pueyaso niishitishano nojori. ⁹ Cunora, seetanujuanaari nio sequesano: “Shiitaniyojua jereca mashaca jaara shoqueeca mashacajinia shuushaare, cuno shiitaniyojuaari puetunu cuno mashacajanaa jereteja”. Naajaariuhuj, shiitaniyojua sesa niishitiojosanoori puetunujuanaa pa sesojuajuhuj. ¹⁰ Naajaa, janiyacujaari pa Jiyaniijaacua tiuya seetanujuanaani, majaari nia tojinu quiniutianiya tamaatia cuno pojori niishitiojosano. Saniniuujia, Pueyasoori noo pojori saniitioriquiano, tamaatia na niishitiojonuusanota nia cushitiojoquiaani. Cante nia niishitiojiya sesani, jaara quiri cuarta Jesucristo jiyaramiquishano pueyano, tama janiyajaaja soj, naajaa, nojoriiri saniitosariquiano.

¹¹ Cuarta Pueyaso pueyanaa, majaari cua niishitiojonu quiquiaa taucacajinjimio Jesucristoocua tiuujiaca, nojori miatejonura na cararaatiuuquia co, seetanujuanaa Pueyaso muerasu nojori quiniuria. Janiya jaara naa seetanujuanaa niishitiojoriquiaani, cuarta Judiocuaca maara naquiya cua miitiaaquiriquiani. Saniniuujia, Jesucristo cusunucua niyacutesanojinia pocuara, paari saaja naacua jiyanooshaaquiaani. Naa cua niishitiojonuucatej, Judiocuacaari jiyanohua cua juaaquiaani. ¹² Majaari nojori nia tojinu, nojori niishitiojosacari nia cararaatiuuquia co miatejosaanura. Maninia juhuari cuno miatejonuunu porocua jayosaanura nia tajiniji, maja socua nojori cushitiojonura nijaniya.

¹³ Cuarta Pueyaso pueyanaa, Pueyasocujaari nia sequequiaari na muerasuniyojua nia quiniuria, Neyanu Jesucristoocua nia tiuuniucua. Naacuajitij, majaari tari nia quiniuhua poonijotesano pueya, taa nia quiquiaaricuaani Moisés Rootasano nia tojishacari

pueyaracaanu. Naa Moisés Rootasano tojjiaca nia quiyaquishacari taritij, naajaa, majaari nia jiyaniinu nia naata miiniu puetunu nia cuaqueya miiniu panishanojuanaa. Maja. Maninia cutaraari niarta Pueyaso pueyata nia cumaquitioojonura, seetanujuanaa nia panitioonuta. ¹⁴ Naa jaara naa miijiaca quiriquiatej, niari puetunu Moisés Rootasanojuanaa tojiyacuaja, taa na rootasanojinia naajiotasano quiyacuajani. Naa sequeyari: “Panijia quia quiriquia, taa quia paniyacuaa tama quia cuaqueyajaajani”.

¹⁵ Naarate pueyanaa, tama nia cuaqueyajaaja nia cojuare. Majaari pueyaracaanu nia juayonuujutanu, naatej, taa sareya sayonuujutaquiaacuaani. Naa jaara naa quiriquiatej, niari socua puecotoonutaniyaquij.

Taa quijiate tama na panishanojuaja miijia pueyanoni, Pueyaso Sohuanu tojijia pueyanonio

¹⁶ Janya nia sequeya cutarani pueyanaa. Cua tojiri. Pueyaso Sohuanu tojjiaca nia quiri pueyaracaanu. Naacuajitij, majaari sacuaraatia tama nia panishanojuaja nia miiniu quiniutianiya. ¹⁷ Nio nia niishiri cutara. Cuno, poojiajinia sesa casaa pa panishanoni, cunoori Pueyaso Sohuanu paraca. Naajuhuaaj, Pueyaso Sohuanuuri poojiajinia sesa casaa pa panishanojuaja nia miiniu puetunu. Naacuajitij, cuno pojori miaquetoojosacari poojiajinia, cunora, majaari pa naata miiniu taa pa miiniu paniyacuajani. ¹⁸ Saniniuujia, Pueyaso Sohuanu jaara nia cumaquitioojuaja saaja Pueyaso nia tojiniuria maninia, cunora, Moisés Rootasanoori tojini paniyacuashaanutianiya tari. Naacuajitij, niaacuajaari maninia miiniutianiya saa Pueyaso Sohuanutaja.

¹⁹ Maatia niquishanocujaari taa pueya miiquiaani, noo pojori, canapuete tama na panishanojuaja miijiacani. Nojoriiri juhuajaniya na camishoo maajipohua numuetucunuujuaca, sacuaraatia miitioojua narta canuutajaarihuaj. Maajipohuari naa sacuaraatia miitioojua narta maajipohuatajuhuaj. Pueyari saaja naa miiniuucua jiaatiacari sacuaraatiatej. ²⁰ Naajuhuaaj, nojoriiri tama nojori pueyasorajaaja nojori shipinishano casaa secojonuujuaca. Nojoriiri shimiacurijuhuaaj, narta pueyano shimiojonuujuaca. Narta pueyano niqiniinu paniyashijiacarihuaj. Nojoriiri juaatioojuacajuahuaj. Nojoriiri narta pueyano jiihtiasanocua jiaatiacarihuaj. Cunora, nojori niqiniinu paniyacuajiaari. Nojoriiri maja na niishiniu rejetenu na juaaquiaca. Ritia juaajiacaari. Pueya nasojoua narta pueyanocuarajaarihuaj. Naacuajitij, nojoriiri narta pueya raquiriojotaquiaa narta pueyajiniji. Nojoriiri saaja tama nojori panishano pueyajaaja panijia, canapuete maninia miiquiaa nojoricuajani. ²¹ Cuno pojori, naa sacuaraatia miijia pueyaracaanu Pueyaso niqiarani, nojoriiri maja na niqiniinu paniniu quijia narta pueyano, cante taquiya maninia miishaaree nocuajicuaani. Nojoriiri sacuaraatia mashaasequenuujacajuahuaj. Nojori mashaasequenuusacari, puetunu sacuaraatia casaa miijioquiaajanaari. Jiyanohua miaquenu porocua. Nojori queranacusacari, nojoriiri socua tamaatia sesa casaa miiniu niishijiacajuahuaj. Niajaniya saniniuujia cuarta Pueyaso pueyanaa, cua tojiri. Cante naa sacuaraatia casaa miijiojuani, nojuajaari maja Pueyaso jiihtiasano na quini quiniutianiya, pueyaracaanu rishijia na quiniuria shuquiriaatia.

²² Saniniuujia, paa jaara Pueyaso Sohuanu shanacure poojiajinia na poonijionurani, nojuajaari parta pueya panijia pa jiyateja. Poojia jiyateja shuquiriaatia quijiaari. Poojia cajitijajaarihuaj. Jacaria pocuajara pa jiyateyajaarihuaj, juhuajaniya sashijiano. Pueyaso Sohuanuuri maninia pueyanora pa jiyatequiaa, jiyanoojiano. Pa sequesano miijia pa jiyateyajaarihuaj, pueya tiuniuria pocua. ²³ Pueyaso Sohuanuuri pa jiyateja pueya shocoteyashijiarajuhuaaj. Pa niishitiquiaajaarihuuaa tama sesa casaa pa cuaqueya panishanojuaja pa rejetenura. Paa jaara naa miijiaca quiriquia Pueyaso Sohuanu cumaacatani, majaari quenaaja niqiriyaatu Moisés Rootasanojininio sesacanu quiniutianiya pajaniya. ²⁴ Seetanujuanaari, paa jaara Jesucristo pueyanora quiquiaarini, pa rupuesacari nojuaja, paari tari poojia sesoriquia seque cusojuaquiara Cristotani, puetunu sesa pa jiaatianujuanaano. ²⁵ Pueyaso Sohuanu jaara nia samiitianiioquiaari Pueyaso muerasu nia quiniuria, quiarjia seetanujuanaa pueyaracaanu na tojjiaca nia quiri cutara. ²⁶ Majaari tama pa cuaqueyajaaja pa jiyaniinu, paa socua maninia pueyano parta pueyajinijini. Paa jaara pueya shocotejaca quiriquiani, paari parta Pueyaso pueya juaatiniutianiyan. Maja maninia, paa jaara juaatishaareni tamonu jaara socua tojishano pueyano quiri pajaniyajiniji, naajuhuaaj, tamonu jaara socua maninia miishaare pajaniyajiniji. Majaari naa miijia nia quini Pueyaso pueyanaa. Saaja maninia quijia pa quiri cutara.

6

Niarta Pueyaso pueyata nia cumaquitioojoriquia

¹ Cuarta Pueyaso pueyanaa, naa jaara parta Pueyaso pueyano niquiriquia sesa miyano, jacaria nia nacasure. Cuno niajanijajinijinio canapuete Pueyaso Sohuanu niishitijaraca

cutarani, nojori cuaara jacaria na nacasuuranooj, sesa miiniu na tarinitianuhuara. Cante cuno sesa miijia nacasuyani, nojuaja cuaara na nacasuura seetanujuanaa na paniniutia narta pueyano. Naajuhuaaj, jijanohua nia cojuare tama nia cuaqueyajaaja Sesaaca mariqui nia saniniujiurijaariuhuaaj, sesa nia miiniurijuhuaaj. ² Maninia cutaraari nia cumaquitoojonura niarta Pueyaso pueyata, niaa jaara taraatia miishaare. Naa pa cumaquishacari parta Pueyaso pueyatej, paari naa pa Jiyaniijia Cristo rootasano pajaniyarano tohuateenutaniyani.

³ Najuhuaana quijia jaara jiyaniya nojuaja cutara niishijia pueyano, pueya tojishano pueyanotuhuaaj, naa niishiriojojaari tama na cuaqueya sapojiyajaacujua. ⁴ Puetunu nijaniyajanaa cumaati tama niishiriojoquiaaajacujua, taamueca pueyanote nijaniyani, maninia miijia, sesa miijia soj. Niaa jaara seetanujuanaa maninia miijiaa quiriquia, tama maninia nia miishanojuaja nia timitiare. Niarta Pueyaso pueyano jaara socua maninia miijia quiri nijaniyajinjiji, socua sesa miijia soj, niaara, naajaa. Maja cunora taraajenu, maja cunora shuquiriaatia quiniujiuhuaaj. Saaja shuquiriaatia nia quiri, niaa jaara maninia miiquiaa taate nia naata miiniucujani. ⁵ Puetunu pajaniyajanaari tamaatia poonijiosano jiiitiaani. Tama nijaniyajaaja cumaati na miiquiaa maninia, Pueyaso shuqiritianura nijaniya, seetanujuanaa shuquiriaatia nia quiniuria.

⁶ Canapuate Pueyaso rupaa niishitiojosaquiaani, cuno pojori cuaara na niishitiojonaa niqitiojoora nojori casamijinjiji saniniuuja, nojori niishitiojonaa jiiitianura nojori panishanojuhuaaj.

⁷ Pueyanaa, maja tama nia cuaqueyajaaja nia sapojonu nia jyanishacari niaari sanitiyoaquihsaanutaniya sesa nia miiniucua. Majaari quenaaja tamonu pueyano na naata Pueyaso rerequetenu. Pueyasoori sanitiojua cutara. Naaratej, nio miriqui sequesano nia niishiri: “Casaa jajau pa natareeni, paari juhua cuno jajau senoonutaniyajaaniuhuaaj”. Nio miriqui sequesanoori nio niishitiojija: cante maninia miijiani, nojuajaari maninia miishaanutaniyajaacuhuaaj. Naajuhuaaj, cante sesa miijiani, nojuajaari sesa miishaanutaniyajaacuhuaaj sesa na miiniucua. Cunoori maja rimiajata. ⁸ Naacuajitij, canapuate tama na cuaqueyajaaja shuqiritijiaa sacuaraatia casaa na miishacari mijiriani, Pueyasoori cuno pojori quejoonutaniya cutara, pueyaracaanu na saniitiosocoriquiano. Saniniuuja, cante Pueyaso Sohuanu tojjiani, Pueyaso panishano na miiniuria puetunujuanaa, nojuajaari pueyaracaanu rishijiaa jiyatesaanutaniya cutara. Nojuajaari shuquiriaatia quiniutianiya pueyaracaanu. ⁹ Cunora pueyanaa, niaa jaara maninia miijiaa quiri, majaari maninia miiniuria nia taajenu. Pueyaracaanu maninia miijiaa nia quiri. Niacuajaari niishiya, pueyano jaara na cuhuariquia natate, nojuajaari na sashijia. Majaari ritia na senoonu. Nio miriqui sequesanoori pa niishitiya, paa jaara Pueyaso Sohuanu tojinu tarinitiaquirini, paa cuaara sashiirijuhuaaj. Na nuhuaaj cutara paari jyanohua shuquiriaatia quijiaara jiyatesaanutaniyani, maninia pa miiniucua. ¹⁰ Naacuajitij, jaara pa naata quiriquia, maninia pa miiriquia puetunu pueyajanaa. Saniya maninia cutaraari puetunu parta Pueyaso pueyajanaa pa miiniuria maninia.

Pablo nacasusacari pueya, quera na tucuatasaacari na naajio

¹¹ Nia niquiri cua naajio pueyanaa. Naa quera namijiaaca cua naajiosacari niaacuaratej, nia niishiri janiyajanaari nio naajiaa tama cua juaashiquiatajaajani. ¹² Socua cua tojiri pueyanaa. Cuno pojori, nia shiniujiuquia nia cararaatiuquia co nia miatejonurani, nojoriiri naa nia miitini paniya saaja narta Judiocuaca timitianura nojori. Nojoriiri narta Judiocuaca puerequiaa. Nojoriiri niishiya narta Judiocuacaari nojori miiniutianiya naquiya, miatesoo nia cararaatiuquia co quiniucua. Majaari nojori tiuuni quiquiaa saaja Jesucristoocua, Pueyaso pueya nojori quiniuria. Cunora, nojoriiri jyanohua paniya nia cararaatiuquia co miatesano pueya nia quiniurijuhuaaj, taa puetunu Judiocuacajanaacuaani. ¹³ Cuno pojori, canapuate na cararaatiuquia co miatesanocuaani, nojorijanaari maja nojori tojinu quiquiaa puetunu Moisés Rootasanojuanaa. Naajaa, nojoriiri nia panitiaa nia cararaatiuquia co miatesano nia quiniurijuhuaaj. Niaa jaara miatejosaare, nojoriiri tama timiquionutaniyajaaja, nojori tojitiajaca nia quiniucua. ¹⁴ Janiya saniniuuja, Pueyaso cuaara cojuara janiya maja cua shuqiritianura tama cua miishanojuaja. Janiyari saaja pa Jiyaniijia Jesucristo shuqiritianu paniquiaani, pocuara na cusonuucua niyacutesanojinia. Naacuajitij, janiyari mijiria niishishanoocua jiaatiaashijiaa jatanishaaquiaarini. Mijiria casaari maja na naata shiniujiuniu janiya, nocua cua jiaatianura socua. ¹⁵ Pueyanaa, pa cararaatiuquia co jaara miatesano quiri, naajaa. Naajuhuaaj, pa cararaatiuquia co jaara miatesoo quiri, naajaa. Majaari rimiajata pa quiniu Pueyaso niqiuara cunora. Saaja panishano cutaraari, quiarinio pueyanora pa

jatanishaanura Pueyaso Sohuanu cumaacata. ¹⁶ Puetunu nio sequesanoocua tiuujiaa-janaani, Pueyasoori nojori jiuujia cajitiquiaa, na jiyanooshacari nojori. Cuno pojoriiri seetanujuanaa Pueyaso saquiriojosano pueya.

¹⁷ Tariucujaari cua rootasano nio naajioneejinia. Quiarijiani, tamonu cuaara socua cua taajeteyaquiiria sesa na niishitiojosanota nijaniya. Janiya cutaraari pa Jiyaniijia Jesucristojiniji niishitiojonani. Cua cuaqueyajinia nio majacuyashiquiajinijini, cunojiniji maatia niishishiyari, janiya seetanujuanaa Jesu seruni.

¹⁸ Cua panishano cuarta Pueyaso pueyanaa, nioojia cuaara jiitiaara pa Jiyaniijia Jesucristo cumaaca, na niishitiajanio. Cuaara naa quiiriatej.

PABLO NAAJIONEE ÉFESO TIACAJINIA QUINIAA PUEYASO PUEYACUARA

Pablo saruhuatasacari Jesucristo tojtijajaca

¹ ¿Niaate quiyajaa cuarta Pueyaso pueyanaa? Janiyari Pablóni, Jesucristo jiyaramiquis-hano na rupaa cua pohuatanura, taa na Que Pueyaso paniquiaaricuajani. Niaacuara naajianijia, canapue Pueyaso saquiriojoquiaari tama neracuajani, canapueete Jesucristo tojtianaacuajani. ² Pa Que Pueyaso, mariyata pa Jiyaniijia Jesucristo cuaara taraajeera niaacua, maninia na miiniuria niajaninya. Nojori cuaara cajitiiria nioojia pueyaracaanu-juhuaj.

Taa Pueyaso miiquiaa pajaniyani Cristo rupuesano pa quishacari

³ Pa Jiyaniijia Jesucristo Queeri Pueyaso. Nojuaja pa shuquiritiare. Neyanu Jesucristo pa rupuenuucua, Pueyasoori capora pajaniyara. Nojuajaari jiyanoehua maninia miiquiaa pajaniya, puetunu jiyocuacaanu na jiiitasano cumaacatajanaa. ⁴ Pueyaso niishishacari taa Neyanu miiniutianiya pocuarani, jiya shipiniyaquishacarijia, nojuajaari tari pa saquirio-joquiaari na shuriucua quijiaca pa quiniuria. Pa saquiriojoquiaarijiaariuhua na tojijiaca pa quiniuria, tojetaarucujanaa sesa miyashijia pa quiniuriajuhuaj. ⁵ Panijia na quini-ucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuaaanu na niishiriojoquiaari na miiniuria pajaniyacujani. ⁶ Jiyanoehua maninia na panishano Niyanuniyojua miiniucua pocuara, nojuajaari pueyaracaanu jiyanooquiaa pajaniya. Nojuajaari jiyanoehua capora. Naa maninia na miiniucua pajaniyatej, paari cunora pueyaracaanu na maniniuhuaqueetaquiaani. ⁷ Niyacuasanoinjia Neyanu shootenuucua na nanaca pocuara, Pueyasoori pa jiyanooquiaari na muerasu pa quiniuria. Naaratej, majaari Pueyaso saniitionu quiniutianiya pajaniya. Puetunu sesa pa miishanojinijijianaa pa jiyanooquiaariiri. ⁸ Pueyasoori na paniniu niishitiquiaari pajaniya, na niquitiosacari na niishitijaja pajaniya, puetunu casaa niishijijajanaa pa quiniuria. ⁹ Nojuajaari jiyanoehua tariucuaaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniujia, nojuajaari jiyasohua na miiniu panishano niishi-tiquiaari pajaniya. ¹⁰ Pueyanaa, nia niishiri casaa Pueyaso miiniutianiyan. Nojuajaari Cristo jiyatenutaniya Jiyaniijijajanaa na quiniuria. Naacuajitij, puetunu jiyocuacaanu quijiacajanaa, mariyata puetunu mijiria quijiacajanaari na tojjiacara quiniutianiya. Nojuajaari naa tohuateenutaniya tamacari, taa tamajaaja na niishiriojoquiaaricuajani.

¹¹ Pueyasoori tariucuaaanu pa saquiriojoquiaari Neyanutaja na cojiritianura pajaniya, maninia na miiniuria pajaniya. Pueyasojuaanaari tariucuaaanu naa niishiriojoquiaari maninia na miiniuria pajaniya. Nojuajaari pueyaracaanu tohuateequiaa taa na miiniu paniquiaaricuajani, niishijia na quiniucua. ¹² Nojuajaari pa saquiriojoquiaari maninia quijiacara na jataniniuria pajaniya. Cuarta Judiucacajinijinio pueyani, canaari coteenu-juanaa Jesucristoocua tiuqujaarini. Naa jiyanoehua maninia Pueyaso miiniucua canaa, nojuaja cuaara maniniuhuaqueetasaria jiyanoehua. ¹³ Quiari naataja nia tojishacari Jesucristo rupaa, niaari cunoro seetanu rupaacuajanaa tiuqujaaririjuhua, Pueyaso muerasura jatanishano nia quiniuria. Naa nocua nia tiuuniucuatej, Pueyasoori Neyanu nia rupueetequiaari. Na Sohuanu niquitioquiaari niajanijiaariuhua taa na sequeequiaar-icuajani. Naacuaji niishishaaquiaari, niaari seetanujuanaa Pueyaso muerasu. ¹⁴ Pueyaso Sohuanuraca pa quishacari, paacuajaari niishiyani, paari puetunu Pueyaso sequesano Neyanuranujuanaa masenutaniya Neyanutajuhua. Pueyaso Sohuanu pa jiiitasacari, paari niishiyani, Pueyasoori pa rijionutaniya puetunu na saquiriojosano pueyatajanaa, na muerasu pa quiniuria na shuriucua. Jiyacaritij, paari tojetaarucujanaa jatanishaanu-taniya juhua Neyanu pa niquishaanurajuhua. Cunora, Pueyasoori jiyanoehua manini-uhuaqueetasano quiniutianiya, jiyanoehua maninia na miiniucua pajaniya.

Taa Pablo secojoquiaari Pueyaso pueyacuarani

¹⁵ Janiyari niajanijajinijij tojiriucuaani, taa pa Jiyaniijia Jesucristo tiuujia nia quiyani, taa parta Pueyaso pueya panijia nia quiyajaniuhua. ¹⁶ Cunora, pueyaracaanu cua secojosacari niaacuara, majaari cua tarinitianu quiquiaa Pueyaso cua sequenura “paacarasho”, maninia na muerasu nia quiniucua. ¹⁷ Pa Jiyaniijia Jesucristo Queeri shacantushiqui quijia na cumaacajinia. Janiyari niaacuara na secojoquiaani, nojuaja niquititionura niajaninya jiyocuacaanuji niishitijaja. Naacuaji nia naa niishiniu na niishitiniu

panishano niajaniani, maninia nia niishiniuria nojuajuhua. ¹⁸ Janiyari niaacuara secojoquiaaaniuhua, Pueyaso cuaara cuhuataara nioojia, maninia nia niishiniuria casaara Pueyaso saquiriojoquiaari niajanianiani, casaa na miiniutianiya niaarajaniuhua. Janiyari niaacuara secojoquiaajuhua, maninia nia niishiniuria taa Pueyaso muerasu jiyatesaanutaniya shacantuuca quijiaa nojori quiniuriani. ¹⁹ Janiyari secojoquiaajuhua, Pueyaso cuaara niishitiiria na cumaaca niajaniani, cuno, nioojiajinia poonijiyani. Na cumaacaari jiyanoehua, puequeyashijia. ²⁰ Pueyasocuaajaari cuno na cumaaca poonitijioquiaari Cristo quetejinia, nojuaja jaara na samiitianiquiaariuhua macujiniji. Jaara na samiitianiquiaari, cuno na cumaacata na cajitiquiaariiri Jiyaniijajanaa cajitujinia na miaquetajara jiyocuaaanu. ²¹ Tii na cajitiquiaariiri puetunu tamasa cumaacaraca quijiaa Jiyaniijajanaa na quiniuria. Majaari tamonu socua cumaacaraca quijiaa quiniu pa Jiyaniijajiniji. Nojuajaari puetunu tamasa jiyaniijanucujanaa Jiyaniijia. Puetunu mijiria quijiaa jiiitasanojuanaari na casaa. Nojuajaari puetunu casaajanaa camaru. Pueyaso jaara quiarinio jiya shipiniriohua, Jesucristoori jiyacari Jiyaniijajanaa quiniutianiyajuhua, taa quiarijia na quiyacujani. ²² Naacujitij, Pueyasoori puetunu na shipinishanojuanaa jiyatequiaari Jesucristo jiiitasocoriquiano. Naajuhua, Pueyasoori Jesucristo jiyatequiaari na saquiriojosano pueya jiiitariquiano, canapue te nocua tiuujacacujani. ²³ Pueyaso saquiriojosano pueyari juhua Jesucristo cuaqueya. Nojuajaari juhua poojia saniniujia, pa jiiitiana na quishacari. Puetunu Pueyaso saquiriojosano pueyajanaa jaara Cristo cuaqueyajinia rupetesaa, Cristo cuaqueyari tucuateenutaniya seetanujanaa maninia jeeacanamitishano na quiniuria. Na cuaqueya pa quishacari, nojuajaari puetunu poojiajinijanaa quiya. Naajuhua, nojuajaari puetunu tiquiyocujanaa quijiajuhuanajaj.

2

Panijia Pueyaso quiniucua, nojuajaari pa jiyanooquiaari

¹ Sesa miijiaa nia quiniucua tarijia, Pueyaso tojiyashijiacajuhua, niaari macunucua quijia Pueyasora. ² Naa jaara naa sesa miijiaa quiquiaaritij, niaari juhua puetunu mijiria quiniaa Pueyaso tojiyashijiacajanaa quiquiaari. Niaari samaruhua jiyaniijia tojiijiaa quiquiaari, cuno, paratu pyarajosaqui quijiani. Nojuajaari Pueyaso tojiyashijiaa shiniujia, nojori miiniuria sesa, taa Sesaaca seque paniyacujani. ³ Tarijia, puetunu pajaniyajanaari Pueyaso tojiyashijiaa quiquiaarini. Paari tama pa miiniu panishanojuaja miijiaa quiquiaarini. Naacujitij, paari puetunu pa cuaqueya miiniu panishanojuanaa miijiaa quiquiaarini, puetunu sacaraatia pa niishiriojosanojuuhua. Naa sesa miijiaa pa quiniucuatej, paari tojetaarucujanaa jiyanoehua Pueyaso saniitiosocoriquiano quiquiaari juucuan, juhua tamasaajuhua. ⁴ Saniniujia, Pueyasoori pocua taraajeja cutara. Jiyanoehua pa paniquiaariiri. ⁵ Cunora, macunucua pa quishacarijia nera, sesa miijiaa pa quiniucua, nojuajaari naa jiciritiaquiaari Jesucristota pa cojiritiaquiaari samiitianijionu. Jiyanootio Pueyaso quiniucua, nojuajaari nia jiyanooquiaari. ⁶ Naa na samiitianijionuucua pajaniya Cristooocua pa tiuuniucuatej, Pueyasoori tari pa tacanijioquiaari Cristota jiyocuaaanu, tii Cristo cajitianura pajaniya. ⁷ Naa Cristota na cojiritianuucua maninia miiniu pajaniyatej, cunoori jiyanoehua maninia! Nojuajaari naa pa miiquiaaritij, puetunu quijiacajanaa nio pa quishacari nuhuaji niishiniuria maatia, Pueyasoori jiyanoehua pa panijia. Maatia niishishaanutaniyari Pueyasoori tojetaarucujanaa jiyanootio cutara, na jiyanooniuucua pajaniya, Neyanuucua pa tiuuniucua. ⁸ Naa Pueyaso quiniucua jiyanootio, nojuajaari nia jiyanooquiaari saaja Jesuucua nia tiushacari. Majaari tama nia miishanotajaaja Pueyaso nia jiyanootiniu quiquiaari tama niajanijajaaja. Pueyasojuanaacujajaari nia jiyanooquiaari niaacua na taraajenuucua. Naajuhua, nojuacujajaari nia tiuutiquiaari Neyanuucua. ⁹ Majaari Pueyaso jiyanooniu quiquiaari pajaniya, maninia miijiaa pa quiniucua. Paa jaara maninia pa miiniucua Pueyaso jiyanootiquiaari tama pa cuaqueyajaajani, paa maara tama pa cuaqueyajaaja timitiareni juhua najuhuaa pocujaja. ¹⁰ Shushajanaa Jesucristooocua pa tiushacari, Pueyasoori jiyacari pa jataniquiaari quiarinio pueyano pa quiniuria, maninia miijiaa pa quiniuria. Nojuacujajaari tari naa niishiriojoquiaari, maninia miijiacara na jataniniuria pajaniya.

Jesucristoori pa jiyateja jiyanootiojuacara

¹¹ Éfeso tiacajinia quiniaa pueyanaa, quiarijia nia niishiriohua taa nia quiquiaari tariucuaaanuni, Pueyaso muerasu nia quiyaquishacarijia. Niaari cuarta Judiocuaa soosano taucuaa quiquiaari, nia cararaatiuquia co mialesoo quiyaquiniucua. Canaa cutaraari canaa cararaatiuquia co mialesanoni. ¹² Naa niishirijuhua, naa nia quishacaritij, niaari Cristooju quiquiaari. Majaari nia naata rupeenu quijia Pueyaso saquiriojosano Israel pueya. Puetunu Pueyaso sequesanojuanaa Israel pueyaranoni, cunoori maja niaarano

quiquiaari. Majaari nia niishiniu quiquiaari Pueyasoori pueyacuaji Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuniuria, Pueyaso na jiyanoootiniuria niajaniya. Niaari saaja taraatia shaajeriquiano quiquiaari. ¿Cantucua niaacua taraajereni? Niaari seetanujuanaa tojetaarucujanaa Pueyasooju quiquiaari mijiria. ¹³ Tariija, niaari seetanujuanaa tucuaaanu quijiaa quiquiaari Pueyasojiniji. Quiarijia saniniujia, Jesucristo shootenuucua na nanaca niyacutesanojinia, niaari nata rupetootesaaquiaari, nocua nia tiuushacari. Naacuajitij, niaari canaa rupuejacajuhua. ¹⁴ Cristocuaaari pa jiyanoootiootequiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupenuera canaajuhua, taucuaa nia quiniucua. Jesucristocuaaari canora tama na cuaqeyajaaja tarinitiaquiaari na mosaanura pa niti, cuno jiyaconaja sohuaca niyartasaanura, pa juaaquiaa tajiyatenura. Naacuajitij, nojuajaari pa jiyatequiaari juhua niquriyatu queecujinino supueno pueya, Judiocuaa, niajaniya taucuaacani. ¹⁵ Naa pa niti Jesucristo cusonuucatej, nojuajaari puetunu Moisés Rootasanoni, niaari canaa niyacutesanojinia, na sesacanura pajaniya. Tariija, paari juhua caapiqui tiaca quiquiaarini. Paari pueyacaanu paracaatioojua quijiani. Quiarijia saniniujia, Jesucristo cusonuucua, nojuajaari pa jiyanoootiootequiaari jatiqui pa quiniuria juhua niquriyatu tiaca, mariyata na rupuejaca pa quishacari. ¹⁶ Naaratej, janiyari socua camia nia sequenuni. Cristo cusonuucua niyacutesanojinia, nojuajaari Pueyaso jiyanoootiquiaari pajaniya, na panishano muerasu pa quiniuria puetunujuanaa, niajaniya taucuaa, canaajuhua. Naacuajitij, Jesucristocua pa tiuushacari, paari juhua niquriyatu tiaca nerani.

¹⁷ Niajaniya taucuaacanaa, niaari juhua tucuaaanu quijiaa quiquiaari Pueyasojiniji. Canaa cutaraari juhua cateca quijia nojuajinijini. Jesucristoori mijiria niqiaari, na niishitiniuria puetunu pajaniyajanaa taa Pueyaso jiyanooni pania pajaniyani. ¹⁸ Cristo jiyanoootiniucua na Que Pueyaso pajaniya, naacuajitij, pa naata pa Que Pueyaso rupenu pa secijosacari nojuaja, mariyata na Sohuanuraca pa quishacari, niajaniya, canaajuhua. ¹⁹ Jesuucua tiuujia nia quishacari quiarijia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinijinino rucoonaa. Quiarijiani, niaari seetanujuanaa Pueyaso pueya cutara. Pueyasoori maninia nia jiti-aajuhua, taa na jitiacquiaa puetunu na saqiriojosano pueyacaani. ²⁰ Pueyaso pueya nia quiniucua, niaari rupuetesano puetunu Pueyaso muerasutajanaa, juhua shanohua tia pa quiniuria Pueyaso quiquiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiujuniao pueyani, nojoriiji juhua cuno tia pacaariana. Saniniujia, Jesucristoori juhua cuno tia morijujiana cutara, cuno tia nujuatana. ²¹ Pueyasoori naa saqiriojoquiaa Neyanuucua tiurriquiano pueya, na quiquiorano na tucuatunura. Cuno tia tucuateesacari, tojetaarucujanaa maninia jeenucasano quiniutianiya pa jiyaniijaraari. ²² Niaari naajuhua, Cristo nia rupuesacari, niarta Pueyaso pueya nia rupuesacarijuhua, Pueyasora, niaari juhua riana, tucurunio. Nojuajaari nia morojotaquiaa na tia na tucuatunura, na Sohuanu quiquiorano.

3

Pabloori Pueyaso jiyaramiquishano taucuaacua

¹ Jesucristojiniji cua pohuatanucua niarta taucuaa, janiyari cunora nujuatesano quia nujuatejojuajiniani. ² Naa naasucuaari niishiyacuaja Pueyasoori cua jiyaramiquiquiaari Jesucristojiniji cua pohuatanura taucuaa, jiyanooshano nojori quiniuriajuhua. ³ Tariucuaaanu, majaari pueya niishiniu quijia, Pueyasoori taucuaa jiyanooniutianiya juhua, taa na jiyanooquiaacua Judiocuaani. Pueyasoojuaacuaaari naa jiyasohua na miiniu panishano cua niishitiquiaaritij, taa shusha nio cua naajio coteejajinia cua pohuataa niajanijacuajani. ⁴ Naa jaara cua naajionee serojore, niaari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacuajitij, janiyari niishiyani taa jiyanoohua maninia nia miishaanutaniyani nocua nia tiuushacari. ⁵ Tariucuaaanu, majaari quenaaja tamonu pueyano niishiniu quijia nio jiyasohua Pueyaso miiniu panishano. Quiari naataja saniniujia, Pueyasoori na jiyaramiquishano pueya niishitiquiaari cuno, jiyasohua na miiniu panishano taucuaani. Na sequenu panishano caminiujuniao pueya na niishitiquiaarijuhua. Pueyaso Sohuanucuaari cuno canaa niishitiquiaari. ⁶ Niajaniya taucuaacanaa, niocuaaari Pueyaso miiniu panishano jiyasohua niajaniya: Jesucristocua nia tiuniucua, Pueyasoori puetunu Judiocuarano na sequesanojuanaa jiyatenutaniya niaarajuhua. Canaari Judiocuaani. Naajaa, Jesucristocua nia tiuniucua, Pueyasoori canaa rupetequiaa niajaniya, juhua niquriyatu pueyano pa quiniuria nera. Naajuhua,

cunora, Pueyasoori nia niqutioquiaa na Sohuanujuhuaj, taa na sequequiaari Neyanu Jesucristoocua tiuujiacacujani.

⁷ Janiyari Jesucristo ruuretaja quiquiaarini. Naajaa, jiyanhua cumaacaraca Pueyaso quiniuucua, nojuajaari cua jataniquiaari Neyanu Jesucristojiniji pohuatana cua quiniuria. ⁸ Jesucristo paraca cua quiniuucua tarijia, janiyara, janiya cuaara socua rerequetesano pueyano quiiria puetunu cuarta Pueyaso pueyajinijianaa. Saniniujia, jiyanhua jiyanootio Pueyaso quiniuucua, nojuajaari cua jiyanooquiaari. Cua jiyatequiaariiri seetanu rupaajanaa Neyanu Jesucristojiniji pohuatana cua quiniuria taucacara. Janiyari cunora Pueyaso shuqiritiaa jiyanhuanani. Cristo jiiitasano pajaniyaranoni, puetunu cuno casaajanaari pa niishishoojua. ⁹ Tariucuacaanu, Pueyasoori puetunu casaajanaa shipiniquiaari. Na shipinyaquishacarijia, Pueyasoori tari niishiriojoquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishitiniu quiquiaari pueya. Nio pa quishacari saniniujia, nojuajaari cua seerataquiaari puetunu pueyajanaa cua niishitiniuria jiyasohuaja na miiniu panishano. ¹⁰ Pueyasoori tariucuacaanu pajaniyara na niishiriojosano racataquiaari pueyaracaanu tama na niishitajajinijaaja. Saniniujia, nio pa quishacari, nojuajaari na niishitiquiaari. Quiar-ijiani, jiyanhua maninia Pueyaso miishacari puetunu na saquirojosano pueyajanaa, puetunu jiyocuacaanu cumaacaraca quijiacajanaari niishiya, Pueyasoori seetanujanaa jiyanhua niishijia cutara. Naacuajitij, Pueyaso seya, Satanás, samaruhuanio, nojori-iri tacuritia shootiaquiaa pajaniya, Pueyaso miiniuucua maninia pajaniya, niishijia na quiniuucua. ¹¹ Quiari naataja, Pueyasoori tariucuacaanu na miishocoriquiano na niishiriojosano tohuateequiaari pa Jiyaniijia Jesucristo cusosacari niyacutesanojinia. ¹² Naacuajitij, Jesucristoocua pa tiuniuucua, pa naata juhuajaniya rupuenu na Que Pueyaso pa puereyaquiniutia. ¹³ Naa Pueyaso miiniuucua pajaniyaretej, majaari nioojia nia niquijotenu Pueyasoocujaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua nijaniyatej, shuquiriaatia nia quiri juhuari. Naa naquiya cua miishacari, cuno cuaara shiniujuuria nijaniya, socua pa Jiyaniijia tojiijaca nia quiniuria.

Pablo secojosano Éfeso tiacajinia quiniaa Pueyaso pueyacuara

¹⁴ Naa Pueyaso muerasu nia quiniuucujahuaj, janiyari mojoquetaquiaani pa Que Pueyaso cua seconjura niaacuara. ¹⁵ Nojuacuajaari Que cutara. Puetunu queyajanaari na sesaatiaacuaja. Nojuajaari puetunu parta Pueyaso muerasujanaa Que, mijiria quiniaa, tariucua jiyocuacaanu quiniaa Pueyaso muerasunio. ¹⁶ Naa nia Que na quiniuucujahuaj, janiyari niaacuara secojoquiaani, nojuaja cuaara cumaquiiria jiyanhua nijaniya na Sohuanuta nioojiajinia. Na Sohuanuuri puetunu pa panishanojuanaa jitiiana. ¹⁷ Naajuhua, niaacuara secojoquiaanijia, seetanujanaa nia niishiniuria Jesucristojuanaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria nijaniya, nocua tiuujiaca nia quishacari. Naacuajitij, niocua niishiri taa Jesucristo paniya jiyanhua nijaniyani. Naacuajitij, majaari nioojia nia niquijotenu quiniutianiya socua. ¹⁸ Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo paniniuni. Naajuhua, niaari seetanujanaa niishiniutianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetejore najuhuanani. Seetanujanaa, majaari pa naata shanacujununoj. Paa jaara na jamatu, na tucuanee, na queroni, na jiaconaja shanacujunu paniriquiani, majaari na puequeeja pa riuriatanu quiniutianiya. ¹⁹ Seetanujanaa, majaari pa naata niishiniu taa jiyanhua na paniya pajaniyani. Naajaa, janiyari niaacuara secojoquiaa Pueyasoni, seetanujanaa nioojia nia niishiniuria cuno, na paniniuni. Naa jaara na paniniu niishishacari taritij, niaari puetunu nioojiajinia quiniutianiya. Naacuajitij, niaari tojetaarucujanaa panijia quiniutianiya taa Pueyasocuaani.

²⁰ Naa Pueyaso miiniuucua maninatej, nojuaja cuaara shuqiritiasaaria. Naa jiyanhua na cumaacata na poonijisacari poojiajiniatej, nojuajaari na naata miiniu socua jiyanhua queraatia pa masesanoinijini nojuaja, pa niishiriojosanojinijinio. ²¹ Puetunu quijiacajanaa cuaara niishiria Pueyasoori jiyanhua maninia. Nojori cuaara naa niishiria nojori niqushacari Pueyaso jatanishano na saquirojosano pueya, Jesucristo miishanonio. ¡Cuaara naa shuqiritiasaaria pueyaracaanutej!

4

Pueyaso Sohuanu pa jiiitasacari, paari rupuetootesano quijiani

¹ Janiyari niya nujuatesano quiyani pa Jiyaniijiajiniji cua poojotanuucua. Cunora, cua tojtiaare. Janiyari nia sequeyani, saaja pa Jiyaniijia tojiijaca nia quiri, seetanujanaa

maninia na muerasu nia quiniuria. Pueyasocuaajaari nia saquiriojoquiaari naa maninia na muerasu nia quiniuria. ² Majaari niarta Pueyaso pueya rerequetajaca nia quiniu. Maninia miitiojuaca nia quiriqia. Puetunu casaajanaa rejeretajaca nia quirijihuhaj. Naa jiuujiaatiojuaca nia quiri nia panitioosacari. ³ Naa Pueyaso jiyanoootiootesacari nijaniyatej, pueyaracaanu nia jyanootioore, juhuajaniya noojia quiniuria juhua rupuetootesano. Pueyaracaanu naa nia miiri Pueyaso Sohanu cumaquishacari nijaniya. ⁴ Naa quijiaca nia quiri pueyanaa, niquiriyatu cuaqueyaraca pa quishacari pa Jiyaniijiaara, mariyata niquiriyatu Sohanuraca pa quishacarijuhuj. Naa Jesucristoocua tiuujiaaca pa quishacaritij, Pueyasoori puetunu pajaniyajanaa rijionutaniya, pueyaracaanu na shuriucua pa quiniuria. ⁵ Puetunu pajaniyajanaari niquiriyatu Jiyaniijiaracani. Nojuajaari Jesucristo. Naajuhuj, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhuj, puetunu pajaniyajanaari moojinia tiuquinijosaaquiaarini, Jesucristo pa jiyatesacari pa Jiyaniijiaara. ⁶ Naajuhuj, saa niquiriyatujua Pueyasoori quiya. Nojuajaari puetunu Neyanuucua tiuujiacajanaa Que. Nojuajaari puetunu na tojjijiacajanaa Jiyaniijia. Nojuajaari puetunu na pueyajanaa poonijioteya na panishano nojori miiniuria. Puetunu na muerasu jiuujiaajanaari na quiquio.

⁷ Saniniuujia pueyanaa, puetunu pajaniyacuaajaari tari jiiitaa tamaatia poonijosano pa miiniuriani, teyano Cristo niqitionu paniquiaari pajaniyacujani. Naacujitij, puetunu pajaniyajanaari maja pa niishiniu miiniu saa niquiriyatu casaaja. ⁸ Tariucuaaanu Pueyaso Rupaa naajiotasanoinijia, paari niishiyani Pueyasoori na Sohanu niqitionu paniquiaari na pueya. Cunora naa sequeya Jesucristojiniijiri:

“Na quioosano pueya tacataquiaariuhua jiyocuaaanuuri. Nareja na niqitionu panishano casaa serotaquiaari na pueyari”.

⁹ Jaara sequeya “tacaquiaariuhua”, cunojinijia paari niishiyani nojuaja jiyocuaaanuujia rosequiaari coteenu, taraatia mijiria na mosaanura pocuara. ¹⁰ Nojuajani, jiyocuaaanuujia rosequiaarini, nojuajaari tojetaarucujanaa jiyocuaaanu tacaquiaariuhua, Jiyaniijiajanaa na quiniuria na Que shuriucua. Tacaquiaariiri puetunu jiaa cajiniocujanaa na mishininiuria na cumaacata, puetunu jiyajanaano. Naacujitij, nojuajaari puetunu tiquiyocujanaa quijia. ¹¹ Nojuacuaajaari noojiaqueya na saquiriojosano pueyajiniijio jiyatequiaari na jiyaramiquishano pueya nojori quiniuria. Saniniuujia, tamasa jiyatequiaariiri Pueyaso sequenu panishano caminiujunaa nojori quiniuria. Saniniuujia, tamasa jiyatequiaariiri Jesucristo niishiyashijia niquiara poojotanaa nojori quiniuria, Pueyaso jyanooiniuria nojorijuhuj, Jesucuaa nojori tiushacari. Tamasa jiyatequiaariiri na tojtiajaca pueya jiiitanaa nojori quiniuria. Tamasa jiyatequiaariiri na rupaa niishitiojanaa nojori quiniuria narta Pueyaso pueyara. ¹² Naacujitij, Jesucristoori na Sohanuta cumaquiquiaa cana na paniyani, puetunu tamaatia na miiniu panishanojuanaa nojori miiniuria. Naa na pueya cumaquiquiaa na Sohanutaari na saquiriojosano pueya tiuuniuria nocua, nojori cumaquishaanurajuhuj. Naa Jesucristoocua tiuujiaaca pueya canesacari socatej, Jesucristo cuaqueyari canequiaa. ¹³ Jesucristora poonijioanaa pueyari naa poonijioquiaatej, paa cuaara tojetaarucujanaa pa Jiyaniijia tojjijiaa quiri-jaatijia, juhua rupuetootesano pa quiniuria. Cristo pueyari naa poonijioquiaa Pueyaso Sohanu cumaacata, paa cuaara seetanujanaa Pueyaso Niyanu niishijiaa quiriijaatijia. Naacujitij, paari tojetaarucujanaa jeenucuaano quiniutianiya, seetanujanaa juhua Jesucristo pa quiniuria. ¹⁴ Naacujitij, majaari tari pa quiniu quiniutianiya juhua naatujua. Niaacuaajaari niishiya naatujooriiri na niishiriojosano jatanijia ritia. Noojia niqijiotejajariuhuj. Naa juhua tariucua cumueca mashaja pa quishacaritij, majaari quenaaja tamasa naata sapojonu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonuujuaca tariucua pa niishishanojinijini, nojoriiri jyanohua sapojonu niishijiaa, nojori tojtiajaca na tashuquootenura Pueyasojinijia. ¹⁵ Nocujia pueyanaa, Pueyaso Rupaata pa cumaquioojore seetanujanaa pa panitioonuta, Cristo rupetajaca pa quiniuria socua. Nojuacuaajaari juhua poojia. ¹⁶ Pueyanaa, niaacuaajaari niishiya, puetunu pa cuaqueyajiniacuma casaa pa jiiitianojuanaari maninia rupuetootesano. Puetunu cunojanaa jaara maninia poonijioquiaa jatiqui, paari maninia qiyani. Pueyaso muerasuuri juhua pa cuaqueya jiiitiano casaa. Naacujitij, puetunu Pueyaso muerasujanaa jaara tama na poonijosanojuaja miiquiaa maninia taa pa Jiyaniijia paniyacuajani, pa Jiyaniijia cuaqueyari maninia canenutaniya, jatiqui rupuetesano pa quishacari, seetanujanaa panitiojuaca pa quiniuria.

Cristoocua tiuujiaaari quiarinio pueya

¹⁷ Jesucristo jiyaramiquishano pueyano cua quiniuucua, cua tojiri pueyanaa. Pueyaso saquiriojosano pueya nia quishacari, maja socua nia quiniu taa Pueyaso niishiyashijia pueya qiyacuana. Nojoriiri najuhuaa quijiaca, najuhuaa nojori niishiriojonuucua.

Naajuhuaaj, nojoriiri tama na panishanojuuaaja miijiaca, najuhuana casaacua nojori jiaatianuucua. ¹⁸ Nojoriiri naa quijiacatej, juhua ninishiqui nojori niishitiaja quiniuucua. Nojoriiri seetanujuanaa niishiyashijiaca, nojori tojiyaquiniuucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaracaanu shuqiriiaatia quijiaaca nojori quiniuria. ¹⁹ Naa pueyaracaanu sesa nojori miijionuucatej, nojoriiri maja tari na niishiniu caririquiniu, sesa nojori miishacari. Nojoriiri puetunu tama na miiniu panishanojuuaaja miijiaca. Nojoriiri puetunu sacuaraatia casaajanaa miiniuucua jiyartuucuno. ²⁰ Niajaniya saniniuujia, majaari naa nia niishitiojosaanu quiquiaari Cristojiniji, naa sacuaraatia miijiaca nia quiniuria. ²¹ Naa jaara Jesujiniji tojiqiaari, niaacuajaari niishiquiaari na rupaari seetanu rupaajanaa cutara. Naaacuajaari na rupaajiniji niishitiojosaquiaari maninia miijiaca nia quiniuria, sesa nia miiniu nia tarinitianurajuhuaaj. ²² Pueyanaa, pa toque mocua jaara mocuaatia jaanure, paari ritia na jocuajani. Naa nia jatarejuhua sacuaraatia miiniu nia niishishano. Sesa nia miiniu panishanoori tama nia sapojoquiaarijia nia sesa miijiaca nia quiniuriatej. ²³ Quiarijia saniniuujia, sesa nia niishitiaja nia jatare, maninia niishitijaraca nia quiniuria, maninia jiuujiaracanio. ²⁴ Seetanujuanaa juhua quiarinio pueyano nia quiri, quiarinio jiuujiaraca, Pueyaso niquitosano niajaniya. Naa quiarinio jiuujiaraca nia quishacaritij, seetanujuanaa juhua Pueyaso pueya nia quiriqia, maninia miijiaca, tojetaarucujanaa sesa miyashijiaca. Naa maninia nia quiniuni, cunoori seetanujuanaa Pueyaso Rupaa nia tojinuuca.

²⁵ Naacuajitij pueyanaa, majaari socua cuaracashijionuujuaca nia quiniu. Pueyaso pueya pa quishacari, puetunu pajaniyajanaari juhua pa Jijaniijia cuaqueyani. Cunora, puetunu nia sequesanojuanaa niarta Pueyaso pueyano cuara quiri seetanujuanaa.

²⁶ Naa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhuaaj, nia jaara juaari, majaari nia juaaquiaca nia nianitanu. ²⁷ Ritia nia jeecatoore, Sesaaca mariqui sesa nia miitiriiri nia jijanoyquishacari.

²⁸ Nio nia tojirijuhuaaj. Cante nohuasejoju quiyajaani, cuara tarinitiaara nohuasejonu. Saniniuujia cuara poonijioora tama na numatucatajaaja cutara. Naacuajitij, nojuaja na naata na jitasanojiniji nareja niquitonu tamasaca, cante na panishano jiiitiaaquiyani.

²⁹ Naajuhuaaj pueyanaa, majaari sacuaraatia casaa nia pocuanu quenaaja. Majaari cararaatia nia puenujutoonujuhuaaj. Saaja maninia pocuajaca nia quiri cutara. Naacuajitij, nia naata niarta Pueyaso pueya niishitiojonu. Nia naata nojori cumaquiniu. Nia naata nojori nacasunujuhuaaj. Naacuajitij, nia naata nojori shiniujuniu saaja Pueyaso tojiijaca nojori quiniuria. ³⁰ Majaari sesa miijiaca nia quiniu, niaa mariqui nioojiajinia quijia Pueyaso Sohuanu taraajoreeri. Pueyasocujaari juhua na sesa naajiotaquiaari poojiajinia na Sohuanuta. Naacuajitij, na rijionu juuca pajaniya, nojuajaari niishiniutianiya paari na saqiriojosano pueyani.

³¹ Pueyanaa, majaari jijanoyashijia nia quiniu. Seetanujuanaa jijanoojiaca nia quiri cutara. Majaari tamasaca shanacunu niaacua, na nasojonura niajaniya. Majaari nia juayonuujutanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia nia sesacanura nojuaja. Naacuajitij, puetunu juaaniujianaa nia tarinitiare, puetunu sesa nia miiniujianaanio. ³² Saniniuujia, maninia miitiojuaca nia quiri. Taraajetoojuaca nia quiriujuhuaaj. Naajuhuaaj, jijanootiojuaca nia quiriujuhuaaj, taa Pueyaso jijanooquiaari pajaniyacuaani, Neyanuucua pa tiuushacari.

5

Seetanujuanaa juhua Pueyaso pueya nia quiri

¹ Pueyanaa, niaacuajaari Pueyaso panishano muerasuniyojuu. Cunora, pueyaracaanu juhua nojuaja nia quiniuria nia saniniuujuri. ² Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jijanohua na paniniuucua pajaniya, nojuajaari tama na cuaqueyajaaja tarinitiaquiaari pa niti na mosaanura. Naa na miiniuucatej, nojuajaari Pueyaso shuqiritiquiaari jijanohua. Na miishanoori juhua shanohua jaanutaja quiquiaari Pueyasora.

³ Pueyaso pueya maanujinijinio nia quiniuucua, majaari nia camishoo maaji nia numetucunu, maajishuriu, casaanio. Cunoori jijanohua sacuaraatia Pueyasora. Majaari quenaaja jijano sacuaraatia casaajiniji nia pocoojonu. Naajuhuaaj, majaari tamasaca jiiitiasanoocua jiaatiajaca nia quiniu. ⁴ Majaari najuhuana sacuaraatia pocuajaca nia quiniujuhuaaj. Majaari najuhuana nia niti nia taquiriocuatenu juhua maninia pocuaja. Naajuhuaaj, majaari sacuaraatia puenujunuujuaca nia quiniu. Puetunu cuno sesa pocuanujanaari sesa Pueyaso pueyara. Saniya nia pocoojore cutara Pueyaso miishanojiniji, socua

pueya maniniuhuaqueetanura Pueyaso. ⁵ Niacuajaari tari niishiya, cante juhuajaniya na camishoo maajipohua numuetucujuuani, maajishuriuhuanio, nojoriiri jiyanhua tارااتيا quiniutianiya. Pueyaso jiiitasano na tojjijaca pueyaranoni, majaari na quiniu quiniutianiya naa miijica pueyara. Naa taraatia miishaanutaniyajaariuhua puetunu tamasaca jiiitasanooocua jiaatiajacajanaa. Pueyasora, jiyano pueyari jiyanhua sesa, juhua juashiquiata shipinjiosano pueyasohua seconujuuaca. ⁶ Naacujitij pueyanaa, majaari nia shanacunu tamasaca sapojonura niajaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocua-jaari juaatishaare. Tari saniitioya na tojjiyashijiacaca pueyari. ⁷ Cunora pueyanaa, majaari quenaaja naa sacuaraatia miijica nia cojinu.

⁸ Pueyaso niishiyashijiacaca nia quishacarijia tarijia pueyanaa, niaari ninishiqui quijiacaca quiquiaari. Quiarijia saniniujia, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quijiacaca nia quiniuria. Cunora, seetanujanaa maninia miijiacaca nia quiri, juhua cuhuashiqui quijiacaca. ⁹ Paa jaara seetanujanaa cuhuashiqui quijiacaca quirini, paari maninia miijiacaca quiniutianiyanani. Naajuhua, paari tojetaarucujanaa sesa miyashijiacaca quiniutianiyanani. Paari seetanujanaa Pueyaso Rupaa tojjijaca quiniutianiya-juhuaj. ¹⁰ Naajuhua pueyanaa, niaa cumaati niishiya, ¹¹ puetunu nia miishanojuanaate pa Jiyaniijia maniniucuasano, maja soj? ¹¹ Majaari niishiqui quijiacaca nia cojinu, nojori jaara sesa miya. Saniya nojori nia nacasura juhuari. Maninia nia miishanojiniji, nojoriiri niishiniutianiya nojori miishanoori tojetaarucujanaa sesa. ¹² Jiyasohua nojori miijosano sacuaraatiaari tojetaarucujanaa jiyanhua cararaatia. Pahuataaquishoo. ¹³ Saniniujia, pa nacasacari nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujanaa sesa. ¹⁴ Pueyaso Rupaacuaajaari nojori jiuujia cuhuataquiaa na cumaacata, cuhuashiqui quijiacaca nojori na jataniniuria. Cunora, naa naajiotasano quiyari tariucuaaanu Pueyaso Rupaajinia:

“¡Maqueyanonaa, quia niucure! ¡Macunucua tajiniji quia sanere, Pueyaso Jiyarosano cuhutanura quiajaniya!”

¹⁵ Naacujitij cua panishano pueyanaa, tama nia cuaqueyajaaja nia cojuare jiyanhua, seetanujanaa maninia miijica nia quiniuria. Majaari juhua niishiyashijiacaca nia quiniu juhuajaniya. Seetanujanaa niishijiacaca nia quiri, maninia miijica nia quiniuria. ¹⁶ Nio pa quishacarinani, sesa miiniuri socua caneya puetunu juucajanaa. Majaari pa niishiniu taate tariqu quiniutianiyanani. Naaratej, jaara pa naata quiri quia maninia pa miiniuria, maninia pa miiri puetunu juucajanaa. ¹⁷ Majaari moseeca nia quiniu. Maninia nia niishiri casaa pa Jiyaniijia paniya nia miiniuriani. ¹⁸ Naajuhua, majaari nia mashaasequejonunu. Niaa jaara mashaaseca quiri quia, majaari nia rejetenu quiniutianiya sesa nia miiniu panishacari. Saniya Pueyaso Sohuanu nia shanacura niaacua cutara, nioojia na mishininiuria na cumaacata, seetanujanaa cumaacaraca nia quiniuria, shuquiriaatia quijiacaca nia quiniurijuhua. ¹⁹ Naa Pueyaso Sohuanuraca nia quishacarijia, tariucuaaanu Pueyaso Rupaajinia naajiotasanojiniji jaaquequejonu nia naminiujitioore. Naajuhua, quiri naataja Pueyaso Sohuanu niishitiojosano nia jaaquequejotoore. Naa jaaquequejosacari, pa Jiyaniijia nia shuquiritiare puetunu nioojitajanaa. ²⁰ Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujiacaca nia quiniuucua.

Taa quijia pa quiyani Pueyaso tojjia pa quishacari

²¹ Pueyanaa, maninia tojtioojua nia quiri, taa pa Jiyaniijia Cristo paniyacujani. Nojuajaari pa Jiyaniijia cutara.

²² Maajipohuanaa, nia niyaca tojjijaca nia quiri, taa pa tojiquiaa pa Jiyaniijiacuaani.

²³ Naa niyacaari juhua nioojia quia niaara, taa Jesucristo quia na saquirojosano pueya jiuujiacuaani. Nojuajaari pocuaji Tacuna, juhua na cuaqueya pa quiniuucua nera.

²⁴ Naacujitij, taa Jesucristo saquirojosano pueya na tojtijacaca quiyacuaani, maajipohua cuara naa pueyaracaanu neyaca tojtijacaca quiri juhuaj.

²⁵ Canuunaa, nia niquiocohua nia paniri taa Jesucristo na saquirojosano pueyaranu paniquiaaricuaa jiyanhuanu. Nojuajaari cunora tama na cuaqueyajaaja tariniitiquiaari na mosaanura. ²⁶ Nojuajaari naa miiquiaariti seetanujanaa nerano pa quiniuria. Tojetaarucujanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani.

²⁷ Paa jaara tojetaarucujanaa tari jeequejosano quirini, pa Jiyaniijijanaari pa tiuquintianutaniya tama nocuajaaja, tariucua jatanishano shacantuucara. Jiyacaritij, paari tojetaarucujanaa sesa miyashijia quiniutianiyanani. Paari seetanujanaa shanhua niquishano quiniutianiyanani, juhua camishocoriquiano maniniushitishano niyacoo, tojetaarucujanaa jiyanhua cohuajaque toqueraca. ²⁸ Pueyanaa, taa nia paniyacuaa tama nia cuaqueyajaajani, naa nia paniri

nia niquiocuajuhuj. Cante necocua panijiani, nojuajaari juhua tama na cuaqueyajaaja paniya. ²⁹ Majaari quenaaja tamonu pueyano quiniu tama na cuaqueya soojeajaaja. Paacuaajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuani. ³⁰ Puetunu na saquiriojosano pueyajanaari juhua na cuaqueya nera. Paacuaajaari na cuaqueyajinijioni. Naaratej, nojuajaari maninia pa cojuaquiaa. ³¹ Cunora naa naajiotasano quiyari tariucuaaanu Pueyaso Rupaajinia. Naa sequeyari:

“Pueyano jaara camiri, nojuaja cuara shiriqiiiria na que, na nucua shuriucuaaji, necocuta na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

³² Pueyasojuaacuaajaari pa niishitiojoquiaari, pueyanoori juhua niquiriyatu cuaqueyaraca quijia jaara camiri necocuara. Cunoori miriqui pa niishitiojiya, puetunu Pueyaso saquiriojosano pueya maanujuaanaari juhua pa Jiyaniijia niquirorano quiya, juhua niquiriyatu cuaqueyaraca pa quiniuria nata. ³³ Pueyanaa, cunojuanaari cua pohuatasano pa Jiyaniijia cuaqueyajiniji. Saniniuujia, puetunu cuarta Pueyaso pueyanaa, nia niquiocua panijia nia quiri juhua tama nia cuaqueyajaaja. Naajuhuj, puetunu maajipohujanaa cuara neyaca tojjijia quiriia.

6

¹ Muerasunaa, pa Jiyaniijia tojjijia nia quishacari, nia queya tojjijia nia quirijihuj. Naa jaara naa miiritij, cunoori jiyanoohua maninia Pueyasora. ² Tariucuaaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojjijia nia quiri, nia nucuanio. ³ Naa nia miiritij, pueyaracaanu shuquiriaatia nia quiniuria, pueyaracaanu nia rishiniuria mijiria, niaa cuara saaqianoshirijiaatijia”.

Nio rootasanoori coteenujanaa rootasano tee Pueyaso sequeyacuajani taa na tojjitajaca na miiniutianiya maniniani.

⁴ Niajaniya saniniuujia pueyanaa, majaari nia niquiuhua nia juaatijionu najuhuanaj. Nojori nia canashitijore maninia. Nia niishitijore maniniajuhuj. Nojori nia nacasurejuhuj. Jaara nia tojjitaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacuajani.

⁵ Niajaniya poonitijosano pueyanaa, mijiria nia camaruhua tojjitajaca nia quiri. Majaari nojori nia rerequetenu. Puetunu nojori sequesanojuanaa najaniya nia miiri nia puerenuta, niaa mariqui saniitiosaareeri nojori sequesano nia miyaquiniuucua maninia. Nojori sequesano nia miiriquia maninia, juhua pa Jiyaniijia Jesucristora. ⁶ Majaari maninia nia poonijionu saaja nojori niquishacari najaniya, nojori shuquiritianura najaniya. Maninia nia poonijiore pueyaracaanu puetunu nioojlatajanaa, seetanujanaa juhua Cristora. Naa jaara naa maninia poonijionuujuaca quiriqiatej, niaari Pueyaso panishano miyajuhuj. ⁷ Puetunu nia poonijosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. ⁸ Niaacuajaari tari niishiya, pa Jiyaniijia Jesucristoori puetunu pajaniyajanaa niqutiontianiya maninia pa miiniuucua mijiria, poonijotesano pueya, camarnuaju pueyano.

⁹ Najaniyajuhuj seya jiitajacanaa, nio sequesano nia tojiri. Maninia nia jiitiare nia poonitijosano pueya. Majaari na miananajonu. Nia niishirijuhuj, niaari mariyata niquiriyatu Jiyaniijiaraca, najaniya, nojoriijuhuj. Nojuajaari jiyocuaaanu quijia. Naaratej, tamonu pueyanoori maja rimajata nera, narta pueyanojiniji.

Taate pa naata Sesaaca nujuatanuni

¹⁰ Quiarjia cua panishano cuarta Pueyaso pueyanaa, seetanujanaa pa Jiyaniijia rupuejaca nia quiri, jiyanoohua cumueeca nioojia quiniuria jiyanoohua na cumaacata. ¹¹ Puetunu Pueyaso niqutiosano casaajanaa nia cushiyore juhua toqueya, Sesaaca sapojiaquiniuucuaaji najaniya. ¹² Pueyaso pueya pa quishacari mijiria, majaari pa quiaquetojonu quiquiaa pueyanota. Pa coopueeri maja pueya. Nojoriiri cumaacaraca quijiaa jiya cajiniocua. Sesaacaari cuno na samaruhua jiyatequiaari jiyaniijianucua nojori quiniuria mijiria. Naacuajitij, nojoriiri cumaacaraca, ninishiqui quijiaa pueya nojori jiitiana. Nojoriiri Pueyaso paraajuhuj. ¹³ Naaratej Pueyaso pueyanaa, puetunu Pueyaso niqutijosanojuanaa nia paracata nia miaquetojotaqueya nia cushiyore. Naacuajitij, sesashiquari niocua na nujuatare, Sesaaca saniniuujishacari najaniya. Naa jaara naa nioojia jeenucuare juhuacarijia puetunu Pueyaso casaatajanaatej, niaari nia paraa nujuatajaca quiniutianiya.

¹⁴ Pueyanaa, niaacuajaari niishiya taa miaquetooyojuate pueyani. Na miaquetoonu panishacari, nojoriiri shoquejiniji casaa na cajiniocua morotaja. Na turtuconee cushiyonuujaari, puetunu na jiriqiajanaa na mishiquiojonura cashiicuaaji. Naajuhuaaj, na sapatuhua cushiyonuujaariuhuaaj. Na nareenee pootujuaari, nocuaji na nujutajara cashi. Naajuhuaaj, na naca na cojuatajara, cumoco casaa cushiyonuujaari. Na nijiniaquetucuaaja mueruu pootujuaariuhuaaj.

Pueyaso pueya pa quishacari saniniujia, tama nia cuaqueyajaaja nia jeenucuare Pueyaso casaata. Naacuajitij, seetanujuanaa Pueyaso Rupaa niishijiaca nia quiri maja nia sapojosaanura. Cunoori juhua pa cajiniocua camarucujua casaa saniniujia. Pueyaraacaanu nia cushishano miijiaca nia quiri, nioojia nia cojuanura Sesaacaacuaaji, nojuaja mariqui nia cararoreeri niaa jaara sesa miiri. Cunoori juhua nia turtuconee nia cushishano.

¹⁵ Pueyaraacaanu jeenucuasano nia quiriqia juhua tariucua sapatu cushinio. Naa tariucua pueca nia quiriqia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanooni panijajuhuaaj. ¹⁶ Naajuhuaaj, pueyaraacaanu nia tiuri Jesucristoocua. Naa Jesucristoocua nia tiuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. ¹⁷ Naa niishishacari niaacuajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niqijiotenura Pueyasocuaaji. Naajuhuaaj, Pueyaso Rupaa nia niishiri maninia. Cunocuaajaari Pueyaso Sohuanu nijiniaquetucuaaja mueruu, pueya jiuujiajinia na poonijonura. ¹⁸ Naajuhuaaj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriquia pueyaraacaanu, naajuhuaaj, na Sohuanu niishitishacari niajaninya casaacuara nia secojonutaniyani. Majaari secojonu nia tarinitianu nia taajenuta. Juhua sutejaca pueyaraacaanu nia secojonuuriquia puetunu niarta Pueyaso pueyacuarajanaa. ¹⁹ Naajuhuaaj, cucuara nia secojonuure, Pueyaso niqutionura janiya na niishitaja, maninia cua pohuatanura Jesujiniji cua puereyaquiniutia. Cucuara nia secojorejuhuaaj, maatia nia niishitiniuria pueya, Pueyasoori puetunu pueyajanaa jiyanooni paninya saaja Jesucristoocua nojori tiushacari. ²⁰ Pueyasojuanaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niqiara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquiniutia.

Pablo pohuatasano Tiquicojiniji

²¹ Pa panishano Tiquicojuajaari niaacua quianutaniya, puetunujuanaa na pohuatanura janiyajiniji, naajuhuaaj, casaa cua miyani. Nojuacuajaari shamaatia poonijiojua pa Jiyaniijara. ²² Janiyacuajaari cunora niaacua na jiyaroyani, nioojia nia cumanijanura canaajiniji nia tojishacari, taa canaa quiya niyani.

²³ Pa Que Pueyaso, mariyata pa Jiyaniijia Jesucristota, nojori cuara cuniqui quinaa parta Pueyaso pueya jiuujia cajitiiria, juhuajaniya nia quiniuria. Nojori cuara nia jiyateera panitiojuacarajuhuaaj, seetanujuanaa Jesucristoocua tiuujia nia quiniuriajuhuaaj. ²⁴ Naajuhuaaj, Pueyaso cuara puetunu pa Jiyaniijia panijiacajanaa cumaquiiria na Sohuanuta, shuquiriaatia nojori quiniuria, cuno pojori, canapute seetanujuanaa Jesucristo panijiacuajani.

PABLO NAAJIONEE FILIPO TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pablóni. Janiyari Timoteota nia saruhuataani, Filipo tiacajinia quiniaa Pueyaso pueyanaa. Canaari Jesucristo poonitijosano pueyajuhua. Canaari nio naajiyani puetunu Pueyaso jatanishano pueyacuaraajanaa, nojori tiuuniucua Neyanu Jesuucua. Canaari cuniqui nia jiitianaa pueyacuara naajiyajuhua, nia cumaquiniaa pueyacuara. ¿Niaate maninia quiyajaa pueyanaa? ² Pa Que Pueyaso, pa Jiyaniijia Jesucristonio, nojori cuara cumaquiiria niajaniya na Sohanuta. Nojori cuara cajitiiria nioojiajuhua.

Pablo secosojano, Filipo tiacajinia quiniaa Pueyaso pueyacuara

³ Pueyaraaanu nia niishirijosacari niajaniya, janiyari pa Pueyaso sequequiaani “paacarasho”, maninia na mueras nia quiniucua. ⁴ Cua secosojacari, janiyari pueyaraaanu puetunu niaacuaraajanaa nia shuquiriniutia masequiaa Pueyasoni. ⁵ Niaa jaara shushajanaa Jesucristoocua tiuquiaari, niaari jiyacari coteequiaari nia naacunura, Jesucristojiniji nia poojotanura tamaquiucua. Quiarijiani, niaari naa nia naacuyajaquij. Janiyari cunora nia timitiaani. ⁶ Majaari nia taacanunu niaacuaji. Naatej, nia Pueyaso coteequiaari maninia na miiniuria nioojiajiniaacuaani, nojuajaari nia nia jeenucuanu tuccatanutaniya, Jesucristota pa naacuneetosacarihua. ⁷ Majaari nia jiyajenenu nia taacanuyaquishacari niaacuaji. Janiyacuajaari tari nia niishiyani, jiyanoohua nia paniniucua niajaniya. Naajuhua, niaari nia cojiritiasaaquiaa cumaaca niqutiosaanujuhua. Naacuajiti nia naata Jesucristojiniji pohuatanu nia nio nujuatejojuajinia, naajuhua, janiya jaara jiyaniijanucua tajoji neqesoreesaareni. Naa Pueyaso cumaquishacari janiyatej, nia naata Pueyaso Rupaacuaji tacunu na cuaracashitijiaca. Pueyaso Rupaacuajiiri nia tacusano maatia, nojori niishiniuria, Jesucristoocua nojori tiuushacari, Pueyasoori nia naata nojori jiyanoonijuhua. Naa nioojia rupuesacari cojiatej, cunoori jiyanoohua nia shiniujuquiaa Jesucristojiniji nia pohuatanura. ⁸ Pueyasocujaari niishiya nia nia pania jiyanoohua niajaniyani, Jesucristo paniniu nia jiitiasacari cojiajinia. ⁹ Janiyari niaacuara secujoquiaa Pueyasoni, socua niishijiaca nia quiniuria, socua Pueyaso niishitija nia jiitanurajuhua, seetanujuanaa maninia panitiojuaca nia quiniuria. ¹⁰ Naacuajitij, niaari niishiniutianiya teyano casaate seetanujuanaa maninia niaarani, saniniujia, teyano casaate sesani. Naacuajitij, pa Jiyaniijia Cristo jaara tiuquiriohua, niaari seetanujuanaa maninia miijiaca quiniutianiya, tojetaarucujanaa sesa miyashijiaca. ¹¹ Naacuajitij, puetunu maninia nia miishanojuanaa Jesucristo cumaquishacari niajaniyani, cunoori juhua queraatia nia senoosano quiniutianiya, Pueyaso shuquiritiasaanura. Naacuajitij, maninia nia miiniucua, pueyari Pueyaso timitianutaniya.

Pabloori saaja Jesucristora quinia panijia

¹² Cuarta Pueyaso pueyanaa, majaari cucua nia taraajenu nujuatejojuajinia taraatia nia miishacari. Nio nia niishiri cutara: nujuatejojuajinia nujuatesocoriquiano nia quiasaanucua, naquiya nia miishacarijuhua, cunoori seetanujuanaa pueya naacuya Jesucristojiniji tojishaanura socua. ¹³ Naacuajitij, puetunu jiyaniijia César tiajinia quiniaa soldadohujanaari niishiya, janiyari cumayocua casaata morotasano quiya niyani, Jesucristojiniji nia pohuatanucua. Majaari saaja soldadohua niishiniu cuno, mariyata puetunu pueyajanaari nia niishiyajuhua. ¹⁴ Parta Pueyaso pueyari namitia niishiyajuhua, janiyari cumayocua casaata morotasaarucuaani. Naacuajitij, cunoori quera puetunu nojorijianaa shiniujirucuaa Jesucristojiniji nojori pohuatanura na puereyaquiniutia, pa Jiyaniijia nia nojori tiuushacari socua.

¹⁵ Seetanujuanaa, noojiaqueya nojorijinijinoori Cristojiniji pohuatanuquiaa socua tojishano pueya nojori quiniuria janiyajiniji, nojori shocotanura janiya. Janiyara, naajaa. Tamasaca saniniujia, nojori cutaraari seetanujuanaa Cristojiniji pohuatanuquiaa nojori shuquitiniuria Pueyaso. ¹⁶ Nojoriiri nia pohuatanuquiaaqui, Jesucristo panijia nia quiniucua. Nojoricujaari niishiya, Pueyasojanaacuajaari nia nia nianu, nia tacunura Jesucristo rupacuaji. ¹⁷ Tamasacaari saniniujia Jesucristojiniji pohuatanuquiaacujua nojori shocotanu paniniutia janiya. Naa nojori miishacarij, nojoriiri socua nia tacaatinu pania juucua. Majaari nojori pohuatanunu quiquiaa seetanujuanaa nojori paniniutia pa Jiyaniijia Jesucristo. ¹⁸ Naa nojori pohuatanuacari seetanujuanaa nojori paniaquiniutia pa Jiyaniijiatej, naajaa. Nojoricujaari Jesucristojiniji pohuatanuquiaa. Janiyari cunora shuquiriaatia quiyani.

¹⁹ Socua shuquiriniutianianijiaa cúa niishishacari Pueyasoori puetunu cuno pojori mi-shanojuanaa jataniniutianiya quiria saa maniniaraja. Naa miiniutianiyari nia secojonu-unuucua cucuara, naajuhuaq, Jesucristo Sohuanu cumaquiniuucua janiya. ²⁰ Naacuaajitij, janiyacuaajaari Pueyasocua tiuyani, nojuajaari cúa cojuanutaniya maja cúa cararoy-aquishaanura janiya jaara nequesoreesaareni. Janiyari Pueyasocua tiuyajaanuhua na cumaquiniuria janiya, cúa puereyaquiniutia cúa pohuatana Jesucristojiniji puetunu pueya niquiarajanaa, taa cúa miiquiaacuajani. Janiya jaara rishiriquiani, janiya jaara mosaariquiajuhuaj, naajaa, janiyari jiyanoehua paniani cúa Jiyaniijia Jesucristo timiti-asaanura. ²¹ Mijiria cúa quishacarija, janiyari saaja Jesucristora quiyani. Saniniuujia, janiya jaara mosaareni, cunoori socua maninia janiyara, na shuriucua cúa naata socua, nata cúa quiniuria shuquiriaatia. ²² Naajaa, janiya jaara mijiria rishiriquiajani, cúa naata socua poonijionu cúa Jiyaniijara. Naacuaajitij, quiarijia, majaari cúa naata saquiriojonu; rishiniu, shaajenu soj. ²³ Naaratej, janiyari coojia niquijioteyaajani. Majaari cúa ni-ishiniu teyano cúa saquiriojonutaniyani. Janiyara maara socua maninia quiri janiya jaara cusoqueeni, Cristo shuriucua cúa quianura nata cúa quiniuria. ²⁴ Saniniuujia, socua maninaruhua mijiria cúa rishiniuraja, pa Jiyaniijiaacua cúa shiniujuuniuria socua nijaniya. ²⁵ Naa cúa niishiriojosacaritij, janiyacuaajaari tari seetanujuanaa niishiyani, janiyari juhanojuaja mijiria niaata rishiniutianiyani. Naacuaajitij, cúa naata nia naacunu, socua pa Jiyaniijiaacua nia tiuuniuria. Cúa naata nia naacunujuhuaj, socua shuquiriaatia quijiaca nia quiniuria nocua nia tiushacari. ²⁶ Naa cúa rishishacari mijiriatej, janiyari niaacua quianutaniyani cúa niquiniuria nijaniya. Naa cúa quishacariuhua niaatej, niaari Jesucristo timitianutaniya maninia na miinuucua janiya.

²⁷ Pueyaso pueyanaa, nio nia sequenu panianijia, seetanujuanaa maninia miijiaca nia quiri taa Jesucristo rootaacuajani. Janiya jaara niaacua quiaareni, janiya jaara quiaaquiyarejuhuaj, naajaa. Saaja nijaniyajiniji pohuataaariquiani, taa jyanohua Jesucristo tojijaca nia quiyajaani, jyanohua panitiojuacajuahuaj. Naajuhuaq, jatiqui Jesucristora nia poonijioteriquiani, na rupaa nia pohuatanuucua. ²⁸ Naajuhuaq, Jesucristo Rupaa paraa puereyashijacara nia jiyateriquiani. Nojori priyojosacari nijaniya, majaari nojori puerenu quenaaja. Naa jaara naa nojori puereyashijaca quiriritij, nojoriiri cunojiniji niishiniutianiya, nojoriiri seetanujuanaa saniitiosocoriquiano taa nia pohuatanuuquiaa nojori niquiaracuajani. Saniniuujia, Pueyaso cajitishacari nioojia, nojori miananajosacari puecoonu nijaniya, niaari cunojiniji niishiniutianiya, niaaqui Pueyaso rijiosocoriquiano cutara. Pueyasocuaajaari naa cumaquijia na pueyatej, puereyashijianucua nojori quiniuria. ²⁹ Pueyasocuaajaari nia tiuutiqaari Neyanuucua, na muerasu nia quiniuria. Naajuhuaq, Neyanu rupuejaca nia quishacari quiarijia, Pueyasoori nia jiyatequiaari Neyanuucua naquiya nia miitishaanurajuahuaj, taa Neyanu miiquiaari naquiya pocuaracaani. ³⁰ Naa niishiri, janiya, nijaniyajuhuaq, paari mariyata naquiya miiniu rejeretaquiaani, pa Jiyaniijara pa poonijosacari. Naaacuaajaari tari niquiquiaari naquiya cúa miiniu. Majaari cúa tarinitianu quiquiaari Jesucristojiniji pohuatanu. Quiarijiani, niaari janiyajiniji tojinutianiyajuahuaj, taa cúa tarinitiaaquiya Jesucristojiniji pohuatanuni, naajaa naquiya cúa miishacari.

2

Juhua Cristo pa qirij, taa na quiquiaaricaani

¹ Naacuaajitij pueyanaa, naquiya nia miishacari, nia niishiri taa Cristo shiniujuquiaa pueyaracaanu nijaniyani, maja nia tacaaniuria. Naa niishirijuhuaq taa na paniniu cumaniijaquiaa nijaniyani, naajuhuaq, taa Pueyaso Sohuanu jiuujiaatiootequiaa nijaniyani. Naa niishirijuhuaq taa Cristo taraajequiaa jyanohua niaacuani. Naa panitiojuaca nia quirijihuaq. ² Jiuujiaatioojuaca nia quirijihuaq, seetanujuanaa panitiojuaca nia quishacari. Naajuhuaq, nareja nia shanacure Pueyaso Sohuanu niaacua, nojuaja cuara puetunu nijaniyajanaa rupeteera, jatiqui nia poonijionura pa Jiyaniijara. Naa jaara naa puetunu nio cúa sequesanojuanaa miijia quiriritij, niaari tojetaarucujanaa shuquiriaatia quijia cúa jiyatenutaniya. ³ Maninia nia miishacari, majaari na miiniu juhua tamasaca nia shocotanura, nia jyanishacari nia naasucuaari socua maninia miijiaca tamasacajiniji. Puetunu maninia nia miishanojuanaa nia miiri tamasaca nia rerequeteyaquiniutia. Puetunu niarta Pueyaso pueyajanaa nia jyatere juhua socua maninia miijiaca nijaniyajiniji. ⁴ Naa jaara maninia miijiaca quiriquiacuaa, majaari tama maninia miijiacajaaja nia quiniu. Niarta Pueyaso pueyacua nia taraajerejuhuaj, maninia quijiaa nojori quiniurajuahuaj.

⁵ Tama nia cuaqueyajaaja nia tarinitiare niarta pueyacua nia taraajesacari, taa Jesucristo tarinitiaquiaari tama na cuaqueyajaaja pocuaracaani. ⁶ Nojuajaari naa miiquiaar-itij: tariucuaaanu, nojuacuajaari Pueyaso quijiajuhuanajaj, juhua na Que. Naajaa,

nojuajaari maja na cuaqueya na jiyatenu quiquiaari seetanujuanaa juhua na Que Pueyaso na quiniuria. ⁷ Nojuajaari jiyanohua cumacaraca Jiyaniijia na quiniu tarinitiaquiaari, juhua nareja poonijioesano pueyano na quiniuria. Naaratej, mijiria rasaaquiaariiri seetanujuanaa pueyano na quiniuria. ⁸ Naa pueyano na quishacari mijiriatej, nojuajaari juhua nareja pueyanora tama na cuaqueyajaaja jiyatequiaari. Pueyaracaanu na Que tojjia na quishacari, nojuajaari tama na cuaqueyajaaja tarinitiaquiaari na mosaanura. Seetanujuanaa cararaatia cusoquiaariiri niyacutesanojinia teetesano, juhua sesa mijia pueyano. ⁹ Naaratej, Pueyasoori seetanujuanaa Jiyaniijiarajanaa na jiyatequiaari puetunu jiyaniijianucuaajiniijijianaa. Na sesojoquiaariiaariuhuj “Jesu”. Nioori sequeya “pocuaaji Tacuna”. Majaari socua tamonu pocuaaji tacuna quiniu mijiria, jiyocuaaanunio. ¹⁰ Puetunu pueyajaanaari niishiniutianiya Jesuuri Jiyaniijiajanaa. Maja tamonu. Cunora, nocuara mojuquetaconutaniyari puetunu jiyocuaaanu quiijiacajanaa, puetunu mijiria quiijiacajanaajuhuj, puetunu jiya cariquimia quiijiacajanaano. ¹¹ Puetunu tamaatia rupaca pocuajacajanaari niishiniutianiya Jesucristoori Jiyaniijiajanaa cutara. Naa Pueyaso miiniucua Neyanutej, puetunu nojorijianaari niishiniutianiya, Pueyasoori tojetaarucujanaa maninia mijia.

Pueyaso pueyari juhua ninishiqui cuhuataja mijiria

¹² Quiarijiani cua panishano cuarta Pueyaso pueyanaa, cua rootasano tojtiajaca nia quiri. Naatej, taa pueyaracaanu cua tojtiajaca nia quiquiaaricujani niaata cua quishacari, quiarijia socua cua tojtiajaca nia quiri, tucuaaanu cua quishacari nijaniyajini. Naacuajitij, seetanujuanaa pa Jiyaniijia tojtiajaca nia quiri nia niishiniuria niaari seetanujuanaa Pueyaso pueya. Majaari na rupaa ruuretano. Jiyanohua puereeta quiniutianiari na tojiyashijianucuaru. ¹³ Pueyasojuaanaacuaajari nioojiajinia poonijioquiaa maninia nia miiniu paniniuria. Na cumaaca nia niqitioquiaajaariuhuj maninia nia miiniuria nera nia panishano, taa na paniyacujani.

¹⁴ Cunora, puetunu nera nia miishanojuanaa nia miiri shitimia, maja nia ririjiotanuta. Majaari nocua juyonuujuatanujuhuj. ¹⁵ Naa jaara naa maninia miijiaca quiritij, majaari Pueyaso niishiyashijiaca pueya naata quiniutianiya sesa na saquirojotanura niaacuara. Naaratej, tojetaarucujanaa sesa miyashijiaca Pueyaso niqiuohua nia quiri, mijiria sesa miijiaca pueya niqiuara. Nojoriiri seetanujuanaa sacuaraatia, Pueyaso tojiyashijiaca. Cuno juhua ninishiqui quiijiaca pueya tajinia nia quishacari, niaari juhua riya nojoriria, naatej, taa riya cuhuataquiaa ninishiquicuaani. ¹⁶ Pa samiitianijia rupaa Jesucristojini nia jiiitianononi, niaari cunota cuhuataquiaa mijiria quiniaa. Naa maninia Pueyaso pueya nia quiniucuaatej, Cristo jaara tuquirohuan na rijonuhua pajaniya, janiyari jiyanohua nia timitianutaniyani. Janiyari naa nia timitianutaniya cua niishishacari puetunu cua poonijosanojuanaari maja najuhua na quiniu quiquiaari. Naajuhuj, majaari najuhua naquiya cua miiniu quiquiaarijuhuaj. ¹⁷ Niaacuajaari maninia miijiaca Pueyasocua tuujiaca nia quiniucua, Jesucristojini nia pohuatanuucua nijaniya. Cuno maninia nia miishanononi, cunoori juhua shanohua jaanutaja Pueyasora. Janiya jaara nacatasaare Jesucristojini nia pohuatanuucua nijaniyani, cua nanacaari shoonutaniya juhua Pueyasora niqitiosocoriquiano. Janiya jaara naa miishaareni, janiyari cua nanacata tucuanutaniya puetunu cua miishanojuanaa Pueyasoranoni. Janiya jaara naa miishaareni, janiyari seetanujuanaa shuquiriaatia quiniutianiyani. Janiyari puetunu nijaniyatajanaa jiyanohua timiniutianiyani. ¹⁸ Shuquiriaatia nia quiriuhuj, janiya jaara mosaareni, cua Jiyaniijia tojjia cua quiniucua. Cua cojitiuri shuquiriniuhuj.

Pablo pohuatasano Timoteojini, Epafroditojinijinio

¹⁹ Janiyari niaacuaji tojiniu paniyani taa nia quiyani, shuquiriaatia cua quiniuriajuhuaj janiya jaara niaacuaji tojirini. Janiyari cunora Timoteo jiyaronutaniya niaacuani. Naacuajitij, cuniqui nia tacatesacariuhua, nojuajacua cua pohuatasuhua nijaniyajini saniniujia. Janiyari cua Jiyaniijia Jesuucua tiuyani na rishitiniuria janiya, nijaniyajini nia tojiniuria. ²⁰ Janiyari Timoteo jiyaronutaniya niaacuani. Saa nojuaja cutaraari seetanujuanaa niaacuatacaaja juhua janiyajuhuj, na naacunura nijaniya, maninia nia quiniuria. ²¹ Tamasacaari saniniujia saaja tama nojori panishano casaacuajaaja tacaajia, maja Jesucristo casaacua. ²² Niaacuajaari tari na niishiya, taamuecate Timoteoni. Nojuajaari pueyaracaanu cuata poonijioquiaa juhua quiyani, Jesucristojini mariyata canaa pohuatanura. ²³ Janiya jaara niishirini taa cua miishaanutaniyani, janiyari Timoteo jiyaronutaniya ritia niaacuani. ²⁴ Naajaa, janiyacuaajari cua Jiyaniijiaacua tiuyani cua cartesaanura niqijii, niaacuua cua quianura ritiajuhuaj.

²⁵ Cua sashishacari Timoteo cua jiyaronura niaacuua, maniacuajaruhua ritia cua jiyaronura niaacuua Epafrodito, parta Pueyaso pueyano. Niacuajaari nojuaja jiyarotaquiaari cumaneeca quiriano, nojuaja cumaquiniuria janiyajuhuj. Nojuajaari maninia

cua naacquiaa. Cuata miiquiaa naquiya jaaraajariija Jesucristojiniji cua pohuatanura. ²⁶ Nojuajaari puetunu nijaniyajanaa niquniuucua jiaataia. Na niishishacari niaari jiyanoherua nocua tacaquioya nia niishiniuucua nojuaja cusosu quiquianu, cunora, nojuajaari ritia nia niquniuria tacaya. ²⁷ Seetanujuanaa nojuajaari cusosu quiquianu. Quera cusocanujuanaari. Pueyaso cutaraari nocua taraajecanu. Cucua taraajecanujaarihuaj, maja cua taraajenu jiyacatenura socua. ²⁸ Janiyari cunora ritia niaacua na jiyaroyani, nia shuquiriniuria nia niquishacari nojuaja niaacua tiuquihuano. Naa shuquiriaatia nia quishacarihuatej, janiyari coojia cajitiniutianiyajaacuhaj. ²⁹ Niarta Pueyaso pueyano na quiniuucua, seetanujuanaa juhua nia tarajanu nia timitiarenoj, niaacua na tiuquishacarihuua. Puetunu jiyano pueyajanaa panijiaa nia quiri, noo pojori pa Jiyaniijara poonijionuuacatej taa Epafroditocuaani. ³⁰ Nojuacuaajaari quera shaajeyarucuaa Cristora na poonijosacari. Cocuaatia miijiocanujaarihuaj. Nojuajaari tama na cuaqueyajaaja tarinitiacanu, na naacunura janiya nia niti. Tucuaaanu nia quiniuucua janiyajiniji, majaari nia naata naacunu janiya.

3

Nio rootasano tojjiaa pa quiri cutara

¹ Quiarjia saniniujia, cuarta Pueyaso pueyanaa, pa Jiyaniijia nia shuquiritiare, pocuaji Tacuna na quiniuucua. Janiyara, maja taajeta cua pacutenuhuara socua cua sequenura nijaniya tari cua sequesano nijaniya. Cunoori seetanujuanaa maninia niaara. ² Tama nia cuaqueyajaaja nia cojuare cuno sacuraatia niishitiojonuujuaca pueyacuaji, cuno pojoriicujaji, sesa miijiacani. Nojoriiri pueya cararaatiuuquia co miatejonuujuaca najuhanaj, nojori jyanishacari nojori miatesano pueyari seetanujuanaa Pueyaso pueya. ³ Paa cutaraari seetanujuanaa Pueyaso pueyani, Pueyaso Sohanu jiyatenuucua pa janiya Pueyaso tojjiaa pa quiniuria. Paari timiquiaajaanihuaj Jesucristo rupesano pa quishacari. Taa pa cararaatiuuquia casaa quiyani, naajaa. Jesucristoocua pa tiuushacari, paari seetanujuanaa Pueyaso pueyani. ⁴ Tamasaca jaara tama na cuaqueyajaaja jiyaniya nojuaja seetanujuanaa Pueyaso pueyano, maninia Judio pueyano na quiniuucua, janiya cutaraari nojori shocotaani. Janiyari tari naa jiyaniquiaarijihuaj. ⁵ Naatej, janiya jaara raaquaaarini, ocho juuca jaara cua shocoqaaarini, cua cararaatiuuquia coori miatesaaquaaari. Janiyari naa miishaaquaaarini taa canaa rootasaaquaaari Moisés Rootasanojinijicuaani, seetanujuanaa Judio pueyano na quiniuria. Naajuhaj, janiyari Israel pueyanoni, cua supuetana Benjamín jinianuucuaajinio supueno pueyano. Na queeri quiquiaari Jacobo, Pueyaso saquiriojosano pueyano. Naa cua supuetana quiniuucua Pueyaso saquiriojosano pueyatej, janiyari naajuhaj, nojoriicuaajinio cua supenuucua. Naajuhaj, janiyari Hebreo rupaa pocuajani taa cua supuetanaacuaani. Cua que, cua nucuaari mariyata Hebreo rupaa pocuajaca quiquiaarijihuaj. Mashaja cua quishacari, janiyari Fariseo pueyanora quiquiaarini. Cuarta Fariseocuaacari socua jyanohua supuetana Moisés Rootasano tojjiaa puetunu cuarta Judiocuacajinjinojuanaa. ⁶ Jiyacaritij, janiyari cua niishitiojonaa tojjia quiquiaari jyanohuani. Majaari cua taajenu quiquiaari nojori sequesano cua miiniuria. Naaratej, janiyari Jesucristo tojjitajaca miijia naquiyani, cua jyanishacari nojori naasucuaari Pueyaso paraa. Naajuhaj, maninia cua tojjiniuucua Moisés Rootasano, janiyari sesacasoo quiquiaarini Moisés Rootasano niishitiojonaara. ⁷ Puetunu nio cua sequesanojuanaani, janiyari jyanohua na timitiaquaaarini cua jyanishacari janiya naasucuaari naa seetanujuanaa Pueyaso pueyanoni. Quiarjia saniniujia, Jesucristoocua cua tiuushacari, tarijia cua jyanishano maninia casaani, puetunu cuno casaajanaari quiarjia najuhuana janiyara. ⁸ Quiarjiani, janiyari socua cua Jiyaniijia Jesucristo niishiniuria jiaataia jyanohuani. Naaratej, puetunu tariucuacaanu cua timitiasano casaajanaari najuhuana janiyara quiarjia. Cristo pueyano cua quiniuucua, janiyari juhua taanuusaquaaari puetunu cuarta Judiocuacajinjijianaani. Naa Cristo tojjijara cua quiniuucuatej, cua shipinijojiniji cua casaarano maseyaquiquiaarinijia. Naajaa, puetunu cuno casaajanaari juhua rucucua quiya janiyara. Janiyari seetanujuanaa saaja cua Jiyaniijia Jesucristo niishiniu paniya socuani, nata rupuetootesano cua quiniuria seetanujuanaa. ⁹ Majaari cua jyaniniu janiya sesa miyashijiani, Moisés Rootasano cua tojjiniuucua. Saniniujia, Jesucristoocua cua tiuushacari, Pueyasoori puetunu sesa cua miishanojuanaa tuujuquiaa. Cua niishishacari Jesucristoori mosaaquaaari cua niti, Pueyasoori cua jyanooquaaari, maja na sesacanura janiya, Neyanuucua cua tiuuniuucua. ¹⁰ Janiyari Jesucristo niishiniu paniya jyanohua socuani, seetanujuanaa nata rupuetootesano cua quiniuria. Janiyari na samiitanitajaja cumaaca panijajaanihuaj, coojiajinia na poonijionura, seetanujuanaa quiarinio pueyanora cua jatanishaanura juhua Cristora. Nojuajaari jyanohua taraatia miishaaquaaari mijiria na quishacari, na Que tojjiaa na

quiniuucua. Janiya cuaara naa miishaariajuhuaj cua tojiniuucua nojuaja, juhua nojuaja cua quiniuria. Tama nojuajaarjia na cuaqueya tarinitiaquiaari na mosaanura. Naajuhua, tama janiyajaarjia cua cuaqueya tarinitiaja quiniu paniyani, cua miiniuria puetunu cua Jiyaniija sequesanojuanaa janiya. ¹¹ Janiyari tojetaarucujanaa maninia miija quiniuucua jiaatiaquiaani, juhua quiarinio pueyano cua quiniuria, juhua tariucua macujinjinio samitianishano pueyano.

Maninia pueya pa quirij, Pueyaso muerasu pa quishacari

¹² Juhuanouaja majaari cua quiniu tojetaarucujanaa maninia miija. Sesa miiniu niishiyajaanija. Jeecasoojuaanija. Naajaa, majaari cua tacaaniu. Jesucristocujaaari cua jiyatequiaari na pueyano cua quiniuria. Naaratej, janiyari jiyanoehua saniniuquiquiaani maninia na pueyano cua quiniuria. ¹³ Cua panishano cuarta Pueyaso muerasuna, janiyari niishiyacujani, juhuanouaja maja maninia cua quiniu taa cua Jiyaniija quiyacuaani. Naajaa, majaari cua tarininiu. Janiyari juhua ritia netena miiquiaani na shocotanura narta netecuatunaa pueya. Maninia netenaari na nijinaria niqiyashijia. Naajuhua, majaari cua niishiriojonu maninia cua miishano tariucua. Janiyari saaja cua tajoji niqiyacuaani, socua maninia miija cua quiniuria tari cua quiniujiniji. ¹⁴ Pueya tacuarishijosacari, netena jaara narta netecuatunaa shocotare, nojuajaari shanohua casaa niqitiosaaquiaa. Majaari najuhua na netenu jyanohua. Janiyaraari naajuhua. Majaari najuhuaa jyanohua cua saniniuuniu quiquiaa, maninia cua quiniuria juhua Cristojuhua. Mijiria cua quiniu cua tucatasacari, Pueyasoari cua jataniniutianiya juhua Cristo cua quiniuria, Cristoocua tiuuja cua quiniuucua.

¹⁵ Pueyanaa, nijaniya, cante seetanujanaa Pueyaso tojjijaa quiyani, mariyata naa nia niishiriojore taa cua niishiriojiyacuani. Naatej, jyanohua nia saniniujiuri juhua Cristo nia quiniuriajuhuaj. Cante tama na cuaqueyajaaja jiyaniya nojuaja tariucua tojetaarucujanaa sesa miyashijiani, Pueyaso cuaara na niishitiiria maninia. ¹⁶ Paa jaara maninia miiniu niishijiaa quirini, majaari pa jiyacateni saaja sesa miiniuucua. Saniya maninia miijacara pa quiri socua.

¹⁷ Cuarta Pueyaso pueyanaa, maninia miijiaa nia quiri taa canaa nia niqiquiaari maninia miyanocuaani. Naajuhua, maninia miijiaa nia niquiri, cante maninia miiquiaani taa canaa niishitiquiaari nijaniyacujani, maninia canaa miishacari. Nojorijiniji nia niishiriquia, maninia nia miiniuriajuhuaj. ¹⁸ Jesucristocujaaari pocuara cusoquiaari niyacutesanojinia teetasano, maninia miijacara pa jatanishaanura. Saniniuujia, queraatia pueyari juhujaniya miiquiaa sesa. Janiyacuajaari nojorijiniji pohuatanu pacutejoquiaari nijaniyani, maja juhua nojori nia quiniuria. Quiarijia cua nujuquenuta, janiyari nia pohuatarohuanuhua jiyano sesa miijiacajiniji. Nojoriiri pa Jiyaniija cusonu soojeaca. Nojoriiri maja na paniniu naquiya na miishaanura Cristo tojjijaa nojori quiniuucua. ¹⁹ Nojoriiri puetunu quejoosanutaniyajanaa mani quiquiojinia. Nojoriiri tama nojori panishanojuaja jiyatecanu juhua nojori pueyasora. Naa sesa miijiaa nojori quishacaritij, majaari nojori niishiniu caririquiniu. Saaja sesa na miitushano timitiatiuyari. Nojoriiri saaja mijiria casaacua jiaatiajaca. ²⁰ Pajaniya saniniuujia, paa cutaraari tari jiyatesaaquiaari jiyocuacaanu quijiacaranoni. Paari cuniquiji pocuaji Tacuna niniuria sashiyani. Nojuacuajaari pa Jiyaniija Jesucristo. ²¹ Jyanohua na cumaacata, nojuajaari pa cuaqueya seque jataniniutianiya, shacantuuca quijia pa quiniuria juhua na cuaqueyajuhua. Nojuajaari cumaacaraca puetunu casaajanaa na tojtiniuria nojuaja. Naacuajitij, nojuajaari na naata moqueja pa cuaqueya jataniniu, pueyaracaanu rishijiaa pa quiniuria.

4

Pueyaracaanu pa Jiyaniija pa shuquiritiare

¹ Cunora, cua panishano cuarta Pueyaso pueyanaa, pueyaracaanu pa Jiyaniija tojjijaa nia quiri. Janiyari jyanohua nia niqiniuucua jiaatiaani. Naa niquiaru cua pohuatanuucua Pueyaso rupaa, niaquiri seetanujanaa na tojjijaa quiquiaari. Naa jyanohua maninia Pueyaso muerasu nia quiniuucuatej, cunoori jyanohua cua timitiquiaa.

² Janiyari Evodia sequeya cutarani, narta maaji Sintiquenio, nojori cuaara jyanootioora juhua seetanujanaa Pueyasocua tiuujiaca maajipohua. ³ Quiajaniya saniniuujia Sicigona, quiaacuajaari cuata poonijiojua jaarajaaja. Cunora, janiyari quia sequenu paniyani, cunoo maajipohua quia jyanootiooterohua, nojori rupetoonuhua. Cuno maajipohuacuajaari jaarajaaja cuata poonijionuuquiaari, Clementejuhua, pa Jiyaniijajiniji cua pohuatasacari. Naa cuata poonijionuuquiaariiaariuhua tamasaca, canapete cuata quiquiaaricujani. Nojori sesacacuajaari tari naajiotasano quiya Pueyaso nequesoreetuneejinia, tee cuniqui pueyaracaanu rishijiacarano sesaca naajiotasano quiyacuajani.

⁴ Cua panishano pueyanaa, pueyaracaanu pa Jiyaniijia nia timitiare. Nia sequero-huacuaraj, pueyaracaanu nia timiri. ⁵ Puetunu pueyajanaa cuaara niishiiria niaari seetanujuanaa maninia pueya, maja juajiaa. Pa Jiyaniijiacuaajaari quera tiuquiuhua.

⁶ Majaari quenaaja nia tacaaniu. Saniniuujia, nia tacaashacari, Pueyaso nia pohuatare puetunujuanaa, nia secojosacari nojuaja. Nia secojosacari, nojuaja nia masere nia panishano. Jiyacariitij, nojuaja nia sequerejuhuaj “paacarasho”. ⁷ Naa nia miishacariitij, Pueyasoori nioojia cajitiniutianiya. Naa Pueyaso cajitiniucua nioojiatej, majaari socua nioojiaa tacaaniu quiniutianiya, nia niishitiajanio. Naacuaajitij, niocua juhuajaniya panaatia quiri Jesucristo cojishano nia quiniucua. Naa Pueyaso miishano pajaniyani, cunoori jiyanoehua jiyajeneta. Nocuaji jiuujiatesano.

Saaja maninia casaacua niishiriojuaca nia quiriquia

⁸ Naajuhua cuarta Pueyaso pueyanaa, nio tojijiaa nia quirijihuaj. Pueyaraaanu saaja seetanujuanaa rupaacua niishiriojuaca nia quiriquia. Naajuhuaaj, saaja requeteyaquishoo casaacua nia niishiriojore. Saaja maninia casaacua niishiriojonujuaca nia quiri, maja cararaatia casaacua. Naajuhuaaj, saaja Pueyaso shuquiritasano casaacua nia niishiriojore, maja Pueyaso sesacasano casaacua. Naacuaajitij, puetunu maninia casaacujanaa nia niishiriojore, casaajinijiti pueya naata Pueyaso shuquiritanuni.

⁹ Maninia nia miiriquia pueyaracaanu, taa cua niishitiojuquiaari niajaniyacuajani. Niaacuajaari cua rootasano tojiquiaari. Naajuhuaaj, niaacuajaari cua niqijia taa miijia cua quiquiaarini. Naa jaara nia miijiaa quirijihuaj, poojia cajitinia Pueyasoori niaata quiniutianiyajuhuaaj.

Pablo pohuatasano, Filipo tiacajinia quiniaa Pueyaso pueya jiyaronuucua cumaneeca nera

¹⁰ Janiyari jiyanoehua cua Jiyaniijia timitiaani juhua shusha nia niishiniuuquiohuhua janiya, cucua nia jiyaronuucua nia reratesano cumaneeca. Naa cua sequesacari niajaniyatej, majaari nia jyaniniu janiya nia sequeyani niaari cua niyajetacanu. Maja. Janiyacuajaari niishiyani, majaari tarijia nia naata cua naacunu quijia nia cumaneecata, nia juuretasacari niaatucua canta cucua na jiyaroriquiani. ¹¹ Majaari naa cua sequenu niajaniyatej cua panishano cua jiiitiaaquiniucua. Maja. Janiyacuajaari tari jiyartuunoni, juhuajaniya cua quiniuria cua jiiitiasanoniyajuata. ¹² Naajuhuaaj, janiyari niishiyani juhuajaniya cua quiniuria cua panishano cua jiiitiaaquishacari. Naajuhuaaj, janiyari niishiyani taa quishanote puetunu cua panishanojuanaa cua jiiitiasacari. Janiyari tariucua saniniujishanoni puetunu casaajanaa cua rejeretanura. Juhuaajaniya quiniu niishiyani nia miaajaaraca cua quishacari, miaajeeju cua quishacarijuhuaj. Cua naata juhuajaniya quiniu casamijiu cua quishacarijuhuaj, maja saaja casamiriaca cua quishacari. ¹³ Cua naata rejeretanu puetunujuanaa, Cristo cumaquishacari janiya. ¹⁴ Naajaa, niaari maninia miirucuaa nia cumaneeca nia jiyarosacari cucua, naquiya cua miishacari niya. Niaari niarta pueyanocua taraajeja cutara.

¹⁵ Naajuhuaaj, Macedonia jiyajiniji cua quiasacari nia shuriucuaaji Filipo tiacajiniji, tamonu jiyacajinia cua pohuatanura Pueyaso rupaa, saaja niajaninya cutaraari cucua jiyanooquaaari. Cunoori quiquiaari shushajanaa Jesucristoocua tiuujiaa nia quishacari. Jiyacariitij, niaari nia reratesano cumaneeca jiyaroriquiaari cucua, shuquiriaatia nia quishacari cua pohuatanuucua nia niqiuara Jesucristojiniji. ¹⁶ Juhuanujuaja nia Macedonia jiyajinia cua quishacarijia, Tesalónica tiacajinia, niaari cucua pacutejoquaaari jiyaronu nia cumaneeca, cua panishano cua masetajara. ¹⁷ Majaari saaja cua paniniu pueyaraaanu nia niqitiojonura nia cumaneecajiniji janiya. Janiya cutaraari nia panitiaani capora pueya nia quiniuria. Naacuaajitij, Pueyasoori saniniuujia socua queraatia nia niqitiojutanuyacuajua. ¹⁸ Epafroditocuaajaari puetunu nia jiyarosano cumaneecajanaa cucua tiuqitiasecuaa. Janiyari cunota puetunu cua panishanojuanaa maserucuaa tarini. Cureyajaari nia jiyarosano cumaneecajiniji. Cuno cumaneeca cucua nia jiyarosani, cunoori juhua Pueyasora niqitiosano casa. Nera, cunoori juhua shanohua jaanutaja catijiasano nocuara. Na shuquiritiriiri. ¹⁹ Naaratej, cua Jiyaniijia Pueyasoori puetunu nia jiiitiaaquishoo casaajanaa nia niqitiojutanuyacuajua. ¿Pueyasoteeri casamijiu? ¡Maja! Nia rupuesacari Neyanu Jesucristo, puetunu na jiiitiasanojuanaari niaaranujuhuaj. ²⁰ ¡Pa Que Pueyasoori jiyanoehua maninia! Saaja nojuaja pa shuquiritiare pueyaracaanu. Cuaara nia quiriiriatej.

Nata quiniaata Pablo sarhuatasacari narta Pueyaso pueya

²¹ Quiria nia saruhatare puetunu Jesucristo jiyanooshano pueyajanaa. Niya cuata quiniaa Pueyaso pueyari nia saruhuataajuhuaaj. ²² Naajuhuaaj, Jesucristoocua tiuujica jiyaniijia Césarra poonijionaa pueyari nia saruhuataajaacuhuaaj, puetunu niya Jesucristoocua tiuujiacajanaanio.

²³ Pa Jiyaniijia Jesucristo cuaara cumaquiiria puetunu nioojiajanaa. Tariucuja pueyanaa.

PABLO NAAJIONEE COLOSA TIACAJINIA QUINIAA PUEYASO PUEYACUARA

Pablo Colosa tiacajinia Pueyaso pueya maanuucuaa naajioquiaari

¹ ¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pabloni, Jesucristo jiyaramiquishano na rupaa pohuatariquiiano taa na Que Pueyaso paniquiaar-icujani. Pa tarajanu Timoteota naajiya nionijia. ² Niaacuara naajiyaniijia, canapue Pueyaso saquiriojoquiaaricujani tama nerajaaja nia quiniuria. Niajaniyacuajaari maninia tiuquuaa Pueyasocua, Cristo rupuesano nia quishacari. Pa Que Pueyaso cuara cumaquiria niajaninya, shuquiriaatia nia quiniuria, juhuajaniya nioojia quiniurijahuaj.

Pablo secijosano Jesuucua tiuuniaa pueyacuara

³⁻⁴ Canaari pohuatasacaanuni taa nia tiuquuaa Jesucristoocuaani, naajuhuj, taa nia paniya puetunu niarta Pueyaso muerasujanaani. Naaratej, pueyaracaanu canaa secijosacari Pueyaso niaacuara, canaari na sequequiaani: “Paacarasho canaa Quena”. ⁵ Niaari naa maninia quiyatej, nia niishishacari Pueyasoori jiyanoohua maninia pa miiniutianiya na niqutiosacari pajaniya jiyocuacaanu na jitiiasanojiniji. Niaacuajaari naa pohuatasaaquiaari tarijiatej, shushajanaa nia tojishacari seetanu Pueyaso rupaajanaa. ⁶ Cuno maninia rupaari puetunu jiyacajinijanaa paaqueyaree, mariyata taa na paaquecanucuaa na pohuatasacari nia tiacajiniacuuaani. Pueyaso Rupaari maninia caneyaree queraatia pueya jiuujiajinia, mariyata taa na caneya nioojiacajiniacuuaani. Naa caneyari nia niishishacari Pueyasoori seetanujanaa pa paniya, taa nia pohuatasaaquiaaricujani. ⁷ Pa panishano Epafrasri naa pohuataquiaari niajaniyatej. Nojuajaari Pueyasora poonijona, juhua canaa. Nojuajaari canaa niti poonijoriqiuuaa niaara. ⁸ Nojuajaari canaa pohuatarucuaa niajaniyajinjiji, naajuhuj taa Pueyaso Sohuuan panitiooteya niajaniani.

⁹ Naaratej, canaa jaara tojiqiuuanu niajaniyajinjini, majaari canaa tarinitianu quiriqiuua Pueyaso secojonu niaacuara. Canaari Pueyaso secujoquiaani, nojuaja cuara nia jataniiria niishijia nia quiniuria na Sohuuan cumaacata. Canaari naa secujoquiaani, maninia nia niishiniuria taa Pueyaso paniya maninia nia quiniuriani, maninia nia miiniuria-juhuaj. ¹⁰ Naa jaara Pueyaso panishano niishijiaa quiri, naacuajitij, niaari maninia quiniutianiya taa pa Jiyaniijia paniya na pueya quiniuriacujani, nojuaja shuquiritianura niajaninya, pueyaracaanu maninia nia quishacari. Niaari puetunu maninia casaajanaa miiniutianiya. Naajuhuj, niaari socua maninia niishiniutianiya Pueyaso. ¹¹ Canaari Pueyaso secujoquiaa niaacuara juhuaj, Pueyaso cumaquiniuria niajaninya puetunu na cumaacatajanaa. Jiyanoohua maniniaari na cumaaca, shuquiriaatia nia rejeretanura juhuajaniya puetunu casaajanaa. ¹² Canaari Pueyaso secujoquiaajuhuj niaa cuara pueyaracaanu sequeera nia shuquiriniutia “paacarasho”, pa Que Pueyaso miishanojiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jitiiasanojiniji pajaniyara, cuhuashiqui quiquiojinia pa quishacari. ¹³ Pueyasoori ninishiquiji pa jayoquiaari, maja Sesaaca jitianura socua pajaniya. Pa jiyateereeri cuhuashiqui quijiaa pa quiniuria, Neyanuniojua jitiiasano pa quiniuria maninia cutara. ¹⁴ Tama Neyanu cusonutajaaja pa jiyanooriiri sesa pa miishanojiniji. Naacuajitij, paari na pueyara jatanishaareeni.

Paari maninia quiya Pueyasotani, Cristo cusonuucua pa niti

¹⁵ Pueyasoori maja niquishano quijia. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari coteenujanaa quiquiaari Pueyaso shipiniyaquishacarijia puetunu casaajanaa. ¹⁶ Na Que Pueyasoori na shipiniquiaari puetunu casaajanaa jiya cajiniocua, mijiriano; niquishano casaa, niqiuquishoo casaanio. Naacuajitij, Cristoori puetunu tamonu cumaacaraca quijiacajanaa shipiniquiaari tama nerajaaja. Nojori shipiniquiaariiri nojori jitianura nera jiyocuacaanu casaa, jiyocuacaanu quijiacanio, mariyata mijiria casaa, mijiria quijiacanio. Nojuajaari puetunujanaa shipiniquiaari. Tama nerajaaja na shipiniquiaariiri. ¹⁷ Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojanaa cojuaa, maninia na quiniuria. ¹⁸ Cristoori Pueyaso muerasu Jiyaniijia-juhuaj, taa poojia quiya pa cuaqueya jiyaniijiacuaani. Puetunu Pueyaso muerasujanaaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samitianiijia, juhua na cuaqueya pa quishacari. Nojuajaari coteenu samiti-aquiaariuhua macujinjiji, juhua Pueyaso jiyapueranu na quiniuria. Naacuajitij, Cristoori coteenu quijia. Nojuajaari Jiyaniijiajuhuanaaj. ¹⁹ Pueyasoori paniquiaari Neyanu Cristo

jiitianura puetunu tama na cumaacajanaa, juhua nojuaja na quiniuriajuhuaj. Naacaujiti, Cristoori maja rimiajata quenaaja na quiniu na Quejiniji. ²⁰ Naajuhua, Pueyasoori paniquiaari Cristo rupuetenuhara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanootiquiaari puetunu casaajanaa tama na cusonutajaaja niyacutesanojinia. Na Que rupetequiaariuhua puetunu casaajanaari, jiyocuaaanu casa, mijiria casaanoo.

²¹ Tariija, niaari Pueyaso paraa quiquiaari, juhua taanusano pueya Pueyasojiniji, sesa mijiaca nia quiniucua. ²² Saniniujia quiarijiani, Pueyasoori nia rupetequiaariuhua nocua, Cristo cusonuucua pocuara, cuaqueyaraca na quishacari mijiria. Naacaujiti, Pueyasoori na naata nia tiuquininiu nocua, tojetaarucuaajanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishanojiniji. Majaari quenaaja shiitianiyojua sesa nia quiniu quiniutianiya na niquiara. ²³ Niaari naa quiniutianiya maninia, niaa jaara cumaatia rupaaciaa Cristooocua, nocua nia tiuushacari, nioojia nia niquijoteyaquiniutia. Majaari nia niishiriojonu Pueyaso naasucuaari maja na miiniu quiniutianiya puetunu na sequesanojuanaa niaara, taa nia tojiqiaaricuaajani. Nia tojishano Pueyaso rupaacuajaari tari pohuatasaaanuu puetunu jiyacajiniaajanaa. Janiya, Pabloni, janiyari na pohuatanu naacutaajaniuhua.

Pablo Pueyaso pueya maanu cumaquiniara jiyatesaaquiaari

²⁴ Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa pa pohuatasacari, puetunu na saquirojosano pueyajanaa tiuuniuria nocuajuhua. Naaratej, janiyari shuquiriaatia quiya niyani, naquiya cua miishacari niaacuara. Naa naquiya cua miishacari Cristojiniji cua pohuatanuucua tiquiyocuate, janiyari Cristo naquiya miiniu tucataa tama cua cuaqueyajiniaajani. ²⁵ Pueyasocuaajari cua jiyatequiaari na saquirojosano pueya cua jiitianura, cua cumaquiniuria nijaniya puetunu na rupaatajanaa. ²⁶ Cuno rupaari saaja Pueyaso jiyasohua niishishano quiquiaari tariija. Majaari na pohuatanu quiquiaari supuetana pueya, tariucuaaanu quijiaca. Quiari naataja cutara. Pueyasoori jiyasohua na rupaa niishitiquiaari tama na saquirojosano pueyarajaaja. ²⁷ Pueyasoori pa niishitiniu paniquiaari taa jiyanoohua shacantuuca na cumaaca quiya nijaniyarani, canapuee maja na saquirojosano Judiocuaca quiquiaaricuaajani. Niocuajaari jiyasohua Pueyaso miiniu panishano tariija: ¡Cristoori nioojiajinia quiya! Nia jiitiasacari Cristo, niaari niishiya niaari shacantuuca quijiara jatanishaanutaniyajuhua.

²⁸ Naaratej, Cristocuaajari canaa pohuatasano. Canaari puetunu pueyajanaa nacasuquiaani. Canaari nojori niishitiojquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucuaajanaa maninia canashitishano pueya, Cristo rupesano nojori quishacari. ²⁹ Naaratej, puetunu Cristo niqutiosano cumaacatajanaa jiyanoohua poonijioquiaanijia, na cumaquishacari janiya.

2

¹ Pueyanaa, janiyari paniyani nia niishiniuria taa jiyanoohua cua poonijioquiaa Pueyaso cua secojonuta niaacuarani, Pueyaso muerasuucua Laodicea tiacajiniajuhuaj, puetunu juhuanujuaja cua niqiyaquiniaa pueyacuaraajanaano. ² Jiyanoohua secojquiaa niaacuaranijia, nioojiaa cumaquishaanura, nioojiaa rupuetoonura jatiqijuihuaj, jiyanoohua nia panitioosacari. Naajuhua, secojquiaanijia maninia niishijiacara nia quiniuria, maninia nia niishiniuria tariucuaaanu Pueyaso niishishano tamajaaja, taa Neyanu seera maninia na miiniutianiya pajaniyani. ³ Neyanu Cristocuaajari puetunu niishijiajanaa. Majaari tamonu niishijia quiniu juhua nojuaja. Jiyanoohua maninia mijia puetunu na niishishanotajanaari. ⁴ Janiyari nio sequeya nijaniyani, tamonu mariqui nia sapojoreeri najuhuaana tamaatia na pohuatasano. ⁵ Majaari cua quiniu quiquiaa niaata. Naajaa, cua sohuanuuri niaata quiquiaa. Nia shuquiritiaanijia, maninia jatiqui nia quishacari, mariyata seetanujuanaa maninia nia tiuushacari Cristooocua, maja jatasano nia quiniuria.

⁶ Niaacuajaari pa Jiyaniijia Jesucristo masequiaari, nia jiyaniijia na quiniuria. Naaratej, pueyaracaanu maninia nia ruperenoo, maninia nia quiniuria mijiria na cumaacata. ⁷ Maninia nia rupeteoore Cristota, naatej, taa naana cumaatia nujuacuuaani, jaara tu-cuamaaca nujuacaraca quiri. Naacaujiti, majaari nia naata jatasano quiniu, maninia nia tiuushacari nocua, taa nia niishitiojsoaaciaaricuaajani. Cunora, pueyaracaanu nia sequeriquia Pueyaso: "Paacarasho canaa Quena".

Niaari quiarinio pueya, Cristo quishacari nioojiajinia

⁸ Tama nia cuaqueyajaaja nia cojuare, tamasa mariqui nia sapojoreeri tamaatia nojori niishishanota najuhuanaj. Niaa jaara nojori niishitiojosano tojitiariquia, niaari juhua

nojori quioosano pueya quiniutianiya. Nojori niishishanoori maja Cristojiniiji. Nojori niishishanoori saaja mijiria niishishano, supuetanaa pohuatasano najuhuanajuhua.

⁹ Nocuaji saaja Cristo nia tojiri. Tama Cristo cutarajaariija puetunu Pueyaso cumaacajanaa jiiitiaja, puetunu na niishitiajajanaano. ¹⁰ Naajuhuaaj, niaari Pueyaso cumaaca jiiitaa, na niishitiajajano, nia rupesacari Cristo. Naacuajitij, niaari puetunu nia panishanojuanaa jiiitaa tari, maninia quijiaca nia quiniuria. Cristojuaanaari Jijaniijajanaa. Cristo jaara na jiyarore, puetunu tamonu cumaacaraca quijiacajanaari na tojitiaa: jiyocuaaanu camarnu, mijiria camarnunio. ¹¹ Cristo nia rupesacari, niaari seetanujuanaa jatanishaa-ree maja sesa nia quiniuria socua. Majaari nareja nia cararaatiuuqia co miatesaanu quiquiaari, taa Judiocuaca miiquiaacuaani. Nojoriiri miatesaaquiaa nojori niishiniuria nojori cu meta quiriia saa Pueyasoraja, maja sesa miiija nojori quiniuria socua. Cuno, miatenuni, majaari pueyano na jataniniu sesa na miiniujiniiji. Cristo cutaraari sesa nioojia jataquiaari, seetanujuanaa sesa nia quiniu jatasaanura puetunujuanaa. ¹² Puetunu sesa nia quiniujianaari juhua jamosaaquiaari Cristota, niaa jaara moojinia tiuquini-jiosaare. Nia tohuatasacariuhua, niaari juhua samiitianishaarohua Cristota, Pueyaso cumaacaacia nia tiushacari. Niaari samiitianishaarohua taa Pueyaso samiitianiquiaariuhua Cristocuaani. ¹³ Naaari juhua macu quiquiaari tariija, sesa miiijaca nia quishacariija, sesa jiuujiaraca nia quishacarijiano. Jiyacaritij, Pueyasoori nia samiitianiquiaari Cristota, na jiyanooshacari nijaniya puetunu sesa nia miishanooriniijijianaa. ¹⁴ Pa tojijaquishacari tariucuaaanu Pueyaso rootasano, paari puecoosocoriquiano quiquiaari juucuaani. Sesu pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiaari puetunujuanaa. Pueyasoori puetunu sesa pa miishanojuanaa tiuutiaquiaari Cristoocua. Cristo teetesacari niyacutesanojinia, puetunu sesa pa miishanojuanaari cuniqui puequequiaari. Naa Cristo miishacari pocuaratej, majaari sesa pa miishano tiuutiasaanu pocua. ¹⁵ Na cusosacari niyacutesanojinia, Cristoori puetunu tamasaca sesa cumaacaraca quijiacajanaa shocotaquiaari. Nojori cumaaca jaariutiareeri. Nojori rerequetereeri, naatej, taa quioosano pueya jaatucunuusaquiaacuaani, pueya niqiuara macaatiishocoriquiano.

Saaja Pueyaso casaacua nia jiaatiariquia

¹⁶ Naaratej, majaari nia tojiniu noo pojori, canapute nia tojitiniu saniniujiya supuetana niishitiojosano cuajani. Nojoriiri najuhuaa niishitiojoquiaa casaa sumatuute puereshiyani, ratasano. Nojoriiri niishitiojoquiaajuhuaaj teyano juucate poonijiaquishiyani, naajuhuaaj, Pueyaso niqiuara pa queranacunuura raca macura. Nojoriiri naa niishitiojonuquiaa nojori jiyaniishacari paa jaara naa miyaquirini, Pueyaso mariqui pa saniitioreeri. ¹⁷ Puetunu cuno supuetanaa niishitiojosanojuanaari tariucuaaanu quiquiaari, miriqui na niishitiojonura pueya taate seetanujuanaa quiniutianiyaniriquiano jaara tiuquiri. Cuno Niriquianocuaajaari Cristo. Tari tiuquiquiaariiri. Nojua-jaari pocuaji Tacuna. Naaratej, majaari socua pa tojiniu cuno miriqui niishitiojosano. Quiaariija saaja Cristo pa tojiri cutara. ¹⁸ Tama nia cuaqueyajaaja nia cojuare, tamonu niishitiojonaa mariqui nia sapojoreeri, niaa mariqui Pueyaso niqutionu panishano nijaniya maseyaquiriiri. Nojoriiri tama na cuaqueyajaaja shuquiritiaquiaa na jiyaniishacari nojori maja Pueyaso shocotaja na quiniu nojori secojosacari Pueyaso seya, maja Pueyasajuanaa. Nojoriiri tama na maquenujinia na niquishanoocuaajaaja tiuujiaa, maja Pueyaso rupaacua. Naacuajitij, nojori tiushacari tama na niishiriojosanoocuaajaaja, nojoriiri seetanujuanaa pueya shocotajaca quiya. ¹⁹ Nojoriiri maja na rupeanu Cristo, juhua poojia Cristo quishacari, na cuaqueya pa quishacarijuhuaaj. Paa jaara maninia ruquetesano quiri poojiatani, poojiaari maninia maashitiya puetunu pa cuaqueyajanaa, paa jaara maninia rupeutoonu quiya puetunu pa nucuhatajanaani, pa cusorohuatano. Pueyasoori naa pa maashitiniu panijajuhuaaj Cristota rupeutootesano pa quishacari.

²⁰ Naaari juhua tari cusoquiaari Cristota, maja socua juhua mijiria quijiaca nia quiniuria. ¿Macutucua taa supuetana rootasano tojirini? Maja na naata. ¿Nijaniyariuhuaaj? ¿Casaara nia tojitiaajaa cuno tariucuaaanu rootasano? Naaari juhua nareja mijiria quiniaa quiyajaa, nia tojishacariija cuno rootasano. ²¹ Supuetanaari naa piriyojouiaariitij: “Maja pa quianu cuno. Maja pa miaquenu cunojuhuaaj. Maja cuno pa cooniu”. Pa supuetanaari naa sequejatej. ²² Naajaa, puetunu cuno pueresano casaajanaari saaja shaajeja pa seecojinia. Majaari poojia na miiniu sesa. Cuno tariucuaaanu rootasanoori saaja tama pueya niishishanojuaja quiquiaari. ²³ Paa naasucuaari jiyaniyani cuno rootasanoori maninia quiya Pueyaso shuquiritanura pajaniya socua. ¿Paatucua socua maninia pueya quiriini paa jaara casaa sumatu puerereni, naajuhuaaj, paa jaara naquiya miiri tama pa cuaqueyajaajani casaa pa puerenutani? Maja. Pa pueresacari casaa, cunoori najuhuaa Pueyasora. Cunoori maja na naacunu pajaniya sesa casaacua pa jiaatiaaquiniuria.

3

¹ Níaa jaara samiitianishaaquiaari Cristota, jiyocuacaanu Pueyaso jiitiasanoocua nia jiaatiare, tee Cristo cajiya na Que Pueyaso miaquetajaracuajani. ² Pueyaso casaacua nia niishiriojore saaja, maja mijiria casaacua. ³ Puetunu tarijia sesa nia quiniujianaari tari juhua jamosaaciaari, niaa jaara Cristo cusonu jiyatere tama nia nitijiaaja. Quiarijiani, niaari saminió quíya nia rupuesacari Pueyaso, Neyanu Cristota. Nojuacuajaari pa samiitianijia. Saniniuuja, juhuanouaja maja niishishano taamueca quíjiaca pa cuaqueya quiniutianiyani. ⁴ Cristo jaara muetarohua pocua mijiria, shacantuuca cumaacaraca quíjiaca pa quishacari, jiyacaritij, paari jatanishaanutaniyani shacantuuca cumaacaraca quíjiaca pa quiniuria nata, juhua nojuajuhua.

Maninia rootasano Pueyaso muerasura

⁵ Naaratej, nia cuaqueya cuaara quíria juhua macu tama nia níquiarajaaja, nia cuaqueya nia ruuretánura na jiaatiasacari sesa miiniucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitianio. Nia cartere puetunu sesa miiniucua nia jiaatiasanojuanaa. Maja sesa casaacua nia jiaatianu. Maja puera casamiicua nia jiaatianu. Casaacua jiaatijaari juhua Pueyaso ruuretaja quíya, tama na jiitiasano casaacuajaaja na tiuushacari juhua Pueyasooacua. ⁶ Pueyasoori jiyanoohua saniitionutaniya na tojiyashijia, canapueete naa sesa quíjiacacuajani. ⁷ Pueyaso tojiyashijia nia quishacari tarijia, niaari naa sesa miíjiaca quíquiaari. ⁸ Quiarijiani, nia tarinitiare puetunu naa sesa nia quiniujianaa. Maja juaaja nia quiniu. Maja naseeca pueyano nia quiniu. Maja jyanoyashijia nia quiniu. Maja sesa miíjiaca nia quiniu. Maja pueya sesacaja nia quiniu. Maja sacuaraatia najuhuaa nia niti taquíruocateja nia quiniu. ⁹ Maja nia cuaracashijiootunu. Niaari tari jatanishaaquiaari tarijia sesa nia quiniujiniji, sesa jiuujiaraca nia quishacarijia, sesa miiniucua jiiitnio nia quishacarijuhuaj. ¹⁰ Níaaari quíarinió jiuujiaraca quíjiaca tari. Quiarijiani, tama nia cuaqueyajaarijia tari jataa juhua nia Shipininia Pueyaso nia quiniuria, seetanujanaa Pueyaso niishijia nia quiniuria. ¹¹ Pueyaso jatanishano pueya pa quishacari quíriani, majaari tari rimiajata pa quiniu, paa jaara Judiocuaca quíyani, tamasaca pueyano; na cararaatiuuquia co miatesano pueya, miatesoo pueyano. Paa jaara tahue quíyani, juhua mococori, poonijotesano pueya, camarnuuju pueyano, naajaa. Cristo pa rupuesacari, puetunu pajaniyajanaari mariyata na muerasu quíyani. Nojuajaari puetunu poojajinia quíyajuhua.

¹² Pueyasoori nia saquíriojoquiaari saa maniníaja nia quiniuria nera. Níajaniyari na panishano muerasu. Naaratej, pueyaca taraajeja nia quíri. Maninia miíjiaca nia quíri. Majaari nia jyaníanu tama nia cuaqueyajaarijia socua maninia tamonujiniji. Maja juaaja nia quiniu. Jacaria pocuaja nia quíri. ¹³ Jacaria nacasutooja nia quíri. Maninia nia jyanoori cante sesa miíri níajaniyani. Taa pa Jyaníjia jyanooquiaari pajaniyacuaani, naa nia jyanootioorejuhua. ¹⁴ Seetanujanaa pueya panijiaaca nia quírijuhuaj. Cunoori socua jyanohua panishano. Panitiojuaca nia quishacari, puetunu nia miishanojuanaari jyanohua maninia quiniutianiyani, jatiqui nia quiniuriajuhuaj. ¹⁵ Naajuhua, Pueyaso nia shanacure nioojia na cajitiniuria pueyaracaanu. Nojuacuajaari nia saquíriojoquiaari juhuaníya quíjiaca nia quiniuria, maninia rupuetootesano. Pueyaso muerasu cuaara jatiqui poonijonuujaca quíria, naatej, taa pa cuaqueyajiniacua casaa puetunujuanaa jatiqui quíyacuaani. Majaari nia juaatíoojonu. Naajuhua, Pueyaso nia shuquíritiare pueyaracaanu, puetunu maninia na miishanojiníjianaa níaa.

¹⁶ Níoojia cuaara quíria mishaja Cristo rupaata, jyanohua na tojiíaca nia quiniuria. Pueyaso Rupaa nia niishitiojootore nia jaaquequejisanota. Naa nia cumaquítiojore puetunu Cristo niishishanotajanaa. Níaa jaaquequejonoore Pueyaso Rupaa naajiosanojiníji, pueya naajiosanojiníjiuhua, Pueyaso Sohuanu niishitiojosano níajaniyani. Naa nia jaaquequejore Pueyasora, nia shuquíritianuta nojuaja. ¹⁷ Jesucristocuaajaari nia jyaníjia quíya. Naacajitij, níaaari na sesaanucua. Naaratej, nia sequesano, nia miishanojuhuaj, puetunu cunojuanaa cuaara quíria maninia nera. Naa nia miíriquia pa Que Pueyaso nia sequenuta “paacarasho”, Neyanu cumaquiniucua níajaniya.

Maninia miíjiaca pa quíri Pueyaso muerasu pa quishacari

¹⁸ Maajipohuaanaa, nia níyaca tojítajaca nia quíri. Pa Jyaníjiaacua tíuujiaca cumaati naa miíquiaaquí. ¹⁹ Pueyanaa, nia níquíocua nia paníri. Majaari na juaaníu. ²⁰ Mueraasapueanaa, nia queya tojítajaca nia quíri, nia shuquíritiniuria pa Jyaníjia. ²¹ Pueyanaa, maja nia juaatíniú nia níquíohua, nojori mariquí maninia miiniucuaaji pishiriiri, puera nia juaashacari nojori. ²² Poonitíjiosano pueyanaa, puetunu nia camarnu sequesanojuanaa nia tojiri. Maja na tojítajaca nia quiniu saaja na shootiasacari níajaniya, na shuquíritianura níajaniya. Majaari saaja na níquishacari nia poonijonu nia sapojonura

nojuaja. Seetanujuanaa maninia nia poonijiore pueyaracaanu nia puerenuta saniya nia camarnujuanaa Pueyaso. ²³ Puetunu nia miishanojuanaa nia miiri shitimia, juhua pa Jiyaniijia Cristora. Naa nia miiritij, maja juhua nareja pueyara. ²⁴ Maja nia niyajetanu, pa Jiyaniijiaari nia niqutionutaniya jiyocuacaanu niaara na jitiisanonijini. Mijiria camarnura nia poonijosacari, niaa cutaraari Cristora poonijiya. Nojuacuajaari nia camarnujuanaa. ²⁵ Pueyasoori sesa mijia saniitionutaniya cutara, sesa nojori miishanojinijini. Pueyasoori maja rimiajata saniniuujia. Mijiria camarucua, poonitijosano pueyanio, naajaa, nojoriiri maja rimiajata Pueyasora.

4

¹ Camarucuaana, pueyaracaanu maninia nia miiriquia nia poonitijosano pueya. Majaari nojori nia miiniu sesa. Maja nia niyajetanu, niaari jiyocuacaanu Camarnuracajuhuj.

² Pueyanaa, Pueyaso secojojua nia quiri pueyaracaanu. Nia secojoriquia maninia nia niishiniutia. Pueyaracaanu Pueyaso nia secojosacari, nia sequerenoj, "paacarasho". ³ Naajuhuj, canacuara nia secojore Pueyaso, nojuaja cuaara canaa pohuataniiria pueya niquiara na rupaa Cristojiniji. Majaari pueya niishiniu quiquiaari tarjia Pueyaso miiniu panishano pajaniyara Cristo seera. Cua pohuatanuucua Cristojiniji, cunora nujuatesano nia quiyani nio nujuatejojuajinia. ⁴ Pueyaso nia secojore cucuara, maninia cua pohuatanura Cristojiniji, pueya niishiniuria maninia cua pohuatasano, taa Pueyaso paniya cua pohuatanuracuajani.

⁵ Maninia nia niishiriojore taa nia miiniutianiya noo pojorini, canapuetucuaja maja Pueyaso muerasuni. Maninia nia miiri nojori, mijiria nia quishacarjia. ⁶ Nia pocoojosacari nojoritia, maja najuhua nia pocuanu. Pueya nia cumaquiri nia sequesanota. Nia niishiriojore taa nia riucuanutaniya tamasaca pueyani, nojori jaara nequesotariquia nijaniya Pueyasocua nia tiuuniujiniji.

Nata quiniaata Pablo saruhuatasacari pueya, naajionu na puecanura

⁷ Pa panishano pa tarajanu Tiquicoori nia pohuatanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jiyaniijiaara canaa poonijionura. ⁸ Niaacua na jiyaroyanjia nia pohuatanura nijaniya taa canaa quiyani, naajuhuj, na cumanijianura nijaniya. ⁹ Pa panishano Onésimoori nata quianutaniyajuhaaj. Nojuacuajaari nijaniyajinijinio pueyano. Maninia poonijiojua Pueyasora. Nojoricuajaari nia pohuatanutaniya puetunu niquijijianaa.

¹⁰ Aristarco, cuata nujuatesano pueyanoni, nojuajaari cua sequeya cua saruhuatanura nijaniya nera. Marcoori nia sarhuataajuhuj. Nojuajaari Bernabé cuna. Niaacuajaari tari rootasaacuan Marcojiniji. Nojuaja jaara niaacua quiaare, niocua maninia na tiuquiniri nia tiajinia. ¹¹ Jesu sesaanucua pueyanoori nia sarhuataajuhuj. Na sesaari Justojuhuj. Saa nio pojorijia Judiocuacajinijioori cuata poonijioquia Pueyasora, canaa niishitiojona Cristojiniji pueya niquiara. Nojoriiri cua cumanijianaa quiquiaa. ¹² Epafrasri nia sarhuataajuhuj. Nojuajaari Cristo seru nijaniyajinijiojuhuj. Nojuajaari pueyaracaanu niaacuara secojoquia queraatia, jiyanojua cumaatia Pueyasocua tiuujia nia quiniuria. Secojoquiaaariuhua ritia Pueyaso tojjia nia quiniuria, puetunu Pueyaso panishanojuanaa nia miiniuria maninia. ¹³ Seetanujuanaa, Epafrasri jiyanojua tacaquiaa niaacua, Laodicea tiacajinia quiniaa Pueyaso muerasuucujuhuj, Hierápolis tiacajinia Pueyaso muerasuucuanio. ¹⁴ Pa panishano naarajona Lucasri nia sarhuataa. Demas nia sarhuataajuhuj.

¹⁵ Canaara nia sarhuataare Laodicea tiacajinia quiniaa parta Pueyaso muerasu. Ninfas nia sarhuataarejuhuj, na tiajinia rerejonaa Pueyaso pueya maanujuhuj. ¹⁶ Naa jaara nio naajione serojorecua nia rerejosacari, Laodicea tiacajinia nia jiyarotarejuhuj, cuaara serojosaaria Pueyaso pueya maanu niquiara tiijuhuj. Naajuhuj, cua naajione Laodicea pueyacuara nia serojore, niaacua nojori jiyarotasacari Laodicea tiacajiniji. ¹⁷ Naa Arquipo nia sequere quiria: "Tama quia cuaqueyajaaja quia cojuare quia tu-cuatanura quia poonijosano pa Jiyaniijiaara. Nojuajaari quia jiyatequiaari nera poonijiriquiano".

¹⁸ Janyari Pabloni. Quiarijiani, tama cua juashiquitatajaaja naajiyaniija saaja cua sarhuatanura nijaniya. Nia niishiriquia, janyari moronucua nujuatesano quiyani. Pueyaso cuaara cumaquiria nijaniya na cumaacata jiyanojua. Tariucuaja.

COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pabloni. Janiyari nio naajiya Tesalónica tiacajinia quiniaa Pueyaso pueya maanuucuarani. Niaacuajaari pa Que Pueyaso rupuejaca, pa Jiyaniijia Jesucristo rupuejancano. Canaari mariyata nia saruhuataani, Silvano, Timoteonio. Pueyaso cuaara maninia jiitiaara na cumaacata niajaniya, maninia nia quiniuria. Cuaara nioojia cajitiirijahuaj, juhuajaniya nia quiniuria.

Tesalónica pueyanaari Jesuucua tiuujiaqui quiquiaari seetanujuanaa

² Maninia nia quiniucua, canaari pueyaracaanu Pueyaso sequequiaani, “paacarasho”. Canaa secojonuusacari, canaari pueyaracaanu niaacuara secojonuucuaani. ³ Pa Que Pueyaso canaa secosacari, canaari pueyaracaanu niishiquiaa niajaniani, taa pueyaracaanu nia poonijioquiaa Pueyasorani, Neyanuucua nia tiuuniucua. Canaari niishiquiaa-juhuj taa nia paniniutia nia naacuquiaa niarta pueyani. Naajuhuj, niaari maninia rejeretaquiaa taraatia nia miiniu, nia niishiniucua pa Jiyaniijia Jesucristoori pocua niniutianihua. ⁴ Pueyaso panishano pueyanaa, canaacuajaari niishiyani, nojuajaari nia saquiriojquiaari na panishano muerasu nia quiniuria. ⁵ Canaa jaara nia niquiara pohuataquiaari Pueyaso rupaa Jesucristojinijini, cunoori maja najuhua pohuatasano quiquiaari. Canaa pohuatasanoori jiyanoehua Pueyaso cumaacaraca quiquiaari. Pueyaso Sohuanuuri jiyanoehua poonijiorquiaa nioojiacajinia. Naacuajitij, niaari niishiquiaari canaa pohuatasanoori seetanu rupaajanaa. Niaacuajaari niishiya taa quijia canaa quiquiaari canaa quishacari niaatani, maninia Pueyaso muerasu nia quiniuria.

⁶ Niaari canaacia jiaatiaquiaari, juhua canaa nia quiniurijahuaj, juhua pa Jiyaniijia Jesu nia quiniurijahuaj. Niaari seetanujuanaa naa miijicara quiquiaari, Pueyaso tojjijia nia quiniurijahuaj taa canaacuaani. Pueyaso rupaa nia tojjishacari, niaari jiyanoehua na timitiaquiaari. Cunora, niaari jiyanoehua naquiya miishaaquiaari. Naajaa, Pueyaso Sohuanuuri nia cumaquiquiaari saaja, shuquiriaatia nia quiniuria. ⁷ Naa shuquiriaatia Pueyaso tojjijia nia quiniucuatej, niaari niarta Pueyaso pueya shiniujuquiaari, seetanujuanaa Pueyaso tojjijia nojori quiniurijahuaj. Niaari naa shiniujuquiaari puetunu niarta Pueyaso pueyanaa Macedonia jiyajinia quiniatej, Acaya jiyajinia quiniaanio. ⁸ Pa Jiyaniijia rupaari niajanijajiniji tucuaaanu paaquequiaari, maja saaja Macedonia jiyajinia, Acaya jiyajinianio. Cuno rupaari puetunu tiqiyocuajanaa poojotasaquiaari. Naacuajitij, puetunu tiqiyocua quijia pueyajanaari tari niishiya taa Pueyasocua tiuujia nia quiya seetanujuanaani. Naacuajitij, ¿canaatucua casaara niishitiojore Jesujiniji socuani, tee cuniqui pueya niishiya tari nojuajinjicuaajani? ⁹ Tee cuniqui canaa tiuquiquiaani, pueyari canaajiniji poojotanuya tari, taa Jesujiniji canaa pohuataquiaaricua niajaniani. Nojoriiri niishiyajuhuj taa canaa nia tiuquinitiaquiaari maninia nia tiacajiniaqueyani, canaa pohuatasano nia tojinuria. Naajuhuj, niaanaari pueya shipinjiosano nia jiyatesano nia pueyasora cartequiaari, pueyaracaanu rishijia seetanu Pueyasojuaanaa tojjitajaca nia quiniuria. ¹⁰ Naajuhuj, niaanaari Neyanu sashiya, jiyocuaanuji na tiuquinihuara, teyano Pueyaso samitiani quiaarihuua macujinjicuaajani. Pueyari niajanijajiniji niishiyajacuhuj, Jesuuri pocuaji Tacuna, maja mani quiquiojinia pa quejoosaanura, Pueyaso saniitiosacari na tojjitaaashijia.

2

Pablo niishitiosacarihuua pueya, taa na quiquiaari nojoritiani

¹ Cuarta Pueyaso pueyanaa, niaacuajaari niishiya, majaari najuhua canaa quini quiquiaari, niaata canaa quishacari. ² Niaacuajaari niishiya, Filipo tiacajinia canaa quishacari, niaacua canaa tiuquiyacquishacarijia, canaari cuno tiacajinia sesacasaaquiaarini. Canaari jiyanoehua taraatia miishaaquiaarijuhuaj. Naajuhuj, nia tiacajinia canaa tiuquijiosacari, pueyari canaa pohuatasano ruuretaquiaari saaja. Naajaa, Pueyasoori canaa cumaquiquiaari juhua jiuujiaaju canaa pohuatanura Jesucristojiniji nia niquiarajuhuj. ³ Canaacuajaari niishiquiaarini canaa pohuatasanoori seetanu rupaajanaa. Majaari canaa pohuatanu quiquiaari canaa miiniuria sesa niajaniani, canaa sapojonura niajanijajuhuj. ⁴ Pueyasojuaanaari canaacua tiuquiquiaari. Cunora, canaa jiyatequiaariiri Neyanujiniji pohuataanaa canaa quiniuria. Naacuajaari taa canaa poojotaquiaa pueya tiuuniuria nocuacuajani, Pueyaso jiyanooniuria nojori. Canaari

seetanujuanaa Pueyaso timitiniu paniyani, maja saaja pueya. Pueyasocuaajaari canaa jiuujia niishijia. ⁵ Niaacuaajaari niishiyajuhuj, majaari canaa sajonu quiquiaari njajaniya shanohua canaa sequesana, canaa nia maniniucuanura. Naajuhuj, majaari canaa cuaracashijionu quiquiaari njajaniya, canaa nia niqutiojonura nia cumaneecajiniji. Pueyasoori na niishiyacuja. ⁶ Majaari quenaaja canaa niishiriojonu quiqia pueya timitiasano canaa quiniuria, nia timitiasano pueya canaa quiniurajuhuj. Maja. ⁷ Canaacuaajaari seetanujuanaa nia jiyaniijianucuanu, Jesucristo jiyaramiquishano pueya canaa quiniucua. Naajaa, niaata canaa quishacari, majaari naa canaa miiniu quiquiaari njajaniya, juhua canaa seya nia quiniuria. Saniniujia, canaari tojtaarucujanaa juhua naatujoori quiquiaarini, niaata canaa quishacari. Naatej, taa maaji jitiiaa maninia necohuacuaani, canaari naa nia jitiiaquiaarijuhuj. ⁸ Jijyanohua canaa paniniucua njajaniya, majaari saaja Pueyaso rupaa canaa pohuatanu quiquiaari njajaniya. Canaa cutaraari tama canaa cuaqueyajaaja panitiaquiaari niaacuarani, naajaa, canaa cuaraa puecoosaariaqui. Canaari naa jitiiaquiaari njajaniyani, jiyanoohua canaa paniniucua njajaniya. ⁹ Cuarta Pueyaso pueyanaa, niaacuaajaari niishiya taa canaa poonijioquiaari jiyanoohuani, tama canaa panishanojuaaja canaa masetajara. Canaari naa poonijionuquiaarini juuca, niucuanio, canaa pohuatanaa Pueyaso rupaa njajaniya. Canaari naa miiquiaarini maja canaa taajetenura njajaniya canaa mashiniquijionuta nia cumaneeca.

¹⁰ Naacuaajitij cuarta Pueyaso pueyanaa, njajaniya, Pueyasojuhuj, niaacuaajaari niishiya canaari saaja maninia miiquiaarini, niaata canaa quishacari. Majaari quenaaja canaa miiniu quiquiaari sesa. Naacuaajitij, tamasacaari maja na naata canacuara saquiriojotanu, canaa jaara tojtaarucujanaa sesa miyaquiaarini. ¹¹ Niaari niishiyajuhuj taa canaa shiniujuquiaari njajaniyani Pueyaso nia tojiniuria. Niaari niishiyajuhuj taa canaa cumaniiaquiaari puetunu njajaniyanaani taraatia nia quishacari, naatej, taa pueyano miiquiaa na panishano niquihuacuaani. ¹² Naajuhuj, canaacuaajaari jiyanoohua nia nacasuquiaarini maninia miijia nia quiniuria juhua seetanujuanaa Pueyaso pueya. Pueyasocuaajaari nia saquiriojoquiaari pueyaracaanu nata nia quiniuria, jiyaniijianucua nia quiniurajuhuj, juhua nojuajuhuj. Nojuacuaajaari na shacantuca cumacajinia quijia.

¹³ Canaa jaara Pueyaso rupaa pohuataquiaari nia niquiarani, majaari nia jiyaniinu quiquiaari cunoori saaja pueyajiniji canaa tojiniushano. Maja. Niaari seetanujuaana na tojtiajacara quiquiaari, nia niishishacari cunoori seetanujuanaa Pueyaso rupaa cutara. Canaari cunora canaa timiniutia sequequiaa Pueyasoni, "paacarasho". Canaa pohuatasanoori seetanujuanaa Pueyaso rupaa. Naacuaajitij, na rupaari noojajinia poonijioquiaa, maninia miijiacara na jataniniuria njajaniya, Jesucristo tiuujia nia quiniucua. ¹⁴ Naa Jesucristoocua tiuujia nia quiniucuatej, niarta pueyari nia miiquiaari naquiya, taa Judea jiyajinia parta Pueyaso pueya maapue miishaaquiaaricuaani. Tama narta Judiocuaajaarija nojori miiquiaari naquiya, Jesucristo tojijia nojori quiniucua. ¹⁵ Nio cuarta Judiocuaani, nojori supuetanaajuhuj, nojoricuaajaari pa Jiyaniijia Jesucristo motuquiaari. Nojori supuetanaari naa tariucuaaanu puecooquiaarijuhua Pueyaso sequesano caminiujuunaa pueyatej. Naajuhuj, Jesucristo tiyashijiaa cuarta Judiocuaaari canaa taanuuquiaari canaa Judea jiyajiniji. ¿Cuno pojoritiiri Pueyaso timitiasano? ¡Maja! Cuno pojoricuaajaari juhua puetunu mijiria quinaa paraajanaa. ¹⁶ Naacuaajitij, canaa jaara taucuaa pohuatanu paniriquia Jesucristojinijini, Pueyaso pueyara nojori jiyatesaanurajuhuj, Judiocuaari canaa tenujuquiaa juucuanu. Naacuaajitij, Pueyasora, sesa Judiocuaa mijiosanoori tari tojtaarucujanaa puera. Cunora, Pueyasoori nojori saniioquiaa jiyanoohua.

Pablo naquerejosacari juucua Tesalónica tiacajinia quinaa Pueyaso pueyacua

¹⁷ Cua panishano pueyanaa, canaacuaajaari rupaquijia nia shuriucuaaji quiaquiaariuhuanu. Jiyacari canaa niquiyaquishacari njajaniya, naajaa, canaacuaajaari juhua niaata quiqiaaajani, pueyaracaanu canaa niishiriojosacari njajaniya, niaacuara canaa secosacari. Canaari juucua jiyanoohua nia niquiniu paniriquiaani. ¹⁸ Cunora, canaari niaacua naquerejoquiaari juucuanu. Janiyari niaacua naquerejonu pacutejoquiaarini. Satanásri canaa cushitioquiaari saajani. ¹⁹ ¿Janiyatucua casaara nia niquiniu paniyaquiririni? Niaacuaajaari jiyanoohua cua timitiasano pueya. Pa Jiyaniijia Jesucristo tiuquishacariuhua, janiyari niishiyani, nojuajaari canaa shuquiritanutaniya maninia na tojijia nia quishacari canaa niishitiojonuucua na rupaa njajaniya. Pa Jiyaniijia pa quishacari, jiyacari, canaari jiyanoohua nia timitianutaniyani, maninia na tojtiajacara nia quiniucua mijiria. ²⁰ Taaquiririni, canaacuaajaari tari shuquiriaatia quiyani, maninia na tojtiajacara nia quiniucua. Niaacuaajaari seetanujuanaa canaa timitiasano pueya.

3

¹ Naa jiyanoohua canaa niishiniu panishacari juucua niajanijajinijitij, majaari socua canaa sashiniu paniniu quiriquiaa. Cunora, canaari niishiriojoquiaarini, maniniacuaajaari canaa jateenura tamajaaja Atenas tiacajinia. ² Naacuajitij, canaari saaja parta Pueyaso pueyano Timoteo jiyaroquiaari niaacuani. Nojuacuajaari jaarajaaja cuata poonijiona Pueyasora, Jesucristojiniji canaa pohuatnura. Janiyari niaacua na jiyaroquiaarini na cumaquiniuria niajanija, mariyata socua na shiniujuniuria niajanija Jesuucua nia tiuuniuria saaja. ³ Na jiyaroquiaarinijia na cumaquiniuria niajanija maja quenaaja niquiriyatu niajanijajinijinio pishiniuria Pueyasocuaaji, naquiya nia miishacari. Niaacuajaari tari niishiquiaari, paari naquiya miishiyani Jesucristoocua pa tiuuniuucua. ⁴ Canaa quishacari niaataja, canaacuaajaari tari nia numootequiaarini, puetunu pajanijajanaari naquiya miishaanutaniyani Jesucristo tojtiajaca pa quiniuucua. Niaacuajaari niishiya, seetanujanaa naa tohuatecanuuri cua sequesano. ⁵ Cua niishishacari niajanijajiniji, niaanaari naquiya miishaquiaa, janiyari puereriquiaani Sesaaca naasucua nia miitiriucuaa sesa. Jaara naa quiriritij, puetunu canaa miishanojuanaa niaara maara najuhuana quiquianu. Naa cua tacaashacaritij, majaari socua cua tarishiniu paniniu quiquianu, niajanijajiniji cua niishiniuria. Cunora, janiyari ritia jiyarocanu niaacua Timoteoni, saniniujia nojuaja pohuatanuhuaa janiya, niaate Jesuucua tiuyajaa.

⁶ Timoteocuaajaari tari niajanijajiniji tiuquiriohuacuaa. Nojuajaari canaa pohuatasuhucuaa, niaanaari Jesuucua tiuyajaa. Niaanaari panitiojuaca quiyajaa. Canaa pohuatasuhucuaajaarihuaj, niaanaari canaa niishiriojoquiaa jiyanoohua nia paniniutia canaa. Niaanaari canaa niquiniuucua jiaatiaa, naatej, taa canaa jiaatiaa canaa niquiniuria niajanijajinaani. ⁷ Cuarta Pueyaso pueyanaa, seetanujanaa canaari taraatia miishiya niyani. Canaari tacayajuhuj. Naajaa, canaa niishishacari niaanaari seetanujanaa Jesuucua tiuyajaa, canaari canaa jiuujia cajitiriucuaani. ⁸ Naa canaa tojishacari niaacuajitij, canaari juhua samiitiacorohuani, pa Jiyaniijia tojtiajaca nia quiniuucuaaja. ⁹ Cunora, canaari jiyanoohua nia shuquiritiaa Pueyaso niqiarani. Naacuajitij, majaari canaa niishiniu taate canaa naata sequenu nojuajani "paacarasho". Naa maninia nia quiniuucuatej, canaari jiyanoohua shuquiriaatia quiyani. ¹⁰ Naajuhuj, canaari juuca, niucua secojoquiaa Pueyasoni, nojuaja cuara canaa tiuquitihuara niaacua. Canaari maninia nia niishitiojonu tucatanu paniyani, seetanujanaa maninia jeenucuaasano Pueyaso pueya nia quiniuria.

¹¹ Canaari paniyani pa Que Pueyasojanaa, pa Jiyaniijia Jesucristonio, nojori cuara canaa naacuura niaacua canaa tiuquiniuria. ¹² Pa Jiyaniijia cuara nia jiyateera socua jiyanoohua panitiojuaca nia quiniuria, tamasaca panijaca nia quiniuriajuhuaj, taa canaa panija niajanijajinaani. ¹³ Naa panijaca na jiyatesacari niajanijatej, niaari nioojia niqijoteyashijaca quiniutianiya cutara. Naajuhuj, niaari tojetaarucujanaa sesa miyashijaca quiniutianiya, pa Jiyaniijia Jesucristo tiuquishacarihuua puetunu na jiyanooshano pueyatajanaa.

4

Taate pa naata Pueyaso shuquiritiniuni

¹ Quiarijiani cuarta Pueyaso pueyanaa, pa Jiyaniijia Jesu jiyaramiquishano pueya canaa quiniuucua, canaa sequesano nia tojiri. Quiarijiani, canaari nia shiniujijani socua maninia miijaca nia quiniuria. Canaari nia niishitiojoquiaari maninia miijaca nia quiniuriani, Pueyaso nia shuquiritiniuria. Niaacuajaari naa maninia miya.

² Niaacuajaari canaa rootasano pa Jiyaniijia Jesujiniji niishiya tari. ³ Canaacuajaari nia rootaquiaarini, Pueyasoori nia panitiaa saaja nera nia quiniuria, tojetaarucujanaa maninia jeequesano nia quiniuria sesa nia miishanojiniji. Majaari nia numuetucunu nia camishoo maaji. ⁴ Puetunu mashiquiorijanaa cuara niishiiria maninia na cojuanura necocharano, maja ritia na numuetucunura, nata na camiyaquishacarijia. Cuaara na cuaqueya panishano rejetenu niishiiria. ⁵ Majaari sacuaraatia nia miiniu taa Pueyaso niishiyashijaca pueya miiquiaacuani, jiyanoohua nojori jiaatiasacari maajicua. ⁶ Naajuhuj, majaari quenaaja jiyasohuaja niarta pueyano niquiocua nia numuetucunu, neyaca nia sapojonuta. Cuno maajicuaajaari saa neyacaraja, maja tamonura socua. Pueyasocuaajaari naa miijaca saniitionutaniya jiyanoohua, taa canaa numootequiaari tari niajanijajajani. ⁷ Pueyasoori maja na saquirojonu quiquiaari pajaniya sacuaraatia miijaca pa quiniuria. Pa saquirojoquiaariiri tojetaarucujanaa sesa miyashijaca pa quiniuria, saa neraja. ⁸ Naacuajitij, cante nio rootasano ruuretajani, nojuajaari maja saaja na rerequetenu nio rootasanojiniji pohuatana. Nojuajaari Pueyasojanaa rerequeteya cutara, cante na Sohanu niqitiojoquiaari niajanijajajani.

⁹ Quiarjiani cuarta Pueyaso pueyanaa, janiyara, najuhuanaruhua niaacuara cua naajonura cua niishitiniuria nijaniya, panitioojuaca nia quiniuria. Pueyasocuaajari tari nioojiajinia nia niishitiquiaari panitioojuaca nia quiniuria. ¹⁰ Niaacuajaari seetanujanaa puetunu Macedonia jiyajinia niarta Pueyaso pueya panijiaca quiyacuaja. Naajaa, cuarta Pueyaso pueyanaa, canaa nia tojiri. ¡Socua panijiaca nia quiri! ¹¹ Tama nia cuaqueyajaaja nia cumaquiriquia juhuajaniya quijiaca nia quiniuria. Tama nia poonijosanjiniaaja nia cojeriquia, tama nia juaashiquiatajaaja nia poonijosacari, taa canaa rootaquiaari nijaniyacuajani. ¹² Naacuajitij, Pueyaso niishiyashijiaca pueyari nia rerequeteyaquiniutianiya. Naajuhuaaj, niaari puetunu nia panishanojuanaa jitianutianiya.

Taa pa Jiyaniijia tiuquishacariuhua quiniutianiya

¹³ Cuarta Pueyaso pueyanaa, canaari juhuacarijia nia tonu paniyani taa Jesucua tiuujiaa shaajecono pueya niishaanutianiya. Canaari nia niishitiniyu paniyani maja nia taraajenura juhua Jesucua tiuyashijiaca pueya. Nojoriiri maja nia jitianu nojori Jiyano, nojori na samiitianijionuhua. ¹⁴ Paacuajaari niishiyani Jesuuri cusoquiaari. Na nuhuaji samiitiaquiaariuhua. Naajuhuaaj, paari niishiyani, Pueyasoori Jesucua tiuujiaa shaajecono pueya samiitianijionutaniuhua, nojori na rijionura Jesuta, Jesu tiuquishacariuhua.

¹⁵ Canaajanaacuajaari nia sequeyani, niocuajaari pa Jiyaniijia niishitishano canaa: pajaniya, canapue te pa Jiyaniijia tiuquishacariuhua saminiucua quiniutianiyaajaani, majaari macunucua pa puetanu quiniutianiya pa Jiyaniijiaata pa naacuneetonura jiya cajiniocua. ¹⁶ Naa quiniutianiyaari. Pa Jiyaniijia nacanuari tojishaanutianiya, Pueyaso seya jiyaniijia nacanujuhuaaj, Pueyaso trompeta jonenenumio. Jiyacaritij, pa Jiyaniijiajanaari jiyocuaaanuji rosenutaniya cohuaaja najacajiniara. Jiyacarijihuaaj, puetunujuanaa Jesucua tiuujiaa shaajecono pueyari samiitiaconutaniuhua coteenu. ¹⁷ Na nuhuaji pajaniya, canapue te saminiucua quiyajaani, paari nojoritia ritia rijiosaanutianiya cohuaaja najacajiniarani. Paari tii coquetoanutianiya pa Jiyaniijiaata paratujiniani. Jiyacaritij, paari tari pueyaracaanu nata quijiacarano quiniutianiya. ¹⁸ Cua panishano pueyanaa, nio cua pohuatasanota nia cumanijiatooriquia.

5

¹ Majaruhua maninia cua naajonura niaacuara cua niishitiniuria nijaniya socua, taacari pa Jiyaniijia tiuquiniutianiuhuani. Niaacuajaari tari na niishiya, naajuhuaaj, taate mijiria quiniutianiya nia tiuquiyaquishacarijia. ² Niaacuajaari maninia niishiya, pueya jiyaniishacari juhuanojuajaaja maja pa Jiyaniijia tiuquiniyu quiniutianiuhuua, nojuajaari jiyacari tiuquiniutianiya. Nojuajaari canashiyaquiji tiuquiniutianiya, taa nohuasejojua tiuquiquiaa niucua tiajiniaacocuaani, juhuajaniya tia camaru maquesacari. ³ Naajuhuaaj, quera pa Jiyaniijia tiuquishacariuhua, mijiria quiniaa pueyari naa sequejaa quiniutianiya: “Paacuaja maninia quiyani. Shaaquicuaaja miaquetojonu”. Canashiyaquiji jiyacari, Pueyaso saniitosacari na tojiyashijiacaari quiniutianiya. Naa quiniutianiyaari taa maaji nooquiaa juhuacatecara canashiyaquiji na manajacuaani. Majaari quenaaja niquiriyatu curosaanu quiniutianiya saniitosoo. ⁴ Nijaniya saniniujia cuarta Pueyaso pueyanaa, niaari maja juhua ninishiqui quijiaca, pa Jiyaniijia cariyatunura nijaniya. ⁵ Puetunu nijaniyajanaacuajaari cuhuashiqui quijiaca. Pueyasojanaacuajaari nioojiaa cuhuataquiaari. Majaari tari juhua ninishiqui quijiaca pueya pa quiniyu. ⁶ Cunora, pa Jiyaniijia sashijiaca pa quirij. Maja juhua tamasaaja, juhuajaniya quiquioyari. Nojoriiri juhua maquetiuya. Pajaniya saniniujia cuarta Pueyaso pueyanaa, juhua sutejaca pa quirij, maninia niishiriojojuacajuhuaaj. ⁷ Maquetujuacaari niucua maquetuquiaa. Naajuhuaaj, mashaasequenujuacaari niucua mashaasequenuquiaa. Naa miijiaacari Pueyaso tojiyashijiaca. Majaari na maniniucuanu cuhuashiqui. ⁸ Pajaniya saniniujia, paari cuhuashiqui quijiaca cutarani. Naaratej, pueyaracaanu maninia niishiriojojuaca pa quirij. Romano pueya miaquetoosacari, nojoriiri turtuco cushiyonuujuua, nocuaji na nujutajara cashi. Cumueeca casaa cushiyonuujuajaariuhuaaj, na naca na cojuatajara. Naajuhuaaj, naa poojia pa cojuare, saaja Jesucua pa tiuuniuta, seetanujanaa panijiaca pa quishacarijihuaaj. Seetanujanaa pa niishiri, Pueyasoori pa saquirojoquiaari na muerasu pa quiniuria pueyaracaanura. Naacuajitij, pocua pa niishitija cojuareni, maja poojia pa niquijiotenura najuhanaj. Naacuajitij, Sesacaari maja na naata shocotanu quiniutianiya pajaniya. ⁹ Pueyasoori maja na saquirojonu quiquiaari pajaniya na saniitosocoriquiano. Pa saquirojoquiaari cutaraari na jiyanooniuria pajaniya, na muerasu pa quiniuria, Neyanu Jesucristoocua tiuujiaa pa quishacari. ¹⁰ Neyanucuaajaari pocuara cusoquiaari, nata rishijiaca pa quiniuria pueyaracaanu. Naacuajitij, naajaa, paa jaara cusoayareni, paa jaara saminio quiyajuhuaaj, pa Jiyaniijia tiuquishacariuhua, puetunu nocua tiuujiaajanaari pueyaracaanu saminio quiniutianiya nata. ¹¹ Naaratej, pueyaracaanu nia

cumaquitioojoriquia Pueyaso rupaata. Nia shiniujiutooriquiajuhuaj, seetanujuanaa pa Jiyaniijia tojjijaca nia quiniuria, taa nia miiquiaacuaja tarini.

Socua Pablo rootasacari Pueyaso pueya

¹² Cuarta Pueyaso pueyanaa, canaa nia tojiri. Cuniqiu nia jiitianaa tojjijaca nia quiri. Majaari nojori rerequetenu. Nojoriiri jiyanoehua poonijioquiaa pa Jiyaniijia nojori niishitiojonura nijaniya, na nacasunura nijaniyajuhua. ¹³ Cunora, jiyanoehua nojori nia paniri. Majaari na rerequetenu. Nojoriiri pa Jiyaniijia poonijioquiaa na cumaquiniuria nijaniya. Maninia nia quiri pueyanaa. Majaari juayonuujatanu.

¹⁴ Nio nia tojirijihuaj cuarta Pueyaso pueyanaa. Taajecori nia nacasura. Noojia niqijiotejaca nia shiniujiuri, seetanujuanaa cumueeca Pueyaso pueya nojori quiniuria. Noo pojori nia cumaquiriquiajuhuaj, Satanás saniniujiushacari na cuaqueya miiniu panishano rejeteraashijiacatej. Majaari cuno pojori cartenu. Nia juaaniu nia rejeteriquia, maja quenaaja nia juaaniuria tamasacata.

¹⁵ Naajuhua, tama nia cuaqueyajaaja nia cojuariquia maja nia naminiuria niarta pueyano, nojuaja jaara sesa miiriquia nijaniya. Saniniuuja, pueyaracaanu maninia nia miitiooriquia niarta Pueyaso pueyata. Naa nia miiriquia puetunu pueyajuhua.

¹⁶ Pueyaracaanu nia shuquiririquia, Pueyaso pueya nia quiniucua. ¹⁷ Naajuhua, pueyaracaanu nia secojoriquia Pueyaso. ¹⁸ Naa jaara maninia miishaare, naa jaara sesa miishaarejuhuaj, naajaa, puetunu naa nia miishaanuucujanaa Pueyaso nia sequeriquia, "paacarasho". Pueyasojuanaacuajaari naa paniya pa miiniuria, Jesucristo Sohuanu pa jiitanuucua poojiajinia. ¹⁹ Majaari Pueyaso Sohuanu nia ruuretanu, nojuaja jaara nioojiajinia nia shiniujiya maninia nia miiniuria. ²⁰ Naajuhua, majaari nia soonu Pueyaso sequesano caminiujiuniaa pohuatasano. ²¹ Coteenu nia saniniujiuri cutara, nia niishiniuria seetanutejanaa nojori pohuatasano. Teyano nojori pohuatasanojinijiniote maniniani, cuno tojjijaca nia quiri. ²² Puetunu sesa niishishano casaajanaa soojeaca nia quiri.

²³ Poojia cajitinia Pueyasojuanaa cuaara nia jeenucuaara juhuacaribia, tojetaarucujanaa sesa miyashijia nia quiniuria pa Jiyaniijiaacuaji. Nojuaja cuaara naa cojuara nia sohuanu, nioojia, nia cuaqueyano, tojetaarucujanaa soosoo nia quiniuria pa Jiyaniijia Jesucristo cuaara tiuquiriohuaatijia. ²⁴ Cante nia saquiriojoquiaaricuaa na pueya nia quiniuriani, nojuajaari puetunu shusha cua sequesanojuanaa nijaniya miiniutianiya niaara. Nojuajaari maja na niishiniu na rupaa jatanu. Nojuaja cutaraari na sequesano miijia pueyaracaanu.

Pablo sequesano na naajionee na tucuatasaari

²⁵ Cuarta Pueyaso pueyanaa, Pueyaso nia secojonuuriquia canaacuarajuhua.

²⁶ Canaara nia saruhuatare cuniqiu quiniaa parta Pueyaso pueyajuhua nojori nia nujuunuta, seetanujuanaa Pueyaso paniniutia.

²⁷ Pa Jiyaniijia jiyaramiquishano cua quiniucua, cua tojitiare pueyanaa. Nio cua naajionee nia serojore puetunu Pueyaso pueyarajanaa.

²⁸ Pa Jiyaniijia Jesucristo cuaara cumaquiiria nioojia. Cuaara naa quiiriatej.

TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo sarhuatasacari Jesucristoocua tiuujiaa

¹ Janiyari Pablóni. Silvano, Timoteonio, canaari nio naajiya niaacuarani, puetunu Tesalónica tiacajinia quiniaa parta Pueyaso pueyarajanaa. Nio naajioneeri niaara, canapue te pa Que Pueyaso rupuejacacuajani, pa Jiyaniijia Jesucristo rupuejacanio. ² Pa Que Pueyaso, pa Jiyaniijia Jesucristojuhuj, nojori cuaara nioojia cumaquiiria. Cuaara nia jiyateera juhuajaniya quijiacarajuhuj.

Pueyasoori na tojtianu paniyashijiaa saniitioriquiano Jesucristo tiuquishacariuhua

³ Cuarta Pueyaso pueyanaa, canaari jyanohua nia timitiaani jyanohua Pueyasooocua tiuujiaa nia quiniucua socua, panitioojuaca nia quiniucua socuajuhuj. Cunora, canaa secojosacari Pueyaso, canaari pueyaracaanu na sequequiaani, “paacarasho”. ⁴ Naa maninia nia quiniucuatej, canaari shuquiriaatia poojotaquiaa nijaniyajiniiji Pueyaso pueya maapue niqiara tamaquiicua canaa rucuanesocarini. Canaari nojori poojotaquiaani taa nia rejeretaquiaa juhuajaniya naquiya nia miiniuni, taraatia nia miiniujihuj, Pueyasooocua tiuujiaa nia quiniucua. ⁵ Pueyaso saquirojionuucua niajaninya pueyaracaanu shuquiriaatia quijiaa nia quiniuria na shuriucua, cunoori maja najuhuaana quiquiaari. Niaacuajaari seetanujuanaa na pueya. Cunoori maatia niishishiyacuaja juhuajaniya nia rejeretasacari naquiya nia miiniu, Pueyasooocua nia tiuuniucua. Pueyaso niishiyashijiaa pueyari naa naquiya miiquiaa nijaniyatej, Jesucristoocua tiuujiaa nia quiniucua.

⁶ Naajaa, Pueyasocuaajaari tojetaarucujanaa sesa miyashijia. Nojuajaari niaacua naminiutianiya noo pojori, naquiya miitajaca nijaniyatej. ⁷ Nijaniya saniniujia, naquiya miijosaaquiarini, niaari canaata samaraatasaanutaniyajuhuj, Jesucristo tiuquishacariuhua pocua. Jiyacaritij, nojuajaari niquishaanutaniya mani rimianuqueyano tiuquitiohuano, jyanohua cumaacaraca na seyata jiyocuaaanuji. ⁸ Tiuquiniutianihuari na saniitionura noo pojori, canapue te Pueyaso niishiniu paniyaquiquiaani, noo pojorijihuj, pa Jiyaniijia Jesu rupaa ruuretjacatej. ⁹ Puetunu cuno pojorijianaari pueyaracaanu saniitiosocoriquiano jiyatesaanutaniya. Nojoriiri tucuaacaanura quejoosaanutaniya pa Jiyaniijia shuriucujaji. Naacuajitij, majaari nojori niqiniu quiniutianiya na jiquico, shacantuuca na cumaacanio, nojuaja jaara mijiria tiuquiriohua pa shuqiritianura nojuaja. ¹⁰ Jiyacaritij, puetunu na jeenucuasano pueyajaanaari jyanohua na timitianutaniya. Puetunu nocua tiuujiaa pueyajaanaari jyanohua jiuujiateconutaniya, pa Jiyaniijia na shootiatasacari. Niaari na niqiniutianiyajuhuj, nojuajiniiji canaa pohuatasanoocua nia tiuuniucua.

¹¹ Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririquiniuria na saquirojionuucua nijaniya. Canaari niaacuara secojoquiaaaniuhuj, Pueyaso cuaara nia tucuataniiria na cumaacata puetunu maninia casaa nia miiniu panishanojuanaa. Cuaara nia tucuataniiriajuhua puetunu nia miishanojuanaa, cuno, Pueyasooocua nia tiuuniutia nia poonijiosanoni. ¹² Naacuajitij, pa Jiyaniijia Jesuuri socua timitiasaanutaniya naa nia miiniucua maniatej. Naajuhuj, nojuajaari nia timitianutaniyajuhuj. Naa maninia quiniutianiyari pa Pueyaso pa Jiyaniijia Jesucristota na cumaquishacari nijaniya.

2

Maatia pohuatasano, taate mijiria quiniutianiyani, pa Jiyaniijia tiuquishacariuhua

¹ Quiarijiani cuarta Pueyaso pueyanaa, socua nia pohuatarohuacuara pa Jiyaniijia tiuquiniujiniiji, taa pa coquetoonutaniya natajanihuuj. ² Canaa sequesano nijaniya nia tojiri, pueyanaa. Majaari nia niyajetanu tariucuaaanu canaa niishitiojosano nijaniya, nia jiyajeneyaquiniucujaji tamasaca sapojosacari nijaniya. Majaari nia shiriiquiniu tamasaca jaara sequere nijaniya: “Pueyaso Sohanuuri cua niishitirii, pa Jiyaniijia tiuquishacariiri quiarijia”. Tamasaca jaara naa nia pohuatare, majaari na sequesano tojiniu. Naajuhuj, tamasaca jaara naajionuure tamajaaja, niaara na jiyatesocoriquiano juhua canaa naajione, majaari nojori tojiniu. Nojoricuajaari nia sapojiya. ³ Pueyanaa, majaari niaacua nojori nia shanacunu nojori sapojonura nijaniya. Naa niishiri, pa Jiyaniijia tiuquiyaquishacariuhuja, queraatia pueyari Pueyasooocujaji pishiniutianiya.

Jiyacarijuhuaj, Pueyaso rootasano Ruuretajajanaari supuenutaniya. Nojuacuajaari tariucua Pueyaso saniitiosocoriquiano na riuriotaca. ⁴ Nojuacuajaari Pueyaso paraca. Nojuajaari puetunu pueyajanaa tenujunutaniya maja nojori tojiniuria Pueyaso, pueya shipinijiosano nojori pueyasohuara nojori tarintianurajuhuaaj. Nojuaja cutaraari tama na cuaqueyajaaja jiyatenutaniya juhua Pueyasora. Pueyaso Secojoju tiajinia cajiniutiani-yari, Jiyaniijajanaa cajitiujiani. Jiyacari sequenutaniyari: “Janiyacujaari Pueyasoni”.

⁵ Pueyanaa, ¿majeeri nio nia niishiniucuaaja? Janiyacuajaari nojuajiniji nia pootajani niaata cua quishacari. ⁶ Niaa naasucuaari niishiyacuaja canteeri juhua na quiaajaani, maja juhuanojuaja mijiria na miiniuria tama na panishanojuaja, Pueyaso paniyaquishacarijia. ⁷ Seetanujuanaa, Sesaaca cumaacaari tari mijiria poonijia jiyasohuaja. Naajaa, Pueyaso paracaari juhuanojuaja maja na naata muetanu, pueya niishiniuria nojuaja, na tenujuna cuara niiquiji rishaarejaatijiaj. ⁸ Na tenujuna jaara rishaare niiquiji, jiyacarijij cuno sesaaca sequeeri muetanutaniya, jiyanojua sesa na miiniuria. Naajaa, pa Jiyaniijia tiuquishacarihuua na shacantuca cumaacajinia, nojuajaari cuno sesaaca seque muetanutaniya saaja na rupaata na noonutia, na shaajanura puetunujuanaa. ⁹ Cuno sesa mijia sequeeri muetanutaniya Satanás cumaquishacari nojuaja. Naacujitij, nojuajaari jiyanojua cumaaca jitianutaniya jiyajeneta casaa na miiniuria, pueya jiuujiatenura nocuaji. Queraatia niishishoo casaa miiniutianiyajaarihuaj, pueya na sapojonura. ¹⁰ Nojuajaari puetunu tamaatia sesa miiniu niishishanojuanaa miiniutianiya na sapojonura noo pojori, canapuate saniitiosocoriquiano pueyacuajani. Nojoriiri sapojosaanutaniya, Pueyaso Rupaa ruuretajaca nojori quiniucua. Nojoriiri maja na tojinu paniniu quiquiaari seetanu rupaajanaa, Pueyaso jiyanooniuria nojori. ¹¹ Naaratej, Pueyasoori nojori tarintianutaniya nojori sapojosaanura, nojori tiuuniuria seetanujuanaa sapojonuunuucua. ¹² Naacujitij, puetunu noo pojorijianaari saniitiosaanutaniya, canapuate seetanu rupaacuajanaa tiuuniu paniyaquijiani, sesa miiniu maniniucuaaja nojori quiniucua.

Pueyaso muerasuranoori tariucuaaanujiniji saquiriojosano

¹³ Nijaniya saniniujia, niaari pa Jiyaniijia panishano pueyacuaja. Jiya shipinijaquishacarijia, niaacuajaari tariucua Pueyaso saquiriojosano pueya quiquiaari. Niaari Pueyaso pueyara quiquiaaricuaaja, na Sohanu jataniniucua nijaniya quiarinio pueya nia quiniuria, seetanu rupaacuajanaa nia tiuuniucua. Cunora, canaari pueyaraaanu Pueyaso sequequiaa niaacuarani, “paacarasho”. ¹⁴ Canaa pohuatasacari Pueyaso rupaa nia niquiara, niaari Jesucristoocua tiuquiaari. Naacujitij, Pueyasoori nia jiyatequiaari na pueya nia quiniuria, shacantuca quijiacara nia jatanishaanura, taa pa Jiyaniijia Jesucristo quiyacuani.

¹⁵ Naaratej cuarta Pueyaso pueyanaa, majaari nioojia nia niquijiotenu Pueyasoocujia. Naajuhuaaj, nia numaama nia racatare canaa niishitiojosano nijaniya niaata canaa quishacari, canaa naajioneecajinia canaa rootasano nijaniyajuhuaaj. ¹⁶ Jiyanoojia pa Jiyaniijia Jesucristo quiniucua, pa Que Pueyasojuhuaj, nojoriiri pa paniquiaa. Naajuhuaaj, poojia cajitiquiaa pueyaraaanuraari. Na rupaacua pa tiuutiquiaariiri, pa niishiniuria paari jiyanojua maninia miishaanutaniya pueyaraaanuni. ¹⁷ Naajuhuaaj, nojori cuara nioojia shiniujiiria, maninia nojori tojtiajaca nia quiniuria pueyaraaanu. Nojori cuara cumaquiiiria nijaniya, tojetaarucujanaa maninia nia sequesano quiniuria, nia miishanonio.

3

Pueyaso rupaa pohuatanaacuara pa secojore

¹ Pueyanaa, socua nia sequerohuacuaraaj. Canaacuara nia secojore, pa Jiyaniijia rupaa paaquetesaanura puetunu tiquiyocuajanaa. Nia secojorejuhuaj, cuno rupaa pueya tojishacari, nojori jatanishaanura, naatej, taa na jataniquiaari nijaniyacuaani. ² Canaacuara nia secojorejuhuaj, Pueyaso cojuanura canaa na tojiyashijiaca pueyacuaji, maja nojori miiniuria sesa canaa. Niacuajaari niishiya, puetunu pueyajanaari maja na tiuuniu Pueyasoocua. Cuno pojoricuajaari canaa paracaajiaca. ³ Naajaa, paacuajaari niishiyani pa Jiyaniijiacuajaari na sequesano miiquiaa. Nojuacuajaari nia cumaquiniutianiya, maja nioojia nia niquijiotenu nocuaji. Sesaacaacujia nia cojuanutianiyajaarihuaj. ⁴ Pa Jiyaniijiaacua canaa tiushacari, majaari canaa taacanunu niaa naasucuaari canaa rootasano tojtiaaquiniutianiya. Maja. Niaa naasucuaari na tojtiaacuaja. ⁵ Pa Jiyaniijia cuara niishitiiiria nioojiajinia, panijia nia quiniuria taa Pueyaso paniyacuaani. Naajuhuaaj, cuara nia niishitiiiria naquiya miiniu rejeretajaca nia quiniuria, Jesucristo cumaquishacari nijaniya.

Poonijiojuaca pa quiri

⁶ Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniuucua, canaa nia tojitiare. Majaari noo pojori nia rupeenu: taajecoritij, noo pojorijuhuj, canaa rootasano tojiyashijiacatej. ⁷ Niaacuaajaari niishiya taa quijiaca canaa quiquiaari niaata canaa quishacarini. Naa quijiaca nia quirijuhuj. Majaari canaa taajeyaca canaa matanu quijiani. ⁸ Majaari najuhuaana canaa miaquenu quijia nia miaquesano. Canaa cutaraari pueyaracaanu canaa samareenuta poonijionuujuaca juucani, niucuanio. Canaari naa poonijionuuquiaarini canaa panishano canaa jiitia-nura, maja quenaaja canaa taajetenura nijaniya, maja nia tacaatianura canaajuhuj. ⁹ Pueyaso jiyaramiquishano pueya canaa quiniuucua, canaa naata quiquiaaricuaajaari canaa panishano canaa mashiniquiniuria nijaniyajini. Naajaa, majaari naa canaa miiniu quiquiaari. Canaari tama canaa juaashiquiacatajaaja poonijioquiaarini, canaa niishitiojonura nijaniya, poonijionuujuaca nia quiniuria juhua canaajuhuj. ¹⁰ Canaa quishacari niaata jiyacarijuhuj, canaari nio nia niishitioquiaarini: “Cante poonijionu paniyaquiyani, cuaara miaqueteshiyaquiiriahuj”. ¹¹ Canaari pohuataaarucuaajaani-uhuj, noojiaqueya nijaniyajinijionaaari juhujaniya quiquiaa. Majanaari na poonijionuunu quiquiaa. Nojoriniaari noo pojori cushitioquiaa, poonijionuujuaca cutaratej. ¹² Pa Jiyaniijia Jesucristo jiyaramiquishano pueya canaa quiniuucua, canaari cuno taajecori sequeyani, nojori cuaara poonijionuura, nojori panishano nojori jitianura.

¹³ Cuarta Pueyaso pueyanaa, teyano nijaniyajinijiniote maninia miijiacacuaani, majaan maninia miiniu nia tarinitianu. ¹⁴ Saniniuujia, cante nio naajioneejinia canaa sequesano tojiniu paniyaquiyani, nojuaja nia niishiri cantenononi. Majaari na rupeenu, na caririquiniuria quenaaja. ¹⁵ Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniuucua.

Pablo sequesano na naajio na tucuatasaari

¹⁶ Poojia cajitijia pa Jiyaniijiani, nojuajanaa cuaara nioojia cajitiria pueyaracaanu, naajaa, niaa jaara taa miishaariquia. Pa Jiyaniijia cuaara pueyaracaanu jiitiaara puetunu nijaniyajanaa.

¹⁷ Janiyari Pablóni. Cua saruhuanura nijaniya, janiyari tama cua juaashiquiatajaaja nio naajiyani. Nia niquiri cua naajiosano, taamuecatenononi. Janiyari naa puetunu cua naajioneecajanaa tucuatquiaani, cua sesa cua naajionuta. ¹⁸ Pa Jiyaniijia Jesucristo cuaara cumaquiiria puetunu nijaniyajanaa. Cuaara naa quiiriatej.

COTEENU PABLO NAAJIONEE TIMOTEOCUARA

Pablo saruhuatasacari Timoteo

¹ Janiyari Pabloni, Jesucristo jiyaramiquishano. Pa Jiyanoojia Pueyaso, pa Jiyaniijia Jesucristonio, nojoriiri nera poonijionara cua jiyatequiaari. Paari Jesucristoocua tiuujiacani, nojuaja jataniniuria pajaniya juhua nojuaja pa quiniuriajuhuaj. ² Timoteonaa, janiyari nio naajiya quiarani. Quiaari juhua quiyanura quiquiaari, Pueyaso pueyanora quia jatanuucua, quia niquiara cua pohuatasacari Pueyaso rupaa. Pa Que Pueyaso, pa Jiyaniijia Jesucristojuhua, nojori cuara cumaquiiria quiajaniya. Nojori cuara quiocua taraajerajuhua. Nojori cuara pueyaracaanu quioojia cajitiirijuhua.

Pablo sequesacari sesa niishitiojonuujuaca cuara sanaajasaaria

³ Janiya jaara Macedonia jiyajiniara quiaquiaarini, janiyacuaaari quia sequequiaarini Éfeso tiacajiniaja quia jiyojenura. Janiyari naa quia sequequiaarini, quia tenujunura cuno pojori, najuhuana tamaatia niishitiojonuya pueyani. ⁴ Janiyari quia sequequiaarijuhuaj, nojori quia sequenura, maja nojori niishiriojonura najuhuana nojori supuetanaa pohuatanuusanojinia. Janiyari quia sequequiaarijuhuaj, maja nojori niishiriojonura nojori supuetanaa sesacajinia, cuno, najuhuana tucayocuara naajionuutasanoni. Pueya niishiriojonuusacari pueyaracaanu cuno najuhuana casaajinia, nojoriiri cunocua juy-onuujutaquiaa saaja. Saniniuuja, nojori cuara Pueyaso rupaacua niishiriojoora cutara. Nocua pa tiuushacari, paari cumaquishaanutaniyani Pueyasora pa poonijionura maninia.

⁵ Naa cua sequesacari Éfeso tiacajiniaja quia jiyojenuratej, janiyari quia sequenu paniriquiaani, pueya quia niishitiojonura panitiojuaca nojori quiniuria. Nojori cuara shitimia panitiojuaca quiiria, juhua jeequesano nojori jiuujia quishacari. Seetanujuanaa Pueyasocua nojori tiuushacari, nojori cuara panitioora maja nojia macuhajenuta sesa nojori miishanojiniji. ⁶ Noojiaqueya cuno pojorijiniiniori tari tarinitiacanu tojiniu nio maninia niishitiojosano. Nojoriiri cushitiquianu na pocojonuucua, na nacojonuucua najuhuana tama nojori niishishanojinijiaaja. ⁷ Nojoriiri Moisés Rootasanojiniji niishitiojonaara quiniu paniya juucua. Majaari quenaaja nojori niishiniu tama nojori sequesanojuaja, nojori shiniujushacari pueya, pueya tojiniuria najuhuana capa nojori niishitiojosano.

⁸ Paacuajaari niishiyani, Pueyaso rootasano Moisésni, cunoori maniniacuaja, paa jaara niishirini casaara naa Pueyaso rootaquiaari pa supuetanaani. ⁹ Paacuajaari niishiyani, Moisés Rootasanoori maja na pueretenu maninia miijica pueya cutara. Pueyasoori maja na rootasano na nishitiniu quiquiaari maninia miijiacara. Na niishitiquiaari cutaraari na tojitiaashijiacara, tama na panishanojuaja miijiacara, Pueyaso soojeacarajuhua, sesa miijiacarano. Moisés Rootasanoori Pueyaso rerequetecacara, Pueyaso casaa rerequetecacarajuhua, noo pojorirajuhua, tama na que tacartaja monutej, na nucuanu, pueya puecojuacarajuhua. ¹⁰ Moisés Rootasanoori na camishoo maajipohua numuetucunujuacacara, maajishurihuara, na numuetucunujuacarano. Moisés Rootasanoori pueya nohuasenujuacacara juhua casami na niquitiojosocoriguiano tamasaca seyara; sapojonuujucarajuhua; na sapojonuta na sequesano maatejacerano, nocua na tiuushaanura; puetunu noo pojorirajanaano, maninia niishitiojosano tojiyashijiacatej. ¹¹ Cuno maninia niishitiojosanoni, cunocuaaari cua pohuatasano Jesucristo rupaajiniiji, pueya jatanura Pueyaso pueyara. Pueyasoori jyanohua maninia, cuno rupaa pohuatanara na jiyatenuucua janiya.

Pablo shuquiritiasacari Pueyaso, na rupaa pohuatanara na jiyatenuucua nojuaja

¹² Pa Jiyaniijia Jesucristoori cucua tiuuquiaari nera cua poonijionura maninia. Cunora, na rupaa pohuatanara cua jiyatequiaariiri. Nojuajaari cua cumaquiquiaa. Cunora, janiyari na sequequiaani, "paacarasho". ¹³ Tariucuaaanu, janiyari nocuara rimiaaqueja quiquiaari sacuaraatiani. Janiyari naquiya na miijiaarijuhuaj, nocua tiuujiaca cua mititiasacari. Janiyari jyanohua na paracaajia quiquiaarijuhuaj. Naajaa, Jesucristoori saaja cucua taraajequiaarini cua niishiyaquiniuucua casaa cua miiriquiaani, nocua tiuyashijia cua quishacariija. ¹⁴ Naa cucua na taraajenuucuatej, nojuajaari seetanujuanaa cua jyanooquiaari. Na jiyanooshacari janiya, nojuajaari cua jataniquiaari nocua tiuujiaca cua quiniuria, panijia cua quiniuriajuhuaj.

¹⁵ Timoteonaa, nioori seetanujuanaa. Puetunu pueyajanaa cuara niishiiria nio. Cua tojiri. Jesucristoori mijiria niquiaari na Que Pueyaso na jyanootiniuria sesa miijica. Janiyacuajaari tojetaarucujanaa cuno sesa miijica pueyajiniinino na jiyanooshanoni. ¹⁶ Janiyari naa jiyanooshaaquiaarini puetunu pueyajanaa niishiniuria taa jyanohua

jiyanootiote Jesucristoni, pueyaracaanu na rejeretanuucua cua juaaniu. Naa Jesucristo jiyanooniucuaacuaa janiya, sesa miijia cua quishacarijiatej, Jesucristoocua tiuujiacarano cuaara niishiiria, nojoriiri na naata jiyanooshaanujuhuj Jesucristoocua nojori tiuushacari. Naacuajitij, nojoricua pueyaracaanu quijiacara jiyatesaarejuhuj. ¹⁷ Naa jiyanootio pa Jiyaniijia quiniucuatej, nojuaja pa tijitiate pueyaracaanu. Nojuajaari Jiyaniijiajuhuanajaj. Nojuajaari Pueyasocuaa, shaajeyashijia, namijiata niquiyaquishoo. ¡Jiyanoohua maniniaari pa Jiyaniijia! ¡Naa seetanujuanaari!

¹⁸ Timoteonaa, quiaacuaajaari niishiya taa Pueyaso cumaquiquiaari quiajanियacuajani, nera quia poonijionura. Cunoori quiquiaari Pueyaso pueya jiiitanaa jaara caminiujiquiaari Pueyaso sequenu panishano quiaara, nera poonijiona quia quiniuria. Naacuajitij quiyunanaa, cua tojiri. Pueyaso cumaaca quia jiiitasacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. ¹⁹ Naa quia quiri Pueyaso rupaa quia pohuatasacari, seetanujuanaa na rupaacua tiuujia quia quishacari, seetanujuanaa na rupa tojjia quia quishacarijuhuj. Naa quijia quia quiritij, quioojia mariqui quia macuhujareeri quiaa jaara sesa miiri quia. Noojiaqueya pueyari tari Pueyasocua tiuuniu tarinitiacanu nojori ruuretanuucua Pueyaso Sohuanu numootesacari nojori jiuujiajinia, sesa nojori miishacari. ²⁰ Naa miitiquianuuri Himeneo, Alejandronio. Janiyari cunora Pueyaso secojorucuaani, Pueyaso cuaara nojori tarinitiaara Satanásra, Satanás miiniuria naquiya nojori. Naacuajitij, nojori cuaara niishiiria maja socua sacuaraatia nojori rimiaaquenera Pueyasocuaara.

2

Secojonuunura niishitiojosano

¹ Cua tojiri Timoteonaa, niaa jaara Pueyaso secojnuuri quia, nia secojnuure puetunu pueyacuaraanaa. Nia panishano casaacuara nia secojori quiajuhuj. Naajuhuj, Pueyaso nia sequeriquia “paacarasho”, pueyaracaanu maninia na miiniucua. ² Jiya jiyaniijianucuaacuara nia secojnuuri quiajuhuj, puetunu pueya camarucuaacuarajuhuj. Nojoricua nia secojnuuri quia, juhuajaniya pa quiniuria panaatia, juhuajaniya pa tojiniuria Pueyaso, maninia pa quiniuria parta pueyatajuhuj. ³ Pa Jiyanoojia Pueyasoori naa paniquiaa pa secojnuratej. Naa pa secojosano maniniucua quiaari. ⁴ Nojuajaari paniya puetunu pueyajanaa tiuuniuria Neyanuucua, na pueyara nojori jatanishaanura, puetunu seetanu rupaajanaa niishijia Jesu nojori quiniuriajuhuj. ⁵ Pa Que Pueyasoori niquiriyatujua. Majaari tamonu Pueyaso quiniu socua. Naajuhuj, niquiriyatujua pueyanoori quia Pueyaso Jiyanootijia pueya. Nojuajaari Jesucristocuaa. ⁶ Puetunu pueyajanaa quishacari saniitiosocori quiano, Jesucristoori tama na cuaqueyajaaja tarinitiaquari na mosaanura narta pueya niti. Naacuajitij, na Que Pueyasoori na naata jiyanooni pajiya saniniujia. Quiarijiacuajaari Pueyaso panishacari Neyanujiniji pohuatasaanura pueya niquiara, nojori jiyanooshaanura. ⁷ Nio rupaa cua pohuatanurajuhuj, Pueyasojuaanaari cua jiyatequiaari Jesucristojiniji pohuatana cua quiniuria. Cua jiyaramiquiaariiri taucuaa cua niishitiniuria Jesu cua nojori tiuuniuria, seetanu rupaajanaa nojori niishiniuriajuhuj. Nio cua sequesanoori seetanujuanaa. Majaari cua sapojonu.

⁸ Cunora, cua tojiri. Janiyari paniyani puetunu tiqiyocujanaa pueya secojnuunura Pueyaso. Jiyocuaaanu nojori shiitiosacari nojori juashiquia nojori secojnuura, nojori jiuujia cuaara quiri jeequesano sesa nojori miishanojiniji. Naajuhuj, cuaara quiaquiri nia najiquitishano, maja sesa niishiriojonutajuhuj. ⁹ Naajuhuj, janiyari paniyani maajipohua cuaara cushiyaquiri puera maniniquiya toqueya, narta maajipohua na shocotanura. Cuaara cushiyaquiri cararaatia niquishano toqueyajuhuj. Maniniacuajaari nojori maniniushiniuria. Sesu cutaraari nojori maniniushiniuria puera, pueya shootianura nojori. Nojori cuaara jiyaniyaquiri nojoriiri seetanujuanaa shanohua niquishano, nojori muecaca jeeacasano quishacari puera, nojori cushishacari orojiniji shipinishano casaanio. ¿Maajitiiri seetanujuanaa shanohua niquishano maaji, na cushiantuucua queraatia cumaneecata masesano noturu shipinijosano sai tiujiau, queraatia cumaneecata masesano maniniquiya toqueyano? Maja. ¹⁰ Nojori cuaara maniniucuaari quia cutara, maninia miijia maajipohua nojori quiniucua. Nojori cuaara quiri juhua noo maajipohua, canapuetucuaa tama nojori cuaqueyajaaja jiyatecanu Pueyasora na quiniuria seetanujuanaani. ¹¹ Pueyaso rupaa niishitiosacari, maajipohua cuaara tojitiari quia sanaa, maja Pueyaso rupaa pohuatanaa na rejetenuta. ¹² Maja cutaraari cua shanacunu maajipohua niishitiojonura Pueyaso rupaa pueya niquiara. Naajuhuj, majaari cua shanacunu maajipohua jiyatesaanura narta Pueyaso pueya jiiitana na quiniuria. Nojori cuaara sanaa tojitiari quia cutara, narta Pueyaso pueya rerejosacari.

¹³ Quia niishiri Timoteonaa, casaara naa cua sequeyani. Pueyasocuaajari coteenu Adán shipiniquiaari. Na nuhuaji Adán niquiorano Eva shipiniquiaariiri. ¹⁴ Quia niishirijuhuj, Soconurano jaara sapojoquiaari Evatej, majaari na sapojonu quiquiaari neyaca Adán. Eva cutaraari sapojosaaquiaari. Naacujitij, na sapojosaaucua, Evaari Pueyaso tojiyashijara quiquiaari. ¹⁵ Naaratej, maajipohua cuaara maninia canashitijioora necohua. Cuaara panijiaa quiriajuhuj. Cuaara maninia miijiaca quiriajuhuj, maninia niishirio-jojuaca nojori quishacari. Naa maajipohua miishacaritij, Pueyasoori nojori jitianutaniya maninia, Jesucristoocua tiuujiaca nojori quishacari.

3

Pueyaso pueya jitianatucua taamueca pueyano quiriqiuani

¹ Nio sequesanoori seetanujuanaa: cante Pueyaso pueya jitianara quiniu paniyani, nojuajaari maninia poonijiosano miiniuucua jiaatiaa. ² Naaratej, cante Pueyaso pueya jitianani, nojuaja cuaara quiriia sesacasoo pueyano. Nojuaja cuaara quiriia saaja niquiriyatu maaji niyaca. Cuaara quiriia noojia niquiriyoteyashijia, maninia niishirio-jojuajuhuj, pueya rerequeteyaquishoonio. Cuaara quiriia maninia pueyano, ru-coojuaca pueya tiuquinitiaja na tiajinia. Cuaara quiriia Pueyaso rupaa niishitiojua maninia. ³ Naajuhuj, nojuaja cuaara quiyaquiriia mashaasequejoru. Cuaara quiyaquiriia ritia juaajia, pueya na piniuria. Cuaara quiriia pueya riuhaneyashijia, pueya juaashacari nojuaja. Cuaara quiriia shiniquijuhuj. Cuaara cumaneecaacua jiaati-aashijia quiriijuhuj. ⁴ Naajuhuj, nojuaja cuaara na tiajinia quiniaa jitiiaja quiriia maninia. Cuaara necohua niishitiojua quiriia maninijuhuj, tojtiajaca nojori quiniuria, pueya rerequeteyashijianio. ⁵ Naacujitij, pueyano jaara maninia casaa necohua niishitiojyashijia quiriqiuia, ¿maatucua taa maninia jitiariqiuia Pueyaso pueya maanuni? ⁶ Naajuhuj, Pueyaso pueya maanu jitiariquiano cuaara quiriia seetanujuanaa Pueyaso tojjijia pueyano cutara. Cuaara quiyaquiriia shusha Pueyasooocua tiuuno pueyano, nojuaja mariqui jiyaniiri nojuaja tojishano pueyano cutara. Nojuaja jaara jiyaniiri nojuaja socua maninia pueyano narta Pueyaso pueyajiniji, nojuajaari cocuaatia miya taa Satanás miiquiaricuaani. Pueyaso panishano seru Satanás quishacarijia, nojuacuajaari taanuusaquiaari Pueyaso shuriucujaji, na jyanishacari nojuaja na naata na Jiyaniijia Pueyaso shocotanu. ⁷ Naajuhuj, Pueyaso pueya maanu jitiariquiano cuaara quiriia maninia miijiaca pueyano, Jesuucua tiuyashijia pueya mariqui na sesacareeri maninia miyashijia na quishacari. Nojuaja jaara naa rerequetesano quiriritij, nojuajaari juhua Sesaaca norijosano quiniutianiya. Naacujitij, pueya tojiyaquishano quiniutianiya.

Narta Pueyaso pueya naacunaatucua taamueca pueya quiriqiuani

⁸ Naajuhuj, parta Pueyaso pueya naacunaa cuaara quiriia tojishano pueya, rerequetesoo. Cuaara quiriia na sequesano miijiaca. Cuaara quiyaquiriia puera mashaca jereca ratunuucua jitiinio. Cuaara quiriia cumaneecaacua jiaatiashijia, jiyasohuaja na nohuasejonura, na sapojonuta na masenurano. ⁹ Naajuhuj, nojori cuaara seetanujuanaa Pueyaso rupaa tojjijia quiriia, teyanooocua tiuujiaca pa quiyacuajani. Naacujitij, nojori jaara naa miijiaca quiriritij, ¿nojeritucua casaacua cararosaariquiani? ¹⁰ Cunora, pueya cuaara senota jiyateyaquishaaria Pueyaso pueya naacunaa nojori quiniuria. Cuaara coteenu maninia niishishiiria nojoriiri seetanujuanaa Pueyaso tojtiajaca. Nojori jaara maninia miijiaca pueya quiri, na nuhuaji cutara, nojori cuaara jiyatesaaria narta Pueyaso pueya naacunaa nojori quiniuria. ¹¹ Naajuhuj, Pueyaso pueya naacunaa niquicohua cuaara quiriia tojishano maajipohua, maja rimiaacatujuri. Cuaara quiriia niishirio-jojuaca, na sequesano miijiaca pueyaracaanunio. ¹² Cante Pueyaso pueya naacunaani, nojori cuaara jitiiaara saa niquiriyatu niquicouaja. Cuaara quiriia necohua niishitiojua maninia casaa, na tojtiajaca necohua quiniuria. Naajuhuj, cuaara quiriia maninia jitiiaja na tiajinia quiniaa pueya. ¹³ Naacujitij, Pueyaso pueya naacunaa jaara maninia poonijioquiaa na naacusacari narta Pueyaso pueya, nojoriiri seetanujuanaa pueya tojishano pueya quiniutianiya. Naajuhuj, nojoriiri socua jyanohua Jesucristoocua tiuujiacara jatanutaniya, na puereyaquiniutia nojori poonijionura pa Jiyaniijia.

Jesucristojiniji Pueyaso niishitishano pueyani, paari nocua tiuujiacani

¹⁴⁻¹⁵ Timoteonaa, janiyari quioqua naquerejiyani. Naajaa, janiyari quiara naajijia nioni. Naacujitij, janiya jaara tarishirini, janiyari paniyani juhuacarijia quia niishinuria taa quijia quia quiniutianiya, Pueyaso pueya maanujiani quia quishacari. Pueyaso pueya maanucuaajari pueyaracaanu rishijia Pueyaso quiquio. Na saquiriojosano pueya nojori quiniucua, nojoriiri na rupaa jitianacuaja, nocuaji tacunaajaariuhuj. ¹⁶ Seetanujuanaa nocuaji jiuujiatesanoori Pueyaso niishitishano Jesucristojiniji pajaniya. Paari nio sequesanoocua tiuujiacani:

Pueyaso Niyanuuri pueyanora jataquiaari, na rupenuera pajaniya. Pueyaso Sohuanuuri pa niishitiquiaari, nojuajaari tojetaarucujanaa sesa miyashijia. Naajuhuaaj, Pueyaso seyacuajaari Jesu niqiquiaari na samiitasacariuhua. Nojuajiniijiiri pohuataaaciaari Judiocuaca niqiuara, taucuaca niqiuarajuhuaaj. Pueyapueeri nocua tiuquuaari. Na Queeri na tacaniquiaariuhua Jijaniijajanaa na quiniuria.

4

Pueyaso Rupaa carteriquiano pueyajiniji pohuatasano

¹ Pueyaso Sohuanuuri maatia pa niishitiquiaa, nio pa quishacari nuhuaji noojiaqueya pueyari Pueyaso rupaa tarinitianutaniya tojiniu, tamaatia niishitiojosano nojori tojiniuucua. Nojoriiri seetanujanaa sapojosaanutaniya naa nojori tojiniuucua samaruha niishishano. ² Nojoriiri sapojonuujuaa pueya tojtiajacara quiniutianiya, noo pojori, sapuenu juhua maninia niqishano pueyatej. Cuno sapojonuujuaacari tariucua sesa miiniuucua jitiqiuono. Majaari tari na niishitiuniu caririqiuinu. ³ Cuno pojoriiri pueya niishitiojowa maja na caminiuria. Niishitiojonuquaaajaariuhuaaj maja pueya miaquenura noojiaqueya miaquesanojuhuaj, teyano Pueyaso shipiniquiaari Jesuucua tiuuijacaracua-jani, cante seetanu rupaajanaa niishijiacacuajani. Cuno miaquesanocuaajaari pa timitiasocoriguiano, Pueyaso pa sequenura, "paacarasho". ⁴ Puetunu Pueyaso shipinishano casaajanaari maninia. Puetunu miaquesano casaajanaa cuaara puereyaquishaaria mi-aquenu, paa jaara coteenu nocuara Pueyaso sequereni, "paacarasho". ⁵ Pueyaso rupaacua tiuuijaca pa quishacari, naacuajitij, nocuara pa secojosacari, Pueyasoori na jiyatequiaa maninia na quiniuria pajaniyara.

Jesucristora poonijiona pueyanotucua taamueca pueyano quiriquiani

⁶ Pueyaracaanu parta Pueyaso pueya quia niishitiojoriquia nio cua rootasano quia-janiya. Naajuhuaaj, pueyaracaanu tama quia cuaqueyajaaja quia cumaquiriquia Jesucristojiniji pa niishishano rupaata, tama Jesucristojuaja rootasanotanio, taa quia tojiquiaacuajanoj. Quiaa jaara naa miijia quiriritij, quiaari maninia poonijiona quiniutianiya Jesucristora.

⁷ Majaari najuhuaana tariucuaaanu supuetanaa pohuatanuusano tojjia quia quiniu, najuhuaana tama pueya niishishanojuajaanio. Majaari cuno tojiniuucua quia cojenu najuhuanaj. Jijyanohua quia jiaatiare cutara, saaja Pueyaso tojjia quia quiniuria. Naa miiniu quia saniniujiiri jijanohua, seetanujanaa Pueyaso panijia quia quiniuria. ⁸ Pueyari queraatia casaa miiniu niishiya, cumueeca pueya nojori quiniuria. Supuetanaari pueyaracaanu nanoojoquiaari na cuaqueya na jiyartuutenura, cumueeca na quiniuria. Cunoori maniniacuaja pa cuaqueyara, mijiria pa quishacari. Saniniuujia, socua jijanohua maninia cutaraari Pueyaso panijia pa quiniuria seetanujanaa. Cunoori jijanohua maninia, mijiria pa quishacariria, Pueyaso shuriucua pa quishacarirajuhuaaj. ⁹ Nio cua sequesanoori seetanujanaa. Puetunu pueyajanaa cuaara na tojiiria. ¹⁰ Cunora, pueya jaara pa miitariquia, naajaa, paari jijanohua poonijioquiaa pueya pa tojitiniuria Pueyaso rupaani. Majaari naa miiniu pa tarinitianu. Paacuajaari niishiyani, paari pueyaracaanu rishijia Pueyasocua tiuyani. Nojuacuajaari puetunu pueyacuaji Tacunajanaa, canapue cutarate nocua tiuuijacacuajani.

¹¹ Nio cua sequesano quiajaniya quia niishitiojore pueya. Nojori quia nacasuriquia jijanohua, na tojtianura quiajaniya. ¹² Majaari pueya shanacunu quiocua, nojori rerequtenura quiajaniya, mashaja quia quiniuucua. Saniya maninia quijia quia quiriquia cutara, pueya jiaatianura quiocua, juhua quiajaniya nojori quiniu paniniurijuhuaaj. Naaratej, tama quia cuaqueyajaaja quia cojuare, taa quia pocuaani, taa quia quiyani. Naajuhuaaj, seetanujanaa panijia quia quiri, Pueyaso rupaacua tiuuijajuhuaaj. Majaari rucajееjoja quia quiniu. Naa maninia miijia quia quiri, pueya jiaatianura quiocua. ¹³ Naacuajitij, cua tiuquiyaquishacarijia quiocua, pueya niqiuara maatia quia serojoriquia Pueyaso Rupaa. Parta Pueyaso pueya quia nacasuriquia jijanohua, Pueyaso tojtiajaca nojori quiniuhuaa seetanujanaa. Seetanujanaa nojori quia niishitiojoriquia maninia. ¹⁴ Pueyasocuaajaari na cumaaca niqutioquiaari quiajaniya. Pueyaso Sohuanucuaajaari naa pohuatequiaari Pueyaso pueya maanu jitianaa pueyatej, nojori jaara niojoquiaari na juaashiquia quiocua, quia jiyatesaanura Pueyasora poonijiona quia quiniuria. Cuno cumaaca quiaa na jitiaani, quia poonijiotere pueyaracaanu. Majaari najuhuaana na jitianu.

¹⁵ Puetunu niya cua rootasanojuanaa quiajaniyani, cuno tojjia quia quiriquia. Naa quia quiriritij, puetunu pueyajanaa niquiniuria taa seetanujanaa socua maninia Pueyaso tojjiaara quia quiyareeni. ¹⁶ Naacuajitij, tama quioojajaaja quia cojuare. Naajuhuaaj, tama quia quia cuaqueyajaaja quia cojuare seetanu rupaajanaa quia niishitiojonura pueya. Majaari

quia tarinitianu miiniu cua sequesano quiajaniya. Naacuajitij, quiaa jaara naa maninia miijia quiri, quiaari tama quia cuaqueyajaaja jiyateya maninia Pueyaso pueyanora. Quia tojtiajaca pueyari Pueyaso pueyara quiniutianiyajuhuaaj.

5

Paatucua taa jitiariquia parta Pueyaso pueyani

¹ Majaari quia saaqiapue quia nacasunu quia juaaniutia, Pueyaso rupaa nojori tojiyaquiniuucua. Nojori quia nacasure jacaria, juhua quia que. Mashiquiori quia nacasure jacariajuhuaaj, juhua quia tapueyocuaca. ² Naajuhuaaj, motajoori quia nacasure juhua quia nucua. Niyacoori quia nacasure juhua quia rimiatuhuaajuhuaaj, maja nojoriicua quia jiaatianuta.

³ Mashiquiopue jaara tojetaarucuajanaa niquiohuaju quiri, jinianuhuajunio, Pueyaso pueya cuaara nojori naacuura. ⁴ Saniniuujia, mashiquio jaara niquiohuaraca quiriquia, jinianuhuaraca soj, cuno pojori cuaara coteenu tama na nucuaajaaja cojuatunu niishiiria, na jiihuuaaj. Naacuajitij, necohua cuaara na queya cojuara, taa na queya cojuaquiaari nojoricuaani, naatujoori nojori quishacari. Pueyasoori naa na queyacuara taraajejaca timitiaja. ⁵ Noo mashiquio, cante seetanujuanaa jiyopueejuni, nojuajaari saaja Pueyasooocua tiuuquiaa. Majaari na tarinitianu secojonu juuca, niucuanio. ⁶ Noo mashiquio saniniuujia, tama na cuaqueyajaaja shuquiritijatej, nojuajaari tariucua juhua macu Pueyasora, saminio na quishacarijia. ⁷ Parta Pueyaso pueya quia niishitiojore nio cua rootasanojuhuaaj, sesacasoo nojori quiniuria. ⁸ Canapuate na queecua, na nucuaacua taraajejajuijiani, tama na tiajinia quijia pueyacuajuhuaaj, naa miijiacatej, nojoriiri Pueyaso Rupaa tojyashijiacara jiyaterohua tari tama nojori cuaqueyajaaja. Naacuajitij, nojoriiri socua tojetaarucuajanaa sesa, Pueyasooocua tiuyaquijia pueyajiniij.

⁹ Mashiquio jaara Pueyaso pueya jitianaa naacunara jyatenu panishaare, cuno mashiquiopue cuaara quiriaria tariucua sesenta marijia shocotejono. Cuaara quiriaria noo mashiquio, cante saaja na camishano pueyanota quiquiaari maninia pueyaracaanuni. ¹⁰ Cuno mashiquio cuaara niishishano maaji quiriaria, maninia miijia na quiniuucua. Cuaara quiriariajuhuaaj, cante maninia canashitijioquiaari necohuani. Cuaara rucoojuaacaara taraajeja quiriariajuhuaaj, na tiajinia na maquiojojua. Cuaara maninia miijia quiriariajuhuaaj, narta Pueyaso pueya niohuaca jeequejojua. Cuaara taraatia miishano pueyacuara taraajeja quiriariajuhuaaj, nojori cumanijianajuhuaaj. Cuaara puetunu maninia na miiniuujanaa tarinitiaaquijia quiriariajuhuaaj.

¹¹ Saniniuujia, noo mashiquio, teyanote juhuanajuaja maja na shocotejonu sesenta marijiani, nojori cuaara jiyateyacuishaaria Pueyaso pueya jitianaa naacunaara. Nojori na naata Cristo samiritianu, niyacaaniuucua nojori jiaatiasacari. ¹² Naacuajitij, nojori camishacariuhua, nojoriiri tari sesa miirii, nojori jatanuucua nojori sequesano saaja Jesucristora na poonijionura. ¹³ Naajuhuaaj, niyacoo naata mashiquio nojori quishacarijia, nojoriiri saaja rucuanecojonu maniniucuaaja, na tiuquijionura puetunu tiacojuanaa. Naa tama na poonijiosanojuaja na jitiiaaquishacariitij, nojoriiri taajecatujuriria quijia. Majaari saaja taajecara na quiniu, juura tojijajaa pueya sequesanoori, tariucua na caminiuujiniu tamasaraj. Naajuhuaaj, sacuaraatia neteyocojiyari juhua paateca, na taajetenura pueya, na caminiuujishacari jiyasohuaaja niishishano casaa. ¹⁴ Naaratej, janiyari cunora paniyani niyacoori naata mashiquiopue cuaara camiyora neyacaara. Cuaara muetuuarajuhuaaj. Cuaara na tia camarucua quiquioora. Nojori jaara naa maninia miiritij, nojori miishanoori maja quenaaja na quiniu quiniutianiya pa paraa rimiaaquenura Pueyaso pueyacuara. ¹⁵ Noojiaqueya niyacoori naata mashiquiopueeri Pueyaso tojiniu tarinitiacanu tari, Satanás tojijiaa nojori quiniuria saniniuujia.

¹⁶ Pa Jiyaniijiaacua tiuujiaca maajipohuajiniijinio jaara tama na pueyajiniijiojuaja jitiare mashiquiopue, nojori cuaara na naacuura tamajaaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquiopue, canapuate tojetaarucuajanaa jiyopueejuni.

¹⁷ Pueyaso pueya jitianaa, noo pojori canapuate maninia jitianaa narta Pueyaso pueyani, nojori cuaara narta Pueyaso pueya tojishano quiriaria. Naajuhuaaj, nojori cuaara nareja niquitiosaaria, na panishano nojori jitianura. Pueyaso pueya maanu jitiianaa-jiniijinio, canapuate Pueyaso rupaa pohuatanaacuajani, Pueyaso rupaa niishitiojonaanio, nojori cutara cuaara socua queraatia niquitiosaaria, maninia poonijiosano nojori miiniuucua. ¹⁸ Tariucuaaanu Pueyaso Rupaa jinia naajiotasanoori naa niishitiojijuhuaaj, naa na sequesacari miriqui:

“Majaari quia juunu rupaa mishi quionu na miaqueya quiniuria quia casaa, quia rapijioetesari quia natau, na jocuanura na sucua jiniji”.

Naa sequeyajaari huaj:

“Poonijioesano pueyano cuaara niqutiosaria na poonijionu sami”.

¹⁹ Pueyano jaara saquirojotariquia Pueyaso pueya maanu jitianacuara, majaari na tojinu, jaara nocura cojtiaaquiri saquirojotanu. Querajaa pueya jaara nocura cojtiare saquirojotanu, cuno pojori sequesano cutaraari seetanujuanaa. ²⁰ Naacujitij, Pueyaso pueya maanu jitianaa jinijinio jaara sesa miiriquia, Pueyaso pueya maanu niqiuara quia nacasurenoj, puetunu narta Pueyaso pueyanaa puerenura, maja sesa nojori miiniurajuhuaaj. ²¹ Timoteonaa, janiyari nio quia sequeya Pueyaso niquiarani, Jesucristo niquiarajuhuaaj, na saquirojosano seya niquiaranio. Nio cua rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa maninia pa niishiyaquishacari na miishano. Naajuhuaaj, majaari pa naata jiuujiaaniu pa panishano pueyano, nojuaja jaara sesa miiri. Naacujitij, majaari rimiajata miijionu sacuraatia. ²² Naajuhuaaj, majaari senota quia juaashiquia quia nianu quia niishishoo pueyanoocua, nojuaja quia jiyatenura Pueyaso pueya jitianara. Maninia cutaraari coteenu quia niishiniuria taamueca pueyanotenojoni, maja sesa miijia pueyano quia jiyatenura Pueyaso pueya jitianara. Quiaa jaara naa Pueyaso pueya jitianara jiyatere quia niishiyaquishoo pueyanotej, Pueyasoori quiocua tiuutianutaniya cuno pueyano miishano sesa. Cunora quia sequeyanijia, tama quia cuaqueyajaaja quia cojuare, tojetaarucujanaa sesa miyaquijia quia quiniuria.

²³ Timoteonaa, naa quia seeco nojionuucatej, majaari saaja mohuaca ratunu. Sequeyarucua cusosu quia quiniucua, secaja vino quia raturiquajuhuaaj quia jiniacuma na jeecanura.

²⁴ Noojiaqueya pueya, sesa nojori miishanoori maatia niishishanocua, Pueyaso sanitionu juuca quiaquishacarijia. Tamasacara saniniuujia, sesa nojori miishanoori maja na niishishaanu quiniutianiya juhanouaja, Pueyaso cuaara nojori nujuatejore na tajojiaatijia, na nequesoreesocoriquiano. ²⁵ Naajaari huaj, maninia pa miishanoori maatia niishishano mijiria. Jiyasohuaaja maninia pa miishanojuhuaaj, cunoori na nuhuaji niishishaanutaniya maatiajuhuaaj.

6

¹ Parta Pueyaso pueyatinijinio, canapueete poonijioesano pueyani, nojori cuaara na camarucua tojtiajaca quiiria. Nojori cuaara rerequeteyaquiria na camarucua, na camarucua mariqui Pueyaso sesacareeri, pa niishitiojosanonio, na tojiyashijia na seru quiniucua. ² Poonijioesano pueyano camarnu jaara Pueyaso pueyano quiriquia, juhua na serujuhuaaj, na seru cuaara na tojjia quiiria. Cuaara na rerequetēja quiaquiria, narta Pueyaso pueyano na camarnu quiniucua. Nojuaja cuaara seetanujuanaa maninia poonijioora nera, na niishishacari na camarnucujaaari narta panishano Pueyaso pueyano.

Cante seetanujuanaa shuquiriaatia quijiacani

Timoteonaa, nio cua sequesano quia niishitiojore pueya. Nojori quia shiniujiuri na tojtianurajuhuaaj. ³ Tamonu jaara tamaatia niishitiojori quia cua niishitiojosanojiniji, nojuajaari tojetaarucujanaa moseeca. Pa Jiyaniijia Jesucristo rupaari jiyanhua maninia. Na niishitiojosano pa tojishacari, cunoori pa naacucua juhua Pueyaso pa quiniuria socua. ⁴ Cante cuno niishitiojosano ruuretaja tama na niishishanojuaja na niishitiojonurani, nojuajaari tama na cuaqueyajaaja jiyaniya nojuaja niishijia cutara. Nojuajaari juaatioonu porocujuhuaaj, Pueyaso rootasanojiniji na taacanuasacari. Naa quijiaca pueya quishacaritij, nojoriiri juaajiacara jataquiaa, nojoritia juayonuujutajaca shocotanucua nojori. Nojoriiri juhuacatecara ruutaquetoquiaa na juayonuutanura. Sesacatoquiaajaari huaj. Naajuhuaaj, nojoriiri najuhuaana soquequiaa, narta Pueyaso pueya naasucua sesa miiquiaa. ⁵ Nojoriiri juayonuujutanu tarinitiaaquijiaca. Nojoriiri maja na naata maninia niishiriojonu socua. Nojoriiri maja na niishiniu seetanu rupaajanaa Pueyasojiniji. Nojoriiri Pueyaso pueya jitiajacara quini panyiya, nojori jiyanihacari nojoriiri naacuaaji jiyanhuaa casamiriacara quiniutianiya. ⁶ Taaquiriirinij, Pueyasocua tiuujia pa quishacari, paacuaaquinatej seetanujuanaa juhua queraatia casamiriaca quijiacani. Paacuaajaari shuquiriaatia quijiaca Pueyaso rupaacua tiuujia pa quishacarinu, juhuajaniya quijiaca pa quishacarijuhuaaj pa jitiiasano casaaniyojuata. ⁷ Paacuaajaari juhuasunucua roosaquiaari mijiriani. Naajuhuaaj, paari juhuasunucua tacateriquianohuani. ⁸ Naaratej, paa jaara pa miaquesocoriquiano jitiariquiani, paa jaara pa cushishocoriquiano jitiariquajuhuaaj, saa cunotaja shuquiriaatia pa quirij. ⁹ Saniniuujia, noo pojori, jiyanhuaa casamiriaca quiniucua jiaatiajacatej, nojoriiri maja

na niishiniu rejetenu, na panishano na miyaquiniuria. Naacuajitij, nojoriiri cocuaatia miiquiaa. Nojoriiri juhua norijosaaquiaa, najuhuaana casamiicua nojori jiaatiasacari, sesa casaacuanio. Puetunu cuno sesa casaajanaari pueya sesoquiaa, nojori saniitiosaanura taraatia. ¹⁰ Cumaneecaacua jiaatianu jiyanoahuani, cuniquiji supuejaari puetunu sesa casaa pa miiniurijanaa. Naacuajitij, noojiaqueya parta Pueyaso pueyajiniinioori Pueyaso rupaa tojiniu tarinitiacanu tari. Nojoriiri tama nojori cuaqueyajaaja miitiquiaa naquiya, naa cumaneecaacua jiaatiajaca nojori quishacaritij. Naaratej Timoteonaa, majaari cumaneecaacua jiaatiaja quia quiniu.

Pablo shiniujishacari Timoteo, Pueyaso tojjia na quiniuria pueyaracaanu

¹¹ Quiajanu Timoteonaa, quiaacuajaari Pueyaso saquiriojosano pueyano. Naaratej, puetunu sesa casaajanaa miyashijia quia quiri. Tojetaarucuajanaa saaja maninia miijia quia quiri, juhua pa Jiyaniijiaja. Pueyasocua tiuujia quia quiri socua. Socua panijia quia quirijiuhuaj. Puetunu casaajanaa rejeretaja quia quirijiuhuaj. Jacaria pocuaja quia quirijiuhuaj, maja pueya rerequeteja. ¹² Pa paraca nojuataja quia quiri quia, jiyanohua quia tiuuniutia Pueyaso rupaacua. Pueyasocuaari saquiriojoquiaari na pueyano quia quiniuria. Cunora, quiaari queraatia pueya niquiara pohuataquiaari Jesucristoocua quia tiuuniujiniji. Naa pueyaracaanu rishijiarano quia quishacaritij, cunora, majaari Pueyaso niqutiojonu panishano quiajanu jaaretenu. ¹³ Quiaacuajaari niishiya taa Jesucristo seetanujanaa pohuataquiaari Poncio Pilato niquiaracuajani, nojuajaari seetanujanaa Pueyaso Niyanu. Naajaa, nojuajaari niishiquiaari nojuajaari cunora mosaanutaniya. Na Que Pueyasocuaari na samiitiani quiaariuhua. Pueyasocuaari saminiora jiyateja puetunu saminio casaajanaa. Naa quia niishishacaritij Timoteonaa, janiyari nio quia sequeya Pueyaso niquiarani, pa Jiyaniijia niquiaracuajani. Cua tojiri. ¹⁴ Puetunu cua rootasano quiajanijanaa quia tojiri. Majaari na jataniniu quenaaja, pa Jiyaniijia mariqui quia niishitiojosano tamacareeri. Taa cua rootaa quiajanuacuajani, na tojjia quia quiri pueyaracaanu, pa Jiyaniijia Jesucristo cuaara tiuquirohuajaatijia, Jiyaniijiajanaa na quiniuria. ¹⁵ Na Que Pueyasoori na tiuquiniutianiya na panishacari, taa na sequequiaaricuajani. Pueyasocuaari jiyanohua pa timitiasano, saaja maninia na quiniucua. Nojuajanaari Jiyaniijia. Nojuajaari puetunu tamasa jiyaniijianucuajanaa Jiyaniijia. Nojuajaari camarucuajiniji Camarnujanaa cutara. ¹⁶ Saaja nojuajaari pueyaracaanu quijiajuhanajaj. Majaari na supueni quiquiaari. Majaari na shaajenu quiniutianiyajuhua. Nojuajaari jiyanohua na shacantuuca cumaacajinia quijiajuhanajaj. Cunora, majaari quenaaja tamonu pueyano na naata nocua catecanonu. ¿Canteeri na niquiquiaari quenaajani? Shaaqui. Pueyanoori maja na naata na niquiniu. ¡Nojuaja cuaara pueyaracaanu timitiasaari! ¡Nojuajaari namitia na cumaaca jitianajuhuanajaj! Cuaara naa quiri pueyaracaanutej.

¹⁷ Timoteonaa, parta Pueyaso pueya quia tojitiri nio, noo pojori, queraatia casamiriacatej. Nojori cuaara niishiiria maja pueya shocotejaca nojori quiniuria, casamiriaca nojori quiniucua. Nojori cuaara niishiirajuhua, maja na casamiicua nojori tiuuniuria, nojori jiyaniishacari nojoriiri pueyaracaanu shuquiriaatia quijiaa quiniutianiya casamiriaca nojori quiniucua. Pa jitianasano casamiiri shaajeriquiano. Nojori cuaara Pueyasocua tiuuria cutara. Nojuajaari capora cutara, na niqutionura puetunu pa panishano casaajanaa, shuquiriaatia pa quiniuria. ¹⁸ Cunora, nojori quia niishitiojore, pueyaracaanu maninia miijia nojori quiniuria. Naatej, taa queraatia casamiriacatucua nojorini, maninia nojori miishano cuaara naa queraatia quiriujuhua. Nojori cuaara ritia niqutiojojuaca quiri nojori jitianasanojiniji, narta Pueyaso pueyano jitiaaquishacari na panishano. ¹⁹ Naa capora nojori quishacaritij, nojoriiri juhua tari jiyocuaanu racataa nojori casaa. Naacuajitij, nojoriiri seetanujanaa shuquiriaatia quijiaa quiniutianiya pueyaracaanu, mijiria, jiyocuaanunio.

Pablo rootasano Timoteo, naqionu na tucuatascari

²⁰ Timoteonaa, Pueyasocuaari quia jiyatequiaari na rupaaajiniji pohuatana quia quiniuria. Maninia quia cojuare seetanu Pueyaso rupaajanaa. Majaari najuhuaana tama pueya niishitiojosanojuaaja tojjia quia quiniu. Noo niishishanojuhuaj, pueya sequesano: “Seetanu niishijiajanaa niishishano cutaratej”, majaari cuno tojinu. Cuno niishishanoori seetanu niishishanojanaa paraca, najuhuaanaari. ²¹ Noojiaqueya parta Pueyaso pueyari Pueyaso rupaa tojiniu tarinitiacanu tari, cuno najuhuaana niishishanoocua nojori tiuuniucua. Niojanaa Timoteonaa.

Pa Jiyaniijia cuaara quia cumaquiriia.

TANEE PABLO NAAJIONEE TIMOTEOCUARA

Pablo saruhuatasacari Timoteo

¹ Janiyari Pabloni, Jesucristo jiyaramiquishano, taa Pueyaso paniquiaaricuajani. Naacuajitij, janiyari Jesucristojiniji pohuatanaara jiyatesaaguiaarini, pueya niishiniuria seetanujuanaa, nojoriiri pueyaracaanu rishijiacara jiyatesaanutaniya Jesucristoocua nojori tiuushacari. ² Naaratej quiyanu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniijia Jesucristojuhuj, nojori cuara cumaquiiria quiajaniya. Naajuhuj, nojori cuara taraajeera quiocua, nojori cuara pueyaracaanu quioojia cajitiirijuhuj shuquiriaatia quia quiniuria.

Jesucristojiniji quia pohuatariquia tamasaca

³ Pueyaso cua secojosacari pueyaracaanu, juuca, niucuanio, janiyari quiocuara secojoquiaani. Cua niishiriojosacari quiajaniya, maninia Pueyaso tojjia quia quiniucua, janiyari Pueyaso sequequiaani, “paacarasho”. Janiyari nera shitimia poonijioquiaa coojia najiquitishooni, taa pa supuetanaa tojjitiquiaari Pueyasocuaani. ⁴ Majaari cua niyajetanu quiquiaa quia nujuquenu cucua, janiya jaara quia shuriucuaji quiaquiaarini. Janiyari cunora jyanohua jiaatiaa cua niquiniuria quiajaniyani, shuquiriaatia cua quiniuria quia shuriucua. ⁵ Janiyacuajaari niishiyani quiaari seetanujuanaa pa Jiyaniijiaacua tiuujiaacuja. Quia ji Loida, quia nucua Eunicienio, nojoriiri coteenujuanaa quiocuaji Pueyasocua tiuujiaa quiquiaari. Majaari cua taacanuunu quiaari seetanujuanaa Jesucristoocua tiuujia quiquiaajuhuj, taa nojori quiquiaaricuuaani.

⁶ Pueyasocuaajaari na cumaaca niqutioquiaari quiajaniya, cua secojosacari quiocuara, cua juaashiquia cua niasacari quiocua. Naacuajitij, quiaacuajaari Pueyaso Sohuanu cumaacaraca quioojiajinia. Naaratej, Pueyaso Sohuanu quia shanacure quiocua, na cumaaca na poonijiotenura socua quioojiajinia. ⁷ Pueyasoori maja na niqutionu quiquiaari na Sohuanu, puereja pa quiniuria. Na Sohuanu niqutioquiaari pajaniya cutaraari, cumaacaraca pa quiniuria, panijiaa pa quiniurijuhuj, maninia niishiriojojuacarano. ⁸ Naacuajitij, majaari quia caririqiniyu pa Jiyaniijia Jesucristojiniji quia poojotanura. Naajuhuj, majaari cua naaqui quia caririqiniyu, nujuatejojuajinia cua nujuatesaanuucua Jesucristojiniji cua pohuatanuucua. Pueyaso cumaquishacari quiajaniya, juhuajaniya quia rejeretare, quiaa jaara naquiya miishaariquiajuhuj, Jesucristojiniji quia pohuatasacari. ⁹ Pueyasocuaajaari pa jiyatequiaari na pueyara. Nojuajaari pa saquiriojoquiaari saa neraja pa quiniuria. Na jyanooniu pajaniyani, majaari na quiniyu quiquiaari maninia miijiaa pa quiniucua juucua. Maja. Nojuacuajaari naa pa jyanooquiaari saaja naa na miiniu paniniucua, jyanoojia na quiniucuaquijuhuj. Jiya shipiniyaquishacarijia, Pueyasoori jiyacari niishiriojoquiaari taa na jyanooniutianiya pajaniyani, Jesucristo cusosacari pa niti. ¹⁰ Quiari naataja pocuaji Tacuna Jesucristo niniucua, Pueyasoori pa niishitiquiaari taate na naata jyanooniu pajaniyani. Cunora, Jesucristoocua pa niti cusoquiaari. Na samiitiasacariuhua, nojuajaari cusonu shocotaquiaari. Naacuajitij, nocua pa tiuushacari, paari pueyaracaanu rishijiaara jiyatesaanutaniyani.

¹¹ Pueya niishiniuria nio rupaa, Pueyasoori cunora na jiyaramiquishano pueyanora cua jiyatequiaari, pueya cua niishitiojonura Jesucristojiniji. ¹² Naacuajitij, janiyari niya naquiya miya nujuatejojuajiniyani. Naajaa, majaari cua caririqiniyu. Janiyacuajaari niishiyani canaacua cua tiuquiarini. Nojuacuajaari pocuaji Tacuna Jesucristo. Cunora, janiyari seetanujuanaa niishiyani, nojuajaari cumaacaraca na cojuanura janiya, nojuaja cuara tiuquiriohuajaatijia. Naajuhuj, nojuacuajaari cumaacaraca na jataniniuria pajaniya, tojetaarucujanaa quiarinio pueya pa quiniuria na tiuquishacariuhua pocua.

¹³ Timoteonaa, maninia niishitiojosano tojjia quia quiriquia taa cua niishitiojoquiaari quiajaniyacujani. Naa quia miiriquia Pueyaso rupaacua tiuujia quia quishacari, pueya panijia quia quiniucuaquijuhuj, Jesucristo rupesano pa quiniucua. ¹⁴ Pueyasocuaajaari quia niishitiquiaari seetanu rupajanaa. Pueyaso Sohuanu quiniucua poojiajinia na cumaquiniuria pajaniya, cuno niishitiojosano quia jitiare maninia, maja tamaatiara na jatanishaanura.

¹⁵ Quiaacuajaari tari niishiya, puetunu Asia jiyajinjiniyo parta Pueyaso pueyari cua tiujiatuquiaari tamajaaja. Majaari na naacutunu paniniyu quiquianu janiya. Nojorijinjiniyo quiquianujuhua Figelo, Hermógenesio. ¹⁶⁻¹⁷ Saniniuuja, Onesíforo cutaraari cucua tiuquitasucanu. Cunora, pa Jiyaniijia cuara nocua taraajeera, puetunu na tiajinia quijiacacuajuhuj. Nojuaja jaara Roma tiacajinia tiuquiquianu, nojuajaari ritia coteecanu na pajenura janiya, cuara cua riuriaterejaatijia. Jaara cua riuriatatanu, nojuajaari coojia

cajitiquianu. Nojuajaari pueyaracaanu cucua tiuquiijiocanu niya nujuatejojuajinia, na naacunura janiya. Majaari cucuaji na caririqiniu quiqiuianu nujuatesano cua quishacari. ¹⁸ Quiaacuaajaari niishiyajuhuaaj taa nojuaja naacuquiaari pajaniyacuaajani, Éfeso tiacajinia pa quishacari. Naa maninia na miiniucua pajaniyacuaatej, pa Jiyaniijia tiuquishacariuhua pocua, nojuaja cuara maninia miiria Onesiforo saniniuuja.

2

Jesucristora poonijojua quia quiri quia puereyaquiniutia

¹ Quiajaniya saniniuuja quiyanunaa, quioojia quia cumaquiriquia Jesucristo niqutiosano cumaacata. ² Nocua tiuushano pueya quiarta Pueyaso pueyajinijinio quia niishitiojore Pueyaso rupaa, nojori niishitiojonura tamasaca saniniuuja. Cuno maninia pueya quia niishitiojore puetunu Pueyaso rupaajanaa, taa quia tojiqiaari queraatia pueya niqiuara cua pohuatasacariacuajani.

³ Juhuaajaniya naquiya miiniu rejeretaja quia quiri quia juhua pa Jiyaniijia Jesucristo soldado, puereyashijia. ⁴ Pueyano jaara soldadora saquiriojosaare, cuno pueyanoori maja na naata tama na panishanojuaja miiniu socua. Nojuajaari pueyaracaanu na camarnu tojjia, na camarnu timitianura nojuaja. Naa pa Jiyaniijia tojjia quia quiri quia juhuaaj Timoteonaa. ⁵ Naajuhuaaj, pueya tacuarishijosacari, nojori cuara quiiria tacuarishijionu camarnu tojjia. Tamonu jaara shocotare na tojiyaquiniutia camarnu, cuno na shocotanuuri najuhuanaj. Naacuajitij, majaari na niqutiosaanu casaa, sesa na miiniutia na shocotasacari. ⁶ Nio quia niishirijuhuaaj: cante cuhuariquia cuhuatajani, nojuaja cuara coteenu na senoosanojinijia racataara na panishano. Na nuhuaji cutara, nojuaja na naata tamasaca niqutiojonu na senoosanojinijia. ⁷ Nio miriqui cua sequesanoocua quia niishiriojore. Pa Jiyaniijiacuaajaari quia niishitiniutianiya puetunujuanaa.

⁸ Majaari nio niyjetanu: Jesucristoori macujinijia samiitianishaacuaariuhua, Pueyaso Niyanu na quiniucua. Pueyano quiqiaarijaariuhuaaj. Nojuacuajaari pa supuetanaa Jiyaniijia David niqiuohuacuajiniio supueno pueyano quiqiaari. Naacuajitij, nojuajaari Pueyaso Jiyarosano quiqiaari mijiria quinia pueya niti na mosaanura. Cunoacuajaari cua pohuatasano Pueyaso Rupaa. ⁹ Naa cua poojotanuuacatej, janiyari naquiya miyani. Janiyari cumayocuta moronucua quiyajaaniuhuaaj, juhua sesa mijia. Naajaa, Pueyaso rupaa cutaraari maja na naata sanaajasaanu. ¹⁰ Cunora, janiyari puetunu naquiya miiniujianaa rejeretaquiaani, Pueyaso saquiriojosano pueya tojiniuria Jesucristojinijia. Naacuajitij, nojoriiri na naata nocua tiuuniu, Pueyaso pueyara nojori jiyatesaanurajuhuaaj, taa na jatanishano pueya pa quiyacuaani. Naacuajitij, paari mariyata shacantuuca quijiacara jatanishaanutaniyani, Jesucristota pa quiniuria pueyaracaanu.

¹¹ Nio sequesanoori seetanujuanaa:

Jesucristoocua pa tiushacari, Pueyasoori Neyanu mosaanu jiyateya pa niti na quiniuria sesa pa miishanojinijia. Naacuajitij, Jesucristo mosaanu jaara pocuara quiqiaari, na samiitianuhuari pajaniyara quiyajuhuaaj, pueyaracaanu rishiriquiano pa quiniuria. ¹² Naajuhuaaj, paa jaara naquiya miitiasaariquia nocua pa tiuuniucuaani, nojuajaari camarucuaa pa jiyatenutianiya narta jiyaniijanucua pa quiniuria. Saniniuuja, pa jaara pa Jiyaniijia tamacariquia Pueyaso niishiyashijia pueya niqiarani, nojuajaari pa tamacanutaniyajuhuaaj. ¹³ Paa jaara na sequesano tojiyashijia quiri quiani, naajaa, nojuajaari pueyaracaanu na sequesano mijia. Pueyasoori na sequesano jataniyashijia cutara.

Taamueca quiijate Pueyaso shuquiritiasano nera poonijionani

¹⁴ Parta Pueyaso pueya quia niishitiojorohuarohua maja najuhuaana nojori juayonuujutanura tamaatia niishitiojosanoocua. Jiyanojua quia nacasure nojori Pueyaso niqiuara, maja naa nojori nacojonura najuhuaana supuetanaa niishitiojosanoocua. Naa tamaatia niishitiojosanoocua juayonuujutanuni, cunoori maja na cumaquiniu na tojiniaa. Socua nojori sesoya cutaraari. ¹⁵ Tama quia cuaqueyajaaja quia cojuare, saa maninia quia niishitiojonura Pueyasojinijia cuno seetanu rupaajanaa. Naacuajitij, Pueyasoori quia timitianutianiya nera poonijiona maniniu quia quiniucua. Majaari capa quia niishitiojonu, quiaa mariqui tamajaaja caririquiriiri. ¹⁶ Naaratej, majaari najuhuaana tama mijiria pueya niishishanojuaja quia tojinu. Pueya tojishacari cuno, nojoriiri socua jiyacatenutianiya Pueyaso tojiyashijia nojori quiniuria. ¹⁷ Cuno najuhuaana niishitiojosanoori jiyanojua puereeta. Cunoori Pueyaso pueya tajinia paaqueja, na sesonura puetunu Pueyaso pueya maanujuanaa. Naa nojori tajinia paaqueyari taa pueyano cusojuaja sapueja pueyano cuaqueya moquijiaquiacuaani, na camaru na cusojuanura. Himeneo, Filetonio, nojoriiri

naa miiquioya quiarijia. ¹⁸Nojoriiri seetanu rupaajanaa jataniquianu tamaatiara. Nojoriiri pueya niishitiojiya, paanaari tari tojetaarucujanaa samitiianishanocujani. Naacua-jitij, majanaari pa cuaqueya jatanishaanu quiniutianiya, shacantuuca cuaqueyaraca pa quiniuria taa pa Jiyaniijiacuaani. Naa nojori niishitiojosacari najuhuanatej, nojoriiri noo-jaqueya Pueyaso pueya cushitiojiya, nojori tiuyaquiniuria pa Jiyaniijia sequesanoocua. ¹⁹Naajaa, Pueyasojuanaacuaajaari pa niishitiquiaari na rupaari seetanujanaa. Majaari na naata jatanishaanu. Naa naajiotasano quiyacuaajaari:

“Pa Jiyaniijiaari na saquiriojosano pueya niishiyacuaaja”.

Naa naajiotasanoori quiyajuhuaaj:

“Canapuate pa Jiyaniijia Jesucristoocua tiuujiacani, nojori cuaara sesa na miijionu tarini-tiaara”.

²⁰Sanajanaa, cua tojiri. Jiyanoehua queraatia casamiriaca pueyano tiajinia, cuno tiajiniaari maja saaja orojiniji shipinijosano coshiquia quiniu, miacoujaanio, platajiniji casaanio. Puetunu tamaatia casaajiniji shipinijosano casamijianaari quijia. Quijiajaari-uhua mati, suruhuatu numajiniji quejasano. Quijiajaariuhua maraujiniiji panishano patacocua, conaanio. Puetunu cuno casamijinijiniojuanaani, noojiaqueyari racatasano saaja masu miaquetejarano quiya, na raatojotajaranonio. Quiyajaariuhua rucucuaacuaaji casaa, rucucua cajitiaja. ²¹Paari naajuhuaaj. Paa jaara tama pa cuaqueyajaaja co-juariquia tojetaarucujanaa sesa pa miiniucuaajini, saaja pa Jiyaniijia pa quiniuria-juhuaaj, naacuaajitij, pa naata juhua pa Jiyaniijia timitiasano tohuatashiniyojua quiniu. Naacuaajitij, pa Jiyaniijia na naata poonijiotenu pajaniya puetunu maninia casaajanaa pa miiniuria.

²²Sanajanaa, quiaacuaajaari niishiya, casaa miiniucua jiaatijacate mashiquiorini. Puetunu cuno sesa niishiriojosanojuanaa quia tarinitariquia. Saniniuujia, saaja maninia miijia quia quiriquia. Saaja Pueyaso rupaacua tiuujiya quia quiriquia, pueya panijiajuhuaaj. Jiyanoojia quia quiriquiajuhuaaj. Naa quia quiriquia, taa puetunu Pueyaso jiyatesano sesa miyashijia pueyajanaa miiquiaacuaani, pa Jiyaniijiaacua nojori tiuniuucua. ²³Pueya jaara nacojoriquia nojori niishiyaquishoo casaajiniji najuhuanaj, nojori quia ruuretare saaja, nojori jaara quia nequesoretare cuno casaajiniji. Quiaacuaajaari niishiya, pueyari jiyano casaacua paracaatiojua. ²⁴Pueyasora poonijiojua pueyano cuaara quiyaquiriia pueya paracaaja. Saniya cuaara quiriia cutara puetunu pueya panijiajanaa. Cuaara quiriiajuhua maninia niishitiojua. Cuaara juhuajaniya rejeretaja quiriia, tamasaca jaara na taajetere. ²⁵Cuaara Pueyaso rupaa tojiyashijia nacasuura jacaria, nojori na paniniutia, maja nojori na juaniutia. Naa quia miishacari, Pueyaso naasucuaari nojori jiuujia tacatonutaniya seetanu rupaajanaa niishijia nojori quiniuria. ²⁶Naacuaajitij, nojoriiri maninia niishiriojua quiniutianiya, nojori jaaretenura Sesaacuaaji, maja Sesaaca miitiniuria nojori taa na paniyacujani.

3

Taa quiijaca mijiria quiniaa quiniutianiya quera jiya puequesacarin

¹Quia niishirijuhua Timoteonaa, jiya puequenu panishacari, pueyari socua jiyacatenu-taniya sesa miijiacara. ²Pueyari saa tama nerajaaja niishiriojua quiniutianiya. Majaari tamonura na niishiriojonu quiniutianiya. Pueyari queraatia cumaneeca jitianuucua jiaatijaca quiniutianiya juhuaaj. Naajuhuaaj, pueyari najuhuaana narta pueya niquiara pocuajaca quiniutianiya, na jyanishacari nojori cutara socua niishijia narta pueya-jiniji, socua shanohua niquishano tamasacajinijinio. Pueyari Pueyaso sesacajaca quiniutianiya, narta pueya sesacajacajuhuaaj. Pueyari na queya tojiyashijia quiniutianiya. Majaari quenaaja pueya timitianu quiniutianiya maninia na miijia. Pueyari maninia miyashijia quiniutianiya, Pueyasojiniji maninia casaa rerequetejaca nojori quiniucua. ³Naajuhuaaj, majaari quenaaja na queya panijia pueya quiniu quiniutianiya, tapueyocua, tama necohuaajaanio. Pueyari tojetaarucujanaa jyanoyashijia quiniutianiya. Sacuaraatia rimiaacaturji quiniutianiyaariuhuaaj. Naajuhuaaj, majaari quenaaja tama nojori cuaqueya panishanojuaja rejetejaca pueya quiniu quiniutianiya. Pueyari naquiya narta pueya miijia quiniutianiya, nojoriicua na taraajeyaquiniutia. Pueyari puetunu maninia miijiacajanaa soojeaca quiniutianiya juhuaaj. ⁴Pueyari tama na cojiniaajaaja tacartajaca quiniutianiya. Pueyari cocuaatia casaa miijia quiniutianiya, mosanucua nojori quiniucua. Pueyari juhuajaniya quijia quiniutianiya, tama nojori cuaqueyajaaja shuquiritajaca nojori quishacari. Shuquiriaatia pueya miishacari tama na panishanojuaja pueyaracaanu, majaari jeya nojori quiniu quiniutianiya nojori shuquiritianura Pueyaso. ⁵Pueyari sapuenu juhua Pueyaso pueya niquishaanutaniya. Naajaa, nojori miishanojiniji, maatia niishishaanutaniyari, nojoriiri Pueyaso cumaaca

maseyaquiquiaari seetanujuanaa jatanishano pueya nojori quiniuria. Cunora cua tojiri Timoteonaa. Majaari jiyano pueya quia rupenutej.

⁶ Tamasaca cuno pueyajinijioni, nojoriiri tiaco tiuquitiacaja, noo maajipohua na sapojonura, najuhuana pueya pohuatasanoocua ritia tiuuiacatej. Cuno maajipohuari tama na cuaqueya miiniu panishanojuaaja rejetyashijiaca. Naa sesa miijiaca nojori quiniucuatej, nojoriiri najuhuana tacaquioquiaa. Cunora, nojoriiri cuno sapojonu-ujuaca tojtiaquiaa. ⁷ Cuno maajipohuari najuhuana pueyaracaanu tojtiaquiaa cuno sapojonuujuaa niishitiojosano. Saniniuujia, majaari Jesucristojiniji seetanu rupaajanaa niishijiacara nojori quiniu quiquiaa, Pueyaso jiyanooniuria nojori. ⁸ Cuno sapuenu juhua Pueyaso rupaa niishitiojonaari seetanu rupaajanaa ruuretaquiaa, taa nio shimiacuri, Janes, Jambres ruuretaquiaari supuetana Moisésuaani. Naacujitij, nojori niishitijaari juhua ninishiqui, sesa nojori miishano timitiajaca nojori quiniucua. Seetanu rupaajanaa nojori tojiyaquiniucua, pueya cuaara tojiyaquiria nojori saniniuujia. Nojoricuajaari Jesucristoocua tiuyashijiaca. ⁹ Naajaa, majaari queraatia pueya tiuuniu quiniutianiya nojoriicua. Ritia niishishaanutaniyacujaari, nojoriiri seetanujuanaa niishiyashijiaca, taa pa supuetanaa niishiquiaaricuaani cuno shimiacuriiri sapojonuujuaa.

Pablo tucuatascari naajionu, socua rootaa Timoteori

¹⁰ Timoteonaa, quiaacujaari pueyaracaanu cua cojiquiaari maninia quia niishiniuria puetunu cua niishitiojosanojuanaa. Quiaacujaari niishiya taa miijia cua quiquiaarini, pa Jiyaniijia cua shuquiritiniuria. Quiaari niishiyajuhuaaj taa seetanujuanaa pa Jiyaniijiacua tiuujia cua quiquiaarini, jacaria pocuajajuhuaaj, pueya panijiano. Quiaari niishiyajuhuaaj, majaari cojia cua najiquitiniu quijiani, pueya miishacari naquiya janiya. ¹¹ Quiaari niishiyajuhuaaj taa cua miitiasaaquiaari Antioquiya tiacajiniani, Iconio tiacajiniajuhuaaj, Listra tiacajiniani. Seetanujuanaa, janiyari naquiya miishaquiaarini. Naajaa, pa Jiyaniijiaari cucua taraajequiaari maninia na rishitiniuria janiya. ¹² Seetanujuanaa naquiya miishaanutaniyari puetunu noo pueyajanaa, tama na cuaqueyajaaja jiyatejaca saaja Jesucristo tojijiaca nojori quiniuriatej. ¹³ Saniniuujia, sesa miijiaca pueya, sapojonuujucanio, nojoriiri socua sesa miiniuria jiyacatenutaniya. Nojori sapojonuusacari tamasaca, nojoriiri naa tama na cuaqueyajaaja sapojonutaniyajaacujua.

¹⁴ Quiajaniya saniniuujia Timoteonaa, majaari quia cartenu puetunu maninia niishitiojosanojuanaa, taa quia niishitiojosaaquiaaricujani. Quiaacujaari niishiya, cuno niishitiojosanoori seetanu rupaajanaa. Quiaari niishiyajaacuhuaaj canapueje quia niishitiojoquiaarini. ¹⁵ Quiaacujaari quia naatujujiniji tariucuaaanu Pueyaso Rupaa niishijia. Cunoori quia niishitiquiaari Jesucristoocua quia tiuuniuria, Pueyaso jiyanooshano pueyano quia quiniuria. ¹⁶ Puetunu Pueyaso Rupaajanaacujaari Pueyaso naajiotanishano na pueya. Cunora, puetunu cuno rupaajanaari maninia pajaniyara. Cuno rupaari cumaacaraca na niishitiojonura pajaniya, na niishitiniuria pajaniyajuhuaaj pa miishanoori sesa, na nacasunura pajaniya maninia miijiaca pa quiniuhua. Pa rootajaariuhuaaj tojetaarucujanaa maninia miijiaca pa quiniuria. ¹⁷ Naacujitij, Pueyaso Rupaari Pueyasora poonijionaa pueya jeenucujaja tojetaarucujanaa, puetunu maninia casaa miijiacajanaa nojori quiniuria.

4

¹ Quiaacujaari niishiya, Jesucristo tiuquishacariuhua mijiria, Jiyaniijijanaa na quiniuria, nojuajaari puetunu na tojtiajacajanaa nequesoreenutaniya mijiria pa miishanojiniji, saminiucua, macunucuanio. Cunora, janiyari na niquiara, pa Que Pueyaso niquiara quia sequeya seetanujuanaani. Cua tojiri. ² Majaari pueya niquiara Pueyaso rupaa pohuatunu quia tarinitianu. Pueyaracaanu quia pohuatariquia, naajaa, quia jiyaniachari jiyacari naasucuaari maja maninia quia pohuatanura. Pueyaso rupaata quia niishitiri sesa miijiaca nojori miishanoori sesa Pueyasora. Pueyaso rupaa tojiyashijiaca quia nacasuriquia. Pueya quia shiniujiuriquia Pueyaso rupaacua nojori tiuuniuria seetanujuanaa. Puetunu cunojuanaa quia miiriquia jacaria quia pocuanuta, maja juaanitua. ³ Naa quia poojotariquia pueya niquiara, nojori tojiniu panishacarijia Pueyaso rupaa. Na nuhuaji, pueyari seetanu rupaajiniji niishitiojosano tojiniu paniyaquiniutianiya. Saaja na ruuretanutaniyaaariuhuaaj. Naa Pueyaso rupaa nojori tojiniu paniyaquishacariitij, nojoriiri queraatia tamaatia niishitiojonuujuaaca rerejotenutaniya, cuno pojori shuquiritiniuria nojori najuhuana pohuatasano. ⁴ Nojoriiri seetanu Pueyaso rupaajanaa tarinitianutaniya, najuhuana sapojonuusano tojtiajaca nojori quiniuria saniniuujia. ⁵ Quiajaniya saniniuujia, maninia niishiriojua quia quiriquia, maja quia sapojosaanurajuhuaaj. Naquiya miiniu rejeretaja quia quiriquia. Pueyaso rupaa Jesucristojiniji pohuatanuucua cojeja quia

quiriquia, pueya tiuuniuria Jesucristoocua. Puetunu quia poonijiosanojuanaa Pueyasora quia tucuatere maninia, taa pa Jiyaniijia sequequiaari quiajanianyacuajani.

⁶Janiya saniniuujia, janiyari quera quianutaniya jiyocuacaanu cua quiniuria pa Jiyani-ijiatani. Cua nanaca jaara shootesaare, janiyara, cunoori juhua Pueyasora cua niqutiosano quiniutianiya. ⁷Majaari cua taajenu quijia, pueyaracaanu cua poonijiosacari cua Jiyaniijia. Janiyari tari tucuataganu miiniu puetunu na sequesanojuanaani. Pueyara-acaanu cua poojotasacari Pueyaso rupaa, majaari cua jataniniu quiquiaari quenaaja. ⁸Naacujitij, shanohua tuhuajaari quiriano jiyocuacaanu racatasano quiya tari, maninia miijia cua quiniucua. Cua Jiyaniijiaari cuno tuhuaja cua niqutionutaniya na samiitian-ishacariuhua janiya. Pa Jiyaniijiaari jiyanoohua maninia. Na jiyanooshano pueya pa quiniucua, majaari socua na saneenu quiniutianiya sesa pa miishano. Majaari saaja janiya na niqutionu quiniutianiya cuno tuhuaja. Puetunu noo pojorijianaa niqutionu-taniyajaariuhua, canapue te nojuaja na paniniutia sashiyajaani, cuara tiuquihuara shacantuuca na cumaacatajaatijia.

Pablo sequesano Timoteo miishocoriquiano

⁹Majaari puera tarishiniu. Quia secoore, cucua quia tiuquiniuria ritia. ¹⁰Demasri cua tiujiaarucuaani. Tesalónica tiacajinia quiaarucuaari. Nojuacuajaari tama na panishanojuaja miiniu panijiaara jatarohuacuaa. Crecenteeri saniniuujia Galacia jiyajinia quiaarucuaa. Titoori Dalmacia jiyajinia quiaarucuaajaacuhua. ¹¹Saaja Lucasri niya cuata quiya. Quiaa jaara cumaji niyare, quiocua Marco rupoyare quiocua. Nojuajaari na naata cua naacunu niya, pa Jiyaniijiaari cua poonijiosacari. ¹²Janiyari saniniuujia Tiquico jiyarorucuaa Éfeso tiacajiniani. ¹³Taa cua sequeya quiajanianyacuajani, quiaa jaara cumaji niyare, quiocua cua tucuaque toque paare quiria, Carpo tiajinia cua tiujiasano, Troas tiacajinia. Quiocua quiria patootaare cua nequesoreetuneeacajuhua. Janiyari socua noo paniya quia patootanurani, shoqueecua naajionuutasano Pueyaso Rupatej.

¹⁴Noo Alejandro, cumueeca casaajiniji shipinijiojua casamitij, nojuajaari jiyanoohua cua paracaajiaa quiquianu. Naajaa, pa Jiyaniijiaacuajaari saniniuujia cucua na naminiutianiyacuajua, naa na miiniucua janiyatej. ¹⁵Tama quia cuaqueyajaaja quia cojuare maja na miiniuria sesa quiajanijuhua. Nojuajaari pa pohuatasano cuaracashitiya saaja, Pueyaso rupaa ruuretaja na quiniucua.

¹⁶Janiya jaara shushajanaa nujuatesaacanu jiyaniijianucua tacojitij, nojori nequesoreenura janiya, majaari quenaaja tamonu Pueyaso pueyajinijinio quiniu quiriquiaa tii, cucuaji na tacunura quenaaja. Puetunu cua cojiniaajanaari cua cartecanu tamajaaja. Naa nojori tarinitianuucua tamajaaja janiyatej, Pueyaso cuara jiyanooria nojori. ¹⁷Naajaa, pa Jiyaniijiaari cua cojiqianuni. Cua cumaquiquianujaariuhua, nojuajiniji cua pohuatanura puetunu cuniqui quiniaa Pueyaso niishiyashijiaa pueyajanaa. Pa Jiyaniijiaari cocuaatia cua miinujiniji juhua nojori juaashiquiajiniji cua jaaquianu, maja nojori monura janiya. ¹⁸Janiyari nocua tiuyani, nojuajaari cua mashiquiniutianiya puetunu sesa casaacuajijianaa. Cua cojuanutaniyajaariuhua, pueyaracaanu rishijia cua quiniuria na shuriucua jiyocuacaanu, Jiyaniijiajanaa na quishacari. ¡Jiyanoohua maniniaari pa Jiyaniijia! ¡Nojuaja cuara shuquiritiasaaria pueyaracaanu! Cuaara naa quiiriatej.

Pablo sequesano na naajione na tucuatasaari

¹⁹Quiria quia saruhuatare Prisca, neyaca Aquilano, puetunu Onesíforo pueyajanaa-juhua, na tiajinia quiniaa. ²⁰Erastoori Corinto tiacajinia jateecanu. Janiyari saniniuujia Trófito tiujiacanu Mileto tiacajiniani, cusosu na quiniucua. ²¹Cucua quia niniuria quia secoore, shuniya coteyaquishacarijia quia tiuquiniuria cucua. Niya cuata quiniaa parta Pueyaso pueyari cua sequereeni, nojoriria cua saruhuatanura quiajaninya. Nojoriiri Eubulo, Pudente, Lino, Claudio, puetunu parta Pueyaso pueya maanujuaanao.

²²Pa Jiyaniijia cuara quioojajinia quijia quiria pueyaracaanu. Pueyaso cuara cumaquiria puetunu nijajaniyajanaa.

PABLO NAAJIONEE TITOCUARA

Pablo naajiosacari Titoocuara

¹ Janiyari Pabloni, Pueyaso seru. Jesucristoori cua jiyaroquiaari na Que Pueyaso saquirojosano pueya cua tiutiniuria Jesuucua, Pueyaso pueya nojori quiniuria. Cua jiyaroquiaariiaariuhua Jesuucua tiuuniaa cua niishitiniuria seetanu rupaajanaa Pueyasojiniji, nojori jatanishaanura maninia quijiacara. ² Nojori tojishacari cuno rupaa, nojoriiri niishiquiaa nojori cutaraari samiitianishaanutaniuhua Pueyaso muerasu nojori quiniuucua, pueyaracaanu quijiacu nojori quiniuria Pueyasota. Cunocuaajaari tariucuaacaanu Pueyaso sequesano, jiyanoehua tarijiatej, jiya shipinishaacarijiyojua. Nojuajaari maja na naata sapojonu. ³ Quiari naataja, Pueyasoori na rupaa niishitiniu paniquiaari pueya, taa na paniquiaari jiyasohuaja tariucuaacaanucujani. Naaratej, pa Jiyanoojia Pueyasoori cua jiyatequiaari na rupaa pohuatanarani, pueya cua tiutiniuria nocua. ⁴ Quiarijiani, quioocuara naajiyaniija Titonaa, juhua cua niyanuniyojua quia quishacari. Quiaari Pueyaso pueyanora quiquiaari quia tiuushacari Cristojiniji cua pohuatasanoocua, taa cua tiuquuaaricuaani. Naacuajitij, paari mariyata nocua tiuujiacani. Pa Que Pueyaso, pocuaji Tacuna Jesucristonio, nojori cuuara cumaquiiira quiajaniya. Nojori cuuara jitiiaara quioojia maninia, shuquiraatia quia quiniuria pueyaracaanu.

Titora Pablo sequesano, Creta jiya tucuaatiajajinia na miishocoriquiano

⁵ Janiyari quia tiujiaquiaari Creta jiya tucuaatiajajiniani, quia tucuaatanura cua poonijosano cureeno. Naaratej, quia sequesananijia quia jyatenua jiyaniijianucua, Pueyaso muerasu maapue jiiitanaa quiniuria puetunu cuno jiya tiacajinijanaa, taa cua sequequiaari quiajaniyacuajani. ⁶ Pueyaso pueya jiiitariquiano cuuara quiiira maninia pueyano, sesa miyashijia, maja pueya pocuanura sesa nojuajiniji. Cuuara jiiitaaari niquiriyatujua niquiocua. Necohua cuuara quiiira Pueyaso muerasujuhua, maja sesa miijia, maja tojiyashijiacajuhua. ⁷ Cante Pueyaso muerasu jiiitanani, nojuajaari Pueyasora poonijiojua. Naaratej, nojuaja cuuara quiiira maninia quijia, sesacasoo, maja tojiyashijia. Cuuara quiaquiiira ritia juaajia, mashaasequejoja, piyojotaja. Cuuara quiaquiiira cumaneeca panijia sesa na miishanota na masenura. ⁸ Naajuhua, Pueyaso pueya jiiitana cuuara quiiira rucoonaacua taraajeja. Cuuara quiiira maninia miijia, maninia niishiriojua. Cuuara quiiirajuhua seetanujuanaa Pueyaso rootasano tojijia, maja rimiajata maninia miijia. Cuuara quiiirajuhua Pueyaso panijia cutara, tama na cuaqueyajaaja jiiitaja maninia, maja sacuaraatia casaa porocua. ⁹ Cuuara quiiira Pueyaso rupaa tojijia cutara, taa na niishitiojosaaquiaaricujani. Naacuajitij, nojuaja na naata pueya cumaquiniu, maninia na niishitiojosanota Pueyaso Rupaajiniji. Naacuajituhua, nojuaja na naata pueya tacatonuhua Pueyasocua sesa nojori niishishanojiniji, noo pojori canapuate Pueyaso Rupaa ruuretajaca quiyacuajani.

¹⁰ Naa quia sequereenijia, queraatia tojiyashijia pueya quiniuucua, canapuate juhua niishiyashijia niishitiojquiaa najuhuaana niishitiojosanocujani. Nojoriiri Pueyaso muerasu sapojia. Queraatia cuno pojoriiri cuarta Judiocuaca. Nojoriiri pueya niishitiojiya pueya cararaatuuquia co miatesaanura, taa Moisés niishitiojquiaari tarijiacuajani, seetanujuanaa Pueyaso muerasu nojori quiniuria juucua. ¹¹ Nojoriiri queraatia niquiohuaraca pueya jiyajeneteya sesa na niishitiojosanota, puetunu tapueyocacatajanaa nojori juayonuujuanura. Cuno niishitiojonaa cuuara sanaajasaaria. Nojoriiri niishitiojquiaa saaja cumaneeca nojori masenura sesa na niishitiojonuunujiniji.

¹² Creta jiya tucuaatiaja pueyajinijinio tamonu shimiacuuri tama na pueyajinijiaaja na sequequiaariti: "Creta pueyari pueyaracaanu saaja sapojonuujuaca. Nojoriiri jiyanoehua juaajia juhua sayoru. Nojoriiri puera miaquenuujuaca. Nojoriiri taajecorijihua". ¹³ Seetanujuanaari cuno shimiacu sequesano. Nocuaji, jiyanoehua quia nacasure nojori, nojori cuuara Pueyaso tojijia quiiira, maninia quijia nojori quiniuria. ¹⁴ Quia rootare nojori maja na tojtianura Judiocuaca nareja najuhuaana pohuatasano, naajuhua, maja nojori tojiniuria pueya rootasano, canapuate Pueyaso seetanu rupaajanaa tojiyashijia quiyacuajani.

¹⁵ Pueyano jaara maninia jiuujiaraca quiri, puetunu casaajanaari maninia quia nera. Saniniujia, pueyano jaara sesa jiuujiaraca quiri Pueyaso rupaacua tiyashijia na quiniuucua, majaari quenaaja niquiriyatu casaa maninia quiniu nera. Na niishitijaari juhua cuuruucua, noojiano. ¹⁶ Nojoriiri tama na cuaqueyajaaja sequeya: "Pueyaso niishiyaniija". Naa nojori sequesacariti, najuhuaana sequeyari. Nojori miishanojiniji, paari niishiyani nojori maja seetanujuanaa Pueyaso muerasu. Nojoriiri jiyanoehua soosano pueya, puera

sesa na quiniuucua. Nojoriiri jiyanhua sesa, tojiyashijacajuhua. Majaari na naata quenaaja maninia miiniu.

2

Maninia niishitiojosano cutara

¹ Nocuaji, pueya quia niishitiojore maninia nojori quiniuria taa pa niishitiojosaaquiaaricujani. ² Naaratej, socua saaquiapue quia niishitiojore nojori cuaara quiaquiria miaquejoru, mashaasequejorunio. Nojori cuaara quiria tojishano pueya cutara, maja rerequetesano. Nojori cuaara quiria maninia niishiriojojuaca. Cuaara quiria maninia quijiacajuhua, na tojishacari puetunu Pueyaso niishitiojosanojuanaa, na panishacari pueyano. Nojori cuaara quiriajuhua maninia rejeretajaca taraatia na miishacari, juhuanianiya nojori sashishacari pa jiyaniijia. ³ Naajuhua, socua motaja maajipohua quia niishitiojore nojori quiniuria maninia Pueyaso niquara pueyaracaanu, maja rimiaacaturu, maja mashaasequenujuaca. Nojori cuaara pueyaracaanu miiria maninia tamasaca niquara, tamasaca miiniuria juhua nojori miishanojuhua. ⁴ Nojori cuaara niishitiojora niyacaraca maajipohua, maninia na paniniuria neyaca, necohuanio. ⁵ Cuno jiyaniyacua cuaara niishitiojora narta maajipohua, maninia niishiriojojuaca nojori quiniuria, saaja neyaca panijaca nojori quiniuria, maja tamonu caya panijacara. Nojori cuaara niishitiojosaariajuhua, maninia poonijiojuaca na tiajinia nojori quiniuria, caporatujori nojori quiniuria, neyaca tojitajacanio. Nojori cuaara naa miiria, Pueyaso Rupaa mariqui rerequetesaareeri.

⁶ Naajuhua, mashiquiori quia niishitiojore maninia niishiriojojuaca nojori quiniuria. ⁷ Puetunu quia miishanojuanaa cuaara quiria maninia nojori niquara, nojori jiaatianura quiocua, juhua quiajaniya nojori quiniuriajuhua. Quia niishitiojosacari nojori, tama quia cuaqueyajaaja quia cojuare, tama quia niishitiojosanojuaja tojijia quia quiniuria. Majaari puenujuua quia quiniu quia niishitiojosacari. ⁸ Maninia quia niishitiojore Pueyaso Rupaa, taa quia niishitiojosaaquiaaricujani. Naacuajitij, tamasaari maja na naata ruuretano quiniutianiya quia niishitiojosano pueya niquara. Naa maninia quia niishitiojosacaritij, quia niishitiojosano rerequetejacaari caririquiniutianiya. Naacuajitij, nojoriiri maja tari na naata pocuanu quiniutianiya sesa pajaniyajiniji. Nojoriiri sanaajetanutaniya.

⁹ Poonitijosano pueya quia rootare, puetunu na camarucua sequesanojuanaa nojori tojiniuria, na camarucua shuquiritianura nojori. Cuaara quiria na camarucua panijaca, maja riuhuanejaca. ¹⁰ Cuaara nohuaseyaquiria na camarucua casami. Cuaara quiria seetanujuanaa maninia miijia, pueya niishiniuria pa jiyanojia Pueyaso rootasanoori jiyanhua maninia cutara. Poonitijosano pueya jaara maninia quiriquia, Pueyaso Ru-paari juhua maniniushitishano quia tamasaca niquara.

¹¹ Paacujaaari niishiyani Pueyasoori jiyanhua jiyanojia seetanujuanaa, Jesu cusonucua puetunu pueyacuaraanaa, sesa pa miishanojiniji pa jiyanooshaanura. ¹² Pueyaso jiyanooshacari pajaniya, cunoori pa niishitiojia pa cartenura puetunu sesa pa miishanojuanaa, maja mijiria casaacua pa jiaatianura sacuraatiajuhua. Naajuhua, Pueyaso jiyanooniucua pajaniya, cunoori pa shiniujiya maninia niishiriojojuaca pa quiniuria mijiria pa quishacarijia, maninia miijiacajuhua, Pueyaso tojjianio pa paniniutia nojuaja. ¹³ Naa Pueyaso jiyanooshacari pajaniya na muerasu pa quiniuriatej, cunora paari na sequesanoocua tiuquiaajuhua. Nojuacuajaari pa sequequiaari pa Pueyaso Cristoori pocua muetanutanihua, shacantuca na cumaacajinia. Naacuajitij, paari shuquiriaatia sashiya pa jiyani. ¹⁴ Nojuajaari tama na cuaqueyajaaja panitiaquiaari pocuara, sesa pa jiiitishano casaacua na tarinitiniuria pajaniya. Pocuara cusoquiaariiri poojia sequejeequesano quiniuria puetunu sesa pa quiniujinijijianaa. Naa miiquiaariiri saaja tama na pueyarajaaja pa quiniuria, jiyanhua maninia miiniucua jiaatijaca pa quiniuriajuhua.

¹⁵ Naa quia niishitiojore pueya Titonaa. Pueyaso pueya quia niishitiojore, quia shiniujiuri, quia nacasure. Naa quia cumaquiniuria nojoritij, quia cumaaca quia paaretare juhua cutara jiyaniijia, tojishano pueyano quia quiniuria. Saaja maninia quia miiriquia pueyaracaanu, tamonu mariqui quia rerequetereeri.

3

Maninia rootasano Pueyaso pueyara

¹ Quia pueya quia niishitiojorohua jiya jiyaniijia tojjijaca nojori quiniuria, jiyaniijanucua na jiyatesano pueya nojori tojiniuriajuhua. Nojori cuaara cuno pojori naacutaara jaara sequesaaare maninia casaa nojori miiniuria. ² Pueya quia niishitiojore nojori cuaara pueya sesacaashijaca quiriiajuhua. Nojori cuaara quiria juhuanianiya quijia, maja

juaajiac. Cuaara quiiria jiyanoojiaca. Cuaara maninia niqiiiria puetunu pueyajanaa, juhua socua maninia pueya nojorijiniji, maja rimiajata na miiniuria tamasaca.

³ Tariija, paari mariyata mosanucua quiquiaarini, Pueyaso tojiyashijiacanio. Paari juhua tashucua quiquiaarini, sapojosano pa quishacari. Paari sesa miiniucua jii-tiquiaarini. Majaari pa naata sesa pa miiniu tarinitianu quiquiaari. Paari pueyaracaanu shuquiriaatia quiniucua jiaatijaca quiquiaarini sesa pa niishishanota. Paari sesa miijiac quiquiaarini. Paari tamasaca jiiitiasanoocua jiaatijaca quiquiaarini, juhua nojori pa quiniuriajuhuaj. Paari pueya soosano quiijaca quiquiaarini. Paari niqutitiojuaca quiaquiquiaarini. ⁴ Naajaa, pa Jiyanoojia Pueyaso cutaraari maninia miiquiaari paja-niya. Naacujitij, paari niishitishaaquiaarini taa Pueyaso paniya puetunu pueyajanaani, na jiyaronuucua Neyanuniyojua pocuara na cusonura. ⁵ Na muerasura pa jiyatequiaariiri saaja pocua na taraajesacari, maninia miyashijia pa quishacariija. Sesa miyashijiacara na Sohuanuta pa jataniquiaariiri, na Sohuanu jeequesacari poojia, maninia jiuujiaraca pa quiniuria. Pueyaso Sohuanuuri pa jataniquiaa juhua quiarinio pueya pa quini-uria. ⁶ Pocuaji Tacuna Jesucristo miiniucua maninia, Pueyasoori jiyanojua queraatia na Sohuanu niqutitioquiaari pajaaniya. Juhua pocua totasaareeri na Sohuanu. Maja shiitianiyojua quenaaja. ⁷ Naacujitij, pa jiyatereeri maninia quiijaca pa quiniuria na jiyanooshacari pajaaniya. Naa pa jiyatequiaariiri na muerasu pa quiniuria, pa masenura puetunu na jiiitiasanojuanaa puera, jiyocuacaanu na racatasano. Naaratej, paari juhua-janiya sashiquiaani, pa niishishacari paari pueyaracaanu quiijaca quiniutianiya natani.

⁸ Nio cua sequesanoori seetanu rupaajanaa. Nio rupaata quia nacasure Pueyaso tojitiijaca puetunu quiojitiatajanaa, nojori cuaara niishiriojora, maninia nojori miini-uria pueyaracaanu. Nio rootasanoori jiyanojua maninia. Maninia cutaraari puetunu pueya cumaquitiatarajanaa. ⁹ Maja cutaraari quia rupeenu cuno pueya, noo pojori canapuate najuhuaana nacojoquiaani, naajuhuj, noo pojori canapuate pueyaracaanu na supuetanaa sesaca serojoquiaa najuhuanani, juhua pueya shocotajaca nojori quini-uria. Naajuhuj, maja quia rupeenu noo pojori canapuate juaatitioquiaani, canapuate tariucuaacuano Moisés Rootasanoocua juayonuutaquiaacuajani. Puetunu cuno nojori niishishanojuanaari najuhuanaj. Majaari na naacunu nojori.

¹⁰ Quia piriyojore cuno, cante Pueyaso muerasu maanu raquirijitiaani, capa na niishi-tiojosanota najuhuanaj. Nojuaja jaara quia tojiyaquiri coteenu quia sequesacari nojuaja, quiocua socua na camiriohua piriyojonu. Jaara tojiyaquiri quiajaniya jiyacaritij, nojuaja cuaara quiiriaqui juhua taanusano. ¹¹ Naa na tojiyaquishacari quiajaniyatej, quiocua niishiri cuno pueyano tari seseree. Tama sesa na miishanojuaarijia juhua nocuara saquiriojotaa.

Pablo sequesano Titora

¹² Janiya jaara Artemas jiyarore quiocuani, jiyanojua quia saniniujiuri cucua quia niniuria Nicópolis tiacajinia. Janiyari quiniqui shuniya tajitiniu paniyani. Janiya jaara Artemas jiyaroyaquiri quiocuani, janiyari Tiquico jiyaronutaniya quiocuani. ¹³ Zenas, Apoloori quiocua tiuquiniutianiya. Nojori quia naacutare quia jiiitiasanota, nojori jiiitia-nura puetunu na panishanojuanaa nojori quianu panishacari quia quiijajiniji. Zenasri pueyacuaji tacuna pueya nequesoreenaa.

¹⁴ Parta Pueyaso muerasu cuaara niishiiria maninia miijiac nojori quiniuriajuhuaj, maja najuhua quiijaca na quiniuria. Maninia cutaraari nojori naacutanura na panis-hano jiiitaaashijiac.

Naajione sequesacari saruhuatasano

¹⁵ Puetunu cuata quiniaajanaari cua sequeya cua saruhuatanura quiajaniya. Canaara quia sarhuatate parta Pueyaso muerasujuhuaj, canapuate canaa panijiacacuajani. Pueyaso cuaara cumaquiiria puetunu niajaniyajanaa. Cuaara naa quiiriatej. Tariucujaja Titonaa.

PABLO NAAJIONEE FILEMÓN CUARA

Pablo sarhuatasacari Filemón

¹ ¿Quiaate quiyajaa canaa panishano Filemónnaa? Janiyari Pablóni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajiya quiarani, jaarajaaja pa Jiyaniijiaara poonijiona quia quiniuucua. ² Canaara quia saruhuatatare pa rimiatucua Apia, Arquiponio, jaarajaaja pa Jiyaniijiajiniji pohuatanani. Canaara quia saruhuatatarejuhua parta Pueyaso pueya maanu, noo pojori, quia tiajinia rerejoquiaa Pueyaso secojonuunuratej. ³ Pa Que Pueyaso, pa Jiyaniijia Jesucristonio, nojori cuara cumaquiiria nijaniya, jiyanoojiaa nojori quiniuucua. Nojori cuara cajitiiria nioojiajuhuaj, juhuajaniya nia quiniuria.

Filemón paniniujiniji pohuatasano, Pueyasoocua na tiuuniujinijina

⁴ Pueyaso cua secijosacari, janiyari quia seera pueyaracaanu Pueyaso sequequiaani, “paacarasho”. ⁵ Janiyari naa sequequiaa Pueyasoni, quiajanijianiji cua tojinuucua taa quia paniquiaa pa Jiyaniijia Jesuni, puetunu na pueyajanaano. Quiaanaari seetanujanaa pa Jiyaniijiaacua tiuujia. Janiyari cunora quia timitiaani. ⁶ Janiyari quiocuara secujoquiaani, seetanujanaa quiarta Pueyaso pueya jiyanoojia quia quiniuria, nojoriicua quia taraajenura. Naacujitij, nojori quia cumaquishacari, quiaari maatia niishiniutianiya puetunu quioojiajinia quia jiiitiasanojuanaa Jesucristojiniji, Jesucristoocua tiuujia quia quiniuucua. ⁷ Parta Pueyaso pueya panijia quia quiniuucua, quiaanaari nojori cumanijiacanu, nojoriicua quia taraajesacari. Naa cua niishishacari quia miishanojinijitij, janiyari coojia cumanijiacanujuhuj. Cunora, shuquiriaatia quiyaniija.

Pablo sequesacari Filemón, nojuaja jiyanooniuhua tama na seru Onésimojuaja

⁸ Jesucristo jiyaramiquishano pueyano cua quiniuucua, cua naata sequenu quiajanija quia miiniuria cua sequesano. ⁹ Naajaa, majaari cua sequenu paniniu quiajanija juhua quia jiyaniija. Saniniuujia, panijia quia quiniuucua, janiyari quia sequenu paniyani quia miiniuria nio cua sequesano quiarijia. Jesucristojiniji cua pohuatanuucua, janiyari quiarijia moronucua quiyani tariucua saaquiano. Naajaa, quia rupena Pablo cua quiniuucua, cua tojiri Filemónnaa. ¹⁰ Cucua quia taraajere quenaaja. Quia nenecojiyanijia cua niyanunijojua Onésimoocua. Nojuajaari seetanujanaa juhua quianura quiriucuaa Jesucristoocua na tiuuniuucua, na tojishacari cua pohuatasano Jesucristojiniji, moronucua cua quishacari.

¹¹ Tariija, Onésimoori sesa seru quiquiaari quiara. Quiarijia saniniuujia, nojuajaari na naata maninia quiniu quiara, taa quiria na quiyacuaani. ¹² Janiyari quiarijia quioocua jiyaroya quianuni. Quiocua na maserohua quia timiniutia, taa quia masequiaa janiyacuaani. ¹³ Moronucua cua quishacari Jesucristo rupaa cua pohuatanuucua, janiyari niyaja na jiyojetenu paniriquiaa juucuan, na naacunura janiya quia niti. ¹⁴ Naajaa, majaari naa cua miiniu paniniu quiriquiaa jiyasohua, coteenu cua nequesotaaquishacari quiajanija. Janiya jaara quia sequereni janiya niya na jiiitianutianiya na naacunura janiyani, quiaa maara cua ruuretaaquiri. Naajaa, janiyari seetanujanaa saaja quia panishano miiniu paniyani. Cunora, janiyari na jiyaroya quiocuan. ¹⁵ Onésimo jiyoteeri quioquaji rupatecanu rupaquiraja, quiarijia quiara na quiniuhua pueyaracaanu cutara. ¹⁶ Quiarijiani, nojuaja naasucuaari socua quia panishano pueyano quiniutianiya serujiniji, seetanujanaa quia tarajanu na quiniuucua quiarijiani, Jesuucua tiuujia na quishacarijuhuaj. Nojuajaari jiyanohua cua panishano parta Pueyaso pueyano. Naajaa, quiaa cuara jyanohua na panijia quiriia socua janiyajiniji, maja juhua nareja quia panishano seru. Seetanujanaa nojuaja quia paniri cutara, quiarta Pueyaso pueyano na quiniuucua.

¹⁷ Naacujitij, janiya jaara seetanujanaa quiarta Pueyaso pueyano quiri quiarani, Onésimo tiuquishacari quioocua, nojuaja quia miiri maninia, taa quia miiquiaacuaa janiyani. ¹⁸ Onésimo jaara sesa miiquiaari quiajanija, jaara quia casaa nohuasequiaarijuhuaj, nojuaja quia jyanoori. Saniniuujia cucua quia tiuutiare puetunu sesa na miishanojuanaa quiajanija. ¹⁹ Janiyacua saniniuujia cua cumanecajiniji quia niqutioreni puetunu sesa na miishanojinijijianaa quiajanija. Janiyari Pablóni. Janiyari tama cua juaashiquiatajaaja nio naajiyani, cua sequesanoocua quia tiuuniuria. Janiyari quia niishitiniu panijajuhuj, Jesucristojiniji cua pohuatasanoocua quia tiushacari, quiaacuaajari pueyaracaanu quijiaa jatanishaaquiaari. Naacujitij, cua naata sequenu quiajanija, cua serura quia quiniurijuhuj. Naajaa, janiyari saaja quia sequenyani Onésimoocua

quia taraajenura. ²⁰ Naa quiria quia miiri quenaaja, mariyata Jesuucua tiuujiaa pa quiniuucua, cua panishano Filemónnaa. Quiaa jaara Onésimo jiyanoori, Cristo panijia quia quiniuucua, quiaari seetanujuanaa coojia cumanijianutaniya.

²¹ Janiyari naa quiocuara naajiyani, cua niishishacari quiaacuajaari cua sequesano miiniutianiya. Janiyari niishiyajaaniuhuj, quiaari socua maninia na miiniutianiya cua sequesanojiniji. ²² Naajuhuj, janiyari juhuacarijia quia sequeyani, cua maquejara quia jeenucuare cucuaji quia tiajinia. Naa pueyaracaanu cucuara nia secojosacari Pueyaso niiquiji cua cartesaanuratej, nojuajaruhua niaacua cua tiuquitiniutianiya, niaata cua quiniuria.

Pablo sequesano na naajio na tucuatascari

²³ Epafraasi cua sequeree cua saruhuatanura nijaniya. Nojuajaari cuarta moronucua-juhuj, Jesucristojiniji canaa pohuatanuucua. ²⁴ Jaarajaaja cuata Jesucristojiniji pohu- atanaa pueyari nia saruhuataajuhuj. Nojoriiri Marco, Aristarco, Demas, Lucasnio.

²⁵ Pa Jiyaniijia Jesucristo cuaara cumaquiiria nijaniya.

HEBREO PUEYACUARA NAAJIONEE

Pueyasoori pajaniyara na rupaa pohuataniquiaari Neyanujiniji

¹ Tariucuacaanu, Pueyasoori pueyaracaanu na sequenu panishano caminiujiunaa pueya poojotaniquiaari pa supuetanaara. Nojuajaari nojuajiniji caminiujiunaa miijitequiaari queraatia tamaatia casaa, nojori na niishitiniuria casaa nojuaja sequenu paniriquiaa nojorini. ² Quiari naataja saniniuujia, Pueyasoori tama Neyanujuaaja pohuataniquiaari na sequenu panishano pajaniyara. Nio Neyanu shipinitiquiaari puetunu casaajanaacuajaari; nio jiya, jiya cajiniocuajuhua, puetunu pa niqiyaquishoo casaajanaano. Naajuhua, Pueyasoori Neyanu jiyatequiaari puetunu tama na shipinishanojuanaa jitianaa quiriquiano. ³ Neyanuuri tojetaarucujanaa maninia, juhua na Quejuhua, juhua na Que niquishanojuhua. Naacujitij, nojuajaari jiyanohua shacantuuca cumaacaracajuhua. Naacujitij, nojuajaari puetunu na shipinijosano casaajanaa rucuanetequiaa maninia, saa na rupaa cumaacataja. Nojuaja jaara cusoquiaari puetunu sesa pa miishanojuanaa na tuujunura, na nuhuaji, jiyocuacaanu tacaquiaarihuuari, na Que Pueyaso miaquetajara na cajiniuria Jiyaniijajanaa quiquiojinia.

Pueyaso Niyanuuri Jiyaniijajanaa cutara Pueyaso seyajiniji

⁴ Naacujitij, Pueyaso Niyanuuri Jiyaniijajanaa quiquiaari Pueyaso seyajiniji. Nojuajaari na Que sesaanucua. ⁵ ¿Pueyasoteeri quenaaja tamono na seyajinijinio sequequiaari: “Nioori cua Niyanu”? ¡Maja! Neyanu sequequiaari cutaraari: “Quiaari quiyanu. Janiyari pueyanora quia muerateree jiyacuani, cua saquiriojosano pueya Jiyaniijia quia quiniuria”.

Neyanujiniji sequequiaarihuuarihuaj:

“Nera, janiyari na Queni. Quiria saniniuujia, nojuajaari quiyanu”.

Pueyasoori maja quenaaja niquiriyatu na seyajinijinio naa na sequenu quiquiaari.

⁶ Tariucuacaanu Pueyaso Rupaajinia, naa naajiotasaquiaari casaa Pueyaso sequenutaniyani, Neyanu na tuiquitishacariuhua mijiria, Jiyaniijajanaa na quiniuria:

“Puetunu cua seyajanaa cuaara Quiyanu tojtiaara, Jiyaniijajanaa na quiniucua”.

⁷ Pueyaso seyajiniji saniniuujia, naa naajiotasano quiyari tariucuacaanu Pueyaso Rupaajinia:

“Pueyasoori na seya jataniquiaa juhua paratura, juhua manirianio, na panishano nojori miiniuria”.

⁸ Neyanu sequeya saniniuurijia:

“Quiyanunaa, quiaacuajaari Pueyasojuhuanajaj. Quiaari Jiyaniijia. Quiaari naa quiniutianiya pueyaracaanutej. Quiaari cumaacaracajuhua, maninia quia jitianura puetunu pueyajanaa. ⁹ Quiaari maninia miiniu porocua. Quiaari sesa miiniu soojea saniniuujia. Cunora, Pueyasonaa, janiyari quia jiyatequiaari Jiyaniijajanaa quia quiniuriani, quia Jiyaniijia cua quiniucua. Janiyari quia jiyatequiaarijuhua socua shuquiriaatia quijia quia quiniuria puetunu quia cojiniaajinjijianaa”.

¹⁰ Pueyasoori naa sequequiaari Neyanujuhua:

“Jiyaniijianaa, quiaacuajaari coteenujanaa casaa shipinijia. Quiaari jiya shipiniquiaari, puetunu jiya cajiniocua niquishano casaajanaano. ¹¹ Puetunu quia shipinishanojuanaari shaajeriquianohua. Quiajaniya saniniuujia, quiaari pueyaracaanu quiriquiano cutara. Puetunu quia shipinishano casaajanaari tariucuashiriquiano juhua toqueja. ¹² Naa na tariucuashishacaritij, quiaari juhua toque mocua na jiu-niocoriguiano, quia jatasocoriguiano. Quiaari naa miiniutianiyaquij taa pueyano jocuaquiaacuaa na toque mocuacuaani, quiariqui toque na cushiniuria saniniuujia. Quiajaniya saniniuujia, majaari quia jatanu quiniutianiya tamaatiara. Quia quiniuuri maja puequeriquiano”.

¹³ Pueyasoori Neyanu sequequiaarihuuarihuaj:

“Miji, cua miaquetajara quia cajishii, janiya jaara quia paraa shocojotare puetunujuanaa-jaatijia, maja quenaaja niquiriyatu curenura na miananajonura quiajaniya”.

Majaari naa Pueyaso sequenu quiquiaari quenaaja niquiriyatu na seyajinijinio.

¹⁴ Puetunu nojorijianaacuajaari Pueyasora poonijionaa. Pueyasoori nojori jiyaramiquiquiaa Jesuucua tiuriquiano pueya nojori cojuanura.

2

Maja cumaati Jesucristo tojyashijacara pa quiniu

¹ Naaratej, Jesucristojiniji pa tojishano tojjiaca pa quiriqia socua, paa mariqui Pueyasoo cuajj rupatereeri. ² Tariucuacaanu, Pueyaso seya caminiujuushano Pueyaso rootasano pueyarani, cuno rootasanoori seetanujuanaa pueya tojishocoriqiano cutara. Cuno rootasano ruuretajaca, na miyashijiacajuhua, nojoriiri saniitiosaaquiaari. ³ Pueyaso seya caminiujuushano tojyashijiaa jaara saniitiosaaquiaaricuaa, ¿paateeri jiyaniyani Pueyaso pa jiyanoonutianiya juhuajaniya Neyanu rupaa tojyashijiaa pa quishacari? ¡Maja! Cuno rupaa nocua pa tiuushano pa jiyanooshaanurani, cunoori pa Jiyaniijajanaa pohuatasano. Pa Jiyaniijia nuhuaji, cuno pojori, canapuet pa Jiyaniijajanaa tojiquiaari pueyaracaanuni, nojoriiri saniniuujia cuno rupaa caminiujuquiaari pajaniyara. Canaa sequetuquiaari nojori tojishanoori seetanu rupajanaa. ⁴ Naajuhua, nojori pohuatasacari Jesucristojiniji, Pueyasoori nojori miitiquiaari jiyajeneta casaa jyanohua na cumaacata, maatia pueya niishiniuria nojori pohuatasanoori seetanujuanaa. Pueyari cunora jyanohua shiriqitiquiaari queraatia Pueyaso cumaacata miishano nojori niquishacari. Naajuhua, Pueyasoori Jesuucua tiuujiaca niqitioquiaa na Sohanu, tamaatia pa miiniuria na cumaacata, taa na paniyacuajani. Cunora, paa cumaa ti seetanujuanaa Pueyaso rupaa Jesucristojiniji tojtijajaca quiyani.

Jesucristo mijiria rasaanquiaari pa puerana na quiniuria

⁵ Cuno quiarinio jiyaranojiniji teyano pa sequeriquiaacuajani, Pueyasoori maja na seya na jiyatenu quiquiaari cuno quiarinio jiya jiyaniijanucuarano nojori quiniuria. ⁶ Naajaa, tariucuacaanu Pueyaso Rupajinia naa naajiotasaaquiaari pueyano nequesotasano Pueyaso:

“Pueyasonaa, ¿casaateeri pueyanoni, nocua quia niishirojonurani? ¿Casaara quia taraajeya pueyacuan? ⁷ Quiaacuajari na shipiniquiaari rupaquijiaa socua cumaacaju na quiniuria quia seyajiniji. Naajaa, quiaari na jiyatequiaari jyanijia na quiniuria, cumaacaraca quijia na quiniurijuhua. ⁸ Quiaari na sequequiaari puetunu quia shipinishano casaajanaa jyanijia na quiniuria”.

Naa Pueyaso sequesacari pueyanotej, puetunu na shipinishano casaajanaa jyanijia na quiniuria, naacuajitij, majaari quenaaja niquiriyatu casaa cureenu quiniutianiya na jittiasoo. Saniniuujia, paacuajari niishiyani, pueyanoori juhuanouaja maja seetanujuanaa cumaacaraca na quiniuria puetunu casaajanaa na tojtiniuria tama nojuajaaja. ⁹ ¿Jesuurijataj? Pueyano na quiniuria, na Que Pueyasoori rupaquijiaa na miiquiaari socua cumaacaju na quiniuria na seyajiniji. Naacuajitij, pueyano na quishacari, Pueyaso taraajenuucua puetunu pueyacuajanaa, Neyanuuri mosaaquiaari pocuara. Naa na cusonuucua pocuaratej, Pueyasoori na jiyatequiaari Jiyaniijajanaa na quiniuria, jyanohua cumaacaraca na quiniurijuhua.

¹⁰ Jamueyashijia Pueyaso quiniuucua, nojuajaari puetunu na muerasuranouanaa panitiquiaari na cojiniaa nojori quiniuria. Paniquiaariiri jatiqumata nata shuquiriaatia pa quiniuria, puetunu tama nerajaaja na shipinishano casaatjanaajuhua. Jeenucuasano pa quiniuria pa cojinuria Pueyaso, nojuajaari jyanohua maninia miiquiaari pocuara, Neyanu na miitishacari naquiya pa niti. Naacuajitij, Neyanuuri tojetaarucujanaa maninia quiquiaari Pueyaso muerasuranocuai Tacuna na quiniuria. ¹¹ Jesucristo jeequenuucua pajaniya sesa pa miishanojiniji, jatanishano pueya pa quiniuria, paari cunora seetanujuanaa Pueyaso muerasuni. Naacuajitij, Pueyasoori pa Que, taa pocuaji Tacuna Que na quiyacuani. Cunora, Jesucristoori maja na carriquinu na Que na sequenura pajaniyajiniji, “cua tapueyocucata”. ¹² Tariucuacaanu Pueyaso Rupajinia naa naajiotasano quiyacuajari na sequesano na Que:

“Cua Quena, janiyari cua tapueyocucata pohuatanutaniyani taamuecate quiajaniyani. Janiyari quia saquiriojosano pueya niqiuara quia jaaquequejotanutaniyani cua shuquiritasacari quiajaniya”.

¹³ Tamaqui, Jesu sequesanoori naa naajiotasano quiyajuhua:

“Janiyari cua Queecua tiuuji quiniutianiyani”.

Naacuajitij, mijiria na quishacari, Jesuuri na Que Pueyasoocua tiuquiaricuaa taa pa tiuquiaa nocuanijia. Socua naa naajiotasano quiyari tamaqui taa Jesu sequenutaniyani, jiyocuaanu na tiuquitasacari pajaniya na shuquiriniutia:

“Nio pojoriiri cua Que jiyatesano cua tapueyocucara, nojori tojtianuucua janiya”.

¹⁴ Cuaqueyaraca pa quiniuucua, Sesaacari cumaacaraca quiquiaari na shaajanura pajaniya, Pueyaso tojtiaashijiaa pa quiniuucua. Naaratej, Jesuuri cuaqueyaraca na quiniuria jataquiaarijuhuaj, taa pajaniyacuani. Naacuajitij, nojuajaari na naata mosaanu quiquiaari pa niti. Naacuajitij, nojuajaari Sesaaca jaariuutiaquiaari pajaniya. ¹⁵ Naacuajitij, nojuajaari juhuajaniya quijiacara jiyatequiaari pajaniya, nocua pa tiuuniuucua. Paari niishiyacuajani, pa cusosacari, paari pa Jiyaniijata quiniuria quianutaniyani.

Cunora, majaari tari pa puerenu pa cusonura. Nocua tiuyashijiaca pueyari seetanujuanaa cusonu puerejaca cutara. ¹⁶ Seetanujuanaa, majaari Jesucristo niniu quiquiaari Pueyaso seya na naacunura. Niquiaari cutaraari pueyacuaji na tacunura, noo pojoriicua, nocua tiuujacate taa supuetana Abraham quiquiaari Pueyasocua tiuujacuaani. ¹⁷ Maninia pa naacuna na quiniuria, Jesucristoori puetunu naquiya miiniujuanaa rejeretaquiaari mariyata taa narta pueya miishaquiaacuaani. Naacuajitij, nojuajaari pocua taraajeja, pocuaji na tacunura Pueyaso. Taraatia pa miiniu niishijia na quiniucua, pa naata nocua tiuuniu pueyaracaanu na Que Pueyaso na jyanootiniuria pajaniya, sesa pa miishanojiniji. Na cusonuucua, naacuajiti Pueyasoori na naata pa jyanooniu puetunu sesa pa miishanojinijianaa. ¹⁸ Mijiria na quishacari, nojuajaari pueyaracaanu taraatia miishaquiaari. Nojuajaari jyanohua saniniujuushaquiaari sesa na miiniuria juucujuhua. Naacuajitij, nojuacuajaari jyanohua niishijia na cumaquiniuria pajaniya, paa jaara sesa miiniuria saniniujuushaariquiani, paa jaara taraatia miishaariquajuhua.

3

Jesucristo cutaraari Jiyaniijijanaa Moisésjiniji

¹ Cuarta Pueyaso pueyanaa, niaacuajaari Pueyaso saquiriojosano tama na pueyajaaja nia quiniuria. Nojuajaari Neyanu Jesu jiyaroquiaari na rupaa na niishitiniuria pajaniya, Pueyaso pueyara pa jatanishaanura. Neyanuuri na jyanootijia pajaniya, nocua pa tiushacari. Cunora, jacaria pa niishirojore socua Jesucristojiniji. ² Mijiria na quishacari, Jesuuri na Jiyarona tojjijia quiquiaari pueyaracaanu, taa Moisés quiquiaari Pueyaso tojjijiacuaani, Israel pueya jittiana na quishacari. ³ Naajaa, Jesucristo cutaraari Jiyaniijijanaa Moisésjiniji. Moisésri saaja narta Pueyaso pueyajinijinio pueyano quiquiaari. Saniniuuja, Jesucristoori puetunu Pueyaso pueyajanaa shipinijia cutara. Naaratej, Jesucristo cuara tojishaaria socua cutara. ⁴ Puetunu pueyapuejanaari supuetanaaraca. Naajaa, Pueyasajuanaari nojori shipinijia seetanujuanaa. ⁵ Naacuajitij, Moisésri pueyaracaanu Pueyaso sequesano caminiujuquiaari Pueyaso saquiriojosano narta Pueyaso pueyara, maninia Pueyaso seru na quiniucua. ⁶ Saniniuuja, Jesucristoori Pueyaso Niyanujuanaa cutara. Nojuajaari Pueyaso saquiriojosano pueya Jiyaniijijanaa. Nojuajaari nojori jittiaa saa maninijaa, taa na Que paniyacuajani. Naaratej, majaari pa cartenu Jesucristo rupaa. Paa jaara Jesucristocua tiuquuaani, naajuhua, paa jaara shuquiriaatia na sashiquiaa na rionura pajaniyani, naacuajitij, paari niishiyani paari seetanujuanaa Pueyaso muerasuni.

Pueyasoori na pueya samaraataja

⁷ Pueyaso pueya pa quishacari, Pueyaso Sohanu sequesano pa tojiri, maja pa rupatenura Pueyaso Rupaacuaji. Na sequesanoori naa naajiotasano quiaa tariucuacaanu Pueyaso Rupaajinia pajaniyarajuhua:

“Pueyanaa, niaa jaara quiarjia tojiriquia Pueyaso sequesano nijaniya, majaari na sequesano ruuretajaca nia quiniu. ⁸ Majaari naa nia quiniu taa nia supuetanaa quiquiaaricuaani, cariquia jiyajinia nojori camarucuneejotasacari pueyaracaanu. Nojoriiri Pueyaso juaatijiojuaca quiquiaari, pueyaracaanu na tojiyashijiaa nojori quishacari. ⁹ Nojoricuajaari pueyaracaanu cua cumaacata cua miijosano niquitiquiaari. Cuarenta marijaari shocojoquiaari, pueyaracaanu jiyajeneta casaa cua miijosacari cua cumaacata, maninia cua jittiasacari nojori. Naajaa, nia supuetanaari cua juaatijioquiaari, pueyaracaanu nojori taacanusacari cucuaji. ¹⁰ Janiyari cunora seetanujuanaa juaaquiaari puetunu cuno pojoritijanaani. Naaratej, janiyari sequequiaarini: ‘Nojoriiri juhua cucuaji tashuquioono rucoojia tamajaaja. Nojoriiri cua niishitiojosano ruuretaquiaa saaja’. ¹¹ Janiyari cunora jyanohua cua juaaniutia naa sequequiaarini: ‘Majaari nojori rupenu quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quiijaca nojori quiniuria cuata’ ”.

¹² Naarate cuarta Pueyaso pueyanaa, tama nia cuaqueyajaaja nia cojuare jyanohua, niaa mariqui Pueyaso Rupaacua tiuyashijiacara quirohuari, Pueyasocuaaji nia rupatenura puetunujuanaa. Pa Pueyasocuaajaari quijijuhuanajaj. Nojuajaari na tojiyashijiacaa sanitiojua. ¹³ Cunora, seetanujuanaa Pueyaso Rupaa tojtijajaca nia quiniuria, puetunu juucajanaa nia shiniujutiooriquia pueyaracaanu. Naa nia miiriquia nio pa quishacari Pueyaso jyanooniu puequeyaquishacarijaa taa na Rupaa sequeyacuajani. Naa nia shiniujutiooriquiatej nia jittiyaquiniucuaaji sesa miiniuria. Saniniuuja, niaa jaara sesa miijiacaa quiriquia, tama sesa nia miinujiaarjia nia sapojonutaniya Pueyaso tojiyashijiacara nia jatanuhua. ¹⁴ Jesucristocua pa tiuuniucua, paari na cojiniaara jiyatesanoni. Naacuajitij, puetunu na jittiasanojuanaari puera quiriqianojuhua, paa

jaara nocua tiuquuaa pueyaracaanuni, taa shushajanaa seetanujuanaa nocua tiujujaca pa quiriquiaacuajani.

¹⁵ Cunora, naa naajiotasano quiyari tariucuacaanu Pueyaso Rupaajinia: “Pueyanaa, niaa jaara quiarijia tojiriquia Pueyaso sequesano niajaniya, majaari na sequesano rejetejaca nia quiniu, taa nia supuetanaa quiquiaaricuaani. Nojoriiri Pueyaso juaatijiojuaca quiquiaari, pueyaracaanu na tojitiaashijaca nojori quishacari”.

¹⁶ ¿Canapueteeri cuno pojorini, Pueyaso tojitiaashijiacani? ¿Secaja pueyatee? Maja. Puetunu noo pojoricuajaari Egipto jiyajiniji Moisés mashiquishano pueyatej. Nojorijianaacuajaari Pueyaso tojiqiaari pocuaano. Naajaa, nojoriiri saaja na ruuretajaca quiquiaari. ¹⁷ Nia niishiritioj, ¿canapuete cuno pojorini, Pueyaso juaatijiojuaarini, pueyaracaanu nojori camarucuneejotasacari cariiquia jiyajiniani? Noo pojoricuajani sesa miijiacatej. Nojoriiri cunora cusonuquuaari nojori quiojosacari nucuaco cariiquia jiyaco. Na cusonuusaquijia jamojosaaquiaariiri. ¹⁸ Nia niishirijihuaaj, ¿canapue naa Pueyaso sequequiaari seetanujuanaa na juaaniutiani: “Majaari nia tiuquitianu quiniutianiya niaarano cua niqitionu panishano jiyajinia, tii juhuajaniya shuquiriaatia nia quiniuria cuata”? Puetunu Pueyaso tojitiaashijiacajanaacuajaari naa sequesaaquiaritij. ¹⁹ Naacuajitij, paacuajaari quiarijia maatia niishiyani, Pueyasocua tiuyashijaca nojori quiniucua, majaari nojori tiuquitianu quiquiaari Pueyaso niqitionu panishano jiyajinia.

4

¹ Pueyasocuaajaari pa masuyajaa panaatia pa quiniuria nata. Cunora, jiyanohua pa cojuare tama pa cuaqueyajaaja Pueyaso sequesanoocua pa tiuuniuria, tamonu pajaniyajinijinio mariqui jiyanoyaquishaareeri. Na sequesanoocua tiuyashijiacari maja na rupenu quiniutianiya Pueyaso, shuquiriaatia na quiniuria Pueyasota. ² Pueyaso rupaacuajaari tari pa niqiara pohuatasaaquiarijihuaaj, nocua pa tiuuniuria, taa pa supuetanaa niqiara na pohuatasaaquiaricuaani. Nojoriiri Pueyaso rupaa tojiqiaari najuhuanaj. Majaari nocua na tiuutiuni quiquiaari. ³ Cunora, Pueyasoori pa supuetanaajiniji naa sequequiaari:

“Cua sequesanoocua nojori tiuyaquiniucua, janiyari cunora seetanujuanaa naa sequequiaari cua juaaniutiani: ‘Majaari nojori tiuquitianu quiniutianiya cua niqitionu panishano jiyajinia, cuata nojori quiniuria shuquiriaatia’”.

Pajaniya saniniuujia, Jesuucua tiujujaca pa quiniucua, paa cutaraari panaatia quijiacara jatanishanoni, pueyaracaanu Pueyaso rupuejaca pa quiniuria. Pueyasoori naajuhuaaj: jiya shipininiu na tucuatanu nuhuaji, nojuajaari panaatia quiya. ⁴ Cunora, tamaqui tariucuacaanu Pueyaso Rupaajinia, naa naajiotasaaquiaariiri:

“Seis juucajinia Pueyaso tucuatasacari puetunu na poonijiosanojuanaa, na nuhuaji nojuajaari séptimo juucajinia samaatequiaari”.

⁵ Pueyaso sequesanoori tariucuacaanu na Rupaajinia naa pacutejosaaquiaari naajiotanu: “Majaari cua tojitiaashijaca rupenu quiniutianiya janiya, panaatia nojori quiniuria cuata”.

⁶ Naa sequesanojinijitij, maatia niishishiyari Pueyasoori pueya masuyajaa, nojori rupenura nojuaja, panaatia nojori quiniuria nata. Noo pojori, coteenujuanaa Pueyaso Rupaa pohuatasaaquiaritij, nojoriiri maja panaatia quijiacara na jatanishaanu quiquiaari, Pueyaso tojitiaashijaca nojori quiniucua. ⁷ Naa Pueyaso panitianaucua pueya, shuquiriaatia nojori quiniuria natajuhuaj, nojuajaari quiarijia masuyajaa pueya. Cunora, jiyanohua Moisés nuhuaji, Pueyasoori supuetana David naajiotaniquiaari pajaniyara saniniuujia. Naa sequeyari:

“Niaa jaara quiarijia tojiri Pueyaso rupaa, Pueyaso sequesano niaarano, majaari na ruuretanu”.

⁸ Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niqitionu panishano jiyajinia. Naajaa, nojori tiuquitiasacari cuno jiyajinia, majaari seetanujuanaa panaatia quijiacara nojori jatanishaanu quiquiaari. Cunoori quiquiaari Pueyasocua tiuyashijaca nojori quiniucuaquihuaj, taa nojori supuetanaa quiquiaaricuaani. Naacuajitij, cuno jiyajinia Josué tiuquitiasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiriquia, ¿Pueyasotucua casaara quiarijia pa masuriquiaja Jesuucua pa tiuuniuriani, seetanujuanaa panaatia quijiacara pa quiniuria natani?

⁹ Naacuajitij, paacuajaari niishiyani, Pueyaso pueyaranoori panaatia quijiacara jatanishaanutaniya, shuquiriaatia pa quiniuria Pueyasota pueyaracaanu. ¹⁰ Naacuajitij, cante Jesucristoocua tiuujiani, nojuajaari panaatia quijiacara jatanishaanutaniya. Majaari socua na tacaaniu quiniutianiya taa tama na cuaqueyajaaja na jiyanootiutianiya Pueyasoni.

Naacuajitij, nojuajaari juhuajaniya quijia quiniutianiya, tarijia najuhuaana na poonijiosanojiniji, naatej, taa Pueyasojuanaa samaatequiaari na poonijionu nuhuajicuaani. ¹¹ Naaratej, panaatia pa quiniuria Pueyasota, seetanujuanaa na Rupaa tojjiiacara pa quiriquia quiarijia. Naa na rupaa tojjiiaca pa quiri paa mariqui saniitiosaaereeri taa pa supuetanaa Israel pueya saniitiosaaquiaaricuaani, Pueyaso sequesano tojjiyashijiaa nojori quiniuucua.

¹² Pueyaso Rupaari samiitianijia, cumaacaracajaariuhua pueya jiuujiajinia na poonijionura. Pueyaso Rupaari jiyanoehua socua shamatucujaja nijiniaquetucujaja mueruujiniji. Nijiniaquetucujaja mueruuri saaja na naata pa cuaqueya jiyatanu. Pueyaso Rupaa cutaraari pa sohuanu tohuariquijia, pa niishitijia tohuariquijianio. Na naata cuhatatanu poojiajinia jiyasohuaja pa niishiriojosano casaa, poojiajinia pa niishishoo casaanio. Naacuajitij, Pueyaso Rupaari poojiajinia sesa casaa pa niishiriojosano nequesoreeja, jiyasohuaja pa miiniu panishano poojiajinia pa niishiriojosanonio. ¹³ Puetunu Pueyaso shipinshano casaajanaani, majaari na cureenu quiniutianiya na nequesoreyaquishoo. Majaari quenaaja niquiriyatu jamaaniu quiniutianiya nocuaji, nequesoresoo na cureenura. Nojuacuajaari maatia niishiya puetunu pa miishanojuanaa, puetunu pa niishiriojosanojuanaanio.

Jesujuanaari Pueyaso jyanootijia pueya

¹⁴ Pueyaso Niyanu Jesuni, nojuajaari na Que jyanootijia pajaniya. Nojuajaari jiya cajiniocua tohuariquiquiaari na Queecua na tiuquiniuria. Nojuajaari quiarijia tii pocuara secojija na Que. Naacuajitij, Jesucristoocua tiuujiaa pa quiniuucua, maja cumaati pa pishiniu nocuaji. Paacuajaari na muerasuniyojuani. ¹⁵ Jesu, Pueyaso pa jyanootijiani, nojuacuajaari pocua taraajenu niishijia paa jaara saniniuujushaariquia sesa pa miinuriani. Nojuacuajaari naa saniniuujushaariaarijuhua sesa na miiniuria juucua, naate taa pa saniniuujushaariaacuaani. Maja cutaraari sesa na miiniu quiquiaari quenaaja. ¹⁶ Cunora, pa jyanoojia Pueyaso pa rupueriquia pa puereyaquiniutia. Nojuacuajaari pa tojjiquiaa pa secojosacari nojuaja, na jyanooniuria pajaniya sesa pa miishanojiniji. Ritia pa cumaquiquiaajaariuhua, pa rejeretanura paa jaara sesa miiniuria saniniuujushaariquiani.

5

¹ Puetunu pueyacuara secojonaa jyaniiijajanaari pueyaracaanu narta pueyajiniinio saquiriojosano pueyano quiquiaa, taa Pueyaso niishitiquiaari supuetana Moisescujajani. Nojuajaari jiyatesaaquiaa pueyacuaji na tacunura Pueyaso. Naacuajitij, nojuajaari nareja pueya niqutiojosano Pueyasorano masejojua. Naajuhua, pueya jaara sesa miiri, pueyacuara secojonaari pueya seya nanaca shootequiaa, Pueyaso jyanooniuria nojori, sesa nojori miishanojiniji. ² Pueyacuara secojona quiniuucua pueyanohuaj, nojuajaari sesa mijijajuhua. Naacuajitij, nojuajaari na naata narta pueyacuara taraajenu, sesa nojori miishacari, nojori niishiyaquishacari maninia miiniuujuhua. ³ Naacuajitij, nojuajaari tama nocuarajaaja seya nanaca shootequiaa sesa na miiniuucua, taa na miiquiaacuaa narta pueyacuariani, sesa nojori miishacari. ⁴ Niaacuajaari niishiya, majaari quenaaja tamonu pueyano na naata tama na cuaqueyajaaja jiyatenu pueyacuara secojona na quiniuria. Pueyasojuanaacuajaari tamajaaja saquiriojojua na panishano pueyano, cuno pueyano quiniuria pueyacuara secojona. Pueyasocuaajaari naa saquiriojoquiaaricuaa Moises tarajanu Aaron, pueyacuara secojonaa jyaniiijia na quiniuria. ⁵ Naajuhua, Jesucristoori maja tama na cuaqueyajaaja na jiyatenu quiquiaari pueyacuara secojona na quiniuria, Pueyaso na jyanootiniuria pajaniya. Tama Pueyasojuaarjia na jiyatequiaari pueyacuara secojona na quiniuria. Nojuajanaacuajaari naa sequequiaari Jesu:

“Quiaari quianu. Janiyari pueyanora quia muerateree jiyacuanii cua saquiriojosano pueya jyaniiijia quia quiniuria”.

⁶ Pueyaso sequesanoori tamaqui tariucuaaanu na Rupaajinia naa naajiotasano quiyajuhua:

“Pueyaracaanu rishijia quia quiniuucua, quiaari pueyaracaanu pueyacuara secojoriquiano cutara, taa Melquisedeccuaani”.

⁷ Naa pueyano na quishacari mijiriatej, Jesucristoori jyanohua saniniuujushaariaari. Naquiya na miyaquishaanuucujaji juucua, nojuajaari na Que Pueyaso secojoquiaari jyanohua na nujuquenuta. Jyanohua martequiaariiri na Que na secojosacari, maja na mosaanura. Nojuajaari niishiquiaari na Que na naata nocua taraajenu, maja na mosaanura. Naajaa, na Que tojjia na quiniuucua, na Que sequequiaariiri: “Naajaa, quia miiri quia panishano cua Quena, taa quia panitiaquiaari miiniu janiyacujajani”. Na Queeri na tojjiquiaari. ⁸ Jesucristoori seetanujuanaa Pueyaso Niyanu quiquiaari

mijiria na quishacarijuhuaj. Naajaa, na niishishacari nojuajaari jiyanoohua naquiya miishaanutaniya nojuaja jaara na Que tojiri, naajaa, nojuajaari saaja na tojiquiaari. ⁹ Naacuajitij, tojetaarucujanaa maninia miijia na quiniuucua, nojuajaari pueyacuaji Tacunara quiquiaari, puetunu na tojtiajacajanaa na jiyatenura pueyaracaanu rishijiacara. ¹⁰ Cunora, na Que Pueyasoori na jiyatequiaari pueyacuara secojona na quiniuria pueyaracaanu, juhua Melquisedec.

Jiyanoohua puereetaari Jesu tojinu tarinitianu

¹¹ Janiyari queraatia socua nia niishitiojonu paniya Jesucristojinijini, nia niishiniuria nojuajaari seetanujuanaa juhua Melquisedec. Cunoori puera jiyajeneta, maatia cua niishitiojonura niajaniya, juhua niishiyashijiacara nia quiniuuquiohua. Niaacuajaari tari niyajetarucuaa tariucuaaanu nia tojishano. ¹² Tariucuaaanujiniji Pueyaso rupaa tojijiaa nia quiniuucua, ¿taateni? Naa mariqui na niishitiojonuujuaca quiquiaari tari. Saniniuujia, niaari quiarijia paniya socua nia niishitiojosaanuhuaa maatia niishishaatia casaa Pueyasojiniji. Naaari juhua naatujooriria quiriohuacuaa, juhua shipiyataaquishoojua. Naacuajitij, majaari nia naata jiyajeneta niishitiojosano casaa niishiniu. ¹³ Naa maatia niishitiojosano niishijiaa nia quishacari saajatej, niaari juhua conaaja quiyajaa, saaja quiitiaacaacua naataja. Majaari Jesucristo niishitiojosano tojtiajaca nia quiniu, maninia miijiaa nia quiniuria. ¹⁴ Juhua tariucua mashiquioriria nia jiyateriquiani. Mashiquiori cutaraari puetunu casaajanaa miaquenuujuaca. Naajuhuj, puetunu Jesucristo niishitiojosanojuanaa niishijiaa nia quiquiaari. Naa jaara na niishitiojosano tojijiaa quiquiaari, saaja maninia miijiaa nia quiniuria, niaari maninia niishiniutianiya teyano casaate maniniani, teyano casaate sesa saniniunijia.

6

¹ Naacuajitij, majaari juhua naatujoori nia quiniu pueyaracaanu. Seetanujuanaa socua Pueyaso rupaa tojtiajaca nia quiquiaari, juhua tariucua cumantumaca mashaja nia quiniuria, cumueeca. Niaacuajaari tari coteenujanaa Jesucristojiniji niishitiojosano niishijiaa. ¿Niaatucua casaara socua niishitiojosaarohua nioojia nia tacatonurani, maja nia tiuuniuria maninia nia miishanoocua najuhuananij? Niaacuajaari tari niishiya, majaari nia naata maninia nia miishanota tama nia cuaqueyajaaja jiyanootiniu Pueyaso. Cunora, niaari Jesucristoocua tiuujiacara quiquiaari tari, Pueyaso jiyanooniuria niajaniya. ² Naajuhuj, niaacuajaari tari niishitiojosaaquiiaari moojinia nia tiuquinishaanura Pueyaso pueya nia quiniuucua. Naaari niishitiojosaaquiiaarijuhua Pueyaso pueyacu nia nianura nia juaashiquia nojoriicuaa nia secojosacari, Pueyaso cumaquiniuria nojori. Naaari niishiyajuhuj, macunucuaari samiitiaconutanuhua. Nojorijinijinio saniniuujia, Pueyaso tojijashijiaacari pueyaracaanu saniitiosocoriquiano jiyatesaanutaniya. ³ Quiarijiani, majaari socua nia niishitiojonu quiniutianiya niajaniya nio shusha cua sequesanojiniji niajaniyani. Pueyaso cumaquishacari janiya, janiyari socua jiyajeneta casaa Jesucristojiniji niishitiojonutaniya niajaniyani.

⁴⁻⁵ Pueyano jaara Pueyaso Rupaa tojijashijiaa quiriohua, najuhuaanari na niishitiojonu pacutenuhua, nojuaja jaara tari Pueyaso Sohanu cuhuatasano jiuujiaraca quiquiaari. Najuhuaanari nojuaja jaara tari jiyanooshano quiquiaari, nojuaja jaara tari Pueyaso Sohanu cumaaca niishijia quiquiaari. Najuhuanajaariuhua nojuaja jaara tari Pueyaso Rupaa shuquiritiaja quiquiaari, nojuaja jaara tari Pueyaso cumaacaraca quiijia quiquiaarijuhuj. ⁶ Jiyano pueyanotej, majaari tari na naata sesa miijia na quiniuucua taraajetesaanuhua, Jesucristoocua na tiuuniuhuaa seetanujuanaa. Nojuajaari juhua Pueyaso Nyanu teetenu pacuteya niyacutesanojinia, naa na ruuretajaca na quiniuucua. Naa Jesucristo tacartaja na quiniuucuatej, tamasaacari Jesu rerequetequiaajuhuj. ⁷⁻⁸ Naacuajitij, cuno pueyanoori juhua noo cuhuariquia tee cuniqui sesa jiyasocua maniniucuaa moritianucujani, riyocuaacano. Pueyasoori najuhuaana maru niyotequiaa. Majaari cuno cuhuariquiajinia nataacuaca muetunu. Jiyano cuhuariquiatej, na camaru cuara catijataaranoj. Pueyasoori naa saniitionutaniya nocuaji ruparequeno pueyajuuhuj. Saniniuujia, Jesucristo rupaa tojijiacani, nojoriiru juhua maninia cuhuariquia. Pueyasoori maru niyotequiaa nocua, maninia na muetutenura tii natoosano casaa. Naacuajitij, na camaruuri queraatia miajajauraca quiniutianiya. Naajuhuj, Pueyasoori na tojtianu tarinitiaashijiaa shuquiritiniutianiya pueyaracaanura.

Pa niishishacari Pueyasoori maninia pa miiniutianiya, paari cunora na tojinu tarinitiaaquiiaani

⁹ Miriqui cua pohuatasano sesa cuhuariquiajinijini, cunoori maja niajaniya cua panishano pueyanaa. Majaari cua taacanunu niajanijajiniji. Niaacuajaari pa Jiyaniijia

tojitiajaca quiquiaa. ¹⁰ Pueyasocuaajaari jiyanoehua maninia. Nojuajaari maja na niyaje-tanu quiniutianiya maninia nia miishano niarta Pueyaso pueya, Pueyaso panijia nia quiniuucua, taa quiarijia nia miyajaacujani. ¹¹ Naatej, taa shitimia niarta Pueyaso pueya naacuijacatucua niajaniani, naajuhuj, janiyari nia panitiaani pa Jiyaniijia nia sashini-uria nia timiniutiajuhuaj, nojuaja jaara pa rijionuucua tiuquiriohuajaatijia. Nia niishi-tiriquiajaanihuaj, Pueyasoori jiyanoehua maninia miiniutianiya pajaniya. ¹² Majaari nia macuhuajeconu juhua taajecori nia quiniuria pa Jiyaniijia. Saniya nia quiriquia cutara juhua tariucuaaanu parta Pueyaso pueya. Nojoriiri shamaatia Pueyasocua tiuujia quiquiaari pueyaracaanu. Naquia miiniu rejeretajacaari quiquiaarijuhuaj. Naaratej, Pueyasocuaajaari tari maninia miiquiaa nojori, taa seetanujuanaa na sequequiaari na pueyarano na miiniuriacujani.

¹³ Pueyasoori seetanujuanaa saaquiano Abraham sequequiaari taa na miiniutianiya maninia nojuajani. Majaari na naata sequenu, tamonu cuara na saniitiooranog, nojuaja jaara miyaquiri na sequesano saaquiano Abraham. ¿Cantucuaa cumaacaraca Pueyaso na saniitionurani? Shaaqui. Nojuajanaacuaajaari Jiyaniijiajanaa. ¹⁴ Naaratej, Pueyasoori naa sequequiaari saaquiano Abraham:

“Janiyari seetanujuanaa maninia miiniutianiya quiajaniani. Janiyari quia juhua mue-tutenutianiya jiyanoehua queraatiarani”.

¹⁵ Naa Pueyaso sequenu nuhuaji saaquiano Abrahamtej, Abrahamri juhuajaniya sashiquiaari Pueyaso cuara na sequesano miiquiaariijaatijia. ¹⁶ Pueyanaa, niaacuaajaari niishiya taa pa miiquiaani, parta pueyano niishiniuria paari nojuaja pa sequesano miiniutianiya seetanujuanaani. Paari naa sequequiaani: “Seetanujuanaa quia sequeyanijia. Majaari cua sapojonu. Pueyaso cuara saniitioora janiya, janiya jaara cua sequesano miyaquirini”. Naa pa sequesacaritij, parta pueyanoori juhuajaniya pocua tiuujia. Majaari tari na taacanuunu pocuaji. ¹⁷ Naajuhuj, Pueyaso sequesacari taa seetanujuanaa na miiniutianiya na pueyarani, nojuajaari jiyanoehua panitiaquiaari pajaniya, na sequesanoocua pa tiuniuria seetanujuanaa. Majaari na paniniu quiquiaari pa taacanuunura quenaaja na sequesanojiniji. Cunora, nojuajaari naa sequequiaari: “Janiyacuajaari Pueyasoni. Majaari cua niishiniu sapojonu. Cua sequesanoori seetanujuanaa”. ¹⁸ Naacujitij, Pueyasoori maatia sequequiaari taa na miiniutianiya nocua tiuujiacarano pueyarani. Majaari saaja cuno na sequenu quiquiaari. Nojuajaari sequequiaarijuhuaj: “Cua sequesanoori seetanujuanaa”. Pueyaso sequesanoori maja na naata jatanishaanu. Naacujitij, pajaniya, nocua tiuujia pueyani, paari poojia cajitiquiaani maatia pa niishishacari, pocuaji Tacunaari puetunu na sequesanojuanaa miiniutianiya pajaniyara. Naacujitij, majaari pa taacanuunu quenaaja. ¹⁹ Naa Pueyaso sequesanoocua tiuujia pa quishacaritij, paari juhuajaniya naquia miiniu rejeretajaca quiquiaani. Sesaacaari maja na naata Pueyaso jaariutianu pajaniya. Naacujitij, paari juhua buqeni, pootioyaquishoo, niiquia casaacuaari na jaasatanuucua. Cuno niiquia casaari niquishoo, moo cariquimia pojiyari. Naajuhuj, nocua pa tiushanoni, nojuajaari jiyocuaaanu quia, niquishoojaariuhua na Que Pueyaso shuriucua na quiniuucua. ²⁰ Nojuajaari na Queecua quianu pa puetaquiaari. Nojuajaari ti pueyaracaanu secojoquiaa na Que pocua, na Que jiyanooniuria pajaniya. Naacujitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiquiaaricuaani.

7

Jesuuri pueyacuara secojona, taa Melquisedec quiquiaaricuaani

¹ Cuno Melquisedecni, nojuajaari Salem tiaca jiyaniijia quijia. Nojuajaari Pueyasojua-naa secojona pueyacuara. Pa supuetana Abraham tacatesacariuhua na naminiu nuhuaji na paraa, tamasaca tiacajinijinio jiyaniijianucuaani, Melquisedecni nocua tohuataquiaari Salem tiacajiniji. Naa na sequequiaariiri: “Abrahamnaa, quiaari Pueyaso timitiasano. Pueyasoori quia miiniutianiya jiyanoehua maninia”. ² Jiyacaritij, Abrahamri na paraa casami nitiariquiohua na quiquojiniohuara. Naacujitij, nojuajaari puetunu cuno casamijinijiniojuanaa Pueyasora na riuriosano niqutioquiaari Melquisedec. Abrahamri naa miiquiaari na niishishacari Melquisedecni Pueyaso secojona pueyacuara quiquiaari. Pueyanaa, nio Melquisedecjiniji nia niishiri. Pueyano rupaajinia, na sesaari sequeya, “Saaja maninia miijia jiyaniijia”. Naajuhuj, na tiaca sesa Salemi, cunoori pueyano rupaajinia sequeya, “Juhujaniya quijia pueya tiaca”. Na sesaari naa quiquiaari na pueya jiuujia cajitijia na quiniuucua. ³ Majaari tojetaarucujanaa na niishishaanu, ¿queraca quiquiaariti, nucuaracajuhuj, supuetanaaracano? Majaari quenaaja na pahuatasaanu-juhua na rasaanujiniji, na shaajenujinijinio. Naacujitij, pajaniyara, Melquisedecni juhua

pueyaracaanu quijiajuhuanajaj. Majaari na niishishaanujuhuaaj, tamonute na niti jiyatesaquiiaari pueyacuara secojona na quiniuria. Maja. Naacuajitij, nojuajaari juhua Pueyaso Niyanu, pueyacuara secojona na quiniuria pueyaracaanura.

⁴ Pueyanaa nia niishiri, Melquisedecquiiri seetanujanaa tojishano pueyano quiquiaari socua pa supuetana Abrahamjiniji. Naaratej, pa supuetana Abrahamri nareja na niqitioquiaari na paraa na shocotasano casamijinjinio. Secaja niqitioquiaari taa Pueyaso rootaquiiaari pa supuetanaacuajani, nojori niqitiojonura nera. Tariucuacaanu, Pueyasoori pa supuetanaa niishitiojoquiaari nojori niqitiojonura secaja, puetunu nojori jiti-asano casaajinijijianaa. Naacuajitij, pueyano jaara diez casaa jitiare, cuaara Pueyasora niqitioora niqiriyatujua. ⁵ Pueyasocuaajaari supuetana Leví niqiuoacuajinjo supueno pueya jiyatequiaari narta Israel pueyacuara secojonaa nojori quiniuria. Nojoriiri jiyatesaquiiaari Pueyasorano pueya niqitiojosano masejojua nojori quiniurijuhuaaj. Naa Pueyaso sequesanoacuajani Moisés Rootasanojinia naajiotasaquiiaari. Abrahamcuajaari puetunu Israel niqiuoacuajanaa supuetana quiquiaari, maja saaja Leví supuetana. Naajaa, Leví niqiuoacuajinjo supueno pueyari Pueyasora narta Israel pueya niqitiojosano masejojua. ⁶ Melquisedecri pueyacuara secojona quiquiaarijuhuaaj. Maja cutaraari Leví niqiuoacuajinjo na supueno quiquiaari. Naajaa, seetanujanaa pueyacuara secojona na quiniucua, Abrahamri Pueyasorano na riuriotaca na niqitioquiaari. Abrahamri seetanujanaa Pueyaso timitiasano pueyano quiquiaari. Naaratej, Pueyasojanaacuajaari tari Abraham sequequiaari, nojuajaari maninia na miiniutianiya. Naajuhuaaj, Melquisedecri pa supuetana Abraham sequequiaari Pueyasoori jiyanohua maninia miiniutianiya nojuaja. ⁷ Paacuajaari niishiyani, Pueyaso jaara maninia miiniutianiya tamonu pueyano, na sequesano caminiujinjo pueyanoori socua tojishano pueyano maninia na miishocoriquiano pueyanojiniji. Naacuajitij, paari niishiyani Melquisedecri socua tojishano pueyano quiquiaari Abrahamjiniji. ⁸ Quarijiani, Pueyasorano pueya niqitiojosano masejojucani, puetunu nojorijianaari shaajecaja pueya. Saniniujia, tariucuacaanu Pueyaso Rupaajinia pa serojosacari Melquisedecjiniji, juhua saminiujiniji pohuatashiyari. ⁹⁻¹⁰ Nia niishirijuhuaaj, Leví niqiuoacuajinjo pueyacuajaari Pueyasorano pueya niqitiojosano masejojua, pueyacuara secojonaa nojori quiniucua. Cua tojiri pueyanaa, Melquisedec naacuneetosacari Abrahamta, Abrahamri jiyacari tari na cuaqueyajinia jitiariquiaa puetunu nocuajinjo supueriquiano pueyajanaa. Naacuajitij, Abraham niqitiosacari Pueyasorano na riuriotaca Melquisedec, pa naata sequenu Leví quiriquianojuanaari jiyacari Melquisedec niqitioquiaari, Abraham quiniucua na jiyasorano tari.

¹¹ Leviacuajinjo supueno pueyari pueyacuara secojonaa quiquiaari, nojori miiniuria taa Moisés Rootasanojinia sequequiaaricuajani. Naacuajitij, narta Israel pueya jaara sesa miiquiaari, nojoriiri sesa miijica seya puecooquiaari pueyaracaanu tama na camaruhacuaraajaaja, nojori na jiyanoootiniuria Pueyaso. Naa nojori miishano jaara pueya jiyateriquia tojetaarucujanaa sesa miyashijiacara, paa maara tamonu pocuara secojoriquiano paniyaquiriquiani. ¡Tamonu pocuara secojoriquiano cutaraari panishaaquiiaari! Juhua pueyaracaanu rishijia Melquisedec panishaaquiiaari cutaraari, maja juhua Aarón saniniujia, nocuajinjo supueno pueyano. Nojoriiri shaajecaja cutara. ¹² Aarón cuajaari narta pueyacuara secojonaa jiyaniijiaari jiyatesano quiquiaari, taa Moisés Rootasanojinia sequeyacuajani. Naacuajitij, tamonu pueyano jaara jiyatesaarecuaa pueyacuara secojona na quiniuria, tamonu rootasanoori panishijuhuaaj, Moisés Rootasano niti na quiniuria. ¹³ Tariucuacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutianiya pocuara secojoriquiano. Nojuacuajaari pa jiyaniijia Jesu. Nojuajaari maja Leví niqiuoacuajinjo supueno. Nojuajaari supuetana Israel niyanuacuajinjo cuaja, saniniujia tamonu neyanuacuajinjoaaruahuaaj, teyanooacuajinjo quenaaja niqiriyatuu pueyacuara secojona supueyaquiquiaaricuajani. ¹⁴ Maatia niishishiyacuajaari, pa jiyaniijiaari Judá niqiuoacuajinjo supueno quiquiaari. Judaari Leví tarajanucuaaja. Moisés pohuatasacari pueyacuara secojonaajinjiniji, majaari quenaaja Judá na jiyaniquini quiquiaari.

¹⁵ Quarijiani, quiarinjo pocuara Secojona quishacari juhua Melquisedec, paari maatia niishiyani Leví niqiuoacuajinjo supueno pueyacuara secojonaari sanitishaaquiiaari.

¹⁶ Nojoriiri pueyacuara secojonaa quiquiaari saaja Leví niqiuoacuajinjo supueno pueya nojori quiniucua. Jesucristo cutaraari pocuara secojonaari jiyatesaquiiaari pueyaracaanu rishijia na quiniucua. ¹⁷ Cunora, Pueyasoori naa sequequiaari nojuajiniji:

“Quiaari pueyacuara secojona quiniutianiya pueyaracaanura, juhua Melquisedec”.

¹⁸ Naacuajitij, puetunu Moisés rootasanojuanaa pueyacuara secojonaa pueya miishocoriquianoori tari jatasaquiiaari, najuhua na quiniucua. Cuno miishanoori cumaacaju quiquiaari pueya na jataniniuria. ¹⁹ Seetanujanaari, Moisés Rootasanoori

maja na naata quiquiaari saaja maninia miijiacara na jataniniuria na tojitiajaca. Quiarijia saniniuuja, paari Pueyaso rupaa Jesucristojiniiji jiitiaani. Nocua pa tiuushacari, Jesucristoori pueyaracaanu pa jiyanootiquiaa na Que, juhuajaniya pa rupuenura nojuaja.

²⁰ Na Que sequesacari Neyanu quiniuria pocuara secojona pueyaracaanura, nojuajaari naa sequequiaari seetanujuanaa. Naacuajitij, paari panaatia quiquiaani pa niishishacari Jesucristoori na Que shuriucua quiya, pueyaracaanu pocuara na secojonura na Que. Saniniuuja, majaari naa Pueyaso sequenu quiquiaari Leví niqiuohuacuajinio supueno pueya, seetanujuanaa pueyaracaanu pueyacuara secojonaa nojori quiniuria. ²¹ Saniniuuja, Neyanujiniiji na sequesanonni, cunoori seetanujuanaa. Majaari na sequesano jatanishaanu quiniutianiya. Naacuajitij, naa naajiotasano quiyari tariucuacaanu Pueyaso Rupaajinia:

“Jiyaniijia Pueyasoori seetanujuanaa sequeree na miishocoriquiano. Majaari na sequesano na jataniniu quiniutianiya. Neyanu sequereecuajaari: ‘Quiaari pueyacuara secoriquiano pueyaracaanu’ ”.

²² Naacuajitij, pueyaracaanu na Que shuriucua Jesu quiniuucua pocuara na secojonura, paari seetanujuanaa niishiyani paari Pueyaso pueyani, Neyanuucua pa tiuuniuucua. Naacuajitij, Pueyaso rupaa Jesujiniijiri socua jiyanohua maninia Moisés Rootasanojiniji. Cunoori pueyaracaanu rishijia Jesu quiniuucua. ²³ Saniniuuja, Leví niqiuohuacuajinio supuenoni, queraatia pueyacuara secojonaari quiquiaari pueyaracaanu rishiyashijia nojori quiniuucua. ²⁴ Jesu cutaraari shaajeyashijia. Naa pocuara secojona na quishacaritij, majaari quenaaja tamonu sanitiniu quiniutianiya nojuaja. ²⁵ Naacuajitij, nocua pa tiuushacari, nojuajaari pueyaracaanu pocuara secojoquiaa, tojetaarucujanaa maninia miijiacara na jatanishaanura, Pueyaso pa rupuenura. Majaari pocuara na Que na secojonu na tarinitianu quiniutianiya, shaajeyashijia na quiniuucua.

²⁶ Jesuuri namitia pocuara secojona na Que. Majaari tamonu quiniu juhua nojuaja. Nojuajaari tojetaarucujanaa maninia miijiajuhanajaj, juhua na Que Pueyaso. Majaari quenaaja sesa miiniu na niishiniu. Sesa miijiaa tajinia na quishacari mijiria, naajaa, majaari sesa na miiniu quiquiaari quenaaja. Saaja maninia miijia na quiniuucua, nojuajaari tojetaarucujanaa tamaatia quijia mijiria quiniaa pueyajiniiji. Naaratej, Pueyasoori jiyocuacaanu quijia na jiyatequiaari, Jiyaniijijanaa na quiniuria na shuriucua, tii na secojonura na Que pocuara. ²⁷ Leví niqiuohuacuajinio supueno pueyacuara secojonaa jiyaniijianucuaari pueyaracaanu tama sesa nojori miishanoocuarajaaja seya puecootujua coteenu, Pueyaso jiyanooniuria nojori. Naa nojori miiniu nuhuajitij, nojoriiri jiyacari narta Israel pueya seya puecooquiaari sesa cuno pojori miishanoocuaru saniniuuja. Maja cutaraari naa Jesu miiniu quiquiaari. Nojuaja jaara tama na cuaqueyajaaja tarinitiaquiaari pocuara na mosaanura juhua borregoniyojua sesa pa miishanoocuaru, cunoujanaari na cusonu quiquiaari. Majaari socua na caminiu quiniutianihua cusonu. Naa na cusonuucua pocuaratej, puetunu sesa miijiacajanaari na naata jiyanooshaanu puetunu sesa na miishanojinijijanaa. ²⁸ Moisés Rootasanojinia, Pueyasoori tii sequeyacuaja canapute pueyacuara secojonaa jiyaniijiaari jiyateshiyani. Puetunu cuno pueyacuara secojonaa jiyaniijianucujanaari sesa miijiaa quiquiaari, juhua puetunu pueyajuhaaj. Jiyanohua Moisés nuhuaji, Pueyasoori saniniuuja tama Neyanujaja jiyatequiaari pocuara secojonajanaa na quiniuria pueyaracaanu. Na Que tojijia na quiniuucua pueyaracaanu, naquiya miiniu rejeretaja na quiniuucujuhuaaj, naacuajitij, nojuajaari tojetaarucujanaa maninia, pocuara secojonara na jiyatesaanura.

8

Quiarinio Pueyaso Rupaacua pa tiuushacari, Jesuuri pa jiyanootiquiaa na Que

¹ Nio, janiya na pacutenutaniuhua sequenuni, cunoori socua panishano nia niishiniuria. Cua tojiri. Pueyaso Niyanu quiniuucua pocuara secojona, nojuajaari na Que miaquetajara cajiquiaari jiyocuacaanu. ² Nojuajaari tii na Que secojoquiaa pocuara Pueyaso Quishaquijanaa. Cunoori Pueyasojuanaa shipinishano quiqiuo, maja pueyano tiasano.

³ Puetunu pueyacuara secojonaajanaari jiyatesaquiaari nojori masejonura narta pueya poosano casaa, Pueyasora nojori niqitiojosano. Naajuhuaaj, nojoriiri seya puecoojuaca, Pueyaso nojori jiyanootiniuria. Naacuajitij, Jesucristo quiniuucua pueyacuara secojonajuhuaaj, nojuaja cuara casaa jiitiaara, Pueyaso na niqitiosocoriquianojuhuaaj. Cuno casaacuajaari tama na cuaqueyajaaja quiquiaari, pocuara na mosaanura, Pueyaso jiyanooniuria pajaniya. ⁴ Leví niqiuohuacuajinio supueno pueyacuara secojonaacuajaari pueya nitiasano nojoriicua masejoquiaajaa, Pueyasora nojori niqitiojosocoriquiano taa Moisés Rootasanojinia sequeyacuajani. Naacuajitij, Jesucristo jaara mijiria quiqiuaja, nojuaja maara pueyacuara secojona quiyaquiriqiaaj. Pueyacuara secojonaacuajaari

queraatia quiya. ⁵ Pueyacuara secojonaa jeecajosano casaa Pueyaso Secojojuua tijainia nojori jitiiasanoni, nojori miishanonio, puetunu cunojuanaari saaja juhua jiyocuacaanu casaa naaqui. Cunora, Moisés jaara tari shipiniriqiaa Pueyaso Secojojuara suhuorotu, puetunu na casamitiajanaanio, jiyacaritij, Pueyasoori naa Moisés sequenu pacutequiaari: “Moisésnaa, cua tojiri. Maninia quia miiri jacaria puetunujuanaa, naatej, taa cua niqiu-tiquianucuaaja quiajaniani, Sinaí tuhananuua quia quishacari”.

⁶ Pocuara Secojonajanaa miishanoori jyanohua maninia socua pueyacuara secojonaa Leví niqiuohuacuajinio supueno miiijosanojiniji. Pocuara Secojona cutaraari tama na cusionutajaaja pa jyanootiquiaari Pueyaso. Naacuajitij, Pueyaso rupaa Jesucristojinijiiri jyanohua socua maninia Moisés Rootasanojiniji.

⁷ Pueya jiuujia jaara na naata quiriquia seetanujuanaa sesa miyashijiacara jatanishano Moisés Rootasano tojjijaca nojori quiniucua, Pueyaso maara quiarinio rupaa niishi-tiyaquiquiaari pajaniya. ⁸ Saniniuujia, Pueyasoori niishi-quiaari Israel pueyari maja na naata quiquiaari puetunu Moisés Rootasanojuanaa tojinuu. Cunora, tariucuaacaanu pueyara Pueyaso sequesano caminiujunia sequesanoori naa naajiotasano quiya:

“Jiyaniijia Pueyasoori sequeya: ‘Tamacari, janiyari quiarinio rupaa niishitiniutianiya Israel jiyajinijinio pueyani, Judá jiyajinijinio pueyanio. Teyano pojoriti nocua tiuyani, nojoriiri seetanujuanaa cua pueya quiniutianiya. ⁹ Quiarinio cua ru-paari tamaatia quiniutianiya Moisés cua niishitiojosano rupaajiniji puetunu Is-rael pueyarajanaa. Jiyacaritij, janiyari nojori mashiquiquiaari Egipto jiyajinijini. Juhua nojori que, janiyari nojori jaatucunuuriquiaa juucuan nojori cua niqiu-tiosocoriquiano jiyajinara. Saniniuujia, nojoriiri Moisés cua rootasano nojoriria tojinuu paniaquiquiaari saaja. Janiyari cunora nojori cartequiaarini’. Jiyaniijia Pueyasoori naa sequeree. ¹⁰ Socua sequeyari: ‘Nio pa quishacari nuhuaji, janiyari naa miiniutianiya cua saquiriojosano pueyarani: janiyari coojia nianutianiya no-jori jiuujiajiniani. Naacuajitij, cua rootasanoori juhua naajiotasano quiniutianiya nojori niishitiajajinia, seetanujuanaa cua tojtiajaca nojori quiniuria. Naacuajitij, janiyari nojori Jiyaniijiajanaa quiniutianiani. Nojoriiri saniniuujia cua pueya quiniutianiyacujua. ¹¹ Jiyacaritij, pueyano jaara janiyajiniji pohuatanu paniri narta pueyano, na cojiniajuhuaj, tapueyocucanio, cunoori najuhuna quiniu-tianiya. Puetunu pueyapuejanaacuajaari tariucua cua niishijaca quiniutianiya; jiyaniijianucua, poonijiotasano pueyanio. ¹² Janiyari nojoriicua taraajeja quiniu-tianiani. Majaari cua saniitionu quiniutianiya nojori, sesa nojori miishanojiniji. Naa cua jiyanooshacari nojoritij, majaari socua cua saneejonu quiniutianiya sesa nojori miishano. Janiyari puetunujuanaa na niyajetanutianiani’”.

¹³ Naa Pueyaso sequesacaritij, taa nojuaja quiarinio na rupaa niishitiniutianiya pa-janiyani, nojuajaari tariucuaacaanu Moisés na rootasano jiyatequiaari tariucuaeneera. Naacuajitij, Moisés Rootasanoori quera shaajasaanutianiya puetunujuanaa.

9

Tariucuaacaanu Moisés suhuorotesano Pueyaso quiquiranoni, cunoori juhua jiyocua-caanu Pueyaso quiqiojuhuaj

¹ Tariucuaacaanu, Pueyasoori Moisés sequequiaari mijiria na quiquirano na suhuorotenura. Na niishitiojoquiaarijiaariuhua taa pueyacuara secojonaa poonijionutianiya cuno na quiqiojiniani. ² Pueyaso Secojojuua suhuorotuuri caapiqui sohuacaraca quiquiaari. Samari nujuatacojuaari coteenu sohuacajinia quiquiaari, miaquejania, tee Pueyaso tacoji pan niojosaaquiaari pueyaracaanucujani. Cuno sohuaca sesa quiquiaari “Pueyaso Shuriucua Quiquio”. ³ Cuno coteenu sohuaca puequeetujiniani, tii tunusano quiquiaariiri shiquiaruque toque. Cuno toque tamajiria quiquiaariiri Pueyaso quiqiojuanaa cutara. Naaratej, na sesa quiquiaari “Pueyaso Quishaquijianaa”. ⁴ Pueyaso Quishaqui tacoji nujuatajaari juhuacutu, orojiniji shipinishano. Cuniqii catejaari shanohua jaanutaja Pueyasora. Pueyaso Quishaquijianaa cutarani, tii nujuatajaari puereetuuca casaa, juhua caaja niqishano. Naananeecajiniji shipinishaquiaariiri. Puetunu na cuaqueyajanaari orota mishiquiosano quiquiaari. Na jiniacuma, casamiiri mii racatasano quiquiaari. Pataconiyojua orojiniji shipinishanoori tii cajitiaquiaari “maná”. Manaari quiquiaari Pueyaso tinishano casaa, Israel pueya miaquesocoriquiano cariquia jiyajinia nojori camarucuneejotasacari. Mii matariquiaaariuhua Aarón nataca catuutianohua, puetunu na jajautajanaa. Mii maturiquiaaariuhua sai neeca quejasano, nocua Pueyaso naajiotasano na rootasano, Moisés na niqutiojosano. ⁵ Cuno caaja tiootiu caco nujuatejosano quiquiaariiri caapiqui shipinishano casaa, nesuharaca, juhua Pueyaso seya niquishano. Nojori nesuhuari

coqueetesano quiquiaari. Teecojuuari, teje Pueyaso shacantuuca mueranacujuquiaari Moisésacuajani. Cuno caaja tiootiuri seya nanaca majiriutiasaquijjuhuaj, Pueyaso jiyanooniuria puetunu Israel pueyajanaa. Tariucuaja puetunu cuno casaajiniijianaa cua pohuatasano niajaniya.

⁶ Pueyaso Secojoja tia jaara tari naa maninia tiasano quiquiaari puetunu na casamitiajanaa, na nuhuaji, pueyacuara secोजनाari pueyaracaanu tiuquiijoquiaari Pueyaso Shuricuuaa quiquiojinia. Nojoriiri tii tiuquiijoquiaari nojori miiniuria taa Moisés Rootasanoinia sequeyacuajani. Maja cutaraari nojori tiuquitianu quiquiaari Pueyaso Quishaquijianaa sohuacamara. ⁷ Saaja nojori jiyaniijia cutaraari tii tiuquiquiaari saaja rupaquijia puetunu marijarajanaa. Na tiuquishacari Pueyaso Quishaqui, seya nanaca pataquiaariiri Pueyaso jiyanooniuria nojuaja, narta Israel pueyano, sesa nojori miishanojiniji. ⁸ Naa Pueyaso Quishaqui quiniucua mishiquionucua pueyacuajitij, Pueyaso Sohuanuuri pa niishitiya, pueyari juhuanajuaja maja na naata rupenu quiquiaari Pueyaso. ⁹ Naacuajitij, puetunu cunojuanaari quiquiaari juhua miriqui miishano, saniniuuja nio pa quishacari pa niishiniuria pocuara Secojonajanaa miishano pocuara. Puetunu pueyacuara secोजनाa catijiasano casaajanaari miriqui miishano quiquiaari saaja. Naajuhuj, pa supuetanaa niqutiojosano casaa Pueyaso jiyanooniuria nojorini, puetunu naa miishanojuanaari miriqui miishano quiquiaari. Naacuajitij, cunoori maja na naata cuno pueya jiuujia jeecanu seetanujanaa, juhujaniya nojori rupenura Pueyaso. ¹⁰ Naaratej, cuno tariucuacaanu rootasanoori saaja panishaaquiaari Pueyaso cuaara na sanitiquiaariijaatiija quiarinio rupaata. Cuno tariucuacaanu rootasanoori pueya niishitiquiaari teyano sumatuuteja miaqeshiyani, teyano mashacateja ratushiyani. Naajuhuj, nojoriiri niishitishaaquiaari taacari pueya jeequeya na cuaqueyani, nojori casaanio, juhua maninia jeequejosano nojori quiniuria Pueyaso niqiara. Puetunu naa pueya miishanojuanaari maja na naata pueya jiuujia jeecanu sesa nojori miishanojiniji.

¹¹ Quiari naataja saniniuuja, Jesucristoori pocuara Secojonajanaara jiyatesaaquiaari, Pueyasojiniji na masenura Pueyaso jiiitasano pajaniyarano. Cuno quiquio, tee na secjoquiaa na Que pocuaracuajani, cunoori seetanujanaa Pueyaso quiquio jiyocuacaanu, maja pueyano tiasano. ¹² Naa Cristo tiuquishacari na Que quiquiojinia Pueyaso na jyanootiniuria pajaniyatij, nojuajaari maja na tiuquitianu quiquiaari cabra nanaca, juunu niquiohuananacanio. Nojuaja cutaraari tama na nanacatajaaja Pueyaso jyanootiquiaari pajaniya. Nojuajaari maja pueyaracaanu na tiuquiiionu na Queecua, taa mijiria pueyacuara secोजनाa jyaniijianucua miiquiaaricuaani. Maja. Nojuajaari na Queecua tiuquiquiaari puetunujanaa. Naa pocuara na cusonuucuatej, na Quaeeri Neyanuucua tiuujiaa jyanooquiaa puetunujanaa. Naacuajitij, majaari Pueyaso shuricuajaji pa taanuusaanu quiniutianiya. ¹³ Pueyasoori Moisés niishitiquiaari, pueyano jaara macu masaqui tiuquimia, jaara na quiarejuhuaj, jiyacaritij, nojuajaari juhua curuutuuca Pueyasora. Naacuajitij, cuno pueyanoori maja na naata narta pueya rupenu. Majaari na naata Pueyaso Secojoja tiajinia tiuquiniujjuhuaj. Naajaa, nojuajaari na naata jeequesano quiniuhua, seru nanaca jaara nocua majiriutiasaaquiaari. Cabra nanaca, juunu nanaca, niyacoo juunu catijiasano juacani, puetunu cunojuanaari maninia quiquiaari pueyara, juhua jeequesano nojori quiniuhuara Pueyasora. ¹⁴ Naa pueya cuaqueya quiniucua juhua jeequesano saaja seya nanacatacuatej, Cristo nanaca cutaraari seetanujanaa cumaacarua pueya jiuujia na jeequenura seetanujanaa, puetunu sesa casaajiniijianaa. Naatej, taa pueyacuara secोजनाa jyaniijianucua tiuquitiquiaari seru nanaca Pueyaso Quishaquicuaani, pueya jyanooshaanura, Jesucristoori naa miiquiaarijuhuaj. Pueyaracaanu quiija na quiniucua, Jesucristojuanaari tama na nanacajaaja tiuquitiquiaari Pueyasoocua, pa jyanooshaanura puetunu sesa pa miishanojinijianaa. Nojuajaari tojetaarucujanaa sesa miyahshija quiquiaari. Naacuajitij, na nanacaari poojia cajitiquiaa, nocua pa tiuushacari. Majaari socua pa jyaniniu na naata tama pa cuaqueyajaaja jyanootiniu Pueyaso tama pa miishanotajaaja. Naacuajitij, quiaritia cutaraari pa naata pa Pueyasora poonijionu shitimia, seetanujanaa jyanooshano pa quishacari.

¹⁵ Jesucristo cusonuucua pocuara, nocua pa tiuushacari, nojuajaari pa jyanootiniara quiquiaari taa quiarinio Pueyaso rupaa sequeyacuajani. Naajuhuj, noo pojori, Pueyasooocua tiuujiaa mijiria Jesu niyacarijiani, sesa nojori miishanoori jyanooshaquiaari Jesu cusonuta quiari naatajuhuaj. Naacuajitij, puetunu Pueyaso saquiriojosano pueyapuejanaari na naata puetunu Pueyaso niqutiojonu panishanojuanaa masenu, taa na sequequiaari niqutionu seetanujanaacuajani, pueyaracaanu shuquiriaatia jatiqui pa quiniuria nata. ¹⁶ Pueyanaa, pa shaajeyaquishacarijia, paari pa miiniu panishano naajiotanu niishijiani. Paari naa mijiani pa casami serotasaanura maninia, teyano pueya pa panitiaa nojori jiiitanura pa casamicuajani pa shaajenu nuhuaji. Naacuajitij, paa jaara tari jamosaareni, pueyari maninia miiquiaa taa pa naajiotaquiaaricuaajani, saminio pa

quishacarijia. ¹⁷ Naacuaajtij, saminio pa quishacarijia, najuhuaanaari pa naajiotasano. Pa shaajesacari, jiyacari cutara pa casamiiri niqutiojosano. ¹⁸ Tariucuaacaanu naajuhuaaj, seya nanacaari shootesaaquiaari, Israel pueya niishiniuria Moisés Rootasanoori seetanujuanaa, nojori tojishocoriquiano. ¹⁹ Naa quiquiaariiri: Moisésri puetunu Pueyaso rootasanojuanaa nojuaja caminiujuquiaari puetunu Israel pueya niquiarajanaa. Na nuhuaaj, Moisésri juunu niqiuohua nanaca, cabra nanaca cojitiquiaari mohuacata. Cunojinia shitiaquiaari borrego cajaca naatusu hisopo cashacucuaataari. Cunota, mohuacanacu majiriutuiaquiaari Pueyaso Rupaa na naajiotasanoocuaari, puetunu Israel pueyacuajanaano. ²⁰ Jiyacaritij, nojori sequequiaariiri: “Nio nanacaari pa niishitiya Pueyasoori seetanujuanaa pajaniyara miiniutianiya puetunu na sequesanojuanaa, paa jaara na rootasano tojijiaa quirini”. ²¹ Moisésri Pueyaso Secojojua tiaacua majiriutuiaquiaari nanacajuhuaaj, puetunu Pueyasora poonijiotajara shipinijosano casamiicuaajanaano. ²² Moisés Rootasanojiniji niishishiyacuaajari, quera puetunu casaajanaari saaja nanacata juhua jeequesano juhua Pueyaso. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

Sesa pa miiniuri jiyanooshaaquiaa Cristo cusuucua pocuara

²³ Mijiria Pueyaso Secojojua tia, puetunu na casaatajanaa quiniucua juhua jiyocuaacaanu casaa naaqui, seya nanacaari maninia quiquiaaricuaaja cuno mijiria casami quiniuria jeequesano. Saniniuuja, jiyocuaacaanu casaa quiniuria jeequesano, socua maninia nanacaari panishaaquiaari seya nanacajiniji. ²⁴ Majaari Cristo tiuquitianu quiquiaari seya nanaca mijiria pueyano tiasano Pueyaso Quishaquijianaa. Cuno quiquioori saaja juhua jiyocuaacaanu Pueyaso quiquiu naaqui. Cristo cutaraari seetanujuanaa Pueyaso Quishaquijianaa tiuquiquiaari. Nojuajaari tii na Que Pueyaso secojoquiaa pocuara. ²⁵ Mijiria pueyacuara secojonaa jiyaniujanucuaari puetunu marijijarajanaa pueyaraacaanu tiuquijioquiaari Pueyaso Quishaqui saaja seya nanacata, pueya na jiyanootiniuria Pueyaso. Jesucristo cutaraari maja naa na miiniu quiquiaari. ²⁶ Jesu jaara Pueyaso pa jiyanootiriquia puetunu marijijarajanaa taa pueyacuara secojonaa jiyaniujanucuaa miiquiaaricuaani, nojuaja maara jiya shipinishaanujiniji mosaariquia puetunu marijijarajanaa. Quiari naataja saniniuuja, Jesucristoori mijiria rasaaquiaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijianaa. Majaari socua na pacutesaanu quiniutianihua monu. Naa na mosaanuucuatej, cunoori tariucuaaja puetunu nocua tiuujiaa pueyajanaa jiyanooshaanura. ²⁷ Naatej, taatucuaa pueyani, nojoriiri shaajecoriquiano. Majaari nojori samitiaconuhua mijiria nojori quiniuhua, socua na cusuuhua juhua coteenu na cusu. Nojori shaajenu nuhuaaj, nojoriiri saaja sashiya Pueyaso nequesoreenura nojori. ²⁸ Naajuhuaaj, naa Jesucristo mosaanuucuaa jiyacaritij, saaja cunojanaari na mosaanu quiquiaari, queraatia pueya jiyanooshaanura sesa nojori miishanojiniji. Naacuaajtij, pocua na muetasacariuhua, majaari jiyacari socua na mosaanu quiniutianihua pueya jiyanooshaanura sesa nojori miishanojiniji. Jiyacaritij, nojuajaari saaja nocua tiuujiaa rijionuucua tiuquiniutianihua, noo pojoriria canapute na sashiycuaajani.

10

¹ Moisés Rootasano pueya miishocoriquianoni, pueyacuara secojonaa miishocoriquianojuhuaaj, puetunu cunojuanaari juhua seetanujuanaa Pueyaso jiyocuaacaanu casaa naaqui, Pueyaso racatasano Jesucristoocua tiuujiaa pueyarano. Moisés Rootasano tojtiajaca pueya cutaraari puetunu marijijarajanaa na seya puecootequiaari, Pueyaso jiyanooniuria nojori juucua. Naajaa, majaari na naata seetanujuanaa maninia miijiaa pueyara na jatanishaanu seya nanacata. ² Naajuhuaaj, pueya miishacari puetunu Moisés Rootasanojuanaa, naajaa, nojoriiri maja seetanujuanaa tama nojori jiuujiaaja na cajitiniu quiquiaari. Cunora, majaari nojori tarinitianu quiquiaari nojori seya puecootenu tama sesa nojori miishanoocuarajaaja. Seya nanacaari maja na naata tuujunu quiquiaari sesa nojori miishano, seetanujuanaa juhuajaniya nojori quiniuria. ³ Naa seya puecoosacari puetunu marijijarajanaa Pueyaso jiyanooniuria pueyatej, cunoori saaja nojori niishitiquiaariuhua tarijia nojori miishano sesa. ⁴ Paari seetanujuanaa niishiyacuajani, juunu nanaca, cabra nanacanio, cunoori maja sesa pa miishano tuujujua seetanujuanaa.

⁵ Cunora, tariucuaacaanu Pueyaso Rupaajinia, mijiria Jesucristo nishacari na sequesocoriquianoori juhuacarijia naajiotasano quiquiaari. Naa sequeyari:

“Cua Pueyasonaa, janiycuaajari niishiyani, majaari quioojia quia cajitiniu quiquiaa seya puecoosacari quiocuara, puetunu nataacuacajiniji pueya niqutiojosacari quiarajuhuaaj. Saniniuuja, quiaari cuaqueyaraca cua quiniuria cua jiyateree, quiocuara

cua mosaanura. ⁶ Majaari quia timiniu quiquiaa seya catijiasacari quiocuara, naajuhuaq pueya shootesacari na seya nanaca, quia jiyanooniuria nojori sesa nojori miishanojiniji. ⁷ Naaratej, janiyari quia sequeyani: 'Niya quiyacuajanijia cua miiniuria quia panishano cua Que Pueyasonaa, taa janiyajiniji tariucuacaanu naajiotasaaquiaricujani' ”.

⁸ Moisés Rootasanojiniji pueyari maatia niishitiojosaaquiaari nojori puecootenura tama na seyajaaja Pueyasooocuara, na nataacuacajinijinio nojori niqutiojonura nerajuhuaq. Nojoriiri niishitiojosaaquiaarijihuaj nojori catijianura na seya Pueyasooocuara, tama nojori seya nanacajaaja shootesaanurajuhuaq, sesa nojori miiniucua. Naajaa, Jesucristo sequesanojiniji, paari quiarijia niishiyani, puetunu naa pueya miishanojuanaari maja na timitiniu quiquiaari Pueyaso. ⁹ Nocuaij, Jesucristoori naa sequequiaari na Que: “Niya quiyacuajanijia, cua miiniuria quia panishano”. Naacuajitij, Jesucristojuanaari mijiria niqiaari pocuara na mosaanura, seetanujuanaa jiyanooshano pa quiniuria cutara, maja najuhuaana seya puecoosaanura socua. ¹⁰ Pueyaso tojjia na quiniucua, Jesucristoori tama na cuaqueyajaaja tarinitiaquiaari pocuara na mosaanura, tojetaarucujanaa jiyanooshano pa quiniuria pueyaracaanu. Naacuajitij, na Que Pueyasoori juhua tojetaarucujanaa sesa miyashijacara pa jiyatequiaari, seetanujuanaa na pueya pa quiniuria tama nerajaaja.

¹¹ Israel pueyacuara secojonaa pueya poonijosacari Pueyaso Secojoja tiajinia, nojoriiri pueyaracaanu seya puecooquiaa narta pueya miishanoocuara sesa. Naajaa, naa nojori miishanoori maja seetanujuanaa na tuujunu pueya miishano sesa. ¹² Saniniuujia, Jesucristoori tama na cuaqueyajaaja tarinitiaquiaari pocuara na mosaanura niyacutesanojinia. Cunojuanaari na mosaanu quiquiaari. Majaari socua na pacutesaanu quiniutianuhua monu. Na cusonuucua pa niti, puetunu nocua tiuujia pueya sesa miishanojuanaari tojetaarucujanaa jiyanooshaaquiaa. Naa na tucuatano nuhuaji Pueyaso miini panishano pueratej, nojuajaari na Que miaguejataja cajiquiaari. ¹³ Quiarijia tii sashiyari, Pueyaso cuara na paraa shocotare puetunujanaajaatijiaj. ¹⁴ Naa niquiriyatu pueyano mosaanuucuatej, puetunu nocua tiuujia pueyajaanaari maninia miijiacara jatanishaaquiaa, tojetaarucujanaa maninia pa quiniuria, Pueyaso rupuejaca pa quiniuria pueyaracaanu. ¹⁵ Pueyaso Sohuanucuaajaari naa pa niishitijajuhuaq naa Pueyaso sequesacari tariucuacaanu na rupaajinia:

¹⁶ “Pa Jiyaniijia Pueyasoori naa sequeya: ‘Nio pa quishacari nuhuaji, janiyari tamaatia miiniutianiya cua saquirojosano pueyani, quiarinio cua rupaacua nojori tiuushacari. Janiyari quiarinio cua rupaa nianutaniya nojori jiuujiajiniani, na tojjiaa nojori quiniuria. Naajuhuaq, janiyari juhua na naajiotanutaniya nojori niishitijajiniani. ¹⁷ Janiyari puetunu sesa nojori miishanojuanaa niyajetanutaniya seetanujuanaani’ ”.

¹⁸ Naacuajitij, sesa pa miishano jaara tari seetanujuanaa jiyanooshano quiya, cunora, majaari tari na panishaanu seya puecoosaanura, sesa pa miishanojiniji pa jiyanooshaanura.

Pueyaso pa ruquere jeequesano poojiata

¹⁹ Naacuajiti cua panishano cuarta Pueyaso pueyanaa, quiarijia cutara pa naata pa puereyaquiniutia tiuquijionu Pueyaso Quishaquijianaa, Jesucristo shootenuucua na nanaca pocuara. ²⁰ Nojuajaari quiarinio nucuaco pa jaatiaquiaa na Quecua. Nojuajaari juhua pocuaij nuunuquiaari Pueyasooocua. Mijiria Pueyaso Secojoja tiajiniani, Pueyaso Quishaquiri shiquiaruque toqueta mishiquionucia quiquiaari, pueya tiuquitiaaquiniuria Pueyasooocua. Cuno shiquiaruque toque cutaraari sutequiaari Jesu cusosacari. Cunocuaajaari pa niishitiya, pocuaijiri juhua nuunusano quiya Pueyasooocua. Neyanu Jesucristocuaajaari cuno quiarinio nuu. Nocua pa tiuushacari, paari pueyaracaanu rishijiacara jatanishaaquiaani juhua nojuajuhuaq. ²¹ Nojuacuajaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucuarajanaa. ²² Cunora, Pueyasooocua pa catecanoriquia seetanujuanaa pa paniniutia nojuaja. Nojuaja pa secojoriquia, seetanujuanaa nocua pa tiuuniutia, maja quenaaja nocuaij pa taacanunuta. Naa pa rupueriquia nojuaja, jatanishano jiuujiaata, juhua poojiacua Jesu nanaca majiriuutiasano quishacari. Naajuhuaq, puetunu sesa pa miishanojuanaa cuara jiyanooshano quiiria, naatej, taa pa cuaqueyacuani, pa nanasacari maniniuniacu mohuacata. ²³ Naa jaara moojinia tiuquinijosaaquiaari, niaari maninia pohuataquiaari pueya niqiaara Jesuucua nia tiuuniujiniji. Nocua nia tiuushacari, niaacuajaari niishiya puetunu Pueyaso sequesanojuanaari pajaniyara tohuateenutaniya, pueyaracaanu shuquiriaatia pa quiniuria nata. Majaari nia taacanunu nocuaij. ²⁴ Parta Pueyaso pueyaca tacaajiaa pa quiriqia. Panijiaa pa quiniuria pa shiniujitiooriquia, maninia miijiaa pa quiniuriajuhuaq. ²⁵ Noojiaqueya parta Pueyaso pueyari tari jitiquiocanu maja na rerejonura narta

Pueyaso pueyata. Majaari naa nia miiniujuhuaj. Maninia cutaraari pueyaracaanu pa rerejonura parta Pueyaso pueyata, pa shiniujiutionura. Naa pa miiriquia pueyaracaanu cutara, pa niishishacari pa Jiyaniijia tiuquiniuuri tari catecanoya.

²⁶ Naa niishiri pueyanaa, maatia pa niishiniu nuhuaji seetanu Pueyaso rupaaajanaa, paa jaara saaja sesa miijioquiaa tama pa panishacarijiaajani, ¿cantucua socua pocuara cusonu pacuterohua saajaniuhua? Shaaqui. ²⁷ Naa sacuraatia miijiacani, nojori cuara niishiiria, nojoriiri cocuaatia miya. Nojori jaara nojori jiuujia tacatoyaquiri sesa nojori miiniujiniji, nojoriiri jiyanoohua saniitiosaanutaniya. Narta Pueyaso paraata cojiritiasaanutaniya quejooonu mani quiquiojiniiaari pueyaracaanura. ²⁸ Pueyano jaara Moisés Rootasano tojyaquiquiaari, querajaa pueya jaara nocuara saquirojotaquiaari, nojori sequesanoori seetanujuanaa quiquiaari. Naacuajitij, majaari nocua na taraajenu quishaaquiaari na mosaanura. ²⁹ Moisés Rootasano tojyashijiaca jaara naa miishaaquiaaricuaa, ¿paateeri jiyaniyanijia Pueyaso Niyanu soojeaca jiyanooshaanutaniya, na nanaca shootesaanu jiyatejaca juhua najuhuanarate? ¿Noo pojoritiiri jiyanooshaanutaniyajuhaaj, Pueyaso Sohuanuucura rimiaaquejaca sacuraatiate? ¡Maja! Pueyaso Sohuanuuri nojori cumaquiniu paniriquiaa juucua. Jesu nanacacuaajaari Pueyaso jiyanootiquiaari nojori, Pueyaso pueya nojori quiniuria juucua. Naacuajitij, Pueyaso Niyanu soojeaca pueyari socua jiyanoohua saniitiosaanutaniya Moisés Rootasano tojyashijiaca pueyajiniji. ³⁰ Paacuajaari tari tojiquiaari naa Pueyaso sequesanooni: “Janiyacuaajaari naminiani. Janiyari sesa miijiaa saniitionutaniyani”. Naa naajiotasaaquiaarijuhuaj: “Pa Jiyaniijia Pueyasoori na pueya nequesoreenutaniya”. ³¹ ¡Jiyanoohua puereeta quiniutianiya cutaraari Pueyaso jiyanooni ruuretajaca pueyara, Pueyaso nequesoreesacari nojori!

³² Pueyanaa, tariucuacaanu naquiya nia miishaanu nia niishiri quia, niaa jaara shushajanaa Jesuucua tiuquiaari. Naa pueya miitiasacari naquiya njajaniyatej, niaari juhuajaniya rejeretaquiaari saaja. ³³ Noojiaqueya njajaniyajinijinoori cararaatia macaatishaaquiaari. Niaari pueya niquiara naquiya miishaaquiaarijuhuaj. Niarta Pueyaso pueya niquishacari naa nia miishaanutej, nojoriiri na puereyaquiniutia nia cojiquiaari saaja, niaacua nojori taraajesacari. ³⁴ Naajuhuaaj, niarta Pueyaso pueyajinijinio jaara nujuatejosano quiquiaari nujuatejojuajinia, Jesu tojtiajaca nojori quiniuucua, niaari nojoriicua tiuquijioquiaari, nojori nia cumanijanura nocua nia taraajenuucua. Naajuhuaaj, nia paraa jaara nia jiiitiasano casami riutiocojoquiaari tama nojoririjaaja, nojori soosano Jesu pueya nia quiniuucua, niaari juhuajaniya nojoriria tarinitiaquiaari saaja. Niaari saaja shuquiriaatia quiquiaari nia niishishacari niaari jiyocuacaanu jiiitaa socua maninia casaa cuno casamijiniji, pueya jaariuutiasano njajaniyajinijini. Cuno, Pueyaso jiiitiasano niaaranoni, cunoori shaajeyashijia casami cutara. ³⁵ Naatej, taa juhuajaniya naquiya miiniu rejeretajaca nia quiquiaaricuaajani, Pueyaso sequesanoocua tiuujia nia quiniuucua, naa Pueyaso sequesanoocua tiuujia nia quiquicia pueyaracaanu. Pueyasocuaajaari jiyanoohua maninia miiniutianiya nocua tiuuniu tarinitiaashijiaca. ³⁶ Naquiya nia miishacari pueyaracaanu, juhuajaniya nia rejeretariquia saaja, maninia nia tucuatunura puetunu Pueyaso panishano nia miiniurijanaa. Naacuajitij, niaari puetunu Pueyaso sequesanojuanaa masenutaniya, pueyaracaanu shuquiriaatia nia quiniuria. ³⁷ Tariucuacaanu Pueyaso sequesanoocuaajaari naa naajiotasano quiya:

“¡Niaaj! ¡Quera tiuquia pueyaca Niriquiano! Maja na tarishiniu. ³⁸ Cua jiyanooshaano pueyari pueyaracaanu rishijiacara jatanishaanutaniya saaja Quiyanuucua nojori tiushacari. Saniniujia, tamonu pueyano jaara nocua tiuuniu tarinitiare, nojuaajaari cua soosano pueyano quiniutianiya”.

³⁹ Cuno pojoriiri saniitiosocoriquiano seetanujuanaa. Pajaniya saniniujia, paa cutaraari maja jiyano pueyajinijioni. Paacuajaari pa Jiyaniijiaacua tiuujiacani, pueyaracaanu nata pa quiniuria shuquiriaatia.

11

Pueyasooocua tiuuniujiniji pahuatasano

¹ Pueyaso sequesanoocua pa tiushacari, paari niishiyani paari puetunu Pueyaso sequesanojuanaa masenutaniyani. Nocua pa tiushacari, paari maatia niishiyani puetunu na sequesanojuanaa pajaniyarano pa niquishoo casaani, cunoori seetanujuanaa quiya. ² Noojiaqueya pa supuetanaajinijinoori seetanujuanaa Pueyaso sequesanoocua tiuujiaa quiquiaari. Naaratej, Pueyasoori nojorijiniji naa sequequiaari: “Cuno pojorini, nojoriiri maninia cua pueya, cua sequesanoocua nojori tiuuniuucua seetanujuanaa”.

³ Pajaniyara naajuhujaj. Tariucuacaanu Pueyaso Rupaacua pa tiuushacari, paari ni-shiyani Pueyasoori jiya shipiniquiaari saaja na pocuanuta. Naacujitij, puetunu pa niquishano casaajanaari shipinishaquiaari niquishoo casaajiniji.

⁴ Supuetana Abel tiuuniuucua Pueyasooocua, Pueyasooocua na catijiasanoori socua maninia quiquiaari Pueyasora tarajanu Caín catijiasanojiniji. Naa Abel tiuuniuucua Pueyasooocuatej, Pueyasoori na jiyatequiaari maninia na pueyano na quiniuria. Pueyasoori Abel catijiasano timitiaquiaari, nocua Abel tiuuniuucua. Cunora, tarajanu Caínri Abel moquiaari. Naajaa, naa macu na quishacaritij, nojuajaari pa niishitiojiyajaa Pueyasooocua pa tiuuniuria taa nojuaja tiuquiaaricuaani.

⁵ Supuetana Enoc quiniuucua Pueyasooocua tiuujia, Pueyasoori puetunujuanaa na riquiaari jiyocuaaanu, mijiria na shaajeyaquiniuucujaji. Narta pueya pajesacari nojuaja, majaari tari na quiniu quiquiaari. Pueyasoori tari na riquiaari. Tariucuaaanu Pueyaso Rupaajinia, nojuajinjijiri pohuatashiyacuaja, Enocnaari Pueyaso timitijia pueyano quiquiaari mijiria na quishacarijia. ⁶ Seetanujuanaari, paa jaara Pueyasooocua tiuyashijia quirini, majaari pa naata timitiniu Pueyaso. Naacujitij, cante Pueyaso niishiniuucua jiaatiaani, nojuaja cu meta tiuuria Pueyasoori seetanujuanaa quijia. Nojuaja cu meta tiuuriajuhujaj, Pueyasoori na seconujuuaca tojiquiaa. Nojori panishano miiquiaa nojoriiaarijuhujaj.

⁷ Pueyasoori supuetana Noé numootequiaari nojuajaari nio jiya pajaashitianiniutianiya, puetunu mijiria sesa mijiacajanaa na shaajanura. Pueyasoori na sequequiaarjijuhujaj puereetuca buque na shipininiuria tii na tacatajara pajaacuaji. Jiyacaritij, Noeri maja na niishiniu quijia pajaa. Naajaa, Pueyaso sequesanoocua na tiuuniuucua, nojuajaari Pueyaso tojiquiaari. Naacujitij, nojuajaari necocuata, puetunu necohuatajanaa cureequiaari, necohua niquicohuatajuhujaj. Puetunu narta mijiria quijia pueyajanaari consonuquiaari pajaajinia, nojori tiuyaquiniuucua Noé pohuatasanoocua Pueyasojiniji. Noé cutaari juhua sesa miyashijara jiyatesaquiaari pueyaracaanu Pueyasota rishijara na quiniuria, Pueyasooocua tiuujia na quiniuucua.

⁸ Abrahamri Pueyasooocua tiuquiaarjijuhujaj. Pueyaso sequesacari nojuaja tamonu jiyajiniara na pacunura, Abrahamri na tojiquiaari. Tama na jiyajinjijiaaja na quiasacari, majaari na niishiniu quiquiaari tee cuniquiria na quiaani. Nojuajaari saaja niishiquiaari Pueyasoori na quijia na niqutionutaniya tama na jiyaranojuaja. ⁹ Pueyaso niqutionosocoriquiano jiyajinia na tiuquishacari, Abrahamri cuno jiyajinia quiquiaari juhua rucuanajoja pueyano. Abrahamri juhuanujuaja maja cuno jiya camaru na quiniu quiquiaari. Naajaa, Pueyaso sequesanoocua tiuujia quiquiaari pueyaracaanuuri. Nojuajaari saaja seya cajacajiniji shitiasano suhuorotujinia quijia quiquiaari pueyaracaanu. Abraham niyanu Isaacri naa quijia quiquiaarjijuhujaj, Isaac niyanu Jacobonio. Pueyasoori cuno pojori sequenu pacutequiaarjijuhua coteenujuanaa na sequesano Abraham. Naacujitij, nojoriiri Pueyaso sequesanoocua tiuujia quiquiaari pueyaracaanujuhujaj. ¹⁰ Pueyaso jaara Abraham sequequiaari, nojuajaari pueyaracaanu na quijiarano quiquio na niqutionutaniya, Abrahamri niishiquiaari Pueyasoori miriqui sequeriquiaa tama na shipinishano tiacajinjijiaaja. Cuno pueyaracaanu rishijia tiacaari Pueyaso niishiriojosano tiaca na saquirojosano pueyarano. Abrahamri cuno tiacara sashijia quiquiaari pueyaracaanu, Pueyaso sequesanoocua na tiuuniuucua.

¹¹ Naajuhujaj, seetanujuanaa Pueyaso sequesacari Abraham, nojuaja na muetutentaniya, Abrahamri jiyacari tariucua saaquiano quiquiaari. Neco Saaraari puera motaja quiquiaarjijuhua na manajenura. Naajaa, Abrahamri niishiquiaari Pueyasoori cumaacaraca quijia na sequesano na tohuateenura. Naa Pueyasooocua na tiuuniuucuatej, Pueyasoori na cumaquiquiaari neco na manajonura. ¹² Naacujitij, mueya shipiniyashijia saaquianoori mueya mueratequiaari. Cuno neyanuucujinino supueno pueyari queraatiara canequiaari, queraatiara juhua riya, serojiaquishoo, juhua shoniniacu caminia shuriuquico paajia jaaquia.

¹³ Puetunu cuno pa supuetanaajanaari Pueyasooocua tiuujiaaja shaajecoquiaari. Nojoriiri juhuanujuaja maja na jiiitanu quiquiaari seetanujuanaa Pueyaso sequesano nojori na niqutionosocoriquiano. Naajaa, seetanujuanaa nojori tiuushacari Pueyasooocua, nojoriiri, Pueyaso sequesanoori juhua tariucua tucuaaanuji nojori niquishano quiquiaari. Nojoriiri na timitiaquiaari juhua tariucua nojori jiiitasano. Naacujitij, nojoriiri juhuanujia quiquiaari juhua rucojuaca nojori quishacari mijiria. Nojoriiri niishiquiaari, mijiria nio jiyani, majaari seetanujuanaa nojori quiquiorano. ¹⁴ Naacujitij, paari ni-shiyani nojoriiri tamonu jiya jiiitanuucua jiaatiariquiaa, pueyaracaanu nojori quiquiorano cutara. ¹⁵ Nojori jaara saaja mijiria jiya camaruhua quiniuria panijiaa quiquiaari, nojori maara na supuetujia jiyajiniara rujiuquiaarijuhua. ¹⁶ Saniniuujia, nojori cutaari socua maninia jiya jiiitanuucua jiaatiaquiaari, pueyaracaanu nojori quiquiorano

cutara. Cunoori jiyocuacaanu quiquiuo, Pueyaso jeenucasano nojoriria. Naaratej, majaari Pueyaso caririquiniu quiquiaari nojori sequesacari: “Pueyasoori canaa Jiyaniijia”. Nojuacuajaari tari jeenucasano tiaca jiiitiaa nojoririano jiyocuacaanu.

¹⁷⁻¹⁸ Pueyaso sequesano Abraham na mueratesano mueya jaara tari mashajaniyojua quiquiaari, Pueyasoori Abraham saniquiaari, na niishiniuria nojuajate seetanujuanaa na tojjia. Naacuajitij, na sequequiaariri cuaara na panishano niyanu moora, nocuara na catijasocoriquiano. Cuno neyanu Isaaccuajaari Pueyaso sequesano quiquiaari, nojuajiniji canenutaniyari queraatia pueya. Naajaa, Pueyaso sequesacari Abraham, neyanu na monura, nojuajaari maja na ruuretanu quiquiaari Pueyaso. Nojuajaari tari Pueyaso sequesanoocua tiuuriquiaa saaja. ¹⁹ Seetanujuanaa Abraham tiuuniucua Pueyasooocua, nojuajaari niishiquiaari Pueyaso na naata neyanu Isaac samiitianiniuhua, nojuaja jaara na more. Naacuajitij, quera Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanujuanaa na tojjia. Naacuajitij, Abrahamri neyanuniyojua jaatucuquiaariuhua shuquiriaatia na quiquiojiniohuara, juhua macu samiitianishanohua. Naa Abraham miishanoni, cunoori miriqui quiya pajaniyara taa Pueyaso miiquiaari Neyanu quiari naatajucuani.

²⁰ Isaac tiuuniucua Pueyasooocujuhua, nojuaja jaara saaquiano quiquiaarijuhuaj, nojuajaari necohua sequequiaari, Jacobo, Esaúno: “Pueyasoori jiyanohua maninia miiniutianiya niaara, niaacuajinio supueno pueyano, taa na sequequiaari janiyacuajani”.

²¹ Jacoboori Pueyaso sequesanoocua tiuujia quiquiaarijuhuaj. Naacuajitij, quera na cusonu panishacari, nojuajaari neyanu José niquiohua sequequiaari: “Pueyasoori jiyanohua maninia miiniutianiya niaara, niaacuajinio supueno pueyano”. Naa na sequenu nuhuaji na jiuhuatej, nojuajaari na natacaacua tanishiquiaari. Pueyaso secojoquiaari na timiniutiaari, na niishishacari Pueyasoori pueyaracaanu miiquiaa puetunu na sequesanojuanaa.

²² Jacobo niyanu Joseeri Pueyaso sequesanoocua tiuujia quiquiaarijuhuaj. Naacuajitij, quera na cusocari, nojuajaari niishiquiaari Pueyasoori tamacari Israel pueya mashiquiniutianihua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tiujianura na nucuhua Egipto jiyajinia, nojori jaara quiojorohua Pueyaso niqutiosocoriquiano jiyajiniara.

²³ Moisés queya quiniucua Pueyasooocua tiuujia, nojoriiri Moisés jamoquiaari jaara shusha rasaquiaari, mueya maniniuniyojua na quiniucua. Naa na shocojoquiaariiri jiuujianaraca raca, pueyaracaanu jamosano na quishacari. Egipto jiyaniijia Faraónri tarijia sequequiaari, puetunu Israel pueya niquiochua shusha roosano canujuanaa cuaara moojinia quejoosaaria. Naajaa, nojoriiri cuno sequesano tojiyaquiquiaari nojori puereyaquiniutia saaja, Pueyasooocua tiuujia nojori quiniucua.

²⁴ Naajuhua, Moisés quishacari tariucua cumantumaca, Pueyasooocua tiuujia na quiniucua, nojuajaari na canashitinia Faraón niyatu tamacaquiaari. Nojuajaari tama sequequiaarijaaja: “Majaari Faraón jinianu cua quiniu paniniu. Janiyacuajaari Israel pueyanoni”. ²⁵ Egipto jiyaniijia jinianu na quiniucua, Moisésri na naata juhuajaniya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishiquiaari cuno shuquiriaatia quiniuri saaja rupaquijia mijiria. Nocuaji, majaari na tamacanu quiquiaari narta Israel pueya, shuquiriaatia na quiniuria tamajaaja. Nojuaja cutaraari narta Israel pueyacua taraajequiaari, Egipto jiya jiyaniijia poonijiotenuucua nojori puera. Cunora, nojuajaari niishiriojquiaari nojuaja cuaara cojiritiasaaria naquiya miishaanu narta Israel pueyatajuhuaj. ²⁶ Pueyaso sequesanoocua tiuujia na quiniucua, nojuajaari niishiquiaari Pueyasoori na tojtiajaca miiniutianiya maninia pueyaracaanu cutara. Nocuaji nojuajaari saquiriojquiaari narta Israel pueyata soosano na quiniuria mijiria, maja puetunu Egipto casami jiiitiaja na quiniuria mijiria, Faraón jinianu na quiniucua.

²⁷ Pueyaso sequesanoocua tiuujia Moisés quiniucua, na nuhuaji, nojuajaari Israel pueya jaatiaquiaari Egipto jiyajiniji. Majaari na puere nu quiquiaari Egipto jiya jiyaniijia juaashacari jiyanohua. Seetanujuanaa Moisés tiuushacari na niquyaquishoo Pueyasooocua, nojuajaari Pueyaso niquiquiaari noojiata, juhua na shuriucua quiyano pueyaracaanu. Naacuajitij, Moisésri tama na cuaqueyajaaja cumaquiquiaari maja na tarinitianura miiniu Pueyaso sequesano nojuaja. ²⁸ Quera Israel pueya mashishacari Egipto jiyajiniji, Pueyasoori Moisés sequequiaari: “Janiyari niucua cua seru jiyaronutaniyani, cua tojiyashijia jiyapueranuhua na pucoonura puetunujuanaa. Nocuaji Israel pueya quia numootere, borrego nanaca nojori shuquijutianura na tia tohuatayaji, maja nia jiyapueranuhua cusojuaaanurajuhua”. Moisésri Pueyaso sequesanoocua tiuquiaari. Naacuajitij, puetunu Israel pueya jiyapueranuhajiniujiojuanaani, majaari quenaaja niquiriyatu niyanu mosaanu quiquiaari cutara.

²⁹ Israel pueya mashishacari Egipto pueyacuaji juucua, Naatunacu jiyanihano camini-aari nojori ritiaquiaari saaja. Nocuaji, Pueyasoori caminia raquitiaquiaari nojori nuura. Na nuhuaji, Pueyasoori Moisés sequequiaari puetunu nojorijianaa cuaara niuutiara caminia taquijiria. Israel pueya tiuuniuucua Pueyaso sequesanoocua, nojoriiri joo-juashiquio niuutiaciaari juhua puereetunu nucuaco. Egipto jiya jiyaniijia soldadohua jaara juhua nojori niutianu paniquiaarijuhuaj, nojoriiri saaja shushiniuquiaari.

³⁰ Israel pueya tiuquishacari Pueyaso niquitiosocoriguiano jiyajinia, nojoriiri na paraa Jericó tiaca shocua camarucuneetaquiaari siete juuca, naatej, taa Pueyaso rootaquiaari nojori miiniuriacuajani. Naa nojori tiuuniuucua Pueyaso sequesanoocuatej, Jericó tiaca shocua sohuacaari puetunu pojotaquiaarijianaa. ³¹ Puetunu Pueyaso tojtiaashiji-acajanaari puecoosaaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajinijinio namuenujuna na jamojonuucua tarjia narta pueyacuaji. Rahabri naa maninia miiquiaari Pueyasooocua tiuujia na quiniuucua. Naaratej, Israel pueyari cuno paanatu jiyanooquiaari.

³² ¿Teyano pa supuetanaajiniji cua pohuatanutaniya nijaniya socuani? Socua queraatia pa supuetanaari Pueyasooocua tiuujiaa quiquiaari. Tariucuaja cua pohuatasano, maninia nia niishiniuria Pueyasooocua tiuujiaa pueyari Pueyaso jiyanooshano. Naajuhuaaj, ma-jaari jeya cua quiniu cua pohuatanura maninia nio pojorijiniji: Gedeón, Barac, Sansón, Jefté, David, Samueljinijinio, socua narta Pueyaso sequesano caminiujiniuaa pueyajini-jinio. ³³ Pueyasooocua tiuujiaa nojori quiniuucua, nojoriiri tamasaca jiyaniijianucua miaquejoquiaari na jiyajiniji. Pueyasooocua tiuujiaa nojori quiniuucua, nojoriiri maninia jiyaniijianucua quiquiaari, maninia na jiitianura narta Israel pueya. Pueyaso seque-sanoocua tiuujiaa nojori quiniuucua, nojoriiri Pueyaso sequesano nojori na niquitioso-coriguiano masequiaari. Pueyasooocua tiuujiaa nojori quiniuucua, juuruu sareya ru-paari juhua seecujutasaajaari saaja, maja na soonura nojori. ³⁴ Pueyasooocua nojori tiu-uniuucua, nojori jaara manijinia quejoosaaquiaari, nojoriiri maja na catenu quiquiaari. Pueyasooocua tiuujiaa nojori quiniuucua, nojoriiri na paraacuaji mashiquiaari saaja, maja na puecoosanura nijiniaquetucuaja mueruuta. Pueyasooocua tiuujiaa nojori quiniuucua, sasaca pueyari jiyanohua cumaacaraca quijiacara quiquiaari. Pueyasooocua tiuujiaa nojori quiniuucua, nojoriiri jiyanohua cumaquishaaquiaari na paraa nojori miaquejonura, na paraa nojori mashiquiniuria nojori jiyajinijijuhuaaj. ³⁵ Naajuhuaaj, Pueyasooocua tiuujiaa maajipohua quiniuucua, nojori macuuri samiiticoquiaariuhua nojoriria.

Tamasacaari jiyanohua taraatia miishaaquiaari Pueyasooocua tiuujiaa nojori quiniu-ucua. Cunora, nojori paraa jaara nojori quiooquiaari, nojoriiri puecoonura mianana-josaaquiaari nojori jaara Pueyaso tojinu tarinitiaaquiri. Nojori jaara na paraa sequesano tojiquiaari, nojori maara cartesaaquiaariuhua. Pueyasooocua tiuujiaa nojori quiniuucua, nojoriiri saaja paniquiaari nojori cuaara puecoosaaquiaari, naajaa, jiyanohua naquiya na miiniutia. Nojoricuajaari niishiquiaari, Pueyasoori nojori samiitianijionutaniuhua, jiyanohua shuquiriaatia nojori quiniuria pueyaracaanura cutara. ³⁶ Tamasaca quiniu-ucua Pueyasooocua tiuujiacajuhuaaj, nojoriiri cararaatia macaataishaaquiaari, jiyanohua majacusaquiaarijuhuaj. Naajuhuaaj, tamasacaari cumayocua shipinishano casaata morojosaaquiaari. Nujuatejojuajinia nujuatejosaaquiaariiri. ³⁷ Tamasacaari saitia jacusaquiaari na puecoosanura. Tamasacaari na cajiniocua rashiquiojosaaquiaari jacaria jiyaratajata juhua juhuana, socua jiyanohua naquiya na miishaanura. Naajuhuaaj, tamasacaari nijiniaquetucuaja mueruuta puetujusaquiaarijianaa piyonu. Naajuhuaaj, tamasaca quiniuucua Pueyasooocua tiuujiacajuhuaaj, nojoriiri juhua taanuusano rucoojo-quiaari puetunu tiquiyocuajanaa. Casamiijiuucua nojori quiniuucua, nojoriiri saaja borrego shoque, cabra shoque cusupuequiaari nojori cushishocoriguiano. Nojoriiri taraatia miitiasano quiquiaari, naquiya miishanojuhuaj. ³⁸ Juhua taanuusano nojori quiniu-ucua, nojoriiri juhua tashuquioono rucoojoquiaari cariquia jiyajinia, tuhuananuhajini-anio. Tiaajunucua nojori quiniuucua, nojoriiri saaja raaco maquiyonuujuaa quiquiaari. Mijiria quijiaa pueyari nojori jiyatequiaari juhua najuhuaa quijiaa pueyara. Naajaa, nojori cutaraari seetanujanaa Pueyaso timitiasano pueya quiquiaari, nocua tiuujiaa nojori quiniuucua.

³⁹ Pueyasocuajaari nojori jiyanooquiaari, seetanujanaa nojori tiuuniuucua nocua. Naajaa, nojoriiri juhuanouaja maja nojori masenu quiquiaari seetanujanaa Pueyaso se-quesano nojori na niquitiosocoriguiano. ⁴⁰ Pueyasoori nio pa quishacari nojori sashitiya-jaara, jiyanohua maninia na miishacari pajaniya na Sohuanuta, Neyanu Jesucristoocua pa tiuuniuucua. Na nuhuaji, Pueyasoori puetunu nojoritajanaa pa cojiritianutaniya jataniniu tojetaarucujanaa maninia miijiaa pa quiniuria, na shuriucua na rijiosacari puetunu pajaniyajanaa.

12

Jesu miishano pa niishiriojoriquia, naquiya rejeretajaca pa quiniuriajuhuaj

¹ Naa pa niishishacari taa queraatia pueya maninia miiquiaari Pueyasoooca tiuujiaca nojori quiniuucuaaani, cunora, tama pa cojetasano najuhuana casaa pa tarinitiariquia. Tarinitiahiyari puetunu najuhuana casaaajanaa, teyanoooca pa cojequiaa Pueyaso panishano pa miyaquiniuriacuajani. Naajuhuj, puetunu sesa miiniujianaa pa tarinitiare, puetunu pa cumaacajanaa pa jiitianura, juhuajaniya rejeretajaca pa quiniuria. Naacuajiti pa naata maninia puetunu puetunu Pueyaso panishanojuanaa pa miiniuria. ² Jesu miishano pa niishiriojoriquia pueyaracaanu. Nojuajaari tojetaarucuajanaa na Que Pueyasoooca tiuuji quiquiaari. Nojuajaari niishiquiaari, naquiya na miiniu nuhuaji, na Queeri jiyanohua shuquiriaatia quijara na jiyatenutaniya. Naaratej, nojuajaari juhuajaniya rejeretaquiaari naquiya na miiniu niyacutesanojinia, cararaatia na miishaanujuhuj. Cunora, nojuajaari na Que miaquetajara cajiya, Jiyaniijajanaa na quishacari.

³ Majaari nia niyajetanu taa Jesu rejeretaquiaari juhuajaniyacuani, pueyaracaanu sesa miijica paracaashacari nojuaja. Nocua nia niishiriojoriquia, niaa mariqui Pueyaso tojinu tarinitianu paniriiri nia taraajenuta naquiya nia miishacari. ⁴ Niaacuajaari naquiya miishaquiaa, Jesucristoooca tiuujiaca nia quiniuucua. Naajaa, majaari pa Jiyaniijia nia tacartanu, naquiya nia miyaquishaanuucujai. Nia rejeretariquia saaja. Majaari juhuanojuaja nia puecoosaanu quiquianu na tojitajaca nia quiniuucua. ⁵ ¿Niateeri Pueyaso rootasano niyajetarucuaa tari, na rootasano pajaniya juhua necohuaja? Naa sequeyari:

“Quianunaa, majaari cua rootasano quia soonu, janiya jaara quia niishitiojia naquiya cua miitshacari quiajaniyani. Janiya jaara quia nacasure socua maninia miijia quia quiniuriani, majaari cucujai pishiniu. ⁶ Quia Jiyaniijia cua quiniuucua, janiyacuaajaari cua panishano pueyano jiuujijayashijiani sesa na miishacari. Naajuhuj, janiyari cua niyanura cua jiyatesano pueyano saniitiojuani jaara sesa miiriquia”.

⁷ Naaratej, juhuajaniya na rejeretajaca nia quiriquia. Pueyasoori juhua necohua nia niishitiojia, maninia na canashitiniuria nijaniya, seetanujuanaa necohua nia quiniuucua. ¿Pueyanoteeri nareja niqijia neyanu, neyanu jaara na tojiyashijia quiriquia? ¡Maja! ⁸ Naajuhuj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacuajitij, Pueyaso jaara nareja niquiriquia nijaniya sesa nia miishacari, cuno maara quiri maja seetanujuanaa necohua nia quiniuucua, juhua tamonu queecuajinio nia quishacari. ⁹ Naajuhuj, naatujoori pa quishacari, pa queyari pa majacujua, nojori pa tojiyaquishacari. Majaari cunora nojori rerequetejaca pa quiniu quiquiaari. Naacuajitij, pa Que Pueyaso jaara pa saniitioriquia, ¿paateeri na rerequetenutaniyani? ¡Maja! Nojuacuajaari seetanujuanaa pa sohuanu Que, pueyaracaanu rishijia pa quiniuria. ¹⁰ Pa queyari pa canashitiojiaari taa nojori paniquiaaricuajani. Nojori rootasacari pajaniya, nojori saniitiosacari pajaniya, cunoori quiquiaari saaja mijiria pa quiniuria maninia. Pa Que Pueyaso saniniujia, nojuajaari pa saniitioquiaa seetanujuanaa maninia miijica pa quiniuria, juhua nojuaja pa quiniuriajuhuaj. ¹¹ Seetanujuanaa, puetunu sanitionujuanaari taraatia pajaniyara. Majaari pa timiniu paa jaara majacusaareni. Naajaa, na nuhuaji, paa jaara na ruuretaaquirini, paari socua maninia miijia jatanishaaquiaani, socua Pueyaso tojiijara pa quiniuria juhuajaniyajuhuj.

Jiyanohua cocuaatiari Pueyaso pa tojiyaquishacari

¹² Naacuajitij, majaari nia pishiniu pueyanaa, Pueyaso saniitiosacari nijaniya. Nocua nia tiuuri saaja. Nioojica nia cumaquiriohua. ¹³ Saaja Jesucristo rupaa tojiijica nia quiri, jatarinitiaja Pueyasoooca tiuujiaca mariqui noojia niquijiotereeri. Nojori cuara saniya cumaquishano quiriira cutara.

¹⁴ Tama nia cuaqueyajaaja nia cumaquiriquia, juhuajaniya quijica nia quiniuria puetunu pueyatajanaa. Majaari juayonuujutanu. Nia saniriquia seetanujuanaa sesa miyashijia nia quiniuria. Saaja noo pojori cutaraari pa Jiyaniijia niquniutianiya, seetanujuanaa maninia miijiacara jatanishano pueyatej. ¹⁵ Pueyasocuaajaari pa jiyanojia. Tama nia cuaqueyajaaja nia cojure niaa mariqui Pueyaso ruuretareeri na naacunu panishacari nijaniya. Nojuajaari cumaacaracacuaaja na cumaquiniuria nijaniya nia panishacari. Naacuajitij, niarta Pueyaso pueyano jaara juaatishaare tamonu miiniuucua sesa nojuaja, nojuaja nia naacure na jiyanooniuria sesa na miinia. Jaara naa miyaquititij, cuno pueyano juaaquiaacari narta pueyacu paaquenutaniya na sesonura queraatia pueya. ¹⁶ Naajuhuj, tama nia cojuatooriquiaajaaja. Naa nia miitiooriquia tamonu nijaniyajinjinio mariqui Pueyaso sequesano na niquitiosocoriquiano pajaniya soojeraa quiriiri, saniya tama na cuaqueyajaaja na shuquiritiniuria mijiria. Supuetana Jacobo puerana Esauacuajaari naa miiquiaaritij. Tamacari na miaajesacari, nojuajaari Jacobo

sequequiaari: “Cua tarajanunaa, pa que niqutiosocoriquiano janiya, na jiyapueranu cua quiniucuanu, cuno cuara quiria quiaa, quiaa jaara quia sumatuujiniji rupore quiria. Jiyanhua miaajeyanijia”.¹⁷ Niaacuajaari niishiya, na nuhuaji, Esauuri paniquiaari na que secojonura nocuara, jiyanhua maninia Pueyaso miiniuria nojuaja, na que jiyapueranu na quiniucua. Na queeri na ruuretaquiaari saaja. Esauuri jiyanhua na que nenecojoquiaari na nujuquenuta. Naajaa, na queeri maja na naata jataniniu quiquiaari tariucua neyanu Jacobo na sequesano Pueyaso niquiaari.

¹⁸ Nio pa quishacari, pajaniyara, Pueyasoori maja juhua tariucuaaanu na quishacari pa supuetanaa Israel pueyata. Jiyacaritij, Pueyaso jaara Moisés tacaniquiaari Sinaí tuhuananuucua, Moisés na niishitiojonura na rootasano na pueyara, tuhuananuuri jiyanhua puereeta niquishano quiquiaari. Tuhuananuuri puereeta noshiriquiaa. Na najacaari tacariquiaa mueruacatej. Jiyanhua ninishiquiri nenuriquiaajuhuj. Paratuuri jiyanhua piyarojoriquiaa puereetajuhuj.¹⁹ Trompeta jonenenuunuuri jiyanhua tojishaariquiaa. Pueyaso pocuanuuri jiyanhua tojishaariquiaajuhuj. Israel pueya tojishacari Pueyaso pocuaano, nojoriiri jiyanhua pueretuquiaari. Naaratej, nojoriiri Moisés sequetuquiaari maja socua Pueyasojuanaa pocuanura nojoriicuaa.²⁰ Nojoriiri maja socua na rejere-tanu quiquiaari puera puereeta Pueyaso sequesacari nojori. Pueyasoori jiyacari naa sequeriquiaa nojoritij, cuno tuhuananuucua nojuajanaa quiniucua:

“Cante nio tuhuananu rupueyani, cuno pueyano cuara mosaaria saitia jacusano, cashanata soj. Naa mijia seru cuara naa puecoosaariajuhuj”.

²¹ Puetunu Israel pueya niquishanojuanaari jiyanhua puereeta quiquiaari seetanujanaa. Moisésjanaari na puerequiaarijuhuj. Nojuajaari na puerenuta sequequiaari: “Cua puerenuta teteaanijia”.

²² Nio pa quishacari saniniujia, majaari pa catecanonu quiquiaa cuno tariucuaaanu pueya pueresano tuhuananuucua. Jesucristo cusonuucua pocuara, paari Pueyaso quiquiojinijanaa tiuquitiaquiaani. Cuno na quiquio sesaari miriqui sequeshiya “Sión tuhuananu”. Na pueya pa quiniucua, nojuajaari jiyocuaaanu pueyaracaanu pa quijiarano tiaca jiiitia. Cunoori seetanujanaa jiyocuaaanujinio Jerusalén tiaca. Naacujitij, paari jiyanhua queraatia Pueyaso seya rupuequiaani, Pueyaso pa maniniuhuaquetanura nojoritiajuhuj.²³ Paari tii rerejonutaniya puetunu parta Pueyaso pueyatajanaani. Pueyaso saquiriojosano pueya pa quiniucua, pa sesacaari jiyocuaaanu Pueyaso nequesoretuneejinia naajiotasano quiaa. Paari Pueyasooica catecanoquiaani. Nojuajaari puetunu pueya nequesoreenajanaa. Jesucristo niyacarijia Pueyasooica tiuujiaca sohuanuhuari tii quiyajuhuj, canapue Pueyaso jiyatequiaari tojetaarucujanaa sesa miyashijiacaracujani.²⁴ Jesucristoori tii quiyajuhuj. Nojuajaari tama na cusonutajaaja Pueyaso jyanootiquiaari nocua tiuujiaca. Tama na nanacajaaja na shootenuucua pocuarajuhuj, paari cunota jequejosaaquiaari tojetaarucujanaani. Naacujitij, Jesu nanacaari jiyanhua socua maninia Abel nanacajiniji. Caín monuucua tarajanu Abel, Abel nanacaari Pueyaso shiniujiya na mona cuara mosaariajuhuj. Jesucristo nanaca saniniujia, cunoori Pueyaso pa jyanootiquiaacujua.

²⁵ Cunora pueyanaa, tama nia cuaqueyajaaja nia cojuare maja nia ruuretatura Jesucristo Rupaa. Tariucuaaanu, pueyari jyanoyaquishaaquiaari nojori ruretasacari Pueyaso sequesano, nojuaja jaara nojori piriyojouquiaari Sinaí tuhuananujiniji. Nojoriiri jyanoyaquishaaquiaari nojori tojiyaquiniucua mijiria Pueyaso quishacari na sequesano. Nojori jaara naa jyanoyaquishaaquiaaricuaa, nio pa quishacari saniniujia, çpaatucua taa jyanoooshaariquia pa ruretasacari Pueyaso quiarijiani, jiyocuaaanuji na piriyosacari pajaniyani?²⁶ Pueyaso pocuasacari Sinaí tuhuananujiniji, jiyari na pocuasacari teteaquiaari. Quiarijia saniniujia, Pueyasoori seetanujanaa sequeya: “Janiyari socua caminiutianihua jiya jiuuquiutianuni. Maja saa jiyaja. Jiya cajiniocuanio. Jiyacunojuanaari quiniutianiya naa cua miiniu”.²⁷ Naa na sequesacari taa socua na caminiutianihua jiya jiuuquiutianuni, naacujiti paari niishiyanu, puetunu na shipinishano casaajanaari shaajeyaquishaquiji shaajenutaniya. Saaja noo casaari cureenutaniya, maja na naata pootiosano casaatej.²⁸ Quiarinio quiquio, Pueyaso shipinishano na niqutiosocoriquiano pajaniyani, cunoori maja na naata shaajasaanu quiniutianiya cutara. Paari jyanijianucua quiniutianiya tii pueyaracaanuni. Pa Pueyasoori jyanohua maninia miiniutianiya pajaniya. Cunora pa shuquiritiare nojuaja. Paari na shuquiritiyani pa timitiasacari nojuaja. Naacujitij, nojuaja pa timitiare jiyanhua pa paniniutia nojuaja, pa puerenutano.²⁹ Nojuajaari puereeta mani, Neyanu ruuretajaca shaajaja, sesa pa miishano catijajuhuj.

13

Taa pa miyani Pueyaso pa timitiniuria

¹ Majaari panitioonu nia tarinitianu. Naa Pueyaso pueya nia quiniucuatej, pueyaraanu panitiojuaca nia quiriquia. ² Naajuhuaaj, majaari rucoojuaca ruuretanu, niaacua nojori tiuquishacari. Nojori panijia nia quiriquia. Noojiaqueya pa supuetanaajinijin-iocuajaari Pueyaso seya masuuquiaari na tiacora, nojori jiyanihacari nareja pueyano naasucua.

³ Nujuatejosano pueyacua taraajejaca nia quiriquia. Tama nia cuaqueyajaaja nia jiyatere juhua nojoritia nujuatejosanojuhuaj, nojoriicua nia taraajenura seetanujuanaa. Naquiya miitiasano pueyacua taraajeja nia quiriquiajuhuaj. Nia niishiriquia, niaari na naata naa miitiasaanujuhuaj.

⁴ Pueyasojuanaacuajaari pa niishitioquiaari pa camitioonura. Cunora, camitioonu pueya cuaara saaja neyacata, necocuata quijia quiiria. Cante camiojuani, nojuaja cuaara tama na cuaqueyajaaja cojuara maja narta pueyano niquiocua na numuetucunura, na camishoo maajinio. Nia niishiri, Pueyasocuajaari naa sacuaraatia miijiaa saniitionutaniya.

⁵ Majaari cumaneeca porocua nia quiniu tama niaarajaaja nia jitianura. Juhua-janiya quijia nia quiriquia nia jiiitiasanota. Nia niishiri, Pueyasocuajaari sequequiaari: "Majaari cua cartenu quiniutianiya nijaniya juhua japueyojua nia quiniuria. Majaari quenaaja cua tiujianu quiniutianiya nijaniya". Cunora pueyanaa, maja nia tacaani. ⁶ Naa seetanujuanaa na sequesanoocua pa tiuushacaritij, pa naata sequenu taa supuetana David naajotaquiaari na sequesanoaujani. Naa sequequiaariiri:

"Jiyaniijia Pueyasocuajaari cua naacuna. Naacuajitij, majaari cua puerenu quiniutianiya. Majaari pueyano na naata taa miiniu janiya".

⁷ Coteenujuanaa nia jiiitianaa pueya nia niishiriojoriquia, noo pojori canapueete shushajanaa nia tojtioquiaari Pueyaso rupaacuajani. Nojoriiri seetanujuanaa Pueyaso tojjijiaa quiquiaari, Jesucristoocua tiuujiaa nojori quiniucua. Juhua nojori quiniucua jiaatiajaca nia quiriquiajuhuaj, taa nojori quiquiaaricuaani.

⁸ Taa quijia Jesucristo quiquiaari tariucuaaanuni, nojuajaari naa quiyajaa. Naa quiniutianiya pueyaracaanuuri. Majaari na jatanu. ⁹ Naaratej, majaari tamaatia niishitiojosano nia tojiniu. Miaquenu pueresanojiniji niishitiojosano cutaraari najuhanaj. Cunoori maja quenaaja na cumaquiniu quiquiaari na tojtiajaca. Naajuhuaaj, majaari pueyacuara secojonaa jiuujia cumaquishaanu quiquiaari nojori miaquesacari Pueyasoro pucoosano seya shujiniji. Pueyaso Sohuanu cutaraari poojia cumaquiquiaa, panijiaa pa quiniuria. ¹⁰⁻¹¹ Saniniuujia, pueyacuara secojonaa jiyaniijiaari maja noo shu na miaquenu quiquiaari cutara, Israel pueya jiyanooshaanura pucoosaaquiaritij. Pueyacuara secojonaa jiyaniijiaari cuno seya nanaca tiuquitiaquiaari Pueyaso Quishaquijianaa puetunu marijarajanaa, cuno nanaca na majiriuutianura tii. Na nanaca shootesano seruuri saniniuujia tiacajiniji jiyatasaaquiaari mij, tii na catijiasaanura puetunujuanaa. Pueyacuara secojonaa jiyaniijiaari tojetaarucujanaa tenujusaquiquiaari maja na miaquenura cuno shu. Nio pa quishacari saniniuujia, paari jiyanohua cumaquishaquianaani Jesucristo cusonuucua pocuara. Cunojiniji, paari seetanujuanaa Pueyaso rupuesano quiyacuajani. ¹² Naajuhuaaj, Jesucristo mosaanura pocuara, nojuajaari Jerusalén tiacajiniji jiyatasaaquiarijuhuaaj, naatej, taa na nanaca shootesano seya jiyatasaaquiaari tamaquiri-cuaani. Nojuajaari naa tama na cuaqueyajaaja tarinitiaquiaari na mosaanura, tojetaarucujanaa jeequesano pa quiniuria puetunu sesa pa miishanojinijijianaa. ¹³ Nojuajaari jiyanohua cararaatia teetsaaquiaari niyacutesanojinia pa niti. Naa Jesu miiniuucua pocuaracuataj, Pueyaso niishiyashijiaa jaara cararaatia miiriquia pajaniya Jesuucua pa tiuuniucuaani, juhuaajaniya na rejeretajaca pa quiriquiajuhuaj. ¹⁴ Pajaniyara, Jesuucua tiuujiacani, nio jiyari maja pa quiquio. Mijiria, shaaquiri pueyaracaanu rishijia quiquio pajaniyarano. Cunora, paari jiyocuaaanu pajaniyarano Pueyaso shipinishano tiacaacua jiaatiaani. ¹⁵ Naa Pueyaso jitianuucua pueyaracaanu rishijia quiquio pajaniyaranoj, nojuaja pa timitariquia pueyaracaanu. Neyanu Jesucristo quiniucua pocuara Secojona, nojuajaari pa tiuquitiaquiaa na Queecua. Nio pa quishacari quiarijiani, majaari Pueyaso paniniu pa seya nanaca. Nojuacuajaari paniquiaa pa shuquiritianura nojuaja cutara. Naacuajitij, pa rupaa pa jiyatere Pueyasora na quiniuria saaja, pueyaracaanu nata pa manihuuaqueetanura nojuaja. Cunocuajaari na panishano. ¹⁶ Naajuhuaaj, majaari nia niyajetanu maninia nia miiniuria niarta Pueyaso pueya. Nojori jiiitaaquishacari nojori panishano, nia jiiitiasano casaajiniji nia niqutiojoriquia nareja nojori. Paa jaara naa miijiaa quirini, paari juhua Pueyasora pa casa niqutioyani. Cuno cutaraari na timitiquiaa.

¹⁷ Cuarta Pueyaso pueyanaa, nia jiitianaa tojitiajaca nia quiriquia. Majaari nojori niishitijosano nia ruuretanu. Nojoricuajaari nioojiaca cojuaquiaa pueyaracaanu, nojori niishishacari Pueyasoori nojori nequesoreenutaniya nia jiitiajaca nojori quiniuucua. Naaratej, shamaatia nojori tojitiajaca nia quiriquia maninia, Pueyaso nojori pohuata-nura shitimia niajanijajini. Naa jaara nojori tojitiaashijiaca quiri, nojoriiri Pueyaso pohuatanutaniya na taraajenuta niajanijajini. Jaara naa quiriritij, niaa cutaraari taraatia quiniutianiyajuhujaj.

¹⁸ Canaacuara nia secojonuuriquia. Canaacuajaari saaja maninia miiniuria saniniuji-uquiaa pueyaracaanuni. Naacujitij, canaa jiuujiaari panaatia quiya Pueyaso niquiara. ¹⁹ Janiyari jiyanohua paniyani cucuara nia secojonura, Pueyaso tiuquitiniuhuara ritia janiya niaacua.

Nio naajiona panishacari maninia Pueyaso miiniuria pueya, na saruhuatasacari pueya-juhujaj

²⁰ Jesucristo shootenuucua na nanaca pocuara, paari niishiyani puetunu Pueyaso seque-sanojuanaari seetanujuanaa pajaniyarano quiniutianiya pueyaracaanu. Naa Jesucristo miishanoocua pa tiuushacaritij, na Que Pueyasoori pa jiyanoocua, juhuajaniya pa rupuenura nojuaja. Pueyasojuaanaacuajaari pa Jiyaniijia Jesucristo samiitiani quiaariuhua macujini. Nojuacuajaari pa cojuana, na panishano pueya pa quiniuucua. jiyanohua maninia pa Pueyaso! ²¹ Neyanu Jesucristoocua nia tiuuniuucua, nojuaja cuaara jataniiria niajanijia tojetaarucujanaa jeenucuasano nia quiniuria, taa na paniyacuajani. Nojuaja cuaara naa miiria niajanijatej, maninia nia tucuatnura puetunu na panishanojuanaa. ¡Pa Jiyaniijia Pueyaso cuaara pueyaracaanu shuquiritiasaaria jiyanohua maninia na quiniuucua! Cuaara naa quiiratej.

²² Cuarta Pueyaso pueyanaa, jiyanohua nia secojijaniijia maja nia ruuretanura secaja rupaata cua shiniujiushacari niajanijia nio cua naajiojina. ²³ Naa niishiri pueyanaa, parta Pueyaso pueyano Timoteori nujuatejojuajini tari tohuatesaarohuacuaa. Nojuaja jaara tarishiyaquiri cucua na tiuquiniuria, janiyari cucua na ruponutaniyani nia niquiniuucua cua quiasacari.

²⁴ Naajuhujaj, quiria nia saruhuatate puetunu nia jiitianaa pueyajanaa, puetunu cuniqui quiniaa parta Pueyaso pueyajanaa. Italia jiyajiniijinio parta Pueyaso pueyari nia saruhuataajuhujaj.

²⁵ Pueyaso cuaara na Sohuanuta cumaquiiria puetunu niajanijajanaa.

SANTIAGO NAAJIONEE

Santiago naajiosano niyaquejeno pueyacuara

¹ Janiyari Santiagoni, Pueyaso seru, Neyanu Jesucristo serujuhuj. Nia saruhuataanijia puetunu tiqiyocua jiyacajinijanaa niyaquejeno Israel doce niqiuhuacuajinio caneno pueyanaa.

Niishitiaja Pueyasojiniji masesano

² Cuarta Pueyaso pueyanaa, shuquiriaatia nia quiriquia niaa jaara taraatia miishaare, niaa jaara naquiya miishaarejuhuj. ³ Niaacuajaari niishiya, niaa jaara Pueyasooqua nia tiuuniuucua saniniujiushaare, niaari socua juhuajaniya sashijiacara quiniutianiya. Naaaraari naa miishaanutaniyaqui nia sashishacari Pueyaso cuaraa puetunu maninijanaa miiria niaarajaatijia. ⁴ Nia rejeretare seetanujuanaa maninia sashijiaa nia quiniuria, majaari quenaaja nia taacanuunu. Niaa jaara naa miijia quiriritij, niaari maninia jeenucuasano quiniutianiya, pueyaracaanu maninia miijia nia quiniuria.

⁵ Tamonu nijanyajinjiniio jaara niishiyaquiri taa na miiniutianiyani, nojuaja cuaraa Pueyaso maseara, Pueyaso na secjosacari. Pueyasoori na niishitiaja niqutionutianiya. Nojuajaari puetunu pueyajanaa niqutioquiaa, capora na quiniuucua. Majaari na juaaniu niaa jaara na masere. ⁶ Nia masesacari, seetanujuanaa nia tiuuri Pueyasooqua, majaari quenaaja nia taacanuunu. Cante na masesacari taacanuujani, nojuajaari juhua paratu piyarojosano mohuaca, naatej, taa paratu tacaroyiaa mohuaca na piyarojosacaricaani. ⁷ Jiyano pueyanotej, Pueyasoori maja na masesano na niqutionu quiniutianiya, noojia niqijijoteja na quiniuucua. ⁸ Noojia niqijijoteja pueyanoori quiarijia maseya na panishano. Tariqui na secjosacari saniniuujia, tamonu casaa maseyari, na paniyaquishacari coteenu na masesanocuaa. Jiyano pueyanoori noojia niqijijoteja pueyaracaanu. Majaari quenaaja na miiniu panishano na tucuatunu quiniutianiya.

⁹ Cua panishano Pueyaso muerasunaa, niaa jaara casamiijiu quiru, naajaa, shuquiriaatia nia quiriquia. Pueyasocujaari nia jiyatequiaari na muerasura, na jitiisanoinijia nia jitianurajuhuj. ¹⁰ Saniniuujia, niaa jaara casamiriaca pueyano quiru, shuquiriaatia nia quiriquia Pueyaso jiyanooshano nia quishacari. Niaacuajaari niishiya niaari tojetaarucujanaa saniitosocoriquiano quiquiaari juucua sesa miijia nia quiniuucua tarijia. Casamiriaca pueyanoori seetanujuanaa juhua naana shuu, majaari na rishiniu. Saaja rupaquijia niqishiya shanohuari. ¹¹ Pananu jaara nasaatia jama, neyonaari sorequee. Na shuuri tiqii. Shanohua niqishanoori shaajequejuhuj. Casamiriaca pueyanoori naajuhuj. Na casami na niqutiojosacarijia na canijianura juucua, canashyaquiji shaajenutaniyajaariuhuj.

Naquiya pa miishacari

¹² Shuquiriaatia quijia cutaraari Pueyasooqua tiuujia, cante taraatia na miishacari rejeretaja saajani. Naa taraatia na saniniujiushaanuucuatej, nojuajaari juhua cutara jiyaniijia tuhuaja niqutiosaanutianiya, pueyaracaanu rishijia pa quiniuria. Cunoori Pueyaso niqutionu panishano na panijiaa, taa na sequequiaaricujani. ¹³ Naa jaara sesa miiniuucua jiaatjaa, majaari sequenu: "Pueyasoqui sesa cua miitini paniya". Pueyasoori maja sesa miijia. ¿Pa Jiyaniijiatucua casaara sesa miitiri pajaniyani? ¹⁴ Saniniuujia, tama poojia sequejaarijia pa shiniujuquiaa sesa pa miiniuria. Naajuhuj, tama pa niishitiajajaarijia pa sapojoquiaa sesa pa panishano pa miiniuria. ¹⁵ Naa sesa miiniuucua pa jiaatiasacaritij, cunora paari sesa miiquiaani. Naa sesa miijia pa quishacaritij, paari cunora shaajasaanutaniyani.

¹⁶ Cuarta Pueyaso pueyanaa, maja tama nia cuaqueyajaaja nia sapojunu. ¹⁷ Puetunu maninia casaajanaa pa masesanoni, cunoori Pueyaso niqutiosano jiyocuacaanuji. Nojuajaari puetunu jiyocuacaanu pa niqishano casaajanaa shipinijioquiaari, mijiria pa cuhatariquiano. Pueyasoori pueyaracaanu maninia quijia. Majaari na jatanu tamaatia na quiniuria, na cojuaaquiniuria pajaniya. ¹⁸ Pueyasocujaari pa sohanu samiitianijioquiaariuhua na rupaacua pa tiuushacari. Nojuajaari pa jiyatequiaari quiarinio na muerasu pa quiniuria. Naacuajitij, taa pueyano tutaacuaa na shuquiriniutia na saaco rishishacariicaani, Pueyasoori naa juhua pa tutaquiaari na shuquiriniutiajuhuj, coteenujanaa na jiyapueranuhua pa quiniuucua. Nojuajaari tariuacuacanujiniji naa pa riurioquiaaritij.

Seetanujuanaa Pueyaso tojitiajaca

¹⁹ Naacuaajiti cua panishano cuarta Pueyaso pueyanaa, cua tojitiare. Puetunu nia-janiyajanaa cuaraa quiriia ritia tojjia, jacaria pocuaja. Cuaara quiriia shiniquiajuhuaj, maja ritia juaajia. ²⁰ Pueyanoori maja na naata Pueyaso panishano miiniu na juaaniutia. ²¹ Naaratej, nia cartere puetunu sacuaraatia nia miiniujuanaa, puetunu sesa nia niishiriojosanojuanaano. Nio pa quishacarini, puera sesa miiniuuri quiquiaa. Naajuhua pueyanaa, juhua maninia naatujua nia tojiri Pueyaso rupaa, taa nia niishitiojosaquiaar-icuaajani. Majaari na ruuretano. Pueyaso rupaacuajaari cumaacaraca tojetaarucujanaa sesa miyashijiacara na jiyatenura pajaniya.

²² Pueyaso rupaa tojjia nia quiri seetanujuanaa. Majaari nia numaa shama nia tojtianunoj. Niaa jaara Pueyaso rupaa tojijaquiri, niaari tama nia cuaqueyajaaja sapojija. ²³ Pueyano jaara Pueyaso rupaa tojiquiaa saaja na numaa shama, nojuajaari juhua noo pueyanojua, na jiquioco niquirii niqutiujinia narejaari. ²⁴ Jaara tacateyaro-hua, na jiquioco niyajetaseequiohuari taamuecate na jiquioco quiriqiaani. ²⁵ Pueyaso rootasanoori jiyanoori maninia, maja quenaaja sesa. Sesu miiniuucua jiiitnio pueyano jaara na tojjia quiri, nojuajaari na naata sesa na miiniu tarinitianu. Cante na numama na racatajani, nojuajaari shuquiriaatia quijia quiniutianiya cutara. Puetunu na miishanojuanaari maninia quiniutianiya pueyaracaanujuhua.

²⁶ Cante na niti rejetyashijiani, nojuaja jaara tama na cuaqueyajaaja jiyaniya: “Janiya cutaraari Pueyaso tojjiani”, cunoori tama na cuaqueya sapojiyajaacujua. Saaja sacuaraatia pocuaja quiya pueyaracaanuuri. Nojuajaari najuhua Pueyaso rupaa tojjia. ²⁷ Cante seetanujuanaa pa Que Pueyaso rupaa tojjiani, nojuaja cuaraa japueyojuaca niquniuucua rucuanera, nojori na naacunura. Cuaara naa miiria mashiquiopuerajuhua, nojori taraajenucusacari nojori na cumanijianura. Naajuhua, cuaara tama na cuaqueyajaaja cojuara, narta pueya na miyaquiniuucujia sesa. Naa miijia pueyanotej, nojuajaari Pueyaso pueyano cutara.

2

Maja cumaati rimiajata pa paniniu pueya

¹ Cuarta Pueyaso pueyanaa, pa Jiyaniijia Jesucristoori shacantuca cumaacajinia quijia. Nojuacuajaari tojetaarucujanaa maninia quijia. Nocua tiuujia nia quishacari, majaari rimiajata nia niquniu tamasa. ¿Pa Jiyaniijiateeri pa sooquiaaricuaa, ninishi quijia pa quishacarijiani? Maja. ² Cunora cua sequesanojinia nia niishiriojore: casamiriaca pueyano jaara nia secojonuujua tiajinia tiuquimia, maniniuqu toqueraca, jaaniishoracaju-hua, ¿taa nia miiniutianiya? ³ Niaari naa sequeja: “Niya quia cajishii pueyanonaa, cajitu maniniuiniyani”. Saniniuujia, toqueeju pueyano jaara jiyacari tiuquimajuhua, jiyareta curuutuquenuyojuua, niaari na sequerecujua: “Cuniqijia quia nujuare”. Casaa maaraja: “Cuniqijia quia cajiri quiaa tii nujuaaani”. ⁴ Niaa jaara naa miiritij, niaari tama nia cuaqueyajaaja jiyateree juhua niarta pueya nequesoreenara. Niaari casamiriaca pueyano jiyaniya nojuaja naasucua socua maninia pueyano casamijiu pueyanojiniji. Naaratej, niaari casamiriaca pueyano shuquiritini panija.

⁵ Cua tojitiare cuarta Pueyaso pueyanaa, ¿majateeri nia niishiniu, Pueyasocuaajaari casamijiuucua pueya saquirojoquiaari nocua tiuujia nojori quiniuria? Nocua tiuujia nojori quishacari, nojori juhua jiyanohua casamiriaca Pueyasora. Naajuhua, Pueyasoori nojori jiyatenutianiya jiyaniijianucua nojori quiniuria, puetunu Pueyaso jii-tiasanojuanaa nojori jiiitianura. Naa miiniutianiya na panijiaacari taa na sequequiaari seetanujuanaacuajani. ⁶ Nijaniyarijiataj, niaari nojori cararojoquiaacujua. ¿Majateeri nia niishiniuujuhua, cuno casamiriaca pueyacuajaari nia nohuasejoquiaa na sapojonuta? Nojori nia jaamitiquiaa nequesoreenaacua, niaacuara na saquirojotanura. Nojori nia miitiuquiaaqui nia jiiitiasano casaanyojua na jaariuutianura puetunujuanaa. ⁷ ¿Majateeri nia niishiniu, nojoricuajaari pa shuquiritiasano Jiyaniijia sesacuaiaajuhua? Pa Jiyaniijia sesa jiyaniquitiuquiaa na soonutaari.

⁸ Puetunu Pueyaso rootasanojinijianaani, nioori socua tojishocoriquiano. Naa naajio-tasano quiyari:

“Pueya nia paniri taa nia paniya tama nia cuaqueyacuuaani”.

Pueyanaa, niaa jaara cuno rootasano miijia quiriqia, niaacuajaari maninia miijia. ⁹ Saniniuujia, niaa jaara rimiajata paniri pueya, niaari sesa miya. Niaari sanitiocoriquiano, Pueyaso niishitiojosano tojiyashijia nia quiniuucua. ¹⁰ Pueyano jaara puetunu Pueyaso rootasanojuanaa tojiquiaa maninia, saniniuujia, jaara niquiriyatu cuno rootasanojiniji tojiyashijia quiri, cuno pueyanocuaajaari Pueyaso tojiyashijia. ¹¹ Pueyasojuaacuajaari sequequiaari: “Maja nia camishoo maaji nia numuetucunu”. Sequequiaarijiaariuhua: “Maja monu”. Naacuajitij, pueyano jaara na camishoo maaji

numuetuqueyaquijia quiri, saniniuujia narta pueyano moyari, cuno pueyanoori Pueyaso rootasano tojiyashijiajuhuaj. ¹² Niaa cumaati niishiya, Pueyasoori na muerasu nequesoreenutaniya taa nojori tojtiaquiaari na rootasanocujani. Nocuaji tama pa cuaqueyajaaja pa cojuare taa pa miiquiaani, taa pa pocuaquiaani. Nia niishiri, paari nequesoreesaanutaniya pa miishanojinijini, taa pa miiquiaari parta pueyani. Cante pueya panijia quiyani taa Pueyaso rootaquiaaricujani, nojoriiri jiyanooshaanutaniya taa nojori jiyanooquiaaricuaa tamasaani. ¹³ Saniniuujia, canapuate narta pueyano jiyanooyashijia quiquiaarini, Pueyaso nequesoreenu juuca puetunu pueyajanaa, nojoriiri jiyanooyaquishaanutaniyajuhuj. Canapuate jiyanoojia cutarani, nojoriiri jiyanooshaanutaniya cutara, taa tamasa nojori jiyanooquiaaani. Nojoriiri shuquiriaatia quiriquiano cuno juuca, Pueyaso nequesoreesacari nojori.

Pueyasoocua tiuujiaaari maninia miijiaa

¹⁴ Cuarta Pueyaso pueyanaa, ¿maninate pueyano jaara sequere: “Janiyacuajaari Pueyasoocua tiuujiani”, nojuaja jaara maninia miyashijia quiyajaa? Nojuaja jaara maninia miijiaa jatanishoo quiyajaa, najuhuaa sequeyari: “Pueyasoocua tiuujianijia”. ¹⁵ Naacuajitij, tamonu parta Pueyaso pueyano jaara pa sequesee: “Maja cua jiitianu toque. Maja quenaaja cua miaquesocoriquiano cua jiitianujuhuj”, ¿taa pa miyani? ¹⁶ ¿Maninateeri paa jaara na sequereni: “Juhujaniya quia quiaarohua. Quia miaquesuhua. Toque quia cushishuhujuhuj”? Maja. Paa jaara quenaaja na niqitioyaquiri na panishanoni, pa sequesanoori najuhuanaj. ¹⁷ Naajuhuj, pueyano jaara sequere: “Jesucristoocua tiuujianijia”, jaara seetanujanaa Pueyaso rootasano tojiyaquiri, na sequesanoori najuhuanajuhuj. Jiyano pueyanoori maja seetanujanaa Jesuucua tiuujia. Paa jaara seetanujanaa Jesuucua tiuujia quirini, pocua maninia miijiaa quiriujuhuj. Maninia miyashijiaari maja seetanujanaa Pueyasoocua tiuujia.

¹⁸ Pueyano jaara tamonu sequeriquia: “Quiaari sequeya quiaa Jesuucua tiuujia cutara. Janiyari saniniuujia maninia miijiani. ¿Taa cua niishiniutianiyani quiaari seetanujanaa Jesuucua tiuujia, quiaa jaara maninia miyaquiri? Maja cua naata na niishiniu. Janiya cutaraari quia niishitiniutianiyani janiyari seetanujanaa Jesuucua tiuujia cutarani, maninia cua miishacari”. ¹⁹ Pueyaso Rupaacua quia tiuuniucua, quiaari niishiyacuja Pueyasoori jiyaniijajanaa. Cuno quia tiuuniuuri maniniacuja. Naajaa, nia niishiri, samaruhuari cuno niishiyajuhuj. Na puerenuta nocuaji tetcatiuyari. ²⁰ Mosanucuanaa, ¿majateeri nia niishiniu? Jesuucua tiuujiaa nia quishacari, niaa jaara maninia miyashijiaa quiyajaa, Jesuucua nia tiuuniuuri najuhuanaj, nia tojiyaquishacari Pueyaso. ²¹ Niaacuajaari niishiya taa Pueyaso saniquiaari pa pupetana Abrahamni, na niishiniuria seetanujanaa nocua tiuujiatee. Pueyasoori naa na saniquiaari: na sequequiaari: “Abrahamnaa, quia niyanuniyojua quia more cucuara quia catijiasocoriquiano”. Majaari Abraham ruuretano quiquiaari Pueyaso sequesano nojuaja. Naaratej, Pueyasoori naa sequesquiaari: “Jiyanojua maninia Abraham, cua tojjia cutara”. ²² Naacuajiti cuarta Pueyaso pueyanaa, naa Abraham tojiniucua Pueyasotej, paari maatia niishiyani nojuajaari seetanujanaa Pueyasoocua tiuujia quiquiaari. Naajuhuj, Pueyaso sequesano na miishacari, nojuajaari Pueyasoocua tiuujia quiquiaari tojetaarucujanaa. ²³ Naa Abraham miiniucuatej, nojuajaari tariucuaaanu Pueyaso rupaajinia nojuajinjij naajiotasano tohuateequiaari. Naa sequeyari:

“Abrahamni Pueyasoocua tiuujiaari. Naa na tiuuniucua Pueyasoocuatej, Pueyasoori na jiyatequiaari juhua tojetaarucujanaa sesa miyashijia na quiniuria”. Naa Abraham quiniucua Pueyaso tojjiatej, nojuajaari sequesaaquiaari Pueyaso rupenata.

²⁴ Naacuajiti pueyanaa, Pueyasocujiaari na sequesano miijia jiyanooquiaa. Maja cutaraari na jiyanooni noo pojori, nocua tiuuniu sequeja najuhuanatej. ²⁵ ¿Niaate niishiyajuhuj taa Pueyaso jiyanooquiaari Jericó tiacajinjini paanatucuaani, nooj, Rahab jiyanihanotej? Pueyasoori na jiyanooquiaari neyatu na quiniuriajuhuaj. Na jiyanooquiaariiri maninia na miiniucua caapiqui pueyano Israel pueyajinjini. Rahabri cuno pueya jamojoquiaari na tiaco. Na nuhuaji, nojori mashiquiquiaariuhua tamocoori, narta Jericó tiacajinjini pueya puecyaquiniucujaj cuno pojori. Rahabri naa maninia miiquiaaritij Pueyasojinjij na tojishanoocua na tuushacari. Niishiquiaariiri Pueyasoori Israel pueya cumaquina quiquiaari. ²⁶ Nio pohuatanoori pa niishitiojia, naatej, taa pa cuaqueya macu quiya sohuanuucuaani, naajuhuj, paa jaara Pueyaso sequesano miyashijia quirini, paari najuhuaa sequeyani: “Jesuucua tiuujianijia”.

3

¹ Cuarta Pueyaso pueyanaa, maja cumaati puera nijaniyajinijinio jiaatianu Pueyaso rupaa niishitiojonaa nia quiniuria. Niaacuaajaari niishiya, Pueyaso rupaa niishitiojonaari socua jiyanoehua saniitiosaanutaniya tamasacajiniji, nojori tojtiaaquiniuucua tama nojori niishitiojosanojuaaja. ² Puetunu pajaniyajanaari sequeyarucua miiquiaa sesani. ¿Teyano pueyanote tojetaarucujanaa narta pueyano najiquitiaquijia na pocuasacariní? Shaaquí. Pueyano sequesano jaara puetunu maninijanaa quiri pueyaracaanu, cuno pueyano maara seetanujuanaa maninia pueyano quiri cutara. Cuno pueyano maara na naata puetunu tama na cuaqueyajaaja jiiitanu niishiriquiajuhua sesa na miyaquiniuucua. ³ Niaacuaajaari niishiya, caballo rupaama jaara niasaare na niqutitijotaja, na camaru na tojinuria, na netesacari, na camaruuri puetunu na caballo cuaqueyajanaa niqutitijotaa na panishaco. ⁴ Puereetuca buqueeri naajuhua. Shiitaniyojua na niqutitijotaja jiiitajaariuhua. Jiyanoehua paratu piyarojosacari, naajaa, na camaruuri saa cunotaja na niqutitijotaa na panishaco. ⁵ Pa nitiiri naajuhua, shiitaniyojua casaaniyojuaari pa cuaqueyajinia shipinishano. Naajaa, jiyanoehua pocuanu niishijaari. Sesa pa miitiyari. Nojuajaari juhua maniyashi. Maniyashi jaara jaare puereetuca cuhuariquiajia, cuno maniyashiiri puereetuca maniria pacusee. Cuhuariquiaari puetunu catemaajanaa. Pa nitiiri naajuhua. ⁶ Pa nitiiri seetanujuanaa juhua mani quiya pa cuaqueyajinia. Paa jaara sesa pocuareni, paari puetunu pa cuaqueyajanaa sesoyani. Pa nitiiri puetunu sesa niishijajanaa. Paa jaara sesa pocuare pueya niquiarani, puetunu pueyajanaari pa sequesano caminiujuquiaa tamasaca niquiarana. Pa nitiiri Sesaaca poonijiotasano. Naacuajitij, sesa pa pocuasacari, paari puetunu mijiria pa quiniujianaa sesoquiaani. ⁷ Pueyanoori na naata jiyartutenu puetunu casaajanaa: jaacuatujuaca, roshiyocuatujuacajuhua, moojinijinio casaanio. Seetanujuanaari, pueyari tari naa na jiyartuutejoquiaa. ⁸ Maja cutaraari pa naata jiyartutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura. ⁹ Paari jiyano pa nitiitaja pa Que Pueyaso maninihuacetaquiaani. Naajuhua, paari Pueyaso shipinishano parta pueya sesacaciaa natajuhua. ¹⁰ Naacuajitij, pa rupaamaji tohuataari maninia sequesano, sacuaraatia sequesanojuhua. Cuarta Pueyaso pueyanaa, ¡maja cumaati naa pa quiniutij! Maja maninia naatej. ¹¹ Samo nacajiniji pueyaracaanu pacaretajaari shocuanacu mohuaca. ¿Jataquiaate soj? ¿Pianacute saniniuuja pacaretaquiaacujua? Maja. Samo nacaari pueyaracaanu maniniuniacu quijia. ¹² Cuarta Pueyaso pueyanaa, ¿mariyajate na naata muetunu shucuenajara? ¿Natecate sacamanajara muetujuajuhua? Maja. Naajuhua, maja pa naata pianacu mohuaca taquitianu cuari maniniujiniji. ¿Mohuacacua casaara jatara tamaatiunacurani? Naajuhua, paa cuara pueyaracaanu maninia pocuara saaja. Maja cumaati pa pocuasano pa cojitiniu sesa pocuasanota.

Niishijia pueyano

¹³ Tamonu nijaniyajinijinio jaara niishijia quiri, nojuaja cuara juhujaniya maninia mijia quiri nareja, maja pueya shocoteja. Jaara naa maninia quijia quiri, pueyari niishiniutianiya nojuaja seetanujuanaa niishijia. ¹⁴ Saniniuuja, nioojia jaara najiquitishano quiri, niishijia nia quiaquiniuucua juhua niarta Pueyaso pueyano, niaari seetanujuanaa mosanucua. Naajuhua, nia miishano jaara quiri nia shocotanura niarta Pueyaso pueya saaja shuquiriaatia nia quiniuria tamajaaja, majaari nia jiyaniuria niaari niishijia. Naa mijia nia quishacaritij, niaa jaara tama nia niishitajajaaja shuquiritari, niaari mosanucua saaja. Nia sequesacari: “Niishijia cutaranija”, niaari sapojiya. ¹⁵ Cuno nia niishitajaari maja jiyocuaacuanu Pueyaso niishitaja. Cuno niishitajaari tama nia niishishanojuaaja, mijiria niishishanojuhua, Sesaajanaa niishishanonio. ¹⁶ Pueyanaa, tee Pueyaso pueya juaatishano quiya tamasaca jaara na shocotane, naajuhua, pueya miishacari saaja tama na panishanojuaaja, tii quiyari juayonuujutanu, puetunu sesa miniuujianaanio. ¹⁷ Saniniuuja, cante Pueyaso niishitaja jiiitaa cutarani, nojuajaari maninia mijia pueyano cutara. Jiyano pueyanoori maninia quijia puetunu pueya niquiarajanaa, jyanootio, jacaria pocuaja. Majaari na niishiniu ritia juaniu. Pueyacuara taraajejaari. Majaari na niishiniu cuaracashijionu pueyacuara. Pueyaracaanu seetanujuanaa sequeyari. ¹⁸ Naajuhua, cante juaatoyano jyanootiootejani, nojuajaari jiyanoehua shuquiriaatia quiniutianiya Pueyaso shuquiritishacari nojuaja maninia na miiniuucua.

4

Mijiria casaacua jiaatijacajiniji pohuatasano

¹ ¿Niaate niishiya casaara nia juayonuujutaquiaa tamajaaja pueyaracaanuni? Niaari naa quiyaquij sesa miiniuucua nia jiaatiasacari. Nioojiaari najiquitishano quiquiaa nia panishanoocua nia jiaatiasacari sacuaraatia. ² Naaratej, nia panishano nia maseyaquishacari,

niaari na casamiicuaaji pueyano moquiaa. Niaari naa miiquiaa puera nia jiaatiasacari nia panishanoocuatej. Nia panishanoocua nia jiaatiasacari jiyanoohua, niaari cunora miriyojotaquiaa. ¡Niaari socua piyotaariquiaaqui! Niaari naa quiyaqui Pueyaso nia secojiyaquiniuucua nojuaja niqutionura niajaniya nia panishano. ³ Naajuhuaaj, niaa jaara na secojore, majaari nia masenu quiquiaa nia masesano. ¿Casaara nia maseyaquiquiaanoj? Nia sequereeraj. Niaari sesa nia jiaatianuta na masequiaajuhuanajaj. Niaari nia jiaati-asanoocua masequiaa juucua, tama nia cuaqueyajaaja nia shuquiritiniuria. ⁴ ¡Pueyanaa, niaaqui Pueyaso rootasano ruuretajacajuhuanajaj! ¿Majateeri nia niishiniu? Cante mijiria sesa miijiaa miishano timitiajacani, nojuajaari Pueyaso paracara quirii. Niaa jaara naa miijiaa quiniu paniyajuhuaaj, niaari tari Pueyaso paracara quirii. ⁵ Tariucuaaanu Pueyaso Rupaajinia nia naajiotasanoori quiyaqui:

“Pueyasoori na Sohuanu niaquiaari poojiajinia, nera na cojuanura pajaniya. Jiyanoohua na paniniutia pajaniya, Pueyaso Sohuanuuri pa jamuequiaa juucua saaja Pueyasora pa quiniuria”.

⁶ Naajuhuaaj, Pueyasojuanaari jiyanoohua maninia naacuquiaa pajaniya, jyanootio na quiniuucua. Na Rupaajiniaari nia naajiotasano quiyajuhuaaj:

“Pueyasoori noo pueya paracaajia, narta pueyajini juhua socua cutara pueyano quiniu panijiatej. Saniniuujia noo pojori maniniucuaarjia, nia sequeracatej: ‘Maja cua naata miiniu maninia tamajaaja. Pueyaso cuaara cua naacuura’”.

⁷ Naarate pueyanaa, seetanujuanaa Pueyaso tojtiajacara nia quiriqia. Cumaatia nia nujuatare Sesaaca, maja na shocotanura niajaniya. Niaa jaara naa miiritij, niaacuaji mashiniutianiyari. ⁸ Niaa jaara Pueyaso rupuere, Pueyasoori nia rupenuutianiyajuhuaaj. Sesa miijiacanaa, cua tojtiate. Taa curuutucojuanucua shuquirioyacuuaani, niaa tama nia cuaqueyajaaja nia jeequejorejuhuaa sesa nia miishanojiniji. Noojiaqueya Pueyaso panijiaaari mijiria sesa miishano paniquiaajuhuaaj. Cuno pueya cuaara noojia jeequejoora maja socua noojia na niqijiotenura najuhuanaj. Cuaara saaja Pueyaso panijiacara quiriia cutara. ⁹ Sesa nia miiniuucua nia nujuquature, nia taraajerejuhuaaj. Nia sapiyonuure. Sesa miishano nia saroojotanu nia jataniri namijiaacatenuecua. Sesa miiniuujini nia shuquirini nia jataniri taraajenuucuaajuhuaaj. ¹⁰ Niaa jaara nioojiajinia sequeriquia Pueyaso niquiara: “Maja cua naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenutaniya jiyaniijianucua nia quiniuria.

Parta Pueyaso pueyacuara rimiaaqueyashijia pa quiriqiaj

¹¹ Pueyanaa, maja sacuraatia nia rimiaaquenu niarta Pueyaso pueyacuara. Maja maninia naatej. Cante narta Pueyaso pueya sesacaani, Pueyaso Rupaajinia naajiotasano tojyashijiaari jyanotej. Niaa jaara naa miiritij, niaari Pueyaso Rupaajinia naajiotasano sesaaca. Naajuhuaaj, niaari tama nia cuaqueyajaaja jiyateya juhua jiyaniijiaara, niarta pueya nequesoreena nia quiniuria. Naa nia miishacaritij, niaari Pueyaso rupaa tojyashijiacara quiqui. ¹² Pueyasojuanaari tamajaaja Jiyaniijiajanaa. Nojuacuajaari na rootasano niishitijia pajaniya. Nojuajaari niquiriyatujua pa nequesoreena, pa sanini-ujiuriquianojuhuaaj. Nojuajaari cumaacaraca pocuaji na tacunura, na shaajanura pajaniyajuhuaaj. ¿Canteeri quiajanianijia, quia saniniujiuniuria tamasaca, juhua nojori jiyaniijiani?

Majaari pa niishiniu tariquiria

¹³ Pueyari naa sequejaca: “Canaari tariqui quianutaniya tamonu tiacajiniani. Canaari cuniqui shocotenutaniya niquiriyatu marijiani canaa niqutiojosacari tii canaa casami. Canaari queraatia cumaneeca masenutaniya canaa casami samini”. Cua tojtiate nia sequeracanaa. ¹⁴ Majaari nia niishiniu taa nia juhuaquenuutaniyani. ¿Niaatucua taa sequereni niaa jaara macu juhuaquema saaja? Nocuaji majaari nia sequenute pueyanaa. Pa quiniuuri juhua shushiquiani. Naatej, taa shushiquiacuaani rupaquijia niqushiyari, na nuhuaji tajimiohuari, paari naajuhuaaj. ¹⁵ Naaratej, nia nia sequere cutara: “Pueyaso jaara paniri, canaari tariqui quianutaniya poonijionuucuan”. Naa cutarate maninia sequenu. ¹⁶ Niaari saniniuujia sequeriquiaacujua: “Janiyari tariqui quianutaniyani cua miiniu panishano cua miiniuria”. Naa nia sequesacaritij, niaari jiyaniya nia naata tamajaaja miiniu puetunu nia panishanojuanaa. Naa nia sequesacari juhua nia miishocoriquianotej, niaari najuhuaana nia rupaa riuticoneetequiaa puera, juhua niishijia pueyano. Niaa jaara tama nia cuaqueyajaaja nia jiyateya juhua tariqui miishocoriquiano niishijiatej, cunoori jiyanoohua sesa. ¹⁷ Naajuhua pueyanaa, niaa jaara maninia miyaquiri, maninia miiniu niishijia nia quishacari, niaari tari sesa miijiaa.

¹ Nia tojitiare, casamiriaca pueyanaa. ¡Juhucarijia nia sapuere! ¡Nia sariyocature! ¡Niaari naquiya miiniutianiya taraatia! ²Niaari jiyanoehua casamiriaca. Cuno nia jiiitasano casamini, najuhuana moqueyari. Surequeyari nia maniniuquiya toqueya miaqueya-juhuaj. Naacuajitij, puetunu nia jiiitasanojuanaari moquenutaniya. ³ Nia paatijosano oroni, nia cumaneecanio, najuhuana tiyarashiyari. Naacuajitij, pa Nequesoreenaari maatia niishiniutianiya niaari sacuraatia jamuejaca quiquiaari. Naa miijiaa nia quiniuucuatej, niaari saniitosaanutaniya. Niaari socua shaajasaanutaniyaquij. Niaari najuhuana queraatia casami paatijiya shuquiriaatia nia quiniuria tamajaaja mijiria. Saniniuujia, nio pa quishacariiri quera pa Jiyaniijia tiuquishacariuhua na saniniuujuniuria pajaniya. ⁴ ¡Jiyaniijiajanaari nia poonijioteseano pueya tojiquiaa! Nojoriiri sariyocuatuiya nia cumaneecajiniji nia niquitioyaquiniuucua nojori poonijionuunujiniji, niaara na senoonuucua nataacuaca nia cuhuariquiajiniji. ⁵ Mijiria nia quishacarijia, niaari shuquiriaatia quiquiaa puetunu nia panishanojuanaa nia jiiitasacari. Naa shuquiriaatia nia quishacaritij, niaari juhuajaniya shiyoshiya juhua puecoosoriquiano cushiyari. Niaari naa miishaanutaniya-juhuaj. ⁶ Niaari maninia miijiaa puecooquiaa. Majaari nojori nujuatanu quiquiaa niajaniya, nocuara nia tonujusacari nia cuaracashiniutia najuhanaj. Naacuajiti casamiriaca pueyanaa, niaa cumaati puetunu nio niaara sequesanojuanaa tojitiaa.

Juhuajaniya pa sashiri pa Jiyaniijia

⁷ Naacuajiti cuarta Pueyaso pueyanaa, juhuajaniya nia sashiri pa Jiyaniijia cuaara tiuquihuua. Cuhuariquia camaruuri na natanu nuhuaji naa sashiquiaa marujuhuaj, maninia na natau moritianura. Maru sashiyajaariuhua cuaara niiria, na natau jajau na querajaacaatiniuria. ⁸ Naa nia sashirijihuuj. Majaari pa Jiyaniijiaacuaji nia pishiniu. Nojuacuajaari quera tiuquiniutianihua. ⁹ Cuarta Pueyaso pueyanaa, majaari niarta pueyacuara nia rimiaaquenu nojori nia soonuta, niaa mariqui saniitosareeri. Nia niishiri, pa saniniuujinia Pueyasoori pocua catecanoya. Tari juhua pa tohuateyaji nujuuari. Nojuajaari seetanujuanaa pa saniniuujunia cutara. Nocuaij maninia pa quirij. ¹⁰ Pueyanaa, juhuajaniya pa rejeretarejuhuaj, paa jaara naquiya miishaaren. Naatej, taa tariucuacaanu Pueyaso sequesano caminiuujinia rejeretacoquiaari taraatia nojori miishacaricuuaani, naa nia rejeretarejuhuaj. ¹¹ Paari niishiyacuajani, Pueyasoori naquiya miiniu rejeretajaca pueya shuquiritaja. Maninia na miiniutianiyari. Niaacuajaari tari pohuatasaaquiarijihuuj taa supuetana Job rejeretacuajiaari naquiya nia miishacaricuuaani. Na nuhuaji cutara, Pueyasoori jiyanoehua maninia na miiquiaariuhua, jiyanoehua pueyacuara taraajeja na quiniuucua, jiyanoojiaariuhua.

¹² Cuarta Pueyaso pueyanaa, nia tojitiare. Nia pocoojosacari, tamonu jaara quia sequesanoocua tiyaguiri, naajaa, majaari najuhuana sesa pocuanu. Maja cutaraari sequenu: “Cua sequesanoori seetanujuanaa juhua jiya cajiniocuaja. Majaari na shaajenu quiniutianiya”. Majaari sequenujuhuaj: “Cua sequesanoori juhua nio jiya. Majaari na shaajenu quiniutianiya”. Majaari naa pocuanu sacuraatiatej. Nia sequesano jaara seetanujuanaa quiri, nareja nia sequere: “Taaquiririnij”. Naajuhuaj, nia sequesano jaara quiri “maja”, cuaara naa quiri seetanujuanaa. Majaari nia sequesano nia maatenu socua, Pueyaso mariqui nia saniitioreeri.

¹³ Tamonu niajaniyajinijinio jaara naquiya miishiya, nojuaja cuaara Pueyaso secojoora. Shuquiriaatia nia quishacari saniniuujia, Pueyasora nia jaaquequejore. ¹⁴ Cusosu nia quishacari, Pueyaso pueya jiiitanaa nia sequere nojori cuaara secojoora niaacuara. Nojori cuaara shiyocua cojuata cusosu quiaara, pa Jiyaniijia sesajinia nojori secojosacari. ¹⁵ Nia secojosacari Pueyaso seetanujuanaa nocua nia tiuuniutia, cusosuuri naatanutaniuhua. Nojuaja jaara sesa miiquianu, Pueyasoori na jiyanooniutianiya sesa na miishanojiniji. ¹⁶ Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secojore tama niaacuaraaja. Pueyasocua nia naatanijiorohua. Maninia pueyano secojosacari jiyanoehua, cunoori jiyanoehua cumaacaraca. Pueyasoori na secojosano tojijia. ¹⁷ Tariucuacaanu pueyara Pueyaso sequesano caminiuujinia Eliasni, nojuajaari nareja pueyano quiquiaarijuhuaj taa pajaniyacuaani. Naajaa, nojuaja jaara Pueyaso secojoquiaari maja maru niiniuria, majaari maru niiniu quiquiaari juuujanaraca marijia cuaara shocojoquiaarijiaatijia, socua seis rancano. Majaari maru niiniu quiquiaari tojetaarucujanaa. ¹⁸ Elias jaara pacutequiaariuhua secojonu maru na panishacari, maruuri shusha niqiaariuhua. Pueya nataacuacaari jiyacari shusha moritiaquiaariuhua.

¹⁹ Cuarta Pueyaso pueyanaa, tamonu niajaniyajinijinio jaara Pueyaso rootasano tojijashijara quiriuhua, tamasaaca jaara na niqiri, cuaara na rootaaranaj, maninia miijia na quiniuhua. ²⁰ Nia niishiri, cante sesa miijia tacatorohua Pueyasocua sesa na miiniuujinijini, nojuajaari cuno sesa miijiaacuaji tacuya maja senota na shaajasaanura.

Pueyaso na jiyanootiyajaariuhua puetunu sesa na miishanojinijijanaa. Tariucuaja cua panishano pueyanaa.

COTEENU PEDRO NAAJIONEE

Pedro saruhuatascari narta Pueyaso pueya

¹ ¿Niaate quiyjaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatanua cuna quiniuria. Janiyari nio naajiyja niaacuarani, noo pojori-icuara canapuate tiquiyocua niayaquecojoquiaaricujani: Ponto jiyajinia, Galacia jiyajinia, Capadocia jiyajinia, Asia jiyajinia, Bitinia jiyajinianio. ² Tariucuaaanu, pa Que Pueyasocuaajaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristoocua nia tiuniuria. Naacuajitij, Jesucristo shootenuucua na nanaca, Pueyasoori nia jiyanoocuaa, juhua tojetaarucujanaa jeequesano nioojia quiniuria. Na Sohuanuuri nia jataniquiaa tojetaarucujanaa maninia miijiaca nia quiniuria, seetanujanaa Jesucristo tojjijaca nia quiniuriajuhuaj. Naa Pueyaso panishano pueya nia quiniuria, nojuaja cuara cumaquiria jiyanhua niajanaya. Cuara nioojia cajitiiria pueyaracaanujuhuj.

Pa niishiri, paari jiyanhua maninia miishaariquianoni

³ Pa Jiyaniijia Jesucristo Que Pueyaso pa maninihuaqueetare, jiyanhua maninia na miiniucua pajaniya. Jiyanhua na taraajenuucua pocua, na pueya pa quiniucuajuhuaj, nojuajaari pa niishitiquiaari paari juhua quiariniora samiitianijiosaanutanihuani. Paari naa samiitianijiosaanutanihuani, naatej, taa Jesucristo samiitiaquiaarihuacuaani. Naa pa niishishacari taa pa miishaanutaniyani, paari shitimia sashiquiaani pa miishaanura taa Pueyaso miini pania pajaniyacujani. ⁴ Naacuajitij, niaari niishiya niaari seetanujanaa masenutaniya puetunujanaa niaarano Pueyaso jiiitasano jiyocuaaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesosaanu. Maja na naata tariucuashiniujuhuaj. ⁵ Pueyasooocua nia tiuniucua, nojuajaari na cumacata nia cojuaquiaa. Pueyaracaanu nia cojuanutaniyani nojuaja cuara nia rijiorejaatijia mijiria taraatia nia quiniujiniji, tojetaarucujanaa jatanishano quiijaca nia quiniuria. Jiyanhua maninia Pueyaso miini panishano na pueyararoni, shusha jiyacari niquishaanutaniyani.

⁶ Cunora niaari shuquiriaatia quiya. Saniniujia, niaa naasucuaari taraajeya rupaquijia nia miijosacari naquiya mijiria. Naajaa, niaa jaara naquiya miishaare, cunoori maja najuhuanaj. ⁷ Naquiya pa miiniuni, cunoori pa saniniujiushaanura paate seetanujanaa Pueyasooocua tiuujiacani. Niaacuaajaari niishiya, pueyari jiyanhua oro panijia. Saniniujia, Pueyasooocua pa tiuniuni, cunoori jiyanhua socua panishano orojiniji. Niaacuaajaari niishiya, pueyari oro catijiaja, na sanishaanura maninia oro seetanutejanaa. Naajaa, seetanujanaa maninia oroori shaajajuahuaj. Saniniujia, paa jaara mijiria naquiya pa miini rejeretajaca quirini, Pueyasooocua tiuujia pa quiniucua, cunoori socua jiyanhua maninia cuno shaajaja orojiniji. Pueyasooocua nia tiuniu jaara saniniujiushaare juhua orojuhuj, jaara seetanujanaa maninia quiri, Pueyasoori nia timitianutaniya. Naacuajitij, Jesucristo muetasacari pocua, Pueyasoori jiyanhua maninia miiniutaniya niajanaya. Jiyaniijianucua nia jiyatenutaniyani.

⁸ Majaari juhuanujuaja Jesucristo nia niquniu. Naajaa, niaacuaajaari na panijia. Nia niquishoo na quishacarijia, naajaa, niaari nocua tiuquua. Niaari na timitiaquiaa jiyanhua. Tojetaarucujanaa jiyanhua nia timini quiniucua nioojiajinia, majaari nia naata na pohuatanu nia rupaata. ⁹ Niaari naa timiquiaa, tariucua jatanishano nioojia quiniucua, Jesucristoocua nia tiuushacari.

¹⁰ Tariucuaaanu, pueyara Pueyaso sequesano caminiujunaa pueyari poojotaquiaari taa Pueyaso jiyanooniutaniya nio pa quishacari pueyani, na pueya nojori quiniuria. Nojoriiri tama nojori naajiotasanojuaja suraatia serojojuaca quiquiaari, Pueyaso Sohuanu niishitishano nojori naajiotasanoni. Nojoriiri jiyanhua niishiniu paniquiaari taa Pueyaso jiyanooniutaniya pueyani. ¹¹ Jesucristo Sohuanucuaajaari juhuacarijia nojori niishitiquiaari taa Pueyaso jiyarosocoriquiano Pueyano miishaanutaniya naquiya coteenuni. Nojori niishitiquiaarijaarihuaj, naquiya na miini nuhaji saniniujia, nojuajaari Jiyaniijarajanaa jiyatesaanutaniya, shacantuca quijia na quiniuria. Naaratej, nojoriiri maninia na niishiniuria saniniujuquiaari juucua, cantejaara cuno quiniutaniyani, Pueyaso Jiyarosocoriquianoni, naajuhuj, taacari na muetanutaniyani. ¹² Pueyasoori saaja nojori niishitiquiaari, na Sohuanu poojotanishano nojorini, cunoori maja tama nojorirajaaja na quini quiquiaari. Cuarta Pueyaso pueyanaa, ¡cunoori niaarano quiquiaari seetanujanaa! ¡Tariucuaaanu poojotasano Pueyaso Jiyarosocoriquianojiniijiri tari tohuateequiaari! Jiyocuaaanuji jiyarosano Pueyaso Sohuanuuri

Pueyaso rupaa pohuatanaa cumaquiquiaa, taa na cumaquiquiaari Pueyaso Jiyaroscorigianojiniji pohuatanaacuaani. Naacujitij, quiari naataja nia tojishano Jesucristojinijini, cunoori supuetanaa pohuatasano quiquiaaricuaaja. Pueyaso seyajanaacuaajaari pueyarano Pueyaso miishocorigianoocua maatia niishiniuucua jiaatiajuhuaj.

Pueyasoori paniya saaja maninia miijiaca pa quiniuria

¹³ Cunora, cuarta Pueyaso pueyanaa, jeenucuasano nia quiriquia. Jesucristo muestasacari pocua, Pueyasoori jiyanoohua maninia miinutianiya pajaniya. Cunora, saaja naa nia miiniu panishaanuucua jiaatiajaca nia quiri. Majaari nioojia niqijijotejaca nia quiniu. Maninia niishiriojojuaca nia quiriquia. ¹⁴ Tarijia, niaari tama nia cuaqueya panishanojuaja miijiaca quiquiaari, Pueyaso niishiyashijiacara nia quishacarijia. Quiarijia saniniuuja, niaari na tojjijaca cutara. Naaratej, na muerasu nia quiniuucua, majaari naa quijiacara nia quiniu socua. ¹⁵ Saniniuuja, saa maninia miijiaca nia quiriquia. Pueyasocuaajaari nia saquiriojojuajaari naa tojetaarucujanaa maninia miijiaca nia quiniuria, juhua nojuajuhua. ¹⁶ Tariucuacaanu Pueyaso sequesanoori naa naajiotasano quiyajuhua:

“Tojetaarucujanaa sesa miyashijiacara nia quiri, taa janiyacuaani”.

¹⁷ Nia secojosacari, niaari Pueyaso sequequiaa, “cua Quenea”. Cunoori maniniacuaaja. Naajaa, majaari nia niyjetanu cutara, nojuajaari puetunu pueyajanaa nequesoreenutaniya sesa pa miishanojiniji, maninia pa miishanojinimio. Majaari rimijata na sanitionu quiniutianiya. Cunora, mijiria nia quishacarijia, nia puerenuta tama nia cuaqueyajaaja nia cojuare, niaa mariqui na tojyashijiacara quirohuari. ¹⁸ Pa supuetanaa quiniuucua sesa miijiaca, paari naa miijiacara quiquiaarijuhuaj. Pueyaso cutaraari naa sesa pa quiniujiniji pa jataniquiaari maninia na muerasu pa quiniuria. Niaacuaajaari niishiya, majaari Pueyaso masenu quiquiaari pajaniya orota, platatanio, shaasteja casaata. ¹⁹ Nojuajaari pa masequiaari tama Neyanuniyojua nanacatajaaja. Jesucristoori tama na cuaqueyajaaja tarinitiaquiaari pocuara na mosaanura, na nanaca shoonuucua pa jiyanooshaanura. Tariucuacaanu, borrego jaara Pueyaso niqiuara mosaaquiiaari na camaru niti, cuno borregoori tojetaarucujanaa borrego maniniu quiquiaari. Naajuhua, Jesucristoori tojetaarucujanaa maninia miijia quiquiaari. Naacujitij, nojuajaari tojetaarucujanaa maninia pueyano quiquiaari pa niti na mosaanura. ²⁰ Jiya shipiniyaquishacarijia, Jesucristoori tariucua pueya niti mosocorigiano sequesaaquiiaari, sesa miijiaca jiyanooshaanura. Saniniuuja quiari naataja, nojuajaari shusha mijiria muetaquiiaari pocuara na mosaanura, taa Pueyaso miiniu paniquiaari pajaniyaracujani. ²¹ Naa Jesucristo miiniuucua pocuaratej, niaari Pueyasocuaa tiuququiaa. Pueyasocuaajaari Neyanu samiitianiquiaariuhua. Na jiyatequiiaariiri Jiyaniijijanaa na quiniuria, shacantuca cumaacaraca quijia na quiniuria. Naacujitij, niaari quiarijia Pueyasocuaa tiuya, na samiitianiniuria nijaniyajuhua. Naaratej, niaari juhujaniya sashiya, shacantuca quijiacara nia jatanishaanurajuhua.

²² Seetanu rupaajanaa tojjitajaca nia quiniuucua, nioojiaari tari jeequejosaaquiiaari, niarta Pueyaso pueya panijiacara nia quiniuria seetanujuanaa. Naaratej, seetanujuanaa panitiojuaca nia quiriquia puetunu nioojitajanaa, maja sesa nia niishiriojonuta que-naaja. ²³ Naa panijiacara nia quiri, jatanishano pueya nia quiniuucua. Pueyaso rupaacua nia tiushacari, niaari juhua roosaaquiariuhua, pueyaracaanu quijiacara nia quiniuria seetanujuanaa. Pueyaso Rupaacuaajaari pueyano samiitianiija, saminio na quiniuucua. Naacujitij, niaari shaajeyashijiacara jatanishaaquiiaari pueyaracaanu Quijia rupaacua nia tiuuniuucua. ²⁴ Tariucuacaanu Pueyaso Rupaajinia naajiotasanoacuaajaari naa sequeya: “Puetunu pueyajanaari rishiyashijiacara juhua jiyasocua. Na cumaaca, puetunu na jiti-asanojuanaajuhua, cunoori soreja, juhua naana shuu. Jiyasocuaari soreja. Naana shuuri tijia. ²⁵ Saniniuuja, Pueyaso Rupaa cutaraari pueyaracaanu quijia”.

Cuno rupaacuaajaari nia niqiuara pohuatasaaquiiaari pueyaracaanu quijiacara na jataniniuria nijaniya.

2

¹ Naaratej, nia tarinitiare puetunu sesa nia miinujianaa. Seetanujuanaa nia tarinitiare cuaracashijionu. Naajuhua, majaari sapuenu juhua maninia pueyano niqishano nia quiniu najuhuanaj. Majaari tamasa jitiisanooocua jiaatiajaca nia quiniujuhua. Majaari coriaacojojuaca nia quiniu socua. ²⁻³ Naa jaara tari niishiyacuaaja pa Jiyaniijaari seetanujuanaa maninia, na rupaacua jiaatiajaca nia quiricuarajaj. Naatej, taa shusha rasano conaaja jiaatiaa supenucuacuaani, naa Pueyaso Rupaacua jiaatiajaca nia quiriquiajuhuaj, cumueeca Pueyaso muerasu nia quiniuria seetanujuanaa. Naacujitij, niocua tojetaarucujanaa jatanishano pueya quiri.

Cristoori juhua saminio saajia, Pueyaso quiquiorano tiataja

⁴ Sajiniiji shipinishano tiari pueyaracaanu rishijia. Naaratej, pa Jiyaniijaari miriqui seqeshiya juhua saminio saajiata Pueyaso quiquiora. Mijiria Pueyasora tijonaari jiyaniquiaari cuno saajiari sesarujuajau. Naaratej, nojori jiyajenetasacari cuno saajia, nojoriiri na jataquiaari na ruuretasacari. Nojuaja cutaraari Pueyaso saajia maniniu, tama na saquiriojosanojuaja. Naaratej, nocua pa tiuuri. ⁵ Naajuhujaj, puetunu Jesuucua tiuujiaca pueyaranojuanaari pueyaracaanu rishijia quiquiorano Pueyasora. Naacuajitij, Jesuucua pa tiuushacari, paari juhua maniniujiaca sai Pueyasorani, na quiquiora na tiatajara. Naajuhujaj, Pueyaso quiquio pa quishacari Neyanuucua pa tiuuniuucua, Pueyasoori pa jiyateya pueyacuara secojonaa pa quiniuria na tacoji. Majaari seya pa niqitiojonu quiquiaa Pueyasoni, taa tariucuacaanu pueyacuara secojonaa pueya miiquiaaricuaani. Paa cutaraari tama pa cuaqueyajaaja jiyatequiaa Pueyasora pa quiniuriani, puetunu pa miishanojuanaano. Puetunu naa pa miishanojuanaa Jesucristoocua pa tiuuniuucua, cunoori Pueyaso timitiquiaa. ⁶ Cunora, tariucuacaanu Pueyaso Rupaajinia, miriqui Pueyaso seqesano Jesucristojiniijiiri naa naajiotasano quiya:

“Janiyari Si6n tuhananuucua jyanohua cua panishano saajia nianutaniyani. Cuno saajiari tama cua saquiriojosanojuaja. Maniniujiajau saajia seetanujuanaari. Cante nocua tiuyani, nojuajaari maja na carosaaanu quiniutianiya”.

⁷ Cua panishano pueyanaa, cuno saajiaacua tiuujiaca nia quiniuucua, cuno saajiari jyanohua nia timitiasano. Nocua tiuyashijia cutaraari carosaaanutianiya. Nio tariucuacaanu Pueyaso Rupaajinia naajiotasanoori tari tohuatecanu nojoriria. Naa miriqui sequeyari:

“Tijonaa jatasano saajia, nojori jyanishacari cuno saajia naasucua sesarujuajau, cuno saajiacuajaari socua jyanohua panishano saajiara jiyatesaaquiaariuhua”.

⁸ Tamaqui, nojuajiniijiiri naa miriqui naajiotasano quiyajuhujaj:

“Pueyari cuno saajiaacua tiuriiniutianiya. Nocua jiriatanutaniyaajariuhua na tiuriinuria”.

Nojoriiri nocua tiuriiquiaa, nojori tojiyaquiniuucua Pueyaso rupaa Jesucristojiniiji. Pueyasocujaari tariucuacaanu sequequiaari Neyanuucua tiuyashijiaacari tiuriiniutianiya puetunurajanaa.

⁹ Nijaniya saniniuujia, niaari tama Pueyaso saquiriojosano pueyajaaja. Nojuajaari puetunu nijaniyajanaa jiyatequiaari nojuaja secojonaa nia quiniuria pueyacuara, pueyaracaanu na panishano miijia nia quiniurijuhujaj. Puetunu nijaniyajanaari tamasa pueypuejinijinio saquiriojosaquiaari saaja Pueyaso pueya nia quiniuria. Neyanu cusonuta, Pueyasoori naa pa masequiaari tama nerajaaja, maninia Pueyaso miishano pa pohuatanura tamasa niqiuara. Tariija, niaacuajaari juhua ninishiqui quijiaa quiquiaari. Pueyaso cutaraari niojia cuhuataquiaari, seetanujanaa shacantuuca cumaacajinia quijia nia quiniuria nata. ¹⁰ Tariucuacaanu, Jesucristoocua tiuyashijia nia quishacarija, niaari juhua soosano taucuaca quiquiaari Pueyasora. Quiariija saniniuujia, niaari Pueyaso panishano pueya. Tariucuacaanu, majaari Pueyaso taraajenu quijia niaacua. Quiariija cutara, niaacua taraajeyari. Cunora, nia jyanooquiaari.

Pueyaso panishano miijia pa quiriqiaaj

¹¹ Cua panishano cuarta Pueyaso pueyanaa, nia tojiri cua sequesano. Niaari juhua rucoonaa mijiria. Nio jiyari maja pueyaracaanu pa quijia. Naaratej, majaari tama nia cuaqueya miiniu panishanojuaja miijia nia quiniu, saaja shuquiriaatia nia quiniuria mijiria. Sesa casaacua pa cuaqueya jiaatianuni, cunoori poojia sesojua. ¹² Saaja maninia miijia nia quiriqiaa Pueyaso niishiyashijia niqiuara. Naacuajitij, nojori jaara niaacuara rimiaaqueeriquia juhua sesa miijiacara nojori jiyatesacari nijaniya, naajaa. Jiya puequesacari, Pueyasoori puetunu pueyajanaa nequesoreenutianiya. Jiyacari, niaacuara rimiaaquejacaari niishiniutianiya, Pueyasoori tojetaarucujanaa maninia miijia na sanitiiosacari nojori, maninia na miishacari nijaniya saniniuujia.

¹³ Pa Jiyaniija tojijia nia quiniuucua, puetunu mijiria pa jiiitanaa jiyaniijianucua tojitiajia nia quiriqiaajuhujaj. Naacuajitij, nia jiya jiyaniijijanaa tojijia nia quiri. Nojuacuajaari jiyaniijijanaa cutara. ¹⁴ Cunora, na jiyatesano jiyaniijianucua tojijia nia quiriqiaajuhujaj. Nojoricujaari na jiyaramiquishano, sesa miijiaa saniitiosaanura, maninia miijia maninuhuaqueetasaanura saniniuujia. ¹⁵ Naacuajitij, saaja maninia miijia nia quishacari, niaari niishiyashijia sesa miijiaa sanaajanutianiya, najuhuaana nojori sesacasacari nijaniya. Cunora, Pueyasoori paniya maninia miijia nia quiniuria.

¹⁶ Tariucuacaanu, Mois6s Rootasanoori juhua nia jiyaniija quijia puetunu niaarajanaa nia tojishocoriqiano. Quiariija saniniuujia, Jesu cusonuucua nia niti, nojuajaari Mois6s Rootasano tohuateequiaari. Naacuajitij, nojuajaari Mois6s Rootasano sanaajaquiaari

niaara. Naacuajitij, Moisés Rootasano tonujiyaquishacari niaacuara tari, naajaa, majaan nia jyaniniu naacuajiti nia naata tama nia panishanojuuaja miiniu. Pueyasojuaacuajaari nia Jiyaniijajanaa cutara. Naaratej, seetanujuanaa na tojtiajaca seya nia quiriquia cutara. ¹⁷ Majaan quenaaja niquiriyatu pueyano rerequeteteja nia quiniu. Niarta Pueyaso pueya panijaca nia quiriquia cutara. Seetanujuanaa Pueyaso tojjiaca nia quiriquia. Majaan jiya jiyaniijajanaa rerequeteteja nia quiniu.

Naquiya pa miishacari, sanaa pa rejeretariquia juhua Cristo

¹⁸ Poonijotesano pueyanaa, seetanujuanaa maninia nia camarnu tojjiaca nia quiriquia. Nia camarnu jaara juuajiaca quiriquia, naajaa, saaja na tojjiaca nia quiriquia. Majaan saaja maninia nia jitiijaca tojjiaca nia quiniu, nia jyanoojiacanio. ¹⁹ Naa jaara juhuajaniya rejeretariquia najuhuaana nia camarnu saniitosacari njajaniya, cunoori jyanohua maninia Pueyasora. ²⁰ Pueyaso cutaraari maja na timiniu niaa jaara juhuajaniya rejeretare nia camarnu saniitosacari njajaniya seetanujuanaa sesa nia miiniuuca. Saniniuuja, nia camarnu jaara saniitiore njajaniya maninia nia miiniuuca, nia jaara na rejeretare juhuajaniya, Pueyasoori cuno timitiaja cutara. ²¹ Pueyasocujaari nia saquiriojoquaaari naquiya rejeretajaca nia quiniuria maninia nia miiniuuca. Cristojuaacuajaari naquiya miishaaquaaari maninia na miiniuria pajaniya. Nojuajaari naa miiquaariitij, pa niishiniuria juhua nojuaja pa miiniurijahuaj. ²² Cristoori maja quenaaja sesa na miiniu quiquaaari mijiria na quishacari. Majaan na cuaracashijionu quiquaaari quenaajajahuaj. ²³ Jaara sesacasaquaaari, nojuajaari maja quenaaja nojori na riucuanu quijia na juaniutia. Jaara miitiasaaquaaari, majaan quenaaja nojori na miananajonu quiquaaari. Nojuajaari saaja na Que Pueyasocua tiuuquaaari, na niishishacari nojuajaari seetanujuanaa maninia nequesoreena cutara. ²⁴ Cristo jaara niyacutesanojinia cusojuasaaquaaari, nojuajaari tari puetunu sesa pa miiniujianaa cusotaquaaari. Naa pa niti Cristo cusuucuatej, cunoori quiquaaari maninia miijiac pa quiniuria saniniuuja, maja socua sesa miijiac pa quiniuria. Naajuhua, nojuajaari pa niti nootusaaquaaari, pa naatanijiosaanura saniniuuja. ²⁵ Tariija, niaari juhua tashuquioono borregohua rucoojuaca quiquaaari. Quiarija saniniuuja, niaari nia cojuana Cristoocua tiuquijioquaaari. Nojuacuajaari nioojia jitiiana maniniu.

3

Camiyono pueyara rootasano

¹ Camishano maajipohuanaa, nia niyaca tojtiajaca nia quiriquia maninia. Naacuajitij, nia niyaca jaara Pueyaso rupaacua tiuyashijia quiriquia, naajaa, nojori tojtiajaca nia quiniuuca nojoriiri niishiniutianiya Pueyaso Rupaari seetanujuanaa. Nojoriiri naa niishiniutianiya saa maninia miijiacaja nia quishacari, nojori nia pohuataaquishacariija Pueyaso Rupaa. ² Nojori niquishacari tojetaarucujanaa maninia miijiac nia quishacari, nojori tojtiajajahuaj, saa cunotaja nojoriiri maatia niishiniutianiya Pueyaso Rupaari seetanujuanaa. ³ Maajipohuanaa, majaan nia tacaaniu saaja nia maniniushiniuria, maninia nia niquishaanura. ¿Maajitiiri maniniucuasano, saaja na muecaca na canuusacari maninia, na cushitiasacari orojiniji shipinishano tuhuajashiquia, na cushishacari shanohua toquejuhuaj? ¿Jiyano maajitiiri maniniucuasano jaara juaanuu maniniu quiriquajahuaj? Maja. ⁴ Naaratej, maninia cutaraari nia tacaaniuria nioojia nia maniniushitiniuria. Cunora, saaja maninia maaji quiniuuca jiaatijaca nia quiriquia cutara, jacia pocuajajuhua, maja juajia. Jiyano maajitij, cunoori seetanujuanaa maninia niqishano Pueyasora cutara. Naa jaara nioojia maniniushitiri cutara, cunoori seetanujuanaa shaajeyaquiriquiano. ⁵ Naajuhua, Pueyasocua tiuujiaca tariucuaaanu maajipohuari neyaca tojjiaca quiquaaari. Naa nojori miiniucuatej, nojori jiuujaari seetanujuanaa shanohua maniniushitishano quiquaaari Pueyasora cutara. ⁶ Supuetana Abraham niquiocua Saaraari naa neyaca tojjiaca quiquaaari. Seetanujuanaa neyaca tojjiaca nia quishacari, nojuajaari na jyaniquijia na jyanijiaata. Naacuajitij, niaa jaara maninia miijiac quiriquia, niaa jaara nia puereyaquiniutia nia niyaca tojjiaca quiriquajahuaj, Pueyasora, niaari Saara niquiojori.

⁷ Nijaniyarijiaata canuunaa, nia niquiocua nia jitiariquia maninia, nia niishishacari maajiri maja cumueeca juhua cayaja. Majaan na rerequetenu. Maajipohuacuajaari Pueyaso jyanooshanohuhua, taa na jyanooquaaari njajaniyacuaani. Pueyasoori niaata nojori cojiritianutianiya samiitianijionu, pueyaracaanu rishijiac nojori quiniurijahuaj. Naacuajitij, maninia nia jitiariquia nia niquiocua, Pueyaso mariqui nojuaja nia secosano tojiyaquiriiri.

Paatucua taa miiriquia parta pueyani

⁸Pueyanaa, cua sequesano quiarijiani, nioori puetunu Pueyaso pueyarajanaa. Pueyaraacaanu jiuujiaatiojuaca nia quiri. Majaari juayonuujutanu. Niarta Pueyaso pueya nia cojiriquia taraatia nojori quishacari, shuquiriaatia nojori quishacarijuhuaj. Seetanujuanaa panitiojuaca nia quiri juhua nia tapueyocucata. Taraajetoojuaca nia quirijiuhuaj. Naajuhuj, majaari tama nia cuaqueyajaaja nia jiyatenu juhua socua tojishano pueyano nia quiniuria tamonu pueyanojiniji. ⁹Niaa jaara sesa miishaariquia, majaari na naminiu. Naajuhuj, niaa jaara sesacasaariquia, majaari nojori nia riucuanu nojori nia sesacanurajuhuj. Saaja maninia nia rihuanere nojori. Tariucuaacaanu, Pueyaso paraca nia quishacarijia, nojuacuaajaari nia saquirojojuacaari maninia na miiniuria nijaniya. Naaratej, saaja maninia nia miiriquia nia paracajuhuj. ¹⁰Tariucuaacaanu Pueyaso Rupaajiniacuaajaari naa naajiotasano quiyajuhuj:

“Cante pueyaracaanu mijiria rishiniuucua jiaatiaani, shuquiriaatia na quiniuriajuhuaj, nojuaja cuara na niti cojuaraa maja sesa na pocuanura. Cuaara na rupaa cojuaraajuhua maja na cuaracashijionura. ¹¹Naajuhuj, cuaara sesa na mijionu tarinitiaara saaja maninia na miiniuria. Nojuaja cuara pueya jiyanoootooteja quiiria. Cuaara naa maninia na miniu tarinitiaaquiiria. ¹²Cante naa maninia mijiani, Pueyasoori na cojuaja, na secojosano tojjijiaariuhuj. Saniniuujia, Pueyasoori sesa miijiaa samiritiaa saaja”.

¹³¿Cantucua sesa nia miiriquiani niaa jaara saaja maninia miijiaa quiriquia? ¹⁴Naajaa, niaa jaara saaja maninia nia miiniuucua miitiasaare, nia timiquiore. Pueyasocuaajaari jiyanojua maninia miiniutianiya nijaniya saniniuujia. Mijiria quiniaa miananajosacari nijaniya, majaari puereu, majaari nioojia nia niqijiotenu. ¹⁵Saniniuujia, nioojijinia Cristo nia jiyatere nia Jiyaniijajanaara, seetanujuanaa na tojjijiaa nia quiniuria. Juhucarijia nia niishiriojoriquia, jeenucuasano nia quiniuria, maninia nia pohuatanura Jesucristojiniji. Naacuajitij, niaari jeenucuasano quiniutianiya, maninia nia riucuanura tamasaca jaara nequesotare nijaniya, casaara juhuajaniya naquiya naquiya miiniu rejeretajate nijaniyani. ¹⁶Jacaria nia pohuatare nia paniniutia nojori, maja nia rerequetenuta nojori. Pueyaracaanu maninia miijiaa nia quiriquia, sesa nia miiniu mariqui nioojia macuhuaajareeri. Naacuajitij, pueyaracaanu shitimia maninia miijiaa nia quishacari Jesucristoocua tiuujiaa nia quiniuucua, niaacuara rimiaaquejacaari tama sesa na pocuanuucuaajaaja caririquiniutianiya.

¹⁷Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniuucua, maja sesa nia miiniuucua. ¹⁸Cristojuanaacuaajaari mosaaquiiaari sesa miijiaa pa quiniuucua. Majaari socua na pacutenu quiniutianiya cusonu. Nojuajaari tojetaarucujanaa maninia miijia quiquiaari. Naacuajitij, nojuajaari sesa miijiaacuara cusoquiiaari, Pueyasocua na jiyatanura nijaniya. Pueyano cuaqueyaraca na quishacari, mosaaquiiaariiri. Pueyaracaanu rishijia sohanuraca na quiniuucua, nojuajaari samiitiaquiiaariuhua. ¹⁹Naa sohanu na quiniuucuatej, nojuajaari macunucua quiquiojinia rosequiiaari tii tama nojuajiniijiaaja na pohuatanura macunucua sohanu. Cuno pojoriiri nujuatejojuajinia mishiquionucua quiya. ²⁰Cuno pojoriiri, noo pojoricuaja tariucuaacaanu supuetana Noé tojjiyashijiaa quiquiaaritij, pueyaracaanu Noé poojotasacari Pueyaso rupaa nojori niquiara juucua. Pueyaracaanu Noé tarishishacari na puereetuca buque na shipinishacari, pajaacuaji na tacajara, Pueyasoori jiyacari cuno sesa miijiaa sashiquiaari juucua. Pueyaracaanu sashiquiaariiri nojori tacatonuhuaa nojiaa nocua juucua. Puetunu mijiria quijiaacua pueyajinijiojuanaani, saaja ocho pueyari cureequiaari, buquejiniaacua nojori tiuquitianuucua. Puetunu pueya shushiniuushacari pajaajinia, cuno pajaari saniniuujia Pueyasocua tiuujiaa cuataniquiiaari na buquejinia. ²¹Quiarijia pajaniyara saniniuujia, cuno pajaari miriqui pa niishitiojia taa Pueyaso miiquiaa pajaniyani, paa jaara moojinia tiuquinishaareni Jesuucua pa tiuushacari. Naatej, taa Noé juhuajaniya cuataquiiaari pajaajiniacuaani, Pueyasocua tiuujia na quiniuucua, pueraari naajuhuj. Naacuajitij, paa jaara moojinia tiuquinishaareni, paari pa timiniutia moojiniji tohuataquihuani, poojia cajitishano seetanujuanaa pa niishishacari paari tari jiyanooshanoni, pocuaji Tacuna Jesucristo samiitianuucua macujiniji. Majaari pa tiuquinishaanu quiquiaa pa seca pa jatanura. ²²Jesucristo samiitiasacariuhua, nojuajaari jiyocuaacaanu tacaquiiaariuhua. Quiarijia cajia Pueyaso miaquetajaraari. Jiyaniijajanaa na quiniuucua, nojuajaari cumaacaraca, tama nojuajaaja na tojtiniuria Pueyaso seya, puetunu cumaacaraca quijiaacajanaa, samaruhanio.

4

Maninia miijiaa pa quiriquia, Pueyaso cumaaca pa jiitianuucua

¹ Naacuaajiti pueyanaa, naatej, taa Cristo rejeretaquiaari naquiya miiniu mijiria na quishacaricaaani, naa rejeretajaca nia quiriquiajuhuaj, niaa jaara naquiya miishaariquia. Naquiya pa miishacari, cunoori sesa pa miiniu pa tarinitijia. ² Naacuaajitij, paa jaara naa naquiya miishaariquiiani, na nuhuaji paari saaja Pueyasora quiniu paniyani. Paari saaja na panishano miiniu paniyani, maja tama pa cuaqueya panishanojuuaa pa miiniuria socua. ³ Tarijia, Pueyaso tojjiyashijaca nia quishacarijia pueyanaa, niaari jiyanhua sesa miijiaca quiquiaari, taa Pueyaso niishiyashijaca miiquiaacuaani. Niaari saaja nia cuaqueya miiniu panishanoocua shiiniuquijia quiquiaari. Niaari queraatia tamaatia sesa miiniuucua jiaatijaca quiquiaari. Niaari saaja mashaasequenuujuaca quiquiaari. Naa queraacunuusaqui, niaari tojetaarucujanaa sacuaaraatia miijiaca quiquiaari. Naaari rerejojuajuhua puera nia ratunura, jiyanhua nia mashaasequenuunurajuhua. Naajuhua, niaari juaashiquiata shipinishano nia pueyasora nia jiyatesano shuquiri-tajaca quiquiaari. Naaari na taccoji sacuaaraatia pueresano casaa miiquiaarijuhuaj. ⁴ Quiarijia saniniuuja, Pueyaso niishiyashijaca nia cojjiyaquishacari naa sacuaaraatia nia miiijonuratej, nojoriiri jiuujiatequiaa nojori shaacasacari niajaniya. Nojoriiri cunora nia sesacaquiaa. ⁵ Cuno pojori cuaara niishiiria nio, Pueyasoori nojori nequesoreenu-taniya na nequesoreesacari puetunu pueyajanaa, saminiucua, macunucuanio. Jiyacaritij, nojori cuaara tama nojoriicuaaji riucuaarajaaja. ⁶ Cunora, pa Jiyaniijia Jesucristoori macunucua niquiara pahuataquiaari Pueyaso rupaa tama nojuajiniijiaaja, nocua tiuujia-cara na jiyatesocoriquiano. Nocua tiuujiaacari pueyaracaanu rishijiacara quiriquiano, taa Pueyasocuaani. Sesa miijiaca mijiria nojori quiniuucua, nojoriiri pajaajinia cusonuuquiaari taa puetunu pueyajanaa shaajecoquiaacuaani. Naajaa, Jesuucua tiuujiaa cutaraari samiitianijiosaanutaniuhua.

⁷ Nio pa quishacarini, paari socua quenaacoya jiya puequesacariicuarani. Naaratej, niishiriojuuaca nia quiriquia. Maninia nia jiitariquia tama nia cuaqueyajaaja, saaja Pueyaso secojuuaca nia quiniuria pueyaracaanu. ⁸ Jiyanhua panitiojuuaca nia quiriquiajuhuaj. Cunoori socua panishano cutara. Paa jaara panijiaa quiriquiani, paari queraatia sesa miishano jiyanoojia quiniutianiyan. Naaratej, seetanujanaa panijiaa nia quiriquia. ⁹ Niarta Pueyaso pueya jiitiaaquishacari na maquejara, na miaqueso-coriquianojuhuaj, nojoriicua taraajeja nia quiriquia. Nojori nia tiuquinitariquia nia tiajinia nia timiniutia. Majaari nojori nia ririjiotanu nia taajenuta. ¹⁰ Pueyasocuaajari na Sohuanu niqutioquiaa puetunu na pueyajanaa, tamaatia maninia casaa miiniu niishijia-pa pa quiniuria. Naaratej, puetunu niajanijajanaa cuaara maninia miiria niarta Pueyaso pueya pueyaracaanu, taa Pueyaso cumaquiquiaa niajaniya maninia nia miiniuriacua-jani. Maninia nia poonjioteriquia Pueyaso cumaaca, nojuaja niqutiojosano niajaniani. ¹¹ Naacuaajitij, nia pocuasacari, Pueyasocua nia tiuuri nojuaja cumaquiniuria niajaniya na panishano nia sequenura. Naajuhua, niaa jaara casaa miiriquia niarta Pueyaso pueya nia naacunura, nojori nia miiriquia maninia Pueyaso niqutiosano cumaacata. Naa nia miiriquiatej, Pueyaso timitiasanura socua, Jesucristoocua tiuujia nia quiniuucua. Nojuaja cuaara maniniuhuaqueetasaaria pueyaracaanu, tojetaarucujanaa maninia miiji-a na quiniuucua, puetunu cumaacaracajanaa na quiniuucujuhua. Cuaara naa quiiriatej.

Juhuaajaniya pa rejeretare naquiya miiniu, Pueyaso pueya pa quiniuucua

¹² Cua panishano cuarta Pueyaso pueyanaa, majaari nia shiriiquiniu niaa jaara jiyanhua naquiya miishaariquia. Majaari nia jiyaniniujuhuaj saa niajanijaja naa miishiya. ¹³ Naa jaara naa naquiya miishaariquiatej, nia timiri. Jesucristoocua tiuujiaa nia quiniuucua, niaacuaajari naa miishiya taa Jesucristo miishaaquiari naquiyaacuaani. Naa naquiya miiniu nia rejeretasacariitij, niaari jiyanhua timitianutaniya Jesucristo, shacantuuca na cumaacata na tiuquishacariuhua, na jataniniuria niajanijaja juhua nojuaja nia quiniuriajuhuaj. ¹⁴ Naajuhua, niaa jaara sesacasaariquia Jesucristo tojjijaca nia quiniuucua, shuquiriaatia nia quiriquia. Pueyari naa nia sesacaquiaa, shitimia maninia miijiaca nia quishacari, Pueyaso Sohuanuraca nia quiniuucua. ¹⁵ Naa jaara naquiya miishaariquia pueyanaa, cuno cuaara quiiria maninia miijiaca nia quiniuucua, maja sesa miijiaca nia quiniuucua. Naa caara caririqiiira cutara niaa jaara moju quiri, nohuase-jojua, sesa miiji, timia niishiniu panijia tamasa casa. ¹⁶ Saniniuuja, maja cutaraari nia caririqiniyu niaa jaara naquiya miishaariquia Jesuucua tiuujiaa nia quiniuucua. Saaja Pueyaso nia shuquiritariquia cunora.

¹⁷ Quiarijiani, Pueyasoori tama na pueyajaaja saniitioquiaa na tojtiaaquishacari na rupa. Paa jaara naa saniitosaaquiaacuaani, ¿taariquitijia noo pojori miishaanutaniya socu-atejaj, Jesucristojiniiji pahuatasano ruuretatejatej? ¹⁸ Naacuaajitij, Pueyaso jiyanooshano

pueya jaara queraatia naquiya miiquiaacuaa, ¿taariquitijia Pueyaso tojiyashijia miishaanutaniyatej? ¡juhuej! Puereeta miishaanutaniyari Pueyaso ruuretajaca, sesa miijiacanio. Nojoriiri jiyanoehua socua naquiya miishaanutaniya, Pueyaso saniitosacari nojori. ¹⁹ Naacuajitij, Pueyaso jaara naa naquiya nia miishaanura paniya, juhuajaniya nia rejeretariquia naquiya nia miiniu. Majaari nia tarinitianu maninia nia miiniu, naquiya nia miishacari. Saaja Pueyasocua nia tiuuriquia nioojia na cojanura maninia. Nojuacuajaari na Shipinina. Nojuacuajaari saa maniniaja. Naquiya pa miitiquiaacuajaari socua na jeenucuanura pajaniya.

5

Socua rootasano Pueyaso pueyara

¹ Quiarijia saniniuujia cuarta pueyaso pueyanaa, janiyari nia jitianaa nacasuyani. Niajaniya, Pueyaso pueya maapue jitiananaa, cua tojitiare. Janiyacuajaari Pueyaso pueya maanu jitianajuhuj, juhua niajanijajuhuj. Janiyacuajaari pa Jiyaniijajanaa niquni-ani, nojuaja jaara naquiya miijioquiaari mijiria na quishacarijia canaata. Naajuhuj, nojuajiniji cua pohuatanuucua, janiyari naquiya miishaacuaaiajanijuhuj. Naacuajitij, pa Jiyaniijia muetasacariuhua na shacantuuca cumaacajinia, janiyari jaarajaaja niaata cojiritiasaanutaniya jatanishaanuni, juhua nojuaja pa quiniuria mariyata. ² Cunora Pueyaso pueya jitiananaa, shamaatia nia cojuare Pueyaso pueyaniyojua, teyano jitianaraa Pueyaso jiyatequiaari niajanijacuajani. Maninia nia cojuariquia nojori, seetanujanaa nojori nia paniniutia, taa Pueyaso paniya nojori nia cojanuracuajani. Majaari nojori nia jitianu nia taajenuta saaja nojori jitianaa nia quiniuucua. Naajuhuj, majaari nojori jitianaa nia quiniu saaja cumaneecaacua nia jiaatianuta. Saniniuujia, seetanujanaa nojori nia paniniutia nia jitiariquia narta Pueyaso pueya. ³ Majaari narta Pueyaso pueya nia jitianu juhua tama nia seyajaaja. Niajaniya saniya cuaara maninia miijiaa quiiria nojori niquiara, nojori niishiniuria naa quijiacate Pueyaso pueya, naa nojori miiniurijuhuj. ⁴ Naacuajitij, pa Jitianajanaa tiuquishacariuhua jiyocuacaanuji, niaari shacantuuca quijiacara jatanishaanutaniya, pueyaracaanu rishijiaa nia quiniurijuhuj.

⁵ Niajaniya mashiquiorinia, Pueyaso pueya jitianaa tojijiaa nia quiriqiajuhuaj. Puetunu niajanijajanaa Pueyaso pueyanaa, tama nia cuaqueyajaaja nia jiyatere narta Pueyaso pueyano cumaqueniaa nia quiniuria jaarajaaja. Tariucuacaanu Pueyaso Rupaajiniacuajaari naa naajiotasano quiya:

“Pueyasoori na juaaniutia niqijia narta pueya shocoteja. Saniniuujia, narta pueyano shocoteyashijia naacujua cutaraari”.

⁶ Naarate pueyanaa, puetunu narta Pueyaso pueyanaa nia jiyateriquia tojishano pueya nojori quiniuria niaara. Majaari quenaaja nojori nia rerequetenu. Naa juhuajaniya narta Pueyaso pueya tojijiaa nia quishacarijij, pa Jiyaniijia Jesucristo jaara tiuquirioh-ua, Pueyasoori na cumaacata nia jiyatenutaniya jiyaniijianucua nia quiniurijuhuj. ⁷ Pueyanaa, puetunu nia tacaaniujanaa nia niqitioere Pueyaso. Nojuacuajaari niaacua taraajequiaa.

⁸ Pueyanaa, nia Paraca sequeeri nia shanacujuquiaa, juhua sare, taa sare shanacujia na sanura casaacuaani. Cunora, soquejaca nia quiriqia pueyaracaanu. Juhua sutejaca nia quiriqia, pueyaracaanu nia secojonura, Sesaaca mariqui juhua sare nia sareeri. ⁹ Cumaatia nia nujuatariquia nojuaja, seetanujanaa Pueyasocua tiuujiaa nia quishacari. Majaari Pueyaso Rupaacuaji nia taacanunu. Naa nia miiriquiatej, nia niishishacari narta Pueyaso pueyari puetunu tiquiyocujanaa naa naquiya miquioyaju-juhuj. ¹⁰ Naa jaara rapaquijia naquiya miishaariquia mijiria, Pueyasoori na nuhuaji nia jataniniutianiya tojetaarucujanaa maninia pueya nia quiniuria. Tojetaarucujanaa pa jyanoojia na quiniuucua, nojuacuajaari nia saquirojoquiaari nata nia quiniuria shacantuuca na cumaacajinia, Neyanu Jesuucua nia tiuumiucua. Naaratej, nojuacuajaari nia jiyatenutaniya seetanujanaa nioojia niqijioteyashijiaa nia quiniuria, socua jyanohua na cumaaca jitiata nia quiniuria, maja quenaaja Sesaaca poptionura niajaniya. ¹¹ ¡Jyanohua maniniaari pa Que Pueyaso! Nojuacuajaari puetunu cumaacaracajanaa pueyaracaanura. ¡Cuaara naa quiriiatej!

Pedro sequesano quera na naajio na tucuatasaari

¹² Cuarta Pueyaso pueyanaa, janiyari parta Pueyaso pueyano Silvano naajioteree nio posunee naajioneeni. Nojuajaari shamaatia poonijiojua pa Jiyaniijia. Janiyari niaacuara naajiotereeni, cua nacasunura niajaniya, cua shiniujuniuria niajanijajuhuj maja nia pishiniuria Pueyasocua. Seetanujanaa jyanoojia na quiniuucua, naarate nojuajaari nia jitiata maninia, naquiya na miitishacari niajanijajuhuj. Cunora, nocua nia tiuuriquia, pueyaracaanu na cumaquiniuria niajaniya.

¹³ Babilonia tiacajinia quiniaa parta Pueyaso pueyari nia saruhuataa. Nojoriiri Pueyaso saquiriojosano na pueyaranojuhuaj, taa na saquiriojosanotucuaa niajaniyani. Marcoori nia saruhuataajuahuaj. Nojuajaari juhua quiyanu. ¹⁴ Nia saruhuatasacari niarta Pueyaso pueya, seetanujuanaa nia paniniutia nia nujuutoore.

Pueyaso cuara nioojia cajitiiria, canapueete Jesucristoocua tiujujacacuajani.

TANEE PEDRO NAAJIONEE

Pedro saruhuatasacari narta Pueyaso pueya

¹ Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiuutiquiaari pocuaji Tacuna Jesucristoocua, taa nocua canaa tiuquiaaricuani. Nocua nia tiuuniuni, cunoori jiyanoehua panishano. Naacuajitij, Pueyasoori nia jiyanooquiaa juhua sesa miyashijiaca nia quiniuria na niqiyara, taa canaa quiyacuani. ² Seetanujuanaa maatia nia niishitiriqia Pueyasoni, pa Jiyaniija Jesunio. Naacuajitij, niaari socua jiyanoehua cumaquishaanutaniya. Nioojaari cajitishaanutaniyajuhua, juhuajaniya quijiaca nia quiniuria.

Pueyaso pueya cuara nio niishitijosano miijiaca quiriia

³ Jesucristojuanaacuajaari pa sequequiaari na pueya pa quiniuria. Paari na maunu tojiqiaarini, pa niishishacari nojuajaari seetanujuanaa Pueyaso Niyanu, tojetaarucujanaa maninia miijia. Seetanujuanaa maatia pa niishiniuucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojiija pa quiniurijuhua. ⁴ Naa jiyanoehua maninia miijia Jesucristo quiniuucuatej, nojuajaari pa niishitiquiaari casaa na miiniu paniya pajaniyarani. Pajaniyarano na sequesanoori seetanujuanaa maninia, tojishocoriqiano. Paa jaara na sequesano tojitiajaca quiri seetanujuanaani, paari jatanishaanutaniyani juhua nojuaja pa quiniurijuhua. Naacuajitij, paari quiariniora jatanishaaquiari na cumaacatani maja pa sesenura. Paa jaara Pueyaso tojiyashijiaca quiriqiani, paa maara tojetaarucujanaa seseriquiani, taa mijiria quinia pueya sesequiaacuani tama nojori panishano miijiacajaaja nojori quiniuucua. ⁵ Cunora, tamajaaja nia saniniujiuriquia tojetaarucujanaa maninia quijiaca nia quiniuria, juhua Pueyaso. Niaacuajaari tari nocua tiuujia. Naa nocua tiuujia nia quiniuucuatej, jiyanoehua nia saniniujiuri maninia miijiaca nia quiniuria pueyaracaanu. Naa maninia miijiaca nia quishacaritij, jiyanoehua nia saniniujiuri socua quiniurijuhua, sesa miiniu nia ruuretanura. ⁶ Naa niishijiaca nia quishacaritij, jiyanoehua nia saniniujiuriquia tama nia cuaqueya miiniu panishanojuaja rejetejaca nia quiniuria, maja nia miiniuria sacuraatia casaa nia panishano. Naa tama nia cuaqueyajaaja rejetejaca nia quishacaritij, jiyanoehua nia saniniujiuriquia juhuajaniya sashijiaca nia quiniurijuhua. Naa juhuajaniya sashijiaca nia quishacaritij, jiyanoehua nia saniniujiuriquia seetanujuanaa Pueyaso panijaca nia quiniuria. ⁷ Naa Pueyaso panijaca nia quishacaritij, jiyanoehua nia saniniujiuriquia niarta Pueyaso pueya panijaca nia quiniuria socua. Naa niarta Pueyaso pueya panijaca nia quishacaritij, jiyanoehua nia saniniujiuriquia tojetaarucujanaa panijaca nia quiniuria.

⁸ Naa jaara puetunu nio niishitijosanojuanaa tojiija quiriqia seetanujuanaa, majaari najuhua na Jiyaniija Jesucristo niishijiaca nia quiniu quiniutianiya. Naajuhua, majaari najuhua quijiaca nia quiniu quiniutianiya. ⁹ Nio rootasano tojiyashijiaca saniniuujia, nojoriiri juhua cariyajuaru, niishiyashijiaca. Naa nojori quiniuucuatej, nojoriiri niyajetaquiaa nojoricuajaari juhua jeequejosaaquiari sesa nojori miishanojiniji. ¹⁰ Cuarta Pueyaso pueyanaa, Pueyasocujaari nia sequequiaari na pueya nia quiniuria. Nojuajaari nia saquiriojiquaari. Cunora, puetunu nio cua rootasanojuanaa tojiija nia quiriqia seetanujuanaa. Naacuajitij, niocua niishiri niaari seetanujuanaa Pueyaso pueya. Majaari quenaaja nocuaji nia rupatenu quiniutianiya. ¹¹ Naa maninia quijiaca nia quiniuucuatej, niaari shuquriaatia tiuquinitiasaanutaniya jiyocuacaanu pocuaji Tacuna Jesucristoocua, pueyaracaanu nata nia quiniuria, pueyaracaanu Jiyaniijajanaa na quiniuucua.

¹² Niaacuajaari maatia niishitijosaaquiari Pueyaso rupaa Jesucristojiniji. Niaari cunoo seetanujuanaa rupaacua tiuujia. Naajaa, janiyari pueyaracaanu nia niishitiniutianiyan, maninia nia racatanura nia numaama. ¹³ Mijiria cua rishishacarija, Jesucristo jiyaramiquishano cua quiniuucua, maniniacuajaari pueyaracaanu cua shiniujiuniora nijaniya, maja tariucua nia niishishano Jesucristo rupaajiniji nia niyajetanura. ¹⁴ Pa Jiyaniija Jesucristoori tari cua niishitiriucuaa janiyari quera mosaanutaniyani. ¹⁵ Cunora, janiyari nio naajiyani niaarani. Naacuajitij, janiya jaara mosaareni, niaari nio cua naajionee jiiitianutaniya cua nuhuaji nia serojosocoriqiano. Maniniacuajaari nia jiiitanura cua naajionee maja nia niyajetanura puetunujuanaa cua niishitijosano nijaniya.

Shacantuuca Jesucristo cumaaca niqiniaajiniji pahuatasano

¹⁶ Canaa niishitijosano nijaniya pa Jiyaniijajinijini, cunoori maja canaa tojishano tamonujiniji. Naajuhua, cunoori maja tama niishijiacajaaja pahuatasano na sapojonura

pueya. Jesucristo cumaacajiniji canaa pohuatasanoni, naajuhua, taa na tiuquiniuti-niuhuan, puetunu cunोजनाari maja tama canaa niishishanojuaja. Canaajanaacua-jaari canaa namijiatajanaa na niquiquiaarini nojuaja jaara shacantuucara jataquiaari canaa niquiara. ¹⁷ Jiyacaritij, na Que Pueyasoori jyanohua na timitiariquiaa canaa niquiara. Canaari na tojiquiaarini naa na sequesacari Neyanujinijitij: “Nojuajaari Quiya-nuniyoja. Jyanohua cua timitiasano”. ¹⁸ Canaa quishacari pa Jiyaniijata shacantuucara na jatasacui tuhananuucua, canaajanaari naa Pueyaso tojiquiaari jiyocuaaanuji pocuaanoni.

¹⁹ Canaa tojinuucua Pueyaso sequesanojuanaa Neyanujiniji, canaari cunora seetan-juanaa niishiyani, tariucuaaanu nojuajiniji pueyara Pueyaso sequesano caminiujiuniaa sequesanoori seetanjuanaajuhua. Naaratej, maniniacuaajaari nia tojinuria nojori naajiotasano Pueyaso Jiyarosocoriquiano Pueyanojiniji. Nojori naajiotasano, cunoori poojiajinia cuhuataquiaa, naatej, taa samaritiu cuhuataa ninishiquicuaani, cuaara juhuaque-majaatijia. Pananuuri saniniuuja muetanutaniyacujua, seetanjuanaa na cuhuatanura pajaniya. Naa quiniutianiyajaariuhua pa Jiyaniijia muetasacariuhua pocua. ²⁰ Maninia nia niishiri nio, pueyanaa. Puetunu tariucuaaanu Pueyaso sequesano caminiujiuniaa naajiotasanojuanaari maja na naata niishishaanu maatia tama pa niishitiajatajaaja. ²¹ Tariucuaaanu Pueyaso sequesano caminiujiuniaa naajionuutasano, cunoori maja tama nojori niishishanojuaja. Pueyaso Sohuanujuanaacuaajaari nojori niishitiquiaari nojori pohuatanura Pueyaso sequenu panishano pueyara.

2

Sacuaraatia miijica niishitiojonaajiniji pohuatasano

¹ Tariucuaaanu, noojiaqueya Israel pueyajinijinoori tama na cuaqueyajaaja jiyate-quiaari juhua Pueyaso sequenu panishano caminiujiuniaa nojori quiniuria. Naacuajitij, nojoriiri narta Israel pueya sapojonuucuaari. Naajuhua cua panishano pueyanaa, sapo-jonuucuaari nia tajinia supuenutaniyajuhua. Nojori niishitiojosacari sacuaraatia tama nojori niishishanojuaja, nojoriiri nia sapojonutaniya. Nojori niishitiojosanoori Pueyaso pueya sesoja cutara. Naacuajitij, nojoriiri tama nojori Camarnujuaja tamacanutaniya, cante nojoricuara mosaaquiariucujani, na pueya nojori quiniuria juucua. Cunora, nojoriiri canashiyaquiji niiquiji puetunu shaajasaanutaniyajanaa saniitiosocoriquiano. ² Queraatia pueyari sacuaraatia miijica quiniutianiyajuhua, sacuaraatia cuno pojori ni-shitiojosano tojjiaa nojori quiniucua. Naa nojori miiniucuatej, Pueyaso niishiyashiji-acaari seetanu rupaajanaa sesacanutaniya. ³ Cuno sacuaraatia niishitiojonuujaacaari jyanohua casamiriaca quiniucua jiaatijaca quiniutianiya. Naaratej, nojoriiri na-juhuana shanohua nojori niishitiojosano nia sapojonutaniya, nareja nia niquitiojonura nojori nia cumaneeca, nia casaminio. Naajaa, naa sacuaraatia miijica nojori quiniu-ucuatej, nojoriiri tariucuaaanujiniji Pueyaso riuriosanocuaa na saniitiosocoriquiano. Majaari Pueyaso jyanooniu quiniutianiya nojori.

⁴ Naajuhua, Pueyaso seya jaara sesa miiquiaari, majaari Pueyaso jyanooniu quiquiaari nojori. Pueyasoori puereeta nojori quejooquiaari ninishiqui. Tii nujuatejosano quiyari, nojori saniitiosaanu juuca cuaara quirijiaatijia. ⁵ Naajuhua, Pueyasoori Noé quishacari sesa miijica pueya jyanoyaquiquiaarijuhua. Cuno sesa miijica pajaashitiani-quiaari-iri nojori cusununura puetunujuanaa. Saaja Noé curoquiaariiri Pueyaso tojjia na quiniucua, socua siete pueyano. Noeeri pueyaracaanu cuno sesa miijica pueya numotequiaari juucua, nojori tacatonura noojia Pueyasocua, sesa nojori miiniujiniji. ⁶ Naajuhua, Sodoma tiacajinia quiniaa pueya quiniucua jyanohua sesa miijica, Pueya-soori cuno tiaca catijiatquiaari tojetaarucujanaa juacara. Naa catijiatquiaari Gomorra tiacajaariuhua. Cuno caapiqui tiaca naa catijiatasaaquiaarini, cunoori quiquiaari cuno nuhuaji quiriquiano pueya na numootenura maja naa sesa miijica nojori quiniuria-juhua, nojori mariqui saniitiosaarejaariuhua. ⁷ Sodoma tiaca Pueyaso catijiatasacari, saaja Lot curoquiaariiri maninia pueyano na quiniucua. Sodoma tiacajinia quijia Lot quiniucua, nojuajaari jyanohua taajequiaari tari, cuno pueya miijionuucua sacuaraatia casa, tariucua nojori jiidishano casaacua.

⁸ Puetunu juucajanaa, Lotri narta Sodoma tiacajinia quiniaa niquiquiaari cararaatia miitioojiano. Sacuaraatia nojori pocoojonu tojiquiaariijaariuhua. Maninia pueyano Lot quiniucua, nojuajaari jyanohua naquiya miiquiaari noojiajinia. Cunora, quera Pueyaso saniitiosacari cuno pojori, Pueyasoori Lot mashiquiquiaari cuno pueya tajiniji. ⁹ Naacuajiti pueyanaa, paari niishiyani, Pueyasoori na tojtiajaca pueya cojuaja, maja

nojori miitishaanura sesa. Saniniuujia, Pueyasoori sesa miijiaca racatajajaara nujuatejosano, nojori saniitiojosaanu juucara. ¹⁰ Pueyasoori socua jiyanoehua nio pojori saniitoriquiano: na camishoo maajipohua numuetucunuucua jiaatiajacani, maajishuriu numuetucunuujacajuhua, noo pojoriujuhua, pa Jiyaniijia rootasano ruuretajaca saajatej. Naa sacaraatia miijiacani, nojoriiri tojetaarucujanaa tojiyashijiaca. Majaari na pueretunu quiquiaa sacaraatia tama nojori panishanojuaaja nojori miiniuria. Naajuhua, nojoriiri maja na pueretunu quiquiaa jiyocuaaanu cumaacaraca quijiaca na sesacanura. ¹¹ Saniniuujia, Pueyaso seya cutaraari jiyanoehua socua cumaacaraca cuno sesa miijiaca pueyajiniji. Naajaa, majaari nojori rutioconu quiquiaa Pueyaso, cuno jiyocuaaanu cumaacaraca quijiaca nojori sesacanura.

¹² Cuno pojori, saaja sacaraatia miiniuria niishitiojanaani, nojoriiri niishiyashijiaca. Nojoriiri juhua nacujiniaaco quijiaca casami, teyanote saaja puecoosocoriquiano roosaaquiaacuajani. Tojetaarucujanaa niishiyashijiaca nojori quiniuucua, nojoriiri maninia quijiaca pa quiniuria pa Jiyaniijia rootasano sesacquiaa. Cunora, nojoriiri juhua puecoosocoriquiano nacujiniaacoji casaa. ¹³ Naacuajitij, nojoriiri naquiya mishocoriquianojuhua, naquiya nojori miitianoocua narta pueya. Nojoriiri jiyanoehua timiquiaa nojori jaara naata quiquiriquia sesa miiniu juucajuhua taa nojori miiquiaa niucucuaani. Cuno pojoriiri sacaraatia miijiaca. Majaari na niishiniu caririqiniu. Nojori sapojonuucua nijaniya, nojoriiri jaarajaaja nia cojiquiaa nia queranacunuusaqui. Naa nojori quishacari nia tajiniatej, nojoriiri jiyanoehua timiquiaa tariucua nojori jiiitishano sesa casaacua nojori niishiriojosacari. ¹⁴ Naacuajitij, nojoriiri maja nareja na niqiniu quiquiaa maajipohua. Puetunu maajipohujanaa niqitiquiaa nocua na jiaatianutaari. Nojoriiri maja na taajenu sesa na miiniuria pueyaracaanu. Canapue te jatarinitiaja pa Jiyaniijia tojjiani, cuno pojoriiri nojori shiniujuquiaa na sapojonuta, sesa nojori miinuriujuhua. Naajuhua, cuno pojoriiri tariucua jiiitino puetunu nojori panishanojuanaa nojori jiiitiana, jaara na naata quiquiriquia. Nojoriiri tariucua Pueyaso jiyatesano na saniitiosocoriquiano. ¹⁵ Pueyaso rootasano tojiyashijiaca nojori quiniuucua, nojoriiri juhua tashuquioono Pueyasocua neteja nuujiniji. Nojoriiri casamiriaca quiniuucua jiaatiajaca juhua supuetana Beor niyanu Balaam. Jiyacaritij, Moab jiya jiyaniijaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyanoehua queraatia casami na niqitiojutaniya, nojuaja jaara nocua quiaare, Israel pueya na shimiojonura nera. ¹⁶ Casamiicua jiaatiaja na quiniuucua, Balaamri na seru nijinia cajiquiaari. Quiaareeri. Nucuaco na quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacuajitij, pocuaashijia seruuri Balaam tarinitiquiaariuhua, juhua moseeca sesa na miiniu panishacari juucua.

¹⁷ Cuno pojori, pueya sapojoua na niishitiojosanotani, nojoriiri juhua cuari joojeteqetano. Naajuhua, nojoriiri juhua niqitioocua paratu piyarojosano, tamoco quiaamaa saajaari. Nojori niishitiojosanoori naajuhua. Majaari na tojjitijaca na naacunu. Pueyasoori jiyanoehua ninishiqui quiquio tari jiiitiaa nojoriicuaaji, pueyaracaanu nojori quiquiorano. ¹⁸ Nojori pohuatasanoori najuhua shanohua tojishano. Saaja sapojonuri. Naacuajitij, nojoriiri shusha Jesuucua tiuujiaca shiniujuquiaa nojori miinihuara tama nojori cuaqueya panishanojuaaja. Cuno Jesuucua tiuujiacacuaaja shusha naataja sesa miijiaca pueyajinijinio jatanishaariquiaa juucua, Pueyaso tojjijaca nojori quiniuria juucua. ¹⁹ Sapojonuujaca cuno niishitiojonuujaca quiniuucua, nojoriiri pueya niishitiojoquiaa sacaraatia. Pueya niishitiojoquiaari, nojoriiniaari seetanujanaa juhuajaniya quijiaca quiniutianiya shuquiriaatia, nojori jaara nojori niishitiojosano tojjijaca quiquiriquia. ¿Nojori niishitiojosano pueyatucua taa juhuajaniya quijiaca quiquiriquiani, tama nojoriijaaja jaara sesa miiniuucua jiiitino quiyaja? Seetanujanaari, pueyano jaara maja na naata quiquiriquia sesa casaa na miijionu tarintianu, cuno pueyanoori seetanujanaa juhua tama sesa na miijiosano serujuaaja. Majaari na naata na tarintianu. ²⁰ Pueyanaa, niacuajiaari niishiya, pueyano jaara pocuaaji Tacunaacua tiuujiara quiri, pa Jiyaniijia Jesucristoori na cumaquijia na tarintianura sesa miiniuria na jiiitishano. Saniniuujia, cuno pueyano jaara sesa miijiaa quirohua, nojuaja jaara sesa miijionura jiiitirohua socua, neraari socua pueereeta quiniutianiya Pueyaso niishiyashijiaca pueyajiniji. ²¹ Naacuajiti pueyanaa, pueyano jaara seetana rupaaanaa niishijia quiquiriquia, nojuajaari cocuaatia miya jaara na samiritiarohua sesa miijia na quiniuhua. Cuno pueyanora maara socua maninia quiquiaari maja na niishiniuria Jesucristo rupaa, teyanote na niquiara pohuatasaaquiaacuajani, jatanishano pueyano na quiniuria. ²² Naa pa Jiyaniijia samiritiajaca pueya quiniuucuatej, sesa miijiaca nojori quiniuhua, nojoriiri nio tariucuaaanu Pueyaso Rupaa-jinia naajiotasano tohuatequiaa. Naa miriqui sequeyari: "Sareeri coteenu macayoree. Na miaquerohuari". Naajuhua: "Cushiiri nanatosaree juucua. Saaja na coquiojinia neeneecasuhuariuhua".

3

Pa Jiyaniijia tiuquiniuhua cuaracashitishacari

¹ Cua panishano cuarta Pueyaso pueyanaa, nioori tanee cua naajionee niaacuara. Coteenu cua naajiojina, janiyari nia nacasuquiaarini socua cua shiniujuniuria niajaniya maja nioojia niqijjotejaca nia quiniuria Pueyaso rootasanojiniji. Janiyari naa miya quiar-ijia nio cua naajiojiniajuhua. ² Maninia nia numaama nia racatariquia tariucuaaanu pueyara Pueyaso sequesano caminiujuninaa pohuatasano, pa Jiyaniijia jiyaramiquishano pueya pohuatasanonio. Cunocuaajaari pocuaji Tacuna rootasano pajaniyara.

³ Nio nia niishiriquia cutara pueyanaa. Quera nio jiya puequesacari, pa Jiyaniijia soojeacaari supenutaniya. Nojoriiri tama na cuaqueya miiniu panishano miijiacajaaja. Na macaatinuria niajaniya, nojoriiri nia nequesotanutaniya: ⁴ “¿Taa nia Jiyaniijia miiquiaarini? Nojuacuajaari nia sequequiaari: ‘Tacatenutaniuhuanijia’. Majaari na tiuquiniu. Tariucuaaanu na niquiniaa pa supuetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na shipinishaanujiniji. Majaari quenaaja tamonu casaa jatanu quiquiaa tamaatiara”. ⁵ Majaari naate pueyanaa. Cuno pojoriiri tariucuaaanu Pueyaso miishanojiniji niishiniu paniyashijiaca. Jiyanojia tariucuaaanu, Pueyasoori jiya cajiniocua shipiniquiaari saaja na pocuanuta. Na sequesacarijijuhua, jiyari mohuacajiniji muetaquiaari, mohuaca jiuujajinia na quiniuria. ⁶ Na nuhuaji, Pueyasoori cuno mohuacaja pajaashitiquiaari puetunu mijiria quijiacajanaa na cusojuanura. ⁷ Quiarijia saniniujia, jiya cajiniocua, nio jyanio, Pueyasoori na cumaacata nojori jiiitaaajara. Na nuhuaji cutara, puetunujaanari catenutaniya, Pueyaso saniitiosacari puetunu na ruuretajaca pueyajanaa.

⁸ Naajuhuaaj cua panishano cuarta Pueyaso pueyanaa, pueyaracaanu nio nia niishiriquia. Pa Jiyaniijia, niquiriyatu juucaari juhua mil marijia. Naajuhuaaj, mil marijiaari juhua niquiriyatu juuca nera. ⁹ Majaari nia jyaniniu maja pa Jiyaniijia tacatenu quiniutianuhua. Majaari na tarishiniu najuhuaaj, taa tamasaca jiyaniyacuaajini. Maja. Maja cutaraari na paniniu pueya quejoosaanura mani quiquiojina. Naacuajitij, nojuacuajaari pueya sashiyajara nojori tacatonura nojori jiuujia sesa nojori miiniujiniji, Pueyaso pueya nojori quiniuria.

¹⁰ Naajaa, nojuacuajaari tiuquiniutianuhua. Pueya jyanishacari Jesucristo maja na tiuquiniu quiniutianuhua, jiyacaritij, canashiyajiqi tiuquiniutianuhuari. Juhua nohuasejojua tiuquiniutianuhuari, sesa miijiaa na saniitionura. Na nuhuaji, jiya cajiniocuaari shaajenutaniya. Jiyanojia cojuatunenutaniyari na shaajesacari. Casaajiniji jiya shipinishaacuaarini, cunoori puetunu catenutaniyajanaa. Naacuajitij, jiyari puetunu mijiria na jiiitiasano casaatjanaa shaajasaanutaniya jyanohua naseeca manijinia.

¹¹ Quiarijia pa niishishacari taa pa jiya shaajasaanutaniyani, cunora, seetanujanaa Pueyaso panijiaa nia quiriqia saa maninia miijiacaja nia quiniuria. ¹² Naa maninia miijiaa nia quiriqia, Pueyaso cuaraa pa Jiyaniijia mueraterohua pocuaajitijia. Pa Jiyaniijia sequesano tojjijaca nia quiriqia, na tiuquiniu juera nia seecotenura. Jiyacaritij, Pueyasoori jiya cajiniocua setanutaniya. Naacuajitij, casaata na shipiniquiaari puetunu casaajanaani, cunoori manijinia mohuaquenutaniya. ¹³ Naajaa, Pueyaso cutaraari seetanujanaa sequequiaari pajaniya, nojuajaari quiarinio jiya cajiniocua shipininiutianiyari pajaniyara, quiarinio jyanio. Cunora, paari shuquiriaatia na sashiyani. Jiyacaritij, majaari quenaaja sesa miiniu niishishaanu quiniutianiyara socua. Puetunu casaajanaari tojetaarucujanaa maninia quiniutianiyara.

¹⁴ Naa nia niishishacari casaa pa sashiya nio pa quishacarini, cunora, jyanohua nia saniniujiriquia saaja maninia miijiaa nia quiniuria. Tojetaarucujanaa jyanoooshano nia quiriqiaajuhuaaj, juhuanijaniya nia quiniuria pa Jiyaniijia tajoji, na nequesoreesacari pajaniya. ¹⁵ Naacuajiti pueyanaa, nio nia niishiriquia: pa Jiyaniijiaari tarishiyajara pueyacua na taraajenuucua, nocua nojori tiuuniuria, Pueyaso jyanooniuria nojori. Tarishiyajariuhuaaj tojetaarucujanaa jeenucuasano pa quiniuria nera. Pa panishano parta Pueyaso pueyano Pabloori naa naajioquiaari niaacuaraajuhuaaj, Pueyaso niishitijaa na jiiitianuucua. ¹⁶ Nojuacuajaari puetunu na naajioneecajinijanaa mariyata nio cua pohuatasano pohuataa. Noojiaqueya na pohuatasanoori seetanujanaa jiyajeneta pueyara. Naacuajitij, mosanucua, noojia niqijjotejacadiao, nojoriiri Pablo niishitiojosano jataniquiaa tamaatiara, nojori niishiyaquishacari cuno rootasano. Nojoriiri naa jataniquiaa puetunu Pueyaso Rupaajanaa. Naacuajitij, nojoriiri tama na cuaqueyajaaja jiyatequiaa Pueyaso saniitiosocoriquiano nojori quiniuria.

¹⁷ Cunora cua panishano Pueyaso pueyanaa, niaacuajaari tari niishiya cuno Pueyaso rootasano tojiyashijiacajiniji. Nocuaji jyanohua nia cojuariquia tama nia cuaqueyajaaja

maja nia sapojosaanura sesa mijiaca nia quinihuara. Saaja Pueyaso rupaacua tiuujiaca nia quiriqia cutara, taa nocua tiuujiaca nia quiyacuajani, cuno pojori mariqui nioojia niqijiotereeri. ¹⁸ Naajuhuj, socua pocuaji Tacuna niishiniucua jiaatijaca nia quiriqia. Naa maninia nia niishiri pa Jiyaniijia Jesucristo, socua na panijiaca nia quiniuria, socua na cumaaca nia jitianurajuhuj. ¡Pa Jiyaniijiaari jyanohua maninia! ¡Nojuaja cuaara shuquiritiasaaria quiarjia, pueyaracaanujuhuj! Cuaara naa quiiriatej.

COTEENUJUANA A JUAN NAAJIONE E

Pueya samiitianija rupaa

¹ Jiya shipinishaacarijiyojua, Jesucristoori quijiajuhuanajaj. Canaari niaara naajiyani, canaa niishitiniuria nijaniya nojuajiniji canaa tojishano, canaa niquishanojuhuaj. Pueyanaa, canaari seetanujuanaa na niquiquiaari canaa namijiatani, pueyaracaanu nata canaa quishacari mijiria. Canaari na cooquiarijuhuj canaa rupuesacari nojuaja. Nojuajaari pueyaracaanu quijia cutara, pa Samiitianijiaariuhuj, pueyaracaanu quijia pa quiniuriajuhuaj, na sequesanoocua pa tiushacari. ² Cuno pueyaracaanu Quijiani, nojuajaari pueyanora jataquiaari. Canaari na niquiquiaarini. Naaratej, canaari pueya pahuataquiaarini, nojuajaari seetanujuanaa pa Samiitianijia. Canaari quiarijia cuno pueyaracaanu Rishijiajiniji nia pahuataajaaniuhuj. Coteenu na Queta quijia jiyocuaaanuuri. Na nuhuaji, canaacia muetaquiaariiri. ³ Canaari seetanujuanaa nia pahuataa canaa niquishanoni, canaa tojishanojuhuaj. Canaa pahuatasanoocua nia tiushacari, pocua rupuetooteni, taa canaa quiya pa Que Pueyaso rupuesanocuaani, Neyanu Jesucristo rupuesanonio. ⁴ Naa jaara nio naajiojinia canaa sequesano tojiri, niaari seetanujuanaa shuquiriaatia quijiaa quiniutianiya. Canaa jaara niaacuaji tojiriqiani, canaari shuquiriniutianiyaacuahuaj.

Pueyaso pa cuhuatana

⁵ Jesucristocuaajaari nio rupaa canaa niishitioquiaari, canaa nia pahuataani. Nojuajaari naa canaa sequequiaari: “Pueyasoori Cuhuatana cutara. Nojuajaari maja ninishiqui quijia quenaaja”. ⁶ Naacuajitij, paa jaara sequereni: “Pueyaso rupueja cutaranijia”, na rupaa pa tojiyaquishacari, paari saaja najuhuaa sapojiyani. Paari juhua ninishiqui quijia quiyajaani. ⁷ Paa jaara seetanujuanaa cuhuashiqui quiyani, taa Pueyaso quiya cuhuashiquicuaani, paari juhua rupuetootesano quiya parta Pueyaso muerasuta cutarani. Naa juhua rupuetootesano pa quishacari, Neyanu Jesucristo nanacaari puetunu sesa pa miishanojuanaa tuujuquiaa poojiajiniji.

⁸ Paa jaara sequereni: “Janiya sesa miyashijiani”, paari tama pa cuaqueyajaaja sapojiyani naa pa sequesacariitij. Majaari Pueyaso rupaa tojijia pa quiniu. ⁹ Paa jaara sesa pa miishano pahuatare saniniunijia, Pueyasoori jiyanootio cutara, na jiyanooniuria pajaniya, taa na sequequiaaricuaajani. Poojiajiniji jeequenutaniya puetunu sesa casaa-janaari. ¹⁰ Paa jaara saniniuuja sequereni: “Maja sesa cua miiniu”, paari Pueyaso jiyateya juhua sapojuaranani. Paa jaara naa quirini, majaari seetanujuanaa na rupaa quiniu poojiajinia.

2

Jesucristo pocuaji tacuna

¹ Quiquihuaniojuanaa cua tojitiare. Nio naajiya niaaranijia, maja juhujaniya nia miiniuria sesa. Paa jaara sesa miirini, paacuajaari pa Que Pueyaso shuriucua jiiitiaa pocuaji Tacunani, na Que Pueyaso na jiyanootiniuria pajaniya. Nojuajaari Jesucristo, pueyaracaanu maninia mijia cutarani. ² Sesa pa miishanoori jiyanooshaaquiaa Jesucristo cusonucua pocuara. Majaari saaja jiyareta pa sesa miishano jiyanooshaanu quiquiaa, mariyuca puetunu mijiria quiniaa sesa miishanojuanaari jiyanooshaaquiaajuhuj.

³ Paa jaara pa jiyaniija rootasano tojirini, paari niishiyani paa tari Pueyaso niishirii cutarani. ⁴ Jesu rootasano tojiyashijia jaara sequeriquia: “Pueyaso niishiyaniija”, jiyano pueyanoori sapojoua. Majaari na jiiitanu Pueyaso rupaa noojiajinia. ⁵ Cante saniniuuja pa jiyaniija sequesano tojijia cutarani, nojuajaari seetanujuanaa pa Que Pueyaso panijia cutara. Naacuajitij, paari niishiyani paari jatiqui quiya natani. ⁶ Cante sequejani: “Janiyari Pueyaso rupuejani”, nojuaja cuuara quiriia juhua Jesucristo, taa na quiquiaari maniniacuaani, mijiria na quishacari.

Quiarinio Pueyaso rootasano pajaniyara

⁷ Cuarta Pueyaso muerasunaa, majaari quiarinio nio rootasano, janiya niaara na naajiyani. Niocuajaari tariucuaaanu nia tojishano, majaari quiarinio. Niaacuajaari tari na tojiquiaari, Pueyaso rupaa jaara shushajanaa nia niquiara pahuatasaaquiaari. ⁸ Naajaa, nio rootasano quiarinijia cua naajiosanoni, niiori seetanujuanaa juhua quiarinio niaara. Niaari tari na tojiquiaa, pueya panijia nia quishacari, taa Jesucristo quiquiaari pueya panijiacuaani mijiria na quishacari. Na rootasano nia tojishacari, niniquiaari tari quiamacuaa nioojiajiniji. Pueyasoori nioojiajinia cuhuataa nia panitioosacari quiarijia.

⁹ Niaa jaara sequeriquia: “Pueyasoori coojia cuhuatarucuaani na rupaa cua niishishacari”, na nuhuaji majaari nia niqiniu paniniu niarta Pueyaso pueyano, niaari ninishiqui quiyajaa. ¹⁰ Cante narta Pueyaso pueya panijia cutarani, nojuajaari cuhuashiqui quijia cutara. Tamasacaari maja na naata sesa na miitiniu, naajuhua, tama nojuajaarijia maja sesa na miiniu quiniutianiya, pueya panijia na quishacari. ¹¹ Cante narta Pueyaso pueya niqiniu paniyashijiani, cuno pueyanoori ninishiqui quiyajaa, juhua ninishiqui canujuucuaajaariuhua. Majaari na niishiniu tee na quiaani. Naa na quiniuucua juhua ninishiquitij, nojuajaari juhua cariojuaru quiya. Majaari na niishiniu Pueyaso casaa.

¹² Quiquihuaniyojuanaa, niaara naajiya nionijia, Pueyaso jiyanooshano muerasu nia quiniuucua, Neyanu Jesucristo mosaanuucua pocuara. ¹³ Queyanaa, niaara naajiyaniija nia niishiniuucua pueyaracaanu Quijia, cante tari pocuaji quiquiaari jiya coteyaquishacarijiacuajani. Mashiquioriniaa, janiya niaara naajiyajaniuhua cua timishacari nia shocotanuucua Sesaaca.

Janiyari niaara naajiocanuni quiquihuanaa, nia niishiniuucua pa Que Pueyaso, Neyanu Jesucristoocua nia tiushacari. ¹⁴ Janiyari niaara naajiocanujuhua queyanaa, nia tiuuniuucua tariucua pocuaji Quijiaacua, nio jiya coteyaquishacarijia. Janiyari niaara naajiocanujuhua mashiquioriniaa, seetanujuanaa maninia nia tojiniuucua Pueyaso rupaa, niaa jaara na masequiaari nioojiajinia, Sesaaca nia shocotanuucujuhua.

¹⁵ Majaari mijiria sesa miiniuucua nia jiaatianu, mijiria casamiicuanio. Cante mijiria casaacua jiaatiajani, cunoori maja pa Que Pueyaso panijia. ¹⁶ Mijiria niishijiaa coretanijosano tama nojori niishishanojinijiaajani, puetunu cunujuanaari maja pa Que Pueyaso niishitishano. Cunoori sacuraatia tama mijiria pueya niishishanojuajaa. Naacuajitij, pueya cua pa quishacari, paari sesa pa jiaatianuta pueyaracaanu casaa paniquiaani tama pa cuaqueya pa shuqiritiniuriajaaja. Paari pa niquishano pa maniniuucasano casaa paniquiaa pueyaracaanuni. Naajuhua, paari pueyaracaanu timiquiaani tamasaca timitiasacari pajaniya. Puetunu naa sacuraatia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej. ¹⁷ Nio jiyari tari tariucushiyaree. Socua shaajasaanutaniya puetunujuanaari. Puetunu sesa pa jiaatianujuanaari cojiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

Jesucristo paraa

¹⁸ Quiquihuanaa, quiarijiaari quera jiya puequesacari tari. Niaacuajaari tari pohuatasaaquiaari Cristo Paracaari niniutianiya. Quiarijiani, queraatia na paraari tari supueree. Naacuajitij, paari niishiyani nio pa quishacariiri jiya puequesacari quera. ¹⁹ Cuno Cristo paraani, nojoriiri pajaniyajinijinio pueya quiquianucuaaja. Pocuaji rupate-tucanuuri maja seetanujuanaa Pueyaso muerasu nojori quishacari. Jaara seetanujuanaa Pueyaso muerasu quiquianu, mariqui pata quiyacuaateni. Naa nojori miiniuucuatej, paari niishiyani majaari puetunu pata rerejonaajanaa seetanujuanaa parta Pueyaso muerasu.

²⁰ Saniniuujia niajaniya Pueyaso muerasunaa, Jesucristoori nia niqutioquiaari na Sohuanu. Naaratej puetunu niajaniyajanaari Pueyaso niishitijaraca. ²¹ Majaari niaacuara cua naajionuni nia niishiyaquishacari Pueyaso rupaa. Niaacuajaari na niishiya cutara. Niaari niishiyajuhua, sapojoua sequesanoori maja Pueyasojiniji.

²² Pueyano jaara sequere: “Jesuuri maja Pueyaso Jiyarosano”, cunoori sapojoua. Cante sequejani: “Pueyasoori maja Jesu Que”, cunocujaari Cristo paraa. Jaara sequerejuhuaj: “Jesuuri maja Pueyaso Niyanu”, cunoori Cristo paracajuhua. ²³ Cante Pueyaso Niyanu Cristo tamacajani, majaari Pueyaso na jitianu na Querajuhua. Cante Pueyaso Niyanu Cristo jiiitiaa cutarani, pa Que Pueyaso jiiitiaa na Querajariuhua.

²⁴ Naaratej, Pueyaso rupaa nia racatare nia numaama taa nia tojiquiaari tariucuaaanucujani jaara shushajanaa pohuatasaaquiaari nia niquiara. Niaa jaara naa racatariquia na rupaa nioojiajiniate, seetanujuanaa nocua nia tiushacari, niaari jatiqui quiya pa Que Pueyasota, Neyanu Jesucristotanio. ²⁵ Jesucristocujaari na Sohuanu niqutioquiaari pajaniya, pueyaracaanu pa rishiniuria. Nojuajanaari naa pa sequequiaari.

²⁶ Nio naajioree niaranijia cua niishitiniuria niajaniya, nia niishiniuria taa Jesu paraa niishitiojonuquiaa sesa najuhua na cuaracashiniuuniani. ²⁷ ¿Casaara nojori nia tojiquiaani? Niaacuajaruhua tari Pueyaso Sohuanu jiiitiaa, Jesucristo niqutiosano niajaniyani. Naacuajitij, majaari tari panishaanu tamasaca niishitiojonura socua niajaniya. Pueyaso Sohuanucujaari nia niishitiojoquiaa puetunu casaajanaa. Puetunu na niishitiojosanojuanaari seetanujuanaa cutara, maja sapojonu. Naaratej, pueyaracaanu jatiqui nia quiiriquia Jesucristota, taa Pueyaso Sohuanu niishitiojoquiaa nia quiniuriacuajani.

²⁸ Quiarijiani quiquiohuaniyojuanaa, jatiquri nia quiri Cristota, seetanujuanaa juhuaniani nia quiniuria pa Jiyaniijia jaara tiuquiriohua pocua. Naa nia quiritij maja nia caririquiniuria nojuaja jaara pa jitiiasuhua. Na rupaa tojiyashijiacaari caririquiniutianiya cutara. ²⁹ Niaacuajaari seetanujuanaa niishiya, Jesucristoori tojetaarucujanaa sesa miyashijia cutara. Naa cumaati niishiyajuhua, puetunu maninia miijiacajanaari Pueyaso muerasu.

3

Pueyaso muerasu

¹ Pueyanaa, pa Que Pueyasoori jiyanoehua pa panijia. Pa sequeyari, “cua niquiohua”. Seetanujuanaa, paari necohuani. Naaratej, majaari mijiria quinia pueya niishiniu pajaniya. Pa niishitiyaquiyari nojori niishiyaquiniuucua pa Que Pueyaso. ² Cua panishano Pueyaso muerasunaa, paari tari Pueyaso muerasucujani. Maja cutaraari pa niishiniu taamuecaqitijia pa quiniutianiya na nuhuajitijaj. Paari saaja niishiya cutarani, Jesucristo jaara nimiohua, paari juhua nojuaja quiniutianiya. Na tiuquishacariuhua, paari na niquiniutianiya nia na quiyacuajani. ³ Puetunu na sashijiacajanaari tama na cuaqueyajaaja jeequequiaa sesa nojori miishanojiniji saaja maninia nojori quiniuria, taa Jesucristocuaani sesa miyashijia tojetaarucujanaa.

⁴ Cante sesa miijiani, cunoori Pueyaso rootasano na rupaajinia tojiyaquijia. Puetunu sesa miiniujanaari Pueyaso rootasano tojiyaquiniu. ⁵ Niaari niishiyajuhua, Jesuuri mijiria pocua niqiaari poojia seque na jataniniuria. Nojuajaari tojetaarucujanaa sesa miyashijia cutara. ⁶ Naacuajitij, cante jatiquri quiya pa Jiyaniijatani, nojuajaari maja sesa na miini quiquiaa cutara. Cante saniniujia sesa miijiani, majaari na niishiniu Jesu. Majaari nojuaja na niquini quiquiaarijuhuaj. ⁷ Quiquiohuaniyojuanaa, tama nia cuaqueyajaaja nia cojuare niaa mariqui sapojosaareeri. Cante maninia miijiani, nojuajaari maninia pueyano cutara, taa pa Jiyaniijia Jesucuaani, pueyaracaanu maninia quijia cutara. ⁸ Saniniujia, cante sesa miijiani, nojuajaari Sesaaca pueyano. Shusha jiya coteenujiniji, Sesaacuajaari tari sesa miijia quiquiaari. Pueyaso Niyanuuri cunora niqiaari puetunu sesa na miijosanojuanaa na shaajanura.

⁹ Puetunu Pueyaso pueyajanaari maja sesa miiniuucua na shiiniuquiniu, quiarinio pueyara Pueyaso rootesano nojori quiniuucua. Nojoriiri quiarinio pueyara jatanishano quiya Pueyaso Sohuanu nojori jitiiasacari. Naacuajitij, seetanujuanaa Pueyaso muerasu nojori quishacari, majaari na naata sesa miijia nojori quiniu pueyaracaanu. ¹⁰ Naacuajitij, maatia niishishanocujaaari cante Pueyaso muerasuni. Saniniujia, cante maninia miyashijiani, nojuajaari maja Pueyaso pueyano. Naajuhua, cante narta pueya paniyaquijiani, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujaniuhua.

Panitoojuaca pa qirij

¹¹ Pueyanaa, shushajanaa Pueyaso rupaa nia tojihacari, niaacuajaari naa niishitiosaaquiaritij: “Panitoojuaca nia qiri”. ¹² ¡Maja cutaraari pa quiniu juhua Caín! Nojuajaari tama tarajanujuaaja moquiaari, Sesaaca tojijia na quiniuucua. Naa niishiritio casaara Caín moquiaari tarajanuni. Nojuajaari tama tarajanujuaaja tacartaquiaari monu, tarajanu miishano quiniuucua maninia. Saniniujia, tama na miishanojuariaa sesa quiquiaari. Cunora tarajanu moquiaariiri.

¹³ Cuarta Pueyaso muerasunaa, majaari nia jiyajenenu Pueyaso ruuretajaca jaara niquiniu paniyaquiquia niajaniya. ¹⁴ Paacuajaari juhua macu samitianiijosaaquiar-iuhuanu, seetanujuanaa saminiuucua pa quiniuria. Paari seetanujuanaa na niishiyani panitoojuaca pa quishacari parta Pueyaso pueyata. Cante tapueyocua paniyaquijiani, nojuajaari juhua macu quiyajaa. ¹⁵ Naajuhua, narta pueyano niquiniu paniyashijiacani, nojuajaari juhua pueya mojuua Pueyasora. Niaacuajaari niishiya, pueyano mojuuaari Pueyaso samitianiyaquishoojua pueyaracaanu na rishiniuria. ¹⁶ Paacuajaari niishiyani, Cristoori jiyanoehua pa panijia na cusunuucua pocuara. Naacuajiti paari niishiyani taamuecate seetanujuanaa paniniuni. Paa cuara naa panijia quiirijuhua, tama pa cuaqueyajaaja pa tarinitianura parta Pueyaso pueyacuara, jiyanoehua pa paniniutia nojori. ¹⁷ Naa jaara nareja niqiyari niarta Pueyaso pueya casamijuniuucua, puetunu nia panishanojuanaa nia jitiiasacarihua, niaari najuhuaana sequeya: “Pueyaso panijianijia”. ¿Pueyaso panijia pueyanoteeri jiyano pueyano, narta Pueyaso muerasu niquitioyaquijia na jitiiasanojiniji? ¡Maja! ¹⁸ Quiquiohuaniyojuanaa, majaari najuhuaana pa sequenu: “Cuarta Pueyaso pueya panijianijia”. Paa jaara seetanujuanaa nojori panirini, nojoriicua pa taraajere, taraatia nojori miishacari. Pueyaracaanu maninia pa miiri, seetanujuanaa pa paniniutia pueya. Majaari najuhuaana pa sequenu: “Nojori paniyanijia”.

Pueyaso tojijaari juhuajaniya quijia Pueyaso niquiara

¹⁹ Naacuaajitij, paa jaara pueya panijia quirini, paari niishiyani paa seetanujuanaa Pueyaso tojijiani. Paari niishiyani paa pueyaracaanu rishiriquiano Pueyasotani. Majaari pa shaajenu quiniutianiya. ²⁰ Pueyaso muerasu pa quishacari, poojia jaara pa taacanutere saaja nocuaji, naajaa, Pueyaso cutaraari jiyanoohua maninia niishijia socua poojia niishishanojiniji. Nojuacuajaari pa niishiya cutara. ²¹ Cua panishano Pueyaso muerasunaa, poojia jaara pa macuhajaaquiri, paari shuquiriaatia quiya Pueyaso niquiaraani. ²² Nojuajaari puetunu pa masesano niqutionutaniya pajaniya, na rupaa pa tojishacari, puetunu na panishanojuanaa pa miishacarijuhuaj. ²³ Pueyaso sequesano pueraari nio: Neyanu Jesucristoocua pa tiuuniuria, pa panitioonurajuhuaaj taa na sequesiaaricuajani. ²⁴ Canapueete Pueyaso rootasano tojijiacani, nojoriiri Pueyasota rupuetootesano quijiaaca. Naajuhuaaj, Pueyasoori nojoriinia quiyacuajua. Nojuacuajaari na Sohuanu niqutioquiaari pajaniya. Naa na Sohuanu pa jiiiasacaritij, paari maatia niishiyani Pueyasoori poojiajinia quiya.

4

Pueyaso Sohuanujiniji pohuatasano, Cristo Paraca sohuanujinimio

¹ Cuarta Pueyaso pueyanaa, quarijiani, queraatia Pueyaso sequenu panishano caminiujuninaa pueyari supueya. Majaari ritia nia tiuuniu puetunu nojoriicuajanaa. Coteenu nojori nia saniniujiuri, nia niishiniuria nojori caminiujishanote seetanujuanaa Pueyaso Sohuanujiniji, tamonujiniji soj. Mijiria, queraatia sapojonuujuaacari caneya. Nojoriiri najuhuaana cuaracashiniuya na sequesacari: “Janiyacuaajaari Pueyaso sequenu panishano caminiujuniani: Pueyaso Sohuanu niishitishano janiya”. ² Niaari naa niishiniutianiya cante seetanujuanaa Pueyaso Sohuanu niishitishano caminiujuniani: Pueyaso Sohuanu jiiitajaari naa sequeja: “Pueyaso jiyarosano Jesucristoori pueyanora quiquiaari, mijiria pocuara cusoriquiano”. ³ Cante saniniuuja jiyaniyani Jesu maja pueyanora na quiniu quiquiaari, cunoori maja Pueyaso Sohuanu na jiiitanu. Saaja Sesaaca sohuanu jiiitaa noojiajinia cutaraari. Nojuacuajaari Jesucristo Paraca. Niaacuajaari tari pohuatasaaquiaari, Cristo Paraca sohuanuuri niniutianiya. Nojuacuajaari tari mijiria quiya.

⁴ Quiquihuanijojuanaa, niaacuajaari Pueyaso muerasu. Naacuaajitij, niaari cuno sapojonuujuaaca shocotacanu Pueyaso cumaacata. Nioojiajinia Quijiaari socua cumaacaraca nojori jiiitasano Sesaaca cumaacajiniji. ⁵ Cuno sapojonuujuaacari saaja Pueyaso niishiyashijia, maja Pueyaso muerasu. Naacuaajitij, nojoriiri saaja mijiria casaajiniji pohuatanuuquiaa. Naarate narta Pueyaso ruuretajacaari nojori tojtiaquiaa. ⁶ Paa cutaraari Pueyaso pueyani. Naacuaajitij, cante Pueyaso tojtiajacani, nojoriiri pa tojtiaquiaa. Canapueete saniniuuja maja Pueyaso pueyani, nojoriiri maja na tojtianu quiquiaa pajaniya. Naacuaajitij, pa naata niishiniu cante seetanujuanaa Pueyaso Sohuanu jiiitaa cutarani, cante saniniuuja sapojoua sohuanu jiiitaanijia.

Pueyaso pa panijia cutara

⁷ Cua panishano Pueyaso pueyanaa, jiyanoohua panitioojuaca pa quirij. Pueyasocuaajaari pa panijia. Nojuajaari pa panitijia na Sohuanuta, jiyanoohua panijia pa quiniuriajuhuaj. Canapueete puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaarihuaj. ⁸ Canapueete pueya paniyashijiacani, nojoriiri maja na niishiniu Pueyaso. Pueyasocuaajaari panijia cutara. ⁹ Nojuajaari pa niishitiquiaari taa na paniquiaa jiyanoohua pajaniyani, Neyanunijojua na jiyarosacari mijiria pa samiitianijioriquiano, pocuara na cusosacari. ¹⁰ Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paniniuria pajaniya. Neyanu jiyaroquiaari pocuara mosocoriquiano, sesa pa miishano jiyanooshaanura. Naa cutarate seetanujuanaa paniniu.

¹¹ Cua panishano Pueyaso muerasunaa, Pueyaso jaara naa pa paniquiaaricuua, ¿casaara pa panitioyaquiyarinijia? Naa panitiojuacara pa quirijjuhuaj. ¹² Majaari quenaaja pa niqiniu quiquiaari Pueyaso, taamuecatejanojoni. Naajaa, paa jaara tamascata panitiojuaca quirini, Pueyasoori poojiajinia quiyacuajua. Naacuaajitij, paari tojetaarucuajanaa panijiacara quiniutianiyan, na paniniu quishacari poojiajinia. ¹³ Nojuajaari na Sohuanu pa niqutioquiaari poojiajinia na quiniuria. Naacuaajitij, paari niishiyani paacuajaari nata rupuetoojua quiyani. ¹⁴ Canaajanaari seetanujuanaa canaa niquishano pohuataani: Pueyasoori Neyanu jiyaroquiaari mijiria, mijiria quiniaa niti mosocoriquiano, nocua tiuujiaca jiyatesaanura Pueyaso pueyara. ¹⁵ Cante pueya niquiara sequejani: “Jesuuri seetanujuanaa Pueyaso Nyanu”, Pueyasoori noojiajinia quiya. Nojuajaari Pueyasota rupuetoojua quiyajuhuaaj.

¹⁶ Naacuaajitij, paari niishiyani Pueyasoori jiyano hua pa panijia. Paari na niishiyajaanuhua na rupaacua pa tiushacari. Pueyaso cutaraari panijia. Paa jaara pueyaracaanu panijia quirini, paari seetanujanaa Pueyaso rupuejani. Naajuhua, Pueyasoori poojiajinia quiya. ¹⁷ Naa Pueyaso quishacari poojiajinatej, paari pueya panijara jiyacatequiaa socuani. Naa seetanujanaa panijia pa quishacari, paari juhuajaniya quiniutianiya Pueyaso nequesoreesacari puetunu pueyapuejanaani. Majaari pa puerenu quiniutianiya panijia pa quishacari taa panijia nojuaja quiyacuaani. ¹⁸ Cante seetanujanaa Pueyaso panijiani, majaari na niishiniu puerenu. Naa pa paniniuuri puetunu pa puerenu jatajanaa. Cante puereja quiya saniniunijia, majaari juhuanojuaja na paniniu Pueyaso puetunu noojiatjanaa. Puerejaari niishiriojiya: “Saniitosaanutaniyanijia”.

¹⁹ Niaacuajaari niishiya, Pueyasoori coteenujanaa pa paniquiaari, naarate paari saniniuujia na paniyani. ²⁰ Saniniuujia, cante sequejani: “Janiyari Pueyaso panijiani”, narta pueya niqiniu paniaquiya saajaaraariuhua, jiyano pueyanoori sapojoja. Naa na paniaquishacari tarajana na niqishano na namijata cutarate, ²¹ maatucua taa Pueyaso panirini, na niqishoo socuani? ²¹ Pueyasocuaajaari naa pa rootaquiaari: “Cante cua panijiani, cuara paniria narta pueyajuhua”.

5

Taa pa shocotanuniya mijiria niishishanoni

¹ Naa jaara Jesuucua tiuuri nojuaja seetanujanaa Pueyaso Jiyarosano quiquiaari, niaari Pueyaso muerasu. Mijiria, cante muerasu que panijiani, necohua panijaaariuhua. ² Naacuaajitij, pa panishacari Pueyaso, pa tojishacari na rootasanojuhua, jiyacariti paari niishiyani paari parta Pueyaso muerasu panijaaacuuhua. ³ Paa jaara Pueyaso panijia quiri seetanujanaani, paari na sequesano tojijia quiyajaanuhua. Na rootasano pajaniyani, majaari jiyajeneta na quiniu pajaniyara. ⁴ Cante seetanujanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasocua pa tiushacari. ⁵ Cante Jesu jiyateya seetanujanaa Pueyaso Niyaturani, saaja jiyano pueyano na naata mijiria niishishano shocotanu cutara.

Pueyaso Niyanujiniji pahuatasano

⁶ Pueyasoori canaa niishitiquiaari Jesuuri seetanujanaa Neyanujuhanajaj, Jesu jaara moojinia tiuquinishaacuaari. Canaa niishitiquiaariiaariuhua Neyanu jaara niyacutesanojinia naatequiaari. Jesuuri maja saaja moojinia na tiuquinishaanu quiquiaari canaa niishiniuria nojuaja. Maja. Naajuhua, janiyajanaari na niquiquiaari na nanaca shooteyano na shuucujani. Naajuhua, poojiajinia quijia Pueyaso Sohuanuuri pa niishitiquiaa cunoori seetanujanaa Pueyaso Niyanu quijiajuhanajaj. Pueyaso Sohuanu cutaraari maja na niishiniu sapojonu. ⁷ Jiuujianaraca jiyocuaaanu quijiaacari pa niishitiya Jesucristoori mijiria niqiaari pueyano na quiniuria seetanujanaa. Cuno pojoriiri nio: Pueyasojanaa, na Rupaa, na Sohuanunio. Nio jiuujianaraca quijiacani, nojoriiri Pueyasojuhanajaj. ⁸ Paari mijiria jiiitaa Jesujiniji pa niishitijacajuhua. Cunoori jiuujianaraca quiyajuhua. Cuno pojoriiri nio: poojiajinia quijia Pueyaso Sohuanu, jiyocuaaanu tojishano rupaa Jesu tiuquinishacari moojinia, naajuhua, na nanaca, pueya niqishano na shuucujaj shoyano. Puetunu cunojuanaari mariyata pa niishitiya Jesuuri seetanujanaa Pueyaso Niyanu. ⁹ Paa jaara tojiriquia pueya pahuatanusanoni, ¹⁰ casara saniya Pueyaso sequesano pa tojiyaquiyarini? Pueyaso sequesano Neyanujiniji socua seetanu rupaajanaa cutara pueya pahuatanusanonijini. ¹⁰ Cante Pueyaso Niyanuucua tiuujiani, Pueyaso Sohuanuuri noojiajinia na niishitiya Jesuuri seetanujanaa Pueyaso Niyanu. Saniniuujia, cante Pueyaso sequesano Neyanujiniji ruuretaja saniniunijia, nojuajaari Pueyaso jiyateya sapojoja, na tiyaquishacari tama Pueyaso sequesanoocuaaja Neyanujiniji. ¹¹ Pueyasocuaajaari sequequiaari, Neyanuucua tiuujiaacari pueyaracaanu rishijia quiniutianiya. ¹² Cante Pueyaso Niyanu jiiitaa noojiajiniani, nojuajaari tari samiitianishaarohua pueyaracaanu rishijia na quiniuria. Pueyaso Niyanu jiiitaaashijiaari saniniuujia maja na rishiniu quiniutianiya.

Nio naajia puequenu panishacari rootasano

¹³ Nio naajia niaaranijia nia niishiniuria, Pueyaso Niyanuucua nia tiushacari niaari tari samiitianijosaarohua pueyaracaanu nia rishiniuria.

¹⁴ Paari Pueyasocua tiuquianaani, pa niishishacari nojuajaari pa tojiquiaa pa secosacari nojuaja, pa masasano jaara quiri taa na paniaacujani. ¹⁵ Naatej, taa pa niishiyacuaani Pueyasoori pa secosano tojiquiaa, paari naa niishiyajuhua paari nojuaja pa masasano maseree tarini.

¹⁶ Cante narta Pueyaso pueyano niqiyaa sesa miyanoni, cuara Pueyaso secojoora nocuara, sesa na miishano jaara na cusojuaashijia quiri. Naacuaajitij, Pueyasoori cuno sesa

miijia naataniniutianihua, sesa na miishano jaara cusojuashijia quiri. Quiyajaariuhua tamonu sesa casa miiniu. Paa jaara cuno sesa casa miirini, paari cusoqueeni. Naa cua sequesacari nijaniyatej, majaari cua sequenu nijaniya nia secojonura jiyano sesa miishanoocaratej. ¹⁷ Seetanujuanaa, puetunu sesa miishanojuanaari sesa Pueyasora. Naajaa, majaari puetunu sesa miishanojuanaa cusojuanu quiniutianiya pajaniya.

¹⁸ Paacuaajaari niishiyani pueyanaa, cante Pueyaso jiitiaa juhua na Que cutarani, nojuajaari sesa miyaquiquiaa, Pueyaso Niyanu cojuasacari nojuaja. Naacuajitij, Sesaacaari maja na naata sesa na miitiniu. Majaari na naata sesa na miiniujiuhuj.

¹⁹ Paari niishiyani paa cutaraari Pueyaso muerasuni. Sesaacaari saniniuujia puetunu mijiria quiniaa Pueyaso niishiyashijiacajanaa jiitiaacujua. Nojuajaari nio jiya camarnu.

²⁰ Paari niishiyajuhuj Pueyaso Niyanuuri mijiria pocua niquiaari. Nojuajaari na niishitaja niquitioquiaari pajaniya, maninia pa niishiniuria na Que, na Que quiniuria pa Quejuhuj. Nojuajaari Pueyasojuanaa cutara. Paari nata quiya jatiquni, Neyanu Jesucristota pa rpuetoosacari. Nojuajaari Pueyasojuhanajaj, pa Samiitianijiaariuhuj, pueyaracaanu rishijiaa pa quiniuria. ²¹ Quiquiohuaniojuanaa, saaja Pueyaso pa paniri. Tama pa cuaqueyajaaja pa cojuare, maja tamonu casaacua pa jiaatianura socua Pueyasojiniji. Paa jaara tamonu casaacua jiaatiareni, paari Pueyaso shocoteya nocuarani. Niojuanaa pueyanaa. Tariucujaja.

TANEE JUAN NAAJIONEE

Pueyaso Rupaa seetanujuanaa panijjara pa jiyateja

¹ ¿Quiaate quiyajaa cua panishano cua rimiatucuaana? Quiaacuaajaari Pueyaso saquiri-
ojosano, neyatu quia quiniuria. Quiocuara naajjyanijia, quia panishano muerasuu-
cuaranio.

Janiyari saaquiano Juanni, Pueyaso muerasu jiiitiana. Seetanujuanaa nia panianijia,
taa puetunu Pueyaso rupaa tojiniaa pueya paniya niajanianyacuani. ² Pueyasojiniji seetanu
rupaajanaari poojjajinia quiya. Naaratej, canaari nia paniyani. Cuno rupaari poojjajinia
quiniutianiya pueyaracaanu. ³ Nia tojishacari seetanu Pueyaso rupaajanaa, nia pani-
tioosacarijuhuaj, naacuaajitij, pa Que Pueyasoori Neyanu Jesucristota nia cumaquini-
tianiya. Niaacua taraajenutaniyajaariuhuj. Nioojia jiyatenutaniya juhuajaniya quiji-
acarajaariuhuj.

⁴ Noojiaqueya quia niquiohuajinjinio niquiquianunijia. Nojori timitiacanunijia nojori
tojitianuucua maninia seetanu rupaajanaa, taa pa rootasaaquiaari pa Que Pueyasojini-
jicuaajani. ⁵ Quiocuara naajjya quiarijianijia cua panishano cua rimiatucuaana, cua
sequenura quiajaniya: “Jiyanohua pa panitioore”. Majaari quiarinio rootasano nio, cua
naajiosano quiocuarani. Nio rootasanocuaajaari pa jiiitasano pueyaracaanu Jesucristo-
jiniji. ⁶ ¿Taate pa naata paniniuni? Paari pueya panijjaca quiyani Pueyaso rootasano
pa tojishacari. Niocuajaari na rootasano: puetunu pa miishanojuanaa cuaara quiiira
Pueyaso pa paniniutia poojjajinia.

Cristo paraari sapojonuujuaca

⁷ Quiarijiani, queraatia sapuenu juhua Pueyaso sequenu panishano caminiujuniaari
mijiria quiya. Nojoriiri pueya niishitiojoquiaa: “Majaari Jesucristo rosenu quiquiaari
jiyocuaaanuji, cuaqueyaraca na quiniuria, seetanujuanaa pueyano na quiniuria”. Cana-
puete naa sequejacani, nojoriiri sapojonuujuaca. Nojoricuaajaari Cristo paraa. ⁸ Tama
nia cuaqueyajaaja nia cojuare cuno pueyacuaji, maja nia tojiniuria nojori, niaa mariqui
Pueyaso niquitionu panishano pajaniya maseyaquiriiri, pa Jiyaniijara nia poonijionu-
jiniji na niquitionu panishano. Suraatiaja nia tojiriohuarohua seetanu rupaajanaa, nia
masenura puetunu Pueyaso jiiitasanojuanaa niaara. ⁹ Cante tama na cuaqueyajaaja jiy-
ateja Pueyaso casaa niishijjara socua Jesucristo jiyaramiquishano pueya niishitiojosano-
jinijini, cuno shocotajaari Pueyasoojura quiquii, na shocotanuucua Cristo rupaa. Cante
saniniuuja seetanu rupaajanaa tojitiaquiaa maniniani, taa pa rootasaaquiaari Cristo
rupaacuaajani, Pueyasocuaajaari na Que, Neyanuuri nocuaji Tacunajuhuj. ¹⁰ Seetanu
rupaajanaa jiiitiaashijia jaara niaacua tiuquiniu paniya tamaatia na niishitiojonura nia-
janiya, majaari niaacua na shanacununoj. Majaari quenaaja na saruhatanujuhuj nia
cumaquiniuria nojuaja. ¹¹ Cante na sequeyani: “Pueyaso cuaara cumaquiiira quiajaniya”,
naa sequejaari cuno sapojojua cojiritiasaaree tari sesa na miishanotaja.

Juan puecasacari naajionu

¹² Socua queraatia sequenu paniya niajanianijia. Naajaa, majaari cua naajionu
paniniu. Janiyacuajaari niaacua naquerejyani, maninia pa pocoojonura, shuquiriaatia
pa quiniuria seetanujuanaa. ¹³ Quia tarajanu niquiohuari cua sequeree nojoriria cua
saruhatanura quiajaniya. Nojuacuajaari Pueyaso saquiriojosano maajijuhuj. Tari-
cuaja.

SOCUA TANEE JUAN NAAJIONEE

Juan maninia pohuatasaaquiaari Gayojiniji

¹ ¿Quiaate quiyajaa cua panishano Gayonaa? Janiyari saaquiano Juanni, Pueyaso muerasu jiiitiana. Seetanujuanaa quia paniyanijia, Pueyaso rupaa quiniuucua coojiajinia.

² Quiocuara secojoquiaanijia, puetunu quia miishanojuanaa cuara quiiiria maninia. Janiyari quiocuara secojoquiaaaniuhuj, maninia quia cuaequeya quiniuria, maja cusuus, taa quioojia quiya maniniacuaani, Pueyaso tojjia quia quishacari maninia.

³ Parta Pueyaso muerasujinijinio pueyari cucua tiuquiquianu quia quijia tiacajiniji. Janiyari jiyanohua shuquiriaatia quiquianuni nojori pohuatasacari quiajanijajiniji. Quiaanaari seetanujuanaa maninia miiijia quiquiaa taa pa rootasaaquiaari Jesucristo rupaacuajani. Quiaacuajaari maninia tojiquiaa seetanu rupajanaa, sanajanaa. ⁴ Jiyanohua timiquiaanijia cua tojishacari cua muerasuuri maninia miya, taa cua rootaquiaari Jesucristo rupaa nojoricuajani. Naa cua tojishacaritij, cunoori jiyanohua cua timitiquiaa socua tamonu casaajiniji.

⁵ Sanajanaa, quiaacuajaari maninia miiijia, maninia quia miishacari parta Pueyaso muerasu. Quiaa cutaraari maninia miiquiaa, quia tiuquitishacari quia tiajinia quia niishishoo tamaquiicujinijio Pueyaso muerasu. ⁶ Pueyaso muerasu rerejosacari niya, Pueyaso rupaa pohuatanura rucoojuacaari canaa niquiara pohuatacanu maninia quia miishanojiniji nojoriria, quia paniniutia nojori. Quiaarijiani, nojori quia niqitioire nareja nojori panishano na jiyatajara, socua nojori quianu panishacari cuniquiji. Naa quia miiri quenaaja, Pueyaso quia shuquiritiniuria. ⁷ Nojoriiri Jesucristojiniji pohuatanura rucoojia. Majaari nojori panishano na masetunu paniniu quiquianu Pueyaso niishiyashijiacajiniji. ⁸ Naaratej, pajaniya cuara naacuura jiyano pueya, noo pojori canapuate pa Jiyaniijia rupaa pohuatanura rucoojiyacuajani. Naa pa miiriti Pueyaso rupaa pohuatanu naacuna pa quiniurijuhuj.

Sesa Diótfrefes miishanojiniji pohuatasano

⁹ Janiyari quia quijia tiacajinia Pueyaso pueya maanuucua naa naajioquiaarijihuj. Janiyari nojori sequequiaarini nojori cuara Pueyaso Rupaa pohuatanura rucoojuaca naacuura, cunoo pojori jiiitianura na panishano. Diótfrefesri saaja tama na cuaequeyajaaja shuquiritiaja, Pueyaso pueya maanu jiiitiana na quishacari. Nocuaji cua sequesano ruuretacanuuri. Cua rerequeteguiaaariuhuj. ¹⁰ Naajaa, janiya jaara niaacua quiaaareni, janiyari naa sacaraatia na miiniuucua na nacasunutaniyani. Nojuajaari tamasaca niquiara canaa sesacaquiaa na sapojonuta. Naa socua sesa miiquiaaariuhuj: majaari na tiuquinitianu quiquiaa Pueyaso Rupaa pohuataanaa na tiajinia. Canapuate saniniuuujia nojori tiuquitini paniquiaa nojori tiajiniani, Diótfrefesri nojori tenujuquiaa saaja. Canapuate Pueyaso rupaa pohuatanura rucoojuaca tiuquinitianu paniquiaajaa na tiajiniani, Diótfrefesri puetunu nojori tenujuquiaajanaa, maja socua nojori rerejonura narta Pueyaso muerasuta.

¹¹ Sanajanaa, majaari quia jiaatianu cunoo sesa miiijiaacua, quiaa mariqui juhua nojuaja quirijiaariuhuj. Saaja quia jiaatiare cutara maninia miiijiaacua, juhua nojuaja quia quiniuria. Cante maninia miiquiaani, cunocujaari Pueyaso pueyano. Sesa miiijia saniniuuujia, nojuajaari Pueyaso niishiyashijia.

Maninia Demetrio miishanojiniji pohuatasano

¹² Puetunu pueyajanaari saniniuuujia maninia pohuatanuquiquiaa Demetriojiniji. Tama Demetrio miiijosanojinijiaaja, pueyari niishiya Demetrioori maninia pueyano. Seetanujuanaa, nojuajaari maninia pueyano, taa tamasaca sequequiaacuajani. Niaacuajaari niishiya canaari seetanujuanaa sequequiaani, naa canaa sequesacari Demetriojiniji.

Naajio puequesacari

¹³ Janiyari queraatia sequenu paniyajaa quiajanijiani. Naajaa, majaari cua sequenu paniniu saaja cua naajiojinia. ¹⁴ Janiyacuaja quioocua naquerejiyani. Jiyacaritij, pocua maninia pocojore cutarani.

¹⁵ Pueyaso cuara quioojia jiiitaara maninia, juhuajaniya quia quiniuria. Niya pa rupuenari cua sequeturee cua saruhuatanura quiajanijia. Puetunu cuniqui pa rupuenajanaa quia saruhuatate canaarajuhuj. Tariucuaja.

JUDAS NAAJIONEE

Judas naajiosano Pueyaso saquiriojosano pueyacuara

¹ Janiyari Judasni, Jesucristo seru, Jacobo tarajanu. Niaacuara naajiyaniija canapuate pa Que Pueyaso panishano muerasucujani. Nojuajanaari nia saquiriojoquiaari nera nia quiniuria. Niajaniyari Neyanu Jesucristo cojuasano, nia rupuesacari nojuaja. ² Pueyaso cuara nia jiuujiaaria. Cuaara nioojia cajitiirijahuaj. Cuaara paniiria niajanijahuaj. Pueyaso cuaara naa miiria jiyanoehua niajanijatej.

Sapojonuujacuajiniji pohuatasano

³ Cua panishano pueyanaa, janiyari niaacuara naajionu paniriquiaa jiyanoehua, cua pohuatanura niajanijaa taa maninia pa miishaanutaniyani, Pueyaso saquiriojosano pueya pa quiniucua: niajanijaa, canaajahuaj. Saniniuujia, quarijiani, socua maninia cutaraari cua naajionura niaacuara, cua nacasunura niajanijaa seetanujuanaa Pueyaso tojijiaa nia quiniuria. Jiyanoehua nia tiuuri pueyaracaanu Pueyaso rupaacua, cumueeca Pueyaso pueya nia quiniuria. Pueyasocujaari na rupaa pohuataniquiaari maninia pa niqiuara. Maja cumaati na jatanishaanu. Cuaara pueyaracaanu maninia pohuatasaa, taa pa pohuatasaaquiaricuaani. ⁴ Naa nia sequeyanijia Pueyaso rerequetejaa supuesacari jiyasohua nia tajinia. Tariucuaaanu Pueyaso Rupaajiniacuajaari cuno sesoriquia pueyajiiniji naajiotasaaquiaricuaaja. Nojoriniaari quejoosaanutaniya pueyaracaanu saniitiosocoriquiano. Nojoriiri sequequiaa: “Shuquiriaatia juhuajaniya pa miiri tama pa cuaqueya miiniu panishanojuaja, pa jiyanoojia Pueyaso quishacari. Paa jaara sesa miirini, naajaa, majaari Pueyaso saniitonu quiniutianiya pajaniya”. Nojoriiri naa sequetuquiaa sesatej. Nojoriiri pa Jiitanajanaa jiyatequiaa juhua saniitioyashijia, pa Jiyaniijajanaa Jesucristoni.

⁵ Niaari niishiyacuaaja, Pueyasoori Israel pueya supuetanaa mashiquiquiaari Egipito jiyajiniji, Egipito pueya seya nojori quishacari. Socua nia niishitiorohuaraj. Na nuhuaji, Pueyasoori na pueyajinijinio nocua tiuyashijiaa puecooquiaari. ⁶ Naajuhuj, Pueyasoori tama na seyajaaja nujuatejoquiaari na nujuatejojuajinia, noo pojori canapuate na shuriucua quijiaa quiquiaari jiyocuaaanucujani. Nojoriiri Pueyasora na poonijiosano tiujiaquiaari. Nojori poonijiosaqi tiujiatuquiaarijuahuaj. Cunora, cumayocuaata morojosaaquiariri, pueyaracaanu niishiqui nojori quiniuria, cuaara quiriijaatijia Pueyaso saniitiojonu juuca cutara. Cuno juuca, Pueyasoori puetunu na tojiyashijiaajanaa saniitiojonutaniya. ⁷ Nia niishirijuhua Sodoma tiacajinia quijia pueya, Gomorra tiacajinia quijia pueyano, nojori tiaca shocua quinaa pueyajuhuj. Puetunu nojorijianaari maninia miiniu ruuretaquiaari tama nojori cuaqueya panishanojuaja nojori miiniuria, jiyanoehua sacuaatia. Nojoriiri maajishuriu numuetucujuuca quiquiaari. Cayashuriuuri narta maaji numuetucujuuca quiquiaarijuahuaj. Pueyasoori maja na shipiniuu quiquiaari naa pueya quiniuriatej. Naa Pueyaso tojiyashijiaa nojori quishacari, mariyata taa tama Pueyaso seyajaaja na tojiyashijiaa quiquiaaricuaani, Pueyasoori nojori quejojoquiaari mani quiquiojinia, tii naquiya nojori miishaanura pueyaracaanu. Naa nojori saniitiosaanuucuaatej, cunoori quiquiaari puetunu pueyajanaa niishiniuria maja Pueyaso tojiyashijiaa pa quiniuria taa nojori quiquiaaricuaani.

⁸ Cuno pojori, sacuaatia niishitiojonaa nia tajinia quiyani, nojoricuaajaari Pueyaso saniitiojunijini niishiya. Naajaa, nojoriiri juhuajaniya miiquiaa puetunu sesajanaa taa noojajinia nojori niishiyacujani. Nojoriiri tama nojori jiuujiaajaja curuushojoquiaa nojori miishacari tama nojori niqishanojuaja na maquenujinia. Pa Jiyaniijia sootiuyajaarijuahuaj. Nojoriiri jiyanoehua cumaacaraca quijiaa sesacaquajahuaj, jiyocuaanu quijiacani. ⁹ Supuetana Moisés shaajesacari, Pueyasoori na seya jiyaniijia Miguel jiyarocuaari Moisés quete na jamonura. Sesaacaari Moisés quete paniquiaari juuca. Nocua Miguelta juayonuutaquiaari. Miguel cutaraari seetanujuanaa cumaacaraca quijia. Naajaa, majaari na saarijionu quiquiaari Sesaaca. Na sequeere saajaari: “Pueyasojanaa cuaara juaaria cutara quiajanijaa”. ¹⁰ Saniniuujia cuno sesa niishitiojonaa nia tajinia quiyani, nojoriiri na niishishoo cumaacaraca casaa sesacaquiaa. Naajuhuj, nojoriiri tama nojori cuaqueyajaaja sesoquiaa sesa na miishanota, taa nacujiniaacoji casaa miiquiaa sesa juhuajaniyacuuaani, maja na niishiniutia. Naaratej, nojoriiri saniitiosocoriquiano puetunurajanaa.

¹¹ Nojoriiri jiyanoehua cocuaatia miiquioquiaa. Nojoriiri narta pueya niquiniu paniaquiquiaa, taa supuetana Caín niquiniu paniaquiquiaari tarajanucuaani. Nojoriiri sesa pueya timitiquiaa casamiriaca nojori quiniurijahuaj, naatej, taa supuetana Balaam

miiniu paniquiaari juucuaaani. Nojoriiri mariyata puetunu quejoosaanutaniyajanaa nojori ruuretanuucua Pueyaso, taa supuetana Coré cusoquiaaricuaani na ruuretascari Moisés. ¹² Nia queranacuscari Pueyaso niquiara nia panitioonuta, cuno sacuaraatia niishitiojonuujuacaari jiyanoehua cararaatia nojori miaquesacari niaata. Majaari nojori paniniu tamasaca. Nojoriiri saaja tama na cuaqueyajaaja shuquiritiniu niishijiaa. Puera miaquenujuaca nojori quishacari, cunoori cararaatia. Jiyano pueyari maja na cumaquiniu niajaniya. Nojoriiri najuhuana quijiaca, juhua niqutioocuaari tajimiaquiaa paratu piyarojosacari. Majaari maru ninuu. Nojoriiri najuhuana quiya, juhua muetuhuo naana. Nojoriiri tariucua macu Pueyasora, naatej taa naana sorenocuaani, juhua puetunu na nujuacatajanaa majaratasano. ¹³ Nojori nuhuaji, pueyari saaja taraatia quiquiaa, cararaatia nojori miishanojiniji. Sesa nojori miishanoori juhua jiyanoehua shoniniacu caminia queyocuasacari cushau, curuutuua. Nojoriiri shanohua niquishiya rupaquija, juhua rijia tyano. Na nuhuaji, nojoriiri ninishiqui quiniutianiya pueyaracaanu Pueyasooju. ¹⁴ Pa supuetana Adánri coteenujanaa shipinishano pueyano quiquiaari mijiria. Enocri séptimo jiyaniijia quiquiaari Adán nuhuaji. Enocri Pueyaso niqutishano nojuaja pohuataquiaari taa nio sesa miijiaa pueya miishaanutaniyani. Nojuajaari naa sequequiaariti: “Janiyari Jiyaniijia niquirii cunocoji niyano jiyanoehua queraatia na pueyatani. ¹⁵ Nijioriquiaari sesa miijiaa na saniitionura. Rerequetejacaacia tiutianutianiya puetunu sesa nojori miishanojuanaari. Puetunu na soojeacajanaari saniitosaanutaniya puetunu nojori sesacanuucujanaa pa Jiyaniijia”. ¹⁶ Cuno sesa niishitiojonuujuacaari naa miiquioquiaa nia tajinia. Nojoriiri saa juayonuutaquijaa. Majaari shuquiriaatia nojori quiniu quiquiaa na jiiitiasanota. Nojoriiri tama na cuaqueya panishanojuaja miiquiaa. Puera pocuajaca quiyajaarihuaj. Nojoriiri na sajojonuta maniniuhuaqueetaquiaa narta pueya, maninia nojori miishaanura. Majaari naa nia quiniu pueyanaa.

Pueyaso pueyara rootasano

¹⁷ Cua panishano pueyanaa, nia niishirioehua pa Jiyaniijia Jesucristo jiyaramiquishano pueya sequesano niajaniya. ¹⁸ Nojoricuajaari nia pohuataquiaari taate quera jiya puequesacari quiniutianiyan. Nojoriiri naa sequetuquiaariti: “Quera jiya puequesacari, Pueyaso sesacajaca pueyari Pueyaso casaa soojeaca quiniutianiya, na rupaa soojeacajuhua. Nojoriiri sesa miiniutianiya tama nojori cuaqueyajaaja nojori shuquiritiniuria”. ¹⁹ Naa cuno pueya miiniucuatej, nojoriiri Pueyaso muerasu jiuujia niyaquejotequiaa maja rupuetoosano nojori quiniuria. Nojoriiri saaja tama sesa nojori niishishano miiquiaajaacujua, Pueyaso Sohuanuuju nojori quishacari.

²⁰ Cua panishano Pueyaso muerasunaa, Jesucristo rupaacua nia tiuuri jiyanoehua socua, seetanujanaa na pueya nia quiniuria maninia. Pueyaso nia secojore Pueyaso Sohuanu cumaacata. ²¹ Naacuaajiti, niocua Pueyaso panishano pueya quiri pueyaracaanu. Juhua-janiya nia sashiri pa Jiyaniijia Jesucristo, nojuaja cuara pueyaracaanu quijiacara pa jiyaterejaatijia, shuquiriaatia pa quiniuria na shuriucua pueyaracaanu. Naa pa miiniutianiyan maninia jiyanojia na quiniucua.

²² Canapuate pa Jiyaniijiaacuaji taacanuyajaani, nojori nia niishitiojore jacaria, seetanujanaa nojori tiuniuria maninia pa Jiyaniijiaacua. ²³ Tamasaca nia priyojorejuhuaj Pueyaso pueya nojori quiniuria, nojori mariqui manijinia puetunu quejoosaarejanaari. Tamasacaari jiyanoehua sesa miijiaa. Naajaa, nojori nia naacure, Jesucristo nojori niishiniuriajuhuaj. Saniniuuja, tama nia cuaqueyajaaja jiyanoehua nia cojuare niaa mariqui sesa miitishaarejaarihuaj nia cojishacari nojori. Jiyano pueyacu nia taraajere. Saniniuuja, puetunu sesa nojori miishanojuanaa nia soore cutara.

Naajio puequesacari Pueyaso maniniuhuaqueetasaanu

²⁴ Pa Que Pueyasoori pa cojuaquiaa maja pa catenura nocuaji. Nojuacuajaari cumaacaraca na tiuquinitianura pajaniya nocua, puetunu tari maniniushitishanojuanaa pa quishacari, shanohua na cumaaca pa shootianura pueyaracaanu. Pa niquishacari nojuaja, paari jiyanoehua na timitianutaniyani.

²⁵ ¡Jiyanoehua maniniara pa Que Pueyaso! Nojuajaari niishijiajanaa. Pa jiyatequiaari na muerasuraari pa Jiyaniijia Jesucristo cusunucua pocuara. ¡Jiyanoehua shanohua na cumaaca! ¡Nojuajaari Jiyaniijiajanaa! ¡Jiyanoehua maninia pa Jiiitiana! ¡Nojuajaari puetunu cumaacaracajanaa cutara! ¡Nojuacuajaari pa Que Pueyaso! Jiya shipinishaacarijiyojua, nojuajaari quijiajuhuanaaj. Naa quiyajaari. Naa quiniutianiya pueyaracaanuuri. Taaquiririni, naacuaaquinatejaj.

JESUCRISTO NIQUITISHANO JUAN

Jesucristo niquitishano pajaniyara

¹ Janiyari Pueyaso seru Juanni. Niya naajiotaa Pueyaso niquitishano Jesucristonijia, saniniujia nojuaja niishitiniuria na tojtiajaca, taa quiari naataja Pueyaso miiniutianiya mijiria quijiacani. Jesucristoori jiyocuaaanuji na seru jiyaroquiaari cucua, na niishitiojonura janiya taa mijiria quijiaca miishaanutaniyani. ² Janiyari puetunu na niquitishanojuanaa caminiujia niajaniya seetanujuanaani. Niocujaari seetanujuanaa Pueyaso rupaa, Jesucristojiniji cua caminiujiushano niaara.

³ Shuquiriaatia quijiaca cutaraari noo pojori, canapuete nio cua caminiujiushano Pueyasojinijini serojonutaniya Pueyaso pueya maapue niquiarani. Na tojtiajacaari shuquiriaatia quijiaca quiniutianiyajuhua, nojori tiuuniucua nio naajiojinia cua pohuatasanoocua. Nio pohuatasano tohuateenuraari tari catecanoya.

Juan naajiosano siete Pueyaso pueya maapuecuara

⁴ Janiyari Juanni. Asia jiyajinia quiniaa siete Pueyaso pueya maapuecuara naajianijia. Pueyaso cuaara cumaquiria niajaniya, cuaara nioojia cajitiirijuhua. Pocua niriqiano pa Que Pueyasoori jyanohua maninia. Nojuajaari pueyaracaanu quijiacuaja. Quiarijia quiyajaariuhua. Na Sohuanuuri juhua siete saminio casaa niquishano, puetunu tiqiyocujanaa quijia na quiniucua. Nojoriiri Pueyaso cajishaqui tajoji quitiuya. ⁵ Pueyaso Niyanu Jesucristoori seetanujuanaa puera caminiujia puetunu na Que Pueyaso Rupaa-janaa. Nojuajaari quiarinio na cuaqueyata pa coteetaquiaari samiitanuhua macujiniji. Nojuacuajaari puetunu mijiria jyanijianucujanaa Jyanijia. Nojuacuajaari pa panijia. Tama na nanacajaaja shootequiaari sesa pa miiniujiniji na jayonura pajaniya, tojetaarucujanaa sesa miyashijiacara na jataniniuria pajaniya. ⁶ Nojuajaari pa jiyatequiaari jyanijianucua pa quiniuria, na Que Pueyaso secojonaa pa quiniuria pueyacuara, nojuaja pa shuqiritianurajuhua. ¡Pa Jyanijiaari jyanohua maninia! ¡Pa Jyanijia cuaara shuqiritiasaaria pueyaracaanu! ¡Nojuacuajaari puetunu cumaacaracajanaa pueyaracaanura! Cuaara naa quiiiatej.

⁷ ¡Nia maure! ¡Pa Jyanijia Cristoori cohuajajinia tari cunocojihua! Puetunu pueyajaanaari na niqiniutianiya, noo pojorijuhua, na motenaatej. Puetunu mijiria quijiaca pueyapuejanaari nocuaji nujuquenutaniya nojori martenua. Taaquiriirinij. Naa quiniutianiyacuaaquiniateja na tiuquishacariuhua.

⁸ Pa Jyanijia Pueyasoori tama nojuajinijiaaja sequeya:

“Janiyacuajaari puetunu casaajanaa coteetanani, na shaajariquianojuhua. Puetunu cumaacaracajanaanijia. Janiyacuajaari pueyaracaanu quijiani. Majaari cua supuenu quiquiaari. Janiyari niaacua tiuquiriquianohuani”.

Juan niquishacari Cristo puereeta na shacantuuca cumaacajinia quiyano

⁹ Janiyari niarta Pueyaso pueyano Juanni. Pa Jyanijia Jesuucua tiujia cua quiniucujuhua, janiyari jaarajaaja niaata cojiritiahiya naquiya miiniuni. Naaratej, paari mariyata jyanijianucuaari jiyatesocoriguianoni. Cunora, paari juhujaniya naquiya miiniu rejeretaquiaani Jesucristo cumaquishacari pajaniya. Pueyaso rupaa Jesucristojiniji cua poojotanucua, janiyari shoniniacu caminia jiuujajinia jatasano quiyani jiya tucuaatiajaca. Nio jiya tucuaatiaja sesaari Patmos. ¹⁰ Tamonu juuca, pa Jyanijia samiitanuhua pa niishiniu juucani, Pueyaso Sohuanuuri cucua niqianu jyanohua na cumaacata. Janiyari jiyacari rupaa tojirii nacaano cua nijiniarani, juhua trompeta jonenenu. ¹¹ Cua sequeriquiaari:

—Casaa cua niqitiniutianiya quiajaniyani, cuno quia naajiotare nequesoreetunearano. Quiocua na nuhuaji na jiyarore Asia jiyajinia nio siete cua saqiriojosano pueya maapuecuara. Nojoriiri Efeso tiacajinia quiniaa, Esmirna tiacajinia, Pergamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajinia.

¹² Janiyari cua nijiniara tacatequeeni cua niqiniuria cante cucua pocuariquiaani. Cua tacatesacari, janiyari siete samari nujuatacojua niqiriini, orojiniji shipinijosano. ¹³ Cuno samari nujuatacojua tajiniani, janiyari pueyano niqiriini, juhua Pueyaso Niyanu niquishano. Tucuaque toque cushiriquiaari. Na niouuacaacuma puecariquiaari. Na jiriquiajinia camarucuteriquiaa orojiniji shipinishano casaari. ¹⁴ Pueyaracaanu quijia na quiniucua, na muecacaari tojetaarucujanaa jyanohua cohuaja quiriqiaa juhua sohuanatu. Maatia pueya jiuujia niqijia na quiniucua, na namijiaari juhua mani rimianacuriqiaa. ¹⁵ Na niouuacaari nenecuriqiaa juhua jyanohua naseeca casaajinia

mohuaquishano bronce. Naa shacantuuca niquishano quiriquiaari puetunu sesa casajaanaa paracaajia na quiniuucua. Cumaacaraca Jiyaniijia na quiniuucua, na pocuasacari, jiyanoehua tojishaariquiaari juhua sararajua, jiyocuaaanuji mohuaca tijia. ¹⁶ Na miaquetajata siete riya muetujuriquiaari. Naajuhua, nijiniaquetucuaa mueruuri na rupaamaji mueranacuriquiaa, na rupaa ruuretajaca na puecoonura. Na jiquicoori jiyanoehua shacantuuca quiriquiaa juhua jiyanoehua pananu jasacari panacari.

¹⁷ Cua niquishacari nojuaja, janiyari cua puerenuta na pajama pojijaree juhua macuni. Nojuajaari saaja na miaquetaja niaree cucua. Cua sequereeri:

—Maja puerenu. Janiyacuaja Jesuni. Janiyari puetunu casaajanaa coteetejani, na shaariquianojuhuaj. ¹⁸ Janiyari pueyaracaanu quijiani. Macu quiquiaarinijia. Naajaa, janiyari samiitiaquiaarihuani pueyaracaanu saminio cua quiniuria. Janiyari macunucua quiqiuo riatataja camaruni. Naacuajitij, janiyari cumaacaracani cua tojiyashijia cua quejoonura macunucua quiqiuojinia. ¹⁹ Pueya niishishocoriquiano, quia niquishano quia naajiotare Juannaa, taa na quiyacujani, naajuhuaq taa mijiria quijia miishaanutaniya na nuhujani. ²⁰ Quiaritia quia pohuatareera maatia quia niishiniuria cua niquitishano quiajanija. Cuno siete riya quia niquishano cua miaquetajata cua muetujanoni, cunoori siete cua seya. Nojoriiri siete cua saquiriojosano pueya maapue jitianaa. Cuno siete samari nujuatacojua orojiniji shipinijosano quia niquishanojanihuaj, cunoori siete cua saquiriojosano pueya maapue.

2

Éfeso tiacajinia quiniaa Pueyaso pueya maanuucua naajione

¹ Juhuacatecara naa cua sequereeri:

—Éfeso tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Nojuaja, cante siete riya cacaa na miaquetajatacujani, cante siete samaritu nujuatacojua tajinia rucuanejojuacuajani, nojuajaari naa quia sequeya: ² ‘Janiyari puetunu quia miishanojuanaa niishiyani. Quiaari jiyanoehua poonijioquiaa quiria. Naajuhuaq, quiaari puetunu casaajanaa rejeretaquiaa juhujaniya. Janiyari niishiyajuhuaq, majaari quia shanacunu quiquiaa sesa miijia nia tajinia. Naajuhuaq, quiaari cuno sapojonuujua nequesorecanu, noo pojori canapue tama sequeriquiaa-jaajani: “Canaari Jesu jiyaramiquishanoni”. Naa quia nequesoreacari nojoritij, quiaari niishiquiano nojoriiri sapojonuujua seetanujanaa. ³ Quiaari puetunujuanaa taraatia quia miiniu rejeretaquiaa, cucua tiuujia quia quiniuucua. Quiaari pueyaracaanu quiria poonijiojua maninia. Quia samareesacari, naajaa, majaari quia tarinitianu quiquiaa. ⁴ Puetunu naa quia miishanojuanaani, cunoori maninia. Saniniuujia, cua sequesano quia tojiri. Majaari panijia quia quiniu tari, juhua coteenujua. Majaari cuno cua maniniucuanu cutara. ⁵ Cunora, quia niishiri taa jiyanoehua cua panijia quia quiquiaarini. Quioojia quia tacatorohua cucua, maninia miijia quia quiniuhua, taa quia quiquiaari coteenucuajani. Quiaa jaara quioojia tacatoyaquiri, janiyari quioqua niniutianiyani, Éfeso tiacajiniji cua patanura quia samaritu nujuataja. ⁶ Quiaari maninijuhuaq, sacuaatia casaa Nicolás niishitiojosano tojiijia miishano soojea quia quiniuucua. Janiyari cuno pojori miishano soyajuhuaq. Nio cua sequesano quiajanijani, cunoori puetunu cua pueyarajanaa. ⁷ Cante numaacani, nojori cuara tojiiria Pueyaso Sohanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casajaanaa nujuataja cumaatiani, janiyari nojori jiyatenutaniya cuno naanajiniji miojuarani, pueyaracaanu rishijia nojori quiniuria’ ”.

Esmirna tiacajinia quiniaa Pueyaso pueya maanuucua naajione

⁸ Jiyaniijia Jesucristoori naa cua sequerejuhuaj:

—Esmirna tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Naa sequeyari cante puetunu casaajanaa coteetenacuajani, na tucuatajanio. Nojuacuajaari cusoquiaari, na nuhuaji samiitiaquiaarihuari. Janiyacuajaari nojuajani. ⁹ ‘Janiyacujaari niishiyani, quiaari naquiya miishaquiaa. Quiaari casamiijiujuhuaj. Naajaa, quiaari jiyanoehua casamiriacuajia nija cua shuriucuanu. Janiyari niishiyajuhuaq, cuno Judiocuacari quia sesacquiaa. Nojoriiri tama sequequiaaajuaju nojoriniari Pueyaso pueya cutara, Judiocuaca nojori quiniuucua. Maja naatej. Nojori cutaraari Satanás pueya maanu. Satanásujaari samaruha jiyaniijia. ¹⁰ Quiaari naquiya miishaanutaniya. Naajaa, majaari puerenu. Satanási noojiaqueya niajanijinijinio nujuatejotenutaniya nujuatejojuajinia nia sanishaanura, niaate cucua tiuujia seetanujanaa. Naajaa, niaari saaja rupaquijia miishaanutaniya naquiya. Quia rejeretariquia saaja. Cua tojiijia quia quiriquia pueyaracaanu, quiaa cuara shaajeyerejatijia. Quiaa jaara naa miiritij, janiyari quia jiyatenutaniya jiyanoehua

shuquiriaatia quijia quia quiniuria pueyaracaanuni. Nio cua sequesano quiajanianuni, cunoori puetunu cua pueyarajanaa. ¹¹ Cante numaaracani, nojori cuaara tojiiria Pueyaso Sohuanu sequesano Pueyaso pueya maapuera. Cante cucua na tiuuniucua naquiya na miishaanu rejeretaja pueyaracaanuni, nojuaja cutaraari maja quenaaja naquiya na miishaanu quiniutianiya Pueyaso saniitiosacari na ruuretajaca. Na ruuretajaca cutaraari quejoosaanutianiya mani noshijia caminiajania' ”.

Pérgamo tiacajinia quiniaa Pueyaso pueya maanuucua naajionee

¹² Jiyaniijia Jesucristoori socua cua sequere:

—Pérgamo tiacajinia quijia cua seruucua quia naajiorejuhuaj, Pueyaso pueya maanu jitianani. Naa quia sequere nojuaja: “Nijiniaquetucua mueruu jitianani naa sequeya: ¹³ ‘Janiyari niishiyani, cuno tiaca quiaa tii quiyani, cunoori Satanás quiquiojuhuaj. Naajaa, quiaari cua tojijia quiquiaa. Majaari cucua quia tiuuniujiniji quia seetanu quiquiaa. Cua seru Antipas cutaraari mosaaquiiaari janiyajiniji pohuatanu na tarinitiaquiniucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jiyanoohua maninia. ¹⁴ Saniniuujia, maja pueyari Israel pueya mianuutequiaari noo shu, teyanote juaashiquiata shipinijosano casaacua puecosano quiquiaaricuaajani juhua Pueyasocua. Naa sacuaaraatia nojori queranacujasacari nojori paraatatej, Israel pueyari cuniquijia cuno taatujuri numuetucujuaarijuhuaj. ¹⁵ Naajuhua, majaari nio cua maniniucuanu: nojiaquiyari niajanijiniujinijioori maja na tarinitianu paniniu sesa na miijionu. Nojoriiri supuetana Balaam niishitiojosano tojijia quiyajaa. Balaamcuaajari Israel pueya paraca Balac niishitiojuaari na pueya cuaara shiniujuuria Israel pueya, jaarajaaja Israel pueya miinuria sesa nojoritia. Naaratej, Balac pueyari Israel pueya mianuutequiaari noo shu, teyanote juaashiquiata shipinijosano casaacua puecosano quiquiaaricuaajani juhua Pueyasocua. Naa sacuaaraatia nojori queranacujasacari nojori paraatatej, Israel pueyari cuniquijia cuno taatujuri numuetucujuaarijuhuaj. ¹⁵ Naajuhua, majaari nio cua maniniucuanu: nojiaquiyari niajanijiniujinijioori maja na tarinitianu paniniu jiyanoohua sacuaaraatia casa Nicolás niishitiojosano. ¹⁶ Quiaari nareja niquiquiaa sacuaaraatia nojori miijionu. Cunora, quioojia quia tacatorohua cucua, janiya mariqui quioocua quiaareeri cuno sacuaaraatia miijia cua miquejonura cua rupaamaji mueranacujua mueruuta. ¹⁷ Cante numaaracani, nojori cuaara tojiiria Pueyaso Sohuanu sequesano Pueyaso pueya maapuera. Cante tama na cuaqueya miiniu panishanojuaja rejetejani, janiyari na mianuutenutaniya jiyocuaaanu cua racatasano cua pueyarano cua riuriotacajinijini. Janiyari na niqutionutaniya cohuajajau saajiajuhuaj, teyanooocua quiarinio sesa naajiotasano quiniutianiyacajani. Majaari tamonu niishiniu quiniutianiya cuno sesa. Saaja na camaruuri na niishinutianiya, cana cua niqutionutaniya cuno saajiacuajani’ ”.

Tiyatira tiacajinia quiniaa Pueyaso pueya maanuucua naajionee

¹⁸ Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Pueyaso Niyanu, juhua mani rimianacuyano namijiaaracani, juhua bronce mohuaquishano shacantuuca nihuacaracajuhua, nojuajaari naa quia sequeya: ¹⁹ ‘Janiyari puetunu quia miishanojuanaa niishiyani. Janiyacuajaaari niishiyani, quiaari Pueyaso panijia, pueya panijiano. Quiaacuajaaari Pueyasocua tiuujia. Quiaari maninia poonijiona Pueyasora, pueya quia naacunura. Naajuhua, quiaari juhuajaniya rejeretaquiaa quiaa jaara taraatia miishaariquia. Janiyari niishiyajuhua, puetunujuanaa quia miishano quiria quiarijiani, cunoori socua queraatia coteenu quia miishanojiniji. ²⁰ Saniniuujia, nio cutaraari cua maniniucuaquishano: cuno Jesabel niaata quiyani, tama na cuaqueyajaaja sequequiaani, nojuajanaari Pueyaso sequesano caminiujunua pueyara. Quiaari juhuajaniya na shanacuaquiaa saaja, sacuaaraatia na niishitiojosanota na sapojonura cua pueya. Naa sacuaaraatia na niishitiojosanotatej, cuno maajiri cua pueya shiniujuquiaa juhuajaniya nojori numuetucujunura na camishoo maajipohua. Cua pueya shiniujuquiaaarijuhuaj nojori miquenuunura noo shu, teyanote juaashiquiata shipinijosano taucua pueyasohuacua puecosano quiquiaacuaajani. ²¹ Janiyacuajaaari tari cuno maaji sashiquianu juucuani, noojia na tacatonura cucua. Majaari na tarinitianu paniniu paanatu na quiniu. ²² Cunora, cua tojiri. Cua saniitionura nojuaja, janiyari na cusotenutaniyani na maquetujinia na matanura. Naajuhua, na numuetucunujuaca jaara noojia tacatoyaquiri sesa nojori miiniujiniji, janiyari jiyanoohua naquiya miiniutianiya nojorini. ²³ Noo maajipohua juhuaj, paanatujuuria quiniuni, cuno paanatujuanaa niishitiojonucua nojori juhua necojorini, janiyari puetunu nojorijianaa pueconutaniyani. Naacuajitij, puetunu Pueyaso pueya maapuejanaari niishinutianiya, janiyari puetunu nojori jiuujajinijianaa nojori niishiriojosano niishijiani, nojori panishanoocua nojori jiaatianunio. Naacuajitij, janiyari maninia miijia niajanijiniujinijio maninia miiniutianiyani. Niajanijiniujinijio sesa miijia saniniuujia, nojoriiri saniitiosaanutaniyacua. ²⁴ Tiyatira tiacajinia quiniaa nojiaqueya niajanijiniujinijio

saniniuuja, niari sacuaraatia cuno maaji niishitiojosano ruuretaquiaa saaja. Naajuhuaaj, majaari nia niishiniu paniniu quijia cuno sacuaraatia casaa jiyasohuaaja niishishano, sacuaraatia miijiaa jiyaniquishanoni “jiyajeneta casaa, Satanásjiniji niishishano”. Naa nia ruuretannuucua puetunu cuno sesa niishitiojosanojuanaani, cunoori maniniacuaja. Cunora, majaari socua cua nacasunu quiarijia nijaniya. ²⁵ Saaja tama nia cuaqueyajaaja nia cojuare jiyanhua, maja nia tarinitianura maninia nia miiniu taa nia miiquiaacuajani. Naa nia miiriquia pueyaracaanu, janiya jaara niaacua tiuquiriohuajaatijia. ²⁶ Cante cua panishano miiquiaa pueyaracaanuni cuaara shaajeyarejaatijia, janiyari cuno pueyano jiyatenutaniya tamasaca pueyapue jiyaniijia na quiniuriani, taa cua Que jiyatequiaari janiya jiyaniijia cua quiniuriacuani. ²⁷ Jiyaniijianuucua cua jiyatesano pueyani, nojori-iri cumaacaraca quiniutianiya na jiiatasano pueya na tojitiniuria nojuaja. Na tojtiaashijia na saniitiosacari saniniuuja, nojori piyonutaniya jacanauraaari, juhua cumamacata pishano conatu. ²⁸ Naajuhuaaj, janiyari joojea na niqutionutaniyani, juhuaquetaja rijiani, shacantuuca quijia na quiniuria juhua janiyajuhuaaj. ²⁹ Cante numaaracani, nojuaja cuaara tojiiria Pueyaso Sohuanu sequesano puetunu Pueyaso pueya maapuerajanaa’ ”.

3

Sardis tiacajinia quiniaa Pueyaso pueya maanuucuaa naajione

¹ Jiyaniijia Jesucristoori socua cua sequeree:

—Sardis tiacajinia quijia cua seruucuaa quia naajiorejuhuaaj, Pueyaso pueya maanu jiiitanani. Naa quia sequere nojuaja: “Naa sequeyari cante Pueyaso Sohuanu jiyaramiquiquiaa cuno siete Pueyaso pueya maapueecuacuajani, nojori jiuujajinia na poonijnura. Nojuacuajaari cuno siete Pueyaso pueya maapue jiiitanaa Jiiitanajanaa. Janyacuajaari cunoni. ‘Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. ² ¡Quia maquenu quia jatate! ¡Suteja quia quiri! Quia cumaquiri noo pojori canapute jatarinitiaja rishiyajaani. Quera cusonuyari. Janiyari Pueyasora quia miishano niqiuquiaani. Majaari maninia na quiniu cua Pueyasora. ³ Quiaacuajaari maninia niishitiojosaaquiaari Pueyaso rupaa. Taa quia niishitiojosaaquiaricuajani, cuno quia niishiriohua. Quioojia quia tacatorohua Pueyasocua, seetanujuanaa na rupaa tojjia quia quiniuria. Quiaa jaara suteja quiniu paniaquiri, janiyari canashyaquiji quiocua niniutianiya juhua nohuase-jojuani, quia jyanishacari maja naasucua juhuanujuaja cua tiuquiniu quiniutianihua. ⁴ Quia jiiatasano pueyajinijinio cuniqui Sardis tiacajiniani, secaja nojorijinijinioori sesa miiniu ruuretajaca saaja. Naa sesa miiniuria nojori na cojijaquiniuucuatej, nojori-iri juhua curuushojijaquishano janiyara. Naaratej, janiyari nojori cushiyotenutaniya cohuaajaqueya toqeni, cuata nojori rucuanenonura, cua rupunaa nojori quiniuucua. Cunoori seetanujuanaa sesa miiniu ruuretajaca nojori quiniuucua, cucua tiujujaca nojori quishacari. ⁵ Canapute naa sesa miiniu ruuretajacani cua tojtiajaca nojori quiniuucua, nojoriiri naa cohuaajaqueya toqueya cushiyotesocoriquianojuhuaaj. Cunoori quiniutianiya tojetaarucujanaa sesa miyashijiacara cua jiyatesacari nojori. Naajuhuaaj, majaari cua tuujunu quiniutianiya nojori sesaca cua naajionejiniji, tee cuniqui pueyaracaanu rishijiacarano cua saquirojosano pueya sesaca naajiotasano quiyacuajani. Naajuhuaaj, janiyari nojori jaatianutaniya cua Queecuani, na seya tacojiriano, cua sequenura nojoriiri cua timitiasano pueyaniojuja. ⁶ Cunora, cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera’ ”.

Filadelfia tiacajinia quiniaa Pueyaso pueya maanuucuaa naajione

⁷ Jiyaniijia Jesucristoori socua cua sequeree:

—Filadelfia tiacajinia quijia cua seruucuaa quia naajiorejuhuaaj, Pueyaso pueya maanu jiiitanani. Naa quia sequere nojuaja: “Cua tojiri. Janiyacuajaari tojetaarucujanaa maninia miijiani, cua Que tojjia quia quiniuucua. Puetunu cua sequesanojuanaari seetanujuanaa. Jiyaniijijanaa cua quiniuucua cua supuetana David niti, janiyari cua Que tiotiu riatataja jiiitanani, cua saquirojosano pueya cua tiuquinitianura cua Queecua. Janiya jaara cuno tiotiu riatareni, tamonuuri maja na naata na tionuhua. ⁸ Janiyari puetunu quia miishanojuanaa niishiyani. Naajuhuaaj, janiyacuajaari juhua tiotiu riatarucuaa quiocuajini, cua rupaa quia poojotanura. Naacuajitij, tamasacaari maja na naata tenujunu quiajaniya. Quiaacuajaari saaja secaca cumaacaraca. Naajaa, quiaari cua rootasano tojjiacuaja. Naajuhuaaj, majaari cua soojeaca pueya niquiara quia tamacanu quiquianu janiya. ⁹ Naa maninia quia miiniuucua janiyaracuatej, janiyari naa maninia miiniutianiya quiarajuhuaaj. Janiyari noojiaqueya Satanás pueya maanujinijinio mojoquetaniniutaniya quiocuarani. Cuno pojoriiri tama na cuaqueyajaaja sequēja, nojoriniaari

seetanujuanaa Pueyaso pueya, Judiocuaca nojori quiniuucua. Naa nojori sequesacaritij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuuja quia quiniuucua. ¹⁰ Janiyari quia sequequiaarini maja quia tarinitianura quiria poonijionu, quiaa jaara naquiya miishaariguia. Quiaari seetanujuanaa naa miiquianu. Naaratej, Pueyaso saniniujushacari puetunu mijiria quiniaajanaa puereeta naquiya na niiniutia nojori, janiyacuaajaari jiyacari nia cojuanutaniyani. ¹¹ Quia niishiri: janiyari quera tiuquihuani. Majaari quia tarinitianu cua rupaa tojiniu, quiaa mariqui sapojosaareeri cucuaji quia rupatenura. Naacuajitij, quiaa jaara cucuaji catere, majaari Pueyaso niq- uitionu quiniutianiya quiarano na racatasano. ¹² Cante sesa miiniu samiritiaja saajani, cua rupaa tojjia na quiniuucua, janiyari jiyocuacaanu Pueyaso Secojojua tiajinia na nju- atenutaniya juhua morijiumi Pueyaso quishaquijianaa, tii cua Que Pueyaso na shuquiri- tianura pueyaracaanu. Majaari socua cuniquiji na pootiosaanu quiniutianiya. Na- juhuaj, janiyari cuno pueyanocua naajiotanutaniya cua Que Pueyaso sesani, quiarinio cua sesajuhua, cua Que Pueyaso tiaca sesanio. Cuno tiacacuajaari quiarinio Jerusalén tiaca, jiyocuacaanuji roshinitiasaariquiano. ¹³ Cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera”.

Laodicea tiacajinia quiniaa Pueyaso pueya maanuucua naajione

¹⁴ Jiyaniijia Jesucristoori socua naa cua sequere:
 —Laodicea tiacajinia quijia cua seruucua quia naajiorejuhuaj, Pueyaso pueya maanu- jitianani. Naa quia sequere nojuaja: “Cua tojiri. Naa sequeyari noo pueyano cana sequesante seetanu rupaajanaacuajani. Puetunu na caminiujushanojuanaa Pueya- sojiniji quiarani, cunoori seetanujuanaa. Pueyasoori na shipinitiquaari puetunu na shipinishano casaajanaa. Cunocuajaari janiya. Cunora, cua tojiri. ¹⁵ ‘Janiyari puetunu quia miishanojuanaa niishiyani. Quiaari najuhua quijia, quia miyaquiniuucua cua sequesano. Seetanujuanaa cua tojiaquiniu panijia quia quishacari, maara socua maninia quiquaari cutara maja quia niishiniuria janiya. ¹⁶ Quiaa jaara cua niishiyashijia quiriquia, janiya maara quiocua taraajereni. Saniniuuja, quiaa jaara seetanujuanaa cua tojjia quiriquia, janiya maara quia timitiaren. Saniniuuja, najuhua cua pueyano quia quiniuucua, janiyari quia soyani. Naa quia quiniuucuatej, janiyari quera quia saniitioyani. ¹⁷ Quiaari tama sequequiaajaacujua: ‘Janiyari casamiriacani. Janiyari puetunu cua panishanojuanaa jitianani maninia mijia cua quiniuucua’. Maja cutaraari quia niishini quioojaari cusosu. Janiyara, quiaari tojetaarucujanaa casamijiu, cariy- ojuaru, juhuasunio. Quiaa jaara na niishiri quia, quiaa maara tama quia cuaqueyajaaja taraajetaja quiriquia. ¹⁸ Cunora, janiyari quia numooteyani moseeca pueyanonaa, cua rupaa tojjia quia quiri, seetanujuanaa casamiriaca quia quiniuria. Naajuhua, maninia mijia quia quiriquia cua cushitiniuria quiajaniya cohuajaque toque, maja cararaatia quia quiniuria juhuasu. Naajuhua, cua niishitaja quia masere cutara, quiooja namijia riatenura, seetanujuanaa maninia niquijia quia quiniuria. ¹⁹ Janiyari puetunu cua pan- ishano pueyajanaa nacasujani, nojori saniitiojuahuaj. Cunora, quiooja quia tacatore cucua. Tama quioojiaaja quia shiniujurijuhua shamaatia cua tojjia quia quiniuria. ²⁰ Cua tojiri. Janiyari quiooja tootiuujini jiiquioonuujiyani. Cante cua tojiyani, nojuaja cuaara na tootiu riataara cucuaji. Janiyacu noca tiuquiumiani, nata cua miaquenura, shuquiriaatia cua pocojonura nata. ²¹ Janiyari cua Paraca shocotaquiaarini cua Que tojjia cua quiniuucua. Naaratej, cua Queeri cua cajitiquaari na shuriucua, jiyaniijajanaa cajitijinia. Naajuhua, janiyari Sesaaca shocotajaca cajitijionutaniya cua shuriucuan, jiyaniijianucua nojori quiniuriajuhuaj. ²² Cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera”.

4

Juan niquishacari jiyocuacaanu Quijaari maniniuhuaqueetasaariquiaa

¹ Na nuhuaji, janiyari mauquiaarini. Janiyari saaja jiya cajiniocua tootiu niquiquaari riatasanoni. Shushajanaa cua tojishano rupaa juhua trompeta jonenenuni, cuno rupa- jaari cua pacutequiaariuhua sequenu. Naa cua sequereeri:

—Miji quia tacama. Janiyari quia niqitiniutianiyan taa nio pa quishacari nuhuaji mijiria quiniaa miishaanutaniyani.

² Jiyacaritij, Pueyaso Sohuanuuri cucua niquiaari. Cua sohuanu tacaniquaari jiyocua- caanuuri. Janiyari jiyacari jiyaniijajanaa cajitiu niquiriini. Pueyanoori tii cajiriquiaa.

³ Nojuajaari shanohua niquishano quiriquiaa, jyanohua shacantuca juhua jaspe saajia, jyanohua naatucajuhuaj, juhua cornalina saajia. Naashiiri na cajitiu caco nujuariquiaa. Jyanohua shacantuca quiriquaari neeruca, pocojuanaque juhua esmeralda saajia.

⁴ Jiyaniari socua veinticuatro cajitiucua niquirii Jiyaniijajanaa cajitiu shocuanii. Tii cajitiuriquiaari veinticuatro niishijiaca jiyaniijianucua. Cohuajaque toqueya cushiy-onuuriquiaari, orojiniiji shipiniijosano nacaqueyano. ⁵ Jiyaniijajanaa cajitiujiniiji, miacanaari nunujuriquiaa. Jiyanoehua majacuriquiaajaariuhua. Jiyaniijajanaa cajitiu taccoji, tii noshiquioriquiaari siete samari. Cunocuaajari siete Pueyaso Sohuanu, puetunu tiqiyocujanaa quijia na quiniucua. ⁶ Jiyaniijajanaa cajitiu taccoji, juhua jiyanoehua puereetuca caminiaari quiriquiaajuhua, juhua cohuaja motiiquio maatia niquishiyari na tamajiria.

Jiyaniijajanaa cajishaqui, cuatro saminio casaari quiriquiaajuhua, puetunu na shocujanaa. Nojoriiri jiyanoehua queraatia namijiaaraca quiriquiaa, na jiriquiaacumaji, na nijiniaacumajinio. ⁷ Cuno cuatro saminucua casaari tamaatia niquishano quiriquiaa tamonujiniiji. Niquiryatuuri juhua juurunu sare niquishano quiriquiaa. Tamonuuri juhua seru juunu caya niquishano quiriquiaa. Tamonuuri juhua surohua miooru jaano niquishaariquiaacujua. ⁸ Puetunu cuno cuatro saminio casaajanaari seis nesuhuaraca quiriquiaa. Puetunu nojori cuaqueyacumajanaa quiriquiaari na namijiaa, nocuaji na niquitija, na nijiniara na niquitajano. Nojoriiri pueyaracaanu Pueyaso maniniuhuaqueetariquiaa, juuca, niucuanio. Majaari nojori tarinitianu quiriquiaa naa na sequetunu:

—Jiyaniijajanaanaa, quiaari saa maniniaja, jiyanoehua maninia, tojetaarucujanaa maninia miijia! Quiaacuaajari Pueyaso, puetunu cumaacaracajanaa. Quiaari quijiajuhuanajaj. Majaari quia supueni quiquiaari. Quiaari quia pueyacia tacateriquianohua.

⁹ Cuno cuatro saminio casaari naa pueyaracaanu maniniuhuaqueetariquiaa Jiyaniijajanaa, na cajitiujinia cajiyano, pueyaracaanu Jiyaniijajanaa quiriquiano na quiniucua. ¹⁰ Naa pueyaracaanu cuno cuatro saminio casa timitiasacari Jiyaniijajanaacuaatej, cuno veinticuatro niishijiaca jiyaniijianucuaari jaarajaaja mojoquetacoqueequiaa Jiyaniijajanaacuaara. Nojoriiri na tuhuajaa jartaqueequiaa Jiyaniijajanaa cajitiu pajama, naa na sequenuta:

¹¹—Niiori quiara, Jiyaniijanaa. Quiaa cutaraari Jiyaniijajanaa, maja canaa. Quiaacuaajari canaa Pueyaso. Quiaa cuara timitiasaaria pueyaracaanu, jiyanoehua maninia shacantuuca quijia quia quiniucua, puetunu cumaacaracajanaa quia quiniucuaajuhua. Quiaacuaajari puetunu casaajanaa shipiniquiaari. Tama quia paniniucuaajaaja, quiaari na shipiniquiaari.

5

Rupanacujusano naajioneejiniiji pahuatasano, Borrego Niquiojuajiniijinio

¹ Na nuhuaji, janiyari Jiyaniijajanaa cajitiujinia cajinia juaashiquiajina niquirii naajioneeni. Na miaquetajara na cacariquiaari. Cuno tucuanee naajioneeri jiumiocosano quiriquiaa. Naajioori nocua quiriquiaa, na nijinia, na jiniacumano. Cuno naajioneejinia, siete naajioori tii naajiotasano quiriquiaa. Cuno siete naajio coteejajiniani, juhua roshitia rupanacujutasanoori quiriquiaa. ² Jiyacaritij, janiyari jiyanoehua cumaacaraca Pueyaso seru niquiriini. Naa nequesoreeriquiaari jiyanoehua na nacanuta:

—¿Cante seetanujuanaa maninia miijia cutarani? Cuno cuara rupartaara rupanacutasano, na riatanura cuno naajionee.

³ Jiyacaritij, majaari quenaaja maninia miijia quiniu quiquiaari jiyocuaaanu, jiyajinia, jiya cariquimianio na riatanura cuno jiumiocosano naajionee. Tojetaarucujanaa shaaqui quiquiaariirri cuno naajionee serojoriquiano. ⁴ Naaratej, janiyari jiyanoehua nujuqueriquiaani, tojetaarucujanaa shaaqui maninia miijia quiyaquiniucua cuno naajio na riatanura, na serojonuranio. ⁵ Cua nujuquesacari, tamonu cuno veinticuatro niishijiaca jiyaniijianucuaajiniijinoori cua sequeree:

—Maja nujuquenu. Quia cumantare. Quia niquiri. Pa Jiyaniijajanaacuaajaari jiyanoehua cumaacaraca. Tariucuaaanu Pueyaso Rupaajinia, nojuacuajaari miriqui sequeshiya Juurunu saretu, Judá niquiohuacujinio supueriquiano, Jiyaniijajanaa na quiniuria na supuetana David niti. Nojuacuajaari pa paraca Satanás shocotana, tojetaarucujanaa Jiyaniijia Pueyaso tojjia na quiniucua. Naaratej, nojuaja na naata cuno siete naajio coteeja rupanacujutasano rupareetanu na serojosocoriguiano.

⁶ Jiyacaritij, janiyari Borrego Niquiojua niquiriini Jiyaniijajanaa cajitiu taccoji nujuano, cuno cuatro saminio casa tajiniano. Cuno veinticuatro niishijiaca jiyaniijianucuaari na shocua quiriquiaajuhua. Borrego Niquiojuuari seetanujuanaa juhua mosano samitianohua niquishaariquiaa. Nojuajaari siete jiyaniijia tuhuajaaraca quiriquiaa, puetunu cumaacaracajanaa na quiniucua. Naajuhua, siete namijiaaraca quiriquiaari. Cuno na siete namijaani, cunocuaajari Pueyaso Sohuanu, Pueyaso jiyaramiquishano puetunu

mijirijajanaa. ⁷ Cua niquishacari, Borrego Niquiojuaari Jiyaniijajanaa cajitujinia cajiyano juaashiquaijiniji jiuniososano naajionee masetaree. ⁸ Nojuaja jaara cuno naajionee cacariquiaa tari, cuno cuatro saminio casaari nocuara mojoquetacoquiaari, cuno veinticuatro niishijiaa jiyaniijianucuanio. Puetunu nojorijianaari taquiniojosano casaa jitiariquiaa. Naajuhua, orojiniji shipinijosano suhuococua mueetacoriquiaari, mishaja shanohua jaanutajata. Nojori mueetacosano shanohua jaanutajani, cunoori nio jiyajiniji Pueyaso muerasu secojonuusano Pueyaso. ⁹ Nojoriiri Borrego Niquiojua jaaquequetariquiaa nio quiarinio jaaquequejosano:

—Saaja quiajaniyari seetanujanaa maninia miijia. Naaratej, quia naata cuno naajionee patanu quia rupareetanura na rupanacujusano. Quiaari jiyanojua maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya masequiaari Pueyasora puetunu tamaatiuucua pueyapuejinijiniojuanaa, puetunu tamaatia rupaa pocuajacajinijiniojuanaa, puetunu tiacajinijiniojuanaa-juhua, puetunu jiyacajinijiojuanaano. ¹⁰ Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianucua, pueyacuara secjonaa, pueyaracaanu nojori maniniuhuaqueetanura pa Pueyaso. Nojoriiri jiyacua jiyaniijianucua quiriquianojuhua.

¹¹ Na nuhuaji janiyari tojetaarucujajanaa jyanohua jyanohua queraatia Pueyaso seya niquiriini. Jiyaniijajanaa caajituu shocua mariquiaari, cuno cuatro saminio casaa shocujuhua, niishijiaa jiyaniijianucua shocuanio. Nojoriiri jyanohua queraatia quiquiaari, juhua jaaquia, serojiaquishoo. Janiyari nojori tojirii pa Jiyaniijia Jesu maniniuhuaqueetaanoni. ¹² Nojoriiri naa na sequeturiquiaa na nacanuta:

—iPa Jiyaniijiaari jyanohua maninia! Pueyacuara mosaaquiaariiri juhua borrego niquiojua. Naaratej, saaja nojuaja cuaara quiriia Jiyaniijajanaa pueyaracaanura. Saaja nojuaja cuaara jitiiaara puetunu casamijianaa. Saaja nojuajaari tojetaarucujajanaa niishijia. Nojuajaari puetunu cumaacaracajanaa. Cuaara naa quiriia pueyaracaanutej. Puetunu quijiaa casaajanaa cuaara tojtiaara pa Jiyaniijia. Saaja nojuaja cuaara quiriia jyanohua timitiasano. Puetunu quijiacajanaa cuaara na maniniuhuaqueetaara.

¹³ Naajuhua, janiyari puetunu Pueyaso shipinishano saminio casaajanaa tojiriini, jiyocuacaanu quijiaa, jiyajinia quijiaa, jiya cariquimia quijiacajuhua, shoniniacu camini-jinia quijiacanio. Puetunu nojorijianaari jyanohua na timiniutia sequeturiquiaa:

—iCuno, na shacantuuca cumaacajinia cajiyani, Borrego Niquiojuaano, nojori cuaara maniniuhuaqueetasaria pueyaracaanu! iPuetunu casaajanaa cuaara tojtiaara nojori pueyaracaanu! iNojori cuaara timitiasaariajuhua! iSaa nojorijia cuaara na maaca jitiiaara pueyaracaanura!

¹⁴ Jiyacaritij, cuno cuatro saminio casaari nojori rihuaneriquiaa saniniuujia:

—iTaaquiriririni! iCuaara naa quiiratej!

Cuno veinticuatro niishijiaa jiyaniijianucuaari saniniuujia mojoquetacoqueecujua cuno pueyaracaanu Quijiaacuara, nojori na shuquiritianura.

6

Jiuniososano naajioneequa seis rupanacujutasano rupareetasacari

¹ Na nuhuaji, cua shootiasacari, Borrego Niquiojuaari coteenujanaa cuno naajionee-jinia rupanacutasano rupartaree. Naa miiriiri cua niqutishaanura taa mijiria quiniaa miishaanutaniya jyanohua naquiyani, quera nio jiya puequesacari. Jiyacaritij, janiyari tamonu cuno cuatro saminio casaajinijinio tojirii sequeyanoni: “iMiji!”. Na pocuanuuri juhua miacana majanu tojishano quiriquiaa. ² Naa na sequesacaritij, janiyari cohua-johuana caballo niquirii nocua canujyanoni. Na nijinia cajiniaari balista cacariquiaa. Jiyacaritij, jiyaniijiaari shipinishano nacaque cushitishaareeri. Na nuhuaji, na caballoori na netetaaree jiyocua na quianura, tii na miaquejonura Pueyaso paraa. Majaari quenaaja na nujuatasaanu quiniutianiya.

³ Na nuhuaji, Borrego Niquiojuaari segundo rupanacutasano rupartaree. Janiyari jiyacari segundo saminio casaajinijinio tojirii sequeyanoni: “iMiji!” ⁴ Naa na sequesacaritij, naatuhuaana caballoori nocua canujumaa. Na nijinia cajiniaari cumaaca niqutiosaare. Naacuajitij, nojuajaari mijiria quijiaa tojetenutaniya tama nojori miaquetojonurajaaja. Cunora, nojuajaari puereetunee nijiniaquetucujaja mueruu niqutiosaaree.

⁵ Na nuhuaji, Borrego Niquiojuaari tercero rupanacutasano rupartaree. Janiyari jiyacari tercero cuno saminio casaajinijinio tojirii sequeyanoni: “iMiji!” Jiyacaritij, janiyari

mueruhua caballo niquirii nocua canujiyanoni. Na nijinia cajiniaari niiquia shanacujutaja jaasutetariquiaa, mijiria quiniaara miajajau shanacujusaanura nojori serotasaanura. ⁶Jiyacaritij, janiyari cuno cuatro saminio casaa tajiniji rupaa tojirii naa sequeyanoni:

—Niquiriyatu juuca poonijionu sami, cuaara niquitiosaaria saaja niquiriyatu kilo trigo jajau. Jaara trigo jajau paniyaquiri, cuaara niquitiosaaria tres kilo cebada jajau. Saniniujuja, majaari shiyocua shanacujunu cutara, vinonio. Cunocujaari queraatia quiniutianiya cutara.

⁷ Na nuhuaji, Borrego Niquiojuuari cuarto rupanacutasano rupartaree. Jiyacaritij, janiyari cuarto saminio casaa tojirii naa sequeyanoni: “iMiji!” ⁸ Janiyari jiyacari tiirihuana caballo niquirii nocua canujiyanoni. Na nijinia cajinia sesaari quiriquiaa “Cusojuaana”. Macunucua Quiquioori na neteyotariquiaa, Cusojuaana puecoosano na rijionura na miitiasocoriquiano. Nojoriiri cumaaca niquitiosaaree jiyanoehua queraatia pueya na cusojuanura. Naacuajitij, jiyanoehua queraatia pueyari puecoosanutaniya miaquetoojosacari. Tamasacaari cusonuunutaniya jiyanoehua miaajesacari. Tamasacaari paaqueja cusonu cusonuutanutaniya. Naajuhuj, tamasaacari sareya sootesaanutaniya. Sacocua satejosaanutaniyajaariuhuj. Naacuajitij, jiyanoehua jiyanoehua queraatia pueyari cusojusaanutaniya. Na nuhuaji, puetunu macunucujanaa jaara serojosaare, puetunu nojorijianaari na cajiniocua quiniutianiya puetunu mijiria quijiaca pueya cajiniocujajiniujuanaa.

⁹ Na nuhuaji, Borrego Niquiojuuari quinto rupanacutasano rupartaree. Jiyacaritij, janiyari Pueyasooacara catijiasaqui juhuacutu cariquiaco niquirii Pueyaso pueya sohuanuhua, noo pojori canapuate puecoosaaquiaricuaajani Pueyaso Rupaa tojijiaca nojori quiniucua, Jesucristojiniji nojori pohuatanuucujuhuj. ¹⁰ Jiyacaritij, nojoriiri naa jiyanoehua nacaree:

—¡Jiyaniijiana! ¡Quiaari saa maninija! Quiaari quia sequesano miijia seetanujuanaa. ¿Taa quia tarishiniutianiyaajara canaa puecooanaa quia nequesoreenurani, nojori quia naminiuria canaacua saniniujuja?

¹¹ Jiyacaritij, puetunu nojorijianaari cohuaaque toqueya niquitiojosaaree. Nojoriiri naa sequesaree:

—Socua rupaquijia nia samaaterejaara, Pueyaso saquiriojosano niarta Pueyaso pueyajiniinjo cuaara puecoosaaria nia shiriajaatijia, taa nia puecoosaaquiaricuaani.

¹² Na nuhuaji, Borrego Niquiojuuari sexto rupanacutasano rupartaree. Jiyacaritij, rijiaari jiya jiuuquijiuutiaree jiyanoehua. Janiyari na niquiriquiaani. Pananuuri mueruucara quiquii juhua mueruque toque. Racaari naatuucara quiquii juhua nanaca. ¹³ Riyari jiya cajiniocuaaji toteree jiyocua, taa satuna totequiaa jiyanoehua paratucarcuaani. ¹⁴ Jiya cajiniocuaari shaajequiejuhuj, juhua tucaneae naajioneeri jiuniosaaaree. Shoniniacu caminiyajinia, puetunu jiya tucuaatiajajanaa, puetunu tuhuananuhujuhuj, puetunu cunojuanaari jiyajeetaquee na nujuatusaquiji. ¹⁵ Nojori puerenuta, mijiria jiyaniijianucuaari raacajinia jamaatiushii, sai tajinia tuhuananuhujajiniuhuj. Naa jamaatiushiijaariuhua noo pojori: pueyacia paaretajaca na cumaacatej, soldadoehua jiyaniijianucua, jiyanoehua casamiriaca pueya, pueya tojishano pueya, poonitijosano pueyajuhuj, puetunu narta pueyajanaano. Puetunu pueyajanaari naa mashiriquiaa juuca. ¹⁶ Nojoriiri tuhuananuhua sequeriquiaa, sainio:

—¡Canaacua nia tiyare canaa nia jamonura cunoocuaaji, na cajitujinia cajija na shacantuuca cumaacajiniani! ¡Canaa nia jamojore maja na niqiara canaa quiniuria, naajuhuj, maja Borrego Niquiojua saniitionura canaa, jiyanoehua na juashacari!

¹⁷ Quiarijiacujaari Pueyaso saniitionu juuca. Jiyanoehua puereeta. ¿Cante na naata na nujuatanuni? Shaaqui.

7

Pueyaso saquiriojosano pueyajiniji pohuatasano, Israel niqiuhuacuajinio supueno pueyajinijinio

¹ Naa cua niqiniuhuhujitij, janiyari socua cuatro Pueyaso seya niquirii nio jiya shocua nujuatiuyano tuhuaquini, pananu muetasamaji, na tiuquishocora, na muetasamaji na muenecara na miaquetajarano. Nojoriiri na nujuatusaquiji paratu tenujuriquiaa maja na piyaronura jiya, shoniniacu caminia, nacuhuanio. ² Jiyacarijuhuaj, janiyari socua tamonu Pueyaso seru niquirii jiya pajamaji niyanoni. Pueyaso naajio jiriataja casaa cacariquiaari. Nojuajaari narta cuatro Pueyaso seyacua nacaree jiyanoehua, noo pojoricua canapuate cumaacaraca quiriquiaacuajani nojori sesonura jiya, shoniniacu camini-
anio. Naa nojori sequesereeri:

³—¡Cuaara! ¡Maja juhuanajuaja jiya nia sesonu, shoniniacu caminia, nacuhuanio, canaa niojiyaquishacarijia Pueyaso sesa, na pueya jiniji, na niishishaanura nojoriiri Pueyaso pueya!

⁴Janiyari jiyacari tojiriini taa pueyate na jiniji jirioosaareeni. Puetunu supuetana Israel doce niquiohuacuajinio supueno pueyapuejinijinioori ciento cuarenta y cuatro mil pueya jirioosaaree. ⁵Naacuaajitij, supuetana Judá niquiohuacuajinio supueno pueyajinijinioni, doce mil pueyari jirioosaaree. Supuetana Rubén niquiohuacuajinio supueno pueyajinijinio, doce miljuhuaj. Supuetana Gad niquiohuacuajinio supueno pueyajinijinio, doce miljuhuaj. ⁶Supuetana Aser niquiohuacuajinio supueno pueyajinijinio, doce miljuhuaj. Supuetana Manasés niquiohuacuajinio supueno pueyajinijinio, doce miljuhuaj. ⁷Supuetana Simeón niquiohuacuajinio supueno pueyajinijinio, doce miljuhuaj. Supuetana Leví niquiohuacuajinio supueno pueyajinijinio, doce miljuhuaj. Supuetana Isacar niquiohuacuajinio supueno pueyajinijinio, doce miljuhuaj. ⁸Supuetana Zabulón niquiohuacuajinio supueno pueyajinijinio, doce miljuhuaj. Supuetana José niquiohuacuajinio supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiniji jirioosaaree.

Cohuajaque toqueya cushitishano pueya maanu

⁹Naa cua niquitishaanu nuhuajitij, janiyari jiyanoehua queraatia pueya niquirii maanoni juhua tereya. Nojoriiri puetunu nio tiquiyocua jiyacajinijiniojuanaa pueya quiriquiaa, puetunu tamaatiuucua pueyapuejinijiniojuanaano. Quiriquiaajaariuhua puetunu tamaatia rupaaca pocuajacajinijiniojuanaa, puetunu tiquiyocua tiacajinijiniojuanaano. Naa tojetaarucujanaa jiyanoehua queraatia nojori quiniuucuatej, majaari na naata serojosaanu quiriquiaa. Nojoriiri Pueyaso shacantuuca cajitii taceji nujuaturiquiaa, Borrego Niquiojuaja tacejino. Puetunu nojorijianaari tucuaqueya cohuajaque toqueyaraca quiriquiaa. Shuquiriaatia nojori quiniuucua, nojoriiri juhua teruhuanajaquera niquishano mueetacoriqiaa. ¹⁰Puetunu nojorijianaari naa mariyata sequeriquiaa na nacanuta:

—¡Jiyanoehua maniniaari pa Que Pueyaso, na shacantuuca cajitiiujinia cajiyani, Borrego Niquiojuajuhua. Nojoricuajaari pa jiyanoocuaari, tojetaarucujanaa quiariniora jatanishano pa quiniuria!

¹¹Naajuhua, puetunu Pueyaso seyajanaa, canapueete shacantuuca cajitii shocua nujuaturiquiaacuajani, niishijiaa jiyaniijianucua shocujuhua, cuno cuatro saminio casaa shocuanio, nojoriiri Pueyasocuaari jacamaturee nojori timitianura nojuaja. ¹²Pueyaso na timitiatuacari, naa sequeteeri:

—¡Taaquiriirinij, seetanujuanaacuaj! ¡Canaari pueyaracaanu quia maniniuhuaqueetanutaniyani! ¡Quiaacuajaari canaa timitiasano! ¡Saaja quiajaniyari seetanujuanaa niishijia cutara! ¡Paacarasho, canaa Pueyasonaa! ¡Quiaa cuaara tojishaaria pueyaracaanu! ¡Quiaari canaa Jiyaniijijajanaa pueyaracaanura! ¡Quiaari puetunu cumaacaracajanaa maninia quia jitianura quia shipinishano! ¡Cuaara naa quiiria pueyaracaanu, pueyaracaanutej!

¹³Jiyacaritij, tamonu cuno veinticuatro niishijiaa jiyaniijianucujinijinioori cua nequesotaree:

—¿Canapueete cuno pojorini, cohuajaque toqueyaracani? ¿Tejenote nojorini?

¹⁴Janiyari na riucaaree saajani:

—Quiaa cutara na niishiya, jiyaniijianaa.

Cua sequeteeri:

—Nojoricuajaari jiyajinijinio pueya. Jiyajinia nojori quishacarijia, nojoriiri cuno jiyanoehua naquiya miishacari rejeretajaca quiquiaari. Nojori tiuuniuucua Borrego Niquiojuaacua, nojoriiri puetunu sesa nojori miishanojiniji juhua nojori toqueya jeequejoquiaari Borrego Niquiojuaja nanacajinia. Naacuaajitij, nojoriiri cohuajaqueya toqueya cushiyonuya. ¹⁵Naa Pueyaso jiyanooshano pueya nojori quiniuucuatej, nojoriiri Pueyaso cajishaqui taceji quijiaa. Nojoriiri pueyaracaanu tii Pueyaso Secojoua tijinia miqiuiaa Pueyaso panishano, juuca, niucuanio, nojori timitiasacari nojuaja. Na shacantuuca cumaacajinia cajijiani, nojuajaari na cumaaca tetenutaniya nojori caco, jatiqui na quiniuria nojoritia pueyaracaanu. ¹⁶Naacuaajitij, majaari socua nojori miaajenu quiniutianiya, jiyamuenunio. Pananuuri maja socua nojori na catijianu quiniutianiya. Naajuhua, majaari socua nasaatia pananu jartanu nojori niishiniu quiniutianiya. ¹⁷Borrego Niquiojuacuajani, Jiyaniijijajanaa cajitii jiuujiajina cajijiani, nojuajanaari nojori jitianutaniya juhua tama na borregohuajaaja. Nojuajaari nojori rucuanejotanutaniya, nojori na raatenura pueya samiitianijia mohuaca pacartajajiniji, pueyaracaanu shuquiriaatia

quijiaca nojori quiniuria. Pueyasojuanaacuajaari nojori namijiaaca tujuunutaniya nojori namijiajiniji.

8

Séptimo rupanacutasanojiniji pahuatasano, shanhua jaanutaja patajajinijinio

¹ Borrego Niquiojua jaara séptimo rupanacutasano rupartaree, cuno naajionee saacata-nura puetunujuanaa, tojetaarucujanaa sanaacara quiquiri jiyocuacaanu pueyaracaanura. Maja cua niishiniu, media horaruhua. ² Na nuhuaji, Pueyaso tajoji, janiyari siete Pueyaso seya niquirii nujuatuyanoni. Nojoriiri jiyacari siete trompeta niquitiojosaaree. ³ Na nuhuaji, socua tamonu Pueyaso seruuri shanhua jaanutaja pataja pamaa, orojiniji shipinishano. Orojiniji shipinishano Pueyasoocuara catijiaja casaa tajoji nujuaseeri, Jijanjiajanaa cajituu tajoji. Queraatia shanhua jaanutaja niquitiosaareeri Pueyasoocuara na catijianura. Jaanutajaari catijiasaariquiano puetunu Pueyaso pueya secosonuu sanotajanaa, Pueyasoocuara na jaanujunura cuno catijiaja casaajiniji. ⁴ Naacuajitij, Pueyaso seruuri Pueyaso pueya secosojano tacanirii Pueyasoocuara, shanhua jaanujua najacata. ⁵ Na nuhuaji, cuno Pueyaso seruuri catijiaja casaajiniji na shanhua jaanutaja pataja mishinirii nishiyata. Jijanhua na majiriataree nio jiyacuaari. Miacanaari ritia nunujuquee. Jijanhua majacureeri. Jijanhua cojuatunereeri. Rijiaari jiuquiujuatiaree-juhuaj.

Trompetaa jonenejosacari

⁶ Cuno siete Pueyaso seya, trompetaa cacariquiaani, nojoriiri jeeacanecoree na trompetaa na jonenenura. ⁷ Jiyacaritij, niquiriyatu cuno Pueyaso serujinijioori na trompeta jonenenu coteeree. Jiyacaritij, miacanajaa shiniitujiaacaari, mariyata mani cocitishano nanacata jiyocua jartasaaree. Jiyari quera na cajiniocua cateree, puetunu na nacahuatajanaa, na jiyasocuatiano.

⁸ Segundo Pueyaso seruuri na trompeta joneneere. Jiyacaritij, casaa juhua puereetuua tuhananu noshiyanoori shoniniacu caminiajinia jataasaaree. Quera shoniniacu caminia cajiniocuaari nanacara quiquii. ⁹ Puetunu shoniniacu caminiajinia quijiaca casaajanaari, quera na cajiniocua cusunuree. Naajuhuj, shoniniacu caminiajinia ruhanetasano puereetuua buqueyajinijioori, quera puetunu na cajiniocujanaa sesosaaree.

¹⁰ Tercero Pueyaso seruuri na trompeta joneneere. Jiyacaritij, puereetuua rijiaari jiyocuacaanuji tiqii, jijanhua nishitiuucua juhua shucuenaja jaamasu noshitishano. Tiyareeri quera na cajiniocua nio jiyacua moocuajinia, mijiria cuariyajiniajuhuaj. ¹¹ Cuno rijia sesaari quiriqiaa "Piiqia". Cunora, tee cuno rijia tiyareeni, puetunu cuno mohuacajanaari piiqiara quiquii. Pueya ratusacari cuno mohuaca, queraatia pueyari saaja cusunuree.

¹² Cuarto Pueyaso seruuri na trompeta joneneere. Jiyacaritij, casaari pananuucua pitiaree, racaacia, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiquii. Quera na cajiniocuaari ninishiqui quiriqiaa. Cunora, pananuuri maja na cuhuatanu quiriqiaa quera juuca cajiniocua. Naajuhuj, riya, racanio, majaari na cuhuatanu quiriqiaa quera niucua cajiniocua-juhuaj.

¹³ Na nuhuaji, janiyari juhua puereetuua surohua miooru niquirii jiya cajiniocuani. Na jaasacari naa nacariquiaa jijanhuaari:

—¡Puereeta, puereeta, puereeta! Seetanujuanaa jijanhua puereeta quiniutianiyari jiyacua quijiaca pueyara, jiuujianaraca curecono Pueyaso seya jaara joneneere, canapuate joneneyaquiyajaa juhuanojacuajani.

9

Quinto trompeta jonesacari

¹ Na nuhuaji, quinto Pueyaso seruuri na trompeta joneneere. Jiyacaritij, janiyari jiyocuacaanuji jiyocua tinio rija niquiriini. Cuno rijiaari tiotuu riatataja niquitiosaaree, puequeetuujuu raa na riatanura. ² Na riatasacari, najacaari nojoma juhua puereetuua cuhuariquia sesacari. Pananu namijia tiomaari. Jiya cajiniocuaari mueruucara quiqui-juhuaj. ³ Sequeruuri cuno najacajiniji mueratuuma. Puetunu nio jiyacuajanaa paaque-maari. Sequeruuri cumaaca niquitiosaaree nojuaraca na quiniuria juhua turucuaniniu. ⁴ Sequeruuri rootasaaree maja nojori miaquenura jiyasocua, nacuhua jaamasujuhuaj, puetunu moritajaca jaamasunio. Sequeru cutaraari jiyaramiquishaare puetunu pueyapuejanaa na sojonura, canapuate na jiniji jirioyaquishoo quiriqiaa Pueyaso sesatacuajani. ⁵ Sequeruuri rootasaareejuhuaj, maja nojori cusojuanura pueya. Cinco raca cuaraa

nojori shocojoora cutara, pueyaracaanu sequeru saashi noosacari. Cuno sequeru saashiiri juhua turucuaniniu saashi noonutaniya.

⁶ Naa pueya miishacari naquiya na noonutatej, pueyari cusunu paniniutianiya juucua. Saaja cusoyaquiniutianiyari. Jiyanoehua na shaajenu panishacari juucua, nojoriiri saaja rishiniutianiya, jiyanoehua naquiya nojori miishacari.

⁷ Sequeruuri puereeta niquishano quiriquiaa juhua miaquetojonura jeenucuasano caballohua. Sequeruuri casaa jiitariquiaa na nacajinia juhua jiyaniijianucua ora-jiniiji shipinijosano nacaqueya. Nojori jiquiooori juhua pueyano jiquioo niquishano quiriquiaa. ⁸ Nojoriiri juhua maaji muecacaraca quiriquiaa, tucamuejarujuri. Juhua jurunu sare quiacaraca quiriquiaajaariuhuj. ⁹ Nojori jiriquiaqueeri cumueeca quiriquiaa juhua turtuco. Nojori jaacuatusacari, na nesuhuari jiyanoehua cojuatuneriquiaa juhua caballohua jayotasacari queraatia rucanejotaruhua, miaquetojonuucua na netecuatusacari. ¹⁰ Cuno sequeruuri juhua turucuaniniu nojuacaraca quiriquiaa. Jiyanoehua noonacuracajuhuj. Jaara nojori saare, cunoori quiquiaari nojori na noonura cinco raca. ¹¹ Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuuj raa camarujaariuhuj. Hebreo rupaajinia, na sesaari “Abadón”. Griego rupaajinia saniniuujia “Apolión”. Pueyano rupaajinia saniniuujia, nioori sequeya “Pueya Puecoona”.

¹² Janyari naa niqutishaareeni taa coteenujanaa naquiya miishaanu quiniutianiyani, cuno jiuujianaraca naquiya miishocoriquianojiniiji. Socua caapiquiiri cureyajaa na nuhuajiria.

Sexto trompeta jonesacari

¹³ Sexto Pueyaso seruuri na trompeta jonereee. Janyari jiyacari rupaa tojirii pocuaanoni, shanohua jaanutaja catijaja juhuacutu cuatro tuhuajaa tajiniiji, Pueyaso tacoji nujuatajani, orojiniiji shipinishanoni. ¹⁴ Cua tojishano rupaani, noo sexto Pueyaso seru sequereeri, na trompeta cacariquiaani:

—Cuno cuatro Sesaaca seya quia saacarajore, puereetuua Eufrates moo shuriucua morojosano quiyani.

¹⁵ Jiyacaritij, cuno cuatro Sesaaca seyari samaacarajosaaree jiyanoehua queraatia pueya nojori puecoonura, quera na cajiniocua puetunu mijiria quijiaa pueyajiniijiojuanaa. Cuno Sesaaca seyari tariucuaaanu naa morojosano quiquiaari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijia. ¹⁶ Janyari tojiriini cuno cuatro Sesaaca seya soldadohuari, dosciento millones pueya quiriquiaa saa caballohuaracaja.

¹⁷ Janyari cuno caballohua niqutishaaree juhua cua maquenujiniyani, na nijinia cajitiuniaanio. Jiyanoehua tamaatia niquishano quiriquiaari. Puetunu nojori jiriquia-cajanaari turtucojiniiji shipinijosano casaata mishiquiojosano quiriquiaa. Cuno, nojori naatiyaquishaanuucujaji nojori cushiyosano turtuconi, cunoori puereeta niquishano quiriquiaa; naatuuca juhua mani, nentuuca juhua jacinto saajia, pocojuaaque juhua azufrejuhuaj. Puetunu cuno caballohua nacacajanaari juhua juurunu sare nacaca niquishaariquiaa. Maniiri nojori rupaamaji rimianacuriquiaa. Najacaari nojonuucuariquiaajuhuj, azufrenio. ¹⁸ Cuno jiuujianaraca puereeta casaata quera na cajiniocua puetunu pueyajiniijiojuanaari cusojuasaaree. ¹⁹ Naacujitij, caballohuari cumaaca jiitariquiaa na rupaama, na pitujiniajuhuaj, nojori puecoonura pueya. Na pituucuaari juhua sacocua niquishano quiriquiaa. Juhua sacocua nacacaraca quiriquiaajaariuhuj pueya na sajitiajara.

²⁰ Cureeno pueya, canapuete maja na puecoosaanu quirii cuno jiuujianaraca puereeta casaatani, nojoriiri sesa miiniu tarinitiaaquiriquiaa saaja. Nojoriiri samaruhua seconu tarinitiaaquiriquiaa. Naajuhuj, nojoriiri orojiniiji shipinijosano casaa shuquiri-tariquiaa Pueyaso niti, platajiniiji shipinishano, broncejiniiji, saajajiniijijuhuj, macajini-jinio. Puetunu cunojuaanaa, nojori jiyatano tama na pueyasohuarajajani, cunoori maja na niquniu. Majaari na tojinu. Majaari na rucuanenujuhuaj. ²¹ Naajuhuj, majaari pueya tarinitianu quiriquiaa narta pueya monu, shimiojonujuhuj. Naajuhuj, majaari nojori tarinitianu quiriquiaa na camishoo maajipohua numuetucujunu, maajishuriu numuetucujunujuhuj. Nohuasejonu tarinitiatuayaquiriquiaajaariuhuj.

10

Pueyaso seru mueetasano tucanee naajioneeniyojuajiniiji pohuatasano

¹ Na nuhuaji, janyari socua tamonu jiyanoehua cumaacaraca Pueyaso seru niquirii jiyocuaanuji roseyanoni. Cohuaja najacajinia cuhuajaatiariquiaari. Na nacaacua camarucuteriquiaa naashiiri. Na jiquiooori jiyanoehua shacantuuca quiriquiaa juhua

pananu. Na cashacucuaari juhua mani niquishano quiriquiaa, naatej, taa mani nujuaa na noshishacaritij. ² Na miaquetajara mueetariquiaa shiitianiyojua naajioneeri, tariucua riatasano. Nio jiyacua nujuaseeri. Na miaquetajara na niohuaca niaree shoniniacu caminiaacu. Tacujua niaree nio jiyacua saniniuurijia. ³ Nocua na nujuasacari, jiyanoehua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu. ⁴ Cuno siete miacana pocuanu nuhuaji, janiyari na sequesano naajiotanu paniriquiaa tari juucuanu. Jiyacaritij, janiyari tamonu rupaa tojirii jiyocuaaanuji naa cua sequeyano saajani:

—¡Maja pueya niishitiniuno cuno siete miacana sequesano! ¡Maja na naajiotanu! Tama quioojiajiniaaja quia racatare.

⁵ Jiyacaritij, Pueyaso seru cua niquishano shoniniacu caminiaacu nujuaanoni, nio jiyacuajuhua, nojuajaari na miaquetajara na juaashiquia shiitioree jiyocuaaanu, seetanujuanaa na sequenura. ⁶ Naa sequereeri:

—Cuno, pueyaracaanu Quijiani, nojuajaari jiya cajiniocua shipininia, jiya shipininia, shoniniacu caminia shipinijuhua, puetunu tii quijiaca casaajanaa shipiniano. Nojuajaari seetanujuanaa naa cua pohuataniya: “Majaari tari na tarishiniu quiniutianiya. ⁷ Séptimo Pueyaso seru coteesacari jonenenu na trompeta, cuno juucaja, puetunu jiyasohuaja Pueyaso miini panishanojuanaari tari tohuatesano quiniutianiya. Naa quiniutianiyaari taa na pohuataquiara na sequenu panishano caminiujunua pueyacuajani”.

⁸ Cua tojishano rupaa jiyocuaaanuji pocuaanoni, socua cua pacuterohua naa sequenuuri:

—Pueyaso seruucua quia quiaare, cuno, shoniniacu caminiaacu nujuaanu, jiyacuanio. Nojuaja quia masetasee cuno riatasano naajioneeniyojua, na mueetaani.

⁹ Janiyari Pueyaso seruucua quiaareeni. Janiyari na seqeseeni na naajioneeniyojua na niqutionura janiya. Cua riucareeri:

—Jajaa, quia patare. Quia miaquerenoj. Shoqueeca quiniutianiya quia rupaamaari juhua samiyatu. Quia seecojinia jatanutaniya piiquiara saniniuurijia. Cunoori, pueya na saniitotaja rupaa na quiniucua.

¹⁰ Janiyari jiyacari cuno naajioneeniyojua pataree Pueyaso seru juaashiquiajinijini. Janiyari na miacquereeni. Seetanujuanaa shoqueeca quiriquiaari juhua samiyatu. Cua miacacari, cua seecojinia jatasee piiquiaraari. ¹¹ Jiyacaritij, janiyari naa sequesareeni:

—Quiocua Pueyaso sequesano caminiujiuriohua pohuatanu queraatia pueyapue niquiara, queraatia tamaatia jiyacajinia quiniaa niquiara, queraatia tamaatia rupaaca pocuajaca niquiarajuhua, queraatia jiyaniijianucua niquiaranio.

11

Caapiqui Pueyaso sequesano caminiujunua miishanojiniji pohuatasano

¹ Na nuhuaji, janiyari tia shanacujutaja naajua niqutiosaareeni, juhua nataca niquishano. Janiyari naa sequesareeni:

—Quiaritia cutara quia quiaare Jerusalén tiacajinia. Tii nujuataja Pueyaso Secojoua tia quia shanacujusee quia shanacujutajata, orojiniji shipinishano shanohua jaanutaja catijianio. Quia serojorejuhua puetunu Pueyaso secojonuujuacajanaa tii. ² Maja cutaraari quia shanacujunu Secojoua tia carijiniacuma. Cunocuaari taucuaa niqutiosaarucuaa tari. Pueyaso sojeaca taucuaari Pueyaso saquirojosano na tiacaran jitianutaniya pueyaracaanu, cuarenta y dos raza cuaara na shocojorejaatijia. ³ Janiyari caapiqui cua saquirojosano pueya jiyaronutaniyani, janiyajiniji nojori pohuatanura pueya niquiara. Nojoriiri janiyajiniji pohuatanutaniya cuaara shocojorejaatijia mil doscientos sesenta juca. Nojoriiri cocuaque toqueya cushiniutianiya taa pueya cushiyoquiaacuajani nojori taraajesacari.

⁴ Cuno caapiqui janiyajiniji pohuataanaani, nojoriiri cuno caapiqui olivo naana, tariucuaaanu Pueyaso Rupaajinia pohuatahiyacujani. Naajuhua, nojoriiri cuno caapiqui samari nujuatacojua, Jiyaniijajanaa tajoji nujuatacojua. Cuno, nojori Jiyaniijiani, nojuajaari jiya Jiyaniijajuhua. ⁵ Tamonu jaara sesa miini paniri cuno caapiqui pueya, nojoriiri na paraa catijanutaniya nojori rupaamaji mueranacujua manitia, nojori na puecoonura. Nojoriiri saaja naa cusojuanutaniya noo pojori, canapuate nojori miini pania sesa juucuaacuajani. ⁶ Nojori, janiyajiniji pohuataanaani, nojoriiri cumaaca jitianutaniya maja na nitiniuria maru pueyaracaanu mijiria nojori pohuatasacari Pueyaso rupaa. Naajuhua, nojoriiri cumaaca jitianutaniya mohuaca na jataniniuria nanacara. Nojoriiri cumaaca jitianutaniyajuhua nojori sesonura jiya puetunu puereeta tamaatia casaatajanaa. Nojoriiri pueyaracaanu naa mijionutaniya nojori panishacari. ⁷ Nojori jaara janiyajiniji pohuatanu tucutare, jiyacaritij, puequeetuuju raamaji tohuatariquiano

pueresano sacuaraatia Casaani, cunoori nojori paracaaniutianiya. Nojori shocotanutaniyari. Naacuajitij, nojori puecoonutaniya socuaari. ⁸ Nojori queteeri cuno puereetuuca niishishano tiaca nuucujinia pojoconutaniya, tee nojori Jiyaniijia mosaaquiiaari niyacutesanojinia teetesanoquajani. Cuno tiacaari miriqui jiyaniquishiya Sodomata, Egiptotanio. ⁹ Naacuajitij, jiuujianaraca juuca, socua niqiriyaatu juuca cajiniocuanio, queraatia tamaatiuucua pueyari nojori quete shootianutaniya. Naa nojori queteya shootianutaniyari queraatia tiqiyocua tiacajinijinio pueya, tamaatiuucua rupaaca pocuajaca pueyajuhaaj, queraatia tamonu jiyacajinijinio pueyanio. Nojori paraari maja na shanacunu quiniutianiya nojori jamojosaanura. ¹⁰ Puetunu mijiria quiniaajanaari shuquiritiuniutianiya, macunucua cuno caapiqui Pueyaso sequesano caminiujuniaa quishacari. Pueyari jiyanoehua timiquionutaniya, naquiya nojori miitiajaca puecoosaanucua. Naaratej, mijiria quijiaaari tama na casamijinijiaaja nareja niqitiojotoonutaniya nojori shuquiriniutia.

¹¹ Naajaa, jiuujianaraca juuca, socua tamonu juuca cajiniocua nuhuaji, Pueyasoori nojori samiitianiijorohua. ¡Nojoriiri na matusaqui saneecuatuohua! Puetunu nojori niqiniiaajanaari jiyanoehua shiriqituri. ¹² Jiyacaritij, cuno caapiqui Jesucristojinij pohuatanaari puereetuuca rupaa tojitiurii jiyocuaaanuji pocuaano. Naa nojori sequeriquiaari:

—¡Miji nia tacatama!

¡Jiyacaritij, nojoriiri na paraa niqiuara tacataquee cohujajinia jiyocuaaanura! ¹³ Na paraa shootiasacari nojori, jiyacaritij, rijiaari jiyanoehua jiuuquiuutiaree. Naa rijia jiuuquiuutiasacari, Jerusalén tiacajinia queraatia tiacaari niyarequetaquee. Siete mil pueyari tii cusuuree. Cureeno pueyari jiyanoehua jiuujiateree Pueyasoocuai. Nojoriiri jiyacari niishirii Jiyocuaaanu Quijiaari seetanujuanaa Pueyaso cutara.

¹⁴ Janiyari naa segundo naquiya miiniu niqitishaareejaaniuhuaaj, taa na nuhuaji na miishaanutaniyacujani. Tercero naquiya miishacariiri quera ritia cuno nuhuajjia quiniutianiya.

Séptimo trompeta jonesacari

¹⁵ Séptimo Pueyaso seruuri na trompeta jonerere. Jiyacaritij, puereetuuca rupaacaari jiyocuaaanu tojishaaree. Naa sequeturiquiaari:

—¡Quiarijiani, pa Jiyaniijia Pueyasoori tari jitianutaniya puetunu jiyacua jiyaniijianucua jitiiasanojuanaa! ¡Nojuajaari pa Jiyaniijia Cristota Jiyaniijianucujanaa quiniutianiya! ¡Nojoricuajaari pueyaracaanu Jiyaniijiajanaa quiriquiano!

¹⁶ Jiyacaritij, cuno veinticuatro niishijiaa jiyaniijianucua, shanohua cajitujinia cajituriquiaa Pueyaso tacojini, nojoriiri Pueyasoocuaa jacamaturee jiyanoehua na shuquiritanuta nojuaja. ¹⁷ Naa sequeteree Pueyasoori:

—¡Paacarasho canaa Jiyaniijianaa! ¡Quiaari puetunu cumaacaracajanaa! ¡Quiaari quijiajuhuanajaj! ¡Quiaari pueyaracaanu quijia! ¡Quiaari tari juhuacatecara quia cumaaca poonijioteree, Jiyaniijiajanaa quia quiniuria pueyaracaanu! ¹⁸ Cunora, puetunu jiyacua jiyaniijianucujanaaari juaaquiyoa. Naajaa, quiarijaari quia juaashacari cutara. Quiarijaari macunucua quia nequesoreenu jucajuhuaj. Saniniuuja, quiaari pueyara quia sequesano caminiujuniaa pueya niqitiojonutaniya nojoriirano quia riuriotaca, puetunu quia saquiriojosano pueyajanaajuhuaaj, puetunu quia timitiajaca pueyajanaano, jiyaniijianucua, narejaca pueyanio. Naajuhuaaj, quiaari jiya sesojuaca pueya shaajanutaniya.

¹⁹ Jiyacarijuhuaj, jiyocuaaanu Pueyaso Secojoua tiaari riataaaree. Janiyari Pueyaso Quishaquijianaa niqiriini. Tii matariquiaari Pueyaso caaja, seetanujuanaa na Rupaajanaa na racataja. Cuno na Rupaari na pueya na jyanootiaja, na tojyashijiaa na saniitotajajuhuaaj. Jiyacaritij, miacanaari nunujuree. ¡Jiyanoehua majacureeri! ¡Puereetatej, jiyanoehua cojuata! ¡Rijiaari jiyacari jiuuquiuutiaree! ¡Jiyanoehua queraatia miacanajaa shiniitujiaaari juhua maru toterejuhuaj! ¡Jiyanoehua puereetaari quiriquiaa!

12

Miriqui pohuatasano maajinjij, puereetuuca Naaquerujinijjuhuaj, juhua cohuaniquia niquishano

¹ Na nuhuaji, pueya jiuujiatenura, casaari jiya cajiniocua niquishaaree. Maajiiri quiriquiaa cuno, cua niquishanoni. Juhua toqueta pananujinia cuhuajaatiariquiaari. Racaacua nuuariquiaari. Doce riyari na nacaque quiriquiaa. ² Cuno maajiiri manajaraca quiriquiaa. Nooriquiaari. Cunora na sariyojotariquiaari quera na ranu panishacari. ³ Jiyacaritij, janiyari socua tamonu casaa niqitishaaree jiya cajiniocuan. ¡Puereetuuca Naaqueruuri quiriquiaa, naatuhuaa! Juhua cohuaniquia niquishano quiriquiaari.

Siete nacacaracari quiriquiaa, diez tuhujaaracanio. Jiyaniijianucuaara shipinijiosano nacaqueya niquitiacoriquiaari na siete nacacaacua. ⁴ Cuno naatuhuana Naaqueruuri quera na cajiniocua riyajinijinio nocuara rerecoree jiyocuacaanuji na pititua. Nio jiyocua na jacutareeri. Naaqueruuri rariquiano maaji taccoji shanacuriquiaa. ¡Na sashiriquiaari cuara raara, mueya na mianura jaara rasaare! ⁵ Maajiiri cayaniojua raree. Nojuaaari puetunu mijirja quijiaa pueyapuejanaa Jiyaniijijanaa quiriquiano. Nojuajaari pueyaracaanu na maca mueturiquiano, na tojijashijiaa na piyotajira. Mueyari na nucua jaariutiasaaree Naaqueruucuaaji. Pueyasoori na shuriucuaara na ririi, tii na cajitiniuria, Jiyaniijia quiriquianoni. ⁶ Maajiiri saniniuujia cariiquia jiyajinia mashirii, tee Pueyaso jeenucuaquiaari tari nocuaji na quijiaracuajani, tii na mianuutesaanurajuhua, cuara shocojorejaatijia mil dosciento sesenta juuca.

⁷ Na nuhuaji, janiyari Pueyaso seya jiyaniijia Miguel niquirii narta Pueyaso seyatani, cuno naatuhuana Naaquerujuhuaj puetunu na seyatajanaa. Puetunu nojorijianaari puereeta quiaquetooriquiaa jiyocuacaanu. Cuno Naaqueruuri na seyata jiyanhua quiaqueriquiaa Pueyaso seya juuca. ⁸ Naajaa, majaari nojori naata quiriquiaa Pueyaso seya shocotanu. Pueyaso seya paracaaniuucua jiyanhua nojori, majaari quiqiuo quiniu quiriquiaa socua nojoriria jiyocuacaanu. ⁹ Naacuajitij, cuno Naaqueruuri jiyocuacaanuji taanusaaree. Nojuacuajaari cuno tariucuaaanu Soconu, Eva sapojoquiaari. Cuno Sesaaca seque sesaari “Satanás”. Nojuajaari puetunu mijirja quiniaajanaa sapojoquiaa. Pueyaso seya shocotanuucua nojuaja, nojuajaari puetunu na seyatajanaa nio jiyacua quejooaaree.

¹⁰ Jiyacaritij, janiyari jiyocuacaanu quijiaa queraatia pueya rupaa tojiriini. Juhua niquiriyatu rupaari tojishaariquiaa jatiqiu nojori paaretasacari na rupaa. Naa seque-turiquiaari:

—¡Pueyasoori parta Pueyaso pueyacuara Saquirojotana jataree tari! Nojuajaari pueyacaanu Pueyaso saquirojotaja Pueyaso pueyacuara, juuca, niucuanio. Naa pa Paraca jatasaanuucuatej, Pueyasoori quiarjia tohuateenutaniya puetunu na sequesanojuanaa na jiyanooshano pueyara. ¡Nojuajaari maninia jiiitianutaniya pajaniya, jiyanhua na cumaacata! ¡Pa Jiyaniijia Cristoori tari jiyatesaaree Jiyaniijijanaa na quiniuria! Naa na miishaanuni, cunoori na Que saquirojosano na quiniuucua.

¹¹ ¡Pueyaso Borrego na quiniuucua, nojuajaari na nanaca shootequiaari, tojetaarucujanaa jiyanooshano pa quiniuria sesa pa miishanojiniji! Naacuajitij, Satanás saquirojotasacari parta Pueyaso pueyacuara, nojoriiri na sanaajaquiaari nojori tiuuiuucua Jesucristoocua. Nojoriiri na shocotaquiaariijanaa, nojori pohuatuaniucua Jesucristoocua nojori tiuuniujiniji. Nojoriiri maja na puereu quijia na mosaanura. Nojoriiri seetanujuanaa juhuajaniya tama na cuaqueyajaaja panitiaquiaari nojori mosaanura. ¹² ¡Naaratej, jiyocuacaanuna, shuquieyaa quia quiri! ¡Naa Sesaaca jatasaanuucuatej, nia timiquiore jiyocuacaanu quijiacanaa! ¡Niajaninya saniniuujia, jiyacua quijiacanaa, shoniniacu caminiajinia quijiacanio, jiyanhua nia taraajere! ¡Sesaaca niishishacari maja puera Pueyaso tarishiniu quiniutianiya na saniitionura nojuaja, nojuajaari niaacua roseyarucuaa jiyanhua na juaniutia!

¹³ Cuno puereeta niquishano Naaqueruuri niishishacari nojuaja tari jatasaaree jiyocua, nojuajaari cuno mueya nucua neteyojotanu coteere na mianura juuca. ¹⁴ Cuno maajiiri querajaa puereetuca nesu niquitiosaaree saaja, juhua jiyanhua puereetuca surohua miooru nesu. Cuno nesuta, maajiiri na quiqiuojiniana jaaree cariiquia jiyajinia, tu-cuacaanu cuno Naaqueruucuaaji. Tii mianuutesaanutaniya pueyaracaanuuri cuara na shocojorejaatijia jiuujianaraca marijia, socua seis racanio. ¹⁵ Jiyacaritij, Naaqueruuri mohuaca quecaree juhua moo, maaji nuhuaji na saquitiniuria, maaji na jaatinitianura juuca. ¹⁶ Jiyari maaji naacutaree. Jiyari juhua na rupaa riataree. Naaqueruuri rupaa-maji pojuaretaano moo raturee saajaari. ¹⁷ Naaqueruuri jiyamitia maajiicua macaarii jiyanhua. Quiaareeri maajiicujajinio supueno pueyata miaguetoojonura. Cuno por-joricuajaari Pueyaso rootasano tojtijajaca, canapete Jesucristoocua nojori tiuuni see-taashijiacacuajani.

¹⁸ Naaqueruuri shoniniacu caminia casaqueyaji nujuasee.

13

Caapiqui puereeta niquishano Casaajiniji pohuatasano

¹ Na nuhuaji, janiyari puereeta niquishano Casaa niquirii shoniniacu caminiajiniji tacaanoni. Siete nacacaraca quiriquiaari, diez nacajaaracanio. Puetunu na diez naca-jaacua jiiitariquiaa jiyaniijianucuaara shipinijiosano nacaqueyari. Puetunu na naca-caacuajanaa, sesacaari nocua naajiotasano quiriquiaa. Na nacacaacua naajiotasano

sesacani, cunoori Pueyaso rerequeteriquiaa, juhua Pueyaso shocotaja na quiniuucua. ² Janiyara, cuno cua niquishano puereeta niquishano Casaani, cunoori juhua marucatuque sare niquishano quiriquiaa. Na niohuacaari juhua oso niohuaca niquishano quiriquiaa, tucuaocua juaashococuaraca. Na rupaari juhua juurunu sare rupaa quiriquiaajuhua. Cuno tari cua pohuatasano naatuhuana juhua cohuaniquia niquishano Naaqueruuri na cumaaca na niquitooree. Tama na cajitiujiniaaja na cajitiriiri jiyaniijijanaa na quiniuria jiyacua. ³ Cuno puereeta niquishano Casaa siete nacacaracani, niquiriyatu na nacacajinjinioori pishano quiriquiaa na mosaanura juucua. ¡Cuno puereetua pia yashi na nacaacua quiriquiaani, saaja cushiriikiiri! Puetunu mijiria quiniaa pueyajanaari jiuujiateree na cushirishacariuhua. Cunora, puetunu nojorijianaari cuno puereeta Casaa tojjiiacara quirii. ⁴ Jiyacaritij, mijiria quiniaa pueyari cuno naatuhuana Naaqueruucuaa jacamateree juhua Pueyasoocua, cuno puereeta niquishano Casaa na jiyatenuucua nojori jiyaniijijanaa na quiniuria. Pueyari cuno siete nacacaraca puereeta niquishano Casaacuaa jacamaterejuhuaj. Nojoriiri naa sequetooree tamajaaja:

—Maja socua tamonu jiyaniijia quiniu juhua nio pa jiyaniijia. ¿Tamonu jiyaniijiateeri cumaacaraca, nata na miaquetoojonura? Shaaqui.

⁵ Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitiojeree sacuraatia na rimiaaquenura Pueyasoocua, Pueyaso na rerequetenurajuhua. Naa miiriiri na jyanishacari nojuajaari socua maninia quijia Pueyasojiniji. Naajaa, nojuajaari jiyaniijiaa jiyatesaaree saaja cuarenta y dos racara. ⁶ Naacuajitij, cuno puereeta niquishano Casaari Pueyaso rerequetenu coteeree. Pueyasoocuaa rimiaaqueereeri. Jesuucua tiuujiaa pueya sesacarejaariuhua, jiyocuacaanu Pueyaso quiquionio. ⁷ Mijiria quijiaa Pueyaso saquiriojosano pueya paracaatishaareejaariuhua. Cumaquishaareejaariuhua Pueyaso pueya na shocotanura. Cumaaca niquitiosaareejaariuhua jiyaniijijanaa na quiniuria, puetunu tamaatiuucua pueyapuejianaa na jiiitanura, puetunu tiquiyocua tiacajinjiniio pueyajanaa, puetunu tamaatia rupacaa pocuajaca pueyajuhua, puetunu tamonu jiyacajiniajanaa quijiacanio. ⁸ Naacuajitij, puetunu mijiria quijiaa pueyajanaari cuno puereeta niquishano Casaacuaa jacamateree na shuquiritianura nojuaja, nojori pueyaso na quiniuucua. Cuno pojoriiri maja Pueyaso saquiriojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jiiitasano naajioneejinia, cante pocuara mosaaquiaaricuaani. Pueyaso muerasu sesaca cutaraari cuno naajioneejinia naajiotasaquiaari jiya shipinishaacarijiyojua, pueyaracaanu rishijiaa pa quiniuria.

⁹ Cante numaaracani, nojuaja cuaara tojiiria nio: ¹⁰ “Cante Pueyaso jiyatesano quiasocoriquianoni, nojuajaari seetanujanaa quiasano pueyano quiniutianiya. Naajuhua, cante nijiniaquetucuaa mueruuta mosocoriquianoni, seetanujanaa naa mosaanutaniyari”. Naaratej, Pueyaso pueya cuaara puetunu casaajanaa rejeretajaca quiiria, seetanujanaa nojori tiushacari Pueyasoocua.

¹¹ Na nuhuaji, janiyari tamonu puereeta niquishano Casaa niquirii jiyajiniji mue-taanoni. Caapiqui nacajaraca quiriquiaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariquiaari. ¹² Jyanohua cumaacaraca quiriquiaari, juhua narta puereeta niquishano Casaa, teyano naca pishanotucuaa cushiriiriohuani. Nojuajaari na naca cushiriinohua narta puereeta niquishano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojuquetanijioree juhua Pueyasoocua, nojori timitianura na naca pishano cushiriinohua puereeta niquishano Casaa. ¹³ Naajuhua, nojuajaari na cumaacata miiri jiyajenete casaa pueya jiuujiatenura nocuaji. Jyanohua cumaacaraca na quiniuucua, pueya niquiara, nojuajaari mani tinirii jiyocuacaanuji jiyocua. ¹⁴ Naa na cumaacata na miiniuucua cuno na naca cushiriinohua puereeta niquishano Casaa tacobitij, puetunu mijiria quiniaa pueyajanaa sapojoreeri. Naacuajitij, nojuajaari pueya shipinitirii casaa. Juhua cuno siete nacacaraca puereeta niquishano Casaari quiriquiaa, teyanote na nacajinia mueruuta pishano na quishacari samitiarohua saajacuaani. ¹⁵ Jiyacaritij, nojuajaari cumaaca niquitiosaaree pueya shipinishano Casaa na jiyatenura saminiara, pocuajara na quiniuria, nocuara jacamatuyashijiaa na puecootenurajuhua. ¹⁶ Naajuhua, cuno caapiqui nacajaraca puereeta niquishano Casaari na pueya sequeree nojori naajiotanura puetunu pueyacuajanaa narta puereeta niquishano Casaa sesa. Naajiotasaareeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajiotasaareeri. Naacuajitij, puetunu mijiria quiniaa pueyacuajanaa naa naajiotasaareeri, tojiyaquishoo pueyacuajanaa, tojishano pueyacuajanaa, casamiriaca pueyacuajanaa, casamijiuniuucua pueyacuajanaa, tama nojoriria poonijionuuacajaja pueyacuajuhua, poonijiotasano pueyacuajanaa. ¹⁷ Jiyacaritij, canapete cuno puereeta niquishano Casaa sesa naajiotasano jiiitaaquiriquiaa na cuaqueyacuani, nojoriiri maja na naata na panishano masenu quiriquiaa na cumaneecata. Naa-

juhuaj, majaari nojori naata na casami niquitiojonu quiriquiaa na cumaneecara. Pueya jaara cuno puereeta niquishano Casaa sesa jittiaquiri naajiotasano na cuaqueyacia, na naata na sesa número jittianu nocua naajiotasano.

¹⁸ Nio niishishaanura maninia, jiyanohua niishitiaaari panishiya cutara. Niishijiaa pueya cuaara serojoora puereeta niquishano Casaa sesa número. Na númeroori pueyano sesa número. Cuno númeroori seiscento sesenta y seis. ¡Cunora pueyanaa, tama nia cuaqueyajaaja nia cojuare maja cuno puereeta niquishano Casaa sesa naajiotasaanura niaacuajuhuaaj!

14

Borrego Niquiojua cojiniaajiniji pohuatasano

¹ Na nuhuaji, janiyari Borrego Niquiojua niquiriini, Sión tuhananuucua nujuaanoo. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijianaa, na Que Pueyaso sesajuhuaaj. ² Na nuhuaji, janiyari casaa tojirii juhua sararojua cojuatuneyano jiyocuacaanujini, juhua miacana majacuyano, juhua queraatia pueya arpa taquinionuyanojuhuaj. ³ Cua tojishanoori quiarinio jaaquequejosano quiriquiaa. Jaaquequenuunaari Pueyaso cajitiu tacoji jaaquequenuuriquiaa, cuno cuatro saminio casaa tacojijuhuaaj, cuno veinticuatro niishijiaa jiyaniijianucua tacojinio. Majaari quenaaja tamonu naata quiriquiaa cuno jaaquequejosano niishiniu nojori jaaquequejonurajuhuaaj. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno pojoricuajaari mijiria quini-aajinijinio saquiriojosaaquiaari Pueyaso pueya nojori quiniuria. ⁴ Nojoriiri tojetaarucuaajanaa maaji numetuqueyashijiaa quiquiaari, saaja pocuaji Tacunaacua jiaatiajaca nojori quiniuucua. Naaratej, tiqiyocua Borrego Niquiojua rucuanajosacari, nojoriiri pueyaracaanu na cojiquiaa. Nojoriiri saquiriojosaaquiaari mijiria quiniaa pueyajinijinio, saaja Pueyasora nojori quiniuria, Borrego Niquiojuara nojori quiniuriajuhuaj. Nojoriiri socua Pueyaso timitiasano pueya puetunu Pueyaso saquiriojosano pueyajinijinojuanaa, taa pa shuquiritiaa shushajanaa pa carojosano pa nataujinijicuaani. ⁵ Nojoriiri tojetarucuaajanaa sapojonu niishiyashijiaa quiquiaari, tojetarucuaajanaa sesa miyashijiaa nojori quiniuucua.

Jiuujianaraca Pueyaso seya pohuatasano

⁶ Na nuhuaji, janiyari tamonu Pueyaso seru niquirii jiya cajiniocua jaanoni. Jaariquiaari mijiria quijiaa pueya niquiara na pohuatanura Pueyaso Rupaa, puetunu jiyacajinia quiniaa pueyarajanaa, puetunu tamaatiuucua pueyapuerajanaa, puetunu tamaatia rupaaca pocuajaca pueyarajanaajuhuaaj, puetunu tiqiyocua tiacajinia quijiaa pueyarajanaano. Na pohuatasanoori seetanu rupaajanaa pueyaracaanura. ⁷ Pueyaso seruuri mijiria quiniaa pueyacia nacariquiaa naatej:

—¡Pueyaso puerejaca nia quiriquia! ¡Nojuaja nia maniniuhuaqueetare! ¡Quiarijiaari na nequesoreesacari pueya! ¡Nocuara nia mojoquetacore nia shuquiritianura nojuaja! ¡Nojuacuajaari jiyocuacaanu shipinina, nio jiya, puereetuca shoniacu caminiajuhuaj, puetunu samocua nacaa pacartacojuacajanaano!

⁸ Jiyacaritij, tamonu Pueyaso seruuri narta Pueyaso seru nuhuajimiaajuhuaaj. Naa miriqui sequeriquiaa Roma tiacajinijiiri:

—¡Babilonia tiaca tari saniitioshiya! ¡Cuno puereetuca tiaca tari saniitioshiya! Babilonia tiacaari puetunu jiyacajinia pueyajanaa niishitiojua, sacuraatia nojori miiniuria juhua nojuajuhuaaj. Babilonia tiacani, nojuajaari puetunu sesa casaa na miijosanotajanaa juhua mashaasequetejoquiaari puetunu mijiria quijiacajanaa. Naacuajitij, puetunu pueyajanaari tama na cuaqueya miini panishanojuaaja miijiacara quiquiaari, jiyanohua nojori jiaatianuta sacuraatia casaa na miiniuria, taa Babilonia tiacajinia quiniaa miijioquiaacuaani.

⁹ Na nuhuaji, socua tamonu Pueyaso seruuri narta caapiqui na puetanaa Pueyaso seya nuhuajimiaajuhuaaj. Mijiria quiniaa pueyacia nacaree naari:

—¡Jiyanohua puereeta quiniutianiyari noo pojoriria, canapuate cuno puereeta niquishano na naca pishano cushiriinohua Casaacuara mojoquetacojua juhua Pueyasoocuarani! ¡Jiyanohua puereeta quiniutianiyari noo pojoririajuhuaj, canapuate juhua na naca cushiriinohua niquishano shipinishano Casaacuara jacamatujacani! ¡Naajuhuaaj, puereeta quiniutianiyari noo pojoriria, canapuate na cuaqueya tarinitiajacani, cuno puereeta niquishano Casaa sesa naajiotasaanura nojori jinijini, nojori juashiquiaacua soj! ¹⁰ ¡Pueyasoori puetunu cuno pueyajanaa saniitionutaniya jiyanohua na juaaniutia! ¡Majaari quenaaja Pueyaso jiuujiaaniu quiniutianiya nojori! ¡Pueyaso seya niquiara, Borrego Niquiojua niquiarajuhuaaj, nojoriiri pueyaracaanu naquiya

miishaanutaniya manitia, azufretanio! ¹¹ ¡Naa Pueyaso miitiasacari nojoritij, najacaari pueyaracaanu nojonutaniya! ¡Majaari quenaaja nojori samaraatasaanu quiniutianiya juuca, niucuanio! ¡Naquiya miiniuuri naa nojori miitianutaniya pueyaracaanu! ¡Naa miishaanutaniyari cuno pojori, canapuate na naca pishano cushiriiniohua puereeta niquishano Casaacuara jacamatujuuca juhua Pueyasooocarani, juhua nojuaja niquishano shipinishano Casaacuarajuhuj! ¡Naa miishaanutaniyajaariuhuj noo pojori, canapuate cuno puereeta niquishano Casaa sesa naajiotaniniutianiya tama nocuajajani!

¹² Cunora, Pueyaso saquiriojosano pueyani, canapuate na rootasano tojitiajacani, Jesuucua tiuuniu tarinitiaashijiacajuhuj, nojori cuaara juhujaniya rejeretaara naquiya nojori miishacari.

¹³ Jiyacaritij, janiyari rupaa tojiriri jiyocuacaanuji naa cua sequeyanoni:

—Nio quia naajiotare: “¡Quiarrijiani, jyanohua shuquiriaatia quijiaca cutaraari cuno macunucua, canapuate tariucua jiyaniijia Jesucristoocua tiuujiaa cusonuunutaniyani!” Pueyaso Sohanuuri naa sequeyajuhuj: “¡Taaquiriirini! Nojoriiri samaateya, pueyaracaanu na jiyaniijara na poonijionuunu nuhuaji. Maninia nojori miishanocujaari niyaje-taaquishaanutaniya. Cunora, nojoriiri maninia miishaanutaniya”.

Pueyaso seya senoosacari pueya juhua nataacuaca nio jiyajiniji

¹⁴ Na nuhuaji, janiyari cohuaja najaca niquiriini. Cuno cohuaja najaca caco cajiniaari juhua Pueyaso Niyanu niquishano quiriquiaa. Jiyaniijara shipinishano nacaque cushitiriquiaari, orojiniji shipinishano. Nataacuaca na senootajara shamaticuaja jacatunee mueruu mueturiquiaari. ¹⁵ Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajiyanoocua nacaree jyanohuari. Naa na sequereeri:

—¡Quia mueruuta quia canuujure, nataacuaca quia senoonura! ¡Jiyajinia nataacuacacujaari tari noshuriujua! ¡Cuaara quiarrijia senoosaaria!

¹⁶ Jiyacaritij, cohuaja najaca caco cajiyanoori na jacatunee mueruuta canuujuree jiya caco. Nataacuaca senooreeri. Cuno nataacuacaari Pueyaso pueyacujaja. Nojoriiri naa rijisaanutaniya jiyocuacaanu.

¹⁷ Jiyacaritij, socua tamonu Pueyaso seruuri tohuatamaa jiyocuacaanu Pueyaso Quishaquiji. Nojuajaari shamaticuaja jacatunee mueruu mueturiquiaajuhuj. ¹⁸ Na nuhuaji, socua tamonu Pueyaso seruuri tohuatamaa Pueyasooacara catijiaja casaajiniji. Nojuajaari mani camaru. Nojuajaari narta Pueyaso seruucua nacaree, shamaticuaja mueruu muetuyanoocua. Na sequereeri:

—¡Quia shamaticuaja mueruuta uva quia carojotare, jiyajinia moritiaconuni! ¡Tari noshuriujucujaja!

¹⁹ Jiyacaritij, Pueyaso seruuri uva carojotaree na mueruuta, puetunu nio jiyajinia cuhuariquiaajinijianaa. Uva jaapuejoree saajiajinia quejasano puereetuca surocohuamaari. Pueyasoori tii na rapijiotenutaniya jyanohua na juaaniutia. Cuno uvani, nojoriiri Pueyaso ruuretajaca pueyacujaja. ²⁰ Cuno uvaari rapijiosaree tucuaaanu naata tiacajiniji. Uva rapijiosaquiji, nanacaari tojetaarucujanaa jaateriquiaa juhua mohuaca. Jyanohua nanaca quiniucua, cabollohua rupaacuma puecariquiaari. Pueyaso tojiyashijiaa pueya nanacaari jyanohua tucuaaanu jaateree juhua moo. Tresciento kilometro jaatereeri.

15

Siete Pueyaso seya, siete naquiya miitiaja na mueetacosacari

¹ Na nuhuaji, janiyari jiya cajiniocua socua niquitishaareeni, cua niishiniuria taa mijiria quiniaa saniitiosaanu tucuatasantaniyani. Cua niquishanoori jyanohua puereeta quiriquiaa. Janiyari nocuaji jiuujiatereeni. Janiyari siete Pueyaso seya niquiriini. Siete Pueyaso naquiya miitiaja mueetacoriquiaari. Pueyaso jaara cuno siete casaata naquiya miitiri pueya, nojuajaari cunota na juaaniu tucuatanutaniya puetunujuanaa.

² Janiyari casaa niquiriijiaaniuhuj juhua puereetuca caminia motiiquiojiniji shipinishano. Manitia cojitishanoori quiriquiaa. Pueyari cuno caminia shocua nujuaturiquiaa. Nojoriiri noo pojori quiriquiaacujaja, canapuate na naca pishano cushiriiniohua Casaa shocotaquiaaricujajani, juhua nojuaja niquishano shipinishano Casaajuhuj. Naajuhuj, nojoriiri maja na shanacunu quiquiaari cuno Casaa sesa naajiotasaanura nojoriicua. Puetunu nojorijianaari Pueyaso niquitiojosano arpaa taquinionuuriquiaa. ³ Nojoriiri Pueyaso seru Moisés jaaquequejosano jaaquequenuuriquiaa, Borrego Niquiojua jaaquequejosanonio. Nojoriiri naa jaaquequenuuriquiaa:

—Jiyaniijianaa, puetunu quia miishanojuanaari jyanohua maninia, nocuaji jiuujiate-sano. ¡Quiaari seetanujuanaa puetunu cumaacaracajanaa! Casaa quia miishacari, quiaari

maninia na miiquiaa. Majaari quenaaja quia jiyajenenu. Quiaacuajaari puetunu jiyacajinia quijiaa pueya Jiyaniijijanaa. ⁴ ¡Quiaari pueresano, Jiyaniijijanaa! ¡Quiaari tojetaarucujajanaa maniniuhuaqueetasano seetanujanaa! ¡Saaja quiajaniya cutaraari tojetaarucujajanaa maninia miiija pueyaracaanu! Naaratej, puetunu jiyacajinijinio pueyajanaari quiocua nijionutaniya nojori shuquiritianura quiajaniya, maninia quia saniitiojonuucua quia paraajuhuaaj.

⁵ Naa cua tojinuu nuhuajitij, janiyari jiyocuacaanu Pueyaso Quishaquijijanaa niquiriri riateyanoni, tee cuniqui seetanu Pueyaso rupaajanaa racatasano quiyacuajani. ⁶ Cua niquishacari, cuno siete Pueyaso seyari Pueyaso Quishaquijijanaa tohuareetariquiaa, canapuete cuno siete naquiya miitijaja patootariquiaacuajani. Nojoriiri tojetaarucujajanaa cohujaja linojiniji toqueyaraca quiriquiaa, shacantuqueya. Nojoriiri orojiniji shipinijosano casaa na jiriquiacajinia camarucuteriquiaa. ⁷ Jiyacaritij, niquiriyatu cuno cuatro saminio casaajinijinooori miacojuua niqutiojoree puetunu cuno siete Pueyaso seyajanaa. Cuno miacojuuari orojiniji shipinijosano quiriquiaa. Pueyaracaanu rishijia Pueyaso juaaquiicata mishinijosano quiriquiaari. ⁸ Jiyacaritij, Pueyaso Quishaquijijanaa maatia najacata mishiquimimaa. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seya cuara puecaarajaatijia naquiya nojori miitijajaca pueya. Cuno najacaari Pueyaso shacantuca cumaacajiniji quiriquiaa, naa na saniitiosacari na paraa.

16

Saniitionujiniji pohuatasano

¹ Jiyacaritij, janiyari tamonu rupaa tojirii Pueyaso Quishaquiji nacaanoni. Naa cuno siete Pueyaso seya sequereeri:

—¡Nia siete miacojuajiniji Pueyaso juaaquiaca nia taroosee jiyocua!

² Niquiriyatu Pueyaso seruuri juhuacatecara coteeree. Quiaareeri. Na miacojuajiniji jaapuesee jiyocuaari. Jiyacaritij, jiyanohua nootuca sapueyari pueyaca supueree. Noo pueyaca supuereeri, canapuete nocua naajiotasano jiitariiquiaa na naca pishano cushiriinohua puereeta niquishano Casaa sesacuajani. Sapueyaraca pueyari cuno puereeta niquishano shipinishano Casaacuara jacamatujuaca quiriquiaajuhuaaj. Jiyanohua nootujuaca sapueyari quiriquiaa.

³ Segundo Pueyaso seruuri na miacojuajiniji Pueyaso juaaquiaca jaapuesee puereetuca shoniniacu caminiajinia. Mohuacaari puetunu nanacara quiquijijanaa, juhua shusha mosano pueyano nanaca. Cunora, puetunu shoniniacu caminiajinia quijia casaajanaari cusunueree.

⁴ Tercero Pueyaso seruuri miacojuajiniji Pueyaso juaaquiaca jaapuesee puetunu moocujinijajanaa, puetunu samocua nacaca pacartacojuacajinijajanaanio. Jiyacaritij, nanacara jataquee puetunujuanaari. ⁵ Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quijiajuhuanajaj. Majaari quia supuenu quiquiaari. Quiaari tojetaarucujajanaa maninia. Naa quia miitiasacari quia tojitiaashijacatej, quiaari seetanujanaa maninia namirii nojori. ⁶ Nojoricuajaari quia saquiriojosano pueyajinijinio nanaca shootejoquiiaari pueyaracaanu, quia sequesano caminiujunijiaa nanacanio. Quiarjia saniniuuja, naa miiijaca nojori quiniuucatej, quiaari nojori raatejoree nanaca. ¡Maniniacuaja Jiyaniijijanaa!

⁷ Jiyacaritij, janiyari Pueyasocuara catijiaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiriirini Jiyaniijijanaa, puetunu cumaacaracajanaa Pueyasonaa. Quiaacuajaari maninia saniitioeree quia tojiyashijiaa, taa quia sequequiaari tariucuacaanu nojoricuajani, quiaari quia tojiyashijiaa saniitionutaniya. Quiaari seetanujanaa sequequiaari quia miishocoriquiano. Quiaari puetunu sesa nojori miishanojuanaa miishijia.

⁸ Na nuhuaji, cuarto Pueyaso seruuri miacojuajiniji Pueyaso juaaquiaca jaapuesee pananuucua. Naacuajitij, pananuuri socua jiyanohua naseecara quiqui, pueya na catijianura juhua mani. ⁹ Naa pananu januucua jiyanohua nasaatiatej, pueyari jiyanohua cateree. Nojoriiri Pueyaso sesacaree saaja, cumaacaraca na quiniuucua, naa nojori na saniitionuucatej. Majaari quenaaja nojori pishiniu quirii sesa nojori miiniujiniji, nojori tacatonuhara noojia Pueyasocua, nojori jiyaniijijanaa nojori jiyatenura Pueyaso. Pueyaso rerequeteturee saajaari.

¹⁰ Na nuhuaji, quinto Pueyaso seruuri miacojuajiniji Pueyaso juaaquiaca jaapuesee. Na naca pishano cushiriinohua puereeta niquishano Casaa cajishaqui na jaapueseeri, tee cuniqui juhua jiyaniijijajanaa na cajiriquiaacuajani. ¡Jiyacaritij, puetunu na jiiitasano

jiyacajanaari ninishiquiria quiquii! Cunora, na pueyari na niti saaquioriquiaa jiyanoehua nooeta naquiya na miquiosacari. ¹¹ Naa Pueyaso saniitosacari nojoritij, naajaa, majaari nojori pishiniu quiriquiaa sesa nojori miiniujiniji. Nojori nootunenuucua, nojoriiri jiyocuaaanu quijia Pueyaso sesacaree saaja, nootujuaaca sapueyaraca nojori quiniuucujuhuaaj.

¹² Cuno nuhuaji, sexto Pueyaso seruuri miacojuajiniji Pueyaso juaaquiaca jaapuesee cuno puereetuca Eufrates moojinia. Moori joojequetaquee jiya pajamaji niriqiano jiyaniijianucua niutiatajara.

¹³ Jiyacarijiuhuaj, janiyari jiuujianaraca samaruhua niqiriini, juhua sacarohua niqishano. Cuno samaruhuari tohuareetariquiaa juhua cohuaniquia niquishano naatuhuaana Naaqueru rupaamaji. Tohuareetariquiaajaariuhua na naca pishano cushiriinohua puereeta niquishano Casaa rupaamaji, narta puereeta niquishano Casaa rupaamajinio. Cuno puereeta niquishano Casaa miijiria quiniaa pueya sapojoriquiaacuaaja, nojori tojinuria na naca pishano cushiriinohua puereeta niquishano Casaa. ¹⁴ Cuno jiuujianaraca samaruhuari cumaacaraca quiriquiaa, na cumaacata nojori miiniuria nocuaji jiuujiate-sano casaa, pueya tiuniuria nojori sequesanoocua. Nojoriiri naa miiriquiaatej, puetunu miijiria jiyaniijianucuaajanaa nojori rerejotenura. Jiyaniijianucuaari naa rerejotesaaree nojori miaquetojonura puetunu cumaacaracajanaa quijia Pueyasota. Pueyasocuaajari tariucuaaanu niishiriojoquiaari naa cuno juuca na miaquetojonura nojortia. Naa paniquiaaricuaajari na paraa na puecoonura.

¹⁵ Jiyacaritij, janiyari pa Jiyaniijajanaa tojirii naa sequeyanoni:

—Cua tojitiare cua pueyanaa. Janiyari canashiyaquiji tiuquiniutianihuani nia niishiyaquishacari. Jiyaniyari naa niaacua tiuquiniutianihuani taa nohuasejojua tiuquiquiaa casami nohuasenuucuaacuaani, juhuaajaniya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyaracaanu na secojosacari, na sashishacari janiya. Tojetaarucujanaa sesa miyaquijia nia quiri, niaa mariqui cua tiuquishacariuhua cararaatia juhua juhuasunucua quiri na niqiuaraari.

¹⁶ Cua Jiyaniijia sequesano cua tojinuu nuhuaji, janiyari cuno samaruhua niqiriini miijiria jiyaniijianucua rerejoteyanoni. Hebreo rupaaajinia, nojori rerejosaqui sesaari, “Armagedón”.

¹⁷ Séptimo Pueyaso seruuri miacojuajiniji Pueyaso juaaquiaca jaapuesee paratujinia. Jiyacaritij, jiyocuaaanu Pueyaso Quishaquijianaa Jiyaniijia cajitujiniji, janiyari rupaa tojirii naa nacaanoni:

—¡Tari miishaaree puetunujuaanaacuaaja!

¹⁸ Jiyacaritij, miacanaari nunujuree. ¡Jiyanoehua majacureeri! Cojuataari quiriquiaa puereeta. Rijiaari tojetaarucujanaa jiyanoehua jiuuquiujiutiaaree. Pueyano shipin-ishaanujiniji, majaari naa rijia jiuuquiujiutianu quijia juhua nio rijia. ¹⁹ ¡Naa rijia jiuuquiujiutianuucua jiyanoehuatej, cuno puereetuca tiacaari neequeresetaquee! Jiuujianaracara raqutiijiquiiri. Puetunu jiyacajinia tiacajanaari niyarequetaree. Jiyacaritij, Pueyasoori cuno puereetuca Babilonia tiaca saniitioree, taa tariucuaaanu na niishiriojoquiaari cuno juuca na saniitonuracujani. ¡Jiyanoehua na juaaniutia na saniitioreeri! Niya sequeshiya Babilonia tiacatani, cunoori Roma tiacacuaaja. ²⁰ Jiyacarijiuhuaj, puetunu shoniniacu caminiaajinia jiya tucuaatiajacajanaari shaajeequee, puetunu tuhuananuhua-janaano. ²¹ Naajuhuaaj, jiyocuaaanuji jiyanoehua puereetujuaaca miacanajaa shiniitujiaacaari totere pueyacua. ¡Noojiaqueyari jiyanoehua niiquia quiriquiaa; cuarenta kilo! Mi-jiria quiniaa pueyari Pueyaso sesacaree, naa nojoriicua na totinijianuucua shiniitujiaaca miacanajaatej.

17

Miriqui pohuatasano Roma tiacajiniji, juhua paanatu

¹ Na nuhuaji, cucua nimiaari niquiriyatu cuno siete Pueyaso seyajinijinio, canaputee siete miacojua patootariquiaacujani. Cua sequeeseeri:

—Miji quia nimia. Janiya quia niqitiniutianiyani taa Pueyaso saniitonutaniya cuno Paanatuni, puetunu jiyajinia mohuacaacujanaa cajiyani. ² Miijiria jiyaniijianucuaari cuno Maaji numuetucujuuca. Sacuaraatia cuno Paanatu niishitiojosanota, nojuajaari juhua mashaasequetejojua puetunu jiyacua quiniaa pueyajanaa. Naacuajitij, nojoriiri sacuaraatia miijiacara quiquiaari, juhua nojuajuhuaaj.

³ Pueyaso seru niqitiniuria janiya na niqitini panishano, nojuajaari cua sohuano jiyataare cariiquia jiyajinia. Janiyari ti niquishii Maajini, naatuhua puereeta niquishano Casaa nijinia cajiyano. Queraatia sesacaari cuno naatuhuaana Casaa cuaqueyacua

quiriquiaa, Pueyaso rerequeteja sesaca, juhua Pueyasora na jiyatesacari tama na cuaequeyajaaja. Siete nacacaracaari quiriquiaa, diez tuhuajaaracanio. ⁴ Cuno Maajiri shanohua toqueya cushiriquiaa, naatuque, shaaruquejuhuaj, juhua jiyaniijianucua cushishano. Queraatia shanohua maniniushitiaja casaa cushitariquiaari: orojiniji shipinijosano casaa, shanohua saijiniji shipinijosano tujiaujuhua, noturu shipinijosano saijiniji tiujiaunio. Orojiniji shipinishano miacojua mueetariquiaari. Mishaja quiriquiaari puetunu sacuaaraatia na miijosano casaatajanaa, numuetucujusaanu porocua na quiniucua. ⁵ Na sesaari miriqui naajiotasano quiriquiaa na jiniji. Naa naajiotasano quiriquiaari: “Janiyari puereetuca Babilonia tiacani. Janiyari paanaturjuri nucuani, puetunu mijiria sacuaaraatia miishanojuanaa coretanijiojua nucuanio”. ⁶ Maninia cua niquishacari, cuno Paanatuuri juhua mashaaseca quiriquiaa na puecootesano Pueyaso pueya nanacata. Nojuajaari jiyanojuaa timijia, Jesujiniji pohuatanaa puecoonu porocua na quiniucua.

Naa cua niquishacari nojuajatej, janiyari jiyanojuaa jiuujiatereeni. ⁷ Pueyaso seruuri jiyacari cua sequeree:

—¿Casaara quia jiuujiateya nocuajini? Quiarijia quia pohuatereera quia niquishanojiniji. Cuno puereeta niquishano Casaa, siete nacacaracani, diez nacajaaracanio, Maaji cajitiya na nijiniani, puetunu cunajuanaari miriqui. ⁸ Cuno puereeta Casaa quia niquishanoni, cunoori tariucuaaanujiniji quijia quiquiaari. Quiarijia saniniuujia, majaari tari na quiniu. Naajaa, quera tacanutaniuhua cuno puequeetuuj raamajiri, seetanujanaa puetunujuanaa na shaajasaanuhua cutara. Pueyaso ruuretajaca pueyari jiyanojuaa shiriqutiuniutianiya nojori jaara cuno puereeta niquishano Casaa niquiri tacatehuano, teyanote tariucuaaanu quijia quiquiaaricujani, quiarijia saniniuujia majaari na quiniu. Jia shipiniyaquishacarijia, cuno pueya sesacuaajaari Pueyaso saquiriojosano pueya sesaca naajiotasaku naajiotasoo quiquiaari.

⁹ Cante niishijiani, nojuaja cuara niishiiria cua pohuatasano. Cuno puereeta niquishano Casaa, na siete nacacani, cunoori siete jiyaca jiyaniijianucua, mariyata siete tuhuananuhua, teyanocua cuno Paanatu cajiyacuajani. ¹⁰ Cuno siete jiyaniijianucuaajinijinioni, cinco nojorijinijinioori tari shaajasaquiaari. Cuno caapiqui cureenojinijini, niquiriyatuuri jiyaniijia quia quiarijia. Tamonuuri supueyojua. Nojuaja jaara supuere, saaja rupaquijia rishiniutianiyari jiyaniijia na quishacari. ¹¹ Cuno puereeta niquishano Casaa, teyanote tariucuaaanu quijia quiquiaaricujani, nojuajaari cuno cinco shaajaso jiyaniijianucuaajinijinio quiquiaaricujaja. Majaari quiarijia na quiniu. Na nuhuaji supenutaniuhuari octavo jiyaniijia na quiniuria rupaquijia. Na nuhuaji shaajasaanutaniya cutaraari.

¹² Cuno diez nacajaa quia niquishanojanuhua, cunoori diez jiyaniijianucuaranocujaja. Nojoriiri cumaaca niquitosaanutaniya saaja niquiriyatu hora jiyaniijianucua nojori quiniuria cuno puereeta niquishano Casaata. ¹³ Cuno diez jiyaniijianucuaari mariyata niishiriojonutaniya nojori cumaquiniuria cuno puereeta niquishano Casaa puetunu nojori cumaacatajanaa, jiyaniijijanaa cuno puereeta niquishano Casaa quiniuria. ¹⁴ Nojoriiri Borrego Niquiojuata miaquetoojonutaniya. Borrego Niquiojuari nojori shocotanutaniya saaja, seetanujanaa jiyaniijijanaa na quiniucua. ¡Nojuajaari puetunu jiyaniijianucua-janaa Jiyaniijia! Nata quiniaa pueyari Pueyaso saquiriojosano pueya, Neyanu tojitiajatuahuaj.

¹⁵ Pueyaso seruuri socua cua sequeree:

—Quiaacuajaari cuno Paanatu niquiri puetunu mohuacaacujanaa cajiyano. Cuno mohuacaacuajaari queraatia tiaca, tamaatiucua pueyapue, tamaatia rupaaca pocujacajuahuaj, tamaatia jiyacajinia quijia pueyano. ¹⁶ Cuno puereeta niquishano Casaa quia niquishanoni, na diez nacajaanio, nojoriiri cuno Paanatu niquiniu paniaquiniutianiya tojetaarucujanaa. Na cartetunutaniyari. Tojetaarucujanaa juhuasu na tiujatunutaniyari. Nojoriiri cuno Paanatu miaquenutaniya. Na nuhuaji, na nuchua catijiatunutaniyari. ¹⁷ Pueyasojuanaacuajaari cuno Paanatu paraa niishitiniutianiya naa nojori miiniuria cuno Paanatutej, taa Pueyaso pania na miishaanuracuajani. Naajuhua, Pueyasoori cuno diez jiyaniijianucua niishiriojotenutaniya jatiqui. Naacuajitij, cuno jiyaniijianucuaari roojotoonutaniya nojori cuara cumaquijia cuno puereeta niquishano Casaa puetunu nojori cumaacatajanaa. Naacuajitij, Pueyaso panishanoori tohuateesaanutaniya taa na sequequiaaricujani. ¹⁸ Naajuhua, cuno Paanatu quia niquishanoni, nojuajaari cuno puereetuca Roma tiacacujaja, miriqui sequeshiya Babiloniatani. Nojuajaari puetunu mijiria jiyaniijianucuaajanaa tojitiquiaa nojuaja.

¹ Naa Pueyaso seru niqutiniyu nuhuaji janiyatej, janiyari socua tamonu Pueyaso seru niquirii jiyocuaaanuji roseyanoni. Jiyanhua cumaacaracaari quiriquiaa. Na shacantuuca cumaacaari jiya cuhuatariquiaa. ² Jiyocuaaanuji na rupaa paaretaree jiyanhuari. Seetanujuanaa miishocoriquiano na sequesano quiniuucua, nojuajaari juhua tariucua miishano na nacatariquiaa:

—¡Tari saniitiosaare Babilonia tiaca! ¡Juhua niyarequetasaareeri cuno puereetuuca tiaca! Samaruhua quiquiora jatanishaaree quiaririja saniniuurija. Naaquiya quiquiora quiniutianiyajaariuhua, puetunu pueya soosano pueresano jaacuatujuaca casaajanaa quiquioranio. ³ Puetunu jiyacajiniinjiojuanaa pueyari sapojonuusaaguiaari Babilonia tiacajiniinjio niishitiojosanota, juhuajaniya sacuaraatia miijiaa nojori quiniurijuhua, juhua mashaaseca. Naajuhua, jiyaca jiyaniijianucuaari Babilonia tiacajinia sacuaraatia miijiosano miijioquiaajuhua, cuno paanatu shiniujiuniuucua nojori. Babilonia tiacajinia quiniaa pueyari puetunu na panishano casamijanaa masejoquiaa puetunu jiyacajiniinjiana, saaja tama nojori cuaqueyajaaja nojori shuquiritiniuria. Naacuajitij, cumaneecara na casami niqutiojonuuuaca pueyari jiyanhua cumaneecaraca pueya.

⁴ Na nuhuaji, janiyari tamonu rupaa tojirii jiyocuaaanujini. Babilonia tiacajinia quiniaa Pueyaso pueya sequereeri:

—¡Cua muerasunaa, cuno tiacajiniji nia quiojore, niaa mariqui sesa miijiacara quiriohuari, cuno sesa miijiaa nia cojiniuucua! Nojorijiniji nia carajere, niaa mariqui puetunu nojoritajanaa cojritiasaare naquiya miiniuri. Nojoricujaari quera saniitioshiya. ⁵ Cuno tiacajinia sacuaraatia miishanoori puera jiyanhua caneyaree. Juhua tuhuanuuri maashiyaree jiyocuaaanura. Pueyasocujaari sacuaraatia nojori miijosano niishiya. Majaari socua tari na naata rejeretanu. ⁶ Babilonia cuara namishaaria taa naquiya na miijioquiaa tamascuaaani. ¡Nojuaja cuara saniitio caminiujiushaaria saniniuuja, sesa na miiniuucua tamasaca! Babiloniaari juhua pueya raatejoquiaari sacuaraatia na niishishano, sesa miijiaa nojori quiniuria juhua nojuajuhua. Cunora, nojuaja cuara puetunu Pueyaso juaaquiacaanaa raatesaaria, tama na suhuocojinijaja miishishanoni. ⁷ Naatej, taa tama na cuaqueyajaaja na shuquiritiquiaa sacuaraatia na miishacaricaaani, saniniuuja cuara naa jiyanhua miitiasaariajuhua. ¡Jiyanhua tama na cuaqueyajaaja timitaja na quiniuucujuhua, cuara saniitiosaaria! Nojuajaari tama sequequiaajaacujua: “Janiyari niya cajiya shuquiriaatiani, cumaacaraca maaji, pueya tojishano jiyaniija. Janiyari maja mashiquoni. Majaari quenaaja cua taraajenu quiniutianiya”. ⁸ Cunora, niquiriyatu juacajiniija, cuno Paanatuuri jiyanhua taraatia miitiasaanutaniya. Jiyacaritij, cusonuunuuri quiniutianiya, naquiya miiniu, miaajenujuhua. Jiyacari catijiatasaanutaniyaariuhua. Jiyanhua cumaacaraca Jiyaniija Pueyaso quiniuucua, nojuajaari naa saniitio nutaniya cuno Paanatu.

⁹ Mijiria jiyaniijianucuaari sacuaraatia miiniuria cojiquiaa cuno Paanatucaaja, tama nojori cuaqueyajaaja nojori shuquiritiniuria. Cunora, nojoriiri jiyanhua nujuquetunutaniya cuno Paanatu jaara saniitiosaare. Nojori niqushacari najaca tacaano jiya cajiniocua, Babilonia tiaca catesacari, nojoriiri nocua sapiyonuunutaniya. ¹⁰ Nojoriiri na puerenuta na shootianutaniya tucuaaanuji, nojori mariqui saniitiosaarejaariuhua. Nojoriiri jiyacari naa sequenutaniya Babilonia tiaca:

—¡Juhuej! ¡Quiaa taraatia miishiya tiaca maniniuniaa! ¡Quiaari jiyanhua cumaacaraca quijia juuca Babilonianaa! ¡Quiaari canashyaquiji saniitiosaare!

¹¹ Puetunu jiyacajinijanaa, cumaneecara na casami niqutiojanaa pueyari Babilonia tiacaacua nujuquetunutaniya. Nojoriiri jiyanhua taraatia quiniutianiya nojori niishishacari, nojoritiucua tee na casami niqutiojore na cumaneecarani. ¹² Tucuaaanuji Babilonia tiacajiniara nojori nitiasano casami quijiaari nio: oro, plata, jiyanhua panishano saijihua, noturu shipinijosano sainio. Nitiasaquiajaariuhua maniniuqui toqueya linojiniji, sedajiniji toqueya, shaaruque toqueyajuhua, juhua jiyaniija cushishano, naatuque toqueyano. Nitiasaquiajaariuhua puetunu tamaatia shanhua jaanujua juhuana raquiquia, elefante quiaajiniji shipinijosano casamijuhua, shanhua naanajiniji shipinijosano casaminio. Nitiasaquiajaariuhua broncejiniji shipinijosano casami, cumueeca casaajiniji shipinijosano casamijuhua, shanhua mármol saajajiniji shipinijosano casaminio. ¹³ Naajuhua, nio shanhua jaanujua casami: canela, muesa nunacuhua, catijiasocoriquiano shanhua jaanujua casaa, mirrajuhua, cuaqueyacua shuquijutiasano shanhua jaanujajano. Nitiasaquiajaariuhua jereca uva caaca, shiyocua, maninia cashojuajuhua, trigo jajaunio. Nitiasaquiajaariuhua casami niyotesano seya, borregohua, caballohua, caballohua jayotasocoriquiano shipinijosano casaano, cumaneecara niqutiojosocoriquiano pueyajuhua seya nojori quiniuria. ¹⁴ Jiyacaritij, Babilonia tiacaari naa sequesaanutaniya:

—¡Majaari socua quia mioonu quiniutianiya jiyanoehua quia maniniucuasano naana jajau, jiyanoehua quioojia jiaatiasano nocuani! ¡Puetunu quia timitiasano casaajanaari maja tari na quiniu quiniutianiya quiara, shanohua niquishano casami, jiyanoehua cumaneecata quia masesano casamino!

¹⁵ Puetunu cuno casami niqutiojonaa pueyajanaari jiyanoehua casamiriaca quiya Babilonia tiacajinia quiniaa masejonuucua nojori casami. Maja nojori saniitiosaanurajuhua, cuno pojoriiri tucuaaanuji na puerenuta nocua nujuquetunutaniya. Nojoriiri na sapuenuta naa na sohwarejotanutaniya:

¹⁶ —¡Juhuej! ¡Babiloniaari tiaca maniniu quijia juucua! Jiyanoehua shanohua niquis-hano quijiaari, taa casamiriaca maajicuaani, na cushishacari na maniniushitiaja casaa. Naa shanohua niquishiyari juhua maaji linojiniji cohuajaque toqueya cushitishano, shaaruque toqueya, naatuque toqueyano juhua jiyaniijia cushishano, orojiniji shipinishano casaata na maniniushishacarijuhuaj, noturu shipinijiosano saitiajuhuaj, shanohua niquishano saitianio. ¹⁷ ¡Jiyanoehua queraatia puetunu na jiiatiasano casamijianaari canashiyaquiji catijiasaaree juhua sohuanatu!

Puetunu pueyajanaa, canapuate shoniniacu caminiajinia poonijionaa na cumaneecaracujani, nojoriiri tucuaaanuji shootiariquiaa Babilonia tiaca catetasacari. Naa shootiaturiquiaajaariuhua casami jaqueroojuaca tamaquiiuca tiaca tacatajajiniaqueya, rucoonaa pueya, buquejinia poonijionaa pueyajuhua, nojori camarucuanio. Puetunu cuno pojorijianaari tucuaaanuji shootiariquiaa Babilonia tiaca catetasacari. ¹⁸ Nojori niquishacari najaca nujuanaa jiya cajiniocuara, nojoriiri naa sariyocuatree:

—¿Socua tamonu tiacateeri quiya juhua cuno Babilonia tiacajuhua? ¡Shaaquil!

¹⁹ Jiyanoehua nojori taraajenuta, nojoriiri jiyojua nanooree na nacaacua. Nojori nujuquenuta, nojoriiri naa sariyocuatree:

—¡Juhuej! ¡Babiloniaari tiaca maniniu quijia juucua! ¡Puetunu shoniniacu caminiajinia buque jiiatianaajanaari jiyanoehua casamiriaca quiya, jiyanoehua casamiriaca Babilonia quiniuuca! ¡Quiarjia saniniuuja, canashiyaquiji puetunujuanaari shaajasaaree!

²⁰ Jiyacaritij, Pueyaso seruuri naa nacaree:

—¡Nia shuquiriri, jiyocuacaanu quijiacanaa! ¡Babilonia saniitiosaanuucua nia tim-iqiuore, Pueyaso saquirojosano pueyanaa, jiyaniijia Jesu jiyaramiquishano pueyajuhua, Pueyaso sequesano caminiujunianio! ¡Pueyasocujaari niaacua namirii Babilonia!

²¹ Jiyacaritij, cumueeca Pueyaso seruuri jiyanoehua puereetuca saajia paree, juhua trigo jajau jacanojotaja saajia. Shoniniacu caminiajinia na jatasacari, naa sequereeri:

—¡Taa cua jatasano saajia shaajema shoniniacu caminia queronijiniacuani, quiaari naa shaajasaanutaniya canashiyaquijijuhua, Babilonia tiacanaa! ¡Majaari socua quia niquishaanu quiniutianiya! ²² ¡Quia nuucuaari tojetaarucujanaa sanaaca quiniutianiya! ¡Majaari arpa taquiniojonu tojishaanu quiniutianiya socua, turequenaco jone-nenuunujuhua, trompeta jonenenuunio! ¡Puetunu tamaatia poonijiosano niishijiaa juaashiquiaraca pueyajanaari shaajasaanutaniyajuhua! ¡Majaari quenaaja niquiriyatu cureenu quiniutianiya quia quishaqui! ¡Naajuhua, majaari socua riiquiniunio tojishaanu quiniutianiya! ²³ ¡Majaari quenaaja niquiriyatu samaritiu niquishaanu quiniutianiya noshiyano quia quishaqui! ¡Naajuhua, majaari camishacari queranacunuunu cojuatunenu tojishaanu quiniutianiya socua! ¡Quiaari naa saniitiosaaareequij, jiyanoehua cumaacaraca quia casami niqutiojonaa pueya quiniuuca puetunu jiyacajinijanaa! ¡Naajuhua, quiaari puetunu jiyacajinia quijia pueyajanaa shimiojona, sapojosano nojori quiniuria puetunu sacuaraatia casaa quia miijiosanotajanaa! ²⁴ ¡Quiarjia saniniuuja, quiocua tiutiashiyari pueyara Pueyaso sequesano caminiujuniaa puecoosaanu, Pueyaso saquirojosano pueya puecoosaanujuhua, puetunu jiyacajinijanaa pueya puecoosaanunio!

19

¹ Naa cua tojinu nuhuajitij, jiyaniari jiyocuacaanu tojirii queraatia rupaacani. Naa sequeturiquiaa jiyanoehuari:

—¡Jiyanoehua maninia pa Pueyaso! ¡Nojuaja pa shuquiritiare! ¡Nojuacuajaari pa Jiyanoojia! ¡Nojuajaari jiyanoehua shacantuuca, tojetaarucujanaa maninia miijia na quiniuuca! ¡Puetunu cumaacaracajaariuhua! ² ¡Maninia na niishiniuuca puetunu cuno Paanatu miishano sacuaraatijanaa, nojuajaari maninia na saniitioree! ¡Cuno Paanatuuri jiyacua quijia pueya sesoquiaari tojetaarucujanaa, sacuaraatia na miijiosano na niishitiojosanota! ¡Pueyasoori cunora na saniitioree! ¡Naajuhua, Babilonia puecoonuucua Pueyaso tojitajaca pueya, Pueyasoori na namirijijuhua!

³ Jiyocuacaanuji rupaaca cua tojishanoni, nojoriiri naa sequerohuacuahuaj:

—¡Jiyanoehua maninia pa Pueyaso! ¡Nojuaja pa timitiariquia pueyaracaanu! ¡Pueyaracaanu cuno Paanatu saniitiosacari, majaari na najaca turetano quiniutianiya quenaaja!

⁴ Cuno veinticuatro niishijiaa jiyaniijianucua, cuno cuatro saminio casaajuhuaaj, nojori-iri jiyacari jiyocuara jacamaturee Pueyasooacara. Nojoriiri naa timitiaree Pueyaso, cante na shacantuuca cumaacajinia cajiriquiaacuajani. Nojoriiri naa na sequeturiquiaa:

—¡Cuaara naa quiiriatej! ¡Pa Jiyaniijia cuaara timitiasaaria pueyaracaanu!

⁵ Jiyacaritij, tamonu rupaari tojishaaree Pueyaso cajishaquijijianaa. Naa sequeriquiaari:

—¡Pa Pueyaso nia timitiariquia, puetunu na tojtiajaca pueyanaa! ¡Nojuaja nia shuquiri-tiare, tojishano pueyanaa, nijaniyajuhuaaj, tojishoo pueyanaa!

Borrego Niquiojua camishocoriquiano maaji maniniushishacari

⁶ Jiyacaritij, janiyari queraatia pueya tojirii jiyanoehua nacaanoni, juhua puereetucua sararouja, juhua miacana majacunujuhuaaj. Puetunu nojorijianaari naa sequeriquiaa:

—¡Jiyanoehua maninia pa Jiyaniijia Pueyaso! ¡Nojuaja pa timitiariquia pueyaracaanu! ¡Nojuacuajaari Jiyaniijiajanaa! ¡Puetunu cumaacaracajanaajuhuaaj! ⁷ ¡Pa shuquiriri! ¡Pa timiri! ¡Quiarijiacuajaari Borrego Niquiojua caminiu juuca, pueyaracaanu na saquiriojosano pueya rupenura nojuaja! ¡Cunora, nojuaja pa timitiaree jiyanoehua! Necoranoori tari maniniushirii na caminiuria. ⁸ Maniniuqui lino toque cushitishaa-reeri, cohuajaque shacantuque. Necoranoni, nojoricuajaari puetunu nocua tiuujiaca pueyajanaa. Naajuhuaaj, cuno cohuajaque na toqueni, cunocuajaari puetunu maninia nojori miijiosanojuanaa.

⁹ Pueyaso seruuri jiyacari cua sequeree:

—Quia naajiotare nio: “Shuquiriaatia quijiaa cutaraari noo pojori, canapuate Borrego Niquiojua camishacari queranacujajiniara masusasoni”.

Naa cua sequeree socuari:

—Cua sequesasoni, cunoori seetanu Pueyaso rupaajanaa.

¹⁰ Jiyacaritij, janiyari Pueyaso seruucuara mojoquetareeni, juhua Pueyasooacara, nojuaja cua timitianura juucua. Cua sequere saajaari:

—¡Maja pueyanonaa! ¡Maja naa quia miiniu! Janiyari nareja Pueyaso seruni taa quiajanijacuuaani, juhua quia tapueyocucajuhuaaj, noo pojori canapuate pa Jiyaniijia Jesujiniji pohuatanu tarinitiaashijiacani. ¡Pueyasooacara quia mojoquetare cutara, quia timitianura nojuaja! Puetunu Jesujiniji pohuatasanojuanaani, cunoori Pueyaso Sohuanu niishitishano na pohuataanaa, janiya, nijaniyajuhuaaj.

Cohuajohuana caballo nijinia cajiniajiniji pohuatasano

¹¹ Na nuhuaj, janiyari jiyocuacaanu Pueyaso quiquio niquirii tariucua riatasoni. Janiyari tii niquirii cohuajohuana caballoni. Na nijinia cajiniaari caapiqui sesacaraca quiriquiaa. Nioori na sesaca: “Na sequesano mijia”, “Seetanu sequejajanaa”. Naari na sesaca. Tojetaarucujanaa maninia mijia na quiniucua, puetunu niishijajanaa-juhuaaj, nojuajaari seetanujanaa maninia saniitiojua sesa mijiaa. Naajuhuaaj, majaari najuhuaana na miaquetooujonu na paraata. ¹² Puetunu casaajanaa niquijia na quiniucua, na namijiaari juhua mani rimianacuyano niquishaariquiaa. Jiyaniijianucuarano ship-inijiosano nacaqueya pasacoriquiaa na nacaacuuaari. Cunoori seetanujanaa Jiyaniijia-janaa na quiniucua. Tamonu na sesaari naajiotasano quiriqiaajuhuaaj. Cuno sesaari tama na niishishanojuaja cutara. ¹³ Na toqueeri nanacatuque quiriquiaa. Nojuajaari tariucuaaanu nio sesaraca quijiacuaja, “Pueyaso Rupaa”. ¹⁴ Jiyocuacaanu nata quiniaa na soldadohuari na nuhuaji sacuriquiaa. Puetunu nojorijianaari cohuajohuanaca caballohua nijinia cajituriquiaa. Naajuhuaaj, nojoriiri linojiniji cohuajaquijiasano toque-yaraca quiriquiaa, jiyanoehua cohuajaqueya tojetaarucujanaa. ¹⁵ Nojori Jiyaniijiajanaa rupaamaji, nijiniaquetucua mueruuri puereeta mueranacuriquiaa. Cunoori puetunu mijiria jiyacajiniajanaa na tojtiaashijiaa na puetujutajara. Nojuajaari jiyacari nojori Jiyaniijiajanaa quiniutianiya, nojori na jitianura jiyanoehua na cumaacata. Puetunu cumaacaracajanaa Pueyaso juaaquiacata nojori saniitionutaniyari, naatej, taa uva rapi-joshiya na caaca shoonuracuuaani. ¹⁶ Na tucuaque toqueecua, na ruhuajacuucujuhuaaj, naa naajiotasanoori quiriquiaa: “Jiyaniijianucua Jiyaniijiajanaa”, “Camarucua Camarnu-juanaa”.

¹⁷ Na nuhuaj, janiyari tamonu Pueyaso seru niquirii pananuucua nujuaanoni. Nojuajaari puetunu jiya cajiniocua jaacuatujuaa casaajanaa jiquioonuuriquiaa jiyanoehua, teyano jaacuatujucate shu miojonuuacuajani. Naa cuno jaacuatujuaa casa sequeriquiaari:

—¡Miji, niya nia rerejosee! ¡Pueyasoori nia queranacutenutaniya! ¹⁸ ¡Nojuajaari queraatia shu nia mianuutenutaniya! ¡Cuno shuuri jiyaca jiyaniijianucua shu, soldadohua camarucua shu, jiyanohua cumueeca puereyaquijiaca shu, caballohua shu, na nijinia cajitiuniaa pueya shujihuaaj! ¡Camarucuaaju pueya shuuri quiniutianiyajuhuaaj, poonijjotesano pueya shu, tojishoo pueya shujihuaaj, tojishano pueya shunio!

¹⁹ Jiyacaritij, janiyari cuno puereeta niquishano Casaa niquiriini, mijiria jiyaca jiyaniijianucuanio, puetunu nojori soldadohuatajanaa. Puetunu nojorijianaari tariucua rerejonu quiriquiaa na miaquetoojonura cohuajohuana caballo nijinia cajiyanta, nata quiniaa na soldadohuatania. ²⁰ Cuno na naca pishano cushiriinohua puereeta niquishano Casaari jiyacari quiasaaree, narta puereeta niquishano Casaanio. Nojuajaari cumaacaraca quiriquiaacuaja mijiria quijiaca pueya na sapojonura na cumaacata na miishanota, nojori na tiuutiniuria na naca pishano cushiriinohua Casaacua. Naa na sapojonucua mijiria quijiaca pueyatej, nojoriiri nojori cuaqueya tarinitiaquiaari na naca pishano cushiriinohua Casaa sesa naajiotasaanura nojoriicua. Naajuhuaaj, nojoriiri juhua cuno puereeta niquishano shipinishano Casaacuara mojoquetacoja quiquiaari juhua Pueyasocuara. Jiyacaritij, cuno caapiqui puereeta niquishano Casaari azufreta noshiyano mani quiquiojinia quejoosaaree saminiucua. Nojoriiri tii pueyaracaanu naquiya miishaanutaniya. ²¹ Puetunu nojoritia quiniaajanaari saniniuujia puecoosaaree nijiniaquetucua mueruuta, teyanote cohuajohuana caballo nijinia cajiyano rupaamaji mueranacuriquiaacuajani. Puetunu jiya cajiniocua jaacuatujaca casaajanaari nojori shu tooquioree jiyanohua.

20

Mil marijara Satanás morosaanujiniji pahuatasano

¹ Na nuhuaji, janiyari tamonu Pueyaso seru niquirii jiyocuaanuji roseyanoni. Puequeetuaju raa riatataja patariquiaari, puereetiuyocua cumayocua shipinishano casaanio, Pueyaso Paraca na morotajara. ² Pueyaso seruuri cuno naatuhuaana Naaqueru juhua cohaniquia niquishano quiasee. Na morojoreeri mil marijara. Nojuacuajaari cuno tariucuaanuu Soconu, samaruhua jiyaniijajanaatuhuaaj. Na sesaari “Satanás”. ³ Maninia na morojonu nuhuaji, Pueyaso seruuri puequeetuaju raama na jartaree. Raa tiotiu mishiquiorohuari. Tiotiu rupanacureeri, maja na riataसानura. Sesaacari naa mishiquiosaareeqij mijiria quijiaca pueya na sapojyaquiniucuaaji cuaara na shocojorejaatijia mil marijia. Cuno mil marijia jaara na shocojore, rupaquijia cartesaanutaniuhuari na saniitiosaanuhuarajanaa cutara.

⁴ Janiyari jiyacari queraatia pueya niquirii jiyaniijia cajitiucuajinia cajitiuyanoni. Nojoriiri nequesoreenaara Pueyaso jiyatesano pueya quiriquiaa, mijiria quijiaca nojori jitianura. Janiyari noo pojori sohuanuhua niquiriijiaaniuhuaaj, canapete naca-reesaacquiaaricuaajani nojori pojojotanuucua pa Jiyaniijia Jesujiniji, Pueyaso rupaa tojitiajaca nojori quiniucuaajuhuaaj. Nojori cutaraari cuno na naca pishano cushiriinohua Casaacuara jacamatiyuaquiquiaari tojetaarucuaajanaa, juhua nojuaja niquishano shipinishano Casaacuarajuhuaaj. Naajuhuaaj, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. ¡Cua niquishacari, nojoriiri cua niquiara samiiticoquee, jiyaniijianucua nojori jiyatesaanura! Mil marijiaari nojori shocojoree, jiyaniijianucua nojori quishacari pa Jiyaniijia. ⁵ Saniniuujia, narta macunucuaari maja na samiitianijiosaanu quiriquiaa cuno mil marijia cuaara shocojorejaatijia. Nio macunucua samiitianijiosacari cua niquishanoni, cunoori coteenujananaa Pueyaso samiitianijiosacari pueya. ⁶ Shuquiriaatia quijiaca cutaraari noo pojori, canape Pueyaso samiitianijionutaniya coteenujanaacuajani. Nojoriiri jiyacari tojetaarucuaajanaa maninia quijiacara jatanishaanutaniya pueyaracaanu rishijia nojori quiniuria. Naacuajitij, Pueyaso ruuretajaca pueya jaara puetunu shaajasaarejanaa, jiyacari majaari Pueyaso pueya pacutenu quiniutianihua cusonu. Saniniuujia, nojoriiri pueyaracaanu shamaatia timitianutaniya Pueyaso, Cristonio. Naajuhuaaj, nojoriiri jiyaniijianucua quiniutianiya Cristota, mijiria quijiaca nojori jitianacari cuno mil marijia.

Sesaaca saniitiosacarijanaa cutara

⁷ Cuno mil marijia shocojonu nuhuaji, Satanásri tohuatesaanutaniuhua na nujuatesaquiji. ⁸ Nojuaja jaara tohuatesaare, quianutaniyari puetunu jiyacajinia quijiaca pueyajanaa na sapojonura, Gog pueya, Magog pueyanio. Nojori na sapojonuta, nojuajaari puetunu jiyaca jiyaniijianucuaajanaa rerejotenutaniya, puetunu nojori soldadohuatajanaa, nojori miaquetoojonura pa Jiyaniijia, puetunu na pueyatajanaanio. Nojori soldadohuari jiyanohua queraatia pueya quiniutianiya, juhua shoniniacua caminia shuruquico paajia jaaquia. Majaari na naata serojosaanu.

⁹ Cua niquishacari, tojetaarucujanaa jiyanoehua queraatia pueyari nijioriquiaa. Jiya pueturiquiaa puetunujuanaari, juhua tereya nojori quiniuucua. Nojoriiri Pueyaso panishano tiaca cosejoree, cuno tiaca shocua quijiaca Pueyaso pueyano. Jiyacaritij, maniiri jiyocuaaanuji tinishaare nojoriicua. Puetunu cuno pueyajanaari catijiasaaree tojetaarucujanaa. ¹⁰ Satanás, cante puetunu cuno pueyajanaa sapojoreecujani, nojuajaari caminiajinia jatasaaaree tee cuniqui mani noshiya azufretacujani. Tariucuaaanu tii jaqueroosaaquiaaricujajaari na naca pishano cushiriinohua Casaa, narta puereeta niquishano Casaanio. Cunocujajaari mijiria quijiaca pueya sapojoquiaaricujaja, na naca cushiriinohua Casaacuaara jacamatujaca nojori quiniuria. Nojoriiri tii miitiasaanutaniya tojetaarucujanaa pueyaracaanura, juuca, niucuanio.

Macunucua nequesoreesacari cohuaja cajituu tacoji

¹¹ Na nuhuaji, janiyari Jiyaniijajanaa cohuaja puereetuca cajituu niqiriini, tii cajiniano. Na niquiara, jiyari puetunu shaajequeejanaa, jiya cajiniucuanio. Majaari socua na niquishaanu quiriohua. ¹² Jiyacaritij, janiyari puetunu macunucujanaa niqiriini nujuatuyano cuno cohuaja cajituu tacojini; jiyaniijianucua, tojishoo quijiaca pueyano. Jiyacaritij, na cohuaja cajituijina cajiniaari na nequesoreetuneece riataquere, socua tamonu nequesoreetuneece. Cuno nequesoreetuneece naajiotasano quiyacuaajaari Pueyaso saquiriojosano pueya sesaca, pueyaracaanu rishijiaca nojori quiniuria. Puetunu cuno tariucuaaanu macunucujanaari nequesoreesaaree puetunu nojori miishanojinijijanaa, taa cuno nequesoreetuneece naajiotasaaquiaaricujani. ¹³ Cua niquiara, macunucua quiquiojina racatasano puetunu cusonuano sohanuhujanaari na cuaqueya ruputesaarohua, shoniniacu caminiajinia moquecono, jiyacua moquecononio. Puetunu nojorijianaari nequesoreesaaree taa miijica nojori quiquiaaricujani. ¹⁴ Na nuhuaji, Cusojuana, macunucua Quiquiojuhuj, nojoriiri mani noshiyano caminiajina jaqueroosaaree. Canapuete cuno mani noshiyano caminiajinia quejosocoriquiano pueyacujani, nojoriiri cusonuunu pacuteriquianocujaja. ¹⁵ Naacujitij, canapuete Pueyaso samiitianijiosocoriquianohua nequesoreetuneece naajiotasoo quiriqiaani, nojoriiri mani noshiyano caminiajina quejoosaaree pueyaracaanura.

21

Quiarinio jiya cajiniocujiniji pohuatasano, quiarinio jiyajinijinio

¹ Na nuhuaji, janiyari quiarinio jiya cajiniocua niqiriini, quiarinio jiyano. Co-teenujuanaa jiya cajiniocuaari tari shaajasano quiriquiaa, jiyano. Naajuhuj, majaari shoniniacu caminia quini quiriqiaa tari. ² Janiyari jiyacari quiarinio Jerusalén tiaca niqiriini Pueyaso Quishaquiji roseyanoni. Tojetaarucujanaa shanohua maniniushitshano quiriqiaari, juhua neyacarano camishocoriquiano niyacoo. ³ Naajuhuj, janiyari Jiyaniijajanaa cajituijini tojirii jyanohua nacanuni. Naa sequeriquiaari:

—¡Pueyaso Quiquioori pueya tajinia quiya tari! ¡Nojuajanaari nojoritia quiniutianiya! ¡Nojoriiri na pueya quiniutianiyajuhuj! ¡Nojuajaari nojori cojiniutianiya, nojori Jiyaniijajanaa na quiniuria, maninia na jitianura nojori! ⁴ ¡Nojuajaari puetunu nojori namijiaacajanaa tuujunutaniya! ¡Jiyacaritij, majaari pueya niishiniu quiniutianiya shaajenu, sapuenu, taraajenu, nootunenunio! ¡Puetunu cuno taraatia miiniucuaajaari tari shaajasano quiriquiaa!

⁵ Na nuhuaji, Jiyaniijajanaa cajituijina cajiniaari naa sequere:

—¡Cua tojiri! ¡Janiyari quiariniora miijia puetunu casaajanaani!

Cua sequerejaariuhuj:

—Cua sequesano quia naajiotare. Seetanujuanaari cua sequesano. Janiyacujajaari cua sequesano tohuateequiaa pueyaracaanuni.

⁶ Cua sequerohuariuhuj:

—Cua sequesano cua miishocoriquianoni, janiyari tari na tucuatere miiniuni. Janiyari quiijajuhuanani. Janiyari pueyaracaanu quiriqianojuhuj. Janiyari puetunu casaajanaa coretanijiani, na shaajajuhuj. Cante jiyamueyani, janiyari pueyaracaanu pacartaja samo nacajiniji na raatenutaniyani, na naatanuhua. Cuno samiitianija mohuacani, cunoori cua Sohanucujaja. Janiyari nareja na niqitioquiaani. Majaari na sami cua masenu quiquiaa na ratuna. ⁷ Cante puetunu casaajanaa rejeretaja quijiani, cua tojijia na quiniuucua, nojuajaari puetunu cua jitiananojuanaa jitianana quiniutianiya. Nera, janiyari na Pueyaso quiniutianiya. Nojuajaari quiyano quiniutianiyacujaja. ⁸ Sesa pueya saniniuujia, nojoriiri puetunu quejoosaariquianojuanaa azufreta noshiyano mani caminiajina. Naa quejoosaanutaniyari nio pojori: Pueyaso tojtiaashijiaca pueya, puerejaca nojori

quiniuucua, Pueyaso Rupaacua tiuyashijiaca, soosano pueya tama sesa nojori miiniuucuaaja seseno, pueya moojuaca, na camishoo maajipohua numuetucunujuaca, shimiacuri, shipinijosano casaacuara jacamatujuaca juhua Pueyasooacuara, puetunu cuaracashijionuujuaca pueyajanaanio. Puetunu cuno pojorijianaa jaara neqesoreesaare, nojoriiri puetunu taanuusaanutaniyajanaa Pueyaso shuriucuaji. Nojoriiri mani noshiyano caminiajinia quejooasaanutaniya, pueyaracaanu naquiya nojori miishaanura tii. Cucocuaajaari sequeshiya, “pueya pacutesacariuhua cusonu”.

Quiarinio Jerusalén tiacajiniji pohuatasano

⁹ Janiyacuajaari tari nia pohuataree cuno siete Pueyaso seyajinjini, canapueete siete miacocua patootanaa quiquiaaricujani, mishaja Pueyaso saniitotajata. Niquiriyatu nojorijinjiniioori cucua nimiaa. Nojuajaari cua seqesee:

—Miji. Quia niqutiriiria Borrego Niquiojua niqiorano. Nojuacuajaari pa Jiyaniijia pueya, na quiquojaariuhuj.

¹⁰ Jiyacaritij, nojuajaari cua sohanu jiyataaree jiyanhua puereetuca jiyaconaja tuhananuucua. Tiji cua niqutiriiria cuno puereetuca quiarinio Jerusalén tiacaari, Pueyaso shuriucuaji roseyano. Tojetaarucujanaa shanhua maniniushitishano quiquiaari. ¹¹ Nenecuariquiaari Pueyaso shacantuca cumaacata. Na nenecuanuuri juhua jiyanhua panishano saajia nenecuanu quiquiaa, juhua jaspe saajia. Maatia niquishiyari na tamajiria, juhua cohuaja motiquito. ¹² Cuno tiaca shocua matacaari jiyanhua puereetuca quiquiaa, jiyaconajahuaj. Tiaca shocua matacaari doce tiotiuhuaraca quiquiaa. Niquiriyatu Pueyaso seruuri puetunu cuno tiotiuujinjijianaa nujuaturiquiaa. Naajuhuj, supuetana Israel doce niqiohuacuajinio supueno doce pueyapue sesacaari puetunu cuno tiotiuhuacuajianaa naajiotasano quiquiaa. ¹³ Jiuujianaraca tiotiuhuari pananu muetasamajiria quiquiaa, cuno tiaca matacaacua. Socua jiuujianaraca tiotiuhuari quiquiaa pananu muetasamaji miaquetajara. Naajuhuj, socua jiuujianaraca tiotiuhuari pananu muetasamaji muenecara quiquiaa. Socua jiuujianaraca tiotiuhuari quiquiaa pananu tiuquishocora. ¹⁴ Cuno tiaca matacaari doce puereetujuaaca saicua nujuaturiquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiquiaa.

¹⁵ Cuno Pueyaso seru cuata pocooriquiaani, nojuajaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tiotiuhua, tiaca shocua matacanio. ¹⁶ Cuno tiacaari jiyanhua tucuhuana quiquiaa. Na cajiniocuaari mariyata juhua na tucuhuana quiquiaajuhuj. Maninia tiasano quiquiaari, maja mijajata. Pueyaso seru shanacujunu nuhuaji puetunu cuno tiacajanaa, mariyata dos mil dosciento kilómetro quiquiaari na tucuhuana, na jiyaconaja, na cajiniocuanio. ¹⁷ Na nuhuaji, tiaca mataca shanacujureejaariuhuj. Setenta y cinco metro jitiariquiaari. Pueyaso seru shanacujutaja tucuaneeeri mariyata juhua mijiria pueyano shanacujutaja quiquiaa. ¹⁸ Cuno tiaca matacaari puetunu jaspe saijinjijianaa shipinishano quiquiaa. Tiacaari saniniujia saaja orojiniji shipinishano quiquiaa, maja quenaaja tamonu casaata cojitishano. Naacuajitij, cuno oroori juhua cohuaja motiquito quiquiaa. Maatia niquishiyari na tamajiria. ¹⁹ Cuno mataca nujuataja doce sairi queraatia tamaatiujiaaca shanhua niquishano saitia maniniushitishano quiquiaa. Cuno mataca nujuataja doce saijinjiniioni, coteenu saajiaari jaspe saitia maniniushitishano quiquiaa. Jaspe sairi neeruca cojitishano pocojuanaqueta. Segundo saajiaari zafiro saitia maniniushitishano quiquiaa. Zafiro sairi nentujuaaca naata. Tercero saajiaari ágata saitia maniniushitishano quiquiaa. Ágata sairi tejatujuaaca neeruca. Cuarto saajiaari ónice saitia maniniushitishano quiquiaa. Ónice sairi pocojuanaque naatuca cojitishano. Sexto saajiaari naatuca cornalina saitia maniniushitishano quiquiaa. Séptimo saajiaari crisólito saitia maniniushitishano quiquiaa. Crisólito sairi tiijaaca. Octavo saajiaari berilo saitia maniniushitishano quiquiaa. Berilo sairi neerujuaaca juhua naashi. Noveno saajiaari topacio saitia maniniushitishano quiquiaa. Topacio sairi jiyanhua pocojuanaque. Décimo saajiaari crisoprasa saitia maniniushitishano quiquiaa. Crisoprasa sairi jiyanhua neerujuaaca. Undécimo saajiaari jacinto saitia maniniushitishano quiquiaa. Jacinto sairi jariya naata naatuca. Duodécimo saajiaari jiyanhua nentuca amatista saitia maniniushitishano quiquiaa. Puetunu cuno saijianaari jiyanhua shanhua sai, shacantujuaaca. ²¹ Tiaca shocua mataca doce tiotiuhuari noturu shipinijosano saijinjiji shipinijosano quiquiaa. Niquiriyatu tiotiuuri niquriyatu noturu saajajinjiji shipinishano quiquiaa. Naa shipinijosano quiquiaari puetunu cuno doce tiotiuhuajanaa. Tiaca nuucuacaari tojetaarucujanaa orojiniji shipinishano quiquiaa.

Jiyanohua maninia cuno oro quiniuucua, Pueyaso shacantuucaari na tohuariquiquiaa, juhua motiiquio cohuajaco na quiniuucua.

²² Cuno tiacajinia, majaari cua niqiniu quirii Pueyaso Quishaqui, tii pa rupuenura nojuaja. Cuniqii, majaari socua Pueyaso Secojoua tia panishaanu. Puetunu cumaacacajanaa Pueyasojuanaari tii quiyacuaja, Borrego Niquiojuajuhua. Puetunu cuno tiacajanaari nojori quishaquicuaja, pueyaracaanu nojori rupesano pa quiniuria. ²³ Cuno tiacaari maja na paniniu pananu na cuhuatariquiano, racajuhua. Pueyaso shacantuuca cumaacacuajaari na cuhuataa. Borrego Niquiojuacuajaari na cuhuatana. ²⁴ Puetunu jiyacajinia quijiaca pueyajanaari cuno tiaca caaniuji quijiaca quiniutianiya. Puetunu jiyaca jiyaniijianucujanaari socua nojori panishano casami patootanutaniya nojori cuhuatana tiacajiniara, Jiyaniijajanaa nojori niqutiosocoriquiano. ²⁵ Cuno tiaca tiotihuuari pueyaracaanu riataquesano quiniutianiya, juuca na quiniuucua pueyaracaanu. Cuniqii, majaari quenaaja niucua niishishaanu quiniutianiya. ²⁶ Jiyajinia quijiaca pueyari socua na panishano casami patootanutaniya cuno tiacajiniara. Cuno tiacaari jiyanohua nojori timitiasano quiniutianiya. ²⁷ Saniniuujia, maja cutaraari sesa casaa tiuquinishaanu quiniutianiya cuno tiacajinia. Naajuhua, majaari sesa miijiaca tiuquiniu quiniutianiya tii, sapojonuujacanio. Saaja noo pojori cutaraari tii tiuquitanutaniya canapue sesacate pueyaracaanu rishijiacarano Borrego Niquiojuua naajioneejinia naajiotasano quiyacuajani.

22

¹ Na nuhuaji, Pueyaso seruuri cua niquitirii pueya samiitianijiotaja moo, cohuajanacu tojearucujanaa. Nenecuariquiaari. Cuno mohuacaari Jiyaniijia Pueyaso cajitujini pacartariquiaa, tee Borrego Niquiojuua cajiyajaniuhua. ² Samiitianijia naanaari tiaca nuu jiuujiaaco nujuaturiquiaa, cuno moo shuriuquicojuhuaj, niqijiria, na taquijiriano. Cuno naanaari puetunu racarajanaa muetjuuca. Naacaujiti, puetunu marijarajanaa, doce caminiujiya muetunuuri. Na muecacaari maninia, puetunu jiyacajinia quijiaca pueyajanaa naarajotajara. ³ Cuniqii, majaari socua Pueyaso sesacasano casaa quiniu quiniutianiya. Naacaujiti, Pueyasojuanaa, Borrego Niquiojuajuhua, nojoricuajaari cuno tiacajinia quijiaca quiniutianiya, Jiyaniijajanaa cajitii quiniuucua tii. Nojori tojtiaja-caari nojori timitianutaniya pueyaracaanu tii. ⁴ Nojori Pueyaso jiquico shootiajaca quiniutianiya. Na sesaari nojori jini naajiotasano quiniutianiya. ⁵ Cuniqii, majaari niucua niishishaanu quiniutianiya. Tii quijiaca pueyari maja na paniniu quiniutianiya samaritiu, pananunio. Jiyaniijia Pueyasojuanaacuajaari nojori cuhuatanutaniya. Nojori jiyaniijianucua quiniutianijuhua, puetunu Pueyaso shipinishanojuanaa nojori jitianura pueyaracaanura.

Jesu Cristo quera tiuquihua

⁶ Na nuhuaji, Pueyaso seruuri cua sequeree:

—Cua niquitishano quiajanianiya, cua sequesanojuhuaj, puetunu cunojuanaari setanujuanaa. Puetunujuanaari tohuateeriquiano. Pueyasoori na Sohuanuta niishitiquiaa na sequesano caminiujiuniaa pueya, nojori pohuatanura pueya niqiuara na niishitiniu panishano. Naajuhua, nojuacuajaari quiarjia na seru jiyaroree, na tojtiajaca na niishitiniuria taa quiar naataja nojuaja tucuatanutaniya puetunu na sequesanojuanaa. ⁷ Pa Jiyaniijiacuajaari naa sequera: “Janiya quera tiuquihua niaacuani”. Shuquiriaatia quijiaca cutaraari noo pojori, canapue nio naajioneejinia Pueyasojiniji niishitishano tojijiacani.

⁸ Janiyajanaacuajaari nio cua naajiotasano niquiniani, na tojiniajuhuaj. Janiya Juanni. Naa cua niqiniu nuhuajiti, cua tojiniu nuhuajijuhua, janiyari Pueyaso seru pajama mojoquetareeni. Janiyari naa mojoquetaree nojuaja cua timitianura juucuan, juhua Pueyaso. ⁹ Nojuajaari cua sequequee saaja:

—¡Maja naa miiniu pueyanonaa! Janiyari Pueyaso serujuhuaj, juhua quiajanijuhua, juhua puetunu quiarta Pueyaso sequesano caminiujiuniaa pueyajuhua. Naajuhua, nio naajioneejinia naajiotasano tojijia pueyani, nojori cuarta Pueyaso seyajuhua. ¡Pueyasojuanaa quia timitiare cutara!

¹⁰ Cua sequereeariuhua:

—Pueyaso niishitishano nio naajioneejinia quia naajiotasanoni, cunoori maja saa quiaraja. Puetunu pueyajanaa cuara na niishiirianoj. Puetunu niya naajiotasanocua-jaari quera tohuateya. ¹¹ Naacaujiti, canapueete sesa na miiniu tarinitianu paniaquiyani, sacaraatia miijiojuacajuhua, cuara na tarinitiaaquiriiaqui. Saniniuujia, canapueete maninia miijiojuaca cutarani, saaja Pueyasora poonijionujuacajuhua, nojori cuara tarinitiaaquiria maninia nojori miiniuujuhua.

¹² Pa Jiyaniijiacuajaari naa pa sequeya:

—¡Taaquiririnij! ¡Quera tiuquihuanijia! Janiyari cua tojtiajaca cua niqutiojosoriquiano casaa tiuquitianutaniuhuanani. Janiyari puetunu nojorijianaa nareja niqutiojonutaniyani, maninia nojori miiniuucua quiria, nojori miishano jaara maninia quiri. ¹³ Pueyaso Rupaa cua quiniuucua, janiyari puetunu Pueyaso sequenu panishanojuanaa caminiujiuniani. Janiyari quijiajuhuanani. Majaari cua supenu quiquiaari. Janiyari puetunu casaajanaa coretanijiani, na shaajariquianojuhuaj.

¹⁴ 'Shuquiriaatia quijiaa cutaraari noo pojori, canapuate juhuacarijia nojori jiuujia jeequecanu Borrego Niquiojua nanacatani. Nojoriiri juhua cohuajaque toqueyaraca quiniutianiya cua niquiara. Naacuajitij, nojoriiri tiuquitianishaanutaniya Pueyaso quijia tiacajinia, nojori mioonura pueyaracaanu pueya rishitijia naanajiniji. ¹⁵ Saniniuujia, nio pojoriiri Pueyaso tiaca mataca tamajiria jateenutaniya: sacuaraatia casaa mijiaa, shimiacuri, na camishoo maajipohua numuetucunuujaca, narta pueya puecoojuaca, shipinijiosano casaacuara jacamatujuaca juhua Pueyasoocuara, cuaracashijionu porocua pueyano.

¹⁶ Janiyacuajaari cua seru jiyarorucuaa quiocuan, na niishitiniuria quiajaniya puetunu niya quia naajiotasanojuanaa, saniniuujia Pueyaso pueya maapue niquiara na caminiujiushaanura. Janiyacuajaari Jesuni, supuetana David niquihuacuajinio caneno pueyajinijinio supueno, Jiyaniijiajanaa cua quiniuria David niti. Naajuhuj, Pueyaso Niyanu cua quiniuucua, janiyari noo rijiani, joojeatej, taa janiyajiniji naajiotasano quiya tariucuaaanu Pueyaso Rupaajiniacuajani.

¹⁷ Pueyaso Sohuanuuri Borrego Niquiojua niqioranota naa sequetiuya: “¡Miji Jiyaniijiana!” Canapuate naa nio naajioneejinia naajiotasano tojiyani, nojori cuara naa sequeerajuhuj: “¡Miji!” Cante jiyamueyani, nojori cuara niiria, Pueyaso samitianiijiotaja mohuacajiniji nojori ratunura. Na ratunaa pueyari, maja na ratunu sami na cumaneeca mashiniquishaanu.

¹⁸ Cante nio naajioneejinia juhuacarijia Pueyaso niishitishano tojiriini, taa Pueyaso miiniutianiyan, janiyajanaari nia numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajioneejinia na pohuatasano naquiya na miitaja casaata. ¹⁹ Naajuhuj, cante nio naajioneejinia pohuatasano cuaracashitijiani, Pueyasoori cuno pueyano taanuunutaniya, maja na quijia tiacajinia na tiuquiniuria. Naacuajitij, majaari nojori mioonu quiniutianiya cuno tiacajinia naana jajau, pueyaracaanu rishijiaa nojori quiniuria, taa nio naajioneejinia na pohuatashiyacuajani.

²⁰ Cante nio sequeyacuajani, nojuajaari naa sequeya: “Taaquiririnij, quera tiuquihuanijia”.

Jaa, Jiyaniijia Jesunaa. ¡Naacuaaquinatejaj! ¡Ritia quia nimiohua canaacua!

²¹ Pa Jiyaniijia Jesu cuara puetunu niajanijajanaa cumaquiiria na Sohuanuta.